


Tupanaarü Ore i Tóru Cori ya Ngechuchu ya

Cristuchiga



New Testament in Ticuna (PE:tca:Ticuna)

Tupanaarü Ore i Tóru Cori ya Ngechuchu ya Cristuchiga New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
9d5dc22a-30be-5d26-85a9-76047f4c89e6

Contents

MATEU	1
MARCU	64
LÚCA	101
CUÁŮ	166
PURACŮGŮ	212
DUMACŮĀX	269
1 CORĪTIUCŮĀX	298
2 CORĪTIUCŮĀX	324
GÁRATAANECŮĀX	340
EPÉCHIUCŮĀX	350
PIRIPUCŮĀX	360
COROCHACŮĀX	367
1 TECHARÓNICACŮĀX	373
2 TECHARÓNICACŮĀX	378
1 TIMUTÉU	381
2 TIMUTÉU	389
TITU	394
FILEMŮŮ	398
EBRÉUGŮ	400
CHAŮTIÁGU	423
1 PEDRU	430
2 PEDRU	437
1 CUÁŮ	442
2 CUÁŮ	448
3 CUÁŮ	449
YUDA	450
APOCARÍCHIU	453

ORE I MEXÜ GA MATEU ÜMATÜXÜ

*Ngechuchu ya Cristu natanüwa ngóxü ga duüxügüchiga
(Lc 3.23-38)*

- 1 Ñaã nixĩ ga yema nuxcümáxügüxü ga duüxügü ga Ngechuchu ya Cristu natanüwa ngóxü. Rü yematanüwa rü Dabí nixĩ ga wüxi, rü Abráü nixĩ ga to.
 - 2 Rü Abráü rü Ichaánatü nixĩ.
Rü nüma ga Ichaá rü Acóbunatü nixĩ.
Rü nüma ga Acóbo rü Yudánatü rü naëneëgünatü nixĩ.
 - 3 Rü Yudá rü Fárenatü rü Záranatü nixĩ. Rü Támara iyixĩ ga norü mamá.
Rü nüma ga Fáre rü Eróŭnatü nixĩ.
Rü nüma ga Eróŭ rü Aráŭnatü nixĩ.
 - 4 Rü Aráŭ rü Aminadánatü nixĩ.
Rü nüma ga Aminadá rü Nachóŭnatü nixĩ.
Rü nüma ga Nachóŭ rü Charmóŭnatü nixĩ.
 - 5 Rü Charmóŭ rü Boónatü nixĩ, rü Raá iyixĩ ga naë.
Rü nüma ga Boó rü Obénatü nixĩ, rü nae rü Rux iyixĩ.
Rü nüma ga Obé rü Ichaxínatü nixĩ.
 - 6 Rü nüma ga Ichaxí rü ãëxgacü ga Dabínatü nixĩ.
Rü nüma ga ãëxgacü ga Dabí rü Charomóŭnatü nixĩ. Rü ngima ga Bechabé ga Uría namëxchirëx ixïcü iyixĩ ga naë ga Charomóŭ.
 - 7 Rü Charomóŭ rü Roboáŭnatü nixĩ.
Rü nüma ga Roboáŭ rü Abíanatü nixĩ.
Rü nüma ga Abía rü Achánatü nixĩ.
 - 8 Rü Achá rü Yochapánatü nixĩ.
Rü Yochapá rü Yoráŭnatü nixĩ.
Rü nüma ga Yoráŭ rü Uchíanatü nixĩ.
 - 9 Rü Uchía rü Yotáŭnatü nixĩ.
Rü Yotáŭ rü Acánatü nixĩ.
Rü nüma ga Acá rü Echequíanatü nixĩ.
- 10 Rü Echequía rü Manachénatü nixĩ.
Rü Manaché rü Amóŭnatü nixĩ.
Rü nüma ga Amóŭ rü Yochíanatü nixĩ.
- 11 Rü Yochía rü Yeconíanatü rü naëneëgünatü nixĩ. Rü yexguma nixĩ ga Babiróniãcŭŭax ga churaragü Yudíugüxü íyaxüxü rü Babiróniãñewa nagagüãxü.
- 12 Rü yexguma Babiróniãwa Yudíugüxü nagagüguwena, rü Yeconía nane ga Charatíe nabu. Rü nüma ga Charatíe rü Chorobabénatü nixĩ
- 13 Rü Chorobabé rü Abiúnatü nixĩ.
Rü Abiú rü Eriaquíŭnatü nixĩ.
Rü nüma ga Eriaquíŭ rü Achónatü nixĩ.
- 14 Rü Achó rü Chadóxnatü nixĩ.
Rü Chadóx rü Aquíŭnatü nixĩ.
Rü nüma ga Aquíu rü Eriúnatü nixĩ.
- 15 Rü Eriú rü Ereachánatü nixĩ.
Rü Ereachá rü Matáŭnatü nixĩ.
Rü nüma ga Matáŭ rü Acóbunatü nixĩ.
- 16 Rü Acóbu rü Yúchenatü nixĩ. Rü nüma ga Yúche rü María ngíte nixĩ. Rü ngima ga María rü Ngechuchu ya Cristu naë iyixĩ. Rü guma Ngechuchuxü nixĩ ga naxunetaxü ga Tupana.

17 Rû yemaãcû Abráŭwa inaxügü ga yema duŭxügü rû 14 nixĩ ñuxmata Dabíwa nangu. Rû yemawena to ga 14 inaxügü ga Dabíwa rû ñuxmata Babiróniãcŭãx ga churaragü Yudíugüxŭ íyauŭxguwa nangu. Rû yemawena to ga 14 inaxügü ga yexguma Yudíugüxŭ ínayauŭxguwena rû ñuxmata Cristu buxguwa nangu.

Ngechuchu ya Cristuarü buxchiga
(Lc 2.1-7)

18 Rû ñaãcû nixĩ ga yexguma nabuxgu ga Ngechuchu. Rû naë ga María rû marü Yúchemaã ixãtechaŭ. Natürü naxŭpa ga nügüna na nangugüxŭ rû marü Tupanaãe i Üünexŭärü ñnũãxŭ ixããcû.

19 Rû Yúche ga María ngítechaŭ ixĩcû rû wüxi ga mecü nixĩ. Rû yemacèx tama nanangoxëëchaŭ ga yema na naxããcŭxŭ ga María. Rû nagu narüxñü ga bexmamare ngĩxŭ na ínatáxŭ. 20 Rû yexguma yemagu ínaxñnyane, rû wüxi ga daxŭcŭãx ga Tupanaãrü orearü ngeruŭ, rû nanegüwa naxcèx nangox rû namaã nidexa. Rû ñanagürü nüxŭ: —Pa Yúche Pa Dabítanŭxŭx, ¡tãxŭ i ngĩxŭ cuxoxŭ i María na ngĩmaã cuxãmaxŭ! Erü Tupanaãe i Üünexŭ ngĩxna ñnũxŭgagu nixĩ i naxããcŭxŭ. 21 —Rû ngĩma tá ngĩxŭ nangëxma ya wüxi ya ngine, rû cuma rû tá Ngechuchugu cunaxüéga. Rû ngëma naega rû ‘maxëeruxŭ’ ñaxŭchiga nixĩ, erü nüma tá norü pecadugüwa ínananguxŭxëe i norü duŭxügü —ñanagürü. 22 Rû guxŭma ga yema orearü ngeruŭ nüxŭ ixuxŭ rû nangupetü na yanguxŭcèx ga Cori ga Tupanaãrü ore ga nuxcŭmaŭxŭ ga norü orearü uruŭwa nüxŭ yaxuxŭ ga ñaxŭ:

23 “Rû tá tauemacü ngĩxŭ inayarütaxu i ngëma nge i taguma yatŭxŭ cuèxcü. Rû tá nayatü. Rû Emanue tá nixĩ i naega. Rû ngëma naega rû ‘Tupana tatanüwa nangu’, ñaxŭchiga nixĩ”,

ñanagürü. 24 Rû yexguma pewa nabèiãchigu ga Yúche, rû nanaxü ga yema Tupanaãrü orearü ngeruŭ ga daxŭcŭãx namaã nüxŭ ixuxŭ. Rû Maríamaã naxãmèx. 25 Natürü taguma ngĩxñnexŭ nacuèx ñuxmata nabu ga guma ngĩne. Rû Ngechuchugu nanaxüéga.

2

Ngechuchuxŭ ínayadaugü ga yatügü ga nüxŭ cuèxŭchigüxŭ

1 Rû Ngechuchu rû Yudéaanewa yexmane ga ñãne ga Beréügu nabu ga yexguma Erode ãëxgacü ixĩxgu ga yema nachiŭãnewa. Rû yexguma nixĩ ga ñãne ga Yerucharéŭwa nangugüxŭ ga ñuxre ga yatügü ga nüxŭ cuèxŭchigüxŭ ga woramacuriwa ngúexŭ ga yaxŭwa ne íxŭ ga üèxcü ne ŭxŭwa. 2 Rû duŭxügüna nacagüe, rû ñanagürügü: —¿Ngextá nixĩ i nangëxmaxŭ ya yima Yudíugüarü ãëxgacü ya ngexwacèx bucü? Toma rû yéama tochiŭãnewa nüxŭ tadau ya norü woramacuri rû ngëmacèx núma taxĩ na nüxŭ tayarücuèxŭügüxŭcèx —ñanagürügü. 3 Rû yexguma yemachigaxŭ nacüexgu ga ãëxgacü ga Erode rû poraãcü naxoegaãe. Rû guxŭma ga duŭxügü ga Yerucharéŭcŭãxgü rû ta naxoegaãégü. 4 Rû yexguma ga ãëxgacü ga Erode rû naxcèx nangema ga guxŭma ga paigüarü ãëxgacügü rû ngúexëeruŭgü ga ore ga mugüwa nguxëetaegüxŭ. Rû nüxna naca, rû ñanagürü: —¿Ngexta nixĩ i nabuégaxŭ ya Cristu? —ñanagürü. 5 Rû nümagü nanangãxügü, rû ñanagürügü: —Nuã Yudéaanewa ngëxmane ya ñãne ya Beréügu tá nixĩ i nabuxŭ. Yerü nuxcŭmaŭcü ga Tupanaãrü orearü uruŭ rû nachiga nanaxumatü, rû ñanagürü ga yema ore:

6 “Rû Beréü ya ñãne ya Yudéaanewa ngëxmane, rû yima rû tama wüxi ya ngexnerüünemare ya ñãne nixĩ, erü nagu tá nabu i ngëma ãëxgacü i taxŭ i Cristu. Rû nüma tá nüxna nadau i guxŭma i Tupanaãrü duŭxügü i Yudíugü”,

ñanagürü. 7 Rû yexguma ga ãëxgacü ga Erode rû bexma naxcèx naca ga yema yatügü ga nüxŭ cuèxŭchigüxŭ ga yaxŭwa ne íxŭ. Rû nüxna naca ga tãxacü rû ngunexŭ na nangóxŭ ga noxri ga guma woramacuri. 8 Rû ñuxŭchi ga Erode rû Beréüwa nanamugü ga yema

yatügü. Rü ñanagürü nüxü: —¡Rü ngema pexĩ rü meã naxcèx peyadèux i ngẽma buxü. Rü ngẽxguma nüxü ipeyangauxgu rü chomaã nüxü pixu na choma rü ta ngema chaxüxcèx, na nüxü chayarücuèxüxcèx i ngẽma buxü! —ñanagürü. ⁹ Rü yexguma yema orexü naxĩnüëguwena, rü inaxĩachi ga yema yatügü. Rü guma woramacuri ga noxri nüxü nadaugücü rü napèxegu nixüchigü rü ñuxmata guma bucü ga Ngechuchu íyexmaxüetüwa nangu. Rü yéma nayachaxãchi. ¹⁰ Rü yexguma guma woramacurixü nadaugügu ga yema yatügü, rü poraãcü nataãëgü. ¹¹ Rü nagu nichocu ga guma ï ga nawa nayexmane, rü yexma nüxü nayangau ga guma bucü ngĩmaã ga naë ga María. Rü guma bucüpegu nacaxãpüxügü, rü nüxü nicuèxüügü. Rü ñuxüchi nayawãxna ga norü baúxacügü, rü õxchanana nanaxãmaregü ga uiru rü pumaragü ga yixichixü. ¹² Rü yemawena, ga yexguma napeeyane ga yema yatügü, rü nanegüwa Tupana nayaxucüxëgü na tama Erodecèx nawoeguxcèx. Rü yemacèx to ga namagu nachiuãnecèx nawoegu.

Equituanewa nabuxmü

¹³ Rü yexguma marü íyaxĩxguwena ga yema yatügü rü wüxi ga daxüçüãx ga Tupanaãrü orearü ngeruü, rü nanegüwa Yúchecèx nangox, rü ñanagürü nüxü: —¡Nabèixãchi rü írüda! ¡Rü ínaxüxü namaã ya yima bucü rü naë rü Equituanewa naxü! ¡Rü ngema pengẽxmagü ñuxmatáta choma cumaã nüxü chixu na ñuxgu tá cutaeguxü! Erü ãëxgacü i Erode rü yima bucücèx tá nadau na yamáãxüxcèx —ñanagürü nüxü. ¹⁴ Rü yexguma ga Yúche rü nabèixãchi rü ínarüda. Rü yexgumatama chütacü namaã inaxüãchi ga guma bucü ga Ngechuchu rü naë. Rü Equituanewa naxĩ. ¹⁵ Rü Equituanewa nayexmagü ñuxmata nayux ga ãëxgacü ga Erode. Rü yemaãcü nangupetü na yanguxcèx ga Tupanaãrü ore ga nuxcümaücü ga norü orearü uruü nüxü ixuxü ga ñaxü:

“Naxcèx changema ya Chaune rü Equituanena chanataeguxëë”,
ñaxü ga yema ore.

Erode nanamu na tüxü nadèixüxcèx ga buxegü

¹⁶ Rü yexguma ãëxgacü ga Erode nüxü cuèxgu ga to ga namagu na nawoeguxü ga yema yatügü ga nüxü cuèxüchigüxü ga yaxüwa ne íxü, rü poraãcü nanu. Rü Beréüwa nanamugü ga norü churaragü na guxü ga yema naãnewa tüxü nadèixüxcèx ga guxãma ga guxema buxegü ga iyatüxe ga yexwacèx buexe rü ñuxmata taxre ga taunecü tüxü yexmagüxewa nangu. Yerü yema yatügü ga yaxüwa ne íxü rü marü nüxü nixugügü rü taxre ga taunecü nixĩ ga noxri na nangóxü ga guma woramacuri. ¹⁷ Rü yemaãcü ningu ga ore ga nuxcümaüxü ga Tupanaãrü orearü uruü ga Yeremiã ümatüxü ga ñaxü:

¹⁸ “Rü Ramáwa nüxü taxĩnüë i wüxi i naga i poraãcü ngechaügaãcüma auxexü. Rü Raquera iyixĩ i ngĩxãcügücèx poraãcü auxcü. Rü taxuacüma ngĩxü tataãëxëëega, erü nayue i ngĩxãcügü”,

ñanagürü ga yema ore. ¹⁹ Natürü yexguma marü nayuxguwena ga ãëxgacü ga Erode, rü Equituanewa rü wüxi ga daxüçüãx ga Tupanaãrü orearü ngeruü rü nanegüwa Yúchecèx nangox. Rü ñanagürü nüxü: ²⁰ —Pa Yúchex, ¡írüda, rü pechiüãnecèx namaã pewoegu ya yima bucü ya Ngechuchu! Erü marü nayue i ngema duüxügü ya yima bucüxü imèxgüchaxüxü —ñanagürü. ²¹ Rü yexguma ga Yúche rü ínarüda rü nachiuãnecèx namaã nataegu ga guma bucü rü naë. ²² Natürü yexguma Yúche nüxü cuáchigagu na Aqueránu ãëxgacüxü ingucuchixü nanatü ga Erodechicüü ga Yudéaanewa, rü namuü ga Yúche ga yéma na naxüxü. Yerü wüxi ga daxüçüãx ga Tupanaãrü orearü ngeruü nanegüwa nanaxucüxë na tama yéma Yudéaanewa na naxüxcèx. Rü yemacèx Gariréaanewa naxü. ²³ Rü yexguma Gariréaanewa nangugügu, rü ñãne ga Nacharétuwa naxĩ, rü yexma naxãchiügü. Rü yemaãcü nangupetü na yanguxcèx ga yema ore ga nuxcümaügüxü ga Tupanaãrü orearü uruügü nüxü ixugüxü ga ñaxü:

“Ngechuchu ya Cristu rü Nacharétucüãxmaã tá nanaxugü”,
ñaxü.

3

Cuáŭ ga baiŭxēeruŭ nüxŭ nixu ga Tupanaärü ore ga dauxchitawa ga ngextá taxúema íxãpataxŭwa

(Mr 1.1-8; Lc 3.1-9, 15-17; Cu 1.19-28)

1-2 Rü yexguma Nacharétuwa nayexmagu ga Ngechuchu, rü Cuáŭ ga baiŭxēeruŭ inanaxügü ga Tupanaärü orexŭ na yaxuxŭ ga Yudéaanewa ga dauxchitawa ngextá taxúema íxãpataxŭwa. Rü duŭxügümaã nüxŭ nixu rü ñanagürü: —¡Nüxŭ perüxoe i pecüma i chixexŭ! Erü marü ningaica na perü ãëxgacü na yïxŭ ya Tupana —ñanagürü. 3 Rü guma Cuáŭ ga baiŭxēeruŭchiga nixŭ ga naxümatüaxŭ ga nuxcümaücü ga Tupanaärü orearü uruŭ ga Ichaxía ga yexguma ñaxgu:

“Rü dauxchitawa i ngextá taxúema íxãpataxŭwa tá nangëxma i wüxi i duŭxŭ i ngema tagaäcü ñaxŭ: ‘¡Pegü pemexëëx naxcëx ya Cori! ¡Rü naxcëx ipeyanawëxächixëëx i perü maxŭ!’ ”

ñaxŭ. 4 Rü naxchiru ga Cuáŭ rü cameyutëxanaxcëx nixŭ, rü norü goyexŭ rü naxchëxmünaxcëx nixŭ. Rü beruremaã rü munümaã naxãwemü. 5 Rü yéma Cuáŭxütawa inayarüxñüëgüxŭ ga duŭxügü ga Yerucharéüçüãx, rü duŭxügü ga guxŭ ga Yudéaanewa ne íxŭ, rü duŭxügü ga natü ga Yudáŭärü ngaicamagu ächiügüxŭ. 6 Rü guxema duŭxëgü ga nüxŭ ixugüexe ga tümaärü pecadugü, rü Cuáŭ rü tüxŭ ínabaiŭxëë ga natü ga Yudáŭwa. 7 Natürü yexguma Cuáŭ nüxŭ dëxgu ga naxütawa na nangugüxŭ ga muxüma ga äëxgacügü ga Parichéugü rü Chaduchéugü na ínabaiŭxëëäxüçëx, rü Cuáŭ ñanagürü nüxŭ: —Pa Äxtapearü Duŭxügüx, ¿rü texé pemaã nüxŭ tixu na naxchaxwa pibuxmüxüçëx i ngëma Tupanaärü poxcu i äücümaxŭ i marü ingaicaxŭ? 8 —¡Rü penaxwëxe na Tupana naxwëxexüäcüma pemaxëxŭ na ngëmaäcü guxüma i duŭxügü nüxŭ nadaugüxüçëx na aixcüma marü nüxŭ perüxoexŭ i ngëma pecüma i chixexŭ! 9 —Erü Tupanapëxewa rü taxuwama name na pegü pixuxŭ na Abráŭtanüxŭ i Yudíugü pixíngüxŭ erü tama ngëmacëx nixŭ ya Tupana i duŭxügüxŭ nayaxuxŭ. Rü pemaã nüxŭ chixu rü ngëxguma Tupana naxwëxegu, rü tama nüxŭ naguxcha na daa nutawa Abráŭtanüxŭ nanguxüxëëxŭ. 10 —Rü Tupanaärü yuema rü marü ímemare na nadaxüxüçëx i ngëma nanetügü i tama mexŭ. Rü guxüma i nanetügü i chixearü öðxŭ rü tá nadaxŭ, rü ñuxüchi tá ínagu —ñanagürü. 11 Rü ñanagürü ta ga Cuáŭ: —Choma rü aixcüma dexáwamare pexŭ íchabaiŭxëë na togü i duŭxügü nüxŭ cuaxüçëx na aixcüma marü nüxŭ perüxoexŭ i pecüma i chixexŭ. Natürü choweama tá ínangu i to i Tupanaärü orearü uruŭ. Rü nüma tá pexütawa nanamu i Tupanaäë i üünexŭ na naporaexëëäxŭ i ngëma Tupanawe rüxixŭ, rü nüma tá nanapoxcue i ngëma Tupanaxŭ oexŭ. Erü nüma rü poraäcü choxŭ narüyexera na äëxgacü yïxŭ. Rü choma rü napëxewa rü taxuwama chame rü bai i norü chatatuarü ngewaxüra chame. 12 —Rü nüma rü marü ínamemare na ñoma i naãnewa yadexechiäxüçëx i norü duŭxügü ñoma wüxi i yatü trigu naätüna idexechixürüŭ. Rü ngëmaäcü tá nayadexechi i ngëma noxrü ixíngüxŭ na naxütawa nangëxmagüxüçëx, natürü ngëma tama noxrü ixíngüxŭ rü tá ínangu nawa ya yima üxü ya taguma ixoxüne —ñanagürü ga Cuáŭ.

Ngechucharü baiechiga

(Mr 1.9-11; Lc 3.21-22)

13 Rü yexguma nixŭ ga Gariréaanewa ne naxüxŭ ga Ngechuchu. Rü Cuáŭxütawa nanguxŭ ga Yudáŭ ga natüwa, na Cuáŭ ínabaiexëëxüçëx. 14 Rü noxri rü tama Ngechuchuxŭ ínabaiexëëchaŭ ga Cuáŭ. Rü ñanagürü nüxŭ: —Choxŭ waxi nixŭ i namexŭ na ícubaixëëxŭ. ¿Rü ñuxäcü i cuma i chauxütawa cuxüxŭ na choma cuxŭ íchabaiexëëxüçëx? —ñanagürü. 15 Natürü ga Ngechuchu rü ñanagürü nüxŭ: —Name nixŭ i choxŭ ícubaixëë i ñuxmax. Erü name nixŭ i tanaxü i guxüma i ngëma Tupana tüxŭ muxŭ —ñanagürü. Rü yexguma ga Cuáŭ rü: —Ngŭ —ñanagürü. 16 Rü yexguma marü Cuáŭ Ngechuchuxŭ íbaixëëëguwena, rü dexáwa ínaxüächigu ga Ngechuchu. Rü yexgumatama niwãxna ga daxüguxŭ ga naãne,

rü Ngechuchu nüxü nadau ga Tupanaãe i Üünexü ga wüxi ga muxtucurüü na inagoxü rü nüxna na nanguxü. ¹⁷ Rü dauxüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü, rü poraäcü namaã chataãexüchicü —ñaxü.

4

Ngechuchuxü naxü ga Chataná (Mr 1.12-13; Lc 4.1-13)

¹ Rü yemawena rü Tupanaãe i Üünexü rü wüxi ga nachica ga ngextá taxúema íxãpataxüwa Ngechuchuxü naga na yéma Chataná nüxü üxüçèx. ² Rü taguma nachibü ga 40 ga ngunexü rü 40 ga chütaxü. Rü yemawena rü nataiya. ³ Rü yexguma ga ngoxo ga Chataná rü Ngechuchuxütawa nangu, na nüxü naxüçèx. Rü ñanagürü nüxü: —Ega aixcüma Tupana Nane quixigu, ¡rü daa nutagüxü namu na pãuxü nanguxüçèx! —ñanagürü ga Chataná. ⁴ Natürü Ngechuchu nanangãxü, rü ñanagürü: —Tupanaärü ore i ümatüxü rü ñanagürü:

“Tãütama pãüxica nanamaxëxëe i duüxügü, natürü guxüma i ore i Tupana nüxü ixuxü nixi i duüxügüxü maxëxëexü”,

ñanagürü. ⁵ Rü yexguma ga ngoxo ga Chataná rü guma ñane ga üüne ga Yerucharéüwa nanaga. Rü tupauca ga taxünetapëxegu nanamunagü. ⁶ Rü ñanagürü nüxü: —Ega aixcüma Tupana Nane quixigu, ¡rü nuã cugü rütáe! Erü Tupanaärü ore i ümatüxüwa rü ñanagürü:

“Tupana tá nanamu i norü orearü ngeruügü i daxüçüãx na cuxna nadaugüçèx. Rü naxmëxmaã tá cuxü niyauxgü na tama tacü rü nutagu cunguxüçèx”,

ñanagürü. ⁷ Rü Ngechuchu nanangãxü rü ñanagürü: —Rü Tupanaärü ore i ümatüxü rü ñanagürü ta:

“¡Tama name i nüxü na cuxüxü ya Cori ya curü Tupana!”

ñanagürü. ⁸ Rü yexguma wenaxärü ga ngoxo ga Chataná rü wüxi ga mëxpüne ga máxpüxüchinetapëxewa nanaga. Rü yéma Ngechuchuxü nanawëx ga guxüma ga nachüñanegü na ñuxäcü yamexëchixü. ⁹ Rü Chataná rü ñanagürü nüxü: —Choma chi cuxna chanaxã i guxüma i ñaã cuxü chawéxü i ngëxguma chi chopëxegu cucaxãpüxügu rü choxü quicuèxüügu —ñanagürü. ¹⁰ Rü yexguma ga Ngechuchu rü ñanagürü nüxü: —¡Choxna ixügachi, Pa Chataná! Erü Tupanaärü ore i ümatüxü rü ñanagürü:

“¡Nüxü icuèxüü ya Cori ya curü Tupana, rü yimaãxüxícatama napuracü!”

ñanagürü. ¹¹ Rü yexguma ga ngoxo ga Chataná rü Ngechuchuna nixügachi. Rü Ngechuchuxütawa nangugü ga daxüçüãx ga Tupanaärü orearü ngeruügü. Rü Ngechuchuxü narüngüxëegü rü nüxna nadaugü.

Ngechuchu rü inanaxügü ga norü puracü ga Gariréanewa (Mr 1.14-15; Lc 4.14-15)

¹² Rü yexguma Ngechuchu nüxü ñnügu ga na napoxcuxü ga Cuáü ga baiüxëëruü, rü Gariréanewa naxü. ¹³ Natürü tama ñane ga Nacharétugu narüxãüx, rü ñane ga Capernáüwa naxü na yexma yaxächüxüçèx. Rü guma ñane rü naxtaxa ga Gariréacutüwa nayexma ga Chaburãütanüxü rü Netarítanüxü ga duüxügü ixächüügüxüwa. ¹⁴ Rü yema nangupetü na yanguxüçèx ga ore ga nuxcümaüçü ga Tupanaärü orearü uruü ga Ichaxía ümatüxü ga ñaxü:

¹⁵⁻¹⁶ “Rü duüxügüçèx tá nangox i wüxi i ngóonexëëruü i Chaburãüärü naãnewa, rü Netaríarü naãnewa, rü Yudáüärü tocutüwa rü ngëma nama i taxtücutüwa nadaxüwa, rü Gariréanewa i ngextá duüxügü i tama Yudiügü ixügüxü ixächüügüxüwa. Rü ngëmaäcü i ngëma duüxügü ga noxri ëänexüwa yexmagüxü, rü tá nüxü nadaugü i wüxi i taxü i ngóonexëëruü. Rü ngëma duüxügü ga noxri yutüüwa yexmagüxü rü tá nüxü nabaxi i ngëma ngóonexëëruü”,

ñanagürü ga yema Ichaxíaarü ore. ¹⁷Rü yexgumaüccüü nixĩ ga inaxügüãxü ga Ngechuchu ga nüxü na yaxuchigaxü ga norü ore ga ñaxü: —¡Nüxü perüxoe i pecüma i chixexü! Erü marü ningaica na perü ãëxgacü na yüxü ya Tupana —ñaxü.

Ngechuchu rü naxcèx naca ga ägümücü ga püchaetanüxü
(Mr 1.16-20; Lc 5.1-11)

¹⁸Rü yexguma naxtaxa ga Gariréaanacügu yaxüxgu ga Ngechuchu, rü yéma nüxü nadau ga taxre ga yatü ga nügüeneëgü ixīgüxü. Rü wüxi rü Chimáü ga Pedrugu äëgaxü nixĩ. Rü to rü Aüdrégu äëgaxü nixĩ. Rü nümagü rü ínapüchaegü, yerü woetama püchaetanüxü nixīgü. ¹⁹Rü yexguma ga Ngechuchu rü ñanagürü nüxü: —¡Chowe perüxü! Rü chorü puracüwa tá pexü chamugü na chauxütawa penagagüxüçèx i duüxügü —ñanagürü. ²⁰Rü yexgumatama ga yema taxre, rü yéma nanatèxgü ga norü püchagü. Rü Ngechuchuwe narüxĩ. ²¹Rü yéamaxüra naxü ga Ngechuchu, rü yéma nüxü nadau ga to ga taxre ga nügüeneëgü. Rü Acobu nixĩ ga wüxi, rü Cuáü nixĩ ga to. Rü Zebedéu nanegü nixĩ ga nümagü. Rü nanatümaã wüxi ga nguewa nayexmagü. Rü yéma ínanangáitagü ga norü püchagü. Rü Ngechuchu naxcèx naca. ²²Rü yexgumatama yéma nguewa tüxü natèxgü ga nanatü. Rü Ngechuchuwe narüxĩ.

Ngechuchu nanangüexëë ga muxüma ga duüxügü
(Lc 6.17-19)

²³Rü guxü ga Gariréaanegu nixügüchigü ga Ngechuchu. Rü wüxichigü ga ñãnewa, rü duüxügüarü ngutaquëxepataüwa ninguxëëtaechigü. Rü duüxügümaã nüxü nixuchiga ga ore ga mexü na ñuxácü äëxgacü yüxü ya Tupana. Rü guxüma ga duüxügü ga yema idaaweexü rü nanameëxëë ga woo nañuxraüxü ga norü ðaawe nüxü yexmaxü, rü naxcèx nitaanegü. ²⁴Rü Ngechuchuxü nacuáchigagü ga guxüma ga duüxügü ga Chíríaanecüãx. Rü naxütawa nanagagü ga nagúxüraüxü ga daxweanemaã idaaweexü. Rü yematanüwa nayexma ga duüxügü ga ngúanemaã idaaweexü, rü duüxügü ga poraãcü naxünewa nangúxü, rü duüxügü ga ngoxo nawa yexmaxü, rü duüxügü ga óxwaãxgüxü, rü duüxügü ga nawãixächigüxü. Rü Ngechuchu nanameëxëë ga guxüma ga yema. ²⁵Rü Ngechuchuwe narüxĩ ga muxüma ga duüxügü ga Gariréaanecüãx, rü Decaporíchiuanecüãx rü Yerucharéücüãx, rü Yudéaanecüãx, rü natü ga Yudáüarü tocutüçüãx.

5

Ngechuchu rü mëxpünewa nüxü nixu ga Tupanaärü ore

¹Rü yexguma Ngechuchu nüxü dèuxgu ga yema muxüma ga duüxügü, rü wüxi ga mëxpünewa ínaxüãchi namaã ga norü ngüexügü. Rü yéma narüto, rü norü ngüexügü nüxü ínachomaëguãchi.

Yíxema taãëgüxechiga
(Lc 6.20-23)

²Rü inanaxügü ga Ngechuchu ga na nangüexëëãxü, rü ñanagürü: ³—Tataãëgü ya yíxema nüxü icuèxächitanüxë i tümaärü pecadu rü nüxü rüxoexe. Erü tümacèx nixĩ i ngema daxügüxü i naane i Tupana äëxgacü íxixüwa. ⁴—Tataãëgü ya yíxema ngechaügüxe, erü Tupana tá tüxü nataãëxëë. ⁵—Tataãëgü ya yíxema tama tügü icuèxüxügüxe, erü tá tanayauxgü i ñoma i naãne i Tupana tümamaã ixunetaxü. ⁶—Tataãëgü ya yíxema poraãcü tüxü nangüchaüxë na Tupanapëxewa meã tamaxëxü, erü Tupana tá tüxna nanaxã i ngëma maxü i mexü i naxcèx tadaugüxü. ⁷—Tataãëgü ya yíxema togü i duüxügü tüxü ngechaütümüügüxe, erü tümagü rü tá ta Tupanaãxü tangechaütümüügü. ⁸—Tataãëgü ya yíxema tama chixexügu rüxínüxë i tümaãëwa, erü yíxemagü tá tixīgü ya Tupanaxü daugüxe. ⁹—Tataãëgü ya yíxema togüarü chogüruü ixīgüxe, erü Tupana rü nanegümaã tá tüxü naxu. ¹⁰—Tataãëgü ya yíxema togü i duüxügü tümachi aiexe naxcèx na Tupana

naxwèxexũãcũma meã tamaxẽxũ. Erũ tũmacèx nixĩ i ngema daxũguxũ i naane i Tupana ãẽxgacũ íxixũwa. ¹¹ —Petaãẽgũ i pema ega duũxũgũ ÷acũ pemaã ixugũegu, rũ chixri pemaã namaxẽgu, rũ chaugagu doramaã poraãcũ chixri pechiga yad exagũgu. ¹² —Rũ petaãẽgũama rũ tama pexoegaãẽgũ! Erũ daxũguxũ i naãnewa tá penayauxgũ i wũxi i perũ ãmare i mexẽchixũ. Rũ ngẽma ñuxma pexũ ngupetũxũrũũ nixĩ ga nũxũ nangupetũxũ ga nuxcũmaũgũxũ ga Tupanaãrũ orearũ uruũgũ, yerũ ga duũxũgũ rũ naxchi rũ ta naxaie.

*Yucũrarũũ rũ omũrũũ pixĩgũ i ñoma i naãnewa
(Mr 9.50; Lc 14.34-35)*

¹³ —Pema rũ ñoma yucũrarũũ pixĩgũ i ñoma i naãnewa. Erũ yima yucũra rũ õna na namexẽxũrũũ, rũ ngẽxgumarũũ ta i pema rũ ñoma i naãnecũãx i duũxũgũarũ mexẽeruũ pixĩgũ. Natũrũ ngẽxguma chi nangeacagu ya yucũra, ¿rũ ÷acũwa chi i namexũ i ngẽxgumax? Rũ dũcax, rũ taxuwama name, rũ ítanatèxmare, rũ ngema duũxũgũ nawa nangagũ. ¹⁴ —Pema rũ ñoma i naãnecũãxãrũ ngóonexẽẽruũ pixĩgũ. Rũ wũxi ya ããne ya wũxi ya mèxpũnewa ngẽxmane, rũ taxuacũma inicux. ¹⁵ —Rũ taxũema wũxi i omũwa tanangixichi na wũxi i caichãũtũũgu na tayaxũcuchixũcèx. Natũrũ wũxi i omũwa tanangixichi na norũ ũchicaũgu tanaxũnagũxũcèx, na ngema tũxũ nabaxixũcèx ya guxãma ya yĩxema yima ãwa ngẽxmagũxe. ¹⁶ —Rũ name nixĩ i duũxũgũpèxewa na meã pemaxẽxũ. Erũ ngẽmaãcũ i pema rũ omũgũrũũ tá pinaĩgũ. Rũ ngẽmaãcũ duũxũgũ tá nũxũ nadaugũ i ngẽma mexũ i pexũxũ, rũ tá nũxũ nicuèxũũgũ ya Penatũ ya daxũwa ngẽxmacũ.

Ngechuchu nanangũexẽẽ ga mugũchiga

¹⁷ —Tama name i nagu perũxĩnũẽ na núma chaxũxũ na ichayanaxoxẽẽxũcèx i Tupanaãrũ mugũ ga Moĩché ũmatũxũ, rũ yema ore ga nuxcũmaũgũxũ ga Tupanaãrũ orearũ uruũgũ namaã nguxẽẽtaegũxũ. Natũrũ núma chaxũ na meã chayanguxẽẽxũcèx i ngẽma mugũ, rũ tama na ichayanaxoxẽẽxũcèx. ¹⁸ —Rũ aixcũma pemaã nũxũ chixu, rũ ñuxma na tama nangupetũxũ i daxũguxũ i naane rũ ñoma i naãne rũ taxucũrũwa naxũchicũxũ i ngẽma mugũ, rũ bai i írarũwa ñuxmatáta yangu i guxũma i ngema mugũ nũxũ nixuxũ. ¹⁹ —Rũ ngẽmacèx ya yĩxema tama naga ãnũxẽ i ngẽma mugũ, rũ woo i ÷acũ i íraxũ i ngẽma nũxũ yaxuxũ rũ duũxũgũxũ tangũexẽẽxgu na nũmagũ rũ ta tama naga naxĩnũèxũcèx, rũ yĩxema rũ tá guxũãrũ yexera wixweama tatèx i Tupana ãẽxgacũ íxixũwa. Natũrũ yĩxema naga ãnũxẽ i Tupanaãrũ mugũ rũ duũxũgũxũ ngũexẽẽxẽ na tũmagũ rũ ta naga taxĩnũèxũcèx, rũ guxũpèxewa tá taxũ i Tupana ãẽxgacũ íxixũwa. ²⁰ —Rũ pemaã nũxũ chixu, rũ ngẽxguma tama Parichẽgũ rũ ngũexẽẽruũgũ i ore i mugũwa nguxẽẽtaegũxũãrũ yexera meã pemaxẽgu, rũ tagutãma Tupana íngexmaxũwa pichocu.

*Ngechuchu nanangũexẽẽ na tama namexũ na texé tũmaẽneẽmaã na nuxũ
(Lc 12.57-59)*

²¹ —Pema rũ marũ nũxũ pexĩnũẽ ga Moĩchẽarũ ore ga nuxcũmaũgũxũ ga duũxũgũmaã nũxũ yaxuxũ ga ñaxũ:

“¡Tãxũ i pemáẽtagũxũ! Erũ texé yamáẽtaxe rũ tá tapoxcu”,

ñaxũ. ²² —Natũrũ choma rũ pemaã nũxũ chixu rũ texé ya tũmaẽneẽmaã nuxẽ, rũ tá tapoxcu. Rũ texé ya ÷acũ tũmaẽneẽmaã ixugũxe, rũ ãẽxgacũgũpèxewa tá tũxũ nagagũ na tũxũ napoxcuxũcèx. Rũ texé ya tũmaẽneẽxũ ngoxo wogũxe, rũ ãũcũmaxũwa tangẽxma, erũ ngũrũãchi tá tapoxcu nagu ya yima ũxũ ya ngoxo nagu poxcuene.

²³⁻²⁴ —Rũ ngẽxguma tupaucawa Tupanana cunaxãxgu i curũ dẽeru, rũ ngema nũxna cucuèxãchigu na ÷acũcèx cumaã nanuxũ i cueneẽ, ¡rũ ngẽxma tupaucagutama naxũ i ngẽma curũ ãmare i Tupanana cuxãxchaũxũ! ¡Rũ cueneẽxũtawa naxũ, rũ namaã yamexẽẽxĩra i ngẽma cuxchi na naxaixũ! Rũ ngẽmawena rũ marũ name i tupaucacèx cutaegu na Tupanana cuyaxãmarexũcèx i curũ dẽeru. ²⁵ —Rũ ngẽxguma chi wũxie wũxi i ngetanũcèx cuxũ íxuaxũgu, rũ ãẽxgacũxũtawa cuxũ tagaxgu, rũ name nixĩ i

namawatama tüxü curüngüxmüxëẽ na tama ãëxgacüpëxewa cuxü tagaxüçèx. Erü wüxicana na ãëxgacüxütawa cunguxü, rü ãëxgacü tá purichíagüna cuxü namu na cuxü napoxcuxüçèx. ²⁶—Rü aixcüma cumaã nüxü chixu rü täütáma ngema poxcupataüwa ícunguxuchi ñuxmatáta ngíxü cuxütanü i guxcü i ngema díëru i nüxü ngíxü cungetanücü. Rü name nixí i paxa Tupanana peca na pexü nüxü nangechaüxüçèx i perü pepadugü na tama pexü napoxcuexüçèx.

Ngechuchu namaã nangúexëẽtae na tama namexü na wüxi i ngemaã chixexügu rüxñüxü

²⁷—Pema marü nüxü pexñüë ga Tupanaärü mu ga Moíché nuxcüma nüxü ixuxü ga ñaxü:

“¡Tama name i naí i ngemaã na icupexü!”

ñaxü. ²⁸—Natürü choma rü pemaã nüxü chixu, rü yíxema texé ya wüxi i ngexü dawenüxë rü tüxü nangúchaüxë na ngímaã itapexü, rü Tupanapëxewa rü marü chixexü ngímaã taxü i tümaãëwa. ²⁹—Rü ngëxguma chi yima curü tügünexëtü pecadu cuxü üxëëgu rü ¡noxtacüma nayaxu rü yaxügu naña! Erü narümemaë nixí na yima cuxetüxicatama iyarütaxuxü na tama guxü i cuxune iyarütaxuxüçèx nagu ya yima üxü ya ngoxogü nagu poxcuene. ³⁰—Rü ngëxguma chi yima curü tügünemëxë pecadu cuxü üxëëgu, rü name nixí i noxtacüma ícunadae rü yaxügu cuyaña. Erü narümemaë nixí na yima cuxmëxícatama iyarütaxuxü na tama guxü i cuxune iyarütaxuxüçèx nagu ya yima üxü ya ngoxogü nagu poxcuene. Rü ngëmaãcü ega woo pexü naguxchagu rü name nixí i nüxna pixígachi i guxüma i chixexü i nagu piyixchaüxü —ñanagürü.

Ngechuchu namaã nangúexëẽtae na tama namexü na texé tümamëxü ítáxü

(Mt 19.9; Mr 10.11-12; Lc 16.18)

³¹Rü ñanagürü ta ga Ngechuchu: —Moíché rü üpa nüxü nixu rü yíxema tümamëxü ítáxe, rü tanaxwëxe i ngíxna tanaxã i wüxi i popera i nawa nüxü tixuxü na marü ngíxü ítatáxü. ³²—Natürü choma rü pemaã nüxü chixu, rü ngëxguma wüxi ya yatü naxmëxü ítëxgu, rü chi tama naí ya yatümaã nangëãëxügagu yixígu, rü äücümaxüwa ngíxü tangëxmaxëẽ erü ngëmaãcü ngürüãchi pecadu ixü. Rü yíxema ngímaã ämaxë i wüxi i nge i marü ngíte ngíxü ítëxcü, rü tüma rü ta pecadu taxü.

Ngechuchu namaã nangúexëẽtae ga unetachiga

³³Rü ñanagürü ta ga Ngechuchu: —Pema rü marü nüxü pexñüë ga Moíchéarü ore ga nuxcümaügüxü ga duüxügümaã nüxü yaxuxü ga ñaxü:

“Ngëxguma Tupanaëgagu texémaã tacüçèx icuxunetagu, rü name nixí i cuyanguxëẽ i ngëma curü uneta”,

ñaxü. ³⁴—Natürü choma rü pemaã nüxü chixu rü tama name i texéégagu rü éxna tacüégagu wüxi i duüxümaã ipexuneta. Rü tama name i daxüguxü i naãneëgagu ipexuneta, erü ngema narüto ya Tupana. ³⁵—Rü tama name i ñoma i naãneëgagu ipexuneta, erü Tupanaärü cuaixcutüchica nixí. Rü tama name i Yerucharéüëgagu ipexuneta, erü Tupana ya guxüärü ãëxgacüarü ñãne nixí. ³⁶—Rü tama name i cugüëgagu icuxuneta, erü woo wüxitama i cuyae rü taxucürüwa cunaxüchicüü na nachóxüçèx rü éxna nawaxüçèx. ³⁷—Rü ngëmacèx rü ngëxguma icuxunetagu rü narümemaë nixí i: —Ngü, tá chanaxü —ñaperügü, rü éxna: —Täütáma chanaxü —ñaperügü. Erü guxüma i to i ore i namaã icuxunetaxü, rü ngoxo i Chatanáwa ne üxü nixí.

Ngechuchu namaã nangúexëẽtae na ñuxãcü namexü na namaã ichopetüxü i ngëma duüxügü i chixri tamaã maxëxü

³⁸Rü ñanagürü ta ga Ngechuchu: —Pema rü marü nüxü pexñüë ga Tupanaärü mu ga Moíché nuxcüma nüxü ixuxü ga ñaxü:

“Ngëxguma texé wüxi i duüxüxü icháixetüxëëgu, rü tümaxëtümaãtama tayangutanüxëë.

Rü texé wüxi i duüxüxü ibüepütagu, rü tümapütamaãtama tayangutanüxëë”,

ñaxũ. ³⁹—Natürü choma rü pemaã nüxũ chixu rü tama name i pegütama ípepoxũ nüxna i duũxũ i chixecũmaxũ. Rü ngẽxguma texé cuxũ pechiwegu, rü marü name i curü tochiwe rü ta icunaxã na ngẽma rü ta cuxũ tapechiwexũcèx rü tama name na cuxũtanũxũ. ⁴⁰—Rü ngẽxguma texé cuxũ íyaxuaxũgu rü cuxna tayapuchaxũgu i curü daxũ, rü name nixĩ i curü gáuxũchiru rü ta noxtacũma tüxna cunaxã. ⁴¹—Rü ngẽxguma texé cuxũ muxgu na wüxi i kilómetrugu tacü tüxũ quingexũcèx, rü name nixĩ i taxre i kilómetrugu tüxũ cuyange. ⁴²—Rü ngẽxguma texé curü ngẽmaxũcèx cuxna caxgu, rü name nixĩ i tüxna cunaxã. Rü tama name na namaã cuxaũxũ i curü ngẽmaxũgũ ega texé paxaãchi cuxna naxcèx caxgu.

Name nixĩ i nüxũ tangechaũ i ngema tamaã rüuwanũgũxũ

⁴³ Rü ñanagürü ta ga Ngechuchu: —Pema rü marü nüxũ pexĩnüë ga Tupanaãrü mu ga Moíché nuxcũma nüxũ ixuxũ ga ñaxũ:

“¡Nüxũ nangechaũ i cumücü, rü naxchi naxai i curü uwanü!”

ñaxũ. ⁴⁴—Natürü i choma rü pemaã nüxũ chixu rü: —¡Nüxũ pengechaũ i perü uwanũgũ! ¡Rü naxcèx peyumüxẽ i ngẽma duũxũgũ i chixexũmaa pewe ingexũtanũxũ! ⁴⁵—Rü ngẽxguma ngẽmaãcü pemaxẽgu rü aixcũma Penatü ya daxũgucü nanegü tá pixĩgũ. Erü nüma rü inanabáixẽë ya üexcü naxcèx i mexũ i duũxũgũ rü chixexũ i duũxũgũ. Rü nanapuxẽë naxcèx i duũxũgũ i meã maxẽxũ rü duũxũgũ i chixri maxẽxũ. ⁴⁶—Rü ngẽxguma chi ngẽma duũxũgũ i pexũ ngechaũgũxũxũxĩcatama pengechaũgũgu, ¿rü tacü rü ãmare tá Tupanaxũtawa peyaxugü naxcèx i ngẽma? Erü ngẽma yatügü i Dumaãrü ãẽxgacücèx díeru ngĩxũ ideetanũxũwa puracüexũ rü ngẽxgumarüũ nanaxügü. ⁴⁷—Rü ngẽxguma chi peeneëgũxũxĩcatama perümoxẽgu, rü guxũ i duũxũgürüütama pixĩgũ. Erü woo ngẽma duũxũgũ i tama Tupanaxũ cuèxgũxũ, rü ngẽxgumarüütama nanaxügü. ⁴⁸—Rü ngẽmacèx penaxwae na aixcũma namexũ i perü maxũ naxrũxũ ya Penatü ya Tupana ya aixcũma mearü maxũãcü.

6

Ngechuchu rü norü ngúetanũxũxũ nangúexẽë na ñuxãcü mexũ naxũgũxũ

¹ Rü ngẽxguma tacü rü mexũ pexũxchaũgu, rü name nixĩ i pexuãë na tama duũxũgüpèxewa penaxũxũ i ngẽma na duũxũgũ pexũ dauxũcèx rü pexũ yacuèxũgũxũcèx. Erü ngẽxguma duũxũgũ pexũ icuèxũgũxũcèx mexũ pexũxgu, rü Penatü ya daxũgucü rü tãütama ãmare pexna naxã. ²—Rü ngẽmacèx ngẽxguma texèxũ curüngũxẽëchaũgu, rü name nixĩ i tama poraãcü nüxũ quixuchiga i ngẽma. Rü tama name i ngẽma duũxũgũ i togüpèxewa meã maxënetaxũrũ na quiĩxũ. Erü nümagü rü norü me nixĩ i ngutaquèxepataũgũwa rü ítamũgũwa nüxũ nixuchiga ega tacü rü mexũ naxũgũgu. Rü ngẽmaãcü nanaxügü na togü meã nachiga idexagũxũcèx. Natürü choma rü aixcũma pemaã nüxũ chixu rü ngẽma na duũxũgũ nüxũ icuèxũgũxũ nixĩ i norü ãmare, rü tãütama nanayaxugü i to i ãmare i Tupanaxũtawa. ³⁻⁴—Natürü i cuma rü ngẽxguma tacü tüxna cuxãxgu ya yíxema ngearü ngẽmaxũãxgũxe, rü name nixĩ i taxúema cuxũ dauãcüma na cunaxũxũ i ngẽma. Rü woo cumücũxũchi rü tama name i nüxũ na nacuáxũ i ngẽma. Rü Cunatü ya daxũgucü ya nüxũ daucü i ngẽma cuxicatama cuxũxũ, rü tá cuxna nanaxã i curü ãmare.

Ngechuchu nanangúexẽë ga yumüxẽchiga

(Lc 11.2-4)

⁵—Rü ngẽxguma peyumüxẽgũgu, rü tama name i ngẽma duũxũgũ i togüpèxewa meã maxënetaxũrũ pixĩgũ. Erü nümagü rü ngẽxguma nayumüxẽgũgu, rü norü me nixĩ na chiãcü nayumüxẽgũxũ i ngutaquèxepataũgũwa rü ítamũgũwa na duũxũgũ nüxũ na daugũxũcèx. Rü aixcũma pemaã nüxũ chixu rü ngẽma na duũxũgũ nüxũ daugũxũxĩcatama nixĩ i norü ãmare. ⁶—Natürü ngẽxguma cuyumüxẽgu, rü name nixĩ i

curü ucapugu cuxücu, rü cunawãxta i curü ñãx, rü ngema cuyumüxê namaã ya Cunatü ya bexma cumaãxícatama ngema ngëxmacü. Rü ngëxguma ya yima Cunatü ya Tupana ya nüxü daucü i ngëma cúacü cuxüxü, rü nüma tá cuxna nanaxã i curü ãmare. ⁷—Rü tama name i natüçexma cunamëxëê i curü yumüxê naxrüü i ngëma duüxügü i tama Tupanaxü cuëxgüxü. Erü nümagü rü nagu narüxñnüê rü ngëma na namëxëëgüãxüçex i norü yumüxê rü Tupana tá nüxü naxñü. ⁸—Rü tama name i ngëma duüxügürüü pixïgü, erü woo tauta naxçex ípecaxgu rü Penatü ya Tupana rü marü nüxü nacuëx na tacü pexü taxuxü. ⁹—Rü ngëmacëx rü ñaãcü tá peyumüxëgü i pemax:

“Pa Tonatü ya Daxügücüx, rü aixcüma üünecü quixï i cumax. ¹⁰ ;Rü núma naxü na torü ãëxgacü quiüxüçex! Rü tanaxwëxe i curü ngüchaü na naxügüxü i duüxügü i ñoma i naãnewa ngëxgumarüü i daxüguxü i naãnewa na curü ngüchaü ínaxügüxürüü. ¹¹ ;Rü toxna naxã i torü õna i ñoma i ngunexüçex ixïxü! ¹² ;Rü toxü nüxü nangechaü i torü chixexü i taxüxü ngëxgumarüü i toma rü tüxü nüxü na tangechaüxürüü ya yíxema chixexü tomaã ügüxe! ¹³ ;Tãxü i tacü rü chixexüpëxewa toxü cuwogüxü na tama nagu tayixüçex! Natürü tanaxwëxe i toxna cudau na tama ngëma chixexü taxügüxüçex. Erü cuma rü guxüguma guxüãrü ãëxgacü quixï rü cuporaxüchi rü cumexëchi. Rü ngëmaãcü yï”.

¹⁴—Rü ngëxguma pema nüxü nüxü pengechaügu i ngëma duüxügü i chixexü pemaã ügüxü, rü Penatü ya daxügücü rü tá ta pexü nüxü nangechaü i perü pecadugü. ¹⁵—Natürü ngëxguma tama nüxü nüxü pengechaügu i ngëma duüxügü i chixexü pemaã ügüxü, rü Penatü ya daxügücü rü tá ta tãütáma pexü nüxü nangechaü i perü pecadugü.

Ngechuchu nanangüexëê ga aurechiga

¹⁶—Rü ngëxguma tama pechibüëacüma peyumüxëgügu rü tama name i pegü pengechaüchíwexëê naxrüü i ngëma duüxügü i togüpëxewa meã maxënetaxü. Erü nümagü rü ngëmaãcü nanaxügü na togü nüxü na daugüxüçex i ngëma na Tupanacëx nax-aureexü. Rü aixcüma pemaã nüxü chixu rü ngëma na duüxügü nüxü daugüxüxícatama nixï i norü ãmare. ¹⁷—Natürü ngëxguma cuma rü tama cuchibüãcüma cuyumüxëgu rü name nixï i meã cugü cuyauxchiwe rü meã cugü curüxixëêru. ¹⁸—Rü ngëmaãcü i togü i duüxügü rü tãxütáma nüxü nacuëxgü na tama cuchibüãcüma cuyumüxëxü. Rü Cunatü ya bexma cumaã ngema ngëxmacüxícatátama cuxü nadau, rü tá cuxna nanaxã i curü ãmare naxçex i ngëma cuxüxü.

Ñuxãcü tüxü nangëxma i tórü meruügü i daxüguxü i naãnewa (Lc 12.33-34)

¹⁹—Rü tama name i pegüçex penanutaquëxe i muxüma i perü meruügü i ñoma i naãnewa. Erü ñoma i naãnewa rü paxama nagux i perü ngëmaxügü, rü naweane rü paxama nanachixexëê, rü ngítèëxgüxü rü naxçex nangïxgü. ²⁰—Rü narümemaë nixï i penamuxëê i perü meruü i daxüguxü i naãnewa. Erü ngema rü tãxütáma nagux, rü naweane rü tãxütáma nanachixexëê, rü ngítèëxgüxü rü tãxütáma ngexma nachocu na naxçex nangïxgüxüçex. ²¹—Erü ngextá ínangëxmaxüwa i perü ngemaxügü, rü ngëxma nixï i perüxñüxü.

Taxüneãrü omüchiga (Lc 11.34-36)

²²—Cuxetügü rü ñoma wüxi i omürüü nixï i cuxunecëx. Rü ngëxguma ngëma Tupana cuxü naxwëxexüçex cudëuxgu, rü guxüma i curü maxü rü name. ²³—Natürü ngëxguma ñoma i naãneãrü ngüchaüçex cudëuxgu, rü guxüma i curü maxü rü chixexüwa nangëxma. Rü aixcüma nataxuma i ëãnexü i ngëmaãrü yexera ixïxü i Tupanapëxewa.

¿Texécex tá cumaxü, Tupanacëx rü ëxna dïërucëx? (Lc 16.13)

24 —Taxucürüwa wüxi i duüxü rü nataxrearü coriãx. Erü wüxi i norü corichi rü tá naxai, rü ngëma to rü tá nüxü nangechaü. Rü êxna wüxicèx rü tá meã napuracü, rü ngëma to rü tá nüxü naxo. Rü taxucürüwa Tupanacèx pemaxê, ega perü dîeruguama perüxĩnüêgu.

Tupana rü naxãcüguna nadau
(Lc 12.22-31)

25 —Rü ngëmacèx pemaã nüxü chixu rü: ¡Tãxü i pexoegaãëgüxü naxcèx na tacü tá pengõxgüxü rü tacü tá pixaxgüxü, rü tacümaã tá na pexãxchirugüxü! Erü perü maxü rü õnaãrü yexera nixĩ, rü pexene rü naxchiruarü yexera nixĩ. 26 —¡Dücèx penangugü i werigü i tama toegüchiréxü, rü tama nanetüarü o ibuxgüxü, rü ngepatagüxü na ngexta namaã nanguxügüxücèx i norü õna! Natürü Penatü ya daxügücü rü nanaxüwemü. Rü pema rü Tupanacèx rü guxüma i werigüarü yexera pixigü. 27 —Rü taxuwama name na tacücèx pexoegaãëgüxü. Erü taxucürüwa ya wüxie i pema rü wüxi i oragu rü ipenamèxãchixëê i perü maxü ega woo poraãcü naxcèx pexoegaãëgügu. 28 —¡Rü tûxcüü pexoegaãëgü naxcèx i pexchiru? ¡Dücèx penangugü i ngëma putüragü i ngextámare yaexü i tama puracüexü, rü tama nügü üxchirugüxü! 29 —Natürü pemaã nüxü chixu rü woo guma ãëxgacü ga Charumóu ga na namexëchixü ga naxchiru, rü taguma wüxi ga putürachacurüü namexëchi. 30 —Rü ngëxguma Tupana ngëmaãcü nangëxãëgu i ngëma putüragü i ñuxma ngëxmagüxü natürü moxü rü marü taxuxü, rü yexera tá pexna nadau i pemax, Pa Yatügü i Tama Aixcüma Meã Yaxõgüxüx. 31 —Rü ngëmacèx tama name i pexoegaãëgü rü ñaperügügü: —¡Tacü tá tangõxgü? rü êxna —¡tacü tá tixaxgü? rü êxna —¡tacümaã tá taxãxchirugü? —ñaperügügü. 32 —Erü ñoma i naãnecüãx i duüxügü rü naxcèx nadaugü i guxüma i ngëma pemaã nüxü chixuxü. Natürü pema rü pexü nangëxma ya Penatü ya daxügücü ya nüêchama nüxü cuácü i pexü na nataxuxü i guxüma i ngëma. 33 —Natürü narümemaë nixĩ i Tupanacèxira pedaügü na ngëma nüma pexü nanaxwèxexüãira pexügüxücèx. Rü naetü tá pexna nanaxã i guxüma i tacü i pexü taxuxü. 34 —¡Tãxü i naxcèx pexoegaãëgüxü i ngëma moxü tá üpetüxü! Erü ngëma moxüãrü ngunexü rü tá nüxü nangëxma i guxchaxügü i namaã ínanguxü. Erü wüxichigü i ngunexü rü nüxü nangëxma i noxrütama guxchaxügü, rü ngëmacèx tama name i moxüãrü guxchaxügücèx pexoegaãëgü i ñuxmax —ñanagürü.

7

Tama name i toguexü tixu
(Lc 6.37-38, 41-42)

1 Rü Ngechuchu rü ñanagürü ta: —¡Rü taxü i togüxü pixuxü! Rü ngëxguma ya Tupana rü tãxütáma pexü nixu na pechixexü. 2 —Erü ngëxgumarüü na togüxü pixuxü rü Tupana rü tá pexü nixu na pechixexü. Rü ngëma na togüxü pepoxcuexü, rü ngëmaãcü tátama nixĩ ya Tupana i pexü napoxcuexü. 3 —¡Rü tûxcüü i nüxü cudawenüxü i ngëma cueneëärü üxaxetüxü i íraxü, ega chi tama naxcèx cuxoegaãëgu i ngëma cuxetüwatama ngëxmaxü i naípüta i taxü? 4 —Rü ngëxguma cuxetüwatama nangëxmagu i wüxi i naípüta i taxü ¡rü ñuxãcü i cueneëxü cuchixewexü, rü ñácuxü nüxü:

“¡Pa Chaueneëx, cuxü chanayauxchaü i ngëma curü üxaxetüxü!” —ñácuxü? 5 —Pa Duüxü i Meã Maxnetaxüx, rü name nixĩ i cunayauxira i ngëma naípüta i cuxetüwatama ngëxmaxü, rü ngëmaãcü tá mea nüxü cudau na cunayaxuxücèx i ngëma cueneëärü üxaxetüxü. [Rü ngëmacèx name nixĩ i cuxira nüxü curüxo i ngëma chixexü i taxü i cumatama cuxüxü, rü ngëxguma tá cume na nüxü curüngüxëëxücèx i cueneë na nüxü naxoxücèx i ngëma chixexü i íraxü i naxüxü.] 6 —Rü tama name i Tupanaãrü ore i üünexümaã penachixewe i ngëma duüxügü i chixecümagüxü i tama yaxõgüchaüxü, erü ngürüãchi ngëmacèx tá pexü nimëxgü. Rü ngëxgumarüü tama name i Tupanaãrü oremaã penachixewe i ngëma duüxügü i tama nüxü cuëxgüchaüxü, erü tá ínanatëxgü.

Name nixĩ i tórü yumüxêwa Tupanana naxcêx taca rü naxcêx tadaugü rü ãxwa: Tu tu tu, ñatarügügü

(Lc 6.31, 11.9-13)

⁷ —¡Tupanana naxcêx peca! rü nüma tá pexna nanaxã. ¡Rü Tupanaxütagu naxcêx pedau! rü tá nüxü ipeyangau. ¡Rü norü ãxwa: Tu tu tu, ñapegü! rü tá pexcêx nayawãxna. ⁸ —Erü guxãma ya yixema naxcêx ícaxe, rü tanayaxu. Rü guxãma ya naxcêx dauxe, rü nüxü itayangau. Rü guxãma ya yixema ãxwa: Tu tu tu, ñagüxe, rü tá tümacêx niwãxna. ⁹ —Rü dücax i pemax, rü ngêxguma chi wüxi i pexacü pãücêx ícaxgu, rü çñuxãcü chi wüxi ya nuta nüxna pexãxü? ¹⁰ —Rü ngêxguma chi choxnicêx pexna nacaxgu rü çñuxãcü chi i âxtape nüxna pexãxü? ¹¹ —Rü pema na pichixecümachiréxü rü nüxü pecuêx na mexü i âmare pexacügüna pexãxü. Natürü Penatü ya daxügücü rü ngêma pema pexacügüna pexãxüârü yexera tá tüxna naxã ya yixema naxütawa naxcêx ícaxe. ¹² —Rü pemaã nüxü chixu, rü ngêma pema penaxwêxexü i togü pemaã na naxüxü, rü name nixĩ i pema rü ta ngêmaãcütama namaã penaxü. Erü ngêmaãcü tüxü namu i Tupanaârü ore ga Moíché ümatüxü rü yema ore ga nuxcümaügüxü ga Tupanaârü orearü uruügü ümatüxü.

Ãx i íraxüchiga

(Lc 13.24)

¹³ —Name nixĩ i ngêma ãx i íraxüwaama pichocu. Erü ngêma ãx i yuwa tüxü gaxü rü ngêma nama i yuwa daxü rü nata. Rü muxüchixüma i duüxügü nagu naxĩ. ¹⁴ —Natürü ngêma nama i maxüwa nadaxü rü ngêma ãx i maxücêx nawa ixücuxü rü naxíra. Rü noxretama nixĩ i duüxügü i nüxü iyangaugüxü.

Wüxi i nanetü rü norü owa nixĩ i nüxü icuáxü

(Lc 6.43-44)

¹⁵ —Rü naxcêx pexuãégü i ngêma doratèexgüxü i nügü ixugünetaxü na Tupanaârü orearü uruügü yixügüxü. Erü nümagü rü petanüwa nangugü, rü nügü mexü i duüxügüneta nixügüxê. Natürü naãêwa rü poraãcü chixexügu narüxñü. ¹⁶ —Rü pema rü nacümawa tá nüxü pecuêx i ngêma duüxügü, ngêxgumarüü i wüxichigü i nanetügü rü norü owa na nüxü icuáxüürüü ngoxi name rü êxna tama. Rü wüxi i torawa rü taxucürüwama ubagü tayaxu. Rü wüxi i chuchuxüwa rü taxucürüwama orix i igu tayaxu. ¹⁷ —Erü guxüma i nanetü i mexü rü name i norü o. Rü guxüma i nanetü i chixexü rü nachixe i norü o. ¹⁸ —Rü wüxi i nanetü i mexü rü taxucürüwama nachixe i norü o. Rü wüxi i nanetü i chixexü rü taxucürüwama name i norü o. ¹⁹ —Rü guxüma i nanetü i tama mexü i norü o rü tayadaxüchi, rü ñuxüchi tayagu. ²⁰ —Rü ngêxgumarüü nacümawa tá nüxü pecuêx i ngêma duüxügü i Tupanaârü orearü uruügüneta ixügüxü.

Tãütama guxüma i duüxügü nichocu i ngextá Tupana ãxgacü íxixüwa

(Lc 13.25-27)

²¹ —Rü tama guxüma i duüxügü i nügü ixugüxü na chorü duüxügü yixügüxü rü tá nichocu i ngextá Tupana ãxgacü íxixüwa. Natürü yixema aixcüma Chaunatü ya daxügücüga ñnüêxñcatátama tixĩ ya ngêma ichocuxe. ²² —Rü ngêxguma ngêma ngunexü i naãneârü guxwa nanguxgu, rü muxüma i duüxügü rü choxü tá ñanagürügü: —Pa Corix, toma rü togü i duüxügümaã nüxü tixu i curü ore, rü cuégagu ítanawoxü i ngoxogü, rü cuégagu tanaxü i muxüma i mexü i taxü i Tupanaârü poramaã taxüxü —ñanagürügü tá choxü. ²³ —Natürü ngêxguma rü tá ñacharügü nüxü: —Taguma chorü duüxügü pixügü. ¡Rü choxna pixígachi i pema i chixexü ügü! —ñacharügü tá.

Yatü i Cristuga ñnüxü rü yatü i tama Cristuga ñnüxüchiga

(Mr 1.22, Lc 6.47-49)

²⁴ —Rü ngêmacêx ya yixema choxü ñnüxê rü naxüxe i ngêma choma tüxü chamuxü, rü wüxi ga yatü ga meã naãêxü cuácü ga nuta ga tacüétügu üpatacürüü tixĩ. ²⁵ —Rü pucü ga tacü ínangu, rü narümêx ga taxtü, rü nixüüchi ga wüxi ga tacü ga buanecü rü guma

ĩgu nanguema. Natürü guma ĩ rü tama niwèxtaũ yerü wüxi ga nutaétügu naxü. ²⁶ — Natürü yíxema choxũ ĩnũxẽ rü tama naxũxe i ngẽma choma tüxũ chamuxũ, rü wüxi ga yatü ga tama naãẽxũ cuácü ga naxnücügumare üpatacürũ tixĩ. ²⁷ —Rü pucü ga tacü ĩnangu, rü narümèx ga taxtũ, rü wüxi ga tacü ga buanecü nixũũchi rü nagu nanguema ga guma ĩ. Rü niwèxtaũ, rü yexma nayarüxo ga guxũma —ñanagürü ga Ngechuchu. ²⁸ Rü yexguma yagúegagu ga Ngechuchu ga na yadexaxũ, rü ga duũxügü rü nabèixãchiãëgü namaã ga norü nguxẽẽtae. ²⁹ Yerü nüma rü Tupanaãrũ poramaã nanangüexẽẽ, rü tama yema ngüexẽẽruũgü ga ore ga mugüwa nguxẽẽtaegüxürũ nixĩ.

8

Ngechuchu rü wüxi ga rüchaxünexüçèx nayataanexẽẽ (Mr 1.40-45; Lc 5.12-16)

¹ Rü yexguma guma mèxpúnewa yanaxüegu ga Ngechuchu, rü muxũma ga duũxügü nawe narüxĩ. ² Rü Ngechuchucèx nixü ga wüxi ga yatü ga chaxünemaã idaawecü. Rü Ngechuchupèxegu nayacaxãpüxü, rü ñanagürü nüxü: —Pa Corix, ngëxguma chi cuma cunaxwèxegu, rü chi cuxũ natauxcha na choxũ curümexẽẽxũ —ñanagürü. ³ Rü yexguma ga Ngechuchu rü nüxü ningögü, rü ñanagürü nüxü: —Ngũ, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga guma yatü ga na nachaxüneãxũ. ⁴ Rü Ngechuchu rü ñanagürü nüxü: —¡Dücèx, taxuemaã tá nüxü quixu! ¡Natürü ngema paixütawa naxü, rü cugü iyawéx! ¡Rü nüxna naxã i ngẽma ãmare ga Moiché tüxü muxü na duũxügü nüxü cuáxüçèx na curümexü! —ñanagürü.

Ngechuchu rü Dumacũãx ga churaragüarü ãëxgacüarü duũxüxü narümexẽẽ (Lc 7.1-10)

⁵⁻⁶ Rü Capernáüwa naxü ga Ngechuchu. Rü yexguma yéma nanguxgu, rü wüxi ga churaragüarü ãëxgacü ga capitáũ ga Dumacũãx rü Ngechuchucèx nixü. Rü Ngechuchuxũ nacèèxũ, rü ñanagürü: —Pa Corix, chorü duũxü rü nanawãixãchi. Rü ngürücarewa nangëxma i chopatawa, rü poraãcüxüchima ngúxü ninge —ñanagürü. ⁷ Rü Ngechuchu rü ñanagürü nüxü: —Marü tá ngema chaxü na naxcèx chayataanexẽẽxüçèx —ñanagürü. ⁸ Natürü nüma ga capitáũ nanangãxũ, rü ñanagürü: —Pa Corix, choma rü taxuwama chame na chopatagu na cuxücuxüçèx. Rü chanaxwèxe i curü orewaxicatama nüxü quixu, rü tá naxcèx nitaane i chorü duũxü. ⁹ —Erü choma rü ta rü chorü ãëxgacümèxëwa changëxma. Rü choxmëxwa nangëxmagü ta i ñuxre i churaragü. Rü ngëxguma chanamuxgu i wüxi na ngextá naxüxüçèx, rü ngema naxü. Rü ngëxguma chaugüxütawa naxcèx changemagu i to, rü chauxütawa nangu. Rü ngëxguma wüxi i chorü duũxüxü chamuxgu na tacü na naxüxüçèx, rü choxũ nanaxü —ñanagürü. ¹⁰ Rü yexguma yemaxũ naxĩnügü ga Ngechuchu rü nabèixãchiãë. Rü ñanagürü nüxü ga yema duũxügü ga nawe rüxĩxü: —Aixcüma pemaã nüxü chixu rü taxuüma i Yudíugütanüwa nüxü ichayangau i wüxi i duũxü i ñaã yatürũ aixcüma yaxõxü. ¹¹ —Rü choma rü pemaã nüxü chixu rü muxüchixü i duũxügü rü guxüwama tá ne naxĩ, rü Tupana ãëxgacü íxixüwa tá nachibüe namaã ya tórü oxigü ya Abráũ rü Ichaá, rü Acobu. ¹² —Natürü muxüma i Abráũtanüxügü i Yudíugü rü tãütama nichocu i ngextá Tupana ãëxgacü íxixüwa. Rü èanexüwa tá nawogü. Rü ngema tá naxauxe, rü tá nixüxchapütägü —ñanagürü. ¹³ Rü yexguma ga Ngechuchu rü ñanagürü yema capitáũxü: —¡Cupatacèx nataegu! Rü tá naxcèx nitaane i curü duũxü, erü cuyaxõ na naxcèx tá yataanexü —ñanagürü. Rü yexgumatama naxcèx nitaane ga yema capitáũãrũ duũxü.

Ngechuchu rü Pedru nèxèçèx nayataanexẽẽ (Mr 1.29-31; Lc 4.38-39)

¹⁴ Rü Pedrupatawa naxü ga Ngechuchu. Rü yéma ngixü nadau ga Pedru nèxë ga ngürücaregu irüxãũxcü yerü iyaxaxüne. ¹⁵ Rü Ngechuchu ngixmëxgu ningögü, rü

yexgumatama igèuxãchi ga yema na yaxaxünexũ. Rũ írũda ga ngĩmax. Rũ ñuxũchi naxcèx inamexẽẽ ga õna.

*Ngechuchu rũ muxũma ga idaaweexũcèx nayataanexẽẽ
(Mr 1.32-34; Lc 4.40-41)*

¹⁶ Rũ yexguma marũ yanaxücuchaũgu ga üèxcü, rũ Ngechuchuxũtawa nanagagũ ga muxũma ga duũxũgũ ga ngoxoãxgũxũ. Rũ wũxitama ga oremaã Ngechuchu ínanawoxũ ga yema ngoxogũ. Rũ nanameẽxẽẽ ta ga guxũma ga yema togũ ga idaaweexũ. ¹⁷ Rũ yemaãcü Ngechuchu nayanguxẽẽ ga yema ore ga nuxcũmaũxũ ga Tupanaãrũ orearũ uruũ ga Ichaxía nüxũ ixuxũ ga ñaxũ:

“Rũ nüma rũ tüxũ naporaexẽẽ i ngẽxguma ituraegu, rũ tüxũ narũmeexẽẽ i ngẽxguma idaaweegu”, ñaxũ.

*Duũxũgũ ga Ngechuchuwe rüxĩchaũxũchiga
(Lc 9.57-62)*

¹⁸ Rũ yexguma Ngechuchu nüxũ dèuxgu ga muxũma ga duũxũgũ na nüxũ íchomaẽguãchixũ, rũ norũ ngúexũgũmaã nüxũ nixu, rũ ñanagürũ: —¡Rũ ngĩxã, rũ naxtaxaarũ tocutüwa taxĩ! —ñanagürũ. ¹⁹ Rũ wũxi ga ngúexẽẽruũ ga ore ga mugüwa nguxẽẽtaexũ, rũ Ngechuchucèx nixũ, rũ ñanagürũ nüxũ: —Pa Ngúexẽẽruũ Pa Ngechuchux, cuwe charũxũchaũ i ngextá cuma ícuxũxũwa —ñanagürũ. ²⁰ Rũ Ngechuchu nanangãxũ rũ ñanagürũ: —Ngowagũ rũ nüxũ nangẽxma i naxmaũgũ, rũ werigũ rũ nüxũ nangẽxma i naxchiãũgũ. Natürũ choma i Tupana Nane na duũxũxũ chiĩxũ, rũ nataxuma i chauchica i ngextá nagu chicuxeruxũ —ñanagürũ. ²¹ Rũ wũxi ga to ga norũ ngúexũ, rũ ñanagürũ nüxũ: —Pa Corix, cuwe charũxũchaũ, natürũ chanaxwèxe i chaunatü tüxũ ichayatèxira —ñanagürũ. ²² Rũ Ngechuchu nanangãxũ, rũ ñanagürũ nüxũ: —¡Noxtacũma chowe rüxũ! Rũ nüe i ngẽma cutanüxũ i tama yaxõgũxũ iyatèxgũ i ngẽma yuexũ —ñanagürũ.

*Ngechuchu rũ buanecũxũ rũ yuapexũ ínayachaxãchixẽẽ
(Mr 4.35-44; Lc 8.22-25)*

²³ Rũ yexguma ga Ngechuchu rũ wũxi ga nguegu nixüe. Rũ norũ ngúexũgũ rũ ta ínayaxũmücũgũ, rũ inaxĩãchi. ²⁴ Rũ ngürũãchi naxtaxaarũ ngãxũtũgu nüxũ naxũ ga wũxi ga buanecü ga taxũchicü. Rũ guma nguewa rũ niyaucuchichigũ ga dexá. Natürũ ga Ngechuchu rũ nape. ²⁵ Rũ yexguma ga norũ ngúexũgũ rũ ínanabèixgũgũ, rũ ñanagürũgũ nüxũ: —Pa Corix, ¡toxũ rüngũxẽẽ, erũ ngẽmama itabaxũgũ! —ñanagürũgũ. ²⁶ Rũ Ngechuchu nanangãxũ, rũ ñanagürũ nüxũ: —Pa Duũxũgũ i Tama Aixcũma Yaxõgũxũx, ¡tüxcüũ pemuũẽ? —ñanagürũ. Rũ yexguma ga Ngechuchu rũ ínarũda. Rũ buanecü rũ yuapena nachogũ. Rũ ínayachaxãchi ga buanecü, rũ inayarũxo ga yuape, rũ ínachaxanemare. ²⁷ Rũ nümagũ ga norũ ngúexũgũ rũ nabèixãchiãẽgũ, rũ nügũmaã ñanagürũgũ: —¿Tãcũ èxna nixĩ i ñãã yatü rũ ngẽmacèx woo ya buanecü rũ yuape rũ naga naxĩnüexũ? —ñanagürũgũ.

*Yatũgũ ga Gadáracũãx ga ngoxogũ nawa yexmagũxũ
(Mr 5.1-20; Lc 8.26-39)*

²⁸ Rũ Ngechuchu rũ norũ ngúexũgũ rũ naxtaxaarũ tocutüwa nangugũ ga Gadáraarũ naãnewa. Rũ yexguma yéma nangugũgu, rũ Ngechuchucèx yéma nibuxmũ ga taxre ga yatũgũ ga duũxèchíquèxetanũgu yarũxauchigũtanũneũxũ. Rũ yema taxre rũ ningoxoãx, rũ nidüraexũchi. Rũ yemacèx taxucürüwama texé yéma namawa taxüpetü. ²⁹ Rũ yema taxre rũ aita naxüe, rũ ñanagürũgũ: —¿Tüxcüũ toxũ nuã cuyachixewe, Pa Ngechuchu ya Tupana Nane? ¿Èxna nuã cuxũ na toxũ ícuyawoxũxũcèx tauta nawa nanguyane na Tupana toxũ poxcuexũ? —ñanagürũgũ. ³⁰ Rũ yema nachicaarũ ngaicamana

nachibüe ga muxüma ga cuchigü. ³¹ Rû yema ngoxogü rû Ngechuchuxü nacèèxügü, rû ñanagürügü: —Rû ngêxguma toxü ícuwoxügu, jrû ngêma cuchigügu toxü nachocuxêê! —ñanagürügü. ³² Rû yexguma ga Ngechuchu, rû ñanagürü nüxü: —Ëcü, jngema pexî! —ñanagürü. Rû yexguma ga yema ngoxogü rû ínachoxü nawa ga yema taxre ga yatügü, rû yema cuchigügu nayachocu. Rû ñuxüchi guxüma ga yema cuchigü rû inaxüâchi, rû naxtaxacutüarü mèxpüxüwa nayarüyuxgü, rû yexma nayi. ³³ —Rû yema cuchigüarü dauruügü rû nabèixâchiâégü, rû îâncèx nibuxmü. Rû yexguma îânewa nangugügu, rû nüxü nixugügü ga guxüma ga yema ngupetüxü ga ñuxâcü naxcèx na yataanegüxü ga yema taxre ga yatügü ga ngoxoâxgüxü. ³⁴ —Rû yexguma ga guxüma ga yema îâncèüâx ga duüxügü, rû Ngechuchuxütawa naxî. Rû yexguma Ngechuchuxü nadaugügu, rû nüxü nacèèxügü na ínaxüxüxcèx ga yema norü naânewa.

9

Ngechuchu rû wüxi ga yatü ga nawâixâchicüçèx nayataanexêê (Mr 2.1-12; Lc 5.17-26)

¹ Rû yexguma ga Ngechuchu rû wüxi ga nguegu nixüe. Rû naxtaxaarü tocutüwa naxü, rû noxrütama îânewa nangu. ² Rû yéma guma îânewa rû duüxügü rû Ngechuchuxütawa nanangetaügü ga wüxi ga yatü ga nawâixâchicü. Rû yexguma Ngechuchu nüxü dèuxgu ga ñuxâcü aixcüma na yaxögüâxü ga yema duüxügü rû ñanagürü nüxü ga guma idaawecü: —jNataãê, Pa Chaunex! Erü curü pecadugü rû marü cuxü nüxü changechaü —ñanagürü. ³ Rû yéma nayexma ga ñuxre ga ngüexêêruügü ga ore ga mugüwa nguxêêtaegüxü. Rû nümagü rû naâxêgüwa ñanagürügü: —¿Ñaa yatü rû tacü Tupanamaã nixugü? —ñanagürügü. ⁴ Natürü ga Ngechuchu rû nüxü nacüexama ga yema naâêwa nagu naxîñüxü. Rû yemacèx ñanagürü nüxü: —¿Tüxcüü chixexügu perüxîñüê? ⁵ —¿Tacü nixî i ngêma rütauxchamaêxü na namaã nüxü ixuxü ya daa nawâixâchicü:

“Rû curü pecadugü rû marü cuxü nüxü changechaü”, rû êxna:

“jInachi rû íxü!” ñagüxü nüxü? ⁶ —Natürü i ñuxma rû tá pexü nüxü chadauxêê na Chaunatü ya Tupana núma choxü muxü na duüxügüaxü nüxü changechaüxcèx i norü pecadugü —ñanagürü. Rû yexguma rû ñanagürü nüxü ga guma nawâixâchicü: —jInachi, rû nayaxu i curü carüü, rû cupatawa naxü! —ñanagürü. ⁷ —Rû yexgumatama ga guma nawâixâchicü rû inachi, rû napatawa naxü. ⁸ Rû yexguma yemaxü nadaugügu ga duüxügü, rû poraâcü namuêê. Rû Tupanaxü nicuèxüügü, rû ñanagürügü: —Moxê, Pa Tupanax, erü cunaporaxêê i ñaa yatü na ngêmaâcü mexü toxcèx naxüxcèx —ñanagürügü.

Mateucèx naca ga Ngechuchu (Mr 2.13-17; Lc 5.27-32)

⁹ Rû yexguma yéma inaxüâchigu ga Ngechuchu, rû yéma nüxü nadau ga wüxi ga yatü ga Mateugu âegaxü ga yéma rütoxü ga ngextá Dumaârü âêxgacüçèx díêru ngîxü ínayauxgüxüwa yerü woetama yemawa napuracü. Rû Ngechuchu rû ñanagürü nüxü: —jChowe rüxü! —ñanagürü. Rû yexguma ga Mateu rû inachi, rû nawe narüxü. ¹⁰ Rû Mateupatawa naxü ga Ngechuchu, rû yéma nachibü. Rû ínangugü ta ga muxüma ga togü ga duüxügü ga Dumaârü âêxgacüçèx díêru ngîxü yauxgüxüwa puracüexü, rû togü ga duüxügü ga taxúema nacümamaã taâégüxü. Rû yema duüxügü rû yéma mechawa narütogü namaã ga Ngechuchu rû norü ngüexügü. ¹¹ Natürü yexguma yemaxü nadaugügu ga Parichéugü, rû Ngechuchuarü ngüexügüna nacagü, rû ñanagürügü: —¿Ñuxâcü i perü ngüexêêruü rû namaã nachibü i âêxgacüarü duüxügü i díêruarü yauxwa puracüexü, rû duüxügü i pecaduâxgüxü? —ñanagürügü. ¹² Rû yexguma yemaxü naxîñügu ga Ngechuchu, rû ñanagürü nüxü ga Parichéugü: —Ngêma poraexü rû tama

nanaxwèxegü ya duturu, natürü ngëma idaaweexü nixĩ i naxwèxegüxü. ¹³ —¡Rü ípixĩ, rü nawa pengüe i Tupanaärü ore i ümatüxü i ñaxü:

“Choma rü tama chanaxwèxe i chauxcèx peyamèx i carnerugü, natürü chanaxwèxe i togü pexü nangechaütümüügü”,

ñaxü! Rü ñanagürü ta ga Ngechuchu: —Choma rü tama mexügüna na chaxuxücèx nixĩ i núma chaxüxü, natürü núma chaxü na nüxna chaxuxücèx i ngëma pecaduãxgüxü na ngëmaãcü nüxü naxoexücèx i nacümagü i chixexügü —ñanagürü.

Ngechuchuna nacagüe ga aurechiga

(Mr 2.18-22; Lc 5.33-39)

¹⁴ Rü yexguma ga Cuáü ga baiüxëëruüärü ngüexügü, rü Ngechuchucèx naxĩ, rü nüxna nacagüe, rü ñanagürügü: —Toma i Cuáüärü ngüexügü na tixügüxü rü nümagü i Parichéugü rü muëxpüxcüna tama tachibüeãcüma tayumüxëgü. ¿Rü tüxcüü i curü ngüexügü rü tama toxrüü tama nachibüãcüma nayumüxëgü? —ñanagürügü. ¹⁵ Rü Ngechuchu nanangãxü rü ñanagürü: —¿Éxna wüxi i ngĩgüarü petawa rü pexcèx namexü na nangechaüëxü rü naxaureexü i ngëma nüxna naxugüxü ega natanüwa nangëxmagu i ngëma yatü i ngexwacèx ámaxü? Maneca tama nixĩ. Natürü wüxi i ngunexügu rü ngëma yatü i ngexwacèx ámaxü rü tá namücügüna nixügachi. Rü ngëma ngunexügu tá nixĩ i aixcüma naxaureexü i namücügü. ¹⁶ —Rü taxüema tanapaita i wüxi i naxchiru i ngauxü namaã i wüxi i natüchi i ngexwacaxüxü i tauta nañaãchimüxü. Erü ngëxguma nayauxgu i ngëma naxchiru rü tá nügü ínanaxíraxãchi i ngëma natüchi i ngexwacaxüxü, rü tá nanagauxëë i ngëma wexachiru. Rü noxriarü yexera tá nixĩ i na nagauxü. ¹⁷ —Rü ngëxgumarüü ta rü taxüema ngexwacaxücü ya binu rü nagu tayabacuchi i wüxi i naxchixü i marü ngauxü i naxchëxmünaxcèx. Erü ngëxguma ngëmaãcü naxüxgu rü yima binu ya ngexwacaxücü rü narüngu, rü tá nayawãixëë i ngëma naxchixü i ngauxü i naxchëxmünaxcèx. Rü ngëxma tá nayarütaxu ya binu rü ngëma naxchixü rü ta. Rü ngëmacèx tanaxwèxe ya ngexwacaxücü ya binu rü ngexwacaxüxü i naxchixügu tayabacuchi. Rü ngëmaãcü tãütáma inayarütaxu. [Rü chorü nguxëëtae i ngexwacaxüxü rü ngëxgumarüü ta nixĩ na taxucürüwama namaã nawüxigüxü i ngëma nuxcümaüxü i pecümagü —ñanagürü ga Ngechuchu.]

Yáiruxacüchiga rü yema nge ga Ngechuchuchirugu ingögücüchiga

(Mr 5.21-43; Lc 8.40-56)

¹⁸ Rü yexguma yemaãcü ínangüexëëtaeyane ga Ngechuchu, rü naxütawa nangu ga wüxi ga äëxgacü ga Yudíugüarü. Rü Ngechuchupëxegu nayacaxãpüxü, rü ñanagürü nüxü: —Pa Corix, chauxacü rü ngexwacèx iyu. Natürü ngëxguma chi ngëma cuxüxgu rü ngixü quingögügu, rü wena chixarü imaxü —ñanagürü. ¹⁹ Rü inachi ga Ngechuchu, rü norü ngüexügümaã yema äëxgacüwe narüxü. ²⁰ Rü yexguma yéma naxüyane ga Ngechuchu rü wüxi ga ngecü ga 12 ga taunecü ägüechacü rü naweama ne ixü. Rü naxpechinüchirugu iyangögü. ²¹ Yerü ngíma rü nagu íruxĩnü rü yexguma chi naxchiruxüxĩcatama yangögümaregu, rü chi ngixcèx nitaane. ²² Natürü nüma ga Ngechuchu rü nügü ínidau, rü ngixü nadau ga yema nge. Rü ñanagürü ngixü: —¡Nataãë, Pa Chauxacüx! Marü cuxcèx nitaane, erü cuyaxõ —ñanagürü. Rü yexgumatama ngixcèx nitaane. ²³ Rü yexguma yema äëxgacüpatawa nanguxgu ga Ngechuchu, rü nüxü nadau ga paxetatanüxü ga marü na ínamemaregüxü na ngixü iyatëxgüxü ga yema bucü. Rü ga duüxügü rü nixáicha rü naxauxe. ²⁴ Rü Ngechuchu ñanagürü nüxü ga yema duüxügü: —¡Ípechoxü i nuã! Erü ngëma bucü rü tama iyu. Rü ipemare —ñanagürü. Natürü nümagü ga duüxügü rü Ngechuchuxü nacugüeama. ²⁵ Rü yexguma Ngechuchu ínachoxüxëëxgu ga duüxügü, rü yema bucüarü ucapugu naxücu. Rü ngixmëxgu nayayauxãchi, rü yexgumatama írüda ga ngímax. ²⁶ Rü guxüwama ga yema naãnewa, rü duüxügü nüxü nixuchigagü ga yema Ngechuchu üxü.

Ngechuchu naxcèx nayataanexêê ga taxre ga yatü ga ingexetüxü

²⁷ Rü yexguma yéma ínaxüüxgu ga Ngechuchu, rü taxre ga ngexetüxü rü nawe nangêgü. Rü tagaäcü ñanagürügü: —Pa Ngechuchux, Pa Dabítanüxüx, ¡cuxü tangechaütümüügü! —ñanagürügü. ²⁸ Rü yexguma Ngechuchu guma í ga nagu napexünegu naxücuxgu, rü yema taxre ga ngexetüxü rü naxcèx naxí. Rü Ngechuchu nüxna naca, rü ñanagürü: —¿Peyaxögüxü yíxü na chaporaxü na pexü charümeêxêxücèx? —ñanagürü. Rü nümagü nanangäxügü, rü ñanagürügü: —Ngü, Pa Corix, tayaxögü —ñanagürügü. ²⁹ Rü yexguma ga Ngechuchu rü naxëtügügu ningögü, rü ñanagürü nüxü: —¡Cü pexcèx yataane, erü peyaxögü! —ñanagürü. ³⁰ Rü naxcèx nitaanegü. Rü Ngechuchu rü poraäcü nayaxucuxêgü na taxúemaâma nüxü na yaxugüxücèx ga yema nüxü ngupetüxü. ³¹ Natürü yema taxre rü yexguma yéma ínachoxügu rü guxüwama ga yema naânewa rü nüxü nixugüeama ga yema Ngechuchu üxü.

Ngechuchu rü naxcèx nayataanexêê ga wüxi ga yatü ga tama idexacü

³² Rü yexguma yema taxre ga yatü íchoüxguwena, rü ñuxre ga duüxügü rü Ngechuchuxütawa nanagagü ga wüxi ga yatü ga tama idexacü yerü ngoxo nawa nayexma. ³³ Rü Ngechuchu ínanatèxüchi ga yema ngoxo. Rü yexgumatama ínanaxügü ga na yadexaxü ga guma yatü. Rü nümagü ga duüxügü rü nabèixächíâêgü. Rü ñanagürügü: —Taguma nüxü tadau i nuâ tachiüânewa i tacü i ñaârüü íxíxü —ñanagürügü. ³⁴ Natürü ga Parichéugü rü ñanagürügü: —Ñaâ yatü rü ngoxogüarü äêxgacü i Chatanáârü poramaâ nixí i ínawoxüâxü i ngoxogü —ñanagürügü.

Ngechuchuxü nangechaütümüügü ga duüxügü

³⁵ Rü yema naânewa rü guxünema ga íânegügu rü íânexäcügügu nixügüchigü ga Ngechuchu. Rü wüxichigü ga íânema, rü duüxügüarü ngutaquêxepataüwa ninguxêetaechigü. Rü duüxügümaâ nüxü nixuchigü ga ore ga mexü na ñuxäcü äêxgacü na yíxü ya Tupana. Rü nanameêxêê ga duüxügü ga ídaaweexü. Rü woo nañuxraüxü ga norü daawe nüxü yexmaxü, rü nanameêxêê. ³⁶ Rü yexguma Ngechuchu nüxü dèuxgu ga yema muxüma ga duüxügü ga naxütawa ngugüxü, rü nüxü nangechaütümüügü. Yerü carnerugü ga ngearü dauruüâxüüü nanaxíxächíâêgü, rü tama nataâêgü. ³⁷ Rü yexguma ga Ngechuchu rü ñanagürü nüxü ga norü ngúexügü: —Aixcüma pemaâ nüxü chixu rü nangêxma i muxüchixü i duüxügü i ímemaregüxü na yaxögüâxü i Tupanaârü ore. Natürü nanoxreêxpüx i Tupanaârü puracütanüxü na namaâ nüxü yaxugüxücèx i ngêma ore. ³⁸ Rü ngêmacèx name nixí i duüxügüarü yora ya Tupanana naxcèx peca i perü yumüxêwa na yamugüâxücèx i norü puracütanüxü i orearü uruügü na ngêma duüxügümaâ nüxü yaxugüxücèx i norü ore i mexü —ñanagürü ga Ngechuchu.

10

Ngechuchu nanade ga 12 ga norü ngúexügü na toxnamana namugüâxücèx (Mr 3.13-19; Lc 6.12-16)

¹ Rü yexguma ga Ngechuchu, rü yema 12 ga norü ngúexügücèx naca. Rü nüxna naxâga rü nanaporaexêê na ínawoxüâxücèx ga ngoxogü rü nameêxêêâxücèx ga duüxügü ga ídaaweexü ga woo nañuxraüxü ga daawe nüxü yexmaxü. ² Rü ñaâ nixí ga naegagü ga yema 12 ga Ngechuchuarü ngúexügü ga imugüxü. Rü natanüwa rü Chimáü ga Pedrugü äegacü nixí ga naêru íxíxü. Rü to nixí ga Pedrueneê ga Aüdré. Rü to nixí ga Chaütiágu rü to nixí ga Chaütiágueneê ga Cuáü. Rü yema taxre rü Zebedéu nanegü nixígü. ³ Rü togü nixí ga Piripi, rü Baturumé, rü Tumachi, rü Mateu ga Dumaârü äêxgacücèx díeruarü yauxwa puracüchirécü. Rü togü nixí ga Chaütiágu ga Arupéu nane, rü Tadéu. ⁴ Rü to nixí ga Chimáü ga iporaäcüücü. Rü to nixí ga Yuda ga Icariüte ga yixcama bexma cúäcü Ngechuchuxü íxuaxüxü.

*Ngechuchu rü norü ngúexügüxü nimugü na nüxü yanaxugüexücèx ga norü ore
(Mr 6.7-13; Lc 9.1-6)*

⁵ Rü Ngechuchu nayamugü ga yema 12 ga norü ngúexügü. Rü nüxna naxāga, rü ñanagürü: —¡Tāütáma natanüwa pexĩ i ngēma duüxügü i tama Yudíugü ixīgüxü! ¡Rü tāütáma Chamáriacüāx i duüxügüarü ñānegüwa pexĩ! ⁶ —Natürü chanaxwèxe i ngēma Yudíugü i carnerugürüü iyarütauxexütanüwa pexĩ. ⁷ —¡Rü ngēma natanüwa nüxü peyarüxu na marü yangaicaxü ya Tupana na norü āëxgacü yĩxü! ⁸ —¡Rü penameëxëëx i ngēma duüxügü i idaaweexü! ¡Rü wena penamaxëxëëx i ngēma duüxügü i marü yuexü! ¡Rü penameëxëëx i ngēma duüxügü i chaxünemaā idaaweexü! Rü ngēma duüxügü i ngoxogü nawa ngëxmagüxü ¡rü nüxü ípenawoxüx! Rü tama name i penaxātanü ega texéxü perümexëëxgu, erü pema rü pexü nangetanümare i ngēma pora. ⁹⁻¹⁰ —¡Rü tāütáma ípingearü dīeruāxgü na perü tacücèx petaxegüxücèx rü bai i perü choca i perü namawaü! ¡Rü wüxitama i pexchiru ípinge, rü bai i perü chapatu, rü bai ya perü caxüchigüxü ya naĩxmenëxā ípinge! Rü pemaā nüxü chixu rü wüxi i puracütanüxü rü name nixĩ i ngēma duüxü i nüxü napuracüüxütawa nachibü. ¹¹ —Rü ngëxguma wüxi ya ñānewa rü éxna wüxi ya ñānexācüwa pengugügu i pemax, ¡rü naxcèx pedèux i wüxi i duüxü i mecümaxü! ¡Rü ngëmaxütagu perücho ñuxmatáta ipexĩāchi i ngēma ñānewa! ¹² —Rü ngëxguma yima ípatagu pechocugu, rü meā tá nüxü perümoxëgü i ngēma duüxügü i ngēma ngëxmagüxü rü: “¡Tupana pexü rüngüxëëx!” ñaperügügü tá nüxü. ¹³ —Rü ngëxguma ngēma duüxügü rü meā pexü nayauxgu rü Tupana tá nüxü narüngüxëë. Natürü ngëxguma tama meā pexü nayauxgu i napatawa rü ñaperügügü tá nüxü:

“Marü name i toxnamana taxĩ”, ñaperügügü tá. ¹⁴ —Rü ngëxguma wüxi ya ñwa rü éxna wüxi ya ñānewa duüxügü tama meā pexü yauxgügu rü tama nüxü naxĩnüëchaügu i perü ore, ¡rü ípechoxü! Rü ngëxguma ípechoüxgu, ¡rü meā pegü ipepagücutü i perü üxaxücutü, na ngēmawa nüxü nacüëxgüxücèx na chixexü na naxügüxü i ngēma duüxügü! ¹⁵ —Rü aixcüma pemaā nüxü chixu rü ngēma ngunexü i nagu nagüxü i naāne, rü Chodomacüāx rü Gomoracüāx i duüxügüarü yexera Tupana tá nanapoxcue i ngēma duüxügü i tama meā pexü yauxgüxü.

Guxchaxügümaā tá pewé ningexütanü i duüxügü

¹⁶ —Dücèx, āücümaxüwa pexü chamugü, ngëxgumarüü i carnerugüxü aigütanüwa imugüxürüü. ¡Rü ngëmacèx penaxwèxe i äxtapegürüü pexuāëgü, natürü muxtucugürüü taxuüma i chixexü pexügü! ¹⁷ —¡Rü pegüna pedaügü! Erü duüxügü rü tá pexü ínayauxü, rü āëxgacügüxütawa tá pexü nagagü na pexü napoxcuexücèx. Rü ngutaquëxepataügügu tá pexü nicuaixgü. ¹⁸ —Rü chaugagu tá āëxgacügü ya tacügüpëxewa pexü nagagü. Rü ngēmaācü tá chauchigagu pidexagü napëxewa i ngēma āëxgacügü rü napëxewa i ngēma duüxügü i tama Yudíugü ixīgüxü. ¹⁹ —Natürü ngëxguma āëxgacügüpëxewa pexü nagagügu na pexü napoxcuexücèx, ¡rü taxucèxtáma pexoegaāëgü na tacümaā tá penangāxüxü rü éxna tacüxü tá namaā na pixuxü! Erü ngëxguma nawa nanguxgu na pidexagüxü, rü Tupanaāë tá pexü nangüxëë na tacüxü tá namaā pixuxü. ²⁰ —Rü tāütáma pema nixĩ i pidexagüxü, natürü Tupanaāë i Üünexü tá nixĩ i pewa idexaxü. ²¹ —Rü nügüeneëgüwa rü tá nügü ínaxuaxügü na āëxgacügü yamëxgüxücèx. Rü ngëxgumarüü tá ta nanatügü rü naxācügüxü ínaxuaxügü, rü naxācügü rü nanatügüxü tá ínaxuaxügü na āëxgacügü tüxü imëxgüxücèx. ²² —Rü chaugagu tá guxü i duüxügü pexchi naxaie. Natürü yíxema aixcüma yaxōmáxë i chorü ore rü tama choxü ítáxe, rü yíxema tá tixĩ ya nayaxúxe i ngēma maxü i taguma gúxü. ²³ —Rü ngëxguma wüxi ya ñānewa rü duüxügü pexü daixchaügu, rü name nixĩ i pibuxmü ya yima ñānewa, rü naĩ ya ñānewa pexĩ. Rü aixcüma pemaā nüxü chixu rü tāütáma guxüne ya Yudíugüarü ñānewa pengugü naxüpa na chataegüxü i chomax. ²⁴ —Rü taxuüma i wüxi i ngúexü rü norü ngúexëëruüxü narüyexera. Rü taxuüma i wüxi i coriarü duüxü rü norü corixü

narüyexera. ²⁵—Rü ngēma norü ngúexēēruūxū üpetüxürüü tátama nüxū naxüpetü i ngēma norü ngúexū. Rü ngēma norü corixū üpetüxürüü tátama nüxū naxüpetü i ngēma norü duūxū. Rü ngēxguma duūxūgü rü ngoxo i Bechebú choxū nawogüegu, ¿rü ñuxácü tá pexū naxu i pemax?

Name nixī na Tupanaxū pemuñēxū

(Lc 12.2-7)

²⁶—Rü ngēmacèx ¡tāxū i nüxū pemuñēxū i ngēma duūxūgü! Erü guxūma i ngēma cúācū üxū rü tá nangoxoma. Rü guxūma i ngēma ñuxma duūxūgücèx ēxūguxū, rü yixcūra rü tá nüxū nacüexgüama. ²⁷—Rü guxūma i ngēma pemaāxīcatama nüxū chixuxū, ¡rü meā duūxūgücèx penangoxēēx! Rü guxūma i ngēma bexma pemaā nüxū chixuxū, ¡rü tagaācū guxū i duūxūgümaā nüxū pixu! ²⁸—¡Rü tāxū i nüxū pemuñēxū i ngēma duūxūgü i pexū daixchaūxū! Erü taxünexūxīcatama nimèxgü. ¡Natürü name nixī i nüxū pemuñē ya yima Tupana! Erü nüma nüxū nangēxma i pora na napoxcuāxūcèx i pexene rü peāē rü ta i ngēma ngoxogūxū ínapoxcuexūgu. ²⁹—¿Tama ēxna wüxitachinü i dīerugu namaā petaxe i taxre i werixacügü? Natürü bai i wüxi i ngēma werixacü rü ñaxtüanegu nangu, ega tama nanaxwèxegu ya Penatü ya Tupana. ³⁰—Rü woo i peyae rü Tupana rü wüxichigü rü nayaxugü, rü nüxū nacüèx na ñuxre ngēxmaxū. ³¹—Rü ngēmacèx ¡tāxū i pemuñēxū! Erü pema rü muxūma i werixacügüarü yexeraxüchi pexū nangechaū ya Tupana.

Yíxema duūxūgüpēxewa tügü ixuxe na Ngechuchu ya Cristuarü duūxūgü tīxū

(Lc 12.8-9)

³²—Rü guxāma ya texé i ñoma i nañnewa i duūxūgüpēxewa tügü ixuxe na chorü duūxū tīxū, rü choma rü tá ta Chaunatü ya daxūgucüpēxewa tūxū chixu na chorü duūxū tīxū i tūmax. ³³—Natürü texé ya ñoma i nañnewa i duūxūgüpēxewa tügü ixuxe na tama chorü duūxū tīxū, rü choma rü tá ta Chaunatü ya daxūgucüpēxewa tūxū chixu na tama chorü duūxū tīxū i tūmax.

Ngechuchugagu nixī i yatoyexū i duūxūgü

(Lc 12.51-53; 14.26-27)

³⁴—Rü tama name i nagu perüxñüē na núma chaxūxū na guxū i duūxūgü rü wüxigu naxñüēxūcèx. Natürü pemaā nüxū chixu rü núma chaxū na chaugagu yatoyexūcèx i duūxūgü. ³⁵—Rü nuā chaxū na wüxi ya yatü rü tama nanatümaā wüxigu naxñüxūcèx, rü wüxi i paxū rü tama naēmaā wüxigu naxñüxūcèx, rü wüxi i naneāx rü tama ngīxēmaā na wüxigu naxñüxūcèx. ³⁶—Rü ngēmaācū wüxi ya íwa, rü nügütanüxūmaā tátama naxuwanūāxgü. ³⁷—Rü yíxema texé ya choxū na tangechaūxūārü yexera tümanatüxū rü ēxna tümaēxū ngechaūxē, rü taxucürüwama chorü duūxū tixī. Rü yíxema texé ya choxū na tangechaūxūārü yexera tümanexū rü ēxna tümaxācūxū ngechaūxē, rü taxucürüwama chorü duūxū tixī. ³⁸—Rü yíxema tama yaxna namaā ínūxē i ngēma guxchaxūgü i chaugagu tümacèx ínguxū rü ngēmaācū chowe rüxūxē, rü taxucürüwama chorü duūxū tixī. ³⁹—Rü texé ya tügü maxēēchaūxē rü tá itayarütaxu. Natürü texé ya chauxcèx yuxe rü tá tanayaxu i maxū i taguma gúxū.

Āmarechiga

(Mr 9.41)

⁴⁰—Rü texé ya pexū yaxúxe rü choxū nixī i tayaxuxū. Rü texé ya choxū yaxúxe rü yima núma choxū mucü ya Chaunatüxū nixī i tayaxuxū. ⁴¹—Rü texé ya wüxi i orearü uruū i Tupana ngema muxūxū yaxúxe, rü ngēmatama āmare i wüxi i orearü uruū yaxuxūraūxū tátama tayaxu. Rü texé ya wüxi i yatü i mecūmaxūxū yaxúxe erü namecūma, rü ngēmatama āmare i wüxi i yatü i mecūmaxū yaxuxūraūxū tátama tayaxu. ⁴²—Rü texé ya wüxi i pochiyuācu i dexá i gèuxchiūxū nüxna āxē i ngēxürüūxū i chorü buxūgü i chowe rüxīxū, rü aixcūmaxūchi tá tanayaxu i tümaārü āmare —ñanagürü ga Ngechuchu.

11

Cuáŭ ga baiŭxēēruŭ nanamu ga ñuxre ga norü duŭxŭgü na Ngechuchuxŭtawa íyadaugŭxŭcèx
(Lc 7.18-35)

¹ Rü yexguma nüxŭ nachauxgu ga Ngechuchu ga na yaxucuxēgüãxŭ ga yema 12 ga norü ngúexŭgü, rü inaxŭãchi ga yéma na duŭxŭgüxŭ nangúexēxŭcèx rü nüxŭ yaxúxŭcèx ga ore ga mexŭ ga guxŭne ga íānegü ga yema nañewa yexmagünewa. ²⁻³ Rü Cuáŭ ga baiŭxēēruŭ rü yexguma poxcupataxŭwa nayexmayane, rü nüxŭ nacuáxchiga ga yema Ngechuchu ŭxŭ. Rü yemacèx ga Cuáŭ rü Ngechuchuxŭtawa nanamugü ga ñuxre ga norü duŭxŭgü na nüxna yacagŭxŭcèx rü aixcúma Cristu ga íanguxēēgücü yíŭ, rü éxna to tá yíŭ ya Cristu. ⁴ Rü Ngechuchu nanangãxŭ rü ñanagürü nüxŭ ga yema duŭxŭgü: —¡Pewoegu rü Cuáŭmaã nüxŭ peyarŭxu i ngēma pematama nüxŭ pedaugŭxŭ rü nüxŭ pexŭnŭxŭ! ⁵ —¡Rü namaã nüxŭ pixu rü ngēma ngexetŭgŭxŭ rü marü nidauchigü, rü ngēma ichixeparaxŭ rü marü inachigü, rü ngēma chaxŭneãxgŭxŭ rü marü naxcèx nitaanegü, rü ngēma ngauchixēgŭxŭ rü marü ningoxnamachixēgü, rü ngēma yuexŭ rü wenaxârü namaxē, rü ngēma ngearü ngēmaxŭãxgŭxŭ rü marü namaã nüxŭ tixu i Tupanaârü ore i mexŭ! ⁶ Rü tataãe ya yixema texé ya tama nüxŭ rüxoxe na choxŭ tayaxôxŭ —ñanagürü ga Ngechuchu. ⁷ Rü yexguma nawoeguxgu ga yema Cuáŭ ga baiŭxēēruŭârü duŭxŭgü, rü Ngechuchu inanaxŭgü ga guma Cuáŭchiga na yadexaxŭ. Rü ñanagürü nüxŭ ga duŭxŭgü: —¿Tacü nixŭ ga pema ípeyadaugŭxŭ ga dauxchitawa ga ngextá taxúema íxãpataxŭwa? —¿Éxna wüxi ga ngëxŭrŭxŭmare ga yatü ga ñoma dexne ga buanecü yaxíãxtanücüxēcürüŭ íxŭxŭ nixŭ ga ípeyadaugŭxŭ? ⁸ —Rü éxna ega tama guma ípeyadaugŭgu, ¿rü tacü nixŭ ga ípeyadaugŭxŭ? ¿Éxna wüxi ga yatü ga poraãcü nügü ngèxãèxŭ yíxŭ ga ípeyadaugŭxŭ? Pema nüxŭ pecuèx i ngēma poraãcü nügü ngèxãègŭxŭ rü ãèxgacŭgü ya tacügŭpatawa nangëxmagü. ⁹ —¿Tacü éxna nixŭ ga ípeyadaugŭxŭ? ¿Éxna wüxi ga Tupanaârü orearü uruŭxŭ? Ngēmaãcü aixcúma yema nixŭ ga ípeyadaugŭxŭ. Rü pemaã nüxŭ chixu rü Cuáŭ ya baiŭxēēruŭ rü tama wüxi i ngëxŭrŭxŭmare i Tupanaârü orearü uruŭ nixŭ. ¹⁰ —Rü Cuáŭchiga nixŭ ga naxŭmatŭxŭ ga yema Tupanaârü ore ga ñaxŭ:

“Cupèxegu chayamu i chorü orearü ngeruŭ na cuxcèx namexēãxŭcèx i duŭxŭgüarü maxŭ”

ñaxŭ. ¹¹ —Rü aixcúma pemaã nüxŭ chixu rü guxŭ i duŭxŭgütanüwa rü nataxuma i Tupanaârü orearü uruŭ i Cuáŭ ya baiŭxēēruŭârü yexera íxŭxŭ. Natürü yixema Tupana ãèxgacü íxŭxŭwa wixwexüchi üxe, rü Cuáŭârü yexera tixŭ. ¹² —Rü yexguma noxri Cuáŭ ya baiŭxēēruŭ inaxŭgügu na nüxŭ yaxúxŭ i ñuxãcü Tupana ãègacü íxŭxŭwa nangugŭxŭ i duŭxŭgü, rü nüma ga duŭxŭgü rü norütama ngúchaxŭmaã nawa nangugŭchaxŭ i ngema nachica. Rü ñuxma rü ta ngemagutama narŭxŭnŭe. ¹³ —Rü guxŭma ga Tupanaârü orearü uruŭgüarü orewa, rü ore ga mugü ga Moïché ümatŭxŭwa rü nüxŭ nixuchigagü na íanguégaxŭ ya Cristu na ãèxgacü na yíxŭcèx. Rü yemaãcü nixŭ ñuxmata íangu ga Cuáŭ. ¹⁴ —Rü ngëxguma chi peyaxôgŭchaŭgu i ñaã chorü ore, rü pemaã nüxŭ chixu rü Cuáŭ ya baiŭxēēruŭ nixŭ ya yima yanguxēcŭ ga yema ore ga guma nuxcúmaŭcü ga orearü uruŭ ga Ería ga ípenanguxēcŭchiga ümatŭxŭ. ¹⁵ —Rü yixema achixēgŭxe, ¡rü naga taxŭnŭe i ngēma ore! —ñanagürü. ¹⁶ Rü ñanagürü ta ga Ngechuchu: —¿Tacügu tá chanangu i ñaã duŭxŭgü i ñuxma maxŭxŭ? Maneca ñaã duŭxŭgü rü taxumaãma nataègü ngëxgumarüŭ i ñuxre i buxŭgü i nügümaã íãxtüwa rütogŭxŭ, rü íxŭnŭcèxwèxegŭxŭ, rü tagaãcü namücŭgŭxŭ ñagŭxŭ:

¹⁷ “Marü wowerumaã pexcèx tapaxetagü, natürü tama ípixŭãchitanŭxŭ. Rü marü ngechaŭ i wiyaegu pexcèx tawiyaegü, natürü tama pexauxe”, ñagŭxŭ. Rü ngēma buxŭgürüŭ nixŭ i ñaã duŭxŭgü. ¹⁸ —Yerü núma naxŭ ga Cuáŭ ga baiŭxēēruŭ rü tama pãŭ

nangõx rü tama binu nayaxaxü. Rü yexguma ga nümagü rü: “Nangoxoãx” ñanagürügü nüxü. ¹⁹—Rü ñuxüchi núma chaxü i choma ya Tupana Nane na duüxüxü chíxü. Rü choma rü õna changõx rü binu chayaxaxü. Rü ngëxguma i nümagü rü taanüxüchixü rü ngãxwëxexü choxü nawogüe. Rü nüxü nixugüe rü pecaduãxgüxümaã chaxãmücü, rü namaã chaxãmücü i ngëma duüxügü i Dumaãrü ãëxgacücèx dïeru ngïxü ideetanüxü. Natürü Tupanaãrü cuèx rü meãma nangõx tümawa ya yíxema aixcüma nawe rüxíxë — ñanagürü ga Ngechuchu.

*Ïãnegü ga tama Tupanaga ñnüene
(Lc 10.13-15)*

²⁰ Rü yexguma ga Ngechuchu rü inanaxügü ga na yangagüãxü ga yema duüxügü ga guma ñãnegüçüãx ga ngextá yexeraãcü ínaxüaxüwa ga taxü ga mexügü ga Tupanaãrü poramaã naxüxü. Rü poraãcü nayangagü, yerü yema duüxügü rü tama nüxü narüxoe ga norü chixexü. ²¹ Rü ñanagürü ga Ngechuchu: —Rü wüxi i ngechaü nixí i pexcèx, Pa Corachíüçüãxgü rü Pa Bechaídacüãxgüx, yerü yexguma chi Tiruarü ñãnewa rü Chidãüãrü ñãnewa chanaxüxgu ga yema mexügü ga cuèxruügü ga Tupanaãrü poramaã petanüwa chaxüxü, rü woo ga na poraãcü yachixexü ga yema duüxügü rü nuxcü mama chitama nüxü narüxoe ga yema nacüma ga chixexü, rü poraãcüxüchi chima nügümaã nangechaügü rü naxauxe, yerü chi nügü nicuèxãchitanü ga na yapedaduãxgüxü. ²² —Natürü pemaã nüxü chixu rü ngëma ngunexü i Tupana nagu napoxcuexü i pecaduãxgüxü, rü ngëma ngunexügu rü Tirucüãxgü rü Chidãüçüãxgüarü yexera tá pexü napoxcue i pemax, Pa Corachíüçüãxgü rü Bechaídacüãxgüx. ²³ —Rü pemax, Pa Capernáüçüãxgü i Duüxügüx, ¿rü pema nagu perüxínüëgu rü daxügüxü i naãnewa tá ipexíxü? Pemaã nüxü chixu rü naãnetüüwa i ngextá Tupana Chatanáxü ípoxcuxüwa tá nixí i pewogüxü. Rü yexguma chi Chodomaãrü ñãnewa chanaxüxgu ga yema mexügü ga cuèxruügü ga Tupanaãrü poramaã petanüwa chaxüxü, rü guma ñãne ga nuxcüma norü pecadugagu iyarüxoxüne rü ñuxma rü chi nangëxma. ²⁴ —Natürü pemaã nüxü chixu rü ngëma ngunexü i Tupana nagu napoxcuexü i pecaduãxgüxü, rü ngëma ngunexügu rü Chodomacüãxgüarü yexera tá pexü napoxcue i pemax, Pa Capernáüçüãxgüx — ñanagürü.

*Chauxcèx pexí na chauxütagu perüngüëxüçèx
(Lc 10.21-22)*

²⁵ Rü yexguma rü ñããcü nayumüxë ga Ngechuchu, rü ñanagürü: —Pa Chaunatü ya Daxügüxü i Naãne rü Ñoma i Naãneãrü Yorax, cuxü chicuèxüü, erü ñãã chorü ngüexügüxü nüxü cucuèxëë i ñãã ore i naxchaxwa íquicüxü i duüxügü i ñoma i naãnewa nüxü cuèxüchigüxü. ²⁶ —Rü moxë cuxna chaxã, Pa Chaunatüx, erü cuma cunaxwëxe na ngëmaãcü cunaxüxü —ñanagürü. ²⁷ Rü ñanagürü ta ga Ngechuchu: —Chaunatü choxna nanaxã i guxüma i tacü i ngëxmaxü. Rü Chaunatüxicatama choxü nacuèx na texé chíxü i choma i Nane. Rü tama guxüma i duüxügü aixcüma nüxü nacuèx na texé yíxü ya Chaunatü. Rü choma ya Nane, rü ngëma duüxügü i Chaunatüxü nüxü chadauxëëchaüxüxícatama nixí i aixcüma nüxü cuèxgüxü na texé yíxü ya Chaunatü. ²⁸ —¿Rü nuã chauxütawa pexí i guxãma i pema ya ipaexe nagagu i perü chixexügü rü perü íxãchiãëgü! Rü choma rü tá pexna chanayaxu i pexweta na iperüngüëxüçèx. ²⁹ —¿Rü ñuxüchi penayaxu i chorü ucuxëgü rü naxcèx pedauxütaegü i chaucüma! Erü choma rü yaxna pemaã chaxínü rü taguma chaugü chicuèxüxü. Rü ngemaãcü tá nüxü ipeyangau i ngema taãë i aixcüma íxíxü. ³⁰ —Erü ngëma pexü chamuxü rü natauxcha na naga pexínüëxü. Rü ngëma pexü chanaxwaexü rü tama naguxcha na penaxüxü —ñanagürü ga Ngechuchu.

12

Ngechucharü ngúexüğü rü trigu nicãüetanü ga ngüchigaarü ngunexügu
(Mr 2.23-28; Lc 6.1-5)

¹ Rû wüxi ga ngüxchigaarü ngunexügu rü Ngechuchu rü norü ngúexügümaã trigunecügu nixü. Rû nataiyae ga norü ngúexüğü, rü yemacèx inaxiãcüma yoxocüne triguta nicãüetanü, rü inayangõetanü. ² Rû yexguma yemaxü nadaugügu ga Parichéugü rü ñanagürügü Ngechuchuxü: —Dücèx i curü ngúexüğü rü chixexü naxüe. Erü ngüxchigaarü ngunexügu napuracüe, rü nachuxu nixi i ngëma —ñanagürügü. ³ Rû Ngechuchu nanangãxü, rü ñanagürü: —¿Taguma êxna poperawa nüxü pedau ga tacü na naxüxü ga nuxcümaücü ga âëxgacü ga Dabí ga yexguma nataiyèxgu ga nûma rü natanüxügü? ⁴ —Rû Tupanapatagu naxücu rü nanangõx ga yema pâü ga üünexü ga Dabícèx rü natanüxügücèx chuxuxü ga na nangõxgüãxü. Yerü paigücèxicatama nixi ga yema pâü. ⁵ —Rû pemax, Pa Parichéugüx ¿taguma êxna nawa pengúe ga yema ore ga mugüpanegu Moiché ümatüxü ga ñaxü rü marü name i paigü rü ngüxchigaarü ngunexügu napuracüe i tupauca ya taxünewa? Rû ngëma rü tama wüxi i pecadu nixi naxcèx i ngëma paigü. ⁶ —Natürü pemaã nüxü chixu rü nuã petanüwa nangëxma i wüxi i duüxü i tupauca ya taxünearü yexera ixixü i Tupanapëxewa. ⁷ —Natürü pema rü tama nüxü pecuèx i ñuxü ñaxüchiga nixi i ngëma Tupanaarü ore i ümatüxü i ñaxü: “Choma rü tama chanaxwèxe i chauxcèx peyamèx i carnerugü, natürü chanaxwèxe i togü pexü nangechaütümüügü”, ñaxü. Rû ngëxguma chi meã nüxü pecuèxgügu i ngëma ore, rü tãü chima chixri nachiga pidexagü i ñaã chorü ngúexüğü i taxuüma i chixexü ügüxü i Tupanapëxewa. ⁸ —Rû choma i Tupana Nane na duüxüxü chiixü, rü aixcüma ngüxchigaarü yora chixi —ñanagürü ga Ngechuchu.

Wüxi ga yatü ga yumécüchiga
(Mr 3.1-6; Lc 6.6-11)

⁹ Rû yexguma yema nachicawa inaxüüxgu ga Ngechuchu, rü guma iãneärü ngutaquëxepataügu naxücu. ¹⁰ Rû yéma nayexma ga wüxi ga yatü ga norü wüxichacüüwa yumécü. Rû nûmagü ga Parichéugü rü naxcèx nadaugü ga ñuxãcü norü âëxgacügüxütawa Ngechuchuxü na inaxuaxügüxü. Rû yemacèx Ngechuchuna nacagüe, rü ñanagürügü: —¿Namexü yiixü na texé naxcèx yataanexëëxü i wüxi i daawexü i ngüxchigaarü ngunexügu? —ñanagürügü. ¹¹ Rû Ngechuchu nanangãxü, rü ñanagürü: —¿Texé i petanüwa rü ngëxguma chi ngüxchigaarü ngunexügu wüxi i perü carneru puchugu nguxgu, rü taux êxna i ngëxgumatama ípeyadaugüxü rü ípenatúächixü woo ngüxchigaarü ngunexü yixigu? ¹² —Natürü Tupanapëxewa rü wüxi i duüxü rü poraãcüxüchima wüxi i carneruarü yexera nixi. Rû ngëmacèx name nixi i mexü taxü i woo ngüxchigaarü ngunexü yixigu —ñanagürü. ¹³ Rû ñuxüchi ga Ngechuchu rü ñanagürü nüxü ga guma yatü ga yumécü: —¿Iyarüwëxächimëxë! —ñanagürü. Rû guma yatü rü inayarüwëxächimëxë, rü yexgumatama narümemëx, rü naí ga naxmëx ga mexünerüü nixi. ¹⁴ Rû yexguma yemaxü nadaugügu ga Parichéugü, rü inachoxü ga yéma. Rû inanaxügüe na naxcèx nadaugüxü ga ñuxãcü tá na Ngechuchuxü yamëxgüxü.

Nuxcümaüxü ga ore ga Ngechuchuchiga

¹⁵ Rû yexguma Ngechuchu nüxü cuáchigagu na Parichéugü na yamëxgüchaüxü, rü inaxüxü ga guma iãnewa. Rû muxüma ga duüxügü rü nawe narüxí. Rû nûma ga Ngechuchu rü nanameëxëe ga guxüma ga yema duüxügü ga idaaweexü. ¹⁶ Rû duüxügüna naxãga na tama nüxü yaxugüexücèx na texe na yiixü ga nûmax. ¹⁷ Rû yemaãcü nanaxü ga Ngechuchu na yanguxëëãxücèx ga yema ore ga nuxcümaücü ga Tupanaarü orearü uruü ga Ichaxía nüxü ixuxü ga ñaxü:

18 “Daa nixĩ ya chorü duũ ya chomatama nüxũ chaxunetacü rü nüxũ changechaũcü rü namaã chataãẽxũchicü. Rü Chauãẽ i Üünexũ rü nüxna tá chanamu. Rü nüma tá guxũ i duũxũgü i tama Yudiugü ixĩgũxũmaã nüxũ nixu i ore i mexũ i aixcũma ixĩxũ. 19 Rü tagutáma ngextá texémaã niporagacüü rü taxúemaãtáma ngextá nipura. Rü tagutáma texé ããneãrũ ítamũgũwa nüxũ taxĩnũ na natagaxũ. 20 Rü nüma rü tãütáma nanadai i ngẽma duũxũgü i norü õwa turaexũ, rü tãütáma inayanaxoxẽẽ i ngẽma duũxũgü i írarüwatama yaxõgũxũ. Rü ngẽmaãcũ tá nixĩ ñuxmatáta guxũ i naãnewa nangu i ngẽma norü ore i aixcũma ixĩxũ. 21 Rü guxũ i duũxũgü i tama Yudiugü ixĩgũxũ rü tá naxcèx naxĩ na ngẽmaãcũ naxũtawa nayauxgũãxũcèx i norü maxũ i taguma gúxũ”, ñanagürü ga Ichaxía.

*Parichéugü rü Ngechuchuxũ nixugüe na ngoxoarü poramaã napuracũxũ
(Mr 3.20-30; Lc 11.14-23, 12.10)*

22 Rü Ngechuchuxũtawa nanagagü ga wüxi ga yatü ga ngoxoãcũ ga ngexetücü rü tama idexacü. Rü Ngechuchu nanamexẽẽ. Rü guma yatü rü yexgumatama nidauchi rü nidexa. 23 Rü guxũma ga duũxũgü rü nabèixãchiãgũ ga yexguma yemaxũ nadaugügu. Rü ñanagürügü: —¿Taux õxna daa yĩxũ ya Dabí nane ya Cristu? —ñanagürügü. 24 Natürü yexguma yemaxũ naxĩnũëgu ga Parichéugü, rü ñanagürügü: —Ñãã yatü i Ngechuchu, rü ngoxogünatü i Bechebúarü poramaã nixĩ i ínawoxũãxũ i ngoxogü — ñanagürügü. 25 Natürü nüma ga Ngechuchu rü nüxũ nacuèxama ga tacügu na naxĩnũëxũ. Rü yemacèx ñanagürü nüxũ: —Ngẽxguma chi wüxi i nachiũãnecũãx i duũxũgü nügü itoyegu rü nügütanüwa chitama nügü nadaixgu, rü nügü chitama naguxẽẽ. Rü ngẽxguma chi wüxi ya ããnecũãx rü õxna wüxi ya ãcũãx nügũmaã nuẽẽchagu rü nügü nadaixgu, rü nügü chitama naguxẽẽ. 26 —Rü ngẽxguma chi Bechebú nügütama itèxüchigu rü nügütama yamèxgu, ¿rü ñuxãcũ chi ãẽxgacüecha yĩxũ? 27 —Rü pemax, Pa Parichéugũx, rü choxũ pixuxgu rü Bechebúarü poramaã íchanawoxũ i ngoxogü. Natürü ngẽxguma chi Bechebúarü poramaã íchanawoxũxgu i ngoxogü, ¿rü texéarü poramaã nixĩ i perü ngúexũgü rü ínawoxũãxũ i ngoxogü? Rü dücax, rü ngẽma perü ngúexũgütama nixĩ i peccèx nangoxẽẽxũ na ípetüexũ. 28 —Natürü pemaã nüxũ chixu rü aixcũma Tupanaãẽ i Üünexũãrũ poramaã nixĩ i íchanawoxũxũ i ngoxogü. Rü ngẽmawa pexũ nüxũ chachuèxẽẽ na marü núma petanüwa nanguxũ ya Tupana, na perü ãẽxgacü yĩxũcèx. 29 —¿Rü ñuxãcũ texé wüxi ya yatü ya poracüpatagu taxücu na tanapuxũxũcèx i norü ngẽmaxũgü, ega tama tayanèixiragu i noxrix? Rü ngẽxguma tayanèixiraguxicatama nixĩ i nüxna tanapuxũxũ i norü ngẽmaxũgü ya yima yatü ya poracü. 30 —Rü yixema tama choxũ ngechaũxẽ rü chauxchi taxai. Rü yixema tama choxũ rüngũxẽẽxẽ na Tupanacèx tananutaquẽexũ i duũxũgü rü chauxchawa tanangianexẽẽ. 31 —Rü ngẽmacèx pemaã nüxũ chixu rü Tupana tá nüxũ nüxũ nangechaũ i guxũma i pecadugü i duũxũgü ügũxũ rü guxũma i norü dexagü i chixexũ. Natürü yixema Tupanaãẽ i Üünexũmaã tacü ixugüxe, rü Tupana rü tagutáma tüxũ nüxũ nangechaũ i ngẽma chixexũ. 32 —Rü guxãma ya texé ya tacü chomaã ixugüxe rü Tupana tá tüxũ nüxũ nangechaũ i ngẽma. Natürü texé ya Tupanaãẽ i Üünexũmaã tacü ixugüxe, rü Tupana rü tagutáma tüxũ nüxũ nangechaũ i ngẽma, rü bai i ñoma i naãnewa, rü bai i daxũguxũ i naãnewa.

*Wüxi i nanetü rü norü owa nixĩ i nüxũ icuáxũ na tacü rü nanetü yĩxũ
(Lc 6.43-45)*

33 —Rü ngẽxguma wüxi i nanetü rü namexgu, rü norü o rü ta name. Natürü ngẽxguma wüxi i nanetü rü nachixèxgu, rü norü o rü ta nachixe. Rü wüxi i nanetü rü norü owa nixĩ i nüxũ icuáxũ ngoxi name rü õxna tama. 34 —Pa Æxtapearü Duũxũgũx, ¿ñuxãcũ i mexũ i orexũ pixuxũ ega pematama rü pichixecũmagu? Erü ngẽma ore i peèxmaã nüxũ pixuxũ rü peãẽwa nixĩ i ne naxũxũ. 35 —Wüxi ya mecü ya yatü rü mexũ i orexũ nixu,

erü naãewa rü aixcüma mexügu narüxĩnü. Natürü wüxi i yatü i chixecümaxü rü chixexü i orexü nixu, erü naãewa rü chixexügu narüxĩnü. ³⁶ —Rü choma pemaã nüxü chixu rü ngẽma ngunexü i nagu nagúxü i naãne, rü Tupana rü tá nüxna naca i guxü i duüxügu naxcèx i guxüma i ore i chixexü i nüxü yaxuxü i ñoma i naãnewa. ³⁷ —Erü ngẽma curü dexagüwa rü Tupana tá cuyü nangugü, rü tá cumaã nüxü nixu ngoxita cume i napëxewa rü ëxna tama —ñanagürü ga Ngechuchu.

Duüxügu ga tama yaxögüchaüxü rü naxcèx ínacagü ga to ga cuèxruü ga Tupanaärü poramaã üxü

(Mr 8.12; Lc 11.29-32)

³⁸ Rü yexguma rü ñuxre ga Parichéugü rü Yudíugüarü ngúexëëruügu ga ore ga mugüwa nguxëëtaegüxü rü ñanagürügü Ngechuchuxü: —Pa Ngúexëëruüx, cuyü tadauxchaü na cunaxüxü i wüxi i cuèxruü i mexü i Tupanaärü poramaã cuyüxü —ñanagürügü.

³⁹ Rü Ngechuchu nanangãxü, rü ñanagürü: —Ñã duüxügu i chixecümagüxü rü tama yaxögüxü rü naxcèx ínacagü i wüxi i cuèxruü i mexü i Tupanaärü poramaã üxü. Natürü yema cuèxruü ga nuxcümaücü ga Tupanaärü orearü uruü ga Yonáxü ngupetüxüxüxüca tátama nadaugü. Rü taxuütáma i to i cuèxruü nüxü tadauxëë i ñã duüxügu. ⁴⁰ —Rü yexgumarüü ga Yoná ga tomaëxpüx ga ngunexü rü tomaëxpüx ga chütaxü choxni ga taxü ga bayenaãnüwa na nayexmaxü rü wenaxärü na nangóxü, rü ngëxgumarüü tá ta nixi i choma i tomaëxpüx i ngunexü rü tomaëxpüx i chütaxü i chatáxüwa changëxmaxü. Natürü wena táxarü changox. ⁴¹ —Rü ngëxguma naãneärü guxgu rü Tupana rü ñã duüxügüna nacaxgu i norü pecaduchiga, rü nuxcümaügüxü ga Nínibecüãx ga duüxügu rü tá inachigü. Rü Tupanapëxewa tá ínanaxuaxügu i ñã duüxügu i ñuxma maxëxü. Yerü nümagü ga Nínibecüãx rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera ixüxü. ⁴² —Rü ngëxguma naãneärü guxgu rü Tupana rü ñã duüxügüna nacaxgu i norü pecaduchiga, rü ngĩma ga nuxcümaücü ga Chabaaneärü äëxgacü rü tá iichi. Rü tá ínaxuaxü i ñã duüxügu i ñuxma maxëxü. Yerü ngĩma rü yaxüwaxüchi ne ixü na äëxgacü ga Charumóüxü naxĩnüxüçèx ga ñuxäcü poraäcü nüxü na nacüèxüchixü. Natürü ñuxma nuã petanüwa nangëxma i wüxi i Charumóüärü yexera ixüxü.

ngoxo i taeguxüchiga

(Lc 11.24-26)

⁴³⁻⁴⁴ —Rü ngëxguma wüxi i ngoxo rü wüxi ya yatüwa ínaxüxügu, rü dauxchitawa i ngextá taxüema íxãpataxüwa rü nu ne nanaxümare. Rü naxcèx nadau na ngexta na nangüxüçèx. Rü ngëxguma taxuxguma nüxü iyangauxgu na ngexta nangüegaxü, rü nagu narüxĩnü na wena nataeguxü naxcèx ya yima yatü ga noxri nawa ínaxüxüchirécü. Rü ngëxguma nataegugu, rü nüxü inayangau ya yima yatü na wüxi ya í ya ngëacüne rü mexëene rü meã nabixichinerüü na yüxü. ⁴⁵ —Rü ngẽma ngoxo rü ínixü rü naxcèx nayadau i to i 7 i ngoxogü i norü yexera i chixexü. Rü guxüma i ngẽma rü yima yatügu nayachocu, rü ngëxma naxãchiügu. Rü ngëxguma ya yima yatü rü noxriarü yexera nachixe. Rü ngëxgumarüü tá ta nüxü naxüpetü i ñã duüxügu i chixecümagüxü —ñanagürü ga Ngechuchu.

Ngechucharü mamá rü naëneëgüchiga

(Mr 3.31-35; Lc 8.19-21)

⁴⁶ Rü yexguma duüxügümaã íyadexayane ga Ngechuchu, rü yéma tangu ga naë rü naëneëgü. Rü ípataarü düxëtügu tarücho, rü Ngechuchumaã tidexagüchaü. ⁴⁷ Rü wüxi ga duüxü Ngechuchumaã nüxü nixu, rü ñanagürü: —Yéa düxëtüwa tangëxma ya cue rü cueneëgü, rü cumaã tidexagüchaü —ñanagürü nüxü. ⁴⁸ Natürü Ngechuchu nanangãxü ga yema duüxü ga namaã nüxü ixuxü ga yema ore, rü ñanagürü nüxü: —¿Texé tixi ya chaue? ¿Rü texégü tixi ya chaueneëgü? —ñanagürü. ⁴⁹ Rü yexguma ga Ngechuchu rü

norü ngúexüğüxü naxuneta, rü ñanagürü: —Düçèx, daxe tixĩ ya chaue, rü daagü nixĩ ya chaueneëgü. ⁵⁰—Erü guxãma ya texé ya naxúxe i Chaunatü ya daxüguçuarü ngúchaũ, rü yixema tixĩ ya chaueneë rü chaueyèx rü chaue —ñanagürü ga Ngechuchu.

13

Ore ga toecügu ixuxĩ (Mr 4.1-9; Lc 8.4-8)

¹ Rü yematama ngunexügu ga Ngechuchu rü ínaxüxü nawa ga guma ï ga nagu napexüne. Rü naxtaxaãnacüwa nayarüto. ² Rü muxüma ga duüxüğü rü yéma naxcèx nangutaquëxegü. Rü yemacèx düxwa wüxi ga ngegu nixüe ga Ngechuchu, rü guma nguewa narüto. Rü guxüma ga duüxüğü rü yexma naxnecütëxegu nachigü. ³ Rü yexguma ga Ngechuchu rü muxüma ga ore ga cuèxruüwa nanangüexëë ga duüxüğü. Rü norü ngüxëëtaewa rü ñanagürü: —Rü wüxi ga yatü ga toecü rü trigumaã nanagüane. ⁴—Rü yexguma trigumaã nagüaneãgu, rü ñuxre ga guma trigu rü namacüwagu nayi. Rü íngugü ga werigü, rü nanawecu. ⁵—Rü náigü ga trigu rü nutatanügu nayi ga ngextá ínachixcaxüwa ga waixüümü. Rü paxa narüxüğü ga guma trigu, yerü ga waixüümü rü tama nayaxcü. ⁶—Rü yexguma nangunagügu ga üëxcü, rü narüngëxgü ga guma trigu. Rü nayue yerü tama poraãcü nixãmëxã. ⁷—Rü náigü ga trigu rü tuxunecügu nayi. Rü yexguma nayaegu ga tuxugü, rü guma triguxü inawocu, rü nanadai. ⁸—Natürü náigü ga trigu rü mexü ga waixüümügu nayi. Rü yexguma nayaegu rü muxüma ga trigu nawa ínguxuchi. Rü nümaxü rü wüxireewa rü 100 püxü ínguxuchi ga norü o, rü náireegüwa rü 60, rü náireegüwa rü 30. ⁹—Rü yixema áchixëgüxe, jrü nagu tarüxínüë i ngëma ore! —ñanagürü.

Tacüçèx nixĩ ga yema ore ga cuèxruüğügu ixuxĩ (Mr 4.10-12; Lc 8.9-10)

¹⁰ Rü yexguma ga norü ngúexüğü rü Ngechuchucèx naxĩ, rü nüxna nacagüe, rü ñanagürüğü: —Pa Corix, ¿Tüxcüü i cuèxruüğügu cuyaxuãcüma cunangüexëëxü i ñaã duüxüğü? —ñanagürüğü. ¹¹ Rü Ngechuchu nanangãxü, rü ñanagürü nüxü: —Tupana rü pexüxícatama nüxü nacüexëë i ngëma ëxüguxü na ñuxãcü ãëxgacü yíxü i nümax. Natürü nüma i togü i duüxüğü rü tama nüxü nüxü nacüexëë i ngëma. ¹²—Rü texé ya aixcüma naga íñüxë i chorü ore, rü Tupana rü yexeraãcü tá tüxü nüxü nacüexëë. Rü ngëmaãcü tá tüxü nangëxma i taxü i cuèx. Natürü texé ya tama naga íñüxë i ñaã ore rü Tupana tá tüxna nanayaxu i ngëma íraxü i cuèx i tüxü ngëxmachirëxü. ¹³—Rü ngëmacèx nixĩ i ore i cuèxruümaã chanangüexëëxü i ngëma duüxüğü. Erü nümagü rü woo nüxü nadaugügu, rü ñoma tama nüxü nadaugüxürüü nixigü. Rü woo nüxü naxínüëgu, rü ñoma tama nüxü naxínüëxürüü nixigü. Rü tama nüxü nacüexgüéga. ¹⁴—Rü aixcüma ngëma duüxüğüchiga nixĩ ga yema Tupanaãrü ore ga nuxcümaücü ga norü orearü uruü ga Íchaxía nüxü ixuxü ga ñaxü:

“Rü ngëma duüxüğü rü tá aixcüma nüxü naxínüë, natürü tãütáma nüxü nacüexgüéga i tacüchiga na yíxü i ngëma nüxü naxínüëxü. Rü aixcüma tá nüxü nadaugü, natürü tãütáma nüxü nacüexgü na tacüchiga yíxü i ngëma nüxü nadaugüxü.

¹⁵ Erü ngëma duüxüğü rü tãütáma nüxü nacüexgüchaũ i chorü ore, rü naxchaxwa tá nügü narütütamachixëgü rü tá naxchaxwa napexetüğü. Rü ngëmaãcü tá nanaxüğü na tama nüxü nadaugüxüçèx i ngëma mexü i naxcèx chaxüxü, rü tama nüxü naxínüëxüçèx i chorü ore, rü tama nüxü nacüexgüxüçèx na ñuxãcü choma chanaxwëxëxüãcüma na namaxëxü, rü tama chauxcèx nadaugüxüçèx na chanamaxëxëxüçèx”,

ñanagürü. ¹⁶ Rü ñanagürü ta ga Ngechuchu: —Natürü pemax, Pa Chorü Ngúexüğüx, rü petaãëgü erü pexetüğümaãtama nüxü pedaugü i ngëma chaxüxü rü pexmachixëmaãtama

nüxü pexĩnüē i chorü ore. ¹⁷ —Rü aixcüma pemaã nüxü chixu rü muxüchixü ga nuxcümaügüxü ga Tupanaãrü orearü uruügü rü muxüchixü ga duüxügü ga imecümaxü, rü nüxü nadaugüchaü i ngēma ñuxma chauxütawa nüxü pedaügüxü. Natürü tama nüxü nadaügü. Rü nüxü naxĩnüēchaü i ngēma ore i ñuxma chauxütawa nüxü pexĩnüēxü. Natürü tama nüxü naxĩnüē —ñanagürü.

Ngechuchu rü meã nanangoxē ga yema ore ga toecüchigagu yaxuxü
(Mr 4.13-20; Lc 8.11-15)

¹⁸ Rü ñanagürü ta ga Ngechuchu: —¡Düçèx, iperüxĩnüē na ñuxü ñaxüchiga yĩxü i ngēma ore i cuèxruü i toecüchiga! ¹⁹ —Rü guma trigu ga namagu yixünerüü tixĩgü ya yixema nüxü ñnüēxē i ore i mexü na ñuxãcü ãëxgacü yĩxü ya Tupana natürü tama nüxü cuèxgüxe i ñuxü ñaxüchiga na yĩxü i ngēma ore. Rü tümaxütawa nangu i Chataná, rü tüxü nüxü inayarüngümaëxēē i ngēma ore i tümãēwa ngëxmachiréxü. ²⁰ —Rü guma trigu ga nutatanügu yixünerüü nixĩ i ngēma duüxügü i nüxü ñnüēxü i Tupanaãrü ore rü taãēãcüma nayauxgüxü. ²¹ —Natürü ngēma na tama aixcüma nagu naxĩnüēxü i ngēma ore, rü paxaãchitama nayaxögü, rü yixcüra ngëxguma ngēma oregagu guxchaxügü nüxü üpetügu rü éxna duüxügü naxchi aiegu, rü ínanatèxgü i ngēma ore. ²² —Rü guma trigu ga tuxunecügu yixünerüü nixĩ i ngēma duüxügü i Tupanaãrü orexü ñnüēxü rü yaxögüxü. Natürü ñoma i naãneãrü ngëmaxügücèx oegaãëgüxü, rü ngëmaguama rüxĩnüēxü, rü düxwa nüxü inayarüngümaë i ngēma ore. Rü guxüma i ngēma rü Tupanaãrü orexü nüxü narüxoxēē na tama aixcüma meã Tupanawe naxĩxüçèx i ngēma duüxügü. ²³ —Natürü guma trigu ga mexü ga waixümügu yixünerüü nixĩ i ngēma duüxügü i nüxü ñnüēxü i Tupanaãrü ore, rü nüxü cuèxgüxü i ñacüchiga na yĩxü, rü naga ñnüēxü rü meã naxcèx maxëxü. Rü tümáxē rü guma trigu ga 100 püxü nawa ínguxuchinerüü tixĩ. Rü tümáxē rü guma 60 püxü nawa ínguxuchinerüü tixĩ. Rü tümáxē rü guma 30 püxü nawa ínguxuchinerüü tixĩ —ñanagürü ga Ngechuchu.

Ore ga chixexü ga natüane ga trigutanügu toxüchigagu ixuxü

²⁴ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü nüma ya Tupana rü ñoma wüxi ga yatü ga mexüne ga triguchire naãnegu tocürüü tá nanaxü. ²⁵ —Rü guma yatü rü yexguma ínapeyane rü wüxi ga norü uwanü ga naxchi aixü rü yéma naxü. Rü naëchita yexma trigunecügu nayatogü ga chixexü ga natüane. Rü ñuxüchi ínixü. ²⁶ —Rü yexguma naxügügu ga trigu rü nayaegu rü yexwacèx yaxoxgu, rü yema natüane rü ta nangox. ²⁷ —Rü yexguma ga yema yatüarü duüxügü, rü namaã nüxü nayarüxügü, rü ñanagürügü:

“Pa Corix, cuma rü cuanegu rü triguxicachirëx ngëxma cuto. ¿Natürü ñuxãcü i ñuxma rü chixexü i natüane rü ta ngema naxügüxü?” ñanagürügü. ²⁸ —Rü yexguma ga yema naãneãrü yora, rü ñanagürü nüxü:

“Maneca wüxi i chorü uwanü i chauxchi aixü nixĩ i ngema ngexü wagüxü” ñanagürü. Rü yexguma ga norü duüxügü rü nüxna nacagü, rü ñanagürügü:

“Pa Corix, ¿cunaxwëxexü na tanabéxü i ngēma chixexü i natüane?” ñanagürügü. ²⁹ —Natürü nüma ga norü cori rü ñanagürü nüxü ga yema norü duüxügü:

“¡Nüetama ngema nangëxmagü! Erü ngëxguma chi penabëxgu, rü ngürüãchi trigumaã chi ta penangauxëē na penabéxü. ³⁰ —Rü narümemã nixĩ i nüetama ngema nayae ñuxmatáta triguarü buxgüwa nangu. Rü ngëxguma rü ngema tá chanamugü i chorü puracütanüxü, rü tá nanabëxira i ngēma chixexü i natüane. Rü tá ínanagoxüçüta, rü ñuxüchi tá ínanagu. Rü ngëmawena tá nayabuxgü i trigu, rü naxchiügu tá choxü namaã nanguxügü” ñanagürü.

Ore ga motachachiregu ixuxü
(Mr 4.30-32; Lc 13.18-19)

³¹ Rū Ngechuchu rü to ga ore ga cuèxruũxũ duũxũgũmaã nixu, rü ñanagürü: —Rü ngẽma Tupanaarü ore rü yexera nixũchigü. Rū ñoma wüxi ya motachachire ya wüxi ya yatü naãnegu toxũnerüũ nixĩ. ³² —Rü woo naxíraxũchichirẽx ya yima naxchire, natürü ngẽxguma naxũxgu rü nayexgu, rü wüxi i nanetü i taetaxũ nixĩ. Rū ngẽmacèx i werigü rü natanüwa naxĩ, rü ngẽxma nayarũxũchiãũgü —ñanagürü.

*Ore ga pãũãrũ puxẽẽruũgu ixuxũ
(Lc 13.20-21)*

³³ Rū Ngechuchu rü to ga ore ga cuèxruũxũ duũxũgũmaã nixu, rü ñanagürü: —Rü Tupanaarü ore rü duũxũgũtanüwa nangu. Rū nixũchigü rü nanaxũchicüxü i norü maxü. Rū ñoma íxraxũ i pãũãrũ puxẽẽruũ i wüxi i nge taxũ i ngírü pãũchara namaã ipuxẽẽxũrũxũ nixĩ —ñanagürü ga Ngechuchu.

*Cuèxruũgu ixuxũ ga oremaã nidexa ga Ngechuchu na yanguxẽẽãxücèx ga Tupanaãrũ ore
(Mr 4.33-34)*

³⁴ Rū guxũma ga yema ore ga Ngechuchu duũxũgũmaã nüxũ ixuxũ, rü cuèxruũgu yaxuãcũma namaã nüxũ nixu. Rū yemaãcüxicatama nixĩ ga namaã nüxũ yaxuxũ. ³⁵ Rū yemaãcü nanaxü ga Ngechuchu na yanguxẽẽãxücèx ga yema Tupanaãrũ ore ga nuxcũmaũcü ga norü orearü uruũ ga Ichaxía ümatũxũ ga ñaxũ: “Choma rü cuèxruũgu ixuxũ i oremaã tá duũxũgũmaã chidexa. Rū tá namaã chanangoxẽẽ i ngẽma cuèx i èxũguxũ ga yexguma noxri naãne ixũgũgumama iicũxũ”, ñaxũ.

Ngechuchu nanangoxẽẽ na tacũchiga yĩxũ ga yema ore ga chixexũ ga natüane ga trigutanũgu toxũchigagu ixuxũ

³⁶ Rū Ngechuchu ínayamugü ga duũxũgü, rü guma ì ga nagu napexũnegu naxücu. Rū norü ngüexũgü rü yema naxcèx naxĩ, rü ñanagürügü nüxũ: —Pa Corix, ¡tomaã nangoxẽẽ na tacũchiga yĩxũ i ngẽma chixexũ i natüanegu ixuxũ i ore! —ñanagürügü. ³⁷ Rū yexguma ga Ngechuchu rü ñanagürü nüxũ: —Rü yima mexũ i trigumaã toecü, rü nüma nixĩ ya Tupana Nane ya duũxũxũ ixĩcü. ³⁸ —Rü ngẽma naãne i nagu natoexũ, rü ñoma i naãne nixĩ. Rū ngẽma mexũ i trigu rü ngẽma nixĩ i duũxũgü i Tupanaãrũ duũxũgü ixĩgũxũ. Rū ngẽma chixexũ i natüane, rü ngẽma nixĩ i duũxũgü i Chatanáãrũ ixĩgũxũ. ³⁹ —Rü ngẽma norü uwanü i chixexũ i natüanemaã naẽchita naãnegu yatoexũ, rü ngẽma nixĩ i Chataná. Rū ngẽma ngunexũ i nagu nabuxuxũ i trigu rü naãneãrũ gũxchiga nixĩ. Rū ngẽma puracũtanũxũ i triguarü buxwa puracüexũ, rü Tupanaãrũ orearü ngeruũgü i daxũcũãx nixĩgü. ⁴⁰ —Rü ngẽxgumarüũ i ngẽma chixexũ i natüane rü na nabéxũ rü ñuxũchi na ínaguxũ, rü ngẽxgumarüũ tá ta nixĩ i naãneãrũ guxgu. ⁴¹ —Rü choma i Tupana Nane na duũxũxũ chiĩxũ, rü tá chanamu i chorü orearü ngeruũgü i daxũcũãx na nadeãxücèx i ngẽma duũxũgü i chixexũ ügũxũ rü ngẽma duũxũgü i toguãxũ chixexũ ügũxẽexũ. Rū tá ínanawoxũ. ⁴² —Rü tá üxüxetüwa nayawocu. Rū ngema tá naxauxe rü tá nixũxchapütagü. ⁴³ —Natürü guxũma i ngẽma duũxũgü i Tupanaga ínüexũ, rü tá üexcürüũ inabaixgü i ngextá Tanatü ya Tupana ãẽxgacü íixĩxüwa. Rū yíxema ãchixẽgũxe, ¡rü nüxũ taxĩnüe i ngẽma ore! —ñanagürü.

Ore ga taxũ ga dẽru ga icũxũgu ixuxũ

⁴⁴ Rū Ngechuchu rü to ga ore ga cuèxruũxũ duũxũgũmaã nixu, rü ñanagürü: —Rü ngẽma na ãẽxgacü yĩxũ ya Tupana rü duũxũgücèx rü namexechi ñoma wüxi i uiru i wüxi i naãnegu icũxũrũxũ. Rū wüxi ya yatü rü ngẽxguma nüxũ iyangauxgu i ngẽma uiru, rü paxa wena ngẽma naãnegu nayacux. Rū taãẽacũma namaã nataxe i guxũma i norü ngẽmaxũgü na naxcèx nataxexücèx i ngẽma naãne na noxrü yĩxũcèx i ngẽma uiru —ñanagürü.

Ore ga nuta ga ngẽãẽruũ ga tatanücügu ixuxũ

⁴⁵ Rū ñanagürü ta ga Ngechuchu: —Rū duñxügü rü ñoma wüxi i taxetanüxü i nutagü ya ngèxãëruüçèx dauxürüü nixīgü na poraãcü Tupanaxcèx nadaugüxü na nüma norü ãëxgacü yixixüçèx. ⁴⁶ —Rü ngëma taxetanüxü rü ngëxguma düxwa nüxü iyangauxgu ya wüxi ya nuta ya ngèxãëruü ya guxüärü yexera mexëchicü, rü namaã nataxe i guxüma i norü ngëmaxügü na naxcèx nataxexüçèx ya yima nuta ya mexëchicü, na noxrü yixüçèx.

Ore ga püchagu ixuxü

⁴⁷ —Rü ngëma Tupana na ãëxgacü yixixü rü wüxi i pücha i nagúxüraüxü i choxni namaã iyaxuxüxürüü nixi. ⁴⁸ —Rü ngëxguma naxããcuxgu i ngëma pücha, rü ngëma püchaetanüxü rü naxnecüpechinügu ínanatúächigü. Rū ngëma narütogü rü nayadexechi i ngëma mexü i choxni, rü pexchigu nananucu. Rū ngëma tama ingõxü i choxni rü ínanawogü. ⁴⁹⁻⁵⁰ —Rü ngëxgumarüü tá nixi i ngëxguma naguxgu i naãne. Erü Tupanaärü orearü ngeruügü i daxüçüãx, rü núma tá naxi. Rū tá nayadexechi i ngëma mexü i duñxügü nüxna i ngëma ichixexü, rü tá üxüxetüwa nayawocu i ngëma duñxügü i chixexü. Rū ngëma tá naxauxe, rü tá nixüxchapütägü —ñanagürü ga Ngechuchu.

Ngexwacaxügüxü rü nuxcümaügüxü i ngëmaxügüchiga

⁵¹ Rū yexguma ga Ngechuchu rü norü ngüexügüna naca, rü ñanagürü: —¿Nüxü pecuáxü yixü na tacüchiga yixü i ngëma pemaã nüxü chixuxü? —ñanagürü. Rū nümagü nanangãxügü rü ñanagürügü: —Ngëmaãcü, Pa Corix, nüxü tacuèx —ñanagürügü. ⁵² Rū yexguma ga Ngechuchu rü ñanagürü nüxü: —Rü ngëxguma wüxi i ngüexëëruü i ore i mugüwa ngüxëëtaexü aixcüma nüxü cuèxgu na ñuxãcü ãëxgacü yixü ya Tupana, rü nanaxwèxe na meã nüxü nacuáxü i ngëma nuxcümaüxü i Tupanaärü ore rü ñaã ngexwacaxüxü i chorü ore rü ta, ngëxgumarüü i wüxi i cori i norü taxepatawa duñxügüçèx inawéxü i norü ngëmaxügü i ngexwacaxügüxü rü norü ngëmaxügü i nuxcümaügüxü ta —ñanagürü ga Ngechuchu.

Ngechuchu rü Nacharétuwa nayexma

(Mr 6.1-6; Lc 4.16-30)

⁵³ Rū yexguma Ngechuchu nüxü rüchaxgu ga yema ore ga cuèxruügüxü na yaxuxü, rü inaxüãchi ga yéma. ⁵⁴ Rū guma ñane ga nawa nayaxüne ga Nacharétuwa naxü. Rū guma ñaneärü ngutaquëxepataügu naxücu rü yéma nanangüexëë ga duñxügü. Rū yema duñxügü rü nabëixãchiãëgü namaã ga norü ore. Rū ñanagürügü: —¿Ngextá nüxü nacuèx i ngëma ngüxëëtae? ¿Rü ñuxãcü nüxü nacuèx na naxüãxü i ngëma mexügü i taxügü i Tupanaärü poramaã naxüxü? ⁵⁵ —¿Taux éxna i daa yixü ya carpinteru ya Yúche nane ya María ngíne, ya Chaütiágu rü Yúche rü Chimáü rü Yuda naëneë ixicü? ⁵⁶ —¿Rü taux éxna i naëyëxgü rü nuxma tatanügu naxãchiügüxü? ¿Rü ngëxguma i ngextá yixü i nayauxãxü i ngëma nüxü nacuáxü? —ñanagürügü. ⁵⁷ Rū yemacèx ga duñxügü rü tama nüxü inarüxínüëchaü. Natürü Ngechuchu rü ñanagürü nüxü: —Guxüma i togü i duñxügü rü namaã nataãëgü i wüxi i Tupanaärü orearü uruü. Natürü ngëma orearü uruüchiüãnewatama rü duñxügü rü tama namaã nataãëgü —ñanagürü. ⁵⁸ Rū yema duñxügütanüwa rü tama poraãcü nanaxü ga mexügü ga taxügü ga Tupanaärü poramaã naxüxü, yerü tama nüxü nayaxögüchaü ga yema duñxügü.

14

Nayu ga Cuáü ga baiüxëëruü

(Mr 6.14-29; Lc 9.7-9)

¹ Rū yema ngunexügügu nixi ga Gariréaaneärü ãëxgacü, ga Erode rü Ngechuchuxü nacuáchigaxü. ² Rū Erode rü norü duñxügümaã ñanagürü: —Yima nixi ya Cuáü ga baiüxëëruü rü marü wena namaxü. Rū ngëmacèx nüxü nangëxma i pora na naxüãxü i ngëma mexügü i taxügü i Tupanaärü poramaã naxüxü —ñanagürü. ³ Rū yema ñanagürü, yerü nümatama ga Erode rü üpaacü norü churaragüxü namu na Cuáüxü yayauxgüxüçèx

rü cadenamaã yanëixgüãcüma poxcupataüwa nagagüãxüçèx. Rü yemaãcü nanaxü ga Erode, yerü yemaãcü naxcèx íca ga naxmèx ga Erodía ga naëneë ga Piripi naxmèxchirèx ixïcü. ⁴ Rü Erode rü Cuáümaã nanu yerü ga Cuáü rü ñanagürü nüxü: —Tama name na cuxumèxmaã cuxãmaxü —ñanagürü. ⁵ Rü Erode rü Cuáüxü nimáxchaü, natürü duüxügüxü namuü yerü guxüma ga duüxügü rü nagu narüxüñüë rü aixcüma Tupanaãrü orearü uruü nixí ga Cuáü. ⁶ Natürü yexguma norü taunecüarü ngunexüwa nanguxgu ga Erode rü wüxi ga peta naxü. Rü yema petawa rü Erodíaxacü rü íyayüxparachigüxü napèxewa ga yema petatanüxü. Rü nüma ga ãëxgacü ga Erode rü poraãcü norü me nixí ga yema naxüxü ga naxãcürücü. ⁷ Rü yemacèx ngímaã inaxuneta rü ñanagürü ngíxü: —¡Choxna naxcèx naca i tacü i cunaxwèxexü, rü aixcüma tá cuxna chanaxã! —ñanagürü. ⁸ Rü yexguma ga ngíma rü ngíëxütawa ixü, rü ngíëna iyaca, rü ngígürügü: —Pa Ma, ¿tacü i cunaxwèxexü na naxcèx íchaçaxü? —ngígürügü. Rü ngíë ngíxü ingãxü, rü ngígürügü: —¡Naxcèx ínaca i Cuáü ya baiüxëëruüëru! —ngígürügü ga ngíë. Rü yexguma ga yema pacü rü ngígürügü nüxü ga Erode: —Chanaxwèxe i wüxi ya poratugu choxna cunaxã i Cuáü ya baiüxëëruüëru —ngígürügü. ⁹ Rü yexguma ga ãëxgacü ga Erode rü inayarümaãchi namaã ga yema ore, natürü norü unetacèx rü norü petatanüxüçèx rü tama ngíxü nawomüxëëchaü. Rü nanamu ga ñuxre ga norü churaragü na ngíxna naxãgüãxüçèx ga yema naxcèx ínaçaxü. ¹⁰ Rü yemaãcü poxcupataüwa nanamu na yéma Cuáüxü yanadaenaãxüçèx. ¹¹ Rü yemawena wüxi ga poratugu ngíxütawa nanange ga Cuáüëru, rü yema pacüna nayaxã. Rü ngíma rü ñuxüchi ngíëna iyaxã. ¹² Rü yexguma ga Cuáüãrü ngüexügü rü yéma naxí, rü nayangegü ga naxüne, rü inayatèxgü. Rü yemawena rü Ngechuchumaã nüxü nayarüxugüe.

Ngechuchu rü nanachibüexëë ga 5000 ga yatügü
(Mr 6.30-44; Lc 9.10-17; Cu 6.1-14)

¹³ Rü yexguma yemaxü nacuáchigagu ga Ngechuchu, rü nüxícatama wüxi ga nguegu nixüe, rü ínaxüxü ga yéma. Rü wüxi ga nachica ga taxúema íxãpataxüwa naxü. Natürü ga duüxügü rü nüxü nacuèxgüama ga ngextá na naxüxü. Rü ínachoxü ga norü íãnegüwa, rü dauxchitagu nawe narüxí. ¹⁴ Rü yexguma nguëwa ínaxüegu ga Ngechuchu rü nüxü nadau ga yema muxüma ga duüxügü. Rü nüxü nangechaütümügü. Rü nanameëxëë ga yema duüxügü ga idaaweexü ga naxcèx yéma nagagüxü. ¹⁵ Rü yexguma marü nachütachaügu rü Ngechuchucèx naxí ga norü ngüexügü, rü ñanagürügü nüxü: —Marü nachütachaü, rü ñuxüchi taxúema nuxma taxãpata i nuã. Rü name nixí ícuyamugü i ñaã duüxügü na íãnexãcügü ya ngaicamana ngëxmagünewa naxíxüçèx, rü ngema norü õnatèex yataxegüxüçèx —ñanagürügü. ¹⁶ Natürü ga Ngechuchu rü ñanagürü nüxü: —Taxuacüma nawoegu. ¡Rü pematama penachibüexëë! —ñanagürü. ¹⁷ Rü nümagü nanangãxügü, rü ñanagürügü: —Natürü nuã rü wüximëëxpüx i pãü rü taxre i choxnixícatama toxü nangëxma —ñanagürügü. ¹⁸ Rü Ngechuchu nanangãxü rü ñanagürü: —¡Nuã chauxütawa penana! —ñanagürü. ¹⁹ Rü yexguma ga Ngechuchu rü duüxügüxü namu na maxëtèxewa natogüxüçèx. Rü ñuxüchi nanade ga yema wüximëëxpüx ga pãü rü yema taxre ga choxnigü. Rü daxügu nadawenüãcüma Tupanana moxë naxã, rü ñuxüchi inanabücu ga yema pãügü. Rü norü ngüexügüna nanana, rü yema duüxügüxü nayanu. ²⁰ Rü guxüma ga yema duüxügü rü meãma nachibüe. Rü yemawena rü 12 ga pexchigü nanapagüamatama namaã ga yema pãü rü choxnichipèxegü ga íyaxügüxü. ²¹ Rü yema yéma chibüexü rü 5000 ga yatügü nixí, natürü ga ngexügü rü buxügü rü tama nayaxugü.

Dexáétügu nixü ga Ngechuchu
(Mr 6.45-52; Cu 6.16-21)

²² Rü yemawena ga Ngechuchu rü duüxügüxü íyamugüyane rü wüxi ga nguegu nay-achoüxëë ga norü ngüexügü na yoxni naxtaxaarü tocutüwa naxíxüçèx. ²³ Rü yexguma

duïxügüxü íyamugüguwena rü guma mèxpünewa ínaxüãchi ga Ngechuchu na nüxïca yéma yayumüxëxücèx. Rü yexma nüxïcatama nachütaü. ²⁴ Natürü ga norü ngúexügü rü naxtaxaarü ngãxütüchiügu nixägü ga yexguma. Rü tacü ga buanecü yexma nüxü naxü, rü poraãcü nayuape. ²⁵ Rü yexguma marü yangunechaügu rü norü ngúexügüwe inaxüãchi ga Ngechuchu. Rü dexáchiüétügu nixü naxcèx ga norü ngúexügü. ²⁶ Rü yexguma norü ngúexügü nüxü daugügu ga dexáchiüétügu na yaxüxü, rü poraãcü nabèixãchiãëgü. Rü norü muümaã aita naxüe, rü ñanagürügü: —Wüxi i naxchiximare nixï —ñanagürügü. ²⁷ Natürü ga Ngechuchu rü namaã nidexa rü ñanagürü nüxü: —¡Peporae! rü choma chixï. ¡Rü tãxü ipemuüëxü! —ñanagürü. ²⁸ Rü yexguma ga Pedru rü Ngechuchumaã nidexa rü ñanagürü: —Pa Corix, ega chi cuma quixïgu, ¡rü choxü namu na choma rü ta dexáétügu chixüxücèx rü cuxütawa na chaxüxücèx! —ñanagürü. ²⁹ Rü Ngechuchu ñanagürü nüxü: —Ëcü ¡nuã naxü! —ñanagürü. Rü yexguma ga Pedru rü ínaxüe ga nguewa. Rü inanaxügü ga dexáétügu na yaxüxü na Ngechuchuxütawa naxüxücèx. ³⁰ Natürü yexguma nüxü yacuèxãchigu ga na naporaxü ga buanecü rü namuü, rü inanaxügü ga na dexáchiügu nanguxü. Rü aita naxü rü ñanagürü: —Pa Corix, ¡choxü rüngüxëë! —ñanagürü. ³¹ Rü yexgumatama ga Ngechuchu rü Pedrumëxëgu nayayauxãchi, rü ñanagürü nüxü: —Cuma rü írarüwatama cuyaxõ. ¿Rü tüxcüü tama aixcüma cuyaxõxõchi? —ñanagürü. ³² Rü yexguma ngegu yachoügu ga Ngechuchu rü Pedru, rü nangupetü ga guma buanecü. ³³ Rü guxüma ga norü ngúexügü ga nguewa yexmagüxü rü Ngechuchupëxëgu nacaxãpüxügü rü nüxü nicuèxüügü, rü ñanagürügü nüxü: —Aixcümaxüchi cuma nixï i Tupana Nane quixü —ñanagürügü.

Yenecharétuanewa Ngechuchu nanameëxëë ga idaaweexü
(Mr 6.53-56)

³⁴ Rü yexguma marü yanguügu ga naxtaawa, rü Yenecharétuanewa nangugü rü yéma ínachoü. ³⁵ Rü yexguma yema duïxügü ga yémacüãx nüxü icuèxãchitanügu ga Ngechuchu na yïxü ga guma, rü guxüma ga yema naãnewa nanguchiga ga yéma na nayexmaxü ga Ngechuchu. Rü yemacèx naxütawa nanagagü ga yema duïxügü ga idaaweexü. ³⁶ Rü Ngechuchuxü nacèxügü na naxchirupechinügu mare yangögügüxücèx. Rü guxüma ga yema naxchirupechinügu ingögüexü rü narümeë.

15

Tacü nixï i Tupanapëxewa duïxügüxü chixexëëxü
(Mr 7.1-23)

¹ Rü Ngechuchucèx naxï ga ñuxre ga Parichéugü rü ngúexëëruügu ga ore ga mugüwa ngüxëëtaegüxü ga Yerucharéüwa ne íxü. Rü Ngechuchuna nacagü, rü ñanagürügü: ² —¿Tüxcüü i curü ngúexügü rü tama nagu naxï i nuxcümaügüxü i tórü oxigücüma? ¿Rü tüxcüü tama nayangüxëëgü i ngëma nacüma na Tupanacèx nayauxmëxgüxü naxüpa na nachibüexü? —ñanagürügü. ³ Natürü ga Ngechuchu rü nüxna naca ga yema Parichéugü rü ngúexëëruügu, rü ñanagürü nüxü: —¿Rü tüxcüü i pema rü nüxü pexo i Tupanaãrü mu na nagu pexüxücèx i pecümagütama? ⁴ Erü Tupana rü norü orewa rü ñanagürü:

“¡Tüxü nangechaü ya cunatü rü cue!”

ñanagürü. Rü ngëma orewa rü ñanagürü ta:

“Rü texé ya tümanatümaã rü ëxna tümaëmaã guxchigaxe rü name nixï i noxtacüma ngëmacèx tüxü tayuxëë”,

ñanagürü. ⁵ Natürü pema rü ñaperügügü:

“Marü name ega wüxi ya yatü nanatüxü rü naëxü ñaxgu: ‘Taxucürüwa chorü ngëmaxümaã cuxü charüngüxëë erü guxüma i chorü ngëmaxü rü marü Tupanana chanaxã’,” ñaxgu. ⁶ Rü ngëxguma texé ngëma ñagügu rü pexcèx rü marü namexü na tama tümanatüxü rü tümaëxü tarüngüxëëxü. Rü ngëmaãcü ipeyanaxoxëë i Tupanaãrü

mu na nagu pexixúcex i pecümagütama. ⁷ Pema nixi i duixügü i togüpéxewa rü meã pemaxênetaxü, natürü peãewa rü chixexügu perüxinüë. Rü aixcüma nixi ga yema ore ga nuxcümaücü ga Tupanaãrü orearü uruü ga Ichaxía pechiga ümatüxü ga ñaxü:

⁸ “Naã duixügü rü naãxmaãmare choxü nicuèxüügü. Natürü naãewa rü tama aixcüma chaugu narüxinüë. ⁹ Rü taxuwama name na ngëmaãcü natüçexma choxü yacuèxüügüxü. Rü guxüma i norü nguxëëtae rü yatügüarü mugümare nixi rü tama aixcüma chorü mu nixi”,

ñaxü. ¹⁰ Rü ñuxüchi ga Ngechuchu rü duixügücèx naca, rü ñanagürü nüxü: —¡Meã iperüxinüë i ñaã chorü ore, rü nagu perüxinüë! ¹¹ Ngëma òna i duixügü ngõxü rü tama ngëma nixi i napecaduãxëëgüxü. Natürü ngëma ore i chixexü i nüxü yaxuxü, rü ngëma waxi nixi i napecaduãxëëgüxü —ñanagürü. ¹² Rü ñuxüchi ga norü ngüexügü rü naxcèx naxi, rü ñanagürügü nüxü: —¿Pa Corix, tama éxna nüxü cucuèx na Parichéugüãewa nangüxü i ngëma ore i namaã nüxü quixuxü? —ñanagürügü. ¹³ Natürü nüma ga Ngechuchu rü nanangaxü rü ñanagürü nüxü: —Guxüma i ngema nanetü i tama Chau-natü itoxü rü tá nanabëx. ¹⁴ Rü nüetama i ngëma Parichéugü, erü namaãrü cuèxruügü i ngexetüxürü nixigü. Rü ngëxguma wüxi i ngexetüxü rü naxrüü ngexetüxümaã inacuèxgu rü ngürüachi ngëma taxre rü wüxi i ãxmaxügu tá nügümaã nayayicu —ñanagürü. ¹⁵ Rü ñuxüchi ga Pedru rü Ngechuchuna naca, rü ñanagürü: —¡Tomaã meã nangoxëë na ñuxü ñaxüchiga yixü i ngëma ore i tomaã nüxü quixuxü! —ñanagürü. ¹⁶ Rü Ngechuchu nanangãxü rü ñanagürü: —¿Éxna pema rü ta tama nüxü pecuèxgüega i ngëma ore? ¹⁷ ¿Tama éxna nüxü pecuèx rü guxüma i ngëma òna i duixügü ngõxü rü naãnuwa naxü, rü yixcama rü ñuxüchi ínaxüxü? ¹⁸ Natürü guxüma i ngëma ore i duixügü nüxü ixuxü rü naãewa nixi i ne naxüxü. Rü ngëma ore i chixexü waxi nixi i napecaduãxëëgüxü i ngëma duixügü. ¹⁹ Erü naãewa nixi i chixexügu naxinüëxü i duixügü. Rü ngëma ne naxü na namáetaxü, rü to i ngexü i átexümaã na inapexü, rü na nangëãëmarexü, rü na nangixü, rü na yadoratëxáxü, rü na naguxchigawëxexü. ²⁰ Rü guxüma i ngëma chixexü waxi nixi i duixügüxü pecaduãxëëxü. Natürü ngëma na tama nayauxmëxgüxü naxüpa na nachibüexü, rü ngëma rü tama nanapecaduãxëë i duixügü —ñanagürü.

*Wüxi ga ngecü ga to ga nachüãnecüãx ga Ngechuchuaxü yaxõxcüchiga
(Mr 7.24-30)*

²¹ Rü yexguma yéma inaxüächigu ga Ngechuchu, rü Tiruane rü Chidãüãneãrü ñãnegüwa naxü. ²² Rü Ngechuchuxütawa ingu ga wüxi ga ngecü ga Canácüãx ga Tiruanegu áchiücü. Rü tagaãcü ngigürügü nüxü: —Pa Cori Pa Dabítanüxüx, ¡cuxü changechautümü! Erü chauxacü rü wüxi i ngoxo ngíwa nangëxma i poraãcü ngixü chixewexü —ngigürügü. ²³ Natürü ga Ngechuchu rü tama ngixü nangãxü. Rü düxwa ga norü ngüexügü rü naxcèx naxi, rü Ngechuchuxü nacèèxügü, rü ñanagürügü: —Pa Corix ¡Ngímaã nüxü ixu i ngëma nge rü íyaxü, erü tawe iyacaechigü! —ñanagürügü. ²⁴ Rü yexguma ga Ngechuchu rü ñanagürü: —Tupana núma choxü namu na Yudíugü i pecaduãxgüxücëxícátama na chadauxúcèx —ñanagürü. ²⁵ Natürü ngíma ga yema nge ga tama Yudíu ixícü rü Ngechuchucèx iyaxü. Rü napëxegu iyacaxápüxü, rü ngigürügü nüxü: —Pa Corix ¡choxü rüngüxëë! —ngigürügü. ²⁶ Natürü Ngechuchu rü ñanagürü: —Tama name i taxacügüna tanapu i norü òna na airugüna naxãxúcèx —ñanagürü. [Rü yema ñanagürü yerü nümagü ga Yudíugü rü nügü nixugüe na Tupanaxácügüxüchi yígüxü rü yema togü rü ñoma airügürü na yixígüxü.] ²⁷ Natürü ngíma ga yema nge rü ngigürügü: —Rü aixcüma nixi i curü ore, Pa Corix, natürü airügü rü ta norü yoraarü ònatüchi i mechawa rüyixü nangõx —ngigürügü. ²⁸ Rü yexguma ga Ngechuchu rü ñanagürü ngixü: —Pa Ngecüx, aixcümaxüchi cuyaxõ. Marü tá chanaxü i ngëma cuma cunaxwëxexü —ñanagürü. Rü yexgumatama ngixcèx nitaane ga ngixãcü.

Ngechuchu rü nanameëxëë ga muxüma ga idaaweexü

²⁹ Rū yemawena ga Ngechuchu rü inaxũãchi ga yema naãnewa, rü naxtaxa ga Gariréacutüwa naxũ. Rū ñuxũchi wüxi ga mëxpũnewa ínaxũãchi, rü yéma nayarüto. ³⁰ Rū muxũma ga duũxũgü naxũtawa nangugü. Rū yéma naxũtawa nanagagü ga duũxũgü ga ichixeparagüxũ, rü ngexetügüxũ, rü tama idexagüxũ, rü chixechacüügüxũ, rü muxũma ga togü ga idaaweexũ. Rū Ngechuchupéxegu nayamugü, rü nüma ga Ngechuchu rü nanameẽxẽ. ³¹ Rū ga duũxũgü rü poraãcü nabèixãchiãëgü ga yexguma nüxũ nadaugüga ga ñuxãcü yema noxri tama idexagüxũ rü marü na yadexagüxũ, rü yema noxri chixechacüügüxũ rü marü naxcèx na yataanegüxũ, rü yema noxri chixeparagüxũ rü marü na nameparagüxũ, rü yema noxri ngexetügüxũ rü marü na yadauchigüxũ. Rū yemacèx ga duũxũgü rü Tupanaxũ nicuèxüügü.

Ngechuchu nanachibüexẽ ga 4000 ga yatügü
(Mr 8.1-10)

³² Rū ñuxũchi ga Ngechuchu rü norü ngúexügcèx naca, rü ñanagürü nüxũ: —Choxũ nangechaütümüügü i ñaã duũxũgü, erü marü tomaèxpüx i ngunexü nuã chauxütawa nangëxmagü, rü nüxũ nataxuma i norü õna. Rū taxuacüma ngẽmaãcümare nachiüwa chanamugü, erü ngürüãchi namagu tá nayaturae —ñanagürü. ³³ Rū norü ngúexügü rü ñanagürügü nüxũ: —¿Natürü ngextá tá tanayaxu i õna naxcèx i guxũma i ñaã duũxũgü? Erü taxúema nuxma taxãpata i nuã —ñanagürügü. ³⁴ Rū Ngechuchu nüxna naca, rü ñanagürü: —¿Ñuxre i pãü pexũ nangëxma i pemax? —ñanagürü. Rū nanangãxũgü, rü ñanagürügü: —Toxũ nangëxma i 7 i pãü rü noxretama i choxnixãcügüxicatama —ñanagürügü. ³⁵ Rū ñuxũchi ga Ngechuchu rü duũxũgüxũ namu na ñaxtüanewa natogüxcèx. ³⁶ Rū nanade ga yema 7 ga pãü rü yema choxnigü. Rū Tupanana moxë naxã. Rū ñuxũchi inanabücu. Rū norü ngúexüguna nanana na duũxũgüxũ yanuãxücèx. ³⁷ Rū guxũma ga duũxũgü rü meãma nachibüe. Rū yemawena rü 7 ga pexchigü nanapagüamatama namaã ga yema pãü rü choxnichipéxegü ga íyaxügüxũ. ³⁸ Rū yema yéma chibüexũ rü 4,000 ga yatügü nixĩ, natürü ga ngexügü rü buxügü rü tama nayaxugü. ³⁹ Rū yemawena ga Ngechuchu rü duũxũgüxũ ínimugü. Rū ñuxũchi wüxi ga ngegu nixüe, rü Magadárü naãnewa naxũ.

16

Parichéugü rü Chaduchéugü naxcèx ínacagü na nüxũ nüxũ nadauxëëgüxücèx ga wüxi ga cuèxruũ ga Tupanaãrü poramaã naxüxũ
(Mr 8.11-13; Lc 12.54-56)

¹ Rū ga Parichéugü rü Chaduchéugü rü Ngechuchuxũ ínayadaugü. Rū Ngechuchuna nacagüe na nüxũ nüxũ nadauxëëgüxücèx ga wüxi ga cuèxruũ ga Tupanaãrü poramaã naxüxũ, yerü nüxũ naxügüchaümare. ² Natürü nüma ga Ngechuchu rü nanangãxũ, rü ñanagürü nüxũ: —Pema rü yáuanecü rü ñaperügügü:

“Name tá nixĩ i moxũãrü ngunexü, erü nadautüweane”, ñaperügügü. ³ Rū ngëxguma pèxmama nadautüweanegu rü poraãcü nacaixanegu, rü:

“Nachixe tá nixĩ i ngunexü” ñaperügügü. Pema nixĩ i duũxũgü i togüpéxewa meã pemaxënetaxũ, natürü chixexügu perüxĩnüë. Rū pema nüxũ pecuèx na penangugüxũ i ñuxgu tá nameãnexũ rü ñuxgu tá nachixeanexũ. Natürü ñuxma na yanguxũ i ngẽma cuèxruügü ga nuxcüma Tupana pemaã ixunetaxũ rü tama nüxũ pecuèxgüega na tacüchiga yĩxũ —ñanagürü. ⁴ Rū ñanagürü ta ga Ngechuchu: —Ñaã duũxũgü i chixecümagüxũ rü tama yaxõgüxũ rü naxcèx ínacagü i wüxi i cuèxruũ i Tupanaãrü poramaã üxũ. Natürü yema cuèxruũ ga nuxcümaücü ga Tupanaãrü orearü uruũ ga Yonãxũ ngupetüxürüxicatátama nadaugü. Rū yexgumarüü na bayenaãnüwa na ínaxũxũxũ, rü choma rü ichatãxüwa tá íchaxüxũ. Rū taxuxütama i to i cuèxruũxũ nüxũ chadauxëë i ñaã duũxũgü —ñanagürü. Rū ñuxũchi nüxna yéma nixũ ga Ngechuchu, rü inaxũãchi.

*Parichéugüarü pãũärü puxêëruũchiga
(Mr 8.14-21)*

⁵ Rũ yexguma naxtaxaarü tocutüwa naxĩxgu ga norü ngúexũgü, rü nüxũ inayarüngümaê na nawemü ta íyangegüxũ. ⁶ Rũ yexguma ga Ngechuchu rü ñanagürü nüxũ: —¡Dücèx, pexuãégü naxcèx i Parichéugü rü Chaduchéugüarü pãũärü puxêëruũ! —ñanagürü. ⁷ Rũ yema norü ngúexũgü rü inanaxügüe ga nügü na ñagüxũ: —Ngêma ñanagürü tüxũ, erü tama tawemüta ítingegü —ñanagürügü. ⁸ Natürü ga Ngechuchu rü nüxũ nacuèxama ga ñuxácü na yadexagüxũ ga norü ngúexũgü. Rũ yemacèx ñanagürü nüxũ: —¿Tüxcüũ,

“Tüxũ nataxu i tawemü” ñaperügügü? Pema rü tama aixcüma peyaxõgü. ⁹ —¿Tama êxna nüxũ pecuèxgüéga rü nüxna pecuèxãchie ga yema wüximêëxpüx ga pãũ ga yema 5,000 ga yatügücèx ichabücuxũ? ¿Rü ñuxre ga pexchi penaxüãcuxũ namaã ga yema naxchipèxegü ga íyaxügüxũ? ¹⁰ —¿Rü tama êxna nüxna pecuèxãchie ga yema 7 ga pãũ ga yema 4,000 ga yatügücèx ichabücuxũ? ¿Rü ñuxre ga pexchi penaxüãcuxũ namaã ga yema naxchipèxegü ga íyaxügüxũ? ¹¹ —¿Rü ñuxácü nixĩ i tama nüxũ pecuáxũ i tama pãũchiga na chidexaxũ i ngèxguma ñachagu:

“¡Pexuãégü naxcèx i Parichéugü rü Chaduchéugüarü pãũärü puxêëruũ!” ñachagu? —ñanagürü ga Ngechuchu. ¹² Rũ yexguma ga norü ngúexũgü rü nüxũ nacuèxgü ga tama pãũärü puxêëruũchiga na yadexaxũ ga Ngechuchu, natürü Parichéugü rü Chaduchéugüarü nguxêëtaechiga na yĩxũ ga na yadexaxũ.

*Pedru nanangoxêë na Cristu na yĩxũ ga Ngechuchu
(Mr 8.27-30; Lc 9.18-21)*

¹³ Rũ yexguma Checharéa ga Piripuaneärü ngaicamana nanguxgu ga Ngechuchu, rü norü ngúexũgüna naca, rü ñanagürü: —¿Ñuxũ ñaxũ i duũxügü i chauchiga na texé chíixũ i chomax? —ñanagürü. ¹⁴ Rũ nüma ga norü ngúexũgü rü nanangãxũ rü ñanagürügü: —Nangèxma i duũxügü rü:

“Cuáũ ya baiũxêëruũ quixĩ” ñagüxũ. Rũ togü i:

“Ería quixĩ” ñagüxũ. Rũ togü i:

“Yeremíã quixĩ” ñagüxũ. Rũ togü rü:

“Wüxi ga nuxcümaũcü ga Tupanaärü orearü uruũ quixĩ” ñagüxũ —ñanagürügü. ¹⁵ Rũ yexguma ga Ngechuchu rü nüxna naca rü ñanagürü: —¿Rü pema i ñuxũ ñapegüxũ choxũ na texé chíixũ? —ñanagürü. ¹⁶ Rũ Chimáũ ga Pedru nanangãxũ, rü ñanagürü nüxũ: —Cuma nixĩ i Cristu ya Tupana ya maxücü Nane quiixũ —ñanagürü. ¹⁷ Rũ Ngechuchu nanangãxũ rü ñanagürü nüxũ: —Cuma rü aixcüma cutaãê, Pa Chimáũx, Pa Yoná Nanex, erü taxuũma i duũxũ nixĩ i cuxũ nüxũ cuèxêëxũ i ngêma, natürü Chaunatü ya daxügücü nixĩ ya cuxũ nüxũ cuèxêëcü na Nane chíixũ. ¹⁸ —Rü choma cumaã nüxũ chixu rü cuma rü Pedru quixĩ. Rũ ngêma cuéga rü “nuta” ñaxũchiga nixĩ. Rũ cuma tá nixĩ i chorü duũxügüarü dauruũ quiixũ. Rũ Chataná rü tãütáma nüxũ narüyexera i ngêma chorü duũxügü. ¹⁹ —Rü choma rü tá cuxna chanaxã i chorü ore na duũxügümaã nüxũ quixuxücèx na nüxũ nacuèxgüxücèx na ñuxácü daxügüxũ i naãnewa nangugüxũ i ngextá Tupana ãëxgacü íixĩxũwa. Rũ yixema tama cuxũ irüxĩnüëxê i ngêma ore rü tãütáma ngema tichocu. Natürü yixema meã cuxũ irüxĩnüëxê i ngêma ore rü aixcüma ngema Tupana ãëxgacü íixĩxũwa tá tangugü —ñanagürü. ²⁰ Rũ yexguma ga Ngechuchu rü norü ngúexũgümaã nüxũ nixu, rü ñanagürü: —¡Taxúemaãtáma nüxũ pixu na choma rü Cristu chíixũ! —ñanagürü.

*Ngechuchu nanaxunagü ga norü yuxchiga
(Mr 8.31-9.1; Lc 9.22-27)*

²¹ Rũ yemawena inanaxügü ga norü ngúexũgümaã nüxũ na yaxuxũ ga tacü tá nüxũ na üpetüxũ. Rũ ñanagürü: —Choma rü Yerucharéüwa tá chaxũ, rü ngema poraãcü

ngúxũ tá choxũ ningexëëgũ. Rũ choxũ tá nimëxgũ i Yudiügüarũ äëgacügüerugũ rũ paigüarũ äëxgacügũ rũ ngúexëëruügũ i ore i mugüwa nguxëëtaegüxũ. Natürũ tomaëxpüx i ngunexũ ngupetügu rũ wena táxaru chamaxũ —ñanagürũ. ²² Rũ yexguma ga Pedru rũ nüxica noxrüwama Ngechuchuxũ naga, rũ inanaxügũ ga na naxucuxëãxũ, rũ ñanagürũ: —Pa Corix, Tupana rũ tama nanaxwëxe na ngëmaãcü quidexaxũ. Rũ täütäma ngëmaãcü cuxũ nangupetü i cumax —ñanagürũ. ²³ Natürũ ga Ngechuchu rũ Pedrucëx nadaueguãchi, rũ ñanagürũ nüxũ: —¡Choxna ixügachi, Pa Chatanáx, erü chixexügu choxũ cunguxëëchaũ! Rũ tama Tupana nagu rüxñüxügu curüxñü, rũ yatügũ nagu rüxñüxügumare curüxñü i cumax —ñanagürũ. ²⁴ Rũ yexguma ga Ngechuchu rũ norü ngúexügüxũ ñanagürũ: —Rũ ngëxguma texé chowe rüxüxchaügu, jëcü nüxũ tarüxo i tümaärũ ngúchaũ, rũ namaã tapora i ngëma guxchaxügũ i tümacëx ínguxũ i ñoma curuchawa tipotaxürũ tüxũ ixixëëxũ, rũ ngëmaëtüwa chowe tarüxüãma! ²⁵ Erü yíxema tügũ maxëchaxëëchaũxë rũ tá tayu. Natürũ yíxema chauxcëx yúxe rũ aixcüma tá tüxũ nangëxma i maxũ i taguma gúxũ. ²⁶ Rũ ¿Täcüwa i nüxũ namexũ ya wüxi ya yatü ega nayauãxgu i guxüma i ñoma i naãneärũ ngëmaxügũ, natürũ iyanatauxëëãgu i norü maxũ? Erü taxucürüwama wüxi ya yatü rũ norü dïërumaã naxcëx nataxe i norü maxũ. ²⁷ Erü choma i Tupana Nane na duüxüxũ chíxũ rũ wena táxaru núma chaxũ. Rũ ngëxguma rũ Chaunatü ya Tupanarüũ tá äëxgacü chixĩ, rũ daxüçüãx i orearü ngeruügümaã tá íchangu. Rũ ngëxguma tá nixĩ i nüxũ chanaxütanüxũ i wüxichigü i duüxügü i ngëma ñuxäcü chauxcëx na namaxëxürüüäcüma maxëxũ. ²⁸ Rũ aixcüma pemaã nüxũ chixu rũ nangëxma i ñuxre i duüxügü i núma ngëxmagüxũ rũ täütäma nayu ñuxmatáta choxũ nadaugü na yuwa ícharüdaxũ rũ aixcüma äëxgacü ya poracü na chíxũ —ñanagürũ ga Ngechuchu.

17

Ngechuchu rü toraxüãcü nangox (Mr 9.2-13; Lc 9.28-36)

¹ Rũ 6 ga ngunexüguwena rũ Ngechuchu ínayagagü ga Pedru rũ Chaütiágu rũ Cuáũ ga Chaütiágueneë. Rũ nüxĩcatama wüxi ga mëxpünewa noxrüwama namaã naxũ. ² Rũ yéma yema ngúexügüpëxewa rũ toraxüãcü nangox ga Ngechuchu. Rũ üëxcürüũ nixĩ ga nachiwe ga na yayauracüxũ. Rũ naxchiru rũ ta üëxcüemarüũ nixĩ ga na nangóonexëëãxũ. ³ Rũ ngürüãchi yéma naxcëx nangoxgü ga Moíché rũ Ería. Rũ Ngechuchumaã yéma nidexagü. ⁴ Rũ yexguma ga Pedru rũ ñanagürũ Ngechuchuxũ: —Pa Corix, name nixĩ nuã tangëxmagü. Rũ ngëxguma cunaxwëxegu rũ tá tanaxü ya tomaëxpüx ya düxenü, rũ wüxi ya cuxcëx, rũ náí ya Moíchécëx, rũ náí ya Eríacëx —ñanagürũ. ⁵ Rũ yexguma íyadexayane ga Pedru rũ wüxi ga caixanexũ ga nangóonexëëxũ rũ natanügu nayangaixema. Rũ yema caixanexüwa inanaxũ ga wüxi ga naga ga ñaxũ: —Daa nixĩ ya Chaune ya nüxũ changechaũxüchicü rũ namaã chataãëxüchicü. ¡Rũ naga pexñüë! —ñanagürũ. ⁶ Rũ yexguma yemaxũ naxñnüëgu ga yema ngúexügü, rũ ñaxtúanegu nanangücuchiãchitanü, yerü poraãcü namuëë. ⁷ Natürũ ga Ngechuchu rũ naxcëx nixü, rũ nüxũ nayarüngögü, rũ ñanagürũ nüxũ: —¡Ipechigü rũ täxũ ipemuëëxũ! —ñanagürũ. ⁸ Rũ yexguma wenaxärũ nadaunagütanügu, rũ Ngechuchuxüxĩcatama nadaugü rũ taxúema ga toguexũ nadaugü. ⁹ Rũ yexguma ínaxügüga ga guma mëxpünewa, rũ Ngechuchu nayaxucuxëgü ga taxúemaãma na nüxũ yaxugüexüçëx ga yema yéma nüxũ nadaugüxũ, ñuxmatáta yuwa ínadaxgu rũ wena namaüxgu. ¹⁰ Rũ ñuxüchi ga yema ngúexügü rũ Ngechuchuna nacagü, rũ ñanagürügü: —¿Tüxcüũ i ngëma ngúexëëruügü i ore i mugüwa nguxëëtaegüxũ rũ ñanagürügü:

“Ería tá nixĩ ya nüxĩra cuxüpa nuã ücü?” ñanagürügü. ¹¹ Rũ Ngechuchu nanangãxũ, rũ ñanagürũ: —Aixcüma nixĩ i Ería na nüxĩra tá núma naxüxũ na chauxüpa Tupanacëx yamexëëãxüçëx i duüxügü. ¹² Natürũ choma pemaã nüxũ chixu, rũ Ería rũ marü núma

naxü, natürü duüxügü rü tama nüxü nacuèxgü na texe yiixü. Rü yemacèx chixri namaã nachopetü. Rü ngëxgumarüü tá ta nixí na chixri tá chomaã nachopetüxü i duüxügü —ñanagürü. ¹³ Rü yexguma ga yema ngúexügü rü nüxü nicuèxächitanü ga Cuáü ga baiüxëëruüchiga na yiixü ga yema Ngechuchu namaã nüxü ixuxü.

Ngechuchu rü nanamexëë ga wüxi ga bucü ga ngoxo nawa yexmacü
(Mr 9.14-29; Lc 9.37-43)

¹⁴ Rü yexguma duüxügü íyexmaxüwa nangugügu, rü wüxi ga yatü Ngechuchucèx nixü. Rü napëxegu nayacaxãpüxü rü ñanagürü nüxü: ¹⁵ —Pa Corix, ¡nüxü nangechaü ya chaune rü naxcèx yataanexëë! Erü muëxpüxcüna rü naxãüãëxü, rü poraãcü nüxü nangux. Rü muëxpüxcüna rü üxüxetügu nayanguxëë, rü ëxna dexágu. ¹⁶ —Rü nuã curü ngúexügüxütawa chanaga, natürü nümagü rü tama nüxü nacuèxgü na namexëëgüãxü —ñanagürü. ¹⁷ Rü yexguma Ngechuchu nanangãxü, rü ñanagürü nüxü ga yema duüxügü ga yema yexmagüxü: —Pa Duüxügü i Tama Yaxögüxü i Chixri Maxëxüx, ¿ñuxgurátáta i pemaã chanuxmaxü rü yaxna pemaã chaxínüxü? ¡Nuã penaga ya yima bucü! —ñanagürü. ¹⁸ Rü Ngechuchu nananga ga yema ngoxo ga guma bucüwa yexmaxü. Rü yemaãcü ínanatëxüchi ga yema ngoxo. Rü yexgumatama naxcèx nitaane ga guma bucü. ¹⁹ Rü yemawena ga norü ngúexügü rü noxrüwama Ngechuchumaã nidexagü. Rü nüxna nacagüe, rü ñanagürügü nüxü: —Pa Corix, ¿tüxcüü i toma rü taxuacüma ínanatëxüchi i ngëma ngoxo? —ñanagürügü. ²⁰ Rü Ngechuchu nanangãxü, rü ñanagürü nüxü: —Pema rü taxuacüma ípenatëxüchi erü tama aixcüma peyaxögü. Rü aixcüma pemaã nüxü chixu, rü ngëxguma chi woo wüxi ya motachachirerüxü naxiraxüchigu i perü õ, rü chi daa mëxpúnemaã nüxü pixuxgu na yaxügachixüçèx, rü chi pega naxínü. Rü taxuxü chima pexü naguxcha ega aixcüma peyaxögügu. ²¹ —Natürü ñaarüü i ngoxo rü tama ínaxüxü ega tama íxaureãcüma iyumüxëgu —ñanagürü.

Ngechuchu rü wenaxãrü nanaxunagü ga norü yuxchiga
(Mr 9.30-32; Lc 9.43-45)

²² Rü yexguma norü ngúexügümaã Gariréaarü naãnegu yaxüxgu ga Ngechuchu, rü norü ngúexügümaã nüxü nixu, rü ñanagürü: —Choma ya Tupana Nane na duüxüxü chiixü, rü chixri tá chomaã nachopetü rü ãëxgacügüna tá choxü namugü i duüxügü. ²³ —Rü tá choxü nimèxgü, natürü tomaëxpüx i ngunexüguwena rü wena táxarü chamaxü —ñanagürü. Rü yexguma yema orexü naxínüëgu ga norü ngúexügü, rü poraãcü nangechaügu.

Ngechuchu ngíxü naxütanü ga yema díëru ga tupauca ga taxüncèx ngíxü nayauxgücü

²⁴ Ngechuchu rü norü ngúexügümaã Capernáüãrü íãnewa naxí. Rü yexguma yema nangugügu rü Pedruxü ínayadaugü ga yema yatügu ga tupauca ga taxüncèx díëru ngíxü yaxgüxü. Rü Pedruna nacagüe rü ñanagürügü: —¿Yima curü Cori rü tama ëxna ngíxü naxütanü i ngëma díëru i tupauca ya taxüncëärü ixícü? —ñanagürügü. ²⁵ Rü Pedru nanangãxü, rü ñanagürü: —Ngëmaãcü nanaxütanü —ñanagürü. Rü yixcama ga yexguma íxgu naxücuxgu ga Pedru, rü Ngechuchuxira Pedrumaã nidexa, rü ñanagürü nüxü: —¿Ñuxü ñacuxü i cumax, Pa Pedrux, rü ngextá nixí i nayauxgüãxü i norü díëru i guxü i nachiüãneärü ãëxgacügü? ¿Cuxcèx i nügütanüwatama rü ëxna togü i duüxügütanüwa? —ñanagürü. ²⁶ Rü Pedru nanangãxü, rü ñanagürü: —Maneca togü i duüxügütanüwa nixí i nayauxgüãxü —ñanagürü. Rü ñuxüchi Ngechuchu nanangãxü rü ñanagürü: —Rü ngëxguma ngëmaãcü yixígu, rü yixema na Tupanaãrü ixígüxü rü taxucèxma tanaxütanügu. ²⁷ —Natürü ngëma na taxúema tamaã nuxüçèx, rü chanaxwëxe i cuyaxütanü i ngëma díëru. ¡Rü yéa naxtaawa naxü, rü ngema yapoxwaxe! ¡Rü ngëma nüxíraüxü i choxni i cunapoxwaüxü rü naãxwa tá nüxü icuyangau i wüxi i díëru i nagu mexü na yangutanüxëëxüçèx i chauxcèx rü cuxcèx rü ta! ¡Rü tupauca ya taxünewa nange i ngëma díëru, rü yaxütanü! —ñanagürü.

18

*¿Texé tá tixĩ ya guxããrũ yexera ixĩxẽ?
(Mr 9.33-37; Lc 9.46-48)*

¹ Rũ yexguma ga norũ ngúexũgũ rũ Ngechuchucèx naxĩ rũ nüxna nacagũ, rũ ñanagürũgũ: —¿Pa Corix, texé tá tixĩ ya guxũãrũ yexera ixĩxẽ i ngẽma Tupana ãẽxgacũ íixĩxũwa? —ñanagürũgũ. ² Rũ yexguma ga Ngechuchu rũ wüxi ga buxũcèx naca, rũ norũ ngúexũgũarũ ngãxũtanũgu nanachixẽẽ. ³ Rũ ñuxũchi ñanagürũ nüxũ: —Dücèx, Pa Chorũ Ngúexũgũx, aixcũma pemaã nüxũ chixu, rũ ngẽxguma tama nüxũ perũxoegu i ngẽma na togũarũ yexera pegũ pixĩgũxẽẽchaũxũ rũ ñuxũchi tama ñaã buxũrũũ pegũ íperũxíragu, rũ taxucürũwa pichocu i ngextá Tupana ãẽxgacũ íixĩxũwa. ⁴—Rũ aixcũma yíxema tũgũ írũxírase rũ ñaã buxũrũũ ixĩxẽ, rũ yíxema tá tixĩ ya guxũãrũ yexera ixĩxẽ i ngextá Tupana ãẽxgacũ íixĩxũwa. ⁵—Rũ texé ya chauégagu meã nayaxúxe i wüxi i buxũ i ñaãrũũ íixĩxũ rũ choxũ nixĩ i tayaxuxũ.

*Naxãũcũma nixĩ na pepadugu inguxũ
(Mr 9.42-48; Lc 17.1-2)*

⁶—Rũ texé ya pepadugu nanguxẽexẽ i wüxi i ñaã buxũgũ i choxũ yaxõgũxũ rũ tümacèx rũ narũmemaẽ chi nixĩ na noxtacũma wüxi ya nuta tümanaãwa nayangacuchixũ, rũ ñuxũchi ngẽmaãcũ taxtũchiũwa tũxũ nayarütáexũ na ngẽxma tayuxũcèx. ⁷—Ñoma i naãneçũãx i duũxũgũcèx rũ wüxi i taxũ i ngechaũ nixĩ na nangẽxmaxũ i muxũchixũ i tacũ i pepadugu nayixẽẽxũ. Rũ guxũguma tá nangẽxma i ngẽma chixexũgũ, natürũ wüxi i ngechaũxũchi tá nixĩ naxcèx i ngẽma yatũ i togũxũ pepadugu nguxẽẽxũ. ⁸—Rũ ngẽmacèx i ngẽxguma chi cuxmẽx rũ êxna cucutũ pepadugu cuxũ nguxẽẽgu, rũ name nixĩ i noxtacũma ícunadae rũ yaxũgu cunaña. Erũ narũmemaẽ nixĩ i cuboxmẽxãcũma rũ êxna cubocutũãcũma na cunayaxuxũ i curũ maxũ na tama guxũne ya cuxmẽxmaã rũ êxna guxũne ya cucutũmaã üxũ ya taguma ixoxũnewa quitèxcuchixũcèx. ⁹—Rũ ngẽxguma chi cuxetũ pepadugu cuxũ nguxẽẽgu, rũ name nixĩ i ícunacaxũchi, rũ yaxũgu cunaña. Erũ narũmemaẽ nixĩ i wüxixetũmaã na cunayaxuxũ i curũ maxũ na tama guxũne ya cuxetũmaã üxũ ya ngoxogũ nagu poxcuenuwa na quitèxcuchixũcèx. [Rũ ngẽmaãcũ woo cuxũ naguxchagu, natürũ name nixĩ i nüxna quixũgachi i guxũma i ngẽma chixexũgũ i nagu cunguchaũxũ.]

*Ore ga carneru ga iyarütaxuxũgu ixuxũ
(Lc 15.3-7)*

¹⁰—Rũ tama name i nüxũ pexoox i wüxi i buxũ i ñaãrũũ choxũ yaxõxũ. Erũ ngẽma norũ dauruũgũ i orearũ ngeruũgũ i daxũcũãx rũ guxũguma Chaunatu ya daxũgucüpẽxewa nangẽxmagũ na ngẽma ngẽma buxũtũwa nachogũxũcèx. ¹¹—Rũ choma i Tupana Nane na duũxũxũ chiĩxũ rũ núma chaxũ na chanamaxẽẽxũcèx i duũxũgũ iyarütaxuxũ. ¹²—¿Rũ ñuxũ ñapegũxũ i pema ega wüxi ya yatũ rũ nüxũ nangẽxmagu i 100 i carnerugũ rũ wüxi nüxũ iyarütaxuxu? ¿Taux êxna i nachitaũgu namugũãxũ i ngẽma 99, rũ ñuxũchi naxcèx yadauxũ i ngẽma nüxũ iyarütaxuxũ? ¹³—Rũ ngẽxguma nüxũ iyangauxgu, rũ namaã nataãẽxũchi i ngẽma norũ carneru. Rũ woo guxũguma namaã nataãe i ngẽma 99 i tama iyarütaxuxũ, natürũ yexeraãcũxũchi namaã nataãe i ngẽma wüxi i iyarütaxuxũ, erũ marũ nüxũ inayangau. ¹⁴—Rũ ngẽxgumarũũ ta nixĩ ya Penatũ ya daxũgucũ na tama nanaxwèxexũ na wüxi i ñaã buxũ na iyarütaxuxũ.

*Ñuxãcũ tamücũxũ na ingechaũxũchiga
(Lc 17.3)*

¹⁵—Rũ ngẽxguma cueneẽ chixexũ cumaã üxgu, rũ name nixĩ i nüxĩcatama namaã quidexa, rũ nüxna nüxũ cucuèxãchixẽẽ i ngẽma norũ chixexũ i cumaã naxũxũ. Rũ ngẽxguma cuga naxĩnũgu, rũ marũ wenaxarũ mexũcèx cunataeguxẽẽ i ngẽma cueneẽ.

16 —Natürü ngëxguma tama cuga naxĩnügu i ngëma cueneë, rü name nixĩ i naxcèx cuca i wüxi rü êxna taxre i duũxügü na nûmagü rü ta namaã yadexagüxücèx i ngëma cueneë. 17 —Rü ngëxguma rü ta tama nüxü inaxĩnügu i ngëma taxre i duũxügüarü ore, rü name nixĩ i guxü i yaxögüxümaã nüxü quixu na ngëma cueneëmaã yadexagüxücèx. Rü ngëxguma rü ta tama nüxü inaxĩnügu i ngëma yaxögüxüârü ore, rü name nixĩ i wüxi i duũxü i tama yaxöxürüügu namaã curüxĩnü. 18 —Rü aixcüma pemaã nüxü chixu rü yíxema núma ñoma i naãnewa tama pexü irüxĩnüxë i chorü ore rü täütáma Tupana äëxgacü íxĩxüwa tichocu. Natürü yíxema meã pexü irüxĩnüxë i ngëma ore rü aixcüma ngëma tá tangu. 19 —Rü pemaã nüxü chixu rü ngëxguma chi taxre i pema i núma ñoma i naãnewa rü wüxigu tacücèx ípecaxgu i Chaunatu ya daxügucüxütawa, rü nüma ya Chaunatu rü tá pexna nanaxã. 20 —Erü ngëma ngextá taxre rü êxna tomaëxpüx i duũxügü chauégagu íngutaquëxexüwa, rü choma rü ta norü ngãxütanüwa changëxma —ñanagürü. 21 Rü yexguma ga Pedru rü Ngechuchucèx nixü, rü nüxna naca, rü ñanagürü: —¿Pa Corix, ngëxguma chaueneë chixexü chomaã üxgu, rü ñuxreëxpüxcüna i namexü na nüxü nüxü changechaüxü naxcèx i ngëma chixexü i chomaã naxüxü? ¿Rü marü namexü i cuxcèx ega 7 ëxpüxcüna yixĩgu na nüxü nüxü changechaüxü? —ñanagürü. 22 Rü Ngechuchu nanangãxü rü ñanagürü: —Tama name i 7 ëxpüxcünaxĩcatama nüxü nüxü cungechaü. Natürü guxügutáma nixĩ i nüxü nüxü na cungechaüxü woo 70 ëxpüxcüna i 7 wa nangu —ñanagürü.

Ore ga äëxgacüarü duũxü ga tama namücüaxü nüxü ngechaüxü ga norü ngetanügu ixuxü

23 Rü Ngechuchu rü ñanagürü: —Rü ngëma Tupana na äëxgacü íxĩxü, rü ñoma wüxi ga nachüãneärü äëxgacü ga norü duũxügü ga nüxü nangetanügüxümaã namexëëchaüxürüü nixĩ. 24 —Rü yexguma inaxügüãgu ga meã nüxü na yadaugüxü ga yema nüxü nangetanügüxüpane, rü naxütawa nanagü ga wüxi ga norü duũxü ga taxüchicü ga dñeru nüxü ngĩxü ngetanüxü. 25 —Natürü ga yema norü duũxü rü nangeärü dñeruãx, rü taxuacüma norü cori ga äëxgacüaxü nanaxütanüega. Rü yemacèx ga yema äëxgacü rü norü churaragüxü namu na to ga corixü namaã nataxegüxücèx ga yema yatü, wüxigu tümamaã ga naxmèx rü naxácügü rü norü yemaxügü, na yema natanü ga dñerumaã naxütanüãxücèx ga norü ngetanü. 26 —Rü yexguma ga yema norü duũxü rü norü äëxgacüpëxegu nacaxãpüxü, rü nüxü nacèxü, rü ñanagürü:

“Pa Corix ¡choxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. 27 —Rü yema norü äëxgacüaxü nangechaütümüü, rü yemacèx namaã nüxü nixu ga marü tama nüxü na naxütanüãxücèx ga yema norü ngetanü. Rü ñuxüchi ínananguxuchixëë. 28 —Natürü yexgumatama yéma äëxgacüxütawa ínaxüüxgu ga yema yatü, rü nüxü inayangau ga wüxi ga namücü ga írarüwatama nüxü nangetanüxü. Rü yema yatü rü nüxna natüxüe, rü nananuxnaxã, rü ñanagürü nüxü:

“¡Choxü ngĩxü naxütanü i ngëma dñeru i ngĩxü cungetanücü!” ñanagürü. 29 —Rü yexguma ga yema namücü rü yema yatüpëxegu nacaxãpüxü, rü nüxü nacèxü, rü ñanagürü:

“Pa Chomücüx, ¡choxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. 30 —Natürü ga yema yatü rü tama nüxü nacüaxchaü ga yema ore. Rü poxcupataügu tüxü napoxcuama ñuxmata nüxü tanaxütanü ga yema tümäärü ngetanü. 31 —Rü yexguma togü ga yema äëxgacüarü duũxügü nüxü daugügu ga yema ngupetüxü, rü poraãcü naãëwa nangüx ga yema naxüxü ga yema yatü. Rü norü corixütawa naxĩ rü nüxü nayarüxügüe ga guxüma ga yema ngupetüxü. 32 —Rü yexguma ga yema äëxgacü rü nanamu ga norü churaragü na naxütawa nagagüãxücèx ga yema yatü. Rü yexguma naxütawa nangüxgu, rü ñanagürü nüxü:

“Wüxi i chixexü i chorü duũxü quixĩ. Choma rü cuxü nüxü changechaü ga yema choxü cungetanüxü, erü choxü cucèxü na tama cuxü chapoxcuxücèx. 33 —Rü cuma

rü chita nüxü nüxü cungechaü i ngëma cumücü i cuxü nangetanüxü, yexgumarüü ga choma rü cuxü nüxü na changechaüxürüü ga yema choxü cungetanüxü”, ñanagürü nüxü. ³⁴ —Rü poraäcü nanuxüchi ga yema äëxgacü. Rü norü churaragüxü namu na napoxcugüäxüçex ga yema yatü ñuxmata guxü nüxü naxütanü ga yema nüxü nangetanüxü —ñanagürü ga Ngechuchu. ³⁵ Rü ñuxüchi ñanagürü ta: —Rü ngëxgumarüü tá pemaã nanaxü ya Chaunatü ya daxügcü i ngëxguma tama wüxichigü aixcüma peenexëgüaxü nüxü perüngümaegu i ngema chixexü i pemaã naxüxü —ñanagürü.

19

Parichéugü rü Ngechuchuna nacagüe i táxmëxchiga (Mr 10.1-12; Lc 16.18)

¹ Rü yema ñaxguwena ga Ngechuchu rü inaxüächi ga Gariréaarü naãnewa. Rü natü ga Yudáüarü tocutüwa naxü ga Yudéaarü naãnewa. ² Rü muxüma ga duüxügü nawe narüxí, rü nüma ga Ngechuchu rü yéma nanameëxëë ga yema idaaweexü. ³ Rü Ngechuchucëx naxí ga ñuxre ga Parichéugü, rü nüxna nacagü rü ñanagürügü: —¿Cuxcëx namexü i wüxi i yatü na ínatáxmëmarexü ega tacü rü chixexü taxüxgu ya naxmëx? —ñanagürügü. Rü yemaäcü nüxna nacagü yerü Ngechuchuxü chixexügu nanguxëëgüchaü. ⁴ Rü Ngechuchu nanangäxü rü ñanagürü: —¿Taguma ëxna nawa pengüe i ngëma Tupanaärü ore i ümatüxü i nüxü ixuxü ga noxri Tupana naxüxgu ga duüxügü, rü yatüxü rü ngecüxü na naxüxü? ⁵ —Rü ñanagürü ga Tupana:

“Rü ngëmacëx ya yatü rü tá nanatü rü naëna nixügachi na namëxmaã inaxäüxüçex. Rü ngëmaäcü i ngëma taxre rü ñoma wüxitama i duüxürüü tá nixígü”.

⁶ —Rü ñuxüchi tama taxre nixí, rü wüxitama nixí. Rü ngëmacëx taxucürüwa texé nügüna tayaxígachitanüxëë i ngëma taxre i Tupana nügüna mugüxü —ñanagürü. ⁷ Rü yexguma Ngechuchuna nacagü rü ñanagürügü: —¿Tüxcüü nixí ga Moíché ga duüxügümaã nüxü yaxuxü rü ngëxguma texé tümamëxü ítáxchaügu rü name nixí i wüxi i popera i tëxgüpane ngíxna taxä, rü ñuxüchi ngíxü ítatëx? ñaxü —ñanagürügü. ⁸ Rü Ngechuchu nanangäxü, rü ñanagürü nüxü: —Pegagu nixí ga Moíché ga tama pexna nachüxäxü na pexmëxü ípetáxü. Yerü nüma nüxü nacuëx na tama aixcüma peyaxögüxü. Natürü noxriarü ügügu rü tama yemaäcü nixí. ⁹ —Rü choma pemaã nüxü chixu rü tama name na texé tümamëxü ítáxü ega tama naí ya yatümaã nangëäëxügagu yixígu. Rü ngëxguma chi yima yatü rü ñuxüchi naí i ngemaã naxäxmëxgu, rü chixexü naxü, rü ñoma naí i ngemaãmare nangëäëxürüü nixí. Rü texé ya ngímaã ämaxë i ngëma nge i ngíte ngíxü ítëxcü, rü ñoma naí i ngemaãmare itapexürüü tixí —ñanagürü ga Ngechuchu. ¹⁰ Rü ñuxüchi ga norü ngüexügü rü ñanagürügü nüxü: —Ega ngëmaäcü yixígu rü name nixí i noxtacüma tama naxämëx ya yatü rü tama ixäte i nge —ñanagürügü. ¹¹ Rü Ngechuchu norü ngüexügüxü nangäxü rü ñanagürü: —Taxucürüwa guxüma i duüxügü nüxü nacuëx i tacüchiga na yíxü i ngëma nguxëëtae. Natürü yíxema Tupana tüxü nüxü cuëxëxëxícatama tixí ya nüxü cuëxgüxe. ¹² —Rü nangëxma i nagüxüraüxü i guxchaxü na tama naxämëxüçex ya yatü. Erü nümaxü i yatü rü woetama taxucürüwa naxämëx erü norü bucüma nangepüxüchare. Rü nümaxü i yatü rü taxucürüwa naxämëx erü nayauxpüxücharee. Rü togü tama naxämëx erü Tupanaärü ngüchaüxícatama naxügüchaü. Rü texé ya ngëmaäcü maxchaüxë rü marü name i ngëmaäcü tamaxü —ñanagürü ga Ngechuchu.

Ngechuchu rü buxügüxü nameäxë (Mr 10.13-16; Lc 18.15-17)

¹³ Rü duüxügü rü Ngechuchuxütawa nanagagü ga ñuxre ga buxügü na Ngechuchu nüxü ingögüxüçex rü namaã nayumüxëxüçex. Natürü ga Ngechuchuarü ngüexügü rü inanaxügüe ga na yangagüäxü ga yema duüxügü ga Ngechuchuxütawa buxügüxü gagüxü. ¹⁴ Natürü ga Ngechuchu rü ñanagürü nüxü ga norü ngüexügü: —Marü name

i chauxütawa naxĩ i buxügü. ;Rü täxũ i nüxna penachuxuxũ! Erü Tupana äëxgacü ííxũwa rü tümacèx nixĩ ya yíxema ñaã buxügürü meã yaxöguxe —ñanagürü. ¹⁵ Rü ñuxũchi ga Ngechuchu rü yema buxügüétü naxümëx. Rü yemawena inaxũachi ga yéma.

*Wüxi ga ngextüxcü ga dïeruãxũchicü Ngechuchumaã nidexa
(Mr 10.17-31; Lc 18.18-30)*

¹⁶ Rü wüxi ga ngextüxcü rü Ngechuchuxütawa nangu, rü nüxna naca, rü ñanagürü: —Pa Ngúexëeruũ ya Mecüx, ;tacü tá chaxũxũ na chanayaxuxüçèx i maxũ i taguma gúxũ? —ñanagürü. ¹⁷ Rü Ngechuchu nanangãxũ rü ñanagürü nüxũ: —;Tüxcüũ “Mecü” ñacurügü choxũ? Erü Tupanaxĩcatama nixĩ ya mecü ixĩcü, rü nataxuma i to. Natürü ngëxguma cunayauxchaũgu i maxũ i taguma gúxũ, rü ;naga naxĩnü i Tupanaãrü mugü! —ñanagürü. ¹⁸ Rü yexguma ga guma ngextüxcü rü ñanagürü: —;Ngëxürüxũ tá nixĩ i Tupanaãrü mugü i naga chaxĩnüxũ? —ñanagürü. Rü Ngechuchu nanangãxũ rü ñanagürü nüxũ: —;Tãütáma cumáëta, rü tãütáma naĩ i ngemaã icupe, rü tãütáma cüngtèèx, rü tãütáma doraxũ quixu i togüchiga! ¹⁹ —;Rü tümaga naxĩnü ya cunatü rü cue, rü nüxũ nangechaũ i cumücügü ngëma na cugü cungechaũxürü! —ñanagürü. ²⁰ Rü yexguma ga guma ngextüxcü rü ñanagürü: —Guxũma i ngëma mugü i nüxũ quixuxũ rü woetama chorü bucüma meã chayanguxëë. ;Rü ;tacü rü to tá chaxü na choxũ nangëxmaxüçèx i maxũ i taguma gúxũ? —ñanagürü. ²¹ Rü Ngechuchu nanangãxũ rü ñanagürü nüxũ: —Ega aixcüma Tupanapëxewa mecü quixĩxchaũgu, rü name nixĩ i namaã cutaxe i guxũma i curü ngëmaxügü rü togü i ngearü ngëmaxũãxgüxũna cunaxã i ngëma curü natanü. Rü ngëxguma tá cuxũ nangëxma i cuchica i daxüguxũ i naãnewa. Rü ñuxũchi marü name i chowe curüxũ —ñanagürü. ²² Natürü yexguma yemaxũ naxĩnügu ga guma ngextüxcü rü poraãcü nangechaũ, yerü namuãrü dïeruãxũchi. ²³ Rü yexguma ga Ngechuchu rü norü ngúexügüxũ ñanagürü: —Aixcüma pemaã nüxũ chixu rü naguxchaxũchi nixĩ na wüxi i duũxũ i dïeruãxũchixũ rü Tupana äëxgacü ííxũwa na nanguxũ. ²⁴ —Rü aixcüma pemaã nüxũ chixu rü ñoma wüxi i cameyu na taxucürüwama wüxi ya ucumaxëtüwa naxüpetüxũãrü yexera narüguxchamaë naxcèx i wüxi i duũxũ i dïeruãxũchixũ na yaxücuxũ i ngextá Tupana äëxgacü ííxũwa —ñanagürü. ²⁵ Rü yexguma yemaxũ naxĩnüëgu ga norü ngúexügü rü poraãcü nabëixãchiãëgü. Rü nügüna nacagüe rü ñanagürügü: —;Rü texé tá ëxna tixĩ ya nayaxúxe i maxũ i taguma gúxũ? —ñanagürügü. ²⁶ Rü Ngechuchu nüxũ nadawenü rü ñanagürü nüxũ: —Duũxügü rü taxuacüma nügü namaxëë, natürü Tupanaãxũ rü natauxcha na namaxëxëãxũ —ñanagürü. ²⁷ Rü yexguma ga Pedru rü ñanagürü nüxũ: —Pa Corix, toma rü marü ítanawogü ga guxũma ga torü yemaxügü na cuwe tarüxĩxüçèx. ;Rü ;tacü tá nixĩ i torü natanü i ñuxmax? —ñanagürü. ²⁸ Rü Ngechuchu nanangãxũ rü ñanagürü nüxũ: —Aixcüma pemaã nüxũ chixu rü ngëma ngunexũ i Tupana nagu nangexwacaxũxëëxũ i guxũma, rü choma rü äëxgacü ya tacü tá chixĩ. Rü chorü tochica i mexëchixũwa tá charüto. Rü pema i 12 i chorü ngúexügü na chowe perüxĩxũ rü pema rü tá ta pexũ nangëxma i perü tochicaxũ i mexëchixũ i chauxütawa. Rü ngëma tá perütogü na norü maxüchigacèx nüxũ picagüxũ i guxũma i Yudíugü. ²⁹ Rü guxãma ya yíxema tümapata chauxcèx ítaxe, rü ëxna tümãeneëgü rü tümãeyëxgüxũ chauxcèx ítaxe, rü ëxna tümãnatü rü tümãëxũ chauxcèx ítaxe, rü ëxna tümãmëx rü tümãxãcügüxũ rü tümããrü naãne chauxcèx ítaxe, rü 100 ëxpüxcüna i ngëma noxri tüxũ ngëxmaxũãrü yexera tá tayaxu. Rü naëtü tá tanayaxu i maxũ i taguma gúxũ. ³⁰ —Natürü muxũma i nümaxũ i ñoma i naãnewa duũxügü wixpëxewa ügüxëëxũ, rü daxüguxũ i naãnewa rü Tupana tá wixweama nanaxügüxëë. Rü muxũma i nümaxũ i ñoma i naãnewa duũxügü wixweama ügüxëëxũ, rü daxüguxũ i naãnewa rü Tupana tá wixpëxewa nanaxügüxëë.

20

Ore ga puracütanüxügu ixuxü

1—Rü ngëma Tupana äëxgacü íxíxüwa rü ñoma wüxi ga ubanecüarü yora ga pëxmama norü puracütanüxü ta yadaucürüü nixí. 2 Rü yema puracütanüxümaã nanamexëë na wüxitchinü ga dïëru gu nüxü na naxütanüãxüçèx ga wüxichigü ga ngunexügu. Rü ñuxüchi naãnewa nanamugü na yéma yapuracüexüçèx. 3—Rü yixcama ga 9 arü oragu rü ínayadau ga ngextá yatügü ga puracüçèx daugüxü íngutaquëxegüxüxüwa. Rü yexma nüxü nayangau ga ñuxre ga yatügü ga ngearü puracüãxgüxü. 4—Rü ñanagürü nüxü:

“¡Ngema chorü ubanecüwa peyapuracüe! Rü meã tá pexü chanaxütanü”, ñanagürü. Rü nümagü rü yéma naxí. 5—Rü yema ubanecüarü yora rü tocuchigu rü wenaxârü togü ga puracütanüxü ta nayadau. Rü tomaëxpüxarü oragu ga yáuanecü rü wenaxârü yexgumarüü ta nayadau. 6—Rü yixcama ga wüximëëxpüxarü oragu ga yáuanecü rü wenaxârü ínayadau ga ngextá yatügü ga puracüçèx daugüxü íngutaquëxegüxüxüwa. Rü yexma nüxü nayangau ga ñuxre ga togü ga yatügü ga ngearü puracüãxgüxü. Rü ñanagürü nüxü:

“¿Tüxcüü i pema rü nuxã perüchomare i guxü i ñoma i ngunexügu, rü tama pepuracüe?” ñanagürü. 7—Rü nümagü nanangãxügü, rü ñanagürügü nüxü:

“Tama tapuracüe erü taxúema toxçèx tadau na tüxü tapuracüexüçèx”, ñanagürügü. Rü yexguma ga yema naãneârü yora rü ñanagürü nüxü:

“¡Pema rü ta ngema chorü ubanecüwa pexí rü peyapuracüe! Rü meã tá pexü chanaxütanü”, ñanagürü. 8—Rü yexguma marü nachütagu rü yema naãneârü yora, rü naxçèx naca ga norü puracütanüxüârü dauruü, rü ñanagürü nüxü:

“¡Naxçèx naca i ngëma puracütanüxü. Rü nüxíra nüxü naxütanü i ngëma wixwenaxüchima ngema íxü, rü nawa tá icuyacuëxëë i ngëma nüxíra ngema puracüexü!” ñanagürü. 9—Rü yéma naxí ga yema puracütanüxü ga wüximëëxpüxarü oragu ga yáuanecü puracüwa íxü. Rü wüxichigü ngíxü nayauxgü ga wüxitchinü ga dïëru. 10—Rü yemawena rü yéma naxí ga yema nüxírama puracüexü ga puracütanüxü. Rü nümagü nagu naxínüëgu rü yexera tá ngíxü nayauxgü ga dïëru, natürü nümagü rü ta ngíxü nayauxgü ga wüxitchinütama ga dïëru ga wüxichigü. 11—Rü yexguma ngíxü nayauxgügu rü inanaxügüe ga chixri na yadexagüxü nachigagu ga yema naãneârü yora. 12—Rü ñanagürügü:

“Yixema rü guxü i ngunexügu üèxcüxetüwa tapuracüe, natürü i ñaã puracütanüxü i wixwenaxüchi íngugüxü rü wüxi i oratama napuracüe. Natürü ngëma tüxü naxütanüãxüëxpüxtama nüxü nanaxütanü”, ñanagürügü. 13—Natürü ga yema ubanecüarü yora nanangãxü, rü ñanagürü nüxü ga wüxi ga yema puracütanüxü:

“Pa Chomücüx, tama cuxü changíx. ¿Tama éxna i wüxitchinügu yíxü ga chomaã cunamexëëxü na cuxü chanaxütanüxü i ngëma puracü? 14—¡Ñaã i curü dïëru, rü íxü! Rü ngëma puracütanüxü i wüxi i oratama puracüexü, rü choma nüxna ngíxü chaxãxchaü i ngëma cuxna ngíxü chaxãcüëxpüx. 15—¿Tama éxna name i ngëma choma chanaxwëxëxüácüma ngímaã na chaxüxü i chorü dïëru? ¿Rü éxna quixãüxãchi erü ngëmaãcü chamecüma?” ñanagürü. 16—Rü yixema ñuxma duüxügü wixweama tüxü ügüxëxë, rü daxügüxü i naãnewa rü Tupana tá wixpëxewa tüxü naxügüxëë. Rü yixema ñuxma duüxügü wixpëxewa tüxü ügüxëxë rü daxügüxü i naãnewa rü Tupana tá wixweama tüxü naxügüxëë. Erü Tupana rü muxüchiena naxu, natürü noxretama tixí ga yixema tüxü nadexe—ñanagürü ga Ngechuchu.

Ngechuchu rü norü tomaëxpücüna nanaxunagü ga norü yuxchiga

(Mr 10.32-34; Lc 18.31-34)

17 Rü yexguma namagu yaxüxgu ga Ngechuchu ga Yerucharéüwa na naxüxü rü noxrüwama naxçèx naca ga yema 12 ga norü ngüxügü, rü ñanagürü nüxü: 18—Pema

nüxü pecuèx na marü ingaicaxü na Yerucharéüwa ingugüxü. Rü ngema rü duüxügü rü tá chixri chomaã nachopetü. Rü tá paigüarü äëxgacügü rü ngüxëëruügü i ore i mugüwa ngüxëëtaegüxüna tá choxü namugü. Rü nümagü rü tá chomaã nanaxuegugü na chayuxücèx. ¹⁹—Rü tá to i nachüüanecüãxna choxü namugü. Rü ngëmagü tá nixi i chaugu idauxcüräügüxü rü choxü cuaixgüxü. rü ñuxüchi tá curuchawa choxü nipotagü na ngëxma chayuxücèx. Natürü tomaëxpüx i ngunexüguwena rü tá wenaxärü chamaxü —ñanagürü.

*Wüxi ga ngüxëëcèx íca ga Chaütiágu rü Cuáüärü mamá
(Mr 10.35-40)*

²⁰ Rü yéma iyexma ga naë ga Chaütiágu rü Cuáü. Rü yema taxre rü Zebedéu nanegü nixigü. Rü ngíma rü Ngechuchucèx iyaxü namaã ga yema taxre ga ngínegü. Rü Ngechuchupëxegu iyacaxápüxü, rü wüxi ga ngüxëëcèx nüxna iyaca. ²¹ Rü nüma ngíxna naca, rü ñanagürü: —¿Tacü nixi i cunaxwèxexü? —ñanagürü. Rü ngíma inangãxü rü ngígürügü: —Pa Corix, ngëxguma äëxgacüxü quingucuchigu rü chanaxwèxe i cunamu na wüxi i ñaã chaune rü curü tügünecüwawa na natoxü, rü ngëma to i curü toxwecüwawa na natoxü —ngígürügü. ²² Natürü Ngechuchu ngíxü nangãxü rü ñanagürü: —Pema rü tama nüxü pecuèx na tacücèx ípeçaxü. ¿Namaxã chi peporaexü i ngëma ngúxü i tá choxü üpetüxü? —ñanagürü. Rü nümagü nanangãxügü rü ñanagürügü: —Ngëmaãcü namaã tá taporae —ñanagürügü. ²³ Rü Ngechuchu nanangãxü rü ñanagürü nüxü: —Aixcüma tá nixi i chauxrüü ngúxü pingegüxü. Natürü ngëma chorü tügünecüwawa rü chorü toxwecüwawa na perütogüxücèx, rü tama choxmëxwa nangëxma na pexna chanaxãxü. Rü Chaunatumëxëwa nixi na nangëxmaxü i ngëma, rü nüma tá tuxna nanaxã ya yíxema tümacèx íyíxë —ñanagürü. ²⁴ Rü yexguma yemaxü naxínüëgu ga yema togü ga 10 ga Ngechuchuarü ngüxügü, rü Chaütiágumaã rü Cuáümaã nanuë. ²⁵ Natürü Ngechuchu naxcèx naca rü ñanagürü nüxü: —Pema nüxü pecuèx rü guxü i nachüüanegüarü äëxgacügü rü poraãcü nanamu i norü duüxügü. Rü ngëma äëxgacügü i taxügü rü norü duüxügüarü yora nügü nixigüxëë. ²⁶ —Natürü täütáma ngëmaãcü nixi i petanüwa. Rü ngëxguma texé naxwèxegu na äëxgacü tíxü i petanüwa, rü name nixi i noxri rü guxãärü ngüxëëruü tixi. ²⁷ —Rü ngëxguma chi texé i petanüwa naxwèxegu na tümamücügüeru na tíxü, rü name nixi i noxri rü guxüma i tümamücügüarü ngüxëëruü tixi. ²⁸ —Yerü chomatama i Tupana Nane na duüxüxü chíxü rü tama togü choxü rüngüxëëxücèx nixi i núma chaxüxü. Natürü núma chaxüxü na duüxügüxü charüngüxëëxücèx rü naxcèx na chayuxücèx rü ngëmaãcü chanaxütanüxücèx na muxüma i nümagü rü nüxü nangëxmaxücèx i maxü i taguma gúxü —ñanagürü.

*Ngechuchu nanameëxëë ga taxre ga ngexetügüxü
(Mr 10. 46-52; Lc 18.35-43)*

²⁹ Rü yexguma Ngechuchu norü ngüxügümaã Yericüarü íänewa íchoüxgu, rü muxüma ga duüxügü nawe narüxí. ³⁰ Rü yéma namacüwawa narütogü ga taxre ga ingexetüxü. Rü yexguma nüxü naxínüëgu na Ngechuchu yéma üpetüxü, rü tagaãcü Ngechuchuna nacagüe, rü ñanagürügü: —Pa Corix, Pa Dabítanüxüx, ¡Cuxü tangechaütümüügü! —ñanagürügü. ³¹ Rü yema duüxügü ga Ngechuchuwe rüxíxü rü nayangagü na iyanangeëxgüxücèx. Natürü nümagü ga yema ingexetüxü rü yexeraãcü Ngechuchuna nacagüe, rü ñanagürügü: —Pa Corix, Pa Dabítanüxüx, ¡cuxü tangechaütümüügü! —ñanagürügü. ³² Rü yexguma ga Ngechuchu rü yexma nayachiãchi rü naxcèx naca ga yema ingexetüxü. Rü nüxna naca rü ñanagürü: —¿Tacü i penaxwèxexü na pexcèx chanaxüxü? —ñanagürü. ³³ Rü nümagü nanangãxügü rü ñanagürügü: —Pa Corix, tanaxwèxe na toxü quidauchitanügüxëëxü —ñanagürügü. ³⁴ Rü yexguma ga Ngechuchu rü nüxü nangechaütümüügü, rü naxëtügügu ningögü. Rü yexgumatama nidauchigü, rü Ngechuchuwe narüxí.

21

Yerucharéügu naxücu ga Ngechuchu (Mr 11.1-11; Lc 19.28-40; Cu 12.12-19)

¹ Rü yexguma marü yangaicagügu ga Yerucharéüwa na nangugüxü, rü nawa nangugü ga guma ñane ga Bechagué ga Oríbunecüarü mèxpüneärü ngaicamana yexmane. Rü Ngechuchu nanamu ga taxre ga norü ngúexügü. ² Rü ñanagürü nüxü: —¡Gua tórü toxmèxtawa ngëxmane ya ñanexäcüwa pexí! Rü ngëxma tá ngixü pengau i wüxi i buru i ngëxma ngaxücü namaã i wüxi i ngixäcü i yatüxü i ngixütagu irüxäüxü. ¡Rü ngixü piwëxü, rü nuã chauxütawa ngixü pega namaã i ngixäcü! ³ Rü ngëxguma texé pexna caxgu na tacüçex ngixü piwëxüxü, ¡rü tümamaã nüxü pixu rü ñapegügü:

“Torü Cori nangixwëxe namaã i ngixäcü, natürü paxa tá ngixü nawoeguxëë”, ñapegügü tüxü! —ñanagürü. ⁴ Rü yema naxüpetü yerü yemaäcü Tupana nayanguxëë ga norü ore ga nuxcümaüxü ga norü orearü uruü ümatüxü ga ñaxü:

⁵ “¡Yerucharéücüäxgümaã nüxü pixu rü ñapegü: ‘¡Düçex ya perü äëxgacü ya nuã pexütawa ücü! Rü nüma rü tama nügü yacuëxüüäcü ínangu, rü wüxi i buruxacüétügumare naxaunagü!’ ”

ñanagürü ga yema ore. ⁶ Rü yexguma ga yema taxre ga norü ngúexügü rü yéma naxí, rü nanaxügü ga yema Ngechuchu namaã nüxü ixuxü. ⁷ Rü Ngechuchuxütawa ngixü nagagü ga yema buru ngixacümaã. Rü yema norü ngúexügü rü naxchirumaã nanaçhatagü ga yema ngixacü, rü ñuxüchi ga Ngechuchu rü natagu naxaunagü. ⁸ Rü yema muxüma ga duüxügü ga nawe rüxüxü rü naxchirumaã nayaçhamatanü ga nama. Rü togü rü naixätü ta nadaügü rü yemamaã nayaçhamatanü ga nama. ⁹ Rü yema duüxügü ga napëxegu ägüxü, rü yema togü ga wixweama ägüxü, rü tagaäcü ñanagürügü: —¡Nüxü ticuëxüxügü ya daa äëxgacü ya Dabítanüxü! ¡Rü namecümaxüchi ya daa Tupanaegagu núma ücü! ¡Rü pema rü ta, Pa Daxücüäx, rü nüxü picuëxüxügü ya Tupana! —ñanagürügü. ¹⁰ Rü yexguma Ngechuchu Yerucharéüwa ixücuxgu, rü guxüma ga yema ñanecüäx rü nanaxixächiaëgü, rü ñanagürügü: —¿Texe nixí ya daa? —ñanagürügü. ¹¹ Rü yema Ngechuchuwe rüxüxü ga duüxügü rü nanangäxügü rü ñanagürügü: —Daa nixí ya Tupanaärü orearü uruü ya Ngechuchu ya Gariréaanewa ngëxmane ya ñane ya Nacharétucüäx ixücü —ñanagürügü.

Ngechuchu rü tupauca ga taxünewa ínanawoxü ga duüxügü ga yéma taxegüxü (Mr 11.15-19; Lc 19.45-48; Cu 2.13-22)

¹² Rü tupauca ga taxünegu naxücu ga Ngechuchu, rü ínanawoxü ga yema yéma tacümaã taxegüxü rü naxçex taxegüxü. Rü nanangüegutanü ga norü mechagü ga yema duüxügü ga yéma Tupanaarü ämarewa mexü ga dïerumaã taxegüxü rü muxtucugümaã taxegüxü.

¹³ Rü ñanagürü nüxü ga yema duüxügü: —Tupanaärü ore i ümatüxüwa rü ñanagürü: “Chopata rü yumüxëpataü nixí”.

Natürü pema rü ngítèëxgüxüpataü peyaxíxëë —ñanagürü. ¹⁴ Rü yéma tupauca ga taxünewa rü Ngechuchuçex naxí ga ñuxre ga ingexetügüxü rü ichixeparagüxü. Rü Ngechuchu nanameëxëë. ¹⁵ Natürü ga paigüarü äëxgacügü rü ngúexëëruügü ga ore ga mugüwa nguxëëtaegüxü, rü nüxü nadaügü ga yema mexügü ga taxügü ga Tupanaärü poramaã naxüxü ga Ngechuchu rü buxügüxü naxínüë ga na ñagüxü: —¡Namexëchi ya daa äëxgacü ya Ngechuchu ya Dabítanüxü! —ñagüxü. Rü yemacëx ga yema äëxgacügü rü nanuë. ¹⁶ Rü ñanagürügü Ngechuchuxü: —¿Nüxü cuxínüxü i ngëma buxügü namaã idexagüxü? —ñanagürügü. Rü Ngechuchu nanangäxü, rü ñanagürü: —Ngü, nüxü chaxínü. ¿Natürü taguma éxna nawa pengúe i Tupanaärü ore i ümatüxü i ñaxü:

“Rü ngëma buxügü i íraxüchixü rü õxchanagü rü tá ta cuxü nicuëxüügü”,

ñaxü? —ñanagürü. ¹⁷ Rü yexguma ga Ngechuchu rü nüxna yéma nixü, rü ñuxüchi ínaxüxü ga guma ñanewa. Rü ñane ga Betániawa naxü, rü yexma nayape.

*Ngechuchu rü orix ga iguera ga ngearü oðxümaã chixexü naxuegu
(Mr 11.12-14, 20-26)*

¹⁸ Rü moxüãcü ga pèxmama rü yexguma wenaxârü Yerucharéücèx nataegugu ga Ngechuchu rü nataiya. ¹⁹ Rü namacüwawa nüxü nadau ga wüxi ga orix ga iguera. Rü naxcèx nixü, natürü taxuüma ga norü oxü inayangau, rü naätüxüxĩcatama inayangau. Rü yemacèx ñanagürü nüxü ga yema orix: —Rü tagutáma wena cuxox, —ñanagürü. Rü yexgumatama narüñexẽ ga yema orix. ²⁰ Rü yexguma yemaxü nadaugügu ga norü ngúexügü, rü nabèixãchiãægü. Rü Ngechuchuna nacagüe rü ñanagürügü: —¿Rü ñuxãcü i ñaã orix i paxama nañexèxü? —ñanagürügü. ²¹ Rü Ngechuchu nanangãxü rü ñanagürü: —Aixcüma pemaã nüxü chixu rü ngèxguma chi meã peyaxögügu rü tama ngẽma igueramaã chaxüxüxĩca chi pexü. Natürü yexeraxü chi pexü. Rü ngèxguma chi daa mèxpünemaã nüxü pixuxgu na yaxügachixüçèx rü taxtü i taxüchiüwa naxüxüçèx, rü pega chi naxĩnü. ²² Rü guxüma i tacü i naxcèx ípeçaxü i perü yumüxèwa, rü tá penayauxgü ega aixcüma peyaxögüãcüma naxcèx ípeçaxgu.

*Ngechuchuna nacagüe na texégagu tupauca ga taxünewa nangüxèëtaexü
(Mr 11.27-33; Lc 20.1-8)*

²³ Rü Ngechuchu rü tupauca ga taxünegu naxücu. Rü yexguma yéma ínangüxèëtaeyane rü naxcèx naxĩ ga paigüarü ãèxgacügü rü Yudiügüarü ãèxgacügüerugü. Rü Ngechuchuna nacagüe rü ñanagürügü: —¿Rü texégagu nixĩ i cunaxüxü i ngẽma núma cuxüxü? ¿Rü texé cuxü tamu na cunaxüxüçèx i ngẽma? —ñanagürügü. ²⁴⁻²⁵ Rü Ngechuchu nanangãxü rü ñanagürü: —Choma rü tá ta pexna chaca, rü ngèxguma choxü pengãxügu i ngẽma pexna naxcèx chaçaxü, rü choma rü tá ta pemaã nüxü chixu na ngèxürüüxü i ãèxgacü na choxü muxü na nuã changüxèëtaexü. ¿Rü texé tanamu ga Cuáü na duüxügüxü ínbaiüxèëxüçèx? ¿Pexcèx rü Tupana yĩxü ga namucü rü éxna duüxügümare? —ñanagürü. Rü yexguma ga yema ãèxgacügü rü inanaxügüe ga nügümaã na yapora-gatanüçüxü. Rü nügümaãtama ñanagürügü: —¿Ñuxü ñagügüxü tá? Erü ngèxguma chi nüxü ixuxgu na Tupana núma namuxü rü nüma rü tá ñanagürü tüxü:

“¿Rü tüxcüü ga tama nüxü peyaxögüxü?” ñanagürü tá. ²⁶ —Rü ngèxguma chi nüxü ixuxgu na yatügümare núma namuxü rü taxcèx rü tá naxãücüma, erü duüxügü tá tüxü nadai. Erü nümagü i duüxügü rü nagu narüxĩnüe na Tupana yĩxü ga Cuáüxü núma mucü —ñanagürügü. ²⁷ Rü yemacèx Ngechuchuxü nangãxügü rü ñanagürügü: —Tama nüxü tacuèx ga texé núma na namuxü ga Cuáü ga baiüxèëruü —ñanagürügü. Rü yexguma ga Ngechuchu rü ñanagürü nüxü: —Choma rü tá ta tãütáma pemaã nüxü chixu na texé choxü muxü na chanaxüxü i ngẽma choxna naxcèx peçaxü —ñanagürü.

Ore ga taxre ga nanegügu ixuxü

²⁸ Rü ñanagürü ta ga Ngechuchu —¿Ñuxü ñapegüxü naxcèx i ñaã ore i tá pemaã nüxü chixuxü? Rü wüxi ga yatü rü nüxü nayexma ga taxre ga nane. Rü wüxi ga guma nanemaã nüxü nixu rü ñanagürü nüxü:

“Pa Chaunex, chanaxwèxe i yéa chorü ubaarü buxgüwa cuyapuracü”, ñanagürü. ²⁹ —Rü guma nane nanangãxü rü ñanagürü:

“Choxü nawèxtümüü na ngema chaxüxü”, ñanagürü. Natürü ga yixcamaxüra rü nagu narüxĩnü rü düxwa yéma nayapuracü. ³⁰ —Rü yixcüra ga guma nanatü rü naĩ ga nanexütawa naxü, rü yexgumarüü ta nüxü yema ñanagürü. Rü guma nane nanangãxü rü ñanagürü:

“Marü name, Pa Pa, rü ngema tá chaxü”, ñanagürü. Natürü tama aixcüma yéma naxü. ³¹ —Rü ñuxma chanaxwèxe i chomaã nüxü pixu rü ngexcürüücü ga guma taxre ga nane ga aixcüma naxücü ga yema nanatü naxwèxexü —ñanagürü. Rü nümagü nanangãxügü rü ñanagürügü: —Ga guma nüxĩra namuãcü nixĩ ga naga ínücü —ñanagürügü. Rü yexguma ga Ngechuchu rü ñanagürü nüxü: —Aixcüma pemaã nüxü chixu rü ngẽma

yatügü i Dumaârü âëxgacücèx dîëru ngîxü dexü rü ngêma ngexügü i chixri maxêxü tá nixî i pexüpa nüxîra ichocuxü i ngextá Tupana âëxgacü íxîxüwa. ³² —Yerü Cuáü ga baiüxêëruü rü núma naxü na pemaâ nüxü yaxuxüçèx na ñuxácü tá na pemaxêxü, natürü ga pema rü tama nüxü peyaxögü. Natürü ga yema yatügü ga Dumaârü âëxgacücèx dîëru ngîxü dexü rü yema ngexügü ga chixri maxêxü rü Cuáüãxü nayaxögü. Natürü ga pema rü woo nüxü na pedaugüxü ga ñuxácü na yaxögüãxü, rü tama nüxü perüxoechaü i pecüma i chixexü na peyaxögüxüçèx —ñanagürü.

*Ore ga chixexü ga puracütanüxügu ixuxü
(Mr 12.1-12; Lc 20.9-19)*

³³ Rû ñanagürü ta ga Ngechuchu: —Rü chanaxwèxe i iperüxînüë i ñaã to i ore i cuèxruü i tá pemaâ nüxü chixuxü. Rû nayexma ga wüxi ga yatü ga nüxü nayexmacü ga wüxi ga norü naâne. Rû yexma nanato ga muxüma ga orîx ga uba. Rû ñuxüchi ínanapoxegu, rü nanaxü ga wüxi ga ubaarü yaxütxüchica rü wüxi ga dauxütaechica. Rû ñuxüchi ñuxre ga puracütanüxüna nüxü nadauxêë. Rû namaâ nanamexêë na ngâxügu namaâ ngîxü yatoyexüçèx ga yema ubatanü. Rû ñuxüchi ga yema naâneärü yora rü wüxi ga to ga nachîüâne ga yaxügüxüwa naxü. ³⁴ —Rü yexguma norü ubaarü buxgüwa nanguxgu, rü yema naâneärü yora rü yéma nanamugü ga ñuxre ga norü duüxügü na yema puracütanüxüna ngîxcèx yaxüçèx ga yema ubatanü ga nüxna ücü. ³⁵ Natürü ga yema puracütanüxügü rü ínanayauxü ga yema coriarü duüxügü. Rû nanaçuaixgü ga wüxi, rü ga to rü nayamèxüchigü, rü ga yema to rü nutamaâ ínanamuxüchigü. ³⁶ —Rü yema naâneärü yora rü wenaxârü noxriarü yexera rümumaêxü ga norü duüxügü yéma namugü. Natürü ga yema puracütanüxügü rü yema togürüütama chixri namaâ nachopetü. ³⁷ —Rü düxwa ga yema naâneärü yora rü yéma nanexüchixü namu yerü nüma nagu naxînügu rü chi nanega naxînüë ga yema puracütanüxügü. ³⁸ —Natürü yexguma yema cori nanexü nadaugügu ga yema puracütanüxügü, rü nügümaâ ñanagürügü:

“Ngêmaärü tá nixî i ñaã naâne i yixcama. ¡Rü ngîxâ tayamèxgü na tóxrü yîxüçèx!” ñanagürügü. ³⁹ —Rü nayayauxgü, rü toxnamana nanagü, rü yexma nayamèxgü —ñanagürü. ⁴⁰ Rû yexguma ga Ngechuchu rü yema paigüarü âëxgacügüna naca rü ñanagürü: —¿Rü ngêxguma ínanguxgu i ngêma naâneärü yora, rü tacü tá yema puracütanüxümaâ naxü? —ñanagürü. ⁴¹ Rû yema âëxgacügü rü Ngechuchuxü nangâxügü, rü ñanagürügü: —Ngêma naâneärü yora rü tama nüxü nangechaütümüüãcüma tá nanadai i ngêma puracütanüxügü i chixri maxêxü. Rû ñuxüchi togü i puracütanüxügü i meã namaâ ngîxü itoyexü i dîëruna tá nüxü nadauxêë —ñanagürügü. ⁴² Rû Ngechuchu rü ñanagürü nüxü: —¿Taguma êxna nawa pengúe i Tupanaärü ore i ümatüxü? Erü ngêmawa rü ñanagürü:

“Rü yima nuta ya mecü ya ñärü üruügü nüxü oechirécü rü ñuxma rü yimatama nixî ya Tupana nüxîra yaxücuchicü na namaâ inaxügüãxüçèx ya ípata. Rû tórü Cori ya Tupana nixî ga naxücü ga yema, rü ñuxma rü namexêchi i taxcèx”, ñanagürü i ngêma ore. ⁴³ —Rü ngêmacèx pemaâ nüxü chixu rü woo pexcèxchirêx na yîxü i ngêma naâne i ngextá Tupana âëxgacü íxîxüwa, natürü pexna tá nanapu. Rû togü i duüxügü i aixcüma Tupanaga ínüëxüna tá nanaxã. ⁴⁴ —Rü yima nuta ega texé namaâ yarüñaxgu rü tá itapoügü. Rû yíxema tümaetügu nanguxe ya yima nuta, rü tá tüxü niñaïxmü —ñanagürü ga Ngechuchu. ⁴⁵ Rû yexguma ga paigüarü âëxgacügü rü Parichéugü nüxü ínüëgu ga yema ore ga cuèxruü ga Ngechuchu namaâ nüxü ixuxü, rü nüxü nicuèxächitanü ga nachiga na yîxü ga yema ore. ⁴⁶ Rû yexgumatama ga yema âëxgacügü rü Ngechuchuxü niyauxgüéga. Natürü taxucürüwama nayayauxgü yerü duüxügüxü namuêë, yerü nümagü ga duüxügü rü nayaxögü ga aixcüma Tupanaärü orearü uruü na yîxü ga Ngechuchu.

22

*Ore ga ngĩgiarũ petagu ixuxũ
(Lc 14.15-24)*

¹ Rũ Ngechuchu rũ wenaxãrũ nanangũexẽẽ. Rũ ore ga cuèxruũgu namaã nayaxu, rũ ñanagũrũ nũxũ: ²—Rũ ngẽma Tupana na ãẽxgacũ ixĩxũ rũ ñoma wũxi ga nachĩũãneãrũ ãẽxgacũ ga naneãrũ ngĩgũ ũchiũcũrũũ nixĩ. ³—Rũ norũ duũxũgũxũ namu na naxcèx yaçaxũcèx ga yema duũxũgũ ga marũ ũpaacũ nũxna naxuxũ. Natũrũ yema duũxũgũ ga marũ nũxna naxuchiréxũ rũ tama yéma naxĩxchaũ. ⁴—Rũ wenaxãrũ togũ ga norũ duũxũgũxũ yéma namugũ. Rũ ñanagũrũ nũxũ:

“¡Ngema pexĩ naxũtawa i ngẽma duũxũgũ i nũxna chaxuchiréxũ, rũ namaã nũxũ peyarũxu rũ marũ íname i chorũ òna i taxũ. Rũ marũ chanadai i chorũ wocagũ i ingũexũ rũ guxũma marũ ínamemare. Rũ chanaxwèxe i paxa nuã naxĩ naxcèx i ñãã chorũ peta!” ñanagũrũ. ⁵—Natũrũ yema duũxũgũ ga nũxna naxuchiréxũ rũ tama naga naxĩnũẽ. Rũ wũxi rũ naãnewa naxũ, rũ ga to rũ norũ taxepataũwa naxũ. ⁶—Rũ ga togũ rũ yema ãẽxgacũarũ duũxũgũxũ ínayauxũ rũ nayaçuaixgũ ñũxmata nayuexẽẽ. ⁷—Rũ yexguma ga guma ãẽxgacũ rũ poraãcũ nanu. Rũ norũ churaragũxũ yéma namugũ na yadaiãxũcèx ga yema duũxũgũ ga máẽtagũxũ, rũ na yagugũãxũcèx ga guma norũ íãne. ⁸—Rũ ñũxũchi ñanagũrũ nũxũ ga norũ duũxũgũ:

“Guxũma i chorũ peta rũ marũ ínamemare. Natũrũ ga yema duũxũgũ ga nũxna chaxuchiréxũ rũ woetama nũxũ chaxo na nuã naxĩxũcèx. ⁹—¡Rũ yéa taxũ i ítamũwa pexĩ, rũ nũxna peyaxu i guxũ i duũxũgũ i ngema nũxũ pedauxũ, na núma chorũ petawa naxĩxũcèx!” ñanagũrũ. ¹⁰—Rũ yema ãẽxgacũarũ duũxũgũ rũ yéma ítamũwa naxĩ. Rũ nũxna nixuetanũ ga guxũma ga duũxũgũ ga mexũgũ rũ chixexũgũ ga nũxũ iyangaugũxũ. Rũ yemaãcũ duũxũgũmaã nanapa ga guma ãẽxgacũpata. ¹¹—Rũ yexguma ga guma ãẽxgacũ rũ nixũcu nawa ga yema ucapu ga nawa peta naxũxũ, yerũ ínayadau ga yema duũxũgũ ga nũxna naxuxũ. Natũrũ yéma nũxũ nadau ga wũxi ga yatũ ga tama norũ ngèxãẽchirugu icúxũ. ¹²—Rũ ñanagũrũ nũxũ:

“Pa Chomũcũx ¿ñũxãcũ i nuxã cuxũcuxũ na tama curũ ngèxãẽchirugu quicúxũ?” ñanagũrũ. Natũrũ núma ga yema yatũ rũ nangeèxmare. ¹³—Rũ yexguma ga guma ãẽxgacũ rũ ñanagũrũ nũxũ ga yema norũ duũxũgũ:

“¡Meã peyanèixpara rũ peyanèixchacũgũ i ñãã yatũ, rũ yéma dũxétũwa i poraãcũ ínaxèãnexũwa peyatá! Rũ ngema tá narũdouxũ rũ tá nixũxchapũta erũ poraãcũ tá nũxũ nangux”, ñanagũrũ. ¹⁴—Rũ Tupana rũ muxũchiena naxu, natũrũ noxretama tixĩ ya yixema aixcũma Tupana tũxũ ndexe —ñanagũrũ ga Ngechuchu.

*Dĩeru i ãẽxgacũna ngixũ ixãcũchiga
(Mr 12.13-17; Lc 20.20-26)*

¹⁵ Rũ yexguma ga Parichéugũ rũ nixĩgachi. Rũ noxrũwama nũgũmaã nayamexẽẽgũ na tacũ rũ oremaã tá Ngechuchuna nacagũexũcèx na chixexũgu nanguxẽẽgũãxũcèx rũ ñũxũchi ãẽxgacũxũtawa na ínaxuaxũgũãxũcèx. ¹⁶ Rũ yemacèx Ngechuchuxũtawa nanamugũ ga ñũxre ga norũ duũxũgũ namaã ga ñũxre ga Erodearũ duũxũgũ na yema oremaã Ngechuchuna na yacagũexũcèx. Rũ yexguma Ngechuchuxũtawa nangugũgu rũ ñanagũrũgũ: —Pa Ngũexẽẽruũx, nũxũ tacuèx rũ aixcũma nixĩ i ngẽma nũxũ quixuxũ i curũ ore. Rũ aixcũma cunangũexẽẽ i duũxũgũ na Tupana naxwèxexũãcũma namaxèxũcèx. Rũ tama duũxũgũgamare cuxĩnũ, erũ tama norũ dũxétũxũnegu cudawenũ, natũrũ nacũma nixĩ i cungugũxũ. ¹⁷—¡Rũ tomaã nũxũ ixu! rũ ngẽma dĩeru ya ãẽxgacũ ya tacũ ya Dumacũãx totanũwa yayauxchaũxũ, ¿rũ namexũ yĩxũ na nũxna ngĩxũ taxãxũ rũ èxna tama? —ñanagũrũgũ. ¹⁸ Natũrũ Ngechuchu nũxũ nacuèxama na chixexũgu naxĩnũèxũ ga yema duũxũgũ, rũ yemacèx ñanagũrũ nũxũ: —Pema nixĩ i togũpèxewa meã pemaxènetaxũ, natũrũ peãẽwa rũ chixexũgu perũxĩnũẽ. ¿Rũ tũxcũũ i chixexũgu

choxü penguxëëchaüxü? ¹⁹ —¡Choxü ngixü pewé i wüxi i dïeru i ngïmaã ãëxgacüaxü penaxütanücü! —ñanagürü. Rü yéma naxütawa ngixü nangepü ga wüxitachinü ga yema dïeru. ²⁰ Rü yexguma Ngechuchu ngixü dëuxgu, rü nüxna naca, rü ñanagürü —¿Rü texéchicünèxã rü texéega nixi i ngïgu üxü? —ñanagürü. ²¹ Rü nümagü nanangãxügü, rü ñanagürügü: —Dumacüãx ya ãëxgacü ya tacüchicünèxã nixi —ñanagürügü. Rü yexguma ga Ngechuchu rü ñanagürü nüxü: —¡ãëxgacüna ngixü pexã i ngëma ãëxgacüarü ixïcü, rü Tupana ngixü pexã i ngëma Tupanaärü ixïcü! —ñanagürü. ²² Rü yexguma yema orexü naxïnüëgu, rü nabëixãchiãëgü. Rü Ngechuchuna ínixi.

*Ngechuchuna nacagüe rü ngoxi yuwa ínadagü i duüxügü
(Mr 12.18-27; Lc 20.27-40)*

²³ Rü yematama ngunexügu rü ñuxre ga Chaduchéugü rü Ngechuchuxütawa naxi. Rü nümagü nixi ga nagu naxïnüëxü na yuexü rü tagutáma wena namaxëxü. Rü yemacëx Ngechuchuna nacagüe, rü ñanagürügü: ²⁴ —Pa Ngúexëëruüx, Moiché nüxü ixuxgu rü ngëxguma wüxi ya yatü naxãmèx rü nangexacüyane nayuxgu, rü name nixi i naëneëtama ngïmaã naxãmèx i ngëma yutecü i naxümmèx, na ngëmaãcü naxãxãcüxücèx nüxü ya yima naëneë ya marü yucü —ñanagürü ga yema ore. ²⁵ Rü ñanagürügü ta ga Chaduchéugü: —Nayexma ga totanüwa ga 7 ga nügüeneë. Rü naxãmèx ga guma yacü, natürü tauta naxãxãcüyane nayu. Rü yexguma ga naí ga naëneë nüxü ngïmaã naxãmèx ga yema ngecü. ²⁶ —Rü guma rü ta nayu, rü nangexacü. Rü yexguma rü naí ga naëneë nüxü ngïmaã naxãmèx. Rü yemaãcü gúcüma ga guma 7 ga nügüeneë rü ngïmaã naxãmèx ga yema nge. Rü gúcüma nayue tauta naxãxãcüyane. ²⁷ —Rü yemawena rü ngïma rü ta iyu ga yema nge. ²⁸ —Rü ngëxguma yuexü wena maxëgu, ¿rü ngexcürüücü ga guma 7 ga nügüeneë naxmèx tá iyixi i ngëma nge? Yerü gúcüma ga guma 7 ga nügüeneë ngïmaã naxãmèx —ñanagürügü. ²⁹ Rü yexguma ga Ngechuchu rü nanangãxü, rü ñanagürü: —Pema rü ípetüe erü tama nüxü pecuèx i Tupanaärü ore i ümatüxü, rü tama nüxü pecuèx i ñuxãcü na yïxü i Tupanaärü pora. ³⁰ —Rü ngëxguma yuexü wena maxëgu rü taxúetáma tixãmèxgü rü ëxna tixãtegü. Erü daxüçüãx i Tupanaärü orearü ngeruügürüü tá tixigü i ngëxguma. ³¹ —Pema choxna peca i yuexüärü dagüchiga. ¿Natürü tama ëxna nawa pengüé i Tupanaärü ore i ümatüxü i ngextá Tupanatama ngëmachigaxü pemaã íyaxuxüwa? Erü ngëma rü ñanagürü ya Tupana:

³² “Choma nixi i Abráüärü Tupana, rü Ichaáarü Tupana, rü Acobuarü Tupana”, ñanagürü. Rü ngëma orewa nüxü tacuèx rü woo ñoma i naãnewa nayuegu i duüxügü, natürü Tupanaärü ínüwa rü guxügüma namaxë —ñanagürü ga Ngechuchu. ³³ Rü yexguma yemaxü naxïnüëgu ga duüxügü, rü guxüma nabëixãchiãëgü namaã ga norü nguxëëtae ga Ngechuchu.

*Ngëma Tupanaärü mu i guxü i norü mugüarü yexera ixixü
(Mr 12.28-34)*

³⁴ Rü nangutaguëxegü ga Parichéugü ga yexguma nüxü naxïnüëgu ga ñuxãcü Ngechuchu rü yema Chaduchéugüxü na iyanangeëxgüxëëxü. ³⁵ Rü wüxi ga yema Parichéugü ga ore ga mugüwa nguxëëtaexü rü Ngechuchuxü chixexügu nanguxëëchaü. Rü yemacëx Ngechuchuna naca rü ñanagürü: ³⁶ —Pa Ngúexëëruüx, ¿ngëxürrüüxü i Tupanaärü mu nixi i guxü i norü mugüarü yexera ixixü? —ñanagürü. ³⁷ Rü Ngechuchu nanangãxü rü ñanagürü: —Ngëma Tupanaärü mu i guxü i norü mugüarü yexera ixixü, rü ñanagürü:

“¡Rü nüxü nangechaü ya Cori ya curü Tupana i guxüne ya curü maxünemaã, rü guxü i cuãëmaã, rü guxü i nagu curüxïnüxümaã!”

ñanagürü. ³⁸ —Rü ngëma nixi i Tupanaärü mu i guxü i norü mugüarü yexera ixixü. Rü ngëma nixi i nüxïraüxü i norü mu ga duüxügüna naxãxü ga Tupana. ³⁹ —Rü ngëma norü taxre i Tupanaärü mu, rü ngëma nüxïraüxü i norü murütama nixi, rü ñanagürü:

“¡Nüxü nangechaü i cumücü ngëma na cugü cungechaüxürüü!” ñanagürü. ⁴⁰ — Rû ngëma taxre i Tupanaârü mugüwa nixî inaxügüxü i guxüma i Tupanaârü mugü ga Moïché ümatüxü rû nuxcümaügüxü ga Tupanaârü orearü uruügu namaã nguxëëtaegüxü —ñanagürü.

¿Texétaa yïxü ya Cristu?
(Mr 12.35-37; Lc 20.41-44)

⁴¹⁻⁴² Rû yoxni ga Parichéugü rû yéma nangutaquëxegü, rû Ngechuchu nüxna naca, rû ñanagürü: —¿Rü ñuxü ñapegüxü i pema nüxü ya Cristu? ¿Rü texétaa yïxü? —ñanagürü. Rû nümagü ga Parichéugü rû nanangäxügü rû ñanagürügü: —Cristu rû nuxcümaücü ga äëxgacü ga Dabítaa nixî —ñanagürügü. ⁴³ Rû yexguma ga Ngechuchu rû ñanagürü: —¿Tüxcüü ga Dabí ga norü Corimaã naxuaxü ga Cristu ga yexguma Tupanaãe ga Ünexü Dabíxü idexaxëëgu? Yerü ga Dabí rû ñanagürü:

⁴⁴ “Tupana rû chorü Cori ya Cristuxü ñanagürü: ‘¡Nuã chorü tügü necüwawa rüto ñuxmatáta nüxü charüporamaë i curü uwanügü na cuga naxïnüëxüçèx!’ ” ⁴⁵ — Natürü ¿ñuxücürüwa i Dabítaa yïxü ya Cristu ega nümatama ga Dabí rû norü Corimaã naxuãgu? —ñanagürü ga Ngechuchu. ⁴⁶ Rû taxumaãma nanangäxügüéga ga yema Parichéugü, rû bai ga wüxi ga oremaã. Rû yemawena rû guxüma namuë na tacüçèx Ngechuchuna nacagüexü.

23

Ngechuchu rû duüxügütanüwa inanaxuaxü ga Parichéugü rû ngúexëëruügu ga Moïchéarü mugüwa nguxëëtaegüxü

(Mr 12.38-40; Lc 11.37-54, 20.45-47)

¹ Rû yemawena ga Ngechuchu rû duüxügüxü rû norü ngúexügüxü ñanagürü: ² — Ngëma ngúexëëruügu i ore i mugüwa nguxëëtaegüxü rû Parichéugü, rû meãma nüxü nacüexgü ga Tupanaârü ore ga Moïché ümatüxü. ³ —Rü ngëmacèx name i naga pexïnüë i guxüma i ngëma pemaã nüxü yaxugüxü. Natürü tama name i nüma namaxëxüácüma pemaxë, erü nüma nüxü nixugü i mexü i ore natürü chixri namaxë. ⁴ —Erü nüma rû poraãcü pexü namu na naga pexïnüëxüçèx i norü mugü i guxchaxü i taxucürüwama texé aurexü. Natürü nümagütama rû bai i írarüwa naga na naxïnüëxü i ngëma nawa pexü namuxü. ⁵ —Rü guxüma i ngëma naxügüxü, rû nanaxügü na duüxügü nüxü daugüxüçèx. Rû ina-yangegü i Tupanaârü ore na ngëmaãcü duüxügü nagu rüxïnüëgu rû aixcüma Tupanaârü duüxügü na yïgüxü. Rû nügü nangëxãëgü na duüxügü nüxü rüdaunüxüçèx. ⁶ —Rü petagüarü õnawa rû nümagü i Parichéugü rû nanaxwëxegü i õnaârü yoraxütawaxüchi na natogüxü na duüxügü ngëma nüxü rüdaunüxüçèx. Rû ngutaquëxepataüguwa rû nanaxwëxegü na napëxewaxüchi ügüxü i naxmëxwëxegüwa natogüxü. ⁷ —Rü ñaneârü ítamüguwa rû nanaxwëxegü na duüxügü meã nüxü rümoxëgüxü ñoma äëxgacüxü meã rümoxëxürüü. Rû nanaxwëxegü na duüxügü rû: “Pa Ngúexëëruüx” ñagüxü nüxü. ⁸ —¡Natürü pema rû täütáma ngëmagu perüxïnüë! Erü guxáma i pema rû pegüeneëgü pixïgü, rû wüxixicatama nixî ya perü ngúexëëruü ixïcü. ⁹ —Rü tama name i ñoma i naãnecüãxmaã pexãnatü, erü wüxixicatama nixî ya Penatü, rû nüma rû daxüwa nangëxma. ¹⁰ —Rü tama name i texé: “Pa Äëxgacüx” ñatarügü pexü. Erü chaxicatama nixî i perü äëxgacü chiïxü. ¹¹ —Rü yixema petanüwa guxãârü yexera ixïxë rû tanaxwëxe na guxüma i tümamücüarü ngüxëëruü tíxü. ¹² —Erü yixema tügü írütaxe rû Tupana tá tüxü naxãnexëë. Natürü yixema tügü íruxíraxe, rû Tupana tá tüxü nicüxüü. ¹³ —Pa Ngúexëëruügu i Ore i Mugüwa Nguxëëtaegüxü rû Pa Parichéugüx, pema nixî i togü i duüxügüpëxewa meã pemaxënetaxü natürü peãewa rû chixexügu perüxïnüëxü. Rû wüxi i ngechaü nixî i pexçèx erü pegagu nixî na tama Tupanaxütawa nangugüxü i togü i duüxügü. Rû pema rû ta rû täütáma ngëxma pechocu, Rû ngëxgumarüü ta rû nüxü penaguxchaxëë

na tama ngëxma nachocuxüçèx i togü i ngëxma chocuchaüxü. ¹⁴—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãewa rü chixexügu perüxñüëxü. Rü wüxi i ngechaü nixí i pexcèx erü tüxna penapuxü ya tümapata ya yíxema yutegüxe. Rü ñuxüchi penamëxëë i perü yumüxëgü na duüxügü nagu rüxñüëgu rü aixcüma mexü i Tupanaärü duüxügü na pixíngüxü. Rü ngëmacèx pema tá nixí i togü i duüxügüarü yexera pepoxcuexü. ¹⁵—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãewa rü chixexügu perüxñüëxü. Rü wüxi i ngechaü nixí i pexcèx erü guxüwama pexí na togü i duüxügümaã nüxü peyarüxuxüçèx i ore na wüxitama ya duüxë pexrüü na yaxöxüçèx. Rü ngëxguma marü pexü tanguüxgu, rü tüxü pechixexëë na düxwa taxreëxpüxcüna perü yexera chixexüwa tangëxmaxüçèx. ¹⁶—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema rü ñoma cuèxruügü i ngexetüxürüü pixíngü. Rü wüxi i ngechaü nixí i pexcèx, erü nüxü pixuxgu rü:

“Ngëxguma texé ya tupauca ya taxüneegagu tacüçèx ixunetagu, rü marü name ega tama tayanguxëëgu i ngëma tümaärü uneta”, ñaperügügü. Natürü ngëxguma texé tupauca ya taxüneärü dïëruégagu tacüçèx ixunetagu, rü:

“Tanaxwëxe i aixcüma tayanguxëë i ngëma tümaärü uneta”, ñaperügügü. ¹⁷—Pema rü pengëãëgü rü ñoma pengexetügüxürüü pixíngü. ¿Pexcèx rü tacü nixí i yexera rümemaëxü, tupauca ya taxüneärü dïëru rü éxna nümatama ya tupauca ya nagagu naxüünene i ngëma dïëru? ¹⁸—Rü tupauca ya taxünewa nangëxma i ngëma ãmarechica i ngexta Tupanacèx ínadaiaxüwa i naxünagü na Tupanana naxãmarexüçèx. Rü pema rü ñaperügügü:

“Rü ngëxguma texé ya tupauca ya taxüneärü ãmarechicagéagu tacüçèx ixunetagu, rü marü name ega tama tayanguxëëgu i ngëma tümaärü uneta. Natürü ngëxguma texé tupauca ya taxüneärü ãmarechicawa ngëxmaxü i ãmareégagu tacüçèx ixunetagu, rü tanaxwëxe i aixcüma tayanguxëë i ngëma tümaärü uneta”, ñaperügügü. ¹⁹—Pema rü pengëãëgü rü ñoma pengexetügüxürüü pixíngü. ¿Pexcèx rü tacü nixí i yexera rümemaëxü, rü yima tupauca ya taxüneärü ãmarechicawa ngëxmaxü i ãmare rü éxna nümatama ya tupauca ya taxüneärü ãmarechica i nagagu naxüünexü i ngëma ãmare? ²⁰—Erü yíxema tupauca ya taxüneärü ãmarechicagéagu tacüçèx ixunetaxe, rü tama ngëma nachicagéaguxicatama itaxuneta, natürü ngëma ãmare i ngëma nachicawa ngëxmaxüégagu rü ta itaxuneta. ²¹—Rü yíxema tupauca ya taxüneegagu tacüçèx ixunetaxe, rü tama ngëma tupaucaégaguxicatama itaxuneta, natürü Tupana ya ngëma maxüçüégagu rü ta itaxuneta.

²² Rü yíxema daxüguxü i naãneegagu tacüçèx ixunetaxe, rü Tupanaärü toruëégagu rü ta itaxuneta, rü ngëxgumarüü ta Tupana ya ngëma rütocüégagu rü ta itaxuneta. ²³—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü, natürü peãewa rü chixexügu perüxñüëxü. Rü wüxi i ngechaü nixí i pexcèx, erü woo tacü i íraxü i pexü ngëxmaxü rü Tupanana penaxã i ngëma nüxna üxü. Natürü tama naga pexñüë i Tupanaärü mugü i guxü i mugüarü yexera ixíxü. Erü pexü nataxu na ãëxgacügü i aixcüma meãma duüxügümaã icuèxgüxü na pixíngüxü, rü pexü nataxu na duüxügü pexü nangechaütümüügüxü, rü aixcüma meã Tupanamaã pixaixcümagüxü. Rü guxüma i ngëma nixí i Tupana naxwëxexü na penaxüxü, tama nüxü ipeyarüngümaëácüma i ngëma mexü i marü pexüxü. ²⁴—Pa Cuèxruügü i Ngexetügüxüx, pema rü guxüma i mugü i woo íraxüchixü rü meãma penaxaure, natürü tama Tupana naxwëxexüácüma pemaxë. Pema rü ñoma wüxi i duüxü i tunüçèx norü axexü bapetüxü rü ñuxüchi arü wüxi i cameyu ixaxwetaüxürüü pixíngü.

²⁵—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãewa rü chixexügu perüxñüëxü. Rü wüxi i ngechaü nixí i pexcèx, erü perü düxëtüxünewaxicatama pegü pemexëëchaü, natürü perü maxüwa rü poraäcü pichixe. Erü penawomüxëëácüma poraäcü naxcèx pengíx i duüxügüarü ngëmaxügü, rü pegüguxicatama perüxñüë. ²⁶—Pa Parichéugü

i Ñoma Ngexetüxürüü Ixīgüxüx, name nixĩ i pegü pimexëẽ i perü aixepewa i perü maxüwa. Rü ngëxguma tá nixĩ i perü düxétüwa rü tá ta pimexü. ²⁷⁻²⁸—Pa Ngúexëẽruügü i Ore i Mugüwa Nguxëẽtaegüxü rü Pa Parichéugüx, pema nixĩ i togü i duüxügüpëxewa meã pemaxënetaxü natürü peãewa rü chixexügu perüxĩnüëxü. Rü wüxi i ngechaü nixĩ i pexcèx, erü ñoma yuetachiquëxegü i düxétüwa cómuxümaã chauzetügüxü natürü aixepewa rü yuetachinaxãmaã rü nagúxüraüxü i ãüãchixümaã napagüxürüü pixīgü. Erü perü düxétüwa i duüxügü nüxü ídaugüxüwaxicatama pime, natürü aixepewa i peãewa rü poraãcü pichixe. ²⁹—Rü wüxi i ngechaü nixĩ i pexcèx, Pa Ngúexëẽruügü i Ore i Mugüwa Nguxëẽtaegüxü rü Pa Parichéugüx. Pema rü peyamecagü ga naxchiquëxegü ga nuxcümaügüxü ga Tupanaärü orearü uruügü rü yema duüxügü ga imexü ga yuexü. ³⁰—Rü ñuxüchi ñaperügü:

“Rü yexguma chi nuxcümaügüxü ga tórü oxigü maxëyane imaxëgu, rü tãü chima nüxü tarüngüxëẽ ga na nadaiãxü ga yema nuxcümaügüxü ga Tupanaärü orearü uruügü”, ñaperügü. ³¹—Rü ngëma oremaã rü pegü pengoxëẽ na nataagü pixīgüxü ga yema duüxügü ga nuxcümaügüxü ga Tupanaärü orearü uruügüxü dèixü. ³²—¡Ecü, noxtacüma chomaã rü ta peyanguxëẽx ga yema chixexü ga nuxcümaügüxü ga perü oxigü ügüëxü! ³³—Pa Äxtapearü Duüxügüx, pema rü poraãcü pichixe. ¿Ñuxãcü tá naxchaxwa pibuxmü ya yima üxü ya Tupana tá namaã pexü poxcuene? ³⁴—Rü ngëmacèx i choma rü tá pexcèx núma chanamugü i Tupanaärü orearü uruügü, rü yatügü i mexügü i nüxü cuëxüchigüxü, rü ngúexëẽruügü i mexügü. Natürü pema rü tá curuchawa peyapotagüãcüma penadai i ñuxre. Rü togü rü ngutaquëxepataügüwa rü tá peyacuaxigü, rü togü rü ñanechigüwa rü tá nawe pingëxütanü na chixexü namaã pexügüxüçèx. ³⁵—Natürü Tupana tá pexü napoxcue naxcèx i guxüma ga norü duüxügü ga imexügü ga perü oxigü dèixü. Rü Abéwa nixĩ ga inaxügüãxü ga na nadaiãxü rü Chacaría ga tupauca ga taxünegu peyamëxgücügu nixĩ ga yacuãxü ga yema. ³⁶—Rü aixcüma pemaã nüxü chixu rü guxüma ga yema chixexüçèx rü Tupana tá nanapoxcue i duüxügü i ñomaücüü maxëxü —ñanagürü ga Ngechuchu.

*Ngechuchu rü Yerucharéüçüãx ga duüxügüçèx naxaxu
(Lc 13.34-35)*

³⁷ Rü ñanagürü ta ga Ngechuchu: —Pa Yerucharéüçüãx, pema penadai i Tupanaärü orearü uruügü, rü nutamaã ípenamuxüchigü i Tupanaärü orearü ngeruügü i pexcèx núma namugüxü. Rü ñuxreëxpüxcüna wüxigu chaugüxütagu pexü chanutaquëxexëẽchaü ñoma wüxi i ota i naxãcüxã nügütüügu tüxü nutaquëxexürüü. Natürü pema rü tama penaxwëxe. ³⁸—Düçèx i ñuxma ya perü ñane, rü Tupana tá ínanatèx. ³⁹—Rü pemaã nüxü chixu rü tãütáma wena choxü pedau ñuxmatáta daxügüxü i nañewa ne chaxü. Rü ngëxguma rü tá choxü pedaugü rü tá ñaperügü:

“Namexëchi nixĩ ya yima Cori ya Tupana núma namücü”, ñaperügü tá —ñanagürü ga Ngechuchu.

24

*Ngechuchu nanaxunagü na tupauca ga taxüne rü tá nagu na napogüëxü
(Mr 13.1-2; Lc 21.5-6)*

¹ Rü yexguma tupauca ga taxünewa ínaxüüxgu ga Ngechuchu, rü norü ngúexügü naxcèx naxĩ. Rü ñanagürügü nüxü: —Düçèx, Pa Corix, ñuxãcü nimexëchi ya daa tupauca ya taxüneärü ípatagü —ñanagürügü. ² Natürü Ngechuchu nanangãxü rü ñanagürü: —Pema nüxü pedaugü ya guxünema ya yima tupauca ya taxüneärü ípatagü. Natürü pemaã nüxü chixu rü aixcüma guxünema ya daa ípatagü rü tá nagu napogüë. Rü naxtapüxarü nutagü rü taxucütáma nügüétü naxüxüra, rü bai ya wüxi —ñanagürü.

*Cuèxruũgü i tá nüxũ idauxũ naxũpa na nagúxũ i naãne
(Mr 13.3-23; Lc 17.22-24, 21.7-24)*

³ Rü ñuxũchi guma Mèxpúne ga Oríbunecügu ãeganewa naxĩ. Rü yexguma guma mèxpúnewa natoxgu ga Ngechuchu rü norü ngüexũgüxicatama naxũtawata naxĩ na noxrüwama nüxna nacagüexũcèx. Rü ñanagürügü: —Tanaxwèxe i tomaã nüxũ quixu na ñuxgu tá nangupetüxũ i ngẽma nüxũ quixuxũ. ¿Rü tacü tá nixĩ i norü cuèxruũ i nawa nüxũ tacuáxũ i ñuxgu tá wena núma na cuxũxũ rü tá na nagúxũ i naãne? —ñanagürügü. ⁴ Rü yexguma ga Ngechuchu rü ñanagürü nüxũ: —¡Pexuãëgü na taxúema pexũ womüxëẽxũcèx! ⁵ —Erü muxũchixũ i duũxũgü tá ínangugü, rü chaugu tá nügü nicuxgü rü tá ñanagürügü:

“Choma nixĩ i Cristu”, ñanagürügü tá. Rü muxũchixũ i duũxũgüxũ tá nawomüxëẽ. ⁶—Rü tá nüxũ pexĩnüechiga na nügü nadèixũ i ñuxre i nachiũãnegü rü nügü na nadaixchaũxũ i togü i nachiũãnegü. ¡Natürü tãütáma ngẽmacèx pebèixãchiãëgü! Erü woetama ngẽmaãcü tátama nangupetü i noxrix. Natürü tãütáma naãneãrü gux nixĩ i ngẽma. ⁷—Erü wüxi i nachiũãne rü to i nachiũãnemaã tá nügü nadai. Rü wüxi i ãëxgacü rü to i ãëxgacümaã tá nanu, rü norü churaragü rü ngẽma to i ãëxgacüarü churaragümaã tá nügü nadai. Rü tá taiya nangux, rü tá nataxüchi i ñaaweanegü, rü muxũma i nachicawa rü tá naxĩãxãchiane. ⁸—Rü guxũma i ngẽma pemaã nüxũ chixuxũ, rü ngẽma nixĩ i norü ügümare i ngẽma ngúxũ i tá ngupetüxũ. ⁹—Rü ngëxguma i togü i duũxũgü rü tá pexũ ínayauxũ na chixexũ pemaã naxügüxũcèx. Rü tá pexũ nadai. Rü guxũ i naãnewa i duũxũgü rü tá pexchi naxaie, erü chorü duũxũgü pixĩgü. ¹⁰—Rü ngëxguma rü tá muxũchixũ i chorü duũxũgü ínanatèxgü i chorü ore, rü nügütanüwa rü tá nügüchi naxaie. Rü nügüechita tá ãëxgacüxũtawata nügü ínayaxuaxũgü. ¹¹—Rü muxũchixũ i orearü uruũgüneta tá ínangugü. Rü tá nüxũ nixugügü na Tupana yĩxũ ya núma namugücü na nüxũ yaxugüxũcèx i ore. Rü ngẽmaãcü tá muxũchixũ i duũxũgüxũ nawomüxëëgü. ¹²—Rü poraãcü tá nangëxma i chixexũ, rü ngẽmagagu rü muxũchixũtáma i duũxũgü rü tãütáma nügü nangechaũgü. ¹³—Natürü yíxema naetüwa meã Tupanaãxũ yaxõomáxë rü yíxema tá tixĩ ya aixcüma nayaxúxe i maxũ i taguma gúxũ. ¹⁴—Rü ngẽma Tupanaãrü ore i mexũ rü guxũ i naãnewa tá nüxũ nixugügü na guxũ i duũxũgü nüxũ na cuèxgüxũcèx. Rü ngẽmawena tá nixĩ i nagúxũ i naãne. ¹⁵—Rü nuxcümaũcü ga Tupanaãrü orearü uruũ ga Danié nachiga nanaxümatü i ngẽma chixexũ i Tupanapëxewa ãũãchixũ i ínguxchaũxũ. Rü ngëxguma nüxũ pedèuxgu na tupauca ya taxũnewa nangóxũ i ngẽma chixexũ i Tupanapëxewa chixexüchixũ, rü name nixĩ i pexuãëgü. ¹⁶—Rü ngëxguma ngẽma üpetügu, rü ngẽma Yudeaanewa ngëxmagüxũ i duũxũgü rü nanaxwèxe na mèxpúneãnewa nabuxmüxũ. ¹⁷—Rü ngẽma ngunexügu ega texé tümapataxëtüwa ngëxmagu, rü tama name i tümapatagu tayangaxi na tümaãrü ngẽmaxũ tayayaxuxũcèx. ¹⁸—Rü texé ya tümaãnewa ngëxmaxë rü tama name i tümapatacèx tataegu na tümachirugü tayayaxuxũcèx. ¹⁹—Rü ngẽma ngunexügügu rü wüxi i ngechaũ tá nixĩ i tümacèx ya yíxema ngeãxtagü ya tacharaũgüxe rü yíxema imaĩxãcügüxe. ²⁰—¡Rü Tupanana naxcèx peça i perü yumüxëwa na tama gáuane ixüyane rü ëxna ngüxchigaarü ngunexüguyane pexũ na nangupetüxũcèx i ngẽma chixexũ! ²¹—Erü ngẽma ngunexügügu rü poraãcü tá nangëxma i ngúxũ ga noxri naãne ixügügumama taguma yexmaxũ, rü ngẽmawena rü tagutáma wena nangëxma. ²²—Rü ngëxguma Tupana tama nanoxrexëëgu i ngẽma ngunexügü, rü taxúetáma tamaxũ. Natürü Tupana tá nananoxrexëë i ngẽma ngunexügü tümacèx ya yíxema nüma tüxũ nadexe. ²³—Rü ngëxguma texé pexũ ñagügu:

“Dücèx, daa nixĩ ya Cristu” ñagügu, rü ëxna:

“Gua nixĩ ya Cristu” ñagügu, ¡rü tama name i nüxũ peyaxõgü! ²⁴—Erü Cristugüneta rü Tupanaãrü orearü uruũgüneta tá ínangugü. Rü tá nanaxügu i muxũma i cuèxruũgü i taxũgü na ngẽmaãcü, ega nüxũ natauxchagu, na tüxũ nawomüxëëgüxũcèx èixrüxe

ya yíxema duïxëgü ya Tupanatama tüxü dexe. ²⁵ —Dücèx, naxüpa na nangupetüxü i guxüma i ngëma ngúxü, rü marü pemaã nüxü chixu i nachiga. ²⁶ —Rü ngëmacèx i ngëxguma duïxügü ñagügu pexü:

“Dücèx, yéa taxúema Íxãpataxüwa nangëxma ya Cristu”, ñagügu, rü tama name i ngëma pexí. Rü ngëxguma ñagügu pexü:

“Dücèx, nuã ucapuwa nangëxma ya Cristu”, ñagügu, rü tama name i nüxü peyaxögü. ²⁷ —Erü ñoma wüxi i bèixbëxane i guxüwama nangóonexëëxürüü tá nixí i ngëxguma wenaxârü núma chaxüxgu i choma i Tupana Nane na duïxüxü chiïxü. ²⁸ Rü duïxügü rü tá chauxcèx nangutaquëxegü ñoma ëxchagü nawemücèx ngutaquëxexürüü.

*Ñuxãcü tá nixí i ngëxguma nataegugu ya Tupana Nane ya duïxüxü ixícü
(Mr 13.24-37; Lc 21.25-33, 17.26-30, 34-36)*

²⁹ —Rü nawena i ngëma ngúxügü rü tá nixo ya üèxcü, rü tãütáma inabáxi ya tauemacü. Rü woramacurigü rü ëxtagü rü tá narüyi. Rü guxüma i ñoma i naãne rü üèxcü rü tauemacü rü woramacurigü rü ëxtagü rü tá naxíãxãchitanü rü tá nu ne nanaxímare. ³⁰ —Rü ñuxüchi duïxügü tá nüxü nadaugü na ñuxãcü daxüwa ne chaxüxü. Rü guxü i nachíüãnecüãx i duïxügü rü tá naxauxe. Rü tá choxü nadaugü i ngëxguma caixanexügügu ícharüxíxgu rü núma chaxüxgu. Rü ngëxguma i choma rü aëxgacü ya poraxüchicü rü mexëchicü tá chixí. ³¹ —Rü tá chanamu i chorü orearü ngeruügu i daxücüãx na yacuegüãxücèx ya norü cornetagu na ngëmaãcü naxítaquëxexëëãxücèx i guxüma i ngëma duïxügü i chadexü i guxüwama ngëxmagüxü ñuxmata naãne iyacuáxüwa ngëxmagüxü. ³² —¡Iperüxínüë i ñaã ore i cuèxruü i orix i iguerachiga, rü naxcèx pengüé! Rü ngëxguma ngexwacaxüxü i nachacüügü iyarüyixgu rü naxüátügu, rü ngëmawa nüxü pecuèx na paxa tá taunecü na yíxü. ³³ —Rü ngëxgumarüü tá nixí i ngëxguma nagúxchaügu i naãne. Erü ngëxguma nüxü pedèuxgu na nangupetüxü i ngëma pemaã nüxü chixuxü, rü ngëmawa tá nüxü pecuèx na marü chingaicaxüchixü. ³⁴ —Rü aixcüma pemaã nüxü chixu rü guxüma i ngëma nüxü chixuxü rü tá nangupetü naxüpa na nayuexü i duïxügü i ñomaücüü maxëxü. ³⁵ —Rü ñoma i naãne rü ngëma daxüwa nüxü idauxü rü tá nagux. Natürü chorü ore rü tagutáma inayarüxo rü aixcüma tá ningü. ³⁶ —Natürü ngëma ngunexü rü ora i nagu tá nangupetüxü i ngëma pemaã nüxü chixuxü, rü Chaunatü ya Tupanaxícatama nüxü nacuèx na ñuxgu tá nangupetüxü i ngëma, rü taxúema ya togue nüxü tacuèx. Rü woo i norü orearü ngeruügu i daxücüãx rü tama nüxü nacuèxgü, rü woo i choma i Nane na chiïxü rü tama nüxü chacuèx na ñuxgu tá nangupetüxü i ngëma. ³⁷ —Rü yexgumarüü ga duïxügüxü ngupetüxü ga yexguma Noë maüxgu, rü ngëxgumarüü tá ta nüxü nangupetü i ngëxguma íchanguxgu i choma i Tupana Nane na duïxüxü chiïxü. ³⁸ —Rü yexguma, naxüpa ga guma mucü ga taxüchicü ga guxüwama inanguanexëëcü, rü ga duïxügü rü nachibüë, rü naxaxegü, rü nixãmëxgü rü nixütexacügü ñuxmata nawa nangu ga yema ngunexü ga nagu Noë naweügu ixüexü. ³⁹ —Rü noxri ga yema duïxügü rü tama nüxü nacuèxgüéga ga tacü tá nüxü na ngupetüxü. Natürü yexguma ínanguxgu ga guma mucü ga taxüchicü ga yema duïxügüxü daicü, rü yexguma nixí ga nüxü yacuèxãchitanüxü. Rü ngëxgumarüü tá ta nixí i ngëxguma wenaxârü núma chaxüxgu i choma i Tupana Nane na duïxüxü chiïxü. ⁴⁰ —Rü ngëma ngunexügu rü taxre i yatügü rü wüxi i naãnewa tá nügümaã nangëxmagü. Rü wüxi tá nixí i Tupana igaxü rü ngëma to rü tá ngëma natèx. ⁴¹ —Rü taxre i ngexügü tá nügümaã ínacaegü. Rü wüxi tá nixí i Tupana igaxü rü ngëma to rü tá ngëma natèx. ⁴² —¡Rü pexuãëgü! Erü tama nüxü pecuèx i tacü rü ora tá íchangu i chomax. ⁴³ —¡Rü nagu perüxínüë i ñaã ore! Rü ngëxguma chí wüxi i ípataarü yora nüxü cuèxgu na tacü rü oragu tá ínanguxü i ngítëxáxü rü tãü chima nape. Erü nüxna chi nadau ya napata na tama ngëxma naxücuxücèx i ngëma ngítëxáxü na tacücèx ngëma yangíxücèx. ⁴⁴ —Rü ngëmacèx name nixí i pexuãëgü i pemax. Erü ngëma

ngunexũ i tama nagu íperũxĩnũexũgu tá nixĩ i ngürũachi íchanguxũ i choma i Tupana Nane na duũxũxũ chiĩxũ.

*Wüxi ga duũxũ ga meã norü coriga ñnũxũ rü to ga tama meã norü coriga ñnũxũchiga
(Lc 12.41-48)*

⁴⁵—¿Rü texé tiĩxũ ya tümaãrũ coriarũ duũxũ ya aixcũma yanguxẽexẽ rü tümaãexũ cuáxe? ¿Tama êxna yixema tiĩxũ ya tümaãrũ cori tüxna ágaxe na meã nüxna tadauxũcèx rü meã oragu tanachibũexẽexũcèx i norü duũxũgũ? ⁴⁶ Rü tataãe ya yixema coriarũ duũxẽ ega ngẽxguma ínanguxgu i tümaãrũ cori rü tüxũ íyanguexũgu na meãma ítanaxũxũ i ngẽma puracũ i nagu tüxũ namuxũ. ⁴⁷—Rü aixcũma pemaã nüxũ chixu rü ngẽma tümaãrũ cori rü tá guxũma i norü ngẽmaxũgũarũ dauruũxũ tá tüxũ nixĩxẽe. ⁴⁸⁻⁵⁰—Natürü ngẽxguma chi ngẽma coriarũ duũxũ rü wüxi i yatü i chixexũ yixĩgu, rü chi nagu naxĩnũgu na tãütãma paxa ínanguxũ i norü cori, rü chi inaxũgũãgu na chixri namuãxũ i namüçũgũ i norü coriarũ duũxũgũ, rü chi ngãxẽxũtanũgu naxãxgu na namaã nachibũxũcèx rü naxaxexũcèx, rü ngürũachi ngẽma ngunexũ rü ngẽma ora i tama nagu ínanguxẽẽãxũgu rü tá ínangu i norü cori. ⁵¹—Rü poraãcũxũchima tá nanapoxcu i ngẽma norü duũxũ, ñoma meã maxẽnetaxũ i duũxũgũxũ napoxcuexũrũ. Rü ngẽma tá narüdoxũ rü nixũxchapũta.

25

Ore ga 10 ga pacũgu ixuxũ

¹ Rü ñanagürü ga Ngechuchu: —Pemaã tá nüxũ chixu i wüxi i ore na nawa nüxũ pecuáxũcèx i ñuxãcũ tá duũxũgũarũ ãexgacũ na yĩxũ ya Tupana i ngẽxguma naguxgu i naãne. Rü iyexma ga 10 ga pacũ ga ngĩrũ daparinamaã ngĩgũarũ petawa ícũ na yaxũmüçũgũãxũcèx ga guma yatü ga ingĩxchaũcũ. ²—Rü 5 ga yema pacũ rü tama ixuãegũ. Rü yema naĩ ga 5 ga pacũ rü meãma ixuãegũ. ³—Rü yema tama uãegũcũ, rü yexguma ngĩrũ daparina íyangegũgu rü tama to ga ngĩrũ queruchinu ta íyangegũ. ⁴—Natürü ga yema uãegũcũ rü to ga ngĩrũ queruchinu ta íyangegũ. ⁵—Natürü ga guma yatü ga ingĩxchaũcũ rü tama paxa ínangu. Rü düxwa ga yema pacũgũ rü ipee yerü iyaxtae. ⁶—Rü yexguma ngãxũcũüwa nanguxgu, rü yema pacũgũ nüxũ ixĩnũe ga wüxi ga naga ga ñaxũ:

“Domama nixĩ ya yima yatü ya ingĩxchaũcũ. ¿Rü íperüdagü, rü ípeyadaugü!” ñaxũ. ⁷—Rü guxcũma ga yema pacũgũ rü írüdagü, rü iyamexẽegũ ga ngĩrũ daparinagü. ⁸—Rü yexguma ga yema 5 ga pacũgũ ga tama uãegũcũ rü ngĩgürügügü ngĩxũ ga yema pacũgũ ga uãegũcũ:

“¿Íraxũ i perü queruchinu toxnata pexã, erü torü omügü rü nixogü!” ngĩgürügügü. ⁹—Natürü ga yema pacũgũ ga uãegũcũ rü ngĩxũ ingãxũgũ, rü ngĩgürügügü:

“Taxucürüwa pexna ta taxã, erü ngẽxguma chi pexna ta taxãxgu rü tãũ chima ningu i toxcèx rü pexcèx. Rü ngẽmacèx narümemaẽ nixĩ i ngextã namaã ínataxegũxũwa pegũxũ nawa pexĩ”, ngĩgürügügü. ¹⁰—Natürü yexguma ga yema 5 ga pacũgũ ga tama uãegũcũ ngĩrũ queruchinuwa naxĩyane, rü ínangu ga guma yatü ga ingĩxchaũcũ. Rü ga yema pacũgũ ga uãegũcũ rü iyachocu nawa ga guma í ga nawa iyangĩxũne. Rü ñuxũchi narüwãxta ga ñãx. ¹¹—Rü yemawena íngügü ga yema pacũgũ ga tama uãegũcũ, rü ngĩgürügügü:

“¿Pa Corix, toxcèx yawãxna i ñãx!” ngĩgürügügü. ¹²—Natürü nüma ga cori, rü ngĩxũ nangãxũ, rü ñanagürü:

“Pemaã nüxũ chixu rü aixcũma tama pexũ chacuèx na texégü pixĩgũxũ”, ñanagürü. ¹³ Rü ñuxũchi ñanagürü ga Ngechuchu: —¿Ípexuãegũ! Erü tama nüxũ pecuèx i tacü rü ngunexũ rü tacü rü ora tá íchangu i choma i Tupana Nane na duũxũxũ chiĩxũ—ñanagürü.

*Ore ga dñerũgu ixuxũ
(Lc 19.11-27)*

¹⁴ Rū ñanagürü ta ga Ngechuchu: —Rū ngēma Tupana na duūxügüarü ãëxgacü na ixixü rü ñoma wüxi ga yatü ga ixüãchichaücü ga to ga nachiuñanewa na naxüxüçexrüü nixi. Rū nüma ga guma yatü rü norü duūxügüçex naca, rü nüxna ngixü naxã ga dïeru na nüxü ngïmaã nanguxüxüçex rü ngïmaã na ínapuracüexüçex. ¹⁵ —Rü wüxi ga yema norü duūxüna ngixü naxã ga 5000 tachinü ga dïeru. Rü yema tona ngixü naxã ga 2000 tachinü ga dïeru. Rü yema tona ngixü naxã ga 1000 tachinü ga dïeru. Rü yemaãcü nanangugü na ñuxãcü tá yema dïerumaã napuracüexü ga wüxichigü ga norü duūxügü rü yemaãcü wüxichigüna ngixü naxã ga yema dïeru. Rü ñuxüchi inaxüãchi ga yema cori na to ga nachiuñanewa naxüxüçex. ¹⁶ —Rü yema norü duūxü ga 5000 tachinü ga dïeru ngixü yaxuxü, rü ngïmaã napuracü, rü naï ga 5000 tachinü ngïmaã nayaxu. ¹⁷ —Rü yexgumarü ta ga yema norü duūxü ga 2000 tachinü ga dïeru ngixü yaxuxü, rü ngïmaã napuracü, rü naï ga 2000 tachinü ngïmaã nayaxu. ¹⁸ —Natürü ga yema norü duūxü ga 1000 tachinü ga dïeru ngixü yaxuxü, rü ngïmaã ínixü. Rü ngixü nixaixmaü, rü yexma ngixü natèx ga yema norü coriarü dïeru. ¹⁹ —Rü nuxcüxürama nataegu ga yema duūxügüarü cori. Rü yexguma ínanguxgu rü inanaxügü ga norü duūxügümaã na namexëëxü ga norü dïeruchiga. ²⁰ —Rü nüxira norü corixütawa naxü ga yema norü duūxü ga 5000 tachinü ga dïeru ngixü yaxuxü. Rü norü corina ngixü naxã ga yema 5000 tachinü. Rü ngïetü ngixü inaxã ga naï ga 5000 tachinü ga ngixü nayaxucü ngïmaã ga yema norü cori nüxna ngixü äcü ga dïeru. Rü ñanagürü norü corixü:

“Dücèx Pa Corix, ñaã iyixi ga yema 5000 tachinü ga dïeru ga choxna ngixü cuxãcü. Marü ngïmaã chapuracü rü ngïmaã cuxü ngixü chayaxu i ñaã naï i 5000 tachinü”, ñanagürü. ²¹ —Rü norü cori rü ñanagürü nüxü:

“Pa Chorü Duūxüx, wüxi i mexëchixü quixi, rü meãma cupuracü. Rü meã nüxna cudau ga yema noxre ga dïeru ga cuxna ngixü chaxãcü, rü meãma ngïmaã cupuracü. Rü ngëmacèx i ñuxma rü tá rümumaëcüna cuxü chadauxëë. ¡Rü ixücu i chopatawa rü ngixã tataãëgü!” ñanagürü. ²² —Rü yemawena ínangu ga yema to ga norü duūxü ga 2000 tachinü ga dïeru ngixü yaxuxü. Rü ñanagürü norü corixü:

“Dücèx Pa Corix, ñaã iyixi ga yema 2000 tachinü ga dïeru ga choxna ngixü cuxãcü. Marü ngïmaã chapuracü rü ngïmaã cuxü ngixü chayaxu i naï i 2000 tachinü. Rü ñaã iyixi”, ñanagürü. ²³ —Rü norü cori rü ñanagürü nüxü:

“Pa Chorü Duūxüx, wüxi i mexëchixü quixi, rü meãma cupuracü. Rü meã nüxna cudau ga yema noxre ga dïeru ga cuxna ngixü chaxãcü, rü meãma ngïmaã cupuracü. Rü ngëmacèx i ñuxmax rü tá rümumaëcüna cuxü chadauxëë. ¡Rü ixücu i chopatawa rü ngixã tataãëgü!” ñanagürü. ²⁴ —Natürü yexguma norü corixütawa nanguxgu ga yema norü duūxü ga 1000 tachinü ga dïeru ngixü yaxuxü, rü ñanagürü norü corixü:

“Dücèx Pa Corix, choma nüxü chacuèx rü wüxi i yatü i aüxü quixi. Rü cunayaxu i nanetüarü o i ngextá tama ícutoexüwa, rü cunabuxarü oõx i nanetü i tama icutoxü. ²⁵ —Rü yemacèx chamuü. Rü waixümügu ngixü chixaixmaü rü ngixü ichatèx. Natürü ñaã iyixi i ngëma curü dïeru”, ñanagürü. ²⁶ Rü yexguma ga norü cori rü nanangãxü rü ñanagürü:

“Pa Chorü Duūxüx, wüxi i chixexü rü oxü i chorü duūxü quixi. Rü cuma meãma nüxü cucuèx rü ngextá tama íchatoexüwa rü chanayaxu i nanetüarü o, rü chanabuxarü oõx i nanetü i tama ichatoxü. ²⁷ —Rü yemacèx narümemaë chi nixi ga bancugu choxü ngïmaã na cunguxüxü ga chorü dïeru na ngëma choxü ngixü yamuxëëgüxüçex, rü ngëmaãcü mucü ngixü na chayaxuxüçex i ngëxguma íchanguxgu”, ñanagürü. ²⁸ —Rü yexguma ga yema cori rü nanamu ga yema togü ga norü duūxügü ga yema yexmagüxü, rü ñanagürü nüxü:

“¡Nüxna ngixü peyaux i ngëma dïeru, rü ngëma yatü i 10,000 i dïeru nüxü ngëxmaxüna ngixü pexã! ²⁹ —Erü yixema tüxü nangëmèxcü rü yexera tá tüxna ngixü taxã, rü ngëmaãcü tá tüxü imuxüchi. Natürü yixema tüxü natauxcü rü woo ngëma noxre i tüxü ngëmèxcü

rü tá tüxna ngĩxũ tayaxu. ³⁰—;Rü yéama düxétüwa i poraãcü ínaxěãnexũwa peyatá i ñaã chorü duũxũ i taxuwama mexũ! Rü ngẽma tá narüdoxü rü tá nixũxchapüta”, ñanagürü.

Naãneãrũ guxgu rü Cristupẽxegu tá nangutaquẽxegü i guxũ i nachiuãnecũãx i duũxũgü na yadexechiãxũcèx i ngẽma mexũgü rü na napoxcueãxũcèx i ngẽma chixexũgü

³¹ Rü ñanagürü ga Ngechuchu: —Rü ngẽxguma wenaxãrũ núma chaxũxgu i choma i Tupana Nane na duũxũxũ chiĩxũ, rü chorü orearü ngeruũgü i daxũcũãx rü tá choxũ naxũmücügü. Rü ãẽxgacü ya tacü tá chixĩ rü chorü tochica i mexẽchixũwa tá charũto. ³²—Rü guxũ i nachiuãnecũãx i duũxũgü rü tá chopẽxegu nangutaquẽxegü. Rü choma rü tá chayadexechi ñoma wũxi i carneruarü dauruũ i norü carnerugü rü chibugü noxrũwama mugũxũrũ. ³³—Rü ngẽma choxrü ixĩgũxũ rü chorü tũgũnecũwawa tá chanangẽxmagũxẽẽ. Rü ngẽma tama choxrü ixĩgũxũ rü chorü toxwecũwawa tá chanangẽxmagũxẽẽ. ³⁴—Rü ngẽxguma i choma i tá ãẽxgacü ya tacü na chiĩxũ rü ñacharũgü tá nüxũ i ngẽma chorü duũxũgü:

“;Nuã pexĩ i pema ya texé ya Chaunatü ya Tupana tüxũ rüngũxẽẽgũxe, rü penayaxu i ngẽma pechica i ngextá núma ãẽxgacü íyĩxũwa! Yerü Chaunatü rü pexcèx nanamexẽẽ i ngẽma pechica ga yexguma tauta naãne naxũxgu. ³⁵—Rü ngẽmaãcü tá pemaã namecũma yerü yexguma chataiyagu rü pema rü choxũ pechibũxẽẽ. Rü yexguma chitawagu rü choxũ pexaxexẽẽ. Rü yexguma tama nüxũ pecuèxgu na texé chiĩxũ rü meã choxũ peyaxũgü ga pepatawa. ³⁶—Rü yexguma changexchirugu rü choxũ pexũxchiru. Rü yexguma chidaawegu rü choxũ perũngũxẽẽ. Rü yexguma poxcupataũwa chayexmagu rü choxũ ípeyadau”, ñacharũgü tá nüxũ. ³⁷—Rü ngẽxguma i ngẽma duũxũgü i chadexũ rü ñanagürũgü tá choxũ:

“Pa Corix, ¿ñuxgu ga cuxũ tadauxũ ga na cutaiyaxũ rü cuxũ tachibũxẽẽxũ? ¿Rü ñuxgu ga cuxũ tadauxũ ga na quitaawaxũ rü cuxũ taxaxẽẽxũ? ³⁸—¿Rü ñuxgu ga tochixũwa cunguxũ rü meã cuxũ tayauxgũxũ ga woo tama cuxũ tacuèxgũgu? ¿Rü ñuxgu ga cungexchiruxũ rü cuxũ taxũxchirugũxũ? ³⁹—¿Rü ñuxgu ga cuxũ tadaugũxũ na quidaawexũ rü ãxna poxcupataũwa cuyexmaxũ rü cuxũ ítayadaugũxũ?” ñanagürũgü tá choxũ. ⁴⁰—Rü choma na ãẽxgacü ya tacü na chiĩxũ, rü tá chanangãxũ, rü ñacharũgü tá:

“Aixcũma pemaã nüxũ chixu rü yexguma nüxũ perũngũxẽẽgũgu i ngẽma chorü duũxũ i yexeraãcü ngearü ngemaxũáxũ, rü choxũ nixĩ ga perũngũxẽẽgũxũ”, ñacharũgü tá nüxũ. ⁴¹ Rü ñuxũchi i choma na ãẽxgacü ya tacü na chiĩxũ, rü ñacharũgü tá nüxũ i ngẽma tama chorü duũxũgü ixĩgũxũ:

“;Choxna pixĩgachi i pema i perü chixexũcèx poxcuexe! ;Rü ngẽma pexĩ nawa ya yima üxü ya taguma ixoxũne ya Tupana ímexẽene naxcèx i ngoxo i Chataná rü norü duũxũgü! ⁴²—Yerü yexguma chataiyagu rü pema rü tama choxũ pechibũxẽẽ. Rü yexguma chitawagu rü tama choxũ pexaxẽẽ. ⁴³—Rü yexguma tama nüxũ pecuèxgu na texé chiĩxũ rü tama meã choxũ peyaxũgü ga pepatawa. Rü yexguma changexchirugu rü tama choxũ pexũxchirugü. Rü yexguma chidaawegu rü poxcupataũwa chayexmagu rü tama choxũ ípeyadaugũ”, ñacharũgü tá nüxũ. ⁴⁴—Rü ngẽxguma i nümagü i tama chorü duũxũgü ixĩgũxũ, rü ñanagürũgü tá choxũ:

“Pa Corix, ¿ñuxgu tochixũwa cingu rü tama meã cuxũ tayauxgü yerü tama cuxũ tacuèxgü? ¿Rü ñuxgu ga cuxũ tadaugũxũ ga na cutaiyaxũ, rü ãxna na quitaawaxũ, rü ãxna na cungexchiruxũ, rü ãxna quidaawexũ, rü ãxna poxcupataũwa na cuyexmaxũ, rü tama cuxũ tarũngũxẽẽgũxũ?” ñanagürũgü tá choxũ. ⁴⁵—Rü choma na ãẽxgacü ya tacü na chiĩxũ, rü tá chanangãxũ, rü ñacharũgü tá nüxũ:

“Aixcũma pemaã nüxũ chixu rü yexguma tama nüxũ perũngũxẽẽgũgu ga wũxi ga duũxũ ga yexeraãcü ngearü ngemaxũáxũ, rü choxũ rü ta tama perũngũxẽẽgü”, ñacharũgü tá nüxũ. ⁴⁶—Rü ñuxũchi i ngẽma duũxũgü i tama chorü duũxũgü ixĩgũxũ rü tá

poxcu i taguma gúxüwa naxĩ. Natürü ngẽma duüxüğü i aixcüma meã chauxcèx maxèxü rü tá nanayauxgü i maxü i taguma gúxü, —ñanagürü ga Ngechuchu.

26

Yudíugüarü ãëxgacüğü naxcèx nadaugü na ñuxãcü Ngechuchuxü yayauxgüxü
(Mr 14.1-2; Lc 22.1-2; Cu 11.45-53)

¹ Rü yexguma Ngechuchu nüxü rüchauxgu ga yema orexü na yaxuxü, rü ñanagürü norü ngúexüğüxü: ² —Pema nüxü pecuèx rü taxre i ngunexü nataxu na nangõxgüãxüçèx i ngẽma õna i Üpetüchigaarü petacèx naxüğüxü. Rü ngëxguma tá nixĩ i choxü yayauxgüxü i chorü uwanüğü na curuchawa choxü yapotagüxüçèx —ñanagürü. ³ Rü yexgumañcüü ga paigüarü ãëxgacüğü, rü ngúexëëruüğü ga ore ga mugüwa nguxëëtaegüxü, rü Yudíugüarü ãëxgacüğüerüğü rü nangutaquëxegü ga napatawa ga Caipá ga paigüarü ãëxgacü ixícü. ⁴ Rü yéma nügümaã nanamexëëgü na Ngechuchuxü nawomüxëëgüãcüma na yayauxgüãxüçèx rü na yamëxgüãxüçèx. ⁵ Natürü nügümaã ñanagürüğü: —Taxucürüwama i ñuxma petagu tayayauxgü, erü duüxüğü rü tá tamaã nanuë —ñanagürüğü.

Wüxi ga nge rü Ngechuchuerugu inaba ga pumara
(Mr 14.3-9; Cu 12.1-8)

⁶ Rü Ngechuchu rü Betániãwa nayexma napatawa ga Chimáü ga rüchaxüncümaã naxügüãcü. ⁷ Rü Ngechuchucèx yéma iyaxü ga wüxi ga ngecü ga yéma nangedü ga wüxiweü ga pumara ga tatanüxüchixü ga mexëchicü ga butiyamaã áchiüxü. Rü yexguma mechawa ínachibüyane ga Ngechuchu, rü ngĩma rü naëruyu inaba ga yema pumara. ⁸ Rü yexguma yemaxü nadaugüğü ga Ngechuchuarü ngúexüğü, rü naãëwa nanguxgü, rü inanaxüğüe ga na ñagüxü. —¿Tüxcüü ngëxma inaxaiyaxü i ngẽma pumara? ⁹ —Rü narümemaë chi nixĩ i tatanüxüğü namaã itaxe, rü ñuxüchi ngẽma dñërumaã nüxü irüngüxëë i ngẽma duüxüğü i ngearü ngëmaxüãxgüxü —ñanagürüğü. ¹⁰ Rü Ngechuchu nüxü naxĩnü. Rü ñuxüchi ñanagürü norü ngúexüğüxü: —¿Tüxcüü ngixü pechixewe i ngẽma nge? Erü ngẽma chomaã naxüxü rü wüxi i mexü nixĩ. ¹¹ —Ngẽma ngearü ngëmaxüãxgüxü rü guxügutáma petanüwa nangëxmagü. Natürü choma rü tãütáma guxüğü petanüwa changëxma. ¹² —Rü ngẽma chomaã naxüxü i ñaã ngecü na chaxunegu nabaãxü i ngẽma pumara i yixixü, rü ngẽmaãcü inaxü erü paxa tá chayü rü tá choxü inatëxgü. Rü ngëmacèx nixĩ i chaxunegu nabaãxü i ngẽma pumara. ¹³ —Rü aixcüma pemaã nüxü chixu rü guxü i naãnewa i ngextá duüxüğü nüxü íixugüğüxüwa i Tupanaarü ore i mexü, rü ñaã ngecü chomaã üxü rü tá ta nüxü nixugüğü. Rü ngẽmaãcü tá ngixna nacuèxãchie i duüxüğü —ñanagürü ga Ngechuchu.

Yuda rü ãëxgacüğümaã nanamexëë na ñuxãcü Ngechuchuxü yayauxgüxüçèx
(Mr 14.10-11; Lc 22.3-6)

¹⁴ Rü ñuxüchi ga wüxi ga Ngechuchuarü ngúexü ga Yuda ga Icariüte rü paigüarü ãëxgacüğüxütawa naxü rü namaã nayarüdexa. ¹⁵ Rü Yuda rü ñanagürü nüxü: —¿Ñuxre tá choxü penaxütanüxü i ngëxguma pexü chanatauxchaxëëgu na Ngechuchuxü piyauxgüxüçèx? —ñanagürü. Rü yexguma ga nümagü ga paigüarü ãëxgacüğü rü 30 tachinü ga dñëruyu namaã naxuneta. ¹⁶ Rü yexgumama inanaxüğü ga Yuda ga naxcèx na nadauxü ga ñuxãcü nüxü na natauxchaxëëgüãxü na Ngechuchuxü yayauxgüxüçèx.

Coriarü õnachiga
(Mr 14.12-25; Lc 22.7-23; Cu 13.21-30; 1 Co 11.23-26)

¹⁷ Rü nawa nangu ga ngunexü ga nagu inaxüğüxü ga yema peta ga pãü ga ngearü puxëëruüãxü nagu nangõxgüxü. Rü norü ngúexüğü rü Ngechuchucèx naxĩ, rü ñanagürüğü nüxü: —¿Ngextá tá tanamexëë i nachica i nawa nangõxgüxü i õna i

Ûpetüchigaarü petagu ingõxü? —ñanagürügü. ¹⁸ Rü nüma ga Ngechuchu rü ñanagürü nüxü: —¡Ngema ñanewa pexi, rü yima yatü ya pemaã nüxü chaxunetacüpatawa pexi! ¡Rü namaã nüxü pixu rü ñapegügü:

“Torü ngüexëeruü rü ñanagürü: ‘Marü ningaicaxüchi na chayuxü rü nuã cupatawa rü chorü ngüexügümaã chanangupetüxëëchaü i Ûpetüchigaarü peta’,” ñaperügügü tá nüxü! ¹⁹ Rü yéma naxi ga yema norü ngüexügü. Rü yema Ngechuchu namaã nüxü ixuxürüü nanaxügü. Rü nanamexëëgü ga yema õna ga Ûpetüchigaarü petagu tá nangõxgüxü. ²⁰ Rü yexguma nachütagu rü yéma mechawa nachibü ga Ngechuchu namaã ga yema 12 ga norü ngüexügü. ²¹ Rü yexguma ínachibüeyane, rü Ngechuchu rü ñanagürü nüxü: —Aixcüma pemaã nüxü chixu rü wüxie i petanüwa tá tixi ya bexma chauechita choxü íyaxuaxüxë —ñanagürü. ²² Rü yexguma ga nümagü ga norü ngüexügü rü poraãcü nangechaügü. Rü wüxichigü nüxna nicachigü, rü ñanagürügü: —Pa Corix, ¿choma éxna tá chiixü ya yixema cuxü íyaxuaxüxë? —ñanagürügü. ²³ Rü nüma ga Ngechuchu nanangãxü rü ñanagürü: —Ngema wüxi ya poratuwa namaã tá chachibüxü, rü ngema tá nixi i chauechita choxü íyaxuaxüxü. ²⁴ —Rü choma i Tupana Nane na duüxüxü chiixü rü tá chayü ngëxgumarüü i Tupanaãrü ore i ümatüxü nüxü ixuxürüü. Natürü wüxi i ngechaüxüchi nixi naxcèx i ngema yatü i choxü íyaxuaxüxü. Rü narümemaë chi nixi ga noxtacüma tãü chima na nabuxü —ñanagürü. ²⁵ Rü nadexaãchi ga Yuda ga naëchita íyaxuaxüxü, rü ñanagürü: —Pa Ngüexëeruüx, ¿tãütama choma nixi? —ñanagürü. Rü Ngechuchu nanangãxü rü ñanagürü: —Ngemaãcü cuma nixi —ñanagürü. ²⁶ Rü yexguma ínachibüeyane rü Ngechuchu nanayaxu ga wüxi ga pãü. Rü Tupanana moxë naxã, rü inanabücu, rü norü ngüexügüxü nayanu. Rü ñanagürü: —Ñãã pãü rü chaxunechiga nixi. Rü ¡penangõ! —ñanagürü. ²⁷ Rü yemawena rü nanayaxu ga wüxi ga pochiyu ga binumaã ããcuxü. Rü yexgumarüü ta Tupanana moxë naxcèx naxãxira, rü ñuxüchi norü ngüexügüna nanaxã, rü ñanagürü nüxü: —¡Rü guxãma i pema rü peyaxëüx ya daa binu! ²⁸ —Erü daa binu rü nachiga nixi ya chaugü ya muxüma i duüxügücèx tá ibacü na ngemaãcü Tupana nüxü nüxü nangechaüxücèx i norü pecadugü. Rü yimawa Tupana nanangõxëë na aixcüma yixü i norü uneta. ²⁹ —Rü pemaã nüxü chixu rü tagutãma wena binu chayaxaxü ñuxmatãta Chaunatü ya Tupana ãëxgacü íixüxüwa ngexwacaxücü ya binu pemaã chayaxëüx —ñanagürü.

Ngechuchu nüxü nixu rü Pedru rü taxütãma nügü nixu na norü ngüexü yixü
(Mr 14.26-31; Lc 22.31-34; Cu 13.36-38)

³⁰ Rü ñuxüchi nawiyaegü ga wüxi ga Tupanaãrü wiyaegu. Rü yemawena rü guma Mèxpüne ga Oríbunecügu ãeganewa naxi. ³¹ Rü yexguma ga Ngechuchu rü ñanagürü nüxü ga norü ngüexügü: —Guxãma i pema rü tá choxü ípetëxgü i ñoma i chütaxügu. Erü Tupanaãrü ore i ümatüxüwa rü ñanagürü:

“Tã chayamèx ya carneruarü dauruü, rü tá nanaxüanemare i carnerugü”,

ñanagürü i ngema ore. ³² —Natürü ngëxguma marü yuwa ícharüdaguwena, rü tá chaxira pexüpa Gariréanewa chaxü —ñanagürü. ³³ Rü yexguma ga Pedru rü nanangãxü rü ñanagürü: —Rü woo guxüma i togü cuxü ítëxgu, natürü i chomax rü tãütama cuxü íchatèx —ñanagürü. ³⁴ Rü Ngechuchu ñanagürü nüxü: —Aixcüma cumaã nüxü chixu rü ñomatama i chütaxügu rü naxüpa na otã icaxü, rü tomaëxpüxcüna tá cugü iquicux na chorü duüxü quixü. ³⁵ Rü Pedru nanangãxü rü ñanagürü: —Rü woo wüxigu cumaã chayuxgu rü tãütama chaugü ichicux na curü duüxü chiixü —ñanagürü. Rü guxüma ga togü ga norü ngüexügü rü ta yema ñanagürügü.

Ngechuchu rü Yechemaníwa nayayumixë
(Mr 14.32-42; Lc 22.39-46)

³⁶ Rü Ngechuchu rü norü ngüexügümaã nawa nangugü ga wüxi ga nachica ga Yechemanígu ãegaxü. Rü Ngechuchu rü ñanagürü nüxü: —¡Nuã perütogü! Rü paxa

yoxni yéa chayayumüxê —ñanagürü. ³⁷ Rû Ngechuchu nügüwe nanagagü ga Pedru rü Zebedéu nanegü ga Chaütíagu rü Cuáü. Rû Ngechuchucêx inaxügü ga na poraäcü nangechaüxü rü naxixächiaêxü. ³⁸ Rû yexguma ga Ngechuchu rü ñanagürü nüxü: —Poraäcü changechaü rü nagu charüxînú rü ngê mamaã tá chayü. ¡Rü nuxa perücho i pemax, rü chauxrüü ipedaue! —ñanagürü. ³⁹ Rû yexguma ga Ngechuchu rü yéaxüra naxü. Rû waixü müãnegu nanangücuchi. Rû nayumüxê rü ñanagürü: —Pa Chaunatüx, ngêxguma cuma cunaxwêxegu, ¡rü nüxna choxü í nanguxuchixêê i ñaã ngúxü i tá choxü üpetüxü! Natürü chanaxwêxe i cuxrütama ngúchaü cuxü rü tama i choxrü —ñanagürü. ⁴⁰ Rû yemawena ga Ngechuchu rü nataegu ga yema norü ngúexügü íyexmagüxüwa. Rû nüxü inayangau ga na ínapeexü. Rû ñanagürü Pedruxü: —Pa Pedrux, ¿taxucürüwama êxna namaã peporae na chomaã ipedauexü, rü bai i wüxi i ora? ⁴¹ —¡Rü pexuãégü rü Tupanana naxcêx peça na pexü nangüxêêxücêx na tama choxü ípetáxücêx ega ngêxguma tacü rü guxchaxü pexü üpetügu! Erü aixcüma peãêwa rü ípememare, natürü pexene nixí ituraxü —ñanagürü. ⁴² Rû yexguma rü wenaxârü noxri ínayumüxêxücêx nataegu ga Ngechuchu. Rû wenaxârü nayumüxê, rü ñanagürü: —Pa Chaunatüx, ngêxguma tama cunaxwêxegu na nawa choxü ícunguxuchixêêxü i ñaã ngúxü i tá chingexü, rü marü name i ngêma cuma cunaxwêxexüãcüma chomaã cunaxü —ñanagürü. ⁴³ Rû ñuxüchi wenaxârü norü ngúexügü íyexmagüxüwa naxü. Rû nüxü inayangau ga na ínapeexü, yerü poraäcü nayaxtaexüchi. ⁴⁴ Rû yéma nüxna nixü, rü wenaxârü nayayumüxê. Rû noxriãcüta nayaumüxê. ⁴⁵ Rû yemawena rü norü ngúexügü íyexmagüxüwa naxü. Rû ñanagürü nüxü: —¡Ñuxma waxi pepepe rü iperüngüê! Erü marü nawa nangu i ora na chorü uwanü choxü iyauxgüxü rü pecaduãxgüxüna choxü namugüxü. ⁴⁶ ¡Ipechigü rü ngíxã ítixí! Erü marü ñomatáma nixí i ngêma choxü íyaxuaxüxü —ñanagürü.

Ngechuchuxü niyaxgü

(Mr 14.43-50; Lc 22.47-53; Cu 18.2-11)

⁴⁷ Rû yexguma íyadexayane ga Ngechuchu, rü ínangu ga Yuda ga norü ngúexüchirêx ixíxü. Rû nawe narüxí ga muxüma ga duüxügü ga taramaã rü naímaã ixãxnexü. Rû yema nixí ga duüxügü ga paigüarü ãêxgacügü rü Yudíugarü ãêxgacügüerügü yéma mugüxü. ⁴⁸ Rû ga Yuda ga ínaxuaxüxü rü marü yema duüxügümaã nanamexêê, rü ñanagürü: —Ngêma nüxü chachúxuxü tá nixí i Ngechuchu. Rû ngêma tá nixí i piyaxgüxü —ñanagürü: ⁴⁹ Rû yexguma Ngechuchucêx nixü, rü ñanagürü nüxü: —Nuxmaê Pa Ngúexêêruüx —ñanagürü. Rû ñuxüchi nüxü nachúxu. ⁵⁰ Rû Ngechuchu nanangãxü rü ñanagürü: —Pa Chomücüx, ¿tacüwa nuã cuxü? —ñanagürü. Rû yexgumatama Ngechuchuxü niyaxgü ga yema duüxügü ga Yudawe rüxíxü. ⁵¹ Rû wüxi ga Ngechuchumücü nanawêxechi ga norü tara, rü paigüarü ãêxgacüarü duüxüxü ínadaechinü. ⁵² Rû yexguma ga Ngechuchu rü ñanagürü: —¡Naxchiügu yaxücuchi i curü tara! Erü guxãma ya yíxema taramaã nuêxê, rü taragu tátama tayue. ⁵³ —¿Tama êxna nüxü cucuêx rü ngêxguma chi choma chanaxwêxegu, rü Chaunatüna chi naxcêx chaca na choxü núma namugüãxücêx i muxüma i norü orearü ngeruügu i daxücüãx na choxü yanangüxêêgüxücêx? ⁵⁴ —Natürü ngêxguma chi ngêma chaxüxgu, rü ¿ñuxãcü chi ningu i Tupanaârü ore i úmatüxü i nüxü ixuxü na choma rü tá chayuxü? ⁵⁵ Rû yexguma ga Ngechuchu rü ñanagürü nüxü ga yema duüxügü: —¿Tüxcüü taragü rü naíxmenêxãgümaã chauxcêx nuã pexí na choxü peyarüyaxgüxücêx ñoma wüxi i ngítêxáxü chiüürüü? Rû guxü ga ngunexügu rü tupauca ga taxünewa changuxêêtae natürü taguma yexma choxü piyaxgü. ⁵⁶ —Natürü guxüma i ñaã ñuxma ngupetüxü, rü ngêmaäcü nangupetü na yanguxücêx i Tupanaârü ore ga nuxcümaügüxü ga norü orearü uruügu úmatügüxü —ñanagürü. Rû yexguma ga guxüma ga norü ngúexügü rü nüxna nibuxmü. Rû nüxícatama yéma nanatêxgü ga Ngechuchu.

*Ãëxgacügü ga taxügüpëxewa Ngechuchuxü nagagü
(Mr 14.53-65; Lc 22.54-55, 63-71; Cu 18.12-14, 19-24)*

⁵⁷ Rü Caipá ga paigüarü ãëxgacüxütawa Ngechuchuxü nagagü ga yema duüxügü ga yayauxgüxü. Rü yexma nixí ga nangutaquëxegüxü ga ngüexëëruüügü ga ore ga mugüwa ngüxëëtaegüxü rü Yudíugüarü ãëxgacügüerugü. ⁵⁸ Natürü ga Pedru rü yaxügu nawe nixächigü ñuxmata paigüarü ãëxgacü ga Caipáxütawa nangu. Rü purichíagü ga tupaucaarü dauruügümaã yéma ñãxtüwa narüto, yerü nüxü nadauxchaü ga tacü tá Ngechuchumaã na naxüexü. ⁵⁹ Rü ga paigüarü ãëxgacügü rü guxüma ga Yudíugüarü ãëxgacügüerugü rü naxcèx nadaugü ga wüxi ga ore ga doramare ixíxü na yemamaã Ngechuchuxü ínaxuaxügüxüçèx na yamèxgüãxüçèx. ⁶⁰⁻⁶¹ Natürü woo muxüma ga duüxügü doraxümare nachigaxü yéma yarüxugüe, natürü taxuxüma ga chixexü inayangaugü ga naxcèx tá yamèxgüãxü. Rü düxwa yéma naxí ga taxre ga yatügü ga doraxümare yéma yarüxugüxü. Rü ñanagürügü: —Toma nüxü taxínüë i ñaã yatü rü ñanagürü:

“Tá nagu chapogü ya daa tupauca ya taxüne ya Tupanaärü, rü tomaëxpüx i ngunexügu tá wenaxärü íchanadaxëë”, ñanagürügü. ⁶² Rü yexguma ga paigüarü ãëxgacü ga Caipá rü inachi, rü ñanagürü Ngechuchuxü: —¿Rü tacümaã cunangãxü i ñuxmax? ¿Rü ñuxü ñaxü yíixü i ngëma cuchiga i nüxü yaxugügüxü? —ñanagürü. ⁶³ Natürü ga Ngechuchu rü nangeëxmare. Rü yemacèx ga paigüarü ãëxgacü ga Caipá rü ñanagürü nüxü: —Tupana ya Maxüçüégagu chanaxwëxe i aixcüma tomaã nüxü quixu na texé quiixü. ¿Rü cuma éxna i Cristu ya Tupana Nane quiixü, rü éxna tama? —ñanagürü. ⁶⁴ Rü Ngechuchu nanangãxü rü ñanagürü: —Ngü, rü ngëma nüxü quixuxü chixí. Rü pemaã nüxü chixu rü tá choxü pedaugü i ngëxguma Chaunatü ya Poracüxütawa charütöxgu rü ngëxguma caixanexügu wenaxärü núma chaxüxgu —ñanagürü. ⁶⁵ Rü yexguma ga paigüarü ãëxgacü rü norü numaã nügüchirugu nagaugü. Rü ñanagürü: —Rü ñaã yatü rü tacü Tupanamaã nixugü. Rü taxucèxma marü tanaxwëxe i ñuxma i to i ore na napoxcuxüçèx i ñaã yatü. Rü pematama marü nüxü pexínüë na ñuxäcü chixexümaã na yadexaxü. ⁶⁶ —¿Ñuxü ñapegüxü i pemax? —ñanagürü. Rü nümagü ga togü ga ãëxgacügü rü nanangãxügü rü ñanagürügü: —Ngëmaãcü chixexü naxü. Rü name nixí i noxtacüma nayu —ñanagürügü. ⁶⁷ Rü yexguma rü Ngechuchuchiwewa naçuaixgüe. Rü nüxna nanaçuaixcagü. Rü togü rü nanapegüchwegü. ⁶⁸ Rü ñanagürügü: —Pa Cristux, ¡nüxü nacüèx na texé cuxü pegüchwegüxü rü cuxna naçuaixcagüxü! —ñanagürügü.

*Pedru rü tama nügü nixu na Ngechuchuxü nacuéxü
(Mr 14.66-72; Lc 22.56-62; Cu 18.15-18, 25-27)*

⁶⁹ Rü yoxni ga Pedru rü ãëxgacüpataëxtüwa narüto. Rü wüxi ga pacü ga ãëxgacüarü duüxü ixícü, rü Pedrucèx iyaxü. Rü ngígürügü nüxü: —Cuma rü ta namücü quixí i ngëma Ngechuchu i Gariréaanecüãx —ngígürügü. ⁷⁰ Natürü ga Pedru rü guxü ga yema duüxügüpëxewa rü tama nügü nixu na Ngechuchuarü duüxü yíixü, rü ñanagürü: —Choma rü tama nüxü chacuèx i tacüchiga nixí i ngëma nüxü quixuxü —ñanagürü. ⁷¹ Rü yexguma marü yema ípataëxtüarü ñãxwa ínaxüüxgu ga Pedru, rü naí ga pacü nüxü idau. Rü ngígürügü namaã ga yema duüxügü ga yéma yexmagüxü: —Ñaã yatü rü Ngechuchu ya Nacharétucüãxmücü nixí —ngígürügü. ⁷² Natürü ga Pedru rü wenaxärü tama nügü nixu na Ngechuchuarü duüxü yíixü. Rü ñanagürü: —Choma rü tama nüxü chacuèx i ngëma yatü. Rü Tupana choxü poxcux ega tama aixcüma yixígu i chorü ore —ñanagürü. ⁷³ Rü yixcamaxüra rü yema duüxügü ga yéma yexmagüxü rü Pedrucèx naxí, rü ñanagürügü nüxü: —Aixcüma nixí i cuma rü ta rü ngëma Ngechuchutanüxü quiixü, erü wüxi i Gariréaanecüãx idexaxürüü quidexa —ñanagürügü. ⁷⁴ Rü nüma ga Pedru rü poraäcü nügü nixã, rü ñanagürü nüxü: —Rü aixcüma tama nüxü chacuèx i ngëma yatü. Rü ngëxguma doraxü chixuxgu rü Tupana choxü poxcux —ñanagürü. Rü

yexgumatama nica ga otá. ⁷⁵ Rü nüma ga Pedru rü yexguma nüxna nacuèxãchi ga yema ore ga Ngechuchu namaã nüxü ixuxü ga ñaxü:

“Rü naxüpa na otá içaxü, rü cuma rü tomaëxpüxcüna cugü tá quixã na chorü duüxü quiüxü”, ñaxü. Rü yéma ínaxüxü ga Pedru rü poraãcüxüchima naxaxu.

27

Yudíugüarü ãëxgacügü rü Piratuxütawa nanagagü ga Ngechuchu
(Mr 15.1; Lc 23.1-2; Cu 18.28-32)

¹ Rü yexguma yangunegu rü guxüma ga paigüarü ãëxgacügü rü Yudíugüarü ãëxgacügüerugü, rü nügümaã nanamexëëgü na ñuxãcü Ngechuchuxü yamëxgüxü. ² Rü nayanëixgüchacüügü rü yemaãcü ãëxgacü ga Piratuxütawa nanagagü. Piratu nixí ga Dumacüãx ga ãëxgacü ga Yudeaanemaã icuácü.

Nayu ga Yuda

³ Rü nüma ga Yuda ga Ngechuchuxü íyaxuaxüxü rü nüxü nadau ga Ngechuchuxü na napoxcuexü. Rü poraãcü nagu narüxñü ga yema chixexü ga nümatama naxüxü. Rü yéma naxü naxütawa ga yema paigüarü ãëxgacügü rü yema Yudíugüarü ãëxgacügüerugü. Rü ngíxü nayataeguxëë ga yema 30 tachinü ga dïëru ga nüxna ngíxü naxãgücü. ⁴ Rü ñanagürü nüxü: —Choma rü marü chixexü chaxü, erü naëchita íchayaxuaxü i wüxi i yatü i taxuüma i chixexü üxü, rü ñuxma rü tá ngëmagagu nayu —ñanagürü. Natürü nümagü ga ãëxgacügü rü nanangãxügü, rü ñanagürügü: —Toma rü tama nüxü tacuáxchaü i ngëma. Cugagutama nixí, rü cuma i nüxü cucuáxü na ñuxãcü cugümaã cunamexëëxü i ngëma —ñanagürügü. ⁵ Rü yexguma ga Yuda rü yexma tupauca ga taxünechiãgu ngíxü nawotanü ga yema dïëru. Rü ñuxüchi ínixü rü nügü nayawëxnaxã. ⁶ Rü ga paigüarü ãëxgacügü rü ngíxü nade ga yema dïëru. Rü ñanagürügü: —Taxucürüwa tupauca ya taxüneärü dïëruchiügu ngíxü tanu i ñaã dïëru, erü ngëmamaã tanaxütanü i ngëma yatü i tá yuxü —ñanagürügü. ⁷ Rü ñuxüchi nügümaã nanamexëëgü na yema dïërumaã naxcèx nataxegüxüçèx ga wüxi ga naãne ga waixüümü ga üwechixü nawa nayauxgüxü. Rü yema naãnecèx nataxegü na nüxü nayexmaxüçèx ga nachica ga ngexta na natëxgüãxüçèx ga yema duüxügü ga togü ga nachüãnecüãx ixígüxü. ⁸ Rü ngëmacèx i ñuxma rü ta i ngëma naãne rü Nagüchitaügu naxãega. ⁹ Rü yemaãcü ningu ga Tupanaärü ore ga nuxcümaücü ga norü orearü uruü ga Yeremíã ümatüxü ga ñaxü:

“Rü nümagü ngíxü nade ga yema 30 tachinü ga dïëru ga Cristutanü Yudíugü ngíxü ixãgücü. ¹⁰ Rü yema dïërumaã naxcèx nataxegü ga wüxi ga naãne ga waixüümü ga üwechixü nawa nayauxgüxü, yema Cori ga Tupana chomaã nüxü ixuxürüü”, ñaxü.

Piratupëxewa nayexma ga Ngechuchu
(Mr 15.2-5; Lc 23.3-5; Cu 18.33-38)

¹¹ Rü ãëxgacü ga Piratuxütawa Ngechuchuxü nagagü. Rü nüma ga Piratu rü Ngechuchuna naca, rü ñanagürü: —¿Cuma quiüxü i Yudíugüarü ãëxgacü ya tacü? —ñanagürü. Rü Ngechuchu nanangãxü, rü ñanagürü: —Ngü, rü ngëma nüxü quixuxü chixí i chomax —ñanagürü. ¹² Rü Ngechuchuxü ínaxuaxügü ga paigüarü ãëxgacügü rü Yudíugüarü ãëxgacügüerugü. Natürü ga Ngechuchu rü taxuxümaãma nanangãxü. ¹³ Rü yexguma ga Piratu rü ñanagürü: —¿Tama ëxna nüxü cuxñü i ngëma ore i namaã cuxü ínaxuaxügüxü? —ñanagürü. ¹⁴ Natürü ga Ngechuchu rü taxuxümaãma nanangãxü. Rü yemacèx poraãcü nabëixãchiãë ga ãëxgacü ga Piratu.

Piratu rü Ngechuchumaã nanaxuegu na nayuxüçèx
(Mr 15.6-20; Lc 23.13-25; Cu 18.38-19.16)

¹⁵ Rü guxüguma ga yema Üpetüchigaarü petagu, rü Piratu ínananguxuchixëëxü ga wüxi ga poxcuxü ga duüxügü naxcèx ícagüxü, yerü yema nixí ga nacüma. ¹⁶ Rü yéma nayexma

ga wüxi ga poxcuxü ga guxü ga duüxügü meã nüxü cuáxü. Rü Barabá nixi ga naega. ¹⁷ Rü yexguma yéma nangutaquëxegü ga duüxügü, rü Piratu nüxna naca, rü ñanagürü: —¿Rü ngexürüxü i penaxwæxü na íchananguxuchixëëxü? ¿Penaxwëxü na Barabáxü íchananguxuchixëëxü rü éxna Ngechuchu i Cristumaã naxugüxü íchananguxuchixëëxü? —ñanagürü. ¹⁸ Rü yema ñanagürü ga Piratu yerü nüxü nacuèx na Ngechuchuchi naxaïxü ga Yudíugüarü äëxgacügü, rü yemacèx nixi ga naxütawa nagagüãxü. ¹⁹ Rü yexguma norü tochicawa natoxgu ga Piratu, rü naxmèx yéma imuga, rü ngígürügü: —Tama name i cunapoxcu i ngëma yatü i taxuüma i chixexü üxü. Yerü nagagu íne chütacü rü poraãcü chachixenegü —ngígürügü. ²⁰ Natürü yema paigüarü äëxgacügü rü Yudíugüarü äëxgacügüerugü, rü duüxügüxü naxucuxëgü na naxcèx ínacagüxüçèx na Barabáxü ínanguxuchixëëxüçèx rü Ngechuchuxü na nayuxëëgüxüçèx. ²¹ Rü äëxgacü ga Piratu rü wenaxârü duüxügüna naca, rü ñanagürü: —¿Ngëxürüxü i ngëma taxrewa i pema penaxwëxü na íchananguxuchixëëxü? —ñanagürü. Rü nümagü ga duüxügü nanangäxügü, rü ñanagürügü: —Tanaxwëxè i Barabáxü ícunguxuchixëë —ñanagürügü. ²² Rü yexguma ga äëxgacü ga Piratu rü nüxna naca, rü ñanagürü: —¿Tacü tá chaxüxü namaã i ngëma Ngechuchu i Cristugu äegaxü? —ñanagürü. Rü guxüma ga duüxügü rü nanangäxügü, rü ñanagürügü: —¡Curuchawa yapota! —ñanagürügü. ²³ Rü yexguma ga Piratu rü ñanagürü nüxü: —¿Natürü tacü rü chixexü naxü? —ñanagürü. Natürü ga nümagü ga duüxügü rü wenaxârü tagaãcü ñanagürügü: —¡Curuchawa yapota! —ñanagürügü. ²⁴ Rü yexguma Piratu nüxü dëuxgu ga marü taxucürüwama Ngechuchuxü na ínanguxuchixëëgaxü, yerü ga duüxügü rü marü nanaxixächiãëgüchaü, rü yemacèx wüxi ga norü duüxüxü namu ga dexá naxütawa na tanangexüçèx. Rü nügü nayauxmëx ga Piratu napëxewa ga guxüma ga yema duüxügü. Rü ñanagürü: —Tama chaugagu tá nixi i na nayuxü i ñaã yatü i taxuüma i chixexü üxü, rü pegagu tátama nixi —ñanagürü. ²⁵ Rü guxüma ga yema duüxügü nanangäxügü, rü ñanagürügü: —Togagu rü toxocügügagu tá nixi i nayuxü —ñanagürügü. ²⁶ Rü yexguma ga Piratu rü Barabáxü ínanguxuchixëë. Rü ñuxüchi norü churaragüxü namu na Ngechuchuxü naçuaixgüçèx, rü yemawena curuchawa na yanapotagüãxüçèx. ²⁷ Rü ñuxüchi ga yema churaragü rü Piratupataarü aixepewa Ngechuchuxü nagagü. Rü yexma Ngechuchuxütagu nanangutaquëxexëë ga guxüma ga churaragü. ²⁸ Rü ñuxüchi Ngechuchuxü ínacuxuchigü, rü wüxi ga máxü ga naxchiru ga dauxügu nayacuxëëgü. ²⁹ Rü naëruwa nayangëxcuchigü ga wüxi ga boxü ga chuchuxüwa naxügüxü. Rü wüxi ga naïxmenëxãxãcüxü nüxü nayayauxächixëë ga norü tügünemëxëwa. Rü ñuxüchi napëxegu nacaxãpüxügü, rü nüxü nacugüe, rü ñanagürügü: —¡Namaüx ya Yudíugüarü Äëxgacü ya Tacüx! —ñanagürügü. ³⁰ Rü nüxna naçuaixgüe. Rü nüxna nanayauxgü ga guma naïxmenëxãxãcü, rü naëruwa namaã nanaçuaixcagü. ³¹ Rü yexguma nüxü nacugüeguwena rü ínacuxuchigü ga yema naxchiru ga daucharaxü. Rü wenaxârü naxchirugutama nayacuxëëgü. Rü ñuxüchi nayagagü na curuchawa yanapotagüãxüçèx.

Ngechuchuxü curuchawa nipotagü
(Mr 15.21-32; Lc 23.26-43; Cu 19.17-27)

³² Rü yexguma yéma inaxiãchigu, rü nüxü nadaugü ga wüxi ga yatü ga Chiréneçüãx ga Chimáügu äegacü. Rü guma yatüxü ngixü iningexëëgü ga Ngechuchuarü curucha. ³³ Rü nawa nangugü ga wüxi ga nachica ga Górgutagu äegaxü. Rü ngëma naega rü Duüxëëruchinëxã ñaxüchiga nixi. ³⁴ Rü nüxna nanaxägü ga binu ga ngüxüarü naächixëëruümaã äexüçü na yaxaxüçèx. Rü Ngechuchu nüxü naxaxneta, natürü tama nayaxaxü. ³⁵ Rü yexguma marü curuchawa yapotagüãxguwena rü ga churaragü rü nanade ga Ngechuchuchiru. Rü ñuxüchi wüxi ga díeru ngixü nañanagügü na yemawa nüxü nacuëxgüçèx na tacü tá nayaxuxü ga wüxichigü. ³⁶ Rü ñuxüchi yéma

narütogü ga churaragü na Ngechuchuna yéma nadaugüxcèx. ³⁷ Rù norü curuchat-apèxewa nayapocuchi ga wüxi ga mürapewa ga äegatachinüxü ga nüxü ixuxü ga tacücèx Ngechuchuxü curuchawa na yapotagüxü. Rù ñanagürü: “Ñañ nixi i Ngechuchu i Yudügüarü Äëxgacü ya Tacü”, ñanagürü. ³⁸ Rù yexgumarüü ta curuchawa nayapotagü ga taxre ga máëtagüxü. Rù wüxi rü Ngechuchuarü tügünecüwawa naxü, rü to ga norü toxwecüwawa. ³⁹⁻⁴⁰ Rù yema duüxügü ga yéma chopetüxü, rü Ngechuchumaã naguxchigagü, rü nanexãerugüãcüma ñanagürügü: —Dücèx, cuma cunangutaüxëëga ya tupauca ya taxüne, rü tomaëxpüx i ngunexügu wenaxärü ícunadaxëëga. ¡Cugütama namaxëë i ñuxmax! Rù ngëxguma chi aixcüma Tupana Nane quixigu, rü ¡ruxi i curuchawa! —ñanagürügü. ⁴¹ Rù yexgumarüü ta Ngechuchuxü nacugüecüraxü ga paigüarü äëxgacügü, rü ngüxëëruüügü ga ore ga mugüwa ngüxëëtaegüxü, rü Parichéügü, rü Yudügüarü äëxgacügüerugü. Rù nügümaã ñanagürügü: ⁴² —Rü nüma rü togüxü namaxëëë natürü i ñuxma rü tama nüxü nacuèx na nügütama namaxëëxü. Rù ngëxguma chi aixcüma Yudügüarü äëxgacü yixigu, ¡rü ñuxma rü ínaxix i curuchawa na nüxü yaxögüxcèx! ⁴³ —Rü nüma nagu naxinügu rü Tupana tá nüxü narüngüxëë. Ècü, ñuxma rü Tupana nüxü rüngüxëëx ega aixcüma nüxü nangüxëëchaügu. ¿Tama ëxna nümatama tamaã nüxü yaxuxü na Tupana Nane yixü? —ñanagürügü. ⁴⁴ Rù woo ga yema máëtagüxü ga naxrüü curuchawa ipotagüxü, rü namaã naguxchigagü.

Nayu ga Ngechuchu

(Mr 15.33-41; Lc 23.44-49; Cu 19.28-30)

⁴⁵ Rù yexguma rü guxü ga naãnewa naxëãne. Rù tocuchigu inaxügü ga yema ñuxmata tomaëxpüxarü orawa nangu ga yáuanecü. ⁴⁶ Rù yema tomaëxpüxarü oragu nixi ga Ngechuchu ga tagaãcü aita naxüxü, rü ñaxü: —Eri, Eri, ¿damá chabátani? —ñanagürü. Rù ngëma rü ñaxüchiga nixi:

“Pa Chorü Tupana, Pa Chorü Tupanax, ¿tüxcüü choxna quixügachixü?” ñaxüchiga nixi. ⁴⁷ Rù nümaxü ga duüxügü ga yéma yexmagüxü rü nüxü naxinüë, rü ñanagürügü: —Ñañ yatü rü nuxcümaücü ga Tupanaärü orearü uruü ga Eriacèx naca —ñanagürügü. ⁴⁸ Rù yexgumatama rü wüxi ga yema duüxügü ga yéma yexmagüxü rü inañaãchi rü Ngechuchuxütawa nanange ga wüxi ga tüaxmü ga binu ga marü ngüchiëxüchicümaã yawaixëëxü. Rù wüxi ga dexnewa nayanëix. Rù ñuxüchi Ngechuchuëxgu nanawëx na nüxü natuxuxüçèx. ⁴⁹ Natürü ga yema togü ga duüxügü ga yéma yexmagüxü rü ñanagürügü: —Yixrüma. Rù ngixã itarüdaunü ngoxita Eria nuã ü na nüxü yanangüxëëxüçèx —ñanagürügü. ⁵⁰ Rù wenaxärü tagaãcü aita naxü ga Ngechuchu, rü ñuxüchi nayu. ⁵¹ Rù yexgumatama ga tupauca ga taxüneärü tüyemachiãxü rü taxregu narügaute. Rù daxüwa inanaxügü ga na nagautexü rü ñuxmata ñaxtüwa nangu. Rù naxiãxãchiane, rü narüngüxtegü ga nutagü ga itacü. ⁵² Rù yuetamaügü rü ningenagü. Rù wena namaxë ga muxüma ga duüxügü ga yuechiréxü ga Tupanaãxü yaxögüxü. ⁵³ Rù yexguma Ngechuchu wena maüxguwena, rü naxmaüwa ínachoxü ga yema duüxügü ga wena maxëxü. Rù Yerucharéüwa naxi. Rù muxüma ga duüxügü nüxü nadaugü. ⁵⁴ Rù yema churaragüarü äëxgacü rü norü churaragü ga Ngechuchuna ídaugüxü, rü nüxü nadaugü ga na naxiãxãchianexü rü guxüma ga yema ngupetüxü. Rù yexguma rü poraãcü namuë, rü ñanagürügü: —Aixcüma nixi ya daa yatü i Tupana Nane na yixü —ñanagürügü. ⁵⁵ Rù iyexmagü ga mucüma ga ngecügü ga yéma yaxüwa nüxü rüdaunücü. Rù yema ngecügü iyixi ga Ngechuchuxü íxümücügücü rü nüxü rüngüxëëgücü ga yexguma Gariréañewa ne naxüxgu. ⁵⁶ Rù yema ngecügütanüwa iyexma ga María ga Magadácüãx, rü María ga Chaütiágu rü Yúche naë, rü Zebedéu namëx ga Chaütiágu rü Cuáü naë.

Ngechuchu rü naxmaügu nayaxücuchigü

(Mr 15.42-47; Lc 23.50-56; Cu 19.38-42)

⁵⁷ Rū yexguma marū nachütachaŭgu, rü yéma nangu ga wüxi ga yatü ga Arimatéacŭâx ga taarü dîeruâcü ga Yúchegu äegacü. Rū nūma rü ta Ngechuchuaxŭ nayaxō. ⁵⁸ Rū nūma rü Piratuna nayaca rü ngoxita name na nayauxâxŭ ga Ngechuchuxŭne ga curuchawa. Rū Piratu norü churaragŭxŭ namu na nūxna naxâgŭâxŭcèx ga Ngechuchuxŭne. ⁵⁹ Rū Yúche nanayaxu ga Ngechuchuxŭne ga curuchawa. Rū wüxi ga naxchâpenüŭ ga ngēmataxŭmaã nananuque. ⁶⁰ Rū yema naxmaŭ ga yexwacaxŭxŭ ga Yúche nügücèxtama duŭxŭgŭxŭ yacaxmaxēēxŭ ga nuta ga tacŭarü mēxpŭxŭwa yexmaxŭgu nayaxŭcuchi ga Ngechuchuxŭne. Rū ñuxŭchi nanangŭxtaŭ namaã ga wüxi ga nuta ga taxŭchicü. Rū yemawena rü ínixŭ. ⁶¹ Rū yéma Ngechuchumaŭârü toxmèxtawa irütogŭ ga María ga Magadácŭâx rü naŭ ga María.

Purichíaqŭ nūxna nadaugŭ ga yema naxmaŭ ga Ngechuchuxŭ nagu yaxŭcuchigŭxŭ

⁶² Rū moxŭâcü ga ngŭxchigaarü ngunexŭgu rü paigŭarü äēxgacŭgŭ rü Parichéugŭ rü yéma Piratuxŭtawa naxŭ. ⁶³ Rū ñanagŭrŭgŭ nŭxŭ: —Pa Corix, nūxna tacuèxâchie ga yema yatü ga Ngechuchu ga idoratèxâxŭ rü yexguma namaŭxgu rü ñanagŭrŭ tomaã:

“Ngēxguma chayuxgu rü tomaēxpŭx i ngunexŭguwena rü wena táxarü ícharŭda”, ñanagŭrŭ tomaã. ⁶⁴ —Rü ngēmacèx tanaxwèxe i churaragŭ ngema cumugŭ na nūxna yadaugŭxŭcèx i ngēma naxmaŭ ñuxmatáta tomaēxpŭx i ngunexŭwa nangu na tama chütacü ngema naxŭxŭcèx i norü ngŭexŭgŭ na yayauxgŭâxŭcèx i naxŭne rü ñuxŭchi duŭxŭgŭmaã nŭxŭ na yaxugŭxŭcèx na marü wena namaxŭxŭ. Erü ngēxguma chi ngēmaâcü naxŭpetŭgu, rü noxriarü yexera tá nixŭ na duŭxŭgŭxŭ nawomŭxēēxŭ —ñanagŭrŭgŭ. ⁶⁵ Rū Piratu ñanagŭrŭ nŭxŭ: —Ngēâgŭ nixŭ i churaragŭ i pexcèx. ¡Ēcŭ ngema namaã pexŭ na meãma pema penaxwèxexŭâcüma nūxna pedaugŭxŭcèx i naxmaŭ! —ñanagŭrŭ. ⁶⁶ Rū yema churaragŭmaã yéma naxŭ, rü meãma nayataixēēgŭ ga guma nuta ga Ngechuchumaxŭ namaã rŭngŭxtaŭcü. Rū nanaxŭarü cuèxruŭâxgŭ na taxŭema naēchita ínaxŭgachigŭxŭcèx ga guma nuta. Rū ñuxŭchi yexma nanamugŭ ga churaragŭ na nūxna nadaugŭxŭcèx.

28

Yuwa ínarŭda ga Ngechuchu

(Mr 16.1-8; Lc 24.1-12; Cu 20.1-10)

¹ Rū sabaduarü ngunexŭguwena ga yŭxŭarü pèxmama, rü yéma naxmaŭwa íyadaugŭ ga María ga Magadácŭâx rü naŭ ga María. ² Rū ngŭrŭâchi poraâcü naxŭâxâchiane, yerü wüxi ga daxŭcŭâx ga Cori ga Tupanaârü orearü ngeruŭ ínarŭxŭ, rü naxmaŭwa nangu rü ínanangŭxgachi ga guma nuta ga namaã nangŭxtaŭcü ga yema naxmaŭ. Rū ñuxŭchi guma nutaétŭwa narŭto. ³ Rū yema orearü ngeruŭ rü wüxi ga bèixbèxanexŭrŭŭ niyauracŭü. Rū nacómŭxŭchi ga naxchiru. ⁴ Rū yexguma yemaxŭ nadaugŭgu ga churaragŭ rü norü muŭmaã nidŭruxè, rü yexma niyuâchitanü. ⁵ Rū yexguma ga yema orearü ngeruŭ, rü ñanagŭrŭ ngŭxŭ ga yema ngecŭgŭ: —¡Tâxŭ i pemuŭēxŭ! Choma nŭxŭ chacuèx rü naxcèx pedaugŭ ya Ngechuchu ga guma curuchawa yapotagŭâcü. ⁶ Nataxuma i nuã, erü marü wena namaxŭ, yema nūma ŭpa pemaã nŭxŭ yaxuxŭrŭŭ. ¡Rü nuã pexŭ, rü ípeyadèux i naxmaŭ i ngēma inaxŭgŭâxŭwa ga naxŭne! ⁷ ¡Rü paxa ípixŭ, rü norü ngŭexŭgŭmaã nŭxŭ peyarŭxugŭe rü marü ínarŭda rü wena namaxŭ ya Ngechuchu! Rü ñuxma rü marü pexŭpa nŭxŭra Gariréaanewa naxŭ i nŭmax. Rū ngema tá nixŭ i nŭxŭ peyadauxŭ. Rū ngēma nixŭ i ore i pemaã nŭxŭ chayarŭxuxŭ —ñanagŭrŭ. ⁸ Rū yexguma ga yema ngecŭgŭ rü paxama nūxna íyaxŭ ga yema naxmaŭ. Rū imuŭē, natŭrŭ itaãgŭ ta. Rū poraâcü iixŭâchi na Ngechuchuarü ngŭexŭgŭmaã nŭxŭ na yanaxugŭexŭcèx ga yema ore ga daxŭcŭâx ngŭmaã nŭxŭ ixuxŭ. ⁹ Rū yexguma inaxŭâchiyane, rü ngŭrŭâchi yéma ngŭxcèx nangox ga Ngechuchu, rü ngŭxŭ narŭmoxē. Rū ngŭmagŭ rü Ngechuchucèx iyabuxmŭ rü nŭxŭ iyacuèxŭgŭ, rü naparawa inèixâchitanü. ¹⁰ Rū nūma ga Ngechuchu

rü ñanagürü ngixügü: —¡Tãxü i pemuñëxü! ¡Rü ípixĩ rü chaueneëgü i chorü ngúexügümaã nüxü peyarüxu rü Gariréaanewa naxĩ! Rü ngema tá nixĩ i choxü nadaugüxü —ñanagürü.

Churaragü rü paigüarü ãëxgacügümaã nüxü nayarüxugüe ga yema ngupetüxü

¹¹ Rü yexguma ga yema ngecügü rü namagu naxĩyane, rü ñuxre ga churaragü ga yéma naxmaüwa dauxütaegüxü rü Yerucharéüwa naxĩ. Rü paigüarü ãëxgacügümaã nüxü nayarüxugüe ga guxüma ga yema ngupetüxü. ¹² Rü yema paigüarü ãëxgacügü rü namaã nayarüdexagü ga Yudíugüarü ãëxgacügüerugü. Rü nügümaã nanamexëëgü ga tacümaã tá churaragüxü na yaxucüxëgüxü. Rü ñuxüchi nüxna ngixü naxägü ga tacü ga dñeru. ¹³ Rü namaã nüxü nixugüe rü ñanagürügü: —¡Pema rü ñaperügügü tá:

“Ngëxguma chütacü tapeeyane, rü norü ngúexügü toechita ngema naxĩ rü nayayauxgü ga naxüne” ñaperügügü tá! ¹⁴ Rü ngëxguma ãëxgacü ya Piratu tá nüxü cuèxgu i ngëma ngupetüxü, rü toma rü tá namaã tidexagü rü namaã tá tanamexëë na taxuüma pemaã naxüxcèx —ñanagürügü. ¹⁵ Rü yexguma ga yema churaragü rü ngixü nayauxgü ga yema dñeru. Rü yema ãëxgacügü namaã nüxü ixugüxürüü duüxügümaã nüxü nixugüe. Rü ñuxma rü ta ngëmatama dexa nixĩ i nüxü yaxugüxü i Yudíugü.

Ngechuchu nanamu ga norü ngúexügü

(Mr 16.14-18; Lc 24.36-49; Cu 20.19-23)

¹⁶ Rü yema 11 ga Ngechuchuarü ngúexügü rü Gariréa- anewa naxĩ ga guma mèxpüne ga Ngechuchu namaã nüxü ixuxñewa. ¹⁷ Rü yexguma Ngechuchuxü nadaugügu rü nüxü nicuèxüügü, woo ñuxre ga norü ngúexügü rü tama aixcüma nayaxögü na Ngechuchu yixü. ¹⁸ Rü yexguma ga Ngechuchu rü naxcèx nixü, rü ñanagürü nüxü: —Tupana rü ãëxgacüxü choxü nixixëë i guxü i daxügüxü i nañnewa rü guxü i ñoma i nañnewa. ¹⁹ —Rü ñuxma rü chanaxwèxe i guxü i nachiüñnewa pexĩ i guxü i duüxügütanüwa. ¡Rü chorü duüxügüxü peyaxígüxëëx! ¡Rü ípenabaiüxëëx chauégagu rü Chaunatuégagu rü Naã i Üünexüegagu! ²⁰ ¡Rü penangúexëëx na naga naxĩnüxüxcèx i guxüma i ngëma pexü chamuxü! ¡Rü dücax, guxügütáma pexütawa changëxmaëcha ñuxmatáta nagú i nañne! —ñanagürü ga Ngechuchu.

ORE I MEXÜ GA MARCU ÜMATÜXÜ

Cuáŭ ga baiüxëëruŭ nüxü nixu ga Tupanaärü ore ga dauxchitawa ga ngextá taxúema íxãpataxüwa

(Mt 3.1-12; Lc 3.1-9, 15-17; Cu 1.9-28)

¹ Ñaã nixi i norü ügü i ore i mexü ya Ngechuchu ya Cristu ya Tupana Nanechiga. ² Rü nuxcümaücü ga Tupanaärü orearü uruŭ ga Ichaxía ümatüxü ga Tupanaärü ore, rü ñanagürü:

“Cupëxegu chayamu i chorü orearü ngeruŭ na namexëëãxüçèx i cumaŭ. ³ Rü dauxchitawa i ngextá taxúema íxãpataxüwa rü tá nangëxma i wüxi i duüxü i ngema tagaäcü ñaxü: ‘¡Pegü pemexëëx naxcèx ya Cori. Rü naxcèx ipeyanawëxãchixëëx i perü maxü!’ ”

ñaxü tá. ⁴ Rü Cuáŭ rü dauxchitawa ga ngextá taxúema íxãpataxüwa nangox rü yéma ínanabaiüxëë ga duüxügü. Rü namaã nüxü nixu ga na namexü na Tupanacèx nadaugüxü rü ínabaiüxü na Tupana nüxü nüxü nangechaüxüçèx ga norü pecadugü. ⁵ Rü guxüma ga duüxügü ga Yudéaanecüãx rü ñãne ga Yerucharéüçüãx rü yéma Cuáŭxütawa naxüxü ga na nüxü iyanaxüñüçèx. Rü nümagü rü norü pecadugüxü yéma nayarüxugüxü, rü Cuáŭ rü natü ga Yudáŭwa ínayabaiüxëëtanü. ⁶ Rü naxchiru ga Cuáŭ rü cameyutèxanaxcèx nixi, rü norü goyexü rü naxchëxmünaxcèx nixi. Rü beruremaã rü munümaã naxãwemü. ⁷ Rü Cuáŭ rü yema nüxü yaxuxü ga orewa, rü ñanagürü: —Chowëama tá ne naxü ya choxü rüyexeracü. Rü choma rü taxuwama chame rü bai na ichayarümaxãchixü na íchayawëxüçèx i norü chapatucunügü. ⁸ —Choma rü dexáwamare pexü íchabaiüxëë, natürü nüma rü tá Tupanaãë i Üünexü pexna nanguxëë —ñanagürü ga Cuáŭ.

Ngechuchuarü baiechiga

(Mt 3.13-17; Lc 3.21-22)

⁹ Rü yema ngunexügügu, rü Ngechuchu rü ínaxüxü nawa ga guma ñãne ga Nacharétu ga Gariréaanewa yexmane. Rü Cuáŭ rü natü ga Yudáŭwa ínanabaiexëë. ¹⁰ Rü yexguma dexáwa ínaxüãchigu, rü Ngechuchu nüxü nadau ga na yangenaxü ga daxüwa. Rü yema Tupanaãë i Üünexü rü wüxi ga muxtucurüŭ ínanago, rü Ngechuchuna nangu. ¹¹ Rü daxüwa ínanaxü ga wüxi ga naga ga ñaxü: —Cuma nixi i Chaune i cuxü changechaüxüchixü rü cumaã chataãëxüchixü —ñaxü.

Ngechuchuxü naxü ga Chataná

(Mt 4.1-11; Lc 4.1-13)

¹² Rü yemawena rü Tupanaãë i Üünexü rü dauxchitawa ga ngextá taxúema íxãpataxüwa Ngechuchuxü naga. ¹³ Rü yéma nayexma ga 40 ga ngunexü. Rü naëügü ga idüraexü íyexmagüxüwa nayexma, rü ngoxo ga Chataná rü nüxü naxü. Natürü Tupanaärü orearü ngeruŭgu ga daxüçüãx rü Ngechuchuxü narüngüxëëgü.

Ngechuchu rü Gariréaanewa ínanaxügü ga norü puracü

(Mt 4.12-17; Lc 4.14-15)

¹⁴ Rü nawena ga poxcupataŭgu na napoxcuxü ga Cuáŭ, rü Gariréaanewa naxü ga Ngechuchu na naxunagüãxüçèx ga Tupanaärü ore i mexü. ¹⁵ Rü ñanagürü: —Marü nawa nangu i ngunexü ga Tupana nagu unetaxü, rü pexcèx ningaica na perü ãëxgacü na yüxü. ¡Rü ñuxma rü name nixi i Tupanacèx pedaugü rü peyaxögü i ngëma norü ore i mexü! —ñanagürü.

Ngechuchu rü ägümücü ga püchaetanüxüçèx naca

(Mt 4.18-22; Lc 5.1-11)

¹⁶ Rū yexguma naxtaxa ga Gariréaanacügu yaxūxgu ga Ngechuchu, rü yéma nüxū nadau ga Chimáũ rü naēneē ga Aüdré. Rū nūmagü rü woetama püchaetanüxū nixīgü rü yéma naxtaawa napüchaegü. ¹⁷ Rū Ngechuchu rü ñanagürü nüxū: —¡Chowe perūxī rü tá pexū charüngüxēē na chauxūtawa penagagüxcèx i duūxūgü! —ñanagürü. ¹⁸ Rū yexgumatama ga yema taxre, rü yéma nanawogü ga norü püchagü. Rū Ngechuchuwe narüxī. ¹⁹ Rū yéamaxūra naxū ga Ngechuchu, rü yéma nüxū nadau ga Chaütiágu rü naēneē ga Cuáu. Rū Zebedéu nanegü nixīgü ga nūmagü. Rū wüxi ga nguewa nayexmagü, rü yéma ínanangáitagü ga norü püchagü. ²⁰ Rū yexgumatama Ngechuchu naxcèx naca. Rū nūmagü rü yéma nguewa tüxū natèxgü ga nanatü ga Zebedéu namaã ga tümaärü puracütanüxūgü, rü Ngechuchuwe narüxī.

*Wüxi ga yatü ga ngoxo nawa yexmaxüchiga
(Lc 4.31-37)*

²¹ Rū ñāne ga Capernáüwa nangugü. Rū yexguma ngüxchigaarü ngunexüwa nangugü, rü Ngechuchu rü ngutaquēxepataüwa naxū rü yexma naxücu. Rū yéma inanaxügü ga na nangüxēētaexū. ²² Rū duūxūgü rü nabèixāchiāegü namaã ga norü ngüxēētae, yerü aixcūma Tupanaärü poramaã meã nangüxēē rü tama ngüxēēruügü ga Moíchéarü mugüwa ngüxēētaegüxürü nixī. ²³⁻²⁴ Rū guma ñāneärü ngutaquēxepataüwa nayexma ga wüxi ga yatü ga ngoxo nawa yexmaxü. Rū aita yéma naxü, rü ñanagürü: —¿Tüxcü totanüwa cuxü, Pa Ngechuchu Pa Nacharétucüãx? ¿Nuã cuxü na toxü cuyadèixüxcèx? Choma rü cuxü chacuèx na Tupana Nane ya Üüncü quiüxü —ñanagürü. ²⁵ Rū Ngechuchu nüxū naxoox ga yema ngoxo, rü ñanagürü: —¡lyarüngeèx rü ínaxüxü nawa ya yima yatü! —ñanagürü. ²⁶ Rū yexguma ga yema ngoxo rü guma yatüxü niyuächixēē, rü tagaäcü aita naxüäcüma nawa ínaxüxü. ²⁷ Rū guxüma ga duūxūgü rü nabèixāchiāegü, rü namücügüna nicachigü rü ñanagürügü: —¿Tacü nixī i ñāã? Maneca wüxi i ngexwacaxüxü i ngüxēētae nixī. Nüma rü aixcūma Tupanaärü poramaã meã nangüxēētae. Rū woo i ngoxogü rü naga naxínüē i ngèxguma namuäxgu —ñanagürügü. ²⁸ Rū yemaäcü nixī ga paxa guxüwama ga Gariréanewa rü Ngechuchuchigaxü nacüèxgüxü ga duūxūgü.

*Ngechuchu rü Chimáũ ga Pedru nèxècèx nayataanexēē
(Mt 8.14-15; Lc 4.38-39)*

²⁹ Rū yexguma ngutaquēxepataüwa ínaxüxügu ga Ngechuchu, rü Chaütiágu rü Cuáuãma Chimáũ rü Aüdrépatawa naxü. ³⁰ Rū Chimáũ nèxè rü ngürücarewa iyexma, yerü iyaxaxüne. Rū Ngechuchumaã ngixü nixugüe. ³¹ Rū ngixcèx nixü, rü ngixmèxgu nayayauxāchi, rü ngixü ínarüdxēē. Rū yexgumatama igèuxāchi ga na yaxaxünexü. Rū írüda, rü inaxügü ga naxcèx na namexēēaxü ga ñna.

*Ngechuchu rü muxüma ga idaaweexüxcèx nayataanexēē
(Mt 8.16-17; Lc 4.40-41)*

³² Rū yexguma marü yanaxüxcuxgu ga üèxcü ga na nachütachaüxü, rü Ngechuchuxütawa nanagagü ga guxüma ga duūxūgü ga idaaweexü rü guxüma ga ingoxoãxgüxü. ³³ Rū guxüma ga yema ñānecüãx rü yexma guma ípataarü ñāxwa naxcèx nangutaquēxegü. ³⁴ Rū nüma nanameèxēē ga muxüma ga duūxūgü ga nagüxüraüxü ga daawemaã idaaweexü. Rū ínanawoxü ga muxüma ga ngoxogü, natürü nüxna nanachüxu ga na yadexagüxü, yerü nūmagü ga ngoxogü rü nüxü nacüèxgü na texé yüxü.

*Ngechuchu rü nanaxunagü ga ore ga mexü ga ngutaquēxepataüwachigü
(Lc 4.42-44)*

³⁵ Rū ngunetüü ga tauta yangóonegu, rü inaxüāchi ga Ngechuchu. Rū ñāneärü yéaxüra ga ngextá taxüema íxāpataxüwa naxü na yéamaxūra yayumüxèxüxcèx. ³⁶ Rū Chimáũ rü namücügümaã Ngechuchucèx nayadaugü. ³⁷ Rū yexguma nüxü iyangaugügu, rü

ñanagürügü nüxũ: —Guxũma i duũxũgü rü cuxcèx nadaugü —ñanagürügü. ³⁸ Natürü ga nüma rü nanangãxũ rü ñanagürü nüxũ: —¡Ngĩxã rü toxnamana taxĩ náigü ya ãñexãcügü ya ngaicamagünewa na ngema rü ta chanaxunagüxcèx i ore i mexũ! Erü woetama ngemacèx nixĩ i Capernáũrũ ãñewa íchaxũxũ. ³⁹ Rũ yemaãcü ga Ngechuchu rü guxũma ga Gariréaanegu nixũãgüchigü. Rũ wüxichigü ga ãñeãrũ ngutaquẽxepataũwa rü nüxũ nixuchigü ga ore ga mexũ, rü ínayawoxũẽtanũ ga ngoxogü.

Ngechuchu rü wüxi ga rüchaxünexũcèx nayataanexẽẽ
(Mt 8.1-4; Lc 5.12-16)

⁴⁰ Rũ Ngechuchucèx nixũ ga wüxi ga yatü ga chaxünemaã idaawecü. Rũ napẽxegu nayacaxãpũxũãcũma ñanagürü nüxũ: —Pa Corix, ngẽxguma cunaxwèxegu na choxũ curümexẽẽxũ, rü cuxũ natauxcha na chauxcèx cuyataanexẽẽxũ —ñanagürü. ⁴¹ Rũ Ngechuchuxũ nangechaũtümũũ ga guma yatü. Rũ nüxũ ningögü rü ñanagürü nüxũ: —Ngũ, chanaxwèxe. ¡Marü curüme! —ñanagürü. ⁴² Rũ yexgumatama nüxũ inayarüxo ga na nachaxünexũ ga guma yatü. Rũ meãma naxcèx nitaane. ⁴³⁻⁴⁴ Rũ Ngechuchu rü yexgumatama ínayamu. Rũ meãma nanaxucuxẽ rü ñanagürü nüxũ: —¡Dücèx, tãxũtãma texemaã nüxũ quixu! ¡Natürü ngema paixũtawa naxũ, rü cugü nüxũ yadauxẽẽ! ¡Rũ curü mexẽẽcèx nüxna yaxuaxũ i curü ãmare ga yema Moĩché tũxũ muxũ na nüxũ nacuáxũcèx i duũxũgü na curümexũ nawa i curü daawe! —ñanagürü. ⁴⁵ Natürü nüma ga guma yatü rü ínixũ rü inanaxügü ga na guxãmaãma nüxũ yaxuxũ ga yema nüxũ ngupetũxũ. Rũ yemacèx ga Ngechuchu rü marü taxucürüwa ngóxũwama duũxũgüpẽxewa ãñegügu naxücu. Natürü dauxchitagu ga ngextá duũxũgü ítaxuxũgu narũxãũx. Rũ yéma naxcèx naxĩxũ ga duũxũgü ga guxũãñewa ne íxũ.

2

Ngechuchu rü wüxi ga yatü ga nawãixãchicücèx nayataanexẽẽ
(Mt 9.1-8; Lc 5.17-26)

¹⁻² Rũ yixcama ga ñuxre ga ngunexũwena rü wenaxãrũ Capernáũrũ ãñegu naxücu ga Ngechuchu. Rũ yexguma duũxũgü nüxũ cuáchigagügu na ípatawa nayexmaxũ, rü yéma nangutaquẽxegü ga muxũma ga duũxũgü. Rũ düxwa ga ãñxtüwa rü nanapã. Rũ nüma ga Ngechuchu rü namaã nüxũ nixu ga ore i mexũ. ³ Rũ yéma nangugü ga ãgümücü ga yatügü ga yéma nangetaũgũxũ ga wüxi ga yatü ga nawãixãchicü. ⁴ Natürü yema na namuxũchixũ ga duũxũgü, rü taxucürüwama Ngechuchuxũtawa nangugü. Rũ yemacèx ínanapogüétü ga Ngechuchu íyexmaxũwa ga guma ípata. Rũ yéma norü caruũgu ínanachũxüetaũgü ga guma nawãixãchicü. ⁵ Rũ yexguma Ngechuchu nüxũ dèuxgu ga ñuxãcü aixcũma na yaxögüãxũ ga yema duũxũgü, rü ñanagürü nüxũ ga guma nawãixãchicü: —Pa Chaunex, curü pecadugü rü marü cuxũ nüxũ changechaũ —ñanagürü. ⁶⁻⁷ Natürü ñuxre ga ngúxẽẽruũgü ga Moĩchéarü mugüwa nguxẽẽtaegũxũ rü yéma narütögü. Rũ naãewa ñaxũgu narũxĩnũẽ: —¿Ñuxãcü tama namuũ na ngẽmaãcü yadexaxũ? ¿Rũ tacü Tupanamaã yaxugũxũ? Erü Tupanaxĩcatama nixĩ ya duũxũgüarü pecaduxũ ngechaũcü —ñaxũgu narũxĩnũẽ. ⁸ Natürü yexgumatama ga Ngechuchu rü nüxũ nicuèxãchi ga yema nagu naxĩnũẽxũ, rü yemacèx nüxna naca rü ñanagürü nüxũ: —¿Tüxcüũ ngẽmagu perũxĩnũẽ i pemax? ⁹ —¿Tacü nixĩ i rütauchamaẽxũ na namaã nüxũ íxuxũ ya daa nawãixãchicü:

“Curü pecadugü rü marü cuxũ nüxũ changechaũ”, rü ãxna:

“¡Inachi, rü nayaxu i curü caruũ, rü íxũ!” ñaxũ? ¹⁰⁻¹¹ —Natürü ñuxma rü tá pexũ nüxũ chadauxẽẽ na Chaunatü núma choxũ muxũ na duũxũgüaxũ nüxũ changechaũxũcèx i norü pecadugü —ñanagürü. Rũ yexguma yema ñaxguwena rü guma nawãixãchicũxũ ñanagürü: —Cumaã nüxũ chixu rü ¡inachi, rü nayaxu i curü caruũ, rü cupatawa naxũ! —ñanagürü. ¹² Rũ yexgumatama inachi ga guma idaawecü. Rũ nanayaxu ga norü caruũ,

rü ínaxũxũ napëxewa ga guxũma ga yema duũxũgũ ga yéma yexmagũxũ. Rü yemacèx ga yema duũxũgũ rü nabèixãchiãëgũ, rü Tupanaxũ nicuèxũgũ, rü ñanagürügũ: —Taguma nüxũ tadau i ñacü i ñaãrũũ ixĩxũ —ñanagürügũ.

Lebícèx naca ga Ngechuchu

(Mt 9.9-13; Lc 5.27-32)

¹³ Rü yemawena rü wenaxãrũ naxtaacutüwa naxũ ga Ngechuchu. Rü yema muxũma ga duũxũgũ rü naxcèx naxĩ. Rü nüma rü nanangüexëë. ¹⁴ Rü yexguma yéma naxüpetügu ga Ngechuchu, rü yéma nüxũ nadau ga Lebí ga Arupéu nane. Rü nüma ga Lebí rü yéma narüto nawa ga yema nachica ga duũxũgũna díeru ngĩxũ ínayaxuxũwa naxcèx ga Dumacũãxãrũ ãëxgacü yerü woetama yema nixĩ ga norü puracü. Rü Ngechuchu rü ñanagürü nüxũ: —¡Chowe rüxũ! —ñanagürü. Rü inachi ga Lebí, rü nawe narüxũ. ¹⁵ Rü yéma Lebípatawa nachibü ga Ngechuchu. Rü yéma nachibüe ga muxũma ga duũxũgũ ga Lebírũũ Dumaãrũ ãëxgacücèx díeru ngĩxũ yauxgũxũ. Rü nayexmagü ta ga togü ga duũxũgũ ga taxúema nacü mamaã taãëgũxũ ga yéma mechawa rütogũxũ namaã ga Ngechuchu rü norü ngüexũgũ. Yerü namu ga yema nawe rüxĩxũ. ¹⁶ Rü yéma nayexmagü ta ga ñuxre ga Parichéugü rü ngüexëëruũgũ ga Moíchéarü mugüwa ngüxëëtaegũxũ. Rü yexguma nüxũ nadaugügu ga yema togümaã na nachibüxũ ga Ngechuchu, rü norü ngüexũgũna nacagü, rü ñanagürügũ: —¿Ñuxãcü i perü ngüexëëruũ rü namaã nachibü i ãëxgacüarü duũxũgũ i díëruarü yauxwa puracüexũ rü duũxũgũ i pecaduãxgũxũ? —ñanagürügũ. ¹⁷ Rü yexguma yemaxũ naxĩnügü ga Ngechuchu rü ñanagürü nüxũ: —Ngëma poraexũ rü tama nanaxwëxe ya duturu, natürü ngëma idaaweexũ waxi nixĩ i naxwëxexũ ya duturu. Choma rü tama mexũgũna na chaxuxücèx nixĩ ga núma chaxũxũ, natürü núma chaxũ na nüxna chaxuxücèx i pecaduãxgũxũ —ñanagürü.

Ngechuchuna aurechigacèx nacagüe

(Mt 9.14-17; Lc 5.33-39)

¹⁸ Rü wüxi ga ngunexũgu rü tama nachibüe yerü Tupanacèx naxauree ga Cuáũ ga baiũxëëruũãrũ ngüexũgũ rü Parichéugüarü ngüexũgũ. Rü yemaxũ nadaugügu ga ñuxre ga duũxũgũ, rü Ngechuchuxũtawa naxĩ rü nüxna nayacagüe, rü ñanagürügũ: —Ngëma Cuáũãrũ ngüexũgũ rü Parichéugüarü ngüexũgũ rü naxauree. ¿Rü tüxcüü i curü ngüexũgũ i tama naxaureexũ? —ñanagürügũ. ¹⁹ Rü Ngechuchu nanangãxũ rü ñanagürü nüxũ: —¿Éxna wüxi i ngĩgüarü petawa rü pexcèx namexũ na naxaureexũ i ngëma nüxna naxugũxũ ega natanüwa nangëxmagu i ngëma yatü i ngexwacèx ãmaxũ? Pemaã nüxũ chixu rü ngëxguma natanüwa nangëxmayane i ngëma yatü i ngexwacèx ãmaxũ rü taxucürüwama naxauree i ngëma nüxna naxugũxũ. ²⁰ —Natürü wüxi i ngunexũ rü ngëma yatü i ngexwacèx ãmaxũ rü tá namücügũna nixũgachi. Rü ngëma ngunexũgu tá nixĩ i naxaureexũ. [Rü chorü ngüexũgũ rü taxucürüwama naxauree i ñuxma erü natanüwa changëxma. Natürü ínangu tá i ngëma ngunexũ na nüxna chixũgachixũ, rü ngëxguma tá nixĩ i naxaureexũ.] ²¹ —Rü taxúema wüxi i naxchirutüchi i ngexwacaxũxũmaã tanapaita i wüxi i naxchiru i ngauxũ. Erü ngëxguma nañaãchimügu i ngëma natüchi i ngexwacaxũxũ, rü tá nanagáuxëë i ngëma ngauxũ i naxchiru. Rü noxriarü yexera tá narügáu. ²² —Rü ngëxgumarũ ta taxúema ngexwacaxücü ya binu rü wüxi i marü ngauxũ i naxchiũ i naxchëxmünaxcèxgu tayabacuchi. Erü ngëxguma ngëmaãcü naxũxgu rü yima binu ya ngexwacaxücü rü narüngu, rü tá nayawãixëë i ngëma naxchiũ i ngauxũ i naxchëxmünaxcèx. Rü ngëxma tá inayarüxo ya binu rü naxchiũ rü ta. Rü ngëmacèx tanaxwëxe ya ngexwacaxücü ya binu rü ngexwacaxũxũ i naxchiũgu tayabacuchi. [Rü chorü ngüxëëtae i ngexwacaxũxũ rü ngëxgumarũ ta nixĩ na taxucürüwama namaã nawüxiguxũ i ngëma nuxcümaũxũ i pecümagü —ñanagürü ga Ngechuchu.]

Ngechuchuarü ngüexũgũ rü trigu nibuxetanü ga ngüxchigaarü ngunexũgu

(Mt 12.1-8; Lc 6.1-5)

²³ Wüxi ga ngüxchigaarü ngunexügu ga Ngechuchu rü norü ngüexüğümaã trigunecüwa nachopetü. Rü nümagü ga norü ngüexüğü rü inaxĩãcüma inanaxüğüe ga trigu na yabuxetanüxü. ²⁴ Rü yema Parichéugü rü Ngechuchuna nacagü rü ñanagürüğü: —Dücèx ¿rü tüxcüü i curü ngüexüğü rü nanaxüğü i ngëma tama mexü i ngüxchigaarü ngunexügu na naxüxü? —ñanagürüğü. ²⁵ Natürü nüma ga Ngechuchu rü ñanagürü nüxü: —¿Taguma êxna poperawa nüxü pedau ga tacü na naxüxü ga nuxcümaücü ga ãëxgacü ga Dabí rü natanüxüğü ga yexguma ôna nüxü tauxgu rü nataiyaegu? ²⁶ Rü yexguma paigüarü ãëxgacü yixĩgu ga Abiatáru, rü Dabí rü Tupanapatagu naxücu. Rü nanangõx ga yema pãu ga üünexü ga paigücèxicatama ixĩxü. Rü nüma ga Dabí rü natanüxümaã rü ta nangau ga yema pãu —ñanagürü. ²⁷ Rü ñanagürü ta ga Ngechuchu: —Ngëma ngüxchigaarü ngunexü rü duüxügücèx nixĩ ga naxüxü. Rü tama ngüxchigaarü ngunexücèx nixĩ ga naxüxü ga duüxüğü. ²⁸—Rü ngëmacèx ya Tupana Nane ya duüxüxü ixĩcü rü namaã inacuèx ta i ngüxchigaarü ngunexü —ñanagürü.

3

Wüxi ga yatü ga yumécüchiga (Mt 12.9-14; Lc 6.6-11)

¹ Rü wenaxärü ngutaquëxepataügu naxücu ga Ngechuchu. Rü yéma nayexma ga wüxi ga yatü ga norü wüxichacüüwa yumécü. ² Rü yema Parichéugü, rü Ngechuchuxü nangugüğü ngoxi tá namexëëã ga ngüxchigaarü ngunexügu, na yemaãcü nüxü nayexmaxücèx ga tacücèx na ínaxuaxüğüãxü. ³ Rü yexguma ga Ngechuchu rü ñanagürü nüxü ga guma yumécü: —¿Írüda, rü nuxã ngãxütanügu yachi! —ñanagürü. ⁴ Rü yexguma ga Ngechuchu rü yema togü ga yéma yexmagüxüna naca, rü ñanagürü nüxü: —¿Tacü nixĩ i mexü na naxüxü i ngüxchigaarü ngunexügu? ¿Namexü na naxüxü i mexü rü êxna chixexü? ¿Rü namexü na namaxëëxü rü êxna yamáxü? —ñanagürü. Natürü ga nümagü rü yexma nayarüngeëxgümare. ⁵ Rü nüma ga Ngechuchu rü nuchametüãcüma nüxü nidaugüãchi ga yema nüxü íchomaëguãchixü. Rü nangechaü yerü tama inaxĩnüëchaü ga yema duüxüğü. Rü guma yatüxü ñanagürü: —¿Iyanawëxãchixëë ya cuxmëx! —ñanagürü. Rü yexguma ga guma yatü rü nügü inayarüwëxãchimëxëë. Rü yexgumatama rü narümexmëx. ⁶ Natürü yexguma yemaxü nadaugügu ga Parichéugü, rü ínachoxü ga yéma. Rü Erodetanüxümaã inanaxüğüe ga na naxcèx nadaugüxü ga ñuxãcü tá na Ngechuchuxü yamëxgüxü.

Naxtaacutüwa Ngechuchucèx nangutaquëxegü ga muxüma ga duüxüğü

⁷ Rü Ngechuchu rü norü ngüexüğümaã naxtaacutüwa naxü. Rü muxüma ga duüxüğü ga Gariréaanecüãx rü nawe narüxĩ. ⁸ Rü yexguma nüxü nacuáchigagügu ga guxüma ga yema mexüğü ga naxüxü ga Ngechuchu, rü naxcèx naxĩtaquëxe ga muxüma ga duüxüğü ga Yudéaanecüãx, rü Yerucharéücüãx, rü Iduméãanecüãx, rü Yudáüãrü tocutücüãx rü yema naãne ga Tiru rü Chidãüãrü ñãnegü nawa yexmaxücüãx. ⁹ Rü yemacèx ga Ngechuchu rü norü ngüexüğüxü namu na wüxi ya ngue naxcèx namexëëgüxücèx na tama yéma yaxüxtüğüãxücèx ga yema muxüma ga duüxüğü. ¹⁰ Yerü nüma rü nanameëxëë ga muxüma, rü yemacèx guxüma ga yema idaaweexü rü naxcèx naxĩ na nüxü yangögüğüxücèx. ¹¹ Rü yexguma yema ngoxoãxgüxü ga duüxüğü nüxü daugügu, rü napëxegu nacaxãpüxüğü rü tagaãcü ñanagürüğü: —Cuma nixĩ ya Tupana Nane quĩxü —ñanagürüğü. ¹² Natürü nüma ga Ngechuchu rü poraãcü nayaxucüxëgü na tama duüxüğümaã nüxü yaxugüexücèx ga nachiga.

Ngechuchu nanade ga 12 ga norü ngüexüğü na toxnamana namugüãxücèx (Mt 10.1-4; Lc 6.12-16)

¹³ Rü yemawena ga Ngechuchu rü wüxi ga mëxpúnewa ínaxüãchi. Rü yéma naxcèx naca ga yema ngüexüğü ga nüma nanaxwëxexü. Rü naxütagu naxĩtaquëxegü. ¹⁴ Rü

yematanüwa nayadexechi ga 12 ga norü ngúexügü na namücügüxüchi yíixüçèx, rü na yamugüãxüçèx ga norü orearü unagüwa. Rü yemagü rü Imugüxügu nanaxüéga. ¹⁵ Rü pora nüxna naxã na Tupanaãrü poramaã ínawoxüãxüçèx ga ngoxogü. ¹⁶ Rü ñaãgü nixĩ ga naega ga yema 12 ga norü ngúexügü ga nadexü. Rü wüxi nixĩ ga Chimáü ga Pedrugu naxüégaxü. ¹⁷ Rü togü nixĩ ga Chaütiágu rü naëneë ga Cuáü. Rü nümagü rü Zebedéu nanegü nixĩ. Rü Ngechuchu rü Boanéregu nanaxüéga. Rü ngëma nixĩ i Duruanexü Nanegü —ñaxüchiga. ¹⁸ Rü togü nixĩ ga Aüdré, rü Piripi, rü Baturumé, rü Mateu, rü Tumachi, rü Chaütiágu ga Arupéu nane, rü Tadéu, rü Chimáü ga iporaãécüücü. ¹⁹ Rü to nixĩ ga Yuda ga Icariüte ga yíxcama bexma Ngechuchuxü íxuaxüxü.

Ngechuchuxü nixugüe na ngoxoarü poramaã napuracüxü
(Mt 12.22-32; Lc 11.14-23, 12.10)

²⁰ Rü yemawena rü wüxi ga ípatagu naxücu ga Ngechuchu. Rü wenaxãrü naxcèx nangutaquëxegü ga muxüma ga duüxügü. Rü yemacèx woo na nachibüexüçèx rü nangechicagü ga nüma rü norü ngúexügü. ²¹ Rü yexguma yemaxü taxínüëgu ga guxema natanüxügü ga Ngechuchu, rü ítayadaugü na tayagagüxüçèx, yerü nüxü tixugügü rü: —Naxüããëmære —ñatagürügü. ²² Rü yexgumarüü ta ga yema ngúexëëruügü ga Moïchéarü mugüwa nguxëëtaegüxü ga Yerucharéüwa ne íxü, rü ñanagürügü: —Ñaã yatü i Ngechuchu, rü ngoxogünatü i Bechebúarü poramaã nixĩ i ínawoxüãxü i ngoxogü —ñanagürügü. ²³ Natürü ga Ngechuchu rü naxcèx naca ga yema ngúexëëruügü. Rü wüxi ga ore ga cuëxruüxü namaã nixu, rü ñanagürü: —¿Rü ñuxácü i Chataná i nügütama ínatèxüchixü? ²⁴ —Rü ngëxguma chi wüxi i nachiüñanecüãx i duüxügü rü nügütanüxüwatama nügü nadaixgu, rü taxuacüma natai i ngëma nachiüñane. ²⁵ —Rü ngëxguma chi wüxi ya ípatacüãx nügü itoyegu, rü taxuacüma natai ya yima ípata. ²⁶ —Rü ngëxgumarüü chi ta nixĩ i Chataná ega nügümaã nanuxgu rü nügü yamëxgu, rü taxuacü chima natai i ngëxguma. Rü chi ngëxma nagux. ²⁷ —Rü taxuacüma texé wüxi ya yatü ya poracüpatagu taxücu na nüxna tanapuxüxüçèx i norü ngëmaxügü, ega tama tayanëixiragu. Erü ngëmaãcücica tá nixĩ i tüxü nanguxüxü na tanapuxüxü i norü ngëmaxügü. ²⁸ —Rü aixcüma pemaã nüxü chixu rü Tupana tá nüxü nüxü nangechaü i duüxügü i guxüma i norü pecadugü rü guxüma i tacü i chixexü i namaã yadexagüxü. ²⁹ —Natürü texé ya chixexü namaã ixugüxe i Tupanaãe i Üünexü, rü tagutáma tüxü nüxü nangechaü ya Tupana. Rü guxügutáma chixexüwa tüxü natèx —ñanagürü. ³⁰ Rü yema ñanagürü ga Ngechuchu, yerü yema ngúexëëruügü ga Moïchéarü mugüwa nguxëëtaegüxü rü: “Nangoxoãx” ñanagürügü nüxü.

Ngechucharü mamá rü naëneëgüchiga
(Mt 12.46-50; Lc 8.19-21)

³¹ Rü yexgumayane rü ítangügü ga Ngechucharü mamá rü naëneëgü. Natürü ípataarü düxétügu tarücho, rü naxcèx yéma tangemagü. ³² Rü yema duüxügü ga Ngechuchuxü íchomaëguãchixü, rü ñanagürügü nüxü: —Curü mamá rü cueneëgü rü cueyèxgü, rü yéa düxétüwa tangëxmagü, rü cuxcèx tadaugü —ñanagürügü. ³³ Rü nüma nanangãxü, rü ñanagürü: —¿Texé tixĩ ya chaue rü chaueneëgü? —ñanagürü. ³⁴ Rü yema nüxü íchomaëguãchixüxü nidaugüãchi, rü ñanagürü: —Rü daxegü tixĩ ya chaue rü chaueneëgü. ³⁵ —Erü guxáma ya texé ya naxüxe i Tupanaãrü ngúchaü, rü yíxcama tixĩ ya chaueneë rü chaueyèx rü chaue —ñanagürü.

4

Ore ga toecügu ixuxü
(Mt 13.1-9; Lc 8.4-8)

¹ Rü wenaxãrü inanaxügü ga Ngechuchu ga na nangúexëëãxü ga duüxügü ga guma naxtaxaãnacüwa. Rü muxüma ga duüxügü yexma naxcèx nangutaquëxegü. Rü yemacèx

düxwa wüxi ga ngue ga yéma naxtaawa yexmanegu nixüe ga Ngechuchu, rü gumawa narüto. Rü yema duüxügü rü naxtaxaānacügu narücho. ²⁻³ Rü yexguma ga Ngechuchu rü inanaxügü ga muxüma ga ore ga cuèxruüwa na nangúexēēāxü ga duüxügü. Rü norü nguxēētaewa rü ñanagürü: —¡Dücèx, iperüxīnüē i ñaā ore! Wüxi ga yatü ga toecü rü triguarü towa naxü. ⁴—Rü yexguma triguchiremaā nagüaneāgu, rü ñuxre ga triguchire rü namagu nayi. Rü ínangugü ga werigü, rü nanawecu. ⁵ —Rü náigü ga triguchire rü nutatanügu nayi ga ngextá ínachicaxüwa ga waixümü. Rü paxa narüxügü ga guma triguchire, yerü ga waixümü rü tama nayaxcü. ⁶ —Natürü yexguma nangunagügu ga üèxcü, rü ínanagu ga guma trigu rü narüñexgü. Rü nayue, yerü tama poraācü nixāmaxā. ⁷ —Rü náigü ga triguchire rü toranecügu nayi. Rü yexguma nayaegu ga tora, rü guma triguxü inawocu, rü yemacèx tama nixo. ⁸ —Natürü náigü ga triguchire rü mexü ga waixümügu nayi. Rü meāma nayae, rü muxüma ga trigu nawa ínanguxuchi. Rü nümaxüneyèxawa rü 30 püxü ínanguxuchi ga norü o, rü náigüwa rü 60, rü náigüwa rü 100 ínanguxuchi —ñanagürü. ⁹ Rü ñuxüchi ñanagürü ta: —Rü yíxema āchixègüxe, ¡rü nüxü taxīnüē i ñaā ore! —ñanagürü.

Tacüchiga nixi ga yema ore ga cuèxruügu ixuxü
(Mt 13.10-17; Lc 8.9-10)

¹⁰ Rü yemawena ga yexguma nanüxícèxgu ga Ngechuchu, rü yema naxütagugüxü wüxigu namaā ga yema 12 ga norü ngüexügü, rü nüxna nacagüe ga na tacüchiga yīxü ga yema ore ga cuèxruügu ixuxü. ¹¹⁻¹² Rü nüma nanangāxü rü ñanagürü nüxü: —Tupana rü pexü nüxü nacuèxēē i ngēma èxüguxü i taxuüma i togü nüxü cuáxü na ñuxācü āèxgacü na yīxü i nümax. Natürü ngēma togü i tama tatanüxü ixixüçèx rü cuèxruügu chayaxuācüma namaā nüxü chixu i ore na woo nüxü nadaunügu rü ñoma tama nüxü nadaugüxürü na yīxüçèx, rü woo nüxü naxīnüēgu rü tama nüxü na nacuèxgüxüçèx. Rü ngēmaācü namaā nüxü chixu na tama nüxü naxoexüçèx i nacüma i chixexü rü tama Tupana nüxü nüxü ngechaüxüçèx i norü pecadugü —ñanagürü.

Ngechuchu rü meā nanangoxēē ga yema ore ga cuèxruü ga toecüchigagu ixuxü
(Mt 13.18-23; Lc 8.11-15)

¹³ Rü Ngechuchu ñanagürü nüxü: —¿Pema rü ta èxna tama nüxü pecuèxgü na tacüchiga yīxü i ngēma ore i cuèxruü i nüxü chixuxü? ¿Rü ñuxücürüwa tá nüxü nacuèxgü i ngēma togü? ¹⁴ —Rü yíxema toexe, rü yíxema tixi ya ore i mexü unagüxe. ¹⁵ —Rü nangēxma i duüxügü i guma triguchire ga namagu yixünerü ixigüxü. Rü nümagü rü nüxü naxīnüē i ore i mexü, natürü yixcama marü nüxü naxīnüēguwena, ngēma nangu i Chataná rü nüxna nanapu i ngēma ore i mexü ga noxri yaxōgüxü. ¹⁶ —Rü togü rü ngēma triguchire ga nutatanügu yixünerü nixigü. Rü ngēmagü nixi i nüxü ínüèxü i ore i mexü, rü taāèācüma nayauxgüxü. ¹⁷ —Natürü ngēma na tama aixcüma nagu naxīnüèxü i ngēma ore, rü paxaāchitama nayaxōgü. Rü ngēmacèx i yixcama ngēxguma ngēma oregagu guxchaxügü nüxü üpetügu rü èxna duüxügü naxchi aiegu, rü nüxü narüxoe i ngēma ore ga noxri yaxōgüxü. ¹⁸⁻¹⁹ —Rü togü rü guma triguchire ga toranecügu yixünerü nixigü. Nümagü rü nüxü naxīnüē i ngēma ore i mexü, natürü ñoma i naāneärü ngēmaxügüçèx naxoegaāgü rü norü díeruguama narüxīnüē, rü nanaxwèxegü i nüxü na nangēxmaxü i muxüma i to i norü ngēmaxügü. Rü guxüma i ngēma rü nüxü nüxü inayarüngümaèxēē i ngēma ore i mexü rü nüxü nüxü narüxoexēē na tama naxügüāxüçèx i ngēma mexü i Tupana nüxü naxwèxexü. ²⁰ —Rü togü rü guma triguchire ga mexü ga waixümügu yixünerü nixigü. Ngēmagü nixi i nüxü ínüèxü i ore i mexü rü nayauxgüxü rü meā Tupana naxwèxexüācüma maxèxü. Rü nümaxü rü guma trigu ga 30 püxü nawa ínguxuchinerü nixigü. Rü nümaxü rü guma 60 püxü nawa ínguxuchinerü nixigü. Rü nümaxü rü guma 100 püxü nawa ínguxuchinerü nixigü —ñanagürü.

Ore ga omügu ixuxü
(Lc 8.16-18)

²¹ Rü yexgumarüü ta ñanagürü nüxü: —¿Éxna nuã tanange i wüxi i omü na wüxi i caichãütüügu rü éxna wüxi i pechicatüügu na yaxücuchixüçèx? Tama ngëmaãcü nixi, erü wüxi i omü rü dauxnagu tanaxünagü na ngema inabaxixüçèx. ²² —Rü ngëxgumarüü ta i guxüma i tacü iicúxü, rü yixcüra rü duüxügü rü tá nüxü nacuèxgüama. Rü guxüma i ngëma ñuxma duüxügüçèx èxüguxü rü tá nangoxoma i yixcüra. ²³ —Rü yixema ächixëgüxe, jrü nüxü taxinüë i ngëma ore! —ñanagürü. ²⁴ Rü yexgumarüü ta ñanagürü nüxü: —¡Meã naga pexinüë i ngëma nüxü pexinüëxü! Rü ngëma pema naga na pexinüëxürü tá nixi i Tupana i pexna naxããxü i cuèx. Rü naetü tá poraãcü pexü narüngüxëë. ²⁵ —Rü pemaã nüxü chixu, rü texé ya aixcüma naga ñnuxë i ñaã ore i mexü rü Tupana rü yexeraãcü tá tüxü nüxü nacuèxëë. Natürü yixema tama naga ñnuxë i ñaã ore rü Tupana tá tüxna nanayaxu i ngëma íraxü i cuèx i tüxü ngëxmachiréxü —ñanagürü.

Ore ga triguchire ga rüxüügu ixuxü

²⁶ Rü Ngechuchu rü ñanagürü ta: —Pemaã tá nüxü chixu i wüxi i ore i cuèxruü na nüxü pecuáxüçèx na ñuxãcü äëxgacü na yiixü ya Tupana. Rü wüxi ya yatü rü waixümügu nanato ya triguchire. ²⁷ —Rü nüma ya yatü rü chütacü nape rü moxüãcü ínarüda, rü yoxni ya yima triguchire rü narüxü rü niyachigü. Natürü nüma ya yatü rü tama nüxü nacuèx na ñuxãcü na naxüxü rü na nayaxü. ²⁸ —Rü ngëmaãcü i ngëma waixümü rü nüëchamatama nanaxüxëë ya yima triguchire. Rü naätügüxira narüxü rü yixcama i nachacu rü ngëmawena nachacuwa nanguxü i norü o. ²⁹ —Rü ngëxguma marü yadauxgu i ngëma norü o, rü nanabuxu erü marü nawa nangu i norü buxgü —ñanagürü.

Ore ga motachachiregu ixuxü
(Mt 13.31-32; Lc 13.18-19)

³⁰ Rü ñanagürü ta ga Ngechuchu: —Rü Tupanaarü ore rü yexera nixüchigü ¿Rü nanatacüraxü rü tacügu tanangu? ³¹⁻³² —Rü ñoma wüxi ya motachachire ya waixümügu itoxünerüü nixi. Rü woo guxünema ya nanetüchirexü narüxíramaë, natürü ngëxguma inatoxgu, rü narüxü rü naya ñuxmata guxüma i togü i nanetüxü nayexera. Rü nachacüü rü nita, rü woo werigü rü natanügu nixüachiãü —ñanagürü.

Cuèxruügu ixuxü ga oremaã nidexa ga Ngechuchu
(Mt 13.34-35)

³³ Rü yemaãcü ga Ngechuchu rü muxüma ga nayexgumaãchiraüxü ga ore ga cuèxruügümaã nanangüxëë ga duüxügü. Natürü yema cuèxruügü rü tama yema duüxügüarü cuèxü nangupetü. ³⁴ Rü ore ga cuèxruügu ixuxüxícatama nixi ga norü nguxëëtae. Rü yixcama ga yexguma nanüxíçèxgügu, rü norü ngüexügüçèx meãma nanangoxëë ga guxüma.

Ngechuchu rü buanecüxü rü yuapexü ínayachaxãchixëë
(Mt 8.23-27; Lc 8.22-25)

³⁵ Rü yematama ngunexügu ga marü nachütachaügu, rü Ngechuchu rü ñanagürü nüxü ga norü ngüexügü: —¡Ngíã rü naxtaxaarü tocutüwa taxí! —ñanagürü. ³⁶ Rü yexguma duüxügüna yéma inaxíãchi. Rü norü ngüexügü rü Ngechuchuxü nigagü nagu ga guma ngue ga marü nawa nayexmane. Rü yexgumarüü ta ga togü ga duüxügü rü náigü ga nguegügu ínayaxümücügü. ³⁷ Rü yexguma yaxãüyane rü inaxü ga wüxi ga buanecü ga taxüchicü. Rü yema na nataxüchixü ga buanecü, rü guma nguegu niyauxcuchichigü ga yuape, rü yexma nabaxügüchaü. ³⁸ Natürü ga Ngechuchu rü guma nguechinüwa wüxi ga cüxeruügu naca, rü yéma nape. Rü ínabaixgügu, rü ñanagürügü nüxü: —Pa Ngüexëëruüx, ¿éxna curü me nixi na nuxma ibaxügüxü? —ñanagürügü. ³⁹ Rü yexguma ínarüda ga Ngechuchu. Rü buanecüna nachogü rü ñanagürü nüxü ga guma naxtaxa:

—¡Iyarüchiane rü íyachaxãchi! —ñanagürü. RÜ ínayachaxãchi ga buanecü rü guxüwama ínachaxanemare. ⁴⁰ RÜ yemawena ga Ngechuchu rü norü ngúexügüxü ñanagürü: —¿Tüxcüü ngémaãcü poraãcü pemuüë? ¿Ñuxma rü ta êxna tama aixcüma peyaxögü? —ñanagürü. ⁴¹ Natürü nümagü ga norü ngúexügü rü poraãcü namuüë. RÜ nügüna nacagüe rü ñanagürügü: —¿Texe êxna nixí ya daa rü èixrücü ya buanecü rü yuape rü naga naxínüëxü? —ñanagürügü.

5

Yatü ga Gadáracüãx ga ngoxogü nawa yexmagüxü (Mt 8.28-34; Lc 8.26-39)

¹ RÜ naxtaxaarü tocutüwa nangugü ga Gadáranewa. ²⁻³ RÜ yexguma marü nguewa ínaxüegu ga Ngechuchu, rü yéma naxcèx nixü ga wüxi ga yatü ga ngoxo nawa yexmaxü. RÜ yema yatü rü duüxëgüchiquëxewa ne naxü, yerü yexma nixí ga yanaxauchigünexüxü. RÜ taxúexüma nanguxü na tayanáixü, woo cadenamaã. ⁴ RÜ woo muëxpüxcüna cadenamaã nayanëixparagü rü nayanëixchacüügü, natürü nüma rü guxügüma íraxügu inanacauügüama, rü yemaãcü taxúexüma nanguxü. ⁵ RÜ ngunecü rü chütacü rü yuetachiquëxetanügu rü naxpüxgügu nanaxauchigüane. RÜ yexma nanacaeane, rü nutamaã nügügu napogü. ⁶ Natürü yexguma yaxügutama Ngechuchuxü nadèuxgu, rü naxcèx inañaãchi, rü napëxegu nayacaxápüxü. ⁷ RÜ aita naxüãcüma ñanagürü nüxü: —¿Tüxcüü nuã choxü cuyachixewe, Pa Ngechuchux, Pa Tupanaxüchi Nanex? RÜ Tupanaegagu cuxü chacèexü na tama ngúxü choxü quingexëëxü —ñanagürü. ⁸ RÜ yemaãcü nidexa ga yema ngoxo yerü Ngechuchu rü marü ñanagürü nüxü: —Pa ngoxox, ¡ínaxüxü nawa ya yima yatü! —ñanagürü. ⁹ RÜ yexguma ga Ngechuchu rü nüxna naca, rü ñanagürü: —¿Tacü nixí i cuéga? —ñanagürü. RÜ nüma ga ngoxo nanangãxü, rü ñanagürü: —Muxüchixü nixí i chauéga, erü tamu i tomax —ñanagürü. ¹⁰ RÜ poraãcü Ngechuchuxü nacèexügü na tama ínawoxüãxüçèx ga yema naãnewa. ¹¹ RÜ yema nachicaarü ngaicamana ga naxpüxpechinüwa rü nayexmagü ga muxüma ga cuchigü ga yéma chibüexü. ¹² RÜ yemacèx ga yema ngoxogü rü Ngechuchuxü nacèexügü, rü ñanagürügü: —¡Ngema cuchitanüwa toxü namugü na nagu tachocuxüçèx! —ñanagürügü. ¹³ RÜ Ngechuchu rü: —Ngü —ñanagürü. RÜ yexguma ga yema ngoxogü rü guma yatüwa ínachoxü, rü yema cuchigügu nayachocu. RÜ yema cuchigü ga wixgu 2000 íxügüxü rü ínaxüãchi, rü naxtaacutüarü mëxpüxüwa nayarüyuxgü. RÜ yexma nayi. ¹⁴ RÜ yema cuchigüarü dauruügü rü ñanewa nabuxmü. RÜ ñanewa rü yema ñanearü ngaicamana ipeagüxü ga duüxügütanüwa nüxü nayarüxugügü ga yema üpetüxü. RÜ ga duüxügü rü ínayadaugü. ¹⁵ RÜ yexguma Ngechuchu íyexmaxüwa nangugügu, rü yéma nüxü nadaugü ga guma yatü ga ngoxoãxchirécü. RÜ yéma narüto, rü naxãxchiru, rü meãma naãëxü nacüex. RÜ poraãcü nabaixãchiãëgü ga duüxügü. ¹⁶ RÜ yema cuchigüarü dauruügü ga nüxü daugüxü ga tacü na nüxü ngupetüxü ga guma yatü ga ngoxoãxchirécü rü tacü nüxü na ngupetüxü ga yema cuchigü, rü yema nixí ga togü ga duüxügümaã nüxü ixugüexü ga guxüma ga yema ngupetüxü. ¹⁷ RÜ yexguma yemaxü naxínüëgu ga duüxügü, rü ínanaxügü ga Ngechuchuxü na nacèexügüxü ga na ínaxüxüçèx ga yema naãnewa. ¹⁸ RÜ yexguma wenaxârü nguegu yaxüegu ga Ngechuchu, rü guma yatü ga ngoxoãxchirécü, rü nüxü nacèexü na Ngechuchuwe naxüxüçèx. ¹⁹ Natürü ga Ngechuchu rü tama nanaxwèxe, rü ñanagürü nüxü: —¡Cuchiüwa naxü rü cutanüxümaã nüxü yarüxu i guxüma i ngéma cuxcèx naxüxü ya Cori ya Tupana, rü ñuxãcü nüxü na cungechaütümüüxü! —ñanagürü. ²⁰ RÜ nüma ga guma yatü rü ínixü. RÜ ínanaxügü ga guxüma ga Decaporíchiuanewa yexmagüne ga ñanegüwa nüxü na yaxuxü ga yema Ngechuchu naxcèx üxü. RÜ guxüma ga duüxügü rü nabaixãchiãëgü.

*Yáiruxacüchiga rü yema nge ga Ngechuchuchirugu ingögücüchiga
(Mt 9.18-26; Lc 8.40-56)*

²¹ Rü yexguma ngegu naxtaxaarü tocutüwa nataegugu ga Ngechuchu, rü muxüma ga duüxügü rü naxcèx yéma nangutaquëxegü. Rü nüma rü naxtaapechinüwa nayexma. ²² Rü yexguma yéma nayexmayane, rü yéma naxütawa nangu ga ngutaquëxepataüärü äëxgacü ga Yáirugu äegacü. Rü yexguma Ngechuchuxü nadèuxgu, rü napëxegu nanangücuchi. ²³ Rü poraäcü nüxü nacèèxü, rü ñanagürü nüxü: —Chauxacü rü ituraxüchi. Rü chanaxwèxe i ngema cuxü na ngixü cuyarüngögüxcèx na ngixcèx yataanexücèx rü namaxüxcèx —ñanagürü. ²⁴ Rü yexguma ga Ngechuchu rü nawe narüxü. Rü muxüma ga duüxügü inayaxümücügü. Rü yéma nayaxüxtügü. ²⁵ Rü yema muxü ga duüxügütanüwa iyexma ga wüxi ga nge ga 12 ga taunecü idaawecü namaã ga na naxägüechaxü. ²⁶ Rü muxüma ga duturugü ngixü naxüxügü rü poraäcü ngüxü ngixü ningexëëgü. Rü yemaäcü natüxcèxma ngixü iguxëë ga guxcü ga ngürü diëru. Natürü tama ngixcèx nitaaneega, rü niyexeraguchigüama ga ngürü daawe. ²⁷ Rü üpaacü togüèxwa Ngechuchuchigaxü ixñü. Rü yemacèx yéma ixü. Rü natanüwa ga yema muxüma ga duüxügü rü Ngechuchuweama ne ixü rü naxchirugu iyangögü. ²⁸ Yerü ñaxügu irüxñü: —Ngëxguma chi naxchiruxümare chingögügu, rü chi chauxcèx nitaane —ñaxügu irüxñü. ²⁹ Rü yexgumatama inayachaxächi ga ngigü, rü nüxü iyacuèxächi ga ngixñewa ga na ngixcèx yataanexü. ³⁰ Natürü ga Ngechuchu rü nüxü nicuèxächi ga na nawa inaxüxüxü ga pora. Rü naxcèx nadauegu ga yema muxüma ga duüxügü, rü nüxna naca, rü ñanagürü: —¿Texé tixí ya chauxchirugu ingögüxe? —ñanagürü. ³¹ Rü norü ngüexügü nanangäxügü, rü ñanagürügü: —Cuma nüxü cudau i ñuxre i duüxügü ngema cuxü na yaxütügüxü rü ngëxguma rü ta:

“¿Texé ya choxü ingögüxe?” ñacuxü —ñanagürügü. ³² Natürü ga Ngechuchu rü nüxü nidaugüächiamana na tüxü nadauxücèx ga na texé na tiixü ga guxema nüxü ingögüxe. ³³ Rü yexguma ga yema nge rü ngürü muümaã yaduruxäcuma naxütawa ingu, yerü nüxü icuèx ga tacü na ngixü ngupetüxü. Rü napëxegu iyacaxäpüxü, rü aixcümäxüchi namaã nüxü iyaxu ga guxüma. ³⁴ Rü nüma ga Ngechuchu rü ñanagürü ngixü: —Pa Chauxacüx, curüme erü cuyaxö. ¡Rü taëècuma íixü, erü marü naxüxü i curü daawe! —ñanagürü. ³⁵ Rü yexguma iyadexayane, yéma nangugü ga ñuxre ga natanüxügü ga guma ngutaquëxepataüärü äëxgacü rü ñanagürügü nüxü: —Cuxacü rü marü iyu. ¿Tüxcüü nüxü cuchixeweecha ya Ngüexëëruü? —ñanagürügü. ³⁶ Natürü ga Ngechuchu rü tama nüxü nacüaxchaü ga yema duüxügüarü dexa. Rü yemacèx guma ngutaquëxepataüärü äëxgacüxü ñanagürü: —¡Täxü i cumüxü, rü yaxömare! —ñanagürü. ³⁷ Rü yexguma ga Ngechuchu rü inayagü ga Pedru rü Chaütiágu rü Cuáü ga Chaütiágueneë. Natürü tama nanaxwèxe na texé ga togue nawe rüxixü. ³⁸ Rü yexguma guma ngutaquëxepataüärü äëxgacüpatawa nangugügu, rü Ngechuchu nüxü nadau ga na iyacuxcuxü rü poraäcü aita naxüècuma naxauxexü ga duüxügü. ³⁹ Rü guma ípatagu naxücu ga Ngechuchu, rü ñanagürü: —¿Tüxcüü ípicuxcu rü ngëmaäcü pexauxe? Ngëma bucü rü tama iyu. Rü ipemare —ñanagürü. ⁴⁰ Rü nüxü nacugüecüraxüäma ga duüxügü. Natürü nüma ga Ngechuchu rü íäxtüwa nanamugü ga guxüma. Rü yema bucünatücèx naca rü ngië, rü yema namücügü, rü namaã nixücu ga inayexmaxüwa ga yema bucü. ⁴¹ Rü ngixmëxgu nayayauxächi, rü ñanagürü ngixü: —Tarita cumi —ñanagürü. Rü ngëma ore rü ñaxüchiga nixí:

“¡Inachi, Pa Bucü, ñacharügü cuxü!” ñaxüchiga nixí. ⁴² Rü yexgumatama ga yema bucü ga 12 ga taunecü ngixü yexmëxcü, rü írüda rü iyaxü. Rü poraäcü nabaixächiaëgü ga duüxügü. ⁴³ Natürü ga Ngechuchu rü poraäcü nüxna nanachuxu na taxüemaãma nüxü yaxugüexücèx ga yema ngupetüxü. Rü ñuxüchi nanamu na ngixü naxüwemügüxcèx ga yema bucü.

6

Nacharétuwa nayexma ga Ngechuchu
(Mt 13.53-58; Lc 4.16-30)

¹ Rū yéma inaxūāchi ga Ngechuchu, rū guma iāne ga Nacharétu ga nawa nayaxūnewatama naxū. Rū norū ngúexūgū rū nawe narūxī. ² Rū yexguma ngūxchigaarū ngunexūwa nanguxgu rū inanaxūgū ga na nangúexēētaexū ga ngutaquēxepataūwa. Rū yema muxūma ga duūxūgū ga yéma irūxīnūēxū, rū nabaixāchiāēgū. Rū nūgūna nacagūe rū ñanagūrūgū: —¿Ngextá naxcèx nangux i guxūma i ngēma nguxēētae? ¿Rū ngextá nanayaxu i ngēma cuèx? ¿Rū ñuxācū nanaxū i ngēma mexūgū i taxūgū i naxūxū? ³ —¿Taux ēxna ñaā yīxū i carpinteru i Ngechuchu, i Maríane, ya Chaūtiágu rū Yúche rū Chimáū rū Yudaēneē ixīcū? ¿Rū taux ēxna i naēyèxgū rū nuxma tatanūgu naxāchiūgūxū? —ñanagūrūgū. Rū yemacèx ga yema duūxūgū rū tama naga naxīnūēchaū. ⁴ Natūrū ga Ngechuchu rū ñanagūrū nūxū: —Wūxi i Tupanaārū orearū uruū rū guxūwama i duūxūgū rū nūxū nangechaūgū. Natūrū norū iānewatama rū natanūxūgūtanūwatama rū napatawatama rū tama aixcūma nūxū nangechaūgū —ñanagūrū. ⁵ Rū yemacèx taxuacūma yéma nanaxū ga muxūma ga mexūgū ga Tupanaārū poramaā naxūxū. Rū noxretama ga duūxūgū ga idaaweexūxūīcatama ningōgū rū naxcèx nayataanexēēgū. ⁶ Rū nabaixāchiāē ga Ngechuchu, yerū yema duūxūgū rū tama nūxū nayaxōgū.

Ngechuchu rū norū ngúexūgūxū nimugū na nūxū yanaxugūexūcèx ga Tupanachiga
(Mt 10.5-15)

Rū Ngechuchu rū guma ngaicamagūne ga iānexācūgūgu nixūgūchigū, rū nayangúexēētanū ga duūxūgū. ⁷ Rū naxcèx naca ga yema 12 ga norū ngúexūgū, rū inanaxūgū ga na namuāxū ga taxrechigū. Rū nūxna nanaxā ga pora na ínawoxūāxūcèx ga ngoxogū. ⁸ Rū nūxna naxāga ga na taxuxūma íyangegūxūcèx ga norū namawaxū, rū bai ga choca rū bai ga pāu rū bai ga norū dīēru. Rū nanaxwèxe ga naxnetūxūīcatama na íyangegūxū. ⁹ Rū namaā nūxū nixu na nacuaixcuxū ga norū chapatu. Natūrū tama nanaxwèxe ga taxre ga naxchiru na íyangegūxū. ¹⁰ Rū ñanagūrū nūxū: —Rū ngēxguma wūxi ya iānewa wūxi ya īgu pechocuxgu, jrū ngēxma pepegū ñuxmata pema ñuxgu ngema ipexīāchix nawa ya yima iāne! ¹¹ —Rū ngēxguma ngexnerūúne ya iānewa tama meā pexū nayauxgūchaūgu rū tama pexū inaxīnūēchaūgu, jrū ípechoxū i ngema! Rū ngēxguma ipexīāchigu, jrū ipenapagū i perū ūxaxūcutū na ngēmawa nūxū nacuèxgūxūcèx na nataxūchixū tá i norū poxcu i ngēxguma naguxgu i naāne! —ñanagūrū. ¹² Rū yexguma inaxīāchi ga norū ngúexūgū. Rū duūxūgūmaā nūxū nixugūe ga na nūxū naxoexūcèx ga nacūma ga chixexū rū Tupanacèx na nadaugūxūcèx. ¹³ Rū ínawoxū ta ga muxūma ga ngoxogū. Rū chixūmaā yachagūācūma nanameēxēē ga muxūma ga idaaweexū.

Nayu ga Cuáū ga baiūxēēruū
(Mt 14.1-12; Lc 9.7-9)

¹⁴ Rū Ngechuchuchigaxū naxīnū ga āēxgacū ga Erode, yerū guxūwama duūxūgū poraācū nachiga nidexagū. Rū yexguma ga Erode rū ñanagūrū: —Rū ngēma Ngechuchu nixī i Cuáū i baiūxēēruū ixīxū rū wena namaxū, rū ngēmacèx nixī i nūxū nangēxmaxū i pora na naxūāxūcèx i ngēma taxū i mexū i Tupanaārū poramaā naxūxū. ¹⁵ Natūrū ga togū rū ñanagūrūgū: —Nuxcūmaūcū ga orearū uruū ga Ería nixī —ñanagūrūgū. Rū togū rū ñanagūrūgū: —Wūxi i Tupanaārū orearū uruū i nuxcūmaūgūxūrūū nixī —ñanagūrūgū. ¹⁶ Natūrū yexguma yemaxū naxīnūgu ga Erode, rū ñanagūrū: —Rū ngēma Ngechuchu nixī i Cuáū ga chorū churaragūxū chidayenaxāxēēchiréxū, rū ñuxma rū wenaxārū namaxū —ñanagūrū. ¹⁷ Rū yema ñanagūrū ga Erode yerū marūchirēx Cuáūxū niyaxu rū poxcupataūgu cadenamaā nayachota. Rū yemaācū nanaxū ngīgagu ga naxmèx ga Erodía ga naēneē ga Piripimèxchirēx ixīcū ga ngīxū napucū ga Erode.

18 Yerü ũpaacü ga Cuáũ rü Erodemaã ñanagürü: —Tama name i cuxmèxũ cuyaxĩxèẽ i cueneëmèx —ñanagürü. 19 Rü yemacèx ga Erodía rü poraãcü Cuáũchi ixai rü inaxwèxe ga na yamáãxũ, natürü poraãcü ngĩxũ naguxcha. 20 Yerü ngĩte ga Erode rü Cuáũxũ namuũ, yerü nüxũ nacuèxchirèx na wüxi ga yatü ga mecü rü üü necü na yĩxũ, rü yemacèx nixĩ ga naetüwa nachogüxũ. Rü yexguma Cuáũãrü orexü naxĩnügu ga Erode, rü naxoegaãẽ, natürü meã nüxũ inarüxĩnü. 21 Natürü wüxi ga ngunexũ nawa nangu na ngĩxũ natauxchaxũ na yamáãxüçèx ga Cuáũ, ga yexguma Erodearü taunecüarü ngunexüwa nanguxgu rü wüxi ga peta ga taxũ naxüxgu naxcèx ga norü ñatügumaègüxũ ga ãëxgacügü, rü norü churaragüarü ãëxgacügü rü yema Gariréaanecüãx ga corigü ga taxügü. 22 Rü yema petawa iyaxücu ga Erodíaxacü, rü yema petatanüxüpèxewa íyañaãchixüchigüxũ. Rü poraãcü norü me iyixĩ ga Erode rü norü petatanüxügü. Rü yemacèx ga nüma ga ãëxgacü ga Erode rü ñanagürü ngĩxũ ga yema pacü: —¡Choxna naxcèx naca i tacü i cunaxwèxexũ, rü tá cuxna chanaxã! —ñanagürü. 23 Rü aixcümáxüchi ngĩmaã inaxuneta, rü ñanagürü: —Ngèxürüxũ i tacü i choxna naxcèx cuçaxũ rü tá cuxna chanaxã, woo ngãxügu i chorü naãne yixĩgu —ñanagürü. 24 Rü nüxna iyaxügachi, rü ngĩëna iyaca, rü ngĩgürügü: —¿Tacü i cunaxwèxexũ na naxcèx íchaçaxü? —Ngĩgürügü. Rü ngĩë ngĩxũ ingãxũ, rü ngĩgürügü: —¡Naxcèx ínaca i Cuáũ ya baiüxèẽruüeru! —ngĩgürügü. 25 Rü yexgumatama ga yema pacü rü paxa iyaxücu ga ãëxgacüxütawa rü ngĩgürügü: —Chanaxwèxe i ñuxmatama paxa wüxi ya poratugu choxna cunaxã i Cuáũ ya baiüxèẽruüeru —ngĩgürügü. 26 Rü nüma ga ãëxgacü rü poraãcü inayarümaãchi, natürü yema norü petatanüxüpèxewa marü ngĩmaã na inaxunetaxüçèx, rü tama ngĩxũ nawomüxèẽchaũ. 27 Rü yemacèx ga Erode rü yexgumatama yéma ínapoxcuxüwa nanamu ga wüxi ga churara na naxütawa nangeaxüçèx ga Cuáũeru. 28 Rü poxcupataüwa naxü ga yema churara, rü Cuáũxũ nidaeru. Rü wüxi ga poratugu ãëxgacüxütawa nanange ga yema naëru. Rü yema pacüna nanaxã. Rü ngĩma rü ngĩëna iyaxã. 29 Rü yexguma yemaxü nacuáchigagügu ga norü ngúexügü ga Cuáũ, rü yéma poxcupataüwa nayayauxgü ga naxüne, rü inayatèxgü.

*Ngechuchu rü nanachibüexèẽ ga 5000 ga yatügü
(Mt 14.13-21; Lc 9.10-17; Cu 6.1-14)*

30 Rü yemawena rü yema norü ngúexügü ga yamugüxũ rü Ngechuchumaã nangutaquèxegü. Rü namaã nüxũ nixugüe ga guxüma ga yema naxügüxũ rü yema nangüxèẽtaegüxũ. 31 Rü Ngechuchu rü ñanagürü nüxũ: —¡Nuã pexĩ, rü ngĩxã, wüxi i nachica i ngextá taxúema íxãpataxüwa taxĩ, na paxaãchi ngèxma yarüngügüxüçèx! —ñanagürü. Rü yema ñanagürü yerü namu ga duüxügü ga yéma ingugütanücüüxũ rü woeguxũ ga togü. Rü yemacèx ga Ngechuchu rü norü ngúexügü rü woo na nachibüexüçèx rü nangechicagü. 32 Rü yemacèx wüxi ga nguegu nichoũ, rü noxrüwama wüxi ga nachica ga taxúema íxãpataxüwa naxĩ. 33 Natürü muxüma ga duüxügü nüxũ nadaugü ga yexguma inaxĩãchigu, rü nüxũ nacuèxgü ga texégü na yĩxũ. Rü yemacèx guxüne ga guma íãnegüçüãx ga duüxügü, rü dauxchitagu nibuxmü rü napèxegu nayayi. 34 Rü yexguma nguewa ínaxüegu ga Ngechuchu, rü nüxũ nadau ga yema muxüma ga duüxügü. Rü nüxũ nangechaütümügü yerü ñoma carnerugü ga ngearü dauruũãxgüxürü nixĩgü. Rü inanaxügü ga na nangúexèẽãxũ ga muxüma ga norü ore. 35 Rü yexguma marü nayáuanegu, rü norü ngúexügü rü naxcèx naxĩ, rü ñanagürügü: —Marü nayáuanexüchi rü ñaã rü wüxi i nachica i taxúema nagu ãpataxũ nixĩ. 36 —Rü ngèmacèx name nixĩ i ícuyamugü i duüxügü na namapechinüwa ipeagüxũ i duüxügüxütawa rü íãnexãcügü ya ngaicamagünewa naxĩxüçèx na ngema norü õnacèx yataxegüxüçèx —ñanagürügü. 37 Natürü ga Ngechuchu rü nanangãxũ, rü ñanagürü nüxũ: —¡Pematama penaxüwemü! —ñanagürü. Rü nümagü nanangãxügü rü ñanagürügü: —¿Éxna cunaxwèxe i 200 tachinü i dñeru naguxü i päüçèx nüxũ tayataxexü

na ngēmamaã tanachibüexēxücèx? —ñanagürügü. ³⁸ Rü yexguma ga Ngechuchu rü ñanagürü nüxü: —¿Ñuxre i pãu pexü nangēxma? ¡Rü ípeyadèux! —ñanagürü. Rü yexguma íyadaugüãgu, rü ñanagürügü nüxü: —Toxü nangēxma i wüximēxpüx i pãu rü taxre i choxni —ñanagürügü. ³⁹ Rü yexguma ga Ngechuchu rü duüxügüxü namu na ñuxrechigü nügüxütawa rütogüxücèx ga maxētēxewa. ⁴⁰ Rü ínarütogü ga 100 chigü rü 50 chigü ga duüxügü. ⁴¹ Rü yexguma ga Ngechuchu rü nanade ga yema wüximēxpüx ga pãu rü yema taxre ga choxni. Rü daxügüxü ga naãnegu nadawenüácüma Tupanana moxē naxã. Rü inanabücu ga yema pãu, rü norü ngúexügüna nanana na yema duüxügüxü yanuãxücèx. Rü yema taxre ga choxni rü ta guxüma ga yema duüxügüxü nüxü nayanuxēē. ⁴² Rü guxüma nachibüe ñuxmata meãma nüxü yangu. ⁴³ Rü yemawena rü 12 ga pexchigü nanapagüamatama namaã ga yema pãu rü choxni ga íyaxügüxü. ⁴⁴ Rü yema yéma pãügü ngōxgüxü rü 5000 ga yatügü nixi.

Dexáétügu nixü ga Ngechuchu
(Mt 14.22-27; Cu 6.16-21)

⁴⁵ Rü yemawena ga Ngechuchu rü duüxügüxü íyamugüyane rü wüxi ga ngeegu nayachoüxēē ga norü ngúexügü na yoxni naxtaxaarü tocutüwa Bechaídawa naxixücèx. ⁴⁶ Rü yexguma duüxügüxü íyamugüguwena, rü mēxpúnewa naxü ga Ngechuchu na yéma yayumüxēxücèx. ⁴⁷ Rü yexguma marü nachütagu, rü naxtaxaarü ngãxütüwa nayexmagü ga norü ngúexügü. Rü Ngechuchu rü nüxícatama dauxchitawa nayaxüãchi. ⁴⁸ Rü nüxü nadau na guxchaxüácüma yaxãgüxü ga norü ngúexügü, yerü ga buanecü rü nawaama nabuxuchi. Rü yexguma marü yangunechaügu, rü Ngechuchu rü dexáétügu nawe narüxü. Natürü ñoma nüxü naxüpetüchaüxürüü nügü nixixēē. ⁴⁹⁻⁵⁰ Rü yexguma norü ngúexügü nüxü daugügu ga dexáétügu na yaxüxü, rü nagu narüxínüē ga wüxi ga naxchiximare na yiixü. Rü yemacèx aita naxüe, yerü guxüma nüxü nadaugü rü poraãcü nabaixãchiãgü. Natürü yexgumatama ga Ngechuchu rü namaã nidexa rü ñanagürü nüxü: —¡Peporae! Rü chomachiréxtama chixi. ¡Tãxü i pemuüëxü! —ñanagürü. ⁵¹⁻⁵² Rü ngeegu nixüe, rü inarüxó ga buanecü. Natürü nümagü ga norü ngúexügü rü nabaixãchiãgümare yerü woo nüxü na nadaugüxü ga yema mexü ga Tupanaãrü poramaã naxüxü ga Ngechuchu ga yexguma yema pãu yamuxēēgu, natürü tama nüxna nacüē x-ãchie na Tupana Nane na yiixü yerü nüxü naguxcha na yaxögüãxü.

Yenecharétuanewa Ngechuchu nanameëxēē ga idaaweexü
(Mt 14.34-36)

⁵³ Rü yexguma marü yanguügu ga naxtaawa, rü Yenecharétuanewa nangugü. Rü yexma naxãnacügu nanangaxügü ga naweü. ⁵⁴ Rü yexguma nguewa ínachoügu, rü yexgumatama ga duüxügü rü nüxü nicuëxãchitanü ga Ngechuchu na yiixü. ⁵⁵ Rü yema naãnewa rü guxüne ga ígüwa nabuxmü ga yema duüxügü. Rü yexguma nüxü nacüëxgügu ga ngextá na nayexmaxü ga Ngechuchu, rü yéma norü caruügügu naxcèx nanagagü ga idaaweexü. ⁵⁶ Rü guxüwama ga ngextá íyanguchigüxüwa ga Ngechuchu, ga ñanexãcüguwa rü ñanegü ga itaxünewa, rü ñanepechinüwa, rü yexma ítamüpechinügu naxcèx nayamugü ga idaaweexü. Rü nüxü nacèëxügü na tama nüxna nachüxãxücèx na naxchirupechinügumare yangögügüxücèx. Rü guxüma ga yema nüxü ingögüexü, rü naxcèx nitaanegü.

7

Tacü nixi i Tupanapëxewa duüxügüxü chixexëëxü
(Mt 15.1-20)

¹ Rü Ngechuchucèx naxi ga Parichéugü namaã ga ñuxre ga ngúexëëruügü ga mugüwa ngxëëtaegüxü ga Yerucharéüwa ne íxü. ² Rü yexguma ñuxre ga Ngechuchuarü ngúexügüxü nadaugügu ga tama Yudíugücüma na yanguxëëgüxü, rü tama Yudíugü

yauxmëxgüxürüü na nayauxmëxgüxü naxüpa na nachibüexü, rü chixri nachiga nidex-agü. ³ Yerü nümagü ga Parichéugü rü guxüma ga togü ga Yudiugü rü nagu naxi ga norü oxigücüma na nayauxmëxiraxü na yemaäcü Tupanapëxewa nügü yamexëëgüxü naxüpa ga na nachibüexü. ⁴ Rü ngëxguma taxepataüwa ne naxixgu ga nümagü rü tama nachibüe ega tama ngëmaäcü nügü nayauxmëxiragu. Rü nangëxma i muxüma i togü i nuxcümaüxü i nacümagü. Rü ngëmacèx nagu naxi i ngëma nacümagü na Tupanacèx nayauxgüäxü i norü pochiyugü rü basugü rü paneragü rü pechicaxügü. ⁵ Rü yemacèx ga yema Parichéugü rü ngüexëëruügü rü Ngechuchuna nacagü, rü ñanagürügü: —¿Tüxcüü i curü ngüexügü i tama nagu naxixü i ngëma tórü oxigücüma rü tama toma tayauxmëxgüxürüü nayauxmëxgüxü naxüpa na nachibüexü? —ñanagürügü. ⁶ Natürü Ngechuchu nanangäxü rü ñanagürü: —Pa Duüxügü ya Pegü Naxaixcümaraügüxe, rü aixcüma pechiga nixi ga yema ore ga nuxcümaücü ga Tupanaärü orearü uruü ga Ichaxía ümatüxü ga ñaxü:

“Ñaa duüxügü rü naäxmaãmare choxü nicuèxüügü, natürü naäëwa rü tama chaugu narüxinüë. ⁷ Rü taxuwama name na ngëmaäcü natücèxma choxü yacuèxüügüxü. Erü guxüma i ngëma norü ngüxëëtae rü yatügüarü mugümare nixi, rü tama aixcüma chorü mu nixi”,

ñaxü. ⁸ —Rü pema i ñuxma rü aixcüma nüxü perüxoe i Tupanaärü mugü na nagu pexixüçèx i ngëma duüxügücümamare ixixü —ñanagürü. ⁹ Rü yexgumarüü ta ñanagürü nüxü: —Pema rü penangexrü i Tupanaärü mugü na pecümagügutama pexixüçèx. ¹⁰ —Yerü ga Moiché rü ñanagürü:

“¿Tüxü nangechaü ya cunatü rü cue!”

ñanagürü. Rü ñanagürü ta:

“Texé ya tümanatümaã rü ëxna tümaëmaã chixexü ixugüxe, rü äëxgacü tá tümamaã nanaxuegu na tayuxüçèx”,

ñanagürü. ¹¹ —Natürü pema rü ñaperügügü:

“Marü name ega wüxi ya yatü nanatüxü rü naëxü ñaxgu: ‘Taxucürüwama chorü ngëmaxümaã cuxü charüngüxëë, erü guxüma i chorü ngëmaxü rü marü Tupanana chanaxä’,” ñaxgu. ¹² —Rü ngëxguma texé ngëma ñagügu, rü pexçèx rü marü namexü na tama tümanatüxü rü tümaëxü tarüngüxëëxü. ¹³ —Rü ngëmaäcü ipeyanaxoxëë i Tupanaärü mugü, na nagu pexixüçèx i pecümagütama i togüwa pexüexëëxü. Rü ngëxgumarüü ta muxüma i to i pecümagü i ngëmarüü ixixügu pexi —ñanagürü. ¹⁴ Rü yexgumawena duüxügücèx naca ga Ngechuchu, rü ñanagürü nüxü: —¿Meã choxü iperüxinüë, rü nüxü pecuá i ñaa chorü ore! ¹⁵ —Rü taxuüma i tacü i düxétüwa ne üxü rü taëxwa ixücuxü nixi i Tupanapëxewa tüxü chixexëëxü. Natürü ngëma taäëwa ne üxü, rü ngëma waxi nixi i tüxü chixexëëxü i Tupanapëxewa. ¹⁶ —Rü ngëxguma pixächixëgu, ¿rü nüxü pexinüë i ngëma ore! —ñanagürü. ¹⁷ Rü yexguma Ngechuchu duüxügüna ixügachigu rü İpatagu naxücuxgu, rü norü ngüexügü nüxna nacagü nachiga ga yema ngüxëëtae. ¹⁸ Rü nüma rü ñanagürü nüxü: —¿Pema rü ta ëxna tama nüxü pecuëxëga i ngëma? ¿Éxna tama i nüxü pecuáxü na taxuüma i tacü i düxétüwa ne üxü rü taëxwa ixücuxü yixü i Tupanapëxewa tüxü chixexëëxü? ¹⁹ —Erü guxüma i ngëma düxétüwa ne üxü rü taëxwa ixücuxü, rü tama taäëwa nangu. Natürü taanüwa naxümare na yixcama taxünewa İnaxüxüçèx —ñanagürü. Rü yemaäcü nüxü nixu na guxüma i òna rü namexü na nangõxü. ²⁰ Rü ñanagürü ta: —Rü ngëma duüxüäëwa ne üxü, rü ngëma waxi nixi i Tupanapëxewa nachixexëëxü. ²¹⁻²² —Erü norü aixepewa i naäëwa nixi i ne naxüxü i muxüma i chixexügü. Rü ngëma nixi i chixexügu na naxinüxü, rü naxüneärü ngüchaüwe na naxüxü, rü na nangixü, rü na namáëtaxü, rü na i ngëmaã na inapexü, rü togüarü ngëmaxü na nüxü nanguchaüxü, rü chixexü na naxüxü, rü na yadoratëxáxü, rü chixexü i nacümagügu na naxäüxü, rü na yaxäüxächiwëxexü, rü na naxoregütëxáxü, rü nügü na

yacuèxüüxü, rü tama meã naãëxü na nacuáxü. ²³—Rü guxüma i ngëma chixexüğü rü duüxüãrü aixepewa nixi i ne naxixü, rü ngëma nixi i Tupanapëxewa nachixexëëxü —ñanagürü.

Wüxi ga ngecü ga to ga nachiuãnecüãx ga Ngechuchuaxü yaxöcüchiga
(Mt 15.21-28)

²⁴ Rü yemawena rü iãne ga Tiru nawa yexmaxü ga naãnewa naxü ga Ngechuchu. Rü yéma wüxi ga İpatawa nangu, natürü tama nanaxwëxe na texé nüxü cuáxü ga yéma na nanguxü. Natürü taxuacüma nüğü inicux. ²⁵ Rü paxama nüxü icuáchiga ga wüxi ga nge ga ngixácüwa ngoxo yexmëxcü. Rü yéma ixü, rü Ngechuchupëxegu iyacaxãpüxü. ²⁶ Rü yema nge rü to ga nachiuãnecüãx ga Chiropeníchiucüãx iyixi. Rü Ngechuchucëx iyaxü, rü nüxü icèèxü na ngixácüwa İnatëxüchiãxüçëx ga yema ngoxo. ²⁷ Natürü ga Ngechuchu rü ñanagürü ngixü: —Name nixi i taxacüğüxüxira tachibüexëë. Erü tama name i taxacüğüna tanayaxu i norü ðna na airugüna naxãxüçëx —ñanagürü. [Rü yema ñanagürü yerü nümagü ga Yudíugü rü nüğü nixugüe na Tupanaxácüğüxüchi yixigüxü rü yema togü rü ñoma airugürü na yixigüxü.] ²⁸ Natürü ngíma ga yema nge rü inangãxü, rü ngigürüğü: —Aixcüma nixi i curü ore, Pa Corix, natürü woo airugü rü ta nanangöx i ngëma ðnatüchi i mechatüügu nayixëëxü i ngëma İpataarü yoraxacüğü —ngigürüğü. ²⁹ Rü yexguma ga Ngechuchu rü ñanagürü ngixü: —Aixcüma name nixi i ngëma nüxü quixuxü. Rü marü name i cutaegu, erü ngëma ngoxo rü marü İnaxüxü ngíwa i cuxacü —ñanagürü. ³⁰ Rü yexguma ngipatawa nanguxgu ga yema ngecü, rü yema ngirü ngürücarewa ngixü iyanguéü ga ngirü bucü. Natürü marü ngixna İnaxüxü ga yema ngoxo.

Ngechuchu nanamexëë ga wüxi ga yatü ga ngauchixëcü rü moxücü

³¹ Rü Tiruanewa nataegu ga Ngechuchu. Rü Chidãüãrü iãnewa naxüpetü, rü ñuxüchi Decaporíchiuaneãrü iãnegüwa rü ta naxüpetü rü ñuxmata Gariréaaneãrü naxtaawa nangu. ³² Rü yéma naxütawa nanagagü ga wüxi ga yatü ga ngauchixëcü rü moxücü, rü nüxna naxcëx nacagü ga nüxü na yangögüxüçëx. ³³ Rü yexguma ga Ngechuchu rü noxrüwama duüxüğüna nanaga. Rü naxmachixëgu nixuxmëx, rü naxbüxágümaã nüğü yawaixmëxëëacüma norü conügu ningögü. ³⁴ Rü yemawena rü daxü nadawenüacüma yaxna narüngü, rü guma yatüxü ñanagürü: —Epéta —ñanagürü. Rü ngëma rü: “¡Ingoxna!” ñaxüchiga nixi. ³⁵ Rü yexgumatama ningoxnamachixë ga guma ngauchixëcü, rü norü conü rü marü narüme rü meã nidexa. ³⁶ Rü Ngechuchu rü duüxüğüxü namu na taxúemaãma nüxü yaxugüexüçëx. Natürü yexguma yexeraacü duüxüğüna nachüxãgu ga na taxúemaãma nüxü yaxugüexüçëx ga nachiga rü yexeraacü nüxü nixugüeama. ³⁷ Rü poraacü nabaixachiãëgü ga duüxüğü, rü ñanagürüğü: —Meãma nanaxü i guxüma rü woo ngauchixëgüxü rü nayangoxnamachixëgüxëë, rü ngeëxgüxü rü nayadexagüxëë —ñanagürüğü.

8

Ngechuchu nanachibüexëë ga 4000 ga duüxüğü
(Mt 15.32-39)

¹ Rü wüxi ga ngunexügu wenaxãrü naxcëx naxítaquëxe ga muxüma ga duüxüğü, rü nüxü nataxuma ga norü ðnagü. Rü Ngechuchu rü norü ngüexüğüçëx naca, rü ñanagürü nüxü: ²—Choxü nangechaütümüüğü i ñaã duüxüğü, erü marü tomaëxpüx i ngunexü nuã chauxütawa nangëxmagü, rü nataxuma i nawemü i nangoxgüxü. ³—Rü ngëxguma chi ngëmaacümare İchayamugügu, rü chi ngürüãchi namagu tá nayaturae, erü nümaxüğü rü yaxüwama ne naxi —ñanagürü. ⁴ Rü norü ngüexüğü rü nanangãxüğü, rü ñanagürüğü: —¿Natürü ñuxacü tá tanachibüexëë i núma i ngextá taxúema İxãpataxüwa? —ñanagürüğü. ⁵ Rü Ngechuchu nüxna naca, rü ñanagürü: —¿Ñuxre i pãü pexü nangëxma i pemax? —ñanagürü. Rü nümagü nanangãxüğü, rü ñanagürüğü: —Toxü nangëxma i 7

i pãu —ñanagürügü. ⁶ Rü ñuxũchi ga Ngechuchu rü duũxũgũxũ namu na ñaxtũanewa natogũxũcèx. Rü nanade ga yema 7 ga pãu, rü Tupanana moxè naxã. Rü ñuxũchi inanabũcu, rü norü ngúexũgũna nanana. Rü nümagü rü duũxũgũxũ nayanu. ⁷ Rü nüxũ nayexma ta ga ñuxre ga choxnixãcũgü. Rü Ngechuchu rü Tupanana moxè naxã, rü ñuxũchi norü ngúexũgũxũ namu na iyanuãxũcèx. ⁸ Rü guxũma ga yema duũxũgü rü meãma nachibüe ñuxmata meã nüxũ yangu. Rü yexguma rü ta 7 ga pexchi nanapagü namaã ga yema íyaxũgũxũ. ⁹ Rü yema duũxũgü ga yéma chibüexũ rü maneca 4000 nixĩ. Rü yemawena ga Ngechuchu rü duũxũgũxũ ínimugü. ¹⁰ Rü ñuxũchi wüxi ga ngegu nixüe namaã ga norü ngúexũgü, rü Damanũtaanewa naxũ.

Parichéugü naxcèx ínacagü ga wüxi ga cuèxruũ ga Tupanaãrü poramaã üxũ
(Mt 16.1-4; Lc 12.54-56)

¹¹ Rü Ngechuchuxũtawa nangugü ga Parichéugü, rü inanaxũgüe ga na namaã yaporagatanũcüxũ. Rü nüxna nacagüe na nüxũ nüxũ nadauxèèxũcèx ga wüxi ga cuèxruũ ga Tupanaãrü poramaã naxũxũ, na yemaãcü nüxũ naxũgũxũcèx, rü nüxũ nacuèxgũxũcèx ngoxi aixcũma Tupana Nane yĩxũ. ¹² Rü Ngechuchu rü poraãcü yaxna narüngü, rü ñanagürü: —¿Tũxcüü i ñaã duũxũgü naxcèx ínacagü i wüxi i cuèxruũ i Tupanaãrü poramaã üxũ? Rü aixcũma pemaã nüxũ chixu rü bai i wüxi i cuèxruũ tá nüxũ chawèx —ñanagürü. ¹³ Rü yema ñaxguwena, rü nüxna yéma nixü ga yema duũxũgü. Rü wenaxãrü ngegu nixüe rü naxtaxaarü tocutüwa naxũ.

Parichéuarü pãũãrü puxèèruũchiga
(Mt 16.5-12)

¹⁴ Natürü ga norü ngúexũgü rü nüxũ inayarüngũmaè ga norü õna na íyangegũxũ, rü wüxixicatama ga pãu nüxũ nayexma ga nguewa. ¹⁵ Rü yexguma ga Ngechuchu rü nayaxucũxègü, rü ñanagürü nüxũ: —¿Dücèx, pexuãè naxcèx i Parichéugüarü rü Erodearü pãũãrü puxèèruũ! —ñanagürü. ¹⁶ Rü yema norü ngúexũgü rü inanaxũgüe na nügũmaã ñagũxũ: —Ngẽma ñanagürü tũxũ erü tama tawemü ta ítingegü —ñanagürügü. ¹⁷ Natürü ga Ngechuchu rü nüxũ nacuèxama na yema ñagũxũ, rü yemacèx ñanagürü nüxũ: —¿Tũxcüü “Tangearü õnaãx”, ñaperügügü? ¿Éxna ñuxma rü ta tama nüxũ pecuèxgüéga rü tama nüxũ picuèxãchitanü i ngẽmachiga? ¿Éxna pexcèx naxè i ngẽma? ¹⁸ Pema rü pexãxètügüchirèx, ¿rü ñuxãcü i tama nüxũ pedauxũ? Rü pexãxmachixègüchirèx, ¿rü ñuxãcü i tama nüxũ pexĩnüèxũ? ¿Rü èxna tama nüxna pecuèxãchie ga yexguma chayamuxèègu ga yema pãu rü choxni? ¹⁹ —Rü yexguma yema 5000 ga duũxũgũxũ chayanuxgu ga yema wüximèèxpũx ga pãu, ¿rü ñuxre ga pexchigü yĩxũ ga napagücü ga yexguma penadexgu ga yema íyaxũgũxũ? —ñanagürü. Rü nümagü nanangãxũgü rü ñanagürügü: —Rü 12 ga pexchigü —ñanagürügü. ²⁰ Rü ñuxũchi ñanagürü ta ga Ngechuchu: —Rü yexguma yema 4000 ga duũxũgũxũ chayanuxgu ga yema 7 ga pãu, ¿rü ñuxre ga pexchigü yĩxũ ga napagücü ga yexguma penadexgu ga yema íyaxũgũxũ? —ñanagürü. Rü nanangãxũgü rü ñanagürügü: —7 ga pexchigü —ñanagürügü. ²¹ Rü yexguma rü ñanagürü nüxũ: —¿Rü ñuxma rü ta taũtama nüxũ pecuèxgüégaxũ na Parichéugücüma rü Erodecüma i chixexũchiga yĩxũ i ngẽma pãũãrü puxèèruũgu pemaã chixuxũ? —ñanagürü.

Ngechuchu rü nanamexèè ga wüxi ga ngexetücü ga Bechaídawa

²² Rü yemawena rü Bechaídaarü ñanewa nangugü. Rü yéma Ngechuchuxũtawa nanagagü ga wüxi ga ngexetücü. Rü nüxũ nacèèxũgü na nüxũ yangögũxũcèx. ²³ Rü Ngechuchu rü guma ngexetücümeèxègu nayayauxãchi, rü ñaneãrü yéamaxũra nanaga. Rü yéma naxbüxágũmaã nayawaixetüxèè, rü ñuxũchi naxètügu ningögü, rü nüxna naca ngoxi marü tacũxũ nadau. ²⁴ Rü yexguma ga guma ngexetücü rü inanaxũgü ga na yadauchixũ. Rü ñanagürü: —Nüxũ chadau i duũxũgü i ñoma naĩgü i ixĩxũnerüü ixĩgũxũ

—ñanagürü. ²⁵ Rü yexguma ga Ngechuchu rü wenaxârü naxêtügu ningögü. Rü nüma ga guma yatü rü meãma inadawenü. Rü yemaãcü naxcèx nitaane rü meãma naxcèx nangox ga guxüma. ²⁶ Rü yemawena ga Ngechuchu rü napatawa nanamu. Rü namaã nüxü nixu na tama ñanecèx nataeguxü.

Pedru nüxü nixu rü Ngechuchu nixï ya yima Tupana nüxü unetacü ya Cristu
(Mt 16.13-20; Lc 9.18-21)

²⁷ Rü yemawena rü Checharéa ga Piripuanewa yexmane ga ñanexãcügüwa naxü ga Ngechuchu norü ngúexügümaã. Rü namawa rü Ngechuchu rü norü ngúexügüna naca, rü ñanagürü nüxü: —¿Ñuxü ñagüxü i duüxügü i chauchiga na texé chiïxü i chomax? —ñanagürü. ²⁸ Rü norü ngúexü nanangãxügü rü ñanagürügü: —Nangëxma i duüxügü rü:

“Cuáü ya baiüxëëruü quixï”, ñagüxü, rü togü i:

“Ería quixï”, ñagüxü, rü togü rü:

“Wüxi ga nuxcümaücü ga Tupanaârü orearü uruü quixï”, ñagüxü —ñanagürügü. ²⁹ Rü yexguma Ngechuchu rü nüxna naca rü ñanagürü: —¿Rü pema i ñuxü ñapegügüxü choxü na texé chiïxü? —ñanagürü. Rü Pedru nanangãxü rü ñanagürü: —Cuma nixï i Cristu i Tupana cuxü unetacü quiïxü —ñanagürü. ³⁰ Rü yexguma ga Ngechuchu rü norü ngúexügüxü namu na taxüemaãma nüxü yaxugüexücèx ga yema ore ga nachiga.

Ngechuchu nanaxunagü ga norü yuchiga
(Mt 16.21-28; Lc 9.22-27)

³¹ Rü yemawena rü Ngechuchu inanaxügü ga norü ngúexügümaã nüxü na yaxuxü ga tacü tá nüxü na üpetüxü. Rü ñanagürü nüxü: —Choma i Tupana Nane na duüxüxü chiïxü, rü poraãcü ngúxü tá chinge. Rü choxü tá naxoxgü i Yudiügüarü ãëxgacügüerugü, rü paigüarü ãëxgacügü, rü ngëma ngúexëëruügü i Moïchëarü mugüwa nguxëëtaegüxü. Rü tá choxü nimèxgü, natürü tomaëxpüx i ngunexügu rü wena táxarü chamaxü —ñanagürü.

³² Rü yema ore rü meãma namaã nanangoxëë. Natürü yexguma ga Pedru rü nüxïca noxrüwama Ngechuchuxü naga, rü inanaxügü ga na naxucüxëãxü na tama yemaãcü yadeaxücèx. ³³ Natürü ga Ngechuchu rü nadauegu, rü norü ngúexügüxü nadawenü. Rü Pedruxü nanga, rü ñanagürü: —¡Choxna ixügachi, Pa Chatanáx! Cuma rü tama Tupana nagu rüxïnüxügü curüxïnü, erü yatügü nagu rüxïnüxügumare nixï i curüxïnüxü —ñanagürü. ³⁴ Rü yexguma ga Ngechuchu rü norü ngúexügücèx rü duüxügücèx naca. Rü ñanagürü nüxü: —Rü ngëxguma texé chowe rüxüxchaügu, jëcü nüxü tarüxo i tümaârü ngúchaü, rü ñoma wüxi i curucha ngïxü tayaxuxürüü namaã tapora i guxüma i ngúxü i chauxcèx tingexü, rü chowe tarüxü! ³⁵ —Erü yïxema tügü maxëchaxëëchaüxë rü tá tayu. Natürü yïxema chaugagu rü ore i mexügagu yuxe, rü aixcüma tá tamaxü. ³⁶ —¿Rü tacüwa nüxü namexü ya yatü ega ngëxguma nayauxãgu i guxüma i ñoma i naãneârü ngëmaxügü, natürü norü maxü iyanatauxëëgu? ³⁷ —Rü ngëxgumarüü ta, ¿rü ñuxre i dïëru iyangu na ngëmamaã naxcèx nataxexü i norü maxü i wüxi ya yatü? ³⁸ —Rü ngëxguma texé i ñaã duüxügü i pecaduãxgüxü i tama yaxögüxüpëxewa chauxcèx taxãnegu rü naxcèx taxãnegu i chorü ore, rü choma i Tupana Nane i duüxüxü na chiïxü rü tá ta tümacèx chaxãne i ngëxguma Chaunatüarü poramaã rü norü orearü ngeruügü i daxüçüãx i üünegüxümaã wenaxârü núma chaxüxgu.

9

¹ Rü yexgumarüü ta ga Ngechuchu rü ñanagürü nüxü: —Aixcüma pemaã nüxü chixu rü ñuxre i duüxügü i nuã ngëxmagüxü rü täütáma nayu ñuxmatáta nüxü nadëux na ñuxãcü ãëxgacü ya poracü na yiïxü ya Tupana —ñanagürü.

Ngechuchu rü toraxüãcü nangox
(Mt 17.1-13; Lc 9.28-36)

² Rū 6 ga ngunexūguwena rü Ngechuchu rü wūxi ga mēxpūnewa naxū. Rū ínayagagū ga Pedru rü Chaūtiāgu rü Cuáūxīcatama. Rū yéma yema ngúexūgūpēxewa toraxūācū nangox ga Ngechuchu. ³ Rū niyauracūū ga naxchiru rü nacómūxūchi. Rū nataxuma i yaxchiruxū i nūxū cuáxū na ngēmaācū nacómūxēēāxū. ⁴ Rū nūxū nadaugū ga Ería rü Moīché ga yéma Ngechuchumaā idexagūxū. ⁵ Rū yexguma ga Pedru rü ñanagürü Ngechuchuxū: —Pa Ngúexēēruūx, namexēchi nixī na nuā ingēxmagūxū. Rū tá tanaxū ya tomaēxpūx ya dūxenū, rü wūxi ya cuxcèx, rü naī ya Moīchécèx, rü naī ya Eríacèx — ñanagürü. ⁶ Rū yema na poraācū nabaixāchiāēgūxū ga yema ngúexūgū, rü yemacèx ga Pedru rü tama nūxū nacuèx ga na ñuxū ñaxū. ⁷ Rū yexgumatama wūxi ga caixanexū ínaxū, rü natanūgu nayangēixema. Rū yema caixanexūwa inanaxū ga wūxi ga naga ga ñaxū: —Daa nixī ya Chaune ya nūxū changechaūxūchicū. ¡Rū nūxū iperūxīnūē! —ñaxū. ⁸ Rū yexgumatama nūgūcūwagu ínadaueguāchitanū, rü taxúexūma ga toguexū nadaugū, rü Ngechuchuxūxīcatama. ⁹ Rū yexguma ínaxīgūgu nawa ga guma mēxpūne, rü Ngechuchu nūxna naxāga ga taxúemaāma na nūxū yaxugūexū ga yema yéma nūxū nadaugūxū, ñuxmatáta yuwa ínadaaxgu ga nūmax. ¹⁰ Rū yemacèx ga yema ngúexūgū rü bexma nūxū nacuèxgū ga yema nūxū nadaugūxū. Natürü nūgūna nacagū ga tacūchiga na yīxū ga:

“Yuwa ínadaaxgu”, ñaxū. ¹¹ Rū ñuxūchi ga yema ngúexūgū rü Ngechuchuna nacagū, rü ñanagürügū: —¿Tūxcūū i ngúexēēruūgū i ore i mugūwa nguxēētaegūxū rü ñanagürügū:

“Ería tá nixī ya nūxīra cuxūpa núma ūcū?” ñanagürügū. ¹² Rū Ngechuchu nanangāxū, rü ñanagürü nūxū: —Aixcūma nixī i Ería na nūxīra núma naxūxū na chauxūpa namexēēāxūcèx i guxūma. ¿Natürü tūxcūū i ore i ūmatūxūwa i ñaxū:

“Rü Tupana Nane ya duūxūxū ixīcū rü tá ngúxū ninge, rü duūxūgū rü tá nūxū naxoe”, ñaxū? ¹³ Natürü i choma rü pemaā nūxū chixu, rü Ería rü marū núma naxū. Natürü ga duūxūgū rü nūmagū nanaxwēxegūxūācūma poraācū chixri namaā nachopetū, yexgumarūū ga ore ga ūmatūxūwa nūxū yaxuxürüū —ñanagürü.

*Ngechuchu nanamexē ga wūxi ga buxū ga ngoxo nawa yexmaxū
(Mt 17.14-21; Lc 9.37-43)*

¹⁴ Rū yexguma yema togū ga norū ngúexūgūtanūwa nangugūgu, rü yéma nūxū nadaugū ga muxūma ga duūxūgū ga yema ngúexūgūxū íchomaēguāchixū. Rū ñuxre ga ngúexēēruūgū ga Moīchéarū mugūwa nguxēētaegūxū, rü yéma niporagatanūcūū namaā ga yema ngúexūgū. ¹⁵ Rū yexguma Ngechuchuxū nadaugūga ga yema muxūma ga duūxūgū, rü poraācū nabaixāchiāēgū. Rū guxūma naxcèx nibuxmū na nūxū yanamoxēgūxūcèx. ¹⁶ Rū nūma ga Ngechuchu rü nūxna naca, rü ñanagürü nūxū: —¿Tacū nixī i pema namaā naxcèx ípiporagatanūcūūxū? —ñanagürü. ¹⁷ Rū wūxi ga yema duūxūgū ga yéma yexmagūxū rü nanangāxū, rü ñanagürü: —Pa Ngúexēēruūx, nuā cuxcèx tūxū chaga ya chaune, erü tūmawa nangēxma i wūxi i ngoxo i tūxū ngegaxēēxū. ¹⁸ —Rū ngextá ítangēxmaxūwa rü ngēxma tūxū yaxūxgu rü waixūmūānegu tūxū naña. Rū tarūchièx, rü tixūxchapūta, rü ngēxma tiyuāchi. Rū marū nūxū chacèèx i curū ngúexūgū na tūmawa ínaxūxūchiāxūcèx i ngēma ngoxo, natürü tama nūxū inaxīnū —ñanagürü. ¹⁹ Rū Ngechuchu nanangāxū, rü ñanagürü: —Pa Duūxūgū i Tama Yaxōgūxū, ¿ñuxguratáta i pemaā chanuxmaxū rü yaxna pemaā chaxīnūxū? ¡Nuā penaga ya yima bucū! —ñanagürü. ²⁰ Rū Ngechuchuxūtawa nanagagū ga guma bucū. Natürü yexguma Ngechuchuxū nadēuxgu ga yema ngoxo, rü guma bucūxū naxū ga na yayuāchixēēāxū. Rū yexma ñaxtūanegu nayangu. Rū yexma nidixegugū, rü narūchièx. ²¹ Rū Ngechuchu rü guma bucūnatūna naca, rü ñanagürü: —¿Rū ñuxgumama nixī ga naxcèx inaxūgūxū ga yema? —ñanagürü. Rū guma bucūnatū nanangāxū rü ñanagürü: —Nabuxgumamatama. ²² Rū muēxpūxcūna i ngēma ngoxo rü ūxūxetūgu rü dexāgu nanañaūxū na ngēmaācū yamaāxūcèx. Rū ngēmacèx ega cumaā nanguxūgu na tacū toxcèx cuxūxū, ¡rū cuxū

tangechaütümüügü, rü toxü rüngüxêê! —ñanagürü. ²³ Rü yexguma ga Ngechuchu rü ñanagürü nüxü: —¿Rü tüxcüü “ega chomaã nanguüxgu”, ñacurügü? Erü guxüma natauxcha tümacèx ya yíxema yaxõxê —ñanagürü. ²⁴ Rü yexguma ga guma bucünatü rü tagaãcü ñatarügü: —Chayaxõ. ¡Choxü rüngüxêê na yexeraãcü chayaxõxücèx! —ñatarügü. ²⁵ Rü yexguma Ngechuchu nüxü dèuxgu na muxüma ga duüxügü marü yexma ngutaquëxexü, rü nananga ga yema ngoxo. Rü ñanagürü nüxü: —Pa ngoxo i Ngegaxëëruü rü Ngauchixëxëëruüx, ¡choma cuxü chamu na nawa ícuxüxüxü ya daa bucü, rü tagutáma wena naga cuyaxücuxü! —ñanagürü. ²⁶ Rü yexguma ga yema ngoxo rü aita naxü, rü wenaxârü guma bucüxü niyuächixêê. Rü ñuxüchi nawa ínaxüxü, rü ñoma nayuxuchixürüü yéma nanatèx. Rü yemacèx ga muxüma ga duüxügü rü ñanagürügü: —Marü nayuxuchi nixí —ñanagürügü. ²⁷ Natürü ga Ngechuchu rü naxmëxgu nayayauxâchi, rü ínanadaxêê. Rü nüma ga guma bucü rü inachi. ²⁸ Rü yemawena ga Ngechuchu rü wüxi ga ípatagu nayaxücu namaã ga norü ngúexügü. Rü yéma nüxíca nüxna nacagü, rü ñanagürügü nüxü: —Pa Corix, ¿tüxcüü i toma rü taxuacüma ítanatèxüchi i ngëma ngoxo? —ñanagürügü. ²⁹ Rü Ngechuchu nanangãxü rü ñanagürü: —Tama ngëmaãcümare ítanatèxüchi i ngëmarüü ixíxü i ngoxo. Natürü tanaxwèxe i Tupanana tanaxuaxü i tórü yumüxëwa na nüma ínatèxüchiãxücèx. Rü ngëmaãcüxícatama nixí i ínaxüxüxü —ñanagürü.

Ngechuchu ru wenaxârü nanaxunagü ga norü yuchiga
(Mt 17.22-23; Lc 9.43-45)

³⁰⁻³¹ Rü yéma inaxíachi rü Gariréaanewa nachopetü. Natürü ga Ngechuchu rü tama nanaxwèxe ga texé nüxü na cuáxü ga na yéma nayexmaxü, yerü norü ngúexügüxü ínangúexêê. Rü ñanagürü nüxü: —Tupana Nane ya duüxüxü ixícü, rü duüxügü tá nayayauxgü rü tá nayamèxgü. Natürü tomaëxpüx i ngunexügu rü wena tá ínarüda —ñanagürü. ³² Natürü ga nümagü rü tama meã nüxü nacuèxgü ga ¡acüchiga na yíxü ga yema ore, rü namuê ga nüxna na nacagüexü.

¿Texé tá tixí ya guxãârü yexera ixíxê?
(Mt 18.1-5; Lc 9.46-48)

³³ Rü Capernáüârü íñewa nangugü. Rü yexguma íxwa nayexmagügu, rü Ngechuchu nüxna naca, rü ñanagürü: —¿Rü ¡acü nixí ga pegümaã naxcèx piporagaetanüxü ga namawa? —ñanagürü. ³⁴ Natürü ga nümagü rü nangeëxgümare, yerü ga namawa rü nachigagu nügümaã niporagaetanü ga texé tíxü ga natanüwa rüyexeramaëxê. ³⁵ Rü yexguma ga Ngechuchu rü ínarüto, rü naxcèx naca ga yema 12 ga norü ngúexügü, rü ñanagürü nüxü: —Rü ngëxguma texé naxwèxegu na guxãëtüwa na taxüxü, rü name nixí i noxri rü guxãârü ñaxtümaëwa tügü taxüxêê na guxãârü ngüxêëruü tíxü —ñanagürü. ³⁶ Rü yemawena rü norü ngãxütanügu nayachixêê ga wüxi ga buxü. Rü ñuxüchi nachacüügu yayauxâchiãcüma ñanagürü: ³⁷ —Rü texé ya chauégagu meã nayaxúxe i wüxi i buxü i ñaârüü, rü choxü nixí i tayaxuxü. Rü texé ya choxü yaxúxe, rü tama choxüxícatama tayaxu, natürü yima núma choxü mucü ya Chaunatüxü rü ta nixí i tayaxuxü —ñanagürü.

Texé ya tama taxchi aixe rü torü ngüxêëruü tixí
(Mt 10.42; Lc 9.49-50)

³⁸ Rü yexguma ga Cuáü rü ñanagürü nüxü: —Pa Ngúexêëruüx, nüxü tadau ga wüxi ga yatü ga cuégagu ngoxogü íwoxüxü. Natürü toma nüxna tanachüxu ga yema, yerü tama tatanüxü nixí ga nümax —ñanagürü. ³⁹ Natürü Ngechuchu nanangãxü, rü ñanagürü: —Tama name i nüxna na penachüxuxü. Erü texé ya chauégagu naxúxe i wüxi i mexü i Tupanaârü poramaã üxü, rü taxucürüwama yixcama chixri chauchiga tidexa. ⁴⁰ Erü texé ya tama taxchi aixe, rü tórü ngüxêëruü tixí. ⁴¹ Rü texé ya woo wüxítama i pochíyuãcu i dexá pexna äxê naxcèx na chorü duüxügü pixíngüxü, rü aixcüma pemaã nüxü chixu rü tá tüxü nangëxma i tümaârü ãmare —ñanagürü.

Naxãücüma nixĩ na pecadugu inguxũ
(Mt 18.6-9; Lc 17.1-2)

⁴² Rũ ñanagürü ta: —Texé ya pecadugu nanguxẽxẽ i wüxi i ñaã buxũgü i choxũ yaxõgũxũ, rü tümacèx rü narümemaẽ chi nixĩ i noxtacüma wüxi ya nuta ya tacü tümanaxãwa tayangacuchi, rü ngẽmaãcü taxtũchiüwa tũxũ tayatáe. ⁴³⁻⁴⁴ —Rü ngẽxguma chi wüxi ya cuxmèx pecadugu cuxũ nguxẽẽgu, rü name nixĩ i noxtacüma ícunadae. Erü narümemaẽ nixĩ i cuboxmèxãcüma cunayaxu i curü maxũ na tama guxũne ya cuxmèx ya mexünemaã nawa quitèxcuchixũcèx ya yima üxü ya ngoxogü nagu poxcuene ya taguma ixoxũne. ⁴⁵⁻⁴⁶ —Rü ngẽxguma chi wüxi ya cucutü pecadugu cuxũ nguxẽẽgu, rü name nixĩ i noxtacüma ícunadae. Erü narümemaẽ nixĩ i cubocutüãcüma cunayaxu i curü maxũ na tama guxũne ya cucutü ya mexünemaã nawa quitèxcuchixũcèx ya yima üxü ya ngoxogü nagu poxcuene. ⁴⁷⁻⁴⁸ —Rü ngẽxguma chi wüxi ya cuxetü pecadugu cuxũ nguxẽẽgu, rü name nixĩ i noxtacüma ícunacaxüchi. Erü narümemaẽ nixĩ i wüxitama ya cuxetümaã Tupana ãẽxgacü íixĩxũwa quixücu, na tama guxũne ya cuxetü ya mexünemaã nawa quitèxcuchixũcèx ya yima üxü ya taguma ixoxũne ya ngoxogü nagu poxcuene i ngextá õxmigü taguma íyuexũwa. ⁴⁹ —Rü aixcüma ñoma õnawa yücüra nagüxürüü tá nixĩ na guxátama guxchaxũwa chopetüxũ. ⁵⁰ —Name ya yücüra. Natürü ngẽxguma chi nangeacagu, ¿rü ñuxãcü tá wenaxãrü naxããca? ¡Rü meã pegüna pedaugü na ñoma yücüra ya taguma iyarüngeacacürüü na namexũcèx i perü maxũ! ¡Rü meã pegümaã pemaxẽ! —ñanagürü.

10

Ngechuchu namaã nangúexẽẽtae na tama namexũ na texé tümamèxũ ítáxũ
(Mt 19.1-12; Lc 16.18)

¹ Rũ yexguma ga Ngechuchu rü Capernáũärü ñanewa inaxũãchi. Rũ Yudéaanewa naxüpetü rü ñuxmata natü ga Yudáũärü tocutüwa nangu. Rũ yema rü wenaxãrü naxcèx nangutaquèxegü ga duũxũgü. Rũ nüma rü inanaxügu ga na nangúexẽẽtaexũ guxũgurüü. ² Rũ ñuxre ga Parichéugü rü naxcèx naxĩ ga na nüxũ yaxüguxũcèx yerü chixexũgu nananguxẽẽgüchaũ. Rü yemacèx nüxna nacagüe, rü ñanagürügü: —¿Namexũ i cuxcèx na wüxi ya yatü rü naxmèxũ ínatáxũ? —ñanagürügü. ³ Rũ nüma nanangãxũ, rü ñanagürü nüxũ: —¿Rü tacü yiixũ ga Moïché pexũ muxũ? —ñanagürü. ⁴ Rũ nümagü nanangãxũgü, rü ñanagürügü: —Moïché nüxũ nixu ga na tama nachuxuxũ na wüxi ya yatü rü ínatámaxũ, ega wüxi i popera i tèxgüpane ngĩxna naxãxgu —ñanagürügü. ⁵ Rũ yexguma ga Ngechuchu rü nanangãxũ, rü ñanagürü nüxũ: —Rü yema na taxúegama na pexĩnüèxũgagu nixĩ ga Moïché ga tama pexna nachúãxũ ga pexmèxũ na ípetáxũ. ⁶ —Natürü noxriarü ügügu, rü Tupana nanaxü ga yatüxũ rü ngexũ. ⁷ —Rü ngẽmacèx ya yatü rü tá nanatü rü naëna nixũgachi na naxmèxmaã inaxãuxũcèx. ⁸ —Rü ngẽmaãcü i ngẽma taxre rü ñoma wüxitama i duũxürüü tá nixĩgü. Rü marü tãütama taxre nixĩ, erü wüxi tátama nixĩ. ⁹ —Rü ngẽmacèx taxucürüwa texé nügüna tayaxĩgachixẽẽ i ngẽma taxre i Tupana nügüna mugüxũ —ñanagürü. ¹⁰ Rũ yexguma marü ñpatawa nangugügu, rü norü ngúexũgü rü wenaxãrü nüxna nacagüe naxcèx ga yema. ¹¹ Rũ Ngechuchu rü ñanagürü nüxũ: —Rü yixema tümamèxũ ítáxe rü naĩ i ngemaã amaxẽ rü pecadu taxü ngĩmaã i ngẽma noxriücü i tümamèx. ¹² —Rü ngẽxgumarüü ta, ega wüxi i nge ítèxtegu rü naĩ ya yatümaã naxãtegu, rü ngĩma rü ta pecadu ixü —ñanagürü.

Ngechuchu rü buxũgũxũ nameãxẽ
(Mt 19.13-15; Lc 18.15-17)

¹³ Rũ yema Ngechuchuxütawa tũxũ nagagü ta ga ñuxre ga buxegü na tũxũ yangõgũgũxũcèx. Natürü ga yema norü ngúexũgü rü inanaxügu ga tũxũ na yangõgũxũ ga guxema tümaxãcüxegũxũ Ngechuchuxütawa gagüxe. ¹⁴ Rũ yexguma yemaxũ

nadèuxgu ga Ngechuchu, rü naãêwa nangux, rü ñanagürü nüxü: —Chanaxwèxe i chauxütawa naxí i buxügü. ¡Rü tãxü i nüxna penachuxuxü! Erü Tupana ãëxgacü íixüwa rü tümacèx nixí ya yíxema ñã buxügürüü taxuüma i chixexüü icuáxe. ¹⁵ —Rü aixcüma pemaã nüxü chixu rü texé ya tama wüxi i buxürüü Tupanaxü yaxúxe na tümäärü ãëxgacü yíixücèx, rü tagutáma nagu taxücu i ngëma naãne i Tupana ãëxgacü íixüwa —ñanagürü. ¹⁶ Rü nüma rü tüxü naganagütanü ga guxema buãxta, rü tümäärugügu naxümëxácüma ñanagürü tüxü: —¡Tupana pexü rüngüxëëx! —ñanagürü.

*Wüxi ga yatü ga dïeruãxüchixü Ngechuchumaã nidexa
(Mt 19.16-30; Lc 18.18-30)*

¹⁷ Rü yexguma marü inaxüãchichaügu ga Ngechuchu, rü yéma naxcèx niña ga wüxi ga yatü. Rü napëxegu nayacaxäpüxü, rü nüxna naca rü ñanagürü nüxü: —Pa Ngúexëëruü ya mecüx, ¿tacü tá chaxüxü na chanayaxuxücèx i maxü i taguma gúxü? —ñanagürü. ¹⁸ Rü Ngechuchu nanangãxü, rü ñanagürü nüxü: —¿Tüxcüü, “Mecü” ñacurügü choxü? Erü Tupanaxícatama nixí ya mecü ixícü, rü nataxuma i to. ¹⁹ Cuma rü marü nüxü cucuèx i Tupanaärü mugü i ñaxü:

“¡Tãütáma cumáëta, rü tãütáma naí i ngemaã icupe, rü tãütáma cungtèèx, rü tãütáma doraxü quixu i togüchiga, rü tãütáma quidoratèèx, rü tümaga naxínü ya cunatü rü cue!”

ñaxü —ñanagürü. ²⁰ Rü yexguma ga guma yatü rü ñanagürü nüxü: —Pa Ngúexëëruüx, rü chorü bucümatama meã chanaxaure i guxüma i ngëma mugü i nüxü quixuxü —ñanagürü. ²¹ Rü yexguma ga Ngechuchu rü nüxü nangechaüãcüma nüxü nadawenü, rü nanangãxü rü ñanagürü: —Rü wüxixicatama cuxü nataxu. ¡Rü íixü, rü namaã yataxe i guxüma i curü ngëmaxügü, rü ñuxüchi togü i ngearü ngëmaxüãxgüxüna naxã i ngëma curü natanü! Rü ngëmaãcü tá cuxü nangëxma i cuchica i daxüguxü i naãnewa. Rü ngëmawena rü marü name i chowe curüxü —ñanagürü. ²² Natürü nüma ga guma yatü rü nanaxixãchiãë ga yexguma nüxü naxínügu ga yema ore. Rü nangechaüãcüma ínixü, yerü namuxüchi ga norü yemaxügü. ²³ Rü Ngechuchu rü nüxü nidaugüãchi, rü ñanagürü norü ngúexügüxü: —Naguxchaxüchi tá nixí na Tupana ãëxgacü íyíxüwa na yachocuxü i ngëma dïeruãxüchigüxü —ñanagürü. ²⁴ Rü nabaixãchiãëgü ga norü ngúexügü namaã ga yema ore. Natürü ga Ngechuchu rü wenaxãrü namaã nüxü nixu, rü ñanagürü: —Pa Chauxacügüx, ñuxácü wüxi i guxchaxüchixü nixí na Tupana ãëxgacü íyíxüwa na yaxücuxü i wüxi i duüxü. ²⁵ —Rü aixcüma pemaã nüxü chixu rü ñoma wüxi i cameyu na taxucürüwama wüxi ya ucumaxëtüwa naxüpetüxüärü yexera narüguxchamaë naxcèx i wüxi i duüxü i dïeruãxüchixü na yaxücuxü i ngextá Tupana ãëxgacü íixüwa —ñanagürü. ²⁶ Rü yexguma yemaxü naxínüëgu ga norü ngúexügü, rü yexeraãcü nabaixãchiãëgü. Rü nügüna nacagüe, rü ñanagürügü: —¿Rü texé tá ëxna tixí ya nayaxúxe i maxü i taguma gúxü? —ñanagürügü. ²⁷ Rü Ngechuchu rü nüxü nadawenü, rü nanangãxü rü ñanagürü nüxü: —Yatügü rü taxuacüma nügü namaxëë, natürü Tupanaãxü rü natauxcha i ngëma, erü Tupanacèx rü nataxuma i tacü i guxchaxü —ñanagürü. ²⁸ Rü yexguma inanaxügü ga Pedru ga na yadexaxü, rü ñanagürü nüxü: —Toma rü marü yéma tanawogü ga guxüma ga torü yemaxügü na cuwe tarüxüçèx —ñanagürü. ²⁹⁻³⁰ Rü Ngechuchu nanangãxü, rü ñanagürü: —Aixcüma pemaã nüxü chixu rü texé ya chaugagu rü ore i maxëxëëruügagu tümapatana, rü ëxna tümãëneëgüna, rü ëxna tümãëyëxgüna, rü ëxna tümãëna, rü ëxna tümãanatüna, rü ëxna tümãxãcügüna, rü ëxna tümããnegüna ngëma ixüxë, rü tá tanayaxu i tümäärü natanü. Rü aixcüma ñuxma i ñoma i naãnewa rü tá tanayaxu i 100 ëxpüxcüna ya tümapatagü, rü tümãëneëgü, rü tümãëyëxgü, rü tümãëgü, rü tümãxãcügü, rü tümããnegü. Natürü ngëxgumarüü tá ta tanayaxu i ngúxügü i togü tá tüxü ingexëëgüxü. Natürü yixcamaxüra i daxüguxü i naãnewa rü tá tanayaxu i maxü i taguma gúxü. ³¹ —Natürü muxüma i nümaxü i ñuxma ñoma i naãnewa duüxügü wixpëxewa ügüxëëxü, rü daxüguxü i naãnewa rü Tupana tá wixweama nanaxügüxëë. Rü muxüma i nümaxü i ñuxma

ñoma i nañnewa duñxügü wixweama ügüxëẽxü, rü daxüguxü i nañnewa rü Tupana tá wixpëxewa nanaxügüxëẽ —ñanagürü.

Ngechuchu rü wenaxãrü nanaxunagü ga norü yuxchiga
(Mt 20.17-19; Lc 18.31-34)

³² Rü Yerucharéüwaama naxĩ. Rü nüma ga Ngechuchu rü norü ngúexügüpëxegu nixü. Rü nümagü rü nabaixãchiãëgü, rü yema togü ga duñxügü ga wixweama ägüxü rü namuñë. Rü Ngechuchu rü wenaxãrü noxrüwama naxcèx naca ga yema 12 ga norü ngúexügü. Rü inanaxügü ga namaã nüxü na yaxuxü ga tacü tá nüxü na ngupetüxü. ³³ Rü ñanagürü nüxü: —Pema nüxü pecuèx na marü ingaicaxü na Yerucharéüwa ingugüxü. Rü ngema rü duñxügü rü tá chixri chomaã nachopetü. Rü paigüarü äëxgacügü rü ngúexëeruügü i ore i mugüwa nguxëëtaegüxüna tá choxü naxuaxügü. Rü nümagü rü tá chomaã nanaxuegugü na chayuxü, rü tá ngëma Dumacüãxgüna choxü namugü. ³⁴ Rü ngëmagü tá nixĩ i chaugu idauxcüräügüxü. Rü tá choxna nacuaixgüe, rü tá choxna nanaçuaixcagü, rü tá choxü nayuxëëgü. Natürü tomaëxpüx i ngunexüguwena táxarü chamaxü —ñanagürü.

Chaütiágu rü Cuáü rü wüxi ga ngüxëëcèx ínacagü
(Mt 20.20-28)

³⁵ Rü Ngechuchucèx naxĩ ga Chaütiágu rü Cuáü ga Zebedéu nanegü, rü ñanagürügü nüxü: —Pa Ngúexëeruñx, tanaxwèxe i toxcèx cunaxü i ngëma ngüxëẽ i naxcèx tá cuxna taçaxü —ñanagürügü. ³⁶ Rü nüma rü nüxna naca, rü ñanagürü: —¿Tacü nixĩ i penaxwèxexü na pexcèx chanaxüxü? —ñanagürü. ³⁷ Rü ñanagürügü: —Rü ngëxguma äëxgacüxü quingucuchigu, rü tanaxwèxe na wüxie i toma rü curü tügüncëwawa tarütoxü, rü togue i curü toxwecüwawa —ñanagürügü. ³⁸ Rü Ngechuchu nanangãxü, rü ñanagürü nüxü: —Pema rü tama nüxü pecuèx na tacücèx ípeçaxü. ¿Rü pexü chi natauxchaxü i na peyaxaxüxü i ngëma axexü i üxchiüxü i choma tá chixaxüxü? ¿Rü namaã chi peporaexü i ngëma ngúxü i tá chingexü? —ñanagürü. ³⁹ Rü nümagü nanangãxügü rü ñanagürügü: —Ngëmaãcü, namaã tá taporae —ñanagürügü. Rü Ngechuchu nanangãxü, rü ñanagürü nüxü: —Aixcüma tá nixĩ i chauxrü peyaxaxüxü i ngëma axexü i üxchiüxü rü chauxrü ngúxü na pingegüxü. ⁴⁰ —Natürü ngëma chorü tügüncëwawa rü chorü toxwecüwawa na perütogüxücèx, rü tama choxmëxwa nangëxma na pexna chanaxãxü, erü Chaunatü tá tuxna nanaxã ya yixema tümacèx íyixë —ñanagürü. ⁴¹ Rü yexguma yemaxü naxĩnëgu ga yema togü ga 10 ga ngúexügü, rü Chaütiágumaã rü Cuáümaã nanuë. ⁴² Natürü Ngechuchu naxcèx naca rü ñanagürü nüxü: —Pema nüxü pecuèx i togü i nachiüñnegüwa rü nangëxmagü i äëxgacügü i nügü nacuëxgügu na namexü na nuãcü namuãxü i norü duñxügü. Rü ngëma äëxgacügü i taxügü rü norü duñxügüarü yora nügü nixigüxëë. ⁴³ —Natürü täütãma ngëmaãcü nixĩ i petanüwa. Erü ngëxguma texé naxwèxegu na guxãärü yexera na tiixü i petanüwa, rü name nixĩ i noxri rü guxãärü ngüxëëruñ na tiixü. ⁴⁴ —Rü ngëxguma chi texé i petanüwa naxwèxegu na tümamücügüeru na tiixü, rü name nixĩ i noxri rü guxüma i tümamücügüarü ngüxëëruñ na tiixü. ⁴⁵ —Rü woo i choma i Tupana Nane na duñxüxü chiixü, rü tama togü choxü rüngüxëëxücèx nixĩ i núma chaxüxü. Natürü núma chaxü na duñxügüxü charüngüxëëxücèx rü naxcèx ichanaxãxücèx i chorü maxü, na ngëmaãcü chanaxütanüxücèx na norü pecadugüna ínangüxücèx i muxüma i duñxügü —ñanagürü.

Bartiméü ga ngexetücüxü narümexëẽ ga Ngechuchu
(Mt 20.29-34; Lc 18.35-43)

⁴⁶ Rü Yericüarü ñanewa nangugü. Rü Ngechuchuwe narüxĩ ga norü ngúexügü rü muxüma ga togü ga duñxügü. Rü yexguma guma ñaneärü guxwa nangugüchaügu ga nüxna na ínachoxüxü, rü yéma namacüwawa narüto ga wüxi ga ngexetücü ga Bartiméüga äëgacü ga Timéü nane. ⁴⁷ Rü yexguma guma ngexetücü nüxü ñnügü ga Ngechuchu ga

Nacharétucũãx na yĩxũ ga guma yéma üpetücü, rü inanaxügü ga poraãcü aita na naxũxũ, rü: —Pa Ngechuchu ya Dabítanũxũx, ¡cuxũ changechaũtũmũũ! —ñanagürü. ⁴⁸ Natürü muxũma ga yema duũxügü rü ínanangaxũchigũama ga na iyanangeáxũcèx. Natürü ga nũma rü yexeraãcü aita naxũama, ñaxũmaã: —Pa Dabítanũxũx, ¡cuxũ changechaũtũmũũ! —ñaxũmaã. ⁴⁹ Rũ yexguma ga nũma ga Ngechuchu rü inayachiãchi, rü ñanagürü: —¡Naxcèx peca! —ñanagürü. Rũ guma ngexetücücèx nacagü, rü ñanagürügü: —¡Nataãẽ rü inachi! Rũ cuxcèx nixĩ i naçaxũ —ñanagürügü. ⁵⁰ Rũ guma ngexetücü rü yexacü nanaña ga norü gáuxũchiru. Rũ inayuxnagü rü Ngechuchucèx nixũ. ⁵¹ Rũ Ngechuchu nũxna naca, rü ñanagürü nũxũ: —¿Tacü nixĩ i cunaxwèxexũ na cuxcèx chanaxũxũ? —ñanagürü. Rũ nũma ga guma ngexetücü, rü nanangãxũ, rü ñanagürü: —Pa Ngúexẽẽruũx, chanaxwèxe na chidauchixũ —ñanagürü. ⁵² Rũ yexguma ga Ngechuchu, rü ñanagürü nũxũ: —¡Ëcü, íxũ! Rũ marü cuxcèx nitaane erü cuyaxõ —ñanagürü. Rũ yexgumatama ga guma ngexetücü rü nidauchi, rü Ngechuchuwe narũxũ ga namawa.

11

Ngechuchu rü Yerucharéũgu naxücu (Mt 21.1-11; Lc 19.28-40; Cu 12.12-19)

¹ Rũ marü Yerucharéũãrũ ngaicamana nangugü ga Oríbunecüarü Mèxpúneãrũ ngaicamana yexmagüne ga ñanexãcügü ga Bechagué rü Betániã. Rũ yexguma yéma nangugü, rü Ngechuchu nanamu ga taxre ga norü ngúexügü. ² Rũ ñanagürü nũxũ: —¡Gua tórü toxmèxtawa ngèxmane ya ñanexãcüwa pexĩ! Rũ ngèxguma nawa pengugü, rü ngèxma tá nũxũ peyangau i wüxi i buru i ngèxma ngaxũxũ i taguma texé natagu aunagũxũ. ¡Rũ peyawèxũ rü nuã penaga! ³ —Rũ ngèxguma texé pexna caxgu na tacücèx peyawèxũxũ i ngèma buru, ¡rũ tümamaã nũxũ pixu rü ñapegügü:

“Torü Cori nanaxwèxe, rü ñuxma tátama nanataeguxẽẽ”, ñapegügü! ⁴ Rũ yéma naxĩ. Rũ yexma namacüwagu nũxũ nayangaugü ga yema buru ga wüxi ga ípataèxũtagu ngaxũxũ. ⁵ Rũ ñuxre ga duũxügü ga yéma yexmagũxũ rü nũxna nacagüe, rü ñanagürügü: —¿Tacü ípexüe? ¿Rũ tũxcüũ peyawèxũ i ngèma buru? —ñanagürügü. ⁶ Rũ nũmagü ga yema ngúexügü, rü yema ore ga Ngechuchu namaã nũxũ ixuxũãcü nanangãxügü. Rũ yemacèx tama nũxna nanachuxgü. ⁷ Rũ natagu nanaçhagümü ga naxchirugü. Rũ yemaãcü Ngechuchuxũtawa nanagagü. Rũ nũma ga Ngechuchu rü natagu naxaunagü. ⁸ Rũ muxũma ga duũxügü rü naxchirumaãtama nanaçhamagü. Rũ togü rü naixãtügü ga naãnewa nadaũxũmaã nayaçhamagü. ⁹ Rũ yema duũxügü ga napèxegu ágũxũ rü yema togü ga wixweama ágũxũ, rü tagaãcü ñanagürügü: —¡Cuxũ tucuèxũxügü! ¡Rũ naxüüne ya daa Tupanaegagu núma ücü! ¹⁰ ¡Rũ ãèxgacü ya Dabírũxũ namecũmaxüchi ya daa ãèxgacü ya núma ngücü! ¡Rũ pema rü ta, Pa Daxücũãx, rü nũxũ picuèxũxügü ya Tupana! —ñanagürügü. ¹¹ Rũ Yerucharéũgu naxücu ga Ngechuchu, rü tupauca ga taxũnecèx nixũ. Rũ meãma guxũwama inanadauaxũne. Rũ ñuxũchi yema norü 12 ga ngúexügümaã Betániããrũ ñanecèx nataegu, yerü marü nayáuane.

Ngechuchu rü orix ga iguera ga ngearü oõxũmaã chixexũ naxuegu (Mt 21.18-19)

¹² Rũ moxũãcü yexguma Betániãwa inaxĩãchigu ga Ngechuchu rü nataiya. ¹³ Rũ yaxũgu nũxũ nadau ga wüxi ga orix ga iguera ga ããtũxũ. Rũ nũma ga Ngechuchu rü naxcèx nixũ na íyadauãxũcèx rü ngoxi nayexmèx ga norü o. Natürü yexguma naxũtawa nanguxgu, rü taxuũma inayangau, rü naãtũxũxĩcatama, yerü tauta norü owa nangu. ¹⁴ Rũ yexguma rü ñanagürü igueraxũ: —¡Tagutãma texé wena cuxũ tamúãrũ oõx! —ñanagürü. Rũ norü ngúexügü rü nũxũ naxĩnũẽ ga yema.

Ngechuchu ínanawoxũ ga yema tupauca ga taxũnewa taxegũxũ ga duũxügü (Mt 21.12-17; Lc 19.45-48; Cu 2.13-22)

¹⁵ Rū yexguma Yerucharéŭwa nangugügu, rü Ngechuchu rü tupauca ga taxŭnegu naxücu. Rū inanaxügü ga na ínawoxŭáxŭ ga yema yéma ŭacümaã taxegüxŭ rü naxcèx taxegüxŭ. Rū nanangüegutanü ga norü mechagü ga yema duŭxŭgü Tupanaarü ãmarewa mexŭ ga dŭerumaã taxegüxŭ rü muxtucumaã taxegüxŭ. ¹⁶ Rū nanachuxu ga texé ŭacü na yéma ngepetüxŭ tupauca ga taxŭnemachiawa. ¹⁷ Rū inanaxügü ga na nangúexēētaexŭ, rü ñanagürü: —Tupanaarü ore i ümatüxŭwa rü ñanagürü: “Chopata rü guxŭma i nachüãnecŭãxgüarü yumüxēpataŭgu tá naxãega”, ñanagürü. Natürü pema rü ngŭtèèxgüxŭpataŭ peyaxŭxē —ñanagürü. ¹⁸ Natürü yexguma yemaxŭ naxŭnēgu ga paigüarü ãëxgacügü rü ngüexēēruŭgü ga Moŭchearü mugüwa ngüxēētaegüxŭ, rü inanaxügü ga naxcèx na nadaugüxŭ ga ñuxácü Ngechuchuxŭ na yamèxgüxŭ. Natürü duŭxŭgüxŭ namuŭē, rü yemacèx taxucürüwama duŭxŭgüpegu nayayauxgü. Yerü nüma ga duŭxŭgü rü namaã nataãxégü ga yema Ngechucharü ngüxēētae. ¹⁹ Natürü yexguma marü nayáuanegu, ga Ngechuchu rü norü ngüexŭgümaã nawa ínachoxŭ ga guma ñãne.

Narüñexē ga yema iguera ga ngearü oðxŭ
(Mt 21.20-22)

²⁰ Rū moxŭãcü pèxmama rü igueraxŭtawa nachopetü. Rū yéma nüxŭ nadaugü ga na nañexēxŭ ñuxmata naxchúmèxãwa nangu. ²¹ Rū yexguma ga Pedru rü nüxna nacüèxãchi ga yema ñeãcü ngupetüxŭ, rü ñanagürü Ngechuchuxŭ: —Pa Ngüexēēruŭx, dŭcax i iguera ga chixexŭ namaã cuzueguxŭ, rü marü narüñexē —ñanagürü. ²² Rū Ngechuchu nanangãxŭ, rü ñanagürü: —¡Nüxŭ peyaxŭgü ya Tupana! ²³ —Rü aixcüma pemaã nüxŭ chixu rü ngëxguma chi wüxie daa mèxpúnexŭ tamuxgu na yaxŭgachixŭcèx rü taxtŭ i taxŭchiüwa nügü na yatáexŭcèx, rü chi pega naxŭnŭ, ega aixcüma peyaxŭgüãcüma nüxŭ ngëma ñapegügu. ²⁴ —Rü ngëmacèx pemaã nüxŭ chixu rü guxŭma i ŭacü i naxcèx ípeçaxŭ i perü yumüxēwa, rü name nixŭ na peyaxŭgüxŭ na marü penayaxuxŭ, rü aixcüma tá penayaxu. ²⁵ —Rü ngëxguma peyumüxégügu, natürü nangëxmagu i ŭacücèx texémaã na penuèxŭ, ¡rŭ tüxŭ nüxŭ pengechaŭ! na Penatü ya daxŭgücü rü ta pexŭ nüxŭ nangechaŭxŭcèx i perü pecadugü. ²⁶ —Natürü ngëxguma pema tama tüxŭ nüxŭ pengechaŭgügu, rü Penatü ya daxŭgücü rü tá ta tãütãma pexŭ nüxŭ nangechaŭ —ñanagürü.

Ngechuchuna nacagüe na texéarü oregagu tupauca ga taxŭnewa nangüxēētaexŭ
(Mt 21.23-27; Lc 20.1-8)

²⁷ Rū yemawena rü Yerucharéŭcèx nawoegu. Rū yexguma Ngechuchu rü tupauca ga taxŭnegu yaxŭgüchigüyane, rü naxcèx naxŭ ga paigüarü ãëxgacügü, rü ngüexēēruŭgü ga Moŭchearü mugüwa ngüxēētaegüxŭ, rü Yudíugüarü ãëxgacügüerugü. ²⁸ Rū nüxna nacagüe, rü ñanagürügü: —¿Texéarü mugagu nixŭ i cunaxŭxŭ i ngëma núma cuzüxŭ? ¿Rü texé cuzŭ tamu na cunaxŭxŭcèx i ngëma? —ñanagürügü. ²⁹⁻³⁰ Rū yexguma ga Ngechuchu rü nanangãxŭ, rü ñanagürü nüxŭ: —Choma rü tá ta pexna chaca, rü ngëxguma choxŭ pengãxŭgu i ngëma pexna naxcèx chaçaxŭ, rü choma rü tá ta pemaã nüxŭ chixu na texé choxŭ muxŭ na chanaxŭxŭcèx i ngëma. ¿Rü texé tanamu ga Cuáŭ na duŭxŭgüxŭ ínabaiŭxēēxŭcèx? ¿Rü Tupana yŭxŭ ga namucü rü èxna duŭxŭgümare? —ñanagürü. ³¹ Rū yexguma ga nümagü rü inanaxügü ga nügümaã na yaporagatanücüxŭ, rü ñanagürügü: —Rü ngëxguma chi:

“Tupana núma nanamu”, ñagügügu, rü nüma rü chi ñanagürü tüxŭ:

“¿Tüxcüŭ ga tama nüxŭ peyaxŭgüxŭ?” ñanagürü chi tüxŭ. ³² ¿Rü ñuxŭcürüwa rü:

“Yatügümare núma nanamu”, ñatarügügü tá? Rū yema ñanagürügü yerü duŭxŭgüxŭ namuŭē. Yerü guxŭma ga duŭxŭgü rü nayaxŭgü rü aixcüma Tupana nanamu ga Cuáŭ na nüxŭ yaxŭxŭcèx ga norü ore. ³³ Rū yemacèx Ngechuchuxŭ nangãxŭgü, rü

ñanagürügü: —Tama nüxü tacuèx ga texé núma na namuxü ga Cuáü ga baiüxëëruü —ñanagürügü. Rü yexguma ga Ngechuchu rü nanangãxü rü ñanagürü nüxü: —Choma rü ta tãütãma pemaã nüxü chixu na texé choxü muxü na chanaxüxü i ngëma choxna naxcèx peçaxü —ñanagürü.

12

Ore i puracütanüxü i chixexüğügu ixuxü (Mt 21.33-46; Lc 20.9-19)

¹ Rü Ngechuchu rü inanaxüğü ga ore ga cuèxruüğügu ixuxümaã na nangúexëëtaexü. Rü ñanagürü nüxü: —Nayexma ga wüxi ga yatü ga norü naãnegu ubanecü ücü. Rü ínanapoxegu, rü nanaxü ga wüxi ga ubaarü yauxtüxüxüchica, rü wüxi ga dauxütaechica na meã nüxna nadauxücèx ga guxüma. Rü ñuxüchi ñuxre ga puracütanüxüna nüxü nadauxëë. Rü namaã nanamexëë na ngãxüğü namaã ngixü yatoyexücèx ga yema ubatanü. Rü ñuxüchi ga yema naãneärü yora rü to ga nachiuãnewa naxü. ² —Rü yexguma nawa nanguxgu ga na yadauxü ga yema ubagü, rü guma yatü rü yéma puracütanüxüğüxütawa nanamu ga wüxi ga norü duüxüxü na naxcèx íyaçaxücèx ga yema ubagü ga nüxna üxü. ³ —Natürü yema puracütanüxüğü rü nayayauxgü, rü nanaçuaixgü ga guma yatüarü duüxü. Rü taxuüma ga ubagü nüxna naxãgü, rü yemaãcü ínayamugü. ⁴ —Rü yexguma ga guma yatü rü to ga norü duüxüxü yéma namu. Natürü ga guma rü nayamèxèrugü, rü namaã naguxchigagü. ⁵ —Rü yexguma rü to ga norü duüxüxü yéma namu. Natürü nayamèxgü. Rü yemawena, rü yéma nanamugü ga muxüma ga togü ga norü duüxüğü. Natürü ga yema puracütanüxüğü rü nayaçuaixgü ga ñuxre, rü togü rü nanadai. ⁶ —Rü yexguma rü nüxü ínayaxü ga nanexüchi ga poraãcü nüxü nangechaücü. Rü düxwa guma nanexü yéma namu, yerü nüma nagu naxínügu rü chi nanega naxínüë ga yema puracütanüxüğü. ⁷ —Natürü yexguma guma cori nanexü nadaugügu ga yema puracütanüxüğü, rü nüğümaã ñanagürügü:

“Ngëmaärü tá nixí i ñaã naãne i yixcama. ¡Rü ngixã tayamèxgü na tóxrü na yiüxücèx!” ñanagürügü. ⁸ —Rü yemaãcü nayayauxgü, rü nayamèxgü. Rü yema ubanecüpechinüwa nayatèxgü ga naxüne. ⁹ —Rü ñuxma rü pexna chaca, ¿pexcèx rü tacü tá naxü ya yima ubanecüarü yora namaã i ngëma puracütanüxüğü i chixexüğü? Rü dücax, rü ngema tá naxü, rü tá nanadai i ngëma puracütanüxüğü, rü togüna tá nanaxã i ngëma ubanecü. ¹⁰ —¿Taguma éxna nawa pengüé i Tupanaärü ore i ümatüxü? Erü ngëmawa rü ñanagürü:

“Rü yima nuta ya mecü ya ñärü üruüğü nüxü oechirécü, rü ñuxma rü yimatama nixí ya Tupana nüxíra yaxücuchicü na namaã inaxüğüãxücèx ya ípata. ¹¹ Rü tórü Cori ya Tupana nixí ga naxücü ga yema, rü ñuxma rü namexëchi i taxcèx”, ñanagürü i ngëma ore. ¹² Rü yexguma ga yema paigüarü ãëxgacügü, rü ngúexëëruüğü ga Moíchéarü mugüwa nguxëëtaegüxü, rü Yudiüğüarü ãëxgacügüerugü, rü Ngechuchuxü niyauxgüchaü. Yerü nüxü nacüèxgü ga nachiga na yiüxü ga yema ore ga cuèxruügu yaxuxü. Natürü duüxüğüxü namuë rü yemacèx taxuüma namaã naxüë. Rü nüxna yéma ínixímare.

Ãëxgacüaxü dïërumaã naxütanüxüchiga (Mt 22.15-22; Lc 20.20-26)

¹³ Rü yexguma ga yema ãëxgacügü rü Ngechuchuxütawa nanamugü ga ñuxre ga norü duüxüğü ga Parichéugü rü Erodetanüxüğü na nüxna yacagüexücèx, rü ngoxi tacü rü chixexü ga dexamaã nüxü nangãxü na yemaãcü ãëxgacügüxütawa na íyaxuaxüğüãxücèx. ¹⁴ Rü nümagü rü naxütawa naxí, rü ñanagürügü nüxü: —Pa Ngúexëëruüx, nüxü tacuèx rü aixcüma nixí i ngëma nüxü quixuxü i ore. Rü tama duüxüğügamare cuxínü, erü tama norü düxétüxünegu cudawenü, natürü nacüma nixí

i cungugüxü. Rü aixcüma cunangüexëẽ i duüxügü na Tupana naxwëxexüãcüma namaxëxücèx. ¡Tomaã nüxü ixu! Rü ngëma dïëru ya ãëxgacü ya tacü ya Dumacüãx totanüwa ngïxü yauxchaücü ¿rü namexü yïxü na nüxna ngïxü taxãxü, rü ëxna tama? —ñanagürügü. ¹⁵ Natürü ga Ngechuchu rü nüxü nacüexama ga na chixexügu namaã naxïnüëxü ga yema duüxügü woo meã namaã na yanadexagüxü. Rü yemacèx ñanagürü nüxü: —¿Tüxcüü chixexügu choxü penguxëëchaüxü? ¡Nuã ngïxü pingè i wüxitachinü i dïëru na ngïxü chadauxücèx! —ñanagürü. ¹⁶ Rü yéma naxütawa ngïxü nangegü ga wüxitachinü ga dïëru. Rü Ngechuchu rü ñanagürü nüxü: —¿Texéhicünèxã rü texéega nixï i ngïgu üxü? —ñanagürü. Rü nümagü nanangãxügü, rü ñanagürügü: —Dumacüãx ya ãëxgacü ya tacüchicünèxã nixï —ñanagürügü. ¹⁷ Rü yexguma ga Ngechuchu rü ñanagürü nüxü: —¡ãëxgacüna ngïxü pexã i ngëma ãëxgacüarü ixïcü, rü Tupanana ngïxü pexã i ngëma Tupanaärü ixïcü! —ñanagürü. Rü yexguma yema orexü naxïnüëgu, rü namaã nabaixãchiãëgü.

*Ngechuchuna nacagüe rü ngoxi wena namaxë i duüxügü
(Mt 22.23-33; Lc 20.27-40)*

¹⁸ Rü yemawena rü Ngechuchuxütawa ínayadaugü ga ñuxre ga Chaduchéugü. Rü nümagü nixï i nüxü yaxugüexü na tagutáma wena namaxëxü i yuexü. Rü yemacèx Ngechuchuna nayacagüe, rü ñanagürügü: ¹⁹ —Pa Ngúexëëruüx, Moïchëarü mugüwa rü ñanagürü:

“Rü ngëxguma wüxi ya yatü naxmèx ngexacüyane nayuxgu, rü name nixï i naëneëtama ngïmaã naxãmèx i ngëma yutecü i naxümèx, na ngëmaãcü naxãxácüxücèx ya naëneë ga marü yucü”,

ñanagürü ga yema ore. ²⁰ —Dücèx, nayexma ga 7 ga nügüeneëgü. Rü naxãmèx ga guma yacü, natürü tauta naxãxácüyane nayu. ²¹⁻²² —Rü yexguma ga naï ga naëneë nüxï ngïmaã naxãmèx ga yema ngecü, natürü guma rü ta nayu rü nangexacü. Rü yexguma ga guma norü tomaëxpüx ga naëneë nüxï ngïmaã naxãmèx, natür ü yexgumarüütama nüxü nangupetü. Rü yemaãcü, gucüma ga guma 7 ga nügüeneë rü ngïmaã naxãmèx ga yema nge. Rü gucüma nayue tauta naxãxácüyane. Rü düxwa ngïma rü ta iyu ga yema nge. ²³ —Rü dücax, ngëxguma yuexü wena maxëgu, ¿rü ngexcürüücü naxmèx tá iyixï i ngëma nge? Yerü gucüma ga guma 7 ga nügüeneëgü ngïmaã naxãmèx —ñanagürügü. ²⁴ Rü yexguma ga Ngechuchu rü nanangãxü, rü ñanagürü nüxü: —Pema rü ípetüe erü tama nüxü pecuèx i Tupanaärü ore i ümatüxü, rü tama nüxü pecuèx i ñuxãcü na naporaxü ya Tupana. ²⁵ —Rü ngëxguma yuexü wena maxëgu, rü taxúetáma tixãmèxgü rü ëxna tixãtegü. Erü daxücüãx i Tupanaärü orearü ngeruügürüü tá tixïgü i ngëxguma. ²⁶ —Pema choxna peca i yuexüärü dagüchiga. ¿Natürü tama ëxna nawa pengüe i Tupanaärü ore ga Moïché ümatüxü ga naïxãcü ga íyaxuxüwa? Erü yema orewa rü Moïchéxü ñanagürü ga Tupana:

“Choma nixï i Abráüärü Tupana, rü Ichaárü Tupana, rü Acobuarü Tupana”, ñanagürü. ²⁷ —Rü ngëma orewa nüxü tacuèx rü Tupana rü maxëxüärü Tupana nixï rü tama yuexüärü Tupana nixï, erü Tupanaarü ñnüwa rü taxúema tayu. Rü ngëmaãcü i pema rü poraãcü ípetüe —ñanagürü.

*Ngëma Tupanaärü mu i guxü i norü mugüarü yexera ixïxü
(Mt 22.34-40)*

²⁸ Rü wüxi ga ngúexëëruü ga Moïchëarü mugüwa nguxëëtaexü, rü nüxü naxïnü ga yema togü ga namücügü ga Ngechuchumaã na íyaporagatanücüüxü. Rü nüma rü nüxü nicuèxãchi ga meãma na nangãxüãxü. Rü yemacèx Ngechuchucèx nixü, rü nüxna naca, rü ñanagürü nüxü: —Pa Ngúexëëruüx, ¿ngëxürüüxü i Tupanaärü mu nixï i guxü i norü mugüarü yexera ixïxü? —ñanagürü. ²⁹ Rü Ngechuchu nanangãxü, rü ñanagürü: —Ngëma Tupanaärü mu i guxü i norü mugüarü yexera ixïxü, rü ñaã nixï, ñanagürü:

“¡Iperüxĩnũe, Pa Iraéanecũãxgũ! Rũ nüma ya Cori ya tórũ Tupana, rũ yixicatama nixĩ ya tórũ Cori. ³⁰ ¡Rũ nüxũ nangechaũ ya Cori ya curũ Tupana guxũne ya curũ maxũnemaã, rũ guxũ i cuãemaã, rũ guxũ i nagu curũxĩnũxũmaã, rũ guxũ i curũ poramaã!”

ñanagürũ. ³¹ —Rũ ngẽma norũ taxre i Tupanaãrũ mu, rũ ñanagürũ:

“¡Rũ nüxũ nangechaũ i cumücũ na cugũ cungechaũxürũ!”

ñanagürũ. Rũ nataxuma i to i Tupanaãrũ mu i ngẽmagüarũ yexera ixĩxũ —ñanagürũ. ³² Rũ yexguma ga yema ngúexẽeruũ ga mugüwa nguxẽetaexũ, rũ ñanagürũ Ngechuchuxũ: —Marũ name, Pa Ngúexẽeruũx, erũ aixcũma nixĩ i ngẽma nüxũ quixuxũ na wüxixicatama na yĩxũ ya Tupana, rũ nataxuma ya naĩ. ³³ —Rũ ngẽma Tupanaxũ na ingechaũxũ guxũne ya tórũ maxũnemaã, rũ guxũ i nagu rüxĩnũxũmaã, rũ guxũ i tórũ poramaã, rũ nüxũ na ingechaũxũ i tamücũ i yigũ na ingechaũxürũ, rũ ngẽma rũ guxũma i carnerugũ i Tupanacèx idèixũ rũ íguxüarũ yexera narümemae —ñanagürũ. ³⁴ Rũ yexguma Ngechuchu nüxũ dèuxgu ga mexũgu na naxĩnũácũma na nangãxũãxũ ga yema ngúexẽeruũ ga mugüwa nguxẽetaexũ, rũ ñanagürũ nüxũ: —Marũ tama taxũ cuxũ nataxu na cunayaxuxũ ya Tupana na curũ ãẽxgacũ yĩxüçèx —ñanagürũ. Rũ yemawena rũ marũ taxuũma nügũ naporaxẽe na nüxna yacachigüxüçèx.

¿Texé nane nixĩ ya Cristu?

(Mt 22.41-46; Lc 20.41-44)

³⁵ Rũ yexguma tupauca ga taxũnewa ínangúexẽetaeyane ga Ngechuchu, rũ duũxũgũna naca, rũ ñanagürũ: —¿Tüxcüũ nixĩ i ngẽma ngúexẽeruũgũ i mugüwa nguxẽetaegüxũ i ñagüxũ:

“Yima Cristu ya Tupana nüxũ unetacũ rũ nuxcũmaüçũ ga ãẽxgacũ ga Dabítaa nixĩ”, ñagüxũ? ³⁶ —¿Rũ ñuxãcũ i ngẽmaãcũ yadexagüxũ? Yerũ nümatama ga Dabí, rũ yexguma Tupanaãe i Üünexũ naãewa ideaxgu rũ ñanagürũ:

“Cori ya Tupana rũ chorũ Corixũ ñanagürũ: ‘¡Nuã chorũ tügüncüwawa rüto ñuxmatáta nüxũ charüporamae i curũ uwanügu na cuga naxĩnũèxüçèx!’ ”

ñanagürũ ga yema orewa. ³⁷ —¿Natürũ ñuxüçürüwa i Dabítaa yĩxũ ya Cristu, ega nümatama ga Dabí, rũ norũ Corimaã naxuãgu? —ñanagürũ. Rũ yema muxũma ga duũxũgũ ga yema yexmagüxũ, rũ taãẽacũma Ngechuchuaxũ inarüxĩnũe.

Ngechuchu rũ nüxũ nixu na tama yameãrũ maxũãxgüxũ ga yema ngúexẽeruũgũ ga Moĩchearũ mugüwa nguxẽetaegüxũ

(Mt 23.1-36; Lc 11.37-54, 20.45-47)

³⁸ Ngechuchu rũ norũ nguxẽetaewa rũ ñanagürũ: —¡Pexuãegũ naxcèx i ngẽma ngúexẽeruũgũ i Moĩchearũ mugüwa nguxẽetaegüxũ! Erũ nümagũ rũ norũ me nixĩ i mexũ i naxchirumaã na naxĩãneãxũ. Rũ nanaxwèxegũ na ítamũwa duũxũgũ meã nüxũ na rümoxègüxũ. ³⁹ —Rũ ngutaquẽxepataũgüwa rũ norũ me nixĩ i ãẽxgacügümeçwèxewa na natogüxũ. Rũ õnagũ i taxũwa rũ ngẽma õnaãrũ yoraxütawa ügüxũ i nachicacèx nadaugũ. ⁴⁰ —Natürũ tüxna nanapuxũ ya tümapatagũ ya yíxema yutegüxe. Rũ ñuxũchi nanamèxèe i norũ yumüxègũ na ngẽmagu nügũ yacüxgüxüçèx rũ duũxũgũ nagu rüxĩnũèxüçèx na aixcũma mexũgũ na yixĩgüxũ. Natürũ nümagũ tá nixĩ i yexeraãcũ napoxcuexũ —ñanagürũ.

Yutecũ ga ngearũ dñeruãxcü ga Tupanacèx dñeru ngĩxũ ixãcũ

(Lc 21.1-4)

⁴¹ Wüxicana ga Ngechuchu rũ tupauca ga taxũneãrũ dñeruchiũãrũ toxmèxtawa narüto. Rũ yema inadawenũ ga ñuxãcũ duũxũgũ yexma ngĩxũ yanaxücuchigüxũ ga norũ dñerugũ. Rũ muxũma ga duũxũgũ ga idñeruãxgüxüchixũ rũ yexma ngĩxũ nayarüxücuchigũ ga muxũchicũ ga norũ dñeru. ⁴² Rũ ngürũ yema ingu ga wüxi ga yutecũ ga ngearũ dñeruãxcü. Rũ ngĩma rũ wüxi ga yema dñeruchiũgu ngĩxũ iyarüxücuchi ga taxretachinũ ga dñeruxacü

ga ítanücü. ⁴³ Rû yexguma ga Ngechuchu rû norü ngúexügücèx naca, rû ñanagürü nüxü: —Aixcüma pemaã nüxü chixu rû ñaã ngecü i yutecü i ngearü dîeruãxcü, rû guxü i ngêma togü i dîeruchiügu dîeru ngîxü ixücuchigüxüârü yexera ngîxü ixã. ⁴⁴ Erü guxüma i togü rû ngîxü inaxâgü i ngêma nüxü íyaxügücü. Natürü ngîma ngîxü natauxyane ngîxü ixã i guxcüma i ngîxü ngêxmèxcü i ngîrû õnatanü —ñanagürü.

13

Ngechuchu nanaxunagü na tupauca ga taxünewa tá na napogüexü (Mt 24.1-2; Lc 21.5-6)

¹ Rû yexguma tupauca ga taxünewa ínaxüxügu ga Ngechuchu, rû wüxi ga norü ngúexügü rû ñanagürü nüxü: —Pa Ngúexêëruüx ¡dücax ñuxâcü nimexêchi ya daa tupauca ya itaxüne rû naxtapüxaru nutagü! —ñanagürü. ² Natürü Ngechuchu nanangãxü, rû ñanagürü: —Pema nüxü pedaugü ya guxünema ya yima tupauca ya taxüneârü ípatagü. Natürü pemaã nüxü chixu rû aixcüma guxünema ya daa ípatagü rû tá nagu napogüe. Rû norü nutagü rû taxucütáma nügüetü naxüxüra, rû bai tá ya wüxi —ñanagürü.

Cuèxruügi i tá nüxü idauxü naxüpa na nagúxü i naãne (Mt 24.3-28; Lc 21.7-24, 17.22-24)

³⁻⁴ Rû yemawena rû Oríbunecüaru Mèxpüne ga tupauca ga taxüneârü toxmèxtawa yexmanewa naxí. Rû yéma narüto ga Ngechuchu. Rû Pedru rû Chaütiágu rû Cuáü rû Aüdré rû naxütawa naxí na noxrüwama nüxna nacagüexücèx. Rû ñanagürügü: —Tanaxwèxe i tomaã nüxü quixu na ñuxgu tá nangupetüxü i ngêma nüxü quixuxü. ¿Rü tacü tá nixí i norü cuèxruü i nawa nüxü tacuáxü ega nawa tá nanguxgu i ngêma? —ñanagürügü. ⁵ Rû yexguma ga Ngechuchu rû nanangãxü rû ñanagürü nüxü: —¡Pexuãëgü na taxúema pexü womüxêëxücèx! ⁶ —Erü muxüchixü i duüxügü tá ínangugü, rû chaugu tá nügü nicüxgü, rû ñanagürügü tá:

“Choma nixí i Cristu”, ñanagürügü tá. Rû muxüchixü i duüxügüxü tá nawomüxêë. ⁷ —Rü ngëxguma nüxü pexínüëgu na nügü nadèixü i nachiüãnegü i ngaicamagüxü rû togü i nachiüãnegü i yaxügugüxü, ¡rû tãütáma ngêmacèx pebaixãchiãëgü! Erü woetama ngêmaãcü tá nangupetü. Natürü tãütáma naãneârü gux nixí i ngêma. ⁸ —Erü wüxi i nachiüãne rû to i nachiüãnemaã tá nügü nadai. Rû wüxi ya ãëxgacüaru churaragü rû to i ãëxgacüaru churaragümaã tá nügü nadai. Rû muxüma i nachicawa rû tá naxíãxãchiane. Rû tá taiya nangux. Natürü guxüma i ngêma rû norü ügümare nixí i ngêma ngúxü i tá ínguxü. ⁹ —¡Rü meã pegüna pedaugü! Erü ãëxgacügüpëxewa tá pexü nagagü, rû ngutaquëxepataügügu tá pexü nicuaixgü. Rû nachiüãnegüaru ãëxgacügüpëxewa tá pexü nagagü naxcèx na chorü duüxügü na pixíngüxü. Natürü ngêmaãcü tá pexü natauxcha na ngêma ãëxgacügümaã nüxü pixuxü i chauchiga. ¹⁰ —Natürü naxüpa na nagúxü i naãne rû tá nüxü nixugüe i Tupanaârü ore i guxü i nachiüãnegüwa. ¹¹ —Natürü ngëxguma ãëxgacügüpëxewa pexü nagagügu, ¡rû tãütáma pexoegaãëgü naxcèx na tacümaã tá penangãxüxü! ¡Rü namaã nüxü pixu i ngêma ore i ngëxgumatama Tupana pexna äxü na nüxü pixuxücèx! Erü tãütáma pema nixí na pidexagüxü, natürü Tupanaãë i Üünexü tá nixí i pewa idexaxü. ¹² —Rü nügüeneëgüwa tátama rû ãëxgacügüxütawa nügü ínayaxuaxügü na ngêmaãcü tüxü nadèixücèx. Rû ngëxgumarüü tá ta i papágü rû mamágü rû tá naxácügüxü ínayaxuaxügü. Rû nümagü i naxácügü rû tá nanatügümaã rû naëgümaã nanuë, rû tá tüxü ínayaxuaxügü na ãëxgacügü tüxü nadèixücèx. ¹³ —Rü guxü i naãnewa rû duüxügü tá pexchi naxaie naxcèx na chorü duüxügü pixíngüxü. Natürü yíxema naetüwa meã Tupanaãxü yaxõómáxë, rû yíxema tá tixí ya aixcüma nayaxúxe i maxü i taguma gúxü. ¹⁴ —Rü ngëxguma nüxü pedèuxgu i ngêma äüãchixü rû äücümaxüchixü i chixexêëruü i ngextá tama ínaxwèxexüwa na nangëxmaxü, rû ngëxguma ya yíxema Yudéaanewa ngëxmagüxe, rû tanaxwèxe i mèxpüneãnewa tabuxmü. Rû texé

ya yíxema nüxü daumatüxe, ¡rü name nixí i meã nagu tarüxínü i ngēma! 15 —Rü ngēma ngunexügu texé tümapatatüwa ngēxmagu, rü tama name i tümapatagu tayangaxi na tacü i tümäärü ngēmaxü tayayaxuxücèx. 16 —Rü texé ya tümäänewa ngēxmaxè rü tama name i tümapatacèx tataegu na tümachirugü tayayaxuxücèx. 17 —Rü ngēma ngunexügügu, rü wüxi i ngechaü tá nixí i tümacèx ya yíxema ngexegü ya itacharaügüxe rü yíxema maïxácügüxe. 18 —¡Rü Tupanana naxcèx peca i perü yumüxèwa na tama gáuane ixüyane pexü na nangupetüxücèx i ngēma chixexü! 19 —Erü ngēma ngunexügügu rü poraäcü tá nangēxma i ngúxü ga noxri Tupana naãne ixügügumama taguma yexmaxü, rü ngēmawena rü tagutáma nangēxma. 20 —Rü ngēxguma Tupana tama nanoxrexēgu i ngēma ngunexügü, rü taxúetáma tamaxü. Natürü Tupana rü marü nananoxrexē i ngēma ngunexügü erü tüxü nangechaü ya yíxema noxrüxü tüxü nadexe. 21 —Rü ngēxguma texé pexü ñagügu:

“Dücèx, daa nixí ya Cristu”, ñagügu, rü éxna:

“Gua nixí ya Cristu”, ñagügu, ¡rü tãxü i nüxü peyaxögüxü! 22 —Erü Cristugüneta rü Tupanaärü orearü uruügüneta tá ínangugü. Rü tá nanaxügü i muxüma i cuèxruügü i taxügü. Rü ngēmaäcü, ega nüxü natauxchagu, rü tá tüxü nawomüxēegü woo ya yíxema duüxégü ya Tupanatama tüxü dexe. 23 —¡Pexuãégü! Erü guxüma i ngēma tá ngupetüxü, rü marü naxüpa pemaã nüxü chixu.

*Ñuxäcü tá nixí i ngēxguma nataegugu ya Tupana Nane ya duüxüxü ixícü
(Mt 24.29-35, 42, 44; Lc 21.25-36)*

24 —Natürü marü nangupetügu i ngēma ngúxügü, rü ngēma ngunexügügu rü tá nixo ya üèxcü rü täütáma inabaxi ya tauemacü. 25 —Rü woramacurigü rü éxtagü rü tá narüyi. Rü guxüma i daxüwa ngēxmaxü rü tá naxiãxächitanü rü nachicana tá nixígachitanü. 26 —Rü ngēxguma i duüxügü rü tá nüxü nadaugü ya Tupana Nane ya duüxüxü ixícü na caixanexügu ínaxíxü i guxüma i norü poramaã rü norü ngóonexümaã. 27 —Rü tá nanamu i norü orearü ngeruügü i daxüçüãx na tüxü nanutaquèxexücèx ya yíxema Tupana tüxü idexechixe ya guxüwama ngēxmagüxe ñuxmatáta naãne íyacuáxüwa nangu. 28 —¡Iperüxínüë i ñaã nguxēetae i orix i iguerachiga, rü naxcèx pengüé! Rü ngēxguma ngexwacaxüxü i nachacüüxacügü iyarüyixgu rü naxüátügu, rü ngēmawa nüxü pecuèx na paxa tá taunecü yiixü. 29 —Rü ngēxgumarüü ta, rü ngēxguma nüxü pedèuxgu na nangupetüxü i ngēma pemaã nüxü chixuxü, rü ngēmawa tá nüxü pecuèx na paxaxüchi tá ínanguxü ya Tupana Nane ya duüxüxü ixícü. 30 —Rü guxüma i ngēma ñuxma pemaã nüxü chixuxü rü aixcüma tá nangupetü naxüpa na nayuexü i ngēma duüxügü i ngēxguma maxèxü. 31 —Daxüguxü i naãne rü ñoma i naãne rü tá inayarüxo. Natürü chorü ore rü tagutáma inayarüxo, rü aixcüma tá ningü. 32 —Natürü ngēma ngunexü rü ora i nagu tá nangupetüxü i ngēma pemaã nüxü chixuxü, rü Tanatü ya Tupanaxícatama nüxü nacuèx i ñuxgu tá na nangupetüxü i ngēma, rü taxúema ya togue nüxü tacuèx. Rü woo i norü orearü ngeruügü i daxüçüãx rü tama nüxü nacuèxgü, rü woo i choma na Nane chíxü rü tama nüxü chacuèx i ñuxgu tá na nangupetüxü i ngēma. 33 —Rü ngēmacèx, ¡pedaue rü pexuãégü! Erü tama nüxü pecuèx i tacü rü ora tá íchangu i chomax. 34 —Rü guxüma i ngēma pemaã nüxü chixuxü, rü ñoma wüxi ga yatü ga ixüãchichaücü na to ga nachiüãnewa naxüxücèxrüxü nixí. Rü yemacèx norü puracütanüxüna naxäga na mea nüxna nadaugüxücèx ga guma napata. Rü ñuxüchi wüxichigüna nanaxã ga norü puracü. Rü yēma ñãxãrü dauruü rü nagu nanamu na mea nadauxütaegüxücèx. 35-36 —¡Rü ngēmacèx i pema rü name na ípexuãègüxü! Erü tama nüxü pecuèx i ñuxgu tá ínangu ya yima cori ya ípataarü yora, rü bexmana noxri nachütagu, rü éxna ngãxücüügu, rü éxna otá icaxgu, rü éxna noxri yangóonegu. ¡Rü ngēmacèx ípedaue na ngürüãchi ínanguxgu tama ípepeeyane pexü na íyanguéüxücèx! 37 —Rü ngēma ore i pemaã nüxü chixuxü, rü guxü i duüxügüçèx nixí. ¡Rü ípedaueecha! —ñanagürü.

14

Ãëxgacügü naxcèx nadaugü na ñuxãcu Ngechuchuxü yayauxgüxcèx
(Mt 26.1-5; Lc 22.1-2; Cu 11.45-53)

¹ Rû taxre ga ngunexü nataxu ga na nawa nanguxü ga Yudíugüarü peta ga Üpetüchiga ga nagu nangõxgüãxü ga pãu ga ngearü puxëëruüãxü. Rû ga paigüarü ãëxgacügü rü ngúexëëruügü ga mugüwa nguxëëtaegüxcèx rü naxcèx nadaugü ga ñuxãcü bexma duüxcügüechita Ngechuchuxü na yayauxgüxcèx rü na yamèxgüãxüxcèx. ² Yerü nümaxü rü ñanagürügü: —Taxucürüwama ñuxma petagu tayayauxgü, erü duüxcügü rü tá tamaã nanuë —ñanagürügü.

Wüxi ga nge rü Ngechuchuerugu inaba ga pumara
(Mt 26.6-13; Cu 12.1-8)

³ Rû Ngechuchu rü Betániãwa naxü napatawa ga Chimáü ga rüchaxü necümaã naxügüãcü. Rû yexguma mechawa natoyane, rü yéma ingu ga wüxi ga ngecü ga wüxiweü ga pumara ga yixichixü ga tatanüxcüchixü yéma ngecü. Rû iyapoyenagu ga yema pumarachixü ga nuta ga mexëchicünaxcèx, rü Ngechuchuerugu inaba. ⁴ Natürü ñuxre ga yema yéma yexmagüxcèx rü nanuë naxcèx ga yema naxüxcèx ga yema ngecü, rü nügümaã ñanagürügü: —¿Tüxcüü ngëxma inaxaiyaxü i ngëma pumara? ⁵ —Rü narümemaë chi nixi i 300 tachinü i dïëruyu namaã itaxe, rü ñuxüchi ngëma dïërumaã nüxcèx irüngüxcèx i ngëma duüxcügü i ngearü dïëruãxgüxcèx —ñanagürügü. Rû yemaãcü ngichiga nidexagü ga yema nge. ⁶ Natürü ga Ngechuchu rü ñanagürü nüxcèx: —¿Ngexrüma! ¿Tüxcüü ngixü pechixewe? Erü ngëma chomaã naxüxcèx, rü wüxi i mexü nixi. ⁷ —Rü ngëma ngearü dïëruãxgüxcèx rü guxügutáma petanüwa nangëxmagü, rü ngëmaãcü pexü natauxcha na nüxcèx perüngüxcèx i ngëxguma penaxwëxegu. Natürü i choma rü tãütáma guxügu petanüwa changëxma. ⁸ —Rü ñãã nge rü inaxü i guxüma i ngëma ngixü tauxchaxü, rü ngëmacèx yoxni choxü ipumaraxüne naxüpa na ichatáxcèx. ⁹ —Rü aixcüma pemaã nüxcèx chixu rü guxü i naãnewa i ngextá duüxcügü nüxcèx íxugügüxcèxwa i ore i maxëëëruü, rü ñãã ngecü chomaã üxcèx rü tá ta nüxcèx nixugügü. Rû ngëmaãcü tá ngixna nacüxcèxchie i duüxcügü —ñanagürü ga Ngechuchu.

Yuda rü ãëxgacügümaã nanamexëë na ñuxãcü tá na Ngechuchuxü yayauxgüxcèx
(Mt 26.14-16; Lc 22.3-6)

¹⁰ Rû Yuda Icariüte ga wüxi ga yema 12 ga ngúexütanüxcèx ixixü, rü Yudíugüarü paigüarü ãëxgacügütanüwa naxü na namaã yamexëëãxüxcèx na ñuxãcü tá na Ngechuchuxü yayauxgüxcèx. ¹¹ Rû yexguma yemaxü naxinüëgu, rü nümagü ga yema ãëxgacügü rü nataãëgü. Rû dïëru Yudana ngixü naxuaxügu. Rû yexgumama inanaxügü ga Yuda ga naxcèx na nadauxü ga ñuxãcü nüxcèx na natauxchaxëëgüãxü na duüxcügüechita Ngechuchuxü yayauxgüxcèx.

Coriarü õnachiga
(Mt 26.17-29; Lc 22.7-23; Cu 13.21-30; 1 Co 11.23-26)

¹² Rû nawa nangu ga ngunexü ga nagu inaxügüxcèx ga yema peta ga pãu ga ngearü puxëëruüãxü nagu nangõxgüxcèx. Rû yema nixi ga ngunexü ga nagu carneruxacü naxcèx yamèxgüxcèx ga Üpetüchigaarü peta. Rû yexguma ga norü ngúexügü rü Ngechuchuna nacagü, rü ñanagürügü: —¿Ngextá cunaxwëxe na tanamexëëxü i õna i Üpetüchigaarü petagu ingõxü? —ñanagürügü. ¹³ Rû yexguma ga nüma rü nanamu ga taxre ga norü ngúexügü, rü ñanagürü nüxcèx: —¿Ëcü, yéa íãnewa pexi! Rû ngëxma tá nüxcèx peyangau i wüxi i yatü i wüxi ya tüxcèx ya dexámaã ããcuxe ngëxma tüxcèx ingexü. ¿Rü nawe perüxcèx! ¹⁴ —¿Rü yima ípata ya nagu yaxücüne i ngëma yatü, rü yima íãrü yoramaã nüxcèx pixu, rü ñapegügü nüxcèx:

“Torü ngúexêëruü nüxü nacuáxchaü na ngêxü yîixü i ngêma ucapu i norü ngúexüğümaã tá nawa nachibüxü i Üpetüchigaarü õnagu”, ñapegügü nüxü! ¹⁵ —Rü nüma tá pexü nüxü nadauxêë i wüxi i ucapu i taxü i marü meã mexêëxü i norü daxüchiüwa ngêxmaxü. ¡Rü ngema penamexêëx i tórü õna i Üpetüchigacèx ixixü! —ñanagürü nüxü. ¹⁶ Rü inaxîãchi ga yema taxre ga ngúexüğü, rü ñanewa naxî. Rü yexma nüxü inayangaugü ga guxüma yema Ngechuchu namaã nüxü ixuxürüü. Rü yéma nanamexêë ga õna ga Üpetüchigacèx ixixü. ¹⁷ Rü yexguma marü nachütachaügu, rü ínangu ga Ngechuchu namaã ga yema 12 ga norü ngúexüğü. ¹⁸ Rü yexguma mechawa ínachibüeyane, rü Ngechuchu rü ñanagürü nüxü: —Aixcüma pemaã nüxü chixu rü wüxie ya petanüwa i ñuxma chomaã nuã chibüxe tá tixî ya bexma choxü íyaxuaxüxê —ñanagürü. ¹⁹ Rü yexguma ga nümagü ga norü ngúexüğü rü poraãcü nangechaüğü. Rü inanaxüğüe ga na wüxichigü nüxna icachigüxü, rü ñanagürüğü: —Pa Corix, ¿choma tá chiixü i cuxü íchayaxuaxüxü? —ñanagürüğü. ²⁰ Rü nüma ga Ngechuchu nanangãxü rü ñanagürü nüxü: —Wüxi i pema i 12 tanüwa i daatama poratuwa norü pãu iwaixêëxü, rü ngêma tá nixî i choxü íyaxuaxüxü. ²¹ —Rü choma i Tupana Nane na duüxüxü chiixü, rü tá chayü ngêma Tupanaarü ore i ümatüxü nüxü ixuxürüü. Natürü wüxi i ngechaüxüchi nixî naxcèx i ngêma yatü i choxü íyaxuaxüxü. Rü narümemaë chi nixî ga noxtacüma tãu chima na nabuxü —ñanagürü. ²² Rü yexguma ínachibüeyane, rü Ngechuchu nanayaxu ga pãu. Rü Tupanana moxê naxã, rü inanabücu, rü norü ngúexüğüxü nayanu. Rü ñanagürü nüxü: —¡Penayaux i ñaã pãu! Rü ngêma rü chaxunehiga nixî —ñanagürü. ²³ Rü yemawena nanayaxu ga wüxi ga pochiyu ga binumaã aãcuxü. Rü yexgumarüü ta Tupanana moxê naxcèx naxãxîra, rü ñuxüchi norü ngúexüğüna nanaxã. Rü guxüma nawa naxaxegü. ²⁴ Rü ñanagürü nüxü: —Daa binu ya chaugü i muxüma i duüxügücèx ibacüchiga nixî. Rü yimawa Tupana meãma nanangoxêë na aixcüma yîixü i norü uneta. ²⁵ —Rü aixcüma pemaã nüxü chixu rü tãxütáma wena chayaxaxü ya daa binu ñuxmatáta Tupana aëxgacü íixixüwa binu ya ngexwacaxücü chayaxaxüx —ñanagürü.

Ngechuchu nüxü nixu rü Pedru rü taxütáma nügü nixu na norü ngúexü yîixü
(Mt 26.30-35; Lc 22.31-34; Cu 13.36-38)

²⁶ Rü ñuxüchi nawiyaegü ñuxre ga Tupanaarü wiyaegu. Rü yemawena rü Oríbunecüarü Mèxpúnewa naxî. ²⁷ Rü yexguma ga Ngechuchu rü ñanagürü nüxü: —Guxãma i pema rü tá choxü ípetèxgü. Erü ngêmaãcü nüxü nixu i Tupanaarü ore i ümatüxü i ñaxü: “Tá chayamèx ya carneruarü dauruü, rü tá nanaxüanemare i carnerugü”, ñaxü. ²⁸ —Natürü ngêxguma marü yuwa ícharüdaxguwena, rü chaxira tá pexüpa Gariréanewa chaxü —ñanagürü. ²⁹ Rü yexguma ga Pedru rü ñanagürü nüxü: —Woo guxüma i togü cuxü ítèxgu, rü choma rü tãütáma cuxü íchatèx —ñanagürü. ³⁰ Rü Ngechuchu nanangãxü rü ñanagürü nüxü: —Aixcüma cumaã nüxü chixu rü ñomatama i chütaxügu rü naxüpa na taxreëxpüxcüna yaçaxü i otá, rü tomaëxpüxcüna taxütáma cugü quixu na chorü duüxü quiixü —ñanagürü. ³¹ Natürü nüma ga Pedru rü ñanagürüama: —Woo wüxigu cumaã chayuxgu, rü tãxütáma chaugü ichicux na curü duüxü chiixü —ñanagürü. Rü guxüma ga togü ga norü ngúexüğü rü ta yema ñanagürüğü.

Ngechuchu rü Yechemaníwa nayayümüxê
(Mt 26.36-46; Lc 22.39-46)

³² Rü yemawena rü Ngechuchu rü norü ngúexüğü rü nawa naxî ga wüxi ga nachica ga Yechemanígu aëgaxü. Rü Ngechuchu rü ñanagürü nüxü: —¡Nuã perütogü yoxni paxa yéa chayayümüxê! —ñanagürü. ³³ Rü ñuxüchi ínayagagü ga Pedru, rü Chaütiágu, rü Cuáü. Rü naxcèx inaxüğü ga na poraãcü nangechaüxü rü naxixãchiãëxü. ³⁴ Rü yexguma rü ñanagürü nüxü: —Poraãcü changechaü, rü nagu charüxînü na ngêmamaã tá chayuxü. ¡Rü nuxa perücho i pemax, rü ipedaue! —ñanagürü. ³⁵ Rü yexguma ga Ngechuchu rü yéaxüra naxü. Rü ñaxtüanegu nanangücuchi. Rü Tupanana naxcèx naca

na nawa ínanguxuchixüçèx ga yema ngúxü ga yexguma chi Tupanaärü ngúchaü yixügu. ³⁶ Rü norü yumüxëwa rü ñanagürü: —Pa Chaunatüx, cuxcèx rü guxüma natauxcha. ¡Rü nüxna choxü ínanguxuchixëë i ñaã ngúxü i tá choxü üpetüxü! Natürü chanaxwëxe i cunaxü i cuxrütama ngúchaü rü tama i choxrü —ñanagürü. ³⁷ Rü ñuxüchi nataegu ga norü ngúexüğü íyexmagüxüwa. Rü nüxü inayangau ga na ínapeexü. Rü ñanagürü Pedruxü: —Pa Chimáüx, ¿Ícupe? ¿Tama éxna namaã cupora na icudauxü, rü bai i wüxi i ora? ³⁸ —¡Rü ipedaue, rü Tupanana naxcèx peça na pexü nangüxëëxüçèx na tama choxü ípetáxüçèx i ngëxguma tacü rü guxchaxü pexü üpetügu! Erü aixcüma peëwa rü ípememare, natürü pexene nixí i ngëma turaxü —ñanagürü. ³⁹ Rü wenaxärü ínixü, rü noxrirütama nayayumüxë. ⁴⁰ Rü yexguma wenaxärü norü ngúexüğüçèx nataegugu, rü nüxü inayangau ga na wenaxärü ínapeexü, yerü poraãcü nayaxtaexüchi. Rü yemacèx ga nümagü rü tama nüxü nacüexgü ga na tacümaã tá nangäxüğüäxü. ⁴¹ Rü norü tomaëxpüxcüna wenaxärü norü ngúexüğüçèx nataegu, rü ñanagürü nüxü: —¿Ñuxma rü ta éxna ípepeema rü iperüngüëãma? ¡Rü marütama! Erü choma i Tupana Nane na duüxüxü chíxü rü marü nawa nangu i ora na choxü na yayauxgüxü rü nüxna na choxü namugüxüçèx i duüxüğü i chixexü i pecaduãxgüxü. ⁴² —¡Rü ipechigü, rü ngíxã ítixí! Erü marü ñomama nixí i ngëma choxü íyaxuaxüxü —ñanagürü.

Ngechuchuxü niyauxgü

(Mt 26.47-56; Lc 22.47-53; Cu 18.2-11)

⁴³ Rü yexguma íyadexayane ga Ngechuchu, rü ínangu ga Yuda ga norü ngúexüchirëx ixíxü. Rü nawe narüxí ga muxüma ga duüxüğü ga taramaã rü naímaã ixäxnexü. Rü yema nixí ga duüxüğü ga yéma namugüxü ga paigüarü äëxgacüğü rü ngúexëëruüğü ga mugüwa nguxëëtaegüxü rü Yudíugüarü äëxgacüğüerugü. ⁴⁴ Rü Yuda ga ínaxuaxüxü rü marü yema duüxüğümaã nanamexëë, rü ñanagürü:

“Ngëma nüxü chachúxuxü nixí i Ngechuchu. Rü ngëma tá nixí i piyauxgüxü rü meã peyanáíacüma peyagagüxü” —ñanagürü. ⁴⁵ Rü yemaãcü Ngechuchucèx nixü, rü ñanagürü nüxü: —Pa Ngúexëëruüx —ñanagürü. Rü ñuxüchi nanachüxu. ⁴⁶ Rü yexgumatama Ngechuchuxü niyauxgü. ⁴⁷ Natürü wüxi ga Ngechuchutanüxü nanawëxechi ga norü tara, rü yemamaã paigüarü äëxgacüarü duüxüxü ínadaechinü. ⁴⁸ Rü yexguma ga Ngechuchu rü yema duüxüğüna naca, rü ñanagürü nüxü: —¿Tüxcüü taragü rü naixmenëxägümaã chauxcèx nuã pexí na choxü peyarüyaxgüxüçèx ñoma wüxi i ngítëxáxü chíxürüü? ⁴⁹ —Rü guxü ga ngunexügu rü petanüwa chayexma ga yexguma tupauca ga taxünewa changuxëëtaegu, rü taguma choxü piyauxgü. Natürü ñaã ñuxma ngupetüxü, rü nangupetü na yanguxüçèx i Tupanaärü ore i ümatüxü —ñanagürü. ⁵⁰ Rü yexguma ga guxüma ga norü ngúexüğü rü nüxna nibuxmü. Rü nüxícatama yéma nanatëxgü ga Ngechuchu. ⁵¹ Natürü wüxi ga ngextüxücü ga düxruümaãxíca nüğü nuquecü nawe nixüchigü. Rü yema duüxüğü rü nayayauxgü. ⁵² Natürü nüma rü nüxü ningëx ga yema düxruü, rü yemaãcü ngexchiruãcüma niña.

Äëxgacüğüpëxewa Ngechuchuxü nagagü

(Mt 26.57-68; Lc 22.54-55, 63-71; Cu 18.12-14, 19-24)

⁵³ Rü yexguma ga yema duüxüğü rü paigüarü äëxgacüğüpëxewa nanagagü ga Ngechuchu. Rü yexma nangutaquëxegü ga guxüma ga togü ga paigü ga äëxgacüğü ixíğüxü, rü yema Yudíugüarü äëxgacüğüerugü, rü yema ngúexëëruüğü ga mugüwa nguxëëtaegüxü. ⁵⁴ Natürü ga Pedru rü yaxügu nawe nixächigü ñuxmata guma paigüarü äëxgacüpataëxtüwa nangu. Rü purichíagü ga tupauca ga taxünearü dauruüğümaã yéma íãxtüwa narüto. Rü nüğü yéma nanaixü üxüxütawa. ⁵⁵ Rü yema paigüarü äëxgacüğü rü guxüma ga yema togü ga äëxgacüğü ga itaxü rü naxcèx nadaugü ga ñuxäcü Ngechuchuxü na ínaxuaxüğüxü rü na yamëxgüäxüçèx. Natürü taxucürüwa nüxü inayangaugü ga tacüçèx tá na yamëxgüäxü. ⁵⁶ Yerü woo muxüma ga duüxüğü rü nüxü

nixugüe ga doramare ga nachiga, natürü nügütanüwatama rü tama nawüxigu ga norü ore. ⁵⁷⁻⁵⁸ Rü ñuxre ga togü inachigü rü doraxümare nixugüe ga Ngechuchuga. Rü ñanagürügü: —Toma nüxü taxĩnüe ga na ñaxü:

“Tá chanangutaxüxëe ya daa tupauca ya taxüne ya duüxügü üxüne. Rü tomaëxpüx i ngunexügu tá chanaxü ya náí ya tama duüxügü üxüne”, ñaxü —ñanagürügü. ⁵⁹ Natürü woo yema oremaã, rü tama nawüxiguéga ga norü ore. ⁶⁰ Rü yexguma ga guma paigüarü äëxgacü rü guxüpëxewa inachi. Rü Ngechuchuna naca, rü ñanagürü: —¿Éxna taxuxümaãma cunangãxü i ñuxmax? ¿Rü tacü nixĩ i ngëma nüxü yaxugüxü i cuchiga? —ñanagürü. ⁶¹ Natürü ga Ngechuchu rü nangeëxmare, rü taxuxümaãma nanangãxü. Rü yemacëx ga nüma ga paigüarü äëxgacü rü wenaxârü nüxna naca, rü ñanagürü: —¿Rü cuma quiixü ya Cristu ya Tupana ya mecü Nane? —ñanagürü. ⁶² Rü Ngechuchu rü ñanagürü nüxü: —Ngü. Ngëma nüxü quixuxü chixĩ. Rü tá choxü pedaugü i ngëxguma Tupana ya poracüarü tügüncüwawa charütöxgu rü ngëxguma caixanexügu wenaxârü núma chaxüxgu —ñanagürü. ⁶³ Rü yexguma ga guma paigüarü äëxgacü rü norü numaã nügüchirugu nagaugü. Rü ñanagürü: —¿Tüxcüü marü tanaxwëxe i to i duüxü i nüxü ixugüxü i nachiga? ⁶⁴ —Rü pematama marü nüxü pexĩnüe na ñuxãcü Tupanamaã naguxchigaxü. ¿Rü ñuxü ñapegüxü i ñuxmax? —ñanagürü. Rü guxüma wüxigu narüxĩnüe rü: —Aixcüma nixĩ na chixexü naxüxü rü namexü na nayuxü —ñanagürügü. ⁶⁵ Rü ñuxre ga nümagü rü inanaxügüe ga nüxna na naçuaixgüexü. Rü nanatüxetügü rü ñuxüchi nüxü nidagügü ñaxümaã: —¡Nüxü nacüex na texé cuxü idagüxü! —ñanagürügü. Rü yema tupauca ga taxüneârü dauruügü ga purichíagü rü nanapechiwegü.

Pedru rü tama nügü nixu na Ngechuchuxü nacuéxü

(Mt 26.69-75; Lc 22.56-62; Cu 18.15-18, 25-29)

⁶⁶ Rü yoxni ga Pedru rü ñaxtüwa äëxgacüpataëxtüwa nayexma. Rü yexgumayane yéma ingu ga wüxi ga pacü ga guma äëxgacüarü duüxü ixícü. ⁶⁷ Rü yexguma Pedruxü nadëuxgu ga yéma üxüxütawa nügü na nanaixüxü, rü meã nüxü idawenü, rü ngigürügü nüxü: —Cuma rü ta namücü quixĩ i ngëma Ngechuchu i Nacharétucüãx —ngigürügü. ⁶⁸ Natürü ga Pedru rü nügü inicux na Ngechuchuarü duüxü yíixü, rü ñanagürü: —Choma rü tama nüxü chacuèx ya yima. Rü tama nüxü chacuèx i tacüchiga nixĩ i ngëma nüxü quixuxü —ñanagürü. Rü yexguma ga nüma rü ípataëxtüarü düxétüwa naxü. Rü yexgumatama nica ga otá. ⁶⁹ Natürü ga yema pacü rü wenaxârü Pedruxü idau, rü inaxügü ga yema togümaã nüxü na yaxuxü, rü ngigürügü: —Ñã rü wüxi i natanüxü nixĩ —ngigürügü. ⁷⁰ Natürü nüma ga Pedru rü wena tama nügü nixu. Rü yixcamaxüra rü yema duüxügü ga yéma yexmagüxü rü wenaxârü ñanagürügü nüxü: —Aixcüma nixĩ na cuma rü ta ngëma Ngechuchutanüxü na quiixü, erü wüxi i Gariréaanecüãx quixĩ —ñanagürügü. ⁷¹ Rü yexguma ga Pedru rü poraãcü nügü nixã, rü ñanagürü: —Rü aixcüma tama nüxü chacuèx i ngëma yatü i nachiga pidexagüxü. Rü ngëxguma doraxü chixuxgu rü ¡Tupana choxü poxcux! —ñanagürü. ⁷² Rü yexgumatama norü taxreëxpüxcüna nica ga otá. Rü yexguma ga Pedru rü nüxna nacüexãchi ga yema ore ga üpaacü Ngechuchu namaã nüxü ixuxü ga ñaxü:

“Rü naxüpa na taxreëxpüxcüna otá içaxü, rü cuma rü tá tomaëxpüxcüna cugü quicux na chorü duüxü quiixü”, ñaxü. Rü yexguma ga Pedru rü poraãcüxüchima naxaxu.

15

Piratupëxewa nayexma ga Ngechuchu

(Mt 27.1-2, 11-14; Lc 23.1-5; Cu 18.28-38)

¹ Rü yexguma yangunegu, rü nangutaquëxegü ga äëxgacügü ga taxügü ga paigüarü äëxgacügü rü Yudíugüarü äëxgacügüerugü rü ngüexëeruügü ga mugüwa ngüxëëtaegüxü rü guxüma ga togü ga yema äëxgacügütanüwa ügüxü. Rü Ngechuchuxü

yanèixgüchacüüácüma ãëxgacü ga Piratuxütawa nanagagü. ² Rû nüma ga Piratu rû Ngechuchuna naca rû ñanagürü: —¿Cuma quiixü i Yudíugüarü ãëxgacü ya tacü? —ñanagürü. Rû Ngechuchu nanangãxü, rû ñanagürü: —Ngü, yima nüxü quixucü chixi —ñanagürü. ³⁻⁴ Natürü yema paigüarü ãëxgacügü rû poraãcü ínanaxuaxügüama, rû yemacèx ga Piratu rû wenaxârü Ngechuchuna naca, rû ñanagürü: —¿Éxna taxuxümaãma cunangãxü? ¿Dücèx i ñuxre i cuchiga i nüxü yaxugüexü! —ñanagürü. ⁵ Natürü ga Ngechuchu rû taxuxümaãma nanangãxü. Rû yemacèx ga Piratu rû poraãcü nabaixãchiãë.

Piratu rû Ngechuchumaã nanaxuegu na nayuxüçèx
(Mt 27.15-31; Lc 23.13-25; Cu 18.38-19.16)

⁶ Rû gucü ga taunecügu ga yexguma yema Üpetüchigaarü petawa nanguxgu rû Piratu ínananguxuchixëëxü ga wüxi ga poxcuxü ga duüxügü naxcèx ícagüxü, yerü yema nixi ga nacüma. ⁷ Rû wüxi ga yatü ga Barabágu äegaxü, rû poxcupataügu napoxcu wüxigu namaã ga togü ga natanüxü ga máëtagüxü ga yexguma ãëxgacüxü ínatèxüchigüchaügu. ⁸ Rû yema duüxügü rû yéma Piratuxütawa nangugü. Rû ínanaxügü ga Piratuna na nacagüexü na naxcèx yangéãxüçèx ga wüxi ga poxcuxü aixrügumarüü. ⁹ Rû Piratu nanangãxü, rû ñanagürü: —¿Penaxwèxexü na pexcèx íchananguxuchixëëxü ya yima Ngechuchu ya duüxügü Yudíugüarü ãëxgacümaã naxugüãcü? —ñanagürü. ¹⁰ Rû yema ñanagürü ga Piratu yerü nüxü nacüex ga na yema paigüarü ãëxgacügü rû na yaxauxãchiexüçèx yixü ga Ngechuchu nüxna yamugüãxü. ¹¹ Natürü ga yema paigüarü ãëxgacügü rû duüxügüxü namugü ga na tagaãcü naxcèx ínacagüxü ga na Barabáxü yangéxüçèx. ¹² Rû yexguma ga Piratu rû nüxna naca, rû ñanagürü: —¿Rü tacü nixi i penaxwèxexü na chanaxüxü namaã ya yima Yudíugüarü ãëxgacügu pexüégacü? —ñanagürü. ¹³ Rû nümagü ga duüxügü rû tagaãcü nanangãxügü, rû ñanagürügü: —¿Curuchawa yapota! —ñanagürügü. ¹⁴ Rû yexguma ga Piratu rû ñanagürü nüxü: —¿Natürü tacü rû chixexü naxü? —ñanagürü. Natürü ga nümagü rû wenaxârü tagaãcü ñanagürügü: —¿Curuchawa yapota! —ñanagürügü. ¹⁵ Rû yexguma ga Piratu rû Barabáxü ínananguxuchixëë, yerü duüxügüxü nataãëxëëchaü. Rû yexguma churaragüxü Ngechuchuxü naçuaixëëguwena ga Piratu, rû ñuxüchi nüxna nanamu na curuchawa yanapotagüãxüçèx. ¹⁶ Rû yexguma ga nümagü ga churaragü rû ãëxgacüpataëxtüwa nanagagü. Rû yéma nanangutaquëxexëë ga guxüma ga namücügü ga churaragü. ¹⁷ Rû ñuxüchi ga yema churaragü rû wüxi ga máxü ga daucharaxü ga naxchirugu nayacüxëëgü. Rû naëruwa nayangèxcuchigü ga wüxi ga boxü ga chuchuxüwa naxügüxü. ¹⁸ Rû yemawena ínanaxügü na tagaãcü ñagüxü: —¿Namaxü ya Yudíugüarü ãëxgacü! —ñagüxü. ¹⁹ Rû wüxi ga naixmenëxãmaã naëruwa nanaçuaixcagü, rû nüxna nacuaixgü. Rû napëxegu nacaxãpüxügü rû nüxü nicuëxüügüneta. ²⁰ Rû yexguma yemaãcü nagu yadauxcüraxügüguwena, rû ínacacüxuchigü ga yema naxchiru ga daucharaxü. Rû wenaxârü naxchirugutama nayacüxëëgü. Rû ñuxüchi ínanagaxüchigü na curuchawa yanapotagüãxüçèx.

Ngechuchuxü curuchawa nipotagü
(Mt 27.32-44; Lc 23.26-43; Cu 19.17-27)

²¹ Rû yéma naxüpetü ga wüxi ga yatü ga Chirenecüãx ga Chimáügu äegacü ga Areyáüdrü rû Rufu nanatü ixicü ga naãnewa ne ücü. Rû yexguma yéma naxüpetügu rû yema churaragü rû guma yatüxü ngixü iningexëëgü ga Ngechuchuarü curucha. ²² Rû Ngechuchuxü nawa nagagü ga wüxi ga nachica ga Górgutagu äegaxü. Rû yema naega rû: Duüxëërchinëxãchitaü, ñaxüchiga nixi. ²³ Rû nüxna nanaxägü ga binu ga miramaã äëücü. Natürü nüma ga Ngechuchu rû tama nayaxaxü. ²⁴ Rû yemawena curuchawa nayapotagü. Rû nümagü ga churaragü rû wüxi ga diëru ngixü nañanagügü na yemawa nüxü nacüexgüxüçèx na ñuxãcü tá nügümaã yatoyeãxüçèx ga Ngechuchuchiru, rû tacü

tá na yangexũ ga wũxichigũ. ²⁵ Rũ meãma 9 arũ oragu ga pèxmama nixĩ ga curuchawa yapotagũãxũ. ²⁶ Rũ yéma nayapocuchi ga wũxi ga mũrapewa ga ãegatachinũxũ ga nũxũ ixuxũ ga tacũcèx curuchawa na yapotagũãxũ. Rũ yema naega ga mũrapewagu ùxũ, rũ ñanagũrũ: “Yudĩugũarũ ãëxgacũ”, ñanagũrũ. ²⁷ Rũ naxrũũ curuchawa nayapotagũ ga taxre ga máëtagũxũ rũ wũxi ga norũ tũgũnecũwawa rũ to ga norũ toxwecũwawa. ²⁸ Rũ yemaãcũ ningu ga Tupanaãrũ ore ga ùmatũxũ ga ñaxũ:

“Ngẽma chixexũ ùgũxũtanũwaama natèx”,

ñaxũ. ²⁹⁻³⁰ Rũ yema duũxũgũ ga yéma chopetũxũ, rũ Ngechuchumaã naguxchigagũ, rũ nanexãerugũãcũma ñanagũrũgũ: —¡Dũcèx! Cuma cunangutaũxẽëega ya tupauca ya taxũne, rũ tomaëxpũx i ngunexũgu wenaxãrũ ícunadaxẽëega. ¡Ëcũ! ¡Cugũtama namaxẽë i ñũxmax, rũ írũxĩ i curuchawa! —ñanagũrũgũ. ³¹ Rũ yexgumarũũ ta Ngechuchuxũ nacugũecũraxũ ga paigũarũ ãëxgacũgũ, rũ ngũexẽëruũgũ ga ore ga mugũwa nguxẽëtaegũxũ. Rũ ñanagũrũgũ: —Nũma rũ togũxũ namaxẽëë, natũrũ taxucũrũwama nũgũtama namaxẽë. ³² —¡Ñũxma rũ ínaxĩx i curuchawa i ngẽma Cristu i Iraéanecũãxãrũ ãëxgacũ na nũxũ idaugũxũcèx rũ nũxũ yaxõgũxũcèx! —ñanagũrũgũ. Rũ woo ga yema máëtagũxũ ga naxrũũ curuchawa ipotagũxũ, rũ namaã naguxchigagũ.

Nayu ga Ngechuchu

(Mt 27.45-56; Lc 23.44-49; Cu 19.28-30)

³³ Rũ yexguma tocuchiwa nanguxgu, rũ guxũ ga naãnewa naxẽãne ñũxmata yáuanecũ tomaëxpũxarũ orawa nangu. ³⁴ Rũ yematama oragu rũ tagaãcũ aita naxũ ga Ngechuchu, rũ ñanagũrũ: —Eríx, Eríx, ¿damá chabátani? —ñanagũrũ. Rũ ngẽma rũ ñaxũchiga nixĩ: “Pa Chorũ Tupanax, Pa Chorũ Tupanax ¿tũxcũũ choxũ nuã cutèx?” ñaxũchiga nixĩ. ³⁵ Rũ nũmaxũ ga duũxũgũ ga yéma yexmagũxũ, rũ nũxũ naxĩnũë rũ ñanagũrũgũ: —¡Dũcèx, nũxũ pexĩnũë! Nuxcũmaũcũ ga Tupanaãrũ orearũ uruũ ga Eríacèx naca —ñanagũrũgũ. ³⁶ Rũ yexguma rũ wũxi ga yema duũxũgũ ga yéma yexmagũxũ, rũ inaãnaãchi rũ wũxi ga tũaxmũ niwaixẽë namaã ga binu ga marũ ngũchièxũchicũ. Rũ wũxi ga dexnewa nayanèĩx, rũ ñũxũchi Ngechuchuxũgu nanawèx na nũxũ natuxuxũcèx. Rũ yema togũxũ ñanagũrũgũ: —¡Yixrũma! ¡Ngĩxã rũ itarũdaunũ ngoxita Ería nuã ù na curuchawa ínaxĩxẽãxũcèx! —ñanagũrũgũ. ³⁷ Natũrũ nũma ga Ngechuchu rũ tagaãcũ aita naxũ, rũ ñũxũchi nayu. ³⁸ Rũ yexguma ga tupauca ga taxũneãrũ tũyemachiãxũ rũ taxregu narũgaute. Rũ daxũwa inaxũgũ ga na nagautexũ rũ ñũxmata ñaxtũwa nangu. ³⁹ Rũ guma churaragũarũ ãëxgacũ ga Dumacũãx ga Ngechuchupèxewa yexmacũ, rũ yexguma nũxũ nadèũxgu ga na nayuxũ, rũ ñanagũrũ: —Aixcũma nixĩ ya daa yatũ i Tupana Nane na yĩxũ —ñanagũrũ. ⁴⁰ Rũ iyexmagũ ta ga ñũxre ga ngecũgũ ga yéma yaxũwa nũxũ rũdaunũcũ. Rũ yematanũwa iyexmagũ ga María ga Magadãcũãx, rũ Charumé, rũ María ga Yúche rũ Chaũtiãgu ga rũbumaècũ naë. ⁴¹ Rũ yema ngecũgũ iyixĩ ga Ngechuchuxũ íixũmũcũgũcũ rũ nũxũ rũngũxẽëgũcũ ga yexguma Gariréaanewa nayexmagu. Rũ yexgumarũũ ta yéma iyexmagũ ga mucũma ga naĩgũ ga ngecũgũ ga Ngechuchuwe rũxĩcũ ga yexguma Yerucharèũwa naxũxgu.

Ngechuchu rũ naxmaxũgu nayanaxũcuchigũ

(Mt 27.57-61; Lc 23.50-56; Cu 19.38-42)

⁴²⁻⁴³ Rũ yexguma marũ nachũtachaũgu ga yema ngunexũ ga Yudĩugũ nagu nũgũ imexẽëgũxũ naxcèx ga ngũxchigaarũ ngunexũ, rũ noxtacũma Piratuxũtawã naxũ ga Yúche ga Arimatéacũãx. Rũ nũma ga guma Yúche rũ Yudĩugũarũ ãëxgacũgũ ga tacũtanũwa naxũ, rũ wũxi ga ãëxgacũ ga poraãcũ nũxũ nangechaũgũcũ nixĩ. Rũ nũma rũ ta ínanguxẽë na Tupana norũ ãëxgacũ yĩxũcèx. Rũ Piratuxũtawã naxcèx ínayaca ga Ngechuchuxũne. ⁴⁴ Rũ nabaixãchiãë ga Piratu ga marũ na nayuxũ. Rũ yemacèx norũ churaragũarũ ãëxgacũcèx nangema na nũxna naçaxũcèx na ñũxgumama yĩxũ ga marũ na nayuxũ. ⁴⁵ Rũ yexguma norũ churaragũarũ ãëxgacũ namaã nũxũ ixuxgu ga marũ

na nayuxŭ, rŭ nŭma ga Piratu rŭ Yŭchena nanaxã ga naxŭne. ⁴⁶ Rŭ yexguma ga Yŭche rŭ naxcèx nataxe ga wŭxi ga naxchãpenŭŭ ga mexèchixŭ. Rŭ curuchawa nanayaxu ga Ngechuchuxŭne, rŭ yema naxchãpenŭŭmaã nananuque. Rŭ wŭxi ga mèxpŭne ga nutanaxcèxgu ũpaacŭ yacaxmaŭgŭxŭ ga naxmaxŭgu nayanaxŭcuchi. Rŭ ñuxŭchi wŭxi ga nuta ga tacŭmaã nanangŭxtaŭ. ⁴⁷ Rŭ María ga Magadãcŭãx rŭ María ga Yŭche naē rŭ nŭxŭ irŭdaunŭ ga ngexta na yanaxŭcuchigŭãxŭ.

16

Wenaxãrŭ namaxŭ ga Ngechuchu

(Mt 28.1-10; Lc 24.1-12; Cu 20.1-10)

¹ Rŭ sabaduarŭ ngunexŭguwena, rŭ María ga Magadãcŭãx, rŭ Charumé, rŭ María ga Chaŭtiãgu naē naxcèx itaxegŭ ga pumara na namaã nachaãxŭcèx ga Ngechuchuxŭne. ² Rŭ pèxmamaxŭchi ga noxri ũèxcŭ iyarŭgoxgu ga yŭxŭarŭ ngunexŭgu, rŭ yema ngecŭgŭ rŭ íyadaugŭ ga yema naxmaxŭ ga nagu yanaxŭcuchigŭãxŭwa. ³ Rŭ ngŭgŭ ngŭgŭrŭgŭgŭ: —¿Texé tá taxcèx ítanaxŭgachi ya yima nuta ya namaã nangŭxtaŭcŭ? —ngŭgŭrŭgŭgŭ. ⁴ Natŭrŭ yexguma meãma nŭxŭ nadaunŭgu, rŭ nŭxŭ idaugŭ ga marŭ na ínaxŭgachixŭ ga guma nuta ga tacŭ ga namaã nangŭxtaŭcŭ ga yema naxmaxŭ. ⁵ Rŭ yexguma nagu nadaugŭga ga yema naxmaxŭ, rŭ nŭxŭ idaugŭ ga wŭxi ga ngextŭxŭcŭ ga mèxchiruxŭ ga cómŭchiruxŭ ga yéma naxmaxŭãrŭ tŭgŭnecŭwawa rŭtoxŭ. Rŭ poraãcŭ íbaixãchiãegŭ ga yema ngecŭgŭ. ⁶ Natŭrŭ nŭma rŭ ñanagŭrŭ ngŭxŭ: —¡Tãxŭ i pebaixãchiexŭ! Pema rŭ naxcèx pedaŭgŭ ya Ngechuchu ya Nacharétucŭãx ga guma curuchawa yapotagŭãcŭ. Marŭ wena namaxŭ, rŭ nataxuma i nuã. ¡Dŭcèx, meã nŭxŭ pedèux i ñaã nachica ga nagu naxŭgŭãxŭ! ⁷ —¡Rŭ paxa ípixŭ rŭ Pedrumaã rŭ ngèma togŭ i ngŭexŭgŭmaã nŭxŭ peyarŭxugŭe, rŭ ñapegŭgŭ nŭxŭ:

“Nŭma ya Ngechuchu rŭ marŭ nŭxŭra pexŭpa Gariréaanewa naxŭ. Rŭ ngèma tá nŭxŭ peyadaugŭ ngèma pemaã nŭxŭ yaxuxŭrŭŭ”, ñapegŭgŭ nŭxŭ! —ñanagŭrŭ. ⁸ Rŭ yexguma ga yema ngecŭgŭ rŭ nŭxna íyabuxmŭ ga yema naxmaxŭ, yerŭ ngŭrŭ muŭèmaã poraãcŭ iyadurŭxe. Rŭ taxŭemaãma nŭxŭ iyaxugŭgŭ, yerŭ poraãcŭ imuŭe.

Ngechuchu rŭ ngŭxcèx nangox ga María ga Magadãcŭãx

(Cu 20.11-18)

⁹ Rŭ yexguma Ngechuchu yuwa írŭdaxguwena ga noxri yangunegu ga yŭxŭarŭ ngunexŭgu, rŭ ngŭxcèxira nangox ga María ga Magadãcŭãx ga ngŭwa ínawoxŭãcŭ ga 7 ga ngoxogŭ. ¹⁰ Rŭ ngŭma rŭ íyaxŭ, rŭ namaã nŭxŭ iyarŭxu ga yema Ngechuchumŭcŭgŭ ga íngechaŭgŭxŭ rŭ íxauxexŭ. ¹¹ Natŭrŭ ga nŭmagŭ rŭ tama nayaxŭgŭchaŭ ga yexguma nŭxŭ naxŭnŭègu ga na namaxŭxŭ ga Ngechuchu rŭ na nŭxŭ nadauxŭ ga ngŭmax.

Ngechuchu rŭ taxre ga norŭ ngŭexŭgŭcèx nangox

(Lc 24.13-35)

¹² Rŭ yemawena ga Ngechuchu rŭ tŭocŭ nangox naxcèx ga taxre ga norŭ ngŭexŭgŭ ga yexguma nama ga naãnewaama nadaxŭgu naxŭxgu. ¹³ Rŭ nŭmagŭ rŭ nawoegu, rŭ yema togŭ ga ngŭexŭgŭmaã nŭxŭ nayarŭxugŭ. Natŭrŭ yemagŭaxŭ rŭ ta tama nayaxŭgŭ.

Ngechuchu nanamu ga norŭ ngŭexŭgŭ

(Mt 28.16-20; Lc 24.36-49; Cu 20.19-23)

¹⁴ Rŭ yemawena ga Ngechuchu rŭ naxcèx nangox ga yema 11 ga norŭ ngŭexŭgŭ ga yexguma mechawa ínachibŭeyane. Rŭ nayangagŭ naxcèx ga tama aixcŭma na yaxŭgŭãxŭ rŭ tama na inaxŭnŭèxŭ. Yerŭ ga nŭmagŭ rŭ tama nŭxŭ nayaxŭgŭchaŭ ga yema nŭxŭ daugŭxŭ ga marŭ wena na namaxŭxŭ. ¹⁵ Rŭ ñanagŭrŭ nŭxŭ: —¡Guxŭ i naãnewa pexŭ rŭ guxŭ i duŭxŭgŭmaã nŭxŭ peyarŭxu i ore i mexŭ! ¹⁶ —Rŭ yŭxema yaxŭxè rŭ íbaiexe rŭ tá tŭxŭ nangèxma i maxŭ i taguma gŭxŭ. Natŭrŭ yŭxema tama yaxŭxè rŭ tá tapoxcu. ¹⁷ —Rŭ ñaã tá nixŭ i cuèxruŭgŭ i nawa nŭxŭ icuãxŭ i ngèma yaxŭgŭxŭ. Rŭ chauégagu tá

Ínanawoxũ i ngoxogũ. Rũ ngexwacaxũxũ i nagagũwa tá nidexagũ. ¹⁸—Rũ naxmẽxmaã tá nũxũ nayayauxãchi i ãxtapegũ. Rũ ngẽxguma yaxaxgũãgu i tacũ i nawa iyuxũ, rũ tãũtãma nanachixexẽẽ. Rũ tá tũxũ ningõgũgũ ya idaaweexe rũ tá tũmacèx nitaanegũ —ñanagũrũ.

Ngechuchu rũ daxũguxũ ga naãnewa naxũ

(Lc 24.50-53)

¹⁹ Rũ nũma ga Cori ga Ngechuchu rũ yexguma norũ ngúexũgũmaã yadeaxguwena, rũ Tupana rũ daxũguxũ ga naãnewa nanaga. Rũ Tupanaãrũ tũgũnecũwawa nayarũto. ²⁰ Rũ nũmagũ ga norũ ngúexũgũ rũ inaxĩãchi na guxũwama nũxũ yanaxugũexũ ga ore i mexũ. Rũ nũma ga Cori rũ nũxũ narũngũxẽẽ, rũ nanangoxẽẽ na aixcũma yĩxũ ga yema ore, yerũ wũxigu namaã napuracũ na naxũgũãxũcèx ga mexũ ga taxũgũ ga Tupanaãrũ poramaã naxũgũxũ.

ORE I MEXÜ GA LUCA ÜMATÜXÜ

Norü ügü i ore ga Ngechuchuchiga

¹⁻² Pa Mecü Pa Teóquirux, nayexma ga tacü ga totanüwa ngupetüxü. Rü muxüma ga duüxügü rü marü nanaxümatügü ga yemachiga, yexgumarüü ga tomaã nüxü na yaxugüexürüü ga yema duüxügü ga noxriarü ügügumama Ngechuchuxü daugüxü rü nüxü rüngüxëëgüxü ga norü orearü uchigawa. ³⁻⁴ Rü ngëmacëx, Pa Teóquirux, rü choma rü ta meãma naxcëx íchaca ga nachiga ga guxüma ga yema Ngechuchu üxü. Rü ñuxma rü chauxcëx rü name na meãma cuxcëx chanaxümatüxü i ngëma na meãma nüxü cucuáxcëx na aixcüma yíixü ga yema ore ga marüchirëx cuxü nangüxëëgüxü ga togü.

Tupanaärü orearü ngeruü ga daxücüãx nanaxunagü ga Cuáü ga baiüxëëruüärü buxchiga

⁵ Rü yexguma Erode äëxgacü ixixgu ga Yudéaanewa, rü yéma nayexma ga wüxi ga Yudíugüarü pai ga Zacaríagu äëgacü. Rü pai ga Arãütaa ga Abíatanüxü nixí ga nümax. Rü namëxéga rü Erichabé nixí. Rü tüma rü ta pai ga Arãütanüxü tixí. ⁶ Rü nüma ga Zacaríá rü namëx ga Erichabé rü meãma Tupanapëxewa, namaxë rü aixcüma naga naxínüë ga norü mugü. Rü yemaãcü taxucürüwa texé chixri nachiga tidexagü. ⁷ Natürü nangexacügü yerü namëx rü ingexacü. Rü ñuxüchi ga nümagü rü marü yaguãxgü nixígü. ⁸ Rü wüxi ga ngunexügu rü yema paigütücumü ga Zacaríá natanüwa üxügu nangu na tupauca ga taxünewa Tupanaärü puracü naxügüxcëx. ⁹ Rü yema paigü rü nacüma nixí ga nüxü na naxunetagüxü ga wüxi ga natanüxü na tupaucaarü aixepegu naxücuxüxcëx rü yéma Tupanacëx na yaguãxüxcëx ga pumara ga yixixü. Rü yema ngunexügu rü Zacaríagu nangu na tupaucaarü aixepegu naxücuxüxcëx na yéma yaguãxüxcëx ga pumara. ¹⁰ Rü yema pumara íyaguyane rü guxüma ga duüxügü ga düxétüwa yexmagüxü rü ínayumüxëgü. ¹¹ Rü ngürüächí Zacaríacëx nangox ga wüxi ga Tupanaärü orearü ngeruü ga daxücüãx. Rü yema nachica ga pumara nawa yagugüüxüärü tügünecüwagu nachí. ¹² Rü yexguma Zacaríá nüxü dèuxgu ga yema Tupanaärü orearü ngeruü ga daxücüãx, rü poraãcü nabaixächíãë, rü poraãcü namuü. ¹³ Natürü yema daxücüãx ga Tupanaärü orearü ngeruü rü ñanagürü nüxü: —Pa Zacaríax, ¡täxü i cumuüxü! Erü Tupana rü marü nüxü naxínü i curü yumüxë. Rü cuxmëx i Erichabé rü cuxü tá ixãxãcü, rü Cuáügu tá cunaxüéga. ¹⁴ —Rü cuma rü tá poraãcü cutaãëxüchi i ngëxguma nabuxgu. Rü muxüma i togü i duüxügü rü tá ta nataãëgüxüchi. ¹⁵ —Erü yima cune rü Tupanapëxewa rü tá wüxi ya mexëchicü nixí. Rü täütáma binu nayaxaxü, rü taxuüma to i tacü rü ngúchixáxü tá nixaxü. Rü tauta nabuyane rü Tupanaãë i Ünexü rü tá nüxna nangu. ¹⁶ —Rü nüma tá muxüma i Yudíugüxü narüngüxëë na norü Cori ya Tupanacëx nawoeguxüxcëx. ¹⁷ —Rü nüma ya Cuáü rü tá Cori ya Cristupëxegu nixü. Rü nuxcümaücü ga Tupanaärü orearü uruü ga Eríarüü tá nixí erü tá nüxü nangëxma i Tupanaãë i poraxü. Rü ngëmaãcü tá nüxü narüngüxëë i papágü na naxãcügüxü nangechaüxü, rü ngëma tama Tupanaga ínüechaüxü rü na aixcüma inaxínüëxüxcëx. Rü ngëmaãcü tá duüxügüxü ínamexëë naxcëx ya Cori ya Cristu —ñanagürü ga yema daxücüãx. ¹⁸ Rü Zacaríá rü yema daxücüãxna naca, rü ñanagürü: —¿Ñuxãcü tá nixí i ngëma na naxãxãcüxü i choxmëx? Erü marü chayaxüchi i chomax rü ngíma rü ta marü iya —ñanagürü. ¹⁹ Rü Zacaríaxü nangãxü ga yema daxücüãx, rü ñanagürü: —Choma nixí i Gabi i Tupanaärü puracü chaxüxü. Rü nüma núma choxü namu na cumaã nüxü na chixuxüxcëx i ñaã ore i mexü. ²⁰ —Natürü ñuxma i cuma rü tama choxü cuyaxõ i ngëma ore i cumaã nüxü chixuxü. Rü ngëmacëx i ñuxma rü tá cungega ñuxmatáta nabu i ngëma cune. Natürü ngëma cumaã nüxü chixuxü, rü aixcüma tá ningu nangu i ngëma ngunexü i Tupana ixunetaxü —ñanagürü.

²¹ Rū yoxni ga duūxūgū rū tupaucaarū dūxétūwa Zacaríaxū nananguxēēgū. Rū nūgūna nacagūe ga tacūcèx na tama paxa yéma ínaxūxūxū. ²² Rū yexguma Zacaríá tupaucawa íxūūxgu, rū taxucūruwa duūxūgūmaā nidexa, yerū nangega. Rū nūmagū ga duūxūgū rū nūxū nicuèxāchitanū ga tacūxū na nadauxū ga Zacaríá ga tupaucaarū aixepena. Rū Zacaríá rū naxmēxmaā duūxūgūxū nūxū nacuèxēē ga tacū nūxū na ūpetūxū, yerū nangega. ²³ Rū yexguma Zacaríá nagūxēēgu ga na naxūāxū ga Tupanaārū puracū ga tupauca ga taxūnewa, rū wenaxārū napatacèx nataegu. ²⁴ Rū yemawena rū Zacaríá namèx ga Erichabé rū ixāxācū. Rū ngīpatagu irūxāūēcha, rū wūximēēxpūx ga tauemacū taguma dūxétūwa íxū. ²⁵ Rū ngīxīcatama ngīgūrūgū: —Cori ya Tupana rū poraācū choxū narūngūxēē. Rū ñuxma rū marū tāūtáma chixri chauchiga nidexagū i duūxūgū naxcèx na changexacūxū —ngīgūrūgū.

Wūxi ga Tupanaārū orearū ngeruū ga daxūcūāx nūxū nixu ga Ngechuchuarū buxchiga

²⁶ Rū 6 ga tauemacū marū ngīxū mexgu ga Erichabé ga yema na naxāxācūxū, rū Gariréaanewa yexmane ga íāne ga Nacharétuwa Tupana nanamu ga norū orearū ngeruū ga Gabi. ²⁷ Rū ngīxūtawa naxū ga wūxi ga pacū ga taguma yatū ngīmaā maūxcū. Rū María nixī ga ngīega. Rū ngīma rū ixātechaū namaā ga wūxi ga yatū ga Yúchegu āegacū. Rū nūma ga Yúche rū nuxcūmaūcū ga āēxgacū ga Dabítanūxū nixī. ²⁸ Rū yema nachica ga María nawa yexmaxūgu naxūcu ga Gabi, rū ñanagūrū ngīxū: —Nuxmaē Pa Maríax. Tupana rū poraācū cumaā nataāē. Rū Cori ya Tupana rū cuxūtawa nangēxma, rū guxū i ngexūgūarū yexera marū cuxū narūngūxēē —ñanagūrū. ²⁹ Natūrū yexguma María nūxū dēuxgu ga yema daxūcūāx ga Tupanaārū orearū ngeruū, rū namaā íbaixāchiāē ga yema norū ore ga ngīmaā nūxū yaxuxū. Rū ngīgūāēwa nagu irūxīnū ga tūxcūū yemaācū ngīxū na namoxēxū. ³⁰ Rū yexguma ga Gabi rū ñanagūrū ngīxū: —Pa Maríax, tama name na cumuūxū, erū Tupana rū poraācū cumaā nataāē. ³¹ —Rū ñuxma rū tá tauemacū cuxū inayarūtaxu, rū tá cuxāxācū, rū tá nayatū i cuxacū. Rū Ngechuchugu tá cunaxūéga. ³² —Rū nūma rū wūxi ya āēxgacū ya taxūchicū tá nixī. Rū Tupana ya Taxūchicū Nane tá nixī i naega. Rū Cori ya Tupana rū tá nuxcūmaūcū ga āēxgacū ga Dabírūū āēxgacūxū nayaxīxēē. ³³ —Rū nūma rū guxūgutáma Yudíugūarū āēxgacū nixī. Rū tagutáma ínanguxuchi na āēxgacū na yīixū —ñanagūrū. ³⁴ Rū yexguma ga María rū Gabina ica, rū ngīgūrūgū: —¿Ñuxācū tá nixī i ngēma na chaxāxācūxū, erū tauta chaxāte? —ngīgūrūgū. ³⁵ Rū nūma ga Gabi rū ngīxū nangāxū, rū ñanagūrū: —Tupanaāē i Ūūnexū tá cuxna nangu. Rū Tupana ya Tacūarū pora rū wūxi i caixanexūrūū tá cugu nayangaixema. Rū ngēmacèx ngēma ōxchana i namaā cuxāxācūxū rū Tupanapēxewa mecūxūchi tá nixī, rū Tupana Nanemaā tá nanaxugū i duūxūgū. ³⁶ —Rū cutanūxū i Erichabé rū marū ixāxācū woo marū yaguāxchirēx na yīixū. Rū woo ga duūxūgū rū:

“Tagutáma íxāxācū” ñanagūrūgū ngīxū, natūrū i ñuxma rū marū 6 ya tauemacū ngīxū name na marū naxāxācūxū. ³⁷ —Erū Tupanaāxū rū taxuūma naguxcha —ñanagūrū. ³⁸ Rū yexguma ga María rū ngīgūrūgū: —Chorū Cori ya Tupanaārū duūxū chixī i chomax. Rū marū name i chomaā nanaxū i ngēma chomaā nūxū quixuxūācūma —ngīgūrūgū. Rū yexguma ngīxna ínixū ga yema Tupanaārū orearū ngeruū ga daxūcūāx ga Gabi.

María rū Erichabéxūtagu ínaxūāne

³⁹ Rū yexgumaūcūū ga María rū paxama nawa íxū ga guma íāne ga Zacaríapata nawa yexmane ga Yudéaaneārū dauxchitawa. ⁴⁰ Rū Zacaríapatawa ingu, rū iyaxūcu, rū Erichabéxū irūmoxē. ⁴¹ Rū yexguma Erichabé nūxū ínūgu ga Maríaarū moxē, rū ngīrū ōxchana ga ngīānūwa yexmaxū rū nixīāxcūū. Rū Tupanaāē ga Ūūnexū rū Erichabéna nangu. ⁴² Rū yexguma ga Erichabé rū tagaācū Maríaxū ngīgūrūgū: —Guxū i ngexūgūarū yexera Tupana cuxū narūngūxēē. Rū ngēxgumarūū ta cunexū narūngūxēē. ⁴³ —¿Tacūwa

chame na nuã chauxütagu cunaxüãnexü? Pa Chorü Cori Naëx. ⁴⁴—Erü ngëxguma nüxü chaxĩnügü i curü moxë, rü chauxacü i chauanüwa ngëxmaxü rü norü taãëmaã nixĩãxcüü. ⁴⁵—Cuma rü cutaãë erü nüxü cuyaxõ i norü ore ya Tupana. Rü ngëmacëx Tupana tá nayanguxëë i ngëma ore i cumaã nüxü yaxuxü —ngigürügü ga Erichabé. ⁴⁶ Rü yexguma ga María rü ngigürügü: —Choma rü chauãëwa poraãcü Tupanaxü chicuèxüü. ⁴⁷—Rü chorü Cori ya chorü Maxëëruümaã chataãëxüchi. ⁴⁸—Rü woo wüxi i Tupanaãrü duüxü i ngearü dïëruãxë chixĩ, natürü Tupana chaugu narüxĩnü. Rü ñuxmaücüü i duüxügü rü taãëxcümaã guxügutáma choxü naxugüe. ⁴⁹—Erü Tupana ya Poracü rü taxü i mexü chauxcëx naxü. Rü naxüüne i naëga ya Tupana. ⁵⁰—Rü nüma ya Tupana rü guxügutáma nüxü tangechaütümüügü ya guxáma ya yixema aixcüma nüxü muüëxë. ⁵¹—Rü guxü ga norü poramaã tüxü narüyexera ga guxema tügütama icuèxüügüxe. ⁵²—Rü marü ínanawoxü ga yema ãëxgacügü ga nügü icuèxüügüxü. Natürü guxema duüxëgü ga tama tügü icuèxüügüxe, rü poraãcü tüxü narüngüxëë. ⁵³—Rü guxema tüxü nataxúxe, rü muxüma tüxna naxã. Natürü guxema muãrü dïëruãxgüxe rü taxuüma tüxna naxããcüma tüxü ínimugü. ⁵⁴—Rü poraãcü nüxü narüngüxëë ga norü duüxügü ga Yudiügü. Rü tama nüxü inarüngüma na nüxü ingechaütümüügüxü, yexgumarüü ga nuxcümaüügüxü ga tatanüxümaã na inaxunetaxü. ⁵⁵—Yerü yemaãcü inaxuneta namaã ga tórü oxí ga Abráü rü namaã ga tatanüxügü na guxügutáma tüxü nangüxëëxü —ngigürügü ga María. ⁵⁶ Rü tomaëxpüx ga tauemacü Erichabéxütagu irüxãüx ga María. Rü ñuxüchi ngipatacë itaegu.

Cuáü ga baiüxëëruüãrü buxchiga

⁵⁷ Rü nawa nangu ga ngunexü ga na naxíraxacüxü ga Erichabé. Rü nayatü ga ngixãcü. ⁵⁸ Rü yexguma nüxü nacuèxgügu na ñuxãcü Tupana ngímaã mecümaxü, rü ngírü ngaicamagu pegüxü ga duüxügü rü ngítanüxügü rü ngixü ínayadaugü, rü ngixü narümoxëgü rü ngixü nayataãëgüxëë. ⁵⁹ Rü 8 ga ngunexüguwena rü ínayawiechëxmüpëxechiraügü ga guma ngíne. Rü nanatü ga Zacaríagu nanaxüégagüchaü ga duüxügü. ⁶⁰ Natürü naë ga Erichabé rü tama inaxwëxe. Rü ngigürügü: —Narümemaë nixĩ i Cuáügu tanaxüéga —ngigürügü. ⁶¹ Rü duüxügü rü ñanagürügü ngixü: —¿Tüxcüü cunaxwëxe i ngëma naëga? Erü cutanüxütanüwa rü tataxuma ya texé ya ngëmagu ãegaxe —ñanagürügü. ⁶² Rü yexguma ga duüxügü rü naxmëxwa nanatü ga Zacaríana nacagüe ga tacü rü naëgagu tá na naxüégaãxü. ⁶³ Rü yexguma ga Zacarí rü poperaxü naxuneta na yexma na naxümatüãxücëx ga naëga. Rü yexma nanaxümatü, rü ñanagürü:

“Cuáü tá nixĩ i naëga”, ñanagürü ga namatü. Rü guxüma ga duüxügü rü nabaixãchiãëgü ga yexguma yema naëgaxü nadaugügu. ⁶⁴ Rü yexgumatama wenaxãrü nidexa ga Zacarí. Rü inanaxügü ga Tupanaxü na yacuèxüüxü. ⁶⁵ Rü yemacëx guxüma ga yema duüxügü ga norü ngaicamagu ãpatagüxü rü poraãcü nabaixãchiãëgü. Rü guxüwama ga yema naãnewa ga Yudéaanewa rü duüxügü nüxü nixuchigagü ga yema ngupetüxü. ⁶⁶ Rü guxüma ga nüxü cuáchigagüxü ga yema ngupetüxü, rü nügüãxëwa nagu narüxĩnüëëcha, rü ñanagürügü: —¿Tacü tá nixĩ i ngëma buxü? Erü Tupana rü aixcüma naxütawa nangëxma —ñanagürügü.

Zacarí rü Tupanaxü nicuèxüü

⁶⁷ Rü nanatü ga Zacaríana nangu ga Tupanaãë i Üünexü. Rü nüxü nixü ga yema ore ga Tupana namaã nüxü ixuxü. ⁶⁸ Rü ñanagürü: —Name nixĩ i nüxü ticuèxüügü ya tórü Cori ga nuxcümaücü ga tórü oxí ga Iraëarü Tupana. Erü núma tatanüwa nangu na tüxü yamaxëëëxücëx i yixema i norü duüxügü na ixigüxü. ⁶⁹—Rü ngëmacëx tüxna nanamu ya wüxi ya poracü ya tórü maxëëëruü ga nuxcümaücü ga norü duüxü ga Dabítanüxüwa ne ücü. ⁷⁰—Rü yemaãcü Tupana tamaã inaxuneta nawa ga yema nuxcümaüügüxü ga norü orearü uruügü ga üünegüxü. ⁷¹—Rü yema orearü uruügüwa nüxü nixü rü tá tüxü ínangüxüxëë naxmëxwa i tórü uwanügü rü guxüma i ngema duüxügü i taxchi aiexü.

⁷²—Rü nuxcümaũgũxe ga tórü oxigümaã nüxũ nixu na nüxũ tangechaũtümũgũxũ rü tagutáma nüxũ iyanangũmaxũ ga yema tümamaã inaxunetaxũ. ⁷³⁻⁷⁵—Rü yemaãcü ga Tupana rü nuxcümaũcü ga tórü oxí ga Abráũmaã inaxuneta. Rü namaã nüxũ nixu rü tá tüxũ ínangũxũxẽẽ nüxna i tórü uwanũgũ na tama imuũẽãcüma naxũxũcèx i Tupanaãrũ puracũ rü aixcüma mecũ na ixĩgũxũ napẽxewa i guxũ i tórü maxũwa i wũxichigũ i ngunexũgu —ñanagũrũ ga Zacaría. ⁷⁶ Rü ñanagũrũ ta: —Cumax, Pa Chaunex, rü Tupana ya Taxũchicũarũ orearũ uruũmaã tá cuxũ naxugũ. Erũ cuma rü tá Corixũpa yoxni duũxũgũmaã nüxũ quixu i nachiga ya Cori. ⁷⁷—Cuma rü Coriarũ duũxũgũxũ tá nüxũ cucuèxẽẽ na Tupana tá nüxũ nüxũ ngechaũxũ i norũ pecadugũ na ngẽmaãcü nayauxgũãxũcèx i maxũ i taguma gũxũ. ⁷⁸⁻⁷⁹—Erũ nüxũ tangechaũtümũgũ ya Tupana ya poraãcü tüxũ ngechaũcü. Rü ngẽmacèx daxũgũxũ i naãnewa taxcèx ne nanamu i ñoma i naãneãrũ ngóonexẽẽruũ i ngexwacaxũxũ na nangóonetanũxẽẽãxũcèx i ngẽma duũxũgũ ga noxri guxũguma norũ chixexũgagu ãücũmaxũwa yexmagũxũ. Rü nüma tá tüxũ narũngũxẽẽ na Tupanamaã rũngũxmũèxũcèx —ñanagũrũ ga Zacaría. ⁸⁰ Rü yema buxũ rü niyachigũ rü wũxichigũ ga ngunexũgu yexeraãcü Tupanaxũ nicuáchigũ. Rü dauxchita ga ngextá taxúema íxãpataxũwa nayexma ñuxmata yema ngunexũwa nangu ga na Yudíugũxũ nügũ nacuèxẽẽxũ.

2

Ngechucharũ buxchiga (Mt 1.18-25)

¹ Rü yexguma Agutu ãẽxgacũ ga tacũ ixĩxgu ga Dumawa, rü nanaxunagũ ga na yaxugũãxũ ga guxũma ga duũxũgũ ga guxũ ga naãnewa. ² Rü yema nüxĩraũxũ ga duũxũgũarũ ugũchiga, rü nanaxũ ga yexguma Quirinu ãẽxgacũ ixĩxgu ga Chírĩaarũ naãnewa. ³ Rü guxũma ga duũxũgũ rü wũxichigũ norũ ñãne ga nagu nabuxũnewa nixũchigũ ga yéma na yaxugũãxũcèx. ⁴ Rü yemacèx ga Yúche rü Gariréaanewa yexmane ga ñãne ga Nacharétuwa ínaxũxũ, rü Yudéaarũ naãnewa yexmane ga ñãne ga Beréũwa naxũ. Rü guma nixĩ ga ñãne ga nuxcümaũcü ga ãẽxgacũ ga Dabí nagu buxũne. Rü yemacèx nixĩ ga Yúche ga yéma naxũxũ, yerũ Dabítanũxũ nixĩ ga nümax. ⁵ Rü Beréũwa naxũ ga Yúche na yaxugũxũcèx wũxigu ngĩmaã ga María ga ngĩmaã naxãmèxchaũcü. Natürũ ga María rü itacharaũ ga na naxããcũxũ. ⁶ Rü yexguma Beréũwa nayexmagũyane, ngĩxna nangu ga ngĩrũ ngunexũ ga na naxíraxacũxũ ga María. ⁷ Rü yexma nabu ga nüxĩraũcü ga ngĩne. Rü naxchãpenũũmaã inanuque. Rü wũxi ga wocaarũ chibũchicagumare inacanagũxẽẽ, yerũ marũ guxũma nixããcu ga ucapu nawa ga guma pegũpataũ.

Tupanaãrũ orearũ ngeruũ ga daxũcũãx rü carnerugũarũ dauruũcèx nangox

⁸ Rü Beréũãrũ ngaicamana nayexmagũ ga ñuxre ga carnerugũarũ dauruũgũ ga chũtacũ nachitaũwa norũ carnerugũna ídaugũxũ. ⁹ Rü ngürũãchi yema carnerugũarũ dauruũgũcèx nangox ga wũxi ga orearũ ngeruũ ga daxũcũãx. Rü Cori ya Tupanaãrũ üüne rü nawa nayexma rü yemacèx poraãcü nangóone. Rü yema carnerugũarũ dauruũgũ rü poraãcü namuũẽ. ¹⁰ Natürũ yema orearũ ngeruũ ga daxũcũãx, rü ñanagũrũ nüxũ: —¡Tãxũ i pemuũèxũ! erũ pexcèx nuã chanange i wũxi i ore i mexèchixũ i guxũ i duũxũgũarũ taãèxẽẽruũ tá ixĩxũ. ¹¹—Erũ ñuxma rü Beréũgu nabu ya perũ maxèxẽẽruũ. Rü nüma rü Cori ya Cristu nixĩ. ¹²—Rü ñãã tá nixĩ i perũ cuèxruũ. Rü tá nüxũ ipeyangau i wũxi i õxchana i naxchãpenũũmaã nuquexũ rü wocaarũ chibũchicagu caxũ —ñanagũrũ. ¹³ Rü yexgumatama ngürũãchi yema daxũcũãx ga orearũ ngeruũxũtawa nangox ga muxũma ga togũ ga daxũcũãx ga orearũ ngeruũgũ. Rü Tupanaxũ nicuèxũgũ, rü ñanagũrũgũ: ¹⁴—Rü ñuxma rü Tupanaxũ ínicuèxũgũ rü ínataãègũ i daxũgũxũ i naãnewa. Rü pema i ñoma i naãnecũãx i Tupana pemaã taãègũe, rü name nixĩ i pegũmaã perũngũxmũè —ñanagũrũgũ. ¹⁵ Rü yexguma daxũwa naxĩxguwena

ga yema orearü ngeruüğü rü yema carnerugüarü dauruüğü rü nügümaã ñanagürüğü: — ¡Ngĩxã Ítayadau i Beréüwa i ngéma ngupetüxü i Cori ya Tupana tamaã nüxü ixuxü nawa i norü orearü ngeruüğü! —ñanagürüğü. ¹⁶ Rü paxa inaxiãchi, rü yéma naxĩ. Rü yexma inayangugü ga Yúche rü María rü guma bucü ga wocaarü chibüchicagu cacü. ¹⁷ Rü yexguma yema bucüxü nadaugügu ga yema carnerugüarü dauruüğü, rü duüxügümaã nüxü nixugüe ga yema ore ga Tupanaärü orearü ngeruü ga daxücüãx namaã nüxü ixuxü ga guma bucüchiga. ¹⁸ Rü guxüma ga duüxügü ga nüxü ñnüëxü ga yema carnerugüarü dauruügarü ore rü namaã nabaixãchiãëgü. ¹⁹ Natürü ga María rü inayaxu ga guxüma ga yema ngupetüxü rü ngiãëgu namaã inguxü rü nagu irüxĩnüëcha. ²⁰ Rü nawoegu ga yema carnerugüarü dauruüğü. Rü taãëcüma Tupanaxü nicuëxüüğü naxcèx ga guxüma ga yema nüxü naxĩnüëxü rü nüxü nadaugüxü yerü aixcüma yema orearü ngeruü ga daxücüãx namaã nüxü ixuxüãcüma nangupetu.

Bucü ga Ngechuchu rü tupauca ga taxünewa nanagagü

²¹ Rü yexguma 8 ga ngunexü nüxü yexmagu ga na nabuxü ga õxchana, rü Ínanawiechëxmüpëxechiraüğü. Rü Ngechuchugu nanaxüëgagü. Rü yematama nixĩ ga naega ga daxücüãx ga Tupanaärü orearü ngeruü Maríaamaã nüxü ixuxü ga tauta namaã naxããcügu. ²² Rü yexguma marü yanguxgu ga yema ngunexü na tupauca ga taxünewa Tupanapëxewa na nügü yamexëëgüxü rü yéma naxĩ na yemaãcü Tupanapëxewa yanguxëëgüãxüçèx ga yema Moïchéarü mugü nüxü ixuxürüü. Rü Yerucharéüwa ga tupauca ga taxünewa nanagagü ga guma bucü na Tupanana namugüãxüçèx. ²³ Rü yemaãcü nanaxüğü yerü Tupanaärü mugüwa naxümatü, rü ñanagürü:

“Ngëxguma wüxi i nge rü nayatügu i nüxĩraüxü i ngĩxãcü, rü name i Cori ya Tupanana inamu”,
ñanagürü. ²⁴ Rü yéma naxĩ rü yéma nanagagü ga taxre ga muxtucugü ga yexwacèx yaexü, na Tupanacèx nadaiãxüçèx ga paigü ga tupaucawa, yerü yema ñanagürü ga Tupanaärü mugüwa. ²⁵⁻²⁶ Rü yexgumaãcüü Yerucharéügu naxãchiü ga wüxi ga yatü ga Chimeügu äëgacü. Rü wüxi ga yatü ga mecümacü nixĩ ga nümax, rü aixcüma Tupanaxü ngechaücü nixĩ. Rü nüma rü guxügüma Ínananguxëë na ñuxguacü tá Ínanguxü ya Yudíugüarü nguxüëëruü ya Cristu. Rü Tupanaãe i Üünexü rü Chimeüxütawa nayexma, rü nüxü nüxü nacuëxëë na täütáma nayuxü ega tama nüxü nadauxiragu ya Cristu ya Cori ya Tupana núma namucü. ²⁷ Rü yema ngunexügu rü tupauca ga taxünewa Chimeüxü naxüxëë ga Tupanaãe i Üünexü. Rü yéma nayexma ga Chimeü ga yexguma Yúche rü María tupaucawa nagagügu ga guma bucü ga Ngechuchu na Tupanana namugüãxüçèx na yemaãcü yanguxëëgüãxüçèx ga Moïchéarü mu. ²⁸ Rü Ngechuchuxü naganagü ga Chimeü. Rü Tupanaxü nicuëxüü, rü ñanagürü: ²⁹ —Pa Corix, ñuxma rü marü name na chayuxü, erü marü cuyanguxëë ga yema chomaã icuxunetaxü. ³⁰⁻³¹ —Rü chauxetümaãxüchi nüxü chadau ya daa Maxëëëruü ya guxü i duüxügüçèx núma cunamucü. ³² —Rü nüma nixĩ i ngóonexëëruü naxcèx i guxüma i duüxügü i tama Yudíugü ixíğüxü. Rü ñaã õxchanagagu rü togü i duüxügü tá nüxü nicuëxüüğü i curü duüxügü i Yudíugü —ñanagürü. ³³ Rü Yúche rü María rü nabaixãchiãëgü namaã ga Chimeüärü ore ga ñuxãcü guma õxchanachigamaã na yadexaxü. ³⁴ Rü yexguma ga Chimeü rü Tupanana naca na meã nüxü nangupetügüxüçèx ga Yúche rü María rü guma õxchana. Rü ñanagürü ngixü ga María ga Ngechuchu naë: —Düçèx, daa õxchana rü tá nanamaxëëë i muxüma i Yudíugü, natürü ngéma tama nüxü yaxögüchaüxü rü tá inayarütaxe. Rü nüma rü wüxi i cuëxruü tá nixĩ i duüxügüçèx, rü muxüma tá nüxü naxoe. ³⁵ —Rü ngémaãcü tá nanangoxëëãma i guxüma i naãëwa nagu naxĩnüëxü i muxüma i duüxügü. Rü guxüma i ngéma tá ñaã õxchanaxü ngupetüxü rü ñoma wüxi i cüxchi i curü maxünewa yarüwáxürüü tá cuxü nangux, Pa Maríax —ñanagürü. ³⁶ Rü yéma ta iyexma ga wüxi ga ngecü ga Tupanaärü orexü ixücü. Rü Ana nixĩ ga ngíëga. Rü Panuëxãcü iyixĩ, rü Ácherutanüxü iyixĩ. Rü marü

yaguãxũchi iyixĩ. Rũ yexguma napaxũchigutama ixãte. Natürũ 7 ga taunecũ- guxicatama ngĩtemaã iyarũxũũxũ, yerũ nayu ga ngĩte. ³⁷ Rũ yemaãcũ wũxi ga yutecũ ga yaguãxũchi iyixĩ, yerũ 84 nixĩ ga ngĩrũ taunecũ. Rũ taguma tupauca ga taxũnewa íxũxũ. Rũ guxũguma ngunecũ rũ chũtacũ rũ naxaureãcũma iyumũxẽẽcha. Rũ yemaãcũ Tupanaxũ iyacuèxũũ rũ inataxẽẽ. ³⁸ Rũ yexgumatama Chimeũ íidexayane, rũ yema ingu ga Ana. Rũ Tupanana moxẽ ixã. Rũ iinaxũgũ ga õxchana ga Ngechuchuchiga na yadexaxũ napẽxewa ga guxũma ga yema Yudĩugũ ga Yerucharẽcũãx ga Cristuxũ ínanguxẽẽgũxũ na norũ nguxuchixẽẽruũ yĩxũcèx.

Ĩane ga Nacharétucèx nawoegu

³⁹ Rũ yexguma marũ yanguxẽẽgũãguwena ga guxũma ga yema Tupanaãrũ mugũ nüxũ íxuxũ, rũ Yũche rũ María rũ naxcèx nawoegu ga norũ ĩane ga Nacharétu ga Gariréaanewa yexmane. ⁴⁰ Rũ guma bucũ rũ niyachigũ, rũ yexeraãcũ nipurachigũ, rũ yexeraãcũ nüxũ nicuáchigũ. Rũ Tupana rũ poraãcũ nüxũ narũngũxẽẽ.

Bucũ ga Ngechuchu rũ tupauca ga taxũnewa naxo

⁴¹ Nanatũ rũ naẽ rũ gucũ ga taunecũgu Yerucharẽũwa taxĩxũ naxcèx ga Ûpetũchigaarũ peta. ⁴² Rũ yexguma Ngechuchu 12 ga taunecũ nüxũ yexmagu, rũ Yerucharẽũwa taxĩ namaã ga nanatũ rũ naẽ, yerũ yema nixĩ ga Yudĩugũcũma naxcèx ga Ûpetũchigaarũ peta. ⁴³ Rũ yexguma yagũechigagu ga Ûpetũchigaarũ peta, rũ tũmachiũcèx tawoegu ga nanatũ rũ naẽ. Natürũ ga Ngechuchu rũ tũmaẽchita tũxna Yerucharẽũgu narũxãũx. ⁴⁴ Rũ tũma nüxũ tacuèxgũgu rũ yema muxũ ga duũxũgũ ga tũmaweama íxĩxũtanũxũtanũgu naxã ga Ngechuchu. Rũ yemaãcũ marũ itaxĩ ga wũxi ga ngunexũ. Natürũ yexguma naxcèx tadaugũgu tũmatanũxũtanũgu rũ yema tũxũ cuèxgũxũtanũgu rũ tama nüxũ itayangaugũ. ⁴⁵ Rũ yemacèx wenaxãrũ Yerucharẽcèx tawoegu na yexma naxcèx tayadaugũxũcèx. ⁴⁶ Rũ tomaẽxpũx ga ngunexũguwena Ngechuchuxũ itayangaugũ ga tupauca ga taxũnegu. Rũ yema narũto natanũwa ga yema ngũexẽẽruũgũ ga Tupanaãrũ mugũwa nguxẽẽtaegũxũ, rũ inarũxĩnũ ga norũ nguxẽẽtae, rũ nüxna nicachigũ. ⁴⁷ Rũ guxũma ga yema duũxũgũ ga Ngechuchuxũ ínũèxũ, rũ nabaixãchiãægũ na ñuxãcũ nüxũ nacuèxũchixũ rũ meãma nangãxũãxũ. ⁴⁸ Rũ yexguma nanatũ rũ naẽ nüxũ daugũgu rũ tabaixãchiãægũ. Rũ naẽ rũ ñatarũgũ nüxũ: —Pa Chaunex, ¿tũxcũũ tomaã ngexũ cuwagũ? Cunatũ rũ choma rũ poraãcũ cuxcèx taxoegaãẽacũma cuxcèx tadaugũecha —ñatarũgũ. ⁴⁹ Rũ yexguma ga Ngechuchu rũ ñanagũrũ: —¿Tũxcũũ chauxcèx pedaugũ? ¿Tama èxna nüxũ pecuèx na woetama Chaunatũchiũwa tá changẽxmaxũ? —ñanagũrũ. ⁵⁰ Natürũ ga tũmagũ rũ tama nüxũ tacuèxgũéga ga yema tũmamaã nüxũ yaxuxũ. ⁵¹ Rũ yexguma ga Ngechuchu rũ tũmawe nataegu ga Nacharétuwa. Rũ guxũguma meã tũmaga naxĩnũècha. Rũ naẽ ga María rũ ngĩãẽwa nagu írũxĩnũècha ga guxũma ga yema ngupetũxũ. ⁵² Rũ niyachigũ ga Ngechuchu, rũ yexeraãcũ nüxũ nicuáchigũ. Rũ Tupana rũ namaã nataãẽ, rũ guxũma ga duũxũgũ rũ ta namaã nataãægũ.

3

Cuáũ ga baiũxẽẽruũ nüxũ nixu ga Tupanaarũ ore ga dauxchitawa ga ngextá taxúema íxãpataxũwa

(Mt 3.1-12; Mr 1.1-8; Cu 1.19-28)

¹ Rũ yexguma Tibériu 15 ga taunecũ Dumaarũ ãẽxgacũ yixĩxgu, rũ yexguma nixĩ ga Põũchiu Piratu rũ Yudéaaneãrũ ãẽxgacũ yĩxũ, rũ Erode rũ Gariréaaneãrũ ãẽxgacũ yĩxũ, rũ naẽneẽ ga Piripi rũ Itúreaane rũ Traconíteaneãrũ ãẽxgacũ yĩxũ, rũ Lichaniã rũ Abiriniãaneãrũ ãẽxgacũ yĩxũ. ² Rũ yexguma ga Aná rũ Caipá rũ paigũeru nixĩgũ. Rũ yexguma nixĩ ga Zacaría nane ga Cuáũmaã yadexaxũ ga Tupana ga dauxchitawa ga ngextá taxúema íxãpataxũwa. ³ Rũ guxũma ga yema nachicagũ ga Yudáũcutũarũ

ngaicamana yexmagüxügu nixügüchigü ga Cuáü. Rü duüxügümaã nüxü nixuchigü na nüxü naxoexüçex ga nacümagü ga chixexü rü ínabaiüxüçex na yemaäcü Tupana nüxü nüxü rüngümaxüçex ga norü pecadugü. ⁴ Rü guma nuxcümaäcü ga Ichaxía ga Tupanaärü orearü uruü naxümatüxürüü nixí ga nangupetüxü. Yerü duüxügüarü maxüärü mexëechigaxü nixu ga yexguma ñaxgu:

“Ngëma nachica i ngextá taxúema íxãpataxüwa rü tá nangëxma i wüxi i duüxü i ngema tagaäcüma ñaxü: ‘¡Pegü pemexëe naxçex ya Cori! ¡Rü naxçex ipeyanawëxãchixëe i perü maxü!’ ⁵ Rü guxãärü maxü rü tá inayarüwëxãchi ñoma wüxi i ngatexü rügütaxürüü na iyawëxüçex i nama. Rü guxãma ya yíxema togüétüwa tügü ngëxmaxëëgüxe rü tá ítarüxí ñoma wüxi ya mëxpüne rü wüxi i ngüchitaeru idoxochixëëxürüü. Rü guxüma i nacüma i wüxü rü tá inayarüwëxãchigü. Rü ngëma duüxügüarü maxüwa tama mexü rü tá nayamexëëgü. ⁶ Rü guxüma i duüxügü rü tá nüxü nadaugü ya yima Maxëxëëruü ya Tupana núma namucü”,

ñanagürü ga Ichaxía ümatüxü ga ore. ⁷ Rü yexguma Cuáüxütawa naxíxgu ga duüxügü na ínabaiüxëëxüçex, rü nüma ga Cuáü rü ñanagürüama nüxü: —Pa Áxtapearü Duüxügüx ¿Rü ñuxäcü nagu perüxínüe na naxchaxwa pibuxmüxü i ngema poxcu i marü ingaicamaxü ega tama nüxü perüxoegu i pecüma i chixexü? ⁸ —¡Rü meã pemaxë na ngëmaäcü guxüma i duüxügü nüxü daugüxüçex na aixcüma marü nüxü perüxoexü i pecüma i chixexü! Rü tama name i ñaperügügü:

“Tãütáma Tupana toxü napoxcue, erü Abráütanüxü tixígü” ñaperügügü. Erü tama ngëmacèx nixí ya Tupana i duüxügüxü nayaxuxü. Rü pemaã nüxü chixu rü ngëxguma Tupana naxwëxegu rü tama nüxü naguxcha na daa nutawa Abráütanüxü nanguxüxëëxü. ⁹ —Tupanaärü yuema rü marü ímemare na yadaxüãxüçex i ngëma nanetügü i tama mexü. Rü guxüma i nanetügü i chixearü õõxü rü tá nadaxü, rü ñuxüchi üxüwa tá ínagu —ñanagürü ga Cuáü. ¹⁰ Rü yexguma ga duüxügü rü Cuáüna nacagü, rü ñanagürügü: —¿Tacü éxna nixí i mexü na tanaxüxü? —ñanagürügü. ¹¹ Rü Cuáü rü nanangãxü rü ñanagürü: —Texé ya taxrearü gáuxüchiruãxë rü name nixí i texé ya tüxü nataxüxena tanaxã. Rü texé ya õnaãxë rü name nixí i texé ya ngearü õnaãxëmaã tangau i tumaärü õna —ñanagürü. ¹² Rü Cuáüxütawa naxí ta ga ñuxre ga yatügü ga Dumaärü äëxgacüçex dïëru ngíxü ideetanüxü. Rü nanaxwëxegü ga Cuáü na ínabaiüxëëxü. Rü Cuáüna nacagü, rü ñanagürügü: —Pa Ngüexëëruüx, ¿Tacü nixí i mexü na tanaxüxü i tomax? —ñanagürügü. ¹³ Rü Cuáü rü ñanagürü nüxü: —Tama name i äëxgacü pemaã nüxü ixuxüärü yexera penayauxgü i dïëru i duüxügüxütawa —ñanagürü. ¹⁴ Rü ñuxre ga churaragü rü ta Cuáüna nacagüe, rü ñanagürügü: —¿Toma rü tacü nixí i mexü na tanaxüxü? —ñanagürügü. Rü nanangãxü ga Cuáü rü ñanagürü: —Tama name i texéxü pexãxüneäcüma tumaärü ngëmaxügü pepuxü. Rü tama name i tacü rü doraxü tümachigaxü pixu na ngëmaäcü tumaärü ngëmaxügü pepuxüxüçex. Rü name nixí i ngëma dïëru i äëxgacü pexü ngímaã naxütanüçümaãtama petaãëgü rü tama yexeracüçex ípeca —ñanagürü. ¹⁵ Rü yexguma ga duüxügü rü poraäcü ínananguxëëgü na paxa ínanguxü ga Tupana Nane ga Cristu. Rü nagu narüxínüe ga na bexmana Cuáü rü Cristu yíxü. ¹⁶ Natürü ga Cuáü rü guxãxü ñanagürü: —Aixcüma i choma rü dexáwamare pexü íchabaiüxëë, natürü tá ínangu i to i Tupanaärü orearü uruü, rü nüma tá pexna nananguxëë i Tupanaãe i Ünexü wüxi i üxüemarüü. Erü nüma rü poraäcü choxü narüyexera na äëxgacü yíxü. Rü choma rü napëxewa rü taxuwama chame rü bai i norü chapatucunüärü wëgüwa chame. ¹⁷ —Rü nüma rü marü ínamemare na ñoma i naãnewa yadexechiãxüçex i norü duüxügü ñoma wüxi ya yatü trigu naãtuna idexechixürüü. Rü ngëmaäcü tá nayadexechi i ngëma noxrü ixígüxü na naxü- tawa nangëxmagüxüçex, natürü ngëma tama noxrü ixígüxü, rü tá ínanagu nawa ya yima üxü ya taguma ixoxüne —ñanagürü. ¹⁸ Rü yema oremaã rü muxüma ga to ga ucuxëgümaã, rü Cuáü duüxügümaã nüxü nixu ga ore ga mexü ga Ngechuchuchiga. ¹⁹ Rü

Cuáŭ rü ãëxgacü ga Erodexŭ nanga, yerü ngĩmaã naxãmèx ga Erodía ga naëneë ga Piripi namèx. Rŭ nananga ta naxcèx ga yema togü ga chixexŭ ga naxüxŭ. ²⁰ Natürü ga Erode rü tama Cuáŭga naxĩnü. Rŭ yexeraxŭ ga chixexŭ naxü, yerü poxcupataŭwa Cuáŭxŭ namu.

Ngechuchuarü baiechiga

(Mt 3.13-17; Mr 1.9-11)

²¹ Rŭ yexguma taxŭta napoxcugu ga Cuáŭ, rü guxŭ ga duŭxŭgŭxŭ ínabaiŭxëëxyane, rü yexguma ta nixĩ ga Ngechuchuxŭ ínabaiexëëxŭ. Rŭ yexguma Ngechuchu íyumŭxëyane rü ningena ga daxŭguxŭ ga naãne. ²² Rŭ Tupanaã i Üünexŭ rü wŭxi ga muxtucurŭŭ inanago rü Ngechuchuna nangu. Rŭ daxŭwa inanaxŭ ga wŭxi ga naga ga ñaxŭ: —Cuma nixĩ, Pa Chaunex, i cuxŭ changechaŭxŭchixŭ rü cumaã chataãëxŭ —ñaxŭ.

Ngechuchu ya Cristu natanüwa ngóxŭ ga duŭxŭgŭchiga

(Mt 1.1-17)

²³ Ngechuchu rü 30 ga taunecü nüxŭ nayexma ga yexguma ínaxŭgŭãgu na guxŭwama duŭxŭgŭmaã nüxŭ yaxuxŭ ga Tupanaarü Ore. Rŭ duŭxŭgŭ nagu narŭxĩnüë rü Yúche nane nixĩ ga nümax.

Rŭ Yúche rü Erí nane nixĩ.

²⁴ Rŭ Erí rü Matáx nane nixĩ.

Rŭ Matáx rü Lebí nane nixĩ.

Rŭ Lebí rü Merequí nane nixĩ.

Rŭ Merequí rü Yana nane nixĩ.

Rŭ Yana rü Yúche nane nixĩ.

²⁵ Rŭ Yúche rü Matatía nane nixĩ.

Rŭ Matatía rü Amó nane nixĩ.

Rŭ Amó rü Naŭŭ nane nixĩ.

Rŭ Naŭŭ rü Echi nane nixĩ.

Rŭ Echi rü Nagaí nane nixĩ.

²⁶ Rŭ Nagaí rü Maãx nane nixĩ.

Rŭ Maãx rü Matatía nane nixĩ.

Rŭ Matatía rü Chemeí nane nixĩ.

Rŭ Chemeí rü Yuchéx nane nixĩ.

Rŭ Yuchéx rü Yudá nane nixĩ.

²⁷ Rŭ Yudá rü Yuanáŭ nane nixĩ.

Rŭ Yuanáŭ rü Récha nane nixĩ.

Rŭ Récha rü Chorobabé nane nixĩ.

Rŭ Chorobabé rü Charatía nane nixĩ.

Rŭ Charatía rü Nerí nane nixĩ.

²⁸ Rŭ Nerí rü Merequí nane nixĩ.

Rŭ Merequí rü Adí nane nixĩ.

Rŭ Adí rü Cocháŭ nane nixĩ.

Rŭ Cocháŭ rü Elmadáŭ nane nixĩ.

Rŭ Elmadáŭ rü Erú nane nixĩ.

²⁹ Rŭ Erú rü Yochué nane nixĩ.

Rŭ Yochué rü Erieché nane nixĩ.

Rŭ Erieché rü Yoríŭ nane nixĩ.

Rŭ Yoríŭ rü Matáx nane nixĩ.

Rŭ Matáx rü Lebí nane nixĩ.

³⁰ Rŭ Lebí rü Chimeŭŭ nane nixĩ.

Rŭ Chimeŭŭ rü Yudá nane nixĩ.

Rŭ Yudá rü Yúche nane nixĩ.

Rŭ Yúche rü Yonáŭ nane nixĩ.

Rŭ Yonáŭ rü Eriaquíŭ nane nixĩ.

³¹ Rŭ Eriaquíŭ rü Meréa nane nixĩ.

Rŭ Meréa rü Ména nane nixĩ.

Rŭ Ména rü Matáta nane nixĩ.

Rŭ Matáta rü Natáŭ nane nixĩ.

- Rü Natáũ rü Dabí nane nixĩ.
 32 Rü Dabí rü Ichaxí nane nixĩ.
 Rü Ichaxí rü Obé nane nixĩ.
 Rü Obé rü Boó nane nixĩ.
 Rü Boó rü Cháru nane nixĩ.
 Rü Cháru rü Nachóũ nane nixĩ.
 33 Rü Nachóũ rü Aminadá nane nixĩ.
 Rü Aminadá rü Admiũ nane nixĩ.
 Rü Admiũ rü Arni nane nixĩ.
 Rü Arni rü Esróũ nane nixĩ.
 Rü Esróũ rü Fare nane nixĩ.
 Rü Fare rü Yudá nane nixĩ.
 34 Rü Yudá rü Acóbu nane nixĩ.
 Rü Acóbu rü Ichaá nane nixĩ.
 Rü Ichaá rü Abráũ nane nixĩ.
 Rü Abráũ rü Taré nane nixĩ.
 Rü Taré rü Nacúx nane nixĩ.
 35 Rü Nacúx rü Cherúx nane nixĩ.
 Rü Cherúx rü Ragáu nane nixĩ.
 Rü Ragáu rü Peréx nane nixĩ.
 Rü Peréx rü Ebéx nane nixĩ.
 Rü Ebéx rü Cháru nane nixĩ.
 36 Rü Cháru rü Caináũ nane nixĩ.
 Rü Caináũ rü Arpacháx nane nixĩ.
 Rü Arpachá rü Chéũ nane nixĩ.
 Rü Chéũ rü Noe nane nixĩ.
 Noe rü Laméx nane nixĩ.
 37 Rü Laméx rü Matucharéũ nane nixĩ.
 Rü Matucharéũ rü Enóx nane nixĩ.
 Rü Enóx rü Yaréx nane nixĩ.
 Rü Yaréx rü Maararéx nane nixĩ.
 Rü Maararéx rü Caináũ nane nixĩ.
 38 Rü Caináũ rü Enóx nane nixĩ.
 Rü Enóx rü Chex nane nixĩ.
 Rü Chex rü Adáũ nane nixĩ.
 Rü Adáũ rü Tupana nane nixĩ.

4

Ngechuchuxũ naxũ ga Chataná *(Mt 4.1-11; Mr 1.12-13)*

¹ Ngechuchuxũtawa nayexma ga Tupanaãe i Üünexũ. Rü yexguma Yudáũchiüwa ínaxũächigu ga Ngechuchu, rü Tupanaãe i Üünexũ rü dauxchitawa ga ngextá taxúema íxãpataxũwa nanaga. ² Rü yéma nayexma ga 40 ga ngunexũ. Rü ngoxo ga Chataná rü nüxũ naxũ. Rü yexguma yéma nayexmagu rü taguma nachibü. Natürü ga yixcama rü nataiya. ³ Rü yexguma ga ngoxo ga Chataná rü ñanagürü nüxũ: —Ega aixcúma Tupana Nane quixĩgu, rü jdaa nutamaã nüxũ ixu na pãuxũ nanguxuchixũcèx! —ñanagürü ga Chataná. ⁴ Rü Ngechuchu nanangãxũ rü ñanagürü: —Tupanaãrü ore i ümatüxũwa rü ñanagürü:

“Tãütáma õnamaãxĩca namaxẽ i duũxũgũ, natürü guxũma i ore i Tupana nüxũ ixuxũ tá nixĩ i duũxũgũxũ maxẽxẽxũ”,

ñanagürü. ⁵ Rü yexguma ga ngoxo ga Chataná rü wüxi ga mèxpúnechitaeruwa nanaga. Rü yéma paxaãchi nüxũ nüxũ nadauxẽẽ ga guxũma ga nachiuãnegü ga ñoma ga naãnecũãx.

⁶ Rü Chataná rü ñanagürü nüxũ: —Guxũ i ñaã nachiuãnegü i mexũ rü norü ngẽmaxũgũ rü chi cuxna chanaxã. Erü choxrü nixĩ i guxũma i ñaãgũ, rü tüxna chanaxã ya texé ya choma chorü me ixĩxẽ na tüxna na chanaxãxũ. ⁷ —Rü ngẽxguma chi chopẽxegu

cucaxãpũxũgu rũ choxũ quicuèxũũgu rũ cuxrũ chi nixĩ i guxũma i ñaã cuxũ chawéxũ —ñanagürũ. ⁸ Natürũ ga Ngechuchu rũ nanangãxũ, rũ ñanagürũ: —¡Choxna ixũgachi! Pa Chata- náx. Erũ Tupanaãrũ ore i ümatũxũwa rũ ñanagürũ:

“¡Nũxũ icuèxũũ ya Cori ya curũ Tupana, rũ yimaãxũxĩcatama napuracũ!”

ñanagürũ. ⁹ Rũ yexguma ga ngoxo ga Chataná rũ Yerucharéũ ga ñãnewa nanaga. Rũ tupauca ga taxũnetapẽxegu nanamunagũ. Rũ ñanagürũ nüxũ: —Ega aixcũma Tupana Nane quixĩgu, rũ ¡nuã cugũ rütãe! ¹⁰ —Erũ Tupanaãrũ ore i ümatũxũwa rũ ñanagürũ:

“Tupana tá nanamu i norũ orearũ ngeruũgũ i daxũcũãx na cuxna nadaugũxũcèx. ¹¹ Rũ naxmẽxmaã tá cuxũ niyaxgũ na tama ¡acũ rũ nutagu cunguxũcèx”,

ñanagürũ. ¹² Rũ Ngechuchu nanangãxũ rũ ñanagürũ: —Tupanaãrũ ore i ümatũxũwa rũ ñanagürũ ta:

“¡Tama name i nüxũ na cuxũxũ ya Cori ya curũ Tupana!”,

ñanagürũ. ¹³ Rũ yexguma marũ taxucürũwama Ngechuchuxũ naxũxgu, rũ nüma ga Chataná rũ nüxna niña ñuxmata nüxũ iyangau na ñuxãcũ wena nüxũ na naxũxũ.

Ngechuchu rũ Gariréaanewa inanaxũgũ ga norũ puracũ
(Mt 4.12-17; Mr 1.14-15)

¹⁴ Rũ Ngechuchu rũ Gariréaanecèx nataegu. Rũ Tupanaãe i Üünexũ rũ naxũtawã nayexma rũ porãcũ nanaporaxẽe. Rũ ga duũxũgũ rũ nachiga nidexagũ ga guxũ ga yema naãnewa. ¹⁵ Rũ wũxichigũ ga ñãneãrũ ngutaquẽxepataũgũwa rũ nanguxẽẽtae. Rũ guxũma ga duũxũgũ rũ nüxũ nicuèxũũgũ.

Nacharétuwa nayexma ga Ngechuchu
(Mt 13.53-58; Mr 6.1-6)

¹⁶ Rũ Nacharétuwa naxũ ga Ngechuchu. Rũ guma nixĩ ga ñãne ga nanatũgũ nawa nayaxẽẽgũne. Rũ ngũxchigaarũ ngunexũgu rũ ngutaquẽxepataũgu naxũcu, yerũ yema nixĩ ga nacũma ga guxũ ga ngũxchigaarũ ngunexũgu. Rũ yéma inachi rũ duũxũgũcèx nüxũ nadaumatũ ga Tupanaãrũ ore ga ümatũxũ. ¹⁷ Rũ nüxna nanaxãgũ ga popera ga Tupanaãrũ orearũ uruũ ga Ichaxía ümatũxũ. Rũ yexguma yangenaãtũãgu, rũ nüxũ inayangau ga ngextã inaxũmatũxũwa ga ore ga ñaxũ:

¹⁸ “Cori ya Tupanaãe rũ chauxũtawã nangẽxma. Rũ nüma rũ choxũ naxuneta na nüxũ chixuxũcèx i ore i mexũ namaã i ngẽma duũxũgũ i ngearũ ngẽmaxũãxgũxũ. Rũ choxũ namu na ngẽma duũxũgũ i pecadutũũwa ngẽxmagũxũmaã nüxũ na chixuxũcèx rũ tá na ínanguxũxũ. Rũ choxũ namu na chayadauchixetũxẽẽgũxũcèx i ngẽma ingexetũgũxũ rũ na íchananguxũxẽẽxũcèx i ngẽma duũxũgũ i togũmẽxẽwa ngẽxmagũxũ. ¹⁹ Rũ núma choxũ namu na duũxũgũmaã nüxũ chixuxũcèx na Tupana nüxũ rüngũxẽẽchaũxũ i ngẽma nüxũ yaxõgũxũ”,

ñanagürũ ga yema ore. ²⁰ Rũ yexguma ga Ngechuchu rũ nügũna nananuxãchiãtũ ga popera. Rũ ngutaquẽxepataũãrũ dauruũna nanaxã rũ ñuxũchi ínarũto. Natürũ guxũma ga yema ngutaquẽxepataũwa yexmagũxũ ga duũxũgũ rũ nüxũ narũdaunũẽcha. ²¹ Rũ yexguma ga Ngechuchu rũ inanaxũgũ ga na yadexaxũ, rũ ñanagürũ: —Ñuxmatama nixĩ i pepẽxewa Tupana yanguxẽẽxũ i ñãã ore ga Ichaxía ümatũxũ —ñanagürũ. ²² Rũ guxũma ga duũxũgũ rũ meã Ngechuchuchiga nidexagũ. Rũ nãbaixãchiãẽgũ namaã ga yema ore ga mexũ ga namaã nüxũ yaxuxũ. Natürũ tama aixcũma nayaxõgũchaũ. Rũ yemacèx nügũna nacagũ rũ ñanagürũgũ: —¿Taux èxna daa yĩxũ ya Yũche nane? —ñanagürũgũ.

²³ Rũ Ngechuchu rũ ñanagürũ nüxũ: —Choma nüxũ chacuèx rũ tá chomaã penaxuxuchi i ngẽma ore i ñaxũ:

“Pa Duturux ¡Cugũtama rũmexẽẽ!” ñaxũ. Rũ èxna tá choxũ ñaperũgũgũ:

“Yema mexũ ga taxũ ga nüxũ taxĩnũèxũ ga Tupanaãrũ poramaã cuxũxũ ga Capernãũwa, rũ tanaxwèxe i nuã curũ ñãnewa rũ ta na cunaxũxũ”, ñaperũgũgũ tá. ²⁴ Rũ nayadaxẽẽ ga Ngechuchu na yadexaũ rũ ñanagürũ: —Aixcũma pemaã nüxũ chixu

rü guxüma i Tupanaärü orearü uruü, rü norü ñānewatama i duüxüğü rü tama meā nanayauxgü. ²⁵ —Rü aixcüma pemaā nüxü chixu rü Iraéanewa rü nayexma ga muxüchixüma ga ngexüğü ga iyutegüxü ga yexguma Ería maüxgu. Rü yexguma nixi ga tomaēxpüx ga taunecüarü ngäxü rü taguma napuxü, rü poraäcü nangüxü ga taiya ga guxü ga ñaa nachixüanewa. ²⁶ —Natürü ga Tupana rü tama wüxi ga Iraéanecüāx ga yutecüxütawa Eríaxü namu. Natürü ngixütawa nanamu ga yema yutecü ga Charépacüāx ga Chidāüärü ñāneärü ngaicamagu āchiücü. ²⁷ —Rü yexguma namaüxgu ga Erichéu, rü Iraéanewa nayexmagü ta ga muxüma ga duüxüğü ga chaxünemaā idaaweexü. Natürü taxuüma ga yema idaaweexü ga Iraéanewa yexmagüxü rü naxcèx nitaaneē. Rü Namāü ga Chíriaanecüāxīcatama nixi ga guma naxcèx yataanecü —ñanagürü ga Ngechuchu. ²⁸ Rü yexguma yema orexü naxīnüēgu, rü guxüma ga yema duüxüğü ga guma ngutaquēxepataüwa yexmagüxü rü poraäcü naxcèx nanuē. ²⁹ Rü inachigü ga duüxüğü rü Ngechuchuxü inatèxüchigü ga guma ñānewa. Rü guma mēxpüne ga guma ñāne nawa yexmanechitaeruwa nanagagü na yēma yanataegüāxüçèx. ³⁰ Natürü ga Ngechuchu rü norü ngäxütanüwa inaxüxüāma, rü inixü.

*Wüxi ga yatü ga ngoxo nawa yexmaxüchiga
(Mr 1.21-28)*

³¹ Rü yexguma ga Ngechuchu rü Gariréaaneärü ñāne ga Capernāüwa naxü. Rü ngüxchigaarü ngunexügu yēma duüxüğüxü nangüexēē. ³² Rü duüxüğü rü nabaixāchiāēgü namaā ga norü nguxēētae, yerü Tupanaärü poramaā nidexa. ³³ Rü guma ngutaquēxepataüwa nayexma ga wüxi ga yatü ga ngoxo nawa yexmaxü. Rü aita yēma naxü, rü ñanagürü: ³⁴ —¡Toxna ixügachi! ¿Tüxcüü totanüwa cuxü, Pa Ngechuchux, Pa Nacharétucüāx? ¿Nuā cuxü na toxü cudèixüçèx? Choma cuxü chacuèx na Tupana Nane ya Üünecü na quiixü —ñanagürü. ³⁵ Rü Ngechuchu nananga ga yema ngoxo rü ñanagürü: —¡lyarüngeèx rü inaxüxü nawa ya yima yatü! —ñanagürü. Rü yexguma ga yema ngoxo rü duüxügüpèxegu nayanguxēē ga guma yatü, rü nawa inaxüxü. Natürü tama nanapixēē. ³⁶ Rü guxüma ga duüxüğü rü nabaixāchiāēgü. Rü nügümücügümaāchigü nachiga nidexagü, rü ñanagürügü: —¿Tacü rü ore nixi i ngēma? Erü ñāā yatü rü aixcüma ngēma ngoxogümaā inacuèx rü poraäcü nanamu. Rü nümagü rü naga naxīnüē, rü inachoxü —ñanagürügü. ³⁷ Rü guxüwama ga yema naānewa rü Ngechuchuchigaxü nixugüe ga duüxüğü.

*Ngechuchu rü Chimāü ga Pedru nëxèçèx nayataanexēē
(Mt 8.14-15; Mr 1.29-31)*

³⁸ Rü guma ngutaquēxepataüwa inaxüxü ga Ngechuchu rü Chimāüpatawa naxü. Rü Chimāü nëxè rü poraäcü iyaxaxüne. Rü Ngechuchuna nacagüe ga ngixcèx na yataanexēēāxüçèx. ³⁹ Rü nüma rü ngixütagu nayachi rü narümèxāchi rü nananga ga yema axüne. Rü yexgumatama igèuxāchi ga na yaxaxünexü. Rü yexgumatama írüda, rü naxcèx inamexēē ga òna.

*Ngechuchu rü muxüma ga idaaweexüçèx nayataanexēē
(Mt 8.16-17; Mr 1.32-34)*

⁴⁰ Rü yexguma marü yanaxücuchaügu ga üèxcü, rü Ngechuchuxütawa nanagagü ga guxüma ga duüxüğü ga nagüxüraüxü ga daaweanemaā idaaweexü. Rü ga Ngechuchu rü wüxichigü ga yema duüxüğüxü ningögü, rü yemaäcü naxcèx nayataanexēēchigü. ⁴¹ Rü nanameèxēē ga muxüma ga duüxüğü ga idaaweexü ga ngoxo nawa yexmagüxü. Rü yema ngoxogü rü aita naxüe, rü ñanagürügü: —Cuma nixi i Tupana Nane quiixü —ñanagürügü. Natürü ga Ngechuchu rü nayangagü ga yema ngoxogü. Rü nüxna nanachüxu ga na yadexagüxü, yerü yema ngoxogü rü nüxü nacuèxgü na Cristu yiixü.

Ngechuchu rü nanaxunagü ga ore ga mexü ga ngutaquëxepataüwachigü
(Mr 1.35-39)

⁴² Rü yexguma noxri yangóonegu rü yema ñanewa ínaxüxü ga Ngechuchu. Rü wüxi ga nachica ga taxúema íxãpataxüwa naxü. Natürü ga duüxügü rü naxcèx nadaugü rü düxwa naxütawa nangugü. Rü nüxü nacèèxügü ga tama na ínaxüxüxücèx ga yema norü nañewa. ⁴³ Natürü ga Ngechuchu rü ñanagürü nüxü: —Taxucürüwama petanügu charüxãüëcha erü chanaxwèxe na náigü ya ñãnegüwa ngëxmagüxü i duüxügümaã rü ta nüxü chixuxü na ñuxãcü ãëxgacü yüxü ya Tupana. Erü woetama ngëmacèx núma choxü namu —ñanagürü. ⁴⁴ Rü yemaãcü Ngechuchu nüxü nixuchigü ga ore ga ngutaquëxepataügwachigü ga guxüma ga Garirëaanewa.

5

Muxüma ga choxni na ínayauxüxüchiga
(Mt 4.18-22; Mr 1.16-20)

¹ Rü wüxicana ga yexguma naxtaxa ga Yenecharétuanacüwa nayexmagu ga Ngechuchu, rü muxüma ga duüxügü rü naxütawa nangugü. Rü düxwa yéma nayaxãütügü, yerü nüxü naxñüëchaü ga Tupanaärü ore. ² Rü Ngechuchu yéma nüxü nadau ga taxre ga ngue ga ingeãcune. Rü guma nguegü rü naxnecüpechinüwa nanadagü, yerü ga püchaetanüxü rü nüxna yéma ínachoü, yerü norü pücha niyauxgü. ³ Rü wüxi ga guma nguegu nixüe ga Ngechuchu. Rü guma ngue rü Chimáüärü nixí. Rü Chimáüna naca ga naxnecüpechinüärü ngãxütüwaxüra na nangeaxücèx. Rü guma nguewa narüto ga Ngechuchu. Rü yéma inanaxügü ga duüxügüxü na nangüxëëxü. ⁴ Rü yexguma yagüegagu ga Ngechuchu ga na yadexaxü, rü Chimáüxü ñanagürü: —¡yéa ínamátamaxüwa namaã naxã ya daa ngue. Rü ngema penatáe i perü pücha na choxnita piyauxgüxücèx! —ñanagürü. ⁵ Rü Chimáü nanangãxü, rü ñanagürü nüxü: —Pa Ngüxëëruüx, ngewèx rü guxü i chütaxü rü tapüchae, natürü taxuüma i choxni tiyaxu. Natürü ñuxma na choxü cumuxü rü wena táxarü íchanatáe i chorü pücha —ñanagürü. ⁶ Rü yexguma ínatéegüãgu ga norü pücha, rü muxüma ga choxni ínayauxü. Rü düxwa narügáuxchaü ga norü pücha yerü namuxüchi ga choxni. ⁷ Rü naxmëxmaã náí ga nguewa yexmagüxü ga natanüxügücèx nacagü na nüxü yanangüxëëgüxücèx. Rü yéma naxí ga yema natanüxügü ga naxcèx nacagüxü. Rü nanaxüãcugü ga guma taxre ga ngue rü wixgutaèx inangutaügü yerü namuxüchi ga choxni. ⁸ Rü yexguma yemaxü nadèuxgu ga Chimáü ga Pedru, rü Ngechuchupëxegu nayacaxãpüxü, rü ñanagürü nüxü: —¡Choxna ixügachi! Pa Corix. Erü choma rü wüxi i duüxü i pecaduãxü chixí —ñanagürü. ⁹ Rü yema ñanagürü ga Chimáü yerü núma rü guxüma ga natanüxügü rü namaã nabaixãchiãëgü ga yema muxüma ga choxni na ínayauxüxü. ¹⁰ Rü nabaixãchiãëgü ta ga Chimáümücügü ga Chaütiágu rü Cuáü ga Zebedéu nanegü. Natürü Ngechuchu rü Chimáüxü ñanagürü: —¡Tãxü i cumuüxü! Erü ñuxmacürüwa rü tá choxü cupuracü na chauxütawa cunagagüxücèx i duüxügü —ñanagürü. ¹¹ Rü yexguma naxãnacüwa namaã nangugügu ga naweügü, rü yéma nanawogü ga norü guxüma rü Ngechuchuwe narüxí.

Ngechuchu rü wüxi ga rüchaxünexücèx nayataanexëë
(Mt 8.1-4; Mr 1.40-45)

¹² Rü yexguma wüxi ga yéma yexmagüne ga ñanewa nayexmagu ga Ngechuchu, rü yéma naxütawa nangu ga wüxi ga yatü ga chaxünemaã idaawexü. Rü yexguma Ngechuchuxü nadèuxgu rü napëxegu nayacaxãpüxü rü yexma nanangücuchi. Rü Ngechuchuxü nacèèxü, rü ñanagürü: —Pa Corix, ngëxguma cuma cunaxwèxegu, rü cuxü natauxcha na choxü curümexëëxü nawa i chorü daawe —ñanagürü. ¹³ Rü yexguma ga Ngechuchu rü nüxü ningögü, rü ñanagürü nüxü: —Ngü, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga yema yatü ga chaxüneãxü. ¹⁴ Rü Ngechuchu nanaxucüxë rü ñanagürü nüxü: —¡Dücèx, taxúemaãtáma nüxü quixu,

natürü paixü cugü yadauxëë na curümexü rü yanguxëë i ngëma Tupana Moïchéwa nüxü ixuxü na duüxügü nüxü cuáxücèx na marü curümexü nawa i curü daawe! —ñanagürü. ¹⁵ Natürü ga Ngechuchuga rü guxüwama ninguchigüama. Rü muxüma ga duüxügü rü naxcèx naxítaquëxegü na norü orexü naxĩnüëxücèx, rü naxcèx na yataaneëxëãxücèx ga norü daawegüwa. ¹⁶ Natürü Ngechuchu rü ñuxguacü rü ngextá taxúema íxãpataxüwa naxüxü. Rü yéma nayayumüxëxü.

*Ngechuchu rü wüxi ga yatü ga nawãixãchicücèx nayataanexëë
(Mt 9.1-8; Mr 2.1-12)*

¹⁷ Rü wüxi ga ngunexü Ngechuchu ínguxëëtaeyane, rü yéma narütogü ga ñuxre ga Parichéugü rü ñuxre ga ngúexëëruügü ga Moïchéarü mugümaã nguxëëtaegüxü ga guxü ga Gariréaaneärü ñanexãcügüwa ne íxü, rü Yudéaanewa ne íxü, rü Yerucharéüwa ne íxü. Rü Tupana rü poraãcü Ngechuchuwa inanawëx ga norü pora rü muxüma ga idaaweexü narümeëxëë. ¹⁸ Rü Ngechuchuxütawa nangugü ga ñuxre ga yatügü, rü naxcèx yéma nanangetaügü ga wüxi ga yatü ga nawãixãchicü. Rü ípatagu nanangechuchitaügüchaü na Ngechuchupëxegu yaxütaügüãxücèx. ¹⁹ Natürü taxuacüma yexma nanangecuchitaügüéga, yerü namuxüchi ga duüxügü. Rü yemacèx ñacèxwëxgu naxígü. Rü meãma Ngechuchu íyexmaxüetüwa ínanapogüãxügü ga guma ípata. Rü yéma duüxügütanüwa Ngechuchupëxewa ínanachüxüetaügü ga guma nawãixãchicü. ²⁰ Rü yexguma Ngechuchu nüxü dëuxgu ga na nüxü yaxögüãxü ga yema yatügü, rü ñanagürü guma nawãixãchicüxü: —Pa Chaunex, marü cuxü nüxü changechaü i curü pepadugü —ñanagürü. ²¹ Natürü yema ngúexëëruügü ga Moïchéarü mugüarü nguxëëtaeruügü rü Parichéugü, rü nagu narüxĩnüë, rü nügüãewa ñanagürügü: —¿Tãcü nixí i ñaã yatü ecèx Tupanamaã chixexü yaxugüxü? Erü taxúema pora tüxü nangëxma na duüxügüaxü pepaduxü tangechaüxü. Rü Tupanaxícatama nixí ya nüxü nangëxmacü i ngëma pora —ñanagürügü naãewa. ²² Natürü ga Ngechuchu rü nüxü nacuèx ga tacügu na ínaxĩnüëxü. Rü yemacèx ñanagürü nüxü: —¿Tüxcüü ngë-magu perüxĩnüë i pemax? ²³ —¿Tãcü nixí irütauxchamaëxü na namaã nüxü ixuxü ya daa yatü ya nawãixãchicü:

“Curü pepadugü rü marü cuxü nüxü changechaü”, rü ëxna:

“¡Inachi rü íxü!” ñágüxü nüxü? ²⁴ —Natürü ñuxma rü tá pexü nüxü chadauxëë na Chaunatü núma choxü muxü na duüxügüaxü nüxü changechaüxücèx i norü pepadugü —ñanagürü. Rü yexguma yema ñaxguwena rü guma nawãixãchicüxü ñanagürü: —Cumaã nüxü chixu rü ¡inachi, rü nayaxu i curü caruü, rü cupatawa naxü! —ñanagürü. ²⁵ Rü yexgumatama guxü ga duüxügüpëxewa inachi ga guma nawãixãchicü. Rü nanayaxu ga norü caruü ga nagu nacaxü. Rü Tupanaxü yacuëxüüchigüãcüma napatawa naxü. ²⁶ Rü guxüma ga duüxügü rü nabaixãchiãëgü. Rü Tupanaxü nicuëxüügü. Rü poraãcü namuëãcüma ñanagürügü: —Ñuxma rü nüxü tadaugü i ñuxre i Tupanaärü puracügü i aixcüma mexëchixügü —ñanagürügü.

*Lebícèx naca ga Ngechuchu
(Mt 9.9-13; Mr 2.13-17)*

²⁷ Rü yemawena ga Ngechuchu rü ínaxüxü ga guma íwa. Rü wüxi ga yatü ga Dumaärü ãëxgacücèx díeru ngíxü ideetanüxüxütawa naxüpetü. Rü guma yatü rü Lebí nixí ga naega. Rü yéma díeru ngíxü ínadexüwa narüto. Rü Ngechuchu rü ñanagürü nüxü: —¡Chowe rüxü! —ñanagürü. ²⁸ Rü inachi ga Lebí, rü yéma nanatèx ga norü guxüma, rü Ngechuchuwe narüxü. ²⁹ Rü yixcama ga Lebí rü Ngechuchucèx napatawa wüxi ga taxü ga òna naxü. Rü muxüma ga yatügü ga Lebírüü díeruarü degüwa puracüexü, rü muxüma ga togü ga duüxügü rü ta yéma mechawa narütogü. ³⁰ Natürü ga yema Parichéugü rü ngúexëëruügü ga Moïchéarü mugüarü nguxëëtaeruügü, rü inanaxügüe na Ngechuchuarü ngúexügüchigagu chixri yadexagüxü. Rü ñanagürügü: —¿Tüxcüü wüxiwa pechibüe rü namaã pexaxegü i ngëma yatügü i Dumaärü ãëxgacücèx díeru ngíxü dexü

rü ngêma pecaduãxgüxü? —ñanagürügü. ³¹ Rü Ngechuchu nanangãxü, rü ñanagürü nüxü: —Ngêma poraexü rü taxucèxma duturu nanaxwèxegü, natürü ngêma idaaweexü nixi i duturu naxwèxegüxü. ³² —Choma rü tama mexügüna na chaxuxücèx nixi i numa chaxüxü, natürü pecaduãxgüxüna na chaxuxücèx nixi i numa chaxüxü na ngêmaãcü nüxü naxoexücèx i nacümagü i chixexügü rü Tupanawe naxixü —ñanagürü.

Ngechuchuna nacagüe ga aurechiga
(Mt 9.14-17; Mr 2.18-22)

³³ Rü yexguma Ngechuchuna nacagüe ga duüxügü, rü ñanagürügü: —Cuáü ya baiüxëruüârü ngüexügü rü Parichéugüârü ngüexügü rü nayumüxëgüecha, rü muëxpüxcüna rü naxauree rü tama nachibüe erü Tupanagu narüxñüë. Natürü i curü ngüexügü, rü guxüguma nachibüe rü naxaxegümare —ñanagürügü. ³⁴ Natürü ga Ngechuchu rü nanangãxü, rü wüxi ga ore ga nügüchigaxütama namaã nixu, rü ñanagürü: —¿Éxna wüxi i ngīgüârü petawa rü pexcèx namexü na penaxaureexëxü i ngêma nüxna naxugüxü ega natanüwa nangëxmagu i ngêma yatü i ngexwacèx ãmaxü? Rü tama nixi. ³⁵ —Natürü wüxi i ngunexü rü ngêma yatü i ngexwacèx ãmaxü, rü tá namücügüna nixügachi. Rü ngêma ngunexügu tá nixi i aixcüma naxaureexü i namücügü —ñanagürü. ³⁶ Rü yexguma ga Ngechuchu rü namaã nüxü nixu ga wüxi ga ore ga yema duüxügücüma ga nuxcümaüxüchiga rü noxrütama nguxëëtae i ngexwacaxüxüchiga. Rü ñanagürü: —Taxüema wüxi i ngexwacaxüxü i naxchiruta tiyo na namaã tanapaitaxücèx i wüxi i naxchiru i marü ngauxü. Erü ngëxguma ngêmaãcü tanaxüxgu rü tanachixexë i ngêma naxchiru i ngexwacaxüxü. Rü ñuxüchi ngêma natüchi i ngexwacaxüxü rü tama nüxü nayatãüxü i ngêma naxchiru i marü ngauxü. ³⁷ —Rü ngëxgumarüü ta rü taxüema ngexwacaxücü ya binu rü nagu tayabacuchi i wüxi i naxchiü i marü ngauxü i naxchëxmünaxcèx. Erü ngëxguma ngêmaãcü naxüxgu rü yima binu ya ngexwacaxücü rü tá narüngu, rü tá nayawãixëë i ngêma naxchiü i ngauxü i naxchëxmünaxcèx. Rü ngëxma tá nayarütaxu ya binu rü ngêma naxchiü rü ta. ³⁸ —Rü ngëmacèx tanaxwèxe na yima ngexwacaxücü ya binu rü ngexwacaxüxü i naxchiügu yabacuchixü. Rü ngêmaãcü rü taxuütáma inayarütaxu. ³⁹ —Rü taxüema ya texé ya tümamaã yaxüxe na ngüchiacü ya binu tayaxaxüxü rü tüxü nangüchaü na tayaxaxüxü ya binu ya ngexwacaxücü ya maïcuracü. Rü ngëxgumarüü ta nixi i ngêma duüxügü i marü namaã yaxüxü i nuxcümaüxü i nacüma i chixexü rü tama nanayauxgüchaü i ngêma mexü i nguxëëtae i ngexwacaxüxü —ñanagürü ga Ngechuchu.

6

Ngechucharü ngüexügü rü trigu nicãüëtanü ga ngüxchigaarü ngunexügu
(Mt 12.1-8; Mr 2.23-28)

¹ Rü wüxi ga ngüxchigaarü ngunexügu rü Ngechuchu rü norü ngüexügümaã trigunecüwa nachopetü. Rü norü ngüexügü rü inaxiãcüma yoxocüne trigu nicãüëtanü. Rü naxmëxmaã nanadaxi ga trigu rü nayangöëtanü. ² Rü ñuxre ga Parichéugü rü yema ngüexügüna nacagü, rü ñanagürügü: —¿Tüxcüü ngüxchigaarü ngunexügu penabuxu i trigu? Erü ngüxchigaarü ngunexügu rü nachuxu na texé puracüxü —ñanagürügü. ³ Rü Ngechuchu nanangãxü, rü ñanagürü: —¿Taguma éxna poperawa nüxü pedau ga tacü na naxüxü ga nuxcümaücü ga äëxgacü ga Dabí ga yexguma nataiyagu ga nüma rü natanüxügü? ⁴ —Rü Tupanapatagu naxücu rü nüxü nadau ga yema pãü ga üünexü ga yexma nuxü. Rü yema pãü rü nachuxu ga ngexerüxemare na nangöxü, rü paigücëxicatama nixi. Natürü Dabí nanayaxu ga yema pãü rü nanangöx, rü natanüxümaã rü ta nangau —ñanagürü. ⁵ Rü ñanagürü ta ga Ngechuchu: —Tupana Nane ya duüxüxü ixicü rü namaã inacüex i ngüxchigaarü ngunexü —ñanagürü.

Wüxi ga yatü ga yumécüchiga
(Mt 12.9-14; Mr 3.1-6)

⁶ Rü to ga ngüxchigaarü ngunexügu rü Ngechuchu rü ngutaquëxepataügu naxücu. Rü inanaxügu ga na nangüxëëtaexü. Rü yéma nayexma ga wüxi ga yatü ga norü tügünewa yumécü. ⁷ Rü yema ngúexëëruügu ga Moïchéarü mugüwa ngüxëëtaegüxü rü Parichéugü, rü Ngechuchuxü nangugügu ngoxita ngüxchigaarü ngunexügu guma yumécüxü namexëë, yerü naxcèx nadaugü ga ñuxácü norü äëxgacügüxütawa na ínaxuaxüguãxü. ⁸ Natürü nüma ga Ngechuchu rü nüxü nacuèx ga yema naãëwa nagu naxínüëxü ga yema yatügu. Rü yemacèx guma yumécüxü ñanagürü: —¡Írüda rü nuxã ngãxütanügu yachi! —ñanagürü. Rü guma yumécü rü inachi rü norü ngãxütanügu nayachi. ⁹ Rü yexguma ga Ngechuchu rü nüxna naca ga yema Parichéugü rü yema mugüwa ngüxëëtaegüxü, rü ñanagürü nüxü: —¿tacü nixí i ngema mexü ixüxü i ngüxchigaarü ngunexügu? ¿Rü ngema mexü rü ëxna chixexü? ¿Rü namexü i na namaxëëxü rü ëxna yamáxü? —ñanagürü. ¹⁰ Rü yexguma Ngechuchu nüxü nidaugüächi ga yema duüxügu ga yéma yexmagüxü. Rü guma yumécüxü ñanagürü: —¡Iyanawëxächixëë ya cuxmëx! —ñanagürü. Rü guma yatü rü nügu inayarüwëxächimëxëë, rü narümemëx. ¹¹ Natürü yema Parichéugü rü ngúexëëruügu ga Moïchéarü mugüwa ngüxëëtaegüxü, rü poraäcü nanuë. Rü nügu nixucüxëgu na ñuxácü tá Ngechuchuxü na yamëxgüxü.

Ngechuchu nanade ga 12 ga norü ngúexügu na tóxnamana namugüãxüçèx
(Mt 10.1-4; Mr 3.13-19)

¹² Rü yexguma ga Ngechuchu rü dauxchitawa, wüxi ga mëxpünewa naxü na yéma yayumüxëxüçèx. Rü guxü ga yema chütaxügu rü yéma nayumüxë. ¹³ Rü yexguma yangóonegu, rü Ngechuchu norü ngúexüguçèx naca. Rü natanüwa nayadexeçi ga 12. Rü yema nixí ga yatügu ga Ngechuchu nüxü unetagüxü na tóxnamana nangegüãxüçèx ga norü ore. ¹⁴ Rü yema yatügu ga nadexü rü Chimáü ga Pedrugu nanaxüéga nixí ga wüxi. Rü to nixí ga Aüdré ga Chimáü naëneë, rü Chaütiágu rü Cuáü, rü Piripi, rü Baturumé, ¹⁵ rü Mateu, rü Tumachi, rü Chaütiágu ga Arupéu nane rü Chimáü ga iporaãëcüücü, ¹⁶ rü Yuda ga Chaütiágueneë, rü Yuda Icariüte ga yixcama Ngechuchuxü íxuaxüxü naëchita.

Ngechuchu rü muxüma ga duüxüguxü nangúexëë
(Mt 4.23-25)

¹⁷ Rü Ngechuchu rü yema yatügu ga nadexümaã ínarüxügu nawa ga guma mëxpüne. Rü wüxi ga nachica ga ínametachinüãnexüwa nayachaxächitanü. Rü yéma nayexmagü ga muxüma ga duüxügu ga guxü ga Yudéaanewa ne íxü, rü Yerucharéüwa ne íxü, rü taxtü ga taxüãnacüwa ga Chidãüwa rü Tiruwa ne íxü. Rü yéma naxí yerü Ngechuchuxü naxínüëchaü, rü nanaxwëxegü ga Ngechuchu na nameëxëëxü ga norü ñaawegüwa. ¹⁸ Rü yema duüxügu ga chixexü ga naãë nawa yexmagüxü rü ta naxcèx nitaanegü. ¹⁹ Rü guxüma ga duüxügu rü Ngechuchuxü ningögügüchaü, yerü norü poramaã nanameëxëë.

Duüxügu i taãëgüxüchiga rü duüxügu i ngechaügüxüchiga
(Mt 5.1-12)

²⁰ Rü yexguma Ngechuchu rü norü ngúexüguxü nadawenü, rü ñanagürü nüxü: —¡Petaãëgü i pema ya ingearü ngëmaxüãxgüxe! Rü Tupana äëxgacü íxíxüwa rü pema rü tá ta pexächica. ²¹ —¡Rü petaãëgü i pema i ñuxma taiyaexe! ¡Rü tá meãma pingãxcharaügu! ¡Rü petaãëgü i pema i ñuxma auxexe! Rü yixcama rü tá pecugüe. ²² —¡Rü petaãëgü i pema i ngëxguma duüxügu pexchi aiegu, rü pexü ínawoüxgu, rü tacü pemaã yaxugüegu, rü chaugagu chixri pechiga yadexagügu! ²³ —Rü ngëxguma ngëma pexü üpetügu, rü ¡petaãëgüama rü tama pexoegaãëgü! Erü daxügüxü i naãnewa rü tá penayauxgü i wüxi i perü ãmare i mexëchixü. Rü dücax, ñaã duüxügu i ñuxma pexchi aixüärü oxigü rü yexgumarüü ta nixí ga naxchi na naxaixü ga nuxcümaüguxü ga Tupanaärü orearü uruügu. ²⁴ —Natürü wüxi i ngechaü tá nixí i pexcèx i pema ya muärü ngëmaxüãxgüxe

erü núma ñoma i naãnewa rü marü petaãëgü. ²⁵ —Rü wüxi i ngechaũ tá nixĩ i pexcèx i pema ya marü ingaxcharaũgüxe erü tá petaiyae. Rü wüxi i ngechaũ tá nixĩ i pexcèx i pema i ñuxma marü cugüexe, erü yixcama rü perü ngechaũmaã tá pexauxe. ²⁶ —Rü wüxi i ngechaũ tá nixĩ i pexcèx i ngëxguma guxũma i duũxũgü pexũ icuèxüũgügu. Erü ngëma duũxũgü i ñuxma pexũ icuèxüũgüxũârü oxigü rü yexgumarüü nüxü nicuèxüũgü ga nuxcümaũgüxü ga orearü uruũgüneta.

Name nixĩ i nüxü tangechaũ i ngëma tamaã rüxuwaniũgüxü
(Mt 5.38-48, 7.12)

²⁷ —Natürü pema i ñuxma na choxü pexĩnüèxü rü pemaã nüxü chixu rü: —¡Nüxü pengechaũ i ngema pemaã rüxuwaniũgüxü! ¡Rü meã nüxü perüngüxëèx i ngëma pexchi aiexü! ²⁸ —¡Rü meã nachiga pidexagü rü naxcèx ípeca i Tupanaãrü ngüxëè naxcèx i ngëma pemaã guxchigagüxü! ¡Rü naxcèx peyumüxëgü i ngëma chixri pechigamaã idexagüxü! ²⁹ —Rü ngëxguma texé cumaã nuxgu rü cuxü tapechiwegu rü name nixĩ i tama cuxütanü ega woo curü tochiwewa rü ta cuxü tapechiwegu. Rü ngëxguma texé cuxü napuarü gáxüchiruãxgu, rü name nixĩ i tüxü cungechaũãma ega woo curü daxü rü ta cuxna tanapuxgu. ³⁰ —¡Rü tüxna naxã ya texé ya curü ngëmaxüçèx ícaxe! Rü ngëxguma texé curü ngëmaxü cuxna napuxgu, rü tama name i naxcèx cungema. ³¹ —Rü ngëma mexü i pema penaxwèxexü na togü pemaã naxüxü, rü name nixĩ i pema rü ta ngëmaãcü mexü namaã pexü. ³² —Rü ngëxguma pema rü ngëma duũxũgü i pexü ngechaũxüxüxĩcatama pengechaũgu, rü ¿tacüwa namexü i ngëma? Erü ngëma duũxũgü i tama yaxõgüxü rü ngëmaãcü nanaxügü. ³³ —Rü ngëxguma ngëma duũxũgü i cuxü rüngüxëèxüxüxĩcatama curüngüxëègu, rü ¿tacüwa namexü i ngëma? Erü ngëma duũxũgü i tama yaxõgüxü rü ngëmaãcü nanaxügü. ³⁴ —Rü ngëxguma ngëma duũxũgü i ixããrü dīeruãxüxüxĩcatama cunaxãxgu i curü dīeru, rü ¿tacüwa namexü i ngëma? Erü ngëma duũxũgü i tama yaxõgüxü rü ngëmaãcü nanaxügü, erü nüxü nacuèxgü rü tá nüxü nanataeguxëè i ngëma dīeru. ³⁵ —Natürü pema rü name nixĩ i nüxü pengechaũ i ngema pemaã rüxuwaniũgüxü, rü nüxü perüngüxëè. Rü ngëxguma ¿tacüçèx pexna nacaxgu, rü name nixĩ i tama pexoegaãèãcüma nüxna penaxã ega woo nagu perüxĩnüègu na ngürüãchi tãütáma pexü nataeguxëèãxü. Erü ngëxguma ngëmaãcü penaxüxgu, rü Tupana rü ngëmaãrü yexera tá poraãcü pexü nanataeguxëè, rü naxãcügü tá pixĩgü ya yima Tupana ya Poraxüchicü ya nüxü rüngüxëècü ta i ngëma taguma moxë nüxna ãgüxü rü ngëma chixecümagüxü. ³⁶ —Rü pema rü name nixĩ i pengechaũwaxegü, ngëma Penatü ya Tupana na ngechaũwaxexürüü.

Tama name i chixexügu namaã perüxĩnüe i togü
(Mt 7.1-5)

³⁷ —¡Rü taxü i togüxü pixuxü! Rü ngëxguma ya Tupana rü tãxütáma pexü nixu na pechixexü. ¡Rü taxü i poxcu namaã pexueguxü i togü! Rü ngëxguma ya Tupana rü tãxütáma poxcu pemaã naxuegu. ¡Rü nüxü nüxü perüngümae i norü chixexü i togü! Rü ngëxguma ya Tupana rü tá pexü nüxü narüngüma i perü chixexü. ³⁸ —¡Rü togümaã pengau i perü ngemaxügü! Rü ngëxguma ya Tupana rü tá pexna nanaxã. Rü ñoma wüxi i choca i meãma napaxürüü rü meama ípoõcuxürüü tá Tupana pexna nanaxã. Erü ngema nguruxü i namaã cumücüna cuxãxü i curü ngemaxü rü nge-matama nguruxümaã tá Tupana cuxna nanaxã —ñanagürü. ³⁹ Rü Ngechuchu rü ñaã cuèxruü norü ngüexügümaã nixu, rü ñanagürü: —¿Ñuxãcü i wüxi i ngexetüxü rü to i ngexetüxüxü namaxü nacuèxëèxü? Erü ngëma taxre i ngexetüxü rü wüxi i ãxmaxügu tá nügümaã nayayicu. ⁴⁰ —Rü taxuüma i ngüexü rü norü ngüexëèruüxü narüyexera. Natürü ngëxguma meã nanguxgu rü tá naxrüxü nixĩ ya norü ngüexëèruü. ⁴¹ —¿Rü tüxcüü nachiga quidexa i cumücü naxcèx i ngëma íraxü i chixexü i naxüxü natürü tama cugütama cungügü naxcèx i ngëma chixexü i taxü i cuxüxü? ⁴² —Rü ngëxguma tama

nüxna cucuèxãchigu i ngẽma chixexũ i taxũ i cumatama cuxũxũ, rü ¿ñuxũcürüwa i nagu curũxĩnũxũ na cunamexẽẽxũ i ngẽma cumücüarũ chixexũ i íraxũ? Pa Duũxũ i Meã Maxnetaxũx, name nixĩ i cuxira nüxũ curũxo i ngẽma chixexũ i taxũ i cumatama cuxũxũ, rü ngẽxguma tá cume na nüxũ curũngũxẽẽxũcèx i cumücü na nüxũ naxoxũcèx i ngẽma chixexũ i íraxũ i naxũxũ.

Wüxi i nanetü rü norü owa nixĩ i nüxũ icuáxũ
(Mt 7.17-20, 12.34-35)

⁴³ —Nataxuma i nanetü i mexũ i chixearü oóxũ. Rü nataxuma i nanetü i chixexũ i meärü oóxũ. ⁴⁴ —Rü wüxichigü i nanetü rü norü owa nixĩ i nüxũ icuáxũ. Rü wüxi i torawa rü taxucürüwama wüxi i orix i imúxũ tayaxu. Rü wüxi i chuxchuxũwa rü taxucürüwa uba tayaxu. ⁴⁵ —Rü wüxi ya mecü ya yatü rü mexũ i orexũ nixu, erü naãẽwa rü aixcúma mexũgu narũxĩnũ. Natürü wüxi i yatü i chixecúmaxũ rü chixexũ i orexũ nixu, erü chixexũgu narũxĩnũ. Rü ngẽma naãẽwa ngexmaxũ i chixexũ nixĩ i nüxũ yaxuxũ.

Ípata ya nutaétügu üxũne rü ípata ya naxnücüétügu üxũnechiga
(Mt 7.24-27)

⁴⁶ —¿Tüxcüũ i pema rü: “Pa Torü Corix” ñaperügü choxũ, natürü tama penaxü i ngẽma pemaã nüxũ chixuxũ? ⁴⁷ —Rü ñuxma tá pemaã nüxũ chixu na ñuxãcü tíxũ ya yíxema chowe rüxũxẽ rü choxũ ñnũxẽ rü naxúxe i ngẽma tümamaã nüxũ chixuxũ. ⁴⁸ —Rü tümã rü wüxi ga yatü ga üpatacü rü yamèxmaũcü ga norü caxta ñuxmata nutawa nangucürüũ tixĩ. Rü yexguma namèxgu ga taxtũ rü yabaixũgu ga napata, rü woo ga na naporaũchiũxũ, rü tama niwèxtaũ, yerü meãma inapugüarü caxtaãx ga guma í. ⁴⁹ —Natürü yíxema nüxũ ñnũmarexe i chorü ore natürü tama naxúxe i ngẽma tümamaã nüxũ chixuxũ, rü wüxi ga yatü ga naxnücüétügumare üpatacürüũ tixĩ. Rü yexguma namèxgu ga taxtũ, rü nibaixũ ga napata, rü naporaũchiü. Rü niwèxtaũ ga napata, rü yexma nayarüxo ga guma í.

7

Ngechuchu rü Dumacũãx ga churaragüarü ãẽxgacüarü duũxũxũ narümexẽẽ
(Mt 8.5-13)

¹ Rü yexguma nüxũ nachauxgu ga duũxũgümaã na yadexaxũ ga Ngechuchu, rü Capernáũwa naxũ. ² Rü yéma nayexma ga wüxi ga churaragüarü capitáũ ga Dumacũãx. Rü guma capitáũ rü nüxũ nayexma ga wüxi ga norü duũxũ ga poraãcü nüxũ nangechaũxũ. Rü yema norü duũxũ rü niðaawe, rü naturaxüchi. ³ Rü yexguma Ngechuchuxũ naxĩnũchigagu ga guma capitáũ, rü Ngechuchuxũtawa nanamugü ga ñuxre ga Yudíugüarü ãẽxgacügüerügü. Rü ñanagürü nüxũ: —jNgema Ngechuchuxũtawa pexĩ na nüxũ pecèèxũgũxũcèx rü núma naxũ na chorü duũxũcèx yanataanexẽẽãxũcèx! —ñanagürü. ⁴ Rü Ngechuchuxũtawa naxĩ, rü poraãcü nüxũ nacèèxũgü, rü ñanagürügü: —Name nixĩ i nüxũ curũngũxẽẽ ya torü capitáũ. ⁵ —Erü nüma rü guxũ i Yudíugũxũ nangechaũ. Rü nümatama nanaxütanü na naxügüãxũcèx ga torü ngutaquẽxepataũ —ñanagürügü. ⁶ Rü yexguma ga Ngechuchu rü nawe narũxũ. Natürü yexguma marü capitáũpataxũ yangaicagu, rü núma ga capitáũ rü Ngechuchucèx yéma nanamu ga ñuxre ga namücügü na namaã nüxũ yanaxugũxũcèx ga norü ore ga ñaxũ: —Pa Corix, tama cuxũ chachixewecheaũ na chopatawa cunguxũ erü choma rü taxuwama chame na chopatagu na cuxücuxũ. ⁷ —Rü ngẽmacèx nixĩ i tama chomatama cuxcèx chayaçaxũ. Rü chanaxwèxe i curü orewaxicatama nüxũ quixu na naxcèx yataanexũ tá i chorü duũxũ. ⁸ —Erü choma rü ta chorü ãẽxgacümèxèwa changèxma, rü choxmèxwa nangèxmagü ta i ñuxre i churaragü. Rü ngẽxguma chanamuxgu i wüxi na ngextá naxũxũcèx, rü ngema naxũ. Rü ngẽxguma chaugũxũtawa naxcèx changemagu i to, rü chauxũtawa nangu. Rü ngẽxguma chorü duũxũxũ chamuxgu na tacü na naxũxũcèx, rü choxũ nanaxü —ñanagürü. ⁹ Rü nüma ga Ngechuchu rü yexguma nüxũ naxĩnũgu ga yema capitáũarü

ore rü nabaixãchiãê. Rü yema duïxügü ga nawe rüxïxüxü nadawenü, rü ñanagürü: —Aixcüma pemaã nüxü chixu rü taxuüma i Yudíugütanüwa nüxü ichayangau i wüxi i duïxü i ngëma yatürüü aixcüma yaxõxü —ñanagürü. ¹⁰ Rü yexguma nawoegugu ga yema capitáümcügü ga Ngechuchuxütawa namugüxü, rü nüxü inayangaugü ga marü naxcèx na yataanexü ga yema capitáüärü duïxü.

Ngechuchu ñanadaxëê ga wüxi ga yutecü ngïne

¹¹ Rü yemawena ga Ngechuchu rü wüxi ga ñãne ga Naïgu ãeganewa naxü. Rü nawe narüxï ga norü ngüexügü, rü muxüma ga togü ga duïxügü. ¹² Rü yexguma guma ñãneärü ngaicamana nanguxgu, rü tüxü nadau ga wüxi ga yueta ga tèxgüwa tüxü nangegüxe. Rü guxema yuetaarü mamá rü tayute rü guma yucü rü guxicatama nixï ga tümane ixïcü. Rü muxüma ga duïxügü ga guma ñãneçüãx rü tüxü ñnixümcügü. ¹³ Rü yexguma Cori ga Ngechuchu guma yucüarü mamaxü dèuxgu, rü nüxü ingechaütümüü. Rü ñanagürü ngïxü: —¡Tãxü i cuxaxuxü! —ñanagürü. ¹⁴ Rü yexguma ga Ngechuchu rü yuetacèx nixü, rü nüxü ningögü ga tümachiü. Rü yema tüxü ingetaügüxü rü tümamaã inayachiãchitanü. Rü ñanagürü ga Ngechuchu tüxü ga guxema yueta: —Pa Ngextüxcüx, ¡rürda! —ñanagürü. ¹⁵ Rü yexguma ga guxema yuchiréxe rü ítarüto, rü itanaxügü ga na tidexaxü. Rü Ngechuchu rü tümãena tüxü namu. ¹⁶ Rü yexguma yemaxü nadaugügu ga duïxügü, rü guxüma namuê. Rü inanaxügüe ga Tupanaxü na yacuèxüügüxü. Rü ñanagürügü: —Wüxi i Tupanaärü orearü uruü i poraxü tatanüwa nangox. Rü ñanagürügü ta: —Tupana nuã naxü na norü duïxügüxü yanangüxëexücèx —ñanagürügü. ¹⁷ Rü guxüma ga Yudeaanewa rü norü ngaicamana, rü duïxügü nüxü nacuáchigagü ga yema Ngechuchu üxü.

Cuáü ga baiüxëëruü rü Ngechuchuxütawa nanamugü ga taxre ga norü duïxügü (Mt 11.2-19)

¹⁸ Rü Cuáü ga baiüxëëruü rü nüxü nacuáchiga ga guxüma ga yema Ngechuchu üxü, yerü norü ngüexügü ga Cuáü rü namaã nüxü nixugü. Rü yemacèx ga Cuáü rü taxre ga norü ngüexügücèx naca. ¹⁹ Rü Ngechuchuxütawa nanamugü. Rü Cuáü rü ñanagürü nüxü: —¡Ngema pexï rü Ngechuchuna peca rü ñapegügü nüxü: “¿Cuma yïxü i Cristu i cuxü ítanangüxëexü, rü éxna to tá yixï i Cristu?” ñapegügü nüxü! ²⁰ Rü yema yatügü ga Cuáü Ngechuchuxütawa mugüxü, rü Ngechuchucèx naxï. Rü ñanagürügü nüxü: —Cuáü ya baiüxëëruü núma cuxütawa toxü namugü na cuxna tayacagüxücèx rü ¿aixcüma cuma quiüxü i Cristu ya núma nguxchaücü, rü éxna to tá yixï i Cristu? —ñanagürügü. ²¹ Rü yexgumatama Ngechuchuxütawa nangugügu ga Cuáüärü ngüexügü, rü Ngechuchu nanameëxëê ga muxüma ga duïxügü ga nagüxüraüxü ga daawemaã idaaweexü rü yema ingoxoãxü. Rü nayadauchigüxëê ga muxüma ga ingexetüxü. ²² Rü yemacèx Ngechuchu nanangãxü rü ñanagürü: —¡Pewoegu rü Cuáümaã nüxü peyarüxu i ngëma pematama nüxü pedauxü rü nüxü pexïnüëxü! ¡Rü namaã nüxü pixu i ñuxãcü i ngëma ingexetüxü rü marü nidauchigü, rü ngëma ichixeparaxü rü marü inachigü, rü ngëma chaxüneãxgüxü rü marü naxcèx nitaanegü, rü ngëma ngauchixëgüxü rü marü ningoxnamachixëgü, rü ngëma yuexü rü wenaxärü namaxë, rü ngëma ingearü ngëmaxüãxümaã rü marü nüxü tixu i Tupanaärü ore i mexü! ²³ —Rü tataãê ya yixema texé ya tama choxü rüxoxe —ñanagürü ga Ngechuchu. ²⁴ Rü yexguma nawoeguxgu ga yema duïxügü ga Cuáü yéma mugüxü, rü Ngechuchu inanaxügü ga guma Cuáüchiga na yadexaxü. Rü duïxügümaã nüxü nixu, rü ñanagürü: —¡Tacü nixï ga pema ípeyadaugüxü ga dauxchitawa ga taxüema íxãpataxüwa? ¿Éxna wüxi ga yatü ga turaxü ga ñoma dexne ga buanecü yaxïãxtanücüxëëcürüü ixïxü nixï ga ípeyadaugüxü? ²⁵ —Rü éxna tama guma ípeyadaugügu, ¿rü tacü nixï ga ípeyadaugüxü? ¿Éxna wüxi ga yatü ga poraãcü nügü ngëxãëcü ípeyadaugü? Pema nüxü pecuèx i ngëma poraãcü nügü ngëxãëgüxü rü

ãëxgacügü ya tacügüpatawa nangëxmagü, rü taxucèxma dauxchitawa nangëxmagü. ²⁶ — ¿Tacü ëxna nixĩ ga ípeyadaugüxü? ¿Éxna wüxi ga Tupanaärü orearü uruü? Ngëmaãcü aixcüma yema nixĩ ga ípeyadaugüxü. Rü pemaã nüxü chixu rü Cuáü ya baiüxëëruü rü tama wüxi i ngëxürüüxü i Tupanaärü orearü uruü nixĩ. ²⁷ —Rü Cuáüchiga nixĩ ga naxümatüxü ga yema Tupanaärü ore ga ñaxü:

“Cupëxegu chayamu i chorü orearü ngeruü na cuxcèx namexëëãxücèx i duüxügüarü maxü”,

ñaxü. ²⁸ —Rü pemaã nüxü chixu rü guxü i duüxügütanüwa rü nataxuma i Tupanaärü orearü uruü i Cuáü ya baiüxëëruüärü yexera. Natürü yíxema Tupana ãëxgacü íixüüwa wixwexüchi üxe, rü Cuáüärü yexera tixĩ —ñanagürü. ²⁹ Rü guxüma ga duüxügü rü woo yema yatügü ga Dumaärü ãëxgacücèx dïëru ngïxü ideetanüxü, rü nüxü naxïnüë ga yema Ngechuchuarü ore rü ñuxüchi Tupanaxü nicuëxüügü yerü nüxü nicuëxächitanü na aixcüma mecü yïixü ga Tupana. Rü yema nixĩ ga duüxügü ga üpaacü Cuáü íbaiüxëëxü. ³⁰ Natürü yema Parichéugü rü yema ngüxëëruügü ga Moïchëarü mugüwa nguxëëtaegüxü rü tama nanaxwèxegü ga Cuáü na ínabaiüxëëxü. Rü yemaãcü nüxü naxoe ga yema mexü ga Tupana naxcèx üxchaüxü. ³¹ Rü nüma ga Cori ga Ngechuchu rü ñanagürü: — ¿Tacügu tá chanangu i ñomaücüü maxëxü i duüxügü? ¿Rü nanatacüraügü? ³² —Rü ñaã duüxügü rü taxuxümaãma nataëgü ngëxgumarüü i ngema buxügü i ñãxtüwa rütogüxü, rü íxïnücèxwèxegüxü, rü tagaãcü namücügüxü ñagüxü:

“Marü wowerumaã pexcèx tapaxetagu natürü tama ípixüächitanüxü. Rü marü ngechaüxü i wiyaegu pexcèx tawiyaegü natürü tama pexauxe”, ñagüxü. Rü ngëma buxügürüü taxuxümaãma nataëgü i ñomaücüü i duüxügü. ³³ —Yerü ga Cuáü ga baiüxëëruü rü núma naxü, rü tama pãü nangõx rü tama binu nayaxaxü. Rü yexguma ga pema rü: “Nangoxoãx” ñaperügü nüxü. ³⁴ —Rü ñuxüchi núma chaxü i choma ya Tupana Nane na duüxüxü chiixü, rü õna changõx rü binu chayaxaxü. Rü ngëxguma i pema rü ñaperügügü choxü:

“Choma rü chataanüxüchi rü changãxwèxe, rü pecaduã x-güxü i duüxügümaã chaxãmücü, rü yatügü i Dumaärü ãëxgacücèx dïëru ngïxü ideetanüxümaã chaxãmücü”, ñaperügügü choxü. ³⁵ —Natürü Tupanaärü cuèx rü meãma nangox tümawa ya yíxema aixcüma nawe rüxixë —ñanagürü ga Ngechuchu.

Ngechuchu rü Chimáü ga Parichéupatawa nayexma

³⁶ Rü wüxi ga Parichéu rü Ngechuchuna naxu na napatawa nachibüxücèx. Rü yéma naxü ga Ngechuchu rü yema Parichéuarü mechawa nayarüto. ³⁷ Rü wüxi ga ngecü ga chixri maüxcü ga guma ñanecüãx, rü yexguma nüxü nacuáchigagu na Parichéupatawa tá na nachibüxü ga Ngechuchu, rü yéma ixü. Rü yéma inange ga wüxi ga pumara ga yixixü ga wüxi ga butiya ga nutanaxcèxmaã äxchiüxü. ³⁸ Rü naxauxácüma Ngechuchucutüxütawa iyarüttoxõchi. Rü ngïxgüxüxëtümaã iyawaicutüxëë. Rü ngïyaemaã ínapicutü, rü inachuxcutü. Rü ñuxüchi yema pumaramaã inachacutü. ³⁹ Rü yexguma yemaxü nadëuxgu ga yema Parichéu ga Ngechuchuna uxü, rü naãëwa nagu narüxïnü rü nügümaãtama ñanagürü: —Ngëxguma chi ñaã Ngechuchu rü aixcüma wüxi i Tupanaärü orearü uruü yixïgu, rü nüxü chi nacuèx na tacü yïixü i ñaã ngexü i nüxü ingögüxü rü ñuxácü na namaxüxü rü poraãcü na napecaduãxü —ñanagürü ga naãëwa. ⁴⁰ Rü yexguma ga Ngechuchu rü nüxü nacuèxama rü Parichéuxü ñanagürü: —Pa Chimáüx, choxü nangëxma i wüxi i ore i cumaã nüxü chixuxchaüxü —ñanagürü. Rü nüma ga Parichéu rü Ngechuchuxü nangãxü, rü ñanagürü: —¡Ëcü, chomaã nüxü ixu, Pa Ngüxëëruüx! —ñanagürü. ⁴¹ Rü ñanagürü ga Ngechuchu: —Taxre ga yatügü rü wüxi ga corixütawa nanangetanü. Rü wüxi nanangetanü ga 500 tachinü ga dïëru rü to nanangetanü ga 50 tachinü. ⁴² —Natürü yema taxre rü taxuacü nanaxütanü ga norü ngetanü. Rü yemacèx düxwa yema norü cori rü nüxü nüxü narüngüma ga yema nüxü

na nangetanügüäxü. Rü ñuxmax, Pa Chimáux, rü jchomaã nüxü ixu! rü ¿ngëxürüüxü ga yema taxre ga yatügu rü yexeraãcü norü corixü nangechaü? —ñanagürü. ⁴³ Rü Ngechuchuxü nangãxü ga Chimáü, rü ñanagürü: —Chauxcèx ga yema yexeraãcü nüxü nangetanüxü nixi ga yexeraãcü norü corixü ngechaüxü —ñanagürü. Rü Ngechuchu rü ñanagürü nüxü: —Ngëmaãcü aixcüma nüma nixi —ñanagürü. ⁴⁴ Rü yexguma ga Ngechuchu rü ngixü nadawenü ga yema ngecü, rü ñanagürü Chimáüxü: —¿Ngixü cudauxü i ñaã ngecü? Rü cupatagu chaxücu i chomax, Pa Chimáux, natürü tama dexá choxnata cuxã chorü yauxcutüruü. Natürü ñaã ngecü rü ngixgüxüxetümaã choxü iyawaicutüxëë, rü ngiyaemaã choxü ípicutü. ⁴⁵ —Cuma rü tama choxü cuchuxu i noxri choxü curümoxëgu, natürü ngima i ñaã ngecü rü noxri núma changuxgumama rü choxü iyachuxcutüchigü. ⁴⁶ —Cuma rü tama pumaramaã choxü cuchaeruxüra, natürü ngima i ñaã ngecü rü chaucutügu inaba i pumara. ⁴⁷ —Rü ngëmacèx woo namu i ngirü pecadugü natürü Tupana ngixü nüxü nangechaü i guxüma, erü ngima rü aixcüma choxü ingechaü. Natürü yixema tama aixcüma ngechaücèx íyaçaxe, rü tama poraãcü Tupanaxü tangechaü —ñanagürü. ⁴⁸ Rü yexguma ga Ngechuchu rü yema ngecüxü ñanagürü: —Curü pecadugü rü marü cuxü nüxü changechaü —ñanagürü. ⁴⁹ Rü yema togü ga nüxna naxugüxü ga yéma Ngechuchumaã mechawa yexmagüxü, rü inanaxügu ga nügümücügümaãchigü na yadexagüxü. Rü ñanagürügu: —¿Tacü nixi i ñaã yatü, ecèx ngëmaãcü duüxügüaxü pecaduxü nangechaüxü? —ñanagürügu. ⁵⁰ Natürü Ngechuchu rü ñanagürü ngixü ga yema ngecü: —Marü cuxü nangëxma i maxü i taguma gúxü, erü choxü cuyaxõ. ¡Ñuxma rü taãëacüma cuchiüwa naxü! —ñanagürü.

8

Ngexügu ga Ngechuchuxü rüngüxëëgüxü

¹ Rü yemawena ga Ngechuchu rü Gariréaaneärü ñanagügu nixüãgüchigü. Rü duüxügümaã nüxü nixuchigü ga Tupanaärü ore na ñuxacü äëxgacü yiixü ya Tupana. Rü ínayaxümücügü ga yema 12 ga ngüexügü ga marü nadexü. ² Rü yexgumarüü ta íiyaxümücügü ga ñuxre ga ngecügu ga üpaacü ngoxogü ngiwa ínawoxücü rü ngirü ñaaweewa ngixü nameëxëëcü. Rü yematanüwa iyexma ga María ga Magadácüãxmaã ngixü naxugücü ga üpaacü Ngechuchu 7 ga ngoxo ngiwa ínawoxücü. ³ Rü yéma iyexma ta ga Cuána ga Cuchu naxmèx. Rü Cuchu nixi ga wüxi ga äëxgacü ga Erodeaxü puracüxü. Rü yéma nayexmagü ta ga Chuchana rü mucüma ga náigü ga ngecügu ga ngirü ñerümaã Ngechuchuxü rüngüxëëgücü.

Ore ga toecügu ixuxü

(Mt 13.1-9; Mr 4.1-9)

⁴ Rü muxüma ga yema ñanagücüãx ga duüxügü, rü Ngechuchuxütawa ínayadaugü. Rü yexguma yéma nangutaquëxegügu ga muxüma ga duüxügü, rü Ngechuchu namaã nüxü nixu ga wüxi ga ore ga cuèxruü, rü ñanagürü nüxü: ⁵ —Wüxi ga yatü ga toecü rü trigümaã nanagüane. Rü yexguma trigümaã nagüaneãgu rü ñuxre ga trigu, rü namagu nayi. Rü duüxügü nawa nangagüxü, rü werigü rü nanawecu. ⁶ —Rü náigü ga trigu rü nutatanügu nayi. Rü yexguma naxügügu ga guma trigu, rü nipagü rü nayuemare, yerü nataxuma ga norü waianexü. ⁷ —Rü náigü ga trigu rü tuxunecügu nayi. Natürü yexguma nayaegu ga tuxugü rü guma triguxü inawocu rü nanadai. ⁸ —Natürü náigü ga trigu rü mexü ga waixümügu nayi. Rü yemacèx ga yexguma nayaegu rü muxüma ga trigu nawa ínanguxuchi. Rü wüxipüxü ga trigüwa ínanguxuchi ga 100 püxü ga trigu —ñanagürü. Rü yemawena rü Ngechuchu tagaãcü ñanagürü nüxü ga duüxügü: —Rü yixema ächixëgüxe, rü jnaga taxinüë i ngëma ore! —ñanagürü.

Tacüchiga nixi ga yema ore ga cuèxruügügu ixuxü

(Mt 13.10-17; Mr 4.10-12)

⁹ Rū yexguma ga norū ngúexŭgū rū nūxna nacagūe na ŭacūchiga yīxŭ ga yema ore ga yatū ga toecūgu ixuxŭ. ¹⁰ Rū Ngechuchu űanagŭrū nūxŭ: —Tupana rū pexŭ nūxŭ nacuèxēē i ngēma èxŭguxŭ i taxuŭma i togū nūxŭ cuáxŭ i űuxácū àèxgacū na yīxŭ i nūmax. Natŭrū togūcèx rū cuèxruŭgu chayaxúácūma namaā nūxŭ chixu i ore. Rū ngexguma woo nūxŭ nadaugūgu rū űoma tama nūxŭ nadaugŭxŭrŭrŭ nixīgŭ, rū woo nūxŭ naxīnŭègu rū űoma tama nūxŭ naxīnŭèxŭrŭrŭ nixīgŭ —űanagŭrū.

Ngechuchu rŭ meā nanangoxēē ga yema ore ga toecūchigagu yaxuxŭ
(Mt 13.18-23; Mr 4.13-20)

¹¹ Rū Ngechuchu rŭ űanagŭrū: —Ngēma ore i toecūchigagu pemaā chixuxŭ rŭ űaāchiga nixī. Rū ngēma trigupŭxŭ rŭ Tupanaārŭ orechiga nixī. ¹² —Rū guma trigu ga namagu yixŭnerŭrŭ nixī i duŭxŭgŭ i ngēma orexŭ īnŭèxŭ. Natŭrū Chataná rŭ ngēma duŭxŭgŭxŭ nūxŭ inayarŭngŭmaèxēē i ngēma ore, na tama yaxōgŭāxŭcèx rŭ tama nayauxgŭāxŭcèx i maxŭ i taguma gŭxŭ. ¹³ —Rū guma trigu ga nutatanŭgu yixŭne, rŭ ngēma nixī i duŭxŭgŭ i nūxŭ īnŭèxŭ i Tupanaārŭ ore rŭ taāèācūma yaxōgŭxŭ. Natŭrū tama aixcūma nanayauxgŭ i ngēma ore, erŭ paxaāchi nayaxōgŭ, rŭ yixcŭra guxchaxŭ nūxŭ ŭpetŭgu, rŭ nūxŭ narŭxoe i ngēma ore. ¹⁴ —Rū guma trigu ga tuxunecūgu yixŭne, rŭ ngēma nixī i duŭxŭgŭ i Tupanaārŭ orexŭ īnŭèxŭ rŭ yaxōgŭxŭ natŭrū űoma i naāneārŭ ngēmaxŭcèx oegaāègŭxŭ, rŭ norū ngēmaxŭguama rŭxīnŭèxŭ rŭ tama nūxŭ rŭxoechaŭxŭ i norū ngŭchaŭgŭ. Rū ngēmagagu dŭxwa tama Tupanacèx namaxē. ¹⁵ —Natŭrū guma trigu ga mexŭ ga waixŭmŭgu yixŭne, rŭ ngēma nixī i duŭxŭgŭ i aixcūma taāèācūma nayauxgŭxŭ i Tupanaārŭ ore, rŭ naga īnŭèxŭ, rŭ meā naxcèx maxēxŭ. Rū ngēma nixī i duŭxŭgŭ i aixcūma Tupanawe rŭxīxŭ rŭ naxŭgŭxŭ i ngēma nŭma nanaxwèxexŭ.

Cuèxruŭxŭ ga omŭgu ixuxŭ
(Mr 4.21-25)

¹⁶ —Taxúema wŭxi i omŭwa tanangixichi na tanatŭxpechitaxŭcèx rŭ èxna tŭmaārŭ pechicatŭŭgu tayaxŭcuchixŭcèx. Natŭrū ngóxŭgu tanaxú na tŭxŭ nabaxixŭcèx ya yixema ngexma chocuxe. ¹⁷ —Rū ngèxgumarŭŭ ta i guxŭma i ŭacū i cúācūma ixŭxŭ rŭ yixcŭra rŭ duŭxŭgŭ tá nūxŭ nacuèxgŭama. Rū guxŭma i ngēma űuxma duŭxŭgŭcèx èxŭguxŭ rŭ tá nangoxoma. ¹⁸ —¡Meā iperŭxīnŭē i űuxmax! Erŭ texé ya naga īnŭèxŭ i ngēma ore i mexŭ, rŭ Tupana tá yexeraācū tŭxŭ nūxŭ nacuèxēē. Natŭrū yixema tama naga īnŭèxŭ, rŭ yexeraācū tá tŭxna nanayaxu i ngēma íraxŭ i tŭmaārŭ cuèx i noxri tŭxŭ ngèxmachiréxŭ —űanagŭrū.

Ngechucharŭ mamá rŭ naēneègŭchiga
(Mt 12.46-50; Mr 3.31-35)

¹⁹ Rū naē ga Ngechuchu rŭ naēneègŭ, rŭ yema Ngechuchu íyexmaxŭwa tangugŭ. Natŭrū taxuacū naxŭtawaxŭchi tangugŭ, yerŭ namuxŭchi ga duŭxŭgŭ. ²⁰ Rū wŭxi ga duŭxŭ Ngechuchumaā nūxŭ nixu, rŭ űanagŭrū: —Yéa dŭxétŭwa tangèxma ya cue rŭ cueneègŭ, rŭ cuxŭ tadaugŭchaŭ —űanagŭrū. ²¹ Natŭrū nŭma ga Ngechuchu rŭ űanagŭrū nūxŭ ga duŭxŭgŭ: —Rū yixema nūxŭ īnŭèxŭ i Tupanaārŭ ore rŭ naga maxexe rŭ yixema tixī ya chaue rŭ chaueneègŭ ixīgŭxe —űanagŭrū.

Ngechuchu rŭ buanecŭxŭ rŭ yuapexŭ ínayachaxāchixēē
(Mt 8.23-27; Mr 4.35-41)

²² Rū wŭxi ga ngunexŭgu ga Ngechuchu rŭ norū ngúexŭgŭmaā wŭxi ga nguegu nichoŭ. Rū űanagŭrū nūxŭ: —¡Ngīxā daa naxtaxaarŭ tocutŭwa taxī! —űanagŭrū. Rū inaxīāchi. ²³ Rū yexguma yaxāŭyane rŭ nipechigŭ ga Ngechuchu. Rū ngŭrŭāchi yexma nūxŭ naxŭ ga wŭxi ga tacū ga buanecŭ. Rū guma nguewa rŭ niyauxcuchichigŭ ga dexá. Rū dŭxwa inayangutaŭgŭchaŭ. ²⁴ Rū yemacèx nŭma ga norū ngúexŭgŭ rŭ Ngechuchuxŭ nacagŭ ga na ínadaxŭcèx. Rū űanagŭrŭgŭ nūxŭ: —Pa Ngúexēèruŭx, ngēmama itabaxŭgŭ

—ñanagürügü. Rû yexguma ga Ngechuchu rû ínarüda, rû buanecüxü rû yuapexü nanga. Rû ínayachaxâchi ga buanecü, rû ínayarüxo ga yuape, rû ínachaxanemare. ²⁵ Rû yexguma ga Ngechuchu rû ñanagürü nüxü ga norü ngúexüğü: —¿Tacü pexü naxüpetü ecèx tama meã peyaxögüxü? —ñanagürü. Natürü ga nümagü rû nabaixâchiãëgü. Rû nügümücügüna nicachigü, rû ñanagürügü: —¿Tacü êxna nixî i ñaã yatü rû ngêmacèx èixrücü ya buanecü rû yuape rû naga naxînüëxü? —ñanagürügü.

*Yatü ga Gadáraçüãx ga ngoxogü nawa yexmagüxü
(Mt 8.28-34; Mr 5.1-20)*

²⁶ Rû düxwa naxtaxaarü tocutüwa nangugü ga Gadáraarü naãnewa. Rû yema naane rû Gariréaaneärü toxmèxtawa nayexma. ²⁷ Rû yexguma marü nguewa ínaxüegu, ga Ngechuchu, rû naxcèx nixü ga wüxi ga yatü ga guma ñãnecüãx ga mucü ga taunecü ngoxogü nawa yexmagücü. Rû guxüguma nangexchiruecha. Rû tama íwa nayexma, yerü duüxêchíquëxetanügu nayarüxauxchigünexü. ²⁸ Rû yexguma Ngechuchuxü nadèuxgu, rû napèxegu nayacaxápüxü. Rû aita naxüácüma ñanagürü: —¿Tüxcüü nuã choxü cuyachixewe, Pa Ngechuchux, Pa Tupana ya Tacüxüchi Nanex? Rû cuxü chacèèxü na tama ngúxü choxü quingexèèxü —ñanagürü. ²⁹ Rû yema ñanagürü yerü Ngechuchu marü nanamu ga yema ngoxogü na ínachoxüxcèx. Rû muëxpüxcüna rû guma yatüxü naxãüãèxèèxü ga yema ngoxogü. Rû duüxügü rû cadenamaã nayanëixchacüügüxü rû nayanëixparagüxü na taxuwama naxüxcèx. Natürü nüma rû naga nacaugüama ga cadenagü. Rû yema ngoxogü rû dauxchitawa ga taxúema íxãpataxüwa nanagagü. ³⁰ Rû Ngechuchu nüxna naca rû ñanagürü: —¿Tacü nixî i cuéga? —ñanagürü. Rû nüma rû Ngechuchuxü nangãxü, rû ñanagürü: —Muxüchixü nixî i chauéga —ñanagürü. Rû yema ñanagürü yerü namuxüchi ga yema ngoxogü ga guma yatügu chocuxü. ³¹ Rû yema ngoxogü rû Ngechuchuna nacagü ga tama ngêma poxcuchica i äxmaxü i taguma iyacuáxügu na nawocuãxücèx. ³² Rû guma mëxpüneärü tuãchiwa nayexmagü ga muxüma ga cuchigü ga yéma chibüexü. Rû yemacèx ga yema ngoxogü rû Ngechuchuxü nacèèxügü na yema cuchigügu nayachocuxücèx. Rû Ngechuchu rû: —Ngü —ñanagürü. ³³ Rû yexguma ga yema ngoxogü rû guma yatüwa ínachoxü rû yema cuchigügu nayachocu. Rû guxüma ga yema cuchigü rû inaxüãchi, rû naxtaacutüarü mëxpüxüwa nayarüyuxgü, rû yexma nayi. ³⁴ Rû yexguma yema cuchigüarü dauruügü nüxü daugügu ga yema ngupetüxü, rû nabaixâchiãëgü rû ínibuxmü. Rû ñãnewa nüxü nayarüxugüe, rû yema ñãneärü ngaicamana ipeagüxü ga duüxügütanüwa rû ta nüxü nayarüxugügü. ³⁵ Rû ga duüxügü rû ínayadaugü ga yema ngupetüxü. Rû yexguma Ngechuchuxütawa nangugügu, rû yéma nüxü nadaugü ga guma yatü ga ngoxoãxchirécü. Rû Ngechuchucutüxütawa narüto, rû marü tama naxãüãë. Rû namuë ga duüxügü. ³⁶ Rû yema duüxügü ga nüxü daugüxü ga yema ngupetüxü, rû yema íyadaugüxümaã nüxü nixugügü ga ñuxãcü Ngechuchu na namexèèxü ga guma yatü ga ngoxoãxchirécü. ³⁷ Rû yexguma yemaxü naxînüëgu, rû guxüma ga yema Gadáraanecüãx ga duüxügü, rû Ngechuchuxü nacèèxügü na ínaxüxcèx ga yema naãnewa, yerü poraãcü namuë. Rû yemacèx ga Ngechuchu rû ngegu nixüe, rû inaxüãchi. ³⁸ Rû guma yatü ga ngoxoãxchirécü rû Ngechuchuxü nacèèxü ga nawe na naxüxcèx. Natürü ga Ngechuchu rû nanamu ga yexma na naxüxcèx, rû ñanagürü nüxü: ³⁹ —¿Cuchiüwa naxü, rû duüxügümaã nüxü yarüxu ga tacü cuxcèx na naxüxü ga Tupana! —ñanagürü. Rû ínixü ga guma yatü, rû guxüma ga yema ñãnecüãx ga duüxügümaã nüxü nayarüxu ga tacü naxcèx na naxüxü ga Ngechuchu.

*Yáiruxacüchiga rû yema nge ga Ngechuchuchirugu ingögücüchiga
(Mt 9.18-26; Mr 5.21-43)*

⁴⁰ Rû yexguma Ngechuchu wenaxärü taegugu ga naxtaxaarü tocutüwa, rû duüxügü rû taãècüma nanayauxgü, yerü guxüma ínananguxèëgü. ⁴¹ Rû yéma Ngechuchuxütawa nangu ga wüxi ga yatü ga Yáiru ga naega. Rû nüma ga Yáiru rû

wüxi ga ngutaquëxepataũârü ãëxgacü nixĩ. Rũ Ngechuchupëxegu nayacaxãpüxü rü nüxũ nacèëxũ ga napatawa na naxũxücèx. ⁴² Yerü nüxũ iyexma ga wüxi ga naxãcü ga ngĩgümaã wüxicacü, rü iyadaawe, rü ituraxüchi. Rũ ngĩma rü maneca 12 ga taunecü ngĩxũ nayexma. Rũ yexguma Yáirupatawa naxũxgu ga Ngechuchu, rü muxüchixũ ga duũxügü nawe narüxĩ, rü düxwa ínayaxüxtügü. ⁴³ Rũ yema duũxügütanüwa iyexma ga wüxi ga ngecü ga 12 ga taunecü ägüechacü. Rũ yemamaã iyadaaweëcha. Rũ duturugüxütagu ngĩxũ iguxëë ga guxcü ga ngĩrü dñeru, natürü taxúema ga texé ngĩxcèx tayataanexëëga. ⁴⁴ Rũ yema ngecü ga Ngechuchuweama ne ixũ, rü naxpechinüchirugu iyangögü. Rũ yexgumatama ínayachaxãchi ga na naxãgüxũ. ⁴⁵ Rũ yexguma ga Ngechuchu rü duũxügüna naca, rü ñanagürü: —¿Texé tixĩ ya choxũ ingögüxe? —ñanagürü. Rũ guxüma ga duũxügü rü: —Taxúema —ñanagürügü. Rũ yexguma ga Pedru rü namücügü rü ñanagürügü: —Pa Ngúexëëruũx, cuma nüxũ cudau i ñuxre i duũxügü ngema cuxũ na nayaxüxtügüxũ, rü ngëxguma rü ta:

“¿Texé ya choxũ ingögüxe?” ñacuxũ —ñanagürügü. ⁴⁶ Natürü ga Ngechuchu rü ñanagürü: —Ngëmáacü wüxie choxũ tingögü, erü nüxũ chicuëxãchi na chorü poramaã tüxũ na charümexëëxũ —ñanagürü. ⁴⁷ Rũ yexguma nangoxomagu ga na nüxũ nacüexamaxũ ga Ngechuchu ga yema nüxũ na yangögüxũ, rü yaduruxãcüma naxütawa ixũ ga yema ngecü. Rũ napëxegu iyacaxãpüxü. Rũ guxũ ga duũxügüpëxewa namaã nüxũ iyaxu ga tacüçèx nüxũ na yangögüxũ, rü ñuxãcü yexgumatama ngĩxcèx na yataanexũ. ⁴⁸ Rũ yexguma ga Ngechuchu rü ñanagürü ngĩxũ: —Pa Chauxacüx, cuxcèx nitaane, erü cuyaxõ. ¡Rü ñuxma rü taãëacüma íixũ! —ñanagürü. ⁴⁹ Rũ yexguma iyadexayane ga Ngechuchu, rü yema nangu ga wüxi ga duũxũ ga ngutaquëxepataũârü ãëxgacü ga Yáirupatawa ne üxũ. Rũ ñanagürü Yáiruxũ: —Cuxacü rü marü iyu. ¡Rü tãxũ i cuyachixewechigüxũ ya Ngúexëëruũ! —ñanagürü. ⁵⁰ Natürü yexguma yema orexũ naxĩnúgu ga Ngechuchu, rü ñanagürü Yáiruxũ: —¡Tãxũ i cuyanguãëxũ! Erü ngëxguma cuyaxõxgu rü cuxacü rü tá wena imaxũ —ñanagürü. ⁵¹ Rũ yexguma Yáirupatawa nangugügu, rü Ngechuchu nayachocuxëë ga Pedru rü Chaütiágu rü Cuáũ rü ngĩnatü rü ngĩë ga yema bucü ga yuxcü. Natürü tama nanaxwèxe na togü yexma chocuxũ. ⁵² Rũ guxüma ga duũxügü ga yema yexmagüxũ rü naxauxe rü ngĩxcèx nangechaügü. Natürü Ngechuchu rü ñanagürü nüxũ: —¡Tãxũ i pexauxexũ! Erü ngëma bucü rü tama nixĩ i nayuxũ. Rũ ipemare —ñanagürü. ⁵³ Natürü ga yema duũxügü rü Ngechuchuxũ nacugüeama, yerü ngĩxũ nadaugü rü aixcüma marü iyu. ⁵⁴ Rũ yexguma ga Ngechuchu rü ngĩxmëxgu nayayauxãchi, rü tagaãcü ñanagürü: —Pa Bucüx, ¡rüda! —ñanagürü. ⁵⁵ Rũ yexguma ga ngĩma rü wena imaxũ, rü yexgumatama írüda. Rũ Ngechuchu rü duũxügümaã nüxũ nixu na ngĩxũ naxüwemügüxücèx. ⁵⁶ Rũ ngĩnatü rü ngĩë ga yema bucü, rü poraãcü tabaixãchiãëgü. Natürü Ngechuchu rü tüxũ namu na taxúemaãma nüxũ na tixuxücèx ga yema ngupetüxũ.

9

Ngechuchu norü ngúexülgüxũ namu na nüxũ yanaxugüexüçèx ga Tupanaarü ore (Mt 10.5-15; Mr 6.7-13)

¹ Rũ Ngechuchu rü nanangutaquëxexëë ga yema 12 ga norü ngúexügü. Rũ pora nüxna naxã rü nüxna naxãga na ínawoxüãxücèx ga nagúxüraüxũ ga ngoxogü, rü na nameëxëëãxücèx ga duũxügü ga idaaweexũ. ² Rũ nayamugü na duũxügümaã nüxũ yaxugüexüçèx ga ore ga mexũ na ñuxãcü ãëxgacü yĩixũ ya Tupana, rü na nameëxëëãxücèx ga duũxügü ga idaaweexũ. ³ Rũ ñanagürü nüxũ: —¡Rü taxuxütáma ípinge i perü namawaũ, rü bai ya perü caxüchigüxũ ya naixmenëxã, rü bai i perü choca, rü bai i perü pãũ, rü bai i perü dñeru. Rũ wüxitama i perü daxü ípinge, rü tama i taxre! ⁴ —Rü ngëxguma wüxi ya ñanewa pengugügu, ¡rü wüxi ya ípatagutama perücho rü ñuxmata ipexĩãchi nawa ya yima ñãne! ⁵ —Rü ngextá tama pexũ ínayauxgüxüwa, ¡rü ípechoxũ nawa ya yima ñãne!

Rü ngëxguma ngema ipexĩächigu ¡rü ipepagücutü i perü üxaxücutü na ngëmawa nüxü nacuëxgüxüçèx na chixexü naxügüxü i ngëma duüxügü! —ñanagürü. ⁶ Rü inaxĩächi, rü guxüma ga ñanexäcügüwa naxĩ. Rü nüxü nixugüetanü ga Tupanaärü ore ga mexü. Rü guxüwama nanameëxëetanü ga duüxügü ga idaaweexü.

Eróde rü tama nüxü nacuëxéga na texe yixüxü ga Ngechuchu

(Mt 14.1-12; Mr 6.14-29)

⁷ Rü Gariréaaneärü äëxgacü ga Erode, rü nüxü nacuáchiga ga guxüma ga yema Ngechuchu üxü. Rü poraäcü nagu narüxĩnü rü naxoegaäë ga Erode, yerü nümaxü ga duüxügü rü ñanagürügü: —Cuáü ya baiüxëëruü nixĩ ya yima, rü marü wena namaxü —ñanagürügü. ⁸ Natürü togü rü ñanagürügü: —Nuxcümaücü ga Tupanaärü orearü uruü ga Ería nixĩ, rü wena nangox —ñanagürügü. Rü togü rü ñanagürügü: —Bexmana náí ga nuxcümaücü ga Tupanaärü orearü uruü nixĩ, rü wena namaxü —ñanagürügü. ⁹ Natürü Erode rü ñanagürü: —Chomatama chanamu ga churaragü na Cuáüxü yadaenaxägüxüçèx. ¿Rü tacü éxna nixĩ i ngëma yatü i duüxügü ngëmaäcü poraäcü nüxü ixuchigagüechaxü? —ñanagürü. Rü Erode rü nüxü nangüchxüxüchi na ñuxäcü Ngechuchuxü na nadauxü.

Ngechuchu rü nanachibüexëë ga 5000 ga yatügü

(Mt 14.13-21; Mr 6.30-44; Cu 6.1-14)

¹⁰ Rü yexguma nawoeguxgu ga yema Ngechuchuarü ngúexügü ga yamugüxü, rü Ngechuchumaã nüxü nixugüë ga yema naxügüxü. Rü nüma ga Ngechuchu rü yema norü ngúexügümaã nixügachi, rü Bechaídaarü ñanewa namaã naxü. ¹¹ Natürü yexguma duüxügü nüxü cuëxgüga ga ngextá na nayexmaxü, rü Ngechuchuwe narüxĩ. Rü Ngechuchu rü meãma yema duüxügüxü nayaxu, rü namaã nüxü nixu na ñuxäcü äëxgacü yüxü ya Tupana. Rü nanameëxëë ga yema duüxügü ga idaaweexü. ¹² Rü yexguma marü nayáuanegu, rü Ngechuchucèx naxĩ ga yema 12 ga ngúexügü ga yamugüxü. Rü ñanagürügü nüxü: —¡Yamugü i ñaã duüxügü na ñanexäcügü rü ípatagü ya ngaicamana ngëxmagünewa na naxixüçèx, rü ngëxma na napegüxüçèx rü norü õnatèex yataxegüxüçèx! Erü nuã íngëxmagüxüwa rü nataxuma i tacü rü õna —ñanagürügü. ¹³ Natürü Ngechuchu rü ñanagürü nüxü: —¡Pematama penaxüwemü! —ñanagürü. Rü nanangäxügü, rü ñanagürügü: —Wüximëëxpüx i pãü rü taxre i choxnixĩcatama toxü nangëxma. ¿Rü éxna cunaxwëxe na naxcèx tayataxegüxü i õna naxcèx i guxüma i ñaã duüxügü? —ñanagürügü. ¹⁴ Rü 5000 ga yatügü nixĩ ga yema yéma yexmagüxü. Natürü Ngechuchu rü ñanagürü nüxü ga norü ngúexügü: —¡Écü ípenatogüxëëx rü 50 chigü i wüxi tücumüwachigü! —ñanagürü. ¹⁵ Rü yemaäcü nanaxügü ga norü ngúexügü. Rü ínatogüxëë ga guxüma ga duüxügü. ¹⁶ Rü yexguma ga Ngechuchu rü nanade ga yema wüximëëxpüx ga pãü rü yema taxre ga choxni. Rü daxügu nadawenüäcüma Tupanana moxë naxã, rü ñuxüchi inanabücu ga yema pãü rü choxni. Rü norü ngúexügüna nanaxã na nüxü yanuãxüçèx ga yema duüxügü. ¹⁷ Rü guxüma ga yema duüxügü rü meãma nachibüë. Rü yemawena rü 12 ga pexchigü nanapagüamatama namaã ga yema pãü rü choxnichipëxegü ga iyaxügüxü.

Pedru nanangoxëë na Cristu na yüxü ga Ngechuchu

(Mt 16.13-19; Mr 8.27-29)

¹⁸ Rü wüxi ga ngunexü rü Ngechuchu norü ngúexügümaã noxrüwama yayumüxëgu, rü nüma rü norü ngúexügüna naca, rü ñanagürü: —¿Ñuxü ñaxü i duüxügü i chauchiga i choma na texé chüxü? —ñanagürü. ¹⁹ Rü norü ngúexügü nanangäxügü rü ñanagürügü: —Nangëxma i duüxügü rü:

“Cuáü ya baiüxëëruü quixĩ”, ñagüxü, rü togü rü:

“Ería quixĩ”, ñagüxü, rü togü rü:

“Wüxi ga nuxcūmaücü ga Tupanaärü orearü uruü i wena maxücü quixĩ”, ñagüxü — ñanagürügü. ²⁰ Rü yexguma Ngechuchu nüxna naca rü ñanagürü: —¿Rü pema i ñuxü ñapegüxü choxü na texé chiixü? —ñanagürü. Rü Pedru nanangäxü rü ñanagürü: —Cuma nixĩ i Cristu i Tupana Nane —ñanagürü.

Ngechuchu nanaxunagü ga norü yuxchiga
(Mt 16.20-28; Mr 8.30-9.1)

²¹ Rü Ngechuchu rü nayaxucüxëgü ga norü ngüexügü na taxúemaãma nüxü yax-ugüexüçèx ga nüma rü Cristu na yiixü. ²² Rü ñanagürü nüxü ga norü ngüexügü: —Choma i Tupana Nane na duüxüxü chiixü, rü poraäcü ngüxü tá chinge. Rü choxü tá naxooxgü i Yudüügüarü äëxgacügüerugü, rü paigüarü äëxgacügü, rü ngëma ngüexëëruügü i Moïchëarü mugüwa nguxëëtaegüxü. Rü tá choxü nimëxgü, natürü tomaëxpüx i ngunexügu rü wena táxarü chamaxü —ñanagürü. ²³ Rü yixcama rü guxüma ga norü ngüexügüxü ñanagürü: —Rü ngëxguma texé chowe rüxüxchaügu, jëcü nüxü tarüxo i tümaärü ngüchaü, rü namaã tabora i ngëma guxchaxügü i tümacèx ínguxü i ñoma curuchawa tipotaxürüü tüxü ixixëëxü, rü ngëmaëtüwa chowe tarüxüãma! ²⁴—Erü yixema tügü maxëchaxëëchaüxë rü tá tayu, natürü yixema chauxcèx yuxe rü aixcüma tá tüxü nangëxma i maxü i taguma gúxü. ²⁵ ¿Rü tacüwa i nüxü namexü ya wüxi ya yatü ega nayauxägu i guxüma i ñoma i naãneärü ngëmaxügü, natürü iyanatauxëëägu i norü maxü? ²⁶ —Rü ngëxguma texé chauxcèx änegu rü naxcèx taxänegu i chorü ore, rü choma i Tupana Nane i duüxüxü na chiixü rü tá ta tümacèx chaxäne i ngëxguma äëxgacü chixiãcüma núma chaxüxgu. Rü ngëxguma wenaxärü núma chaxüxgu rü Chaunatü ya Tupanarüü tá chapora, rü daxüçüãx i Tupanaärü orearü ngeruügü i üünegüxürüü tá chamexëchi. ²⁷—Rü aixcüma pemaã nüxü chixu rü ñuxre i duüxügü i nuã ngëxmagüxü rü tá nüxü nadaugü na ñuxäcü äëxgacü na yiixü ya Tupana naxüpa na nayuxü —ñanagürü.

Ngechuchu rü toraxü nangox
(Mt 17.1-8; Mr 9.2-8)

²⁸ Rü 8 ga ngunexüguwena ga na yema ñaxü, rü Ngechuchu rü wüxi ga mëxpünewa naxü na yéma yayumüxëxüçèx. Rü ínayaxümücügü ga Pedru rü Chaütiágu rü Cuáü. ²⁹ Rü yexguma ínayumüxëyane ga Ngechuchu rü nachiwe rü ngürüächí niyauracüü, rü naxchiru rü ta niyauracüü, rü poraäcüxüchima nacómü. ³⁰ Rü yexguma rü yéma nangox ga taxre ga yatügü ga Ngechuchumaã idexagüxü. Rü Moïché nixĩ ga wüxi, rü Ería nixĩ ga to. ³¹ Rü yema taxre íyexmagüxüwa rü poraäcüxüchi nangóone. Rü ínidexagü nachiga ga ñuxäcü Yerucharëügu tá na nayuxü ga Ngechuchu. ³² Rü woo ga Pedru rü namücügü rü poraäcü na nayaxtaexü rü tama napee. Rü nüxü nadaugü ga ñuxäcü poraäcü na nangóonexü ga naxütawa ga Ngechuchu rü yema taxre ga yatügü ga namaã yexmagüxüxütawa. ³³ Rü yexguma yema taxre ga yatügü Ngechuchuna ixigachitanügu, rü Pedru rü ñanagürü Ngechuchuxü: —Pa Ngüexëëruüx, namexëchi nixĩ na nuã ingëxmagüxü. ¡Rü ngixã tanaxü ya tomaëxpüx ya düxenü, rü wüxi ya cuxcèx, rü náí ya Moïchéçèx, rü náí ya Eríacèx! —ñanagürü. Natürü ga Pedru rü tama nüxü nacüèx ga na ñuxü ñaxü yerü poraäcü nabaixächiãë. ³⁴ Rü yexguma íyadexayane ga Pedru, rü wüxi ga caixanexü natanügu nayangëixema. Rü poraäcü namuüë ga yema ngüexügü ga yexguma yema caixanexü natanügu yangëixemagu. ³⁵ Rü yema caixanexüwa inanaxü ga wüxi ga naga ga ñaxü: —Daa nixĩ ya Chaune ya nüxü changechaüxüchicü. ¡Rü naga pexĩnüë! —ñaxü. ³⁶ Rü yexguma yema ñaxguwena ga yema naga rü Ngechuchuarü ngüexügü rü taxüexüma ga toguexü nadaugü, rü Ngechuchuxüxícatama nadaugü. Rü yema ngüexügü rü taxúemaãma nüxü nixügüe ga yema nüxü nadaugüxü.

Ngechuchu rü nanamexëë ga wüxi ga bucü ga ngoxo nawa yexmacü
(Mt 17.14-21; Mr 9.14-29)

³⁷ Rū yexguma moxũãcũ ga guma mēxpũnewa yanachoũgu, rũ muxũma ga duũxũgũ yexma Ngechuchuxũ nayangaugũ. ³⁸⁻³⁹ Rũ yema duũxũgũtanũwa rũ wũxi ga yatũ tagaãcũ Ngechuchuxũ ñanagũrũ: —Pa Ngũexẽẽruũx, ¡choxũ rũngũxẽẽ, rũ tũxũ nadau ya chaune! Erũ tũgũmaã choxũ tawũxicẽx, rũ wũxi i ngoxo tũmawa nangẽxma. Rũ ngẽxguma tũxũ naxũxgu, rũ aita tũxũ naxũxẽẽ, rũ tũxũ naxũũãẽxẽẽ, rũ tũxũ narũchiẽxẽẽ. Rũ chixexũ tũmamaã naxũ, rũ tama tũxũ ningẽxchaũ. ⁴⁰ Rũ marũ nũxũ chacẽxũ i curũ ngũexũgũ na tũmawa ínatẽxũchigũãxũcẽx i ngẽma ngoxo, natũrũ tama nũxũ inaxĩnũ —ñanagũrũ. ⁴¹ Rũ yexguma Ngechuchu nanangãxũ, rũ ñanagũrũ: —Pa Duũxũgũ i Tama Yaxõgũxũx, ¿Ñuxguratáta i pemaã chanuxmaxũ rũ yaxna pemaã cha xĩ-nũxũ? ¡Nuã naga ya cune! —ñanagũrũ. ⁴² Natũrũ yexguma Ngechuchuxũtawa nanguxgu ga guma bucũ, rũ yema ngoxo rũ guma bucũxũ ñaxtũanegu nayanguxẽẽ, rũ nanaxũũãẽxẽẽ. Natũrũ Ngechuchu nananga ga yema ngoxo, rũ nanamexẽẽ ga guma bucũ. Rũ ñuxũchi nanatũxũtawa nanamu. ⁴³ Rũ guxũma ga duũxũgũ rũ naũaixãchiãẽgũ ga yexguma nũxũ nadaugũgu ga ñuxãcũ na naporaxũ ya Tupana.

Ngechuchu rũ wenaxãrũ nanaxunagũ ga norũ yuxchiga
(Mt 17.22-23; Mr 9.30-32)

Rũ yexguma duũxũgũ namaã baixãchieyane ga yema Ngechuchu ũxũ, rũ ñanagũrũ ga Ngechuchu nũxũ ga norũ ngũexũgũ: ⁴⁴ —¡Meã iperũxĩnũẽ i ñaã ore i pemaã nũxũ chixuxũ! ¡Rũ tãũtãma nũxũ ipeyarũngũmaẽ! Choma i Tupana Nane na duũxũxũ chiĩxũ, rũ chauechita tá choxũ ínaxuaxũgũ i duũxũgũ na ãẽxgacũgũ choxũ iyauxgũxũcẽx —ñanagũrũ. ⁴⁵ Natũrũ ga norũ ngũexũgũ rũ tama nũxũ nacuẽxgũẽga ga yema namaã nũxũ yaxuxũ. Yerũ Tupana rũ tama naxcẽx nanangoxẽẽ ga yema ore na nũxũ nacuẽxgũxũcẽx. Rũ yema ngũexũgũ rũ namuũẽ ga Ngechuchuna na nacagũxũ na meã namaã nangoxẽẽãxũcẽx ga yema namaã nũxũ yaxuxũ.

¿Texé tá tixĩ ya guxããrũ yexera ixĩxẽ?
(Mt 18.1-5; Mr 9.33-37)

⁴⁶ Rũ yexguma ga norũ ngũexũgũ rũ inanaxũgũẽ ga nũgũmaã na yaporagatanũcũũxũ nachiga ga texé tá tiĩxũ ya natanũwa guxããrũ yexera ixĩxẽ. ⁴⁷ Natũrũ Ngechuchu rũ nũxũ nacuẽxama ga yema norũ ngũexũgũ nagu rũxĩnũẽxũ. Rũ yemacẽx wũxi ga buxũ nũgũxũtawa naga, rũ nũgũxũtagu nayachixẽẽ. ⁴⁸ Rũ ñanagũrũ nũxũ ga norũ ngũexũgũ: —Texé ya ñaã buxũxũ meã yaxũxe chauẽgagu, rũ choxũ nixĩ i tayaxuxũ. Rũ yĩxema meã choxũ yaxũxe, rũ Chaunatu ya núma choxũ mucũxũ rũ ta meã tayaxu. Rũ yĩxema guxããrũ yexera tũgũ írũxĩraxe, rũ yĩxema tixĩ ya guxããrũ yexera ixĩxẽ —ñanagũrũ.

Texé ya tama taxchi aixe rũ tórũ ngũxẽẽruũ tixĩ
(Mr 9.38-40)

⁴⁹ Rũ yexguma ga Cuáũ rũ ñanagũrũ nũxũ: —Pa Ngũexẽẽruũx, nũxũ tadau ga wũxi ga yatũ ga cuẽgagu ngoxogũ íwoxũxũ. Rũ toma nũxna tanachũxu ga yema yerũ tama tatanũxũ nixĩ ga nũmax —ñanagũrũ. ⁵⁰ Natũrũ Ngechuchu rũ ñanagũrũ nũxũ: —Tama name i nũxna na penachũxuxũ. Erũ texé ya tama taxchi aixe, rũ tórũ ngũxẽẽruũ tixĩ —ñanagũrũ.

Ngechuchu nayangagũ ga Chaũtiãgu rũ Cuáũ

⁵¹ Rũ yexguma marũ yangaicagu ga Ngechuchu ga daxũguxũ ga naãnewa na naxũxũ, rũ tama namuũãcũma inaxũãchi ga Yerucharẽũwa na naxũxũ. ⁵² Rũ nũgũpẽxegu naya-mugũ ga ñuxre ga norũ orearũ ngerũgũ. Rũ nũmagũ rũ nawa naxĩ ga wũxi ga íanexãcũ ga Chamãriaanewa yexmane, na yexma naxcẽx yadaugũxũcẽx ga wũxi ga í na Ngechuchu nagu pexũnẽxũ. ⁵³ Natũrũ yema Chamãriaanecũãx rũ tama nanayauxgũchaũ, yerũ nũxũ nacuẽxgũ ga Yerucharẽũwa tá na naxũxũ. ⁵⁴ Rũ yexguma yemaxũ nadaugũgu ga norũ ngũexũgũ ga Chaũtiãgu rũ Cuáũ, rũ ñanagũrũgũ Ngechuchuxũ: —Pa Corix, ¿cunaxwẽxexũ

na Tupanana naxcèx tacaxũ na daxũwa ne namuãxũcèx ya üxü na naguxẽẽãxũcèx i guxũma i ñaã duũxũgü, yema nuxcũmaũcü ga Tupanaãrũ orearũ uruũ ga Ería üxũrũ? —ñanagürügü. ⁵⁵ Rũ yexguma ga Ngechuchu rũ nüxũ nadawenü, rũ nayangagü, rũ ñanagürü nüxũ: —Pema rũ tama nagu perũxĩnũẽ na texéarũ duũxũgü pixĩgũxũ. ⁵⁶ —Erü choma i Tupana Nane na duũxũxũ chiĩxũ, rũ tama duũxũgüarũ tauxexẽẽwa núma chaxũ, natürü núma chaxũ na duũxũgũxũ chamaxẽẽxũcèx —ñanagürü. Rũ yexguma rũ náí ga ñanexãcüwa naxĩ.

Duũxũgü ga Ngechuchuwe rüxĩchaũxũchiga
(Mt 8.19-22)

⁵⁷ Rũ yexguma namagu naxĩngu rũ wüxi ga yatü Ngechuchuxũ ñanagürü: —Pa Corix, cuwe charũxũchaũ i ngextá cuma ícuxũxũwa —ñanagürü. ⁵⁸ Rũ Ngechuchu nanangãxũ rũ ñanagürü: —Ngowagü rũ nüxũ nangẽxma i naxmaxũgü, rũ werigü rũ nüxũ nangẽxma i naxchiãũgü, natürü choma i Tupana Nane na duũxũxũ chiĩxũ, rũ nataxuma i chauchica i ngextá nagu chicuxeruxũ —ñanagürü. ⁵⁹ Rũ Ngechuchu ñanagürü nüxũ ga wüxi ga to ga yatü: —¡Chowe rüxũ! —ñanagürü. Natürü núma ga yema yatü rũ ñanagürü nüxũ: —Pa Corix, noxri chanawèxe i chaunatũxũ ichayatèxira —ñanagürü. ⁶⁰ Rũ Ngechuchu nanangãxũ rũ ñanagürü: —Nüẽ ngẽma cutanũxũ i tama yaxõgũxũ iyatèxgü i ngẽma naxrũü yuexũ, natürü cuma rũ curü puracü nixĩ na paxa duũxũgũmaã nüxũ cuyarũxuxũ i Tupanaãrũ ore na ñuxãcü guxããrũ ãẽxgacü na yĩxũ i nümax —ñanagürü. ⁶¹ Rũ wüxi ga to ga duũxũ rũ ñanagürü Ngechuchuxũ: —Pa Corix, ngẽmaãcü cuwe charũxũchaũ, natürü noxri chanaxwèxe i nüxũ chayarũmoxẽ i ngẽma chopatacũãxgü —ñanagürü. ⁶² Natürü Ngechuchu rũ ñanagürü nüxũ: —Texé ya yíxema inaxügũxe na Tupanaãrũ puracüwa tapuracũxũ natürü tümaãrũ ngẽmaxũguama rüxĩnũxẽ, rũ tama tame na Tupanaãxũ tapuracũxũ —ñanagürü.

10

Ngechuchu nayamugü ga 72 ga norü ngúexũgü

¹ Rũ yemawena ga Cori ga Ngechuchu rũ nayadexechi ga 72 ga to ga norü ngúexũgü. Rũ taxrechigü inayamugü na yoxni guxũ ga yema ñanegü rũ nachicagü ga Ngechuchu nawa üxchaũxũwa na naxĩxũcèx. ² Rũ ñanagürü nüxũ: —Aixcũmaxũchi nangẽxma i muxũchixũ i duũxũgü i yaxõgũchaũxũ natürü ngema Tupanaarũ orearũ uwa puracüexũ rũ noxretama nixĩ. Rũ ngẽmacèx name i perü yumũxèwa nüxna peca ya yima puracüarũ yora na ngema norü puracüwa namugüãxũcèx i to i puracütanũxũ. ³ —¡Rü ipexĩãchi rü ngẽma pexĩ! Rũ dücax, ñoma carnerugü i aigütanüwa imugũxũrũü nixĩ i pexũ chimugũxũ. ⁴ —¡Rü tãütáma choca ípinge, rü bai i perü díeru, rü bai i perü chapatu! Rũ tama chanaxwèxe i namagu penuxcü i ngẽxguma namawa texéxũ perũmoxègügu. ⁵ —Rü ngẽxguma wüxi ya íwa pengugügu, rü ñaããcü tá nüxũ perũmoxègü i ngẽma duũxũgü:

“¡Petaãxè erü Tupana rü napetanügu!”, ñaperügügu tá. ⁶ —Rü ngẽxguma ngẽma nangẽxmagu i duũxũgü i Tupanaxũ cuèxgũchaũxũ rü Tupana rü tá nüxna nanaxã i taãxè. Natürü ngẽxguma ngema nataxuxgu i duũxũgü i Tupanaxũ cuèxgũchaũxũ, rü ngema Tupanaarũ taãxè rü pexrütáma nixĩ. ⁷ —¡Rü wüxi ya ígutama perücho, rü ngẽma pechibüe rü peyaxü i ngẽma nüxũ ngẽxmaxũ i ngẽma ícũãxgü! Erü wüxi i puracütanũxũ rü name nixĩ na nayauxãxũ i norü natanü naxcèx i norü puracü. Rũ yima ñanewa pengẽxmagüyane rü tama chanaxwèxe i náí ya ígu peyapegü. ⁸ —Rü ngẽxguma wüxi ya ñane ya nawa meã pexũ nayaxunewa pengugügu, ¡rũ penangõ i ngẽma õna i pexna naxãgũxũ! ⁹ —¡Rü penameẽxèx i ngẽma idaaweexũ i yima ñanewa ngẽxmagũxũ! ¡Rü namaã nüxũ pixu rü ñapegügu nüxũ:

“Tupanaärü pora rü marü pexna nangaicama rü napexütägu”, ñapegügü nüxü!
 10 —Natürü ega nawa pengugügu ya wüxi ya ñäne i ngextá duüxügü tama meã pexü
 iyauxgüxüwa, jrü ngëma ítamügu ípechoxü rü ñapegügü nüxü i ngëma ñäneçüãx!:

11 “Rü woo ñaã perü ñäneärü üxaxü i tocutüwa yaxüxü, rü itanapagü, na ngëmawa nüxü
 pecuáxüçèx na Tupana rü tama pemaã nataãxü. ¡Natürü tama nüxü ipeyarüngümaë na
 marü pexna nangaicamaxüchichiréxü ya Tupana na perü äëxgacü yíixü”, ñaperügügü
 tá nüxü i ngëma ñäneçüãx! 12 —Rü pemaã nüxü chixu rü ngëma ngunexü i nagu nagüxü i
 naãne, rü Chodomacüãx i duüxügüarü yexera Tupana tá nanapoxcue i ngëma duüxügü
 i tama meã pexü yauxgüxü.

Ñänegü ga tama Tupanaga ñnüëne

(Mt 11.20-24)

13 —Rü wüxi i ngechaü nixí i pexcèx, Pa Corachícüãx rü Bechaídacüãx i Duüxügüx,
 yerü yexguma chi Tiruarü ñänewa rü Chidãüärü ñänewa chanaxüxgu ga yema mexügü ga
 cuèxruügü ga Tupanaärü poramaã petanüwa chaxüxü, rü woo ga na poraãcü yachixexü
 ga yema Tirucüãx rü Chidãüçüãx ga duüxügü rü nuxcümama chitama nüxü narüxoe ga
 nacüma ga chixexü, rü poraãcüxüchi chima nügümaã nangechaügü rü naxauxe, yerü
 chi nügü nicuèxächitanü ga na yapecaduãxgüxü. 14 —Natürü pemaã nüxü chixu rü
 ngëma ngunexü i Tupana nagu napoxcuexü i pecaduãxgüxü, rü ngëma ngunexügu rü
 Tirucüãx rü Chidãüçüãxärü yexera tá pexü napoxcue i pemax. 15 —Rü pemax, Pa
 Capernãüçüãxgü i Duüxügüx çéxna pema nagu perüxñnüëgu rü daxügüxü i naãnewa tá
 pexíxü? Pemaã nüxü chixu rü naãnetüüwa i ngextá Tupana Chatanáxü ípoxcuxüwa tá
 nixí i pewogüxü. 16 Rü ñüxüchi norü ngúexügüxü ñanagürü: —Rü yíxema pega ñnüëxë, rü
 chauga rü ta taxñnüë. Natürü yíxema tama pega ñnüëxë, rü chauga rü ta tama taxñnüë.
 Rü yíxema tama chauga ñnüëxë, rü tama naga taxñnüë ya Chaunatü ya núma choxü mucü
 —ñanagürü ga Ngechuchu.

Nawoegu ga yema 72 ga Ngechuchuarü ngúexügü

17 Rü taãëcüma nawoegu ga yema 72 ga norü ngúexügü ga yamugüxü. Rü ñanagürügü
 nüxü: —Pa Corix, ngëxguma cuégagu tidexagügu, rü èixruxü i ngoxogü rü toga naxñnüë
 —ñanagürügü. 18 Rü Ngechuchu rü ñanagürü nüxü: —Ngëmaãcü aixcüma nixí. Yerü
 nüxü chadau ga Chataná ga daxügüxü ga naãnewa na nataëxü wüxi ga äëmacürüü. 19 —
 Rü choma nixí ga pexna chanaxãxü ga pora na tama chixexü pemaã naxügüxüçèx
 ega woo äxtapegüwa rü éxna tuxchinawegüwa pengagügu. Rü yexgumarüü ta pexna
 chanaxã ga pora na nüxü perü- yexeraxüçèx i guxüma i Chatanáärü pora na ngëmaãcü
 taxucürüwama tacü rü chixexü pemaã naxüxüçèx. 20 —¡Natürü táxü i petaãëgüxü naxcèx
 i ngëma na pega naxñnüëxü i ngoxogü! Rü narümemae nixí i petaãëgü naxcèx na marü
 naxümatüxü i peëga i Tupanaärü poperawa i daxügüxü i naãnewa —ñanagürü.

Ngechuchu rü nataãë

(Mt 11.25-27, 13.16-17)

21 Rü yexgumatama ga Tupanaãë ga Üünexü rü poraãcü Ngechuchuxü nataãëxëë. Rü
 ñanagürü ga Ngechuchu: —Pa Chaunatü, Pa Daxügüxü i Naãne rü Ñnoma i Naãneärü Yorax,
 cuxü chicuèxüü, yerü ñaã chorü ngúexügüxü nüxü cucuèxëë i ñaã ore ga naxchaxwa
 iquicúxü ga duüxügü i ñoma i naãnewa nüxü cuèxüchigüxü. Rü yemaãcü cunaxü,
 Pa Chaunatüx yerü yemaãcü nixí ga cunaxwèxexü —ñanagürü. 22 Rü ñanagürü ga
 Ngechuchu: —Chaunatü choxna nanaxã i guxüma i tacü i ngëxmaxü. Rü taxúema choxü
 tacuèx na Tupana Nane chiixü. Rü Chaunatüxicatama nixí ya choxü cuácü na Nane
 chiixü. Rü ngëxgumarüü ta taxúema nüxü tacuèx na texe yíixü ya Chaunatü. Rü choma
 ya Nane rü ngëma duüxügü i Chaunatüxü nüxü chadauxëëchaüxüxícatama nixí i nüxü

cuèxgüxü na texe yiixü —ñanagürü. ²³ Rü yexguma norü ngüexügüxü nadawenü, rü namaãxica ñanagürü: —Tataãëgü ya yixema tümaxëtümaãxüchi nüxü daugüxe i ñaã ñuxma pema nüxü pedaugüxü. ²⁴ —Erü pemaã nüxü chixu, rü muxüma ga nuxcümaügüxü ga Tupanaärü orearü uruügü rü äëxgacügü ga tacügü, rü nüxü nangüchaü ga nüxü na nadaugüchaüxü i ñaã ñuxma pema chauxütawa nüxü pedaugüxü. Natürü tama nüxü nadaugü. Rü nüxü nangüchaü ga nüxü na naxĩnüëchaüxü i ñaã ñuxma pema chauxütawa nüxü pexĩnüëxü. Natürü tama nüxü naxĩnüë —ñanagürü.

Ore ga mecü ga Chamáriacüãxgu ixuxü

²⁵ Rü yexguma inachi ga wüxi ga ngüexëëruü ga Moïchéarü mugüwa nguxëëtaexü, rü Ngechuchuxütawa naxü na namaã yanadexaxüçex. Rü Ngechuchuxü naxüxchaü, rü yemacèx nüxna naca rü ñanagürü: —Pa Ngüexëëruü ya Ngechuchux, ¿Tacü nixĩ i mexü na chanaxüxü na choxü nangëxmaxüçex i maxü i taguma gúxü? —ñanagürü. ²⁶ Rü Ngechuchu nanangãxü, rü ñanagürü: —¿Ñuxü ñaxü i ngëma ore i Moïchéarü mugüwa ümatüxü? ¿Rü tacüxü i cumaã yaxuxü? —ñanagürü. ²⁷ Rü yema ngüexëëruü ga Moïchéarü mugüwa nguxëëtaexü, rü Ngechuchuxü nangãxü, rü ñanagürü: —¡Nüxü nangechaü ya Cori ya curü Tupana i guxüma i curü maxümaã, rü guxü i cuãemaã, rü guxü i curü poramaã, rü guxü i nagu curüxĩnüxümaã! ¡Rü nüxü nangechaü i cumücü ngëma na cugütama cungechaüxürüü! —ñanagürü. ²⁸ Rü yexguma ga Ngechuchu rü ñanagürü nüxü: —Ngëma ore i choxü namaã cungãxüxü rü marü name. Rü ngëxguma ngëma ore quinguxëëxgu, rü tá cunayaxu i maxü i taguma gúxü —ñanagürü. ²⁹ Natürü ga yema ngüexëëruü ga Moïchéarü mugüwa nguxëëtaexü, rü nügüëtüwa nachogüchaü. Rü yemacèx Ngechuchuna naca, rü ñanagürü: —¿Rü texé tixĩ ya chomücü? —ñanagürü. ³⁰ Rü yexguma ga Ngechuchu rü nanangãxü, rü ñanagürü nüxü: —Wüxi ga yatü Yerucharéüwa ne naxü, rü Yericü ga ñanewa naxü. Rü namagu nüxü nangaugü ga ngítèëxgüxü. Rü guxüma ga norü yemaxüçex nangixgü, rü èixrüxü ga naxchiru rü ta naxcèx nangixgü. Rü nanaçuaixgü, rü nayayuächixëëgü, rü yemaäcü yéma nanatèxgü. ³¹ —Rü yematama namawa naxüpetü ga wüxi ga Yudiügüarü pai. Natürü yexguma yema yatüxü nadèuxgu rü nüxü yéma naxüpetümare. ³² —Rü yéma naxüpetü ta ga wüxi ga Lebítanüxü ga tupauca ga taxünewa puracüxü. Rü yexguma yema yatüxü nadèuxgu, rü nüma rü ta nüxü naxüpetümare. ³³ —Natürü yixcüra rü wüxi ga Chamáriaanecüãx ga yatü rü yematama namawa naxüpetü. Rü yexguma guma yatüxü nadèuxgu rü nüxü nangechaütümüü. ³⁴ —Rü guma yatüçex nixü. Rü chixü rü binumaã nanaxüxü ga norü oxrigü, rü meãma nayanèixgü ga yema norü oxrigü. Rü ñuxüchi norü burugu nanamunagü, rü wüxi ga pegüchicawa nanaga. Rü yéma nüxna nadau. ³⁵ —Rü moxüäcü ga yexguma inaxüãchigu ga yema Chamáriaanecüãx, rü ngixü nayaxu ga taxretachinü ga norü diëru, rü yema pegüchicaarü yorana ngixü naxã. Rü ñanagürü nüxü:

“¡Nüxna nadau i ñaã yatü! Rü ngëxguma yexeragu naxãtanügu na nuã nangëxmaxü, rü choma tá cuxü chanaxütanü i ngëxguma chataeguxgu”, ñanagürü. ³⁶ Rü ñanagürü ga Ngechuchu nüxü ga yema ngüexëëruü ga Moïchéarü mugüwa nguxëëtaexü: —Ñuxma chanaxwëxe i chomaã nüxü quixu i ngëxürüxü ga yema tomaëxpüxtanüwa ga aixcüma namücü ixixü ga yema yatü ga ngítèëxgüxü imèxgüxü —ñanagürü ga Ngechuchu. ³⁷ Rü yexguma ga yema ngüexëëruü ga Moïchéarü mugüwa nguxëëtaexü rü ñanagürü: —Yema Chamáriaanecüãx nixĩ ga yema yatümücü ixixü, yerü nüxü nangechaütümüü —ñanagürü. Rü yexguma ga Ngechuchu rü ñanagürü nüxü: —¡Ñuxma rü íixü rü yema Chamáriaanecüãx üxürüü naxü! —ñanagürü nüxü.

Marta rü Maríapatawa nangu ga Ngechuchu

³⁸ Rü yexguma Ngechuchu namagu ixüxgu norü ngüexügümaã rü wüxi ga ñanexäcüwa nangu. Rü yéma guma ñanexäcüwa rü wüxi ga nge ga Martagu äegacü ngígüpatawa inanguxëë. ³⁹ Rü Martaaxü iyexma ga wüxi ga ngíeyèx ga Maríagu äegacü. Rü ngíma rü

Ngechuchucutüxtawa irüto na inaxĩnũxücèx ga Ngechuchuarü ore. ⁴⁰ Natürü ga Marta rü itaarü puracüãx rü yemaãcü ngĩrũ puracüguama irũxĩnũ. Rũ yemacèx Ngechuchucèx iyaxũ, rü ngĩgürügü nüxũ: —Pa Corix, ¿tama êxna nagu curũxĩnũ i ngẽma na chataarũ puracüãxũ rü ngẽma chaueyèx rü choxnaxĩca na natáãxũ i guxũma i ngẽma puracü? ;Rũ namaã nüxũ ixu na choxũ nangũxẽxücèx! —ngĩgürügü. ⁴¹ Natürü Ngechuchu rü ngĩxũ nangãxũ, rü ñanagürü ngĩxũ: —Pa Martax, cuma rü poraãcü curü puracücèx cuxoegaãe, rü muxũma i ngẽmaxũgu curũxĩnũ. ⁴² —Natürü wũxixicatama nixĩ i guxũãrũ yexera i mexũ na nagu rũxĩnũxũ. Rũ María iyixĩ i ngẽmagu rũxĩnũcũ. Rũ taxúetáma ngĩxna tayanuxũ i ngẽma —ñanagürü ga Ngechuchu.

11

Ngechuchu nanangúexẽẽ ga yumüxèchiga (Mt 6.9-15, 7.7-11)

¹ Rũ wũxicana wũxi ga nachicawa nayumüxè ga Ngechuchu. Rũ yexguma nüxũ nachauxgu, rü wũxi ga norü ngúexũ rü ñanagürü nüxũ: —Pa Corix ;toxũ nangúexẽẽ na ñuxãcü tayumüxègũxũ, yema Cuáũ ga baiũxẽeruũ norü ngúexũgũxũ nangúexẽẽxũrũ! —ñanagürü. ² Rũ Ngechuchu ñanagürü nüxũ: —Rũ ngẽxguma peyumüxègũgu rü ñaperügügü tá:

“Pa Tonatü ya Daxũgucũx, rü aixcũma Üüncü quixĩ i cumax. ;Rũ núma naxũ na torü ãẽxgacü quiĩxücèx! Rũ tanaxwèxe i curü ngúchaũ na naxũgũxũ i duũxũgü i ñoma i naãnewa, ngẽma daxũguxũ i naãnewa na curü ngúchaũ ínaxũgũxũrũ. ³ ;Rũ toxna naxã i torü õna i wũxichigü i ngunexücèx ixĩxũ! ⁴ ;Rũ toxũ nüxũ nangechaũ i torü pecadugü, erü toma rü ta tũxũ nüxũ tangechaũ ya guxãma ya yixema chixri tomaã chopetuxe! ;Rũ tãxũ i ;tacü rü chixexũpèxewa toxũ cuwogũxũ na tama nagu tayixücèx!”

ñanagürü. ⁵ Rũ ñanagürü ta ga Ngechuchu: —Ngẽxguma chi wũxie i pema rü tũxũ nangẽmaxgu i wũxi i tümamücü, rü chi ngãxücüü napatawa taxũxgu rü ñatagügu nüxũ:

“Pa Chomücũx, ;tomaèxpũx i pãũ choxna naxã! ⁶ —Erü wũxi i chomücü rü yaxũwa ne naxũ, rü ngexwacèx chopatawa nangu. Rũ choma rü changearü õnaãx, rü taxuũmaãma chanachibüxèẽega”, ñatagügu. ⁷ —Rũ ngẽma tümamücü i napatawa ngẽxmaxũ, rü chi tũxũ nangãũxgu rü ñaxgu:

“;Tãxũ i choxũ cuchixewexũ! Chorü ñãx rü marü narüwãxta, rü choma rü chaux-acügü rü ngürücarewa tangèxmagü. Rũ ngẽmacèx taxucürüwa ícharüda na ;tacü cuxna na chaxãxücèx”, ñaxgu chi tũxũ. ⁸ —Rũ pemaã nüxũ chixu, rü ngẽma na tümamücü yĩxücèx rü tãütáma ínãrũda na ;tacü tũxna naxãxücèx. Natürü tá ínãrũda na tama tanachixeweechaxücèx, rü tá tũxna nanaxã i guxũma i ;tacü i tanaxwèxexũ. ⁹ —Rũ ngẽmacèx pemaã nüxũ chixu rü, ;Naxcèx ípeca rü Tupana rü tá pexna nanaxã! ;Rũ Tupanacèx pedèux rü tá nüxũ ipeyangau! ;Rũ ñãxwa: Tu tu tu ñapegü, rü tá pexcèx niwãxna i ñãx! ¹⁰ —Erü guxãma ya yixema naxcèx íçaxe rü tanayaxu, rü guxãma ya naxcèx dauxe rü nüxũ itayangau. Rũ guxãma ya ñãxwa: Tu tu tu ñagũxe, rü tümacèx tá niwãxna i ñãx. ¹¹ —¿Rũ ñuxãcü i wũxi i pema na papágü piĩxũ rü penena penaxãxũ ya wũxi ya nuta ega pãũcèx pexna nacaxgu, rü êxna wũxi i áxtape ega choxnicèx pexna nacaxgu? ¹² —¿Rũ texé i petanüwa rü penena penaxã i tuxchinawe ega wũxi ya otacharaũcèx pexna nacaxgu? ¹³ —Rũ ngẽma pema na pichixecümachiréxũ natürü nüxũ pecuèx na ñuxãcü mexũ i ãmare pexacügüna na pexãxũ, rü pemaã nüxũ chixu rü Penatü ya Daxũgucü rü perü yexera tá nixĩ na pexna mexũ naxãxũ. Rũ guxãma ya yixema Tupanaxũtawa Naãe i Üünexücèx íçaxe, rü tá tũxna nanaxã —ñanagürü ga Ngechuchu.

Ngechuchuxũ nixugüe na ngoxoarü poramaã napuracüxũ nawogüe (Mt 12.22-30; Mr 3.20-27)

¹⁴ Rū Ngechuchu ínanatèxüchi ga wüxi ga ngoxo ga wüxi ga yatüxü ngegaxèèxü. Rū yexguma ínaxüüxgu ga yema ngoxo rü guma yatü rü nidexa. Rū guxüma ga duüxügü rü nabaixächiãégü ga yexguma yemaxü nadaugügu. ¹⁵ Natürü ñuxre ga duüxügü rü ñanagürügü: —Ñaa yatü i Ngechuchu, rü Behebú i ngoxogüarü ãëxgacüarü poramaã nixí i ínanawoxüãxü i ngoxogü —ñanagürügü. ¹⁶ Natürü ga togü rü nüxü naxügüchaü, rü yemacèx naxcèx ínacagü ga nüxü na nawéaxü ga wüxi ga cuèxruü ga daxücüãx na yemawa nüxü nacuèxgüxüçèx rü ngoxi aixcüma Cristu yí. ¹⁷ Natürü nüma ga Ngechuchu rü nüxü nacuèxama ga tacügu na naxínüèxü, rü yemacèx ñanagürü nüxü: —Ngëxguma chi wüxi i nachíüãnecüãx i duüxügü nügü itoyegu rü nügütanüwa chitama nügü nadaixgu, rü nügü chitama naguxèë. Rū ngëxguma chi wüxi ya ícüãx nügümaã nuèèchagu rü nügü nadaixgu, rü nügü chitama naguxèë. ¹⁸ —¿Rü ngëxguma chi Chataná nügümaãtama nuxgu, rü nügütama yamèxgu, rü ñuxácü chi i ãëxgacüecha yíxü? Rū ngëma ñacharügü i ñuxma erü pema choxü pixuxgu rü Behebúarü poramaã íchanawoxü i ngoxogü. ¹⁹ — Natürü ngëxguma chi Chatanáarü poramaã íchanawoxügu i ngoxogü, rü perü ngüexügü rü chita Chatanáarü poramaã ínanawoxü i ngoxogü. Rū ngëmawa meã nüxü tacuèx na pema rü ípetüexü. ²⁰ —Natürü pemaã nüxü chixu rü aixcüma Tupanaarü poramaã nixí i íchanawoxüxü i ngoxogü. Rū ngëmawa pexü nüxü chacuèxèë na núma petanüwa nanguxü ya Tupana na ãëxgacü yíxüçèx. ²¹ —Rü ngëxguma wüxi ya yatü ya poracü rü meãma nügü naxüxnegu rü nüxna nadèuxgu ya napata, rü taxúetáma naxcèx tangíx i norü ngëmaxü i napatawa ngëxmaxü. ²² —Natürü ngëxguma ínanguxgu i to i yatü i nüxü rüporamaèxü, rü nüxü nayexeragu, rü tá nüxna nanapuxü ya naxne ya nügü namaã ínaporaãxüne, rü tá nüxna nanapuxü i guxüma i norü ngëmaxü, rü tá nayana. ²³ — Yíxema tama choxü ngechaüxè rü chauxchi taxai. Rū yíxema tama choxü rüngüxèexè na Tupanacèx tayagagüxü i duüxügü rü chauxchawa tanangianexèë.

ngoxo i taeguxüchiga

(Mt 12.43-45)

²⁴ —Rü ngëxguma wüxi i ngoxo rü wüxi ya yatüwa ínaxüüxgu, rü dauxchitagu nanañaãne, rü naxcèx nadau na ngextá na nangüxü. Rū ngëxguma taxuguma nangüegagu, rü nügü ínicuèx rü ñanagürü:

“Maneca naxcèx tá chataegu ya yima yatü ga noxri nawa íchaxüxüchirécü”, ñanagürü.

²⁵ —Rü ngëxguma nataegugu, rü yima yatüxü inayangau na ñoma wüxi ya í ya mexèene rü meã nabixichinerü na yíxü. ²⁶ —Rü ínixü rü naxcèx nayadau i to i 7 i ngoxogü i norü yexera i chixexü. Rū guxüma i ngëma ngoxogü rü wüxigu yima yatügu nachocu, rü ngëxma naxächíügü. Rū ngëxguma ya yima yatü rü noxriarü yexera nachixe —ñanagürü.

Taãe i aixcüma ixíüchiga

²⁷ Rū yemaxü íyaxuyane, rü wüxi ga ngecü rü duüxügütanüwa tagaãcü ngígürügü: —Tataãe ya yíxema tügüanüwa cuxü yaxèexè rü tügü nixüwa cuxü maixè —ngígürügü.

²⁸ Natürü ga Ngechuchu rü ñanagürü: —Yexeraãcü tataãe ya yíxema nüxü ínúxè i Tupanaarü ore rü naga ínúxè —ñanagürü.

Duüxügü ga tama yaxögüchaüxü rü naxcèx ínacagüama ga to ga cuèxruü ga Tupanaarü poramaã üxü

(Mt 12.38-42; Mr 8.12)

²⁹ Rū nimuétanü ga duüxügü ga Ngechuchuxütawa ngutaquèxegüxü. Rū ínanaxügü ga Ngechuchu ga namaã na yadexaxü. Rū ñanagürü: —Ñaa duüxügü i ñomaücüü maxèxü rü nichixecüma. Rū naxcèx ínacagü i wüxi i cuèxruü i mexü i Tupanaarü poramaã üxü. Natürü Tupana rü wüxixicatama i cuèxruü tá nüxü nawèx. Rū ngëma nixí i cuèxruü ga Tupanaarü orearü uruü ga Yonáwa duüxügüxü nawèxü na nüxü nacuèxgüxüçèx na aixcüma Tupana yíxü ga guma yéma namucü. ³⁰ —Rü yexgumarüü ga Yoná rü wüxi ga cuèxruü nixí naxcèx ga Níibecüãx ga duüxügü, rü ngëxgumarüü tá ta nixí ya Tupana

Nane ya duñxũxũ ixĩcü na wüxi i cuèxruũ tá yĩxũ naxcèx i ñomaũcüü maxèxũ i duñxũgü.
³¹—Rü ngèxguma naãneärü guxgu rü Tupana rü ñomaũcüü maxèxũ i duñxũgüna nacèxgu i norü pecaduchigacèx, rü ngĩma ga nuxcümaũcü ga Chabaaneärü ãèxgacü tá írũda rü tá íanaxuaxũ i ñomaũcüü maxèxũ i duñxũgü. Yerü ngĩma rü yaxũwaxüchi ne ixũ ga na ãèxgacü ga Charumóũxũ naxĩnũxüçèx ga ñuxäcü poraäcü nüxũ na nacüèxüchixũ. Natürü ñuxma nuã petanüwa nangèxma i wüxi i Charumóũärü yexera ixĩcü. ³²—Rü ngèxguma naãneärü guxgu rü Tupana rü ñomaũcüü maxèxũ i duñxũgüna nacèxgu norü pecaduchigacèx, rü nuxcümaũgüxũ ga Nínibecũãx ga duñxũgü rü tá ínarüdagü rü tá íanaxuaxũgü i ñomaũcüü maxèxũ i duñxũgü. Yerü nümagü ga Nínibecũãxgü ga duñxũgü rü nüxũ narüxoe ga nacümagü ga chixexũ ga yexguma Yoná namaã nüxũ ixuxgu ga Tupanaärü ore. Natürü ñuxma nuã petanüwa nangèxma i wüxi i Yonáärü yexera ixĩxũ.

Taxüneärü omüchiga
(Mt 5.15, 6.22-23)

³³—Taxüema wüxi i omüwa tanangixichi rü ñuxüchi itayacux rü éxna tacütüügu tayaxücuchi. Natürü norü üchicaũgu tanaxünagü na ngema tüxũ nabaxixüçèx ya yíxema duñxègü ya yima ígu chocuxe. ³⁴—Cuxetügü rü ñoma wüxi i omürüü nixĩ i cuxunecèx. Rü ngèxguma ngẽma Tupana cuxũ naxwèxexüçèx cudèuxgu, rü guxũma i curü maxũ rü name. Natürü ngèxguma ñoma i naãneärü ngüchaũcèx cudèuxgu, rü guxũma i curü maxũ rü chixexüwa nangèxma. ³⁵—¡Meã cugüna nadau na tama éãnexũxũ nanguxuchixüçèx i ngẽma ore i mexũ i cuxũ ngèxmaxũ, i ñoma wüxi i omürüü ixĩxũ! ³⁶—Ngèxguma chi guxũ i curü maxüwa nangèxmagu i Tupanaärü ngóonexũ rü taxuwama nachixèxgu i curü maxũ, rü meã chi nüxũ cucuèx i Tupanaärü ngüchaũ ñoma wüxi i omü i cuxũ baxixürüü —ñanagürü.

Ngechuchu rü duñxũgütanüwa íanaxuaxũ ga Parichéugü rü ngúexèèruũgü ga Moíchéarü mugüwa nguxèètaegüxũ
(Mt 23.1-36; Mr 12.38-40; Lc 20.45-47)

³⁷ Rü yexguma nüxũ nachauxgu ga na yadexaxũ ga Ngechuchu rü wüxi ga Parichéu nüxna naxu ga napatawa na yachibüxüçèx. Rü yema Parichéupatawa naxũ, rü mechawa nayarüto. ³⁸ Rü yema Parichéu rü nabaixãchiãè ga yexguma Ngechuchuxũ nadèuxgu na tama yanguxèèãxũ ga yema Moíchéarü mu na nayauxmèxgüxiraxũ ga yexguma nachibüegu. ³⁹ Natürü nüma ga Cori ga Ngechuchu rü ñanagürü nüxũ: —Pema i Parichéugü rü ñoma pochiyu rü poratu i düxétüwaxicatama iyaxuxürüü pixĩgü. Natürü i peãèwa rü nagu perüxĩnüè na pengixũ rü chixexũ pexüxũ. ⁴⁰—Pa Naèchitamare Maxèxũx, çtama éxna nüxũ pecuèx na guma Tupana ga naxücü i ngẽma tórü düxétüxünewa ngèxmaxũ, rü gumatama yĩxũ ga naxücü ga tórü maxũ i tórü aixepewa ngèxmaxũ? ⁴¹—Rü name nixĩ i Tupanana penaxã i perü maxũ na aixcüma naxcèx pemaxèxüçèx. Rü ngẽmaäcü tá pime i guxüwama. ⁴²—Natürü wüxi i ngechaũ nixĩ i pexcèx, Pa Parichéugüx, erü pema rü perü ngèmaxüwa rü meã Tupanana penaxã i ngẽma noxrü ixĩxũ, natürü perü maxüwa rü tama aixcüma naga pexĩnüè rü tama nüxũ pengechaũ. Rü marü name na perü ngèmaxüwa Tupanana penaxãxũ i ngẽma noxrü ixĩxũ. Natürü perü maxüwa rü ta penaxwèxe i meã naga na pexĩnüèxũ rü nüxũ na pengechaũxũ. ⁴³—Rü wüxi i ngechaũ nixĩ i pexcèx, Pa Parichéugüx, erü pema rü pexũ nangüchaũ i ãèxgacüchicagüwa na perütogüxũ i ngutaquèxepataũgüwa. Rü penaxwèxe na ñoma ãèxgacüxũ rümoxèxürüü na meã pexũ namoxègüxũ i duñxũgü i ítamügüwa. ⁴⁴—Rü wüxi i ngechaũ nixĩ i pexcèx, erü ñoma yuetamaũgü i tama nüxũ idauxũ i duñxũgü naèchitamare naetüwa chopetüxürüü pixĩgü. Erü woo perü düxétüwa pime, natürü aixepewa i peãèwa rü poraäcü pichixe —ñanagürü ga Ngechuchu. ⁴⁵ Rü wüxi ga ngúexèèruũ ga Moíchéarü mugüwa nguxèètaexũ, rü Ngechuchuxũ nangãxũ rü ñanagürü: —Pa Ngúexèèruũ Pa Ngechuchux, rü ngẽma na ngẽma ñacuxũ, rü toma rü toãèwa nangux

—ñanagürü. ⁴⁶ Natürü Ngechuchu rü ñanagürü nüxü: —Wüxi i ngechaü nixĩ i pexcèx, Pa Ngúexēēruügü i Moĩchēarü Mugüwa Nguxēētaegüxüx, erü poraäcü penamu i duüxügü na naga naxĩnüēxüçèx i ngēma Moĩchēarü mugü i guxchaxü i pematama bai i Írarüwa naga pexĩnüēchaüxü. ⁴⁷ —Rü wüxi i ngechaü nixĩ i pexcèx, erü peyamexēēgü i tümamaügü ga guxema nuxcümaügüxe ga Tupanaärü orearü uruügü ga perü oxigü tüxü dèixe. ⁴⁸ —Rü ngēmawa nüxü tacuèx na pema rü ta ipexāgüxü nawa ga yema chixexü ga perü oxigü ügüxü. Yerü nümagü rü tüxü nadai ga guxema Tupanaärü orearü uruügü, rü ñuxma i pema rü peyamexēēgü i tümamaügü. ⁴⁹ —Rü yemacèx nixĩ ga Tupana ga ñaxü:

“Ngēma duüxügütanüwa tá chanamugü i chorü orearü uruügü rü chorü orearü ngeruügü. Natürü ngēma duüxügü i chixexügü rü tá nanadai i nümaxü rü togüxü rü tá nachixewegü rü tá nawe ningēxütanü”,

ñaxü ga Tupana. ⁵⁰⁻⁵¹ Rü ñanagürü ga Ngechuchu: —Rü pemaã nüxü chixu rü Tupana tá nayapeguächixēē i pema i ñuxma maxēxē erü pema rü ta perü oxigüçumagu pexĩ. Nümagü rü noxritama naāneärü ügügumama rü nanadai ga muxüma ga Tupanaärü orearü uruügü. Rü nüxĩra nayamèxgü ga Abé rü gumawena nayadaietanü ga muxüma ga togü ñuxmata Zacaría ga tupauca ga taxünegu yamèxgüäcüwa nangu. Rü guxüma ga yema orearü uruügü ga perü oxigü dèixüçèx rü Tupana tá pexna naca, erü pema rü ta perü oxigürüütama pixigü rü tama nüxü perüxoechaü i ngēma chixexü i pexüxü. ⁵² —Rü wüxi i ngechaü nixĩ i pexcèx, Pa Ngúexēēruügü i Moĩchēarü Mugüwa Nguxēētaegüxüx, erü duüxügüchaxwa ipeyacux i Tupanaärü ore i aixcüma ixixü i pematama tama pixögüxü. Rü nüxna penachuxu i togü i duüxügü i aixcüma yaxögüchaüxü na nümagü rü ta tama yaxögüäxüçèx —ñanagürü ga Ngechuchu. ⁵³⁻⁵⁴ Rü yexguma Ngechuchu yema ñaxgu, rü yema ngúexēēruügü ga Moĩchēarü mugüwa nguxēētaegüxü rü yema Parichéugü rü poraäcü Ngechuchumaã nanuē. Rü inanaxügü ga nüxna na nacagüexü naxcèx ga muxüma ga ore ga guxchaxümaã na yemaäcü chi nüxü iyangaugüxüçèx ga ore ga chixexü na yemamaã norü äëxgacügüxü- tawa Ngechuchuxü íyaxuaxügüxüçèx.

12

Ngechuchu nanangúexēē na tama namexü na duüxügüpëxewa meã imaxnetaxü natürü taãewa rü chixexügu rüxnüxü

¹ Rü yoxni yexma nangutaquëxegü ga muxüchixü ga duüxügü. Rü yema na namuxüchixüçèx rü düxwa nügücutüwa ningagüetanü ga duüxügü. Rü Ngechuchu inanaxügü ga norü ngúexügümaãxĩra na yadexaxü, rü ñanagürü: —¡Pexuāëgü naxcèx i Parichéugü! Erü duüxügüpëxewa meã namaxēneta natürü naãewa rü chixexügu narüxnüē. ² —Natürü guxüma i tacü i wüxie cúäcü üxü rü tá nangoxoma. Rü guxüma i tacü iicüxü rü yixcüra rü tá duüxügü nüxü nacüèxgüama. ³ —Rü ngēmamacèx guxüma i ngēma ore i ēānexüwa cúäcü nüxü pixuxü rü yixcüra rü tá nangoxoma rü guxü i duüxügü tá nüxü naxĩnüē. Rü ngēma ore i ucapuarü aixepewa cúäcü nüxü pixuxü, rü yixcüra rü guxäpëxewa tá nüxü nixugügü i duüxügü.

Name nixĩ na Tupanaxü pemüñëxü
(Mt 10.26.31)

⁴ —Rü ngēmamacèx i pemax, Pa Chomücügüx, rü pemaã nüxü chixu rü itama nüxü pemüñë i ngēma duüxügü i pexü daixchaüxü! Erü taxünexüxĩcatama nimèxgü, natürü taxücürüwama taãëxü nimèxgü. ⁵ —Natürü pemaã tá nüxü chixu na texéxü tá na pemüñëxü. ¡Nüxü pemüñë ya Tupana! Erü nüma nüxü nangëxma i pora na yamáãxü i pexene, rü napoxcuãxü i peãe i ngextá ngoxogüxü ínapoxcuxügu. ¡Rü yimaxü tá nixĩ i pemüñëxü! ⁶ —¿Tama ëxna taxretachinü i dīëruxacügu namaã petaxe i wüximēëxpüx i werixacügü? Natürü Tupana rü tama tüxü inayarüngüma ya yixema werixacüãxgü, rü bai ya wüxi. ⁷ —Rü woo i peyaegü rü Tupana nüxü nacüèx na ñuxre i peyae ngëxmaxü. Rü

ngëmacèx, jtãxũ i pexoegaãëgũxũ! Erũ pema rũ muxũma i werixacũgũarũ yexeraxũchi pexũ nangechaũ ya Tupana.

Yixema duũxũgũpëxewa tũgũ ixuxe na Ngechuchu ya Cristuarũ duũxũ tiĩxũ
(Mt 10.32-33, 12.32)

⁸ —Rũ pemaã nũxũ chixu rũ guxãma ya texé i ñoma i naãnewa duũxũgũpëxewa tũgũ ixuxe na chorũ duũxũ tiĩxũ, rũ choma i Tupana Nane na duũxũxũ chiĩxũ, rũ napëxewa i Tupanaãrũ orearũ ngeruũgũ i daxũcũãx rũ tá tũxũ chixu na chorũ duũxũ tiĩxũ i tũmax. ⁹ —Natürũ texé ya ñoma i naãnewa duũxũgũpëxewa tũgũ ixuxe na tama chorũ duũxũ tiĩxũ, rũ choma rũ tá ta napëxewa i Tupanaãrũ orearũ ngeruũgũ i daxũcũãx rũ tá tũxũ chixu na tama chorũ duũxũ tiĩxũ i tũmax. ¹⁰ —Rũ guxãma ya texé ya chixri chauchiga idexaxe i choma i Tupana Nane na duũxũxũ chiĩxũ, rũ Tupana tá tũxũ nũxũ nangechaũ i ngëma. Natürũ texé ya Tupanaãë i Üünexũchiga chixri idexaxe, rũ Tupana rũ tãütãma tũxũ nũxũ nangechaũ i ngëma. ¹¹ —Rũ ngëxguma duũxũgũ ngutaquëxepataũgũwa rũ ëxna ãëxgacũgũpëxewa pexũ nagagũgu na pexũ napoxcuxëcèx, rũ jtãxũ i pexoegaãëgũxũ na tacũmaã tá penangãxũxũ rũ ëxna tacũxũ tá namaã na pixuxũ! ¹² —Erũ ngëxguma nawa nanguxgu na pidexagũxũ, rũ Tupanaãë i Üünexũ tá pexũ nanguxëë na tacũxũ tá namaã pixuxũ —ñanagũrũ ga Ngechuchu.

Wũxi i ãũcũmaxũ nixĩ na imuãrũ dïëruãxũ

¹³ Rũ yema duũxũgũtanũwa rũ wũxi ga yatũ Ngechuchuxũ ñanagũrũ: —Pa Ngúexëëruũx, jnamaã nũxũ ixu ya chaueneë rũ choxna naxãã i ngëma chaunatu ga yucũarũ ngëmaxũ i choxna üxũ! —ñanagũrũ. ¹⁴ Natürũ Ngechuchu rũ ñanagũrũ nũxũ: —Pa Yatũx, çtexé perũ ãëxgacũxũ choxũ tingucuchixëë na chayatoyexëcèx i ngëma penatũarũ ngëmaxũ? —ñanagũrũ. ¹⁵ Rũ ñanagũrũ ta ga Ngechuchu: —jPexuãë na tama pexũ nangũchaũxëcèx i togũarũ ngëmaxũ! Erũ wũxi i duũxũ rũ tama ngëma na namuãrũ ngëmaxũãxũcèx nixĩ i nayauxãxũ i norũ maxũ i taguma gũxũ —ñanagũrũ. ¹⁶ Rũ yexguma wũxi ga ore ga cuëxruũxũ namaã nixu, rũ ñanagũrũ: —Nayexma ga wũxi ga yatũ ga muãrũ dïëruãcũ, rũ guxũma ga yema nanetũgũ ga naãnegu natogũxũ rũ meãma nũxũ nixo. ¹⁷ —Rũ guma yatũ rũ nagu narũxĩnũ rũ naãëwa ñanagũrũ:

“çTacũ tá chaxũxũ i ñũxmax? Erũ nataxuma i chorũ nachica i ngexta namaã na changuxũxũ i chaunetũgũarũ o”, ñanagũrũ. ¹⁸ —Rũ naãëwa ñanagũrũ:

“Marũ nũxũ chacuëx na tacũ tá chaxũxũ. Rũ nagu tá chapogũ ya guxũnema ya chorũ ĩpatagũ ga nagu namaã changuxũne ga chaunetũgũarũ o. Rũ náĩ ya taxũragũne tá chaxũ na ngëxma namaã changuxũxëcèx i guxũma i chaunetũgũarũ o rũ guxũma i chorũ ngëmaxũgũ. ¹⁹ —Rũ ngëxguma marũ namexgu i guxũma, rũ chaugũmaã tá ñacharũgũ: ‘Ñuxma rũ tá icharũngũ rũ meã tá chachibũ rũ meã chaxaxe rũ ngëmaãcũ tá chataãë. Erũ namuxũchi i chorũ ngëmaxũgũ, rũ mucũma ya taunecũ tá choxũ natai’, ñacharũgũ tá chaugũmaã”. ²⁰ —Natürũ Tupana rũ ñanagũrũ guma yatũxũ:

“Pa Yatũx, cungëãëmare i cuma erũ ñoma i chũtaxũgu tátama cuyu. Rũ ngëma curũ ngëmaxũgũ i namaã cunguxũxũ, rũ çtexëarũ tá nixĩ i ngëxguma?” ñanagũrũ ga Tupana. ²¹ —Rũ ngëxgumarũ tá ta namaã nangupetũ i ngëma duũxũgũ i nũgũcëxtama norũ ngëmaxũgũmaã nguxũxũ rũ tama nũgũ ímexëëxũ i Tupanapëxewa —ñanagũrũ ga Ngechuchu.

Tupana rũ naxãcũgũna nadau
(Mt 6.25-34)

²² Rũ yemawena rũ norũ ngúexũgũxũ ñanagũrũ ga Ngechuchu: —Pemaã nũxũ chixu jrũ tãxũ i pexoegaãëgũxũ naxcèx i tacũ tá na pengõxũ rũ tacũmaã tá na pixãxchiruxũ! ²³ —Erũ perũ maxũ rũ õnaãrũ yexera nixĩ, rũ pexene rũ naxchiruarũ yexera nixĩ. ²⁴ —jDücèx penangugũ i werigũ i tama toegũchirëxũ, rũ tama nanetũarũ o ibuxgũxũ, rũ ngepatagũxũ na ngexta namaã nanguxũgũxëcèx i norũ õna! Natürũ Tupana rũ

nanaxüwemü. Rü pema rü Tupanacèx rü poraãcü guxüma i werigüarü yexera pixîgü.
²⁵ —Rü taxuwama name na pexoegaãëgüxü. Erü taxucürüwama wüxie i pema rü
 pegütama ipemèxãchixëë ngãxü ya metruugu ega woo poraãcü naxcèx pexoegaãëgügu.
²⁶ —Rü ngëxguma tama pemaã nanguxü i ngëma íraxü rü taxucürüwama pegütama
 ipemèxãchixëë ega woo naxcèx pexoegaãëgügu, rü ¿tüxcüü i ngëxguma rü ta tacü i togü i
 ngëmaxügücèx pexoegaãëgüxü? ²⁷ —¿Dücèx penangugü i putüragü na ñuxãcü nayaexü
 i nachacu! Rü tama napuracüexü, rü tama nügü üxchirugüxü. Natürü woo guma
 ãëxgacü ga Charumóü ga na namexëchixü ga naxchiru rü taguma wüxi ga putürachacuarü
 mexürüü nixí. ²⁸ —Rü marü nüxü pedau i ñuxãcü Tupana na nangèxãëxü i putüragü
 i ñuxma naãnewa rüxügümarexü natürü moxü rü marü taxuxü. Rü ngëxguma Tupana
 ngëmaãcü nangèxãëgu i putüragü rü pema rü tá ngëmaãrü yexera pexchiru pexna naxã,
 Pa Duüxügü i Írarüwatama Yaxögüxüx. ²⁹ —Rü ngëmacèx tama name i pexoegaãë naxcèx
 i tacü tá na pengõxü rü tacü tá na pixaxüxü. ³⁰ —Erü ñoma i naãnecüãx i duüxügü
 rü naxcèx nadaugü i guxüma i ngëma pemaã nüxü chixuxü. Natürü pema rü pexü
 nangëxma ya Penatü ya Tupana ya nüëchama nüxü cuácü na pexü nataxuxü i guxüma i
 ngëma. ³¹ —Rü ngëmacèx narümemae nixí na Tupanaãrü ngúchaüçèx pedaugüxü na perü
 ãëxgacü yíixüçèx. Rü ñuxüchi nüma rü tá pexna nanaxã i guxüma i tacü i pexü taxuxü.

*Ñuxãcü tüxü nangëxma i tóru ngëmaxügü i daxüguxü i naãnewa
 (Mt 6.19-21)*

³² —¿Tãxü i pemuüëxü, Pa Chauzacügüx! Pema rü noxretama pixîgü natürü Penatü
 ya Tupana rü norü ngúchaü nixí na pexna naxããxü i pechica i ngextá nüma ãëxgacü
 íyíixüwa. ³³ —¿Rü namaã petaxe i perü ngëmaxügü rü togü i duüxügü i nüxü nataxuxüna
 penaxã i ngëma díëru! Rü ngëmaãcü tá pegüxü penangëxmaxëë i perü ngëmaxügü i
 taguma pexü ngauxü rü taguma gúxü i daxüguxü i naãnewa i ngextá tama íyaxücuxüwa
 i ngítèxáxü rü naweane tama ínachixexëëxüwa. ³⁴ —Erü ngextá ínangëxmaxüwa i perü
 ngëmaxügü, rü ngëxma nixí i perüxüñüëxü.

Name nixí i yigü ítamexëëgü naxüpa na ínanguxü ya Cristu

³⁵ —¿Rü ípememare namaã i perü omügü i naígüxü! ³⁶ —Rü name nixí i wüxi i coriarü
 duüxügü i ímemaregüxürüü na pixîgüxü. Rü penaxwèxe na ñoma duüxügü i íãxwa norü
 corixü nanguxëëgüxürüü na pixîgüxü. Rü ngëxguma norü cori rü wüxi i ngígüarü petawa
 ne naxüxgu rü: Tu tu tu ñaxgu, rü paxa naxcèx nayawãxnagü i íãx. ³⁷ —Rü nataãëgü
 i ngëma coriarü duüxügü ega inadauegu i ngëxguma ínanguxgu i norü cori. Rü pemaã
 nüxü chixu rü ngëma cori rü norü mechawa tátama nanatogüxëë i ngëma norü duüxügü
 i nüxü ínanguxëëgüxü, rü nüma tátama ngëma norü duüxügüxü inaxüwemü. ³⁸ —Rü
 woo ngãxüçüü ínanguxgu rü ëxna marü yangunechaügu rü nataãëgü i ngëma coriarü
 duüxügü ega inadauegu i ngëxguma ínanguxgu i norü cori. ³⁹ —Rü ngëxguma chi wüxi
 ya íãrü yora nüxü cuëxgu na ñuxguacü ínanguégaxü i ngítèxáxü, rü tãü chima nape. Rü
 chi nüxna nadau ya napata na tama yawãxnaãxüçèx rü tama na nüxü nangíxüçèx. ⁴⁰ —
 Rü pema rü ta penaxwèxe na ípememarexü. Erü ngürüãchi tama nagu íperüxüñüëyane tá
 íchangu i choma i Tupana Nane na duüxüxü chiüxü —ñanagürü ga Ngechuchu.

*Wüxi ga duüxü ga meã norü coriga íñüxü rü to ga tama meã norü coriga íñüxüchiga
 (Mt 24.45-51)*

⁴¹ Rü yexguma ga Pedru rü Ngechuchuna naca rü ñanagürü: —Pa Corix, ¿toxcèxicatama
 ëxna nixí i ñaã ore i cuëxruü i tomaã nüxü quixuxü, rü ëxna guxü i duüxügücèx
 yíixü? —ñanagürü. ⁴² Rü ñanagürü ga Cori ga Ngechuchu: —¿Texé tíixü ya yíxema
 tümaãrü coriarü duüxë ya aixcüma yanguxëëxë rü meã tümaãëxü cuáxe? ¿Tama ëxna
 yíxema tíixü ya tümaãrü cori tüxna ägaxe na meã nüxna tadauxüçèx rü meã oragu
 tanachibüexëëxüçèx i norü duüxügü? ⁴³ —Rü tataãe ya yíxema coriarü duüxë i ngëxguma

Ínanguxgu i túmaãrũ cori rũ tũxũ íyanguẽũgu na meãma ítanaxũxũ i ngẽma puracũ i nagu tũxũ namuxũ. ⁴⁴—Rũ aixcũma pemaã nũxũ chixu rũ ngẽma túmaãrũ cori rũ tá guxũma i norũ ngẽmaxũgũarũ dauruũxũ tá tũxũ nixĩxẽẽ. ⁴⁵⁻⁴⁶—Natũrũ ngẽxguma chi ngẽma duũxũ nagu rũxĩnũgu rũ norũ cori rũ tama paxa na ínanguxũ, rũ inaxũgũãgu na chixri namuãxũ i natanũxũgũ i yatũxũgũ rũ ngexũgũ, rũ peta naxũxgu rũ nachibũxgu, rũ naxaxegu, rũ nũgũ nangãxẽẽgu, rũ ngũrũãchi ngẽma ngunexũ rũ ngẽma ora i tama nagu ínanguxẽẽãxũgu tá ínangu i norũ cori. Rũ poraãcũxũchi tá nanapoxcu ngẽma duũxũgũ i tama norũ coriga ínũxũxũ napoxcuexũrũũ. ⁴⁷—Rũ ngẽma coriarũ duũxũ i nũxũ cuẽxchirẽxũ na tacũ nanaxwẽxexũ i norũ cori, natũrũ tama nũgũ ímexẽẽxũ rũ tama norũ coriga ínũxũ, rũ tá poraãcũ nanaçuaxi. ⁴⁸—Natũrũ ngẽma coriarũ duũxũ i tama nũxũ nacuããcũma chixri norũ coriga ínũxũ, rũ chixexũ ũxũ, rũ tá írarũwaxũra nanaçuaxi. Rũ texé ya Tupana muxũma tũxna ãxẽ, rũ muxũcẽxtãma tũxna naca. Rũ texé ya muxũna tũxũ nadauxẽẽxẽ rũ tá yexeraãcũ tũxna naca.

*Ngechuchugagu nixĩ i yatoyexũ i duũxũgũ
(Mt 10.34-36)*

⁴⁹—Nũma chaxũ na ñoma i naãnewa duũxũgũxũ chidauchitanũxẽẽxũcẽx. Rũ chierũ aixcũma marũ yadauchitanũgu. ⁵⁰—Rũ choma rũ tá poraãcũ ngũxũ chinge, rũ chanaxĩxãchiãẽ ñũxmatáta yangu i ngẽma. ⁵¹—Rũ tama name i nagu perũxĩnũẽ na núma chaxũxũ na guxũ i duũxũgũ rũ wũxigu naxĩnũẽxũcẽx. Natũrũ pemaã nũxũ chixu rũ núma chaxũ na chaugagu yatoyexũcẽx i duũxũgũ. ⁵²—Erũ ñaãwena ega wũxi ya ípatawa nangẽxmagu i wũximẽẽxpũx i duũxũgũ, rũ tomaẽxpũx tá choxũ nayaxõgũ rũ taxre i tama, rũ ãxna taxre tá choxũ nayaxõgũ rũ tomaẽxpũx i tama. ⁵³—Rũ wũxi i papá tá nayaxõ rũ nane rũ tãũtãma nayaxõ, rũ ãxna nane tá nayaxõ natũrũ nanatũ i tama. Rũ ngẽxgumarũũ ta wũxi i mamá tá iyaxõ rũ ngĩxãcũ rũ tãũtãma iyaxõxchãũ, rũ ãxna ngĩxãcũ tá iyaxõ rũ ngĩẽ rũ tãũtãma iyaxõxchãũ. Rũ wũxi ya ngĩxẽ tá iyaxõ rũ ngĩneãx rũ tãũtãma iyaxõ, rũ ãxna ngĩneãx tá iyaxõ rũ ngĩxẽ rũ tãũtãma iyaxõ —ñanagũrũ ga Ngechuchu.

*Cuẽxruũgũ i nachiga i tacũ tá nangupetũxũ
(Mt 16.1-4; Mr 8.11-13)*

⁵⁴ Rũ Ngechuchu ñanagũrũ ta nũxũ ga duũxũgũ: —Ngẽxguma nũxũ pedẽuxgu na naxẽãchianexũ, rũ nagu perũxĩnũẽ tá na napuxũ. Rũ aixcũma ngẽmaãcũ nixĩ. ⁵⁵—Rũ pema nũxũ pecuẽx na ñũxãcũ penangugũxũ ya buanecũ, rũ ngẽmaãcũ nũxũ pecuẽx rũ tá na nanguxetũxũ. Rũ aixcũma ngẽmaãcũ nixĩ. ⁵⁶—Pa Duũxũgũx, pema rũ togũ i duũxũgũpẽxewa meã pemaxẽneta, natũrũ peãẽwa rũ chixexũgu perũxĩnũẽ. Pema nũxũ pecuẽx na ñũxãcũ penangugũxũ ega tá napuxgu rũ ãxna tá nanguxetũgu. ¿Rũ ñũxãcũ i ñũxma i tama nũxũ pecuãxũ na Tupana yĩxũ ya petanũwa ngucũ?

*Name nixĩ na curũngũxmũxũ namaã i curũ uwanũ
(Mt 5.25-26)*

⁵⁷—Rũ tũxcũũ tama nũxũ pecuãxchãũ i ngẽma nama i mexũ i Tupana pexũ naxwẽxexũ na nagu pexĩxũ. ⁵⁸—Rũ ngẽxguma chi wũxie wũxi i ngetanũcẽx cuzũ íxuaxũgu rũ ãẽxgacũxũtawã cuzũ tagaxgu, rũ name nixĩ i namawatama tũxũ icurũngũxmũxẽẽ na tama ãẽxgacũpẽxewa cuzũ tagaxũcẽx. Erũ wũxicana na ãẽxgacũxũtawã cunguxũ rũ ãẽxgacũ tá purichĩagũna cuzũ namu. Rũ purichĩagũ tá cuzũ napoxcu. ⁵⁹—Rũ cumaã nũxũ chixu rũ ngẽxma poxcuchicagu tá curũxãũx ñũxmatáta ngĩxũ cuzũtanũ i guxcũ i dũẽru i nũxũ ngĩxũ cungetanũcũ. [Rũ aixcũma ngẽxgumarũũ tá cumaã nanaxũ ya Tupana ega tama namaã cunamexẽẽxgu i curũ maxũ —ñanagũrũ ga Ngechuchu.]

13

Wũxi i mexũ nixĩ na nũxũ rũxoexũ i tacũma i chixexũ

¹ Rū yexgumatama Ngechuchuxūtawa nangugū ga ñuxre ga duñxūgū. Rū Ngechuchumaã nūxū nixugū ga na ñuxācū āēxgacū ga Piratu namuxū ga norū churaragū na nadaiāxūcèx ga ñuxre ga yatūgū ga Gariréaanecūāx ga yexguma yema yatūgū rū Tupanacèx carneru nadaixgu tupauca ga taxūnewa. ² Rū Ngechuchu nūxna naca rū ñanagürü nūxū: —¿Pema nagu perūxīnūēgu rū yemaācū nūxū nangupetū ga yema yatūgū, yerū yema togū ga Gariréaanecūāxārū yexera nipecaduāxgū? ³ —Pemaã nūxū chixu rū tama nixī. Rū ngēxguma chi pema rū tama nūxū perūxoegu i pecūma i chixexū, rū guxāma i pema rū tá ta ipeyarūtauxe. ⁴ —¿Rū ēxna pema nagu perūxīnūēgu rū guxū ga Yerucharéūcūāxārū yexera nipecaduāxgū ga yema 18 ga yatūgū ga yuexū ga yexguma Chiruéwa yexmaxū ga dauxūtaechica naetū rüngutaūgu? ⁵ —Pemaã nūxū chixu rū tama nixī. Rū ngēxguma chi pema rū tama nūxū perūxoegu i pecūma i chixexū, rū guxāma i pema rū tá ta ipeyarūtauxe —ñanagürü ga Ngechuchu.

Ore ga nanetū ga iguera ga ngearū òðxūgu ixuxū

⁶ Rū nūma ga Ngechuchu rū nūxū nixu ga wūxi ga ore ga igueragu ixuxū, rū ñanagürü: —Rū wūxi ga yatū nūxū nayexma ga wūxi ga ubanecū. Rū yexma nanato ga wūxi ga iguera. Rū nūma ga guma yatū rū inayadauuxū ga yema iguera rū ngoxi naxōō, natürü taxuxūma ga norū oxū inayangau. ⁷ —Rū yemacèx yema norū duñxū ga norū naānena dauxūxū ñanagürü:

“Dücèx, tomaēxpūx ya taunecū guxūguma íchayadauxū i ñaã iguera, rū taguma naxo. Rū ngēmacèx chanaxwèxe na cuyadaxūchixū na tama natücèxma nuã naānena naxīaneāxūcèx”, ñanagürü nūxū. ⁸ —Natürü ga yema norū duñxū ga norū naānena dauxū, rū norū corixū nangāxū, rū ñanagürü:

“Pa Corix, ¡nūetama doma taunecūxicatama nangēmèx! Rū tá chanaxaimūānepūne rū waxmūānexūmaã tá chanagüpūne. ⁹ —Rū bexmana ngēxguma rū tá naxo. Natürü ngēxguma tāūtāma naxoxgu rū tá chayadaxūchi”, ñanagürü.

Ngechuchu rū ngūxchigaarū ngunexūgu ngīxcèx nayataanexēē ga wūxi ga ngecū ga pūcèxwecū

¹⁰ Rū wūxi ga ngūxchigaarū ngunexūgu rū Ngechuchu nanguxēētae ga wūxi ga ngutaquēxepataūwa. ¹¹ Rū yéma iyexma ga wūxi ga ngecū ga 18 ga taunecū idaawecū. Rū ipūcèxwe yerū wūxi ga ngoxo ngīxū napūcèxwexēē, rū taxuacūma iyarūwēxāchi. ¹² Rū yexguma Ngechuchu ngīxū dēu_xgu rū ngīxcèx naca, rū ñanagürü ngīxū: —Pa Ngecūx, ñuxma rū marū cuxcèx nitaane i curū daawewa —ñanagürü. ¹³ Rū yexguma rū ngīxū ningōgū, rū yexgumatama iyarūwēxāchiwemūxū, rū inaxūgū ga Tupanaxū na yacuèxūxū. ¹⁴ Natürü yema ngutaquēxepataūārū āēxgacū rū nanu, yerū Ngechuchu rū ngūxchigaarū ngunexūgu ngīxū narūmexēē ga yema nge. Rū yemacèx ga yema āēxgacū rū ñanagürü duñxūgūxū: —Nangēxma i 6 i ngunexū i nagu namexū na ipuracūexū. Rū ngēma ngunexūgūgu nixī i namexū na nuã pexīxū na pegū peyarūmexēēgūxūcèx rū tama i ngūxchigaarū ngunexūgu —ñanagürü. ¹⁵ Rū yexguma ga Cori ga Ngechuchu rū nanangāxū, rū ñanagürü: —Pa Duñxūgūx, pema rū togū i duñxūgūpēxewa meã pemaxēneta, natürü peāēwa rū chixexūgu perūxīnūē. ¿Tama ēxna guxā i pema rū ngūxchigaarū ngunexūgu peyawēxū i perū woca rū ēxna perū buru na peyaxaxexēēgūxūcèx? ¹⁶ —Rū ñaã ngecū rū Abráūtanūxū iyixī, rū Chataná rū 18 ya taunecū ngīxū nachixexēē namaã i ñaã daawe. ¿Rū taux ēxna i namexū na ngīxcèx chayataanexēēxū i ngūxchigaarū ngunexūgu? —ñanagürü. ¹⁷ Rū yexguma yema ñaxgu ga Ngechuchu, rū guxūma ga norū uwanūgū rū poraācū naxāneē. Natürü guxūma ga togū ga duñxūgū rū nataāēgū ga yexguma nūxū nadaugūgu ga yema mexūgū ga Ngechuchu uxū.

*Ore i motacha- chiregu ixuxū
(Mt 13.31-32; Mr 4.30-32)*

18 Rū ñanagürü ga Ngechuchu: —¿Ñuxãcü nixĩ i ãëxgacü na yĩxũ ya Tupana, rü nañuxraũxũ i nüma ãëxgacü íyĩxũwa? ¿Rü tacügu tá chanangu? 19 —Maneca wüxi ya motachachire ya wüxi ya yatü nañegu toxünerüũ nixĩ. Rū woo naxíraxüchichirëx ya naxchire natürü narüxü, rü naya ñuxmata wüxi i nanetü i taetaxũ nixĩ. Rū ngëmacëx i werigü rü natanügu nixüachiãũ —ñanagürü.

Ore i pãũãrũ puxëëruũgu ixuxũ
(Mt 13.33)

20 Rū ñanagürü ta ga Ngechuchu: —¿Ñuxãcü nixĩ i Tupana ãëxgacü íxĩxũwa? ¿Rü tacügu tá chanangu? 21 —Rü pãũãrũ puxëëruũrũ nixĩ na guxüwama nanguxũ. Erü wüxi i ngecü rü íraxũ- tama i pãũãrũ puxëëruũmaã inaxüéũ i taxũ i ngĩrũ pãũchara. Rū ngëma pãũãrũ puxëëruũ rü woo naxíra rü nayapuxëë i guxüma i ngĩrũ pãũchara —ñanagürü ga Ngechuchu.

Ïãx i íraxüchiga
(Mt 7.13-14, 21-23)

22 Rū inixüchigü ga Ngechuchu ga Yerucharéũwa na naxüxũ. Rū yexguma namagu yaxüxgu rü ñanegüwa rü ñanexãcügüwa nixüpetüchigü, rü yéma nayangüexëëtanü ga duũxügü. 23 Rū wüxi ga duũxü nüxna naca rü ñanagürü: —Pa Corix ¿noxretátama nixĩ i ngëma nayauxgüxũ i maxü i taguma gúxü? —ñanagürü. Rū nüma ga Ngechuchu nanangãxũ, rü ñanagürü: 24 —Daxüguxũ i naãneãrũ Ïãx rü naxíraxüchi. ¿Rü paxa naxcëx pedau na nawa pichocuxüçëx! Erü pemaã nüxü chixu rü muxüchixüma i duũxügü tá nüxü nangüchaũ na nawa yachocuxü, natürü tãütáma nawa nichocu. 25 —Erü ngëxguma Ïãrũ yora marü nawãxtagu i Ïãx, rü pema i düxëtüwa ngëxmagüxe rü tá penatutuãũ. Rū ñaperügügü tá:

“Pa Corix, ¿paxa toxcëx yawãxna i Ïãx!” ñaperügügü tá. Natürü nüma i cori rü tá pexü nangãxũ, rü ñanagürü tá:

“Tama pexü chacuèx na ngextácüÏãx pixĩgüxũ”, ñanagürü tá pexü. 26 —Rü ngëxguma rü tá ñaperügügü nüxü:

“Cumaãchirëx wüxiwa tachibüe rü taxaxegü. Rü toxü cungüexëë ga torü ñaneãrũ ítamüğüwa”, ñaperügügü tá. 27 —Natürü nüma rü tá pexü nangãxũ rü ñanagürü tá: “Marü pemaã nüxü chixu rü tama pexü chacuèx na ngextácüÏãxgü pixĩgüxũ. ¿Rü ípixĩ i nuã chauxütawa i guxãma i pemax, Pa Chixri Maxëxüx!” ñanagürü tá. 28 —Rü ngema tá pexauxe, rü tá pixüxchapütägü i ngëxguma nüxü pedëuxgu i Abráũ rü Ichaá rü Acobu rü guxüma i Tupanaãrũ orearü uruügü na Tupana ãëxgacü íxĩxũwa na nangëxmagüxũ rü pema rü nüxna na ípewoxüxũ. 29 —Erü guxüwatáma ne naxĩ i duũxügü. Rü Tupana ãëxgacü íxĩxũwa tá nangëxmagü. Rü ngëma tá narütogü na ngëma nachibüexüçëx. 30 —Rü tá nangëxma i nümaxü i ñoma i naãnewa duũxügü nüxü oexü, natürü daxüguxũ i naãnewa rü Tupana tá wixpëxewa nanaxügüxëë. Rü tá nangëxma i nümaxü i ñoma i naãnewa duũxügü nüxü icuèxüügüxũ, natürü daxüguxũ i naãnewa rü Tupana rü tá wixweama nanaxügüxëë —ñanagürü ga Ngechuchu.

Ngechuchu rü YerucharéüçüÏãx ga duũxügüçëx naxaxu
(Mt 23.37-39)

31 Rū yematama ga ngunexügu rü Ngechuchuxütawa nangugü ga ñuxre ga Parichéugü. Rū ñanagürügü Ngechuchuxü: —¿Íixü i nuã! Erü ãëxgacü ya Erode rü cuxü nimëxéga —ñanagürügü. 32 Natürü nüma ga Ngechuchu nanangãxũ rü ñanagürü: —¿Naxütawa pexĩ i ngëma yatü i nüxü cuèxüchixü na ñuxãcü duũxügüxũ nawomüxëëxũ, rü namaã nüxü pixu rü ñuxma rü moxü rü tá íchana- woxü i ngoxogü, rü tá chanameëxëë i ngëma duũxügü i idaaweexü, rü pëxmaãcü tá chanaguxëë! 33 —Natürü chanaxwëxe i ichixüchigü i ñuxma rü moxü rü paxmaãcü ñuxmatáta Yerucharéũwa changu.

Erü Yerucharéügu nixĩ i na nayuexũ i guxũma i Tupanaãrũ orearũ uruügu. ³⁴ — Rũ dücax, Pa Yerücharéüçüãx, pema peyadaietanũ i Tupanaãrũ orearũ uruügu, rũ nutamaã ípenamuxũchigũ i Tupanaãrũ orearũ ngeruügu i pexcèx núma namugũxũ. Rũ ñuxreëxpüxcüna wüxigu chaugũxũtagu pexũ chanutaquëxexëëchaũ, ñoma wüxi i ota ya naxãcüãx nügütüügu tüxũ nutaquëxexürüũ. Natürü pema rũ tama penaxwèxe. ³⁵ — Dücèx i ñuxma ya perü ñãne, rũ Tupana tá ínanatèx. Rũ pemaã nüxũ chixu rũ täütáma wena choxũ pedau ñuxmatáta daxũguxũ i naãnewa ne chaxũ. Rũ ngëxguma rũ tá choxũ pedau rũ tá ñaperügügu:

“Namexëchi nixĩ ya yima Cori ya Tupana núma namucü”, ñaperügügu tá —ñanagürü ga Ngechuchu.

14

Ngechuchu rũ naxcèx nayataanexëë ga wüxi ga yatü ga rüchaxünexũ

¹ Rũ wüxi ga ngüxchigaarũ ngunexügu rũ Ngechuchu rũ wüxi ga Parichéupatawa nayachibü. Rũ yéma nayexmagü ga togü ga Parichéugü ga yéma bexma Ngechuchuxũ ngugüexũ. ² Rũ yéma nayexma ta ga wüxi ga yatü ga idaawexũ ga rüchaxünexũ. ³ Rũ yexguma ga Ngechuchu rũ yema ngüxëëruügu ga Moíchéarũ mugüwa ngüxëëtaegüxüna rũ Parichéugüna naca, rũ ñanagürü: —¿Tama penachuxuxũ ega ngüxchigaarũ ngunexügu chanamexëëxgu i wüxi i idaawexũ? —ñanagürü. ⁴ Natürü ga nümagü rũ nangeëxgümare. Rũ yexguma ga Ngechuchu rũ naxmëxgu nayayauxãchi ga yema idaawexũ, rũ nanamexëë. Rũ namaã nüxũ nixu ga na íyaxüxüçèx. ⁵ Rũ Ngechuchu rũ ñanagürü Parichéugüxũ: —¿Texé i pema i ngëxguma perü buru rũ ëxna perü woca puchugu nagoxgu, rũ taux ëxna i ngëxgumatama ípeyadauxũ rũ ípe- yatüãchixũ i woo ngüxchigaarũ ngunexügu? —ñanagürü. ⁶ Rũ nümagü rũ taxuũmaãma nanangãxügu.

Duüxügu ga ngügarü petawa nüxna naxugüxüchiga

⁷ Rũ yexguma mechawa natogüchaügu ga yema nüxna naxugüxũ, rũ Ngechuchu nüxũ nadau na wüxichigü rũ ñãrũ yoraxütawaxüchi natoxchaüxũ. Rũ yexguma yemaxũ nadëuxgu rũ nayaxucüxëgü, rũ ñanagürü: ⁸ —Ngëxguma texé cuxna uxgu i wüxi i ngügarü petawa, rũ tama name i petaarü yoraxütawaxüchi üxũ i naxmëxwëxewa cuyarüto. Erü yixcüra ngürüãchi tá ínangu i to i nüxna naxuxũ i curü yexeraxüchi ixĩxũ. ⁹ —Rũ ngëma petaarü yora i pexna uxũ, rũ tá cumaã nüxũ nayarüxu na icuchixüçèx i ngëma nachicawa na ngëma natoxëëãxüçèx i ngëma to i curü yexera ixĩxũ. Rũ ngëxguma i cuma rũ poraãcü cuxãneãcüma rũ nawa iyacuáxũ i naxmëxwëxewa tá cuyarüto. ¹⁰ — Rũ narümemaë ega texé cuxna uxgu, rũ nawa iyacuáxũ i naxmëxwëxewa curüto. Rũ ngëxguma i ngëma petaarü yora i cuxna uxũ rũ ñanagürü tá cuxũ:

“Pa Chomücüx, ¡nuã chauxütawa yarüto!” ñanagürü tá cuxũ. Rũ ngëmaãcü ngëma petaarü yora rũ wüxi i mexũ tá cumaã naxü napëxewa i guxũma i duüxügu i nüxna naxuxũ i cumaã ngëma rütogüxũ. ¹¹ —Erü texé ya tügü írütaxe rũ Tupana tá tüxũ naxãnexëë. Natürü texé ya tügü íruxíraxe rũ Tupana tá tüxũ nicuëxüũ —ñanagürü ga Ngechuchu. ¹² Rũ ñanagürü ta ga Ngechuchu nüxũ ga yema yatü ga nüxna uxũ: —Rũ ngëxguma wüxi i õnacèx rũ ëxna petacèx texéna cuxuxchaügu, rũ tama name i nüxna cuxu i cumücügü, rũ bai i cueneëgü, rũ bai i cutanüxügu, rũ bai i curü ngaicamagu pegüxũ i duüxügu i díeruãxgüxũ. Erü nümagü rũ tá nüxĩ cuxna naxugüe, rũ ngëmaãcü tá cuxũ nanaxütanügü. ¹³ —Natürü ngëxguma wüxi i peta cuxüxgu, rũ narümemaë nixĩ i nüxna cuxu i duüxügu i ngearü díeruãxgüxũ, rũ duüxügu i taxucürüwama puracüexũ, rũ ngëma ichixeparagüxũ, rũ ngëma ingexetügüxũ. ¹⁴ —Rũ tá cutaãëxüchi i ngëxguma erü nümagü rũ taxucürüwa cuxũ nanaxütanügü. Natürü tá cunayaxu i curü natanü i ngëxguma wena namaxëgu i Tupanaãrũ duüxügu i mexũ —ñanagürü.

Ore i taxũ i õnagu ixuxũ
(Mt 22.1-10)

¹⁵ Rũ yexguma yemaxũ naxĩnũgu ga wũxi ga yatũ ga mechawa rũtoxũ rũ Ngechuchuxũ ñanagũrũ: —Rũ tataãe ya yixema Tupana ãẽxgacũ íxixũwa chibũxe —ñanagũrũ. ¹⁶ Rũ yexguma ga Ngechuchu rũ ñanagũrũ nũxũ: —Wũxi ga yatũ nanaxũ ga wũxi ga õna ga taxũ. Rũ norũ duũxũxũ namu na nũxna yaxuxũcẽx ga muxũma ga duũxũgũ. ¹⁷ —Rũ yexguma marũ namexgu ga norũ õna, rũ wena norũ duũxũxũ namu na yema duũxũgũ ga marũ nũxna naxugũxũmaã nũxũ na yanaxuxũcẽx ga marũ na namemarexũ ga norũ õna, rũ paxa yẽma na naxĩxũcẽx. ¹⁸ —Natũrũ guxũma ga yema nũxna naxugũxũ, rũ inanaxũgũ ga nũgũ na ínaxuegũxũ. Rũ yema nũxĩra nũxna naxu rũ ñanagũrũ:

“Ngexwacaxtama naxcẽx chataxe i wũxi i naãne. Rũ paxa tá íchayadau. ¡Rũ namaã nũxũ ixu i cori rũ taxucũrũwama ngẽma chaxũ!” ñanagũrũ. ¹⁹ —Rũ ga yema to rũ ñanagũrũ:

“10 i wocagũ i puracũruũcẽx chataxe, rũ tá ngẽmaxũ chayaxũ. ¡Rũ namaxã nũxũ ixu i cori rũ taxucũrũwama ngẽma chaxũ!” ñanagũrũ. ²⁰ —Rũ ga to rũ ñanagũrũ:

“Ngexwacaxtama chaxãmẽx rũ ngẽmacẽx taxucũrũwama ngẽma chaxũ”, ñanagũrũ. ²¹ —Rũ yexguma nataegugu ga yema coriarũ duũxũ, rũ norũ corimaã nũxũ nixu ga guxũma ga yema ore. Rũ yexguma ga norũ cori rũ nanu, rũ ñanagũrũ nũxũ ga norũ duũxũ:

“¡Paxa ngẽma ítamũgũ i taxũwa rũ ítamũacũgũwa naxũ, rũ nuã nagagũ i ngẽma duũxũgũ i ngearũ dũeruãxgũxũ, rũ ngẽma duũxũgũ i taxucũrũwama puracũexũ, rũ ngẽma ichixeparagũxũ, rũ ngẽma ingexetũgũxũ!” ñanagũrũ. ²² —Rũ yixcamaxũra ga yema norũ cori namaã nũxũ ixuxũ naxũxguwena rũ yema norũ duũxũ ñanagũrũ nũxũ:

“Pa Corix, marũ chanaxũ i ngẽma chomaã nũxũ quixuxũrũũ, natũrũ naxãchicaaneãmatama i nuã cupatawa”, ñanagũrũ. ²³ —Rũ yexguma ga norũ cori rũ ñanagũrũ nũxũ:

“¡Paxa ngẽma nama i taxũgũwa rũ nama i íraxũgũwa naxũ, rũ nuã nagagũ i togũ i duũxũgũ na nuxã chopatagu nachocuxũcẽx, rũ ngẽmaãcũ na naxããcuxũcẽx ya daa chopata! ²⁴ Erũ pemaã nũxũ chixu rũ taxuũma ga yema nũxĩra nũxna chaxuxũ rũ nuã chorũ õnawa tá nachibũe”, ñanagũrũ.

Tama natauxcha na Cristuwe rũxũxũ
(Mt 10.37-38)

²⁵ Rũ muxũchixũma ga duũxũgũ Ngechuchuwe narũxĩ. Rũ nadauegu ga Ngechuchu, rũ ñanagũrũ nũxũ: ²⁶ —Rũ ngẽxguma texé chowe rũxũxchaũgu, rũ tanaxwẽxe i choxũ tangechaũ tũmanatũarũ yexera, rũ tũmaẽãrũ yexera, rũ tũmamẽxãrũ yexera, rũ tũmaxãcũgũarũ yexera, rũ tũmaẽneẽgũarũ yexera, rũ tũmaẽyẽxgũarũ yexera, rũ tũmaãrũ maxũãrũ yexera rũ ta. Rũ ngẽxguma tama ngẽmaãcũ choxũ tangechaũgu rũ taxucũrũwama aixcũma chorũ ngũexũ tixĩ. ²⁷ —Rũ yixema tama naxwẽxexẽ na chaugagu ngũxũ tingeãcũma chowe tarũxũxũ, rũ taxucũrũwama chorũ ngũexũ tixĩ. ²⁸ —Rũ ngẽxguma chi wũxie i petanũwa rũ wũxi ya ípata ya taxũne taxũxchaũgu, ¿rũ tama õxna i noxri i tanangugũxiraxũ na ñuxre i dũeru tá nagu ngĩxũ ítatãxũ? Rũ ngẽmawa nũxũ tacuẽx rũ marũ tũxũ iyangu i ngẽma tũmaãrũ dũeru i tũxũ ngẽxmacũ na tayanguxẽẽxũcẽx ya yima í. ²⁹ —Erũ ngẽxguma chi tama meã tanangugũgu i tũmaãrũ dũeru na ñuxregu tá naxãtanũxũ ya yima í, rũ norũ caxtaxica chi itapugũgu rũ yixcũra rũ taxucũrũwa chi tanaguxẽẽgu i ngẽma puracũ, rũ guxũma i duũxũgũ i nũxũ daugũxũ i ngẽma tũmaãrũ puracũ rũ tá tũxũ nacugũe. ³⁰ —Rũ ñanagũrũgũ tá:

“Ngẽma yatũ inanaxũgũ na naxũpataxũ, natũrũ taxucũrũwama nayanguxẽẽ”, ñanagũrũgũ tá. ³¹ —Rũ ngẽxguma wũxi i nachiũãneãrũ ãẽxgacũ rũ to i nachiũãneãrũ ãẽxgacũmaã nũgũ nadaixchaũgu, ¿rũ tama õxna i noxri inangugũãxũ rũ ngoxi 10,000 i churaragũ rũ yangu na nũgũ nadaixũcẽx namaã i norũ uwanũ i 20,000 i churaragũ nũxũ ngẽxmaxũ? ³² —Rũ ngẽxguma nangugũãgu na tama yanguxũ i norũ churaragũ rũ, ¿taux

ẽxna i ngẽxguma yaxũwa nangẽxmagutama i norũ uwanũ, rũ naxũtawa namugũãxũ i norũ orearũ ngeruũgũ, rũ namaã nũxũ na yanaxugũexũcèx na nũgũmaã nangũxmũexũ?
³³ —Rũ ngẽxgumarũũ tá ta nixĩ i pemax, erũ ngẽxguma ngexerũxũxe i petanũwa tama ngema tanawogũgu i guxũma i tũxũ ngẽxmaxũ na chowe tarũxũxũcèx, rũ taxucũrũwama aixcũma chorũ ngũexũ tixĩ.

Ngẽxguma nangeacagu ya yucũra rũ taxuwama name
(Mt 5.13; Mr 9.50)

³⁴ —Pema rũ ñoma yucũrarũũ pixĩgũ i ñoma i naãnewa, erũ yima yucũra rũ õna na namexẽẽxũrũũ rũ pema rũ ñoma i naãnecũãx i duũxũgũtanũwa rũ norũ mexẽẽruũ pixĩgũ. Name ya yucũra. Natũrũ ngẽxguma chi nangeacagu, ¿rũ ñuxãcũ tá wenaxãrũ naxããca?
³⁵ —Rũ taxuwama name. Rũ woo waixũmũãrũ waxmũãnexẽẽruũcèx rũ tama name. Rũ ítanatẽxmare. Rũ yĩxema aixcũma ãchixẽxẽ, ¿rũ name nixĩ i nagu tarũxĩnũẽ i ñãã ore! —ñanagũrũ.

15

Ore i carneru i iyarũtaxuxũgu ixuxũ
(Mt 18.10-14)

¹ Rũ guxũma ga yema yatũgũ ga Dumaãrũ ãẽxgacũcèx dũẽru ngĩxũ ideetanũxũ, rũ togũ ga duũxũgũ ga chixexũ ga nacũmagu íxũ, rũ Ngechuchucèx naxĩ na iyanaxĩnũẽxũcèx ga norũ ore. ² Rũ yemacèx ga Parichéugũ rũ ngũexẽẽruũgũ ga Moĩchearũ mugũwa nguxẽẽtaegũxũ, rũ Ngechuchuxũ nixugũe, rũ ñanagũrũgũ: —Ñãã yatũ rũ norũ me nixĩ i pecaduãxgũxũmaã na naxãmũcũxũ, rũ namaã na nachibũxũ —ñanagũrũgũ. ³ Rũ yexguma ga Ngechuchu rũ ñãã ore ga cuèxruũxũ namaã nixu, rũ ñanagũrũ: ⁴ —¿Texé i petanũwa rũ ngẽxguma tũxũ nangẽxmagu i 100 i tũmaãrũ carnerugũ rũ wũxi tũxũ iyarũtauxgu, rũ taux ẽxna i nachitaũwa tanawogũxũ i ngẽma 99, rũ naxcèx tayadauxũ i ngẽma tũxũ iyarũtaxuxũ ñuxmata nũxũ itayangau? ⁵ —Rũ ngẽxguma nũxũ itayangèuxgu rũ taãẽãcũma tũgũãtũgu tayagaxũ. ⁶ —Rũ ngẽxguma tũmapatawa tanguxgu, rũ tanangutaquẽxexẽẽ i tũmamũcũgũ, rũ duũxũgũ i tũmaãrũ ngaicamagu pegũxũ, rũ ñatagũxũ nũxũ:

“¿Wũxigu chomaã petaãẽgũ, Pa Chomũcũgũx! Erũ marũ nũxũ ichayangau i ngẽma chorũ carneru ga iyarũtaxuxũ”, ñatagũxũ nũxũ. ⁷ —Rũ pemaã nũxũ chixu rũ ngẽxgumarũũ ta nataãẽgũ i daxũcũãx i ngẽxguma nangẽxmagu i 99 i duũxũgũ i mexũgũ i marũ Tupanaãrũ ixĩgũxũ, natũrũ yexeraãcũ nataãẽgũ i ngẽxguma wũxi i duũxũ i pecaduãxũ nũxũ rũxoxgu i nacũma i chixexũ rũ Tupanaãxũ yaxõõgu —ñanagũrũ.

Ore ga dũẽru ga iyarũtauxcũgu ixuxũ

⁸ Rũ Ngechuchu rũ wũxi ga to ga ore ga cuèxruũxũ nixu, rũ ñanagũrũ: —Ngẽxguma chi wũxi i ngecũaxũ nangẽxmagu i 10 tachinũ i dũẽru, rũ wũxi ngĩxũ iyarũtauxgu, ¿rũ taux ẽxna i omũwa nangixichiãxũ rũ nabixichiãxũ ya ngĩpata, rũ meãma ngĩxcèx nadauxũ ñuxmata ngĩxũ iyangau? ⁹ —Rũ ngẽxguma ngĩxũ iyangauxgu, rũ inangutaquẽxexẽẽ i ngĩmũcũgũ i ngexũgũ rũ ngĩtanũxũgũ i ngĩrũ ngaicamagu pegũxũ, rũ ngĩxũ nũxũ:

“¿Wũxigu chomaã petaãẽgũ, Pa Chomũcũgũx! Erũ marũ ngĩxũ ichayangau i ngẽma chorũ dũẽru ga iyarũtauxchirẽxcũ”, ngĩxũ. ¹⁰ —Rũ pemaã nũxũ chixu rũ ngẽxgumarũũ ta nataãẽgũ i daxũcũãx i Tupanaãrũ orearũ ngeruũgũ i ngẽxguma wũxi i duũxũ i pecaduãxũ nũxũ rũxoxgu i nacũma i chixexũ rũ Tupanaãxũ yaxõõgu —ñanagũrũ ga Ngechuchu.

Ore ga wũxi ga ngextũxũcũ ga nanatũna ixũcũgu ixuxũ

¹¹ Rũ ñanagũrũ ta ga Ngechuchu: —Nayexma ga wũxi ga yatũ ga taxre ga nane nũxũ yexmacũ. ¹² —Rũ guma rũbũmaẽcũ, rũ nanatũxũ ñanagũrũ:

“Pa Pa, ¿choxna naxã i ngẽma curũ ngẽmaxũgũ i choxna ùxũ!” ñanagũrũ. Rũ yexguma ga nanatũ rũ yema taxre ga nanemaã nayatoye ga norũ yemaxũgũ. ¹³ —Rũ ñuxre ga

ngunexüguwena rü guma nane ga rübumaëcü rü nananutaquëxe ga guxüma ga norü yemaxügu rü namaã nataxe. Rü yema dïërumaã rü to ga nachiuãnewa naxü. Rü chixri yéma namaxü, rü yemaäcü ngixü naguxëë ga guxcüma ga norü dïëru. ¹⁴ —Natürü yexguma marü ngixü naguxëëguwena ga guxcüma ga norü dïëru, rü poraäcü nataxu ga òna ga yema nachiuãnewa. Rü yemacèx ga guma ngextüxcü rü inanaxügu ga taiya nüxü na ngúxü. ¹⁵ —Rü yexguma rü norü puracücèx nadau naxütagu ga wüxi ga yatü ga yema nachiuãnecüãx. Rü nüma ga yema yatü rü norü naãnewa nanamu na yéma norü cuchigüna yadauxcèx. ¹⁶ —Rü düxwa nüxü nachixéga ga yema cuchiwemü, yerü poraäcü nataiyaxüchi. Natürü taxüema òna nüxna taxã. ¹⁷ —Rü yexguma naãewa nagu narüxñü, rü ñanagürü:

“¿Ñuxre i chaunatüarü puracütanüxü rü nüxü nangëxma i òna rü nüxü ínayaxü? Rü choma i nuã rü taiyamaã tá nuxma chayü. ¹⁸ —Rü chaunatücèx tá chataegu, rü ñachagürü tá tüxü: ‘Pa Papax, marü chixexü Tupanapewa chaxü rü cupewa rü ta. ¹⁹ —Rü tama marü chame na Chaune, ñacuxü choxü. ¡Rü wüxi i curü puracütanüxüxü choxü ixixëë!’ ñacharügü tá tüxü ya chaunatü”, ñanagürü. ²⁰ —Rü inaxüãchi rü nanatüpatacèx nataegu. Rü yexguma yangaicagu ga nanatüpata, rü yaxügu nüxü tadau ga nanatü, rü tüxü nangechaütümü. Rü naxcèx tiña, rü nüxna tanëixächi, rü nüxü tachúxu. ²¹ —Rü yexguma ga nüma ga tümane rü ñanagürü tüxü:

“Pa Papax, marü chixexü Tupanapewa chaxü, rü cupewa rü ta. Rü ngemacèx marü tama name na ‘Chaune’ ñacuxü choxü”, ñanagürü. ²² —Natürü tüma ga nanatü rü tümaärü duüxügüxü ñatarügü:

“¡Paxa nuã penange i naxchiru i mexëchixü rü peyacüxcuchix! ¡Rü wüxi i anera ta naxmëxwa ngixü pingëxcuchix! ¡Rü chapatu rü ta nuãta penge, rü peyacuaixcuchix! ²³ —¡Rü peyayaxux i ngëma wocaxacü i rüngümaexü, rü peyamá, rü ngixã namaã tachibüe rü tapetae! ²⁴ —Erü daa chaune rü chauxcèx rü marü nayu, natürü maxücü chauxcèx ínangu. Rü marü inayarütauxchirëx, rü wenaxärü nangox”, ñanagürü. Rü yexguma inanaxügüe ga na napetaegüxü. ²⁵ —Rü yoxni ga guma nane ga rüyamaëcü, rü naãnewa nayexma. Rü yexguma nataegugu rü marü ñarü ngaicamana nangugu, rü nüxü naxñü ga na ínapaxetagüxü rü íyaxüãchitanüxüxü. ²⁶ —Rü wüxi ga nanatüarü duüxcèx naca, rü nüxna naca ga tacü na ínaxüexü ga íwa. ²⁷ —Rü yema nanatüarü duüxü rü nanangãxü, rü ñanagürü: “Cueneë rü marü ínangu. Rü ngëmacèx cunatü toxü tamu na tayamáxcèx i ngëma wocaxacü i rüngümaexü, erü cueneë rü mecü ínangu rü tama nidaawe”, ñanagürü nüxü. ²⁸ —Natürü ga guma naëneë ga rüyamaëcü rü nanu, rü tama ígu naxücuchaü. Rü yemacèx düxwa ga nanatü rü naxcèx ítaxüxü, rü nüxü tayacèxü na yaxücüxcèx. ²⁹ —Rü nüma rü ñanagürü tüxü ga nanatü:

“Cuma nüxü cucuèx i ñuxre ya taunecü cuxü chapuracü, rü taguma chixri cuga chaxñü. Rü bai i ñuxgu wüxicana wüxi i chibuxacü choxna cumu na chomücügümaã chapetaexcèx. ³⁰ —Natürü ñuxma na ínanguxü i ngëma cune i chixri curü dïëru ngixü guxëëxü nagu i ngexügü i ngëãëxü, rü naxcèx cuyamëx i ngëma wocaxacü i rüngümaexü”, ñanagürü. ³¹ —Rü yexguma ga nanatü rü ñatarügü nüxü:

“Pa Chaunex, cuma rü guxüguma chauxütawa cungëxma, rü guxüma i chorü ngëmaxügü rü cuxrü nixí. ³² —Natürü ñuxma rü name nixí na ipetaegüxü rü na itaãëgüxü erü cueneë ga guma chauxcèx rü marü yücü, rü maxücü taxcèx ínangu. Rü woo tüxna inayarütaxu, rü wenaxärü taxcèx nangox”, ñatarügü.

16

Ore ga yatü ga chixri norü coriarü yemaxüna dauxügu ixuxü

¹ Rü ñanagürü ta ga Ngechuchu norü ngüexügüxü: —Nayexma ga wüxi ga cori ga muärü yemaxüãxüchixü. Rü nüxü nayexma ga wüxi ga norü duüxü ga norü yemaxüärü dauruü. Natürü togü ga duüxügü rü norü corimaã nüxü nixügü na yema norü duüxü

rü chixri norü yemaxüna na nadauxü. ² —Rü yexguma ga yema cori rü yema norü duüxüçèx naca, rü ñanagürü nüxü:

“Dücèx, cuchigaxü chomaã nixugügü i duüxügü. ¿Rü tacü nixi i ngëma? ¡Rü chomaã nüxü ixu rü ñuxäcü nixi i curü puracü, erü marü täütáma chorü ngëmaxüârü dauruüxü cuxü chixixëê!” ñanagürü nüxü. ³ —Rü yexguma ga yema coriarü duüxü rü nagu narüxñü, rü nügüãëwa ñanagürü:

“¿Tacü tá chaxü i ñuxmax, erü chorü cori rü marü choxü ínatèxüchi i ngëma chorü puracüwa? Tama chapora na naãnewa chapuracüxüçèx, rü chaxãne na dïerucèx na íchaçaxü nüxna i togü. ⁴ —Rü marü nüxü chacuèx na tacü tá na chaxüxü na choxü nangëxmaxüçèx na texé tümapatawa choxü yaxuxü i ngëxguma changearü puracüãxgu”, ñanagürü. ⁵ —Rü yexguma nügüxütawa naxcèx naca ga wüxichigü ga yema duüxügü ga norü coriaxü yangetanügüxü. Rü yema nüxïra yéma naxütawa nguxüna naca, rü ñanagürü:

“¿Ñuxre i nüxü cungetanüxü i chorü cori?” ñanagürü. ⁶ —Rü nüma nanangãxü, rü ñanagürü:

“Nüxü chanangetanü i 100 i data i chixü”, ñanagürü. Rü yema coriarü duüxü rü ñanagürü nüxü:

“Ñãã nixi i popera i curü ngetanü nawa ngóxü. ¡Rü paxa írúto rü to i popera naxü, rü 50 i dataguxicatama naxü i curü ngetanü!” ñanagürü. ⁷ —Rü yemawena rü yema to ga duüxü ga norü coriaxü nangetanüxüna naca, rü ñanagürü:

“¿Cuma rü ñuxre yïxü i nüxü cungetanüxü i chorü cori?” ñanagürü. Rü nüma rü nanangãxü, rü ñanagürü:

“Nüxü chanangetanü i 100 i choca i trigu”, ñanagürü. Rü yema coriarü duüxü rü ñanagürü nüxü:

“Ñãã nixi i popera i curü ngetanü nawa ngóxü. ¡Rü paxa írúto rü to i popera naxü rü 80 i chocaguxicatama naxü i curü ngetanü!” ñanagürü. ⁸ —Rü norü cori rü nüxü nicuèxüüãma ga yema norü duüxü ga chixexü, yerü nüxü nadau ga ñuxäcü na naxãëxüchixü. Rü pemaã nüxü chixu rü ñoma i naãnecüãx i duüxügü, rü ngëma Tupanaãxü yaxögüxü i duüxügüarü yexera paxa naxcèx nadaugü na ñux- äcü nüxü natúxü i duüxügü. ⁹ —Rü pemaã nüxü chixu rü ngëma ñoma i naãne i chixexüwa pexü ngëxmaxü rü name nixi i ngëmamaã nüxü penangüchaüxëê i duüxügü na Tupanaxütawa nangugüxü. Rü ngëmaäcü i ngëxguma naguxgu i ngëma ñoma i naãnewa pexü ngëxmaxü rü peyuxgu, rü tá pexü nangëxma ya Penatü ya pexü yaxucü i daxüguxü i naãnewa. ¹⁰ —Yíxema meã namaã icuáxe ega woo noxretama tümamëxëwa ngëxmagu, rü ngëxguma muxüma tümamëxëwa ngëxmagu rü tá ta meã namaã itacuèx. Natürü yíxema chixri namaã icuáxe ega noxretama tümamëxëwa ngëxmagu, rü ngëxguma muxüma tümamëxëwa ngëxmagu rü ngëxgumarüü tá ta chixri namaã itacuèx. ¹¹ —Rü ngëxguma tama meã namaã ipecuèxgu i ngëma pexmëxwa ngëxmaxü i ñoma i naãne i chixexüwa, ¿rü texé tá pexmëxgu tanaxü i ngëma aixcüma mexü i Tupanaârü ixixü? ¹² —Rü ngëxguma tama meã namaã ipecuèxgu i ngëma Tupana pexna äxü i ñoma i naãnewa, ¿rü ñuxäcü tá pexna nanaxã i pechica i daxüguxü i naãnewa? ¹³ —Taxucürüwama i wüxi i duüxü rü nataxrearü coriãx. Erü wüxi i norü corichi rü tá naxai, rü ngëma to rü tá nüxü nangechaü. Rü ëxna wüxicèx rü tá meã napuracü rü ngëma to rü tá nüxü naxo. Rü pema rü taxucürüwama Tupanacèx pemaxë ega perü dïeruguxicatama perüxñüëgu —ñanagürü ga Ngechuchu. ¹⁴ Natürü ga yema Parichéugü rü poraäcü norü dïeruguama narüxñüë. Rü yemacèx Ngechuchuxü nacugüe ga yexguma nüxü naxñüëgu ga guxüma ga yema ore. ¹⁵ Rü yexguma ga Ngechuchu rü ñanagürü nüxü: —Pema nixi i duüxügüpëxewa meã pemaxënetaxü, natürü Tupana pexü nacuèx na tacügu perüxñüëxü. Rü woo duüxügü pexü nicuèxüügü naxcèx i ngëma pexüxü, natürü Tupana rü naãëwa nangux i ngëma —ñanagürü ga Ngechuchu.

Tupanaärü mugü ga Moïché ümatüxü rü ñuxäcü äëxgacü na yüxü ya Tupanachiga

¹⁶ Rü yexguma ga Ngechuchu rü ñanagürü: —Noxri nayexma ga Tupanaärü mugü ga Moïché duüxügüxü nguxëëxü, rü yema nguxëëtae ga nuxcümaüügüxü ga Tupanaärü orearü uruügü duüxügüxü namaã nguxëëxü. Natürü yexguma Cuáü ga baiüxëëruü ínguxguwena, rü marü duüxügümaã nüxü chixuchiga i Tupanaärü ore i mexü i ñuxäcü äëxgacü na yüxü. Rü ñuxma rü guxüma i ngëma duüxügü rü poraäcü nügü naporaexëë na yachocuxücèx i ngëma Tupana äëxgacü íxixüwa. ¹⁷ —Naxüpa na yanguxü i Tupanaärü mugü rü woo wüxi i mu i íramarexü yixügu, rü naguxchaxüchi na iyanaxoxü i ngëma nüxü yaxuxü. Natürü aixcüma narütauxchamaë nixü na iyanaxoxü i ñoma i naãne rü guxüma i ngëma daxüwa nüxü idauxü.

Ngechuchu namaã nangüexëëtae na tama namexü na texé tümamaxü ítáxü
(Mt 19.1-12; Mr 10.1-12)

¹⁸ —Ngëxguma wüxi ya yatü ítámèxgu rü naí i ngemaã naxãmèxgu rü Tupanapëxewa rü pecadu naxü. Rü texé ya yixema ngümaã ämaxë i wüxi i nge i ngíte ngixü ítëxcü, rü Tupanapëxewa rü tüma rü ta pecadu taxü.

Yatü i dïëruäxüchixüchiga rü Dácharuchiga

¹⁹ —Nayexma ga wüxi ga yatü ga dïëruäxüchixü ga guxüguma mexëchixü ga naxchirugu icüxü. Rü guxü ga ngunexügu rü taxüma ga òna naxü rü napetaexü. ²⁰ —Rü nayexma ta ga wüxi ga yatü ga ngearü dïëruäcü ga Dácharugu äegacü. Rü guxüguma yema dïëruäxüchixüpataèxwa nayarütooxü. ²¹ —Rü guma Dácharu rü nanangöxchaü ga yema ònatüchi ga yema yatü ga dïëruäxüchixüärü mechawa rüyüixü. Rü naxcèx naxü ga airugü, rü nanawearü oxriäxgü. ²² —Rü wüxi ga ngunexü nayu ga guma ngearü dïëruäcü, rü daxücüäx ga Tupanaärü orearü ngeruügü rü daxüguxü ga naãnewa nana-gagü na wüxiwa Abráümaã nayexmaxücèx. Rü nayu ta ga yema yatü ga dïëruäxüchixü, rü inayatèxgü ga duüxügü. ²³ —Rü ngëma nachica i Tupana ngoxogüxü nagu poxcuxüwa naxü ga yema yatü ga dïëruäxüchixü rü yéma poraäcü ngüxü ninge. Rü daxü nadau, rü yaxügu Abráüxü nadau na Dácharumaã wüxiwa nayexmaxü ga daxüguxü ga naãnewa. ²⁴ —Rü yexguma ga yema yatü ga dïëruäxüchichiréxü rü aita naxü rü ñanagürü:

“Pa Oxi Pa Abráüx, ¡cuxü changechaütümüü, rü nuã namu ya Dácharu na dexámaã nügü yawaixpëxemëxëäcüma choxü yanawaixpëxearü conüäxücèx! Erü poraäcü choxü nangux i nuã üxüwa”, ñanagürü. ²⁵ —Natürü Abráü rü ñanagürü nüxü:

“Pa Chaunex, ¡nüxna nacuëxächi na taxuüma cuxü taxuxü ga yexguma cumaüxgu! Natürü Dácharu rü poraäcü chixexü nüxü naxüpetü. Rü ngëmacèx i ñuxma rü nuã mexüwa nangëxma, rü cuma rü ngëma poxcuchicawa ngüxü quinge. ²⁶ —Rü ñuxüchi nangëxma i wüxi i taxüchixü i ngatexü i tórü ngäxüwa üxü. Rü ngëmacèx ega númacüäx ngëma íxchaügu, rü taxucürüwama ngëma naxü. Rü woo ngëmacüäx núma íxchaügu rü taxucürüwama núma naxü”, ñanagürü. ²⁷ —Rü yexguma ga yema yatü ga dïëruäxüchichiréxü rü ñanagürü:

“Cuxü chacèxü, Pa Oxi, Pa Abráüx, na chaunatüpatawa cunamuxücèx ya Dácharu. ²⁸ —Erü ngëma nangëxmagü ya wüximëëxpüx ya chaueneëgü. Rü chanaxwèxe na namaã nüxü na yanaxuxücèx na tama nuã ñaã poxcuchica i poraäcü choxü ínangüxüwa naxüxücèx”, ñanagürü. ²⁹ —Natürü ga Abráü rü ñanagürü nüxü:

“Cueneëgü nüxü nangëxma i Tupanaärü mugü ga Moïché ümatüxü rü yema ore ga nuxcümaüügüxü ga Tupanaärü orearü uruügü ümatüxü. Rü name nixü i ngëma orega na naxüñüëxü”, ñanagürü. ³⁰ —Rü yexguma ga yema yatü ga dïëruäxüchichiréxü rü Abráüxü nangäxü, rü ñanagürü:

“Ngëmaäcü, Pa Oxi, Pa Abráüx, natürü ngëxguma chi wüxi i duüxü i yuchiréxü ngëma üxgu rü namaã nüxü yanaxuxgu, rü chi nüxü narüxoe i nacüma i chixexü”, ñanagürü.

³¹ —Natürü Abráü, rü ñanagürü nüxü:

“Ngëxguma tama naga naxĩnũëgu ga yema ore ga Moïché ümatũxũ rü yema ore ga nuxcũmaũgũxũ ga Tupanaãrũ orearũ uruũgũ ümatũxũ, rü woo chi wüxi i marũ yuwa írũdaxũ i duũxũ ngema ũxgu, rü namaã nüxũ yanaxuxgu i ore, rü tãũ chima nüxũ nayaxõgũ”, ñanagürũ.

17

Naxãũcũma nixĩ na pecadugu inguxũ

(Mt 18.6-7, 21-22; Mr 9.42)

¹ Rü Ngechuchu rü norũ ngũexũgũxũ ñanagürũ: —Rü guxũgutãma nangëxma i tacũ i duũxũgũxũ pecaduãxëẽxũ. Natürũ wüxi i ngechaũ tá tũmacèx nixĩ ya yixema duũxë ya togũxũ pecadugu nguxëexë. ²⁻³ —Rü tũmacèx rü narũmemaë nixĩ na tũmanaxãwa yangacuchixũ ya wüxi ya nuta ya tacũ rü ngëmaãcũ taxtũwa tũxũ na itãexũ naxũpa na pecadugu tananguxëẽxũ i wüxi i chorũ duũxũ. ¡Rü ngëmacèx name nixĩ i pexuãëgũ i pemax! Rü ngëxguma wüxi i cueneë chixexũ cumaã ũxgu rü ¡meã naxuxcuxë! Rü ngëxguma nüxũ naxoxgu i nacũma i chixexũ rü ¡nüxũ nüxũ nangechaũ i ngëma! ⁴ —Rü woo 7 ëxpũxcũna chixexũ cumaã naxũxgu i wüxi i ngunexũgu, rü 7 ëxpũxcũna cuxna yacaxgu na nüxũ nüxũ cungechaũxũcèx, rü name nixĩ i nüxũ nüxũ cungechaũ —ñanagürũ ga Ngechuchu.

Ñuxãcũ tabora ega yaxõxgu

⁵ Rü norũ ngũexũgũ ga norũ orearũ uwa namugũxũ rü ñanagürũgũ: —Pa Corix, ¡toxũ rüngũxëẽ na yexeraãcũ tayaxõgũxũcèx! —ñanagürũgũ. ⁶ Rü yexguma ga Cori ga Ngechuchu rü ñanagürũ nüxũ ga norũ ngũexũgũ: —Rü ngëxguma chi woo naxĩraxũchigu i perũ õ, rü daa naĩ rü chi pega naxĩnũ ega ñapegũgu:

“¡Cugũ nabëx i nuã rü taxtũchiũgu cugũ yato!” ñapegũgu, rü chi pega naxĩnũ.

Wüxi i ngũxëẽruũãrũ puracũchiga

⁷ —Ngëxguma chi wüxie i petanũwa rü tũxũ nangëxmagu i wüxi i tũmaãrũ duũxũ i tũmaãnewa ne ũxũ i puracũwa rü ëxna carneruarũ dauwa, rü tama nũgũcèxira naxũwemũ. ⁸ —Natürũ norũ corixũxĩra naxũwemũ na nachibũxũcèx rü naxaxexũcèx, rü nüma rü yixcama nachibũ. ⁹ —Rü norũ cori rü tama moxë nüxna naxã na naxũwemũãxũcèx, erũ woetama ngëma nixĩ i norũ puracũ i ngëma norũ duũxũ. ¹⁰ —Rü ngëxgumarũũ tá pixĩgũ i pemax. Erũ ngëxguma ngëma Tupana pexũ ũxëẽxũxĩcatama pexũxgu, rü penaxwèxe i pegũ ñaperũgũgũ:

“Puracũtanũxũ i taxuwama mexũ tixĩgũ, erũ ngëma nawa tũxũ namuxũxĩcatama nixĩ i tinguxëẽxũ”, ñaperũgũgũ —ñanagürũ ga Ngechuchu.

Ngechuchu nanameëxëẽ ga 10 ga yatũgũ ga chaxũneãxgũxũ

¹¹ Rü yexguma namagu yaxũxgu ga Ngechuchu ga Yerucharéũwa na naxũxũ, rü Chamãriaane rü Gariréaane nũgũmaã íxũyexũwa naxũpetũ. ¹² Rü yexguma wüxi ga ñãnexãcũwa nanguxgu, rü yexma napëxegu nayayi ga 10 ga yatũgũ ga chaxũnemaã idaaweexũ. Rü yaxũgu nüxũ nachigũ. ¹³ Rü tagaãcũ ñanagürũgũ nüxũ: —Pa Ngechuchux, Pa Ngũexëẽruũx, ¡cuxũ tangechaũtũmũũgũ! —ñanagürũgũ. ¹⁴ Rü yexguma Ngechuchu nüxũ dëuxgu, rü ñanagürũ nüxũ: —¡Yéa paigũxũtawa pexĩ, rü nüxũ pegũ peyawëxgũ! —ñanagürũ. Rü yexguma namagu naxĩyane, rü naxcèx nitaanetanũ ga yema yatũgũ. ¹⁵ Natürũ natanũwa rü nayexma ga wüxi ga Ngechuchucèx taeguxũ ga yexguma marũ nũgũ nadëuxgu ga naxcèx na yataanexũ. Rü tagaãcũ Tupanaxũ nicuèxũũchigũ. ¹⁶ Rü Ngechuchupëxegu nanangũcuchi rü moxë nüxna naxã. Rü yema yatũ rü Chamãriaanecũãx nixĩ. ¹⁷ Rü yexguma ga Ngechuchu rü ñanagürũ: —¿Taux ëxna i 10 chirëx pixĩgũxũ na pexcèx chayataanexëẽgũxũ? ¿Ngëxũgũ nixĩ i ngëma togũ i 9 i yatũgũ? ¹⁸ —¿Rü ñãã to i nachiũãnecũãx i duũxũxĩcatama nixĩ itaeguxũ na Tupanaxũ

yacuèxüüxcèx? —ñanagürü. ¹⁹ Rû yexguma rû guma yatüxü ñanagürü: —¡Inachi rû íixü! Cuxcèx nitaane, erü cuyaxõ —ñanagürü.

Ñuxãcü tá nixĩ i ngëxguma ínanguxgu ya Tupana na ãëxgacü yïxü
(Mt 24.23-28, 36-41)

²⁰ Rû Parichéugü rû Ngechuchuna nacagü, rû ñanagürügü: —¿Ñuxgu tá nixĩ na yangucuchixü ya Tupana na ãëxgacü yïxüxcèx i núma? —ñanagürügü. Rû Ngechuchu nanangãxü, rû ñanagürü: —Norü nguchiga ya Tupana rû tama wüxi i tacü i nüxü idauxürüü nixĩ. ²¹ —Rû taxuacüma ñaperügügü:

“Daa nixĩ”, rû éxna “Gua nixĩ”, ñaperügügü. Erü marü petanüwa nangu ya Tupana na ãëxgacü yïxüxcèx —ñanagürü. ²² Rû yexguma norü ngüexüügüxü ñanagürü: —Rû tá pexcèx ínangu i ngunexü i nagu poraãcü tá choxü pedaugüchaüxü woo wüxi i paxaãchicèxtama yixĩgu. Natürü tãütáma choxü pedaugü i ngëxguma. ²³ —Rû duüxügü rû tá ñanagürügü pexü:

“Daa nixĩ ya Cristu”, rû éxna, “Gua nixĩ ya Cristu”, ñanagürügü tá. Natürü pemax jrü tãütáma nüxü peyaxõgü, rû tãütáma nawe perüxĩ! ²⁴ —Rû ngëxguma íchanguxgu i choma i Tupana Nane na duüxüxü chiixü, rû wüxi i ãëmacü i guxüãneguma baxixürüü tá chixĩ. ²⁵ —Natürü noxri rû tá poraãcü ngüxü chinge, rû ñoma i naãnecüãx i duüxügü i ñuxma maxëxü rû tá choxü naxoe. ²⁶ —Rû yexgumarüü ga duüxügü na chixri maxëxü ga yexguma Noë maüxgu, rû ngëxgumarüü tá ta chixri namaxë i duüxügü i ngëxguma íchanguxgu i choma i Tupana Nane na duüxüxü chiixü. ²⁷ —Rû ga duüxügü ga yexguma rû nachibüe, rû naxaxegü, rû nixãmèxgü, rû nixütexacügü ñuxmata nawa nangu ga yema ngunexü ga Noë naweügu nagu ixüexü. Rû ínangu ga mucü ga taxüchicü, rû guxüma ga yema duüxügü rû nayue. ²⁸ —Rû yexgumarüü ta nangupetü ga yexguma nuxcümaücü ga Lox maüxgu. Rû duüxügü rû nachibüe, rû naxaxegü, rû norü yemaxüxcèx nataxegü, rû namaã nataxegü, rû nixüanegü rû nitoegü, rû nixüpatagü. ²⁹ —Natürü yexguma Lox ixüxgu nawa ga guma íãne ga Chodoma, rû daxüwa narüyi ga üxü ga naxĩchine, rû nanadai ga guxüma ga yema duüxügü. ³⁰ —Rû ngëxgumarüü tá ta nangupetü i ngëxguma íchanguxgu i choma i Tupana Nane na duüxüxü chiixü. ³¹ Rû ngëma ngunexügu rû texé tama tümapataarü aixepewa ngëxmagu, rû tama name i tümapatagu tayangaxi na tümäärü ngëmaxügü tayatoxüxcèx. Rû texé ya tümãnewa ngëxmaxë, rû tama name i tümapatacèx tataegu na tacü ngëma tayayaxuxüxcèx. ³² —Rû nüxna pecuèxãchie ga ñuxãcü ngixü na naxüpetüxü ga Lox namèx ga na nayuxü, ga yexguma ngigüweama nadèuxgu. ³³ —Erü yixema tügü maxëchaxëëchaüxë rû tá itayarütaxu, natürü yixema chauxcèx yuxe rû aixcüma tá tüxü nangëxma i maxü i taguma gúxü. ³⁴ —Rû pemaã nüxü chixu rû ngëma chütaxügu rû wüxi i ngürücarewa tá nangëxmagü i taxre i duüxügü. Rû wüxi tá niga, rû ngëma to rû tá ngëma natèx. ³⁵ —Rû taxre i ngexügü tá nügümaã ínacaegü. Rû wüxi tá niga rû ngëma to rû tá ngëma natèx. ³⁶ —Rû taxre i yatügü rû wüxi i naãnewa tá nangëxmagü. Rû wüxi tá niga rû ngëma to rû tá ngëma natèx —ñanagürü ga Ngechuchu. ³⁷ Rû yemaxü naxĩnüëgu ga norü ngüexüügü, rû Ngechuchuna nacagü, rû ñanagürügü: —Pa Corix, ¿ngextá tá nixĩ i nangupetüxü i ngëma nüxü quixuxü? —ñanagürügü. Rû núma ga Ngechuchu rû nanangãxü, rû ñanagürü: —Duüxügü rû tá chauxcèx nangutaquëxegü ñoma ëxchagü nawemücèx ngutaquëxexürüü —ñanagürü.

18

Ore ga ãëxgacügu rû yutecügu ixuxü

¹ Rû Ngechuchu rû wüxi ga to ga orexü namaã nixu na yemawa nangüexëëãxüxcèx na ñuxãcü nanaxwëxexü na taguma nüxü nachaueãcüma guxüguma nayumüxëgüxü. ² Rû ñanagürü nüxü ga norü ngüexüügü: —Wüxi ga íãnewa nayexma ga wüxi ga ãëxgacü ga tama Tupanaga ñnüxü rû taxüexüma ngechaüxü. ³ —Rû guma íãnewatama iyexma ga

wüxi ga nge ga yutecü ga ngxü nayexmacü ga wüxi ga guxcha namaã ga to ga duüxü. Rü yemacèx yema ãëxgacüxütawa ixüxecha na ngxü namexëãxücèx ga yema guxcha. ⁴—Rü muëxpüxcüna yéma ixüüxü, natürü yema ãëxgacü rü tama ngxü narüngüxëëchaü. Natürü düxwa nagu narüxüna ga yema ãëxgacü rü naãëwa ñanagürü:

“Choma rü tama Tupanaxü changechaü, rü taxúexüma chacuáxchaü. ⁵—Natürü ngëma choxü na nachixeweechaxücèx i ñaã nge, rü noxtacüma tá ngxü charüngüxëë na tama yeüürü choxü nachixeweechaxücèx”, ñanagürü. ⁶ Rü Cori ga Ngechuchu rü ñanagürü: —Yema nixi ga norü ore ga yema ãëxgacü ga chixexü. ⁷—¿Taux éxna i Tupana rü paxa tüxü ínapoxüxü ya yíxema duüxë ya tüxü nayaxuxe i ngëxguma chütacü rü ngunecü rü norü ngüxëëcèx nüxna tacaxgu i tümaãrü yumüxëwa? ⁸—Rü pemaã nüxü chixu rü Tupana rü paxatáma tüxü narüngüxëë. Natürü ngëxguma wenaxãrü núma chaxüxgu i choma i Tupana Nane na duüxüxü chíxü, ¿rü ñuxre i duüxügü i aixcüma yaxögüxüxü tá ichayangau i ñoma i naãnewa? —ñanagürü ga Ngechuchu.

Ore i Parichégu ixuxü rü dïëruarü deruügu ixuxü

⁹ Rü Ngechuchu rü nüxü nixu ga ñaã ore nachiga ga yema duüxügü ga nügü írümegünetaxü rü tama togüxü cuáxchaügüxü. ¹⁰ Rü ñanagürü: —Taxre ga yatü rü tupauca ga taxünewa nayayumüxëgü. Rü wüxi rü Parichéu nixi, rü yema to rü wüxi ga yatü ga Dumaãrü ãëxgacüçèx dïëru ngxü dexü nixi. ¹¹—Rü yema Parichéu rü yexma nachi, rü ñaãcü nayumüxë:

“Pa Tupanax, moxë cuxna chaxã erü tama togü i duüxügürüü chíxü. Rü tama togürüü changitèx, rü tama ngëmarüü taxü i chíxexü chaxü rü éxna wüxi i nge i átecümaã ichape. Rü bai i ñaã yatü i Dumaãrü ãëxgacüçèx dïëru ngxü dexürüü chíxü. ¹²—Choma rü guxcü ya yüxügu rü taxreëxpüxcüna chaxaure rü tama chachibü na cugu charüxüxüçèx. Rü chorü dïëruwa rü guxüguma meã cuxna chanaxã i ngëma cuxna üxü”, ñanagürü. ¹³—Natürü ga guma yatü ga Dumaãrü ãëxgacüçèx dïëru ngxü decü, rü yaxügu narüxãüx. Rü namuü ga daxü na nadawenüxü, rü yema norü ngechaümaã nügü napaxremü, rü ñanagürü:

“Pa Tupanax, ¿Cuxü changechaütümüü! Erü wüxi i pecaduáxü chíxü”, ñanagürü ga guma yatü. ¹⁴—Rü ngëmacèx pemaã nüxü chixu rü guma yatü ga Dumaãrü ãëxgacüçèx dïëru ngxü decü rü yexguma napatacèx nataegugu rü Tupanapëxewa rü mecü nixi. Natürü yema Parichéu rü Tupana rü tama namaã nataãë. Erü texé ya tügü icuèxüxüxe rü Tupana tá tüxü naxãnexëë. Natürü texé ya tama tügü icuèxüxüxe rü Tupana rü tá tüxü nicuèxüxü —ñanagürü ga Ngechuchu.

Ngechuchu rü meã buãxgüxü nayaxu

(Mt 19.13-15; Mr 10.13-16)

¹⁵ Rü yéma Ngechuchuxütawa tüxü tagagü ta ga buãxgü na tüxü yangögüchigüxüçèx. Natürü yexguma norü ngüexügü yemaxü dauxügügu rü tüxü ningagü ga guxema tümacüçègü Ngechuchuxütawa tüxü gagüxe. ¹⁶ Natürü Ngechuchu rü nügüxütawa tümacèx naca ga guxema buãxta rü ñanagürü norü ngüexügüxü: —Chanaxwèxe i chauxütawa naxi i buxügü. ¿Rü tãxü i nüxna penachuxuxü! Erü Tupana ãëxgacü íxüxüwa rü tümacèx nixi ya yíxema ñaã buxügürüü íxügüxe. ¹⁷—Aixcüma pemaã nüxü chixu rü texé ya tama wüxi i buxürüü Tupanaxü yaxüxe na tümaãrü ãëxgacü na yíxüçèx, rü tagutáma nagu taxücu i Tupana ãëxgacü íxüxüwa —ñanagürü ga Ngechuchu.

Wüxi ga yatü ga dïëruãxüchicü Ngechuchumaã nidexa

(Mt 19.16-30; Mr 10.17-31)

¹⁸ Rü wüxi ga yema Yudíugüarü ãëxgacü rü Ngechuchuna naca rü ñanagürü: —Pa Ngüexëëruü ya Mecüx, ¿tacü tá chaxüxü na chanayaxuxücèx i maxü i taguma güxü? —ñanagürü. ¹⁹ Rü Ngechuchu nanangãxü rü ñanagürü nüxü: —¿Tüxcüü “Mecü” ñacurügü

choxü? Erü Tupanaxĩcatama nixĩ ya mecü ixĩcü, rü nataxuma i to i mecü ixĩxü. ²⁰—Cuma nüxü cucuèx i Tupanaärü mugü i ñaxü:

“¡Tãütáma naĩ i ngemaã icupe, rü tãütáma cumáëta, rü tãütáma cungitèèx, rü tãütáma doraxü quixu i togüchiga, rü tümaga naxĩnú ya cunatü rü cue!”

ñaxü. ²¹ Rü yexguma ga guma yatü rü ñanagürü Ngechuchuxü: —Woetama chorü bucüma meãma chayanguxëẽ i guxüma i ngëma mugü i nüxü quixuxü —ñanagürü. ²² Rü yemaxü naxĩnügu ga Ngechuchu rü ñanagürü: —Wüxixicatama cuxü nataxu, rü ngëma nixĩ na namaã cutaxexü i guxüma i curü ngëmaxüügü rü togü i ngearü ngëmaxüãxgüxüna na cunaxãxü i curü natanü, rü ngëxguma rü tá cuxü nangëxma i cuchica i daxüguxü i naãnewa. Rü ñuxüchi marü name i chowe curüxü —ñanagürü. ²³ Natürü yemaxü naxĩnügu ga guma yatü rü poraãcü inayarümaãchi, yerü namuärü dïeruãxüchi. ²⁴ Rü yexguma Ngechuchu nüxü dëuxgu ga ñuxãcü na nangechaüxü, rü ñanagürü nüxü ga norü ngúexüügü: —Naguxchaxüchi tá nixĩ na Tupana ãëxgacü íxixüwa na yachocuxü i ngëma dïeruãxüchigüxü. ²⁵ —Rü dücax, wüxi i cameyu rü taxucürüwama wüxi ya ucumaxëtüwa naxüpetü. Rü ngëxgumarüü ta nixĩ i wüxi i duüxü i dïeruãxüchixü rü taxucürüwama Tupana ãëxgacü íxixüwa nixücu [ega norü dïeruguama naxĩnügu rü tama yaxõõgu —ñanagürü.] ²⁶ Rü yexguma yemaxü naxĩnüëgu ga duüxüügü rü ñanagürügü: —¿Éxna texé tá ya nayaxúxe i maxü i taguma gúxü? —ñanagürügü. ²⁷ Rü Ngechuchu ñanagürü nüxü: —Duüxüügü rü taxuacüma nügü namaxëẽ, natürü Tupanaãxü rü natauxcha na namaxëxëãxü —ñanagürü. ²⁸ Rü Pedru ñanagürü Ngechuchuxü: —Pa Corix, toma rü yéma tanawogü ga guxüma ga torü yemaxüügü na cuwe tarüxixüçèx —ñanagürü. ²⁹⁻³⁰ Rü yexguma ga Ngechuchu rü ñanagürü nüxü ga norü ngúexüügü: —Aixcüma pemaã nüxü chixu rü texé ya Tupanacèx tümapatana, rü éxna tümangatüna, rü éxna tümãëna, rü éxna tümãëneëgüna, rü éxna tümãëyëxgüna, rü éxna tümamèxna, rü éxna tümãëcügüna ngema ixüxë na Tupanaãxü tapuracüxüçèx, rü ñoma i naãnewa tátama poraãcü tanayaxu i tümãärü natanü. Rü daxüguxü i naãnewa rü tá ta tanayaxu i maxü i taguma gúxü —ñanagürü.

Ngechuchu rü wenaxãrü nanaxunagü ga norü yuxchiga
(Mt 20.17-19; Mr 10.32-34)

³¹ Rü Ngechuchu rü noxrüwama naxcèx naca ga norü ngúexüügü, rü ñanagürü nüxü: —Ñuxma rü Yerucharéüwa tá taxĩ na ngema yanguxüçèx i guxüma ga yema ore ga nuxcümaügüxü ga Tupanaärü orearü uruügü ümatüxü ga chauchiga. ³² —Rü Yerucharéüçüãx i duüxüügü rü tá to i nachiüãnecüãxna choxü namugü. Rü ngëma duüxüügü rü tá chaugu nidauxcüraügü, rü tá chomaã naguxchigagü, rü tá chauchiwewa nacuaixgü. ³³ —Rü tá choxü naçuaixgü, rü yixcüra rü tá choxü nimèxgü. Natürü tomaëxpüx i ngunexüguwena rü tá wenaxãrü chamaxü —ñanagürü. ³⁴ Natürü yema norü ngúexüügü rü tama nüxü nacüëxgüéga ga na çacüchiga yĩxü ga yema ore ga namaã nüxü yaxuxü. Yerü poraãcü nüxü naguxcha ga aixcüma nüxü na nacüëxgüxüçèx.

Ngechuchu nanamexëẽ ga wüxi ga ngexetücü ga Yericúwa
(Mt 20.29-34; Mr 10.46-52)

³⁵ Rü yexguma Ngechuchu ñãne ga Yericúwa nguxchaügu, rü yéma namacüwawa narüto ga wüxi ga yatü ga ngexetücü ga dïerucèx yéma iwémécü. ³⁶ Rü yexguma guma ngexetücü nüxü ñnügu ga muxüma ga duüxüügü na yéma chopetüxü, rü duüxüügüna naca ga çacü na ngupetüxü. ³⁷ Rü nanangãxüügü, rü ñanagürügü: —Ngechuchu ya Nacharétucüãx nuã naxüpetü —ñanagürügü. ³⁸ Rü yexguma ga guma ngexetücü rü tagaãcü ñanagürü: —Pa Ngechuchux, Pa Dabítanüxüx, ¡cuxü changechaütümüü! —ñanagürü. ³⁹ Rü yema duüxüügü ga Ngechuchupëxegu íxü, rü nanangagü ga na iyanangeáxüçèx. Natürü guma ngexetücü rü yexeraãcü tagaãcü ñanagürü: —Pa Dabítanüxüx, ¡cuxü changechaütümüü! —ñanagürüama. ⁴⁰ Rü yexma nayachiãchi ga Ngechuchu, rü duüxüügüxü namu na

naxütawa nagagüãxücèx. Rù yexguma marü naxütawa nanguxgu, rù guma ngexetücüna naca ga Ngechuchu, rù ñanagürü: ⁴¹ —¿Tacü i cunaxwèxexü na cumaã chanaxüxü? —ñanagürü. Rù guma ngexetücü nanangãxü rù ñanagürü: —Pa Corix, chanaxwèxe na choxü quidauchixëxü —ñanagürü. ⁴² Rù Ngechuchu ñanagürü nüxü —¡Idauchi! Rù marü cuxcèx nitaane erü cuyaxõ —ñanagürü. ⁴³ Rù yexgumatama nidauchi ga guma ngexetücü, rù Ngechuchuwe narüxü, rù Tupanaxü nicuèxüüchigü. Rù guxüma ga duüxügü ga nüxü daugüxü ga yema ngupetüxü rù Tupanaxü nicuèxüügü ta.

19

Ngechuchu rü Zaquéuchiga

¹ Rù Ngechuchu rü Yericúarü ñanewa naxüpetü. ² Rù yéma nayexma ga wüxi ga yatü ga dïeruãxüchixü ga Zaquéugu äegaxü. Rù nüma nixi ga naëru ga yema yatügü ga Dumaärü äëxgacücèx dïeru ngixü ideetanüxü. ³ Rù yema Zaquéu rü poraäcü nüxü nangüchaü ga Ngechuchuxü na nadauxü na nüxü nacuáxücèx. Natürü taxuacüma nüxü nadau, yerü namuxüchi ga duüxügü, rù ñuxüchi nanuxchanexüchi ga nümax. ⁴ Rù yemacèx Ngechuchupëxegu nayangu, rù namacüwawa wüxi ga naïgu naxïnagü na Ngechuchuxü nadauxücèx ga yexguma yéma naxüpetügu. ⁵ Rù yexguma yéma naxüpetügu ga Ngechuchu, rù daxü nadau natüüwa ga guma naï. Rù ñanagürü nüxü: —Pa Zaquéux, ¡paxa íruxi i ngema! Erü cupatawa tá changu i ñuxma —ñanagürü. ⁶ Rù paxa ínarüxü ga Zaquéu, rù taãëäcüma Ngechuchuxü nayaxu. ⁷ Rù yexguma yemaxü nadaugügu ga duüxügü, rù guxüma inanaxügüe ga chixri Ngechuchuchiga na yadexagüxü. Rù ñanagürügü: —¿Ñuxäcü i nüma rü wüxi i duüxü i pecaduãxüpatawa nangu? —ñanagürügü. ⁸ Rù yexguma ga Zaquéu rü inachi rü ñanagürü Ngechuchuxü: —Dücèx, Pa Corix, choma rü ngearü dïeruãxgüxüna tá chanaxã i ngãxügu i guxüma i chorü ngëmaxügü. Rù ngëxguma chi texé tüxü chawomüxëëäcüma tüxü changïxgu, rù ägümücüéxpüxcüna tá tüxü ngixü chataeguxëë i ngëma tümaärü dïeru —ñanagürü. ⁹ Rù Ngechuchu rü ñanagürü nüxü: —Rü ñoma i ngunexügu cupatawa nangu i maxü i taguma gúxü, erü cuma rü ta rü Abráürüü cuyaxõ. ¹⁰ —Rü choma i Tupana Nane na duüxüxü chiixü, rü ñoma i nañewa chaxü na naxcèx chayadauxücèx i ngëma duüxügü i iyarütauxexü na chanamaxëxëxücèx —ñanagürü.

Ore i dïerugu ixuxü (Mt 25.14-30)

¹¹ Rù yoxni yema Ngechuchuarü ore inaxïnüeyane ga duüxügü, rù Ngechuchu rü wüxi ga to ga ore ga cuèxruüxü namaã nixu, yerü marü Yerucharéüxü ningaica, rù duüxügü nagu rüxïnüegu rü paxa tá ínangu ga Tupana na norü äëxgacü yïixücèx. ¹² Rù yexguma ga Ngechuchu rü nügüchiga nidexa rü ñanagürü nüxü: —Nayexma ga wüxi ga yatü ga taxü ga cori ixïcü ga nayaxucü ga ore na nachüüãneärü äëxgacüxütawa naxüxücèx ga yaxüwa na yema äëxgacü nüxü unetaxücèx na guma nawa ne naxüxüne ga ñaneärü äëxgacü yïixücèx. ¹³ —Rü yexguma tauta inaxüächigu, rü naxcèx nangema ga 10 ga norü duüxügü. Rù wüxichigüna ngixü naxã ga wüxitachinü ga tatanücü ga dïeru. Rù ñanagürü nüxü:

“¡Ngïmaã pepuracüe rü ngixü pimuxëë i ñaã dïeru ñuxmatáta chataegu!” ñanagürü. ¹⁴ —Natürü yema ñanecüãx ga duüxügü rü naxchi naxaie ga guma cori. Rù yemacèx nawenaãma nayamugü ga ñuxre ga orearü ngeruügü na nachüüãneärü äëxgacümaã nüxü yanaxugüxücèx na tama nanaxwèxegüxü na norü äëxgacüxü na yïixücèx ga guma cori. ¹⁵ —Natürü nachüüãneärü äëxgacü rü nayangucuchixëëãma ga guma cori. Rù ñuxüchi ga guma cori rü norü ñanecèx nataegu na yéma äëxgacü na yïixücèx. Rù yexguma ínanguxgu rü naxcèx nangema ga yema 10 ga norü duüxügü ga dïeru nüxna ngixü naxãxü, yerü nüxü nacuáxchaü ga ñuxrechigü ngixü na yamuxëëxü ga norü dïeru ga wüxichigü ga yema

norü duñxügü. ¹⁶—Rü yema nüxıra dñeru nüxna ngñxñ naxãxñ rü norü corixütawa nangu, rü ñanagürü:

“Pa Corix, curü dñeru rü 10 êxpüxcüna ngñxñ chimuxêê”, ñanagürü. ¹⁷—Rü guma Cori ga yexwaca ãêxgacüxñ ingucuchicü rü nanangãxñ, rü ñanagürü:

“Wüxi i mexñ i chorü duñxñ quixñ. Maneca meãma namaã cupuracü i ngẽma íraxñ i dñeru i cuxna chaxãxñ. Rü ñuxma rü 10 ya ñãnegüarü ãêxgacüxñ tá cuxñ chixñxêê”, ñanagürü. ¹⁸—Rü yéma nangu ga to ga norü duñxñ, rü ñanagürü:

“Pa Corix, curü dñeru rü wüximêêxpüxcüna ngñxñ chimuxêê”, ñanagürü. ¹⁹—Rü norü cori nanangãxñ rü ñanagürü nüxñ:

“Cuma rü wüximêêxpüx ya ñãnegüarü ãêxgacüxñ tá cuxñ chixñxêê”, ñanagürü. ²⁰—Rü yéma nangu ga to ga norü duñxñ rü ñanagürü nüxñ:

“Pa Corix, ñaã iyixñ i curü dñeru. Rü wüxi ya dechugu ngñxñ chanuque, rü ngẽmaãcü ngñmaã changuxñ. ²¹—Yerü cuxcêx chamuñ, erü wüxi i yatü i aüxñ quixñ. Rü cunayauxtanü i ngẽma tama cuxrñ ixñxñ, rü cunayaxu i nanetüarü o i ngextá tama cuma ícutoexñwa”. ²²—Rü yexguma ga guma ãêxgacü rü ñanagürü nüxñ:

“Wüxi i chorü duñxñ i chixexñ quixñ i cumax. Rü curü oretama nixñ i cuxñ ixuxñ na cuchixexñ. Marü nüxñ cucuèxchirêx ga na chaxaüxñ, rü chanayautanüxñ i ngẽma tama choxrñ ixñxñ, rü chanayaxuxñ i nanetüarü o i tama choma ichatoxñ. ²³—¿Natürü tñxcüñ tama bancugu choxñ ngñmaã cunguxñ i chorü dñeru na ngẽma choxñ ngñxñ yamuxêêgñxñcêx, rü ngẽmaãcü mucü ngñxñ na chayaxuxñcêx i ngẽxguma íchanguxgu?” ñanagürü. ²⁴—Rü yexguma ga ãêxgacü rü yema yexmagüxñmaã nüxñ nixu, rü ñanagürü:

“¡Nüxna ngñxñ peyaxu i ngẽma dñeru, rü ngẽma 10 i dñeru nüxñ ngẽxmaxñna ngñxñ pexã!” ñanagürü. ²⁵—Rü nümagü rü nanangãxñgü, rü ñanagürügü:

“Natürü, Pa Corix, nüma rü marü nüxñ ingẽxma i 10 i dñeru”, ñanagürügü. ²⁶—Rü guma ãêxgacü nanangãxñ, rü ñanagürü:

“Pemaã nüxñ chixu rü texé ya chauga ñnuxê rü yexera tá tñxna chanaxã. Natürü texé ya tama chauga ñnuxê rü tá tñxna chanayaxu i woo ngẽma íraxñ i tñxñ ngẽxmaxñ. ²⁷—Rü yema chorü uwanügü ga tama naxwèxegñxñ ga norü ãêxgacüxñ na chiñxñ, ¡rñ nuã penagagü, rü nuã chopèxegu peyadai!” ñanagürü.

Ngechuchu rü Yerucharéñgu naxñcu
(Mt 21.1-11; Mr 11.1-11; Cu 12.12-19)

²⁸ Rü yema orexñ yaxuxguwena ga Ngechuchu, rü inixñchigü ga Yerucharéñwa na naxñxñ. ²⁹ Rü yexguma marü nawa nangugüchañgu ga guma ñãnegü ga Bechagué rü Betániã ga Oríbunecüarü Mèxpñneärü ngaicamana yexmagüne, rü Ngechuchu nanamu ga taxre ga norü ngüexñgü. ³⁰ Rü ñanagürü nüxñ: —¡Gua ñãnexãcüwa pexñ! Rü ngẽxma tá nüxñ peyangau i wüxi i buru i ngexwaca yaxñ i ngẽxma ngaxñxñ i taguma texé natagu aunagñxñ. ¡Rü peyawëxñ, rü nuã penaga! ³¹—Rü ngẽxguma texé pexna çaxgu na çacücêx peyawëxñxñ i ngẽma buru, ¡rñ tñmamaã nüxñ pixu rü ñapegügü:

“Torü Cori nanaxwèxe”, ñapegügü tñxñ! ³² Rü yéma naxñ ga yema taxre ga norü ngüexñgü. Rü yexma nüxñ nayangau ga yema buru ga Ngechuchu namaã nüxñ ixuxñrñ. ³³ Rü yexguma yawëxñgüãgu ga yema buru, rü norü yoragü rü yema ngüexñgüna nacagüe, rü ñanagürügü: —¿Tñxcüñ peyawëxñ i ngẽma buru? —ñanagürügü.

³⁴ Rü nümagü nanangãxñgü, rü ñanagürügü: —Rü tayawëxñ erü torü Cori nanaxwèxe —ñanagürügü. ³⁵ Rü Ngechuchuxütawa nanagagü ga yema buru. Rü yema norü ngüexñgü rü norü gáuxñchirumaã nanatütägü. Rü ñuxñchi Ngechuchuxñ natagu naxaunagñxñgü. ³⁶ Rü duñxñgü rü Ngechuchupèxewa norü gáuxñchirumaã nayaçhamagü ga nama. ³⁷ Rü yexguma inaxügüãgu na ínaxñgñxñ nawa ga yema nama ga Oríbunecüarü Mèxpñnewa yarüdaexñ, rü guxñma ga yema duñxñgü ga yaxögñxñ ga nawe rñxñxñ rü inanaxügü ga taãêãcüma aita na naxñexñ rü tagaãcü Tupanaxñ na yacuèxñgñxñ

naxcèx ga guxūma ga yema cuèxruūgū ga taxū ga nūxū nadaugūxū ga Tupanaārū poramaā naxūxū ga Ngechuchu. ³⁸ Rū ñanagürügü: —¡Namecūmaxūchi ya daa tórū ãëxgacū ya Tupanaégagu núma ũcū! ¡Rū pema rü ta, Pa Daxūcūāx, rü petaāxëgü rü nūxū picuèxūūgü ya Tupana! —ñanagürügü. ³⁹ Rū yéma duūxūgütanūwa nayexmagü ga ñuxre ga Parichéugü. Rū ñanagürügü Ngechuchuxū: —Pa Ngúexëëruūx, ¡Yangagü i ngēma cuwe rüxīxū i duūxūgü na yanachianegūxūcèx! —ñanagürügü. ⁴⁰ Natürü Ngechuchu nanangāxū rü ñanagürü nūxū: —Pemaā nūxū chixu rü ngëxguma chi iyanangeèxgügu i ñaā duūxūgü, rü daa nutagü ya namacūwawa ngëxmagücü rü chi nūxī aita naxūe —ñanagürü. ⁴¹ Rū yexguma Yerucharéūārū ngaicamana nanguxgu ga Ngechuchu, rü guma ñānecūāx ga duūxūgücèx naxaxu. ⁴² Rū ñanagürü: —Pa Yerucharéūcūāxgü, chierü ñoma i ngunexūgu nūxū pecuèxgu na texé aixcūma taāë pexna āxū. Natürü ngēma rü pexchawa inicux i ñuxma, rü taxuacūma nūxū pecuèx. ⁴³ —Rü tá guxchaxūgü pexū naxūpetü. Rū perü uwanūgü tá nanaxū i norü poxūchica i norü guxūcūwawa ya perü ñāne. Rū norü churaragü tá pexū ínachoeguāchi, rü guxūcūwawa tá pexcèx ne naxī. ⁴⁴ —Rü tá nagu napogüe ya perü ñāne, rü tá pexū nadai. Rū taxucütāma ya nuta ngextá nügūxétü nanugūxūra i perü ñāneārü poeguxūtapūwa. Rū ngēmaācū tá pexū naxūpetü, yerü tama nūxū pecuèxgūchañ ga yexguma Tupana petanūgu naxūānegu —ñanagürü.

*Ngechuchu rü tupauca ga taxūnewa ínanawoxū ga duūxūgü ga yéma taxegūxū
(Mt 21.12-17; Mr 11.15-19; Cu 2.13-22)*

⁴⁵ Rū Ngechuchu rü tupauca ga taxūnewa nangu rü yexma naxūcu. Rū inanaxūgü na ínawoxūāxū ga yema duūxūgü ga tupauca ga taxūnewa taxegūxū. ⁴⁶ Rū Ngechuchu rü ñanagürü nūxū: —Tupanaārü ore i ũmatūxūwa rü ñanagürü: “Chopata rü yumūxēpatañ nixī”.

Natürü pema rü ngítèèxgūxūpatañ peyaxīxëë —ñanagürü. ⁴⁷ Rū guxū ga ngunexūgu rü tupauca ga taxūnewa nayangūxëëtae ga Ngechuchu. Natürü ga paigūarü ãëxgacūgü, rü ngúexëëruūgü ga Moīchearü mugūwa nguxëëtaegūxū, rü Yerucharéūārü ãëxgacūgü, rü naxcèx nadaugü ga ñuxācū tá na yamèxgūāxūcèx. ⁴⁸ Natürü taxucürüwa tacū namaā naxūgü, yerü guxūma ga duūxūgü rü namaā nataāëgü, rü meā inarūxīnūë ga norü ore.

20

*Ngechuchuna nacagü na texéarü oregagu tupauca ga taxūnewa nanguxëëtaexū
(Mt 21.23-27; Mr 11.27-33)*

¹ Wūxi ga ngunexū ga Ngechuchu rü tupauca ga taxūnewa nayexma. Rū nanangūxëë ga duūxūgü, rü namaā nūxū nixu ga Tupanaārü ore. Rū yexguma íyadexayane rü yéma nangugü ga paigūarü ãëxgacūgü, rü ngúexëëruūgü ga Moīchearü mugūwa nguxëëtaegūxū, rü Yudíugūarü ãëxgacūgüerugü. ² Rū ñanagürügü nūxū: —¿Texéarü mugagu nixī i cunaxūxū i ngēma núma cuxūxū? ¡Rü texé cuxū tamu na cunaxūxūcèx i ngēma? —ñanagürügü. ³ Rū yexguma ga Ngechuchu rü ñanagürü nūxū: —Choma rü tá ta pexna chaca, rü chanaxwèxe i choxū pengāxūgü. ⁴ —¿Rü texé tanamu ga Cuáñ na duūxūgūxū ínabaiūxëëxūcèx? ¡Pexcèx rü Tupana yīxū ga namucü rü éxna duūxūgūmare? —ñanagürü. ⁵ Rū yexguma ga Parichéugü rü inanaxūgüe ga nügūmaā na yaporagatanūcūxū. Rū nügūmaātama ñanagürügü: —¿Ñuxū ñagūgūxū tá? Erü ngëxguma chi:

“Tupana núma nanamu”, ñagūgu, rü nūma rü chi ñanagürü tūxū:

“¿Rü tūxcūñ ga tama nūxū peyaxōgūxū?” ñanagürü chi tūxū. ⁶ —Rü ngëxguma chi ñagūgu:

“Yatūgūmare nuā nanamu”, ñagūgu, rü guxū i duūxūgü chi nutamaā tūxū ínamuxūchigü, rü tūxū chi nadai. Erü nūmagü i duūxūgü rü nagu narūxīnūë na Tupana yīxū ga Cuáñxū mucü. ⁷ Rū Ngechuchuxū nangāxūgü rü ñanagürügü: —Tama nūxū

tacuèx ga texé núma na namuxũ ga Cuáũ ga baiũxẽẽruũ —ñanagürügü. ⁸ Rũ yexguma ga Ngechuchu rũ ñanagürü nüxũ: —Choma rũ ta tãütãma pemaã nüxũ chixu na texé choxũ muxũ na chanaxũxúcèx i ngẽma choxna naxcèx peçaxũ —ñanagürü.

Ore ga puracütanũxũ ga chixexũgu ixuxũ
(Mt 21.33-44; Mr 12.1-11)

⁹ Rũ inanaxũgü ga Ngechuchu ga duũxũgümaã na yadexaxũ. Rũ ñãã ore ga cuèxruũxũ namaã nixu, rũ ñanagürü: —Nayexma ga wüxi ga yatü ga wüxi ga ubanecü ücü ga norü naãnewa. Rũ ñuxũchi ñuxre ga puracütanũxũna nanaxã na nüxna nadaugũxúcèx rũ yixcama rũ norü yoramaã na yayauxyegüãxúcèx ga yema norü o. Rũ ñuxũchi ga guma yatü rũ nixũ ga yéma rũ nuxcüma nataegu. ¹⁰ —Rũ yexguma nawa nanguxgu ga na yadauxũ ga yema ubagü, rũ guma yatü rũ yéma puracütanũxũgüxũtawã nanamu ga wüxi ga norü duũxũ na naxcèx íyaçaxúcèx ga yema ubagü ga nüxna üxũ. Natürü yema puracütanũxũgü rũ nanaçuaixgü ga guma yatüarü duũxũ, rũ taxuũma ga uba nüxna naxãgü. Rũ yemaãcü ínayamugü. ¹¹ —Rũ yexguma ga guma yatü rũ wenaxãrũ to ga norü duũxũ yéma ta namu. Natürü ga yema puracütanũxũgü rũ chixexũ namaã nixugüe, rũ nanaçuaixgü, rũ taxuũma ga uba nüxna naxãgü. Rũ yemaãcü ínayamugü. ¹² —Rũ wenaxãrũ to ga norü duũxũ yéma ta namu ga guma yatü. Natürü ga yema puracütanũxũgü rũ nanapixẽẽ, rũ ínatatèxüchigü ga yema naãnewa. ¹³ —Rũ düxwa ñanagürü ga guma naãneãrũ yora:

“¿Tãcũ tá chaxũxũ i ñuxmax? Rũ name nixĩ i chaune ya nüxũ changechaũcü ngema chanamu. Rũ ngẽxguma nüxũ nadaugügu rũ bexmana naga tá naxĩnüẽ”, ñanagürü. ¹⁴ —Natürü ga yema puracütanũxũgü rũ yexguma guma yatü nanexũ nadaugügu, rũ nügümaã ñanagürügü:

“Ñãããrũ tá nixĩ i ñãã naãne i yixcama. ¡Rũ ngĩxã tayamèxgü na tórü na yĩxũcèx!” ñanagürügü. ¹⁵ —Rũ ínatatèxüchigü ga yema naãnewa, rũ nayamèxgü —ñanagürü ga Ngechuchu. Rũ yexguma ga Ngechuchu rũ duũxũgüna naca, rũ ñanagürü: —¿Tãcũ tá ngẽma puracütanũxũmaã naxü i ngẽma naãneãrũ yora i ñuxmax? ¹⁶ —Rũ ngema tá naxũ rũ tá nanadai i ngẽma puracütanũxũgü, rũ togüna tá nanaxã i norü naãne —ñanagürü ga Ngechuchu. Rũ yexguma yemaxũ naxĩnüẽgu ga duũxũgü rũ ñanagürügü: —Chierü tama ngẽmaãcü nangupetüxẽẽãxgu ya Tupana —ñanagürügü. ¹⁷ Natürü Ngechuchu rũ nüxũ nadawenü, rũ ñanagürü nüxũ: —¿Natürü ñuxũ ñaxũchiga nixĩ i ngẽma Tupanaãrũ ore i ümatüxũ i ñaxũ?:

“Yima nuta ya mecü ya ñãrũ üruũgü nüxũ oechirécü, rũ ñuxma rũ yimatama nixĩ ya Tupana nüxĩra yaxücuchicü na namaã inaxüğüãxũ ya ñpata”, ñaxũ. ¹⁸ Rũ ñanagürü ta ga Ngechuchu: —Texé ya yima nutamaã yarüñaxẽ, rũ tá itapoũgü. Rũ yixema tümaetügu nanguxe ya yima nuta, rũ tá tüxũ niñáíxmü —ñanagürü ga Ngechuchu. ¹⁹ Rũ ga paigüarü ãẽxgacügü rũ ngüexẽẽruũgü ga Moĩchëarü mugüwa ngüxẽẽtaegüxũ, rũ yexgumatama Ngechuchuxũ niyauxgüchaũ. Yerü nüxũ nacüèxgü ga nachiga na yĩxũ ga yema ore ga cuèxruũ ga nüxũ yaxuxũ. Natürü tama nayayauxgü, yerü duũxũgüxũ namuũẽ.

Ãẽxgacüaxũ dñerumaã naxütanũxũchiga
(Mt 22.15-22; Mr 12.13-17)

²⁰ Rũ yemacèx ga yema paigüarü ãẽxgacügü rũ Ngechuchuxũtawã nanamugü ga ñuxre ga norü duũxũgü na mexũ i duũxũgürüũ yéma iyanaxĩnüèxúcèx natürü naxcèx na nadaugũxúcèx ga ñuxãcü nachiuãneãrũ ãẽxgacüxũtawã Ngechuchuxũ na ínaxuaxũgüxúcèx. ²¹ Rũ yemacèx Ngechuchuna nacagü rũ ñanagürügü: —Pa Ngüexẽẽruũx, toma nüxũ tacuèx rũ aixcüma nixĩ i ngẽma nüxũ quixuxũ rũ ngẽma namaã cungüexẽẽtaexũ. Rũ tama duũxũãrũ düxëtüxũnegu cudawenü erü nacüma nixĩ i cungüxũ. Rũ aixcüma cunangüexẽẽ i duũxũgü na Tupana naxwèxexũãcüma

namaxêxúcèx. ²² —Rü dücax, ngêma ãñeârü dîêru i ãêxgacü ya tacü ya Dumacüãx naxwêxexü na tanaxütanüxü, ¿rü namexü yîxü na nüxü tanaxütanüxü rü êxna tama? —ñanagürügü. ²³ Natürü Ngechuchu nüxü nacüexama na chixexügu naxîñüêxü ga yema duüxügü, rü yemacèx ñanagürü nüxü: —¿Tüxcüü i chixexügu choxü penguxêêchaü? ²⁴ —¿Choxü ngîxü pewé i wüxi i dîêru na ngîxü chadauxúcèx! ¿Rü texéhicünèxã rü texééga ngîgu üx? —ñanagürü. Rü nanangãxügü rü ñanagürügü: —Dumacüãx ya ãêxgacü ya tacüchicünèxã nixî —ñanagürügü. ²⁵ Rü yexguma ga Ngechuchu rü ñanagürü nüxü: —¿Ãêxgacüna ngîxü pexã i ngêma ãêxgacüarü ixîcü, rü Tupanana ngîxü pexã i ngêma Tupanaârü ixîcü! —ñanagürü. ²⁶ Rü yemaäcü ga Ngechuchu rü woo norü orewa rü taxucürüwama chixexügu nananguxêêgü ga duüxügüpêxewa, yerü meãma nanangãxü. Rü guxüma ga duüxügü rü nangeëxgümare yerü nabaixãchiãêgü namaã ga yema norü ore.

*Chaduchéugü rü Ngechuchuna nacagüe rü ngoxi wena namaxê i duüxügü
(Mt 22.23-33; Mr 12.18-27)*

²⁷ Rü Ngechuchuxütawa ínayadaugü ga ñuxre ga Chaduchéugü. Rü nümagü nixî ga nagu naxîñüêxü na tagutáma wena namaxêxü i yuexü. Rü yemacèx Ngechuchuxü ñanagürügü: ²⁸ —Pa Ngúexêêruüx, Moïchéarü mugüwa rü ñanagürü:

“Ngêxguma wüxi ya yatü naxmèx ngexacüyane nayuxgu, rü name nixî i naêneétama ngîmaã naxãmèx i ngêma yutecü i naxümèx, na ngêmaäcü naxãxãcüxúcèx nüxü ya naêneë ya marü yucü”,

ñanagürü ga yema ore. ²⁹ Rü ñanagürügü ta ga Chaduchéugü: —Nayexma ga 7 ga nügüeneë. Rü naxãmèx ga guma yacü, natürü tauta naxãxãcüyane nayu. ³⁰ —Rü yexguma naí ga naêneë nüxî ngîmaã naxãmèx ga yema ngecü. Rü guma rü ta nayu, rü nangexacü.

³¹ —Rü yexguma rü naí ga naêneë nüxî ngîmaã naxãmèx. Rü yemaäcü gúcüma ga guma 7 ga nügüeneëgü rü ngîmaã naxãmèx ga yema nge. Rü gúcüma nayue tauta naxãxãcüyane.

³² —Rü ngîma rü ta düxwa iyu ga yema nge. ³³ Rü ngêxguma yuexü wena maxêgu, ¿rü ngecürüücü naxmèx tá iyixî i ngêma nge? Yerü yexguma namaxêgu rü gúcüma ga guma 7 ga nügüeneë ngîmaã naxãmèx —ñanagürügü. ³⁴ Rü yexguma ga Ngechuchu rü nanangãxü rü ñanagürü: —Ñoma i nañewa rü yatügü rü nixãmèxgü rü ngexügü rü nixãtegü. ³⁵ —Natürü ngêma duüxügü i Tupanapêxewa mexü na wena namaxêxü na daxüguxü i nañewa naxîxúcèx rü ngêma rü tãütáma nixãmèxgü rü êxna nixãtegü. ³⁶ —

Erü ngêma rü tagutáma nayue. Rü daxücüãx i Tupanaârü orearü ngeruügürüü tá nixîgü. Rü aixcüma Tupanaxãcügü nixîgü erü yuwa ínarüdagü. ³⁷ —Rü yema ore ga naixãcü ga iyauratanücüxünechigawa, rü Moïché tüxü nüxü nacüexêê rü yuexü rü tá wena na namaxêxü. Erü yema orewa, rü ñanagürü ga Cori ga Tupana:

“Choma nixî i Abráüârü Tupana, rü Ichaáarü Tupana, rü Acobuarü Tupana”, ñanagürü. ³⁸ —Rü ngêmawa nüxü tacüèx rü woo ñoma i nañewa nayuegu i duüxügü, natürü Tupanacèx rü guxüguma namaxê —ñanagürü. ³⁹ Rü yexguma ga ñuxre ga ngúexêêruügü ga Moïchéarü mugüwa nguxêêtaegüxü rü ñanagürügü: —Aixcüma meãma nüxü quixu, Pa Ngúexêêruüx —ñanagürügü. ⁴⁰ Rü yemawena rü marü namuê ga tacüchigacèx Ngechuchuna na nacagüexü.

*¿Texé nane nixî ya Cristu?
(Mt 22.41-46; Mr 12.35-37)*

⁴¹ Rü Ngechuchu rü ñanagürü nüxü: —¿Tüxcüü duüxügü nüxü nixugüe rü Cristu rü nuxcümaücü ga ãêxgacü ga Dabítaa nixî? ⁴²⁻⁴³ —Yerü Dabítama ñaãcü nanaxümatü ga Wiyaegüarü poperawa:

“Tupana rü chorü Cori ya Cristuxü ñanagürü: ‘¡Nuã chorü tügüñecüwawa rüto, ñuxmatáta cuxmèxwa chanangêxmagüxêê i curü uwanügü na namaã icucuáxúcèx!’ ”

ñaãcũ nanaxumatũ. ⁴⁴ Rũ ñanagürũ ga Ngechuchu: —¿Ñuxũcürũwa i Dabítaa yĩxũ ya Cristu ega numatama ga Dabí rũ norũ Corimaã naxuãgu? —ñanagürũ.

Ngechuchu rũ nüxũ nixu na tama nameärũ maxũãxgũxũ ga yema ngúexẽeruũgũ ga Moĩchearũ mugüwa nguxẽetaegũxũ

(Mt 23.1-36; Mr 12.38-40; Lc 11.37-54)

⁴⁵ Rũ guxũma ga duũxũgũ rũ yéma inarũxĩnũe ga yexguma Ngechuchu norũ ngúexũgũxũ ñaxgu: ⁴⁶ —¡Pexuãegũ naxcèx i ngẽma ngúexẽeruũgũ i Moĩchearũ mugüwa nguxẽetaegũxũ! Erũ nũmagũ rũ norũ me nixĩ i mexũ i naxchirumaã na naxĩãneãxũ. Rũ ítamũwa nanaxwèxegũ na duũxũgũ meã nüxũ rũmoxègũxũ. Rũ ngutaquẽxepataũgũwa rũ norũ me nixĩ i ãexgacũgũmèxwèxewa na natogũxũ. Rũ õna i taxũwa rũ ngẽma õnaärũ yoraxũtawã ugũxũ i nachicacèx nadaugũ. ⁴⁷ —Rũ tüxũ nawomũxẽegũãcũma tüxna nanapuxũ ya tümapatagũ ya yĩxema yutegũxe. Rũ ñuxũchi nanamèxẽe i norũ yumũxègũ na duũxũgũ nãgu rũxĩnũèxũcèx na aixcũma mexũgũ yĩgũxũ. Natürũ nũmagũ tá nixĩ i yexeraãcũ napoxcuxũ —ñanagürũ.

21

Yutecüarũ ãmarechiga

(Mr 12.41-44)

¹ Rũ yexguma tupauca ga taxũnẽwa nayexmagu ga Ngechuchu, rũ yéma nüxũ nadau ga ñuxãcũ duũxũgũ ga idĩeruãxũ Tupanana ngĩxũ na naxãgũxũ ga norũ dĩeru ga tupaucaarũ dĩeruchiũwa. ² Rũ ngĩxũ nadau ta ga wũxi ga ngecũ ga yutecũ ga ngearũ dĩeruãxcũ ga tupaucaarũ dĩeruchiũgu taxretachinũ ga íraxũchicũ ga dĩeru ngĩxũ ixũcuchicũ. ³ Rũ ñanagürũ ga Ngechuchu: —Aixcũma pemaã nüxũ chixu rũ ñaã ngecũ i yutecũ i ngearũ dĩeruãxcũ rũ guxũ i togũ i dĩeru ngĩxũ ixãgũxũärũ yexera ngĩxũ ixã. ⁴ —Erũ guxũma i togũ rũ ngĩxũ inaxã i ngema nüxũ íyaxũgũcũ. Natürũ ngĩma ngĩxũ natauxyane ngĩxũ ixã i guxcũma i ngĩxũ ngexmaxcũ i ngĩrũ õnatanũ —ñanagürũ.

Ngechuchu nanaxunagũ na tupauca ya taxũnegu tá napogüexũ

(Mt 24.1-2; Mr 13.1-2)

⁵ Rũ ñuxre ga norũ ngúexũgũ rũ nidexagũ nachiga ga tupauca ga taxũne ga ñuxãcũ na namexèchixũ ga naxtapũx ga nutanaxcèxgũ, rũ na namexèchixũ ga guxũma ga guma tupaucaarũ yemaxũgũ ga duũxũgũ nüxna ãmarexũ. Rũ yexguma ga Ngechuchu rũ ñanagürũ: ⁶ —Rũ nawa tá nãngu i ngunexũgũ i guxũnetama ya daa tupauca ya nüxũ pedauxũne, rũ tá nãgu napogũe. Rũ naxtapũxarũ nutagũ rũ taxucũtãma nũgũetũ naxũxũra, rũ bai ya wũxi —ñanagürũ.

Cuèxruũgũ i tá nüxũ idauxũ naxũpa na nagũxũ i naãne

(Mt 24.3-28; Mr 13.3-23)

⁷ Rũ yexguma ga norũ ngúexũgũ rũ Ngechuchuna nacagũ, rũ ñanagürũgũ: —Pa Ngúexẽeruũx, ¿ñuxgu tá nixĩ i nangupetũxũ i ngẽma nüxũ quixuxũ? ¿Rũ tacũwa tá nüxũ tacuèx na nangupetũxũ tá i ngẽma? —ñanagürũgũ. ⁸ Rũ Ngechuchu rũ ñanagürũ: —¡Pexuãegũ tá na taxuũma pexũ womũxẽèxũcèx! Erũ muxũchixũ tá chaugu nũgũ nicuxgũ rũ tá ínãngũgũ rũ ñanagürũgũ tá:

“Choma nixĩ i Cristu, rũ paxã tá nãgu i naãne”, ñanagürũgũ tá pexũ. ¡Natürũ tãütãma nüxũ peyaxõgũ! ⁹ —Rũ ngẽxguma tá nüxũ pexĩnũegũ na nũgũ nadèixũ i wũxi i nachiũãne to i nachiũãnemaã, rũ èxna nüxũ pexĩnũegũ na wũxi i nachiũãnewatama rũ duũxũgũ rũ norũ ãexgacũmaã nũgũ nadèixũ, ¡rũ tãütãma pebaixãchiãegũ! Erũ ngẽmaãcũ tá nangupetũ i noxrix. Natürũ tãütãma naãneärũ gux nixĩ i ngẽma. ¹⁰ —Erũ wũxi i ãexgacũarũ churaragũ rũ to i ãexgacũarũ churaragũmaã tá nũgũ nadai. Rũ wũxi i nachiũãne rũ to i nachiũãnemaã tá nũgũ nadai. ¹¹ —Rũ nũmaxũ i nachiũãnegũwa rũ porãcũ tá naxĩãxãchiane, rũ porãcũ tá nãgu i taiya, rũ tá nataxũchi i daaweane. Rũ duũxũgũ

tá nüxü nadaugu i daxüwa i tacü i namaã nabaixächixü, rü taxü i cuèxruügü. ¹² — Natürü naxüpa i guxüma i ngëma rü duüxügü tá pexü inayauxü, rü tá pewe ningëxütanü. Rü ngutaquëxepataügüwa tá pexü nagagü na ngëma pexna nacagüxücèx, rü tá pexü napoxcue. Rü nachiuãnegüarü äëxgacügüpëxewa tá pexü nagagü, naxcèx na chorü duüxügü pixigüxü. ¹³ —Rü ngëmaäcü tá pexü natauxcha na äëxgacügümaã nüxü pixuxü i chauchiga. ¹⁴ —Rü ngëxguma tá ngëma pexü nagagügu, jrü tãxü i pexoegaãëgüxü naxcèx na tacümaã tá penangãxüxü na pegüétüwa pechogüxücèx! ¹⁵ —Erü choma tá pexü charüngüxëë na nüxü pecuáxücèx na tacümaã penangãxüxü i perü uwanügü. Rü nümagü rü täütáma nüxü nacuèxgü na tacümaã pexü nangãxügüxü i ngëxguma. ¹⁶ — Natürü pema rü woo penatügü, rü peegü, rü peeneëgü, rü peeyèxgü, rü petanüxügü, rü pemücügü rü tá napeechitaegü na purichíagüxütawa pexü íyaxuaxügüxü. Rü purichíagü rü tá pexü nadai i ñuxre i pemax. ¹⁷ —Rü guxü i naãnewa rü duüxügü tá pexchi naxaie, erü choxü peyaxögü rü chorü duüxügü pixigü. ¹⁸ —Natürü woo tacü pexü üpetügu rü Tupanamëxëwa tá pengëxmagü, rü nüma tá pexü inapoxü rü bai i wüxi i peyae tá inayarütaxu. ¹⁹ —Rü ngëxguma aixcüma peyaxögüamagu rü tama choxü ípetèxgu, rü tá penayauxgü i maxü i taguma gúxü. ²⁰ —Rü ngëxguma nüxü pedèuxgu na perü uwanügüarü churaragü Yerucharéüxü íchomaëguächixü, rü ngëmawa tá nüxü pecuèx na paxa tá nagu napogüexü ya yima ñãne. ²¹ —Rü yíxema Yudéaanewa ngëxmagüxe rü name nixí i mëxpúneãnewa tabuxmü. Rü yíxema Yerucharéüwa ngëxmagüxe rü tanaxwèxe na paxa ítachoxüxü. Rü yíxema tümaãnewa ngëxmagüxe rü tama name na ñãnecèx tawoeguxü. ²² —Erü ngëma ngunexügügu tá inangu i Tupanaãrü poxcu. Rü ngëmaäcü tá nayanguxëë i guxüma i ngëma norü ore i ümatüxüwa nüxü yaxuxü. ²³ —Rü ngëma ngunexügügu rü tá poraäcü tüxü naguxcha ya yíxema ngexegü ya iitacharaügüxe rü yíxema imaixácügüxe. Erü tá nangëxma i taxü i ngúxü, rü Tupana rü poraäcü tá nanapoxcue i ngëma duüxügü. ²⁴ —Rü ñuxre, rü tá norü uwanügü taramaã nanadai. Rü togü, rü tá inayauxü na to i nachiuãnewa nagagüãxücèx. Rü ñuxüchi i ngëma norü uwanügü rü tá nagu napogüe ya yima ñãne ya Yerucharéü. Rü ngëmaäcü tá nangupetü ñuxmatáta nawa nangu na Tupana ínamuxüxü i ngëma.

Tupana Nanearü taeguchiga

(Mt 24.29-35, 42-44; Mr 13.24-37)

²⁵ —Rü ngëxguma rü tá nangox i cuèxruügü. Rü üèxcü rü tauemacü rü wora-macurigü rü tá nixígachitanü i nachicawa.. Rü guxü i nachiuãnegüwa rü duüxügü rü tá nanaxixächiaëtanü rü tá nabaixächiaëgü namaã na poraäcü naxãügaächixü i taxü i taxtü rü norü yuapegü. ²⁶ —Rü duüxügü rü norü muümaã tá inayayiaxë i ngëxguma nüxü nadaugu i ngëma üpetüchaüxü i ñoma i naãnewa. Erü woo guxüma i tacü i daxüwa nüxü idauxü rü tá naxiãxächitanü rü tá nu ne nanaxímare. ²⁷ —Rü ngëxguma rü guxü i duüxügü i ñoma i naãnecüãx rü tá choxü nadaugu i ngëxguma wüxi i caixanexügu ícharüxixgu rü núma chaxüxgu namaã i chorü pora rü üüne. ²⁸ —Rü ngëxguma inaxügügu na naxüpetüxü i ngëma pemaã nüxü chixuxü, rü name nixí na petaãëgüxü rü meã pedaunagüxü, erü paxa tá íchangu na pexü íchangüxüxëëxücèx —ñanagürü. ²⁹ Rü yemawena rü wüxi ga ore ga cuèxruüxü namaã nixu ga Ngechuchu, rü ñanagürü: —¡Dücèx penangugü i iguera, rü ëxna ngëxürüxümare i to i naigü! ³⁰ —Rü ngëxguma nüxü pedèuxgu na ngëxwaca naxüátüxü, rü ngëmawa nüxü pecuèx na paxa tá taunecü na yiixü. ³¹ —Rü ngëxgumarüü ta i ngëxguma nüxü pedèuxgu na nangupetüxü i ngëma pemaã nüxü chixuxü, rü ngëmawa tá nüxü pecuèx na yimama yiixü ya Tupana na äëxgacü yiixücèx. ³² —Aixcüma pemaã nüxü chixu rü guxüma i ngëma nüxü chixuxü rü tá ningu naxüpa na nayuexü i duüxügü i ñuxma maxëxü. ³³ —Daxügüxü i naãne rü ñoma i naãne rü tá nagux. Natürü chorü ore rü tagutáma inayarüxo. ³⁴ —¡Pexuãëgü na tama tacü rü chixexügügu düxwa nüxü perüxoexü na peyaxögüxü! Rü ngëmacèx penaxwèxe na

pegüna pedaugüxü na tama pengãxëxü rü êxna ñoma i naãneärü ngüchaũguama na perüxĩnũëxü. Erü ngürüächi ngëmagu íperüxĩnũëyane tá pexü íchayabaixgü. ³⁵ —Rü ñoma wüxi ya yüta ya ngürüächi tacü iyaxúnerüü tá nixĩ naxcèx i guxüma i duüxügü i ñoma i naãnecüãx i ngëxguma wenaxärü núma chaxüxgu. ³⁶ —Rü ngëmacèx name nixĩ i pegü ípemexëëgü. ¡Rü guxüguma peyumüxëgü na ngëmaãcü tama pexü naxüpetüxüçèx i ngëma ãücümaxügü, rü aixcüma pimexüçèx i ngëxguma chopëxewa pengugügu! —ñanagürü ga Ngechuchu. ³⁷ Rü guxü ga ngunexügügu rü tupauca ga taxünewa nayexma ga Ngechuchu, rü duüxügüxü nangüexëë. Rü chütacü rü guma Mèxpüne ga Oríbunecügu äeganegu nayapeexü. ³⁸ Rü guxüma ga duüxügü rü pëxmamaxüchi tupauca ga taxünewa nangugüxü na Ngechuchuxü naxĩnũëxüçèx.

22

Äëxgacügü naxcèx nadaugü na ñuxäcü Ngechuchuxü yayauxgüxü
(Mt 26.1-5, 14-16; Mr 14.1-2, 10-11; Cu 11.45-53)

¹ Rü marü ningaica ga Yudügarü peta ga Üpetüchiga ga nagu nangõxgüãxü ga pãu ga ngearü puxëeruüãxü. ² Rü ga paigüarü äëxgacügü rü ngüexëëruügü ga Moïchëarü mugüwa nguxëëtaegüxü rü naxcèx nadaugü ga ñuxäcü duüxügüechita Ngechuchuxü na yamëxgüxü, yerü duüxügüxü namuüë. ³ Rü yexguma ga Chataná rü Yuda ga Icarütegu nangaxi. Rü nüma ga Yuda rü yema 12 ga Ngechuchuarü ngüexügü ga imugüxütanüxüchirëx nixĩ. ⁴ Rü nüma ga Yuda rü ínayadau natanüwa ga paigüarü äëxgacügü rü tupauca ga taxüneärü purichíagüarü äëxgacügü. Rü namaã nüxü nixu ga ñuxäcü na natauxchaxü ga Ngechuchuxü na yayauxgüxüçèx. ⁵ Rü nümagü ga yema äëxgacügü rü nataãëgü. Rü díëru Yudana ngixü naxuaxügü. ⁶ Rü Yuda rü ngixü nayaxu ga yema díëru. Rü inanaxügü ga naxcèx na nadauxü ga ñuxäcü duüxügüechita Ngechuchuxü na yayauxgüxü ga äëxgacügü.

Üpetüchigaarü õnawa nachibü ga Cori
(Mt 26.17-29; Mr 14.12-25; Cu 13.21-30; 1 Co 11.23-26)

⁷ Rü nawa nangu ga yema petaarü ngunexü ga nagu nangõxgüãxü ga pãu ga ngearü puxëeruüãxü. Rü yema nixĩ ga ngunexü ga nagu carneruxacü yamëxgüxü naxcèx ga Üpetüchigaarü peta. ⁸ Rü Ngechuchu nanamu ga Pedru rü Cuáü, rü ñanagürü nüxü: —¡Peyamexëëx i tórü õna i Üpetüchigacèx! —ñanagürü. ⁹ Rü nümagü Ngechuchuxü nangãxügü, rü ñanagürügü: —¿Ngextá nixĩ i cunaxwëxexü na tanamexëëxü? —ñanagürügü. ¹⁰ Rü Ngechuchu nanangãxü, rü ñanagürü: —Ngëxguma Yerucharéüwa pengugügu rü ngëxma tá nüxü peyangau i wüxi ya yatü i wüxi i tüxü i dexámaã ääcuxcü ngixü ingexü. ¡Rü nawe perüxĩ ñuxmatáta napatawa pengugü! ¹¹ —¡Rü yima ípata ya nagu yaxücune ya yima yatü, rü yima íãrü yoramaã nüxü pixu rü ñapegügü nüxü:

“Torü ngüexëëruü rü nüxü nacuáxchaü na ngëxürüüxü yüxü i ngëma ucapu i norü ngüexügümaã tá nawa nachibüxü i Üpetüchigaarü õnacèx”, ñapegügü nüxü! ¹² —Rü tá pexü nüxü nadauxëë i wüxi i ucapu i taxü i marü mexëëxü i norü daxüchiüwa ngëxmaxü. ¡Rü ngëmawa tá penamexëë i ngëma õna i Üpetüchigacèx ixixü! —ñanagürü nüxü. ¹³ Rü yema naxĩ ga nümagü rü nüxü inayangaugü ga guxüma yema Ngechuchu namaã nüxü ixuxürüü. Rü yema nanamexëëgü ga õna ga Üpetüchigacèx ixixü. ¹⁴ Rü yexguma nawa nanguxgu ga ora ga na nachibüexü, rü mechawa narüto ga Ngechuchu namaã ga norü ngüexügü. ¹⁵ Rü yexguma ga Ngechuchu rü ñanagürü: —Ñuxäcü poraãcü choxü nangüchaü na pemaã chachibüxü i ñaã Üpetüchigaarü õnawa naxüpa na chayuxü. ¹⁶ —Natürü pemaã nüxü chixu rü täütáma wenaxärü Üpetüchigaarü õnawa chachibü, ñuxmatáta chowa yangu i ngëma Tupana naxwëxexü —ñanagürü. ¹⁷ Rü yexguma nanayaxu ga wüxi ga pochiyu ga binumaã ääcuxü. Rü Tupanana moxë naxãxira, rü

ñuxŭchi ñanagŭrŭ nŭxŭ ga norŭ ngúexŭgŭ: —¡Peyaxaxŭ ya daa binu, rŭ pegŭmaã pengau!
 18 —Erŭ pemaã nŭxŭ chixu rŭ tagutáma wena chayaxaxŭ ya binu ñuxmatáta nawa nangu na pecaduarŭ ũtanŭcèx chayuxŭ na aixcŭma pemaã inacuáxŭcèx ya Tupana — ñanagŭrŭ. 19 Rŭ nanayaxu ta ga pãu, rŭ Tupanana moxè naxcèx naxã. Rŭ ñuxŭchi inanabŭcu, rŭ norŭ ngúexŭgŭna nanaxã. Rŭ ñanagŭrŭ nŭxŭ: —Ñãã pãu rŭ chaxune i pexcèx yuxŭchiga nixi. ¡Rŭ ñããwena rŭ ñããcŭ tá penaxŭ na choxna pecuèxãchiexŭcèx! — ñanagŭrŭ. 20 Rŭ marŭ chibŭwena rŭ to ga pochiyu ga binumaã ããcuxŭ norŭ ngúexŭgŭna naxã, rŭ ñanagŭrŭ: —Daa binu rŭ Tupanaãrŭ uneta i ngexwacaxŭxŭãrŭ cuèxruŭ nixi. Rŭ chaugŭ ya pexcèx ibacŭwa Tupana pexŭ nŭxŭ nadauxèè na aixcŭma yŭixŭ i ngèma norŭ uneta. 21 —Natŭrŭ ngèma yatŭ i chauuechita ãëxgacŭgŭna choxŭ muxchaŭxŭ, rŭ nuã mechawa tamaã narŭto i ñuxmax. 22 —Rŭ choma i Tupana Nane na duŭxŭxŭ chiŭxŭ, rŭ Chaunatu ixunetaxŭrŭŭ tá chayu. Natŭrŭ wŭxi i ngechaŭxŭchi tá nixi naxcèx i ngèma yatŭ i ãëxgacŭgŭna choxŭ muxŭ. 23 Rŭ yexguma ga norŭ ngúexŭgŭ rŭ inanaxŭgŭe ga nŭgŭna na nacagŭexŭ, rŭ ñanagŭrŭgŭ: —¿Texé tá tixi ya yixema naèchita ãëxgacŭgŭna namuxè? —ñanagŭrŭgŭ.

Norŭ ngúexŭgŭ rŭ nŭgŭna nacagŭe na texé tá tixŭxŭ ya guxãxŭ rŭyexeraxe i natanŭwa

24 Rŭ yexguma ga yema ngúexŭgŭ rŭ nŭgŭmaã niporagatanŭcŭu nachiga na texé tá tŭixŭ ya natanŭwa guxããrŭ yexera ixŭxè. 25 Natŭrŭ ga Ngechuchu rŭ ñanagŭrŭ nŭxŭ: —Ñoma i naãnewa rŭ guxŭ i nachiŭãnegŭarŭ ãëxgacŭgŭ, rŭ poraãcŭ norŭ duŭxŭgŭxŭ namugŭ. Rŭ ñuxŭchi nŭgŭ yaxugŭgu rŭ norŭ duŭxŭgŭarŭ dauruŭ i mexŭgŭ nixŭgŭ. 26 — ¡Natŭrŭ pema rŭ tãŭtáma ngèxgumarŭŭ pixŭgŭ! Rŭ ngèxguma texé naxwèxegu na guxããrŭ yexera tŭixŭ i petanŭwa, rŭ name nixi na tŭgŭ ítarŭxŭraxŭ i guxŭma i tŭmamŭcŭgŭtanŭwa. Rŭ texé naxwèxegu na peeru tŭixŭ i petanŭwa, rŭ name nixi i noxri rŭ guxããrŭ ngŭxèèruŭ tixi. 27 —Rŭ ñoma i naãnewa rŭ corigŭ rŭ mechawa narŭtogŭ na nachibŭexŭcèx, rŭ norŭ duŭxŭgŭ nixi i ngèma naxcèx òna ixŭxŭ rŭ nŭxŭ rŭngŭxèèxŭ. Natŭrŭ tatanŭwa rŭ tama ngèmaãcŭ nixi, erŭ choma i perŭ cori na chiŭxŭ rŭ perŭ ngŭxèèruŭ chixi. 28 —Rŭ pemagŭ nixi ga guxŭguma chauxŭtawa peyexmagŭxŭ ga yexguma ngúxŭ chingexgu. 29 —Rŭ ngèmacèx i choma rŭ ãëxgacŭgŭxŭ pexŭ chixŭgŭxèè yema chaunatu ãëxgacŭxŭ choxŭ ingucuchixèèxŭrŭŭ. 30 —Rŭ ngèmaãcŭ ãëxgacŭ íchixŭxŭwa rŭ chomaã tá pechibŭe rŭ tá pexaxegŭ. Rŭ ãëxgacŭchicawa tá perŭtogŭ na norŭ maxŭcèx nŭxna pecagŭxŭ i guxŭma i Yudŭgŭ —ñanagŭrŭ.

*Ngechuchu nŭxŭ nixu na Pedru tá nŭgŭ icŭxŭ na norŭ ngúexŭ yŭixŭ
 (Mt 26.31-35; Mr 14.27-31; Cu 13.36-38)*

31 Rŭ Pedruxŭ ñanagŭrŭ ta ga Cori ga Ngechuchu: —Pa Pedrux, Chataná rŭ pexcèx ínaca na chixexŭmaã poraãcŭ pexŭ naxŭxŭcèx. 32 —Natŭrŭ choma rŭ Chaunatuŭxŭ cuxcèx chacèèxŭ na taguma nŭxŭ curŭxoxŭcèx na cuyaxŭxŭ. Rŭ ngèmacèx i cumax, Pa Pedru, rŭ ngèxguma chauxcèx cutaeguxgu, rŭ chanaxwèxe i nŭxŭ curŭngŭxèè i cumŭcŭgŭ na nŭmagŭ rŭ yaxŭgŭecheaxŭcèx —ñanagŭrŭ. 33 Rŭ ñanagŭrŭ ga Pedru: —Pa Corix, choma rŭ marŭ íchamemare na wŭxigu cumaã na chapoxcuxŭ rŭ èxna wŭxigu cumaã na chayuxŭ —ñanagŭrŭ. 34 Natŭrŭ Ngechuchu rŭ ñanagŭrŭ nŭxŭ: —Pa Pedrux, cumaã nŭxŭ chixu rŭ ñomatama i chŭtaxŭgu naxŭpa na otá icaxŭ, rŭ cuma rŭ tomaèxpŭxcŭna tá nŭxŭ quixu na tama choxŭ cucuáxŭ —ñanagŭrŭ.

Marŭ ningaica ga na guxchaxŭgŭ nŭxŭ ũpetŭxŭ

35 Rŭ yexguma ga Ngechuchu rŭ norŭ ngúexŭgŭna naca, rŭ ñanagŭrŭ: —Yexguma pexŭ chimugŭgu ngearŭ chocaãxgŭxemaã rŭ ngearŭ dièruãxgŭxemaã rŭ ngearŭ chapatuãxgŭxemaã, ¿rŭ íacŭ pexŭ taxuxŭ ga yexguma? —ñanagŭrŭ. Rŭ nŭmagŭ nanangãxŭgŭ rŭ ñanagŭrŭgŭ: —Taxuŭma —ñanagŭrŭgŭ. 36 Rŭ yexguma norŭ ngúexŭgŭxŭ ñanagŭrŭ ga Ngechuchu: —Natŭrŭ ñuxma rŭ texé ya petanŭwa ya chocaãxè

rü tanaxwèxe na ítayangexũ i tümaãrũ choca rü tümaãrũ dñeruchixũ rü ta. Rü ngëxguma texé ngearü taraãxgu rü tanaxwèxe i namaã tataxe i tümaãrũ gáuxũchiru na tümaãrũ poxũruũ i taracèx tataxexũcèx. ³⁷ —Erü pemaã nüxũ chixu rü chauchiga nixĩ i ngëma Tupanaãrũ ore i ümatüxũ i ñaxũ:

“Wüxi i máëtaxũrũ tá nanapoxcugü rü tá nayamèxgü”,
ñaxũ. Erü guxũma i ngëma chauchiga ümatüxũ i Tupanaãrũ ore i ümatüxũwa rü aixcüma ngëmaãcü tá ningu —ñanagürü. ³⁸ Rü yexguma ga norü ngúexũgü rü ñanagürügü: —Pa Corix, nuã nangëxma i taxre i tara —ñanagürügü. Rü nüma ga Ngechuchu rü nanangãxũ rü ñanagürü: —Marü ningu i ngëma —ñanagürü.

Ngechuchu rü Yechemaniwa nayayumüxë
(Mt 26.36-46; Mr 14.32-42)

³⁹ Rü yexguma ga Ngechuchu rü ínaxũxũ ga guma ñãnewa. Rü Oríbunecüarü Mèxpúnewa naxũ, yerü woetama nacüma nixĩ ga yéma na naxũüxũ. Rü norü ngúexũgü rü ta nawe narüxĩ. ⁴⁰ Rü yexguma yema nachicawa nanguxgu, rü norü ngúexũgüxũ ñanagürü: — ¡Tupanana naxcèx peça na pexũ nangũxëxũcèx na tama Chatanáãrũ ügagu chixexũgu peyixũcèx! —ñanagürü. ⁴¹ Rü yexguma ga Ngechuchu rü yéamaxũra 50 ga metruwa norü ngúexũgüna naxũ. Rü yexma nacaxãpüxü rü nayumüxë. ⁴² Rü ñanagürü: —Pa Chaunatüx, ngëxguma cuma cunaxwèxegu, ¡rü nüxna choxũ ínanguxuchixëẽ i ñãã ngúxũ i tá choxũ üpetüxũ! Natürü chanaxwèxe i cunaxü i curü ngúchaũ rü tama i choxrü — ñanagürü. ⁴³ Rü yexguma wüxi ga daxũcũãx ga Tupanaãrũ orearü ngeruũ rü naxcèx nangox, rü nanaporaxëẽ. ⁴⁴ Rü poraãcü nanaxixãchiãẽ ga Ngechuchu, rü yemacèx yexeraãcü nayumüxë. Rü yema na naxixãchiãẽxũmaã poraãcü nanaxaiyaãchi. Rü guma norü aiyacümaã nichuruxũne. Rü ñoma nagü waixũmüãnewa ichuruxũrũ nixĩ ga norü aiyacü. ⁴⁵ Rü yema ínayumüxëxũwa rü inachi ga Ngechuchu, rü norü ngúexũgütanüwa naxũ. Rü nüxũ inayangau ga na ínapeexũ yerü norü ngechaũmaã düxwa nayaxtae. ⁴⁶ Rü yexguma ga Ngechuchu rü ñanagürü nüxũ: —¿Tüxcüũ ípepee? ¡Íperüdagü rü Tupanana naxcèx peça na pexũ nangũxëxũcèx na tama Chatanáãrũ ügagu chixexũgu peyixũcèx! —ñanagürü.

Ngechuchuxũ niyauxgü
(Mt 26.47-56; Mr 14.43-50; Cu 18.2-11)

⁴⁷ Rü yexguma íyadexayane ga Ngechuchu, rü yéma nangugü ga muxũma ga duũxũgü. Rü Yuda ga Ngechuchuarü ngúexũchirëx ixixũ nixĩ ga naxũpëxexũ. Rü Ngechuchucèx nixũ na nüxũ nachúxãcüma nüxũ namoxëxũcèx. ⁴⁸ Rü Ngechuchu rü ñanagürü: — Pa Yudax, ¿tüxcüũ wüxi i chúxumaã cuchauechitae? —ñanagürü. ⁴⁹ Rü yema togü ga Ngechuchuarü ngúexũgü ga naxũtawa yexmagüxũ, rü yexguma nüxũ nadaugügu ga yema ngupetüxũ rü ñanagürügü nüxũ: —Pa Corix, ¿cunaxwèxexũ na taramaã tanadëixũ? —ñanagürügü. ⁵⁰ Rü wüxi ga Ngechuchuarü ngúexũ rü paigüarü ãëxgacüarü duũxũxũ nanapixëẽ, rü ínanadae ga norü tügünechinü. ⁵¹ Natürü Ngechuchu rü ñanagürü: — ¡Ngexrüma na pegü namaã pedëixũ! —ñanagürü. Rü yexguma ga Ngechuchu rü yema yatü ga ídaechinüxũxũ ningögü, rü nanamexëẽ. ⁵² Rü Ngechuchu namaã nidexa ga yema ãëxgacügü ga norü yauxwa yéma íxũ. Rü yema ãëxgacügütanüwa nayexmagü ga paigüarü ãëxgacügü, rü tupauca ga taxũneãrü purichíagüarü ãëxgacügü, rü Yudíugüarü ãëxgacügüerügü. Rü Ngechuchu rü ñanagürü nüxũ: —¿Tüxcüũ taragü rü naíxmenëãgümaã chaucèx nuã pexĩ ñoma wüxi i ngítëxãxũ chiixũrũ? ⁵³ —Rü guxũ ga ngunexũgu ga yexguma petanüwa chayexmagu ga tupauca ga taxũnewa, rü tama choxũ piyauxgü. Natürü marü nawa nangu na pexũ natauxchaxũ na choxũ piyauxgüxũ, erü ñoma nixĩ i ora na naporaxũ i Chataná —ñanagürü.

Pedru inayacux na Ngechuchuxũ nacuáxũ
(Mt 26.57-58, 69-75; Mr 14.53-54, 66-72; Cu 18.12-18)

⁵⁴ Rū Ngechuchuxū niyaxgū, rū paigüarū ãëxgacüpatawa nanagagü. Rū Pedru rü nawe narüxū, natürü yaxüguma nüxū nixūchigü. ⁵⁵ Rū yéma paigüarū ãëxgacüpataèxtüarü ngäxūwa, rü purichíagü nanaxügü ga wüxi ga üxü. Rū nüxū ínachomaëguãchi. Rū Pedru rü ta yéma natanüwa narüto. ⁵⁶ Rū yexguma yéma üxücutüwa natoxgu ga Pedru, rü wüxi ga ngecü ga ãëxgacüarü duüxū nüxū idau. Rū meãma nüxū idawenü, rü ngīgürügü: —Ñã yatü rü Ngechuchutanüxū nixī —ngīgürügü. ⁵⁷ Natürü Pedru rü tama nüxū nacuáxchaü ga yema ore, rü ñanagürü: —Pa Ngecüx, choma rü tama nüxū chacuèx ya yima Ngechuchu —ñanagürü. ⁵⁸ Natürü yixcamaxüra rü to ga duüxū Pedruxū nadau, rü ñanagürü nüxū: —Cuma rü ta Ngechuchutanüxū quixī —ñanagürü. Natürü Pedru nanangãxū rü ñanagürü: —Tama nixī, Pa Yatüx. Tama natanüxū chixī —ñanagürü. ⁵⁹ Rū wüxi ga ora ngupetüguwena rü to ga duüxū rü nüxī ñanagürüama: —Aixcümamaxüchi ñã yatü rü Ngechuchutanüxū nixī, erü Gariréaanecüãx nixī —ñanagürü. ⁶⁰ Rū yexguma ga Pedru rü ñanagürü: —Pa Yatüx, tama nüxū chacuèx na tacüchigaxū quixuxū —ñanagürü. Rū yexgumatama Pedru ídexasane rü nica ga otá. ⁶¹ Rū yexguma ga Cori ga Ngechuchu rü Pedrucèx nügü ínidau. Rū nüma ga Pedru rü nüxna nacuèxãchi ga yema ore ga Cori ga Ngechuchu namaã nüxū ixuxū ga ñaxū:

“Ñomatama i chütaxügu naxüpa na otá içaxū, rü tomaëxpüxcüna taxütáma cugü quixu na chorü duüxū quíxū”, ñaxū. ⁶² Rū yexguma ga Pedru rü ínaxüxū ga yéma. Rū poraãcüxüchi naxaxu.

Ngechuchugu nidaux-cüraügü
(Mt 26.67-68; Mr 14.65)

⁶³ Rū yema yatügü ga Ngechuchuna daugüxū, rü nagu nidauxcüraügü, rü nüxna nanaçuaixcagüxū. ⁶⁴ Rū nayadüxétügü, rü nachiwegu nidagügü, rü ñanagürügü: —¡Nüxū nacuèx na texé cuxū na idagüxū! —ñanagürügü. ⁶⁵ Rū muxüma ga to ga ore ga chixexū namaã nixugüe.

Ãëxgacügü ga tacügüpëxewa nanagagü ga Ngechuchu
(Mt 26.59-66; Mr 14.55-64; Cu 18.19-24)

⁶⁶ Rū yexguma yangunegu rü nangutaquëxegü ga Yudiügüarü ãëxgacügüerügü, rü paigüarü ãëxgacügü, rü ngüexëëruügü ga Moíchéarü mugüwa ngüxëëtaegüxū. Rū ñüxüchi norü purichíagüxū namu na napëxewa Ngechuchuxū nagagüxücèx. Rū yéma Ngechuchuna nacagü, rü ñanagürügü: ⁶⁷ —Toma rü nüxū tacuáxchaü rü cuma quíxū i Cristu rü éxna tama. ¡Tomaã cugü ixu! —ñanagürügü. Rū Ngechuchu nanangãxū rü ñanagürü: —Ngëxguma chi pemaã nüxū chixuxgu na choma chíxū i Cristu, rü tãu chima choxū peyaxögü. ⁶⁸ —Rü ngëxguma chi pexna chacaxgu na tacücèx choxna peçaxū, rü tãu chima choxū pengãxüga, rü tãu chima choxū pingëxgü. ⁶⁹ —Natürü ñuxmawena rü choma i Tupana Nane na duüxüxū chíxū rü Chaunatü ya Tupana ya poracüxütawa tá changëxma —ñanagürü. ⁷⁰ Rū yexguma guxüma ga yema ãëxgacügü nüxna nacagü, rü ñanagürügü: —¿Éxna cuma quíxū i Tupana Nane? —ñanagürügü. Rū Ngechuchu nanangãxū, rü ñanagürü: —Ngü. Tupana Nane chixī ngëxgumarüü i pematama nüxū pixuxürüü —ñanagürü. ⁷¹ Rū yexguma nügümaã ñanagürügü ga yema ãëxgacügü: —Ñuxma rü marü taxucèxma naxcèx tadau i to i duüxügü i nüxū ixuxū i ñã yatüchiga. Erü yixematama marü naãxwatama nüxū taxínüë i norü ore na ñuxü ñaxū —ñanagürügü.

23

Piratupëxewa nayexma ga Ngechuchu
(Mt 27.1-2,11-14; Mr 15.1-5; Cu 18.28-38)

¹ Rū guxüma ga yema ãëxgacügü rü inachigü, rü ãëxgacü ga Dumacüãx ga Piratuxütawa Ngechuchuxū nagagü. ² Rū yéma Piratupëxewa inanaxügüe ga

Ngechuchuxũ na yaxugüexũ. Rũ ñanagürügü: —Ñãã yatü rü nüxũ itayangaugü na cumaã nanuẽxẽãxũ i duũxügü. Rũ tomaã nüxũ nixu na tama namexũ na ãẽxgacü ya Dumawa ngẽxmacüaxũ na tanaxütanüxũ. Rũ nügü nixu na nüma na yĩxũ i torü ãẽxgacü i Cristu — ñanagürügü. ³ Rũ yexguma ga Piratu rü Ngechuchuna naca rü ñanagürü: —¿Cuma quiĩxũ i Yudiugüarü ãẽxgacü? —ñanagürü. Rũ Ngechuchu nanangãxũ rü ñanagürü: —Ngẽmããcü, ngẽma nüxũ quixuxũ chixĩ i chomax —ñanagürü. ⁴ Rũ yexguma ga Piratu rü ñanagürü nüxũ ga paigüarü ãẽxgacügü rü togü ga duũxügü: —Chauxcèx rü taxuũma i chixexũ naxü i ñãã yatü —ñanagürü. ⁵ Natürü nümagü rü yexeraãcü Ngechuchuxũ nixugüeama, rü ñanagürügü: —Nüma rü guxũ i Yudeaanewa nanangüexẽẽ i duũxügü na cuxchi naxaiexcèx. Rũ Gariréaanewa inanaxügü ga yemaãcü na duũxügüxũ nangüexẽẽxũ, rü ngẽmaãcü nanaxü ñuxmata nüma Yudeaanewa nangu —ñanagürügü.

Erodepẽxewa nayexma ga Ngechuchu

⁶ Rũ yexguma yemaxũ naxĩnügü ga Piratu, rü duũxügüna naca rü ngoxi Gariréaneccũãx yixĩ ga Ngechuchu. ⁷ Rũ yexguma Piratu nüxũ ñnügü ga aixcuma Gariréaneccũãx na yĩxũ ga Ngechuchu rü Gariréaneãrü ãẽxgacü ga Erodexütawa nanamu, yerü Yerucharéũwa nayexma ga Erode ga yexguma. ⁸ Rũ yexguma Ngechuchuxũ nadẽuxgu ga Erode rü nataãẽxũchi. Yerü nuxcümama poraãcü nüxũ nadauxchaũ, yerü ũpaacü nüxũ naxĩnügü ga nachiga. Rũ inananguxẽẽ na Ngechuchuxũ nadauxchaũxũ na napẽxewa naxüãxũ ga wüxi ga mexũ ga taxũ ga Tupanaãrü poramaã naxüxũ. ⁹ Rũ muẽxpüxcüna Ngechuchuna naca ga Erode. Natürü Ngechuchu rü tama nanangãxũ. ¹⁰ Rũ yéma nayexmagü ta ga paigüarü ãẽxgacügü rü ngüexẽẽruũgü ga Moĩchearü mugüwa ngüxẽẽtaegüxũ. Rũ nümagü rü poraãcü Ngechuchuxũ ñnaxuaxügü. ¹¹ Rũ yexguma ga Erode rü norü churaragü rü poraãcü chixri Ngechuchumaã nachopetü. Rũ nagu nidauxcüraũgü. Rũ ñuxũchi wüxi ga ãẽxgacüchirugu nayacuxẽẽgü na yemaãcü nüxũ nacugüexücèx. Rũ yemawena Piratuxũta wenaxãrü Ngechuchuxũ namu ga Erode. ¹² Rũ woo ũpaacü ga Piratu rü Erodemaã nügüchi na naxaiecxũ, natürü yema ngunexũgu nixĩ ga nügümaã nangüxmüexũ.

Piratu rü Ngechuchumaã nanaxuegu na nayuxücèx (Mt 27.15-26; Mr 15.6-15; Cu 18.39-19.16)

¹³ Rũ yexguma ga Piratu rü nanangutaquẽxexẽẽ ga paigüarü ãẽxgacügü, rü togü ga Yudiugüarü ãẽxgacügü, rü guxũma ga duũxügü ga yéma yexmagüxũ. ¹⁴ Rũ Piratu ñanagürü nüxũ: —Pema nuã chauxcèx penaga i ñãã yatü, rü nüxũ pixu na chomaã nanuẽxẽãxũ i duũxügü. Natürü pepẽxewa nüxna chaca i ngẽmachiga rü ñuxma rü marü nüxũ pedau na taxuũma nawa ichayangauxũ i ngẽma chixexũ i naxcèx ípenaxuaxũxũ. ¹⁵ —Rü Erode rü ta taxuũma nawa inayangau i ngẽma chixexũ, rü ngẽmacèx wenaxãrü taxcèx nanamuegu. Rũ dücax, taxuũma i chixexũ naxü na ngẽmagagu nayuxücèx. ¹⁶ —Rü ngẽmacèx chorü churaragüxũ tá chamu na naçuaixgüãxücèx, rü ñuxũchi tá chayangẽx — ñanagürü. ¹⁷ Rũ nüma ga Piratu rü guxügüma ga yexguma yema petawa nanguuũxgu rü duũxügüxũ nataãẽxẽẽchaũ namaã ga na yangéãxũ ga wüxi ga yatü ga poxcuxũ. ¹⁸ Natürü guxũma ga yema duũxügü rü wüxigu inanaxügüe ga aita na naxüexũ. Rũ ñanagürügü: —¡Napoxcu i ngẽma Ngechuchu! ¡Rü Barabãxũ waxi ñnanguxuchixẽẽ! —ñanagürügü. ¹⁹ Rũ yema Barabã rü napoxcu yerü ũpaacü Yerucharéũwa ãẽxgacümaã nananuẽxẽẽ ga duũxügü, rü ñuxũchi namaãeta. ²⁰ Natürü ga Piratu rü wenaxãrü duũxügümaã nidexa, yerü nüma rü Ngechuchuxũ ningéxchaũ. ²¹ Natürü ga duũxügü rü yexeraãcü aita naxüe rü ñanagürügü: —¡Curuchawa yapota! ¡Curuchawa yapota! —ñanagürügü. ²² Rũ Piratu norü tomaẽxpüxcüna duũxügümaã nidexa, rü ñanagürü: —Dücèx, ¿tacü rü chixexũ ãxna naxü? Choma rü taxuũma i chixexũxũ nawa ichayangau na ngẽmacèx chanayuxẽẽxũ. Rũ chorü churaragüxũ tá chamu na naçuaixgüãxücèx, rü ñuxũchi tá chayangẽx —ñanagürü. ²³ Natürü nümagü ga duũxügü rü yexeraãcü aita naxüeama,

rü naxcèx ínacagü na curuchawa yapotaãxücèx. Rü yema na nayexeragüamaxü ga yema duüxügü rü düxwa ga Piratu rü duüxügüga naxĩnũ. ²⁴ Rü nüma ga Piratu rü norü churaragüxü namu na naxügüãxücèx ga yema duüxügü naxwèxegüxü. ²⁵ Rü Barabáxü ningëx, yerü yema nixĩ ga duüxügü naxcèx ícagüxü. Rü yema Barabá nixĩ ga poxcuxü naxcèx na duüxügüxü ãëxgacümaã nanuëxëëxü rü namáëtaxü. Rü yexguma ga Piratu rü duüxügüna Ngechuchuxü namu na namaã naxügüãxücèx ga yema nümagü nanaxwèxegüxü.

Ngechuchuxü curuchawa nipotagü

(Mt 27.32-44; Mr 15.21-32; Cu 19.17-27)

²⁶ Rü yema duüxügü rü Ngechuchuxü nigagü na curuchawa yanapotagüãxücèx. Rü yexguma Ngechuchuxü yagagüyane, rü yexma namagu nüxü nangaugü ga wüxi ga yatü ga Chirencüãx ga naãnewa ne ücü. Rü Chimáü nixĩ ga naega. Rü Chimáüxü niyauxgü ga duüxügü, rü naätügu ngĩxü naxünagügü ga curucha na Ngechuchuwe ngĩxü nangexücèx. ²⁷ Rü muxüma ga duüxügü rü nawe narüxĩ. Rü yema duüxügütanüwa nayexmagü ga muxüma ga ngexügü ga auxexü rü aita üexü, yerü Ngechuchucèx nangechaü. ²⁸ Natürü ga Ngechuchu rü yema ngexügüxü nadawenü, rü ñanagürü nüxü: —Pa Ngecügüx, Pa Yerucharéücüãx ¡täxü i chauxcèx pexauxexü, natürü pegüçèxtama pexauxe rü pexacügücèx! ²⁹ —Erü nawa tá nangu i ngunexügü i nagu ñagüxü tá i duüxügü:

“Tataãëgü ya yixema ngeãxta ya taxuacüma ãxãcügüxe, rü taguma tacharaügüxe, rü taguma maixãcügüxe, erü taxucatáma tümãxãcügücèx taxauxe”, ñagüxü. ³⁰ —Rü ngëxguma i duüxügü rü tá mëxpünegüxü nacèèxügü rü ñanagürügü tá:

“¡Toétügu rübuemü!” ñanagürügü tá. Rü tá ngüchitaerügüxü nacèèxügü, rü ñanagürügü tá:

“¡Toxü idüxétügü!” ñanagürügü tá. ³¹ —¿Erü ñuxãcü tá namaã nachopetü i ngëma duüxügü i aixcüma chixexü ügüxü, ega ñaã chixexü chomaã naxügügu na woo taxuüma i chixexü chaxüchiréxü? —ñanagürü ga Ngechuchu. ³² Rü yéma nanagagü ta ga taxre ga máëtagüxü na Ngechuchurüü curuchawa yanapotagüãxücèx. ³³ Rü yexguma nawa nangugügu ga yema nachica ga Duüxëëruchinëxãgu äegaxü, rü yéma curuchawa Ngechuchuxü nipotagü. Rü yema taxre ga máëtagüxü rü ta Ngechuchurüü curuchawa nipotagü, wüxi ga norü tügünecüwawa rü to ga norü toxwecüwawa. ³⁴ Rü yexguma Ngechuchuxü curuchawa íyapotagüyane, rü ñanagürü ga Ngechuchu: —Pa Chaunatüx, ¡nüxü nangechaü i ñaã duüxügü, erü tama nüxü nacüèxgü na tacü rü chixexü naxüexü! —ñanagürü. Rü yema churaragü rü nanade ga Ngechuchuchiru. Rü ñuxüchi wüxi ga díëru ngĩxü nañanagügü na yemawa nüxü nacüèxgüxücèx na texéarü tá yĩxü ga yema Ngechuchuchiru. ³⁵ Rü duüxügü rü yéma inarüdaunü. Natürü yema Yudíugüarü äëxgacügü rü Ngechuchuxü nacugüe, rü ñanagürügü: —Nüma rü togüxü namaxëxëë. ¡Ëcü, ñuxma rü nügütama namaxëë ega aixcüma Cristu ya Tupana nüxü unetacü yixĩgu! —ñanagürügü. ³⁶ Rü yema churaragü rü ta Ngechuchuxü nacugüe. Rü naxütawa naxĩ, rü nüxna nanaxã ga binu ga üxchiücü. ³⁷ Rü ñanagürügü nüxü: —Ega Yudíugüarü äëxgacü ya tacü quixĩgu, ¡rü cugütama rüngüxëë i ñuxmax, na ícunguxuchixücèx! —ñanagürügü. ³⁸ Rü norü curuchatapëxewa nipota ga wüxi ga mürapewaxacü ga äegatachinüxü ga Griégügügawa rü Dumacüãxgügawa rü Yudíugügawa ümatüxü ga ñaxü: —Daa nixĩ ya Yudíugüarü Äëxgacü ya Tacüxüchi —ñaxü. ³⁹ Rü wüxi ga yema máëtaxü ga naxrüü curuchawa ipotaxü rü Ngechuchumaã naguxchiga, rü ñanagürü: —Ega aixcüma Cristu quixĩgu, ¡rü cugütama rüngüxëë na ícunguxuchixücèx, rü toxü rü ta rüngüxëë na ítangüxüxücèx! —ñanagürü. ⁴⁰ Natürü ga yema to ga máëtaxü rü namücüxü ínangaxüchiamá, rü ñanagürü nüxü: —Cuma rü naxrüü na curuchawa quipotachiréxü, ¿rü ngëxguma rü ta tama Tupanaxü cumuüxü? ⁴¹ —Yixema rü name

nixĩ na ipoxcuexũ erũ tagagutama nixĩ i ngũxũ ingegũxũ erũ ngẽma nixĩ i tórũ natanũ naxcèx ga yema chixexũ ga ixügũxũ. Natürũ daa yatũ rũ taxuũma i chixexũ naxũ — ñanagürũ. ⁴² Rũ yexguma ga yema máetaxũ rũ ñanagürũ: —Pa Ngechuchux, ¡choxna nacuèxãchi i ngëxguma wenaxârũ núma cuxũxgu rũ ãëxgacũxũ ícunguxgu! —ñanagürũ. ⁴³ Rũ Ngechuchu nanangãxũ rũ ñanagürũ: —Aixcũma cumaã nüxũ chixu rũ ñomatátama i ngunexũgu chomaã cungëxma i mexëchixũ i naãnewa —ñanagürũ.

Nayu ga Ngechuchu

(Mt 27.45-56; Mr 15.33-41; Cu 19.28-30)

⁴⁴ Rũ yexguma tocuchiwa nanguxgu rũ guxũwama naxëãne ñuxmata tomaëxpũxaru orawa nangu ga yáuanecũ. ⁴⁵ Rũ ga üèxcũ rũ nixo. Rũ tupauca ga taxũneãrũ tüyemachiũxũ rũ ngãxũgu narügaute. ⁴⁶ Rũ yexguma ga Ngechuchu rũ poraãcũ aita naxũ rũ ñanagürũ: —Pa Chaunatũx, cuxmëxwa chanangëx i chauãë —ñanagürũ. Rũ yema ñaxguwena rũ nayu. ⁴⁷ Rũ yexguma yema churaragüaru ãëxgacũ ga Dumacũãx nüxũ dëuxgu ga yema ngupetũxũ, rũ Tupanaxũ nicuèxũũ, rũ ñanagürũ: —Aixcũma ñaã yatũ rũ taxuũma i chixexũ naxũ —ñanagürũ. ⁴⁸ Rũ guxũma ga yema togũ ga duũxũgũ ga yema yexmagũxũ rũ nüxũ daugũxũ ga yema ngupetũxũ, rũ poraãcũ nangechaũgũãcũma napatacèx nawoegu. ⁴⁹ Natürũ guxũma ga yema duũxũgũ ga aixcũma Ngechuchuxũ cuèxgũxũ rũ yaxũwa- tama nüxũ narüdaunũ ga yema ngupetũxũ. Rũ yema duũxũgũtanũwa ta iyexmagũ ga yema ngecũgũ ga Ngechuchuwe rüxĩcũ ga yexguma Gariréaanewa ne naxũxgu.

Ngechuchu rũ naxmaũgu nayanaxüchigũ

(Mt 27.57-61; Mr 15.42-47; Cu 19.38-42)

⁵⁰ Rũ nayexma ga wüxi ga yatũ ga Yudéaanewa yexmane ga ñãne ga Arimatéacũãx, rũ Yúche nixĩ ga naega. Rũ núma rũ Yudíugüaru ãëxgacũgũtanũwa naxũ, natürũ namecũma rũ meã namaxũ. ⁵¹ Rũ núma rũ poraãcũ ínananguxëë na ínanguxũ ga Tupana na yema ãëxgacũ yĩxüçèx. Rũ yemacèx tama norũ me nixĩ ga yema Ngechuchumaã naxügũxũ ga yema togũ ga namücũgũ ga ãëxgacũgũ. ⁵² Rũ núma ga Yúche rũ Piratuxũtawa naxũ, rũ Ngechuchuxũnecèx ínayaca. ⁵³ Rũ curuchawa nayayaxu ga Ngechuchuxũne, rũ wüxi ga düxruũmaã nananuque. Rũ wüxi ga naxmaũ ga nutaarũ mëxpũxũwa yacaxmaũgũxũgu nayanaxüchuchi. Rũ yema naxmaũ rũ nayexwacaxũ, rũ taguma texéxũ nagu yaxüchigũxũ nixĩ. ⁵⁴ Rũ yema nixĩ ga ngunexũ ga nagu Yudíugũ nügũ imexëëgũxũ naxcèx ga ngũxchigaarũ ngunexũ. Rũ marũ ningóonechaũ ga yema ngũxchigaarũ ngunexũ. ⁵⁵ Rũ yema ngecũgũ ga Ngechuchumaã Gariréaanewa ne ícũ, rũ Ngechuchuxũ íyaxüchigũxũwa íyadaugũ. Rũ nüxũ idaugũ ga ñuxãcũ na íyaxüchigũãxũ ga naxũne. ⁵⁶ Rũ yexguma ngĩpatawa nangugũgu, rũ inamexëëgũ ga pumara rũ chixũ. Rũ irüngũgũ ga ngũxchigaarũ ngunexũgu, yerũ yema nixĩ ga Tupanaãrũ mu.

24

Yuwa ínarüda ga Ngechuchu

(Mt 28.1-10; Mr 16.1-8; Cu 20.1-10)

¹ Rũ pëxmamaxũchi ga yüxüaru ngunexũgu, rũ yema ngecũgũ rũ wenaxârũ naxmaũwa íyadaugũ. Rũ yema inangegũ ga yema pumara ga yamexëëgũxũ. Rũ naĩgũ ga ngecũgũ rũ ta ngĩxũ íyaxüçüçü. ² Rũ yexguma yema nangugũgu, rũ nüxũ iiyangaugũ ga marũ na ínaxügachixũ ga guma nuta ga naxmaũãrũ ngũxtaũxũ. ³ Rũ yexma nagu íchocu, natürũ taxuũma idaugũ ga naxũne ga Cori ga Ngechuchu. ⁴ Rũ yema ngecũgũ rũ poraãcũ íbaixãchiãëgũ, rũ tama nüxũ icuèxgüéga ga tacũ na naxügũxũ. Rũ ngürüãchi nüxũ idaugũ ga taxre ga yatũgũ ga ngĩxũtagu chigũxũ ga poraãcũ iyaurachirutanüçüxũ. ⁵ Rũ yema ngecũgũ rũ iyarũmaxãchierugũ, yerũ poraãcũ imuũë. Rũ yemacèx ga yema yatũgũ rũ

ñanagürügü ngĩxũ: —¿Tũxcũũ nuxã yuetamaũgu naxcèx peyadau ya yima maxũcü? ⁶ — Nataxuma i nuã ya Ngechuchu, erũ marũ wena namaxũ. ¡Rũ nüxna pecuèxãchie ga yema ore ga pemaã nüxũ yaxuxũ ga yexguma Gariréaanewa nayexmagu! ⁷ —Yerũ pemaã nüxũ nixu ga ñuxãcü pecaduãxgũxũ tá na yayauxgũxũ, rü curuchawa na yapotagũãxũ, rü ñuxãcü tomaẽxpũx i ngunexũgu tá wena na namaxũxũ —ñanagürügü ga yema yatügü. ⁸ Rũ yexguma ga yema ngecügü rü nüxna icuèxãchie ga yema Ngechuchuarü ore. ⁹ Rũ nüxna iwoegu ga yema naxmaũ. Rũ yema 11 ga Ngechuchuarü ngúexũgũmaã nüxũ iyarũxugüe ga guxũma ga yema nüxũ nadaugũxũ. Rũ guxũma ga togü ga yaxõgũxũ ga yema yexmagũxũmaã rü ta nüxũ iyarũxugüe. ¹⁰ Rũ María ga Magadácũãx, rü Cuána, rü María ga Chaũtiágu naẽ, rü naĩgü ga ngecügü iyixĩ ga wũxigu yema Ngechuchuarü ngúexũgũxũtawa nangegücü ga yema ore. ¹¹ Natürü yema ngúexũgücèx rü ñnucamare nixĩ ga yema ore, rü tama ngĩxũ nayaxõgũchaũ. ¹² Natürü ga Pedru rü inañaãchi, rü ñnayadau ga naxmaũwa. Rũ yexguma nagu yadaucuchigu ga naxmaũ, rü nüxũ nadau ga düxruũgü ga wũxicũwagu na nanuxũ. Rũ poraãcü nabaixãchiãẽ namaã ga yema ngupetũxũ, rü ñaixãchiãẽãcüma napatacèx nataegu.

*Emaũãrũ namawa nangox ga Ngechuchu
(Mr 16.12-13)*

¹³ Rũ yema ngunexũgutama rü taxre ga yema Ngechuchuarü ngúexũgü rü wũxi ga ñãne ga Emaũwa naxĩ. Rũ norũ yaxũ ga guma ñãne rü 11 ga kilõmetru nixĩ nüxna ga Yerucharéũ. ¹⁴ Rũ yexguma namagu naxĩyane, rü nachigagu nidexatanũ ga guxũma ga yema ngupetũxũ. ¹⁵ Rũ yexguma yemachigagu iyadexatanũyane, rü nümatama ga Ngechuchu rü ngürũãchi naxcèx yema nixũ, rü natanũgu nixũchigü. ¹⁶ Natürü yema ngúexũgü rü woo Ngechuchuxũ nadaugü, rü tama nüxũ nacuèxgüéga na Ngechuchu yĩxũ, yerũ Tupana rü nanatoõégü na tama Ngechuchuxũ nacuèxgũxũcèx. ¹⁷ Rũ yexguma ga Ngechuchu, rü yema taxre ga ngúexũgũna naca, rü ñanagürü: —¿Tãcũchiga nixĩ i pidexatanũxũ na nuxã namagu na pexĩxũ? ¿Rũ tãcũcèx nixĩ i pengechaũẽxũ? — ñanagürü. ¹⁸ Rũ wũxi ga yema ngúexũ ga Creopágu aegaxũ nanangãxũ, rü ñanagürü: —Guxũma i duũxũgü nixĩ i nüxũ cuáxũ ga yema yexwaca ngupetũxũ ga Yerucharéũwa. Rũ cuma na yexma cunaxũãnechiréxũ rü maneca cuxicatama nixĩ i tama nüxũ cucuáxũ ga yema ngupetũxũ —ñanagürü. ¹⁹ Rũ yexguma ga nüma ga Ngechuchu rü ñanagürü: —¿Tãcũ nangupetü ga Yerucharéũwa? —ñanagürü. Rũ nanangãxũgü ga yema ngúexũgü, rü ñanagürügü: —Poraãcü chixexũ nüxũ naxüpetü ga Ngechuchu ga Nacharétucũãx. Nüma ga Ngechuchu rü Tupanaãrũ orearü uruũ ga mecü nixĩ. Rũ Tupanapẽxewa rü duũxũgüpẽxewa namecüma rü nanaxü ga taxũ ga cuèxruũgü ga Tupanaãrũ poramaã naxũxũ, rü meã duũxũgũxũ nangúexẽ. ²⁰ —Natürü ga paiguarü aẽxgacügü rü tórü aẽxgacügü rü nayayauxgü. Rũ Dumacũãx ga aẽxgacügüna nanamugü na curuchawa yapotagũãcüma nayuxẽégũãxũcèx. Rũ yemaãcü nayamèxgü. ²¹ —Toma nüxũ tacuèxgu rü nüma tá nixĩ i tomaã naporaxũ na ñanguxuchixũcèx i tachiũãne nüxna i Dumacũãxãrũ aẽxgacü. Rũ ñuxma rü marũ tomaẽxpũx i ngunexũ nawena nixĩ ga na yamèxgũãxũ. ²²⁻²³ —Natürü tama ngẽxĩcatama nixĩ, yerũ ñuxre ga ngexũgü ga totanũxũ rü toxũ ñayabaixgügü. Yerũ yema ngexũgü rü pèxmamaxũchi ñayadaugü ga naxmaũwa, rü tama nüxũ ñayangaugü ga naxũne ga guma Ngechuchu. Rũ yemacèx ga yema ngexũgü rü toxcèx nawoegu, rü tomaã nüxũ nayarũxugüe ga nüxũ na nadaugũxũ ga Tupanaãrũ orearü ngeruũgü ga daxũcũãx. Rũ yema daxũcũãxgü rü namaã nüxũ nixugügü ga Ngechuchu rü na namaxũxũ —ñanagürügü. ²⁴ Rũ yexguma yema ngexũgüarü orexũ taxĩnũégü, rü ñuxre ga tomücügü rü naxmaũwa ñayadaugü. Rũ yema ngexũgü nüxũ ixugũxũrũũ nüxũ ñayangaugü ga naxmaũ. Natürü tama Ngechuchuxũ nadaugü —ñanagürügü. ²⁵ Rũ yexguma ga Ngechuchu rü ñanagürü nüxũ: —¿Tũxcũũ tama peãẽta ipexü i pemax? ¿Rũ ñuxgura tá ta ipeyaxõgũxũ i nuxcümaũgũxũ ga Tupanaãrũ orearü

uruŕgüarü ore? ²⁶ ¿Rü tama êxna nüxü pecuèx ga yema ngúxü tá na yangexü ga Cristu naxüpa na daxüguxü i naãnewa naxüxü, na ngema aëxgacü yïixücèx? —ñanagürü. ²⁷ Rü yexguma inanaxügü ga namaã na nangoxëãxü ga guxüma ga Tupanaärü ore ga nachiga ümatüxü. Rü yema Tupanaärü ore ga Moïché ümatüxümaã inanaxügü. Rü ñuxüchi namaã nüxü nixu ga guxüma ga yema Tupanaärü ore ga nuxcümaügüxü ga Tupanaärü orearü uruŕgü ümatügüxü. ²⁸ Rü yexguma yema ñãne ga Emaüwa nangugügu, rü Ngechuchu rü nümaxü toxnamana nügü naxüxëeneta. ²⁹ Natürü ga yema ngúexügü rü nüxü nacèexügü na yexma naxãxüxcèx, rü ñanagürügü: —¡Nuxma toxütagu nape, erü marü nayáuane, rü paxa tá nachüta! —ñanagürügü. Rü yexguma ga Ngechuchu rü nawe yexma narüxãxü. ³⁰ Rü yexguma chibücèx wüxiwa mechawa natogügu, rü Ngechuchu nanayaxu ga pãü. Rü Tupanana moxë naxcèx naxã. Rü ñuxüchi inanabücu, rü wüxichigüna nanaxã. ³¹ Rü yexgumatama naãxü nicuèxãchitanü. Rü nüxü nacuèxgü na guma yïixü ga Ngechuchu. Natürü yexgumatama ngürüãchi inayarütaxu ga nümax. ³² Rü yema taxre ga ngúexügü rü nügümaã ñanagürügü: —¿Tama êxna ga itaãëgüxü ga tórü maxünewa ga yexguma namawa tamaã yadeaxgu rü tamaã nangoxëãgu ga Tupanaärü ore i ümatüxü? —ñanagürügü. ³³ Rü yexgumatama ga yema taxre ga ngúexügü rü inaxïãchi ga Yerucharéücèx na nawoeguxü. Rü yexma nüxü nayangau ga na íngutaquëxegüxü ga yema 11 ga Ngechuchuarü ngúexügü rü togü ga natanüxügü. ³⁴ Rü yema duüxügü ga íngutaquëxegüxü rü ñanagürügü nüxü: —Aixcüma nixi i marü wena namaxüxü ya Cori ya Ngechuchu. Rü Chimãü ga Pedru rü marü nüxü nadau —ñanagürügü. ³⁵ Rü yexguma ga yema taxre ga ngúexügü rü ta nüxü nixugügu ga yema nüxü ngupetüxü ga namawa, rü ñuxãcü nüxü na yacuèxãchitanüxü ga guma na yïixü ga Ngechuchu ga yexguma pãü inabücuxgu.

*Ngechuchu rü norü ngúexügücèx nangox
(Mt 28.16-20; Mr 16.14-18; Cu 20.19-23)*

³⁶ Rü yexguma yemaãcü íyadexagüyane, rü ngürüãchi norü ngãxütanügu nachi ga Ngechuchu. Rü nüxü narümoxë, rü ñanagürü: —Nuxmaë Pa Chorü Duüxügüx —ñanagürü. ³⁷ Natürü nümagü rü nabaixãchiãëgü, rü poraãcü namuë, yerü nagu naxïnüëgu rü wüxi ga naxchixixümare nadaugü. ³⁸ Natürü ga Ngechuchu rü ñanagürü nüxü: —¿Tüxcüü pebaixãchiãëgü rü tama peyaxögü na choma chíxü? ³⁹ —¡Dücèx, nüxü pedèux ya choxmëxgü rü chaucutügü! Rü chomatama chixi. ¡Rü choxü pingögü rü meã choxü perüdaunü! Erü wüxi i naxchixi rü tama choxü pedauxürüü naxãmachi rü naxãxchinèxã —ñanagürü. ⁴⁰ Rü yema ñaxguwena, rü nüxü nanawëx ga naxmëx rü nacutü. ⁴¹ Natürü ga yema duüxügü rü yexguma rü ta tama nüxü nayaxögü, yerü nabaixãchiãëgü rü nataãëgü. Rü yemacèx ga Ngechuchu rü nüxna naca rü ñanagürü nüxü: —¿Pexü nangëxmaxü i õna i nuã? —ñanagürü. ⁴² Rü yexguma nüxna nanaxãgü ga wüxi ga choxni ga iguxüchipëxe rü wüxiweü ga berure. ⁴³ Rü nüma ga Ngechuchu rü nanayaxu. Rü yema duüxügüpëxewa nanangõx. ⁴⁴ Rü ñuxüchi ñanagürü nüxü: —Rü yema choxü ngupetüxü rü yema nixi ga pemaã nüxü chixuxü ga yexguma tauta chayuxgu rü petanüwa chayexmagu. Yerü yexguma rü pemaã nüxü chixu rü ñacharügü:

“Rü tá ningu i guxüma i Tupanaärü ore i chauchiga ümatüxü i Wiyaegüarü poperawa, rü Moïché ümatüxü i mugüwa, rü ore i nuxcümaügüxü ga Tupanaärü orearü uruŕgü ümatüxüwa”, ñacharügüchirëx pexü. ⁴⁵ Rü yemaãcü namaã nanangoxëã ga Tupanaärü ore ga ümatüxü. ⁴⁶ Rü ñanagürü nüxü: —Tupanaärü ore i ümatüxüwa rü nüxü nixu rü choma i Cristu rü tá chayü, rü tomaëxpüx i ngunexügu rü tá wena chamaxü. ⁴⁷ —Rü yematama ore i ümatüxüwa nüxü nixu rü tá chauégagu tá nixi i nüxü yaxugüxü i ore i mexü. Rü Yerucharéüwa tá inaxügü i ngëma ñuxmatáta guxü i naãnewa nangu na ngëmaãcü duüxügü nüxü rüxoexücèx i nacüma i chixexü na Tupana nüxü nüxü ngechaüxücèx i norü pecadugü. ⁴⁸ —Rü ñuxma rü pematama nixi i chorü orearü

uruŭgü, rü tá duŭxŭgümaã nüxŭ pixu ga yema chauxŭtawa nüxŭ pedaugŭxŭ rü nüxŭ pexŭnŭëxŭ. ⁴⁹ —Rü dücax, choma rü pexcèx tá núma chanamu i Naãë i Üünexŭ ga pexcèx nüxŭ naxunetaxŭ ya Chaunatü. Natürü chanaxwèxe i númatátama daa ããne ya Yerucharéŭwa pengëxmagü, ñuxmatáta penayauxgü i ngëma Tupanaãë i Üünexŭ i daxŭwa ne ũxŭ i tá pexŭ poraexëëxŭ —ñanagürü.

Ngechuchu rü daxŭguxŭ ga naãnewa naxŭ

(Mr 16.19-20)

⁵⁰ Rü yexguma ga Ngechuchu rü Yerucharéŭärü toxnamana norü ngúexŭgüxŭ nagagü, ñuxmata Betániãärü ngaicamana nangugü. Rü yéma norü ngúexŭgüétü nawémëx, rü Tupanana naxcèx naca na nüxŭ nangŭxëëxŭcèx. ⁵¹ Rü yexguma yema ngúexŭgücèx nayumüxëguwena rü nüxna nixŭgachi. Rü Tupana daxŭguxŭ ga naãnewa nanaga. ⁵² Rü nümagü ga norü ngúexŭgü rü Ngechuchuxŭ nicuèxüŭgü. Rü ñuxŭchi taãëácüma Yerucharéŭcèx nawoegu. ⁵³ Rü guxŭguma tupauca ga taxŭnewa naxŭxŭ, rü yéma Tupanaxŭ nicuèxüŭgü. Rü ngëmaãcü yï.

ORE I MEXŨ GA CUÁŨ ÜMATÜXŨ

Tupana Nane rü duïxũãcü nangox

¹ Naxüpa ga guxüma, rü marü nayexma ga Tupana Nane. Rü Tupanamaã nayexma rü woetama Tupana nixĩ ga nümax. Nüma rü Tupanaãrü Ore nixĩ i naega erü tamaã nüxũ nixu i Tupanachiga. ² Rü naxüpa ga guxüma rü nüma ga Tupana Nane rü naxütawatama nayexma. ³ Rü guma Nanexũ nixĩ ga namuxũ ga Tupana na naxüãxüçèx ga guxüma. Rü nataxuma i tacü i ñuxma ngëxmaxũ i tama nüma naxüxũ. ⁴ Rü Nanewa nixĩ i nangexmaxũ i maxũ. Rü ngema maxũ rü guxũ i duïxüğüarü ngóonexëëruũ nixĩ. ⁵ Rü yima Nane rü woo chixexũ íporaxüwa rü duïxüğüxũ nüxũ nacuèxëë i Tupanachiga. Rü ngëma chixexũ rü taxucü-rüwama ngëma mexũxũ narüyexera. ⁶⁻⁷ Rü nayexma ga wüxi ga yatü ga CuáŨ ga baiïxëëruũgu äegacü. Rü guma nixĩ ga Tupana núma namucü na nüxũ yaxuxüçèx ga nachiga ga guma ngóonexëëruũ na yemaãcü guxãma nüxũ yaxögüxüçèx. ⁸ Rü nüma ga CuáŨ rü tama Tupana Nane ya duïxüğüarü ngóonexëëruũ nixĩ. Natürü nüma nixĩ ga Tupana núma namuxũ na nüxũ yaxuxüçèx ga nachiga ga guma ngóonexëëruũ. ⁹ Rü ñoma ga naãnewa nangu ya yima aixcüma Tupana Nane ixĩcü i guxüma i duïxüğüxũ ngóonetanüxëëcü. ¹⁰ Rü nüma ga guma Nane ga Tupanaãrü Ore ixĩcü rü ñoma ga naãnewa nayexma. Rü woo nagagu nixĩ ga naxüãxũ ga guxüma ga ñoma ga naãne, natürü ñoma ga naãne-cüãx ga duïxüğü rü tama nüxũ nacuèxgü na texe yĩxũ. ¹¹ Nuã norü naãnewatama nangu, natürü norü duïxüğü ga Yudíugü rü tama nanayauxgü. ¹² Natürü guxema nayauxgüxe rü nüxũ yaxögüxe rü tüxũ nanatauxchaxëë na Tupanaxãcügü tixíğüxũ. ¹³ Rü ñuxma rü Tupanaxãcügü tixíğü ga guxema yaxögüxe. Natürü tama noxri tabuexügagu nixĩ i ngëma rü tama tümanatüğüarü ngúchaügagu nixĩ. Natürü i ñuxma rü Tupanaxãcügü tixíğü ga guxema yaxögüxe yerü nümatama ga Tupana rü naxãcüğüxũ tüxũ nixíğüxëë. ¹⁴ Rü nüma ya yima Nane ya Tupanaãrü ore ixĩcü rü duïxũãcü nangox. Rü totanüwa nayexma rü poraãcü toxũ nangechaũ rü aixcüma nixĩ ga norü ore. Rü toma nüxũ tadaugü ga ñuxãcü na naxüünexũ. Rü Nanatüxütawa nanayaxu ga yema üüne yerü nügümaã nüxũ nawüxicèx ga nüma. ¹⁵ Rü gumachigaxũ nixĩ ga yaxuxũ ga CuáŨ ga yexguma ñaxgu: —Daa nixĩ ga guma pemaã nüxũ chixuchigacü ga yexguma ñachaxgu:

“Rü yima choweama ne ücü rü choxũ rüyexeracü nixĩ, yerü woetama marü nayexma ga tauta chabuxgu ga chomax”, ñanagürü ga CuáŨ. ¹⁶ Rü yima Tupana Nane rü namecümümaxüchi rü naxmëxwa nangëxma i guxüma. Rü naxütawa nixĩ i nayauxgüxũ i guxüma i ngüxëëgü. ¹⁷ Rü Moïchéxũ nixĩ ga namuxũ ga Tupana na tüxũ nangúexëëxüçèx ga yema norü mugü. Natürü Ngechuchu ya Cristuxũ nixĩ ga namuxũ na tüxũ nangúexëëxüçèx na yigü ingechaüğüxũ rü nagu imaxëxüçèx i ore i aixcüma ixĩxũ. ¹⁸ Taguma texé ñuxgu nüxũ tadau ga Tupana. Natürü Nane ya nügümaã nüxũ wüxicacü nixĩ ya tüxũ nüxũ cuèxëëcü. Rü yima Nane rü Tupanaxüchi nixĩ, rü Nanatümaã wüxiwa nangëxmagü.

CuáŨ ga baiïxëëruũ rü nüxũ nixu ga Ngechuchu ya Cristuchiga

(Mt 3.11-12; Mr 1.7-8; Lc 3.15-17)

¹⁹ Rü yema Yudíugüarü äëxgacüğü ga Yerucharéüçüãx rü CuáŨ ga baiïxëëruũxütawa nanamugü ga paigü rü Lebítanüxüğü na nüxna yacagüexüçèx na texe yĩxũ. ²⁰ Rü nüma ga CuáŨ rü meãma nügü nixu, rü ñanagürü: —Tama nixĩ i Cristu chíxũ i chomax — ñanagürü. ²¹ Rü wenaxãrü nüxna nacagü rü ñanagürüğü: —¿Texé ëxna quixĩ? ¿Éxna cuma ga nuxcümaücü ga Tupanaãrü orearü uruũ ga Ería quiïxũ? —ñanagürüğü. Rü CuáŨ nanangãxũ rü ñanagürü: —Tama Ería chixĩ —ñanagürü. Rü nümagü rü wenaxãrü nüxna

nacagüe rü ñanagürügü: —¿Éxna cuma quiixü ya yima orearü uruü ga Moiché nüxü ixucü ga ínguxchaücü? —ñanagürügü. Rü CuáŨ nanangãxü rü ñanagürü: —Tama yima chixĩ —ñanagürü. ²² Rü yexguma ñanagürügüama: —¿Éxna texé quiixü? Erü tanaxwèxe i ngēma núma toxü mugüxütawa tanange i curü ngãxüga. ¿Rü ñuxü ñacuxü i ñuxma na texé quiixü? —ñanagürügü. ²³ Rü CuáŨ nanangãxü rü ñanagürü nüxü: —Choma nixĩ i ngēma duüxü i dauxchitawa i ngextá taxúema íxãpataxüwa tagaãcü ñachaxü:

“¡Rü nüxü perüxoe i pecüma i chixexü rü ipeyanawëxãchixëëx i perü maxü naxcèx ya Cori ya Tupana!” ñachaxü, guma nuxcümaücü ga orearü uruü ga Ichaxía nüxü ixuxürüü —ñanagürü. ²⁴⁻²⁵ Rü yexguma ga yema paigü rü Parichéugü yéma mugüxü ga CuáŨmaã na yanadexagüxcèx rü wenaxãrü nüxna nacagüe, rü ñanagürügü: —Rü ngëxguma tama Cristu quixigu, rü tama Ería quixigu, rü tama yima orearü uruü ya ínguxchaücü quixigu, ¿rü tüxcüü i duüxügüxü ícubaiüxëëxü i ñuxmax? —ñanagürügü nüxü. ²⁶⁻²⁷ Rü CuáŨ nanangãxü rü ñanagürü: —Choma rü dexáwamare íchanabaiüxëë i duüxügü. Natürü petanüwa nangëxma ya yima tama nüxü pecuácü ya choweama ne ücü. Rü choma rü napëxewa rü taxuwama chame, rü bai i norü chapatucunügüarü wëgüwa chame —ñanagürü ga CuáŨ. ²⁸ Rü yema nachica ga Betániãgu äegaxüwa nixĩ ga CuáŨ ga nüxü yaxuxü ga yema ore. Rü natü ga YudáŨãrü tocutüwa nixĩ ga yema nachica ga ngextá CuáŨ duüxügüxü íbaiüxëëxüwa.

Ngechuchu nixĩ ga Tupana núma namucü na duüxügüarü pecaducèx nayuxüçèx

²⁹ Rü moxüãcü ga CuáŨ rü Ngechuchuxü nadau ga naxcèx na yaxüxü. Rü ñanagürü ga CuáŨ: —¡Rü dücax! Daa nixĩ ya yima Tupana núma namucü na nayuxüçèx na ñoma i naãneçüãx i duüxügüarü pecaduxü iyanaxoxëëxüçèx. ³⁰ —Rü choma rü daa Ngechuchuchigaxü nixĩ ga chixuxü ga yexguma ñachagu:

“Rü choweama ne naxü ya wüxi ya chorü yexeracü, yerü nüma rü woetama nayexma ga tauta chabuxgu ga chomax”, ñachagu. ³¹ —Rü chomatama ga noxri rü tama nüxü chacuèx ga texe na yïixü ga nümax. Natürü núma chaxü na dexáwamare duüxügüxü íchibaiüxëëtanüxüçèx na tatanüxü i Yudíugü nüxü cuèxgüxüçèx na texé yïixü —ñanagürü.

³² Rü ñanagürü ta ga CuáŨ: —Rü chomatama nüxü chadau ga Tupanaãe ga Üünexü ga yexguma wüxi ga muxtucurüü daxüwa ínaxexeegu rü Ngechuchuxünegu yanawëxgux. ³³ —Choma rü noxri tama nüxü chacuèx ga texe na yïixü ga nümax. Natürü ga Tupana ga choxü mucü na dexáwamare duüxügüxü íchabaiüxëëxüçèx, rü ñanagürü choxü:

“Rü yima nüxü cudaucü ya chauãe i Üünexü naetügu íruxexecü, rü yima tá nixĩ ya chauãe i Üünexü duüxügüna nguxëëcü”, ñanagürü choxü. ³⁴ —Choma rü marü yima Ngechuchuxü chadau rü pemaã nüxü chixu na nüma rü aixcüma Tupana Nane yïixü —ñanagürü.

Nüxãraixü ga norü ngúexügü ga Ngechuchu

³⁵ Moxüãcü rü wenaxãrü CuáŨmaã yema nachicawa tayexmagü ga toma ga taxre ga norü ngúexügü. ³⁶ Rü yexguma Ngechuchuxü nadëuxgu ga yéma na naxüpetüxü, rü CuáŨ rü ñanagürü toxü: —¡Düçèx! Yima nixĩ ya Tupana núma namucü na pecaducèx nayuxüçèx —ñanagürü. ³⁷ Rü toma ga CuáŨãrü ngúexügü rü nüxü taxĩnüe ga yexguma yema ñaxgu. Rü Ngechuchuwe tarüxĩ. ³⁸ Rü nügü ínidau ga Ngechuchu, rü toxü nadau ga nawe na tarüxixü. Rü toxna naca rü ñanagürü toxü: —¿Tacüçèx pedau? —ñanagürü. Rü tomagü rü ñatarügügü: —Pa Ngúexëëruüx, ¿ngexta nixĩ i cupexü? —ñatarügügü. ³⁹ Rü Ngechuchu toxü nangãxü, rü ñanagürü toxü: —¡Nuã chowe perüxĩ rü ípeyadëux! —ñanagürü. Rü nawe tarüxĩ, rü nüxü tadaugü ga na ngexta napexü. Rü yexguma yéma tangugügu, rü marü ägümücüarü orawa nangu ga na nayáuanexü. Rü yexma naxütagu tarücho rü ñuxmata nachüta. ⁴⁰ Rü choma chixĩ ga noxri CuáŨ ga baiüxëëruüxü chaxĩnüxü ga yixcama Ngechuchuwe charüxüxü. Rü chomücü rü

Aũdré nixĩ. Rũ nũma rũ Pedru ga Chimáũeneẽ nixĩ. ⁴¹ Rũ yexgumatama ga Aũdré, rũ naẽneẽ ga Chimáũcèx nayadau. Rũ ñanagũrũ nũxũ: —Rũ marũ nũxũ itayangau ya yima Cristu ga nuxcũma Tupana nũxũ unetacũ —ñanagũrũ. ⁴² Rũ yemawena, rũ Ngechuchu íyexmaxũwa Chimáũxũ naga ga Aũdré. Rũ yexguma Ngechuchu Chimáũxũ dèuxgu, rũ ñanagũrũ nũxũ: —Cuma nixĩ i Chimáũ i Cuáũ nane quiĩxũ. Natũrũ i ñuxmawena rũ Nuta tá nixĩ i cuéga —ñanagũrũ. Rũ ngẽma naega rũ Pedru ñaxũchiga nixĩ.

Ngechuchu rũ naxcèx naca ga Piripi rũ Natanae

⁴³ Rũ moxũãcũ ga Ngechuchu rũ nũgũ namexẽẽ na Gariréaanewa naxũxũcèx. Rũ Piripixũ inayangau rũ ñanagũrũ nũxũ: —¡Chowe rũxũ! —ñanagũrũ. ⁴⁴ Rũ nũma ga Piripi rũ ñane ga Bechaĩdacũãx nixĩ. Rũ yémacũãx ta nixĩ ga Aũdré rũ Pedru. ⁴⁵ Rũ Piripi rũ Natanaeçèx nayadau, rũ ñanagũrũ nũxũ: —Marũ nũxũ itayangau ya yima Cristu ga Moĩché nachiga naxũmatũcũ ga mugũarũ poperawa, rũ nuxcũmaũgũxũ ga Tupanaãrũ orearũ uruũgũ ta nachiga naxũmatũgũcũ. Yima nixĩ ya Yũche nane ya Ngechuchu ya Nacharétucũãx —ñanagũrũ. ⁴⁶ Rũ ñanagũrũ ga Natanae: —¿Ñuxãcũ i tacũ rũ mexũ i Nacharétuwa ne naxũxũ? —ñanagũrũ. Rũ Piripi nanangãxũ, rũ ñanagũrũ nũxũ: —¡Dũcèx, ngĩxã rũ ítayadau! —ñanagũrũ. ⁴⁷ Rũ yexguma Ngechuchu Natanaexũ dèuxgu ga naxcèx na yaxũxũ, rũ ñanagũrũ: —¡Dũcèx! Yéa ne naxũ i wũxi i yatũ i aixcũma Yudíu ixĩxũ i aixcũma ngearũ chixexũãxũ —ñanagũrũ. ⁴⁸ Rũ yexguma ga Natanae rũ Ngechuchuna naca, rũ ñanagũrũ nũxũ: —¿Ñuxãcũ i choxũ cucuáxũ? —ñanagũrũ. Rũ Ngechuchu nanangãxũ rũ ñanagũrũ nũxũ: —Naxũpa ga Piripi cuxcèx na yaçaxũ, rũ choma rũ cuxũ chadau ga yexguma orix ga igueratũũgu curũxãũxgux —ñanagũrũ. ⁴⁹ Rũ Natanae nanangãxũ rũ ñanagũrũ nũxũ: —Pa Ngúexẽẽruũx, cuma rũ Tupana Nane quixĩ. Rũ cuma nixĩ i guxũma i Yudíugũarũ Æexgacũ quiĩxũ —ñanagũrũ. ⁵⁰ Rũ Ngechuchu nanangãxũ, rũ ñanagũrũ nũxũ: —Cuma rũ choxũ cuyaxõ erũ cumaã nũxũ chixu na igueratũũwa cuxũ na chadauxũ. Rũ ngẽmacèxicatama nixĩ i cuyaxõxũ. Natũrũ ngẽma ñuxma nũxũ cudauxũãrũ yexera tá nixĩ i nũxũ cudauxũ i yixcũra —ñanagũrũ. ⁵¹ Rũ ñanagũrũ ta ga Ngechuchu: —Rũ aixcũma pemaã nũxũ chixu rũ tá nũxũ pedaugũ na yawãxnaxũ i daxũguxũ i naãne. Rũ tá nũxũ pedaugũ i Tupanaãrũ orearũ ngeruũgũ i daxũcũãx i ngema daxũ ígũxũ rũ írũxĩgũũxũ i naetũwa ya Tupana Nane ya duũxũxũ ixĩcũ —ñanagũrũ.

2

Ngĩarũ peta ga ñane ga Canáwa ùxũ ga Gariréaanewa

¹ Rũ yexguma marũ tomaẽxpũx ga ngunexũ Gariréaanearũ ñane ga Canáwa nayexmagu ga Ngechuchu, rũ nayexma ga wũxi ga ngĩarũ peta. Rũ yemawa ngixna naxugũ ga naẽ ga Ngechuchu. ² Rũ Ngechuchuna rũ toxna rũ ta naxugũe na yéma taxĩxũcèx. ³ Rũ nagux ga norũ axexũ ga binu. Rũ Ngechuchu naẽ ngĩgũrũgũ nũxũ ga Ngechuchu: —Marũ nagũarũ binuãxgũ —ngĩgũrũgũ. ⁴ Natũrũ Ngechuchu ngĩxũ nangãxũ, rũ ñanagũrũ: —Pa Mamax, ¿tũxcũũ chomaã nũxũ quixu i ngẽma? Erũ tauta nawa nangu na chanaxũxũcèx i tacũ rũ mexũ i Tupanaãrũ poramaã ùxũ —ñanagũrũ. ⁵ Natũrũ ga ngĩma ga naẽ rũ ngĩgũrũgũ nũxũ ga yema baegũxũ namaã ga binuchiũ: —¡Penaxũx i guxũma i ngẽma nũma pemaã nũxũ yaxuxũ! —ngĩgũrũgũ. ⁶ Rũ yéma iyexma ga 6 ga tũxũ ga nutagũngĩxcèx. Rũ wũxichigũ ga yema tũxũwa rũ maneca yexma name ga 50 rũ éxna 70 litrugũ ga dexá. Rũ yema tũxũgũ iyixĩ ga yema Yudíugũ ngĩxũ ixũgũãcugũcũ ga yexguma dexámaã nũgũ yayauxmẽxgũchaũgu na Tupanacèx nũgũ yamexẽẽgũxũcèx. ⁷ Rũ Ngechuchu rũ yema baegũxũxũ namu, rũ ñanagũrũ: —¡Dexámaã ngĩxũ pixũgũãcu i ñaã tũxũgũ! —ñanagũrũ. Rũ nũmagũ ga yema baegũxũ rũ meãma ngĩxũ nixũgũãcu. ⁸ Rũ Ngechuchu ñanagũrũ nũxũ: —Rũ ñuxma chanaxwèxe i íraxũ peyaxu, rũ petaarũ yoraxũtawawa penange —ñanagũrũ. Rũ yemaãcũ nanaxũgũ ga yema baegũxũ. ⁹ Rũ yema petaarũ yora nũxũ

naxaxneta ga yema dexá ga binuxũ nacèxichixũ. Natürü tama nüxũ nacuèx ga ngextá na nayauxgũãxũ. Rü yema baegũxũĩcatama nixĩ ga nüxũ cuèxgũxũ ga dexámare na yĩixũ ga noxrix. Rü yexgumatama ga yema petaarü yora rü yema yatü ga ingĩxũcèx naca. ¹⁰ Rü ñanagürü nüxũ: —Guxũ i naãnewa rü duũxũgü rü noxri rü namaã nabae ya mecü ya binu. Rü ngèxguma marü meãma guxũma axegügu i ngẽma nüxna naxuxũ, rü ngẽmawena rü nüxna nanaxã ya ngexcürüücümare ya binu. Natürü i cuma rü marü nagúxchaũgu i peta, rü mexèchicü ya binumaãtama cuyaxaxegüxèẽ i duũxũgü —ñanagürü. ¹¹ Rü guma Gariréaanewa yexmane ga ñãne ga Canáwa nixĩ ga yema naxuxũ ga Ngechuchu. Rü yema nixĩ ga nüxĩraũxũ ga cuèxruũ ga Tupanaãrü poramaã üxũ ga nawa nügü inawéxũ ga Tupana Nane na yĩixũ. Rü toma ga norü ngúexũgü rü nüxũ tayaxõgü. ¹² Rü yemawena rü Capernáũ ga ñãnewa naxũ ga Ngechuchu. Rü naẽ rü naẽneẽgü rü toma ga norü ngúexũgü rü ta ítayaxümücügü. Rü yéma guma ñãnewa tayexmagü ga ñuxre ga ngunexũ.

*Ngechuchu rü tupauca ga taxĩnewa ínanawoxũ ga yema duũxũgü ga yéma taxegüxũ
(Mt 21.12-13; Mr 11.15-18; Lc 19.45-46)*

¹³ Rü toma ga Yudíugü rü marü ningaica ga torü peta ga Üpetüchiga. Rü yemacèx ga Ngechuchu rü Yerucharéüwa naxũ. ¹⁴ Rü yexma tupauca ga taxũnegü nüxũ nayangau ga duũxũgü ga yéma norü wocagümaã rü carnerugümaã rü muxtucugümaã taxegüxũ. Rü yéma nüxũ nadau ta ga duũxũgü ga norü taxechicawa rütogüxũ rü Tupanaarü amarewa mexũ ga díerumaã yéma taxegüxũ. ¹⁵ Rü yexguma yemaxũ nadèuxgu ga Ngechuchu, rü nanaxü ga wüxi ga cúaixruũ ga naxchèxmünaxcèx. Rü yemamaã tupauca ga taxũnewa ínanawoxũ ga yema duũxũgü guxũma ga norü carnerugümaã rü wocagümaã. Rü yema díerucèx taxegüxũãrü díeru rü ngĩxũ narüwoũ ñaxtúanegu. Rü norü mechagü rü ta nüxũ nawoneta. ¹⁶ Rü yema muxtucugümaã taxegüxũxũ ñanagürü: —¡Ipeyana i ngẽma perü muxtucugü i nuã! Tama name i taxepataũxũ peyaxĩxèẽ ya daa Chaunatuãpata —ñanagürü. ¹⁷ Rü yexguma ga toma ga norü ngúexũgü rü nüxna tacuèxãchie ga nuxcümaũxũ ga ümatüxũ ga ñaxũ:

“Duũxũgü rü tá chauxchi naxaie erü chanachuxu i tacü i chixexũ na naxügüxũ i Tupanapatawa”,

ñaxũ. ¹⁸ Rü yexguma ga yema ãèxgacügü rü Ngechuchuna nacagü, rü ñanagürügü: —¿Tacü rü cuèxruũxũ toxũ cudadaxèẽ na nawa nüxũ tacuáxũcèx na aixcüma Tupana yĩixũ ya cuxũ mucü na ícunawoxũxũcèx i ñãã duũxũgü i nuã? —ñanagürügü. ¹⁹ Rü Ngechuchu nanangãxũ, rü ñanagürü: —¡Nagu pepogüe ya daa tupauca ya taxũne! Rü choma rü tomaèxpüx i ngunexũgu rü tá wena íchanadaxèẽ —ñanagürü. ²⁰ Rü yexguma ga yema ãèxgacügü rü nanangãxũgü, rü ñanagürügü: —Rü 46 ga taunecü nawa napuracüe ga duũxũgü na naxügüãxũcèx ga daa tupauca ya taxũne. ¿Rü ñuxãcü tá i cuma i tomaèxpüx i ngunexũ tátama wena ícunadaxèẽxũ? —ñanagürügü. ²¹ Natürü guma Tupanapata ga Ngechuchu nachiga idexane rü naxũnechigatama nixĩ. ²² Rü yemacèx ga toma ga norü ngúexũgü, rü yexguma Ngechuchu yuwa írüdaxgu, rü nüxna tacuèxãchie ga yema ore ga Ngechuchu nüxũ ixuxũ. Rü aixcüma tayaxõgü ga yema ore ga nüxũ yaxuxũ rü yema Tupanaãrü ore ga nuxcümaũgüxũ ga orearü uruũgü Ngechuchuchigagu ümatügüxũ.

Ngechuchu rü nüxũ nacuèx i guxũma i duũxũgü

²³ Rü yexguma Ngechuchu Üpetüchigaarü petacèx Yerucharéüwa yexmagu, rü muxũma ga duũxũgü rü nüxũ nayaxõgü, yerü nüxũ nadaugü ga yema taxũ ga mexũgü ga Tupanaãrü poramaã naxuxũ. ²⁴ Natürü ga nüma ga Ngechuchu rü tama yema duũxũgümèxèwa nügü nayexmaxèẽchaũ, yerü woetama marü nüxũ nacuèx ga tacügu na naxĩnüèxũ ga guxũma ga yema duũxũgü. ²⁵ Rü yemacèx ga nüma rü taxucèxma texé namaã nüxũ tixu na tacügu naxĩnüèxũ ga yema duũxũgü. Yerü nümatama marü nüxũ nacuèx ga tacügu na naxĩnüèxũ ga naãèwa ga wüxichigü.

3

Ngechuchuxütagu nanaxüâne ga Nicodému

¹ Nayexma ga wüxi ga Parichéu ga Nicodémugu aëgacü. Rü nüma rü wüxi ga aëxgacü ga nüxü nangechaügücü nixi ga Yudiügütanüwa. ² Rü guma Nicodému rü Ngechuchuxütagu nanaxüâne ga chütacü. Rü ñanagürü Ngechuchuxü: —Pa Ngúexëëruüx, toma nüxü tacuèx na aixcüma Tupana núma cuxü muxü na toxü cungúexëëxüçèx. Erü taxucürüwa texé cuxrüü tanaxü i ngëma taxü i mexügü i Tupanaärü poramaã üxü, ega tama Tupana tümaxütawa ngëxmagu —ñanagürü. ³ Rü Ngechuchu nanangäxü rü ñanagürü nüxü: —Aixcüma cumaã nüxü chixu, rü yixema tama wenaxärü buxe rü taxucürüwama Tupana aëxgacü íixixüwa tangu —ñanagürü. ⁴ Rü Nicodému rü Ngechuchuna naca, rü ñanagürü nüxü: —¿Natürü ñuxäcü i wüxi i yatü i marü yaxü i wena nabuxü? ¿Éxna wena naëänügu naxücuxü rü ngëmaäcü wena nabuxü? —ñanagürü. ⁵ Rü Ngechuchu nanangäxü rü ñanagürü: —Rü aixcüma cumaã nüxü chixu rü yixema tama nüxü rüxoxe i tümäärü pecadu rü tama Tupanaã i Ünexüwa nayaxúxe i maxü i ngexwacaxüxü, rü taxucürüwama Tupana aëxgacü íixixüwa tichocu ⁶ —Yixema duüxüwa buxe rü duüxütama tixi. Natürü yixema Naã i Ünexüwa nayaxúxe i maxü i ngexwacaxüxü, rü Tupanaxäcü tixi. ⁷ —¿Täütáma cubaixächiã na cumaã nüxü chixuxü na Tupana naxwëxexü na guxüma i duüxügü rü wena nabuexü! ⁸ —Ya buanecü rü nüma ínanaxwëxexüwa nabu. Rü nüxü cuxinü i naga, natürü tama nüxü cucuèx na ngextáama ne naxüxü rü ngextáama na naxüxü. Rü ngëxgumarüü ta tixigü ya guxáma ya yixema Naã i Ünexüwa nayaxúxe i maxü i ngexwacaxüxü —ñanagürü. ⁹ Rü Nicodému wenaxärü Ngechuchuna naca, rü ñanagürü: —¿Natürü ñuxäcü nixi i ngëma? —ñanagürü. ¹⁰ Rü Ngechuchu nanangäxü, rü ñanagürü nüxü: —Cuma rü Yudiügüarü ngúexëëruü i nüxü cuáxü quixi. ¿Rü ñuxäcü chi i cuma i tama nüxü cucuáxü i ngëma? ¹¹ —Aixcüma cumaã nüxü chixu rü toma rü namaã tidexagü i ngëma nüxü tacuáxü. Rü norü uruü tixigü i ngëma nüxü tadaugüxü. Natürü pema rü tama toxü peyaxögü i ngëma pemaã nüxü tixuxü. ¹² —Rü ñuxma na tama choxü peyaxögüxü i ngëma pemaã nüxü chixuxü i ñoma i naãneärü ngëmaxüchiga, rü ¿ñuxäcü tá peyaxögüxü ega pemaã nüxü chixuxgu i daxüguxü i naãneärü ngëmaxüchiga? ¹³ —Taguma texé daxüguxü i naãnewa taxü. Natürü i choma i Tupana Nane na duüxüxü chiüxü, rü chaxicatama nixi i ngëma ne chaxüxü rü ngëma tá chaxüxü. ¹⁴⁻¹⁵ —Pema nüxü pecuèx ga ñuxäcü nuxcümaxüchima yema nachica ga ngextá taxúema íxãpataxüwa, rü Moïché wüxi ga naïgu nanaxünagü ga yema äxtape ga díerumünaxcèx. Rü ngëxgumarüü tá ta i choma i Tupana Nane i duüxüxü chiüxü, rü wüxi i naïgu tá choxü naxünagügü i duüxügü na guxáma ya texé ya choxü yaxögüxe rü tüxü nangëxmaxüçèx i maxü i taguma gúxü.

Tupana rü poraäcü nüxü nangechaü i ñoma i naãnecüãx

¹⁶ —Rü Tupana rü poraäcü nüxü nangechaü i ñoma i naãnecüãx i duüxügü. Rü yemacèx inanamu ga Nane ga nügümaã wüxicacü na guxáma ya texé ya nüxü yaxögüxe rü tama itarütauxèçèx rü tüxü nangëxmaxüçèx i maxü i taguma gúxü. ¹⁷ —Yerü ga Tupana rü tama ñoma ga naãnewa nanamu ga Nane na duüxügümaã naxueguäxüçèx na napoxcuexü. Natürü núma nanamu na namaxëxëëxüçèx i duüxügü. ¹⁸ —Rü yixema Tupana Naneãxü yaxöxë, rü Tupana rü tama tümamaã nanaxuegu na tapoxcuxü. Natürü yixema tama nüxü yaxöxë, rü marü tümamaã nanaxuegu na tapoxcuxü, erü tama nüxü tayaxö ya yima Tupana Nane ya nügümaã wüxicacü. ¹⁹ —Rü yixema tama nüxü yaxögüxe, rü Tupana rü marü tümamaã nanaxuegu na tapoxcuexü. Yerü yexguma ñoma ga naãnewa nanguxgu ga Tupana Nane ya duüxügüarü ngóonexëëruü, rü tama nawe tarüxüchaü. Natürü yexera tümäärü me nixi ga ëänexüwaama na tayexmagüxü, yerü chixexü taxügü. ²⁰ —Guxáma ya yixema chixexü ügüxe rü naxchi taxaie i ngóonexü.

Rü tama nüxna tangaicamagüchaŭ erü tama tanaxwèxe na nangóxŭ i ngēma chixexŭ i ítaxügüxŭ. ²¹ —Natürü yíxema aixcūma Tupanaärü ore nüxŭ ixuxŭäcūma meã maxēxē rü nüxna tangaicama i ngēma ngóonexŭ. Rü ngēmaäcū tanaxŭ na meã nangóxŭcèx na Tupanaärü ngüchaŭäcūma na yíxŭ i guxŭma i ngēma taxügüxŭ —ñanagürü.

Cuáŭ ga baiŭxēeruŭ rü wenaxärü nüxŭ nixu ga Ngechuchuga

²² Rü yemawena rü tomaã Yudéaanewa naxŭ ga Ngechuchu. Rü ñuxre ga ngunexŭ tomaã yéma nayexma rü yéma duŭxügüxŭ ítabaiŭxēēgü. ²³ Rü Cuáŭ ga baiŭxēeruŭ rü Enóärü íñewa ga Chariärü ngaicamana rü ínanabaiŭxēē ta ga duŭxügü yerü yéma nayexma ga taxŭ ga dexá. Rü yema yéma íngugüetanüxŭ ga duŭxügü, rü Cuáŭ ínayabaiŭxēētanü. ²⁴ Rü yemaäcū nangupetü naxŭpa ga na poxcupataŭgu yatèxcuchixŭ ga Cuáŭ. ²⁵ Rü yexguma rü ñuxre ga norü ngúexŭgü ga Cuáŭ, rü wüxi ga Yudíumaã niporagatanücüü nachiga ga nacūmagü na ñuxäcū namexŭ na Tupanacèx nügü yamexēēgüxŭ ga duŭxügü. ²⁶ Rü Cuáŭmaã nüxŭ nayarüxugüe, rü ñanagürügü: —Pa Ngúexēeruŭx, dücax guma yatü ga tomaã nüxŭ quixucü rü cumaã yexmacü ga natü i Yudáŭärü tocutüwa, rü yima rü ñuxma rü duŭxügüxŭ ínabaiŭxēē, rü guxŭma i duŭxügü rü nawe narüxŭ —ñanagürügü. ²⁷ Rü Cuáŭ nanangäxŭ rü ñanagürü nüxŭ: —Taxúema tacü tüxŭ nangēxma ega Tupana tama tüxna naxäxgu. ²⁸ —Pematama rü marü choxŭ pexínüē ga yexguma ñachagu:

“Choma rü tama Cristu chixŭ. Natürü choma chixŭ i Tupana yima Cristupèxegu choxŭ imuxŭ na nüxŭ chixuxŭcèx i nachiga”, ñachagu. ²⁹ —Rü wüxi i ngígüwa rü yima yatü ya ingcū rü naxmèxärü yora nixŭ. Rü yima yatümücü i naxŭtawa ngèxmaxŭ rü nüxŭ inarüxŭnü i norü ore. Rü nataãe i ngèxguma nüxŭ naxŭnügü i ngēma na yadexaxŭ. Rü ngèxgumarüŭ i choma rü aixcūma Cristumaã chataäexŭchi i ñuxmax. ³⁰ —Nüma rü tá nixŭnagüchigü na äëxgacü yíxŭ, natürü i choma rü tá ícharüxŭchigü.

Yima daxüwa ne ŭxcüchiga

³¹ —Rü yima Cristu ya daxüwa ne ŭxcü rü guxäetüwa nangēxma. Natürü i choma rü ñoma i nañewa changēxma, rü ñoma i nañecŭäx chixŭ, rü ngēma ñoma i nañewa ngèxmaxŭchigaxŭ chixu. Natürü i nüma ya Cristu ya daxüwa ne ŭxcü, rü guxäetüwa nangēxma. ³² —Rü nüma rü tamaã nüxŭ nixuchiga ga yema nüxŭ nadauxŭ rü nüxŭ naxŭnügü. Natürü noxretama nüxŭ nayaxögü i ngēma nüxŭ yaxuxŭ. ³³ —Natürü ngèxguma texé nüxŭ yaxöxgu i norü ore, rü ngēmaäcū tanangoxēē na aixcūma yíxŭ i ngēma Tupana nüxŭ ixuxŭ. ³⁴ —Rü yima Tupana núma namücü, rü Tupanaärü orexŭ nixu. Erü Tupana rü nüxna nanamu i Naãe i Üünexŭ na guxŭguma naxŭtawa nangèxmaxŭcèx. ³⁵ —Rü Tanatü ya Tupana rü Nanexŭ nangechaŭ. Rü ngēmacèx marü naxmèxwa nanangèxmaxēē i guxŭma i tacü i ngèxmaxŭ. ³⁶ —Rü yíxema Tupana Naneäxŭ yaxöxē rü tüxŭ nangēxma i maxŭ i taguma gúxŭ. Natürü yíxema tama nüxŭ yaxöxchaŭxē ya Tupana Nane, rü täütáma tüxŭ nangēxma i ngēma maxŭ i taguma gúxŭ. Natürü tá tanayaxu i ngēma äücūmaxŭ i poxcu i Tupana tá namaã tüxŭ poxcuxŭ —ñanagürü ga Cuáŭ ga baiŭxēeruŭ.

4

Ngechuchu rü Chamáriaanecŭäx ga ngecü

¹ Rü Parichéugü rü nüxŭ nacuáchigagü ga Ngechuchu rü Cuáŭärü yexera nüxŭ na nayexmaxŭ ga norü ngúexŭgü, rü norü yexera duŭxügüxŭ na ínabaiŭxēēxŭ. ² Natürü tama Ngechuchu nixŭ ga ínabaiŭxēēcü ga duŭxügü. Rü toma ga norü ngúexŭgü tixŭ ga tanaxŭxŭ ga yema. ³ Rü yexguma Ngechuchu nüxŭ ínügü ga Parichéugü rü nachigagu na yadexagüxŭ, rü yéma Yudéaanewa ítachoxŭ na Gariréaanecèx tawoeguxŭ. ⁴ Natürü ga yema nama ga nagu tawoeguxŭ rü Chamáriaanewa nadapetü. ⁵ Rü yemacèx ga toma rü nawa tangugü ga wüxi ga Chamáriaaneärü íñe ga Chicaru. Rü guma íñeärü

ngaicamana nayexma ga yema naãne ga nuxcúmañcú ga Acobuaxü yexmaxü rü yix-cama rü nane ga Yúchena naxãxü. ⁶ Rü yéma nayexma ga wüxi ga puchu ga duüxügü dexácèx ixaixmañgücü ga Acobuarü Puchugu ãegacü. Rü poraãcü nipa ga Ngechuchu ga namagu na yaxüxü. Rü yemacèx guma puchuxütawa nayarütoõchi. Rü tocuchiwa nanguxchañ ga yexguma. ⁷⁻⁸ Rü toma ga norü ngúexügü rü guma ñanewa taxí na torü õnacèx tayataxegüxücèx. Rü towena yéma ingu ga wüxi ga ngecü ga Chamáriaanecüãx ga guma puchuwa dexáwa ücü. Rü Ngechuchu rü ñanagürü ngíxü: —¡Íraxü i dexá choxna naxã! —ñanagürü. ⁹ Natürü ga yema nge rü iþaixãchiãe yerü ga Yudíugü rü Chamáriaanecüãxgümaã nügüchi naxaie rü yemacèx ga yema nge rü inangãxü rü ngígürügü nüxü: —¿Ñuxãcü i cuma na Yudíu quiixü i dexácèx choxna cuçaxü i choma na Chamáriaanecüãx chiixü? —ngígürügü. ¹⁰ Rü Ngechuchu ngíxü nangãxü, rü ñanagürü: —Ngëxguma chí nüxü cucuèxgu i ngëma mexü i Tupana cuxna ãxchañxü, rü chí nüxü cucuèxgu na texé yíixü ya yima dexá cuxna taçacü, rü cuma rü chí nüxnata cuca i dexá i maxü nawa ngëxmaxü rü nüma rü chí cuxna nanaxã i ngëma dexá —ñanagürü. ¹¹ Rü yema ngecü inangãxü, rü ngígürügü nüxü: —Pa Corix, ¿ñuxãcü tá i dexáta cuyaxu? Erü daa puchu rü namátamaxüchi rü cuxü nataxuma na ñacümaã cunayaxuxücèx i dexá. ¿Rü ngextá tá i cunayaxuxü i ngëma dexá i maxü nawa ngëxmaxü na choxna cunaxãxücèx? ¹² —Nuxcúmañcú ga tórü õxi ga Acobu toxçèx núma Chamáriaanewa nanatèx ga daa puchu. Rü gumawa nixí ga naxaxexü ga nüma rü nanegü rü norü wocagü. ¿Rü ñuxãcü chí i cuma i norü yexera quiixü? —ngígürügü. ¹³ Rü Ngechuchu ngíxü nangãxü, rü ñanagürü: —Rü guxãma ya texé ya daa puchuarü dexáwa axexe, rü wena táxarü tiñawae. ¹⁴ —Natürü texé ya yíxema choma tüxna chaxãxü i dexáwa axexe, rü tagutáma wena tiñawa. Erü ngëma dexá i choma tüxna chaxãxü rü wüxi ya puchu ya guxüguma ibaibecürüü tá nixí i tümawa, erü ngëma dexáwa nangëxma i maxü i taguma gúxü —ñanagürü. ¹⁵ Rü ngíma ga yema nge rü inangãxü rü ngígürügü: —Pa Corix, ¡choxna naxã i ngëma dexá na taguma wena chiñawaxücèx, rü taguma wena daa puchuwa dexáwa chaxüxücèx! —ngígürügü. ¹⁶ Rü Ngechuchu ñanagürü ngíxü: —¡Íyadau ya cute, rü naxçèx yaca, rü nuã pexí! —ñanagürü. ¹⁷ Rü yema ngecü rü inangãxü, rü ngígürügü nüxü: —Nataxuma ya chaute —ngígürügü. Rü Ngechuchu ñanagürü ngíxü: —Aixcüma nixí i ngëma nüxü quixuxü na nataxuüma ya cute. ¹⁸ —Yerü wüximéëxpüxchirèx nixí ga cute, rü yima ñuxma cuxütawa ngëxmacü rü tama aixcüma cutexüchi nixí. Rü ngëmacèx aixcüma nixí i curü ore i chomaã nüxü quixuxü —ñanagürü. ¹⁹ Rü yexguma yemaxü naxñügu ga yema ngecü, rü ngígürügü: —Pa Corix, nüxü chicuèxãchi rü cuma rü wüxi i Tupanaãrü orearü uruñ quixí. ²⁰ —Nuxcúmañgüxü ga torü õxigü ga Chamáriaanecüãxgü rü daa mëxpüne ga Garachíüwa Tupanaxü nicuèxüügü. Natürü i pema i Yudíugü rü ñaperügü:

“Rü Yerucharéü nixí i nachica i mexü i ngextá Tupanaxü tikuèxüügü”, ñaperügügü. ²¹⁻²² Rü Ngechuchu ngíxü nangãxü rü ñanagürü: —Pema i Chamáriaanecüãxgü rü tama aixcüma nüxü pecuèxgü ya yima nüxü picuèxüügücü. Natürü toma i Yudíugü rü aixcüma nüxü tacuèx ya yima nüxü tikuèxüügücü, erü Yudíugügagu nixí i Tupana namaxèxèxü i guxüma i duüxügü. ¡Choxü yaxõ, Pa Ngeçüx! Rü aixcüma ñangu tá i ngunexü na täütáma daa mëxpünewa rü èxna Yerucharéüwa tá nüxü na picuèxüügüxü ya Tanatü ya Tupana. ²³ —Erü yíxema aixcüma Tupanaxü icuèxüügüxe rü nüetama nixí i ngëxürüüxümare i nachicawa Tupanaxü tikuèxüügü. Erü ñuxma rü ngëma Naãe i Üünexü naxwèxexü nixí na guxüma i tümãëmaã rü tümããrü maxümaã aixcüma Tupanaxü tikuèxüügüxü. Rü ngëmaãcü nixí i nanaxwèxexü ya Tanatü na nüxü tikuèxüügüxü. ²⁴ —Erü Tupana rü wüxi i Naãe nixí. Rü ngëmacèx yíxema texé ya nüxü icuèxüügüxe rü tanaxwèxe i guxüma i tümãëmaã rü tümããrü maxümaã na aixcüma nüxü tikuèxüügüxü, ngëma Naãe i Üünexü naxwèxexüãcüma —ñanagürü. ²⁵ Rü yema ngecü inangãxü rü ngígürügü: —

Choma nüxũ chacuèx rü tá ñoma i nañnewa nangu ya yima Cristu ya Tupana nüxũ unetacü. Rü ngëxguma yima núma ũxgu rü tá tamaã nanangoxëẽ i guxũma i Tupanachiga —ngĩgürügü. ²⁶ Rü Ngechuchu rü ñanagürü ngĩxũ: —Choma na cumaã chidexaxũ, rü yima chixĩ—ñanagürü. ²⁷ Rü yexguma íyadexayane rü ítangugü ga toma ga norü ngúexũgü. Rü tabaixãchiãëgü yerü ga Ngechuchu rü wüxi ga ngecümaã ínidexa. Natürü taxúema ga toma rü togü taporaxëẽ ga nüxna na tacagüxũ ga tacü ngĩmaã na nanaxwèxexũ rü tacüchiga yĩxũ ga ngĩmaã na íyadexaxũ. ²⁸ Rü yexguma ga yema ngecü rü yéma ngĩxũ itèx ga ngĩrũ tũxũ. Rü íañewa ixü na duũxũgümaã nüxũ yanaxuxüçèx. ²⁹ Rü ngĩgürügü: —¡Ngĩxã rü ítayadaugü i wüxi i yatü i chomaã nüxũ ixuxũ ga guxũma ga tacü ga chaxüxũ! ¿Taux ëxna yima yĩxũ ya Cristu? —ngĩgürügü. ³⁰ Rü inaxĩãchi ga yema íañecũãx, rü Ngechuchu íyexmaxũwa naxĩ. ³¹ Rü yoxni ga toma ga norü ngúexũgü rü Ngechuchuxũ tachixewegü na nachibüxüçèx. ³² Natürü ga nüma rü ñanagürü toxũ: —Choma rü choxũ nangëxma i chowemü i pema tama nüxũ pecuáxũ —ñanagürü. ³³ Rü yexguma ga toma ga norü ngúexũgü rü togüna tacagüe, rü ñatarügügü: —Bexmana marü ¿texé nuã tanange i nawemü? —ñatarügügü. ³⁴ Natürü ga Ngechuchu rü ñanagürü toxũ: —Ngëma õna i choxũ poraxëẽxũ nixĩ na chanaxüxũ i norü ngúchaũ ya yima nuã choxũ mucü ya Chaunatu, rü na chayanguxëẽxũ i norü puracü. ³⁵ —Rü pema rü ñaperügügü:

“Rü ägümücü ya tauemacü nataxu na yabuxgüxũ i trigu”, ñaperügügü. Natürü i choma rü ñacharügü pexũ:

“¡Düçèx, rü meã penangugü i duũxũgü! Erü marü ínamegü na Tupanaxũ nayauxgüxüçèx, ngëxgumarüũ i wüxi i trigunecü i marü nawa nanguxũ na yabuxgüxũ erü marü nidau”. ³⁶ —Rü yíxema Tupanacèx nadexe i duũxũgü rü tá tanayaxu i tümaãrũ natanü. Rü guxũma i ngëma duũxũgü i tũxũ irüxĩnũxũ rü tá nanayauxgü i maxũ i taguma gúxũ. Rü ngëmaãcü rü wüxigu tá tataãëgü ya yíxema tüxira ngëma duũxũgümaã Tupanaãrũ orexũ ixuxe rü yíxema yixcama ngëma duũxũgüxũ Tupanacèx dexe. ³⁷ —Rü aixcüma nixĩ i ngëma ore i ñaxũ:

“Wüxie tixĩ ya namaã toexe i trigu rü togue tixĩ ya yíxema yabuxgüxe i norü o”, ñaxũ. [Rü ngëxgumarüũ rü wüxie tixĩ ya tüxira duũxũgümaã nüxũ ixuxe i Tupanaãrũ ore, rü togue tixĩ ya yixcama ngëma duũxũgüxũ dexe Tupanacèx.] ³⁸ —Rü noxri rü togü nixĩ ga duũxũgümaã nüxũ ixuxũ ga Tupanaãrũ ore, natürü ga duũxũgü rü tama nayaxögü ga yexguma. Rü yemawena rü pexũ chamu na yema duũxũgümaã nüxũ pixuxüçèx ga yema ore. Rü pema nixĩ ga yema duũxũgüxũ pedexũ Tupanacèx, yerü nayaxögü ga yexguma namaã nüxũ pixuxgu ga yema ore. Rü yemaãcü ga pema rü marü peyoxnië nawa ga togüarü puracü —ñanagürü. ³⁹ Rü muxũma ga guma Chamáriaanewa yexmane ga íañecũãx rü Ngechuchuaxũ nayaxögü, yerü nüxũ nayaxögü ga yema ore ga yema ngecü namaã nüxũ ixuxũ ga yexguma ngĩxgu:

“Guxũma ga tacü ga ũpa chaxüxũ rü chomaã nüxũ nixu” ngĩxgu. ⁴⁰ Rü yemacèx ga yema Chamáriaanecũãxgü rü yexguma Ngechuchuxũtawana nangugügu rü nüxũ nacèèxũgü ga yexma natanügu na naxãũxüçèx. Rü taxre ga ngunexũ yexma natanügu narüxãũx ga Ngechuchu. ⁴¹ Rü muxũma ga togüamachigü ga Chamáriaanecũãxgü rü Ngechuchuaxũ nayaxögü ga yexguma nüxũ naxĩnũëgu ga yema norü ore ga nümatama nüxũ yaxuxũ. ⁴² Rü yexguma ga yema duũxũgü rü ñanagürügü ngĩxũ ga yema ngecü: —Ñuxma waxi nixĩ i aixcüma nüxũ tayaxögüxũ erü tomatama nüxũ taxĩnũë i ngëma norü ore i tomaã nüxũ yaxuxũ. Rü ngëmawa nüxũ tacuèx na aixcüma yima yĩxũ ya Cristu ya ñoma i nañnecũãx i duũxũgüarü maxëxëeruũ. Rü tama ngëma cuma tomaã nüxũ quixuxüçèxicatama tayaxögü —ñanagürügü.

Ngechuchu rü nanamexëẽ ga wüxi ga ãëxgacü nane

⁴³ Rü taxre ga ngunexũguwena ga Ngechuchu rü tomaã inaxũãchi ga Chamáriaanewa na Gariréaanewa naxüxüçèx. ⁴⁴ Rü nümatama ga Ngechuchu ga ũpaacü rü ñanagürü:

—Wüxi i Tupanaärü orearü uruŭ, rü norü nañnewatama i duŭxügü rü tama meã nanayauxgü —ñanagürü. ⁴⁵ Natürü yexguma Gariréaanewa tangugügu, rü yema nañnecŭŭx ga duŭxügü rü meãma nanayauxgü. Yerü nümagü ga yema nañnecŭŭxgü rü Yerucharéüwa naxĩ ta naxcèx ga Üpetüchigaarü peta, rü yéma nüxŭ nadaugü ga yema taxŭ ga mexügü ga Tupanaärü poramaã naxüxŭ ga Ngechuchu ga yexguma. ⁴⁶ Rü ga Ngechuchu rü tomaã nataegu naxcèx ga guma ñãne ga Caná ga Gariréaanewa yexmane. Rü guma ñãnewa nixĩ ga binuxŭ nanguxuchixëëãxŭ ga dexá. Rü ñãne ga Capernáüwa nayexma ga wüxi ga tacü ga ãëxgacü, rü niðaawe ga wüxi ga nane. ⁴⁷ Rü yexguma guma ãëxgacü nüxŭ cuáchigagu ga Ngechuchu rü Gariréaanewa na nanguxŭ ga Yudéaanewa na ne naxüxŭ, rü naxütawa naxü. Rü nüxŭ nayacèxŭ na napatawa naxüxŭcèx, rü naxcèx na yanataanexëëãxŭcèx ga guma nane ga marü turaxüchicü. ⁴⁸ Rü Ngechuchu nanangãxŭ, rü ñanagürü nüxŭ: —Pema rü tama peyaxögü ega tama nüxŭ pedauxiragu i taxŭ i cuèxruügü i Tupanaärü poramaã üxŭ —ñanagürü. ⁴⁹ Natürü ga guma ãëxgacü rü ñanagürü nüxŭ: —Pa Corix, ¡paxa chowe rüxŭ naxüpa na nayuxŭ ya chaune! —ñanagürü. ⁵⁰ Rü Ngechuchu nanangãxŭ rü ñanagürü nüxŭ: —¡Nataegu i cupatawa! Erü cune rü marü naxcèx nitaane —ñanagürü. Rü guma yatü rü nayaxö ga yema ore ga Ngechuchu namaã nüxŭ ixuxŭ. Rü napatacèx nataegu. ⁵¹ Rü yexguma napatawa nanguxchaŭgu ga guma ãëxgacü, rü norü duŭxügü napëxegu nayayi, rü ñanagürügü nüxŭ: —Cune rü marü naxcèx nitaane —ñanagürügü. ⁵² Rü yexguma rü norü duŭxügüna naca, rü ñanagürü nüxŭ: —¿Tacü rü oragu inaxügüxŭ na naxcèx yataanexŭ? —ñanagürü. Rü yema norü duŭxügü nanangãxŭ rü ñanagürügü: —Ñe tocuchiguwena nixĩ ga nüxŭ nangupetüxŭ ga na yaxaxünexŭ —ñanagürügü. ⁵³ Rü guma bucü nanatü rü nüxna nacuèxãchi ga yema oragu na yïxŭ ga Ngechuchu ga ñaxŭ nüxŭ:

“Cune rü marü naxcèx nitaane” ñaxŭ. Rü nüma ga guma ãëxgacü rü guxüma ga napatacŭŭx rü Ngechuchuaxŭ nayaxögü. ⁵⁴ Rü yexguma Yudéaanewa ne naxüxgu ga Ngechuchu, rü yema nixĩ ga norü taxre ga cuèxruŭ ga taxŭ ga Tupanaärü poramaã duŭxügüxŭ nawéxŭ ga Gariréaanewa.

5

Ngechuchu rü nanamexëë ga wüxi ga yatü ga idaawexŭ ga Betchawa yexmaxŭ

¹ Rü ñuxre ga ngunexügü ngupetüguwena rü nayexma ga wüxi ga peta ga Yudíugü auregüxŭ na yemaãcü Tupanaxŭ yacuèxüügüxŭcèx. Rü yemacèx ga Ngechuchu rü Yerucharéücèx nataegu. ² Rü guma ñãneärü poxeguxŭ rü nüxŭ nayexma ga wüxi ga ñãx ga Carneruarü Choxŭchicagu ãegaxŭ. Rü yema ñãxärü ngaicamana nayexma ga wüxi ga puchu ga Yudíugügawa Betchagu ãegaxŭ. Rü guma puchuanacüwa nayexma ga wüximëëxpüx ga chopetüchica ga ãxpataŭetügüxŭ. ³ Rü yema chopetüchicagu nacagü ga muxüma ga duŭxügü ga idaaweexŭ. Rü nümaxŭ rü nangexetügü, rü togü rü nachixeparagü, rü togü rü nanawãxãchigü. Rü yema idaaweexŭ rü yéma nananguxëëgü ga guma puchu ga na naxĩãxãchichiüxŭcèx. ⁴ Yerü ñuxguacü rü guma puchugu ínarüxĩxŭ ga wüxi ga daxüçŭŭx ga Tupanaärü orearü ngeruŭ, rü nayaxĩãxchiücüüxëëxŭ. Rü guxema tüxira tügü yéma táexe nachiüwa ga guma puchu ga yexguma yaxĩãxchiücüügu, rü tümacèx nitaane woo ga ngëxürüümare ga daawe tüxŭ yexmaxë. ⁵ Rü yéma natanüwa nayexma ga wüxi ga yatü ga marü 38 ga taunecü idaawecü. ⁶ Rü yexguma Ngechuchu nüxŭ dèuxgu ga guma yatü ga yexma na nacaxŭ, rü nüxŭ nacuáchiga ga marü mucüma ga taunecü na yadaawexŭ. Rü yemacèx nüxna naca rü ñanagürü nüxŭ: —¿Cunaxwèxexŭ i cuxcèx na yataanexŭ? —ñanagürü. ⁷ Rü Ngechuchuxŭ nangãxŭ ga guma idaawecü, rü ñanagürü: —Pa Corix, tataxuma ya texé ya choxŭ rüngüxëëxë na ngema choxŭ tataëxŭcèx i ngëxguma naxĩãxãchichiügu ya daa puchu. Rü guxüguma i ngëxguma ngema chaugü chatáechaŭgu, rü yoxni i togü rü marü nüxĩra nügü ngema natáegü —ñanagürü.

⁸ RŦ Ngechuchu rŦ ñanagŦrŦ nŦxŦ: —¡Inachi, rŦ nayaxu i curŦ caruŦ, rŦ íixŦ! —ñanagŦrŦ. ⁹⁻¹⁰ RŦ yexgumatama naxcèx nitaane ga guma yatŦ. RŦ nanayaxu ga norŦ caruŦ, rŦ ínixŦ. NatŦrŦ ga yema ngunexŦ rŦ ngŦxchigaarŦ ngunexŦ nixŦ. RŦ yemacèx ga yemacŦŦxgŦ ga YudŦgŦarŦ ãèxgacŦgŦ rŦ ñanagŦrŦgŦ nŦxŦ ga guma yatŦ ga naxcèx itaanecŦ: —Ñoma nixŦ i ngŦxchigaarŦ ngunexŦ. RŦ ngèmacèx nachuxu nixŦ na cuyangexŦ i curŦ caruŦ erŦ yemaãcŦ tamaã nŦxŦ nixu ga MoŦché —ñanagŦrŦgŦ. ¹¹ NatŦrŦ ga guma yatŦ rŦ yema YudŦgŦarŦ ãèxgacŦgŦxŦ nangãxŦ, rŦ ñanagŦrŦ: —Yima choxŦ rŦmexèècŦ rŦ ñanagŦrŦ choxŦ:

“¡Nayaxu i curŦ caruŦ rŦ íixŦ!” ñanagŦrŦ. ¹² RŦ yexguma ga yema ãèxgacŦgŦ rŦ nŦxna nacagŦ, rŦ ñanagŦrŦgŦ: —¿Texé ngèma ñatarŦgŦ cuxŦ:

“¡Nayaxu i curŦ caruŦ rŦ íixŦ!” ñatarŦgŦ cuxŦ? —ñanagŦrŦgŦ. ¹³ NatŦrŦ ga guma yatŦ rŦ tama nŦxŦ nacuèx ga texé naxcèx na yataanexèèxŦ, yerŦ namuxŦchi ga duŦxŦgŦ ga yéma, rŦ yexma nayarŦtaxu ga Ngechuchu. ¹⁴ NatŦrŦ yixcama ga Ngechuchu rŦ tupauca ga taxŦnegu nŦxŦ nayangau ga guma yatŦ, rŦ ñanagŦrŦ nŦxŦ: —¡DŦcèx i ñuxma marŦ cuxcèx na yataanexŦ, rŦ tãŦtãma wena chixexŦ cuxŦ na tama quŦdaawexŦcèx namaã i wŦxi i ðaawe i ngèma marŦ cuxŦ ngupetŦxŦãrŦ yexera ixŦxŦ! —ñanagŦrŦ. ¹⁵ RŦ ínixŦ ga guma yatŦ, rŦ YudŦgŦarŦ ãèxgacŦgŦmaã nŦxŦ nayarŦxu ga Ngechuchu na yŦxŦ ga guma namexèècŦ. ¹⁶ RŦ yemacèx nixŦ ga yema ãèxgacŦgŦ ga Ngechuchucèx nadaugŦxŦ na yamèxgŦãxŦcèx, yerŦ ngŦxchigaarŦ ngunexŦgu napuracŦ. ¹⁷ NatŦrŦ ga Ngechuchu rŦ ñanagŦrŦ nŦxŦ: —ChaunatŦ ya Tupana rŦ guxŦ i ngunexŦgu napuracŦ rŦ mexŦ naxŦ. RŦ ngèmacèx i choma rŦ ta naxrŦŦ chapuracŦ —ñanagŦrŦ. ¹⁸ RŦ yemacèx ga yema YudŦgŦarŦ ãèxgacŦgŦ rŦ yexeraãcŦ NgechuchuxŦ nimèxgŦchaŦ. YerŦ tama naxrŦŦ nanaxaure ga ngŦxchigaarŦ ngunexŦ rŦ ñuxŦchi nŦxŦ nixu ga NanatŦxŦchi na yŦxŦ ga Tupana, rŦ yemaãcŦ nŦgŦ nixu ga NanatŦ ga Tupanamaã na nawŦxiguxŦ.

NŦma ga Tupanatama nixŦ ga Nanena naxããxŦ ga pora

¹⁹ RŦ yexguma ga Ngechuchu rŦ ñanagŦrŦ nŦxŦ ga yema ãèxgacŦgŦ: —AixcŦma pemaã nŦxŦ chixu rŦ choma i Tupana Nane rŦ tama chorŦ poramaã chanaxŦ i ðacŦ rŦ puracŦ i mexŦ. NatŦrŦ ngèma nŦxŦ chadauxŦ i ChaunatŦ ũxŦxŦcatama nixŦ ichaxŦxŦ. RŦ guxŦma i ngèma ChaunatŦ ũxŦ, rŦ choma ya Nane rŦ ta chanaxŦ. ²⁰ —ChaunatŦ ya Tupana rŦ choxŦ nangechaŦ, rŦ ngèmacèx choxŦ nŦxŦ nadauxèè i guxŦma i ðacŦ i nŦma naxŦxŦ. RŦ ngèma ñuxma choxŦ nŦxŦ nadauxèèxŦãrŦ yexera tá choxŦ nŦxŦ nadauxèè i yixcŦra. RŦ ngèxguma i pema ega ngèmaxŦ pedaugŦgu, rŦ tá peðaixãchiãègŦ namaã. ²¹ —RŦ ChaunatŦ rŦ ínanadagŦxèè i yuexŦgŦ rŦ wena nanamaxèè. RŦ ngèxguma-rŦŦ ta i choma i Nane rŦ tŦxna chanaxã i maxŦ ya yŦxema chatŦmawèxéxe na tŦxna chanaxãxŦ. ²²⁻²³ —RŦ tama ChaunatŦ nixŦ ya duŦxŦgŦxŦ icagŦcŦ i norŦ maxŦchiga. NatŦrŦ choxŦ nixŦ i namuxŦ na chanaxŦxŦcèx i ngèma, na choxŦ yacuèxŦŦgŦxŦcèx i duŦxŦgŦ, ngèma ChaunatŦxŦ na yacuèxŦŦgŦxŦrŦŦ. RŦ yŦxema tama choxŦ icuèxŦxŦxè, rŦ tama nŦxŦ ticuèxŦŦ ta ya ChaunatŦ ya choxŦ nuã mucŦ. ²⁴ —AixcŦma pemaã nŦxŦ chixu rŦ yŦxema texé ya choxŦ irŦxŦnŦxè i chorŦ ore, rŦ nŦxŦ yaxŦxè ya yima ChaunatŦ ya nŦma choxŦ mucŦ, rŦ tŦxŦ nangèxma i maxŦ i taguma gŦxŦ. RŦ ChaunatŦ rŦ tãŦtãma tŦmamaã nanaxuegu na tapoxcuxŦ erŦ marŦ nawa ítanguxuchi na tayuxŦ, rŦ tŦxŦ nangèxma i maxŦ i taguma gŦxŦ. ²⁵ —RŦ aixcŦma pemaã nŦxŦ chixu rŦ marŦ nawa tá nangu i ngunexŦ rŦ ñuxmatama nixŦ i chauga naxŦnŦxŦ tá i ngèma duŦxŦgŦ i norŦ pecadugu yuexŦ rŦ iyarŦtauxexŦ. RŦ texé ya chauga ñnŦxè rŦ tá tamaxè. ²⁶ —NŦma ya ChaunatŦ rŦ nŦxŦ nangèxma i pora na namaxèèãxŦcèx i duŦxŦgŦ. RŦ ngèma pora rŦ choxna nanaxã ya ChaunatŦ na choma rŦ ta duŦxŦgŦxŦ chamaxèèxŦcèx. ²⁷ —RŦ ChaunatŦ ya Tupana choxŦ namu na duŦxŦgŦna chaçaxŦcèx naxcèx i norŦ maxŦchiga, erŦ choma nixŦ i Nane i duŦxŦxŦ çŦixŦ. ²⁸ —¡TãxŦ i peðaixãchiãègŦxŦ namaã i ñãã ore i pemaã nŦxŦ chixuxŦ! ErŦ tá ínangu i ngèma ngunexŦ i nagu guxŦma i duŦxŦgŦ i yuexŦ rŦ tá na

nüxü naxĩnüëxü i chauga. ²⁹—Rü naxmaüğüwa tá ínachoxü. Rü ngëma meã maxëxü, rü tá ínärüdagü na nayauxgüãxücëx i maxü i taguma gúxü. Natürü ngëma chixexü ügüxü, rü tá ínärüdagü na napoxcuexücëx.

Nawa nüxü icuáxü na Tupana yĩxü ga Ngechuchuna naxãcü ga pora

³⁰—Choma rü taxucürüwa tacü chaxü chauechamatama ega tama choxü naxüëëãgu ya Chaunatü. Rü Chaunatü chomaã nüxü ixuxüãcüma nixĩ i nüxna chaçaxü i duüxügü i norü maxüchiga. Rü ngëxguma nüxna chacaxgu rü aixcüma meãma chanangugü i duüxügü. Erü tama choxrütama ngúchaü nixĩ i ngëma chaxüxü, natürü Chaunatü ya nuã choxü mucüarü ngúchaü nixĩ i ngëma chaxüxü. ³¹—Rü ngëxguma chi chauchigaxütama chixuxgu rü taxuwama name i ngëma. ³²—Natürü nangëxma i to i chauchigaxü ixuxü. Rü nüxü chacuëx rü aixcüma nixĩ i norü ore i pemaã nüxü yaxuxü. ³³ Pema rü Cuáü ya baiüxëëruüxütawa penamugü ga perü duüxügü na nüxü pecuáxücëx ga ore ga aixcüma ixixü ga chauchiga. Rü yema ore ga Cuáü pexü namaã ngãxüxü rü aixcüma nixĩ. ³⁴—Natürü i choma rü tama chanaxwëxe i tacü rü yatü chauétüwa nachogü, erü choma tátama chaugüna chadau. Natürü pemaã nüxü chixu i ngëma Cuáüärü ore na choxü peyaxögüxücëx rü na penayauxgüxücëx i maxü i taguma gúxü. ³⁵—Cuáü rü wüxi ga omü ga iyauracüüxü rü pexü baxixü-rüü nixĩ ga pexcëx. Rü pema rü paxaãchi namaã petaãëgü. ³⁶—Natürü nangëxma i tacü i Cuáüärü orearü yexera chauétüwa íchogüxü. Rü ngëma nixĩ ga yema taxügü ga cuëxruügü ga Chaunatü choxü muxü na norü poramaã chanaxüxücëx. Rü yemawa pexü nüxü chadauxëë na aixcüma Chaunatü ya Tupana yĩxü ga núma choxü mucü. ³⁷—Rü ngëxgumarüü ta ya Chaunatü ga guma núma choxü mucü, rü marü chauétüwa ínachogü, woo taguma nüxü pexĩnüë ga naga rü taguma nüxü pedau. ³⁸—Rü ngëma Chaunatüarü ore rü ta tama peãëwa nixücu, erü tama choxü peyaxögü woo Chaunatü núma choxü na muxü. ³⁹⁻⁴⁰—Pema meãma nawa pengúe i Tupanaärü ore i ümatüxü, erü nagu perüxĩnüë rü ngëmawa tá nüxü ipeyangau i perü maxü i taguma gúxü. Natürü woo ngëmatama Tupanaärü ore i ümatüxüwa rü chauchiga meã na yadexaxü, natürü i pema rü tama choxü peyaxögüchaü na ngëmaãcü penayauxgüxücëx i ngëma maxü. ⁴¹⁻⁴²—Rü choma rü tama chanaxwëxe na choxü picuëxüügüxü erü meãma pexü chacuëx, rü nüxü chacuëx na tama aixcüma Tupanaxü pengechaügüxü. ⁴³—Chaunatü ya Tupana nixĩ ga núma choxü mucü, natürü i pema rü tama choxü peyaxügüchaü. Natürü ngëxguma chi tomare i yatü nagagutama núma üxgu, rü ngëma chi nixĩ i taãëãcüma peyaxügüxü. ⁴⁴—¿Rü ñuxãcü chi choxü peyaxögü ega penaxwëxegu na pemücügütama pemaã taãëxü rü tama naxcëx pedaugügu na Tupanaxüchi pemaã taãëxü? ⁴⁵—¡Tãxü i nagu perüxĩnüëxü na choma tá yĩxü na pexü chixugüxü i Chaunatüxütawa! Erü Moïché ga guma perü maxücëx nüxü peyaxögücü tátama nixĩ ya yima pexü ixugücü i Chaunatüxütawa. ⁴⁶—Rü ngëxguma chi peyaxögügu i ngëma ore ga Moïché ümatüxü, rü choxü rü chi ta peyaxögü. Yerü ga Moïché rü chauchigagu nixĩ ga naxümatüãxü ga norü poperawa. ⁴⁷—Natürü ngëxguma tama peyaxögügu i ngëma Moïché ümatüxü i ore, ¿rü ñuxãcü tá peyaxögü i ngëma choma pemaã nüxü chixuxü? —ñanagürü ga Ngechuchu.

6

Ngechuchu rü nanachibüexëë ga 5000 ga yatügü
(Mt 14.13-21; Mr 6.30-44; Lc 9.10-17)

¹ Rü yemawena ga Ngechuchu rü naxtaxa ga Gariréagu ãeganearütocutüwa tomaã naxü. Rü norü toëga ga guma naxtaxa rü Tibéria nixĩ. ² Rü muxüma ga duüxügü rü nawe narüxĩ. Yerü üpaacü rü marü nüxü nadaugü ga ñuxãcü Ngechuchu na naxüxü ga taxü ga mexügü ga Tupanaärü poramaã üxü ga yexguma duüxügü ga idaaweegüxücëx yataanexëëgüãgu. ³ Rü yexguma ga Ngechuchu rü wüxi ga mèxpünewa tomaã ínaxüãchi.

Rü wüxigu tomaã yéma narüto. ⁴ Rü marü ningaica ga yema Yudíugüarü peta ga Üpetüchiga. ⁵ Rü yexguma Ngechuchu nüxü dawenügu rü nüxü nadau ga muxüma ga duüxügü ga nawe rüxixü. Rü yemacèx Piripina naca, rü ñanagürü: —¿Rü ngextá tá naxcèx tataxe i nawemü i ñaã duüxügü na nachibüexëxüçèx? —ñanagürü. ⁶ Rü nümatama ga Ngechuchu rü marü nüxü nacuèx ga tacü tá na naxüxü. Natürü yema ñanagürü Piripixü, yerü nüxü nacuáxchaü ga tacümaã tá na nangäxüäxü. ⁷ Rü yexguma Ngechuchuxü nangäxü ga Piripi, rü ñanagürü: —Woo chi naxcèx itaxegügu i 200 i díeru naguxü i pãu, rü tãu chima nüxü ningu ega woo wüxichigüna íraxü íxächigügu —ñanagürü. ⁸⁻⁹ Rü yexguma ga Aüdré ga Ngechuchuarü ngüexü ga Pedru ga Chimáü naëneë, rü ñanagürü: —Nuã nangëxma i wüxi i buxü rü nüxü nangëxma i 5 i pãu i chebadanaxcèx rü taxre ta i choxni. ¿Natürü tacüwa name i ngëma naxcèx i ñaã muxüchixü i duüxügü? —ñanagürü. ¹⁰ Rü yexguma ga Ngechuchu rü ñanagürü toxü: —¡Ëcü, namaã nüxü pixu i duüxügü na ínatogüxüçèx! —ñanagürü. Rü yema nachicawa rü nametëxeane ga guma maxë. Rü gumatëxewa narütogü ga duüxügü. Rü maneca 5000 wa nangu ga yexguma yatügüxica ixugügu. ¹¹ Rü yexguma ga Ngechuchu rü nanade ga yema pãügü, rü Tupanana moxë naxã. Rü yemawena rü toxü nayanu na yema duüxügü ga yéma rütogüxüxü tayanuxüçèx. Rü yexgumarüü ta ga choxni rü nüxü toxü nayanuxëë, ñuxmata meãma nachibüe ga guxüma ga yema duüxügü. ¹² Rü yexguma marü meã nachibüegu ga guxüma, rü Ngechuchu toxü namu rü ñanagürü toxü: —¡Penade i ngëma naxchipëxegü i íyaxügüxü na tama inaxaiyëxüçèx! —ñanagürü. ¹³ Rü tanade ga yema naxchipëxegü ga yema 5 ga pãüwa íyaxüxü, rü 12 ga pexchi namaã tanaxüäcugü. ¹⁴ Rü yexguma yema duüxügü nüxü daugügu ga yema mexü ga taxü ga Tupanaärü poramaã naxüxü ga Ngechuchu, rü ñanagürügu: —Aixcümáxüchi daa nixí ya Tupanaärü orearü uruü ga guma ínanguxëëcü —ñanagürügu. ¹⁵ Natürü ga Ngechuchu rü nüxü nicuèxächi ga duüxügü rü na norü äëxgacüxü yangu-cuchixëëgüchaüäxü. Rü yemacèx nüxna nixügachi rü yéamaxüra naxü nawa ga guma mëxpüne na nüxícatama nayexmaxüçèx.

Dexáétügu nixü ga Ngechuchu
(Mt 14.22-27; Mr 6.45-52)

¹⁶ Rü yexguma marü nachütagu, rü toma ga Ngechuchuarü ngüexügü rü wenaxärü naxtaacutüwa taxí. ¹⁷ Rü poraäcü naxëãne. Rü tama ínangu ga Ngechuchu. Rü yemacèx wüxi ga ngue ga taxünegu tichoü, rü itaxíächi ga na tocutüwa taxixü ga Capernáüärü íãnewa na tangugüxüçèx. ¹⁸ Rü yexguma tixãüyane rü inaxügü ga na poraäcü yabuaxü. Rü yemagagu rü poraäcü nayuape. ¹⁹ Rü yexguma marü 5 ga kilómetru tixãügu, rü Ngechuchuxü tadaugü ga na dexáchiüétügu yaxüxü. Rü toma ga norü ngüexügü rü poraäcü tamuüë. ²⁰ Natürü nüma ga Ngechuchu rü ñanagürü toxü: —Choma chixí. ¡Rü tãxü i pemuüëxü! —ñanagürü. ²¹ Rü yexguma ga toma ga norü ngüexügü rü taãëäcüma tanayauxgüchaü ga toweüwa. Rü yexgumatama ítangugü ga yema ítaxüüwa.

Ngechuchucèx nadaugü ga duüxügü

²² Rü moxüäcü ga yema duüxügü ga naxtaxaarü tocutügu rüchoxü, rü nüxü nicuèxächitanü ga toma ga Ngechuchuarü ngüexügü ga marü nagu na taxixü ga guma ngue ga taxüne ga nügümaã wüxicane. Rü nüxü nacuèxgü ta ga Ngechuchu rü tama towe na naxüxü. ²³ Rü yexguma yemagu inaxínüëyane, rü yoxocüne ínangugü ga náigü ga ngue ga itaxüne ga Tibériaarü íãnewa ne íxüne. Rü norü ngaicamana nangugü ga yema nachica ga ngextá Ngechuchu ínachibüexëxüwa ga yema muxüma ga duüxügü ga yexguma moxë inaxãxgu naxcèx ga yema pãu. ²⁴ Rü yexguma yema duüxügü nüxü daugügu ga guma nguewa na Ngechuchu rü toma ga na tatauxexüma rü yexma guma nguegügu nichoü na Ngechuchucèx yadaugüxü Capernáüärü íãnegu.

Ngechuchu nixí i pãu i maxü tüxna äxü

²⁵ RŦ yexguma guma naxtaxaarŦ tocutŦwa nangugŦgu ga yema duŦxŦgŦ, rŦ NgechuchuxŦ yexma nayangaugŦ. RŦ nŦxna nacagŦe, rŦ űanagŦrŦgŦ: — Pa NgŦexŦŦruŦx, űűuxgu nixŦ i nuā cunguxŦ? —űanagŦrŦgŦ. ²⁶ RŦ Ngechuchu nanangāxŦ, rŦ űanagŦrŦ nŦxŦ: —AixcŦma pemaā nŦxŦ chixu rŦ tama yema nŦxŦ na picuŦxāchitanŦxŦcŦx ga yema mexŦgŦ ga TupanaarŦ poramaa chaxŦxŦ nixŦ i chauxcŦx pedaugŦxŦ. NatŦrŦ chauxcŦx pedaugŦ yerŦ meāma pechibŦe nawa ga yema ōna ga pexna chaxāxŦ. ²⁷ —ŦTāxŦ i naxcŦx pepuracŦexŦ i ōna i paxama gŦxŦ! RŦ narŦmemaŦ nixŦ i naxcŦx pepuracŦe i ngema maxŦ i aixcŦma ixŦxŦ i taguma gŦxŦ. RŦ ngŦma nixŦ i maxŦ i choma i Tupana Nane ya duŦxŦxŦ chixŦcŦ tá pexna chaxāxŦ, erŦ ChaunatŦ ya Tupana rŦ marŦ nanangoxŦŦ na aixcŦma Nane chŦxŦ —űanagŦrŦ. ²⁸ RŦ yexguma ga nŦmagŦ rŦ nŦxna nacagŦ, rŦ űanagŦrŦgŦ: —ŦTacŦ tá taxŦe na tayanguxŦŦxŦcŦx i ngŦma Tupana toxŦ naxwŦexŦ? —űanagŦrŦgŦ. ²⁹ RŦ Ngechuchu nanangāxŦ rŦ űanagŦrŦ nŦxŦ: —RŦ Tupana rŦ nŦma choxŦ namu. RŦ ngŦma nŦma pexŦ nanaxwŦexŦ nixŦ na choxŦ peyaxŦgŦxŦ —űanagŦrŦ. ³⁰ RŦ yexguma ga nŦmagŦ rŦ nŦxna nacagŦ, rŦ űanagŦrŦgŦ nŦxŦ: —ŦTacŦ rŦ cuŦxruŦxŦ tá toxŦ cudauxŦŦ na cuxŦ tayaxŦgŦxŦcŦx na aixcŦma Cristu quiŦxŦ? űRŦ tacŦ i to i mexŦ tá toxcŦx cuxŦxŦ i űuxmax? ³¹ YerŦ nuxcŦmaŦgŦxŦ ga tŦrŦ oxigŦ, rŦ nanangŦxgŦ ga yema pāu ga Tupana nŦxna āxŦ ga chianexŦwa ga ngextā taxŦema íxāpataxŦwa. RŦ TupanaarŦ ore i ŦmatŦxŦwa rŦ űanagŦrŦ:

“Tupana rŦ daxŦcŦŦx ga pāumaā nanachibŦexŦŦ ga duŦxŦgŦ”,

űanagŦrŦ i ngŦma orewa. ³² RŦ Ngechuchu nanangāxŦ rŦ űanagŦrŦ nŦxŦ: —AixcŦma pemaā nŦxŦ chixu rŦ tama nixŦ ga MoŦché yŦxŦ ga nŦxna naxāxŦ ga yema pāu ga daxŦcŦŦx, natŦrŦ ChaunatŦ ga Tupana nixŦ ga nŦxna naxācŦ. RŦ nŦma nixŦ i űuxma i pexna naxāxŦ i pāu i aixcŦma ixŦxŦ i daxŦwa ne ŦxŦ. ³³ —ErŦ ngŦma pāu i Tupana ixāxŦ, rŦ daxŦguxŦ i naānewa ne naxŦ rŦ nanamaxŦxŦŦ i űoma i naānecŦŦx i duŦxŦgŦ —űanagŦrŦ. ³⁴ RŦ nŦmagŦ rŦ naxcŦx ínacagŦ, rŦ űanagŦrŦgŦ nŦxŦ: —Pa Corix, űguxŦguma toxna naxāŦcha i ngŦma pāu! —űanagŦrŦgŦ. ³⁵ RŦ Ngechuchu űanagŦrŦ nŦxŦ: —Choma nixŦ i ngŦma pāu i maxŦxŦŦruŦ chŦxŦ. RŦ yŦxema texŦ ya chauxŦtawa ŦxŦ rŦ tagutāma tataiya. RŦ texŦ ya choxŦ yaxŦxŦ rŦ tagutāma ŦŦtawa. ³⁶ —NatŦrŦ marŦ pemaā nŦxŦ chixu rŦ woo na choxŦ pedaugŦxŦ rŦ tama choxŦ peyaxŦgŦ i pemax. ³⁷ —RŦ guxāma ya yŦxema duŦxŦgŦ ya ChaunatŦ choxna tŦxŦ mugŦxe rŦ chorŦ duŦxŦgŦ tixŦgŦ. RŦ texŦ ya choxŦ yaxŦgŦxe rŦ tāŦtāma tŦxŦ chaxoŦx. ³⁸ —YerŦ tama choxrŦtama ngŦchaŦ na chaxŦxŦcŦx nixŦ ga daxŦguxŦ ga naānewa ne chaxŦxŦ. NatŦrŦ nŦma chaxŦ na chanaxŦxŦcŦx i norŦ ngŦchaŦ ya ChaunatŦ ya nŦma choxŦ mucŦ. ³⁹ —RŦ ngŦma norŦ ngŦchaŦ ya ChaunatŦ ya Tupana ya nŦma choxŦ mucŦ nixŦ i na taxŦexŦma ichayarŦtauxŦŦxŦ ya yŦxema choxna tŦxŦ namugŦxe. ErŦ nŦma ya ChaunatŦ nanaxwŦe na tŦxŦ yuwa ícharŦdagŦxŦŦxŦ i naānearŦ guxgu. ⁴⁰ —Choma nixŦ i Tupana Nane chŦxŦ. RŦ ngŦma norŦ ngŦchaŦ ya ChaunatŦ ya Tupana ya nŦma choxŦ mucŦ nixŦ na tŦxŦ nangŦxmaxŦ i maxŦ i taguma gŦxŦ ya guxāma ya texŦ ya choxŦ daugŦxe rŦ choxŦ yaxŦgŦxe. ErŦ choma tá nixŦ i tŦxŦ ícharŦdagŦxŦŦxŦ i naānearŦ guxgu —űanagŦrŦ. ⁴¹ RŦ yexguma yema orexŦ naxŦnŦŦgu ga yema YudŦgŦ, rŦ inanaxŦgŦe ga Ngechuchuchiga na yadexagŦxŦ. YerŦ űanagŦrŦ ga Ngechuchu: —Choma nixŦ i pāu i daxŦguxŦ i naānewa ne chaxŦxŦ —űanagŦrŦ. ⁴² RŦ űanagŦrŦgŦ: —ŦTaux Ŧxna űāā yŦxŦ i Ngechuchu i YŦche nane? RŦ yŦxema rŦ tŦxŦ tacuŦx ya nanatŦ rŦ naŦ. űRŦ űuxācŦ i nŦma i “DaxŦwa ne naxŦxŦ”, űaxŦ? —űanagŦrŦgŦ. ⁴³ RŦ Ngechuchu űanagŦrŦ nŦxŦ: —ŦNŦxŦ perŦxoe na choxŦ na pixuechaxŦ! ⁴⁴ —TaxŦema chauxŦtawa tangu ega tama choxna tŦxŦ namuxgu ya chaunatŦ ga guma nŦma choxŦ mucŦ. RŦ texŦ ya chauxŦtawa ngugŦxe rŦ choma rŦ tá wena tŦxŦ chamaxŦxŦŦ i naānearŦ guxgu. ⁴⁵ —NuxcŦmaŦgŦxŦ ga TupanaarŦ orearŦ uruŦgŦarŦ poperawa naxŦmatŦ i ore i űaxŦ:

“Tupana tá guxāxŦ nangŦexŦŦ”,

ñaxũ. Rũ ngẽmacèx guxãma ya texé ya Chaunatũxũ ñnũxẽ rũ naxũtawa ngúxe, rũ chauxũtawa taxĩ. ⁴⁶ —Taguma texé Chaunatũ ya Tupanaxũ tadau. Rũ chaxicatama nixĩ i nũxũ chadauxũ erũ naxũtawa ne chaxũ. ⁴⁷ —Aixcũma pemaã nũxũ chixu rũ texé ya choxũ yaxõxẽ rũ tũxũ nangẽxma i maxũ i taguma gúxũ. ⁴⁸ —Choma nixĩ i pãũ i maxẽxẽẽruũ chiĩxũ. ⁴⁹ —Rũ perũ oxigũ ga nuxcũmaũgũxũ rũ nanangõx ga yema pãũ ga Tupana nũxna ãxũ ga yema nachica ga ngextá taxúema íãpataxũwa. Natürũ woo nanangõxgũ ga yema pãũ rũ nayueamatama. ⁵⁰ —Natürũ ñãã pãũ i pemaã nũxũ chixuxũ i daxũwa ne ùxũ rũ chomatama chixĩ. Rũ guxãma ya texé ya choxũ yaxúxe ñoma pãũ tangõxũrũ rũ tá tamaxẽcha. ⁵¹ —Chomatama nixĩ i pãũ i maxẽxẽẽruũ i daxũwa ne chaxũxũ. Rũ texé ya ñoma chomaã taxãwemũxũrũ choxũ yaxõxẽ rũ guxũgutáma tamaxẽcha. Erũ ngẽma pãũ i choma tũxna chaxãxũ rũ chaxunetama nixĩ. Rũ ichanaxã i chaxune na namaxẽxũcèx i ñoma i naãnecũãx i duũxũgũ —ñanagürũ ga Ngechuchu. ⁵² Rũ yexguma ga yema Yudiũgũ rũ poragaãcũ nũgũna nacagũe, rũ ñanagürũgũ: —¿Ñuxãcũ tá i ñãã yatũ i naxũne tátama tũxũ nangõxẽẽxũ? —ñanagürũgũ. ⁵³ Rũ Ngechuchu ñanagürũ nũxũ: —Rũ choma i Tupana nane na duũxũxũ chiĩxũ rũ aixcũma pemaã nũxũ chixu rũ ngẽxguma pema rũ tama chaxunemaã pexãwemũgũgu rũ tama nawa pexaxegũgu ya chaugũ, rũ tãũtáma pexũ nangẽxma i maxũ i taguma gúxũ. ⁵⁴ —Texé ya chaxunemaã ãwemũxẽ rũ chaugũwa axexe rũ tũxũ nangẽxma i maxũ i taguma gúxũ. Erũ choma rũ tá tũxũ chamaxẽẽ ega naãneãrũ guxgu. ⁵⁵ —Erũ chaxune rũ õnaxũchi nixĩ rũ chaugũ rũ axexũxũchi nixĩ. ⁵⁶ —Texé ya chaxunemaã ãwemũxẽ rũ chaugũwa axexe rũ chowa tayaxũx rũ choma i tũmawa. ⁵⁷ —Chaunatũ ga núma choxũ mucũ rũ namaxũ. Rũ núma choxna nanaxã i maxũ. Rũ ngẽxgumarũũ ta i choma rũ tá tũxna chanaxã i maxũ ya yixema choxũ yaxúxe rũ choxũ yaxõxẽ. ⁵⁸ —Marũ pemaã nũxũ chixu na choma rũ pãũ i daxũwa ne ùxũ chiĩxũ. Natürũ choma rũ tama yema pãũ ga nuxcũmaũgũxũ ga perũ oxigũ ngõxgũxũ ga pãũrũ chixĩ. Yerũ woo ga yema pãũ na nangõxgũxũ ga perũ oxigũ rũ nayueamatama. Natürũ texé ya choxũ yaxúxe, ñoma pãũ tangõxũrũ, rũ choxũ yaxõxẽ rũ guxũgutáma tamaxũ —ñanagürũ. ⁵⁹ Rũ Ngechuchu rũ duũxũgũmaã nũxũ nixu ga yema ore ga yexguma nangúexẽẽãgu ga Yudiũgũarũ ngutaquẽxepataũwa ga ñãne ga Capernãũwa.

Ngechuchuarũ orewa nangẽxma i maxũ i taguma gúxũ

⁶⁰ Rũ yexguma nũxũ naxĩnũẽgu ga yema nguxẽẽtae, rũ muxũma ga yema duũxũgũ ga nawe rũxĩxũ rũ ñanagürũgũ: —Rũ ngẽma tamaã nũxũ yaxuxũ, rũ naguxchaxũchi na nũxũ icuáxũ na ñuxũ ñaxũ. ¿Ñuxãcũ texé tũxũ natauxcha na naga taxĩnũxũ? —ñanagürũgũ. ⁶¹ Natürũ ga Ngechuchu rũ nũxũ nacuèxama ga yemaãcũ nũgũmaã na íyadexagũxũ naxcèx ga yema nguxẽẽtae, rũ yemacèx nũxna naca, rũ ñanagürũ: —¿Éxna peãẽwa nangux i ngẽma ore? ⁶² —Rũ ngẽxguma peãẽwa nanguxgu i ngẽma ore i pemaã nũxũ chixuxũ, rũ ¿tacũgu chi perũxĩnũẽxũ ega choxũ pedèuxgu na wenaxãrũ daxũ na chaxĩxũ, ga noxri ne chaxũxũwa na chaxũxũ i choma i Tupana Nane na duũxũxũ chiĩxũ? ⁶³ —Tupanaãẽ i Üünexũ nixĩ i inaxãxũ i maxũ i taguma gúxũ. Rũ tama pexene nixĩ i pexũ maxẽxẽẽxũ. Rũ ngẽma ore i pemaã nũxũ chixuxũ rũ peãẽcèx nixĩ, rũ nawa nangẽxma i maxũ i taguma gúxũ. ⁶⁴ —Natürũ tangẽxma i petanũwa ya ñuxre ya tama yaxõgũxe —ñanagürũ. Rũ yema ñanagürũ ga Ngechuchu yerũ noxriarũ ügũgumama marũ nũxũ nacuèx ga texé tá nũxũ na yaxõgũxũ, rũ texé tá cúãcũ ínaxuaxũxũ. ⁶⁵ Rũ ñanagürũ ta: —Rũ ngẽmacèx marũ pemaã nũxũ chixu rũ taxuacũma texé chauxũtawa tangu ega tama Chaunatũ chauxũtawa tũxũ gaxgu —ñanagürũ. ⁶⁶ Rũ yexguma inanaxũgũe ga nũxna na yaxĩgũxũ ga muxũma ga yema duũxũgũ ga noxri nawe rũxĩchiréxũ. Rũ marũ tama nawe ínaxĩxũ. ⁶⁷ Rũ yexguma ga Ngechuchu rũ norũ 12 ga ngúexũgũna naca, rũ ñanagürũ nũxũ: —¿Éxna pema rũ ta choxna pixĩgachitanũchaũ? —ñanagürũ. ⁶⁸ Natürũ Chimãũ ga Pedru rũ nanangãxũ, rũ

ñanagürü: —Pa Corix, ¿Texéxütawa chi taxixü ega cuxna tixigachitanügu? Erü cuma rü cuxü nangéxma i ore i nawa nangéxmaxü i maxü i taguma gúxü. ⁶⁹ —Toma rü marü cuxü tayaxögü, rü nüxü tacuèx na cuma quiixü ya Cristu ya Üünecü ya Tupana Nane —ñanagürü. ⁷⁰ Rü Ngechuchu toxü nangäxü, rü ñanagürü: —¿Taux éxna choma yixü ga pexü chidexeçixü ga pema ga 12? Natürü nangéxma i wüxi i petanüwa i Chatanáärü duixü ixixü —ñanagürü. ⁷¹ Rü Yuda ga Icariüte ga Chimáü naneçhiga nixi ga yadexaxü ga Ngechuchu. Yerü Yuda tá nixi ga cúacü inaxuaxüxü rü woo ga nüma rü wüxi ga totanüxüchiréx na yixü.

7

Ngechuchueneëgü rü tama nüxü nayaxögü

¹ Rü yemawena ga Ngechuchu rü Gariréaanewa yexmagüne ga ñänegügu nixüägüchigü. Rü tama Yudéaanewa nayexmachaü yerü yémacüãx ga Yudíugüarü äëxgacügü rü naxcèx nadaugü ga na yamèxgüchaüãxüçèx. ² Natürü marü ningaica ga yema Yudíugüarü peta ga nagu norü düxenügü yaxügüxü na yemawa nüxna nacuèxächieçüçèx ga ñuxäcü nuxcümaügüxü ga norü oxigü na naxügüxü ga norü düxenügü ga naixätünaxcèx ga yexguma Moichéwe naxixgu ga ngextá taxúema íxäpataxüwa. Rü yemacèx nixi ga Düxenügüarü Petagu naxäegaxü. ³ Rü naëneëgü ga Ngechuchu rü ñanagürügü nüxü: —Tama name i nuxä Gariréaarü naänegu curüxäüx. Rü name nixi i petacèx Yudéawa cuxü, na ngéma duixügü i cuwe rüxixü i ngema ngéxmagüxü nüxü daugüxüçèx i ngéma cuèxruügü i mexügü i Tupanaärü poramaã cuxüxü. ⁴ —Erü ngéxguma chi wüxi ya yatü rü duixügüxü nügü nacuèxëçhaügu rü tama cúacü nanaxü i tacü i naxüxü. Rü ñuxma na cunaxüxü i muxüma i mexügü i Tupanaärü poramaã cuxüxü, rü name nixi i guxü i duixügüpéxewa cunaxü —ñanagürügü. ⁵ Rü yema ñanagürügü ga naëneëgü yerü woo ga nümagü rü ta tama nüxü nayaxögü. ⁶ Rü yexguma ga Ngechuchu rü nanangäxü, rü ñanagürü nüxü: —Tauta nawa nangu i ngunexü na petawa chaxüxü. Natürü pexcèx rü ngéxürüxümare i ngunexü nixi i mexü na petawa nagu pexixü. ⁷ —Ngéma duixügü i ñoma i naänecüãx rü tama pexchi naxaie. Natürü chauxchi naxaie erü chanangoxëë i ngéma naxügüxü rü na nachixexü. ⁸ —Name nixi i petawa pexi i pemax. Choma rü tauta ngema chaxü erü tauta nawa nangu i ngunexü i nagu ngema chaxüxü —ñanagürü ga Ngechuchu. ⁹ Rü yexguma yema ñaxguwena, rü Gariréaanegu narüxäüx.

Ngechuchu rü Düxenügüarü Petawa naxü

¹⁰ Natürü nawena ga naëneëgü ga petawa na naxixü, rü Ngechuchu rü ta yéma naxü. Natürü cúacü yéma naxü, rü tama poraäcü duixügüxü nügü nadauxëë. ¹¹ Rü yema Yudíugüarü äëxgacügü rü naxcèx nadaugü ga yema petawa, rü ñanagürügü: —¿Ngextá nangéxma i ngéma yatü? —ñanagürügü. ¹² Rü nügütanüwa ga yema duixügü ga yéma yexmagüxü, rü poraäcü Ngechuchuchiga ínidexagü. Rü ñuxre ga yema duixügü rü ñanagürügü: —Yima rü wüxi ya yatü ya mecü nixi —ñanagürügü. Natürü ga togü rü ñanagürügü: —Ngéma yatü rü tama name erü duixügüxü nawomüxëë —ñanagürügü. ¹³ Natürü taxuüma ga duixügü rü mea togüpéxewa Ngechuchuxü nicuèxüügüchaü, yerü yema Yudíugüarü äëxgacügüxü namuëë. ¹⁴ Rü yexguma marü yema petaarü ngäxüwa nanguxgu, rü nixücu ga Ngechuchu nawa ga tupauca ga taxüne. Rü inanaxügü ga na nanguxëëtaexü. ¹⁵ Rü yema Yudíugüarü äëxgacügü, rü nabaixächieëgü namaã ga yema ore ga Ngechuchu nüxü ixuxü. Rü ñanagürügü: —¿Ñuxäcü i ngémaäcü poraäcü nüxü nacuáxü, rü taguma texé nanguxëë? —ñanagürügü. ¹⁶ Rü Ngechuchu nanangäxü rü ñanagürü nüxü: —Ñaã chorü nguxëëtae rü tama choxrü nixi, erü Chaunatü ya núma choxü mucüarü nixi. ¹⁷ —Ngéxguma texé naxüxchaügu i Tupanaärü ngüchaü rü yixema tá nüxü tacuèx ngoxi aixcüma Tupanaxütawa chanayaxu i ngéma chorü nguxëëtae rü éxna chaugüxütawatama chayaxuxü yixi i ngéma. ¹⁸ —Yixema texé ya

mexũ i tümachigaxũtama ixuxe rü ngẽmaãcü tanaxü erü tanaxwexe i duũxũgü na tüxũ icuèxüũgüxũ. Natürü texé nüxũ tixu i ore i mexũ nachiga i ngẽma tüxũ muxũ, rü aixcüma nixĩ i tümaãrũ ore. Rü tama dora nixĩ i ngẽma nüxũ tixuxũ. ¹⁹ —¿Tama êxna aixcüma yĩxũ ga Moĩché pexna naxãxũ ga Tupanaãrũ mugü? Natürü taxúema i pema naga pexĩnüẽ i ngẽma mugü. ¿Rü ñuxma rü tüxcüũ nixĩ i choxũ pimèxgüchaũxũ? —ñanagürü. ²⁰ Rü yema duũxũgü nanangãxũgü, rü ñanagürügü: —Cuma rü ngoxo cuwa nangẽxmamare. ¿Êxna texé cuxũ timèxgüchaũ? —ñanagürügü. ²¹ Natürü ga Ngechuchu rü ñanagürü nüxũ: —Choma rü ngũxchigaarü ngunexũgu chanamexẽẽ ga wüxi ga yatü. Rü guxãma i pema rü penuãẽgü naxcèx ga yema wüxitama ga mexũ ga ngũxchigaarü ngunexũgu chaxũxũ. ²² —Natürü pema rü ta ngũxchigaarü ngunexũgu pepuracüe na nagu pexĩxũcèx ga Moĩchéarü mugü. Rü Moĩché pemaã nüxũ nixu na tüxũ ípewiechèxmüpèxechiraũxũ ya guxãma ya yatüxe ya buxe. Natürü tama Moĩché nixĩ ga inaxügücü ga yema, yerü nuxcümaũgüxũ ga perü oxigüwa nixĩ ga ne naxũxũ. Rü ñuxma i pema rü yema mugagu rü tüxũ ípewiechèxmüpèxechiraũ ya guxãma ya buxe ya yatüxe woo ngũxchigaarü ngunexũ yixĩgu. ²³ —Rü ngẽmaãcü i pema rü ngũxchigaarü ngunexũgu buxexũ ípewiechèxmüpèxechiraũ erü naga pexĩnüẽchaũ i Moĩchéarü mugü. ¿Rü ñuxma rü tüxcüũ yĩxũ i chomaã penuẽxũ naxcèx na ngũxchigaarü ngunexũgu chanamexẽẽxũ ga wüxi ga yatü ga idaaweecü? ²⁴ —Rü ngẽmacèx tama name i ngürümare penangugü i ngẽma chaxũxũ. Rü penaxwexe i meã nagu perüxĩnüẽxira, na aixcüma meã penangugüxũcèx —ñanagürü ga Ngechuchu.

Ngechuchu rü Tupana Nane nixĩ

²⁵ Rü ñuxre ga yema duũxũgü ga Yerucharéũgu ãchiũgüxũ rü nügüna nacagüe, rü ñanagürügü: —¿Taux êxna daa yĩxũ ya yima yatü ya ãẽxgacügü naxcèx daugücü na yamèxgüchaũãxũcèx? ²⁶ —¡Dücèx! Gua nixĩ rü yéa guxũ i duũxũgüpèxewa nidexa rü taxúema ñuxũ ñatarügü nüxũ. ¿Taux êxna i tórü ãẽxgacügü i marü nüxũ yaxõgüãxũ na aixcüma Cristu na yĩxũ i nümax? ²⁷ —Natürü i yixema rü nüxũ tacuèxgü na ngextá ne naxũxũ i nümax. Natürü ngẽxguma aixcüma Cristu núma ùxgu rü taxúetáma nüxũ tacuèx na ngextá na ne naxũxũ —ñanagürügü. ²⁸ Rü nüma ga Ngechuchu rü tupauca ga taxúnewa ínanangüexẽẽ ga duũxũgü. Rü yexguma nüxũ naxĩnügu ga yema ore ga Yudíugü nüxũ ixugüexũ ga nachiga, rü tagaãcü ñanagürü: —Pema rü marü choxũ pecuèx rü nüxũ pecuèx na ngextá na ne chaxũxũ. Natürü tama chaugagu nixĩ i núma chaxũxũ. Choma núma chaxũ yerü núma choxũ namu ga Tupana ya naxwèxecü na nüxũ yaxõgüxũ natürü i pema rü tama nüxũ pecuácü. ²⁹ —Choma rü nüxũ chacuèx yerü naxũtawa ne chaxũ, rü nüma nixĩ i núma choxũ namuxũ —ñanagürü. ³⁰ Rü yexguma ga yema ãẽxgacügü rü Ngechuchuxũ niyauxgüchaũ. Natürü taxuũma nayayauxgü, yerü tauta nawa nangu ga ngunexũ ga na yayauxgüãxũ rü na yamèxgüãxũcèx. ³¹ Natürü muxũma ga duũxũgü rü nüxũ nayaxõgü. Rü ñanagürügü: —¿Ngẽxguma ínanguxgu ya Cristu rü tacü rü cuèxruũ i taxũ tá naxü ya daa yatü tama ùxũ i ñuxmax? —ñanagürügü.

Parichéugü rü Ngechuchuxũ niyauxgüchaũ

³² Rü yema Parichéugü rü duũxũgüxũ naxĩnüẽ ga yemaãcü Ngechuchuchiga na yadexagüxũ. Rü yemacèx ga nümagü rü paigüarü ãẽxgacügü rü yéma nanamugü ga tupauca ga taxúneãrũ purichíagü na Ngechuchuxũ yanayauxgüxũcèx. ³³ Rü yexguma ga Ngechuchu rü ñanagürü nüxũ: —Paxaãchi tátama nixĩ i petanüwa changẽxmaxũ, rü ñuxũchi tá chataegu naxũtawa ya yima núma choxũ mucü. ³⁴ —Pema rü tá chauxcèx pedaugü, natürü tãütáma choxũ ipeyangaugü. Erü ngẽma ngextá tá íchangẽxmaxũwa rü taxuacü ngẽma pengugü. ³⁵ Rü yexguma ga yema Yudíugüarü ãẽxgacügü rü nügüna nacagüe, rü ñanagürügü: —¿Ngextá tá naxü ega taxuacütáma nüxũ iyarüngaugügu? ¿Êxna ngẽma Yudíugü i to i nachiũãnewa ngẽxmagüxũtanüwa tá naxü rü êxna ngẽma tama

Yudíugü ixíğüxütanüwa tá naxü na yangúexêêãxücèx? ³⁶ —¿Rü tacüchiga nixí i ngêma na ngêma ñaxü:

“Tá chauxcèx pedaugü natürü tãütáma choxü ipeyangaugü, erü taxuacütáma ngema pexí i ngêma tá íchangêxmaxüwa”, ñaxü? —ñanagürügü.

Dexá i maxêëruüchiga nidexa ga Ngechuchu

³⁷ Rü yema nawa iyacuáxü ga petaarü ngunexü nixí ga guxü ga togü ga ngunexüärü yexera rümemaëxü naxcèx ga Yudíugü. Rü yema ngunexügu nixí ga inachixü ga Ngechuchu rü tagaãcü ñaxü: —Rü ngêxguma texé itawaxgu rü jnuã chauxütawa taxü rü tayaxaxe! ³⁸ —Rü “texé ya choxü yaxöxê rü túmaärü maxñewa tá nibaibe i taxü i dexá i maxêëruü” ngêma Tupanaärü ore i ümatüxü nüxü ixuxürüü —ñanagürü. ³⁹ Rü yexguma yema ñaxgu ga Ngechuchu rü Tupanaãê i Üünexüchiga nixí ga yadexaxü. Rü nüxü nixu ga guxüma ga yema nüxü yaxögüxü rü tá na nayauxgüãxü i Naãê i Üünexü. Natürü tama yexgumatama nanayauxgü, yerü tauta wenaxärü daxügüxü ga naãnecèx nataegu ga Ngechuchu na guxüärü ãëxgacü na yiïxücèx.

Ngechuchugagu nügü nitoye ga duüxügü

⁴⁰ Rü nümaxü ga yema duüxügü rü yexguma nüxü naxñnüëgu ga yema Ngechuchu nüxü ixuxü, rü ñanagürügü: —Aixcüma ñaã yatü nixí i ngêma Tupanaärü orearü uruü i ínguxchaüxü —ñanagürügü. ⁴¹ Rü togü rü ñanagürügü: —Daa nixí ya Cristu —ñanagürügü. Natürü togü rü ñanagürügü: —Tama nixí, erü taxucürüwa Gariréaanecüãx nixí ya Cristu.

⁴² —Erü Tupanaärü ore i ümatüxüwa rü ñanagürü:

“Cristu rü tá Dabítaa nixí, rü tá nangox i iãne i Beréüwa ga ngextá Dabí íbuxüwa”, ñanagürügü. ⁴³ Rü yemaãcü Ngechuchugagu nügü nitoye ga duüxügü. ⁴⁴ Rü ñuxre ga yema duüxügü rü Ngechuchuxü niyauxgüchaü, natürü taxuüma nayayauxgü.

Yudíugüarü ãëxgacügü rü tama Ngechuchuaxü nayaxögüchaü

⁴⁵ Rü yema tupauca ga taxüneärü purichíagü, rü Parichéugücèx rü paigüarü ãëxgacügücèx nawoegu. Rü yema ãëxgacügü rü nüxna nacagü, rü ñanagürügü: —¿Tüxcüü tama nuã penaga? —ñanagürügü. ⁴⁶ Rü yema purichíagü rü nanangãxügü rü ñanagürügü: —Taguma texé tidexa i ñaã yatü idexaxürüü —ñanagürügü. ⁴⁷ Rü yexguma ga Parichéugü rü ñanagürügü nüxü: —¿Éxna pexü rü ta marü nawomüxêê i nümax? ⁴⁸ —Dücèx, rü taxúema i tomax i Parichéugü rü taxuüma i tórü ãëxgacügü rü nüxü nayaxögü i ngêma Ngechuchu. ⁴⁹ —Natürü ñaã duüxügü i tama Tupanaärü mugüxü cuèxgüxü rü marü nachixexügügü —ñanagürügü. ⁵⁰ Natürü Nicodému ga Parichéu ixícü ga wüxicana Ngechuchuxütagu naxüãnecü, rü ñanagürü nüxü: ⁵¹ —Ngêma tórü mugü i ümatüxüwa rü ñanagürü:

“Taxuacüma wüxi i yatüxü tapoxcu ega tama nüxü ixñnüëxíragu i norü dexa na nüxü icuáxücèx na tacü na naxüxü”, ñanagürü. ⁵² Rü yexguma ga natanüxügü rü nanangãxügü, rü ñanagürügü nüxü: —¿Éxna cuma rü ta Gariréaanecüãx quixí? ¡Nawa nangux i Tupanaärü ore i ümatüxü rü ngema tá nüxü cudau rü taxuütáma i Tupanaärü orearü uruü rü Gariréaanecüãx nixí! —ñanagürügü. ⁵³ Rü yexguma ga wüxichigü rü nachüüwa naxí.

8

Nge ga ãtecü ga naï ga yatümaã ngêãëxcü

¹ Rü Ngechuchu rü Oríibunecügu ãegane ga mëxpúnewa naxü. ² Rü moxüãcü ga yexguma yangunegu, rü wenaxärü tupauca ga taxüñecèx nataegu. Rü ga duüxügü rü naxcèx naxí. Rü nüma ga Ngechuchu rü ínarüto, rü inanaxügü ga na nangúexêêãxü ga duüxügü. ³ Rü yema ngúexêëruügü ga Moíchéarü mugüwa ngüxêëtaegüxü rü Parichéugü, rü Ngechuchuxütawa ngíxü nagagü ga wüxi ga nge ga ãtecü ga ngíxü nadaugücü ga

naĩ ga yatümaã na inapexũ. Rũ guxũma ga yema duũxũgũ ga yéma yexmagũxpẽxegu ngĩxũ nayachixẽẽgũ. ⁴ Rũ ñanagürũgũ Ngechuchuxũ: —Pa Ngúexẽẽruũx, ñaã nge i ãtecũ rũ ngĩxũ itayangau na naĩ ya yatümaã na inapexũ. ⁵ Moĩchearũ mugũwa tamaã nüxũ nixu na nutamaã ngĩxũ ímuxũchiãcũma ngĩxũ imáxũ i wũxi i nge i ngẽmaãcũ maxũcũ. ¿Ñuxũ ñacuxũ i cuma i ñuxmax? —ñanagürũgũ. ⁶ Rũ yema ñanagürũgũ ga nümagũ, yerũ Ngechuchuxũ guxchaxũgu nanguxẽẽgũchaũ na nüxũ nayexmaxũcèx ga tacücèx na ínaxuaxũgũãxũ. Natürũ ga Ngechuchu rũ inayarũmaxãchi rũ inanaxũgũ ga naxmẽxmaã waixũmũwa na naxũmatũãxũ. ⁷ Natürũ nüxũ naceèxũgũama, rũ yemacèx dũxwa wena xãrũ nadaunagũ ga Ngechuchu, rũ ñanagürũ nüxũ: —Ngexerũxe i petanũwa ya ngearũ pecaduãxẽ rũ tũxira nuta ngĩxũ tanaña —ñanagürũ. ⁸ Rũ wenaxãrũ inayarũmaxãchi ga Ngechuchu rũ naxmẽxmaã nanaxũmatũ ga waixũmũwa. ⁹ Natürũ yexguma nüxũ naxĩnüẽgu ga yema ore ga Parichéugũ rũ inanaxũgũe ga nügũ na yawũxĩxũ ga nügũwe na ínachoxũxũ. Rũ yaguãxgũ ga Parichéugũwa inaxũgũ ga na ínachoxũxũ rũ dũxwa guxũma ínachoxũ. Rũ yexguma marũ guxũma ga Parichéugũ íchoũxgu, rũ Ngechuchu rũ yema ngecũxicatama yéma duũxũgũpẽxewa nayaxũgũ. ¹⁰ Rũ yexguma ga Ngechuchu rũ wena nadaunagũ. Rũ ngĩxna naca rũ ñanagürũ ngĩxũ: —Pa Ngecũx, ¿Ngẽxũgũ nixĩ i ngẽma cuxũ íxugũexũ? ¿Rũ taxuũma cuxũ imáxchaũ? —ñanagürũ. ¹¹ Rũ ngĩma rũ ngĩgürũgũ nüxũ: —Taxuũma Pa Corix —ngĩgürũgũ. Rũ yexguma ga Ngechuchu rũ ñanagürũ ngĩxũ: —Choma rũ ta tama cuxũ chapoxcu. Ñuxma rũ marũ name rũ íquixũ rũ tama wena pecadu cuxũ —ñanagürũ.

Ngechuchu rũ ñoma i naãneãrũ ngóonex- ãẽruũ nixĩ

¹² Rũ wenaxãrũ duũxũgũmaã nidexa ga Ngechuchu, rũ ñanagürũ nüxũ: —Choma nixĩ i ñoma i naãnecũããrũ ngóonexẽẽruũ. Rũ yixema chowe rũxũxẽ rũ chorũ ngóonexũwa tangẽxma rũ tũxna chanaxã i maxũ. Rũ tá nüxna ítanguxuchi i tũmaãrũ chixexũ —ñanagürũ. ¹³ Rũ yexguma ga Parichéugũ rũ ñanagürũgũ nüxũ: —Cuma rũ cugũchigaxũtama quixu. Rũ ngẽma cuchiga i nüxũ quixuxũ rũ taxuwama name —ñanagürũgũ. ¹⁴ Rũ Ngechuchu nanangãxũ rũ ñanagürũ nüxũ: —Rũ ngẽma ore i chauchiga nüxũ chixuxũ rũ aixcũma nixĩ woo chomatama yixĩgu i namaã chaugũétũwa chidexaxũ. Erũ choma rũ nüxũ chacuèx i ngextá ne chaxũxũ, rũ ngextá tá chaxũxũ. Natürũ pema rũ tama nüxũ pecuèx na ngextá ne chaxũxũ rũ tama nüxũ pecuèx na ngextá tá chaxũxũ. ¹⁵ Pema rũ choxũ pengugũ i ñoma i naãnecũããx i duũxũgũ nagu rũxĩnüẽxũãcũmamare. Natürũ i choma rũ taxuèxũma changugũ. ¹⁶ Natürũ ngẽxguma chi texéxũ changugũgu rũ aixcũma meãma tũxũ changugũ. Erũ tama chaxicatama tũxũ changugũ, natürũ yima Chaunatũ ga núma choxũ mucũmaã nixĩ i wũxigu tũxũ tangugũxũ. ¹⁷ Rũ ngẽma mugũ ga Moĩché ũmatũxũ i nagu pexĩxũ, rũ ñanagürũ:

“Ngẽxguma taxre i duũxũgũ rũ wũxitama i orexũ yaxugũgu, rũ ngẽmawa ãẽxgacũ nüxũ nacuèx na aixcũma yĩxũ i ngẽma nüxũ yaxugũexũ”, ñanagürũ. ¹⁸ Rũ dũcax, choma nixĩ i wũxi i chauchigaxũ chixuxũ rũ Chaunatũ ga núma choxũ mucũ nixĩ ya naĩ. ¿Rũ tũxcũũ tama choxũ peyaxõgũchaũ i ñuxmax? —ñanagürũ. ¹⁹ Rũ yexguma ga nümagũ rũ nüxna nacagũe rũ ñanagürũgũ: —¿Ngexcũ ya yima Cunatũ? —ñanagürũgũ. Rũ Ngechuchu nanangãxũ rũ ñanagürũ: —Choxũ rũ tama pecuèx rũ Chaunatũxũ rũ ta tama pecuèx. Rũ ngẽxguma chi choxũ pecuèxgũgu rũ Chaunatũxũ rũ chi ta pecuèxgũ —ñanagürũ. ²⁰ Rũ yema orexũ nixu ga Ngechuchu ga yexguma nanguxẽẽtaegu ga tupauca ga taxũnawa naxũtawa ga yema nachica ga ngextá duũxũgũ tupaucana dũeru ngĩxũ íxãgũxũwa. Natürũ taxuũma Ngechuchuxũ niyaxugũ, yerũ tauta nawa nangu ga yema ngunexũ ga nagu yayaxugũãxũ.

Ngechuchu rũ Parichéugũmaã nüxũ nixu rũ ngextá nüma ínaxũxũwa rũ taxucürũwa ngẽma naxĩ

²¹ Rŭ Ngechuchu rŭ wenaxârŭ namaã nŭxŭ nixu, rŭ ñanagŭrŭ: —Choma rŭ tá pexna chixŭ i nŭma, rŭ pema rŭ tá chauxcèx pedaugŭ, natŭrŭ tá perŭ pecadugu peyue. Rŭ ngextá íchaxŭxŭwa rŭ taxucŭrŭwama ngema pexŭ —ñanagŭrŭ. ²² Rŭ yexguma ga yema Yudŭgŭ rŭ ñanagŭrŭgŭ: —¿Éxna nŭgŭ tátama nimèx rŭ ngèmacèx tamaã nŭxŭ yaxuxŭ na taxucŭrŭwama ngema ixŭxŭ i ngèma ínaxŭxŭwa? —ñanagŭrŭgŭ. ²³ Rŭ Ngechuchu ñanagŭrŭ nŭxŭ: —Pema rŭ ñoma i naãnecŭãx i duŭxŭgŭ pixŭgŭ, natŭrŭ i choma rŭ daxŭguxŭ i naãnewa ne chaxŭ. Pema rŭ ñoma i naãneârŭ duŭxŭgŭ pixŭgŭ natŭrŭ i choma rŭ tama ñoma i naãnecŭãx chixŭ. ²⁴ —Rŭ ngèmacèx pemaã nŭxŭ chixu rŭ tá perŭ pecadugu peyue. Erŭ ngèxguma tama choxŭ peyaxŭgŭgu na choma chiŭxŭ ya Cristu, rŭ perŭ pecadugu tá peyue —ñanagŭrŭ. ²⁵ Rŭ yexguma nŭxna nacagŭe, rŭ ñanagŭrŭgŭ: —¿Natŭrŭ texé quixŭ i cumax? —ñanagŭrŭgŭ. Rŭ Ngechuchu nanangãxŭ, rŭ ñanagŭrŭ: —Marŭ noxritama pemaã nŭxŭ chixu na texé chiŭxŭ. ²⁶ —Rŭ choma rŭ choxŭ nangèxma i muxŭma i tacŭ i chomatama pexŭ changŭexèèchaŭxŭ rŭ tacŭcèx pexna na chaçaxŭ, natŭrŭ tãútama chanaxŭ i ngèma. Erŭ yima Chaunatu ga nŭma choxŭ mucŭ chomaã nŭxŭ ixuxŭ i orexicatama nixŭ i ñoma i naãnecŭãxgŭmaã nŭxŭ chixuxŭ. Rŭ guxŭma i ngèma nŭxŭ yaxuxŭ ya Chaunatu, rŭ aixcŭma nixŭ —ñanagŭrŭ. ²⁷ Natŭrŭ nŭmagŭ rŭ tama nŭxŭ nacuèxgŭega ga Nanatu ya Tupanachiga na yŭxŭ na yema ñaxŭ ga Ngechuchu. ²⁸ Rŭ yemacèx ga Ngechuchu rŭ ñanagŭrŭ nŭxŭ: —Choma nixŭ i Tupana Nane i duŭxŭxŭ chiŭxŭ. Rŭ yixcŭra ngèxguma curuchawa choxŭ pipotagŭgu, rŭ tá nŭxŭ picuèxãchitanŭ na Cristu na chiŭxŭ. Rŭ tá nŭxŭ pecuèx na taxuŭma chauechamatama chaxŭxŭ. Rŭ ngèma Chaunatu chomaã nŭxŭ ixuxŭxŭicatama nixŭ i pemaã nŭxŭ chixuxŭ. ²⁹ —Yima nŭma choxŭ mucŭ ya Chaunatu rŭ chauxŭtawa nangèxma. Rŭ taguma choxna nixŭgachi, erŭ choma rŭ guxŭguma chanaxŭ i ngèma norŭ ngŭchaŭ ixŭxŭ —ñanagŭrŭ. ³⁰ Rŭ yexguma yema ñaxgu ga Ngechuchu rŭ muxŭma ga duŭxŭgŭ nŭxŭ nayaxŭgŭ.

Yŭxema Tupanaxãcŭgŭ ixŭgŭxechiga, rŭ yŭxema pecadutŭŭwa ngèxmagŭxechiga

³¹ Rŭ yexguma ga Ngechuchu rŭ ñanagŭrŭ nŭxŭ ga yema Yudŭgŭarŭ ãèxgacŭgŭ ga nŭxŭ yaxŭgŭxŭ: —Ngèxguma pema meãma peyaxŭgŭechagu i ngèma pemaã nŭxŭ chixuxŭ, rŭ aixcŭmaxŭchi tá chorŭ ngŭexŭgŭ pixŭgŭ. ³² —Rŭ tá nŭxŭ pecuèx i ore i aixcŭma ixŭxŭ. Rŭ ngèma ore tá pexŭ ínanguxŭxŭèè —ñanagŭrŭ. ³³ Rŭ nŭmagŭ rŭ Ngechuchuxŭ nangãxŭgŭ, rŭ ñanagŭrŭgŭ: —Toma rŭ nuxcŭmaŭcŭ ga torŭ oxŭ ga Abrãŭtaa tixŭgŭ rŭ taguma texémèxewa tangèxmagŭ. ¿Ñuxãcŭ i cumax rŭ tá na ítanguxŭxŭ, ñacuxŭ? —ñanagŭrŭgŭ. ³⁴ Rŭ Ngechuchu ñanagŭrŭ nŭxŭ: —Aixcŭma pemaã nŭxŭ chixu rŭ guxãma ya pecaduãxè rŭ pecadutŭŭwa tangèxmagŭ. ³⁵ —Wŭxi i coriarŭ duŭxŭmare rŭ tama norŭ coripatacŭãx nixŭ. Natŭrŭ wŭxi i cori nane rŭ guxŭguma nanatu nane nixŭ. ³⁶ —Choma rŭ Tupana Nane chixŭ. Rŭ ngèxguma chi choma pecaduna pexŭ íchanguŭxèègu, rŭ aixcŭma tá nŭxna ípenguŭ. ³⁷ —Marŭ nŭxŭ chacuèx na Abrãŭtaa pixŭgŭxŭ i pemax. Natŭrŭ choxŭ pimèxgŭchaŭ erŭ tama aixcŭma choxŭ peyaxŭgŭ i ngèma ore i pemaã nŭxŭ chixuxŭ. ³⁸ —Choma rŭ yema Chaunatu choxŭ wéxŭ nixŭ i pemaã nŭxŭ chixuxŭ. Natŭrŭ pema rŭ penaxŭ i ngèma penatu pemaã nŭxŭ ixuxŭ —ñanagŭrŭ ga Ngechuchu. ³⁹ Rŭ nŭmagŭ rŭ Ngechuchuxŭ nangãxŭ rŭ ñanagŭrŭgŭ: —Torŭ oxŭ nixŭ ga Abrãŭ —ñanagŭrŭgŭ. Natŭrŭ Ngechuchu nanangãxŭ rŭ ñanagŭrŭ nŭxŭ: —Ngèxguma chi aixcŭma Abrãŭtaa pixŭgŭgu rŭ chi Abrãŭ ŭxŭrŭŭ penaxŭ. ⁴⁰ —Natŭrŭ woo pemaã nŭxŭ chixu i ore i aixcŭma ixŭxŭ ga Chaunatu ga Tupana choxŭ nguxèèxŭ, rŭ pema rŭ choxŭ pimèxgŭchaŭ. Natŭrŭ ga Abrãŭ rŭ taguma yemaãcŭ nanaxŭ. ⁴¹ —Pema rŭ penaxŭ i penatŭgŭcŭmatama —ñanagŭrŭ. Rŭ yexguma ga nŭmagŭ rŭ ñanagŭrŭgŭ: —Toma rŭ tama tangŭrŭwaŭgŭmare, rŭ toxŭ nangèxma ya wŭxitama ya tonatu. Rŭ yima nixŭ ya Tupana —ñanagŭrŭgŭ. ⁴² Rŭ Ngechuchu nanangãxŭ, rŭ ñanagŭrŭ nŭxŭ: —Ngèxguma chi aixcŭma Tupana yixŭgu ya penatu rŭ choxŭ chi pengechaŭ, erŭ choma rŭ Tupanaxŭtawa nixŭ i ne chaxŭxŭ, rŭ ngèmacèx chanuxma. Rŭ tama chauechamatama nŭma chaxŭ,

natürü núma chaxũ yerü Chaunatü ya Tupana núma choxũ namu. ⁴³ —¿Tũxcũũ tama nũxũ pecuèxéga i ngẽma pemaã nũxũ chixuxũ? Pexũ naguxcha erü woetama tama iperũxĩnũechaũ i ngẽma pemaã nũxũ chixuxũ i ore. ⁴⁴ —Penatü rü Chataná nixĩ rü pema rü naxácũgũ pixĩgũ. Rũ ngẽmacèx penaxũ i ngẽma núma pexũ nanaxwèxexũ. Rũ ngẽma Chataná rü noxriarü ügũgumama wũxi i máètaxũ nixĩ. Rũ taguma ore i aixcũmaxũgu narũxĩnũ rü taguma ore i aixcũmaxũ nixu. Rũ ngẽxguma yadeaxgu rü doraxũxĩcatama nixu, erü núma rü wũxi i doratèxáxũ nixĩ. Rũ guxũma i doratèxáxũnatü nixĩ. ⁴⁵ —Natürü i pema rü tama choxũ peyaxõgũchaũ erü ore i aixcũmaxũ chixu. ⁴⁶ —¿Texé ya petanũwa choxũ dauxe na pecadu chaxũxũ? Rũ ñuxma na nũxũ chixuxũ i ore i aixcũma ixĩxũ, rü ¿tũxcũũ tama choxũ peyaxõgũ? ⁴⁷ —Texé ya Tupanaãrũ duũxũ ixĩxẽ rü itarũxĩnũ i Tupanaãrũ ore. Natürü i pema rü tama Tupanaãrũ duũxũgũ pixĩgũ, rü ngẽmacèx nixĩ i tama iperũxĩnũechaũxũ i Tupanaãrũ ore —ñanagürü.

Tauta nangoxgu ga Abráũ rü Cristu rü marü nayexma

⁴⁸ Rũ yexguma ga yema Yudĩgũarũ ãèxgacũgũ rü ñanagürũgũ nũxũ: —Rũ aixcũma nixĩ ga yema torü ore ga yexguma ñatagũgũgu:

“Cuma rü wũxi i Chamáriacũãx quixĩ, rü ngoxo cuwa nangẽxma”, ñatagũgũgu —ñanagürũgũ. ⁴⁹ Rũ Ngechuchu nanangãxũ, rü ñanagürü nũxũ: —Chowa rü nataxuma i ngoxo. Rũ ngẽma chaxũxũ nixĩ na Chaunatũxũ chicuèxũxũ, natürü i pema rü chixri chauchiga pidexagũ. ⁵⁰ —Choma rü tama naxcèx chadau na texé choxũ icuèxũũgũxũcèx. Natürü Tupana nixĩ ya naxwèxecü na duũxũgũ choxũ icuèxũũgũxũ. Rũ núma tá nanapoxcue i ngẽma chauxchi aixũ. ⁵¹ —Aixcũma pemaã nũxũ chixu, rü texé ya naga ñnũxẽ i ngẽma tümamaã nũxũ chixuxũ rü guxũgutáma tamaxècha —ñanagürü. ⁵² Rũ yexguma ga yema Yudĩgũarũ ãèxgacũgũ, rü Ngechuchuxũ nangãxũgũ, rü ñanagürũgũ: —Ñuxma rü meãxũchima nũxũ tacuèx na cuwa nangẽxmaxũ i wũxi i ngoxo. Yerü ga Abráũ rü guxũma ga nuxcũmaũgũxũ ga Tupanaãrũ orearü uruũgũ rü nayue. Natürü cuma rü ñuxma tomaã nũxũ quixu rü texé ya naga ñnũxẽ i ngẽma curü ore rü guxũgutáma tamaxècha —ñacurũgũ. ⁵³ —¿Éxna cuma rü tórü õxi ga Abráũãrũ yexera quixĩ? Yerü núma rü nayu rü guxũma ga nuxcũmaũgũxũ ga Tupanaãrũ orearü uruũgũ rü ta nayue. ¿Rũ cugũcèx rü texé quixĩ? —ñanagürũgũ. ⁵⁴ Rũ Ngechuchu nanangãxũ, rü ñanagürü nũxũ: —Ega chaugũ chitama chicuèxũũgu rü ngẽma rü taxuwama name. Natürü yima choxũ icuèxũcũ rü Chaunatü nixĩ. Rũ yima Chaunatütama nixĩ ya perü Tupana ixĩcũ —ñapegũcũ nũxũ. ⁵⁵ —Natürü i pema rü tama aixcũma nũxũ pecuèx ya Chaunatü ya Tupana. Natürü i choma rü ngẽmããcũ nũxũ chacuèx. Rũ ngẽxguma chi:

“Tama nũxũ chacuèx”, ñachaxgu, rü pexrũũ chi wũxi i doratèxáxũ chixĩ. Natürü i choma rü aixcũmaxũchima nũxũ chacuèx ya Chaunatü ya Tupana, rü naga chaxĩnũ i guxũma i norü ore i chomaã nũxũ yaxuxũ. ⁵⁶ —Perü õxi ga Abráũ rü nataãe yerü aixcũma nayaxõ rü tá na íchanguxũ i ñoma i naãnewa. Rũ yemaxũ nacuèx rü yemacèx nataãe —ñanagürü ga Ngechuchu. ⁵⁷ Rũ yexguma ga yema Yudĩgũarũ ãèxgacũgũ rü Ngechuchuxũ nangãxũgũ, rü ñanagürũgũ: —Cuma rü tauta 50 ya taunecü cuxũ nangẽxma. ¿Ñuxãcũ Abráũxũ cudau ga tauta cungoxgux ga yexguma? —ñanagürũgũ. ⁵⁸ Rũ Ngechuchu nanangãxũ rü ñanagürü nũxũ: —Aixcũma pemaã nũxũ chixu rü tauta Abráũ ngoxgu rü choma rü marü chayexma —ñanagürü. ⁵⁹ Rũ yexguma ga nümagũ rü nutane nanayauxgũ na gumamaã ínamuxũchigũãxũcèx. Natürü ga Ngechuchu rü naxchaxwa inicux. Rũ yemaãcũ ínaxũxũ nawa ga guma tupauca ga taxũne.

9

Ngechuchu nanamexẽ ga wũxi ga yatü ga norü bucũma ngexetücü

¹ Rũ yexguma namagu tomaã yaxũxgu ga Ngechuchu, rü yéma nũxũ nadau ga wũxi ga yatü ga woetama norü bucũma ngexetücü. ² Rũ toma ga norü ngũexũgũ rü nũxna

tacagü, rü ñatarügügü: —Pa Ngúexêëruüx, ¿Tüxcüü ngexetücüma nabu ya daa yatü? ¿Éxna nanatü rü naëärü pecadugagu rü éxna norü pecadugagutama? —ñatarügügü. ³ Rü Ngechuchu toxü nangãxü, rü ñanagürü toxü: —Tama norü pecadugagu rü tama i nanatü rü naëärü pecadugagu nixi i ngëmaãcü nabuxü. Natürü ngëmaãcü nabu na nawa nüxü pedauxücèx na ñuxãcü Tupana tüxü na rümexêëxü. ⁴—Rü ñoma rü ta nangune rü name nixi na paxama na naxüxü i ngëma puracü ya Chaunatü ga núma choxü mucü tüxna äxü. Erü paxa tá nachüta rü ngëxguma rü taxucürüwama texé tá tapuracü. ⁵ —Rü ñuxma na ñoma i naãnewa changëxmaxü rü ñoma i naãneärü ngóonexêëruü chixi —ñanagürü. ⁶ Rü yexguma yema ñaxguwena rü Ngechuchu waixüümüãnewa nacuaxi. Rü yema waixüümü ga iwaixümaã nanachaxetü ga guma yatü ga ngexetücü. ⁷ Rü yexguma guma ngexetücüxü ñanagürü: —¿Dexámaã cugü yayauxetü i Chiruéarü puchuwa! —ñanagürü. Rü ngëma naega rü “Tüxü muxü”, ñaxüchiga nixi. Rü yéma naxü ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü. ⁸ Rü yexguma ga yema duüxügü ga guma ngexetücüpataarü ngaicamagu pegüxü rü yema duüxügü ga üpaacü nüxü daugüxü ga na nangexetüxü, rü ñanagürügü: —¿Taux éxna i ñaã yixü ga yema yatü ga ngexetüchiréxü ga duüxügüxü dīerucèx cèexüxü? —ñanagürügü. ⁹ Rü nümaxü rü ñanagürügü: —Ngëmaãcü nüma nixi —ñanagürügü. Rü togü rü ñanagürügü: —Tama nixi i yima yixü, natürü nanangëxgumaraüxüchi —ñanagürügü. Natürü nümatama ga guma yatü ga ngexetüchirécü, rü ñanagürü: —Ngëmaãcü choma chixi —ñanagürü. ¹⁰ Rü yexguma ga yema duüxügü rü nüxna nacagü rü ñanagürügü: —¿Rü ñuxãcü nixi i marü quidauchixü i ñuxmax? —ñanagürügü. ¹¹ Rü nüma nanangãxü rü ñanagürü: —Yima yatü ya Ngechuchugu äegacü rü yima waixüümüãnewa nacuaxi. Rü yema waixüümü ga iwaixümaã choxü nachaxetü. Rü ñanagürü choxü: “¿Yéa Chiruéarü puchuwa naxü rü ngëma dexámaã cugü yayauxetü!” ñanagürü choxü. Rü yéma chaxü, rü yexguma dexámaã chaugü chayauxetügu rü chidauchi —ñanagürü ga guma yatü. ¹² Rü yexguma nüxna nacagüe, rü ñanagürügü: —¿Ngextá nangëxmaxü i ñuxma ya yima yatü ya cuxü rümexêëcü? —ñanagürügü. Rü nüma ga guma yatü ga ngexetüchirécü rü ñanagürü: —Tama nüxü chacuèx —ñanagürü.

Parichéugü rü guma ngexetücü ga Ngechuchu namexêëcüna nacagüe

¹³⁻¹⁴ Natürü yema ngunexü ga Ngechuchu nagu namexêëxü ga guma ngexetücü, rü ngüxchigaarü ngunexü nixi. Rü yemacèx ga duüxügü rü Parichéugüxütawa nanagagü ga guma yatü ga ngexetüchirécü. ¹⁵ Rü yexguma ga yema Parichéugü rü nüxna nacagüe ga guma yatü, rü ñanagürügü: —¿Ñuxãcü i marü curümexëtüxü i ñuxmax? —ñanagürügü. Rü nüma nanangãxü rü ñanagürü: —Waixüümü ga naxbüxágümaã yawaixêëxümaã choxü nachaxetü ga Ngechuchu, rü ñuxüchi dexámaã chaugü chayauxetü, rü ngëmacèx marü chidauchi —ñanagürü. ¹⁶ Rü yexguma ga ñuxre ga Parichéugü rü ñanagürügü: —Yema yatü ga cuxü rümexêëxü rü tama Tupanaärü duüxü nixi, erü tama nanaxaure i ngüxchigaarü ngunexü —ñanagürügü. Natürü togü ga Parichéugü rü ñanagürügü: —¿Ñuxãcü nanaxü i ngëma cuèxruü i mexü i taxü ega wüxi i pecaduãxü yixixgux? —ñanagürügü. Rü yemaãcü nügü nitoye ga nagu naxinüexüwa ga yema Parichéugü. ¹⁷ Rü wena nüxna nacagüe ga guma yatü ga ngexetüchirécü, rü ñanagürügü: —¿Natürü cuma rü ñuxü ñacuxü nachiga i ngëma yatü ga cuxü rümexêëxü? —ñanagürügü. Rü nüma nanangãxü, rü ñanagürü: —Chauxcèx rü wüxi i Tupanaärü orearü uruü nixi —ñanagürü. ¹⁸ Natürü ga yema Yudiügüarü äëxgacügü rü tama nüxü nayaxögüchaü ga nüma na yixü ga na nangexetüchiréxü ga noxrix, rü ñuxma rü marü na yadauchixü. Rü yemacèx ga yema äëxgacügü rü tümacèx nangemagü ga nanatü rü naë ga guma yatü ga rümexëtücü. ¹⁹ Rü tüxna nacagü, rü ñanagürügü: —¿Daa yixü ga guma pene ga nüxü pixucü ga woetama ngexetüãcü bucü? ¿Ñuxãcü i ñuxma i yadauchixü? —ñanagürügü. ²⁰ Rü nanatü rü naë tanangãxügü rü ñatarügügü: —Ngëmaãcü nüxü tacuèx rü daa nixi ya

tone ga ngexetüácüma buchirécü. ²¹ Natürü tama nüxü tacuèx ga ñuxácü na yadauchixü i ñuxmax. Rü tama nüxü tacuèx ga texé na namexëtüxëxü. ¡Ëcü nüxnatama pecagü! Erü nüma rü marü naya, rü nümatama pemaã nüxü na yaxuxüçèx —ñatarügügü. ²² Rü yema ñatarügügü ga nanatü rü naë, yerü tamuüë. Yerü ga Yudíugüarü âëxgacügü rü marü nügümaã nanamexëëgü na tüxü ínatèxüchigüxüçèx ga ngutaquëxepataüwa ga texé ga Ngechuchuaxü yaxõxë na Cristu yíxü. ²³ Rü yemacèx nixí ga nanatü rü naë ga ñatagügüxü: “¡Ëcü, nüxnatama pecagü! Erü nüma rü marü naya rü nümatama pemaã nüxü na yaxuxüçèx”, ñatagügüxü. ²⁴ Rü yexguma ga yema Yudíugüarü âëxgacügü rü wenaxârü naxcèx nacagü ga guma ngexetüchirécü. Rü ñanagürügü nüxü: —Rü ñuxma tanaxwèxe i Tupanapëxewa rü aixcüma tomaã nüxü quixu na texé cuxü rümexëëxü. Erü toma rü meãma nüxü tacuèx i ngëma Ngechuchu rü wüxi i pecaduãxü na yíxü —ñanagürügü. ²⁵ Rü nüma nanangãxü rü ñanagürü nüxü: —Choma rü tama nüxü chacuèx ega wüxi i pecaduãxü yixígu rü ëxna tama. Rü ngëma nüxü chacuáxü nixí ga na changexetüchiréxü ga noxrix rü ñuxma rü na chidauchixü —ñanagürü. ²⁶ Rü wenaxârü nüxna nacagüe, rü ñanagürügü: —¿Rü tacü nixí ga cumaã naxüxü? ¿Rü ñuxácü ga naxüãxü ga cuxü na yadauchixetüxëëxü? —ñanagürügü. ²⁷ Rü nanangãxü rü ñanagürü nüxü: —Marü pemaã nüxü chixu, rü tama choxü iperüxĩnüëchaü. ¿Tüxcüü penaxwèxe na wena pemaã nüxü chixuxü? ¿Ëxna pema rü ta nüxü peyaxõgüchaü? —ñanagürü. ²⁸ Rü yexguma rü guma yatümaã chixexü nixugüe, rü ñanagürügü: —Cumaërü nixí i nüxü cuyaxõxü i ngëma yatü, natürü i toma rü Moíchéarü oreaxü nixí i tayaxõgüxü. ²⁹ —Toma rü nüxü tacuèx ga Tupana rü aixcüma Moíchémaã na yadexaxü, natürü ngëma Ngechuchu rü tama nüxü tacuèx na ngextá na ne naxüxü —ñanagürügü. ³⁰ Rü guma yatü nanangãxü, rü ñanagürü nüxü: —¿Ñuxácü nixí i ngëma? Nüma rü marü choxü narümexëtüxëë, natürü ¿ñuxácü i pema i tama nüxü pecuáxü na ngextá ne naxüxü? ³¹ —Rü guxãma i yixema rü meãma nüxü tacuèx rü Tupana tama nüxü naxĩnü i pecaduãxgüxüãrü yumüxë. Natürü Tupana rü tüxü nüxü naxĩnü i tümaãrü yumüxë ya yixema nüxü icuèxüügüxe rü naxúxe i Tupanaãrü ngúchaü. ³² —Taguma ñuxgu nüxü taxĩnüchiga i wüxi i yatü na yadauchixëëãxü i wüxi i duüxü i norü bucüma ngexetüxü. ³³ —Rü ngëxguma chí tama Tupana núma namuxgux ya daa yatü ya choxü rümexëëcü, rü taxuacü chima mexü naxü —ñanagürü ga guma yatü ga ngexetüchirécü. ³⁴ Rü yexguma ga yema Yudíugüarü âëxgacügü, rü ñanagürügü nüxü: —Cuma na pecadugu na cubuxü, ¿rü ñuxácü cunaxwèxe na toxü cungüxëëchaüxü? —ñanagürügü. Rü ñuxüchi ínatèxüchigü ga ngutaquëxepataüwa.

Duüxügü i tama yaxõgüxü rü ngexetüxürrüü nixígu

³⁵ Rü Ngechuchu rü nüxü nacuáchiga ga na ínatèxüchigüãxü ga guma ngexetüchirécü. Rü yexguma nüxü nadëuxgu, rü ñanagürü nüxü: —¿Nüxü cuyaxõxü ya Tupana Nane ya duüxüxü ixícü? —ñanagürü. ³⁶ Rü yexguma ga nüma rü Ngechuchuxü nangãxü rü ñanagürü: —Pa Corix, ¡chomaã nüxü ixu na texe yíxü na nüxü chayaxõxüçèx! —ñanagürü. ³⁷ Rü Ngechuchu nanangãxü, rü ñanagürü: —Marü nüxü cudau ya Tupana Nane. Rü chomatama nixí i cumaã na íchidexaxü chíxü —ñanagürü. ³⁸ Rü yexguma ga guma yatü ga ngexetüchirécü rü Ngechuchupëxegu nacaxãpüxü, rü nüxü nicuèxüü, rü ñanagürü nüxü: —Ngëmaãcü cuxü chayaxõ, Pa Corix —ñanagürü. ³⁹ Rü yexguma ga Ngechuchu rü ñanagürü: —Rü ñoma i naãnewa chaxü na chayadexechixüçèx i chorü duüxügü nüxna i ngëma duüxügü i tama choxrü ixígüxü. Rü nuã chaxü na chanameëxëëxüçèx i ngëma duüxügü i noxri tama Tupanaxü cuèxgüxü. Rü ngëxgumarüü ta núma chaxü na duüxügü i tama choxü cuèxgüchaüxüxü chanawéxü na duüxügü i ngexetüxürrüü na yixígüxü, erü tama choxü nayaxõgüchaü —ñanagürü. ⁴⁰ Rü ñuxre ga Parichéugü ga yéma Ngechuchumaã yexmagüxü, rü yexguma yema orexü naxĩnüëgu,

rü Ngechuchuna nacagü, rü ñanagürügü: —¿Éxna toma rü ta tama Tupanaxü tacuèxgü ñacuxü? —ñanagürügü. ⁴¹ Rü Ngechuchu nanangãxü rü ñanagürü nüxü: —Ngëxguma chi tama aixcüma Tupanaxü pecuèxgügu rü tâü chima pegagu nixĩ na pepecaduãxgüxü. Natürü ngëma na pegü pixuxü na Tupanaxü pecuáxü rü ngëmacèx pegagutama nixĩ na pepecaduãxgüxü i ñuxmax —ñanagürü.

10

Carnerugüarü dauruü rü norü carnerugü

¹ Rü yexguma ga Ngechuchu rü ñanagürü: —Rü aixcüma pemaã nüxü chixu rü ngëma yatü i tama carnerupüxüârü ãxwa ixücuxü rü wüxi i ngítèxáxü nixĩ i ngëma, erü ngextámare nixücu. ² —Natürü ngëma carnerupüxüârü ãxwa meãma ixücuxü, rü ngëma nixĩ i norü dauruüxüchi i carnerugü. ³ —Rü ngëma yatü i carnerupüxüârü ãxna dauxü rü nayawãxna i ãx na yaxücuxüçèx i carnerugüarü dauruü. Rü nüma i carnerugü rü nüxü nacuèxgü i naga i ngëma norü dauruü. Rü ngëma norü dauruü rü wüxichigü i norü carneru rü naegamaã naxcèx naca na ínamuxüãxüçèx i naxpüxüwa. ⁴ —Rü ngëxguma ínamuxüãxgu i guxüma i norü carnerugü, rü nüma i norü dauruü rü napèxegu nixüchigü. Rü nümagü i carnerugü rü nawe narüxĩ, erü nüxü nacuèxgü i naga. ⁵ —Natürü ngëxguma wüxi i yatü i tama aixcüma norü dauruü ixixü, rü tama nawe narüxĩ i ngëma carnerugü. Rü nüxna naxĩgü, erü tama nüxü nacuèxgü i naga i ngëma tama norü dauruü ixixü —ñanagürü ga Ngechuchu. ⁶ Rü Ngechuchu rü duüxügümaã nüxü nixu ga yema ore ga cuèxruü, natürü ga nümagü rü tama nüxü nacuèxgüéga ga tacüchiga na yĩxü.

Ngechuchu rü carneruarü dauruü ya mecü nixĩ

⁷ Rü yexguma ga Ngechuchu rü wenaxârü ñanagürü nüxü: —Aixcüma pemaã nüxü chixu rü choma nixĩ i carnerupüxüârü ãx na nawa yachocuxüxü i carnerugü. ⁸ Guxüma ga yema chopegu nüxira núma íxü rü ngítèèxgüxü rü máètagüxü nixĩgü. Natürü yema carnerugü rü tama naga naxĩnüë. ⁹ Choma nixĩ i ãx. Rü texé ya chowa ixücuxe rü tá tamaxü. Rü meãma tá tüxü naxüpetü ngëxgumarüü i wüxi i carneru i naxpüxügu ücuxü rü íxüxüxü rü nüxü iyangaucü ya mecü ya maxë. ¹⁰ Ngëma ngítèxáxü rü núma naxü na yangíxüçèx rü namáètaxüçèx rü nachixexëãxüçèx. Rü ngëmacèxicatama núma naxü. Natürü i choma rü núma chaxü na chanamaxëxëxüçèx i duüxügü rü na aixcüma nüxü nangëxmaxüçèx i maxü i taguma gúxü. ¹¹ Choma nixĩ i carneruarü dauruü ya mecü chíxü. Erü wüxi i carneruarü dauruü ya mecü rü norü carnerugüxü ínapoxü rü ñuxmata naxcèx nayux. ¹² Natürü ngëma díerucèxmare puracüxü, rü ega ngëxguma aixü nadèuxgux rü carnerugüna ngema niña. Rü ngëmaãcü nanaxü erü tama aixcüma norü dauruü nixĩ i nümax, rü tama noxrü nixĩ i ngëma carnerugü. Rü ngëma ai rü carnerugüxü ínayauxü rü ngëxma tüxü naxüanexëmare. ¹³ Rü ngëma yatü rü niña, erü norü díerucèxicatama ngema napuracü. Rü tama aixcüma carnerugügu narüxĩnü. ¹⁴⁻¹⁵ Choma nixĩ i carnerugüarü dauruü ya mecü chíxü. Rü ngëxgumarüü ya Chaunatü na choxü nacuáxü rü choma rü Chaunatüxü na chacuáxü, rü ngëxgumarüü ta nüxü chacuèx i chorü carnerugü, rü nümagü rü choxü nacuèxgü. Rü choma rü naxcèx chayü i chorü carnerugü. ¹⁶ Rü choxü nangëxmagü ta i togü i carnerugü i tama ñaã naxpüxüwa ngëxmagüxü. Rü ngëmagü rü tá ta nuã chanagagü, rü tá chauga naxĩnüë. Rü wüxitücumü tátama nixĩ rü choma tátama nixĩ i norü dauruü chíxü. ¹⁷ Chaunatü rü choxü nangechaü, erü chorü carnerugüçèx chayü rü wena táxarü chamaxü. ¹⁸ Taxüema choxü tayuxëë, natürü chomatama chorü ngüchaümaátama ichanaxã i chorü maxü. Erü choxmëxwa nangëxma na ichanaxãxüçèx, rü wena na chanayaxuxüçèx, yerü yemaãcü choxü namu ga Chaunatü —ñanagürü. ¹⁹ Rü yexguma yema orexü naxĩnüëgu ga yema Yudíugüarü ãëxgacügü rü wenaxârü nügü nitoye ga yema nagu naxĩnüëxüwa. ²⁰ Rü muxüma ga nümagü rü ñanagürügü: —¿Tüxcüü nüxü iperüxĩnüë i ñaã yatü i ngëãxü i ngoxo nawa ngëxmaxü? —ñanagürügü.

²¹ Natürü ga togü rü ñanagürügü: —Taxuñma i yatü i ngoxo nawa ngëxmaxü rü ñaärüü meã nidexa. ¿Ñuxãcü i wüxi i yatü i ngoxo nawa ngëxmaxü rü tüxü narümexëtüxëe ya wüxi ya ngexetüxe? —ñanagürügü.

Yudíugüarü ãëxgacügü rü Ngechuchuxü naxoe

²² Rü nawa nangu ga yema peta ga gucü ga taunecügu norü tupauca ga taxü necëx naxügüxü ga Yudíugü na nüxna nacüèxãchigüxüçëx ga yema ngunexü ga nagu yanguxü ga guma tupauca. Rü nagáuane ga Yerucharéüwa ga yexguma. ²³ Rü guma tupauca ga taxünewa nayexma ga wüxi ga chopetüchica ga Charumóüarü Chopetüchicagu äegaxü. Rü yemagu nayarüxüxü ga Ngechuchu. ²⁴ Rü ga yema Yudíugüarü äëxgacügü rü nüxü ínachomaëguãchi, rü ñanagürügü nüxü: —¿Ñuxgurátá tomaã quixaixcüma na cügü quixuxü na texé na quiixü? Ega aixcüma cuma rü Cristu quixígu, rü jmeã noxtacüma tomaã nüxü ixu! —ñanagürügü. ²⁵ Rü Ngechuchu nanangãxü, rü ñanagürü nüxü: —Marü pemaã nüxü chixu, natürü i pema rü tama choxü peyaxögü. Guxüma i tacü i chaxüxü rü Chaunatüarü poramaã nixí i chanaxüxü, rü ngëmawa meãma pexü nüxü chadauxëe na choma rü Cristu na chiixü. ²⁶ —Natürü pema rü tama peyaxögü, erü tama chorü carnerugütanüxü pixígu. ²⁷ —Chorü carnerugü rü nüxü nacüèx i chauga, rü choma rü chorü carnerugüxü chacuèx, rü nüma rü chowe narüxí. ²⁸ —Rü choma rü nüxna chanaxã i maxü i taguma gúxü. Rü nümagü rü tagutáma inayarütaxe, rü taxúetáma choxna tanapuxü i choxmëxwa. ²⁹ —Rü yíxema Chaunatü choxna tüxü mugüxe ya chorü carnerugü, rü guxüarü yexera tixí i napëxewa. Rü taxúema texé nüxna tüxü tapuxü. ³⁰ —Chaunatü rü choma rü wüxitama tixígu —ñanagürü. ³¹ Rü yexguma ga yema Yudíugüarü äëxgacügü rü wenaxärü nutane nanayauxgü na gumamaã Ngechuchuxü ínamuxüchigüxüçëx. ³² Natürü ga Ngechuchu rü ñanagürü nüxü: —Pepëxewa chanaxü i muxüma i mexügü i Chaunatüarü poramaã chaxüxü. ¿Rü ngëxürüxü i ngëma mexü i chaxüxüçëx nixí i choxü nutamaã ípëmuxüchigüchaüxü? —ñanagürü. ³³ Rü yema Yudíugüarü äëxgacügü rü Ngechuchuxü nangãxügü, rü ñanagürügü: —Tama wüxi i puracü i mexüçëx cuxü ítamuxüchigüchaü. Natürü cuxü ítamuxüchigüchaü erü Tupanamaã rü tacü quixugü. Cuma rü wüxi i duüxümare quixí rü cügü Tupanaxü quixíxëechaü —ñanagürügü. ³⁴ Rü nüma ga Ngechuchu rü ñanagürü nüxü: —Perü mugüpanewa rü naxümatü i Tupanaärü ore i ñaxü:

“Rü pematama nixí i tupanagü pixíguxü”,

ñaxü. ³⁵ —Rü ngëma Tupanaärü ore i úmatüxüwa nüxü yaxuxü, rü nüxü tacüèx rü taxucürüwama texé itayanaxoxëe. Rü ngëma orewa rü Tupana rü ñanagürü:

“Guxãma ya yíxema texé yanayauxgüxe i chorü ore rü tupanagü tixígu”,

ñanagürü i ngëma orewa. ³⁶ —Rü Tupana choxü nayaxu na chanaxüxüçëx i norü puracü, rü yemacëx ñoma ga nañewa choxü namu. ¿Rü ñuxãcü i pema nagu perüxíñüëgu rü chixexü Tupanamaã chaxüxü i ngëxguma Tupana Nane chixí —ñachagu pemaã? ³⁷ —Rü ngëxguma chi tama chanaxüxgu i ngëma mexü i Chaunatü üxü, rü marü name ega woo tama choxü peyaxögügu. ³⁸ —Natürü ngëxguma chanaxüxgu i ngëma Chaunatü üxü, rü woo tama choxü peyaxögügu, rü chanaxwëxe i nüxü peyaxögü i ngëma taxü i mexügü i Chaunatüarü poramaã chaxüxü. Erü ngëmawa tá nüxü pecüèx na Chaunatü rü chowa nangëxmaxü rü choma i nawa —ñanagürü. ³⁹ Rü wenaxärü Ngechuchuxü niyauxgüchaü ga yema Yudíugüarü äëxgacügü. Natürü nüma ga Ngechuchu rü naxchaxwa niña.

⁴⁰ Rü yexguma ga Ngechuchu rü natü ga Yudáüarü tocutüçëx tomaã nataegu. Rü yema nachica ga Cuáü duüxügüxü úpaacü nawa íbaiüxëexügu tomaã narüxãüx. ⁴¹ Rü muxüma ga duüxügü rü Ngechuchuxü ínayadaugü, rü ñanagürügü: —Cuáü rü taxuñma ga taxü ga mexü ga cuèxruü naxü ga Tupanaärü poramaã. Natürü guxüma ga ore ga Cuáü tamaã nüxü ixuxü ga ñaã yatüchiga rü aixcüma nixí —ñanagürügü. ⁴² Rü yema nachicawa rü muxüma ga duüxügü rü Ngechuchuxü nayaxögü.

11

Dácharuarü yuxchiga

¹ Nayexma ga wüxi ga yatü ga idaawecü ga Dácharugu äegacü. Rü nüma rü naëyèxgü ga María rü Marta rü iâne ga Betániäcũäx nixigü. ² Rü yema María iyixĩ ga Cori ga Ngechuchucutügu pumara bacü rü ñuxüchi ngïyaemaã ínapicutücü. Rü guma Dácharu ga idaawecü nixĩ ga ngïeneë. ³ Rü poraãcü nidaawe ga Dácharu. Rü yemacèx ga naëyèxgü, rü Ngechuchuxütawa imugagü, rü ngïgürügü: “Pa Corix, cumücü ya Dácharu ya nüxü cungechaücü rü nidaawe”, ngïgürügü. ⁴ Rü yexguma yema orexü naxĩnügu ga Ngechuchu, rü ñanagürü: —Ngëma ðaawe rü täütáma yumaã inayacuèx. Natürü nidaawe na duüxügü nüxü nadaugüxücèx na ñuxäcü naporaxü ya Tupana rü ñuxäcü choma i Nane rü ta na chaporaxü —ñanagürü. ⁵ Rü Ngechuchu poraãcü María rü Marta rü Dácharuxü nangechaü. ⁶ Natürü yexguma nüxü naxĩnügu ga na yaðaawexü ga Dácharu, rü tama paxa ínayadau. Rü taxre ga ngunexüãmatama yexma narüxãüx ga yema nachica ga nawa nayexmaxüwa. ⁷ Rü yixcama ga yemawena rü toxü ñanagürü: —¡Ngïxã rü wena Yudéaanewa taxĩ! —ñanagürü. ⁸ Rü toma ga norü ngúexügü rü ñatarügügü nüxü: —Pa Ngúexëëruüx, yexwacatama nixĩ ga yemacũäx ga Yudíugüarü äëxgacügü yexma nutamaã cuxü ímüxüchigüchaüxü. ¿Rü tüxcüü wena ngëma cuxüxchaü i ñuxmax? —ñatarügügü. ⁹ Rü Ngechuchu rü tomaã nüxü nixu ga wüxi ga ore na nüxü tacuèxgüxücèx na tauta nawa nanguxü na nayuxü ga nümax. Rü ñanagürü toxü: —¿Taux éxna i wüxi i ngunexü rü 12 i ora nawa ngëxmaxü? Ngëxguma texé ngunecü ixüxgu rü tama tacümaã itayarüña, erü tümacèx nangóone. ¹⁰ —Natürü ngëxguma wüxie chütacü ixüxgu rü ngëmaãcü tacümaã itayarüña, erü tümacèx naxëãne —ñanagürü. Rü yemaãcü nanangoxëë na tauta nawa nanguxü na nayuxü ga nümax. ¹¹ Rü yemawena ga Ngechuchu rü ñanagürü toxü: —Tamücü ya Dácharu rü napemare. Natürü ñuxma rü tá chayabaixächixëë —ñanagürü. ¹² Rü yexguma ga toma ga norü ngúexügü rü ñatarügügü: —Pa Corix, ega napemaregu, rü ngëmawa nüxü tacuèx na naxcèx tá yataanexü —ñatarügügü. ¹³ Natürü ga Ngechuchu rü nüxü nixuxchaüchirëx ga Dácharu ga marü na nayuxü. Natürü ga toma nüxü tacuèxgügu rü na napemarexüchigaxü yüxü ga tomaã yaxuxü. ¹⁴ Rü yexguma ga Ngechuchu rü meãma tomaã nüxü nixu rü ñanagürü: —Dácharu rü marü nayu. ¹⁵ —Natürü choma rü chataãë na tama ngëma changëxmaxü, erü ngëmaãcü nixĩ i namemaëxü i pexcèx na choxü peyaxögüxücèx. ¡Rü ngïxã rü ítayadaugü! —ñanagürü. ¹⁶ Rü yéma nayexma ga totanüxü ga Tumachi ga Wüxigu Buexü ga Taxreëxpüxümaã, naxugüxü. Rü nüma ga Tumachi rü ñanagürü toxü: —¡Ngïxã i yixema rü ta ngëma taxĩ na wüxigu Ngechuchumaã iyuexücèx! —ñanagürü.

Ngechuchu nixĩ i wena namaxëxëxü i yuexü

¹⁷ Rü yexguma Betániãwa tomaã nanguxgu ga Ngechuchu, rü marü ägümücü ga ngunexü nangupetü ga na iyatèxgüãxü ga Dácharu. ¹⁸ Rü guma Betániã rü Yerucharëüärü ngaicamana nayexma. Rü tomaëxpüx ga kilómetru nixĩ ga norü yaxü. ¹⁹ Rü muxüma ga Yudíugü rü Dácharueyèx ga Marta rü Maríaxütawa naxĩ na ngïxü yataãëxëëgüxücèx, yerü nayu ga ngïeneë. ²⁰ Rü yexguma Marta nüxü cuèxgu ga marü na ínanguxü ga Ngechuchu, rü nüxü iyatüxächi. Natürü ga María rü íxgutama íruxãüx. ²¹ Rü Marta rü ngïgürügü nüxü ga Ngechuchu: —Pa Corix, yexguma chi cuma cunumèxgu rü täü chima nayu ga chaueneë. ²² —Natürü choma nüxü chacuèx na woo i ñuxma na nayuxü, rü Tupana tá cuxna nanaxã i guxüma i tacü i naxcèx ícuçaxü —ngïgürügü. ²³ Rü Ngechuchu ngïxü nangãxü rü ñanagürü: —Cueneë rü wena tá namaxü —ñanagürü. ²⁴ Rü Marta ngïgürügü nüxü: —Ngëmaãcü nüxü chacuèx rü wena tá namaxü i ngëxguma naguxgu i naãne rü ngëxguma wena namaxëgu i guxüma i yuexü —ngïgürügü. ²⁵ Rü yexguma ga Ngechuchu rü ñanagürü: —Choma nixĩ i íchanadagüxëëxü i yuexügü, rü wena chanamaxëxëxü. Rü yixema choxü yaxõxë rü woo tayuxgu rü tá wenaxärü

tamaxŭ. ²⁶ —Rŭ guxãma ya texé ya maxŭxê rŭ choxŭ yaxŏxê, rŭ guxŭgutãma tamaxŭ. ¿Cuyaxŏxŭ yŭixŭ i ngẽma? —ñanagŭrŭ ga Ngechuchu. ²⁷ Rŭ ngĩma rŭ ngĩgŭrŭgŭ nŭxŭ: — Ngŭ, Pa Corix, choma rŭ chayaxŏ na cuma rŭ Tupana Nane ya Cristu ga ítananguxêcŭ na quiixŭ —ngĩgŭrŭgŭ.

Dácharu itáxŭwa naxaxu ga Ngechuchu

²⁸ Rŭ yema ñaxguwena rŭ Marta rŭ ngĩyèx ga Maríacè x iyaca. Rŭ bexma ngĩmaã nŭxŭ iyarŭxu, rŭ ngĩgŭrŭgŭ: —Marŭ nuã nangu ya Ngúexêẽruŭ ya Ngechuchu, rŭ choxŭ cuxcèx nayacaxêẽ —ngĩgŭrŭgŭ. ²⁹ Rŭ yexguma María nŭxŭ ñnŭgu ga marŭ yéma na nanguxŭ ga Ngechuchu, rŭ paxa ichi, rŭ Ngechuchuxŭ íyadau. ³⁰ Rŭ Ngechuchu rŭ tauta ñãnewa nangu ga yexguma, rŭ yema nachica ga Marta nŭxŭ ídauxŭwatama nixŭ ga nayexmaxŭ. ³¹ Rŭ Maríapatawa nayexma ga ñuxre ga yémacŭãx ga Yudíugŭarŭ ãëxgacŭgŭ ga ngixŭ yéma taãxêẽgŭxŭ. Rŭ yexguma ngixŭ nadaugŭgu ga paxa na inachixŭ rŭ na ínaxŭxŭ, rŭ ngĩwe narŭxŭ. Yerŭ nŭma nŭxŭ nacuèxgŭgu rŭ yéma Dácharu itáxŭwa ixŭ na yéma yaxaxuxcèx. ³² Rŭ yexguma Ngechuchuxŭtawã nanguxgu ga María, rŭ napéxegu iyacaxãpŭxŭ, rŭ ngĩgŭrŭgŭ: —Pa Corix, yexguma chi cuma cunumèxgu rŭ tãŭ chima nayu ga chaueneẽ ya Dácharu —ngĩgŭrŭgŭ. ³³ Rŭ yexguma Ngechuchu ngixŭ dèuxgu ga na naxaxuxŭ rŭ na naxauxexŭ ga yema Yudíugŭarŭ ãëxgacŭgŭ ga ngĩwe rŭxŭxŭ, rŭ porãcŭ ngechaŭ nŭxŭ nangux. ³⁴ Rŭ Ngechuchu nŭxna naca rŭ ñanagŭrŭ: —¿Ngexta nixŭ i ipenatáxŭ? —ñanagŭrŭ. Rŭ nŭmagŭ nanangãxŭ rŭ ñanagŭrŭgŭ: —Pa Corix, ¡dŭcax, nuã naxŭ, rŭ íyadau! —ñanagŭrŭgŭ. ³⁵ Rŭ naxaxu ga Ngechuchu. ³⁶ Rŭ yema Yudíugŭ rŭ ñanagŭrŭgŭ: —¡Dŭcèx ñuxãcŭ porãcŭ Dácharuxŭ nangechaŭ! —ñanagŭrŭgŭ. ³⁷ Natŭrŭ ñuxre ga yema ãëxgacŭgŭ ga Yudíugŭarŭ rŭ ñanagŭrŭgŭ: —Daa nixŭ ga guma yatŭ ga ngexetŭcŭxŭ rŭmexêẽcŭ. ¿Rŭ tŭxcŭŭ taxucŭrŭwa tacŭ rŭ mexŭ Dácharucèx naxŭ na tama nayuxcèx? —ñanagŭrŭgŭ.

Wenaxãrŭ namaxŭ ga Dácharu

³⁸ Rŭ Ngechuchu porãcŭ ngechaŭ nŭxŭ nangux rŭ Dácharumaxŭcèx nixŭ. Rŭ wŭxi ga mèxpŭneãrŭ ãxmaxŭ nixŭ ga yema naxmaxŭ. Rŭ nayexma ga wŭxi ga nuta ga norŭ ngŭxtaŭruŭ. ³⁹ Rŭ Ngechuchu rŭ ñanagŭrŭ: —¡Ípenangŭxgachix ya yima nuta ya namaã nangŭxtaŭcŭ! —ñanagŭrŭ. Natŭrŭ ga Marta ga Dácharueyèx rŭ ngĩgŭrŭgŭ: —Pa Corix, cuxã marŭ nayixane nixŭ, erŭ marŭ ãgŭmŭcŭ i ngunexŭ naetŭ nixŭ ga na nayuxŭ —ngĩgŭrŭgŭ. ⁴⁰ Natŭrŭ ga Ngechuchu rŭ ñanagŭrŭ ngixŭ: ¿Taux éxna i marŭ cumaã nŭxŭ chixuchiréxŭ rŭ ngèxguma cuyaxŏxgu rŭ tá nŭxŭ cudau i wŭxi i mexŭ i taxŭ i Tupana ŭxŭ? —ñanagŭrŭ. ⁴¹ Rŭ yexguma ínanangŭxgachigŭ ga guma nuta. Rŭ Ngechuchu daxŭgu nadawenŭãcŭma ñanagŭrŭ: —Pa Chaunatŭ Pa Tupanax, moxè cuxna chaxã erŭ marŭ choxŭ cuxŭnŭ. ⁴² —Choma nŭxŭ chacuèx rŭ guxŭguma choxŭ cuxŭnŭ. Natŭrŭ moxè cuxna chaxã i ñuxma erŭ chanaxwèxe i ñãã duŭxŭgŭ na yaxŏgŭãxŭ na cuma nŭma choxŭ cumuxŭ —ñanagŭrŭ. ⁴³ Rŭ yexguma yema ñaxguwena, rŭ tagaãcŭ ñanagŭrŭ: —Pa Dácharux, ¡ínaxŭxŭ i ngẽma! —ñanagŭrŭ. ⁴⁴ Rŭ ínaxŭxŭ ga Dácharu ga naxchãpenŭãmaã guxŭwama rŭbuxpŭxŭcŭ. Rŭ Ngechuchu ñanagŭrŭ nŭxŭ ga duŭxŭgŭ: —¡Ípeyawèxpŭxŭ na íyaxŭxŭcèx! —ñanagŭrŭ.

Ãëxgacŭgŭ naxcèx nadaugŭ na ñuxãcŭ Ngechuchuxŭ yayauxgŭxŭ (Mt 26.1-5; Mr 14.1-2; Lc 22.1-2)

⁴⁵ Rŭ yema Yudíugŭarŭ ãëxgacŭgŭ ga Maríawe rŭxŭxŭ rŭ nŭxŭ nadaugŭ ga yema Ngechuchu ŭxŭ, rŭ muxŭma Ngechuchuxŭ nayaxŏgŭ ga yexguma nŭxŭ nadaugŭgu ga ñuxãcŭ wena Dácharuxŭ na namaxêẽxŭ. ⁴⁶ Natŭrŭ ñuxre ga yema ãëxgacŭgŭ rŭ Parichéugŭmaã nŭxŭ nayarŭxugŭ ga yema Ngechuchu ŭxŭ. ⁴⁷ Rŭ yexguma ga yema Parichéugŭ rŭ paigŭarŭ ãëxgacŭgŭ rŭ nangutaquèxegŭ namaã ga guxŭma ga yema ãëxgacŭgŭtŭcumŭwa ŭgŭxŭ. Rŭ ñanagŭrŭgŭ: —¿Tacŭ tá taxŭe? Erŭ ñãã yatŭ i Ngechuchu

rü nanaxü i muxüma i mexü i cuèxruügü. ⁴⁸ —Ngèxguma chi tama yayauxgügu, rü guxütáma i duüxügü rü tá nüxü nayaxögü, rü Dumacüâxgüarü churaragü rü núma chi naxí rü nagu napogüe ya tórü tupauca ya taxüne, rü düxwa tãu chima tóxrü nixí i ñaã tachiüãne —ñanagürügü. ⁴⁹ Natürü guma taunecügu rü yema paigütanüwa rü Caipá nixí ga norü ãèxgacü. Rü nüma rü ñanagürü nüxü: —Pemagü rü taxuüma pecuèx. ⁵⁰ —¿Éxna tama nüxü pecuèx rü taxcèx rü na namemaèxü na wüxitama i yatü guxü i duüxügücèx na yuxü, na tama nayuexücèx i guxüma i tachiüãnecüâx i duüxügü? —ñanagürü. ⁵¹ Natürü ga Caipá rü tama nüèchama yema ñanagürü, yerü guma taunecügu rü nüma nixí ga paigüarü ãèxgacü yíixü. Rü yemacèx rü Tupana nixí ga Caipáwa idexacü ga yexguma nüxü yaxuxgu na Ngechuchu rü guxüma i Yudiügücèx tá na nayuxü. ⁵² Rü yema orewa rü nanangoxèè na tama Yudiügücèxicatama tá na nayuxü, natürü guxüma i Tupanaärü duüxügü i guxü i naãnewa ngèxmagüxücèx rü tá ta na nayuxü, na ngèmaãcü wüxigu nangutaquèxexücèx i guxüma i ngèma duüxügü i Tupanaärü ixígüxü. ⁵³ Rü yexgumaücüü nixí ga inaxügüèãxü ga Yudiügüarü ãèxgacügü ga nagu na naxínüèxü ga ñuxãcü tá na Ngechuchuxü yamèxgüxü. ⁵⁴ Rü yemacèx ga Ngechuchu rü marü tama yema Yudiügü ímuxütanügu naxã. Rü tomaã ínaxüxü ga Yudéaanewa, rü wüxi ga íanexãcü ga Efraïgu äeganewa naxü. Rü yexma tomaã narüxãüx. Rü guma ñãne rü wüxi ga nachica ga ngextá taxúema íxãpataxüärü ngaicamana nayexma. ⁵⁵ Rü marü ningaica ga yema Yudiügüarü peta ga Üpetüchiga. Rü yemacèx muxüma ga duüxügü ga náí ga íanecüâx rü Yerucharéüwa naxí na Tupanacèx nügü yamexèègüxücèx naxüpa ga yema peta. ⁵⁶ Rü Ngechuchucèx nadaugü ga duüxügü. Rü tupauca ga taxünewa nügüna nicagüetanü, rü ñanagürügü: —¿Ñuxü ñapègüxü i pemax? ¿Ñoma i petawa tá naxüxü rü èxna tama? —ñanagürügü. ⁵⁷ Rü yema Parichéugü rü paigüarü ãèxgacügü rü duüxügüna naxãgagü, rü ñanagürügü: —Ngèxguma ngextá nüxü pedaugügu i ngèma Ngechuchu, ¡rü tomaã nüxü peyarüxu na tayayauxgüxücèx! —ñanagürügü.

12

Wüxi ga nge rü Ngechuchucutügu pumara iba (Mt 26.6-13; Mr 14.3-9)

¹ Rü 6 ga ngunexü naxüpa ga Üpetüchigaarü peta, rü Ngechuchu rü tomaã Betániãwa naxü. Rü guma ñãne nixí ga nagu naxãchixüne ga Dácharu ga Ngechuchu wena namaxèècü. ² Rü yéma Dácharuchixüwa Ngechuchucèx nanaxügü ga taxü ga õna. Rü totanüwa ga yema mechawa yexmagüxe rü Dácharu nixí ga Ngechuchuxütawaama chibücü. Rü Marta iyixí ga inaxücü ga õna. ³ Rü yexguma ga María rü yéma inange ga wüxi ga taxüraweüxü ga pumara ga yixichixü rü tatanüxüchixü. Rü Ngechuchuxü namaã iyixcutü. Rü ñuxüchi ngíyaemaã ínapicutü. Rü guma í rü guxüwama nayixmachíã namaã ga yema pumara. ⁴⁻⁵ Rü yexguma ga Yuda ga Icaríute ga wüxi ga totanüxüchirèx ixíxü ga yixcama bexma cúãcü Ngechuchuxü íxuaxüxü, rü ñanagürü: —¿Tüxcüü tama tatanüxügu namaã itaxe i ngèma pumara na ngèma díèrumaã nüxü nangüxèèxücèx i ngèma duüxügü i ngearü díèruãxgüxü? —ñanagürü. ⁶ Natürü ga Yuda rü tama aixcüma nagu narüxínü ga yema ngearü díèruãxgüxü. Natürü yema ñanagürü yerü nüma rü wüxi ga ngítèxáxü nixí. Rü naxmèxwa nayexma ga yema choca ga díèru ngíxü nagu taxügüxü ga guxãma ga toma ga Ngechuchuarü ngúexügü. Rü Yuda rü ñuxguacü rü noxrüxütama ngíxne nangíxíxü. ⁷ Rü yexguma ga Ngechuchu rü ñanagürü nüxü: —¡Tãxü i ngíxü cuchixewexü! Erü choma rü paxa tá chayü rü tá ichatèx. Rü ngèmacèx nixí i ngèma pumaramaã choxü nachaxü. ⁸ —Ngèma ngearü díèruãxgüxü rü guxügütáma petanüwa nangèxmagü. Natürü i choma rü tãütáma guxügu petanüwa changèxma —ñanagürü.

Paigüarü ãèxgacügü rü nügümaã nanamexèègü ga ñuxãcü Dácharuxü tá na yamèxgüxü

⁹ Rŭ muxŭma ga Yudiŭgŭ rŭ nŭxŭ nacuáchiga ga Betániãwa na nayexmaxŭ ga Ngechuchu. Rŭ yéma naxí na nŭxŭ nadaugŭxŭcèx. Rŭ tama Ngechuchuxŭxícatama nadaugŭchaŭ natŭrŭ nŭxŭ nadaugŭchaŭ ta ga Dácharu ga Ngechuchu wena namaxèècŭ.
¹⁰ Rŭ yexguma ga paigŭarŭ ãëxgacŭgŭ rŭ nŭgŭmaã nanamexèègŭ ga Dácharuxŭ rŭ ta na yamèxgŭxŭcèx. ¹¹ Yerŭ Dácharugagu nixí ga muxŭma ga Yudiŭgŭ ga Ngechuchuxŭ yaxŭgŭãxŭ rŭ yema paigŭna naxíxŭxŭ.

Ngechuchu rŭ Yerucharéŭgu naxŭcu
(Mt 21.1-11; Mr 11.1-11; Lc 19.28-40)

¹² Rŭ muxŭma ga duŭxŭgŭ rŭ Yerucharéŭwa naxí naxcèx ga Üpetŭchigaarŭ peta. Rŭ moxŭãcŭ duŭxŭgŭ nŭxŭ nacuáchigagŭ ga Ngechuchu rŭ guma iãnewa na nanguxchaŭxŭ.
¹³ Rŭ yexguma moruátŭta nadaŭgŭ rŭ yemamaã Ngechuchuxŭ nayatŭxgŭtanŭãchi. Rŭ tagaãcŭ ñanagŭrŭgŭ: —¡Rŭ naxŭüne rŭ namecŭmaxŭchi ya daa Tupanaégagu núma ũcŭ! ¡Rŭ yixema na Iraétanŭxŭ ixíxŭxŭ rŭ namecŭmaxŭchi ya daa tŭrŭ ãëxgacŭ! —ñanagŭrŭgŭ.
¹⁴ Rŭ Ngechuchu nŭxŭ inayangau ga wŭxi ga buru, rŭ naetŭgu naxaunagŭ ga yema Tupanaãrŭ ore ga ũmatŭxŭ nŭxŭ ixuxŭrŭŭ ga yexguma ñaxgu:
¹⁵ “¡Tãxŭ i pemuŭèxŭ, Pa Yerucharéŭcŭãxgŭxŭ! ¡Rŭ iperŭdaunŭ na ngema ne naxŭxŭ ya perŭ ãëxgacŭ ya wŭxi i buru i íraxŭetŭgu aunagŭcŭ!”
ñaxŭ. ¹⁶ Rŭ noxri ga toma ga norŭ ngŭexŭgŭ rŭ tama nŭxŭ tacuèxgŭéga ga Ngechuchuchiga na yíxŭ ga yema ore. Natŭrŭ yixcŭra marŭ Ngechuchu Tupanaxŭtawa ũxgu, rŭ yexguma nixí ga nŭxna tacuèxãchiexŭ ga guxŭma ga yema Ngechuchuxŭ ngupetŭxŭ, rŭ yema Tupanaãrŭ ore nŭxŭ ixuxŭãcŭtama nŭxŭ na nangupetŭxŭ. ¹⁷ Rŭ yema duŭxŭgŭ ga Ngechuchuxŭtawa yexmagŭxŭ ga yexguma Dácharuxŭ wena namaxèègu, rŭ nŭxŭ nixugŭe ga yema nŭxŭ nadaugŭxŭ. ¹⁸ Rŭ yemacèx nixí ga duŭxŭgŭ ga Ngechuchuxŭ yatŭxãchitanŭxŭ na nayauxgŭãxŭcèx, yerŭ nŭxŭ nacuáchigagŭ ga yema taxŭ ga mexŭ ga Tupanaãrŭ poramaã naxŭxŭ. ¹⁹ Natŭrŭ ga yema Parichéugŭ rŭ nŭgŭmaã ñanagŭrŭgŭ: —Marŭ nŭxŭ pedauxŭ i ñuxma na taxucŭrŭwama tacŭ namaã ixuxŭ. ¡Rŭ dŭcax, guxŭma i duŭxŭgŭ rŭ nawe narŭxí! —ñanagŭrŭgŭ.

Griégugŭ rŭ Ngechuchuxŭ nadaugŭchaŭ

²⁰ Rŭ muxŭma ga duŭxŭgŭ rŭ petacèx Yerucharéŭwa naxí na yéma Tupanaxŭ na yanacuèxŭgŭxŭcèx. Rŭ yema duŭxŭgŭtanŭwa nayexma ga ñuxre ga Griégugŭ.
²¹ Rŭ yema Griégugŭ rŭ Piripicèx naxí. Rŭ nŭma ga Piripi rŭ Gariréaneãrŭ iãne ga Bechaídacŭãx nixí. Rŭ nŭxŭ nacèxŭgŭ rŭ ñanagŭrŭgŭ: —Pa Corix, nŭxŭ tadauxchaŭ ya Ngechuchu —ñanagŭrŭgŭ. ²² Rŭ Piripi rŭ Aŭdrémaã nŭxŭ nayarŭxu. Rŭ yema taxre rŭ wŭxigu Ngechuchuxŭtawa naxí, rŭ namaã nŭxŭ nayarŭxugŭ. ²³ Rŭ yexguma ga Ngechuchu rŭ ñanagŭrŭ nŭxŭ: —Rŭ marŭ nawa nangu tá na chayuxŭ rŭ wenaxãrŭ Chaunatŭxŭtawa tá na chaxŭxŭ i choma i Tupana Nane i duŭxŭxŭ chiŭxŭ. ²⁴ —Rŭ aixcŭma pemaã nŭxŭ chixu rŭ ngèxguma chi wŭxipŭxŭ i trigu tama waixŭmŭãnegu toxgu rŭ wŭxipŭxŭechatama nixí. Natŭrŭ ega waixŭmŭgu natoxgu, rŭ ngema naxŭxgu, rŭ muxŭchinema ínanguxuchi. [Rŭ ngèxgumarŭŭ tá ta Tupanaxŭtawa nangugŭ i muxŭma i duŭxŭgŭ ega chayuxgux.] ²⁵ —Rŭ pemaã nŭxŭ chixu rŭ texé ya yíxema tŭmaãrŭ maxŭxŭ ngechaŭxè i ñoma i naãnewa rŭ tá itayarŭtaxu. Natŭrŭ texé ya yíxema tama tŭmaãrŭ maxŭxŭ ngechaŭxè rŭ tama yuxŭ muŭxè i ñoma i naãnewa, rŭ tá tŭxŭ nangèxma i maxŭ i taguma gŭxŭ. ²⁶ —Rŭ ngèxguma texé choxŭ puracŭchaŭgu rŭ name nixí i chowe tarŭxŭ. Rŭ ngèma choma tá íchangèxmaxŭwa rŭ ngema rŭ tá ta tangèxma i tŭmax. Rŭ ngèxguma texé choxŭ puracŭgu rŭ Chaunatŭ ya Tupana rŭ tá tŭmamaã nataãè —ñanagŭrŭ.

Ngechuchu nanaxunagŭ ga norŭ yuxchiga

²⁷ —Rŭ Ngechuchu ñanagŭrŭ: —Rŭ ñuxma rŭ poraãcŭ changechaŭ rŭ chanaxixãchiãè. ¿Rŭ tacŭxŭ tá Chaunatŭmaã chixuxŭ? Taxucŭrŭwa namaã nŭxŭ chixu na choxŭ

ínanguxuchixêêxúcèx na tama chayuxúcèx, erü woetama ngêmacèx núma chaxũ — ñanagürü. ²⁸ Rũ ñanagürü: —Pa Chaunatũx, ¡Choxũ rüngũxêê na duũxũgüpêxewa cuxũ chataxêêxúcèx! —ñanagürü. Rũ yexguma ga yema duũxũgũ ga yéma yexmagũxũ rü nüxũ naxĩnũê ga wüxi ga naga ga daxũwa inaxũxũ ga ñaxũ: —Marũ cuxũ charũngũxêê na choxũ cutaxêêxũ ga noxrix, rü wena táxarũ cuxũ charũngũxêê na choxũ cutaxêêxúcèx —ñanagürü ga yema naga. ²⁹ Rũ yema duũxũgũ ga yéma yexmagũxũ ga nüxũ ñnũxũ ga yema naga, rü ñanagürügũ: —Wüxi i duruanexũ nixĩ —ñanagürügũ. Natürü togũ rü ñanagürügũ: —Wüxi i Tupanaãrũ orearũ ngeruũ i daxũcũãx nixĩ i namaã idexaxũ —ñanagürügũ. ³⁰ Rũ yexguma ga Ngechuchu rü ñanagürü nüxũ: —Tama chauxcèx nixĩ i nüxũ pexĩnũxũ i ngêma naga. Rũ pexcèxtama nixĩ i nüxũ pexĩnũxũ. ³¹ —Rũ ñuxma tá nixĩ i Tupana inaxũgũãxũ na tüxũ napoxcuexũ ya duũxê naxcèx i tümaãrũ pecadugũ. Rũ ñuxma tá nixĩ i Tupana ínatèxüchixũ i ngêma ñoma i naãnewa poraxũ i Chataná. ³² —Rũ ngêxguma curuchawa chipotagu rü chaugũxütawa tá chanagagũ i guxũma i duũxũgũ —ñanagürü ga Ngechuchu. ³³ Rũ yema orewa duũxũgũmaã nüxũ nixu ga ñuxãcü tá na nayuxũ. ³⁴ Rũ yema duũxũgũ nanangãxũgũ, rü ñanagürügũ: —Torũ mugũ i ümatüxũwa nüxũ tadaugũ na guxũgutáma namaxêchaxũ ya Cristu. ¿Rũ ñuxãcü i cuma rü ñacurügũ: “Rũ Tupana Nane ya duũxũxũ ixĩcü rü curuchawa tá nipota”, ñacurügũ? ¿Rũ texé tixĩ ya yíxema Tupana Nane ya duũxũxũ ixĩxê? —ñanagürügũ. ³⁵ Rũ yexguma ga Ngechuchu rü ñanagürü nüxũ: —Ñoma rü ta petanüwa changêxma na ñoma i naãnewa pexũ changüexêêxúcèx rü ngêmaãcü pexũ changóonetanüxêêxúcèx. Natürü paxaãchicèxicatama petanüwa changêxma. Rũ name nixĩ i paxa choxũ peyaxögũ ñoma rü ta pexcèx chanangónexêê naxũpa na naxêãnexũ. Erü yíxema êãnexũwa ngêxmaxê rü tama nüxũ tacuèx na ngextá taxũxũ. ³⁶ —Rũ ñoma rü ta petanüwa changêxma rü name nixĩ i paxa choxũ peyaxögũ na chorũ ngóonexũwa pengêxmagũxúcèx —ñanagürü. Rũ yema ñaxguwena rü natanüwa ínaxũxũ ga Ngechuchu. Rũ naxchaxwa inicux.

Tacüèx nixĩ ga Yudíugũ ga tama Ngechuchuaxũ yaxögũãxũ

³⁷ Rũ woo ga Ngechuchu rü duũxũgüpêxewa nanaxũ ga muxũma ga taxũ ga mexũ ga cuèxruũgũ ga Tupanaãrũ poramaã naxũxũ, natürü yexguma rü ta tama nüxũ nayaxögũ ga duũxũgũ. ³⁸ Rũ yemaãcü Tupana nayanguxêê ga yema ore ga Ichaxía ümatüxũ ga ñaxũ:

“Pa Corix, taxúema tayaxõ ga yema ore ga tüxũ tangüexêêxũ. Rũ woo nüxũ tadaugũ na ñuxãcü naporaxũ ya Tupana, rü tama tayaxögũ”,

ñaxũ. ³⁹⁻⁴⁰ Rũ yemaãcü ga yema duũxũgũ rü tama nayaxögũ yema Ichaxía ümatüxũwa nüxũ yaxuxürũ, rü:

“Yema duũxũgũ rü tama nüxũ nadaugüchaũ rü tama nayaxögüchaũ rü tama Tupanacèx nawoegüchaũ. Rũ yemacèx ga Tupana rü nüxna nixũ na tama nüxũ nadaugüxúcèx rü tama yaxögũãxúcèx rü tama naxcèx nawoegüxúcèx na nüma nüxna naxããxúcèx i maxũ i ngexwacaxũxũ”,

ñaxũ. ⁴¹ Rũ yema ñanagürü ga Ichaxía yerü nangoxetügu marũ nüxũ nadau na ñuxãcü ãêxgacü ya tacüxüchi na yĩxũ ya Ngechuchu ya Cristu. Rũ yemaãcü nachiga nidexa.

⁴² Natürü muxũma ga yema Yudíugũarũ ãêxgacügũ rü Ngechuchuaxũ yaxögũ, rü woo ga ñuxre ga naêrugũ rü ta nayaxögũ, natürü tama nügũ nixugüchaũ ga duũxũgüpêxewa, yerü namuũê na Parichéugũ ngutaquêxepataũwa ínawoxũxũ. ⁴³ Rũ yemaãcü tama nügũ nixugüchaũ, yerü norü me nixĩ ga duũxũgũ namaã nataãêgũxũ rü tama aixcüma naxcèx nadaugũ na Tupana namaã taãêxũ.

Texé ya tama Ngechuchuarü oreaxũ yaxõxê rü tá tapoxcu

⁴⁴ Rũ tagaãcü ñanagürü ga Ngechuchu: —Texé ya choxũ yaxõxê rü tama choxũxĩcatama tayaxõ. Natürü Chaunatü ya núma choxũ mucüaxũ rü ta tayaxõ. ⁴⁵ —Rũ texé ya choxũ dauxe, rü Chaunatü ya núma choxũ mucüxũ rü ta tadau. ⁴⁶ —Choma na ngóonexêêruũ

chĩxũ, rü ñoma i nañewa changu na guxãma ya texé ya choxũ yaxõxẽ rü tama eãnexũwa na tangẽxmagüechaxũcèx. ⁴⁷ —Natürü ngẽxguma texé nüxũ ñügu i chorü ore rü tama tayaxõxgu rü tama choma nixĩ i tüxũ chapoxcuxũ. Erü tama ñoma i nañewa changu na chanapoxcuexũcèx i duũxũgü, natürü núma chaxũ na chanamaxẽxẽxũcèx. ⁴⁸ —Yixema texé ya tama choxũ yaxõxẽ rü tama chauga ñüxẽ rü marü tüxũ nangẽxma na tacüçèx tá Tupana tüxũ poxcuxũ. Erü ngẽma ore i nüxũ chixuxũgagu tátama nixĩ ya Tupana i tüxũ napoxcuxũ i nañeãrũ guxgu, erü tama tayaxõ i ngẽma ore i nüxũ chixuxũ. ⁴⁹ —Tama chaugagutama chidexa, natürü guma Chaunatü ga núma choxũ mucü, rü guma nixĩ ga chomaã nüxũ ixucü na tacüxũ tá duũxũgümaã chixuxũ rü ñuxãcü tá chanangüexẽxũ. ⁵⁰ —Rü nüxũ chacuèx na Chaunatüarü orewa nangẽxmaxũ i maxũ i taguma gúxũ. Rü ngẽmacèx i ngẽma ore i nüxũ chixuxũ, rü ngẽmatama ore nixĩ i Chaunatü choxũ muxũ na nüxũ chixuxũ —ñanagürü ga Ngechuchu.

13

Ngechuchu rü norü ngüexũgüxũ niyauxgücutü

¹ Rü wüxi ga ngunexũ nataxu ga nawa na nanguxũ ga yema Yudíugüarü peta ga Üpetüchiga. Rü Ngechuchu nüxũ nacuèx ga marü nawa na nanguxũ ga ñoma ga nañewa na yaxũxũ rü wenaxãrũ Nanatüxütawa na naxũxũ. Rü nüma rü yexguma ñoma ga nañewa nayexmagu rü guxũguma tüxũ nangechaũ ga guxema noxrü ixĩgüxe. Rü yexgumarüũ ta ga yexguma toxna yaxũxchaũgu ga daxũguxũ ga nañewa na naxũxũ, rü yemaãcü poraãcü toxũ nangechaũ. ²⁻⁴ Natürü ga Chataná rü marü Yuda ga Chimáũ ga Icariüte nanena nangu na bexma cúãcü Ngechuchuxũ ñaxuaxũxũcèx. Rü Ngechuchu rü marü nüxũ nacuèx ga Nanatüxütawa na ne naxũxũ rü wena táxarü Nanatüçèx na nataeguxũ. Rü nüxũ nacuèx ga Nanatü rü naxmẽxgu na naxüãxũ ga guxũma ga pora. Rü yemacèx ga yema chütaxũgu ga yexguma mechawa ítachibüeyane, rü inachi ga Ngechuchu. Rü ñacuxuchi ga norü gáuxũchiru, rü wüxi ga tuayamaã nügü nigoye. ⁵ Rü ñuxũchi yaxmẽxũpáxũgu dexáta naba, rü toxũ niyauxgücutü. Rü guma tuaya ga namaã yagoyecümaã toxũ ñnapigücutü. ⁶ Rü yexguma Chimáũ ga Pedruxũ nayauxcutüchaũgu rü ñanagürü ga Pedru: —Pa Corix, ¿ñuxãcü tá i cuma i choxũ cuyauxcutüxũ? —ñanagürü. ⁷ Rü Ngechuchu nanangãxũ rü ñanagürü: —Ñuxma rü tama nüxũ cucuèx i tüxcüũ na chanaxũxũ i ñaã, natürü yixcama rü tá nüxũ cucuèx —ñanagürü. ⁸ Natürü ga Pedru rü ñanagürü: —Choma rü täütáma chanaxwèxe na choxũ cuyauxcutüxũ —ñanagürü. Rü Ngechuchu nanangãxũ rü ñanagürü nüxũ: —Ngẽxguma tama cuxũ chayauxcutügu, rü täütáma choxrü quixĩ —ñanagürü. ⁹ Rü yexguma ga Chimáũ ga Pedru rü ñanagürü nüxũ: —Pa Corix, ¡Tama choxũ cuyauxcutüxicatama! Natürü chanaxwèxe i choxũ cuyauxmẽx rü choxũ cuyauxeru ta —ñanagürü. ¹⁰ Natürü Ngechuchu nanangãxũ rü ñanagürü nüxũ: —Texé ya ngexwacèx aiyaxe rü tanaxwèxe i tümacutüxicatama tayaxu, erü guxũwama tangemata. Rü pema rü marü pingematagü, natürü tama guxãma aixcüma tingemata —ñanagürü. ¹¹ Rü Ngechuchu nüxũ nacuèx na texé tá bexma cúãcü ñaxuaxũxũ, rü yemacèx ñanagürü nüxũ: —Natürü tama guxãma aixcüma tingemata —ñaxũ. ¹² Rü yexguma toxũ yayauxgücutüguwena, rü Ngechuchu wena nicuxcuchi ga norü gáuxũchiru. Rü wenaxãrũ mechawa narüto. Rü ñanagürü toxũ: —¿Nüxũ pecuáxũ yĩixũ i ngẽma chaxũxũ? ¹³ —Pema rü: “Pa Ngüexẽëruũ” rü “Pa Corix”, ñaperügü choxũ. Rü marü name i ngẽma ñaperügü, erü aixcümaxũchi ngẽma chixĩ. ¹⁴ —Rü ñuxma i choma na ngüexẽëruũ chixĩxũ rü pemaã na ichacuáxũ, rü pexũ chiyauxgücutü. Rü ngexgumarüxũ ta i pema rü name i wüxichigü i pemücüxũ piyauxgücutü. ¹⁵ —Choma rü pexũ nüxũ chadauxẽë na ñuxãcü tá penaxũxũ na pema rü ngema pemaã chaxũxũãcü penaxũxũcèx. ¹⁶ —Rü aixcüma pemaã nüxũ chixu rü taxuũma i wüxi i coriarü duũxũ rü norü coriétüwa nügü nangexmaxẽë. Rü taxuxũma i ãëxgacüarü orearü ngeruxũ i norü ãëxgacü i

namuxűétüwa nügü nangexmaxëë. ¹⁷ —Rü ngëxguma nüxű pecuèxgu i chorü ore rü penaxüxgu i ngëma pemaã nüxű chixuxű, rü aixcüma tá petaãëgü. ¹⁸ —Rü tama guxãma i pechiga nixĩ i chidexaxű. Erü choma rü tuxű chacuèx rü texëgü tixĩ ya yixema tuxű chidexechixe. Natürü Tupana nayanguxëëchaű i norü ore i ümatuxű i ñaxű:

“Texé ya chomaã chibüxe rü chomaã tarüxuwanu”,

ñaxű. Rü ngëmaãcü tá nangupetü na yanguxüçèx i ngema Tupanaarü ore. ¹⁹ —Natürü naxüpa na nangupetuxű i ngëma, rü pemaã nüxű chixu na choxű peyaxögüxüçèx i ngëxguma nangupetüxgu. ²⁰ —Aixcüma pemaã nüxű chixu rü texé ya tuxű yaxüxe ya yixema choma ngëma tuxű chamuxë, rü choxű nixĩ i tayaxuxű. Rü texé ya choxű yaxüxe, rü Chaunatu ga núma choxű mucuxű nixĩ i tayaxuxű —ñanagürü ga Ngechuchu.

Ngechuchu nüxű nixu ga Yuda rü tá bexma cúãcü na ínaxuaxűãxű

(Mt 26.20-25; Mr 14.17-21; Lc 22.21-23)

²¹ Rü yexguma yema ñaxguwena ga Ngechuchu rü poraãcü ngechaű nüxű nangux, rü meãma tomaã nanangoxëë, rü ñanagürü toxű: —Aixcüma pemaã nüxű chixu rü wüxie i petanüwa tá nixĩ i bexma cúãcü choxű ítaxuaxűxű —ñanagürü. ²² Rü yexguma ga toma ga norü ngúexügü rü wüxichigü togü tadawenü, rü tama nüxű tacuèxgü ga texéchiga na yema ñaxű. ²³ Rü choma ga norü ngúexű ga poraãcü choxű nangechaűxë rü nacüwawa charüto ga Ngechuchu ga mechawa. ²⁴ Rü Chimáű ga Pedru rü bexma choxű naxuneta ga na Ngechuchuna chaçaxüçèx ga texéchiga na yíxű ga yema. ²⁵ Rü yexguma ga choma rü yexeraãcü Ngechuchuna chimaxcuchi rü nüxna chaca, rü ñacharügü: —Pa Corix, ¿texé tá tixĩ ya yixema? —ñacharügü. ²⁶ Rü Ngechuchu choxű nangãxű, rü ñanagürü: —Wüxi i pãűârü bücuxű tá íchacúe, rü yixema tuxna chanaxãxë, rü yixema tixĩ —ñanagürü. Rü yexguma ínanacúe ga wüxi ga pãűârü bücuxű rü Yuda ga Icariúte ga Chimáű nanena nanaxã. ²⁷ Rü yexgumatama Yuda nayauxgu ga yema pãűârü bücuxű rü ngoxo ga Chataná rü Yudagu naxücu. Rü yexguma ga Ngechuchu rü ñanagürü nüxű: —Rü ngëma cuxüxchaűxű, ¡rü paxa naxü! —ñanagürü. ²⁸ Natürü taxúema ga toma ga mechawa chibüexe nüxű tacuèxgü ga tacüchiga na yíxű ga yema ñaxű ga Ngechuchu. ²⁹ Rü núma ga Yuda rü díeruchiűârü dauruű nixĩ. Rü yemacèx ñuxre ga toma nüxű tacuèxgügu rü Ngechuchu taxewa nanamu, na tacüçèx yataxexüçèx naxcèx ga peta, rü éxna duűxügü ga ngearü díeruãxűna ngíxű na naxãxüçèx ga díeru. ³⁰ Rü yexguma Yuda nayauxgu ga yema pãű, rü ínaxűxű ga yema ucapuwa. Rü marü nachüta ga yexgumax.

Ngechuchu norü ngúexügümaã nüxű nixu ga yexwacaxűxű ga norü mu

³¹ Rü yexguma Yuda íxüxguwena, rü Ngechuchu rü ñanagürü: —Rü ñuxma rü tá aixcüma nangox na ñuxãcü naporaxű ya Tupana Nane ya duűxüxű ixícü. Rü yimawa tá nixĩ i nangoxëëãxű ya Tupana i norü pora. ³² —Rü ngëxguma yima Tupana Nane nangoxëëxgu i Tupanaarü pora, rü ngëxgumarűű tá ta ya Tupana rü nanangoxëë i Nanearü pora. Rü paxa tá nixĩ i ngëma. ³³ —Pa Chauzacüãxgüx, tãűtãma muxű i ngunexű petanüwa changëxma. Rü pema rü tá chauxcèx pedaugü, natürü ngëma choma íchaxűxűwa rü taxucürüwama ngëma pexĩ. Rü ñaãtama ore nixĩ ga marü Yudíugüarü ãëxgacügümaã nüxű chixuxű, rü ñuxma rü pemaã rü ta nüxű chixuxű. ³⁴ —Rü pemaã nüxű chixu i wüxi i ngexwacaxűxű i mu. Rü ngëma pexű chamuxű nixĩ i pemücügüxű na pengechaűxű i wüxichigü. Rü ngëma na choma pexű changechaűxürűű, rü chanaxwëxe i wüxichigü i pema rü pemücügüxű pengechaűgü. ³⁵ —Rü ngëxguma wüxichigü pemücügüxű pengechaűgu, rü guxűma i duűxügü tá nüxű nicuèxãchitanü na chorü ngúexügü pixígüxű —ñanagürü.

Ngechuchu nüxű nixu rü Pedru rü tãxűtãma nügü nixu na norü ngúexű yixĩxű

(Mt 26.31-35; Mr 14.27-31; Lc 22.31-34)

³⁶ Rü Chimáű ga Pedru rü Ngechuchuna naca, rü ñanagürü: —Pa Corix ¿ngextá tá cuxű? —ñanagürü. Rü Ngechuchu nanangãxű, rü ñanagürü: —Ngëma íchaxűxűwa rü

taxucürüwa chowe curüxü i ñuxmax. Natürü yixcama rü ngemáãcü tá chowe curüxü — ñanagürü. ³⁷ Rü yexguma ga Pedru rü ñanagürü: —Pa Corix, ¿tüxcüü taxucürüwa cuwe charüxü i ñuxmax? Erü marü íchamemare na cuxcèx na chayuxü —ñanagürü. ³⁸ Rü Ngechuchu nanangãxü, rü ñanagürü: —¿Aixcüma yĩxü i marü ícumemarexü na chauxcèx cuyuxü? Aixcüma cumaã nüxü chixu rü täütátama yacaxgu ya otá, rü tomaëpüxcüna tá nüxü quixu na tama choxü cucuáxü —ñanagürü ga Ngechuchu.

14

Ngechuchu rü nama i Nanatüxütawa nadaxü nixí

¹—¿Tãxü i penaxixãchiãëgüxü i pemax! ¿Tupanaãxü peyaxögü rü choxü rü ta peyaxögü!
²—Chaunatüxütawa nangëxma i muxüchixüma i nachicagü. Ngëxguma chi natauxguma, rü täü chima pemaã nüxü chixu na pexcèx chayamexëëxüçèx i pechicagü. ³—Rü ngëxguma marü ngema chaxüxgu rü wüxi i pechica chamexëëxgu, rü wena táxarü núma chaxü. Rü pexü tá chayagagü na ngëma nachica i chomatátama nawa changëxmaxüwa na pengëxmagüxüçèx i pemax. ⁴—Rü pema rü nüxü pecuèx na ngextá tá na chaxüxü, rü marü nüxü pecuèx i nama i ngema nadaxü —ñanagürü ga Ngechuchu. ⁵ Rü Tumachi rü ñanagürü: —Pa Corix, tama nüxü tacuèx na ngextá na cuxüxü. ¿Rü ñuxãcü tá i nüxü tacuáxü i ngëma nama? —ñanagürü. ⁶ Rü Ngechuchu nanangãxü, rü ñanagürü: —Choma nixí i ngëma nama i Chaunatüxütawa nadaxü chiixü. Rü aixcüma nixí i ngëma ore i nüxü chixuxü. Rü choma nixí i duüxügüxü chamaxëëxü. Rü chaugaguxicatama nixí i Chaunatüxütawa nangugüxü i duüxügü. ⁷—Rü ngëxguma chi pema rü aixcüma meã choxü pecuèxgügu, rü Chaunatüxü rü chi ta pecuèxgü. Rü ñuxmaüçüü nixí i Chaunatüxü pecuáxü, erü marü nüxü pedaugüecha —ñanagürü. ⁸ Rü yexguma ga Piripi rü ñanagürü: —Pa Corix, ¿Toxü nüxü nadauxëë ya Cunatü! Rü ngëxícatama i tanaxwëxegüxü —ñanagürü. ⁹ Rü Ngechuchu nanangãxü, rü ñanagürü: —Pa Piripix, ¿ñuxre ya taunecü marü petanüwa changëxma rü ñuxma rü ta tama choxü cucuèxégaxü? Yíxema choxü dauxe rü Chaunatüxü rü ta tadau. ¿Rü tüxcüü i ngëxguma rü ta cunaxwëxexü i pexü nüxü na chadauxëëxü ya Chaunatü? ¹⁰—¿Tama ëxna cuyaxõ na choma rü Chaunatümaã rü wüxitama tixígüxü? Rü guxüma i ore i pemaã nüxü chixuxü rü tama chauechama nüxü chixu. Erü yima Chaunatü ya wüxiwa chomaã ngëxmacü, rü yima nixí ya naxüçü i guxüma i noxrütama puracü. ¹¹—Chanaxwëxe i choxü peyaxögü na choma rü Chaunatümaã wüxitama tixígüxü. Natürü woo tama ngëma pixögügu rü chanaxwëxe na choxü peyaxögüxü naxcèx i ngëma mexügü i taxü i Tupanaãrü poramaã chaxüxü. ¹²—Aixcüma pemaã nüxü chixu rü yíxema choxü yaxõxë rü tá tanaxü i guxüma i choma chaxüxü. Rü ngëma chaxüxüãrü yexera tá taxü, erü choma rü tá Chaunatüxütawa chaxü. ¹³—Rü guxüma i tacü i chauégagu Tupanaxütawa naxcèx ípeçaxü rü tá pexna chanaxã. Rü ngëmaãcü tá chanaxü na chaugagu nangóxüçèx i Chaunatüarü pora. ¹⁴—Rü choma tá chanaxü i guxüma i tacü i chauégagu choxna naxcèx peçaxü.

Ngechuchu rü norü ngüexügümaã inaxuneta na naxcèx tá núma namuãxü i Naãe i Üünexü

¹⁵—Rü ngëxguma aixcüma choxü pengechaügu, rü naga tá pexñüë i chorü mugü.
¹⁶—Rü choma tá Chaunatüna naxcèx chaca na núma pexcèx namuãxüçèx i to i perü ngüxëëruü i Naãe i Üünexü, na guxügütama petanüwa nangëxmaxüçèx. Rü nüma tá nixí i pexcèx nangoxëëãxü i ore i aixcüma ixixü. ¹⁷—Rü ñoma i naãnecüãx i duüxügü rü taxucürüwama nanayauxgü, erü tama nüxü nadaugü rü tama nüxü nacuèxgü. Natürü i pema rü marü nüxü pecuèx, erü nüma rü petanüwa nangëxma. Rü guxügütama pemaã inarüxãüx. ¹⁸—Rü täütáma núma pexü chawogümare i chomax, erü wena táxarü pexcèx chataegu, na petanüwa changëxmaxüçèx. ¹⁹—Rü paxa tá nixí na täütáma choxü nadaugüxü i ñoma i naãnecüãx i duüxügü. Natürü i pema rü tá choxü pedaugü. Rü tá pemaxë, erü choma rü chamaxü. ²⁰—Rü ngëxguma yuwa ícharüdaxgu rü wena

chamaůxgu, rů ngēxguma tá nůxů picuēxāchitanů na choma rů Chaunatůwa chamaxůxů rů pema i chowa rů choma i pewa. ²¹—Yůxema texé ya nůxů cuáxe rů naga ůnůxē i chorů mugů, rů tanangoxēē na aixcůma choxů tangechaůxů. Rů Chaunatů tá tůxů nangechaů ya yůxema choxů ngechaůxē, rů choma rů tá ta tůxů changechaů. Rů tůxů tá chaugů chawēx —ñanagůrů ga Ngechuchu. ²² Rů nayexma ga to ga Ngechucharů ngůexů ga Yudagu āegaxů ta. Rů yema rů ñanagůrů: —Pa Corix, ůtůxcůů toxů cugů cuwēx, rů tama ñoma i naānecůůx i duůxůgůxů cugů cuwēx? —ñanagůrů. ²³ Rů Ngechuchu nanangāxů, rů ñanagůrů: —Yůxema choxů ngechaůxē rů naga taxůnů i ngēma ore i tůmamaā nůxů chixuxů. Rů Chaunatů tá tůxů nangechaů. Rů choma rů Chaunatůmaā wůxigu tůmaxůtawa tá tangēxmagů. ²⁴—Yůxema tama choxů ngechaůxē rů tama naga taxůnů i ngēma chorů ore. Rů ngēma ore i chauxůtawa nůxů pexůnůēxů rů tama chorů ore nixů, natůrů guma Chaunatů ga nůma choxů mucůarů ore nixů. ²⁵—Ñoma rů ta petanůwa changēxma rů pemaā nůxů chixu i guxůma i ngēma ore i pexcēx choxů ngēxmaxů. ²⁶—Natůrů Chaunatů rů tá chauégagu nůma nanamu i Naāē i ůůnexů na pexů nangůxēēxůcēx. Rů nůma i Naāē i ůůnexů tá pexů nangůxēē i guxůma, rů tá nůxna pexů nacuēxāchixēē i guxůma i ore ga pemaā nůxů chixuxů. ²⁷—Rů ñůxma na pexna íchixůxů, rů pexna chanaxā i taāē. Natůrů ngēma taāē i pexna chaxāxů, rů tama ñoma i naānecůůx pexna āxů i taāērůů nixů. Rů tama chanaxwēxe i penaxůxāchiāēgů rů pemuůē. ²⁸—Marů pemaā nůxů chixu na pexna tá íchixůxů rů wena táxarů pexcēx chataeguxů na pemaā changēxmaxůcēx. Rů choxů pexůnůē ga yexguma yema ñachaxgu. Rů ngēxguma aixcůma choxů pengechaůgu rů tá petaāēgů ega nůxů pecuēxgu na Chaunatůcēx chataeguxů, erů Chaunatů rů chorů yexera nixů. ²⁹—Rů naxůpa na nangupetůxů i ngēma, rů pemaā nůxů chixu na choxů peyaxůgůxůcēx i ngēxguma nangupetůgu. ³⁰—Marů tāůtāma poraāců pemaā chidexa, erů marů ůnangu i Chataná i ñoma i naāneārů āēxgaců ixůxů. Natůrů nůma rů taxuwama choxů narůyexera. ³¹—Natůrů ngēma tá choxů ngupetůxů, rů ngēmaāců tá nixů na guxůma i ñoma i naānecůůx i duůxůgů nůxů nacuāxůcēx na choma rů Chaunatůxů na changechaůxů, rů chanaxůxů i ngēma nůma choxů namuxů. ¡Rů ipechigů, rů ngůxā ítixů! —ñanagůrů ga Ngechuchu.

15

Ubanegu nůgů nangu ga Ngechuchu

¹ Rů ñanagůrů ga Ngechuchu: —Choma nixů i ñoma wůxi i ubanerůů chůůxů rů Chaunatů nixů ya norů yora ixůců i ngēma uba. ²—Rů chorů duůxůgů rů ngēma ubachacůgůrůů nixůgů. Rů ngēma ubachacůů i tama oxů, rů norů yora rů nayadae. Natůrů ngēma nachacůů i oxů, rů meā nanamexēētanů na yexeraāců poraāců naxoxůcēx. ³—Pema rů marů pime, yerů naga pexůnůē ga yema ore ga pexů changůxēēxů. ⁴—Rů name nixů i guxůguma chowa peyaxůxgů, ngēma na choma rů pewa chayaxůxůrůů. Erů wůxi i ubachacůů rů tama nůxůca naxo, ega tama nanewa yaxůxgux. Rů ngēxgumarůů ta i pema rů taxuacůma chauxcēx pemaxē, ega tama chowa peyaxůxgůechagu. ⁵—Choma nixů i ubane, rů pema i nachacůůgů. Rů yůxema chowa yaxůēchaxe rů choma i tůmawa, rů aixcůma tá chauxcēx tamaxů. Rů ngēmaāců wůxi i ubachacůů i oxůrůů tá tixů. Natůrů ngēxguma tama chowa peyaxůxgůechagu, rů taxucůrůwama ůaců pexůe. ⁶—Rů texé ya tama chowa yaxůēchaxe rů tá ítatēxůchi. Rů wůxi i ubachacůů i daexů rů ipaxů rů iguxůrůů tá tixů, rů ngēxma tá tayarůxo. ⁷—Rů ngēxguma chowa peyaxůxgůechagu rů taguma nůxů ipeyarůngůmaēgu i ngēma ore i pexů changůxēēxů, rů marů name i naxcēx ípeca i ůaců i penaxwēxexů, rů choma rů tá pexna chanaxā. ⁸—Rů ngēxguma aixcůma meā chauxcēx pemaxēgu, rů Chaunatůxů tá nicuēxůůgů i duůxůgů. Rů ngēmaāců aixcůma chorů ngůexůgů tá pixůgů. ⁹—Choma rů pexů changechaů ngēma na Chaunatů choxů ngechaůxůrůů. Rů chanaxwēxe i

aixcūma meã chauga pexĩnũēcha, erū choma rŭ guxŭguma pexŭ changechaŭ. ¹⁰ — Choma rŭ naga chaxĩnũ i Chaunatuãrũ mugũ rŭ nũma rŭ guxŭguma choxŭ nangechaŭ. Rŭ ngẽxgumarũ tã ta nixĩ ega naga pexĩnũēgu i chorũ mugũ, rŭ guxŭgutãma pexŭ changechaŭēcha. ¹¹ — Choma rŭ ngẽmaãcũ pemaã nũxũ chixu na wũxigu chomaã petaãēgũxũcèx. Rŭ ngẽmaãcũ tã aixcūma petaãēgũ. ¹² — Rŭ choma pexŭ chamu na pemũcũgũxũ pengechaŭgũxũcèx, ngẽma choma na pexŭ changechaŭxũrũ. ¹³ — Rŭ ngẽxguma wũxie aixcūma tũmamũcũxũ ngechaŭgu, rŭ nũxũ tangechaŭãma rŭ nũetama ega woo tũmamũcũcèx tayuxgu. Rŭ nataxuma i to i ngechaŭ i ngẽmaãrũ yexera. ¹⁴ — Pema rŭ chomũcũgũ pixĩgũ i ngẽxguma chauga pexĩnũēgu. ¹⁵ — Choma rŭ marũ tama chorũ duũxũgũmareãcũ pexŭ chaxu. Erũ wũxi i coriarũ duũxũmare rŭ tama nũxũ nacuèx i ngẽma norũ cori ũxũ. Natũrũ ñuxma rŭ chomũcũgũmaã pexŭ chaxu, erũ pexŭ nũxũ chacuèxēē i guxũma i ore ga Chaunatu chomaã nũxũ ixuxũ. ¹⁶ — Pema rŭ tama pexira chauxcèx pedaugũ, natũrũ chaxira nixĩ ga pexcèx chadauxũ rŭ pexŭ chamuxũ na aixcūma chauxcèx pemaxèxũcèx rŭ chauxũtawa penagagũxũcèx i muxũma i duũxũgũ na guxŭguma choxŭ yaxõgũãxũcèx. Rŭ Chaunatu ya Tupana tã pexna nanaxã i guxũma i tacũ i chauégagu nũxna naxcèx pecaxũ. ¹⁷ — Rŭ ngẽma nixĩ i pexŭ chamuxũ na pemũcũgũxũ pengechaŭgũxũcèx.

Ñoma i naãnecũãx i duũxũgũ rŭ Ngechuchuchi rŭ norũ ngũexũgũchi naxaie

¹⁸ — Ngẽxguma ñoma i naãnecũãx i duũxũgũ pexchi aiegu, rŭ jnũxna pecuèxãchie ga chaxira chauxchi na naxaieũ! ¹⁹ — Rŭ ngẽxguma chi ñoma i naãnecũãx i duũxũgũrũ pixĩgũgu, rŭ ñoma i naãnecũãx i duũxũgũ rŭ chi pexŭ nangechaŭgũ ngẽma natanũxũgũxũ na nangechaŭgũxũrũ. Natũrũ choma nixĩ ga pexcèx chadauxũ natanũwa ga ñoma ga naãnecũãx ga duũxũgũ. Rŭ ngẽmacèx nixĩ i pexchi naxaieũ, erũ marũ tama naxrũũ pixĩgũ. ²⁰ — jNũxna pecuèxãchie ga pemaã ñachagu:

“Taxuxũma i wũxi i coriarũ duũxũ rŭ norũ coriétũwa nũgũ nangexmaxēē”, ñachagu! Rŭ yema na chauxchi na naxaieũ, rŭ pexchi rŭ tã ta naxaie. Rŭ yexguma chi chauga naxĩnũēgu rŭ ñuxma rŭ chi ta pega naxĩnũē. ²¹ — Rŭ ngẽmaãcũ ta chaugagu pexchi naxaie i ñoma i naãnecũãx i duũxũgũ erũ tama nũxũ nacuèxgũ ya Chaunatu ga nũma choxũ mucũ. ²² — Rŭ ngẽxguma chi choma tama namaã chanangoxēēgu na ñuxãcũ chixri na namaxèxũ, rŭ tãũ chima nũxũ nacuèxgũ ga pecadu na naxũgũxũ. Natũrũ ñuxma namaã nũxũ na chixuxũ na ñuxãcũ chixri namaxèxũ, rŭ ngẽmacèx i ñuxma rŭ taxuacũma nũxũ nixugũ na yangearũ pecaduãxũ. ²³ — Rŭ guxũma i duũxũgũ i chauxchi aieũ rŭ Chaunatu chi rŭ ta naxaie. ²⁴ — Rŭ ngẽma duũxũgũpèxewa rŭ Tupanaãrũ poramaã chanaxũ i mexũgũ i taxũ i taguma texé ya togue ũxũ. Rŭ ngẽxguma chi tama napèxewa chanaxũxgu i ngẽma mexũgũ rŭ tãũ chima Tupana namaã nanaxuegu na nagagutama yapecaduãxgũxũ. Natũrũ na woo marũ nũxũ nadaugũxũ i ngẽma mexũgũ i taxũ i Tupanaãrũ poramaã chaxũxũ, rŭ ngẽxguma rŭ ta chauxchi naxaieama rŭ Chaunatu chi rŭ ta naxaie. ²⁵ — Natũrũ ngẽmaãcũ nangupetũ erũ Tupana nayanguxēēchaŭ i norũ ore i ũmatũxũ i ñaxũ:

“Chauxchi naxaie woo taxuũma i chixexũ chaxũxgu”,

ñaxũ. ²⁶ — Natũrũ choma rŭ tã Chaunatuégagu pexcèx nũma chanamu i perũ ngũxēēruũ i Tupanaãē i Ũnèxũ i tã pexŭ nũxũ cuèxēēxũ i ore i aixcūma ixĩxũ. Rŭ nũma tã nixĩ i meãma pemaã nũxũ yaxuxũ i chauchiga. ²⁷ — Rŭ pema rŭ tã ta chauchigaxũ pixugũe, yerũ noxri ichanaxũgũgu ga duũxũgũmaã nũxũ na chixuxũ ga chorũ ore, rŭ woetama marũ chauxũtawa peyexmagũ — ñanagũrũ ga Ngechuchu.

16

¹ Rŭ Ngechuchu rŭ ñanagũrũ nũxũ: — Rŭ pemaã nũxũ chixu i ñaã ore na tama nũxũ na perũxoexũcèx na choxũ peyaxõgũxũ. ² — Rŭ ngutaquèxepataũgũwa tã pexŭ ínawoxũ. Rŭ aixcūma tã nawa nangu na texé pexŭ dèixũ rŭ tã nagu tarũxĩnũxũ na ngẽmaãcũ

mexũ Tupanacèx taxũxũ. ³—Rũ ngẽmaãcü tá pemaã namaxẽ i duũxũgũ, erũ taguma nüxũ nacuèxgũ ya Chaunatũ, rũ choxũ rũ ta tama nacuèxgũ. ⁴—Rũ pemaã nüxũ chixu i ñaã ore i ñuxmax, na nüxna pecuèxãchixèx i ngẽxguma yixcüra ngẽmaãcü pexũ nangupetũgu.

Tupanaãe i Üünexũãrũ puracũchiga

—Noxri rũ tama pemaã nüxũ chixu i ñaã ore, yerũ petanũgu charũxãũx. ⁵—Natürũ i ñuxma rũ tá pexna íchixũ na Chaunatũ ga núma choxũ mucũxũtawa na changẽxmaxũcèx. Rũ pema rũ taxúema choxna peca na ngextá tá na chaxũxũ. ⁶—Natürũ poraãcü pengechaũgũama erũ pemaã nüxũ chixu i ngẽma ore. ⁷—Natürũ aixcüma pemaã nüxũ chixu rũ pexcèx narümemaẽ nixĩ na Chaunatũcèx chataeguxũ. Rũ ngẽxguma chi tama Chaunatũxũtawa chaxũxgu rũ tãũ chima núma naxũ i Naãe i Üünexũ i pexũ rüngũxẽxũ. Natürũ ngẽxguma ngẽma chaxũxgu rũ choma tá núma chanamu i Naãe i Üünexũ. ⁸—Rũ ngẽxguma Naãe i Üünexũ núma ùxgu rũ tá guxũ i duũxũgũxũ nüxũ nacuèxèe na yapecaduãxgũxũ. Rũ tá nanangoxèe i ñuxãcü na yĩxũ i ngẽma maxũ i Tupanapèxewa aixcüma mexũ. Rũ tá duũxũgũxũ nüxũ nacuèxèe na Tupana tá napoxcuexũ i duũxũgũ naxcèx i norũ pecadugũ. ⁹—Rũ nüma i Naãe i Üünexũ tá duũxũgũxũ nüxũ nacuèxèe na pecaduãxgũxũ yĩxũ erũ tama choxũ nayaxõgũ. ¹⁰—Rũ tá nanangúexèe i ñuxãcü na yĩxũ i ngẽma maxũ i Tupanapèxewa aixcüma mexũ, erũ choma rũ tá Chaunatũxũtawa chaxũ, rũ pema rũ tãũtãma marũ choxũ pedaugũ. ¹¹—Rũ Naãe i Üünexũ tá duũxũgũxũ nüxũ nacuèxèe na Tupana tá napoxcuexũ i duũxũgũ i chixexũ ügũxũ, erũ Tupana rũ namaã nanaxuegu na marũ napoxcuãxũ i Chataná i ñoma i naãnemaã icuáxũ. ¹²—Choma rũ choxũ nangẽxma i muxũma i to i ore i pemaã nüxũ chixuxchaũchiréxũ. Natürũ ega ñuxma chi pemaã nüxũ chixuxgu rũ tãũ chima nüxũ pecuèxgũ. ¹³—Rũ Tupanaãe i Üünexũ rũ nüxũ nixu i ore i aixcüma ixĩxũĩcatama. Rũ ngẽxguma núma naxũxgu rũ nüma tá pexũ nangúexèe i guxũma i ore i aixcüma ixĩxũ. Erũ nüma rũ tama nüèchama tá nidexa, natürũ ngẽma ore i Chaunatũxũtawa rũ chauxũtawa nüxũ naxĩnüxũxũxica tátama nixu. Rũ tá pexũ nüxũ nacuèxèe i guxũma i ñacũ i yixcüra tá ngupetũxũ. ¹⁴—Rũ nüma rũ tá choxũ nataxèe, erũ chauxũtawa tá nanayaxu i norũ nguxèetae, rũ ñuxũchi tá pexũ nangúexèe namaã i ngẽma nguxèetae. ¹⁵—Guxũma i Chaunatũaxũ ngẽxmaxũ rũ choxrũ ta nixĩ. Ngẽmacèx pemaã nüxũ chixu rũ Naãe i Üünexũ rũ chauxũtawa tá nanayaxu i norũ nguxèetae, rũ ñuxũchi pexũ tá namaã nangúexèe. ¹⁶—Rũ paxa tãũtãma choxũ pedau. Natürũ ngẽmawena rũ wena táxarũ choxũ pedau erũ Chaunatũxũtawa tá chaxũ—ñanagürũ ga Ngechuchu.

Ngema guxchaxũgũ rũ yixcüama rũ tá taãexũ nananguxuchi

¹⁷ Rũ yexguma ñuxre ga toma ga Ngechuchuarũ ngúexũgũ rũ togũna tacagũ, rũ ñatarũgũgũ: —¿Ñacũchiga nixĩ na ngẽma ñaxũ:

“Rũ paxa tãũtãma choxũ pedaugũ. Natürũ ngẽmawena rũ wena táxarũ choxũ pedaugũ”, ñaxũ? ¿Rũ ñacũchiga ta nixĩ na ñaxũ:

“Choma rũ Chaunatũxũtawa tá chaxũ”, ñaxũ? ¹⁸—¿Rũ ñacũchiga ta nixĩ na ñaxũ:

“Rũ paxa tãũtãma choxũ pedaugũ”, ñaxũ? Rũ yixema rũ tama nüxũ tacuèxgũega na ñacũchigaxũ tamaã yaxuxũ—ñatarũgũgũ. ¹⁹ Rũ Ngechuchu rũ nüxũ nacuèxama ga nüxna na tacagũchaũxũ ga tomãx. Rũ yemacèx ñanagürũ toxũ: —Choma rũ marũ pemaã nüxũ chixu rũ paxa tãũtãma choxũ pedau, natürũ ngẽmawena rũ wena táxarũ choxũ pedau. ¿Rũ ngẽma dexacèxtama i pegũna pecagũxũ? ²⁰—Rũ aixcüma pemaã nüxũ chixu rũ pema rũ tá pexauxe, rũ tá pengechaũgũ. Natürũ ñoma i naãnecũãx i duũxũgũ rũ tá nataãegũ. Natürũ woo pema tá pengechaũgũ, rũ ngẽma perũ ngechaũ rũ tá taãexũ nananguxuchi. ²¹—Ngẽxguma wũxi i nge íraxacũchaũgu rũ inaxixãchiãe, erũ inguxneca. Natürũ ngẽxguma marũ tabuxgu ya ngĩrũ õxchana, rũ nüxũ iyarũngũma na

ñuxácü poraácü ngĩxũ na nanguxchiréxũ i noxrix, erü tümamaã itaãe ya ngĩrũ õxhana. ²² —Rü ngëxgumarũ tá ta pexũ nangupetü i pemax, erü ñuxma rü penaxixãchiãgũ. Natürü wena táxarü chataegu rü pexũ íchayadau. Rü ngëxguma rü tá pexũ nangëxma i wüxi i taãe i taxucürüwama texé pexna yaxuxũ. ²³ —Rü ngëxguma ínanguxgu tá i ngëma ngunexũ na yanguxũ i ñaã pemaã nüxũ chixuxũ, rü taxucèxtáma tacücèx choxna pecagü erü aixcüma Chaunatü tá nixĩ ya pexna naxácü i guxũma i tacü i chauégagu nüxna naxcèx pecaxũ. ²⁴ —Ñuxmarüta i pema rü taxuïcèxma chauégagu ípecagü. ¡Naxcèx ípeca rü tá penayaxu i ngëma naxcèx ípecaxũ! Rü ngëmaãcü rü tá aixcüma petaãgũ.

Ngechuchu rü marü nüxũ narüyexera i guxũma i tacü i ñoma i naãnewa ngëxmaxũ

²⁵ —Ñuxma rü cuèxruũgügu chayaxuácüma pemaã nüxũ chixu i ore. Natürü nawa tá nangu i ngunexũ i marü táütáma ngëmaãcü pemaã nüxũ chixu. Rü ngëxguma rü tá noxtacüma meã pemaã chanangoxëe i Chaunatüchiga. ²⁶⁻²⁷ —Rü ngëma ngunexügu i pema rü Chaunatüxütawa tá chauégagu naxcèx ípeca i tacü i penaxwèxexũ. Rü taxucèxma tüxcüũ choma tá Chaunatüxütawa pexũ naxcèx íchaca, erü nümatama ya Chaunatü rü woetama pexũ nangechaũ, erü pema rü choxũ pengechaũ rü peyaxögü na naxütawa ne chaxũxũ. ²⁸ —Chaunatüxütawa ne chaxũ na ñoma ga naãnewa chaxũxücèx. Rü ñuxma rü tá nüxna chataegu i ñoma i naãne na wenaxãrũ Chaunatüxütawa chaxũxücèx —ñanagürü. ²⁹ Rü yexguma ga toma ga norü ngúexüügü rü ñatarügügu: —Ñuxma waxi nixĩ i meãxũchima tomaã cunangoxëexũ i curü ore i tomaã nüxũ quixuxũ. Rü tama tacügu ixuxũácüma tomaã nüxũ quixu. ³⁰ —Rü ñuxma rü nüxũ tacuèx na aixcüma guxũxũma na cucuáxũ. Rü taxuacüma texé ñuxũ ñatagürü cuxũ. Rü ngëmacèx nixĩ i tayaxögüxũ na aixcüma Tupanaxütawa na ne cuxũxũ —ñatarügügu. ³¹ Rü Ngechuchu toxũ nangãxũ rü ñanagürü: —¿Aixcüma peyaxögüxũ i ñuxmax? ³² —Rü nawa tá nangu i ngunexũ rü ñuxmatátama nixĩ i na pegü pewoonexũ. Rü wüxichigü i pema rü tá pepatawa pexĩ, rü chaxica tá nuã choxũ petèx. Natürü tama chaxica tá icharüxãũx, erü Chaunatü rü chauxütawa nangëxma. ³³ —Rü guxũma i ñaã ore rü pemaã nüxũ chixu na chaugagu petaãgüxücèx. Rü ñoma i naãnewa rü tá ngúxũ pingè. Natürü ¡peporae! erü choma rü marü nüxũ charüyexera i guxũma i tacü i ñoma i naãnewa ngëxmaxũ —ñanagürü.

17

Ngechuchu rü norü ngúexüügüxèx nayumüxë

¹ Rü yema ñaxguwena rü Ngechuchu daxügu nadawenü, rü ñanagürü: —Pa Chaunatüx, marü nawa nangu i ngunexũ na chayuxũ. Rü chanaxwèxe na duũxügüxũ nüxũ cucuèxëexũ na aixcüma choma rü cune chíixũ. Rü ngëmaãcü i choma rü tá nüxũ nüxũ chacuèxëe na cuma rü aixcüma Tupana na quiixũ. ² —Erü marü guxũ i duũxügüarü ãëxgacüxũ choxũ quixixëe, na chanamaxëxëxücèx i guxũma i duũxügü i choxna cumugüxũ. ³ —Rü ngëma duũxügü tá nüxũ nangëxma i maxũ i taguma gúxũ ega cuxũ nacuèxgügu na cuxicatama Tupana na quiixũ, rü choxũ nacuèxgügu na choma rü Cristu ga núma choxũ cumucü na chíixũ. ⁴ —Choma rü marü cuxũ chataxëe i ñoma i naãnewa rü chayanguxëe i guxũma i puracü ga nawa choxũ cumuxũ. ⁵ —Rü ñuxma Pa Chaunatüx, rü chanaxwèxe i cugüxütawa choxũ cungëxmaxëe na choxũ nangëxmaxüçèx ga yematama pora ga cumaã choxũ yexmaxũ ga noxri tauta naãne üxgu. ⁶ —Rü guxema duũxëgü ya tüxũ quidexechixe ga ñoma ga naãnewa na choxna tüxũ cumugüxücèx, rü marü tüxũ nüxũ chacuèxëe i texé na quiixũ i cumax. Rü woetama cuxrügü tixĩgü rü cuma nixĩ ga choxna tüxũ cumugüxũ. Rü tümagü rü marü naga taxĩnüe i curü ore. ⁷ —Rü ñuxma rü marü nüxũ tacuèx rü guxũma i ngëma choxna cuxãxũ, rü aixcüma cuxütawa ne naxũ. ⁸ —Rü choma rü marü tümamaã nüxũ chixu ga curü ore ga chomaã nüxũ quixuxũ. Rü tümagü rü marü tayaxögü i ngëma ore. Rü nüxũ ticuèxãchitanü na aixcüma cuxütawa na ne chaxũxũ i chomax. Rü tayaxögü ga cuma núma choxũ na

cumuxũ. ⁹—Rũ ngẽmacèx cuxna chaca na tũxũ na curũngũxẽxũcèx. Rũ tama cuxna chaca na nũxũ curũngũxẽxũcèx i ñoma i naãnecũãx i duũxũgũ, natũrũ cuxna chaca na tũxũ curũngũxẽxũcèx ya guxema choxna tũxũ cumugũxe, erũ curũ duũxũgũ tixĩgũ. ¹⁰ Rũ guxãma ya yĩxema choxrũgũ ixĩgũxe rũ cuxrũgũ tixĩgũ. Rũ guxãma ya cuxrũgũ ixĩgũxe rũ choxrũgũ tixĩgũ. Rũ tũmagagu rũ duũxũgũ choxũ nicuèxũgũ. ¹¹—Choma rũ marũ tãũtãma ñoma i naãnewa changẽxmaẽcha, natũrũ i tũmagũ rũ ngẽmããcũ ñoma i naãnewa tá tangẽxmagũ ngẽxguma cuxũtawa chaxũyane. Pa Chaunatũ ya Üñecũx, rũ chanaxwèxe na curũ pora ga choxna cuxãxũmaã tũxna cudadũxũ ya yĩxema choxna tũxũ cumugũxe, na ngẽmããcũ guxãma wũxigu rũxĩnũxũcèx, ngẽma cuma rũ choma na wũxigu rũxĩnũxũrũũ. ¹²—Rũ yexguma guxema choxna tũxũ cumugũxetanũwa chayexmagu ga ñoma ga naãnewa, rũ curũ pora ga choxna cuxãxũmaã tũxna chadau rũ tũxũ íchapoxũ. Rũ taxũema ga guxema choxna tũxũ cumugũxe rũ itayarũtauxe. Rũ Yuda ga woetama iyarũtaxuxũxicatama inayarũtaxu na yanguxũcèx i curũ ore i ümatũxũ. ¹³—Rũ ñũxma rũ cuxũtawa tá chaxũ. Natũrũ ñomarũta ñoma i naãnewa changẽxma-yane rũ nũxũ chixu i ñãã curũ ore na tũmagũ rũ ta tũxũ nangẽxmaxũcèx i ngẽma taãẽ i aixcũma ixĩxũ i choma choxũ ngẽxmaxũ. ¹⁴—Choma rũ marũ tũmamaã nũxũ chixu i curũ ore. Natũrũ ñoma i naãnecũãx i duũxũgũ rũ tũmachi naxaie, erũ tũma rũ tama naxrũũ tixĩgũ, ngẽxgumarũũ i choma rũ tama ñoma i naãnecũãxrũũ chixĩ. ¹⁵—Tama cuxna tũmacèx chaca na tũxũ na quigagũxũcèx i ñoma i naãnewa. Natũrũ cuxna chaca na tũxũ na ícupoxũxũcèx nũxna i ngoxo i Chataná. ¹⁶—Choma rũ tama ñoma i naãnecũãx chixĩ. Rũ tũmagũ rũ ta tama ñoma i naãnecũãx tixĩgũ, erũ cuxrũgũ tixĩgũ i ñũxmax. ¹⁷—Curũ ore rũ aixcũma nixĩ. Rũ chanaxwèxe i tũxũ cungũxẽẽ i curũ ore, na aixcũma cupẽxewa tixũñexũcèx ya yĩxema choxna tũxũ cumugũxe. ¹⁸—Rũ yexgumarũũ ga ñoma ga naãnecũãx ga duũxũgũtanũwa choxũ na cumuxũrũũ, rũ ngẽxgumarũũ i choma rũ ta ñoma i naãnecũãx i duũxũgũ-tanũwa tũxũ chamugũ. ¹⁹—Rũ tũmagagu chaugũ ichaxã na tũxũ changũxẽẽxũcèx i curũ ore i aixcũma ixĩxũ, na cupẽxewa tixũñexũcèx ya yĩxema choxna tũxũ cumugũxe. ²⁰—Natũrũ tama yĩxema ñũxma yaxõgũxecèxicatama cuxna chaca. Natũrũ cuxna chaca ta tũmacèx ya yĩxema yixcũra tá yaxõgũxe nagagu i tũmaãrũ ore ya yĩxema ñũxma yaxõgũxe. ²¹—Rũ guxãma ya yĩxemacèx cuxna chaca na aixcũma wũxitama tixĩgũxũcèx. Rũ ngẽma cuma rũ choma na wũxitama ixĩgũxũrũũ, Pa Chaunatũx, rũ chanaxwèxe i guxãma i tũma rũ ta wũxitama tixĩgũ. Rũ ngẽmããcũ i ñoma i naãnecũãx i duũxũgũ, rũ tá nayaxõgũ na cuma núma choxũ cumuxũ. ²²—Rũ choma rũ marũ tũxna chanaxã i ngẽmatama pora i cuma choxna cuxãxũ na ngẽmããcũ wũxitama tixĩgũxũcèx ngẽma cuma rũ choma na wũxitama ixĩgũxũrũũ. ²³—Rũ chanaxwèxe na tũmawa changẽxmaxũ rũ cuma i chowa na cungẽxmaxũ na ngẽmããcũ aixcũma wũxi-tama ixĩgũxũ i guxãma i yixema. Rũ ngẽmããcũ i ñoma i naãnecũãx i duũxũgũ rũ tá nũxũ nicuèxãchitanũ na cuma núma choxũ cumuxũ, rũ tá nũxũ nicuèxãchitanũ na tũxũ cungechaũxũ ya yĩxema choxna tũxũ cumugũxe ngẽma na choxũ cungechaũxũrũũ. ²⁴—Pa Chaunatũx, cuma choxna tũxũ cumugũ. Rũ chanaxwèxe i chauxũtawa tangẽxmagũ i ngẽma tá íchangẽxmaxũwa, na nũxũ tadaugũxũcèx i chorũ pora ga choxna cuxãxũ. Yerũ choxũ cungechaũ ga yexguma tauta naãne ixũgũgumama. ²⁵—Pa Chaunatũ ya Mecũx, ñoma i naãnecũãx i duũxũgũ rũ tama cuxũ nacuèxgũ. Natũrũ choma rũ cuxũ chacuèx. Rũ yĩxema choxna tũxũ cumugũxe rũ ta marũ nũxũ tacuèxgũ na cuma núma choxũ cumuxũ. ²⁶—Rũ marũ tũxũ nũxũ chacuèxẽẽ na texé quiĩxũ. Rũ guxũgutãma tũxũ nũxũ chicuèxẽẽãmachigũ na cuma choxũ cungechaũxũrũũ tũgũ tangechaũgũxũcèx rũ choma rũ tũmaxũtawa na changẽxmaxũcèx —ñanagũrũ ga Ngechuchu.

18

Ngechuchuxũ niyauxgũ
(Mt 26.47-56; Mr 14.43-50; Lc 22.47-53)

¹ Rŭ yema ñaxguwena ga Ngechuchu rŭ tomaã inaxũãchi, na Cheduruarŭ ngatexũãrŭ tocutŭwa taxĩxũcèx. Rŭ yéma nayexma ga wŭxi ga nanetŭnecŭ. Rŭ yemawa naxũ ga Ngechuchu tomaã. ² Rŭ Yuda ga yema bexma cúãcŭ Ngechuchuxũ íyaxuaxũxũ rŭ nŭxũ nacuèx ga yema nachica, yerŭ Ngechuchu rŭ muèxpŭxcŭna yéma tomaã nangutaquèxexũ. ³ Rŭ yéma nangu ga Yuda namaã ga ñuxre ga churaragŭ rŭ ñuxre ga tupauca ga taxũneãrŭ purichíagŭ ga yéma namugŭxũ ga paigŭarŭ àèxgacŭgŭ rŭ parichéugŭ. Rŭ meãma nixãxne, rŭ yéma nanangegŭ ga omŭgŭ. ⁴ Natŭrŭ ga Ngechuchu rŭ marŭ nŭxũ nacuèx ga guxũma ga tacŭ tá nŭxũ na ngupetũxũ. Rŭ yemacèx naxcèx nixũ, rŭ nŭxna naca, rŭ ñanagŭrŭ: —¿Texécèx nixĩ i pedaugũxũ? —ñanagŭrŭ. ⁵ Rŭ nŭmagŭ rŭ Ngechuchuxũ nangãxũgŭ, rŭ ñanagŭ-rŭgŭ: —Nacharétucũãx i Ngechuchucèx nixĩ i tadaugũxũ —ñanagŭrŭgŭ. Rŭ Ngechuchu nanangãxũ, rŭ ñanagŭrŭ: —Choma chixĩ —ñanagŭrŭ. Rŭ Yuda ga bexma cúãcŭ ínaxuaxũxũ rŭ yema churaragŭtanŭwa nayexma. ⁶ Rŭ yexguma yema ñaxgu ga Ngechuchu: “Choma chixĩ”, ñaxgu, rŭ nŭgŭweama nacaixũtanŭ ga yema churaragŭ, rŭ yexma nayayi. ⁷ Rŭ yexguma ga Ngechuchu rŭ wena nŭxna naca, rŭ ñanagŭrŭ: —¿Texécèx nixĩ i pedaugũxũ? —ñanagŭrŭ. Rŭ nŭmagŭ rŭ nanangãxũgŭ rŭ ñanagŭrŭgŭ: —Nacharétucũãx i Ngechuchucèx nixĩ i tadaugũxũ —ñanagŭrŭgŭ. ⁸ Rŭ Ngechuchu rŭ wenaxãrŭ ñanagŭrŭ nŭxũ: —Marŭ pemaã nŭxũ chixu rŭ choma chixĩ. Rŭ ngèxguma chauxcèx pedaugŭgu rŭ ípeyaxĩxèè i ñaã chorŭ ngúexũgŭ! —ñanagŭrŭ. ⁹ Rŭ yemaãcŭ nangupetŭ na yanguxũcèx ga norŭ ore ga nŭmatama ga Ngechuchu nŭxũ yaxuxũ ga ñaxgu:

“Yíxema Chaunatŭ choxna tũxũ mugŭxe rŭ taxúetáma itayarŭtauxe”, ñaxgu. ¹⁰ Rŭ Chimáũ ga Pedru rŭ nŭxũ iyexma ga wŭxi ga cŭxchi. Rŭ ngĩxũ nayaxu ga norŭ cŭxchi rŭ yemamaã ínanadaechinŭ ga paigŭarŭ àèxgacŭarŭ duũxũ ga Macugu àegaxũ. Rŭ norŭ tŭgŭnechinŭ ínadae. ¹¹ Natŭrŭ ga Ngechuchu rŭ Pedruxũ ñanagŭrŭ: —¿Ngĩxchixũgu ngĩxũ íxŭcuchi i curŭ cŭxchi! ¿Tama èxna nŭxũ cucuèx na choma rŭ tá ngúxũ chingexũ ngèma Chaunatŭ chomaã naxueguxŭrŭ? —ñanagŭrŭ.

Anápatawa Ngechuchuxũ nagagŭ

(Mt 26.57-58; Mr 14.53-54; Lc 22.54)

¹² Rŭ yexguma ga churaragŭarŭ àèxgacŭ, namaã ga norŭ churaragŭ rŭ tupaucaarŭ purichíagŭ, rŭ Ngechuchuxũ niyaxugŭ. Rŭ nayanèixchacũgŭ. ¹³ Rŭ noxri rŭ àèxgacŭ ga Anápatawa nanagagŭ. Rŭ Aná rŭ Caipánèxtŭ nixĩ. Rŭ guma taunecŭgu ga Caipá rŭ paigŭeru nixĩ. ¹⁴ Rŭ yema Caipá nixĩ ga ŭpaacŭ yema Yudíugŭarŭ àèxgacŭgŭmaã nŭxũ íxuxũ ga na namemaèxũ ga wŭxitama ga yatŭ guxũma ga Yudíugŭcèx na yuxũ.

Pedru rŭ Ngechuchuxũ nixã

(Mt 26.69-70; Mr 14.66-68; Lc 22.55-57)

¹⁵ Rŭ choma rŭ Chimáũ ga Pedru rŭ wŭxigu Ngechuchuwe tarũxĩ. Rŭ yema paigŭarŭ àèxgacŭ rŭ choxũ nacuèx. Rŭ yemacèx ga choma rŭ wŭxigu Ngechuchumaã tichocu ga àèxgacŭpataèxtŭwa. ¹⁶ Natŭrŭ ga Pedru rŭ íãxãrŭ dŭxétŭgutama narũxãũx. Rŭ yemacèx íchaxũxũ ga choma, rŭ yema íãxãrŭ dauruũ ga ngecũmaã chayarŭdexa rŭ yexguma Pedruxũ iyamucuchi. ¹⁷ Rŭ yexguma ga yema ngecŭ ga íãxãrŭ dauruũ, rŭ Pedruna íca, rŭ ngĩgŭrŭgŭ: —¿Tama èxna cuma rŭ ta wŭxi i norŭ ngúexũ quiĩxũ i ngèma yatŭ i yayauxgũxũ? —ngĩgŭrŭgŭ. Rŭ Pedru ngĩxũ nangãxũ, rŭ ñanagŭrŭ: —Tama nixĩ —ñanagŭrŭ. ¹⁸ Rŭ yéma íãxtŭwa rŭ àèxgacŭarŭ duũxũgŭ rŭ purichíagŭ rŭ nanaxũgŭ ga wŭxi ga ŭxũ, yerŭ nagáuane. Rŭ guma ŭxŭxetŭarŭ ngaicamagu nachigŭ, rŭ yéma nŭgŭ ninaĩxũgŭ. Rŭ Pedru rŭ ta yéma nŭgŭ nanaĩxũ naxètŭwa ga guma ŭxũ.

Paigŭarŭ àèxgacŭ rŭ Ngechuchuna naca

(Mt 26.59-66; Mr 14.55-64; Lc 22.66-71)

¹⁹ Rŭ yema paigŭarŭ àèxgacŭ rŭ inanaxũgŭ ga Ngechuchuna na naçaxũ, rŭ ñanagŭrŭ: —¿Tacŭ nixĩ ga duũxũgũxũ namaã cungŭexèèxũ? ¿Rŭ texègŭ tixĩ ya yíxema curŭ

ngúexŭgŭ? —ñanagŭrŭ. ²⁰ Rŭ Ngechuchu ñanagŭrŭ nŭxŭ: —Choma rŭ guxŭ ga duŭxŭgŭpĕxewa nŭxŭ chixu ga chorŭ ore. Rŭ ngutaquĕxepataŭgŭwa rŭ tupauca ya taxŭnewa i ngextá guxŭma i Yudiŭgŭ íngutaquĕxegŭxŭwa chanangúexĕĕ ga duŭxŭgŭ. Rŭ yemaácŭ taxuŭma ichicux ga chorŭ ore. ²¹ —¿Rŭ tŭxcŭŭ i choxna cuçaxŭ i ñuxmax? Ēcŭ, jnŭxna naca i ngĕma duŭxŭgŭ ga nŭxŭ ínŭĕxŭ ga chorŭ ore! Rŭ nŭmagŭ tá cumaã nŭxŭ nixugŭe ga tacŭchigaxŭ namaã na chixuxŭ. Erŭ nŭmagŭ rŭ nŭxŭ nacuĕxgŭ i guxŭma ga tacŭ ga namaã nŭxŭ chixuxŭ —ñanagŭrŭ. ²² Rŭ yexguma Ngechuchu yema ñaxgu, rŭ wŭxi ga tupauca ga taxŭneârŭ purichía ga naxŭtagu chixŭ, rŭ Ngechuchuchiwegu nidagŭ. Rŭ ñanagŭrŭ Ngechuchuxŭ: —¿Tŭxcŭŭ ngĕmaácŭ cunangãxŭ ya daa paigŭarŭ âĕxgacŭ? —ñanagŭrŭ. ²³ Rŭ Ngechuchu nanangãxŭ rŭ ñanagŭrŭ: —Rŭ ngĕxguma tacŭ rŭ chixexŭxŭ chixuxgu, jrŭ nŭxŭ ixu na ñuxácŭ chixri na chidexaxŭ! Natŭrŭ ega chorŭ ore rŭ aixcŭma yixŭgu, rŭ ¿tŭxcŭŭ i choxŭ quidagŭxŭ i ñuxmax? —ñanagŭrŭ. ²⁴ Rŭ yexguma ga Aná rŭ Ngechuchuxŭ yanáíácŭma paigŭarŭ âĕxgacŭ ga Caipáxŭtawa nanamu.

Pedru rŭ wenaxârŭ tama Ngechuchuxŭ nacuĕxneta
(Mt 26.71-75; Mr 14.69-72; Lc 22.58-62)

²⁵ Rŭ yoxni ga Pedru rŭ ŭxŭarŭ ngaicamagu nachiecha, rŭ yéma nŭgŭ nanaíxŭãma. Rŭ yema yéma yexmagŭxŭ rŭ nŭxna nacagŭe, rŭ ñanagŭrŭgŭ: —¿Tama ĕxna cuma rŭ ta norŭ ngúexŭ quiŭxŭ i ngĕma yatŭ i yayauxgŭxŭ? —ñanagŭrŭgŭ. Natŭrŭ ga Pedru rŭ tama nŭgŭ nixu, rŭ ñanagŭrŭ: —Tama nixŭ —ñanagŭrŭ. ²⁶ Rŭ yéma nayexma ga wŭxi ga paigŭarŭ âĕxgacŭarŭ duŭxŭ. Rŭ yema rŭ Pedru ídaechinŭxŭtanŭxŭ nixŭ. Rŭ Pedruna naca, rŭ ñanagŭrŭ: —¿Tama ĕxna cuma yŭxŭ ga nanetŭnecŭwa Ngechuchumaã cuxŭ chadauxŭ? —ñanagŭrŭ. ²⁷ Rŭ Pedru rŭ wena tama nŭgŭ nixu. Rŭ yexgumatama nica ga otá.

Ngechuchu rŭ Piratu-pĕxewa nayexma
(Mt 27.1-2, 11-14; Mr 15.1-5; Lc 23.1-5)

²⁸ Rŭ yexguma Ngechuchumaã nŭxŭ nachauegu ga nŭxna na nacagŭxŭ, rŭ Caipápatawa ínanagaxŭchigŭ rŭ Yudéaaneârŭ âĕxgacŭ ga Dumacŭãxpatawa nanagagŭ. Natŭrŭ marŭ ningóonechaŭ ga yexguma rŭ yemacĕx ga yema Yudiŭgŭ rŭ tama guma âĕxgacŭpatagu nachocu, yerŭ norŭ mugŭ nŭxŭ nixu rŭ taxŭ ga pecadu nixŭ na wŭxi ga Dumacŭãxpatawa na nachocuxŭ ga yema ngunexŭgu. Rŭ yemaácŭ tama Tupanapĕxewa nŭgŭ nixŭxaarŭ maxŭãxĕĕgŭchaŭ, yerŭ yexguma nŭgŭ yaxŭxaarŭ maxŭãxĕĕgŭgu, rŭ taxucŭrŭwa nanangŭxgŭ ga ðna ga Ũpetŭchigaarŭ petacĕx namexĕĕxŭ. ²⁹ Rŭ yemacĕx ga guma âĕxgacŭ ga Dumacŭãx ga Piratu rŭ napatawa ínaxŭxŭ ga duŭxŭgŭmaã na yadexaxŭcĕx. Rŭ ñanagŭrŭ nŭxŭ: —¿Tacŭcĕx ípenaxuaxŭ ya daa yatŭ? —ñanagŭrŭ. ³⁰ Rŭ nŭmagŭ rŭ Piratuxŭ nangãxŭgŭ, rŭ ñanagŭrŭgŭ: —Ngĕxguma chi tama wŭxi i taxŭ i chixexŭ naxŭxgu, rŭ tãŭ chima cuxŭtawa tanaga —ñanagŭrŭgŭ. ³¹ Rŭ yexguma ga Piratu rŭ ñanagŭrŭ nŭxŭ: —¿Ēcŭ perŭ âĕxgacŭgŭxŭtawa penaga, rŭ perŭ mugŭ pemaã nŭxŭ ixuxŭácŭma penapoxcux! —ñanagŭrŭ. Natŭrŭ ga yema Yudiŭgŭ rŭ Piratuxŭ nangãxŭgŭ, rŭ ñanagŭrŭgŭ: —Natŭrŭ pema i Dumacŭãxgŭ rŭ marŭ toxna penachuxu na texéxŭ timĕxgŭxŭ tŭmaârŭ chixexŭcĕx —ñanagŭrŭgŭ. ³² Rŭ yemaácŭ ningu ga yema ore ga Ngechuchu ũpaacŭ nŭxŭ ixuxŭ ga ñuxácŭ tá na nayuxŭ. ³³ Rŭ Piratu rŭ wenaxârŭ napatagu naxŭcu, rŭ Ngechuchucĕx nangema. Rŭ nŭxna naca, rŭ ñanagŭrŭ: —¿Cuma yŭxŭ i Yudiŭgŭarŭ Āĕxgacŭ quiŭxŭ? —ñanagŭrŭ. ³⁴ Rŭ Ngechuchu ñanagŭrŭ nŭxŭ: —¿Cuechamatama i nagu curŭxŭnŭxŭ na ngĕmaácŭ choxna cuçaxŭ, rŭ ĕxna togŭ marŭ cumaã nŭxŭ nixu na ngĕmaácŭ choxna cuçaxŭcĕx? —ñanagŭrŭ. ³⁵ Rŭ Piratu Ngechuchuxŭ nangãxŭ, rŭ ñanagŭrŭ: —¿Ēxna cuma nagu curŭxŭnŭgu rŭ Yudiŭ chíxŭ? Rŭ ngĕma cuchiŭñanecŭãxgŭ rŭ paigŭarŭ âĕxgacŭgŭtama nixŭ i chauxŭtawa cuxŭ gagŭxŭ. ¿Ēxna tacŭ rŭ chixexŭ cuxŭ? —ñanagŭrŭ. ³⁶ Rŭ yexguma ga Ngechuchu rŭ

nanangãxũ, rü ñanagürü: —Choma rü tama ñoma i naãnewa ãëxgacü chixĩ. Rü ngëxguma ñoma i naãnewa ãëxgacü chixĩgu, rü chorü duũxügü rü chi Yudíugüarü ãëxgacügümaã nügü nadai rü tâũ chima choxũ niyauxgü i ngëxguma. Natürü tama ñoma i naãnewa ãëxgacü chixĩ —ñanagürü. ³⁷ Rü yexguma ga Piratu rü ñanagürü nüxũ: —¿Éxna to i nachiũãneãrü ãëxgacü quixĩ i cumax? —ñanagürü. Rü Ngechuchu nanangãxũ rü ñanagürü: —Cumatama marü nüxũ quixu na ãëxgacü chiĩxũ. Rü yemacëx ga choma rü chabu rü ñoma ga naãnewa chaxũ na duũxügümaã nüxũ chayarüxuxüçèx i ore i aixcüma ixĩxũ. Rü guxãma ya texé ya nüxũ cuáxchaũxë i ngëma ore i aixcüma ixĩxũ, rü choxũ itarüxĩnë i ngëma ore i nüxũ chixuxũ —ñanagürü. ³⁸ Rü Piratu rü ñanagürü nüxũ: —¿Tacü nixĩ i ngëma ore i aixcüma ixĩxũ? —ñanagürü.

Ngechuchumaã nanaxuegu na yamëxgüãxũ
(Mt 27.15-31; Mr 15.6-20; Lc 23.13-25)

Rü yemaãcü Ngechuchuna nacaxguwena ga Piratu, rü wenaxãrü Yudíugümaã narüdexa. Rü ñanagürü nüxũ: —Taxuũma i chixexũxũ nawa chadau i ñaã yatü. ¿Rü tüxcüũ chi inapoxcuxũ? ³⁹ —Natürü guxügüma ega Üpetüchigaarü petawa nanguxgu, rü pecüma nixĩ na choxna naxcèx na pecaxũ na íchananguxuchixëẽxüçèx i wüxi i duũxũ i poxcuxũ. ¿Rü penaxwëxexũ na pexcèx íchananguxuchixëẽxũ i ñaã perü ãëxgacü, Pa Yudíugüx? —ñanagürü. ⁴⁰ Rü yexguma ga guxũma ga yema duũxügü, rü tagaãcü aita naxüe, rü ñanagürügü: —Tama tanaxwëxe na cuya-ngéxũ i ngëma yatü. Rü Barabá waxi nixĩ i tanaxwëxexũ na cuyangéxũ —ñanagürügü. Rü yema Barabá rü wüxi ga máëtaxũ nixĩ.

19

¹ Rü yexguma ga Piratu rü churaragüxũ namu na Ngechuchuxũ naçuaixgüxüçèx. ² Rü yema churaragü rü chuchuxüwa nanaxügü ga wüxi ga boxũ, rü ñuxüchi naëruwa nayangëxcuchigü. Rü wüxi ga máxũ ga naxchiru ga daucharaxügu nayacuxëëgü. ³ Rü ñuxüchi naxcèx naxĩ, rü nüxũ nacugüeãcüma ñanagürügü nüxũ: —¡Namaxũ, Pa Yudíugüarü ãëxgacüx! —ñanagürügü. Rü nanapechiwegü. ⁴ Rü Piratu rü wenaxãrü düxétüwa naxũ, rü Yudíugüxũ ñanagürü: —¡Düçèx! ñuxma tá nuã pepëxewa chanaga na nüxũ pecuáxüçèx na taxuũma i chixexũxũ nawa chadauxũ —ñanagürü. ⁵ Rü düxétüwa naxũ ga Ngechuchu. Rü namaã nangëxcueru ga yema boxũ ga chuchuxüwa naxügüxũ. Rü nagu nicux ga yema máxũ ga naxchiru ga daucharaxũ. Rü yex-guma ga Piratu rü Yudíugüxũ ñanagürü: —Daa nixĩ ya yima yatü —ñanagürü. ⁶ Natürü yexguma Ngechuchuxũ nadaugügu ga paigüarü ãëxgacügü rü purichíagü, rü inanaxügüe ga aita na naxüexũ. Rü ñanagürügü: —¡Curuchawa yapota! ¡Curuchawa yapota! —ñanagürügü. Rü Piratu rü ñanagürü nüxũ: —¡Ëcü, peyaga rü pematama curuchawa peyapota! Erü choma rü taxuũma i chixexũxũ nawa chadau —ñanagürü ga Piratu. ⁷ Natürü ga yema Yudíugü rü Piratuxũ nangãxügü, rü ñanagürügü: —Toma toxũ nangëxma i wüxi i torü mu. Rü ngëma torü mu toxũ nüxũ nacüxëë na namexũ na nayuxũ i ñaã yatü, yerü nüma rü nüxũ nixu ga Tupana Nane na yĩxũ —ñanagürügü. ⁸ Rü yexguma yemaxũ naxĩnügü ga Piratu, rü yexeraãcü namuũ. ⁹ Rü wena Ngechuchumaã napatagu naxücu. Rü yema Ngechuchuna nayaca, rü ñanagürü: —¿Ngextácüãx quixĩ i cumax? —ñanagürü. Natürü ga Ngechuchu rü tama nanangãxũ. ¹⁰ Rü yexguma ga Piratu rü Ngechuchuxũ ñanagürü: —¿Éxna ngëma täütãma choxũ cungãxũ? ¿Tau éxna i nüxũ cucuáxũ na choxmëxwa cungëxmaxũ na curuchawa cuxũ chipotaxũ rü éxna cuxũ na íchanguxuchixëẽxüçèx? —ñanagürü. ¹¹ Rü Ngechuchu nanangãxũ, rü ñanagürü: —Tãũ chima cuxmëxwa changëxma, ega tama Tupana naxwëxegu. Rü ngëmacèx nixĩ i ngëma duũxügü i cuxna choxũ mugüxũ rü curü yexera poraãcü napecaduãxgü —ñanagürü. ¹² Rü yemawena rü Piratu nagu narüxĩnü ga ñuxãcü Ngechuchuxũ na ínanguxuchixëẽegaxũ. Natürü yema

Yudíugü rü poraãcü aita naxüe, rü ñanagürügü: —Ngëxguma tá ícunanguxuchixëëxgu rü tama curü äëxgacü ya tacü ya Dumacüâx ya Chécharuxü cungechaŦ. Erü ngexerúxe ya äëxgacü ya tacüxü tügü ingucuchixëëxë, rü Dumacüâx ya äëxgacü ya tacü ya Chécharuarü uwanü tixí —ñanagürügü. ¹³ Rü yexguma yemaxü naxñügu ga Piratu, rü churaragüxü namu ga Ngechuchuxü düxétüwa na nagagüxcèx. Rü nawa nayarüto ga wüxi ga tochicaŦ ga taxü ga nutagünaxcèx ga togawa rü Gabatagu äëgaxü. Rü yema nachicawa nixí ga poxcuexü ga duüxügüna naçaxü ga äëxgacü. ¹⁴ Rü wüxi ga ngunexü nataxu ga Üpetüchigaarü petawa na nanguxü ga yexguma, rü marü tocuchiwa nangu. Rü Piratu rü Yudíugüxü ñanagürü: —¡Daa nixí ya yima perü äëxgacü! ñanagürü. ¹⁵ Natürü ga nümagü rü aita naxüe, rü ñanagürügü: —Tanaxwèxe na nayuxü. Rü ¡curuchawa yapota! —ñanagürügü. Rü Piratu nüxna naca rü ñanagürü nüxü: —¡Ñuxãcü i choma rü ichanamu na curuchawa yapotagüâxüxcèx ya perü äëxgacü? —ñanagürü. Natürü ga paigüarü äëxgacügü rü Piratuxü nangãxügü, rü ñanagürügü: —Yima äëxgacü ya tacü ya Chécharu ya Dumawa ngëxmacü rü yima nixí ya torü äëxgacü, rü nataxuma i to —ñanagürügü. ¹⁶ Rü yexguma ga Piratu rü yema Yudíugüna Ngechuchuxü namu na curuchawa yapotagüâxüxcèx. Rü nümagü rü nayagagü.

*Curuchawa Ngechuchuxü nipotagü
(Mt 27.45-56; Mr 15.33-41; Lc 23.44-49)*

¹⁷ Rü ínaxüxü ga Ngechuchu, rü norü curucha ngíxü ininge. Rü yéma nanagagü nawa ga wüxi ga nachica ga “Duüxëëruchinèxãgu” äëgaxü. Rü yema rü Górguta nixí ga naega ga togawa. ¹⁸ Rü yéma curuchawa Ngechuchuxü nayarüpotagü. Rü Ngechuchurüü curuchawa nayapotagü ga taxre ga to ga yatügü, rü wüxi ga norü tügünecüwawa rü to ga norü toxwecüwawa. ¹⁹ Rü Piratu rü churaragüxü namu na Ngechuchuarü curuchatapëxewa na yapocuchigüâxüxcèx ga wüxi ga mürapewaxacü ga äëgatachinüxü ga ñaxü:

“Ngechuchu ya Nacharétucüâx ya Yudíugüarü Äëxgacü”, ñaxü. ²⁰ Rü muxüma ga yema Yudíugü nüxü nadaumatü ga yema namatü ga mürapewaxacügu üxü. Yerü yema nachica ga Ngechuchuxü curuchawa íyanapotagüxüwa, rü ñãneärü ngaicamana nixí. Rü tomaëxpüx ga nagawa naxümatü ga yema naega ga yema mürapewawa. Rü togawa rü Griégugügawa rü Dumacüâxgügawa naxümatü. ²¹ Rü yemacèx ga yema Yudíugüarü paigüarü äëxgacügü rü Piratuxü ñanagürügü: —Toma rü tama tanaxwèxe i cunaxümatü i “Yudíugüarü Äëxgacü”, ñaxü. Rü narümemaë nixí i cunaxümatü rü ñacurügü:

“Nügü ixücü na Yudíugüarü Äëxgacü yíixü”, ñacurügü. ²² Natürü Piratu nanangãxü rü ñanagürü: —Ngëma chaxümatüxü rü marü ngëxma naxümatü —ñanagürü. ²³ Rü curuchawa marü Ngechuchuxü yapotagüguwena ga churaragü, rü nanade ga Ngechuchuchiru. Rü yema ägümücü ga churaragü rü nügümaã nayatoye ga naxchiru. Rü nanayauxgü ta ga norü gáuxüchiru ga máxü. Natürü taxuwama narüngèixte, yerü woetama yemaãcü naxü. ²⁴ Rü yemacèx ga yema churaragü rü nügümaã ñanagürügü: —¡Tãütáma nagu tagaugüe! Rü narümemaë nixí i naxcèx tá naxñüxcèxwëxegü rü ngíxü tañanagügü i wüxi i dïëru na ngëmawa nüxü icuèxgüxcèx na texéarü tá na yíixü —ñanagürügü. Rü yemaãcü ningu ga Tupanaärü ore ga ümatüxü ga ñaxü:

“Nügümaã nayatoye i chauxchiru, rü naxcèx ngíxü tanañanagügü i wüxi i dïëru”, ñaxü. Rü aixcüma yemaãcü nixí ga naxügüâxü ga churaragü. ²⁵ Rü Ngechuchuarü curuchapünewa iyexma ga naë ga María, rü ngíeyèx, rü María ga Creopá naxmèx, rü María ga Magadácüâx. ²⁶ Rü yexguma Ngechuchu naëxü dëuxgu ga yexma chauxütagu na nachixü, rü ñanagürü ngíxü: —Pa Mamax, yima nixí ya cune, —ñanagürü. ²⁷ Rü yemawena, rü ñanagürü choxü: —Ngëma iyixí i cue —ñanagürü. Rü yexgumamama rü chopatawa ngíxü chayaxu. Rü chauxütawa iyexmaëcha.

Nayu ga Ngechuchu

²⁸ Rŭ Ngechuchu nŭxŭ nacuèx ga marŭ na yanguxŭ ga guxŭma ga norŭ puracŭ ga ñoma ga naãnewa. Rŭ yema Tupanaãrŭ ore ga ũmatŭxŭ na yanguxèẽxècèx, rŭ ñanagŭrŭ: —Chitawa —ñanagŭrŭ. ²⁹ Rŭ yéma iyexma ga wŭxi ga tŭxŭxãcŭ ga binu ga marŭ ũxchiŭcŭmaã ããcuxcŭ. Rŭ wŭxi ga tŭèxmŭ guma binumaã niwaixèẽgŭ, rŭ wŭxi ga dexnemenèxãwa nayanèix. Rŭ yemamaã naãxgu nanawèxgŭ. ³⁰ Rŭ Ngechuchu nayaxaxŭ ga guma binu ga ũxchiŭcŭ rŭ ñanagŭrŭ: —Marŭ ningŭ i guxŭma i chorŭ puracŭ —ñanagŭrŭ. Rŭ ñuxŭchi inayarŭmaxãchieru, rŭ nayu.

Wŭxi ga churara rŭ wocaxemaã Ngechuchuxŭ nacanapacŭtŭxŭ

³¹ Natŭrŭ ga yema Yudiŭgŭarŭ ãèxgacŭgŭ rŭ tama nanaxwèxegŭ ga curuchagŭwa na nayexmagŭxŭ ga yema naxŭnegŭ. Yerŭ moxŭãcŭ rŭ ngŭxchigaarŭ ngunexŭ nixŭ. Rŭ yema Yudiŭgŭcèx rŭ yema nixŭ ga guxŭ ga ngŭxchigaarŭ ngunexŭãrŭ yexera ga ũnèxŭ, yerŭ norŭ peta ga Ũpetŭchigaarŭ ũgŭ nixŭ. Rŭ yemacèx Piratuna naxcèx nacagŭ na churaragŭ yéma namugŭxŭcèx na yapoyeparagŭãxŭcèx na paxa nayuexŭcèx ga yema curuchawa ipotagŭxŭ, rŭ paxa na nadeãxŭcèx ga curuchawa naxŭpa ga ngŭxchigaarŭ ngunexŭ. ³² Rŭ yéma naxŭ ga churaragŭ rŭ inanapoeparagŭ ga yema taxre ga yatŭgŭ ga Ngechuchumaã yéma curuchawa ipotagŭxŭ. ³³ Rŭ Ngechuchucèx naxŭ ga churaragŭ, natŭrŭ nŭxŭ nadaugŭ ga marŭ na nayuxŭ. Rŭ yemacèx tama nayapoyeparagŭ. ³⁴ Natŭrŭ wŭxi ga churara rŭ Ngechuchuxŭ nacanapacŭtŭxŭ. Rŭ yexgumatama ínayèxŭchi ga nagŭ rŭ dexá. ³⁵ Rŭ choma i Cuáŭ rŭ nŭxŭ chadau i guxŭma ga ñaã pemaã nŭxŭ chixuxŭ. Rŭ aixcŭma nixŭ i ñaã chorŭ ore. Rŭ chomatama nŭxŭ chacuèx i aixcŭma na yŭxŭ, rŭ pemaã nŭxŭ chixu na pema rŭ ta peyaxŭgŭxŭcèx. ³⁶ Rŭ yema nangupetŭ na yanguxŭcèx i Tupanaãrŭ ore i ũmatŭxŭ i ñaxŭ: “Rŭ taxŭnetáma ya naxchinèxã nipoyegŭ”, ñaxŭ. ³⁷ Rŭ toxnamana i Tupanaãrŭ ore i ũmatŭxŭwa rŭ ñanagŭrŭ: “Tá nŭxŭ narŭdaunŭ ya yima nacanapacŭtŭxŭgŭãcŭ”, ñanagŭrŭ.

Ngechuchuxŭ inatèxgŭ

(Mt 27.57-61; Mr 15.42-47; Lc 23.50-56)

³⁸ Rŭ nayexma ga wŭxi ga yatŭ ga Arimatéacŭãx ga Yúchegu ãegacŭ. Rŭ nŭma rŭ ta Ngechuchuaxŭ nayaxŭ, natŭrŭ cúãcŭ nayaxŭ yerŭ natanŭxŭ ga Yudiŭgŭarŭ ãèxgacŭgŭxŭ namuŭ. Rŭ guma nixŭ ga Piratuna yaçacŭ na nayauxãxŭcèx ga Ngechuchuxŭne. Rŭ Piratu rŭ: —Ngŭ, —ñanagŭrŭ. Rŭ yexguma ga Yúche rŭ yéma naxŭ ga curuchawa íyapotaxŭwa, rŭ curuchawa nayayaxu ga naxŭne ga Ngechuchu. ³⁹ Rŭ yéma nangu ga Nicodému ga ũpaacŭ chŭtacŭ Ngechuchuxŭtagu naxŭãnecŭ. Rŭ yéma nanange ga 30 kilo naguxŭ ga pumara ga yixichixŭ na Ngechuchuxŭ namaã nachaxŭnegŭxŭcèx. ⁴⁰ Rŭ yemaãcŭ ga Yúche rŭ Nicodému rŭ curuchawa nanayauxgŭ ga naxŭne ga Ngechuchu. Rŭ naxchiru ga marŭ pumaracharaxŭmaã nayanáixpŭxŭgŭ. Yerŭ yema nixŭ ga tocŭma ga toma ga Yudiŭgŭ ga yexguma wŭxi ga yueta tŭxŭ itatèxgŭgu. ⁴¹ Rŭ yema nachica ga Ngechuchu curuchawa íipotaxŭwa nayexma ga wŭxi ga nanetŭnecŭ. Rŭ yema nanetŭnecŭwa nayexma ga wŭxi ga naxmaxŭ ga yexwacaxŭxŭ ga taguma texéxŭ nagu natèxgŭxŭ. ⁴² Rŭ yema naxmaxŭgu nayaxŭcuchigŭ ga Ngechuchuxŭne yerŭ nangaicama, rŭ paxa tá ningune ga ngŭxchigaarŭ ngunexŭcèx.

20

Ínarŭda ga Ngechuchu

(Mt 28.1-10; Mr 16.1-8; Lc 24.1-12)

¹ Rŭ yŭxŭarŭ pèxmamaxŭchi ga tauta meã yangóonegu, rŭ María ga Magadácŭãx rŭ Ngechuchuxŭ íyaxŭcuchigŭxŭwa ixŭ. Rŭ nŭxŭ idau ga guma nuta ga Ngechuchumaxŭ

namaã rüngüxtaücü, rü marü na íanaxügachixü. ² Rü yexgumatama iinaãchi, rü yema choma rü Chimáü ga Pedrumaã ítayexmagüxüwa íña. Rü ngígürügü toxü: —Rü marü nanayauxgü ya Cori ya Ngechuchu i naxmaxüwa. Rü tama nüxü tacuèx na ngexta na naxügüãxü —ngígürügü. ³ Rü yexguma ga choma rü Pedru rü Ngechuchuxü íyaxüchigüxüwa taxí. ⁴ Rü wüxigu itaxüãchi ga tomox, natürü ga choma rü poraãcü Pedruarü yexera ichañaãchi. Rü chaxira Ngechuchuxü íyaxüchixüwa changu. ⁵ Rü ichayarümaxãchi na nagu chidaucuchixüçèx. Rü nüxü chadau ga naxchiru ga namaã yanáixpüxügüãxü ga yexma na naxüxü. Natürü tama aixepegu chaxücu. ⁶ Rü choweama ínangu ga Chimáü ga Pedru. Rü nüma rü yema naxmaxügu naxücu. Rü nüma rü ta nüxü nadau ga yema naxchiru ga namaã yanáixpüxüchiréxü. ⁷ Rü nüxü nadau ta ga naxchiru ga namaã yanéixèrugüãxü ga meãma dixcumüxü ga nüxrüguma üxü. Rü tama wüxigu namaã nanu ga yema naxchiru ga namaã yanáixpüxügüãxü. ⁸ Rü yexguma ga choma ga chaxiraxüchi yéma na changuxü, rü choma rü ta chixücu. Rü nüxü chadau ga guxüma, rü chayaxõ ga Ngechuchu rü marü wena na namaxüxü. ⁹ Yerü noxri rü tama nüxü tacuèxgüéga ga yema Tupanaärü ore ga ümatüxü ga ñaxü: “Cristu rü tá wena namaxü”, ñaxü. ¹⁰ Rü yexguma ga toma rü tochiüçèx tawoegu.

*Ngechuchu rü ngíxcèx nangox ga María ga Magadácüãx
(Mt 16.9-11)*

¹¹ Natürü ga María rü yexma irüxãüx naxütagu ga Ngechuchumaxü. Rü yéma ixaxu. Rü naxauxãcüma iyarümaxãchi, rü nagu iyadaucuchi ga naxmaxü. ¹² Rü nüxü idau ga taxre ga daxüçüãx ga Tupanaärü orearü ngeruügü ga icómüchiruxü. Rü Ngechuchuxüne ixüchiréxüwa narütogü, rü wüxi ga Ngechuchueru ixüxüwaama rü to ga nacütawaama. ¹³ Rü yema daxüçüãx ga duüxügü rü ngíxna nacagüe, rü ñanagürügü: —Pa Ngeçüx, çtacüçèx cuxaxu? —ñanagürügü. Rü ngíma rü inangãxü, rü ngígürügü: —Chaxaxu erü nayangegü i naxüne ya chorü Cori, rü tama nüxü chacuèx na ngexta naxügüãxü —ngígürügü. ¹⁴ Rü yexgumatama yema ngíxgu, rü ngígüweama idau. Rü nüxü idau ga Ngechuchu ga ngíxütawa na nayexmaxü. Natürü tama nüxü icuèx ga Ngechuchu na yíxü ga guma. ¹⁵ Rü yexguma ga Ngechuchu rü ngíxna naca, rü ñanagürü: —Pa Ngeçüx, çtacüçèx cuxaxu? ¿Rü texécèx nixí i cudauxü? —ñanagürü. Rü ngíma nüxü nacuèxgu rü yema nixí ga yema nanetüncüarü dauruü. Rü yemacèx ngígürügü nüxü: —Pa Corix, ega cuma cuyangexgu i naxüne ya Ngechuchu, rü ¡chomaã nüxü ixu na ngexta na cunaxüxü na choma chayayaxuxüçèx! —ngígürügü. ¹⁶ Rü yexguma ga Ngechuchu rü ñanagürü ngíxü: —Pa Maríax —ñanagürü. Rü ngíma rü naxcèx idaueguãchi, rü togawa ngígürügü nüxü: —Pa Rabunix —ngígürügü. Rü ngëma rü “Pa Ngúexëëruüx”, ñaxüchiga nixí. ¹⁷ Rü Ngechuchu rü ñanagürü ngíxü: —¡Tãxü i choxü quingögüxü, erü tauta Chaunatüxütawa chaxü! ¡Natürü ngëma chaueneëgütanüwa naxü rü namaã nüxü yarüxu na choma rü tá Chaunatü ya chorü Tupana ya Penatü ya perü Tupanaxütawa chaxüxü! —ñanagürü. ¹⁸ Rü yexguma ga María ga Magadácüãx rü tomaã nüxü iyarüxu ga marü nüxü na nadauxü ga Cori ga Ngechu-chu. Rü ñuxüchi tomaã nüxü iyaxu ga yema ore ga Ngechuchu ngímaã nüxü ixuxü.

*Norü ngúexügüçèx nangox ga Ngechuchu
(Mt 28.16-20; Mr 16.14-18; Lc 24.36-49)*

¹⁹ Rü yema yüxüarü ngunexüärü chütacü, rü tangutaquëxegü ga toma ga Ngechuchuarü ngúexügü. Rü togü tarüwãtaügü, yerü yema Yudíugüarü äëxgacügüxü tamuë. Rü Ngechuchu rü ngürüãchi yéma nangox, rü torü ngãxütanügu nachí. Rü toxü narümoxë, rü ñanagürü: —¡Petaãëgü! —ñanagürü. ²⁰ Rü yema ñaxguwena rü toxü nügü nawémëx, rü nügü inawépacütüxü. Rü tomagü ga norü ngúexügü rü tataãëgü, yerü nüxü tadaugü ga guma torü Cori. ²¹ Rü yexguma rü wenaxãrü ñanagürü toxü: —¡Petaãëgü!

Rü yema Chaunatü núma choxü na muxürüü tátama nixĩ i pexü chamuxü i chomax —ñanagürü. ²² Rü yexguma rü toétü “cue” ñanagürü ga Ngechuchu. Rü ñuxüchi ñanagürü toxü: —¡Penayauxgü i Tupanaãe i Üünexü! ²³ Rü ngëxguma duüxügü nüxü rüxoegu i norü pecadugü, rü pema rü pexü nangëxma i pora na namaã nüxü pixuxü na Tupana marü nüxü nüxü rüngümaxü i norü pecadugü. Natürü ngëxguma duüxügü tama nüxü rüxoegu i norü pecadugü, rü pema rü pexü nangëxma i pora na namaã nüxü pixuxü na marü ngëma norü pecadugüwatama nangëxmagüxü —ñanagürü ga Ngechuchu.

Tumachi nüxü nadau ga Cori ga wena maxücü

²⁴ Natürü totanüxü ga Tumachi ga Wüxigu Buexümaã taxugüxü, rü tama totanüwa nayexma ga yexguma Ngechuchu toxçèx ngoxgu. ²⁵ Rü yixcama ga toma rü Tumachi-maã nüxü tixugüe, rü ñatarügügü: —Marü nüxü tadau ya tórü Cori ya Ngechuchu —ñatarügügü. Natürü ga Tumachi rü toxü nangäxü rü ñanagürü: —Ngëxguma tama nüxü chadëuxgu i norü itapuamaxü i naxmëxwa rü tama nüxü chingögügu i ngëma itapuamaxü rü ngëma norü cana-pacütüxü, rü täütáma chayaxõ i ngëma ore i chomaã nüxü pixuxü —ñanagürü. ²⁶ Rü 8 ga ngunexüguwena rü wenaxärü tangutaquëxegü ga toma ga wüxi ga İpatawa. Rü totanüwa nayexma ga Tumachi ga yexguma. Rü woo ga na nawãtaxü ga İax, rü ngürüäch i yéma nangox ga Ngechuchu, rü torü ngäxütanügu nachi. Rü toxü narümoxë, rü ñanagürü: —¡Petaãëgü! —ñanagürü. ²⁷ Rü yexguma Tumachixü ñanagürü ga Ngechuchu: —¡Nüxü ingögü i ñaã chorü itapuamaxü i choxmëxwa ngëxmaxü, rü nüxü nadau ya daa choxmëx! ¡Rü nuxa chorü canapacütüxügü ingögü! ¡Rü nüxü rüxo na tama cuyaxõxü! ¡Rü meãma yaxõ i ñuxmax! —ñanagürü. ²⁸ Rü yexguma ga Tumachi rü Ngechuchuxü nangäxü, rü ñanagürü: —Pa Chorü Corix, cuma nixĩ i chorü Tupana quiixü —ñanagürü. ²⁹ Rü Ngechuchu rü ñanagürü nüxü: —Pa Tumachix, cuma cuyaxõ i ñuxma erü choxü cudau. Natürü tataãëgü ya yixema tama choxü daugüãcüma yaxögüxe —ñanagürü.

Tacüçèx naxümatü i ñaã popera

³⁰ Rü Ngechuchu rü topëxewa nanaxü ga muxüma ga to ga mexügü ga cuëxruügü i tama ñaã poperagu ümatüxü. ³¹ Natürü guxüma i ñaã poperagu ümatüxü, rü naxümatü na peyaxögüxüçèx na Ngechuchu rü Cristu ya Tupana Nane na yiixü. Rü ngëxguma nüxü peyaxögügu rü tá pexü nangëxma i maxü i taguma gúxü.

21

Ngechuchu rü 7 ga norü ngüexügüçèx nangox

¹ Rü yemawena ga Ngechuchu rü wenaxärü toxçèx nangox naxtaxa ga Gariréaanacüwa. Rü Tibéria nixĩ ga to ga naega. Rü ñaãcü nixĩ ga toxçèx nangóxü. ² Rü wüxiwa tayexmagü ga choma rü Chaütiágu ga Zebedeu nanegü rü Chimáü ga Pedru, rü Tumachi ga Wüxigu Buexümaã taxugüxü, rü Natanae ga Gariréaanegune ga İane ga Canácüax, rü to ga taxre ga tomücügü ga Ngechuchuarü ngüexügü. ³ Rü Chimáü ga Pedru rü ñanagürü toxü: —Tá chayapüchae —ñanagürü. Rü yexguma ga toma rü tanangäxügü, rü ñatarügügü nüxü: —Toma rü tá ta cuwe tarüxĩ —ñatarügügü. Rü yéma taxĩ, rü wüxi ga ngegu tichoü. Natürü yema chütaxügu rü taxuüma ga choxni tiyauxgü. ⁴ Rü yexguma noxri yangóonegu rü Ngechuchu toxçèx nangox ga naxtaxaanacüwa. Natürü ga toma rü tama nüxü tacüexgü ga Ngechuchu na yiixü. ⁵ Rü yexguma ga Ngechuchu rü toxna naca, rü ñanagürü toxü: —Pa Ngextüxücügüx, ¿éxna taxuüma i choxni piyauxgü? —ñanagürü. Rü toma rü tanangäxügü rü ñatarügügü: —Taxuüma —ñatarügügü. ⁶ Rü yexguma ga Ngechuchu rü ñanagürü toxü: —¡Peweüärü tügüncëwawaama penatáe i perü pücha! rü tá İpenayauxü i choxni —ñanagürü. Rü yémaãma tanatáegü ga torü pücha, rü taxucürüwa İtanatüächigü, yerü muxüchixü ga choxni tiyauxgü. ⁷ Rü yexguma ga choma rü Pedruxü ñacharügü: —Yima nixĩ ya Cori ya

Ngechuchu —ñacharügü. Rü yexguma yemaxü naxĩnügu ga Pedru ga guma na yĩxü ga Cori, rü nicuxcuchi ga naxchiru yerü noxri rü ínacuxuchichirêx. Rü natüchiüwa nayuxu, rü naxānacüwa naxcèx nawêxê. ⁸ Rü toma ga natanüxü rü nguemaātama naxānacüwa taxāgü. Rü yéma tanatügü ga yema pücha ga choxnimaā āācuxü yerü 100 metruxicatama nataxu ga na naxānacüwa na tangugüxü. ⁹ Rü yexguma nguewa ítachoügu rü yéma nüxü tadau ga wüxi ga üxü, rü naxêtügu naxü ga wüxi ga choxni. Rü yéma nayexma ta ga wüxi ga pāü. ¹⁰ Rü Ngechuchu rü ñanagürü toxü: —¡Nuāta penge i ñuxre i ngēma choxni i ípeyauxüxü! —ñanagürü. ¹¹ Rü Chimáü ga Pedru rü nguengu nixüe. Rü yema püchamaā naxnücügu ínanatúāchiwetaü ga choxni ga ínayauxüxü. Rü 153 ga choxni ga itaxü nayexma nawa ga yema pücha. Rü woo ga na namuxüchixü, rü tama narügáu ga pücha. ¹² Rü yexguma ga Ngechuchu rü ñanagürü toxü: —¡Nuā pexĩ rü peyachibüe! —ñanagürü. Rü taxüema ga toma rü nüxna tacaxchaü na texé yĩxü ga nümax, yerü marü nüxü tacuèxgü ga guma na yĩxü ga Cori ga Ngechuchu. ¹³ Rü yexguma ga Ngechuchu rü yéma toxütawa naxü. Rü nanayaxu ga pāü rü wüxichigü toxna nanaxā. Rü yexgumarüü ta ga choxni rü toxna nanaxā. ¹⁴ Rü yema nixĩ ga norü tomaēxpüxcüna ga toxcèx na nangóxü ga Ngechuchu ga yuwa ínadxguwena.

Ngechuchu rü Pedrumaā nidexa

¹⁵ Rü yexguma chibüewa tingugüguwena rü Ngechuchu rü Chimáü ga Pedruna naca, rü ñanagürü: —Pa Chimáü Pa Cuáü Nanex, ¿aixcüma choxü cungechaüxü i ñaā cumücügüxü na cungechaüxüärü yexera? —ñanagürü. Rü Pedru nanangāxü, rü ñanagürü: —Ngü, Pa Corix, cuma nüxü cucuèx na cuxü changechaüxü —ñanagürü. Rü Ngechuchu rü ñanagürü nüxü: —¡Nachibüexêê i chorü duüxügü! —ñanagürü. ¹⁶ Rü wenaxärü Pedruna naca, rü ñanagürü: —Pa Chimáü Pa Yoná Nanex, ¿aixcüma i choxü cungechaüxü? —ñanagürü. Rü Pedru nanangāxü, rü ñanagürü: —Ngü, Pa Corix, cuma nüxü cucuèx na cuxü changechaüxü —ñanagürü. Rü Ngechuchu rü ñanagürü nüxü: —Ëcü, ¡nüxna nadau i chorü duüxügü! —ñanagürü. ¹⁷ Rü norü tomaēxpüxcüna wenama Pedruna naca, rü ñanagürü: —Pa Chimáü Pa Yoná Nanex, ¿aixcümāxüchi yĩxü i choxü cungechaüxü? —ñanagürü. Rü yexguma ga Pedru rü düxwa nangechaü, yerü norü tomaēxpüxcüna Ngechuchu nüxna naca ngoxi aixcüma nüxü nangechaü. Rü ñanagürü ga Pedru: —Pa Corix, cuma nüxü cucuèx i guxüma. Rü cuma nüxü cucuèx na aixcümāxüchi cuxü changechaüxü —ñanagürü. Rü Ngechuchu ñanagürü nüxü: —Ëcü ¡nachibüexêê i chorü duüxügü! ¹⁸ —Rü aixcüma cumaā nüxü chixu rü yexguma cunxextüxügu rü cugü quicuxcuchi ga na ngextá cuma ícunaxwèxexüwa cuxüxcèx. Natürü ngèxguma yaguāx quixĩgu rü tá quixuuchiacüü na togue cuxü icuxcuchixüxcèx. Rü ngēma tama cuma ícunaxwèxexüwa tá cuxü nagagü —ñanagürü. ¹⁹ Rü Ngechuchu rü yema ñanagürü na nüxü nüxü nacuèxêêxüxcèx ga ñuxācü tá na nayuxü ga Pedru na yemaācü Tupanaxü nataxêêxüxcèx. Rü yemawena ga Ngechuchu rü ñanagürü nüxü: —¡Chowe rüxü! —ñanagürü.

Yema ngüexü ga Ngechuchu poraācü nüxü ngechaüxüchiga

²⁰ Rü yexguma nügüweama nadèuxgu ga Pedru rü choxü nadau ga naweama na ne chaxüxü. Rü chomachirêx nixĩ ga chibüwa Ngechuchucüwawa charütoxü rü nüxna chaçaxü rü ñachaxü:

“Pa Corix, ¿texé tá tixĩ ya yixema bexma cuechita cuxü íxuaxüxê?” ñachaxü. ²¹ Rü yexguma Pedru choxü dèuxgu rü Ngechuchuna naca, rü ñanagürü: —Pa Corix, ¿ñaā Cuáü rü tacü tá nüxü üpetüxü? —ñanagürü. ²² Rü Ngechuchu nanangāxü, rü ñanagürü nüxü: —Ngèxguma choma chanaxwèxegu rü chanamaxêê ñuxmatáta wena núma chaxü. ¿Rü tüxcüxü i nagu curüxĩnüxü i ngema? Rü cuma ¡rü chowe rüxü! —ñanagürü. ²³ Rü yexguma yema chomücügü nüxü ínüegu ga yema chauchiga, rü nagu narüxĩnüe na

taxūtáma chayuxŭ. Natürü Ngechuchu rü tama nüxŭ nixu ga tãxūtáma na chayuxŭ. Natürü ñanagürümare:

“Ngëxguma choma chanaxwèxegu rü chanamaxëë ñuxmatáta wena núma chaxŭ. ¿Rü tüxcüxŭ i nagu curüxñüxŭ i ngëma?”, ñanagürümare. ²⁴ Rü chomatama nixĩ ga nüxŭ chadauxŭ i guxŭma i ñaã pemaã nüxŭ chixuxŭ, rü chomatama nixĩ i pexcèx chanaxümatüxŭ i ñaã ore. Rü guxãma i toma rü nüxŭ tacuèx na aixcüma na yïxŭ i ñaã pemaã nüxŭ chixuxŭ. ²⁵ Rü nayexma ga to ga muxŭchixŭma ga tacü ga Ngechuchu üxŭ. Rü ngëxguma chi naxümatügu i guxŭma ga yema naxüxŭchiga, rü nagu charüxñügu rü tãŭ chima ñoma i naãnegu name i ngëma poperagü i nachiga ümatüxŭ.

NGECHUCHUARÜ NGÚEXÜGÜ GA YAMUGÜXÜÄRÜ PURACÜCHIGA

Tupana inaxuneta rü tá ínangu i Naãe i Üünexü

1-2 Pa Mecü Pa Teóquirux, nüxïra chaxümatüxü ga poperawa cumaã nüxü chixu ga guxüma ga Ngechuchu üxü rü duüxügüxü namaã nangúexëexü ga noxritama inaxügüägu ga norü puracü ñuxmata yema ngunexü ga Tupana daxügüxü ga naãnewa nagaxgu. Rü yexguma tauta daxügüxü ga naãnewa naxüxgu ga Ngechuchu rü nayadexechi ga norü ngúexügü ga yamugüchaüxü na Tupanaärü puracü naxügüxüçex. Rü Tupanaãe i Üünexüärü poramaã nanangúexëe ga yema duüxügü, rü namaã nüxü nixu ga tacü tá na naxüexü. ³ Rü yexguma marü yuwa ínadxëguwena ga nüma ga Ngechuchu rü 40 ga ngunexügu rü nügü nangoxëexü naxcëx ga norü ngúexügü rü muxüma ga togü ga nüxü yaxögüxü na yemaãcü nüxü nacüexgüxüçex na aixcüma wena namaxüxü. Rü namaã nüxü nixuchiga na ñuxäcü na yixïxü i Tupana äëxgacü íyixïxüwa. ⁴ Rü yexguma yema ngúexügü ga yamugüxütanüwa nayexmagu ga Ngechuchu, rü namaã nüxü nixu ga tama nüxna na ngextá naxïxüçex ga Yerucharéü. Rü ñanagürü nüxü: —Ípenangüxëex i ngëma Tupanaãe i Üünexü ga Chaunatü pemaã ixunetaxü ga pemaã nüxü chixuchigaxü! ⁵ Aixcüma nixï ga Cuáü rü dexáwa duüxügüxü ínabaiüxëexü, natürü i pema rü täütáma muxü i ngunexü nangupetü na Tupanaãe i Üünexü tá pexna nguxü —ñanagürü.

Daxügüxü ga naãnewa naxü ga Ngechuchu

⁶ Rü yexguma nangutaquëxëgüga ga yema norü duüxügü, rü Ngechuchuna nacagü, rü ñanagürügü: —Pa Corix, ¿éxna ñoma tá nixï i ngunexü i marü ícunawoxü i nuã Yudíugüchiüãnewa i torü uwanügüarü churaragü na wenaxärü tomatama namaã itacuáxüçex i ñaã tochiüãne? —ñanagürügü. ⁷ Rü Ngechuchu nanangäxü, rü ñanagürü: —Pema rü taxucëxma nüxü pecuáxchaü i ñuxgu tá nixï i ngëma ngunexü, erü Chau-natüxicatama nüxü nangëxma i pora na nüxü naxunetaxü i ngëma ngunexü i choxna naxcëx peçaxü. ⁸ Natürü ngëxguma pexna nanguxgu i Tupanaãe i Üünexü, rü tá pexü naporaexëe. Rü tá ípechoxü na nüxü peyarüxügüexüçex i chauchiga i Yerucharéüwa, rü guxüma i Yudeáanewa, rü Chamáriaanewa, rü ñuxmatáta guxü i naãnewa nangu —ñanagürü. ⁹ Rü yexguma yema ñaxguwena rü nüxü ínadaunüyane ga norü ngúexügü, rü Tupana rü daxügüxü ga naãnewa Ngechuchuxü naga. Rü wüxi ga caixanexügu nayaxücu, rü yemaãcü tama wenaxärü nüxü nadaugü. ¹⁰ Rü yexguma Ngechuchuxü ínadaunüyane ga daxüwa na naxüxü, rü ngürüächi natanüwa nangox ga taxre ga yatü ga icómüchiruxü. ¹¹ Rü ñanagürügü nüxü: —Pa Yatügü i Gariréaanecüäx, ¿tüxcüü daxügu íperüdaunü? Erü daatama Ngechuchu ga petanüwa yexmacü rü ñuxma Tupana daxüwa nagacü, rü ngëma ñuxma nüxü na pedauxü na ñuxäcü daxüwa naxüxü, rü ngëmaãcü tátama nixï i wena núma naxüxü —ñanagürügü.

Yudachicüü nanayauxgü ga Matía

¹² Rü yema ngúexügü ga Ngechuchu imugüxü na Tupanaärü puracü naxügüxüçex, rü nüxna ínixï ga guma mëxpüne ga Oríbunecügu äegane. Rü Yerucharéüçex nawoegu. Rü guma ñanearü yaxü nüxna ga guma mëxpüne rü wüxi ga kilómetru nixï. ¹³ Rü yexguma Yerucharéüärü ñanewa nangugügu, rü nagu nachocu ga guma í ga nagu napegüne. Rü dauxna naxïgü naxcëx ga yema ucapu ga taxü ga nagu napegüxü. Rü nümagü nixï ga Pedru, rü Cuáü, rü Chaütiágu, rü Aüdré, rü Piripi, rü Tumachi, rü Baturumé, rü Mateu, rü Chaütiágu ga Arupéu nane, rü Chimáü ga Ipóraãecüücü, rü

Yuda ga Chaŭtiágu naēneē. ¹⁴ Rū guxūma ga nūmagü rü guxūguma nangutaquēxegūxū na wūxigu nayumūxēgūxūcèx namaã ga Ngechuchueneēgü, rü ngīmaã ga María ga Ngechuchu naē, rü ñuxre ga togü ga ngexūgü. ¹⁵ Rū guxūma ga yema ngunexūgügu rü nangutaquēxegūxū ga yema yaxōgūxū. Rū 120 nixī. Rū wūxi ga ngunexūgü ga Pedru rü inachi ga norü ngāxūtanūwa, rü ñanagürü: ¹⁶ —Pa Chomücügüx, marü ningu ga yema Tupanaãe i Üünexū nuxcūma Dabíxū muxū na naxūmatüāxūcèx nachiga ga Yuda ga namaārü cuèxruū ixīxū naxcèx ga yema duūxūgü ga Ngechuchuxū iyaxgūxū. ¹⁷ —Rū tatanūxūchirēx nixī ga Yuda, rü nūma rü ta taxrūū ñaã Tupanaārü puracüwa napuracü ga noxrix. ¹⁸ —Natürü nūma ga Yuda rü bexma Ngechuchuxū ínaxuaxū. Rū yemacèx ga āēxgacügü rü nüxū nanaxūtanü. Natürü yixcama ga Yuda rü naxcèx ínicuèx ga yema chixexū ga naxūxū, rü yemacèx nanataeguxēē ga yema dīeru. Rū yemawena rü nügü nawēxnaxā rü nañtanūwa nügü narütáe. Rū yexguma duūxūgü nadaexūgügu rü inanago, rü niwāīxpütüwe rü ínayixū ga nañnūta. Rū yema dīeru ga nataeguxēēxūmaã ga āēxgacügü rü naxcèx nataxe ga wūxi ga naāne. ¹⁹ —Rū nüxū nacuáchigagü ga guxūma ga Yerucharéüçüāx, rü yemacèx Achédamagu nanaxüéga ga yema naāne. Rū ngēma nixī i “Nagüchitaū” ñaxūchiga. ²⁰ —Rū Wiyaegüarü poperawa yemachiga nanaxūmatü ga Dabí, rü ñanagürü:

“Yixrūma rü ngēma natá ya napata, rü taxúema nagu pe”,
ñanagürü. Rū toxnamana i ngēma poperawa rü ñanagürü ta:

“Rü name nixī na togue naxūxū i ngēma norü puracü”,

ñanagürü. ²¹⁻²² —Rü nuã tatanūwa nangēxmagü i ñuxre i yatügü ga guxūguma tüxū ümücügüxū ga yexguma tatanūwa nanuxmagu ga Cori ga Ngechuchu. Rū nūmagü rü tawe narüxī ga noxritama Cuáū Ngechuchuxū íbaiexēēgu rü ñuxmata yema ngunexū ga daxūguxū ga naānewa naxūxgu. Rū name nixī i ngēmatanūwa na nayaxuxū i wūxi i Yudachicüüxū na tamücü yīixūcèx rü tarüū nüxū yaxuxūcèx i ñuxácü wena na namaxūxū ya Ngechuchu. ²³ Rū yemawena rü nüxū naxunetagü ga taxre ga yatügü. Rū wūxi nixī ga Yúche ga Yuchugu āegaxū ga Bachabámaã naxugūxū. Rū Matía nixī ga to. ²⁴⁻²⁵ Rū ñaãcü nayumūxēgü: —Pa Corix, cuma nüxū cucuèx i guxūma i duūxūgüarü maxū. ¡Rü ñuxma rü toxū nawēx i ngēxūrüüxū i cuxcèx mexū i ñaã taxrewa na cunamuxūcèx rü nūma na naxūāxūcèx i ñaã puracü ga Yuda ítáxū ga yexguma norü poxcuwa naxūxgu! —ñanagürügü. ²⁶ Rū wūxi ga dīeru ga cuèxruū ngīxū nañanagügü na yemawa nüxū nacuèxgūxūcèx ga ngēxūrüüxū ga yema taxre tá na ixúcuxū. Rū Matíagu nangu na yangucuchixūcèx. Rū yexgumatama rü yema 11 ga duūxūgü ga Ngechuchu imugūxūtanügu naxā ga Matía.

2

Ínangu ga Tupanaãe i Üünexū

¹ Rū nawa nangu ga yema Yudíugüarü peta ga Pētecóstege āegaxū. Rū yema ngunexūgu rü guxūma ga yema yaxōgūxū rü wūxi ga nachicawa nangutaquēxegü. ² Rū ngürüāchi daxūwa ne naxū ga wūxi ga naga ñoma wūxi ya buanecü ya taxūchicü icuxcugurū, rü guxūne ga guma í ga nawa nayexmagünegu nayaxūga. ³ Rū naxcèx nangox ga üxüema ga ñoma naconügüraūxū. Rū yema üxüema rü nügüna nixīgü, rü wūxichigü ga yema yaxōgūxūna ninguchigü. ⁴ Rū guxūma ga yema yexmagūxū rü Tupanaāxē ga Üünexū nüxna nangu. Rū yema Naãe i Üünexū yadexagüxēēxūācūma inanaxügüe ga to ga nagawachigü na yadexagūxū. ⁵ Rū yema ngunexūgügu rü yema petacèx Yerucharéüwa nayexmagü ga muxūma ga toxnamana ne íxū ga Yudíugü ga Tupanaga ínüexū ga guxū ga togü ga nachiiānewa ne íxū. ⁶ Rū yexguma nüxū naxīnūēgu ga ñuxácü na yadexagūxū ga yema yaxōgūxū, rü nangutaquēxegü ga muxūma ga yema duūxūgü ga toxnamana ne íxū. Rū nabaixāchiāēgü yerü yema yaxōgūxū rü wūxichigü ga yema

togü ga duüxügügawachigü nidexagü. ⁷ Rü yema na poraäcü nabaixächiaãëgüxüçèx, rü nügümaã rü ñanagürügü: —¿Tama êxna Gariréaanecüãx yixigüxü i guxü i ñaã duüxügü i tagawa idexagüxü? ⁸—¿Rü ñuxäcü êxna i nüxü ixĩnüëxü i wüxichigü i yixema i taga i nawa iyaexüwa na yadexagüxü? ⁹⁻¹¹ —Yixema tixigü i Pártiaanecüãx, rü Médiaanecüãx, rü Eraüãanecüãx, rü Mechopotámiããanecüãx, rü Yudéaanecüãx, rü Capadochíaanecüãx, rü Põtuaneüãx, rü Áchiaarü naãanecüãx, rü Piríquiaanecüãx, rü Paüpíriaanecüãx, rü Equituarü naãanecüãx, rü Díbiaarü naãanecüãx i Chireneüãx. Rü tatanüwa nangëxma ta i duüxügü i Crétaanewa rü Arábíaarü naãanewa ne íxü. Rü ñuxre i yixema rü Dumacüãx i Yudíugü tixigü. Rü nuã tatanüwa nangëxma ta i Dumacüãx i tama Yudíugü ixigüxü natürü tacümagu íxü. Rü guxãma rü nüxü taxĩnüë na wüxichigü i tagawachigü na yadexagüxü i ñaã ngüexügü. Rü tagawa tamaã nüxü nixugüe i ñuxäcü na namexëchixü ya Tupana —ñanagürügü. ¹² Rü guxüma poraäcü nabaixächiaãëgü, rü tama nüxü nacüëxgü ga ñuxäcü na yixü ga yema. Rü nügüna nacagüe, rü ñanagürügü: —¿Tacüchiga nixi i guxüma i ñaã? —ñanagürügü. ¹³ Natürü ga togü rü nüxü nacugüecüraxü, rü ñanagürügü: —Nangãëmare rü ngëmacèx nixi i ngëmaäcü yadexagüxü —ñanagürügü.

Pedruarü dexa

¹⁴ Rü yexguma inachi ga Pedru namaã ga yema 11 ga namücügü, rü tagaäcüma ñanagürü: —Pa Yudíugü i nuxma Yerucharéügu naxiãanexü rü Pa Nuãcüãxgüx, ¡rü dücax, meã iperüxĩnüë i ñaã tá pemaã nüxü chixuxü! ¹⁵ —Rü ñaã chomücügü rü tama nangãxë i pema nagu perüxĩnüëürüü, erü pëxmamatama nixi rü ngexwacèx 9 arü orawa nangu. ¹⁶ —Natürü ñaã ñuxma nüxü pedauxü nixi ga yema Tupanaärü orearü uruü ga Yoé marü nüxü ixuchigaxü ga yexguma ñaxgux:

¹⁷ “Rü ñanagürü ya Tupana: ‘Ngëma nawa iyacuáxü i ngunexügügu rü guxü i duüxügütanüwa tá chanamu i Chauãë i Üünexü, rü penegü rü pexacügü rü tá chauchigagu nidexagü. Rü choma rü tá chayangoxetüxëë i perü ngextüxüxügü rü tá nüxü nadaugü i ngëma tá nüxü chawéxü. Rü perü yaguãxgümaã tá chidexa i nanegüwa. ¹⁸ Rü chorü duüxügütanüwa tá chanamu i Chauãë i Üünexü i ngëma ngunexügügu, rü tá chauchigagu nidexagü. ¹⁹ Rü naãnetüwewa tá ichanawëx i mexügü i taguma nüxü idauxü. Rü ñoma i naãanewa tá ichanawëx i cuëxruügü i nagü, rü üxüema, rü taemaxü. ²⁰ Rü üëxcü rü tá nixoema rü tauemacü rü tá nagürüü naduema naxüpa na wenaxärü núma naxüxü ya Cori. Rü ngëma ngunexü i nagu núma naxüxü, rü wüxi i ngunexü i mexëchixü tá nixi. ²¹ Rü guxãma ya yixema Corina çaxe na tüxü nangüxëëxüçèx, rü tá tamaxë’ ”,

ñanagürü ga yema orewa. ²² Rü ñanagürü ga Pedru: —Pa Duüxügü Pa Yudíugüx, ¡iperüxĩnüë i ñaã ore! Rü pema rü meãma nüxü pecüëx rü Ngechuchu ga Nacharétucüãx rü guma nixi ga wüxi ga yatü ga Tupana pepëxewa nüxü yaxücü na Nanexüchi yixü. Rü yemacèx ga Tupana rü norü poramaã nüxü nanaxüxëë ga muxüma ga mexügü rü cuëxruügü ga noxri taguma nüxü idauxü. ²³ —Rü Tupana pexna nanamu ga guma Ngechuchu na pecaducèx nayuxüçèx yerü yemaäcü nanaxüxchaü ga Tupana, rü yemaäcü nagu narüxĩnü ga noxri tauta naxüxgux ga naãne. Rü pema penamu ga yatügü ga tama yaxögüxü na yayauxgüãxüçèx rü curuchawa na yapotagüãxüçèx. Rü yemaäcü penayuxëë. ²⁴ —Rü woo nayuchirëx natürü tama yexma nayacuëx, yerü Tupana wena nanamaxëë rü ínanadaxëë. Rü yemaäcü ga yema yu rü taxuacüma marü nüxü narüporamaëëcha. ²⁵ —Yerü ga ãëxgacü ga Dabí rü Ngechuchuchigagu nidexa, rü ñanagürü:

“Guxüguma nachauxütagu ya Cori ya Tupana rü choxü narüngüxëë na taxucèxma chaxoegaãëxüçèx. ²⁶ Rü yemacèx marü chataãë rü taãëxü ga oremaã chidexa. Rü choma nüxü chacüëx na mexü tá choxü üpetüxü i ngëxguma chayuxgux. ²⁷ Erü cuma täütáma yuexüchicawa choxü cutèx, rü täütáma cunaxwëxe na yayixixü i

chaxune i choma ya Cune ya Üünecü na chiixü. ²⁸ Marü choxü nüxü cucuèxëë i ñuxäcü tá chanayaxu i maxü i taguma gúxü, rü tá poraäcü choxü cutaäëxëë, erü chomaä tá icurüxäüx”,

ñanagürü ga Dabí. ²⁹ Rü ñanagürü ga Pedru: —Pa Chaueneëgüx, rü aixcüma pemaä nüxü chixu na nayuxü ga nuxcümaücü ga tórü äëxgacü ga Dabí, rü marü inatëx, rü ñuxma rü ta tatanüwa nangëxma i naxmaxü. ³⁰ —Natürü nüma ga Dabí rü wüxi ga Tupanaärü orearü uruü nixí. Rü yemacëx nüxü nacuèx rü wüxi ga nataa tá nixí i äëxgacü ya Cristuxü ingucuchicü, yerü ga Tupana rü yemaäcü namaä inaxuneta. ³¹ —Rü yemacëx nuxcümaxüchima ga Dabí rü ñoma marü nüxü nadauxuchixürü nüxü nixu rü Cristu rü tá yuwa ínarüda rü täütáma naxmaxüwa nangëxmaëcha rü täütáma niyixi i naxüne. ³² —Rü ñuxma ya Tupana rü marü wena nanamaxëë ga guma Ngechuchu, rü guxäma ga toma rü nüxü tadaugü na wena namaxüxü, rü ngëmacëx pemaä nüxü tixuchiga. ³³ —Rü Tupana rü daxüguxü ga nañnewa nanaga na norü tügünecüwawa yanatoxüçëx. Rü Tanatü ya Tupana rü marü nüxna nanamu ga Naäë i Üünexü ga nuxcüma nüxü yaxuxü rü tá nuä na namuäxü. Rü ñuxma ya yima Ngechuchu rü núma totanüwa nanamu i ngëma Naäë i Üünexü. Rü ngëma Naäë nuä üxü nixí i ñuxma nüxü pedauxü rü nüxü pexínüëxü. ³⁴⁻³⁵ —Rü taguma daxüwa naxü ga Dabí, natürü nümatama rü ñanagürü:

“Tupana rü chorü Cori ya Cristumaä nüxü nixu rü ñanagürü: ‘¡Rü chorü tügünecüwawa rüto ñuxmatáta cuxmëxwa chanangëxmagüxëë i curü uwanügü!’ ”

ñanagürü. ³⁶ Rü ñanagürü ga Pedru: —Name nixí i guxäma i pema i Yudiügü na nüxü pecuëxgüxü rü guma Ngechuchu ga curuchawa peyapotacü, rü Tupana rü marü perü Cori ya Cristuxü nayaxixëë —ñanagürü ga Pedru. ³⁷ Rü yexguma yemaxü naxínüëgu ga yema duüxügü ga yéma yexmagüxü, rü poraäcü nanaxixächiäëgü. Rü Pedruna nacagüe, rü yema togü ga Pedrumücügüna rü ta nacagüe, rü ñanagürügü: —¡Rü tacü tá taxüexü i ñuxmax, Pa Toeneëgüx? —ñanagürügü. ³⁸ Rü Pedru nanangäxü, rü ñanagürü: —¡Nüxü perüxoe i pecüma i chixexü rü Tupanacëx pedaugüe rü Ngechuchuégagu ípebaiü na pexü nüxü nangechaüxüçëx i perü pecadugü ya Tupana! Rü Tupana tá pexna nanamu i Naäë i Üünexü. ³⁹ —Rü ñaä Tupanaärü uneta, rü pexcëx nixí, rü pexacügüçëx, rü guxü i duüxügü i yaxüwa ngëxmagüxüçëx nixí. Erü guxü i duüxügü i tórü Cori ya Tupana nügüxütawa naxcëx çaxüçëx nixí i ngëma uneta —ñanagürü ga Pedru. ⁴⁰ Rü yema oremaä rü muxüma ga to ga oremaä nayaxucuxëgü ga Pedru, rü ñanagürü: —¡Nüxna pixígachi i ngëma duüxügü i chixexü ügüxü na pema rü ta tama chixexü pexügüxüçëx! —ñanagürü. ⁴¹ Rü yema duüxügü ga naga ñnüëxü ga yema ore ga Pedru namaä nüxü ixuxü, rü ínabaiü. Rü yema ngunexügu rü poraäcü nayexera ga na yamuxü ga yema yaxögüxü. Rü 3,000 ga duüxügü nixí ga Ngechuchuaxü yaxögüxü ga yexguma. ⁴² Rü yema yexwacëx yaxögüxü rü guxügüma inarüxínüë ga yema ngüexügü ga Ngechuchu imugüxüärü nguxëëtae. Rü meä nügümaä nangaugü ga norü yemaxügü. Rü guxügüma nayumüxëgüxü rü chibücëx nangutaquëxegüxü.

Yema yaxögüxü rü aixcüma nügü nangechaxügü

⁴³ Rü yema ngüexügü ga Ngechuchu imugüxü rü nanaxügü ga muxüma ga mexügü ga Tupanaärü poramaä naxügüxü. Rü yexguma yemaxü nadaugügu ga togü ga duüxügü, rü poraäcü nabaixächiäëgü ga guxüma. ⁴⁴ Rü guxüma ga yema yaxögüxü, rü wüxigu narüxínüë. Rü meä nügümaä nangaugü ga norü yemaxügü. ⁴⁵ Rü namaä nataxegüxü ga norü nañnegü rü guxüma ga togü ga norü yemaxügü. Rü nügümaä ngüxü nitoyegüxü ga yema díeru yexgumarüü na ñuxre natümawëxexü ga norü ñnatanü ga wüxichigü. ⁴⁶ Rü guxü ga ngunexügu tupauca ga taxünewa nangutaquëxegüxü, rü chibücëx nangutaquëxegüxü ga napatagüwa, rü taäëäcüma nügümaä nachibüexü. ⁴⁷ Rü guxügüma Tupanaxü nicuëxüügüxü. Rü guxüma ga yema íñecüäx rü nüxü nangechaügü ga yema yaxögüxü. Rü wüxichigü ga ngunexügu rü nimuëtanü ga duüxügü ga yaxögüxü, yerü

nūma ga Cori ga Ngechuchu rü nüxü narüngüxëê na nayauxgüãxücèx ga norü maxü i taguma gúxü.

3

Naxcèx nitaane ga wüxi ga yatü ga chixeparacü

¹ Rü wüxi ga ngunexügu ga Pedru rü Cuáü rü tomaëxpüxarü oragu ga yáuanecü rü tupauca ga taxünewa naxí, yerü yema nixí ga yumüxëârü ora. ² Rü yéma guma tupauca ga taxünewa nayexma ga wüxi ga yatü ga norü bucumatama chixeparacü. Rü guxü ga ngunexügu rü natanüxügü rü guma tupauca ga taxüneârü ìãx ga Mexëchixügu äegaxügu nayamugüxü, na dïêrucèx ínacáüxücèx nüxna ga duüxügü ga guma tupauca ga taxünegu chocuxüxü. ³ Rü yexguma Pedru rü Cuáüxü nadèuxgux ga tupauca ga taxünegu na nachocuxü, rü guma chixeparacü rü nüxü nawémëx rü dïêrucèx nüxna naca. ⁴ Rü Pedru rü Cuáü meâma nüxü narüdaunü, rü Pedru rü ñanagürü nüxü: — ¡Toxü nadawenü! —ñanagürü. ⁵ Rü nüma ga yatü rü nüxü nadawenü, yerü nüma nüxü nacuèxgu rü chi tacü nüxna naxägü. ⁶ Natürü ga Pedru rü ñanagürü nüxü: —Choxü nataxuma i dïêru. Natürü ngëma choxü ngëxmaxü tá cuxna chaxã. Rü naegagu ya Ngechuchu ya Cristu ya Nacharétucüãx cuxü chamu, rü jinachi rü ixü! —ñanagürü. ⁷ Rü yema ñaxguwena ga Pedru, rü norü tügünemëxëgu nayayauxãchi, rü inanachixëê, rü yexgumatama napora ga namëxtüxügüwa rü nacutügüwa. ⁸ Rü nayuxnagü rü inachi, rü inanaxügü na iyaxüxü. Rü nümatama iyaxüãcüma Pedru rü Cuáüwe tupauca ga taxünegu naxücu. Rü nanayuxnagüane rü Tupanaxü nicuèxüü. ⁹ Rü guxüma ga duüxügü nüxü nadaugü ga na íyaxüxü, rü Tupanaxü na yacuèxüüxü. ¹⁰ Rü poraãcü nañaxãchiãëgü ga duüxügü naxcèx ga yema nüxü ngupetüxü ga guma yatü. Yerü nüxü nacuèxgü ga na guma yíixü ga tupauca ga taxüneârü ìãx ga Mexëchixügu äegaxüwa rütooxüchirécü rü yéma dïêrucèx ícacü.

Tupaucacüwawa yexmaxü ga chopetüchica ga Charomóütarü Üpetüchicagu äëgaxüwa nidexa ga Pedru

¹¹ Rü guma chixeparachirécü ga marü naxcèx yataanecü, rü tama Pedru rü Cuáüna nixügachichaü. Rü guma tupauca ga taxüncüwawa nayexma ga wüxi ga chopetüchica ga “Charomóüârü Üpetüchicagu” äegaxü. Rü yema chopetüchicawa rü Pedru rü Cuáücèx naxítaquëxe ga guxüma ga duüxügü yerü poraãcü nañaxãchiãëgü. ¹² Rü yexguma Pedru nüxü dèuxgu ga yema duüxügü ga yéma naxcèx ìtaquëxegüxü, rü ñanagürü nüxü: —Pa Chautanüxügü i Yudíugüx, ¿Tüxcüü peñaxãchie namaã i ngëma ñaã yatümaã ngupetüxü? ¿Rü tüxcüü toxü perüdaunü ñoma torü poramaã rü torü mexümaã tanamexëëxürüü? ¹³ —Nuxcümaügücü ga tórü oxigü ga Abráü rü Ichaá rü Acobu rü togü ga tórü oxigü rü nüxü nayaxögü ga Tupana. Rü yimatama Tupana nixí ya ñuxma Ngechuchuxü taxëécü, na guxüârü yexera yíixücèx. Rü gumatama Ngechuchu ya Tupanaârü ngüxëëruü ixícü nixí ga pema äëxgacü ga Piratuxütawa penagagücü. Rü yexguma nüxü yangéxchaügu ga Piratu, rü pema rü tama penaxwèxegü ga na yangéãxü. ¹⁴ —Pema rü tama penaxwèxe ga na íanguxuchixü ga guma üüncü ga aixcüma mecü ga Ngechuchu, natürü naxcèx ípeca na pexcèx íanguxuchixëëãxücèx ga wüxi ga máëtaxü. ¹⁵ —Rü yemaãcü pematama peyamëxgü ga guma Ngechuchu ya tüxü maxëxëécü. Natürü ga Tupana rü wena nanamaxëê. Rü toma nixí ga nüxü tadaugüxü ga wena na namaxüxü. ¹⁶ —Rü ñaã yatü ga chixeparachiréxü i pema nüxü pedauxü rü nüxü pecuáxü rü marü naxcèx nitaane erü Ngechuchuaxü nayaxô. Rü ngëma Ngechuchuaxü na yaxôoxücèx nixí i naxcèx yataanexü ngëma ñuxma guxãma i pema nüxü pedauxürüü. ¹⁷ —Rü dücax i ñuxma Pa Chaueneëgüx, rü yexguma pema rü wüxigu perü äëxgacügümaã peyamëxgügu ga Ngechuchu, rü tama nüxü pecuèxgü ga tacü na pexüexü. ¹⁸ —Natürü ga Tupana

rü yemaãcü nayanguxẽẽ ga yema uneta ga nuxcüma nümatama nüxũ yaxuxũ nawa ga guxũma ga norü orearü uruũgü. Yerü yema norü ore ga ümatüxũwa rü ñanagürü:

“Cristu rü tá ngúxũ ninge”,

ñanagürü. ¹⁹⁻²⁰—Rü ngẽmacèx, Pa Chaueneẽgüx, rü name nixĩ i nüxũ perüxoe i pecüma i chixexũ, rü Tupanacèx pedaugü, rü nüxũ peyaxõgü na nüma pexũ ínapiãxũcèx i perü pecadugü. Rü ngẽxguma i nüma rü tá pexũ nataãẽgüxẽẽ, rü tá núma nanamu ya Ngechuchu ga noxritama naãne ixügügu pexcèx nüxũ naxunetacü na perü ãẽxgacü ya Cristu na yĩxũcèx. ²¹—Natürü i ñuxma rü Tupana nanaxwèxe i daxüguxũ i naãnegu na naxãuxũ ya Ngechuchu ñuxmatáta nüma ya Tupana wena namexẽẽãgu i guxũma i ñoma i naãnewa ngẽxmaxũ. Yerü yemaãcü nixĩ ga nüxũ yaxuxũ ga Tupana nawa ga nuxcümaũgüxũ ga norü orearü uruũgü ga ixüünexũ. ²²—Rü Moĩché rü tórü oxigümaã nüxũ nixu rü ñanagürü:

“Rü perü Cori ya Tupana rü petanüwa tá nüxũ naxuneta i wüxi i norü orearü uruũ i chauxrüũ ixĩxũ. Rü name nixĩ na naga pexĩnüexũ i guxũma i ngẽma pemaã nüxũ yaxuxũ. ²³ Rü texé ya tatanüwa tama naga ñnüxẽ i ngẽma orearü uruũ, rü tá tüxũ ínátèxüchi i tatanüwa”,

ñanagürü ga Moĩché. ²⁴—Rü Chamue rü guxũma ga togü ga Tupanaãrü orearü uruũgü ga naweama ügüxũ rü ta nüxũ nixugüe ga tacü tá na üpetüxũ i ñomaũcüü. ²⁵—Rü nuxcümaxũchima ga Tupana rü tórü oxi ga Abráümaã nüxũ nixu rü ñanagürü:

“Rü wüxi i cutaa tá nixĩ i nüxũ rüngüxẽẽxũ i guxũma i duũxũgü i ñoma i naãnecũãx”, ñanagürü. Rü yemaãcü ta Tupana inaxuneta nawa ga nuxcümaũgüxũ ga norü orearü uruũgü. Rü pemaã nüxũ chixu i ñuxma, rü pexcèx nixĩ ga yema unetagü ga nuxcümaũgüxũ ga orearü uruũgüwa tórü oxigümaã nüxũ yaxuxũ ga Tupana. ²⁶—Rü pemaã nüxũ chixu Pa Chautanüxũgü i Yudíugüx, rü yexguma Tupana wena namaxẽẽgu ga Nane ga Ngechuchu rü petanüwaxira nanamu na pexũ nangüxẽẽxũcèx, erü nanaxwèxe i wüxichigü i pema na nüxũ perüxoexũ i pecümagü i chixexũ—ñanagürü ga Pedru.

4

Ãẽxgacügüpẽxewa nayexmagü ga Pedru rü Cuáũ

¹ Rü yexguma duũxũgümaã íyadexagügu ga Pedru rü Cuáũ, rü yexgumayane yéma nangugü ga guma tupauca ga taxũneãrü purichíaarü ãẽxgacü, rü paigü, rü Chaduchéugü. ² Rü Pedru rü Cuáũmaã nanuẽ ga paigü yerü duũxũgüxũ nangúexẽẽ ga na marü wena namaxũxũ ga Ngechuchu, rü naxrüũ tá ta wena namaxẽxũ i guxũma i duũxũgü i marü yuexũ. ³ Rü ínanayauxũ, rü poxcupataũgu nanawocu ñuxmata moxũãcü, yerü marü nayáuane. ⁴ Natürü muxũma ga yema duũxũgü ga nüxũ ínüexũ ga yema Tupanaãrü ore rü nayaxõgü. Rü 5000 wa nangu ga yatüxũxica ixügügu. ⁵ Rü moxũãcü Yerucharéüwa nangutaquẽxegü ga Yudíugüarü ãẽxgacügü namaã ga naerugü, rü ngúexẽẽruũgü ga ore ga mugüwa nguxẽẽtaegüxũ. ⁶ Rü yéma nayexma ta ga Aná ga paigüeru ixĩcü, rü Caipá, rü Cuáũ, rü Areyáũdrü, rü guxũma ga yema togü ga paigü ga paigüerutanüxũ ixĩgüxũ. ⁷ Rü nanamu na naxütawa nagagüãxũcèx ga Pedru rü Cuáũ. Rü yexma norü ngãxũtanügu nanachigüxẽẽ rü nüxna nacagü, rü ñanagürügü: —¿Texé pexũ tamu, rü texé pexna tanaxã i pora na penamexẽẽxũcèx i ñaã yatü?—ñanagürügü. ⁸⁻⁹ Rü Pedruwa nayexma ga Tupanaãẽ ga Üünexũ rü nanaporaxẽẽ. Rü yemacèx ga Pedru rü nanangãxũ, rü ñanagürü: —Pa Íãneãrü ãẽxgacügüx, rü Pa Yudíugüarü ãẽxgacügüerugüx, rü ñuxma toxna naxcèx peca naxcèx ga norü mexẽẽ i ñaã chixeparachiréxũ erü nüxũ pecuáxchaũ ga ñuxãcü na namexũ. ¹⁰—Rü ñuxma tá pemaã nüxũ tixu na nüxũ pecuáxũcèx i guxãma i pema rü nüxũ nacuẽxgüxũcèx i guxũma i tatanüxũgü i Yudíugu. Rü ñaã yatü i ñuxma pepẽxewa ngẽxmaxũ rü Ngechuchu ya Cristu ya Nacharétucũãx nixĩ ga namexẽẽcü. Rü guma nixĩ ga pema curuchawa peyapotacü rü peyuxẽẽcü. Natürü ga Tupana rü wena nanamaxẽẽ.

11 —Rü gumatama Ngechuchu nixĩ ga pema nüxũ pexoecü. Natürü ga Tupana rü nayamucuchi na guxũarü ãëgacü yixixũcèx. 12 —Rü yima Ngechuchucatama nixĩ ya tórü maxèxèëruũ, erü yixicatama nixĩ ga Tupana nüxũ unetacü i ñoma i naanewa na tüxũ namaxèxèëxũcèx —ñanagürü ga Pedru. 13 Rü yexguma yema ãëxgacügü nüxũ daugügu ga ñuxãcü tama muũëãcüma na yadexagüxũ ga Pedru rü Cuáũ, rü nabaixãchiãëgü, yerü nüxũ nicuèxãchitanü ga tama meã poperaxũ na yacuáxũ rü puracütanüxũmare yixĩgüxũ. Rü aixcüma nüxũ nicuèxãchitanü ga Ngechuchuarü ngúexũgü na yixĩgüxũ. 14 Rü ñuxũchi nüxũ nadaugü ta ga guma yatü ga rümecü ga Pedru rü Cuáũxũtagu na nachixũ. Rü yemacèx ga yema ãëxgacügü rü taxuacüma ñuxũ ñanagürügüega nachiga ga yema ngupetüxũ. 15 Rü yexguma ga yema ãëxgacügü rü ínamuxũ ga yema ínangutaquëxegüxũwa, rü nüxĩcatama nügümaã nidexagü. 16 Rü ñanagürügü: —¿Tãcü tá namaã ixüexũ i ñãã yatügü? Erü guxũma i Yerucharéũcũãx i duũxũgü rü nüxũ nacuèxgü i ngëma mexũ i taxũ i naxügüxũ, rü taxuacüma itayacux. 17 —Natürü ngëma na tama yexeraãcü duũxũgütanüwa nanguchigaxũcèx i ngëma ngupetüxũ, ¡rü ngĩxã tanamuũëxèë na ñuxmawena rü taxúemaãma ngëma Ngechuchuchigagu yadexagüxũcèx! —ñanagürügü. 18 Rü wenaxãrü Pedru rü Cuáũcèx nacagü, rü nüxna naxãga na tama Ngechuchuchigamaã yadexagüxũcèx, rü bai i texéxũ na nangúexèëxũcèx i nachiga. 19 Natürü ga Pedru rü Cuáũ rü nanangãxũgü, rü ñanagürügü: —¡Nagu perüxĩnüë i pematama! ¿Rü namexũ i Tupanapëxewa na pega taxĩnüëxũ rü éxna Tupanaga taxĩnüëxũ? 20 —Erü toma rü taxuacüma nüxũ tarüxoe na nüxũ tixuxũ ga yema nüxũ tadaugüxũ rü nüxũ taxĩnüëxũ —ñanagürügü. 21 Rü yexguma ga yema ãëxgacügü rü nayaxãxũnegü rü yemaãcü ínayamugü, yerü nataxuma ga tãcücèx na napoxcueãxũ rü duũxũgüxũ namuũë, yerü guxũma ga duũxũgü rü Tupanaxũ nicuèxüũgü naxcèx ga yema nüxũ ngupetüxũ ga guma yatü ga chixeparawa rümecü. 22 Rü guma yatü ga yemaãcü Tupanaãrü poramaã naxcèx itaanecü, rü 40 arü yexera nixĩ ga norü taunecü.

Yema yaxõgüxũ rü Tupanaarü ngüxèëcèx ínacagü

23 Rü yexguma marü ínamuxũãxgu, rü Pedru rü Cuáũ rü namücügü íyexmagüxũwa naxĩ. Rü namaã nüxũ nixugüe ga guxũma ga yema ore ga Yudíugüarü ãëxgacügü rü paigüarü ãëxgacügü namaã nüxũ ixuxũ. 24 Rü yexguma Pedru rü Cuáũxũ naxĩnüëgu ga namücügü, rü guxũma wüxigu nayumüxëgü rü Tupanamaã nidexagü rü ñanagürügü: —Pa Corix, cuma cunaxü ga daxügüxũ ga naãne rü ñoma ga naãne, rü taxũ i taxtũ, rü guxũma i tãcü i nawa ngëxmaxũ. 25 —Rü cumatama nixĩ ga nuxcüma Cuãë i Üünexũxũ cumuxũ na curü ngüxèëruũ ga Dabíwa yanadexaxũcèx rü ñaxũcèx:

“¿Tüxcüũ ínipurae i ñoma i naãnecũãx i duũxũgü i tama yaxõgüxũ? ¿Rü tüxcüũ ngëma natüçëxmamare ixĩgüxũgu narüxĩnüë i guxũ i nachiũãnecũãx? 26 —Nümagü i nachiũãnegüarü ãëxgacügü rü Tupanamaã nanuë, rü nügümaã nangutaquëxegü na wüxigu nügümaã nagu naxĩnüëxũcèx na ñuxãcü tá nüxũ na nayexeragüxũcèx ya Cori ya Tupana rü Nane ya nüxũ naxunetacü ya Cristu”,

ñanagürü. 27 —Rü aixcüma nixĩ ga ñoma ga íãnewa ga ãëxgacügü ga Erode rü Piratu ga nangutaquëxegüxũ namaã ga to ga nachiũãnegüçũãx rü totanüxũ ga Yudíugü, na chixexũ naxügüxũcèx namaã ya curü ngüxèëruũ ya üünecü ya Ngechuchu ya Cristuxũ nüxũ cuxunetacü. 28 —Rü yemaãcü ga nümagü rü nayanguxèë ga guxũma ga yema cuma nuxcü mama nagu curüxĩnüxũ rü nüxũ cuxunetaxũ rü tá na yanguxũ. 29 —¡Rü dücax, Pa Corix, cuma nüxũ cucuèx na ñuxãcü toxũ naxãxũnegüxũ! Toma nixĩ i curü ngüxèëruũgü rü tanaxwëxe na toxũ cuporaexèëxũ na tama tamuũëãcüma nüxũ tixuxũcèx i curü ore. 30 —¡Rü curü poramaã nameëxèë i duũxũgü i idaaweexũ! ¡Rü duũxũgüxũ nawëx i cuèxruũgü i curü poramaã cuxüxũ i naegagu ya curü ngüxèëruũ ya üünecü ya Ngechuchu! —ñanagürügü. 31 Rü yexguma yumüxëwa nüxũ nachauegu, rü

guma İpata ga nawa nangutaquëxegüne rü naxĩãxãchi. Rü Tupanaãe i Üünexũ rü nüxna nangu ga guxũma. Rü tama namuëãcũma nüxũ nixugüe ga Tupanaãrũ ore.

Yema yaxõgũxũãrũ yemaxũgũ rü guxũãrũ nixĩ

³² Rü namu ga yema yaxõgũxũ. Rü guxũma rü wüxigu narüxĩnũe. Rü taxuũma nagu narüxĩnũ ga noxrüxicatama na yĩxũ ga norü yemaxũgũ, natürü guxũma ga namücügũmaã nangau. ³³ Rü yema ngúexũgũ ga Ngechuchu imugũxũ na Tupa-naãrũ puracü naxügũxũcèx, rü Tupanaãrũ poramaã nüxũ nixugüe ga ñuxãcü wena na namaxũxũ ga Cori ga Ngechuchu. Rü Tupana rü poraãcü nüxũ narüngũxẽe ga guxũma ga yema yaxõgũxũ. ³⁴⁻³⁵ Rü natanüwa rü nataxuma ga wüxi ga nüxũ nataxuxũ, yerü guxũma ga yema nüxũ yexmaxũ ga naãnegü rü êxna İpatagü, rü namaã nataxegü. Rü yema dïeru ga ngĩxũ nayauxgücü rü yéma ngĩxũ nangepü, rü yema ngúexũgũ ga Ngechuchu imugũxũna ngĩxũ nayaxãgü. Rü ñuxũchi nügü ngĩxũ ninuũxũ ga ñuxrechigü nüxũ nataxuxũ ga wüxichigü. ³⁶ Rü nayexma ga wüxi ga yatü ga Lebitanũxũ ga Chiprecũãx ga Yúchegu ãegacü. Rü yema ngúexũgũ ga Ngechuchu imugũxũ na Tupanaãrũ puracü naxügũxũcèx rü Bernabémaã nanaxugü. Rü ngẽma naega, rü: “Taãxẽẽruũ”, ñaxũchiga nixĩ. ³⁷ Rü nüma ga Bernabé rü nüxũ nayexma ga wüxi ga naãne, rü namaã nataxe. Rü yema ngúexũgũ ga Ngechuchu imugũxũxũtawa ngĩxũ nana ga yema dïeru.

5

Ananíã rü Chacuíraarü pecaduchiga

¹ Rü nayexma ga wüxi ga yatü ga Ananíãgu ãegaxũ rü Chacuíra ga namèx. Rü nümagü rü namaã nataxegü ga wüxi ga norü naãne. ² Natürü nüma ga Ananía rü namèxmaã wüxigu nagu narüxĩnũe na nügũxũ ngĩxne nayauxgũxũ ga ñuxre ga yema naãnetanü. Rü ñuxũchi yema ngúexũgũ ga Ngechuchu imugũxũxũtawa ngĩxũ nangepü ga yema nüxũ İyaxücü. ³ Rü yexguma ga Pedru rü ñanagürü nüxũ: —Pa Ananíãx, ¿tüxcüũ ngoxo i Chatanága cuxĩnũ rü Tupanaãe i Üünexũmaã quidora, rü cugũxũ ngĩxne cuyaxu i ñuxre i ngẽma curü naãnetanü? ⁴ —¿Êxna yexguma tauta namaã cutaxegu, rü tama êxna cuxrü yĩxũ ga yema naãne? ¿Rü yexguma namaã cutaxegu, tama êxna cuxrü yĩxũ ga yema dïeru na ngĩxũ cuguxẽxũcèx i ngẽma cuma cunaxwèxexũãcũma? ¿Tüxcüũ i cunaxũxũ i ñaã? Tama yatügũmaãxĩca quidora, natürü Tupanamaã rü ta nixĩ i quidoraxũ —ñanagürü ga Pedru. ⁵ Rü yexguma yema orexũ naxĩnũgu ga Ananíã, rü yuxũma inayangu. Rü poraãcüxũchima namuë ga guxũma ga yema duũxũgü ga yexguma yemaxũ nacuáchigagügu. ⁶ Rü ñuxre ga yéma yexmagũxũ ga ngextũxũxũgü rü nanayauxgü ga naxũne, rü nananuquegü, rü inayatèxgü. ⁷ Rü tomaëxpũx ga ora ngupetũxgu rü İngu ga namèx. Rü yexma İxücu natürü tama nüxũ İcùex ga tacü na ngupetũxũ. ⁸ Rü Pedru ngĩxna naca, rü ñanagürü: —¿Yema natanü ga İpexunetaxũgu yĩxũ ga namaã petaxegũxũ ga perü naãne? —ñanagürü. Rü ngĩma rü: —Ngü, ngẽxgumaëxpũxgu nixĩ —ngĩgürügü. ⁹ Rü Pedru rü ñanagürü ngĩxũ: —¿Tüxcüũ pegũmaã ngẽmaãcü wüxigu perüxĩnũe na namaã pidoraexũcèx i Tupanaãe i Üünexũ? ¿Dücèx, ngẽma cutexũ İyatèxgũxũ rü marü İnangugü, rü ñuxma rü cuxũ rü tá ta ngema nangepü! —ñanagürü. ¹⁰ Rü yexgumatama yuxcũma Pedrupèxegu İyangu. Rü yexguma nachocuxgu ga yema ngextũxũxũgü, rü yuxcũma ngĩxũ İnayangaugü. Rü ngĩxũ nayauxgü, rü ngĩtexũtagutama ngĩxũ nayatèxgü. ¹¹ Rü yexguma nüxũ nacuèxgügu ga yema ngupetũxũ, rü guxũma ga yema yaxõgũxũ rü yema togü ga duũxũgü rü ta poraãcüxũchima namuë.

Tupanaãrũ poramaã nanaxügü ga muxũma ga mexũgü

¹² Rü yema ngúexũgũ ga Ngechuchu imugũxũ, rü duũxũgüpèxewa nanaxügü ga muxũma ga mexũgü ga Tupanaãrũ poramaã naxügũxũ. Rü inanawèxgü ga muxũma ga cuèxruũgü. Rü guxũma ga yema yaxõgũxũ rü guxũguma naxĩtaquëxegũxũ nagu ga yema

tupaucu ga taxünewa yexmaxü ga chopetüchica ga Charomóñärü Üpetüchicagu äegaxü. ¹³ Rû yema togü ga duüxügü ga tama yaxögüxü rû namuñe na yema yaxögüxütanügu naxägüxü, natürü poraäcü yema yaxögüxüxü nangechaügü. ¹⁴ Rû nimuëtanüâma ga yema yaxögüxü yerü muxüma ga duüxügü ga yatüxügü rû ngexügü rû Coriaxü nayaxögüetanü. ¹⁵ Rû nüma ga duüxügü rû itamügügu nayamugüxü ga idaaweexü naxchäpenüñmaã rû norü caruügümaã na yexguma Pedru yéma üpetüxgu, rû naxchipetamare nüxü na nachixüçex. ¹⁶ Rû yexgumarü ta rû yéma naxïtaquëxegüxü ga muxüma ga duüxügü ga Yerucharéñärü ngaicamana imugüne ga ñanewa ne ñxü. Rû yéma naxçex nanagagüxü ga yema idaaweexü rû yema ngoxoãxgüxü. Rû guxüma naxçex nitaanegü.

Pedru rû Cuáñwe ningëxütanü ga paigü

¹⁷ Rû yexguma ga guma paigüeru rû guxüma ga yema natanüxügü ga Chaduchéugü rû poraäcü nixäñxächigü naxçex ga yema mexügü ga naxügüxü ga yema ngüexügü ga Ngechuchu imugüxü. ¹⁸ Rû yemacex norü purichíagüxü namu na ñnayauxüñxüçex ga yema ngüexügü. Rû ñañeärü poxcupataügu nanapoxcuc. ¹⁹ Natürü Coriarü orearü ngerü ga daxüçüñx naxçex nayawãxna ga yema poxcupatañärü ñaxgü ga chütacü. Rû ñanamuxü, rû ñanagürü nüxü: ²⁰ —ñNgema tupaucu ya taxünewa pexï, rû guxü i duüxügümaã nüxü pixu na ñuxäcü Tupana inaxäxü i ngexwacaxüxü i maxü! —ñanagürü. ²¹ Rû yexguma ga yema ngüexügü ga Ngechuchu imugüxü rû naga naxññe ga yema ore. Rû moxüäcü ga pëxmamaxüchi rû tupaucu ga taxünewa naxï, rû duüxügüxü nangüexëe. Rû yoxni ga guma paigüeru rû natanüxügü, rû nanangutaquëxexëe ga guxüma ga yema togü ga äëxgacügü ga äëxgacügütücümüwa ügüxü. Rû poxcupatañwa nanamugü ga purichíagü na yagagüñxüçex ga yema ngüexügü ga Ngechuchu imugüxü. ²²⁻²³ Rû yexguma poxcupatañwa nangugügu ga yema purichíagü, rû taxuxüxüma ñayangaugü. Rû nayawoegu, rû nüxü nayarüxugüe, rû ñanagürügü: —Yima poxcupatañ rû narüwãxta, rû meãma nataichirëx, rû purichíagü nüxna nadaugü i nañxwa. Natürü ngëxguma tayawãxnagu, rû taxuxüxüma itayangaugü i aixepewa —ñanagürügü. ²⁴ Rû yexguma yema orexü naxññeügu ga yema paigüeru rû yema togü ga paigü ga äëxgacügü ixügüxü rû yema tupaucu ga taxünewa purichíagüarü äëxgacü rû guxüma nabaixächiaëgü yerü tama nüxü nacüexgü ga ngextá tá na nanguxü ga guxüma ga yema rû ñuxäcü tá na iyanaxoxëëgüñxü. ²⁵ Rû yexguma yemagu ñaxññeüyane rû yéma nangu ga wüxi ga yatü, rû namaã nüxü nixu, rû ñanagürü: —Ngema yatügü i pepoxcuchirëxü, rû tupaucu ya taxünewa nangëxmagü, rû ñanangüexëe i duüxügü —ñanagürü. ²⁶ Rû yéma naxï ga tupaucu ga taxünewa purichíagüarü äëxgacü wüxigu namaã ga norü purichíagü na yagagüñxüçex. Natürü namuñe na duüxügü nutamaã yamuxütanüxü, rû yemacex meãmare yema ngüexügüxü nigagü. ²⁷ Rû yexguma namaã ñanagügügu, rû yema äëxgacügüpëxewa nanagagü. Rû yema paigüeru rû namaã nidexa rû ñanagürü nüxü: ²⁸ —Marü poraäcü pexna tanachüxu na tama ngema Ngechuchuégamaã penangüexëëxüçex. Natürü i pema rû guxüne ya Yerucharéñwa penangüexëe i duüxügü, rû ñuxüchi toxna penaxuxchañ ga na togagu nayuxü ga yema Ngechuchu —ñanagürü. ²⁹ Rû Pedru rû namücügümaã nanangãxügü, rû ñanagürügü: —Narümemaë nixï na Tupanaga taxññeüxü rû tama i yatügüga. ³⁰ —Guma Tupana ga nuxcümaügüxü ga tórü oxigü nüxü yaxögücü, rû guma nixï ga wena namaxëecü ga Ngechuchu ga pema peyamäcü ga yexguma curuchawa peyapotagügu. ³¹ —Natürü Tupana rû nanataxëëãma, rû nügüarü tügüncüwawa nanatoxëe. Rû tórü cuëxruñ rû maxëxëeruñ nayangucuchixëe na tatanüxügü i Yudíugüxü nangüxëëxüçex na nüxü naxoxüçex i norü chixexügü, rû Tupana nüxü nüxü nangechañxüçex i norü pecadugü. ³² —Rû toma nüxü tacüex na aixcüma yñxü i guxüma i ngema pemaã nüxü tixuxü erü tomatama nüxü tadaugü. Rû ngëxgumarü ta i Tupanaãe i Ünexü i Tupana tuxna äñxü

ya yíxema naga ñnūēxē, rü nüxū nacuèx na aixcūma yīxū —ñanagürügü. ³³ Rü yexguma yemaxū naxīnūēgu ga yema ãēxgacügü, rü poraãcūxūchima nanuē, rü nanadaixchaū. ³⁴ Natürü yema ãēxgacügütanūwa nayexma ga wūxi ga Parichéu ga Gamarié ga naega. Rü nüma rü meãma nanangúexēē ga Tupanaärü mugü. Rü guxūma ga duūxūgü rü nüxū nangechaūgü. Rü nüma ga Gamarié inachi rü nanamu na paxaãchi ínamuxūãxūcèx ga yema ngúexūgü ga Ngechuchu imugūxū. ³⁵ Rü ñuxūchi namücügü ga ãēxgacügümaã nüxū nixu rü ñanagürü: —Pa Chautanūxūx, ¡pexuãēgü na tacü tá namaã pexūexū i ñaã yatügü! ³⁶—Rü nüxna pecuèxãchie ga ũpa ga ñuxãcū ãēxgacūxū nügü ningucuchixēēchaū ga Teudá. Rü nügütama nixu na wūxi ga tacü na yīxū. Rü maneca 400 naguxū ga yatügü nawe narūxī. Natürü churaragü nayamèxgü, rü nayu. Rü guxūma ga yema nawe rüxīxū rü nangīãchi, rü yexma nayarūxo ga guxūma. ³⁷—Rü yixcūra ínangu ga to ga yexguma tachiūãneärü ãēxgacü duūxūgūxū ixugügu, rü yema nixī ga Yuda ga Gariréaanecūãx ga ãēxgacūxū nügü ingucuchixēēchaūxū. Rü nayaxucuxēgü ga duūxūgü rü nawe narūxī ga ñuxre. Natürü yemaxū rü ta nimèxgü rü nayu. Rü guxūma ga yema nawe rüxīxū rü nangīãchi. ³⁸—Rü ngēmacèx i ñuxma rü pexū chaxucuxē na peyangēxgūxū i ñaã yatügü, rü tama penapoxcuexū. Erü ngēxguma nagagutama yixīgu i ngēma nüma naxūgūxū, rü tá inayarūxo. ³⁹—Natürü ngēxguma Tupanaärü yixīgu i ñaã naxūgūxū, rü taxuacūma ipeyanaxoxēē. ¡Rü pexuãēgü na tama ngürüãchi Tupanamaã yīxū i penuēxū! —ñanagürü. Rü guxūma ga yema ãēxgacügü rü naga naxīnūē ga yema norü ucuxē. ⁴⁰ Rü ñuxūchi nanachocuxēē ga yema ngúexūgü ga Ngechuchu imugūxū. Rü nayaçuaixgü. Rü nüxna naxāga na tama Ngechuchuchiga yadexagūxūcèx. Rü yemawena rü nayangēxgü. ⁴¹ Rü yema ãēxgacügüna ínixī ga yema ngúexūgü. Rü nataãēgü yerü woetama Tupana nanaxwèxe ga yemaãcū Ngechuchucèx ngúxū na yangegūxū. ⁴² Rü guxū ga ngunexūgu tupauca ga taxūnewa rü ípatagūwa, rü nanangúexēēãma, rü nüxū nixugüetanü ga ore ga mexū ga Ngechuchu ya Cristuchiga.

6

Yema ngúexūgü ga Ngechuchu imugūxū rü nüxū naxuneta ga 7 ga yatügü na nüxū nangūxēēgūxūcèx ga Tupanaärü puracūwa

¹ Rü yexgumaücüü rü yexeraãcū nimuchigü ga yema duūxūgü ga yaxōgūxū. Rü natanūwa nayexmagü ga Yudíugūchirēx ga Griégugawewa ne íxū rü Griégugawa idexagūxū. Rü nayexma ta ga yaxōgūxū ga Yudíugü ga Yerucharéüçūãx ga woetama nagawa idexagūxū. Rü yema yaxōgūxū ga Griégugawa idexagūxū rü nidexagüecha nachigagu ga yema yaxōgūxū ga Yerucharéüçūãxgü ixīgūxū, rü ñanagürügü: —Totanūwa yutegūxe rü tama meã õna tüxna naxāgūxū i ngēxguma õna inaxāgūxūxgu i wūxichigü i ngunexūgu —ñanagürügü. ² Rü yexguma ga yema 12 ga ngúexūgü ga Ngechuchu imugūxū rü guxūma ga yema yaxōgūxūxū nangutaquēxexēēgü, rü ñanagürügü nüxū: —Tama name na ítanangéxū i Tupanaärü orearü uchiga i tomax na õnamaã itacuáxūcèx. ³—Rü ngēmacèx, Pa Tomücügüx, rü ¡Naxcèx pedèux i petanūwa ya 7 ya yatügü ya guxāma nüxū ngechaücü, rü meã naãēxū cuácü, rü aixcūma Tupanaãē i Üünexū nawa ngēxmacü! Rü toma tá nüxna tanaxā i ngēma puracü na nümagü õnamaã inacuèxgūxūcèx. ⁴—Rü ngēxguma i toma rü yumūxēwa rü Tupanaärü orearü uchigawaxicatama tá tapuracüe —ñanagürügü. ⁵ Rü yexguma ga guxūma ga yema duūxūgü rü: —Ngü —ñanagürügü naxcèx ga yema ore. Rü nüxū naxunetagü ga Etébaū ga meã yaxōcü rü aixcūma Tupanaãē i Üünexū nawa yexmacü, rü Piripi, rü Pócoro, rü Nicanúru, rü Timú rü Paruménu, rü Nicuráchi ga Aütioquiácūãx ga tauta Ngechuchuaxū yaxōōgu Yudíugücūma yaxucü. ⁶ Rü yema ngúexūgü ga Ngechuchu imugūxūxūtawa nanagagü. Rü nümagü naxmēxmaã nüxū yangōgüãcūma naxcèx nayumūxēgü. ⁷ Rü yema Tupanaärü ore rü yexeraãcü nixūchigü.

Rü poraãcü nimuêtanü ga yema yaxõgüxü ga Yerucharéüwa. Rü woo muxüchixüma ga Yudíugüarü paigü rü ta Ngechuchuaxü nayaxõgü.

Etébaüxü niyauxgü

⁸ Rü Etébaü nixi ga wüxi ga yatü ga Tupana poraãcü nüxü rüngüxëécü rü naporaxëécü na duüxügütanüwa naxüãxüçèx ga mexügü ga taxügü rü cuèxruügü ga Tupanaãrü poramaã naxüxü. ⁹ Rü nayexma ga wüxi ga ngutaquëxepataü ga Yudíugüarü ga Ínguxüxüãrü Ngutaquëxepataüga ãegane. Rü gumawa nangutaquëxegü ga duüxügü ga üpaacü corigümëxëwa yexmagüxü. Rü ñuxre ga guma ngutaquëxepataüçüãx rü wüxigu namaã ga ñuxre ga Chireneãnecüãx, rü Aleyãdriaanecüãx, rü Chiríchiaanecüãx, rü Áchiaarü naãnecüãx, rü inanaxügüe ga Etébaümaã na iyaporagatanüçüxü. ¹⁰ Natürü taxuacüma Etébaüxü narüyexeragü, yerü nüma ga Etébaü rü nidexa namaã ga yema cuèx ga Tupanaãe i Ünexü nüxna äxü. ¹¹ Rü yexguma ga yema duüxügü rü togüaxü nanaxütanügü na Etébaüchiga doraxü yaxugüxüçèx. Rü ñanagürügü ga yema idoraegüxü: —Toma nüxü taxínüëgu, rü Moïchéchiga rü Tupanachigamaã chixexü ga ore nixugü ga Etébaü —ñanagürügü. ¹² Rü yemaãcü nananuëxëe ga duüxügü rü Yudíugüarü ãëxgacügüerugü rü ngüxëëruügü ga ore ga mugüwa ngüxëëtaegüxü. Rü yemacèx Etébaüçèx nibuxmü, rü nayayauxgü, rü ãëxgacügüerugü íngutaquëxegüxüwa nanagagü. ¹³ Rü naxcèx nadaugü ta ga yatügü ga doraxü ixugüemarexü rü yema rü ñanagürügü: —Ñaa yatü rü guxügüma chixexümaã nidexa i nachigagu ya daa tupauca ya taxüne, rü nachigagu i Tupanaãrü mugü. ¹⁴ —Rü toma rü nüxü taxínüë rü:

“Yima Ngechuchu ya Nacharétucüãx rü tá nanangutaüxëe ya daa tupauca, rü tá inayanaxoxëe i nacümagü ga Moïché tüxü ngüxëëxü”, —ñanagürügü. ¹⁵ Rü yexguma Etébaüxü nadaunügu ga guxüma ga yema ãëxgacügü ga yema rütogüxü, rü nüxü nadaugü ga nachametü rü wüxi ga daxü-çüãx ga orearü ngerüchametürü na yiixü.

7

Etébaüãrü ore

¹ Rü nüma ga paigüeru, rü Etébaüna naca rü ñanagürü: —¿Aixcüma yiixü i ñaa ore i nüxü yaxugüexü? —ñanagürü. ² Rü Etébaü nanangãxü, rü ñanagürü: —Pa Chautanüxü Pa ãëxgacügüx, ¡Choxü iperüxínüë! Guma Tupana ya mexëchicü, rü nuxcümaüçü ga tórü oxí ga Abráüçèx nangox ga yexguma Mechopotámiããrü naãnegu naxãchiügu ga yexguma tauta Aráüãrü naãnewa naxüxgu na yexma yaxãchiüxüçèx. ³ —Rü Tupana rü ñanagürü nüxü:

“¡Nüxna ixü i cuchüãne rü cutanüxü, rü ngëma choma tá cuxü nüxü chadauxëëxü i naãnewa naxü!”

ñanagürü. ⁴ —Rü yexguma ínaxüxü ga Abráü nawa ga yema Cadéucüãxãrü naãne ga ngextá noxri ínaxãchiüxüwa, rü Aráüãrü naãnegu nayaxãchiü. Rü yexguma nanatü yuxguwena, rü ñoma ga naãne i ñuxma nagu pexãchiüxüwa naxü, yerü yemaãcü Tupana núma nanaga. ⁵ —Natürü yexguma rü ta taxuüma ga noxrüxüchi ga naãne nüxna naxã ga Tupana i ñoma i naãnewa, rü bai ga íraxü ga noxrüxüchi ga naãne. Natürü Abráümaã ínaxuneta ga yixcama tá nüxna na naxããxü ga ñoma i naãne na noxrüxüchi yiixüçèx, rü yixcama marü nayuxguwena rü nanegüarü na yiixüçèx. Rü yemaãcü Abráümaã ínaxuneta ga woo na nangexacüxü ga yexguma. ⁶ —Rü ñanagürü Abráüxü ga Tupana:

“Rü yixcama i cutaagü rü tá to i nachüãne i tama noxrü íxüxüwa nangëxmagü. Rü ngëma nachüãnecüãx i duüxügü rü norü duüxügüxü tá nayaxígüxëe. Rü 400 ya taunecü rü ngëma duüxügü rü tá chixri namaã nachopetü i cutaagü. ⁷ Natürü choma tá chanapoxcue i ngëma nachüãnecüãx i norü duüxügüxü yaxígüxëëxü. Rü ngëmawena i cutaagü rü tá ínachoxü nawa i ngëma naãne, rü nuã ñaa i naãnewa tá choxü nicuëxüügü”,

ñanagürü ga Tupana. ⁸—Rü yexguma Tupana rü Abráũ rü nügümaã nanamexêê, rü ñanagürü ga Tupana:

“Choma rü tá cuxũ charüngũxêê ega cuma rü guxũma i cutanũxũgü ípewiũchèxmüpêxechiraũ. Rü ngêma tá nixĩ i cuèxruũ i yigümaã imexêêxũ”, ñanagürü ga Tupana. Rü nabu ga wüxi ga nane ga Abráũ, rü Ichaágu nanaxüéga. Rü yexguma 8 ga norü ngunexũwa nanguxgu ga Ichaá, rü nümatama ga Abráũ rü ínanawiechèxmüpêxechiraũ. Rü yexguma marü nayèxgu ga Ichaá rü nabu ga nane ga Acobu, rü nümatama ga Ichaá rü ínanawiechèxmüpêxechiraũ. Rü yixcama marü nayèxgu ga Acobu rü nüxũ nayexma ga 12 ga nanegü. Rü nümatama ga Acobu rü ínanawiechèxmüpêxechiraũ ga guxũma ga yema 12 ga nanegü. Rü yema 12 ga nanegü nixĩ ga yema 12 ga nuxcũmaũgũxũ ga tórü oxigü. ⁹⁻¹⁰—Rü yema 12 ga Acobu nanegü ga tórü oxigü ixĩgũxũtanũwa rü wüxi rü Yúche nixĩ ga naega. Natürü naêneégü ga guma Yúche rü nixãũxãchie, rü yemacèx Equituarü naãnewa íxũ ga taxetanũxũxũ Yúchemaã nataxegü na Equituarü naãnewa nagagüãxũcèx. Natürü Tupana rü Yúchemaã nayexma, rü nüxũ narüngũxêê na tama pecadu naxũxũcèx ga yexguma guxchaxũwa nayexmagu. Rü nüxna nanaxã ga cuèx, rü Yúchexũ narüngũxêê ga meã na nayauxãxũcèx ga Equituaneärü ãèxgacü ga Faraũ. Rü yemacèx ga Faraũ rü ãèxgacũxũ nayangucuchixêê. Rü nüma ga Yúche nixĩ ga ãèxgacü ga Faraũpatawa rü guxũma ga yema nachiũãnewa. Rü Faraũxĩcatama nixĩ ga Yúhearü yexera na ãèxgacü yĩxũ ga yema naãnewa. ¹¹—Rü yexgumaũcüü nayexma ga taiya ga guxũ ga Equituarü naãnewa rü Canaãärü naãnewa. Rü poraãcü taiya nüxũ nangux ga duũxũgü. Rü yemacèx ga yema nuxcũmaũgũxũ ga tórü oxigü rü düxwa taxuacũma nüxũ inayangaugü ga nabü ga Canaãärü naãnewa. ¹²—Natürü yexguma nüxũ nacuáchigaxgu ga Acobu ga na nayexmaxũ ga nabü ga Equituanewa, rü yema nanamugü ga nanegü ga guma tórü oxigü ixĩgücü. Rü yema nixĩ ga nawa inaxügũxũ ga noxrima nabücèx Equituanewa na naxĩxũ. ¹³—Rü yixcama marü naguxgu ga yema nabü rü wenaxärü Equituanewa naxĩ nawa ga nabü. Rü yexguma wenaxärü yema naxĩxgu ga naêneégü, rü nügü nixu ga Yúche namaã. Rü yexguma nüxũ nacuèx ga Faraũ ga ngextácũãx na yĩxũ ga Yúche. ¹⁴—Rü yixcamaxũra ga Yúche rü tümacèx nangema ga nanatü rü guxũma ga natanũxũ. Rü maneca 75wa nangu ga yema duũxũgü ga Yúchetanũxũ. ¹⁵—Rü yemaãcü Equituanewa naxũ ga Acobu na yexma yaxãchiũxũcèx. Rü yexma nayu ga nümax. Rü yexma nayue ta ga nanegü ga tórü oxigü. ¹⁶—Rü yexguma nayuxgu ga Acobu, rü Chiquéũwa nanangegü ga naxũne na yexma yatèxgüãxũcèx nagu ga yema naxmaxũ ga Abráũ díerumaã naxcèx taxexũ ga Amú nanegũxũtawawa ga Chiquéũwa. ¹⁷—Rü düxwa nawa nangu na Equituanewa ínanguxũxũcèx ga tatanũxũ ga yexgumarüü ga Tupana Abráũmaã ixu-netaxũ. Rü yexguma rü marü poraãcü nimu ga tatanũxũ ga Equituanewa. ¹⁸—Rü yexguma ningucuchi ga to ga Equituaneärü ãèxgacü ga tama Yúchechigaxũ cuáxũ. ¹⁹—Rü yema ãèxgacü rü tatanũxũxũ nawomũxêê rü chixri tümamaã naxũpetü ga guxema nuxcũmaũgũxe ga tórü oxigü. Rü tüxũ namu na yexwaca buexe ga tümaxãcügũxũ ítawogũxũ na tayuexũcèx. ²⁰—Rü yexgumaũcüü nabu ga Moĩché, rü Tupanaãxũ nangúchaũ. Rü tomaèxpũx ga tauemacü nüxna tadaugü ga tümapatawa ga naê rü nanatü. ²¹—Rü yexguma düxwa ínatatèxgügu, rü Faraũxãcü inayaxu, rü ngĩnexũ inayaxêê. ²²—Rü yemaãcü Moĩchéxũ nanguxêégü ga guxũma ga Equituanecũãxärü cuèx. Rü nüma ga Moĩché rü wüxi ga ãèxgacü ga poracü nixĩ, rü norü dexawa rü ta napora. ²³—Rü yexguma 40 ga norü taunecüwa nanguxgu ga Moĩché rü nagu narüxĩnü ga natanũxũgü ga Yudíugütanügu na naxũãneãxũ. ²⁴—Rü nüxũ nadau ga wüxi ga Equituanecũãx ga wüxi ga Yudíuxũ na nacuaxixũ. Rü yemacèx ga Moĩché rü yema Yudíuétüwa ínayuxu, rü yema Equituanecũãxũ nimèx rü nanayuxêê. ²⁵—Rü nüma ga Moĩché nagu rüxĩnügu rü chi natanũxũgü ga Yudíugü rü chi nüxũ nacuèxgü na Tupana yema namuxũ na ínanguxũxêêãxũcèx. Natürü tama nüxũ nacuèxgüéga ga yema natanũxũgü. ²⁶—Rü

moxüãcü ga Moïché rü nüxü nadau ga to ga taxre ga Yudíugü ga nügü yexma dèixü, rü nüxna nachogüchaü. Rü ñanagürü nüxü:

“Pema rü pegütanüxügü pixīgü. ¿Rü tüxcüü pegü pedai i pemax?” ñanagürü. ²⁷—Rü yexguma ga yema namücüxü icuaxixü rü Moïchéxü natèxneta, rü ñanagürü nüxü:

“¿Texé cuxü tamu na toeru quiixüçèx rü tomaã icucuáxüçèx? ²⁸—¿Éxna choxü quimáxchaü ta, ga ñne quimáxü ga Equituanecüãxrüü?” ñanagürü. ²⁹—Rü yexguma yemaxü naxínügu ga Moïché, rü niña ga yema naãnewa. Rü Madiáüãnewa naxü. Rü yema nachiuãne ga tama noxrü ixixügu nayaxãchiü. Rü yexma naxãmèx rü nabu ga taxre ga nanegü. ³⁰—Rü 40 ga taunecüguwena ga dauxchitawa ga Chinaï ga mèxpúneãrü ngaicamana, rü wüxi ga naixëtaxacü ga yéma iyauraxüwa Moïchéçèx nangox ga wüxi ga Tupanaãrü orearü ngeruü ga daxüçüãx. ³¹—Rü nabaixãchiãe ga Moïché ga yexguma nüxü nadèuxgu. Rü naxcèx nixü rü nüxna nangaicama na meã nüxü nadauxüçèx. Rü yexguma Moïchémaã nidexa ga Cori ga Tupana, rü ñanagürü nüxü:

³²“Choma nixi i curü oxigüarü Tupana chiixü rü Abráü rü Ichaá rü Acobuarü Tupana chiixü”,

ñanagürü. Rü yexguma ga Moïché rü inanaxügü ga norü muümaã na yaduruxü. Rü namuü ga yexma na nadawenüxü. ³³—Rü yexguma ga Cori ga Tupana rü ñanagürü nüxü:

“¡Inacuaixü i curü chapatu erü ñaã naãne i nagu cuchixü rü naxüüne, erü chanuxma!

³⁴Choma rü ngóxüwama nüxü chadau i ñuxácü poraãcü ngúxü na yangegüxü i chorü duüxügü i Equituanewa. Rü nüxü chaxínü i na naxauxexü. Rü ngëmácèx núma chaxü na íchananguxüxèxüçèx. ¡Nuã naxü na Equituanewa cuxü chamuxüçèx!”

ñanagürü. ³⁵—Rü woo ga noxri ga nümagü ga natanüxügü rü guma Moïchéxü naxoe ga yexguma ñagügu:

“¿Rü texé cuxü tamu na toeru quiixüçèx rü tomaã icucuáxüçèx?” ñagügu, natürü ga Tupana rü yéma nanamuãma na yema duüxügüxü ínanguxüxèxüçèx rü norü ãèxgacü na yixüçèx. Rü yemaãcü Moïchéxü namu ga Tupana ga yexguma naxütawa namuãxgu ga yema norü orearü ngeruü ga yema naixëtaxacü ga iyauraxüwa naxcèx ngóxü. ³⁶—Rü Moïché nixi ga Equituarü naãnewa ínagaxüxü ga nuxcümaügüxü ga tórü oxigü. Rü Equituanewa, rü Dauchiüxü ga Taxtüwa, rü dauxchitawa ga ngextá taxúema íxãpataxüwa inanawèx ga cuèxruügü, rü nanaxü ga mexü ga taxügü ga Tupanaãrü poramaã naxüxü. Rü yemaãcü 40 ga taunecü nüxü na rü-ngüxèe ga yema duüxügü. ³⁷—Rü nümatama ga Moïché nixi ga tatanüxügü ga Yudíugümaã ñaxü:

“Tupana rü yixcüra tá pexcèx nüxü naxuneta i petanüwa i wüxi i norü orearü uruü ga yexgumarüü ga choxü na naxunetaxürüü”,

ñanagürü. ³⁸—Rü nümatama ga Moïché nixi ga nuxcümaügüxü ga tórü oxigümaã nangutaquèxexü ga yema naãne ga ngextá taxúema íxãpataxüwa. Rü tórü oxigümaã nayexma ga Chinaï ga mèxpúnewa ga yexguma namaã yadeaxgu ga Tupanaãrü orearü ngeruü ga daxüçüãx. Rü nümatama ga Moïché nixi ga nayauxãxü ga Tupanaãrü ore i maxèxèeruü na nüxü tüxna naxããxüçèx. ³⁹—Natürü ga tórü oxigü rü tama naga naxínüèchaü ga guma Moïché. Rü ínanatèxüchigüama, rü Equituaneguama narüxínüãègü.

⁴⁰—Rü tórü oxigü rü Moïchéenee ga Arãüxü ñanagürügü: “¡Rü toxcèx naxü i tupanachicünèxãgü na nawe tarüxixüçèx! Erü tama nüxü tacuèxgü i tacü nüxü na üpetüxü i ngëma Moïché ga Equituanewa tüxü yagagüxü”, ñanagürügü. ⁴¹—Rü yexguma nanaxügü ga wüxi ga wocaxacüchicünèxã norü tupanaxü. Rü ñuxüchi naxcèx nanadaï ga ñuxre ga carnerugü na yemamaã nüxü yacuèxüügüxüçèx. Rü wüxi ga peta naxcèx naxügü ga yema wocaxacüchicünèxã ga nümatama naxügüxü. ⁴²—Rü yemacèx ga Tupana rü nüxna nixügachi ga yema duüxügü. Rü ínanawogü na woramacuri rü üèxcü

rü tauemacümaã natupanaãxëẽãxüçèx. Yerü yemaãcü Tupanaãrü orearü uruüğüarü poperagu naxümatü, rü ñanagürü:

“Pema, Pa Yudiüğüx, ¿Chauxcèx yïixü ga penadèixü ga carnerugü ga yexguma 40 ga taunecü dauxchitawa ga ngextá taxúema íxãpataxüwa peyexmagügu? ⁴³ Tama aixcüma chauxcèx nixi yerü ga pema rü ngextá ípexixüwa rü ípenangeexü ga napata ga perü tupananeta ga Moro rü ípenangeexü ga perü tupananeta ga Refããrü woramacurichicünèxã. Rü yemaãcü pegümaã ípenangeexü ga yema tupananetachicünèxãgü ga pematama pexüğüxü na nüxü picüexüüğüxüçèx. Rü ngëmacèx i ñuxma rü perü naãnewa tá pexü íchawoxü rü yaxüwa i Babiró-niããrü yexerawa tá pexü chamugü”,

ñanagürü ga Tupana ga yema orewa. ⁴⁴—Rü yema naãne ga ngextá taxúema íxãpataxüwa rü tórü oxigü nüxü nayexma ga wüxi ga ípata ga naxchirunaxcèx ga nagu namaã nangüğüne ga Tupanaãrü mugü ga nutagu ümatüxü. Rü guma ípata ga naxchirunaxcèx nixi ga nüxü nawéãcüma Tupana Moïchéxü naxüxèxene. ⁴⁵—Rü yexguma nayuxguwena ga Moïché, rü Yochué ningucuchi ga ãëxgacü na yïixü. Rü tórü oxigü rü nuã tórü naãnewa nanangegü ga guma ípata ga naxchirunaxcèx ga yexguma Yochuémaã napugüãgu ga ñãã naãne nüxna ga yema duüxüğü ga Tupana íwoxüxü napèxewa ga tórü oxigü. Rü núma nayexma ga guma ípata rü ñuxmata Dabí ingucuchigu ga ãëxgacü na yïixü. ⁴⁶—Rü guma ãëxgacü ga Dabí rü Tupana rü poraãcü namaã nataãë, rü nüxü narüngüxëë. Rü núma ga Dabí rü Tupanana naxcèx naca na naxüãxüçèx ga wüxi ga tupauca ga taxüne ga nawa Tupanaxü na yacuèxüüğüxüçèx ga tatanüxüğü ga Acobutaagü. ⁴⁷—Natürü Dabí nane ga Charumóü nixi ga naxücü ga guma tupauca ga Tupanacèx ixixüne. ⁴⁸—Natürü ya Tupana ya tacüxüchima rü tama duüxüğü üxüne ya tupaucagümaã naxãpata. Rü yemacèx ga Tupana rü nuxcümaücü ga norü orearü uruüwa rü ñanagürü:

⁴⁹⁻⁵⁰ “Choma nixi ya ãëxgacü ya tacüxüchima, rü daxüğüxü i naãne nixi i chorü toxmaxwèxeruü ixixü rü ñoma i naãne nixi i chorü chicutüruü ixixü. ¿Rü ñuxücürüwa i nagu perüxñüxü tá na penaxüxü ya wüxi ya tupauca ya chaugu mexüne?”

ñanagürü ga Cori ya Tupana. Rü ñanagürü ta ga Tupana:

“¿Tama éxna choma yïixü ichanaxüxü ga guxüma i tacü i ngëxmaxü? ¿Rü ñuxãcü chi penaxüxü i wüxi i nachica i nagu charüngüxü?”

ñanagürü ga norü orewa. ⁵¹ Rü ñanagürü ga Etébaü: —Dücèx Pa ãëxgacüğüx, pema rü guxüğüma nüxü pexoe i Tupanaãrü ore, rü tama íperüxñüéchaü. Rü peãewa rü tama peyaxögüchaü. Rü pema rü guxüğüma Tupanaãë i Üünexümaã penuëëcha. Yema nuxcümaüğüxü ga perü oxigürüütama pixüğü i pemax. ⁵²—Rü perü oxigü rü chixeãcüma namaã nachopetü ga guxüma ga Tupanaãrü orearü uruüğü. Rü nanadai ga yema orearü uruüğü ga nüxü ixuchigagüxü ga na núma naxüxü tá ga guma mecü ya Ngechuchu. Rü yexguma ínanguxgu ga guma Ngechuchu rü pema Piratuna penamu rü penayuxëë. ⁵³—Rü woo pema rü Tupanaãrü orearü ngerüğü ga daxüçüãxütawa penayaxu ga Tupanaãrü ore, natürü tama naga pexñüë —ñanagürü ga Etébaü.

Nayu ga Etébaü

⁵⁴ Rü yexguma nüxü naxñüëgu ga yema ore, rü nanuëxüchiana ga yema duüxüğü. Rü norü numaã Etébaüçèx nixüxchapütägü. ⁵⁵ Natürü ga Etébaü rü aixcüma Tupanaãë i Üünexü nawa nayexma. Rü daxü nadawenü, rü nüxü nadau na ñuxãcü namexëchixü ga Tupana. Rü nüxü nadau ga Ngechuchu ga Tupanaãrü tügüneguama chicü. ⁵⁶ Rü yexguma rü ñanagürü: —Nüxü chadau i na yangoxnaãchixü i naãnetüwe, rü nüxü chadau ya Cristu ya Tupana Nane ya duüxüxü ixicü ya Tupanaãrü tügüneguama chicü —ñanagürü ga Etébaü. ⁵⁷ Natürü nümagü rü nüğü narütütamachixëgü, rü tagaãcü aixta naxüëãcüma nüxna nayuxgü. ⁵⁸ Rü ínanagaxüchigü ga ñãnewa, rü nutagümaã ínanamuxüchigü. Rü yema nayexma ga wüxi ga ngextüxüxü ga Chaurugu äegaxü. Rü yemaxü nanawotanü ga

norū gáuxŭchirugū ga ínacuꝑuchigūxŭ ga yema duŭxŭgū ga Etébaŭxŭ imèxgūxŭ. ⁵⁹ Rū yexguma nutamaã inamuxŭchigūāguyane, rū nayumŭxē ga Etébaŭ rū ñanagŭrū: —Pa Cori Pa Ngechuchux, ¡Nayaxu i chauãē! —ñanagŭrū. ⁶⁰ Rū yemawena rū inacaxāpŭxŭ, rū tagaãcŭ aixta naxŭ, rū ñanagŭrū: —Pa Cori Pa Tupanax, ¡Tāxŭ i ñaã pecaducèx cunapoxcuexŭ i ñaã duŭxŭgū! —ñanagŭrū. Rū yexguma yema ñaxguwena rū nayu.

8

Chauru rū guxema yaxōgŭxewe ningēchigū na tūxŭ napoxcuexŭcèx

¹ Rū Chauru rū norū me nixī ga Etébaŭxŭ na yamèxgūxŭ. Rū yematama ngunexŭgu rū norū uwanŭgū rū inanaxŭgŭe ga na poraãcŭ nawe yangēxŭtanŭxŭ ga yema yaxōgŭxŭ ga Yerucharéŭwa yexmagŭxŭ. Rū dŭxwa ga guxŭma rū Yudéaanegu rū Chamáriaanegu nŭgŭ nawoone. Rū yema ngúexŭgŭ ga Ngechuchu imugŭxŭxicatama ínayaxŭgŭ ga Yerucharéŭwa. ² Rū ñuxre ga yatŭgŭ ga meãma Tupanaãxŭ yaxōgŭxŭ rū nanayauxgŭ ga Etébaŭxŭne, rū inanatèxgŭ rū poraãcŭ naxcèx naxauxe. ³ R yexguma ga Chauru rū chixri tŭmamaã naxŭpetŭ ga guxema yaxōgŭxe. Rū tŭmapatagu nixŭcuchigŭ na tŭxŭ ínayauxŭxŭcèx. Rū yéma tŭxŭ ínátŭxŭ ga yatŭgŭ rū ngexegŭ, rū ñuxŭchi poxcupataŭgu tŭxŭ nawocu.

Chamáriawa nŭxŭ nixuchiga ga Tupanaãrū ore i mexŭ

⁴ Rū yema yaxōgŭxŭ ga Chauruchaxwa ibuxmŭxŭ ga Yerucharéŭwa, rū guxŭwama ga ngextá ínaxŭxŭwa rū nŭxŭ nixuchigagŭ ga ñuxãcŭ Ngechuchu tŭxŭ na maxēxēxŭ. ⁵ Rū Piripi nixī ga wŭxi ga yema orexŭ ixuchigacŭ. Rū nŭma rū ñāne ga Chamáriawa naxŭ, rū yéma inanaxŭgŭ ga Cristuchigaxŭ na yaxuxŭ. ⁶ Rū yema duŭxŭgŭ ga Chamáriacŭāx, rū Piripicèx nangutaquēxegŭ. Rū guxŭma meãma inarŭxŭnŭē ga yema ore ga namaã nŭxŭ yaxuxŭ, yerŭ nŭxŭ nadaugŭ ga yema mexŭgŭ ga taxŭgŭ ga Tupanaãrū poramaã naxŭxŭ ga Piripi. ⁷ Rū muxēma ga duŭxŭgŭ ga ngoxogŭ tŭmawa yexmaxē rū tŭmacèx nitaanegŭ. Rū yema ngoxogŭ rū tagaãcŭ aita naxŭeãcŭma tŭmawa ínachoxŭ. Rū yexgumarŭŭ ta rū muxēma ga nawāixāchigŭxe rū chixeparagŭxe rū tŭmacèx nitaanegŭ. ⁸ Rū yemacèx poraãcŭ nataãegŭ ga guxŭma ga duŭxŭgŭ ga guma ñāne ga Chamáriawa. ⁹ Natŭrŭ guma ñānewa nayexma ga wŭxi ga yatŭ ga Chimáŭgu āegaxŭ ga ñuxre ga taunecŭ norŭ yuŭmaã duŭxŭgŭxŭ womŭxēxŭ ga guma ñānewa. Rū nŭgŭ nixu ga na wŭxi ga tacŭxŭ cuáxŭ na yīxŭ. ¹⁰ Rū guxŭma meãma nŭxŭ inarŭxŭnŭē woo ga buxŭgŭ rū yaxŭgŭ. Rū ñanagŭrŭgŭ: —Ñaã yatŭ rū aixcŭma nŭxŭ nangēxma i Tupanaãrū pora i taxŭ —ñanagŭrŭgŭ. ¹¹ Rū naga naxŭnŭē ga duŭxŭgŭ, yerŭ mucŭma ga taunecŭ rū norŭ yuŭmaã nanawomŭxēē. ¹² Rū Piripi rū yema duŭxŭgŭmaã nŭxŭ nixu ga ore ga mexŭ ga Ngechuchu ya Cristuchiga, rū ñuxãcŭ na āēxgacŭ yīxŭ ya Tupana. Rū yexguma yema ore yaxōgŭgu ga duŭxŭgŭ, rū Piripi ínabaiŭxēē ga yatŭxŭ rū ngexŭgŭ. ¹³ Rū nŭmatama ga Chimáŭ rū ta nayaxō, rū ínabaie. Rū inanaxŭgŭ ga Piripixŭ na naxŭmŭcŭxŭ. Rū yexguma nŭxŭ nadēŭxgu ga yema cuèxruŭgŭ rū mexŭgŭ ga taxŭ ga Tupanaãrū poramaã naxŭxŭ ga Piripi, rū poraãcŭ nabaixāchiãē ga Chimáŭ. ¹⁴ Rū yema Ngechucharŭ ngúexŭgŭ ga Yerucharéŭwa yexmagŭxŭ rū nŭxŭ naxŭnŭēchiga ga meã na nayauxgŭāxŭ ga Tupanaãrū ore ga Chamáriawa. Rū yemacèx yéma nanamugŭ ga Pedru rū Cuáŭ. ¹⁵ Rū yexguma Chamáriawa nangugŭgu ga Pedru rū Cuáŭ, rū naxcèx nayumŭxēgŭ ga yema yexwaca yaxōgŭxŭ ga duŭxŭgŭ, na nayauxgŭāxŭcèx ga Tupanaãē i Üünexŭ. ¹⁶ Yerŭ yexguma noxri yaxōgŭāgu ga yema duŭxŭgŭ rū Piripi marŭ ínabaiŭxēēmare naegagu ga Cori ga Ngechuchu, natŭrŭ taxuxŭnata nangu ga Tupanaãē i Üünexŭ. ¹⁷ Rū yemacèx ga Pedru rū Cuáŭ naxmēxmaã nŭxŭ ningōgŭgŭ ga yema yaxōgŭxŭ, rū yexguma nanayauxgŭ ga Tupanaãē i Üünexŭ. ¹⁸⁻¹⁹ Rū nŭxŭ nadau ga Chimáŭ ga na duŭxŭgŭna nanguxŭ ga Tupanaãē i Üünexŭ ga yexguma Pedru rū Cuáŭ naxmēxmaã yema duŭxŭgŭxŭ yangōgŭgŭgu. Rū yemacèx dīeru Pedru rū Cuáŭna ngŭxŭ naxāxchaŭ ga Chimáŭ rū ñanagŭrŭ nŭxŭ: —¡Choxna rū ta

penaxã i ngẽma pora, na yixema tũxũ chingõgũxe rũ ta tũxna nanguxũcèx i Tupanaãẽ i Üünexũ! —ñanagürũ. ²⁰ Rũ yexguma ga Pedru rũ ñanagürũ nũxũ: —¡Cuxrũõtama iyanataxux i curũ dñeru, erũ ngĩmaã naxcèx cutaxechaũ i Naãẽ i Üünexũ i Tupana tũxna mumarexũ! ²¹ Cuma rũ taxucürũwama cunayaxu i ngẽma pora, erũ curũ maxũ rũ tama name i Tupanapèxewa. ²² ¡Nũxũ rũxo i ngẽma curũ chixexũ, rũ Tupanana naxcèx naca na cuxũ nũxũ nangechaũxũcèx! Rũ bexmana tá cuxũ nũxũ nangechaũ i ngẽma chixexũ i cuãewa nagu curũxĩnũxũ. ²³ Erũ nũxũ chacuèx rũ poraãcũ cunuãẽwèxe, rũ ngẽma curũ chixexũ rũ cumaã inacuèx rũ ñoma cupoxcuxürũũ cuxũ nixĩxèẽ —ñanagürũ. ²⁴ Rũ Chimáũ nanangãxũ, rũ ñanagürũ: —¡Pema Tupanana chauxcèx peça na tama choxũ nangupetũxũcèx i ngẽma nũxũ pixuxũ! —ñanagürũ. ²⁵ Rũ Pedru rũ Cuáũ rũ yema Chamáriaanecũãx ga duũxũgũmaã nũxũ nixugũe ga Cori ga Ngechuchuchiga, rũ namaã nũxũ nixugũe ga Tupanaãrũ ore. Rũ yemawena rũ Yerucharéũcèx nawoegu. Rũ namawa rũ muxũne ga Chamáriaanewa yexmane ga ñanexãcũgũwa rũ nũxũ nixuetanũ ga Tupanaãrũ ore i mexũ.

Piripi rũ namagu nũxũ nangau ga wũxi ga ãẽxgacũ ga Etiópiaanecũãx

²⁶ Rũ yemawena, rũ Tupanaãrũ orearũ ngeruũ ga daxũcũãx rũ Piripimaã nũxũ nixu, rũ ñanagürũ: —¡Rũ paxa inaxũãchi rũ ñane ya Gachawaama naxũ nawa i ngẽma nama i Yerucharéũwa ne daxũ rũ Gachawa iyarũgoxũ! —ñanagürũ. Rũ ngẽma nixĩ i nama i dauxchitawa i ngextá taxúema íxãpataxũwa dapetũxũ. ²⁷ Rũ inaxũãchi ga Piripi rũ yema namawa naxũ. Rũ yexma nũgũ nangau namaã ga wũxi ga yatũ ga Etiópiaanenanguxũ ga gũxcũma ga yema ãẽxgacũarũ dñeru. Rũ ñeãcũ Yerucharéũwa naxũ na Tupanaxũ yanacuèxũxũcèx. ²⁸ Rũ nachiũãnecèx nataegu, rũ norũ autu ga cowaru itúchigũnewa narũto. Rũ nawa ningúchigũ ga yema ore ga Tupanaãrũ orearũ uruũ ga Ichaxía umatũxũ. ²⁹ Rũ Tupanaãẽ i Üünexũ rũ Piripixũ ñanagürũ: —¡Paxa naxcèx ixũ i ngẽma autu! —ñanagürũ. ³⁰ Rũ paxa yema autucèx niña ga Piripi. Rũ yexguma naxũtawana nanguxgu rũ nũxũ naxĩnũ ga na Tupanaãrũ orearũ uruũ ga Ichaxía umatũxũ ga orewa nangũxũ ga yema ãẽxgacũ. Rũ yexguma ga Piripi rũ nũxna naca rũ ñanagürũ nũxũ: —¡Nũxũ cucuáxũ i tacũchiga na yĩxũ i ngẽma nawa cungũxũ? —ñanagürũ. ³¹ Rũ nũma ga ãẽxgacũ ga Etiópiaanecũãx rũ nanangãxũ, rũ ñanagürũ: —¡Ñuxũcürũwa i nũxũ chacuáxũ ega taxúema chomaã inanguxũxèẽgux? —ñanagürũ. Rũ Piripicèx naca na naxĩnagũxũcèx, rũ naxũtawana na natoxũcèx. ³² Rũ yema nawa yangúchigũxũ ga Tupanaãrũ ore ga umatũxũ, rũ ñanagürũ:

“Rũ ñoma wũxi i carneru i norũ mèxwa nagagũxũrũũãcũ nayagagũ. Rũ wũxi i carneruxacũ i ngẽma yayoxtèxagũxũpèxewa tama aita uxũrũũ nachianemare, rũ taxu ñanagürũ. ³³ Rũ yexguma duũxũgũ poraãcũ chixri namaã chopetũgu rũ taxúema naetũwa tachogũ. ¿Rũ texé tá meã nachiga tidexa ga yema duũxũgũ ga yemaãcũ poraãcũxũchima chixexũ ugũxũ? Yerũ nayamèxgũ na nataxuxũcèx i norũ maxũ i ñoma i naãnewa”,

ñanagürũ ga yema ore ga nawa nangũxũ. ³⁴ Rũ Piripina naca ga yema ãẽxgacũ ga Etiópiaanecũãx, rũ ñanagürũ: —¡Chomaã nũxũ ixu! ¿Rũ texéchigagu nixĩ ga yadexaxũ ga yema Tupanaãrũ orearũ uruũ? ¿Nũgũchigagutama rũ èxna toguechigagu? —ñanagürũ. ³⁵ Rũ yexguma nanangãxũ ga Piripi. Rũ yematama ore ga umatũxũmaã inanaxũgũ na namaã nũxũ yaxuxũ ga ore i mexũ ga Ngechuchuchiga. ³⁶ Rũ yixcamaxũra ga yexguma inaxĩyane, rũ dexá íyexmaxũwa nangugũ. Rũ ñanagürũ ga yema ãẽxgacũ: —Nuã nangèxma i dexá. ¿Rũ tama èxna inamexũ na nuã choxũ ícubaixèẽxũ? —ñanagürũ. ³⁷ Rũ ñanagürũ ga Piripi: —Ngèxguma aixcũma meãma cuyaxõxgux, rũ marũ name i na cuxũ íchabaixèẽxũ —ñanagürũ. Rũ nanangãxũ ga yema ãẽxgacũ, rũ ñanagürũ: —Ngemããcũ chayaxõ na Ngechuchu ya Cristu yĩxũ ya Tupana Nane —ñanagürũ. ³⁸ Rũ yexguma ínayachaxãchixèẽ ga norũ autu, rũ wũxigu dexáchiũwa nachoũ. Rũ Piripi ínanabaixèẽ ga

yema ãëxgacü. ³⁹ Rŭ yexguma dexáwa ínachoõchigu, rŭ Tupanaãe i Üünexŭ rŭ Piripixŭ niga. Rŭ yema ãëxgacü rŭ marü tama wena Piripixŭ nadau. Natürü taãëãcü namagu nixŭ. ⁴⁰ Natürü Achotowa nayangox ga Piripi. Rŭ yema ãñewa inaxŭãchi, rŭ nüxŭ nixuchigü ga ore i mexŭ ga guxŭma ga ãñewa ñuxmata Checharéaarü naãnewa nangu.

9

Ngechuchuaxŭ nayaxõ ga Chauru

¹⁻² Rŭ yoxni ga Chauru rŭ daimaã nayaxãxŭnechigüama ga yema duñxŭgü ga Cori ga Ngechuchuaxŭ yaxõgŭxŭ. Rŭ yemacèx paigüeruxŭtawa naxŭ, rŭ naxcèx nüxna naca ga popera ga nüxna ägaxŭ na Yudiugüarü ngutaquëxepataŭgü ga Damacuwa yexmagünegu yaxücuchigŭxŭcèx rŭ yexma tümacèx nadauxŭcèx ga guxema yaxõgŭxe ga yatŭxe rŭ ngexegü na Yerucharéüwa tüxŭ nagagŭxŭcèx rŭ yexma tüxŭ yapoxcuexŭcèx. ³ Natürü yexguma marü Damacuxŭ yangaicagu, rŭ ngürüãchi meãma nüxŭ nabáxi ga wüxi ga omü ga poraxŭ ga daxŭwa ibáxixŭ. ⁴ Rŭ ñaxtŭanegu nayangu ga Chauru, rŭ nüxŭ naxŭnŭ ga wüxi ga naga ga nüxna çagŭxŭ ga ñaxŭ: —Pa Chauru Pa Chaurux, çtŭxcüŭ i chowe quingëchigŭxŭ? —ñaxŭ. ⁵ Rŭ Chauru nanangãxŭ, rŭ ñanagürü: —¿Rŭ texé quixŭ, Pa Corix? —ñanagürü. Rŭ nüma ga Cori rŭ nanangãxŭ rŭ ñanagürü: —Choma nixŭ i Ngechuchu, rŭ chorü duñxŭgü nixŭ i ngëma nawe quingëchigŭxŭ. ⁶ Rŭ inachi, rŭ ngëma Damacuarü ãñewa naxŭ! Rŭ ngëma rŭ wüxi ya yatü tá cumaã nüxŭ nixu na tacü tá cuxŭxŭ —ñanagürü. ⁷ Rŭ yema yatŭgü ga Chauruxŭ íxŭmücŭgŭxŭ, rŭ inayanguãëgü, yerü nüxŭ naxŭnŭe ga yema ore natürü taxúexŭma nadaugü. ⁸ Rŭ ñuxŭchi inachi ga Chauru ga ñaxtŭanewa ga íyanguxŭwa, rŭ nidauchixetü, natürü taxuŭma nadau yerü nixoxetü. Rŭ yemacèx ga namücŭgü, rŭ nachacüügu nayayauxãchi, rŭ yemaãcü Damacuwa nanagagü. ⁹ Rŭ tomaëxpŭx ga ngunexŭgu, rŭ nangexetü, rŭ tama nachibü, rŭ tama naxaxe. ¹⁰ Rŭ Damacuwa nayexma ga wüxi ga yatü ga Ngechuchuaxŭ yaxõxŭ ga Ananíã ga naega. Rŭ Cori ya Ngechuchu naxcèx nangox, rŭ ñanagürü nüxŭ: —Pa Ananíãx —ñanagürü. Rŭ nüma ga Ananíã nanangãxŭ, rŭ ñanagürü: —¿Tacü? Pa Corix —ñanagürü. ¹¹⁻¹² Rŭ nüma ga Cori nanangãxŭ, rŭ ñanagürü: —¿Dücèx, ngëma ítamŭ i Meã i Wéxŭgu äëgaxŭwa naxŭ! Rŭ ngëma Yudapatawa naxcèx ínaca i wüxi i yatü i Tarsucŭãx i Chaurugu äëgaxŭ! Rŭ nüma rŭ ngëma inayumŭxë rŭ nangoxetü rŭ marü cuxŭ nadau, Pa Ananíãx, na ngëxma cuxŭcuxŭ rŭ naxëtügu quingõgŭxŭ na wena yadauchixŭcèx —ñanagürü ga Cori ga Tupana. ¹³ Rŭ yexguma yemaxŭ naxŭnŭgu ga Ananíã, rŭ ñanagürü: —Pa Corix, muxŭma i duñxŭgü chomaã nüxŭ nixu i ngëma yatŭchiga na ñuxre i chixexŭ naxŭxŭ namaã i curü duñxŭgü i Yerucharéüwa. ¹⁴ Rŭ ñuxma rŭ paigüarü ãëxgacügüarü mumaã núma naxŭ na inayauxŭãxŭcèx i guxŭma i duñxŭgü i cuégagu yumŭxëgŭxŭ —ñanagürü. ¹⁵ Natürü nüma ga Cori rŭ ñanagürü nüxŭ: —¿Ngema naxŭ! Erü choma chanayaxu i ngëma yatü na choxŭ yaxuchigaxŭcèx namaã i togü i nachiüãnecŭãxgü i duñxŭgü rŭ norü ãëxgacügü, rŭ ngema Iraécüãxgü. ¹⁶ Rŭ choma tá nüxŭ nüxŭ chadauxëë i ñuxre i ngúxŭ i tá yangexŭ i chauxcèx —ñanagürü ga Cori. ¹⁷ Rŭ guma ípata ga Chauru nawa yexmanewa naxŭ ga Ananíã. Rŭ nagu naxŭcu, rŭ nüxŭ ningõgü, rŭ ñanagürü nüxŭ: —Pa Chaueneë Pa Chaurux, nüma ya Cori ya Ngechuchu ga guma namawa cuxcèx ngócü ga yexguma núma cuxŭxgu, rŭ núma choxŭ namu na wenaxârü quidauchixŭcèx, rŭ cuxna nanguxŭcèx i Naãe i Üünexŭ —ñanagürü. ¹⁸ Rŭ yexgumatama rŭ ñoma tacüchicutëxerüŭ naxëtüwa inayi, rŭ yexguma wenaxârü meã nidauchixetü. Rŭ yexguma inachi ga Chauru, rŭ Ananíã inanabaixëë. ¹⁹ Rŭ yemawena nachibü, rŭ wenaxârü napora. Rŭ ñuxre ga ngunexŭgu yexma Damacugu narüxãxŭ namaã ga yema yaxõgŭxŭ ga yexma ächiŭgŭxŭ.

Chauru rŭ Damacuwa nüxŭ nixu ga Ngechuchuchiga

²⁰ Rü yexguma inanaxüğü ga Chauru ga ngutaquëxepataüğüwa nüxü na yaxuchi-gaxü na Ngechuchu yïixü ya Tupana Nane. ²¹ Rü guxüma ga yema nüxü ñnëxü rü poraäcü nabaixächiäëgü, rü ñanagürüğü: —¿Tama ëxna ñaã yatü yïixü ga Yerucharéüwa iyayauxüğüxü ga guxüma ga duüxüğü ga Ngechuchuaxü yaxögüxü? ¿Rü tama ëxna ñaãtama yïixü ga yema núma üxü na ínayauxüäxüçëx rü ñuxüchi paigüarü äëxgacüxütawa nagagüäxüçëx i duüxüğü i yaxögüxü? —ñanagürüğü. ²² Natürü ga Chauru rü guxü ga ngunexügu yexeraäcü tama namuüäcüma nüxü nixuchigaama ga ore ga Ngechuchuchiga. Rü inayanangeëxgüxëë ga Yudíugü ga Damacuwa yexmagüxü, yerü meãma nanangoxëë na Cristu yïixü ga Ngechuchu.

Chauru rü Yudíugü- chaxwa niña

²³ Rü marü muxüma ga ngunexüğü ngupetüguwena rü yema Yudíugü rü wüxigu nügümaã nagu narüxñnüë na Chauruxü yamëxgüxüçëx. ²⁴ Natürü nüma ga Chauru rü nüxü nacuächiga ga na yamëxgüchaüäxü. Rü yema Yudíugü rü ngunecü rü chütacü rü guma ñãneärü poxeguxüärü ñãxgügu Chauruxü nanëixgüxü na yamëxgüäxüçëx. ²⁵ Natürü ga Chauruarü ngüexüğü rü chütacü rü wüxi ga pexchi ga tacügu guma ñãneärü poxeguxütapüxëtüwa ínanachüxüetaüğüama, rü yemaäcü niña ga Chauru.

Yerucharéüwa nayexma ga Chauru

²⁶ Rü yexguma Yerucharéüwa nanguxgu ga Chauru, rü yema yaxögüxümaã nangutaquëxechaü. Natürü yema yaxögüxü rü nüxü namuüë, yerü nüma nüxü nacuëxgügu rü tama aixcüma Ngechuchuaxü nayaxö. ²⁷ Natürü Bernabé rü yema ngüexüğü ga Ngechuchu imugüxütanüwa nanagaama. Rü yema ngüexügümaã nüxü nixu ga ñuxäcü Cori ya Ngechuchuxü na nadauxü ga Chauru ga namawa, rü ñuxäcü Cori namaã na idexaxü. Rü nüxü nixu ta ga ñuxäcü Damacuwa rü tama namuüäcüma nüxü na yaxuxü ga Ngechuchuchiga. ²⁸ Rü yemaäcü ga Chauru rü Yerucharéügu narüxäüx. Rü yema ngüexüğü ga Tupana imugüxütanügu naxã. Rü tama namuüäcüma Cori ya Ngechuchuchigaxü nixuchigü. ²⁹ Rü yema Yudíugü ga Griégugawa idexagüxümaã nidexaxü ga Chauru, rü Ngechuchuchigagu nügümaã nayaporagaexü. Natürü ga nümagü rü naxcëx nadaugüama ga ñuxäcü tá na yamëxgüäxü. ³⁰ Rü yexguma nüxü yacuëächitanügu ga yema togü ga yaxögüxü, rü Checharéawa Chauruxü nagagü. Rü yexguma yéma nangugügu rü wüxi ga wapurugu nayamuëgü rü Tarsuwa naxü. ³¹ Rü yexguma rü meãma nüxü naxüpetü ga yema yaxögüxü ga guxüma ga Yudéaanewa, rü Gariréaanewa rü Chamáriaanewa. Rü yexeraäcü meã nayaxögüetanü rü aixcüma Tupana naxwëxëxüäcüma meã namaxë. Rü Tupanaãë i Üünexüärü ngüxëëmaã nimuëtanüãma ga yema yaxögüxü.

Eneã rü narüme

³² Rü yexguma Pedru yema yaxögüxütanügu ixüägüchigüxgu, rü yema Didágu ächiüğüxü ga yaxögüxütanüwa rü ta nangu. ³³ Rü yexma nüxü nayangau ga wüxi ga yatü ga Eneã ga naega ga 8 ga taunecü norü pechicagu cacü, yerü nanawäixächi. ³⁴ Rü Pedru ñanagürü nüxü: —Pa Eneãx, Ngechuchu ya Cristu cuxü narümeëë. ¡Inachi rü namexëë i cuxchapenüxü! —ñanagürü. Rü yexgumatama inachi. ³⁵ Rü guxüma ga yema Didáçüäxgü rü Charunacüäxgü rü nüxü nadaugü ga na inachixü ga guma yatü, rü nüxü narüxoe ga nacümagü ga chixexü, rü Cori ya Ngechuchuwe narüxi.

Wena imaxü ga Dorca

³⁶ Rü yexgumaäcüü ga ñãne ga Yopewa rü iyexma ga wüxi ga Tupanaãxü yaxöxcü ga ngecü ga Tabita ga ngíega. Rü ngëma naega i Griégugawa rü Dorca ñaxüchiga nixi. Rü ngíma rü wüxi ga mecü iyixi ga ngírü üwa, rü guxügüma nüxü irüngüxëë ga yema duüxüğü ga tacü nüxü taxuxü. ³⁷ Rü yexgumaäcüü iyadaawe ga Dorca, rü iyu, rü ngímücügü nanamexëë ga ngíxíne. Rü ípataarü daxüchiüwa yexmaxü ga ucapugu

nanaxügü ga ngĩxĩne. ³⁸ Rũ Yopearũ ngaicamana nayexma ga guma ããne ga Didá ga Pedru nawa yexmane. Rũ yema yaxõgũxũ ga Yopecũãx rũ nüxũ nacuèxgũ ga Didáwa na nayexmaxũ ga Pedru. Rũ naxcèx yéma nanamugũ ga taxre ga yatũ ñaxũmaã: — ¡Rũ paxa toxcèx nuã naxũ! —ñaxũmaã. ³⁹ Rũ yexguma ga Pedru rũ nawe narũxũ. Rũ yexguma ínanguxgu, rũ yema ucapu ga yema yueta nawa yexmaxũwa nanagagũ. Rũ guxũma ga yutegũxũ rũ Pedruxũ ínachomaẽguãchi, rũ naxauxe, rũ nüxũ nayawégũ ga yema naxchirugũ ga Tabita nüxũ íxũxũxũ ga yexguma namaũxgu. ⁴⁰ Rũ Pedru rũ düxétüwa nanamugũ ga guxũma. Rũ inacaxãpũxũ, rũ nayumüxẽ. Rũ ñuxũchi ngĩxcèx nadauegu ga yema yuxcü, rũ ñanagürü: —Pa Tabitax, ¡Írũda! —ñanagürü. Rũ yexguma rũ iyadauchixetü, rũ Pedruxũ idau, rũ írũto. ⁴¹ Rũ yexguma ngĩxmèxgu nayayauxãchi, rũ ngĩxũ inachixẽ. Rũ ñuxũchi naxcèx naca ga yema yaxõgũxũ rũ yema yutegũxũ, rũ maxũxcü nüxũ ngĩxũ nawèx. ⁴² Rũ guxũma ga yema duũxügũ ga Yopewa yexmagũxũ rũ nüxũ nacuáchigagũ ga yema. Rũ Cori ga Ngechuchuaxũ nayaxõgũ ga muxũma. ⁴³ Rũ muxũma ga ngunexũ Yopegu narũxãũx ga Pedru napatagu ga Chimáũ ga naxchèxmüãrũ paxèewa puracũxũ.

10

Pedru rũ Cornériuchiga

¹ Rũ ããne ga Checharéawa nayexma ga wüxi ga yatũ ga Cornériugu ãegacü. Rũ 100 ga Itáriaanecũãx ga churaragüarũ capitáũ nixĩ. ² Rũ nüma nixĩ ga wüxi ga yatũ ga meãma Tupanaãxũ yaxõcü. Rũ wüxigu namèxmaã rũ naxãcügũmaã Tupanaxũ nangechaügũ. Rũ mucũma ga norũ dïerumaã nüxũ narüngũxèẽ ga duũxügũ ga Yudíugũ ga tacü nüxũ taxuxũ. Rũ guxũguma nayumüxẽ rũ Tupanamaã nidexa. ³ Rũ wüxi ga ngunexũ ga yexguma tomaẽxpũxarũ orawa nanguxchaũgu ga yáuanecü, rũ nangõxetü. Rũ meãma nüxũ nadau ga wüxi ga Tupanaãrũ orearũ ngeruũ ga daxũcũãx ga yema ucapu ga nawa nayexmaxũgu ücuxũ. Rũ ñanagürü nüxũ: —Pa Cornériux —ñanagürü. ⁴ Natürü nüma ga Cornériu rũ meãma nüxũ nadawenü, rũ poraãcü namuũãcüma nüxna naca, rũ ñanagürü: —¿Tacü cunaxwèxe, Pa Corix? —ñanagürü. Rũ nanangãxũ ga yema orearũ ngeruũ ga daxũcũãx, rũ ñanagürü: —Curü yumüxègũ rũ Tupana marü cuxũ nüxũ naxĩnü, rũ cumaã nataãẽ na ñuxãcü nüxũ curüngũxèẽxũ i duũxügũ i tacü nüxũ taxuxũ. ⁵ —¡Rũ chanaxwèxe i Yopewa cunamugũ i ñuxre i yatügũ na naxcèx yacagũxècèx i wüxi i yatũ i Chimáũ i Pedrugu ãegaxũ! ⁶—Rũ to i Chimáũ i naxchèxmüãrũ paxèewa puracũxũpatawa nangèxma rũ ngèxma nape. Rũ yima napata rũ taxtũ i taxũcutüwa nangèxma —ñanagürü. ⁷ Rũ yexguma nüxna iyanatauxgu ga yema orearũ ngeruũ ga namaã yéma idexaxũ, rũ Cornériu rũ naxcèx naca ga taxre ga norũ puracütanũxũ rũ wüxi ga churara ga meã naga ñnüxũ ga meã Tupanaãxũ yaxõxũ. ⁸ Rũ namaã nüxũ nixu ga guxũma ga yema nüxũ nadauxũ, rũ ñuxũchi Yopewa nanamugũ. ⁹ Rũ moxũãcü ga yexguma namagu naxĩyane rũ marü Yopexũ yangaicagũgu ga yema duũxügũ ga Cornériu yéma mugũxũ, rũ Pedru rũ daxũ naxĩ ga ípataétüwa na yéma nayumüxèxècèx. Rũ tocuchiarũ oragu nixĩ ga yexguma. ¹⁰ Rũ nataiya, rũ nüxũ nachixéga ga na nachibüxũ. Rũ yexguma norũ õna ínaxügüyane, rũ nangõxetü ga Pedru. ¹¹ Rũ nüxũ nadau ga na yangõxnaxũ ga naãnetüwe, rũ yéma ínaruĩ ga wüxi ga naxchiru ga ñoma wüxi ga taxũ ga naxchápenüürü ixĩxũ. Rũ norũ ägümücüpèxewa naxãtũxũ rũ yemaãcü ínaruçhũxüẽ ñuxmata ñaxtũanewa nangu. ¹² Rũ yemagu ínaruçhũxüewetaxũ ga nagũxũraũxũ ga naèxügũ, rũ äxtapegũ, rũ werigũ. Rũ yema naxchápenüüwa nayexma ta ga tacü ga tama nangõxgũxũ ga Yudíugũ. ¹³ Rũ Pedru nüxũ naxĩnü ga Tupanaga ga nüxũ ñaxũ: —Pa Pedrux ¡Inachi, rũ ta imèx, rũ nangõx! —ñaxũ. ¹⁴ Rũ Pedru nanangãxũ rũ ñanagürü: —Taxucürüwa nixĩ, Pa Corix, erü taguma chanangõx i tacü i toxcèx ãũãchixũ —ñanagürü. ¹⁵ Rũ yexguma ga yema Tupanaga, rũ wenaxãrũ ñanagürü: —Ngèma choma chamexèẽxũ rũ tama name i ãũãchi nüxũ cuwogũ

—ñanagürü. ¹⁶ Rū tomaẽxpüxcüna yemaãcü nangupetü. Rū yexguma wenaxãrū daxũ nachüxnagü ga yema naxchãpenüü namaã ga guxũma ga nawa yexmagüxũ. ¹⁷ Rū poraãcü nagu narüxnü ga Pedru ga tacüchiga na yĩxũ ga yema nüxũ nadauxũ ga yexguma nangoxetügu. Rū yemagu ínaxĩnüyane, rü guma ìpataèxwa nangugü ga yema yatügü ga Cornériu yéma mugüxũ ga naxcèx ícaetanüxũ ga Chimáũpata. ¹⁸ Rū yéma naxcèx ínacagü rü aixcüma yexma nape ga wüxi ga yatü ga Chimáũ ga Pedrugu ãegaxũ. ¹⁹ Rū Pedru nagu íruxĩnüyane ga yema nüxũ nadauxũ ga yexguma nangoxetügu, rü Tupanaãe i Üünexũ rü ñanagürü nüxũ: —Ngẽägü nixĩ i tomaẽxpüx i yatügü i cuxcèx daugüxũ. ²⁰ —¡Inachi, rü íruxĩ, rü tama cuxoegaãẽãcüma nawe rüxũ! Erü choma nixĩ i núma chanamugüxũ —ñanagürü. ²¹ Rū yexguma naxcèx ínaxĩ ga Pedru, rü ñanagürü nüxũ ga yema yatügü: —Choma nixĩ i chaucèx pedaugüxũ. ¿Rü tacüwa nuã pexĩ? —ñanagürü. ²² Rū nümagü nanangãxügü, rü ñanagürügü: —Capitáũ ya Cornériuxütawa ne taxĩ rü núma nixĩ i nuã toxũ namugüxũ. Rū wüxi ya yatü ya mecü nixĩ, rü Tupanaxũ nangechaũ. Rū guxũma i Yudíugü nüxũ nangechaũ i nümax. Rū wüxi ga Tupanaãrū orearü ngerüũ ga daxüçũãx nanamu na cuxcèx toxũ yacaxẽèxüçèx ga Cornériu rü napatawa cuxüxüçèx rü nüxũ na naxĩnüxüçèx i curü ore —ñanagürügü. ²³ Rū yexguma nanachocuxẽe ga Pedru, rü yexma nanapegüxẽe ga yema chütaxügu. Rū moxüãcü inaxĩachi rü nawe narüxũ ga Pedru. Rū ínaxümmüçügü ga ñuxre ga Yopecũãx ga yaxögüxũ. ²⁴ Rū moxüãcü Checharéawa nangugü ga ngextá Cornériu ínanguxẽèxüwa namaã ga guxũma ga natanüxügü rü namüçügü ga nüxũ nangechaũgüxũ ga nüxna naxuxũ. ²⁵ Rū yexguma Cornériupatawa nanguxgu ga Pedru, rü ìaxtüwa naxcèx naxũ ga Cornériu, rü Pedrupëxegu nayacaxãpüxü, rü nüxũ nicuèxüü. ²⁶ Natürü ga Pedru rü inanachixẽe rü ñanagürü: —¡Inachi! Rū choma rü ta cuxrüũ duüxümare chixĩ rü tama Tupana chixĩ —ñanagürü. ²⁷ Rū nügümaã yadexagüãcüma wüxigu nichocu. Rū Pedru yéma namaã inayarüxũ ga muxüma ga duüxügü ga yexma ngutaquëxegüxũ. ²⁸ Rū yexguma ga Pedru rü ñanagürü nüxũ ga yema duüxügü ga yexma ngutaquëxegüxũ: —Pema nüxũ pecuèx i toma i Yudíugüçèx rü nangëxma i torü mugü i toxna nachuxuxũ na pemaã tangutaquëxegüxũ, rü pepatagu na tachocuxũ. Natürü Tupana choxũ nangoxetüxẽe rü choxũ nüxũ nadauxẽe na tama namexü na ngẽmaãcü nagu na charüxnüxũ pemaã. ²⁹ Rū ngẽmacèx tama chaxoõcüma núma chaxũ i ngëxguma chaucèx pengemagu. Rū ñuxma rü chanaxwèxe i chomaã nüxũ pixu na tacüçèx chaucèx pengemaxũ —ñanagürü. ³⁰ Rū Cornériu nanangãxũ, rü ñanagürü: —Marü ãgümüçü i ngunexũ nangupetü ga ñüxgumaãcü ga tomaẽxpüxarü oragu ga yáuanecü, rü nuã chopatawa chayumüxẽ erü guxüguma ngẽmaãcü chanaxü. Rū yexguma chayumüxẽgu rü changoxetü, rü chaucèx nangox ga wüxi ga yatü ga iyaurachirucüüxũ. ³¹ —Rü ñanagürü choxũ:

“Pa Cornériux, Tupana marü nüxũ naxĩnü i curü yumüxẽ rü cumaã nataãe na ñuxãcü nüxũ curüngüxẽxũ i duüxügü i tacü nüxũ taxuxũ. ³² —¡Rü Yopewa namugü i ñuxre i yatügü na naxcèx yacagüxüçèx i Chimáũ i Pedrugu ãegaxũ! Rū to i Chimáũ i naxchëxmüãrū paxẽewa puracüxüpatagu pexũ. Rū yima napata rü taxtü i taxücutüwa nangëxma”, ñanagürü choxũ. ³³ Rū yemacèx rü yexgumatama paxa cuxcèx yéma chanamugü, rü cuma rü mexü toxçèx cuxü erü núma cuxü. Rū ñuxma i guxãma i toma rü Tupanapëxewa tangëxmagü. Rū nüxũ taxĩnüèchaũ i gux-ũma i ngẽma ore i Cori namaã núma cuxü muxü na tomaã nüxũ quixuxüçèx —ñanagürü ga Cornériu.

Pedru rü Cornériupatawa nüxũ nixu ga Ngechuchuchiga

³⁴ Rū yexguma inanaxügü ga Pedru ga na yadexaxũ, rü ñanagürü: —Ñuxma waxi nixĩ i nüxũ chacuáxũ na Tupanacèx nawüxiguxũ i guxũma i duüxügü erü núma rü aixcüma guxãxüma nangechaũ. ³⁵ —Rü núma rü wüxichigü i nachiũãnewa nanade i ngẽma duüxügü i nüxũ ngechaũgüxũ rü mexü ügüxũ. ³⁶ —Rü núma ga Tupana rü Yudíugütanüwaxíra nanamu ga norü ore rü marü nüxũ nixu na tüxũ nüxũ nangechaũxũ

i tórü pecadugü i ngëxguma Cristu ya guxãârü Cori ixĩcüaxũ yaxõgügu. ³⁷ —Pema rü meãma nüxũ pecuèx na tacü ngupetüxũ ga guxũwama ga Yudíugüarü naãnewa. Rü noxri ga Cuáũ rü nüxũ nixu na Tupana naxwëxexũ na ínabaiũxũ ga duũxũgü. Rü yemawena ga Ngechuchu rü Gariréaanewa inanaxügü ga duũxũgümaã nüxũ na yaxuxũ ga ore i mexũ. ³⁸ —Rü pema nüxũ pecuèx ga ñuxãcü Tupana na naporaxëèxũ ga Ngechuchu ya Nacharétucũãx yerü nüxna nanaxã ga Naãë i Üünexũ. Rü nüma ga Ngechuchu rü mexũ naxü ga yema íyaxũgüxũwa, rü nanameèxëë ga guxũma ga yema duũxũgü ga ngoxoãxgüxũ. Rü yemaãcü nanaxü yerü Tupana nüxũ narüngüxëë. ³⁹ —Rü toma nixĩ ga nüxũ tadaugüxũ rü nüxũ tixuchigaxũ i guxũma ga naxüxũ ga Ngechuchu ga Yudéaanewa rü Yerucharéũârü ñãnewa. Rü yemawena rü nayamëxgü rü curuchawa nayapotagü. ⁴⁰ —Natürü ga Tupana rü tomaèxpüx ga ngunexũ ngupetügu rü wena nanamaxëë rü toxcèx nanangõxëë. ⁴¹ —Natürü tama guxũ ga duũxũgücèx nangõx. Rü toxcèxicatama nangõx ga toma ga üpamama Tupana toxũ dexe na nüxũ tixuxüçèx i Ngechuchuchiga. Rü yexguma marü yuwa ínadxguwena rü namaã tachibüe rü namaã taxaxegü. ⁴² —Rü nümatama ga Ngechuchu toxũ nimugü na duũxũgümaã nüxũ tixuxüçèx na Tupana marü ãëxgacüxũ yangucuchixëèxũ na guxũ i duũxũgüarü ngugüruũ na yĩxüçèx. Rü nüma ya Ngechuchu nixĩ i tórü maxüxũ nangugüxũ, rü nüma tá nixĩ i guxũ i duũxũgü i maxëxũ rü yuexüxũ yacagüxũ naxcèx i norü maxüchiga. ⁴³ —Rü üpamamatama guxũma ga Tupanaârü orearü uruügü rü Ngechuchuchiga nidexagü, rü ñanagürügü:
 “Rü nüma tá nüxũ nüxũ nangechaũ i norü pecadugü i guxũma i duũxũgü i nüxũ yaxõgüxũ”,
 ñanagürügü.

Tupanaãë i Üünexũ rü yema duũxũgü ga tama Yudíugü ixĩgüxũtanüwa nangu

⁴⁴ Rü yexguma íyadexayane ga Pedru, rü Tupanaãë i Üünexũ nüxna nangu ga guxũma ga yema yéma irüxĩnüèxũ ga yema ore. ⁴⁵ Rü yema yaxõgüxũ ga Yudíugü ga Pedrumaã yéma íxũ, rü poraãcü nabaixãchiãëgü yerü Tupanaãë i Üünexũ rü nüxna rü ta nangu ga yema duũxũgü ga tama Yudíugü ixĩgüxũ. ⁴⁶ Rü nüxũ naxĩnüë ga to ga nagawachigü na yadexagüxũ, rü Tupanaxũ na yacuèxüügüxũ. ⁴⁷ Rü yexguma ga Pedru rü ñanagürü:
 —¿Éxna nangëxmaxũ i texé na nüxna nachuxuxũ i na ínabaiũxũ i ñãã duũxũgü i marü taxrüũ Tupanaãë i Üünexũ nüxna nguxũ? —ñanagürü. ⁴⁸ Rü nanamu na Ngechuchu ya Cristuégagu na ínabaiũxũ ga yema duũxũgü ga yexwaca yaxõgüxũ. Rü yexguma Pedruxũ nacèèxüügü na yexma naxãüxüçèx ga ñuxre ga ngunexũ.

11

Pedru rü Yerucharéüwa yexmagüxũ ga yaxõgüxũmaã nüxũ nixu ga tacü na ngupetüxũ ga Checharéawa

¹ Rü yema ngüexüügü ga Ngechuchu imugüxũ rü yema yaxõgüxũ ga Yudéagugüxũ, rü nüxũ nacuáchigagü na yema tama Yudíugü ixĩgüxũ rü ta nayauxgüãxũ ga Tupanaârü ore. ² Natürü yexguma Yerucharéüwa nanguxgu ga Pedru, rü ñuxre ga Yudíugü ga yaxõgüxũ rü Pedruxũ nixugüe. ³ Rü ñanagürügü: —¿Rü tüxcüũ natanüwa cuxü i ngëma tama Yudíugü ixĩgüxũ, rü namaã cuchibü? —ñanagürügü. ⁴ Rü Pedru meãma namaã nüxũ nixu ga guxũma ga tacü na ngupetüxũ, rü ñanagürü nüxũ: ⁵ —Choma rü Yopëarü ñãnewa chayexma, rü yexguma íchayumüxëyane, rü changõxetü. Rü nüxũ chadau ga wüxi ga naxchápenüürü ixĩxũ ga norü ägümücüpëxewa ätüxüxũ ga írüçhüxüexũ ñuxmata chauxütawa nguxũ. ⁶ —Rü meãma nüxũ chadawenü na nüxũ chadauxüçèx na tacü yexmaxũ ga aixepewa. Rü nüxũ chadau ga naxünagü ga ixãgümücüparaxũ rü naëxüügü ga idüraexũ, rü äxtapegü rü werigü. Rü yema naxchápenüüwa nayexma ta ga tacü ga

tama ingõxü, erü taxcèx i yixema i Yudíugü rü naxãũãchi. ⁷—Rü nüxü chaxĩnü ta ga Tupanaga ga choxü ñaxü:

“¡Inachi! Pa Pedrux. ¡Rü ta imèx, rü nangõx!” ñaxü. ⁸—Natürü choma chanangãxü, rü ñacharügü:

“Taxucürüwa nixĩ, Pa Corix, erü taguma chanangõx i tacü i toxcèx ãũãchixü”, ñacharügü. ⁹—Rü yexguma wenaxãrü ñanagürü choxü ga yema Tupanaga ga daxüwa inaxüxü:

“Ngẽma choma i Tupana chamexẽxü, rü tama name i ãũãchi nüxü cuwogü”, ñanagürü. ¹⁰—Rü tomaẽxpüxcüna yemaãcü nangupetü, rü yexguma wenaxãrü daxü nachüxnagü ga yema naxchãpenüü namaã ga guxüma ga nawa yexmagüxü. ¹¹—Rü yexgumatama guma ĩ ga nawa chayexmanewa nangugü ga tomaẽxpüx ga yatügü ga Checharéawa ne mugüxü ga chauxcèx daugüxü. ¹²—Rü Tupanaãe i Üünexü choxü namu na nawe charüxüxcèx woo tama Yudíugü na yixigüxü ga yema duüxügü. Rü chomaã ta yéma naxĩ ga ñaã 6 ga yaxõgüxü. Rü napatawa tangugü ga guma yatü ga Cornériu, rü yexma tachocu. ¹³—Rü tomaã nüxü nixu ga ñuxãcü na napatawa nüxü nadauxü ga Tupanaãrü orearü ngeruü ga daxücüãx ga yexma chixü ga ñaxü nüxü:

“¡Yopewa namugü i yatügü na naxcèx yacagüxcèx i Chimáü i Pedrugu ãegaxü! ¹⁴—Rü nüma tá cumaã nüxü nixu na ñuxãcü tá cuma rü guxü i cupatagugüxümaã penayaxuxü i perü maxü i taguma gúxü”, ñanagürü nüxü. ¹⁵—Rü yexguma ichanaxügüga ga na chidexaxü, rü nüxna nangu ga Tupanaãe i Üünexü, yexgumarüü ga noxri tüxna nangugurüü. ¹⁶—Rü yexguma ga choma rü nüxna chacuèxãchi ga Cori ya Ngechuchuarü ore ga yexguma ñaxgu:

“Rü aixcüma nixĩ ga Cuáü ga dexáwamare ínabaiüxẽãxü, natürü i pema rü Tupanaãe i Üünexü tá pexna nangu”, ñaxgu. ¹⁷—Rü pema nüxü pecuèx na ñuxãcü Tupana tüxna nanguxẽxü ga Naãe i Üünexü i yixema na Cori ya Ngechuchu ya Cristuaxü yaxõgüxü. Rü ñuxma na taxrüü Tupana yema duüxügüna nanguxẽxü ga Naãe i Üünexü, ¿rü ñuxcürüwa i choma i nüxü chaxoxü na naga chaxĩnüxü ya Tupana? —ñanagürü ga Pedru. ¹⁸ Rü yexguma yema orexü naxĩnüëgu ga yema yaxõgüxü ga Yerucharéücüãx, rü nachianegümare. Rü Tupanaxü nicuèxüügü. Rü ñanagürügü: —Rü ngẽmawa nüxü tacuèx na Tupana tüxü dexü ya yixema woo tama Yudíugü ixigüxe. Rü ngẽxguma nüxü tarüxoegu i tümaãrü chixexü rü Tupanacèx tadaugügu, rü nüma tüxna nanaxã i maxü i taguma gúxü —ñanagürügü.

Yaxõgüxü ga Aütioquíawa yexmagüxüchiga

¹⁹ Rü yexguma Etébaüxü yamèxgüguwena, rü norü uwanügü poraãcü nawe ningëxütanü ga yema yaxõgüxü. Rü yemacèx nügü nawoone. Rü Peníchiawa, rü Chiprewa rü Aütioquíawa nabuxmü. Rü yéma nüxü nixugüe ga ore ga mexü ga Ngechuchuchiga. Natürü Yudíugümaãxĩcatama nüxü nixugüe ga yema ore rü tama ga togümaã. ²⁰ Natürü yéma Aütioquíawa nangugü ta ga ñuxre ga togü ga yaxõgüxü ga Chíperecüãx, rü Chirenecüãx. Rü nümagü rü yema tama Yudíugü ixigüxümaã rü ta nüxü nixugüe ga ore i mexü i Cori ya Ngechuchuchiga. ²¹ Rü Tupana nüxü narüngüxẽe, rü nanaporaexẽe. Rü yemacèx muxüma ga yema duüxügü rü nüxü narüxoe ga nuxcümaüxü ga nacümagü, rü Cori ya Ngechuchuaxü nayaxõgü. ²² Rü yexguma yemaxü nacuáchigagügu ga yema yaxõgüxü ga Yerucharéüwa yexmagüxü, rü Aütioquíawa nanamugü ga Bernabé. ²³ Rü yexguma yéma nanguxgu ga Bernabé, rü nüxü nadau ga ñuxãcü Tupana nüxü na rüngüxẽxü ga yema yaxõgüxü ga Aütioquíacüãx, rü poraãcü namaã nataãe. Rü nayaxucuxëgü ga guxüma na meãma Cori ya Ngechuchuwe naxĩamaxüxcèx, rü taguma nüxü naxoexüxcèx. ²⁴ Yerü nüma ga Bernabé rü wüxi ga yatü ga mecü nixĩ. Rü aixcüma Tupanaãe i Üünexü rü nawa nayexma, rü napora ga norü õwa. Rü yemacèx muxüchixüma ga duüxügü rü Cori ya Ngechuchucèx naxĩ rü nüxü

nayaxōgū. ²⁵ Rū yemawena ga Bernabé rü Tarsuwa naxū na Chaurucèx yadauxūcèx. ²⁶ Rū yexguma nūxū iyangauxgu, rü Aūtioquíawa nanaga. Rū wūxi ga tauncü wūxiwa yéma nayexmagü namaã ga yema yaxōgūxū. Rū nanangúexēē ga muxūchixūma ga duūxūgū. Rū Aūtioquíawa nixī ga inaxūgūxū ga duūxūgū na Cristutanūxūmaã na naxugūãxū ga yema yaxōgūxū. ²⁷ Rū yexgumaūcūū Yerucharéūwa ne naxī ga ñuxre ga Tupanaārū orearū uruūgū rü Aūtioquíawa naxī. ²⁸ Rū natanūwa nayexma ga wūxi ga orearū uruū ga Agabu ga naega. Rū nanangutaquēxexēē ga yema yaxōgūxū ga Aūtioquíawa yexmagūxū. Rū yema ngutaquēxewa rü inachi ga Agabu rü Tupanaãē i Ūünexū nanamu ga na yadexaxū, rü ñanagürü: —Wūxi i taiya i taxū tá ínangu i guxū i ñaã nachiūñewa —ñanagürü. Rū aixcūma ínangu ga yema taiya ga yexguma Cáudiu ãēxgacū ixīxgu. ²⁹ Rū yexguma ga yema yaxōgūxū ga Aūtioquíawa yexmagūxū, rü marū wūxigu nagu narūxīnūē na yéma ngīxū namugūxūcèx ga dīeru na nūxū nangūxēēgūxūcèx ga yema yaxōgūxū ga Yudéaanegu āchiūgūxū. Rū wūxichigū ngīxū inaxā ga dīeru yexgumarūū ga ñuxre ga nūxū yexmacū. ³⁰ Rū yemaãcū nanaxūgū, rü Bernabé rü Chaurumaã yéma ngīxū namugū ga yema dīeru naxcèx ga yema yaxōgūxūārū ãēxgacūgū ga Yudéaanewa yexmagūxū.

12

Āēxgacū ga Erode rü Chaūtiáguxū nimèx rü Pedruxū napoxcu

¹ Rū yexgumaūcūū inanaxūgū ga āēxgacū ga Erode ga na ínayauxūãxū ga ñuxre ga yaxōgūxū ga Yerucharéūcūãx na napoxcuexūcèx. ² Rū norū churaragūxū namu na taramaã Chaūtiágu ga Cuáūēneēxū yamèxgūxūcèx. ³ Rū yexguma nūxū nadèuxgu ga Erode ga norū me na yīxū ga Yudíugū ga yema na naxūxū, rü norū churaragūxū namu na Pedruxū rü ta yayauxgūxūcèx. Rū yema nangupetū ga Yudíugūarū peta ga Ūpetūchigagu ga yexguma pāū ga ngearū puxēēruūãxū nangōxgūgu. ⁴ Rū yexguma Pedruxū yayauxgūgu, rü poxcupataūgu nayatēxcuchi. Rū ñuxūchi ga Erode rü nanamu ga āgūmūcūtūcumū ga norū churaragū na nūxna nadaugūxūcèx. Rū wūxitūcumūwachigū rü nayexma ga āgūmūcū ga churaragū. Rū yemaãcū nanaxū ga Erode, yerū nagu narūxīnū ga yema petawena guxū ga duūxūgūpēxewa na nagaãxūcèx na yamèxgūãxūcèx. ⁵ Rū yemaãcū ga Pedru rü poxcupataūwa nayexma rü churaragū rü meãma nūxna nadaugū. Natürü ga yema yaxōgūxū ga Yerucharéūcūãx rü poraãcū nayumūxēgū, rü Tupanana naxcèx nacagū.

Tupana rü Pedruxū ínanguxuchixēē ga poxcupataūwa

⁶ Rū yematama ga chūtaxūgu naxūpa ga yema ngunexū ga Erode duūxūgūpēxewa nagaxchaūxū, rü taxre ga churaragūarū ngāxūwa nape ga Pedru. Rū taxre ga cadena-maã ninèixgūchacūū. Rū togū ga churaragū ga dauxūtaexū nūxna nadaugū ga poxcupataūārū iãx. ⁷ Rū ngürūāchi yema poxcupataūwa nangox ga wūxi ga orearū ngeruū ga daxūcūãx ga Coriarū. Rū poraãcū nangóone ga guma poxcupataūwa. Rū yema orearū ngeruū Pedruxū nacuxagū, rü nanabaixāchixēē. Rū ñanagürü: —¡Paxama írūda! —ñanagürü. Rū yexgumatama íniwēgū ga guma cadena ga Pedru namaã inèixgūchacūūcū. ⁸ Rū Pedruxū ñanagürü ga yema orearū ngeruū: —¡Rū icūxcuchichiru rü nacuaixcu i curū chapatu! —ñanagürü. Rū yemaãcū nanaxū ga Pedru. Rū ñanagürü ta: —¡Rū icūxcuchi i curū gāuxūchiru, rü chowe rūxū! —ñanagürü. ⁹ Rū nawe narūxū ga Pedru. Rū tama nūxū nacūex ga aixcūma na yīxū ga yema orearū ngeruū namaã ūxū. Rū naxcèx rü nangoxetūmare. ¹⁰ Rū nūxū nachopetū ga nūxīraūxū ga dauxūtaexū, rü ñuxūchi ga yema to ga dauxūtaexū. Rū yexguma nawa nangugūgu ga yema iãx ga áchumenèxānaxcèx ga ítamūwaama ūxū, rü nūēchama niwāxna. Rū ínachoxū. Rū yexguma marū wūxi ga ítamū inaxīxgu, rü nūxna inayarūtaxu ga yema orearū ngeruū. ¹¹ Rū yexguma nūxū nicūexāchi ga Pedru, rü nūgūmaã ñanagürü: —Ñuxma waxi i nūxū chacuáxū na aixcūma Cori ya

Tupana núma namuxŭ i norŭ orearŭ ngeruŭ na Erodemĕxĕwa choxŭ napuxŭ, rŭ nawa choxŭ ínanguxuchixĕĕxŭ i guxŭma i ngĕma chomaã naxŭgŭchaŭxŭ i ngĕma Yudŭgŭ i tama yaxŭgŭxŭ —ñanagŭrŭ. ¹² Rŭ yexguma yemaxŭ yacuĕxĕchigu ga Pedru, rŭ ngĭpatawa naxŭ ga wŭxi ga ngecŭ ga Mariagu ãegacŭ. Rŭ ngĭma iyixĭ ga Cuáŭ Marcu naĕ. Rŭ yĕma nangutaquĕxegŭ ga muxŭma ga duŭxŭgŭ ga yĕma yumŭxĕgŭxŭ. ¹³ Rŭ íĕxtŭarŭ poxeguxŭârŭ íĕxwa, rŭ: —Tu tu tu —ñanagŭrŭ ga Pedru. Rŭ wŭxi ga pacŭ ga Rode ga ngĭega íyadau. ¹⁴ Rŭ yexguma nagawa nŭxŭ nacuĕxgu ga na Pedru yĭxŭ, rŭ ngĭrŭ taãĕmaã rŭ íyafñamare na nŭxŭ yanaxuxŭ ga na Pedru yĭxŭ ga íĕxtŭarŭ íĕxgu chicŭ. Rŭ tama iyawĕxna ga íĕx. ¹⁵ Rŭ yema yexmagŭxŭ rŭ: —Cungĕãĕmare —ñanagŭrŭgŭ ngĭxŭ. Natŭrŭ ngĭma rŭ: —Aixcŭma nixĭ—ngĭgŭrŭgŭ. Rŭ yexguma ñanagŭrŭgŭ: —Maneca tama nŭma nixĭ. Rŭ norŭ dauruŭ i daxŭcŭĕxmare nixĭ —ñanagŭrŭgŭ. ¹⁶ Natŭrŭ ga Pedru rŭ yoxni íĕxwa: —Tu tu tu —ñanagŭrŭama. Rŭ yexguma naxcĕ x yawĕxnaãgu rŭ nŭxŭ nadaugŭgu ga Pedru na yĭxŭ, rŭ nabaixĕchiãĕgŭ. ¹⁷ Natŭrŭ nŭma naxunagŭmĕxĕ, rŭ naxmĕxmaã nayanachianexĕĕgŭ. Rŭ namaã nŭxŭ nixu na ñuxĕcŭ Cori ínanguxuchixĕĕxŭ ga poxcupataŭwa. Rŭ ñanagŭrŭ ta: —ĭChaŭtiãgumaã rŭ ngĕma togŭ i yaxŭgŭxŭmaã nŭxŭ pixu i ngĕma ore! —ñanagŭrŭ. Rŭ yexguma inaxŭãchi, rŭ toxnamana naxŭ. ¹⁸ Rŭ yexguma yangunegu, rŭ yema churaragŭ ga poxcupataŭwa dauŭtaegŭxŭ rŭ poraãcŭ nanaxĭxĕchiãĕgŭ yerŭ tama nŭxŭ nacuĕxgu ga tacŭ na ngupetŭxŭ namaã ga Pedru. ¹⁹ Rŭ yemacĕx ga Erode rŭ yema churaragŭxŭ namu na Pedrucĕx yadaugŭxĕcĕx. Rŭ yexguma taxuxŭma iyangaugŭgu, rŭ Erode rŭ yema churaragŭgutama nananguxĕĕ na nayuexĕcĕx. Rŭ yemawena ga Erode rŭ ínaxŭxŭ ga Yudĕaanewa, rŭ Checharĕagu nayaxĕchiŭ.

Nayu ga Erode

²⁰ Rŭ Erode rŭ namaã nanu ga Tirucŭĕxgŭ rŭ Chi-dãŭcŭĕxgŭ. Natŭrŭ ga yema Tirucŭĕxgŭ rŭ Chidãŭcŭĕxgŭ rŭ naxcĕx nadaugŭ na ñuxĕcŭ Erodexŭ nangŭxmŭxĕĕgŭxŭ, yerŭ Erodexĭŭãnewa nixĭ ga nayauxgŭãxŭ ga nabŭ. Rŭ yemacĕx wŭxi ga Erodearŭ duŭxŭ ga ãĕxgacŭ ga Batumaã naxãmŭcŭgŭ na nŭxŭ nangŭxĕĕxĕcĕx na Erodemaã yadexagŭxĕcĕx. ²¹ Rŭ Erode rŭ namaã inaxuneta ga wŭxi ga ngunexŭ na namaã yadexaxĕcĕx. Rŭ yexguma yema ngunexŭ ga nagu inaxunetaxŭwa nanguxgu, rŭ yema Tirucŭĕx rŭ Chidãŭcŭĕx rŭ Erodexŭtawa nangugŭ. Rŭ nicŭxcuchi ga Erode ga norŭ ãĕxgacŭchiru, rŭ norŭ tochicaxŭwa narŭto, rŭ duŭxŭgŭmaã nŭxŭ nixu ga norŭ ore. ²² Rŭ yexguma ga guxŭma ga yema duŭxŭgŭ rŭ tagaãcŭ ñanagŭrŭgŭ: —Ñãã ãĕxgacŭ rŭ tama duŭxŭârŭ dexarŭŭ nixĭ i norŭ dexa, natŭrŭ ñoma Tupanaârŭ dexarŭŭ nixĭ —ñanagŭrŭgŭ. ²³ Rŭ Erode rŭ yema duŭxŭgŭarŭ oremaã nataãĕ, rŭ tama Tupanaxŭ nicuĕxŭĕchaŭ ga ñuxĕcŭ Tupana nŭxŭ narŭngŭxĕĕxŭ. Rŭ yemacĕx wŭxi ga Tupanaârŭ orearŭ ngeruŭ ga daxŭcŭĕx rŭ yexgumatama Erodexŭ nidaawexĕĕ. Rŭ õxmigŭ nanangŭx, rŭ yemamaã nayu. ²⁴ Natŭrŭ yema yaxŭgŭxŭ rŭ yexeraãcŭ guxŭwama nŭxŭ nixugŭe ga Cori ga Tupanaârŭ ore. Rŭ muxŭchixŭ ga duŭxŭgŭ nŭxŭ nayaxŭgŭ. ²⁵ Rŭ yexguma marŭ yanguxĕĕãgu ga norŭ puracŭ ga Chauru rŭ Bernabĕ, rŭ ínaxoxŭ ga Yerucharĕŭwa, rŭ wenaxârŭ Aŭtioquiacĕx nawoegu. Rŭ nayagagŭ ga Cuáŭ Marcu.

13

Bernabĕ rŭ Chauru rŭ inanaxŭgŭe ga to ga nachĭŭãnewa na nangegŭãxŭ ga Tupanaârŭ ore

¹ Rŭ yema yaxŭgŭxŭ ga Aŭtioquíaawa yexmagŭxŭtanŭwa rŭ nayexma ga ñuxre ga yatŭgŭ ga Tupanaârŭ orearŭ uruŭgŭ, rŭ ñuxre ga yatŭgŭ ga Tupanaârŭ orewa nguxĕĕtaegŭxŭ. Rŭ yematanŭwa nayexma ga Bernabĕ, rŭ Chimáŭ ga Waxwegu ãegaxŭ, rŭ Dúchiu ga Chireneçŭĕx, rŭ Manae ga wŭxigu ãĕxgacŭ ga Erodemaã yaexŭ, rŭ Chauru. ² Rŭ wŭxi ga ngunexŭ ga yexguma Coricĕx ínangutaquĕxegŭgu rŭ tama

nachibüeäcüma ínayumüxëgüguyane, rü Tupanaãe i Üünexü rü ñanagürü nüxü: —¡Choxna penamugü i Chauru rü Bernabé na naxügüãxücèx i ngëma puracü i choma nawa chana-mugüchaüxü! —ñanagürü. ³ Rü yexguma nüxü nachauegu ga tama nachibüeäcüma na nayumüxëgüxü, rü Chauru rü Bernabéétügu naxümëxgü ga yema yaxögüxü, rü ñuxüchi inanamuächitanü na naxügüãxücèx ga Tupanaärü puracü.

Chiprewa naxi ga Bernabé rü Chauru

⁴⁻⁵ Rü Tupanaãe i Üünexü rü inanamuächitanü ga Bernabé rü Chauru. Rü ñãne ga Cheúchiawa naxi, rü gumaärü türewa inaxiãchi, rü capaxü ga Chiprewa naxi. Rü Cuáü Marcu nawe narüxü na nüxü nangüxëëxücèx. Rü yexguma Charamína ga ñãneärü türewa nangugügu, rü inanaxügüe ga nüxü na yaxugüxü ga Tupanaärü ore ga Yudíugüarü ngutaquëxepataügwä. ⁶ Rü guxügu nixiãgütanü ga yema capaxüwa ñuxmata Papu ga ñãnewa nangugü. Rü yéma namaã inayarüxi ga wüxi ga Yudíu ga yuüxü ga Barechúgu äegaxü. Rü nüma rü wüxi ga idoratëxáxü nixi yerü nügü yaxuxgu rü aixcüma Tupanaärü orearü uruü nixi. ⁷ Rü nayexma ga yema capaxüärü äëxgacü ga Chérquiu Paurugu äegaxü. Rü nüma nixi ga wüxi ga yatü ga meã naãëxü cuácü. Rü yema yuüxü rü guma äëxgacüarü ngüxëëruü nixi. Rü nüma ga äëxgacü rü norü duüxügüxü namu na Chauru rü Bernabécèx yacagüxücèx, yerü nüxü naxinüchaü ga Tupanaärü ore. ⁸ Natürü yema yuüxü ga Griégugawa Erimínugu äegaxü, rü Chauru rü Bernabéna nayanuxü na Tupanaärü orexü yaxugüxü. Yerü tama nanaxwëxe na yaxöðxü ga guma äëxgacü. ⁹⁻¹⁰ Natürü ga Chauru ga Paurugu ta äegaxü, rü aixcüma Tupanaãe i Üünexü nawa nayexma. Rü nüma ga Pauru rü meãma nüxü nadawenü ga yema yuüxü, rü ñanagürü nüxü: —Pa Idoratëxáxü Pa ngoxo Nanex, cuma rü chixëxücatama cuxüchaü, rü naxchi cuxai i guxüma i mexü. ¿Ñuxgura tá ta i nüxü curüxoxü na ícuyatóxëëxü i Cori ya Tupanaärü ore i aixcüma ixixü? ¹¹ —Ñuxmatátama cuxü napoxcu ya Cori ya Tupana. Rü tá cungexetü, rü ñuxre i ngunexügu rü täütáma nüxü cudau ya üëxcü —ñanagürü. Rü yexgumatama naxcèx naxëänëxüchi ga yema yuüxü, rü naxmëxmaã nadaugü na texé naxmëxgu yayauxächixücèx rü namaã ítixüxücèx. ¹² Rü yexguma yemaxü nadëuxgu ga yema capaxüärü äëxgacü rü nayaxö ga Tupanaärü ore, yerü namaã nañaxächiaë ga yema Pauru rü Bernabé nüxü ngüxëëxü ga Cori ya Tupanachiga.

Pauru rü Bernabé rü Pichídiaanewa yexmane ga ñãne ga Aütioquíawa nangugü

¹³ Rü Papuwa inaxiãchi ga Pauru namücügümaã rü nixãü ga taxtü ga taxüwa. Rü Pérupe ga ñãnewa nangugü ga Paüpíriaanewa. Natürü yéma nüxna naxo ga Cuáü Marcu, rü Yerucharéücèx nataegu. ¹⁴ Rü Pérupewa inaxiãchi ga Pauru rü Bernabé rü ñãne ga Aütioquíawa nangugü ga Pichídiaanewa. Rü yéma rü ngüxchigaarü ngunexügu rü Yudíugüarü ngutaquëxepataügu nachocu, rü yéma narütogü natanüwa ga yema íngutaquëxëgüxü. ¹⁵ Rü yema ngutaquëxewa rü nüxü nadaumatügü ga Tupanaärü mugü ga Moíché ümatüxü rü yema ore ga Tupanaärü orearü uruügü ümatüxü. Rü yemawena, rü guma ngutaquëxepataüärü äëxgacügü, rü Bernabé rü Pauruna nacagü, rü ñanagürügü: —Pa Toeneëgüx, ngëxguma pexü nangëxmagu i perü ore i taãëxëëruü i toxcèx rü marü name i ñuxma tomaã nüxü pixu —ñanagürügü. ¹⁶ Rü yexguma inachi ga Pauru, rü naxunagümëxë na iyanachianëxücèx ga duüxügü. Rü yexguma duüxügümaã nidëxa, rü ñanagürü: —Pa Duüxügü Pa Chautanüxügüx rü Guxãma i Pema i To i Nachiüãnecüãx Ixígüxex ya Tupanaxü Ngechaügüxe, rü ¡perüxínüé! ¹⁷ —Yima tórü Tupana i yixema i Yudíugü, rü tüxü nade ga nuxcümaügüxe ga tórü oxigü na tüxü nangüxëëxücèx. Rü poraãcü tüxü nimuxëë ga yexguma woo to ga nachiüãne ga Equituanewa tayexmagügu. Rü yemaãcü wüxi ga taxü ga nachiüãne tüxü nixígüxëë. Rü ñuxüchi yemawena, rü norü poramaã tüxü ínagaxü ga yema naãnewa. ¹⁸ —Rü dauxchitawa ga ngextá taxüema íxãpataxüwa tüxü nagagü. Rü yéma 40 ga taunecü Tupana yaxna tümamaã naxinü ga guxema tórü oxigü. ¹⁹ —Rü Tupana nanadai ga yema

7 ga ãĕxgacŭgŭ ga Canaãñecŭãxgŭ guxŭma ga norŭ duŭxŭgŭmaãchigŭ. Rŭ yemaãcŭ nanaxŭ na tŏrŭ օxigŭna naxããxŭcèx ga yema naãne na tŭmaãrŭgŭxŭchi yŭxŭcèx. ²⁰—Rŭ 450 ga taunecŭ rŭ yemaãcŭ tŭxŭ narŭngŭxèè. Rŭ yemawena rŭ tŭxna nanamu ga togŭ ga ãĕxgacŭgŭ ga dauruŭgŭ ñŭxmata Tupanaãrŭ orearŭ uruŭ ga Chamuĕ ingucuchix. ²¹—Rŭ yexguma ga duŭxŭgŭ rŭ Tupanana naxcèx nacagŭ ga wŭxi ga ãĕxgacŭ ga rei na namaã inacuãxŭcèx. Rŭ Tupana rŭ nŭxna nanamu ga Chaú ga Chiche nane ga Beyamítaa ixŭcŭ. Rŭ nŭma nŭxna nadau ga duŭxŭgŭ ga 40 ga taunecŭgu. ²²Rŭ yemawena ga Tupana rŭ Ínanatèxŭchi ga Chaú, rŭ Dabíxŭ naxuneta na guma norŭ ãĕxgacŭ yŭxŭcèx. Rŭ Dabíxŭ nixuchiga ga Tupana, rŭ ñanagŭrŭ:

“Nŭxŭ chadau rŭ Dabí ya Ichaí nane rŭ wŭxi ya yatŭ ya poraãcŭ choxŭ ngŭchaŭcŭ nixŭ. Rŭ nŭma tá nanaxŭ i guxŭma i ngĕma choma chanaxwèxexŭ”, ñanagŭrŭ ga Tupana. ²³Rŭ nuxcŭma ga Tupana rŭ marŭ inaxuneta rŭ wŭxi i Dabítaa tá nixŭ i Cristu ixŭxŭ, rŭ tá nanamaxèxèè i Yudíugŭ. Rŭ Ngechuchu nixŭ ga guma maxèxèeruŭ ga tŏrŭ օxigŭmaã nŭxŭ yaxucŭ ga Tupana. ²⁴Natŭrŭ naxŭpa ga Ngechuchu na Ínguxŭ, rŭ Cuáŭ ga baiŭxèèeruŭ rŭ guxŭma ga Yudíugŭmaã nŭxŭ nixuchiga ga ore i mexŭ rŭ ñanagŭrŭ:

“Rŭ name nixŭ i nŭxŭ perŭxoe i pecŭma i chixexŭ, rŭ Tupanacèx pedaugŭ, rŭ ípebaiŭ”, ñanagŭrŭ. ²⁵Rŭ yexguma marŭ yangaicaxgu ga tá na nayuxŭ ga Cuáŭ, rŭ ñanagŭrŭ:

“Rŭ tama choma nixŭ i ngĕma pema nagu perŭxŭnŭèxŭ i Cristu chiŭxŭ. Natŭrŭ chowema ne naxŭ i nŭma ya aixcŭma Cristu ixŭcŭ. Rŭ choma rŭ napĕxewa taxuwama chame, rŭ bai i norŭ chapatucunŭãrŭ wĕgŭwaxŭra chame erŭ nŭma rŭ wŭxi i ãĕxgacŭ i tacŭxŭchima nixŭ”, ñanagŭrŭ ga Cuáŭ. ²⁶Rŭ ñanagŭrŭ ga Pauru, —Pa Chautanŭxŭgŭ i Abráŭtaagŭx, rŭ Guxãma i Pema i To i Nachiŭãñecŭãx i Tupanaxŭ Ngechaŭgŭxex, rŭ pexcèx nixŭ i ñaã ore i tŭxŭ maxèxèèxŭ. ²⁷—Rŭ aixcŭma yema Yerucharéŭcŭãxgŭ ga duŭxŭgŭ rŭ yema norŭ ãĕxgacŭgŭ rŭ tama nŭxŭ nacuèxgŭ ga Tupana Nane na yŭxŭ ga Ngechuchu. Rŭ tama meã nŭxŭ nacuèxgŭ ga tacŭchiga na yŭxŭ ga yema ore ga nuxcŭmaŭgŭxŭ ga Tupanaãrŭ orearŭ uruŭgŭ ũmatŭxŭ i ñŭxma perŭ ngutaquĕxepataŭwa nŭxŭ pedamatŭgŭxŭ i wŭxichigŭ i ngŭxchigaarŭ ngunexŭgu. Rŭ yemaãcŭ nŭmagŭtama ga yema duŭxŭgŭ ga Ngechuchuxŭ imèxgŭxŭ rŭ yexguma yamèxgŭãgu rŭ nayanguxèè ga yema ore ga nuxcŭma ũmatŭxŭ. ²⁸—Rŭ woo taxuŭma ga tacŭ ga chixexŭ nawa inayangaugŭ na nayuxèèãxŭcèx, natŭrŭ Piratuna naxcèx nacagŭ na yamáãxŭcèx. ²⁹—Rŭ ningu ga guxŭma ga yema ore ga Tupanaãrŭ orearŭ uruŭgŭ ũmatŭxŭ ga Ngechuchuchiga ga ñŭxãcŭ tá na nayuxŭ. Rŭ yemawena rŭ nanayauxgŭ ga naxŭne ga curuchawa, rŭ wŭxi ga naxmaxŭgu nayanaxŭcuchigŭ. ³⁰—Natŭrŭ ga Tupana rŭ wena nanamaxèè ga woo marŭ na nayuxŭ. ³¹—Rŭ nŭma ga Ngechuchu rŭ muxŭma ga ngunexŭ naxcèx nangox ga yema duŭxŭgŭ ga nawe rŭxŭxŭ ga yexguma Gariréaanewa ne naxŭxgu rŭ Yerucharéŭwa naxŭxgu. Rŭ ngĕma duŭxŭgŭ nixŭ i ñŭxma i guxŭ i duŭxŭgŭmaã nŭxŭ ixugŭxŭ i nachiga. ³²⁻³³Rŭ ngĕmaãcŭ i toma rŭ núma tangugŭ na pemaã nŭxŭ tixuxŭcèx i ngĕma ore i aixcŭma mexŭ. Rŭ dŭcax, rŭ yema uneta ga nuxcŭmaŭgŭxŭ ga tŏrŭ օxigŭmaã nŭxŭ yaxuxŭ ga Tupana, rŭ taxcèx nayanguxèè ga yexguma Ngechuchuxŭ wena namaxèègu. Rŭ wŭyaegŭpanewa i norŭ taxre i capíturuwa rŭ ngĕmachiga nŭxŭ nixu i ngĕxguma:

“Cuma nixŭ i Chaune, rŭ choma nixŭ i Cunatŭ chiŭxŭ”, ñaxgu. ³⁴—Rŭ Tupana rŭ nuxcŭma rŭ marŭ nŭxŭ nixu ga wena tá na namaxèèãxŭ ga Ngechuchu na tama yayixixŭcèx ga naxŭne. Rŭ norŭ orewa rŭ ñanagŭrŭ:

“Rŭ choma tá pexcèx chayanguxèè ga yema unetagŭ i ũnègŭxŭ i aixcŭma ixŭgŭxŭ ga nuxcŭma Dabímaã nŭxŭ chixuxŭ”, ñanagŭrŭ. ³⁵—Rŭ ngĕmacèx toxnamana i Tupanaãrŭ orewa rŭ ñanagŭrŭ ta: “Tama cunaxwèxe na yayixixŭ i naxŭne ya Cune ya ũnecŭ,”

ñanagürü. ³⁶—Rü yexguma namaũxgu ga Dabí, rü nüxũ narüngũxëë ga norü duũxũgü, yexgumarüũ ga ñuxãcü Tupana namuxũ. Natürü ñuxũchi nayu, rü nanatü rü naëxũtagu natëx ga naxũne, rü niyixi. ³⁷—Natürü guma Tupana wena namaxëëcü ga Ngechuchu rü tama niyixi ga naxũne. ³⁸—Rü ñuxmax, Pa Chaueneëgũx, rü chanaxwëxe i nüxũ pecuëx rü yimatama Ngechuchugagu Tupana tüxũ nüxũ nangechaũ i tórü pecadugü ngëxgumarüũ i pemaã nüxũ tixuxürüũ. ³⁹—Rü ñuxma ya guxãma ya yixema nüxũ yaxögũxe, rü Ngechuchugagu Tupana tüxũ nüxũ nangechaũ i guxũma ga yema pecadugü ga noxri taxucürüwa tüxũ nüxũ nangechaũxũ ga yexguma nagu taxĩxgu ga yema mugü ga Moĩché ümatũxũ. ⁴⁰—Rü pexuãëgü na tama pegu nanguxüçëx i ngëma poxcu i Tupanaãrü orearü uruũgü nüxũ ixuchigaxũ ga yexguma ñagügu:

⁴¹ “Rü dücax, Pa Duũxũgü i Tupanaãrü Orexũ Cugüexũx, rü tá pebaixãchie rü tá peyue erü pema pemaxëyane rü tá chanaxü i tacü i taxũ. Rü pema rü tãütãma peyaxögü i woo texé pemaã nüxũ ixuxgu”,

ñanagürü. Rü yexma nayacuëxëë ga Pauru ga norü ore. ⁴² Rü yexguma guma ngutaquëxepataũwa ínachoxũgu ga Pauru rü namücügü, rü yema duũxũgü ga tama Yudíugü ixĩgũxũ rü nüxũ nacëëxũgü na to ga ngũxchigaarü ngunexũgu rü wenaxãrü yematama orexũ namaã yaxuxüçëx. ⁴³ Rü yexguma marü nüxũ nachauegu ga na nangutaquëxegũxũ, rü Pauru rü Bernabéwe narüxĩ ga muxũma ga Yudíugü rü müxũma ga togü ga duũxũgü ga tama Yudíugü ixĩgũxũ natürü Yudíugürüũ yaxögũxũ. Rü Pauru rü Bernabé rü namaã nidexagü rü nayaxucuxëgü na guxũguma nagu naxĩnüëëchaxüçëx ga ñuxãcü Tupana nüxũ ngechaũãcüma na nadexũ. ⁴⁴ Rü yema to ga ngũxchigaarü ngunexũgu, rü wixgutaëx guxũma ga yema ñãnecũãx nangutaquëxegü na inaxĩnüëxüçëx ga Tupanaãrü ore. ⁴⁵ Natürü nayexma ga ñuxre ga Yudíugü ga tama ngutaquëxegu chocuxũ. Rü yexguma nüxũ nadaugügu ga na namuxũchixũ ga duũxũgü ga Paurucëx ngutaquëxegũxũ rü poraãcü nixãũxãchie. Rü inanaxüğüe ga na Pauruxũ nachoxũgagũxũ rü namaã naguxchigagũxũ. ⁴⁶ Natürü ga Pauru rü Bernabé rü tama namuũëãcüma yema Yudíugũxũ nangãxũgü, rü ñanagürügü: —Tupana nanaxwëxe na pemaãxĩra nüxũ tixuxũ i norü ore. Natürü ñuxma na nüxũ pexoexũ i ngëma ore rü tama na penayauxgũchaũxũ i maxũ i taguma gúxũ, rü ngëmacëx i ñuxmax i toma rü tá ngëma tama Yudíugü ixĩgũxũtanüwa taxĩ. ⁴⁷—Yerü yemaãcü toxũ namu ga Cori, rü ñanagürü: “Duũxũgü i tama Yudíugü ixĩgũxũãrü ngóonexëëruũ marü cuxũ chixĩxëë, na guxũwama i ñoma i naãnewa cunangexüçëx i chorü ore i maxëxëëruũ”,

ñanagürü. ⁴⁸ Rü yexguma yema orexũ naxĩnüëgu ga yema duũxũgü ga tama Yudíugü ixĩgũxũ, rü nataãëgü rü ñanagürügü: —Rü namexëchi nixĩ i ñãã Cori ya Tupanaãrü ore —ñanagürügü. Rü nayaxögü ga guxũma ga yema duũxũgü ga Tupana marü nüxũ unetaxũ na nayauxgũãxüçëx i maxũ i taguma gúxũ. ⁴⁹ Rü yemaãcü guxũwama ga yema naãnewa nanguchigü ga Cori ya Tupanaãrü ore. ⁵⁰ Natürü yema Yudíugü ga tama Ngechuchuaxũ yaxögũchaũxũ, rü chixexũmaã nayaxuxcuxëgü ga ñuxre ga ngexũgü ga mexũgü ga Tupanaxũ ngechaũgũxũ rü guma ñãneãrü ãëxgacügü na Pauru rü Bernabéxũ ínawoxũxüçëx. Rü yemacëx ínawoxũ ga yema naãnewa. ⁵¹ Rü yexguma ga Pauru rü Bernabé rü inapagücutü ga norü üxaxücutü na yemawa nüxũ yacuëxãchitanüxüçëx ga norü chixexũ ga yema ñãnecũãxgü ga duũxũgü. Rü ñuxũchi ga Pauru rü Bernabé rü ñãne ga Icúniũwa naxĩ. ⁵² Natürü yema yaxögũxũ ga guma ñãne ga nawa ínachoxũnewa yexmagũxũ rü poraãcü Tupanamaã nataãëgü, rü Naãë i Üünexũ rü aixcüma nawa nayexma.

14

Pauru rü Bernabé rü ñãne ga Icúniũwa nayexmagü

¹ Rü Icúniũwa rü wüxigu Yudíugüarü ngutaquëxepataũgu nachocu ga Pauru rü Bernabé. Rü meãma nüxũ nixuchiga ga Tupanaãrü ore rü yemaãcü nayaxögü ga muxũma

ga duüxügü ga Yudiügu rü yema tama Yudiügu ixīgüxü rü ta. ² Natürü yema Yudiügu ga tama Ngechuchuaxü yaxögüxü, rü chixexümaã nayaxucuxëgü ga yema tama Yudiügu ixīgüxü na yema yaxögüxüchi naxaixücëx. ³ Rü yemacëx muxüma ga ngunexü yexma narücho ga Pauru rü Bernabé, rü tama namuüëacüma nüxü nixuchiga ga Cori ya Tupanaârü ore. Rü yema duüxügümaã nüxü nixu na ñuxäcü Tupana poraäcü tüxü nangechaüxü. Rü nüma ga Cori rü yema duüxügüxü nüxü nadauxëë na namaã nataäëxü ga yema ore. Rü yemacëx Pauru rü Bernabéxü narüngüxëë na inawëxgüäxücëx ga cuëxruügü rü na naxügüäxücëx ga mexügü ga Tupanaârü poramaã naxügüxü. ⁴ Natürü ga guma ñanecüäx ga duüxügü rü nitoye. Rü nümaxü rü yema Yudiüguwaama naxügü rü togü rü Pauru rü Bernabéwaama naxügü. ⁵ Rü yexguma ga yema Yudiügu, rü yema duüxügü ga tama Yudiügu ixīgüxü, rü guma ñäneârü äëxgacügümaã wüxigu nagu narüxñüë na Pauruxü rü Bernabéxü yayauxgüxü na nutamaã ínamuxüchigüäxücëx. ⁶⁻⁷ Natürü yexguma nüxü nacuächigagügu ga Pauru rü Bernabé, rü nibuxmü. Rü Dicóniüãnewa yexmane ga ñanegü ga Listra rü Derbewa naxí. Rü guma ñanegüwa rü guxüma ga yema naãnewa ipeagüxü ga duüxügümaã rü ta nüxü nixuchigagü ga ore i mexü.

Nutagümaã Pauruxü ínamuxüchigü ga Listrawa

⁸⁻⁹ Rü yéma Listrawa nayexma ga wüxi ga yatü ga ínapogücutüxü norü bucümatama. Rü yéma narüto rü inarüxñü ga yema Pauru nüxü ixuxü ga ore. Rü Pauru rü meãma nüxü nadawenü, rü nüxü nadau ga na nüxü nayexmaxü ga norü õ na naxcëx yataanexücëx. ¹⁰ Rü yexguma ga Pauru rü tagaäcü ñanagürü nüxü: —¡Inachi, rü meãma ínangacutü! —ñanagürü. Rü yexguma inayuxnagü ga guma yatü, rü inanaxügü ga na iyaxüxü. ¹¹ Rü yexguma yema muxüma ga duüxügü nüxü daugügu ga yema na naxüxü ga Pauru, rü tagaäcü yema Dicóniügawa nidexagü, rü ñanagürügü: —Tupanagü i naduüxügüraüxü ínarüxīgü, rü tatanüwa nangugü —ñanagürügü. ¹² Rü Bernabé rü tupana ga Chéumaã nanaxüëgagü. Rü Pauru rü Érememaã nanaxüëgagü yerü nüma nixí ga yadexaxü. ¹³ Rü guma ñäne íxücuxüwa nayexma ga tupana ga Chéuarü tupauca ga taxüne. Rü guma tupaucaarü pai rü yéma nanagagü ga wocagü ga iyatüxü ga putüramaã ngëxäëgüxü. Rü nüma ga pai rü ga duüxügü rü nanadaixchaü ga yema wocagü naxcëx ga Pauru rü Bernabé na yemamaã nüxü yacuëxüügüxücëx. ¹⁴ Natürü yexguma nüxü yacuëxächitanügu ga Bernabé rü Pauru, rü norü gáuxüchirugu nagáugüë na yema duüxügü nüxü cuëxgüxücëx na tama namexü ga yema naxcëx naxüechaüxü. Rü yema muxüma ga duüxügütanüwa nabuxmü, rü ñaxümaã aita naxüë: ¹⁵ —Pa Yatügüx, ¿tüxcüü toxcëx penaxü i ngëma? Toma rü pexrüü duüxügümare tixīgü. Rü nuã taxí na pemaã nüxü tayarüxuxücëx na nüxü perüxoexücëx i ngëma chixexügü i taxuwama mexü rü naxcëx pedaugüxücëx ya Tupana ya maxücü ga naxücü ga daxügüxü i naãne, rü ñoma i naãne, rü taxtü i taxü, rü guxüma i nawa ngëxmaxü. ¹⁶ —Rü nuxcümayerü nixí ga Tupana ga yaxna namaã naxñüxü ga duüxügü ga woo nümagü nanaxwëxegüxü naxügügu. ¹⁷ — Natürü nüma ga Tupana rü taguma nüxü narüchau na duüxügüxü nangüxëëxü. Rü yemaäcü tüxü nüxü nacuëxëë na Tupana yíixü i nümax. Rü nümatama nixí i núma namuäxü ya pucü rü meã pexü nayaexëxëäxü i penetügü. Rü nüma nixí i pexna naxäãxü i pewemü na ngëmaäcü petaäëgüxücëx —ñanagürügü ga Pauru rü Bernabé. ¹⁸ Natürü woo yema orexü namaã na yaxugüxü rü poraäcü nüxü naguxcha ga Pauru rü Bernabé ga nüxna na nachogüxü ga duüxügü ga tama naxcëx na nadaiäxücëx ga yema wocagü na yemamaã nüxü yacuëxüügüxücëx. Rü düxwa yemacëx tama naxcëx nanadai. ¹⁹ Natürü yexgumayane rü ínangugü ga ñuxre ga Yudiügu ga Aütioquíawa rü Icúniüwa ne íxü. Rü chixexümaã nayaxucuxëgü ga yema muxüma ga duüxügü na tama Pauru rü Bernabéga naxñüëxücëx, rü namaã nanuëxücëx. Rü yemacëx ga yema duüxügü rü nutamaã Pauruxü ínamuxüchigü, rü ñäneârü íxpemawa nanatüchigügü, yerü nüma nüxü nacuëxgügu

rü marü nayu. ²⁰ Natürü yexguma yema yaxōgūxū naxūtawa ngutaquēxegu, rü inachi ga Pauru, rü wenaxārü nagu naxūcu ga guma ĩāne. Rū moxūācū inaxūāchi ga yēma, rü Bernabēmaā Derbewa naxū. ²¹ Rū guma ĩānewa nūxū nixugūe ga ore ga mexū. Rū nanangūexēē ga duūxūgū, rü muxūma Tupanaāxū nayaxōgū. Rū yemawena rü wenaxārü naxcèx nawoegu ga Listra, rü Icúniū, rü Aūtioquía. ²² Rū guma ĩānegūwa rü yema yaxōgūxūxū nixucuxēgū, rü nūxū nanangūchaūxēēgū na guxūguma meā na yaxōgūāxūcèx. Rū namaā nūxū nixugūe, rü ñanagürügū: —Ngēma Tupana āēxgacū ĩxūwa na ĩxūcuxūcèx, rü tanaxwèxe na muēxpūxcūna guxchaxūgūmaā yaxna ĩxīnūēxū i ñoma i naānewa —ñanagürügū. ²³ Rū Pauru rü Bernabé rü wūxichigū ga ĩānewa rü nūxū nixunetatanū ga ñuxre ga yatūgū na yaxōgūxūārū āēxgacūgū yixīgūxūcèx. Rū tama nachibūeācūma naxcèx nayumūxēgū. Rū yemawena rü yima Cori ya Tupana ga nūxū yaxōgūācūna nanaxuaxūgū na guxūguma namaā inaxāūxūcèx rü meā nūxna nadauxūcèx ga yema yaxōgūxūārū āēxgacūgū.

Pauru rü Bernabé rü naxcèx nawoegu ga Aūtioquía ga Chíríaanewa yexmane

²⁴ Rū Pichídiaanewa nichopetū, rü Paūpíríaanewa nangugū. ²⁵ Rū Pérupe ga ĩānewa nūxū nixugūe ga Tupanaārū ore, rü ñuxūchi Atária ga ĩānewa naxī. ²⁶ Rū yēma rü wūxi ga wapurugu nichoū na Aūtioquíacèx nawoeguxūcèx. Rū guma ĩāne ga Aūtioquíawa nixī ga noxri duūxūgū Tupanana namugūxū ga Pauru rü Bernabé na naxūgūāxūcèx ga yema puracū ga ñuxma marü yanguxēēgūxū. ²⁷ Rū yexguma ĩnangugūgu ga Pauru rü Bernabé, rü nanangutaquēxexēē ga guxūma ga yema duūxūgū ga yaxōgūxū. Rū namaā nūxū nixugūgū ga guxūma ga ñuxācū Tupana poraācū nūxū na rüngūxēēxū. Rū yexgumarūū ta rü namaā nūxū nixugūgū ga ñuxācū na yaxōgūāxū ga yema duūxūgū ga tama Yudíugū ĩxīgūxū, yerū Tupana nūxū nanatauxchaxēē na yaxōgūāxūcèx. ²⁸ Rū muxūma ga ngunexūgu yema yaxōgūxūtanūwa nayexmagū ga Pauru rü Bernabé.

15

Yerucharéūwa nangutaquēxegū

¹ Rū yexgumaācūū rü nayexma ga ñuxre ga duūxūgū ga Yudéaanewa ne ĩxū ga Aūtioquíawa ngugūxū. Rū nūmagū inanaxūgūe ga tūxū na nangūexēēxū ga guxema yaxōgūxe ga Aūtioquíacūāx, rü ñanagürügū: —Ngēxguma tama pegū ĩpewiūchēmüpēxechiraūgu yema Moīché tūxū muxūrūū rü taxuacūma pexū nangēxma i maxū i taguma gūxū —ñanagürügū. ² Natürü ga Pauru rü Bernabé rü tama norū me nixī ga yema, rü yemacèx poraācū nūgū namaā nachoxūgagū ga yema duūxūgū ga Yudéaanewa ne ĩxū. Rū dūxwa Pauru rü Bernabé rü ñuxre ga togū ga Aūtioquíacūāx ga yaxōgūxūxū naxunetagū na Yerucharéūwa naxīxūcèx na yema ngūexūgū ga Ngechuchu imugūxū rü yema yaxōgūxūārū āēxgacūgūmaā yamexēēgūāxūcèx ga yemachiga. ³ Rū yemaācū ga yema yaxōgūxū ga Aūtioquíacūāx rü Yerucharéūwa nanamugū ga yema yatūgū na naxcèx ĩyacagūxūcèx rü yamexēēgūāxūcèx ga yema ore. Rū Peníchiaanewa rü Chamáriaanewa nachopetū ga Pauru rü Bernabé. Rū yēma rü duūxūgūmaā nūxū nixugūe ga ñuxācū yema tama Yudíugū ĩxīgūxū rü nūxū na naxoexū ga nuxcūmaūxū ga nacūmagū na Tupanawe naxīxūcèx. Rū yema oremaā poraācū nanataāēxēēgū ga guxūma ga yema yaxōgūxū. ⁴ Rū Yerucharéūwa nangugū ga Pauru rü Bernabé. Rū guxūma ga yema yaxōgūxū rü yema ngūexūgū ga Ngechuchu imugūxū rü yema yaxōgūxūārū āēxgacūgū rü meāma nanayauxgū. Rū Pauru rü Bernabé namaā nūxū nixugūgū ga guxūma ga ñuxācū Tupana poraācū nūxū na rüngūxēēxū na duūxūgūmaā nūxū yaxugūxūcèx ga ore i mexū. ⁵ Natürü ñuxre ga Parichéugū ga Ngechuchuaxū yaxōgūxū, rü inachigū, rü ñanagürügū: —Name nixī na nūgū ĩnawiūchēmüpēxechiraūgūxū i ngēma tama Yudíugū ĩxīgūxū i ngexwaca yaxōgūxū. Rū name nixī na naga naxīnūēxū i ngēma mugū ga Moīché ũmatūxū —ñanagürügū. ⁶ Rū yexguma nangutaquēxegū ga yema ngūexūgū ga

Ngechuchu imugüxü rü yema yaxõgüxüãrû ãëxgacügü na namexëëgüãxüçèx ga yema ore. ⁷ Rü yixcama marü ñuxgumama nügümaã yéma yaporagatanüçüügu, rü inachi ga Pedru, rü ñanagürü nüxü: —Pa Chaueneëgüx, pema nüxü pecuèx ga na ùpamama Tupana choxü yaxuxü ga petanüwa na yema duüxügü i tama Yudíugü ixíngüxümaã nüxü chixuxüçèx i norü ore i mexü i maxëxëëruü, na nümagü rü ta Ngechuchuauxü yaxõgüãxüçèx. ⁸ —Rü yima Tupana ya guxããëxü cuácü rü tüxü nüxü nadauxëë na nadeãxü i ngëma duüxügü i tama Yudíugü ixíngüxü, yerü nüxna nanamu ga Naãë i Üünexü yema tüxna namuãxürüü. ⁹ —Rü Tupanapëxewa rü yixema i Yudíugü rü namaã tawüxigu i ngëma duüxügü i tama Yudíugü ixíngüxü. Yerü nümagü rü ta Tupana nüxü nüxü nangechaü ga norü pecadugü ga yexguma nüxü yaxõgüãgu. ¹⁰ —¿Rü tüxcüü tama namaã petaãë i ñuxma i ngëma Tupana üxü? ¿Rü tüxcüü ngëma ngexwacèx yaxõgüxüxü penaxüëëchaü i ngëma Moíchéarü mugü i guxchaxü ga tórü oxigü rü taxuacüma naga taxínüëxü rü woo yixemagü rü ta taxuacüma inguxëëxü? ¹¹ —Rü tama ngëma mugü nixí i tüxü maxëxëëxü. Natürü yixema rü tayaxõgü na tórü Cori ya Ngechuchu tamaã mecümaxügagu yiixü na tüxna naxãmareãxü i maxü i taguma gúxü. Rü ngëxgumarüü ta nixí i naxcèx i nümagü i tama Yudíugü ixíngüxü —ñanagürü ga Pedru. ¹² Rü inanaxügü ga Bernabé rü Pauru na yadexagüxü. Rü guxüma ga yema duüxügü rü inarüchianegü rü inarüxínüëmare. Rü Bernabé rü Pauru rü namaã nüxü nixugüë ga ñuxácü Tupana na nüxü rüngüxëëgüxü na naxügüãxüçèx ga mexü ga taxügü ga Tupanaãrü poramaã naxügüxü natanüwa ga yema duüxügü ga tama Yudíugü ixíngüxü. ¹³ Rü yexguma Bernabé rü Pauru igüegagügu, rü nüxíxãrü nidexa ga Chaütiágu, rü ñanagürü: —Pa Chaueneëgüx, ¿choxü iperüxínüë! ¹⁴ —Pedru i Chimáü rü tamaã nüxü nixu na ñuxácü Tupana inaxügüxü ga nüxü na nangüxëëxü ga yema duüxügü i tama Yudíugü ixíngüxü. Rü tamaã nüxü nixu ta na ñuxácü Tupana yema duüxügütanüwa nadeãxü ga ñuxre ga duüxügü na noxrü yixíngüxüçèx. ¹⁵ —Rü ngëma Pedru nüxü ixuxü rü nawüxigu namaã ga yema ore ga nuxcümaügüxü ga orearü uruügü ümatüxü ga ñaxü:

¹⁶ “Rü ngëmawena rü tá chataegu, rü tá nüxü charüngüxëë i Dabítaagü i Yudíugü. Rü woo nawoonemare i ñuxmax, natürü wena táxarü wüxiwa chanaxíxëë, rü tá íchanadagüxëë na noxrirüü naporaexüçèx. ¹⁷ Rü ngëmaãcü tá nüxü charüngüxëë na ngëma duüxügü i tama Yudíugü ixíngüxü rü chauxcèx nadaugüxüçèx, wüxigu namaã i guxüma i chorü duüxügü i Yudíugü i choma chadexü. ¹⁸ Rü yemaãcü nüxü nixu ga nüma ga Cori ya Tupana ga nuxcümama tüxü nüxü cuëxëëcü ga yema”,

ñanagürü ga yema ore ga nuxcüma ümatüxü. ¹⁹ Rü ñanagürü ga Chaütiágu: —Rü ngëmacèx, Pa Chaueneëgüx, rü chauxcèx rü tama name na guxü i Moíché ümatüxü i mugümaã nüxü ichixewexü i ngëma duüxügü i tama Yudíugü ixíngüxü i nüxü rüxoexü i nuxcümaüxü i nacümagü na Tupanawe naxíxüçèx. ²⁰ —Rü narümemaë nixí i naxcèx tanaxümatü i popera, rü ngëmawa namaã nüxü tixu:

- (1) Rü tama name na nangõxgüãxü i ngëma naxünagümachi i togü norü tupanetachicünèxãgüçèx dèixü.
- (2) Rü tama name na naí i ngëmaã rü ëxna naí ya yatümaã inapexü.
- (3) Rü tama name na nangõxgüãxü i namachi i ngëma naëxü rü ëxna naxüna i wëxnaãxü rü ëxna natügu nguxü.
- (4) Rü tama name na nangõxgüãxü ya nagü.

Rü ngëxícatama nixí i inaxwèxexü na naxcèx naxümatüxü. ²¹ —Erü guxüne ya ñãnewa nangëxma ya Yudíugüarü ngutaquëxepataü i ngextá nuxcümama guxü i ngüxchigaarü ngunexügu nawa inangüë rü nüxü nixuchigagü i guxüma i ngëma mugü ga Moíché ümatüxü —ñanagürü ga Chaütiágu.

Popera ga yema duüxügü ga tama Yudíugü ixíngüxüçèx ümatüxü

²² Rû yema ore rû norû me nixî ga yema ngúexügü ga Ngechuchu imugüxü, rû yema yaxögüxüârü âëxgacügü, rû guxüma ga yema yaxögüxü. Rû nügümaã ñanagürügü: — ¡Ngîxã tatanüwa tanade ya taxre ya yatügü na Aütioquíawa namugüxüçèx namaã ya Pauru rû Bernabé! —ñanagürügü. Rû nüxü naxunetagü ga Yuda ga Barsabágu âegaxü rû Chira. Rû nümagü ga Yuda rû Chira rû âëxgacügü nixî ga natanüwa ga yema yaxögüxü ga Yerucharéüwa yexmagüxü. ²³ Rû namaã yéma nanamugü ga popera, rû ñaã nixî ga yema ore ga nagu naxümatügüxü:

“Pa Toeneëgü i Tama Yudiügü Ixîgüxe i Aütioquíagu rû Chíriaanegu rû Chiríchiaanegu Ächiügüxe, rû toma i peeneëgü i Ngechuchu toxü imugüxe rû toma i yaxögüxüârü âëxgacügü ixîgüxex, rû pexü tarümoxëgü. ²⁴ Rû nüxü tacuáchigagü rû ñuxre ga duüxügü ga núma ne íxü rû woo tama toma yéma tanamugü natürü nümagü rû yéma naxî rû Moîchéarü mugümaã pexü nachixewegü rû yemaãcü pexü inatüexëë. ²⁵ Rû yemacèx guxâma ga toma rû wüxigu nagu tarüxînüë na totanüwa nüxü taxunetaxü ga taxre ga taeneëgü na pexcèx ngema tanamugüxüçèx namaã i taeneëgü i nüxü ingechaügüxü i Bernabé rû Pauru. ²⁶ Rû nümagü i Bernabé rû Pauru nixî ga poraãcü äücümáxüwa nayexmagüxü naxcèx ga tórü Cori ya Ngechuchu ya Cristu. ²⁷ Rû ñuxma rû pexcèx ngema tanamugü i Yuda rû Chira na nümagüxüchi pemaã nüxü yaxugüxüçèx rû pemaã nangoxëëgüãxüçèx i guxüma i torü ore. ²⁸⁻²⁹ Erü Tupanaãë i Üünexüçèx name, rû toxcèx rû ta name na tama muxüma i mugü pexna taxägüxü. Rû ñaã ägümücü i mugüxícatama nixî i pexü tamuxü:

(1) Rû tama name na penangöxü i naxünagümachi i togü norü tupanane-tachicünèxägüçèx dëixü.

(2) Rû tama name na penangöxü i namachi i ngëma naxünagü i wëxnaãxü.

(3) Rû tama name na penangöxü ya nagü.

(4) Rû tama name na naí i ngemaã rû éxna naí ya yatümaã ipepexü.

Rû mexü tá pexügü ega penaxauregu i ngëma mugü. Rû nuãma pexna”, ñanagürü ga yema ore ga naxümatügüxü. ³⁰ Rû natanüxüxü namoxëgüguwena, rû inaxîãchi ga yema yéma mugüxü, rû Aütioquíawa naxî. Rû yexguma yéma nangugügu rû nanangutaquëxexëë ga guxüma ga yema yaxögüxü ga duüxügü, rû nüxna nanaxägü ga yema popera. ³¹ Rû yexguma nüxü nadaumatügügu, rû poraãcü nataãëgü namaã ga yema ucüxëgü ga nüxna naxägüxü. ³² Rû Yuda rû Chira ga Tupanaãrü orearü uruügü na yixîgüxü, rû muxüma ga oremaã nayaxucüxëgü ga yema yaxögüxü, rû nüxü narüngüxëë na yexeraãcü yaxögüãxüçèx. ³³ Rû marü ñuxre ga ngunexü yéma nayexmagüguwena, rû ínixî. Rû yema yaxögüxü ga Aütioquíacüãx, rû taãëãcüma Yuda rû Chiraxü narümoxëgü rû meãma ínayamugü na naxcèx nawoeguxüçèx ga yema Yerucharéüçüãx ga noxri natanüwa namugüxü. ³⁴ Natürü ga Chira rû nagu narüxînü na yexma Aütioquíagu naxãüxü, rû yemacèx Yudaxícatama Yerucharéüçèx nataegu. ³⁵ Rû Pauru rû Bernabé rû ta yexma narücho. Rû wüxigu namaã ga muxüma ga togü, rû nanangüexëë ga duüxügü, rû namaã nüxü nixügügu ga Cori ya Tupanaãrü ore i mexü.

Pauru rû wenaxãrü inaxüãchi ga to ga nachüãnegüwa na nangeaxü ga Tupanaãrü ore

³⁶ Rû yexguma marü ñuxre ga ngunexü ngupetügu, rû ñanagürü ga Pauru Bernabéxü: — ¡Ngîxã wenaxãrü natanügu tanaxîãne i ngëma yaxögüxü i guxüne ya íãne ga ngextá nüxü íxuchigaxüwa ga Cori ya Tupanaãrü ore na nüxü idauxüçèx na ñuxãcü nüxü ínangupetügüxü! —ñanagürü. ³⁷ Rû Bernabé rû nayagaxchaü ta ga Cuáü Marcu. ³⁸ Natürü ga Pauru rû tama nanaxwëxe ga na yagaãxü, yerü Paüpíriawa nüxna naxo ga noxri, rû tama ínayaxümücü ga yema puracüwa. ³⁹ Rû poraãcü nügümaã niporagatanücüü naxcèx ga yema, rû düxwa nügüna nixîgü. Rû Bernabé nayaga ga Marcu, rû Chiprearü capaxüwa naxü. ⁴⁰ Rû yoxni ga Pauru rû Chiraxü niga. Rû yema Aütioquíacüãx ga yaxögüxü rû naxcèx nayumüxëgü na Tupana nüxü rüngüxëëgüxüçèx. Rû yexguma inaxîãchi. ⁴¹ Rû

Chíríiaanewa rü Chiríchiaanewa nachopetü, rü yéma Tupanaärü oremaã nanataãẽxẽẽgü ga yema yaxõgüxü.

16

Pauru rü Chirawe narüxü ga Timutéu

¹ Rü Derbewa rü Listrawa nangugü ga Pauru rü Chira. Rü yéma nayexma ga wüxi ga yaxõcü ga Timutéugu ãegacü. Rü naẽ rü wüxi ga Yudíu ga yaxõxcü iyixí. Rü nanatü rü wüxi ga Griégu tixí. ² Rü guxüma ga yema yaxõgüxü ga Listracüãxgü rü Icúniücüãxgü rü nüxü nixugüe na mea maxücü yixixü ga nüma ga Timutéu. ³ Rü Pauru rü nanaxwèxe na Timutéu íyaxümücüxü. Natürü naxüpa ga na yagaãxü rü Ínanawiechèxmüpèxechiraü, yerü yemaãcü nanaxwèxegü ga yema Yudíugü ga yema naãnewa yexmagüxü. Yerü guxüma nüxü nacuèxgü ga na Griégu tiixü ga nanatü. ⁴ Rü guxünema ga guma ãnegü ga nawa nachopetünewa, rü duüxügümaã nüxü nixugüetanü ga yema ucuxê ga yema Yerucharéücüãx ga ngúexügü ga Ngechuchu imugüxü rü yema yaxõgüxüärü ãẽxgacügü nüxü ixugüxü. ⁵ Rü yemaãcü yexeraãcü meã nayaxõgü ga guxüma ga yema yaxõgüxü, rü guxü ga ngunexü rü yexeraãcü nimuëtanü ga yema yexwacèx yaxõgüxü.

Pauru nangõxetü rü wüxi ga yatü ga Machedóniãcüãxü nadau

⁶ Rü Áchiaanewa naxíxchaü na yéma nüxü yaxugüxüçèx ga ore i mexü. Natürü Tupanaãẽ i Üünexü rü nüxna nanachüxu ga yema. Rü yemacèx Piríquiaanewa rü Gárataanewaama nachopetü. ⁷ Rü Míchiaarü naãnewa nangugü, rü yéma nagu narüxñüẽ ga na Bitíniãärü naãnewa naxíxü. Natürü yéma rü ta Tupanaãẽ i Üünexü nüxna nanachüxu ga na yéma naxíxü. ⁸ Rü yemacèx Míchiaanewa nachopetümare rü ãne ga Tróawa nangugü. ⁹ Rü yema chütaxügu rü Pauru nangõxetü rü nüxü nadau ga wüxi ga yatü ga Machedóniãcüãx ga napèxegu chicü. Rü nüxü nacèxü, ñaxümaã: —¡Machedóniãwa naxü, rü toxü rüngüxèẽ! —ñaxümaã. ¹⁰ Rü yexguma yemaxü nadèuxgu ga Pauru, rü yexgumatama togü tamexèẽgü na Machedóniãwa taxíxüçèx. Yerü nüxü tacuèxgü rü aixcümáxüchi nixí ga Tupana toxçèx çaxü na yema duüxügümaã nüxü tixuxüçèx ga ore i mexü.

Piripuwa nayexmagü ga Pauru ru Chira

¹¹ Rü Tróaarü türewa itaxíãchi, rü capaxü ga Chamotáchiucèx wèxgu taxí. Rü moxüãcü Neãporiwa tangugü. ¹² Rü yéma rü dauxchitagu taxí rü Piripuwa tangugü. Rü guma nixí ya Dumacüãxgüärü ãne ga Machedóniããnegu naxügüne. Rü guma nixí ya guxüne ya ãneärü tamaẽne ga yéma. Rü yéma tayexmagü ga ñuxre ga ngunexügü. ¹³ Rü ngüxchigaarü ngunexügu, rü guma ãne iyacuáxüwa taxí ga natüpechinüwa, yerü nagu tarüxñüégu rü yéma nayexma ga Yudíugüärü yumüxèchica. Rü yéma tarütogü, rü namaã tidexagü ga ñuxre ga ngexügü ga yéma ngutaquèxegüxü, rü namaã nüxü tixugü ga Tupanaärü ore. ¹⁴ Rü yéma iyexma ga wüxi ga ngecü ga Díria ga ngíega ga Tupanaxü icuèxüüxcü. Rü Tiatíra ga ãnecüãx iyixí. Rü dauxracharaxü ga naxchirumaã itaxe yerü yema nixí ga ngírü puracü. Rü ngíma rü meãma yéma irüxñü, yerü nüma ga Cori ya Tupana rü ngíxü nanangüchaüxèẽ na meã inaxñüxüçèx ga yema ore ga Pauru nüxü ixuxü. ¹⁵ Rü yemawena rü ñuxüchi líbaie wüxigu namaã ga guxüma ga ngítanüxügü. Rü yixcama rü toxü icèèxü ñaxümaã: —Ngèxguma pema choxü pedèuxgu na aixcüma nüxü chayaxõxü ya Cori ya Tupana, rü marü name ega chopatagu peyapegügu —ngígürügü. Rü yéma toxü ixixèẽ. ¹⁶ Rü wüxi ga ngunexügu ga yexguma yumüxèwa taxíxgu ga tomáx, rü yexma ngíxü tayangau ga wüxi ga pacü ga corigüxütaxü ixícü ga ngoxoãxcü. Rü yema pacü rü wüxi ga tacüxü cuèxcü iyixí, rü duüxügümaã nüxü iyaxu ga tacü tá yixcüra na ngupetüxü. Rü yemacèx ga duüxügü rü díerumaã ngíxü nanaxütanü na nüxü yaxuxüçèx na tacü tá na ngupetüxü. Rü yemaãcü poraãcü díeruxü itú naxçèx ga ngírü corigü. ¹⁷ Rü ngíma towe ingè ga toma rü Pauru, rü tagaãcü ngígürügü: —Ñãã yatügü rü Tupana ya

tacüxüchimaârü duüxügü nixĩ, rü pemaã nüxü nixu na ñuxãcü tá penayaxuxü i maxü i taguma gúxü —ngĩgürügü. ¹⁸ Rü yemaãcü iyixĩ ga muxüma ga ngunexügu. Rü düxwa nüxü nawëxtümüxü ga Pauru, rü ngĩxcèx nadauegu, rü ñanagürü nüxü ga yema ngoxo ga ngĩwa yexmaxü: —Ngechuchu ya Cristuégagu cuxü chamu, na ngĩwa ícuxüxüxcèx —ñanagürü. Rü yexgumatama ngĩwa ínaxüxü ga yema ngoxo. ¹⁹ Rü yexguma nüxü nadaugügu ga ngĩrü corigü ga marü tama ngĩgagu díeru ngĩxü na nayauxgüxü, rü Pauru rü Chiraxü ínayauxü, rü ãëxgacügüarü ngutaquëxechicawa nanagagü. ²⁰ Rü ãëxgacügüna nanaxuaxü ga yema ngĩrü corigü, rü ñanagürügü: —Ñãã Yudíugü rü tórü ñãnewa nanachixeãëxëgü i duüxügü. ²¹ —Rü tüxü nangúexëë na naxaurexüçèx i nacümagü i tüxna chuxuxü i yixema i Dumacüãxgü —ñanagürügü. ²² Rü yexguma ga guxüma ga yema ñãnecüãx, rü Pauru rü Chirana nayuxgü. Rü yema ãëxgacügü nanamu na ínacüxüãxüçèx rü ngexchiruxüma naixmenëxãmaã yaçuaixgüãxüçèx. ²³ Rü yexguma marü poraãcü yaçuaixgüãguwena, rü poxcupataügu nanawocu. Rü nüxna naxãga ga yema poxcupataüârü dauruü na meãma nüxna nadauxüçèx. ²⁴ Rü yexguma yemaxü naxĩnügu ga yema dauruü, rü poxcupataüârü aixepexgüchixü ga ucapugu nanawocu, rü meãma nayachotaparagü. ²⁵ Natürü ngãxüçüügu rü nayumüxëgü ga Pauru rü Chira, rü nawiyaegü, rü Tupanaxü nicuëxüügü. Rü yema togü ga poxcuexü rü nüxü naxĩnüë. ²⁶ Rü ngürüãchi poraãcü naxĩãxãchiane, rü ínyangogütanüãchi ga guma poxcupataüârü caxtagü. Rü yexgumatama niwãxnagü ga guxüma ga ñãxgü ga guma poxcupataü. Rü guxüma ga yema poxcuexüârü cadenaparagü rü niwëgü. ²⁷ Rü pewa nabaixãchi ga yema poxcupataüârü dauruü. Rü yexguma nüxü nadëuxgu ga na yawãxnagüxü ga ñãxgü ga guma poxcupataü rü nanayaxu ga norü tara na nügü yamáxüçèx, yerü nüma nüxü nacüexgu rü marü nibuxmü ga yema poxcuexü. ²⁸ Natürü tagaãcü aixta naxü ga Pauru, rü ñanagürü nüxü: —¡Tãxü i cugü quimáxü! Rü guxãma i toma rü tanuxmagü —ñanagürü. ²⁹ Rü yexguma ga yema poxcupataüârü dauruü rü naxcèx ínaca ga wüxi ga omü, rü inañaãchiãcüma yema duüxügü ípoxcuexügu nayangaxi, rü yaduruxãcüma Pauru rü Chirapëxegu nayacaxãpüxü. ³⁰ Rü yexguma ñãxtüwa Pauru rü Chiraxü nagagü, rü ñanagürü nüxü: —Pa Corigüx, ¿Tacü tá chaxüxü i choma na choxü nangëxmaxüçèx i maxü i taguma gúxü? —ñanagürü. ³¹ Rü nümagü rü nanangãxügü rü ñanagürügü nüxü: —¡Nüxü yaxõ ya Cori ya Ngechuchu, rü tá cuxü nangëxma i maxü i taguma gúxü i cuma rü guxü i cupatacüãx! —ñanagürügü. ³² Rü namaã rü guxüma ga yema napatacüãxgümaã rü ta nüxü nixugüe ga Cori ya Tupanaârü ore. ³³ Rü yematama oragu ga chütacü, rü nüma ga yema poxcupataüârü dauruü nayayauxgü ga norü oxrigü ga Pauru rü Chira. Rü yemawena rü ñuxüchi ínabaie ga nüma wüxigu tümamaã ga naxmèx rü naxacügü. ³⁴ Rü ñuxüchi ga nüma ga poxcupataüârü dauruü rü napatawa Pauruxü rü Chiraxü nagagü. Rü õna nüxna naxã rü nataãë ga nüma rü guxüma ga napatacüãxgü ta, yerü Tupanaãxü nayaxõgü. ³⁵ Rü moxüãcü pëxmama rü yema ñãneârü ãëxgacügü rü yema poxcupataüârü dauruüxütawa nanamugü ga purichíagü na namaã nüxü yanaxugüxüçèx na Pauru rü Chiraxü ínamuxüxü. ³⁶ Rü yexguma ga yema poxcupataüârü dauruü rü ñanagürü Pauruxü: —Rü ngëma ãëxgacügü rü nuã nanamugü i ore na pexü íchamuxüxüçèx. ¡Rü ëcü ípexoxü, rü meã ípixĩ! —ñanagürü. ³⁷ Natürü ga Pauru rü ñanagürü nüxü ga yema purichíagü: —Marü chixri tomaã nachopetü i toma i Dumacüãxüchigü na tixígüxü, rü tama toxna nacaxiraãcüma toxü niçuaixgü ga napëxewa ga guxüma ga duüxügü, rü ñuxüchi poxcupataügu toxü nawocu. Rü ñuxma rü cúãcüma toxü ínamuxüchaü. Rü tãütãma ngëmaãcü nixĩ. ¡Rü ëcü nümatama núma naxĩ i ãëxgacügü na nümatama toxü íyamuxüxüçèx! —ñanagürü ga Pauru. ³⁸ Rü yexguma ga yema purichíagü rü ãëxgacügümaã nüxü nayarüxugüe ga yema ore. Rü poraãcü nabaixãchiãëgü ga yema ãëxgacügü ga yexguma nüxü naxĩnüëgu ga na Dumacüãxüchi yixígüxü. ³⁹ Rü yema naxĩ, rü Pauru rü Chirana nayacagü na nüxü nüxü nangechaügüxüçèx naxcèx ga yema namaã naxügüxü. Rü ínamuxü, rü nüxü nacëxügü na nawa ínaxoxüxüçèx ga guma

ĩane. ⁴⁰ Rŭ yexguma poxcupataũwa ínachoxũgu ga Pauru rŭ Chira, rŭ Díriapatawa naxĩ. Rŭ yema yaxõgũxũmaã nangutaquẽxegũ, rŭ nayaxucuxẽgũ, rŭ Tupanaãrŭ oremaã nanataãẽxẽẽgũ. Rŭ ñuxũchi yemawena rŭ inaxĩãchi.

17

Pauru rŭ Chiramaã nanuẽ ga duũxũgũ ga Techarónicawa

¹ Rŭ ĩãnegũ ga Aũfĩpori rŭ Aporóniãwa nachopetũ ga Pauru rŭ Chira, rŭ ĩãne ga Techarónicawa nangugũ. Rŭ yéma nayexma ga wũxi ga ngutaquẽxepataũ ga Yudĩugũarũ. ² Rŭ guma ngutaquẽxepataũwa naxũũxũ ga Pauru, yerũ woetama yema nixĩ ga nacũma. Rŭ tomaẽxpũx ga ngũxchigaarũ ngunexũgu rŭ Tupanaãrũ ore ga ũmatũxũchiga yema Yudĩugũmaã yéma nidexa. ³ Rŭ meãma naxcẽx nanangoxẽẽ ga yema ore, rŭ namaã nüxũ nixu ga tacũcẽx na nayuxũ ga Cristu rŭ tũxcũũ wena na namaxũxũ. Rŭ ñanagũrũ: — Rŭ yima Cristu rŭ Ngechuchu nixĩ, rŭ nachiga nixĩ i pemaã nüxũ chixuxũ —ñanagũrũ ga Pauru. ⁴ Rŭ ñuxre ga yéma yexmagũxũ ga Yudĩugũ rŭ nayaxõgũ, rŭ Pauru rŭ Chiratanũgu naxãgũ. Rŭ yexgumarũũ ta Ngechuchuaxũ nayaxõgũ ga muxũma ga Griégugũ ga noxri Yudĩugũrũũ yaxõgũxũ. Rŭ muxũma ga ngexũgũ ga dĩeruãxgũxũ rŭ ta nayaxõgũ. ⁵ Rŭ yemacẽx ga yema Yudĩugũ ga tama yaxõgũxũ, rŭ nanuẽ rŭ nixãũxãchigũ yerũ muxũma ga duũxũgũ nüxũ nayaxõgũ ga Pauru rŭ Chiraarũ ore. Rŭ norũ numaã nanaxĩtaquẽxexẽẽ ga ñuxre ga yatũgũ ga chixexũgũ ga taxuwama mexũ. Rŭ yemaxũ namugũ na nanuẽxẽẽãxũ ga yema ĩãnecũãx ga duũxũgũ. Rŭ Yachãũpatawa nabuxmũ ga yema chixexũ ga duũxũgũ na Pauru rŭ Chiracẽx nadaugũxũcẽx, yerũ yema muxũma ga duũxũgũpẽxewa nanagagũchaũ. ⁶ Natũrũ yexguma tama yexma nüxũ yangaugũgu, rŭ Yachãũxũ niyauxgũ, rŭ ñuxre ga yaxõgũxũxũ rŭ ta ínayauxũ. Rŭ nayagauxũtanũ, rŭ guma ĩãneãrũ ãẽxgacũgũpẽxewa nanagagũ. Rŭ tagaãcũ ñanagũrũgũ: —Ngẽma Pauru rŭ Chira i guxũ i naãnewa duũxũgũxũ chixexẽẽgũxũ, rŭ núma rŭ ta nangugũ. ⁷ —Rŭ Yachãũ nixĩ ga nayaxuxũ ga napatawa. Rŭ guxũma i nũmagũ i ngẽma yatũgũ rŭ tama naga naxĩnũẽchaũ i tórũ ãẽxgacũ ya Dumacũãxãrũ mugũ, erũ nüxũ nixugũe rŭ nangẽxma i to i ãẽxgacũ i Ngechuchu —ñanagũrũgũ ga yema chixexũ ga duũxũgũ. ⁸ Rŭ yexguma nüxũ naxĩnũẽgu ga yema oregũ, rŭ poraãcũ nanuẽ ga yema muxũma ga duũxũgũ rŭ yema ĩãneãrũ ãẽxgacũgũ ta. ⁹ Natũrũ ga Yachãũ rŭ namũcũgũ rŭ dĩerumaã nügũ naxũtanũgũ, rŭ yemacẽx nayangẽxgũ.

Pauru rŭ Chira rŭ Beréawa nayexmagũ

¹⁰ Rŭ yematama ga chũtaxũgu rŭ yema yaxõgũxũ ga Techarónicacũãx rŭ ĩãne ga Beréawa nanamugũ ga Pauru rŭ Chira. Rŭ yexguma yéma nangugũgu, rŭ Yudĩugũarũ ngutaquẽxepataũwa naxĩ. ¹¹ Rŭ yema Yudĩugũ ga Beréacũãx, rŭ yema togũ ga Yudĩugũ ga Techarónicawa yexmagũxũãrũ yexera narũmemaẽgũ. Rŭ norũ ngũchaũmaã meãma nanayauxgũ ga yema ore. Rŭ guxũ ga ngunexũgu rŭ Tupanaãrũ ore ga ũmatũxũwa nangũe na meã nüxũ nacuẽxgũxũcẽx ngoxi aixcũma yĩĩxũ ga yema ore ga Pauru rŭ Chira namaã nüxũ ixuxũ. ¹² Rŭ muxũma ga yema Beréacũãx ga Yudĩugũ rŭ Ngechuchuaxũ nayaxõgũ. Rŭ yexgumarũũ ta ga muxũma ga Griégugũ ga Yatũxũgũ rŭ ngexũgũ ga ãẽxgacũgũ namẽx ixĩgũxũ, rŭ nayaxõgũ. ¹³ Natũrũ yexguma yema Yudĩugũ ga Techarónicacũãx nüxũ cuãchigagũgu ga na Beréawa rŭ ta nüxũ na yaxuxũ ga Tupanaãrũ ore ga Pauru, rŭ yéma naxĩ, rŭ nananuẽxẽẽ ga yema ĩãnecũãx ga duũxũgũ na Paurumaã chixri nachopetũxũcẽx. ¹⁴ Natũrũ yexguma yemaxũ nacuãchigagũgu ga yema yaxõgũxũ, rŭ paxama Pauruxũ ínaxũxũẽẽgũ ga guma ĩãnewa. Rŭ ñuxre ga yema yaxõgũxũ rŭ Pauruxũ ínixũmũcũgũ. Rŭ dauxchitagu naxĩ rŭ ñuxmata taxtũpechinũwa nangugũ. Natũrũ ga Chira rŭ Timutéu rŭ Beréagu narũchooma. ¹⁵ Rŭ yema duũxũgũ ga Pauruxũ íxũmũcũgũxũ, rŭ wapurugu ínayaxũmũcũgũ ñuxmata ĩãne ga Atenawa nangugũ, rŭ

ñuxŭchi Beréacèx nawoegu. Rŭ Pauru rŭ yema duŭxŭgŭxŭ yéma namuga na paxa naxŭtawa naxŭcèx ga Chira rŭ Timutéu.

Atenawa nayexma ga Pauru

¹⁶ Rŭ yexguma Pauru rŭ Atenawa Chira rŭ Timutéuxŭ nanguxèegu, rŭ tama nataâécŭraxŭ yerŭ nŭxŭ nadau ga guma ìānewa ga na poraâcŭ naxchicŭnèxāmaāmare na natupanaâxgŭxŭ. ¹⁷ Rŭ yemacèx ga Pauru rŭ Yudŭgŭarŭ ngutaquèxepataŭwa Cristuchigaxŭ nixu namaā ga yema Yudŭgŭ rŭ yema togŭ ga tama Yudŭgŭ ixŭgŭxŭ ga Tupanaxŭ icuèxŭgŭxŭ. Rŭ guxŭ ga ngunexŭgu ga ìāneārŭ plaza ga taxŭwa rŭ ta Cristuchigaxŭ nixu namaā ga yema duŭxŭgŭ ga yéma āmŭcŭwa ìxŭ. ¹⁸ Rŭ nayexmagŭ ta ga ñuxre ga yatŭgŭ ga Epicŭriugŭarŭ nguxèètaewa ngŭexŭ, rŭ togŭ ga Etóicugŭarŭ nguxèètaewa ngŭexŭ. Rŭ nŭmagŭ rŭ inanaxŭgŭe ga Paurumaā na yaporagatanŭcŭxŭ. Rŭ ñuxre ga nŭmagŭ rŭ ñanagŭrŭgŭ: —¿Rŭ tacŭ nixŭ i nŭxŭ yaxuxŭ i ñāā yatŭ i idexaechamarexŭ? —ñanagŭrŭgŭ. Rŭ togŭ nanangŭxŭgŭ, rŭ ñanagŭrŭgŭ: —Maneca wŭxi i to i nachiŭānecŭāxŭrŭ tupanagŭarŭ orearŭ uruŭ nixŭ —ñanagŭrŭgŭ. Rŭ yemaâcŭ nidexagŭ ga yema duŭxŭgŭ, yerŭ Pauru rŭ nŭxŭ nixu ga ore ga mexŭ ga Ngechuchuchiga ga nuxâcŭ wena na namaxŭxŭ. ¹⁹ Rŭ dŭxwa norŭ āèxgacŭgŭarŭ ngutaquèxechica ga Areópagu āegaxŭwa nanagagŭ. Rŭ yéma nŭxna nacagŭ, rŭ ñanagŭrŭgŭ nŭxŭ: —Toma nŭxŭ tacuáxchaŭ na tacŭ rŭ nguxèètae i ngexwacaxŭxŭ yŭxŭ i ngēma namaā cunguxèètaexŭ. ²⁰ Erŭ toxcèx rŭ wŭxi i taguma nŭxŭ taxŭnŭèxŭ nixŭ i ngēma ore, rŭ nŭxŭ tacuáxchaŭ na tacŭchiga yŭxŭ i ngēma nŭxŭ quixuxŭ —ñanagŭrŭgŭ. ²¹ Rŭ yemaâcŭ nidexagŭ, yerŭ guxŭma ga Atenacŭāxgŭ rŭ yema to ga nachiŭānecŭāxgŭ ga yexma āchiŭgŭxŭ, rŭ woetama yexicagu narŭxŭnŭè ga na nŭxŭ yaxuxŭcèx rŭ nŭxŭ naxŭnŭèxŭcèx ga yexwacaxŭxŭ ga oregŭ. ²² Rŭ yemacèx ga Pauru rŭ inachi norŭ ngāxŭtanŭwa ga yema duŭxŭgŭ ga yema Areópaguwa ngutaquèxegŭxŭ, rŭ ñanagŭrŭ: —Pa Atenacŭāxgŭx, nŭxŭ chadau na poraâcŭ perŭ tupanagŭgu perŭxŭnŭèxŭ. ²³ —Erŭ ngèxguma perŭ ngutaquèxechicagŭwa chixŭpetŭchigŭgu, rŭ nŭxŭ chadau i naxchicŭnèxāgŭ i nŭxŭ picuèxŭgŭxŭ. Rŭ wŭxi i nachicawa namaā chayarŭxŭ i wŭxi i yumŭxèchica, rŭ ngèxma naxŭmatŭ i naega i ñaxŭ: “Tupana ya tama nŭxŭ icuácŭ”, ñaxŭ. Rŭ yima Tupana ya tama nŭxŭ pecuáâcŭma nŭxŭ picuèxŭgŭcŭ nixŭ ya choma pemaā nŭxŭ chixuchigacŭ. ²⁴ —Rŭ guma Tupana ga naxŭcŭ ga guxŭma ga naānegŭ rŭ guxŭma i nawa ngèxmaxŭ, rŭ nŭma nixŭ i norŭ yora yŭxŭ i daxŭgŭxŭ i naāne rŭ ñoma i naāne. Rŭ ngèmacèx nŭma rŭ tama duŭxŭgŭ ŭxŭne ya tupaucagŭgu naxāchiŭ. ²⁵ —Rŭ nŭmatama ya Tupana rŭ taxucèxma nanaxwèxe i duŭxŭgŭarŭ ngŭxèè na namaxŭxŭcèx i nŭmax, erŭ taxuŭma nŭxŭ nataxu. Rŭ nŭmatama guxāna nanaxā i maxŭ, rŭ tŭxna nanaxā ya buanecŭ ya namaā ingŭātanŭcŭcŭ. Rŭ nŭmatama tŭxna nanaxā i guxŭma. ²⁶ —Nŭma rŭ wŭxi ga duŭxŭwatama nanaxŭ ga guxŭma ga duŭxŭgŭ na guxŭ i naānewa nangèxmagŭxŭcèx. Rŭ nŭma inaxuneta i ñuxgu tá na nabuxŭ i duŭxŭgŭ rŭ ngexta tá naxāchiŭxŭ i wŭxichigŭ. ²⁷⁻²⁸ —Rŭ yemaâcŭ nanaxŭ na naxcèx nadaugŭxŭcèx ga duŭxŭgŭ rŭ ñoma èānexŭwa tacŭcèx idaugŭxŭrŭŭ nŭxŭ iyangaugŭxŭcèx. Natŭrŭ nŭma ya Tupana rŭ woetama guxŭguma tŭxna nangaicamachirèx, erŭ nagagu nixŭ i imaxèxŭ rŭ ixŭāxtanŭcŭxŭ rŭ ingèxmaxŭ, ngèxgumarŭŭ i ñuxre i perŭ poperaarŭ ŭmatŭxŭgŭ naxŭmatŭxŭrŭŭ, rŭ ñanagŭrŭgŭ:

“Rŭ Tupanaxâcŭ tixŭgŭ”, ñanagŭrŭgŭ. ²⁹ —Rŭ ñuxma na Tupanaxâcŭgŭ ixŭgŭxŭ, rŭ tama name i nagu tarŭxŭnŭè rŭ Tupana rŭ wŭxi i naxchicŭnèxā i uirumŭwa rŭ èxna dŭèrumŭwa rŭ èxna nutawa ixŭxŭrŭŭ nixŭ. Erŭ guxŭma i ngēma naxchicŭnèxāgŭ rŭ nŭmatama i duŭxŭgŭ nagu naxŭnŭèxŭâcŭma nanaxŭgŭ. ³⁰ —Rŭ nuxcŭma ga duŭxŭgŭ rŭ naèchitamare ìnatŭe, natŭrŭ nŭma ga Tupana rŭ namaā yaxna naxŭnŭ. Natŭrŭ i ñuxma ya Tupana rŭ nanamu i duŭxŭgŭ i guxŭwama na naxcèx nadaugŭxŭ rŭ nŭxŭ naxoexŭ i nacŭma i chixexŭgŭ. ³¹ Yerŭ nŭma ga Tupana rŭ marŭ nŭxŭ naxuneta i wŭxi i ngunexŭ i nagu tá aixcŭma guxŭ i ñoma i naānecŭāxŭ i duŭxŭgŭna naçaxŭ i norŭ maxŭchiga. Rŭ

marü nüxŭ naxuneta ya wüxi ya yatü ya Ngechuchu, rü yima tá nixŭ ya duŭxŭgüna çacü. Rü Tupana rü guxäxŭma nüxŭ nacuèxëë ga yema ga yexguma Ngechuchuxŭ wena namaxëëgu —ñanagürü ga Pauru. ³² Rü yexguma yema wena na namaxëxŭchigaxŭ naxŭnŭëgu ga duŭxŭgü, rü ñuxre ga nümagü rü Pauruxŭ nacugüe. Natürü ga togü rü ñanagürügü: —Rü wenagu táxarü cuxŭ itarüxŭnŭë i ngëmachiga —ñanagürügü. ³³ Rü yexguma ga Pauru rü ínaxŭxŭ ga natanüwa. ³⁴ Natürü ñuxre ga duŭxŭgü rü Pauruwe narüxŭ, rü Ngechuchuaxŭ nayaxögü. Rü natanüwa nayexma ga Diuníchiu ga wüxi ga Areópagutanŭxŭ, rü wüxi ga ngecŭ ga Dámari ga ngëga. Rü ñuxre ga togü rü ta nayaxögü.

18

Corŭtiuwa nayexma ga Pauru

¹ Rü yemawena rü inaxŭãchi ga Pauru ga Atenawa, rü ñãne ga Corŭtiuwa naxŭ.
² Rü yéma namaã inayarŭxŭ ga wüxi ga yatü ga Aquiru ga Pötuaneçŭãx ga yexwacè Dumawa ga Itáriaanewa ne ŭxŭ namèx ga Prisilamaãx. Rü yéma Corŭtiuwa nayexma yerü Dumacŭãxgŭarü ãëxgacü ga Cáudiu nanamu ga na ínachoxŭxŭcèx ga guxŭma ga Yudíugü ga Dumawa. Rü Pauru rü naxŭtagu nanaxŭãne. ³ Rü yexma nape rü naxchirunaxcèx ga düxenüârü üwa nügümaã napuracüe yerü woetama yema nixŭ ga norü puracü ga Pauru rü Aquiru rü Prisila. ⁴ Rü guxŭ ga ngŭxchigaarü ngunexŭgu rü Yudíugŭarü ngutaquëxepataŭwa naxŭxŭ ga Pauru, rü duŭxŭgümaã nidexaxŭ, rü nayaxucŭxëgŭxŭ. Rü yexgumarŭ ta nayaxucŭxëgŭxŭ ga yema duŭxŭgü ga tama Yudíugü ixŭgŭxŭ. ⁵ Rü yixcamaxŭra ínangugü ga Chira rü Timutéu ga Machedóniãwa ne íxŭ. Rü yexguma inanaxŭgü ga Pauru ga aixcŭma poraãcŭ nüxŭ na yaxuxŭ ga Tupanaârü ore. Rü meãma Yudíugŭxŭ nangŭexëë na Ngechuchu rü Tupana Nane ya Cristu na yŭxŭ. ⁶ Natürü nümagü ga yema Yudíugü rü inanaxŭgüe ga Paurumaã na nanuëxŭ, rü namaã naguxchigagŭxŭ. Rü yexguma inapamŭchiru ga Pauru, yerü yema nixŭ ga wüxi ga cuèxruŭ naxcèx ga yema duŭxŭgü na yemawa nüxŭ yacuèxãchitanŭxŭcèx ga norü chixexŭ. Rü ñanagürü nüxŭ: —Pegagu tátama nixŭ i na ipeyarŭtauxexŭ, rü marü tama chaugagu tá nixŭ. Rü ñomaŭcŭü i choma rü tá ngëma tama Yudíugü ixŭgŭxŭtanüwa chaxŭ —ñanagürü ga Pauru. ⁷ Rü ínaxŭxŭ ga guma ngutaquëxepataŭwa. Rü yéma nayexma ga wüxi ga yatü ga Tíchiu ga Yuchugu ãegaxŭ. Rü nüma rü Tupanaxŭ nangechaŭ rü yexma ngutaquëxepataŭcŭwagu naxãpata. Rü yemaxŭtawa naxŭ ga Pauru, rü yexma nape. ⁸ Rü Cripu ga ngutaquëxepataŭârü ãëxgacü rü namèx rü guxŭma ga naxãcŭgü rü Cori ya Ngechuchuaxŭ nayaxögü. Rü yexgumarŭ ta rü muxŭma ga Corŭtiucŭãxgŭ rü nayaxögü ga yexguma nüxŭ naxŭnŭëgu ga yema ore, rü ñuxŭchi Pauru ínanabaiŭxëë. ⁹ Rü wüxi ga chŭtaxŭ rü nangoxetü ga Pauru. Rü Cori ya Tupana namaã nidexa, rü ñanagürü: —¡Rü táxŭ i cumuŭxŭ! ¡Rü nüxŭ ixuama i chorü ore! ¡Rü táxŭ i curŭchianexŭ! ¹⁰ —Erü choma rü chacuxŭtagu, rü taxúetáma chixexŭ cumaã taxŭ. Erü daa ñãnewa rü choxŭ nangëxma i muxŭma i chorü duŭxŭgü —ñanagürü ga Tupana. ¹¹ Rü wüxi ga taunecŭarü ngãxŭ Corŭtiuwa nayexma ga Pauru. Rü yéma yema duŭxŭgŭtanüwa namaã nangŭexëëtae ga Tupanaârü ore. ¹² Natürü yexguma Acayaaneârü ãëxgacü yixŭga ga Gariõŭ, rü yema Yudíugü rü wüxigu Pauruxŭ niyaxŭgü, rü ãëxgacŭpëxewa nanagagü. ¹³ Rü ñanagürügü nüxŭ ga guma ãëxgacü: —Ñã yatü rü duŭxŭgŭxŭ naxucŭxë na Tupanaxŭ yacuèxŭgŭxŭcèx rü tama naga na naxŭnŭëxŭcèx i tachiŭãneârü mugü —ñanagürügü. ¹⁴ Rü Pauru marü nachonagŭchaŭ, natürü nüma ga ãëxgacü ga Gariõŭ rü yema Yudíugŭxŭ nangãxŭ, rü ñanagürü: —Rü ngëxguma chi wüxi i taxŭ i chixexŭ naxŭxgu, rü ëxna namáëtagu, rü ngëxguma chi nixŭ i choma i pexŭ ichaxŭnŭxŭ, Pa Yudíugŭx. ¹⁵ —Natürü ngëma pecŭmachiga rü perü mugŭchiga rü perü nguxëëtaechiga na yŭxŭ, rü choma rü tama nüxŭ chacuáxchaŭ i ngëma. ¡Rü pematama penamexëëx! Rü choma rü tama ngëmachigaarü ãëxgacü chixŭxchaŭ —ñanagürü. ¹⁶ Rü

yexguma ínanawoxü ga yéma. ¹⁷ Rû yexguma guxüma ga yema duüxügü rû Yudíugüarü ngutaquëxepataüârü âëxgacü ga Chótenegu âegaxüxü yexma niyauxgü. Rû yexmatama âëxgacü ga Gariöüþëxegu nanaçuaixgü. Natürü nüma ga Gariöü rû taxu ñanagürüama.

Pauru rû Aütioquíacèx nataegu, rû ñuxüchi wenaxârü inaxüâchi na norü tomaëxpüxcüna to ga nachiüânegüwa nangeaxü ga Tupanaârü ore

¹⁸ Rû yemawena rû muxüma ga ngunexü yéma Corítiuwa nayexma ga Pauru. Rû yixcama nüxü narümoxë ga yema yaxögüxü rû nüxna inaxüâchi. Rû ñâne ga Chëcreawa naxü namaã ga Prisila rû Aquiru. Rû Chëcreawa nügü nidüpüxüeru ga Pauru yerü marü nayanguxëë ga wüxi ga uneta ga Tupanamaã nüxü yaxuxü. [Rû woetama yema nixí ga nacümagü ga Yudíugü ga yexguma yanguxëëgüãxgu ga wüxi ga uneta ga Tupanamaã nüxü yaxuxü.] Rû ñuxüchi Chëcreaarü türewa rû wüxi ga wapurugu nichoü na Chíríaanewa naxüxcèx. ¹⁹ Rû yexguma Epéchiuwa nangugügu, rû Pauru nüxna nixügachi ga Prisila rû Aquiru, rû Yudíugüarü ngutaquëxepataüwa naxü. Rû yéma namaã nidexa ga yema Yudíugü ga guma ngutaquëxepataüwa ngutaquëxegüxüxü. ²⁰ Rû yema Yudíugü, rû muxüma ga ngunexügü nüxü nacèxügü ga yexma na naxüxcèx, natürü ga nüma rû tama nanaxwëxe. ²¹ Rû yemacèx nüxü narümoxëãma, rû ñanagürü nüxü: —Rû ngëxguma Tupana naxwëxegu, rû wena táxarü pexcèx chataegu —ñanagürü. Rû yemawena rû Epéchiuarü türewa nayarüxüe, rû inaxüâchi. ²² Rû Checharéaarü türewa nangu, rû yéma ínaxüe. Rû ñuxüchi Yerucharéüwa naxü na nüxü yanamoxëxüxcèx ga guxüma ga yema yaxögüxü. Rû ñuxüchi Aütioquíawa naxü. ²³ Rû yexguma marü ñuxre ga ngunexü yéma Aütioquíawa nayexmagu, rû wenaxârü inaxüâchi ga Pauru na wüxichigü ga ñâne ga Gárataanewa rû Fríyíaanewa yexmagünewa íyadauxüxcèx rû yataãëxëëgüãxüxcèx ga guxüma ga yema yaxögüxü ga guma ñänegüwa yexmagüxü.

Aporu rû Epéchiuwa nüxü nixu ga Tupanaârü ore

²⁴ Rû yexgumaücüü rû Epéchiuwa nangu ga wüxi ga Yudíu ga Aporugu âegaxü. Rû nüma rû ñâne ga Aleyãdriacüãx nixí, rû nüxü natauxcha ga duüxügüpëxewa na yadexaxü. Rû meãma nüxü nacuèx ga Tupanaârü ore i ümatüxü. ²⁵ Rû nüma meã nüxü nacuèx ga Cuáü ga baiüxëëruüârü nguxëëtae ga Cori ga Ngechuchuchiga, rû nüxü nacuèx na ñuxãcü Cuáü duüxügüxü íbaiüxëëxü. Natürü yexicaxütama nacuèx ga Ngechuchuchiga. Natürü poraãcü nataãëcüma nidexa rû aixcüma nanangüexëë ga duüxügü. ²⁶ Rû nüma ga Aporu rû tama namuüãcüma ínanaxügü ga na yadexaxü ga Yudíugüarü ngutaquëxepataüwa. Natürü yexguma Aporuxü naxíñüëgu ga Prisila rû Aquiru, rû napatawa nanagagü na yexeraãcü namaã inanguxüxëëãxüxcèx ga Ngechuchuchiga. ²⁷ Rû yexguma Acayaanewa naxüxchaügu ga Aporu, rû yema yaxögüxü ga Epéchiucüãx nüxü narüngüxëëgü. Rû popera yéma namugü naxcèx ga yema yaxögüxü ga Acayacüãx na meã Aporuxü nayauxgüxüxcèx. Rû yexguma Acayawa nanguxgu ga Aporu rû poraãcü nüxü narüngüxëë ga yema duüxügü ga Tupanaârü ngechaügagu Ngechuchuaxü yaxögüxü. ²⁸ Rû guxü ga duüxügüpëxewa nüxü nüxü nacuèxëë ga poraãcü na ínatüexü ga yema Yudíugü ga tama Ngechuchuxü cuáxchaügüxü. Rû nümagü ga Yudíugü rû taxucürüwama ñuxü ñanagürügü, yerü ga Aporu rû Tupanaârü ore ga ümatüxüwa meãma nüxü nanawëx ga na Ngechuchu rû aixcüma Tupana Nane ya Cristu na yíixü.

19

Epéchiuwa nayexma ga Pauru

¹ Rû yexguma Corítiuwa nayexmayane ga Aporu, rû Pauru rû naxpüxanegu idaxü ga namawa nixüpetü, rû Epéchiuwa nangu. Rû yexma nüxü nayangau ga ñuxre ga yaxögüxü. ² Rû nüxna naca, rû ñanagürü nüxü: —¿Marü penayaxuxü i Tupanaãe i Ünexü ga yexguma peyaxögügu? —ñanagürü. Rû nümagü nanangãxü, rû ñanagürügü:

—Tama. Taguma nüxü taxĩnüêchiga na tacü yĩxü i Tupanaãe i Ünexü —ñanagürügü. ³ Rü yexguma ga Pauru rü nüxna naca rü ñanagürü nüxü: —¿Texéaxü peyaxögüxü ga yexguma ípebaiügu? —ñanagürü. Rü nümagü nanangãxü, rü ñanagürügü: —Toma nüxü tayaxô ga yema Cuáü ga baiüxêeruüârü nguxêetae —ñanagürügü. ⁴ Rü yexguma ga Pauru rü ñanagürü nüxü: —Cuáü ínanabaiüxêe ga yema duüxügü ga nüxü rüxoexü ga nacüma ga chixexü rü Tupanacèx daugüxü. Natürü yema duüxügümaã nüxü nixu ta na nüxü yaxögüãxücèx ga Ngechuchu ga naweama äcü —ñanagürü ga Pauru. ⁵ Rü yexguma yemaxü naxĩnüêgu ga yema duüxügü rü ínabaiü naegagu ga Cori ya Ngechuchu. ⁶ Rü yexguma Pauru rü yema yaxögüxüetügu naxüméxgu, rü nüxna nangu ga Tupanaãe i Ünexü, rü to ga nagawachigü nidexagü, rü nüxü nixugüe ga Tupanaârü ore. ⁷ Rü maneca 12 ga yatü nixígü ga yema duüxügü. ⁸ Rü tomaêxpüx ga tauemacü yéma nayexma ga Pauru. Rü Yudíugüarü ngutaquêxepataüwa naxüüxü rü tama namuüâcüma nüxü nixuuxü ga Tupanaârü ore. Rü nanangüexêe na ñuxäcü äêxgacü na yĩxü ya Tupana, rü nüxü nanangüchaüxêe na Ngechuchuaxü yaxögüãxücèx. ⁹ Natürü nayexma ga ñuxre ga duüxügü ga tama nüxü cuèxgüchaüxü rü tama yaxögüchaüxü. Rü nümagü ínanaxügüe ga na yema muxüma ga duüxügüpêxewa chixexü yaxugüexü nachigagu ga Cori ga Ngechuchu. Rü yemacèx nüxna nixügachi ga Pauru, rü toxnamana nanagagü ga yema yaxögüxü. Rü guxü ga ngunexügu namaã nüxü nixuchiga ga ore nawa ga wüxi ga ngutaquêxepataü ga Tiranuârü ngüepataü ga naega. ¹⁰ Rü yemaäcü nanaxü ga taxre ga taunecü, rü yemaäcü guxüma ga Áchiacüãxgü ga Yudíugü rü Griégügü rü nüxü naxĩnüê ga Cori ya Tupanaârü ore. ¹¹ Rü Tupana Pauruxü narüngüxêe ga na naxüãxü ga taxügü ga mexügü ga Tupanaârü poramaã naxüxü. ¹² Rü èixrüxü ga norü dechugü ga Pauru rü naxchirugü rü duüxügü rü yema idaaweexüxütawa nanangegü. Rü yexguma yema idaaweexü nüxü ingögügügu ga yema naxchiru rü êxna dechu, rü naxcèx nitaanegü. Rü yema duüxügü ga ngoxoãxgüxü rü ta naxcèx nitaanegü. ¹³ Natürü nayexma ga ñuxre ga Yudíugü ga íanegüwachigü ixíetanüxü rü ngoxogüarü woxüwa puracüexü. Rü nüxü naxügü na Cori ya Ngechuchuégagu na ínawoxüãxü ga ngoxogü nawa ga yema duüxügü ga ngoxoãxgüxü. Rü ñanagürügü: —Ngechuchu ya Pauru nüxü ixuchigacüégagu pexü tamu na ípechoxüxücèx —ñanagürügü ga yema Yudíugü. ¹⁴ Rü yema 7 ga yema ügüxü, rü wüxi ga Yudíugüarü paigüarü äêxgacü ga Echebaga äegaxü nanegü nixígü. ¹⁵ Natürü wüxi ga ngunexügu ga yexguma wüxi ga ngoxoxü ínatèxüchigüchaügu, rü yema ngoxo nanangãxü, rü ñanagürü: —Nüxü chacuèx ya Ngechuchu, rü nüxü chacuèx ya Pauru na texé yĩxü. ¿Natürü i pema rü texégü pixígü? —ñanagürü. ¹⁶ Rü yexguma ga yema yatü ga ngoxoãxü rü yema duüxügü ga ínatèxüchigüchaüxüna nayuxu, rü nüxü narüporamae ga guxüma, rü ínanagáuüxüne. Rü yemaäcü ngexchiruxüma rü napíexüma nibuxmü ga guma íwa. ¹⁷ Rü guxüma ga Yudíugü rü Griégügü ga Epéchiuwa yexmagüxü rü nüxü nacuáchiga ga yema. Rü poraäcü namuüê ga guxüma. Rü yemaäcü yexeraäcü natachiga ga Cori ga Ngechuchu ga yéma. ¹⁸ Rü muxüma ga yema yaxögüxü rü yéma ningugüetanü, rü guxü ga duüxügüpêxewa nüxü nixugüechigü ga nüma rü ta na nayuüechiréxü, natürü tá nüxü na naxoexü ga yema. ¹⁹ Rü muxüma ga yema iyüechiréxü, rü yéma nanana ga norü poperagü ga yuüpane ga nawa nangüexü, rü guxápêxewa ínanagu. Rü yexguma nangugügüãgu ga natanü ga yema poperagü, rü maneca 50,000 tachinü ga díeru ga tatanüxüwa nangu. ²⁰ Rü yemaäcü ga Cori ya Tupanaârü ore, rü yexeraäcü nixüchigü, rü yexeraäcü duüxügü nüxü nadau na ñuxäcü naporaxü ga yema ore. ²¹ Rü yemawena ga Pauru, rü nagu narüxĩnü ga Machedóniãñewa rü Acayaanewaxíra na naxüxü, rü yéma ñuxüchi Yerucharéüwa na naxüxü. Yerü yema ñanagürü: —Rü ngema Yerucharéüwa tá chaxü, rü yixcama rü Dumawa rü tá ta chaxü —ñanagürü. ²² Rü yemacèx nügüpêxegu Machedóniãñewa nanamugü ga taxre ga norü ngüxêeruü ga Timutéu rü Eratu. Natürü nüma ga Pauru rü ñuxre ga ngunexü Áchiagu narüãüx.

Nanuē ga duūxūgū ga Epéchiuwa

²³ Rū yexgumaūcūū rū Epéchiuwa rū nanaxixāchitanūāē ga duūxūgū, rū poraācū nanuē nachigagu ga Cori ya Tupanaārū ore. ²⁴ Rū yemaācū naxūpetū nagagu ga wūxi ga yatū ga dīerumūwa puracūxū ga Demétriu gu āegaxū. Rū nūma rū ínanaxūxū ga norū tupana ga Atemíchaarū tupaucachicūnēxāgū ga dīerumūnaxcēx. Rū nayexma ga muxūma ga norū puracūtanūxū ga yemawa puracūexū. Rū guxūma poraācū meā nūxū naxātanū ga yema puracū. ²⁵ Rū nūma ga Demétriu rū nanangutaquēxexēē ga guxūma ga puracūtanūxū ga yemawa puracūexū, rū ñanagūrū nūxū: —Pa Chomūcūgūx, meā nūxū pecuēxgū na ñāā tórū dīerumūārū puracūgu na ngīxū iyaxuxū i tórū dīeru. ²⁶ Rū marū nūxū pedaugū i ngēma Pauru rū nūxū pexīnūē na ñuxācū yaxucuxēgūāxū i duūxūgū, rū ñuxācū namaā nūxū yaxuxū na tama aixcūma tupanagū yīxū i ngēma tupanagū i yixema ixūgūxū. Rū ngēmaācū muxūma i duūxūgūxū nūxū narūxoexēē na tama tórū tupanagūaxū yaxōgūāxūcēx. Rū tama nūma Epéchiuwaxicatama ngēxū nawagū natūrū wixguxūchi taēx guxū i Áchiaanewa ngēmaācū chixri nayaxucuxēgū i duūxūgū. ²⁷ Rū pema nūxū pecuēx rū tórū puracūcēx rū naxāūcūma i ngēma. Rū wūxi i chixexū ta nixī i naxcēx i tórū tupana i Atemíchaarū tupauca ya taxūne. Rū ñuxma rū muxūma i duūxūgū rū ngīxū nangechaū i Atemícha i guxū i Áchiaanewa rū guxū i naānewa. Natūrū ngēma Pauruarū ucuxēgagu rū dūxwa taxuxūtāma ngīxū nangechaū i duūxūgū, rū ngēmaācū dūxwa inaārūxo tá ta i tórū puracū —ñanagūrū ga Demétriu. ²⁸ Rū yexguma yemaxū naxīnūēgu, rū poraācū nanuē, rū tagaācū ñanagūrūgū: —¡Namaxū i Epéchiucūāxgūarū tupana i Atemícha! —ñanagūrūgū. ²⁹ Rū guxūma ga yema íānecūāxgū rū poraācū yexma ínatūēāē. Rū ínanayauxū ga Gayu rū Aritárcu ga Machedóniāānecūāxgū ga Paurumūcūgū, rū guma í ga íāneārū ngutaquēxepataūwa nanagauxūtanū. ³⁰ Rū Pauru rū ta yexma naxūcuchaū na yema duūxūgūmaā yadexaxūcēx, natūrū yema yaxōgūxū nūxna nanachuxu ga yexma na naxūcuxū. ³¹ Rū yema Áchiaaneārū āēxgacūgūtanūwa rū nayexma ga ñuxre ga Paurumūcūgū ixīgūxū. Rū nūmagū rū ta Pauruxūtawa namugagū na tama yema ngutaquēxechicagu naxūcuxūcēx. ³² Rū yoxni ga duūxūgū ga yema ínangutaquēxegūxūwa, rū nūmaxū rū wūxi ga oremaā aita naxūe, rū togū ga to ga oremaā aita naxūe. Yerū poraācū nanaxixāchiāēgū ga guxūma ga yema duūxūgū ga yēma ngutaquēxegūxū. Rū muxūma rū tama nūxū nacuēxgū ga ſacūcēx na nangutaquēxegūxū. ³³ Natūrū yēma nayexma ga wūxi ga Yudíu ga Areyáūdrugu āegaxū. Rū yema togū ga Yudíugū rū namaā nūxū nixu ga ſacūcēx na nangutaquēxexū. Rū duūxūgūpēxewa nanamugū na yadexaxūcēx rū naētūwa nachogūxūcēx ga yema Yudíugū ga yēma yexmagūxū. Rū nūma ga Areyáūdru rū naxunagūmēxē na iyanachianegūxūcēx ga duūxūgū, na namaā yadexaxūcēx. ³⁴ Natūrū yexguma nūxū yacuēxāchitanūgu ga Aré rū Yudíu na yīxū, rū guxūma ga yema duūxūgū rū wūxigu tagaācū aita naxūe. Rū taxre ga ora ninge ga na tagaācū ñagūxū: —¡Namaxū i Epéchiucūāxgūarū tupana i Atemícha! —ñagūxū. ³⁵ Rū dūxwa yema íāneārū āēxgacū nanachiāchixēē ga yema muxūma ga duūxūgū, rū ñanagūrū nūxū: —Pa Epéchiucūāxgūx, guxūma i duūxūgū nūxū nacuēx na Atemíchaarū tupauca ya taxūneārū dauruū na ixīgūxū. Rū guxūma nūxū nacuēx na nūma tūxū nangēxmaxū i Atemíchachicūnēxā i daxūwa rūnguxū. ³⁶ —Rū ñuxma na guxūma nūxū na cuāxū na aixcūma yīxū i ngēma, rū name nixī na pechiāchixū, rū taxuūma i chixexū pexūexū. ³⁷ —Erū ñāā yatūgū i nuā pegagūxū, rū taxuūma i chixexū ngīmaā naxūgū i tórū tupana, rū tama chixexū nixugūe ngīchigagu. ³⁸ —Rū ngēxguma chi Demétriu rū ngēma namūcūgū i namaā napuracūexū rū nūxū nangēxmagu i ſacū i tama norū me ixīxū, rū nangēxma i ngutaquēxechicagū i ngextá āēxgacūgū duūxūgūxū íicagūxūwa. Rū name nixī na ngēma āēxgacūgūpēxewa namexēēāxū i ſacū i tama norū me ixīxū. ³⁹ —Rū ngēxguma nangēxmagu i ſacū i to i perū guxchaxūgū, rū name nixī i íāneārū āēxgacūgūarū ngutaquēxewa penamexēē

i ngēma. ⁴⁰ —Erü ñuxma rü taxãücūmaxūgugū rü ngürüãchi ãëxgacū ya tacū ya Dumawa ngëxmacū rü tūxna tá naxcèx naca i ngēma ñuxma ngupetūxū. Erü aixcūma taxumaãma tanangãxūëga i ãëxgacū, ega tūxna nacaxgu naxcèx i ñaã ngutaquëxe i nawa pexãūgatanūxū —ñanagürü. ⁴¹ Rū yexguma marū yema ñaxguwena, rü ínayamugū ga yema duūxūgū.

20

Machedóniãñewa rü Griégugūchiūñewa naxū ga Pauru

¹ Rū yexguma marū nangupetūgu ga yema na íyacucuxū ga duūxūgū, rü Pauru naxcèx nangema ga yema yaxōgūxū na yaxucuxēgūãxūcèx. Rū yexguma marū namaã nūxū nachaugu, rü nūxū narūmoxē, rü inaxūãchi ga Machedóniãñewa na naxūxū. ² Rū yexguma yema nañewa yaxūpetūgu, rü taãëxū ga oremaã nayaxucuxēgū ga yema yaxōgūxū ga wūxichigū ga ñañewa yexmagūxū. Rū yemaãcū Griégugūchiūñewa nangu. ³ Rū yéma nayexma ga tomaëxpūx ga tauemacū. Rū yexguma marū inaxūãchichaūgu ga Chíríaanewa na naxūxū, rü tama wapurugu nixū yerū nūxū nacuáchiga ga na ñuxre ga Yudíugū yamëxgūchaūxū. Rū yemacèx nagu narūxīnū ga dauxchitagu na nataeguxū, rü wenaxārū Machedóniãñewa na naxūpetūxū. ⁴ Rū ínayaxūmücūgū ga Chópate ga Beréacūãx ga Píru nane, rü Aritárcu rü Segūdu ga Techarónicacūãxgū, rü Gayu ga Derbecūãx, rü Timutéu, rü Tíquicu, rü Turuquínu ga Áchiaanecūãxgū. ⁵ Rū yema yatūgū rü nūxīra topëxegu naxāgū, rü Tróawa toxū nayarūnguxēëgū. ⁶ Rū nawena ga yema Yudíugūarū peta ga ūpetūchiga ga pāū ga ngearū puxēëruūãxū nagu nangōxgūxū, rü wapurugu Piripuwa itaxīãchi. Rū wūximēëxpūx ga ngunexū ngupetūgu, rü Tróagu nūxū tayangaugū ga yema topëxegu āgūxū. Rū yexma tarūcho ga 7 ga ngunexū.

Tróagu nanaxūãne ga Pauru

⁷ Rū yema yūxūarū ngunexūgu rü tangutaquëxegū namaã ga yema yaxōgūxū na tanangōxūcèx ga pāū ga būcuxū yema Ngechuchu toxū ngúexēëxürüū. Rū yema yaxōgūxūmaã nidexa ga Pauru. Rū nanamèxēë ga norū dexa ñuxmata ngāxūcūwa nangu, yerū moxūãcū inaxūãchichaū. ⁸⁻⁹ Rū daxūwa ga guma ípataarū tomaëxpūxchiūwa yexmaxū ga ucapuwa tangutaquëxegū. Rū namu ga omū ga yéma naīgūxū. Rū nayexma ga wūxi ga ngextūxūcū ga Eutícugu ãegacū. Rū yéma wūxi ga yema ucaputapūxarū ñaxwa narūto. Natürü ga Pauruarū dexa, rü poraãcū namèx. Rū yemacèx ga guma ngextūxūcū rü poraãcū nayaxta, rü dūxwa nipeãchi rü yema ñaxwa narūngu, rü ñaxtūanegu nangu. Rū yéma yucūma nanayauxgū. ¹⁰ Rū ínarūxī ga Pauru, rü nayanawūxūchi ga guma ngextūxūcū, rü duūxūgūxū ñanagürü: —¡Tāxū i peñaxīãchiexū, erū namaxū nixī! —ñanagürü. ¹¹ Rū yexguma wenaxārū daxū naxī, rü inanabūcu ga yema pāū, rü nanangōx. Rū wenaxārū nidexa ñuxmata yangune, rü yexguma inaxūãchi. ¹² Rū guma ngextūxūcū rü maxūcū napatawa nanagagū. Rū yemacèx poraãcū nataãëgū ga guxūma ga nūmagū.

Tróawa inaxūãchi ga Pauru rü Miretuwa naxū

¹³ Rū yexguma ga Pauru rü ñanagürü: —Dauxchitagu tá chixū ñuxmatáta ñañe ya Achuwa changu na ngema pexū chixūexūcèx —ñanagürü. Rū yemacèx ga toma rü wapurugu tichoū rü yoxni napëxegu taxī ñuxmata Achuwa tangugū. ¹⁴ Rū yexguma Achugu Paurumaã togū tayangauxgu, rü yéma toxū nixūe. Rū tachopetū ga yéma ñuxmata Miterénewa tangugū. ¹⁵ Rū yéma itaxīãchi rü moxūãcū Quíuarū toxmèxtawa tachopetū. Rū yemaarū moxūãcū Chamowa tangugū. Rū yemaarū moxūãcūama Miretuwa tangugū. ¹⁶ Rū yemaãcū ítixī yerū ga Pauru rü tama Áchiaanegu nanuxcūchaū. Yerū nanaxwèxe ga paxa Yerucharéūwa na nanguxū naxcèx ga Pëtecóstarū ngunexū. Rū yemacèx nagu narūxīnū na tama Epéchiugu íyadauxū.

Yaxōgūxūārū ãëxgacūgū ga Epéchiucūãxmaã nidexa ga Pauru

¹⁷ Natürü yexguma Miretuwa tangugügu rü Epéchiuwa naxcèx namuga ga Pauru na naxütawa naxixücèx ga yema yaxögüxüârü âëxgacügü ga Epéchiucüâx. ¹⁸ Rü yexguma Pauruxütawa nangugügu, rü ñanagürü nüxü: —Pema meã nüxü pecuèxgü ga ñuxäcü pepèxewa na chamaxüxü ga guxügu ga yexguma noxritama nuã Áchiaanewa chaxüxgu. ¹⁹ Rü guxüguma ga yexguma petanüwa chayexmagu, rü meãma chanaxü ga Cori ya Tupanaârü puracü, taguma chaugü chicuèxüüâcüma. Rü woo muëxpüxcüna poraäcü changechaügu, nagagu ga yema chixexü ga chomaã naxügüchaüxü ga Yudiügü, natürü naetüwa chanaxüama ga yema puracü. ²⁰ Rü taguma íchayachaxâchi ga pemaã nüxü na chixuxü ga guxüma ga yema ore ga perü mexücèx ixixü. Rü guxü ga duüxügüpèxewa, rü pepatagüwa rü ta pexü changüexëë ga yema ore. ²¹ Rü Yudiügümaã rü yema tama Yudiügü ixigüxümaã nüxü chixu na namexü ga na nüxü naxoexücèx ga norü chixexügü rü Tupanaga naxinüèxücèx, rü nüxü na yaxögüâxücèx ga tórü Cori ya Ngechuchu. ²² Rü ñuxma rü Yerucharéüwa chaxü erü Tupanaãë i Üünexü rü ngema choxü namu. Natürü tama nüxü chacuèx na tacü tá choxü üpetüxü i ngema. ²³ Rü ngëma nüxü chacuáxü nixi i duüxügü tá choxü napoxcu rü guxchaxügü tá choxü naxüpetü i Yerucharéüwa. Rü ngëxícatama nixi i chomaã nüxü yaxuxü i Tupanaãë i Üünexü i guxüne ya iãne i ngextá íchixügüxüwa. ²⁴ Natürü tama ngëma äücümaxügu charüxünü erü nüetama nixi ega woo chayuxgu. Natürü ngëma chanaxwèxexü nixi na taãëäcüma chapuracüamaxü na meã chayangüxëèxücèx i ngëma puracü ga tórü Cori ya Ngechuchu choxna äxü rü nüxü chixuxücèx i norü ore i mexü na ñuxäcü Tupana tüxü ngechaüxü. ²⁵ Rü ñuxma rü marü nüxü chacuèx rü tagutáma wena choxü pedaugü i pema ga marü pemaã nüxü chixuxe na ñuxäcü âëxgacü na yixü ya Tupana. ²⁶ Rü ngëmacèx i ñoma i ngunexügu rü pemaã nüxü chixu rü marü tama chaugagu nixi ega texé petanüwa iyarütauxgu. ²⁷ Erü marü meãma pemaã nüxü chixu i guxüma i ngëma Tupana pexü naxwèxexü, rü taxuüma ichicux. ²⁸ Rü ngëmacèx i ñuxma rü penaxwèxe na pexuäëgüxü rü meã nüxna pedaugüxü i guxüma i yaxögüxü i petanüwa ngëxmagüxü. Erü ngëma nixi i Tupanaãxë i Üünexü nagu pexü mugüxü na nüxna pedaugüxücèx i ngëma Tupanaârü duüxügü i yaxögüxü i Ngechuchu nagümaâtama naxcèx taxexü. ²⁹ Choma nüxü chacuèx rü ngëxguma íchixüxgu, rü chowena tá pexcèx nuã naxi i togü i duüxügü. Rü tá nanachixexëëchaü i ngëma yaxögüxü ñoma airugü i idüraexü i carnerugüxü ngiächixëèxürü. ³⁰ Rü woo petanüwatátama nangëxmagü i nümaxü i tá doramaremaã nangüxëèxü i ngëma yaxögüxü na nügüwe naxixëèäxücèx. ³¹ ¡Pegüna pedaugü, rü nüxna pecuèxâchie na ñuxäcü tomaëxpüx ga taunecügu rü ngunecü rü chütacü rü taguma íchayachaxâchixü ga pexcèx chaxauxäcüma na pexü chixucuxëgüxü ga wüxichigü! ³² Rü ñuxmax, Pa Chaueneëgüx, rü Tupanana pexü chamugü. Rü chanaxwèxe i naga pexinüë i norü ore i tüxü nüxü cuèxëèxü na ñuxäcü poraäcü tüxü nangechaüxü. Erü ngëma norü ore tá pexü naporaexëë na tórü Coricèx pemaxëxücèx rü pexü nangëxmaxücèx i pechica namaã i guxüma i duüxügü i Tupana dexü. ³³ Choma rü taxuguma chaugücèx chanaxwèxe ga texéarü dīeru rü texéchiru. ³⁴ Rü pematama rü meã nüxü pecuèx ga ñuxäcü daa choxmëxmaã na chapuracüxü naxcèx ga yema choxü rü chomücügüaxü taxuxü. ³⁵ Rü guxüguma meã pexü changüexëë na ngëmaäcü pepuracüexü na nüxü perüngüxëèxücèx i ngëma duüxügü i nüxü nataxuxü. Rü name nixi na nüxna pecuèxâchiexü i Cori ya Ngechucharü ore ga nümatama ñaxü:

“Rü narümemaë nixi i pema na toguena penaxäxü rü tama i tüma pexna tanaxäxü”, ñaxü. ³⁶ Rü yexguma yema ñaxguwena ga Pauru, rü inacaxäpüxü namaã ga guxüma, rü nayumüxë. ³⁷ Rü guxüma poraäcü naxauxe, rü Pauruna nanëixächigü, rü nüxü nachüxgü. ³⁸ Yerü poraäcü nangechaüë naxcèx ga yema ore ga namaã nüxü yaxuxü ga:

“Marü tagutáma wena choxü pedaugü” ñaxü. Rü nümagü ínayaxümücügü ñuxmata wapuruwa nangu.

21

Yerucharéŭwa naxŭ ga Pauru

¹ Rŭ yexguma nŭxna itaxĩachi ga yema yaxŏgŭxŭ, rŭ wapurugu tichoŭ. Rŭ capaxŭ ga Coscèx noxtacŭma tixaŭ. Rŭ moxŭacŭ rŭ Rodawa taxĩ. Rŭ yéma itaxĩachi, rŭ Pátarawa tangugŭ. ² Rŭ yexma nŭxŭ tayangau ga wŭxi ga wapuru ga Peníchiawa ŭxŭne. Rŭ nagu tichoŭ, rŭ itaxĩachi. ³ Rŭ yixcamaxŭra nŭxŭ tadaugŭ ga Chipre. Rŭ torŭ toxwecŭwawaama naxŭ, rŭ nŭxŭ tachopetŭ. Rŭ itañaxwetaxŭ ñŭxmata Chíríaanewa tangugŭ. Rŭ Tiruwa ítachoŭ, yerŭ yéma nixĩ ga ínanuŭacŭxŭ ga guma wapuru. ⁴ Rŭ yexma nŭxŭ tayangau ga yémacŭŭax ga yaxŏgŭxŭ, rŭ 7 ga ngunexŭ yéma natanŭwa tayexmagŭ. Rŭ Tupanaãe i Ūñexŭ nayadexagŭxèe ga yema yaxŏgŭxŭ, rŭ Pauruxŭ ñanagŭrŭgŭ: —ǰTãxŭ i Yerucharéŭwa cuxŭxŭ! —ñanagŭrŭgŭ. ⁵ Natŭrŭ yexguma nangupetŭgu ga yema 7 ga ngunexŭgŭ, rŭ itaxĩachi. Rŭ yema yaxŏgŭxŭ rŭ towe narŭxĩ. Rŭ naxmèxmaächigŭ rŭ naxácŭgŭmaächigŭ toxŭ ínixŭmŭcŭgŭ ga guxŭma ñŭxmata guma íañechipenŭwa tangugŭ. Rŭ yexma naxnŭcŭgu tacaxgŭápŭxŭ, rŭ tayumŭxègŭ. ⁶ Rŭ yexguma ga toma rŭ nŭxŭ tarŭmoxègŭ, rŭ tichoŭ ga wapuruwa. Rŭ nŭmagŭ rŭ napatacèx nawoegu. ⁷ Rŭ toma rŭ Tiruwa itaxĩachi rŭ Turemáídawa tangugŭ. Rŭ yéma ítachoŭ, yerŭ yexma nayacuèx ga wapurugu na taxĩxŭ. Rŭ nŭxŭ tarŭmoxègŭ ga yema yaxŏgŭxŭ ga yéma yexmagŭxŭ, rŭ wŭxi ga ngunexŭ natanŭgu tarŭcho. ⁸ Rŭ moxŭacŭ itaxĩachi ga yéma, rŭ Checharéawa tangugŭ. Rŭ Piripi ga Tupanaãrŭ orearŭ uruŭpatawa taxĩ. Rŭ nŭma rŭ yema 7 ga ngŭxèerŭgŭ ga tupaucana daugŭxŭtanŭxŭ nixĩ. Rŭ yexma naxŭtagu tapegŭ. ⁹ Rŭ nŭma nŭxŭ iyexma ga ágŭmŭcŭ ga naxácŭgŭ ga taguma ixãtecŭ ga Tupanaãrŭ orexŭ ixugŭecŭ. ¹⁰ Rŭ yexguma marŭ ñŭxre ga ngunexŭ yéma tayexmagŭgu, rŭ Yudéaanewa ne naxŭ ga wŭxi ga Tupanaãrŭ orearŭ uruŭ ga Agabugu aegaxŭ. ¹¹ Rŭ yexguma toxŭtawa nanguxgu ga Agabu, rŭ nanayaxu ga Pauruarŭ goyexŭ. Rŭ namaã nŭgŭ ninèixgŭcutŭ, rŭ nŭgŭ nináimèx, rŭ ñanagŭrŭ: —Tupanaãe i Ūñexŭ marŭ chomaã nidexa rŭ ñanagŭrŭ: “Rŭ ñaãcŭ tá nayanèixgŭ i Yudíugŭ i Yerucharéŭwa i ñaã goyexŭãrŭ yora. Rŭ ngèma duŭxŭgŭ i tama Yudíugŭ ixígxŭna tá nanamugŭ”, ñanagŭrŭ. ¹² Rŭ yexguma yema orexŭ taxĩnŭègu, rŭ toma rŭ yema Checharéacŭŭxgŭmaã Pauruxŭ tacèxŭgŭ ga tama Yerucharéŭwa na naxŭxècèx. ¹³ Natŭrŭ nŭma ga Pauru rŭ toxŭ nangãxŭ rŭ ñanagŭrŭ: —ǰTŭxcŭŭ pexauxe rŭ choxŭ pengechaŭxèe? Choma rŭ íchamemare na chináixŭ. Rŭ ngèxgumarŭŭ ta rŭ marŭ íchame na Yerucharéŭgu chayuxŭ naxcèx ya Cori ya Ngechuchu —ñanagŭrŭ. ¹⁴ Rŭ yexguma marŭ taxuacŭma tanachŭxugu, rŭ tachianemare, rŭ ñatarŭgŭ: —ǰÈcŭ yangu i Cori ya Tupanaãrŭ ngŭchaŭ! —ñatarŭgŭgŭ. ¹⁵ Rŭ yemawena rŭ togŭ tamexèègŭ, rŭ Yerucharéŭwa taxĩ. ¹⁶ Rŭ towe narŭxĩ ga ñŭxre ga yaxŏgŭxŭ ga Checharéacŭŭxgŭ, rŭ Machŏŭpatawa toxŭ nagagŭ. Rŭ nŭma nixĩ ga wŭxi ga Chíperecŭŭax ga ŭpamama woetama yaxŏxŭ. Rŭ naxŭtagu tapegŭxŭ.

Chaŭtiáguxŭtagu nanaxŭãne ga Pauru

¹⁷ Rŭ yexguma Yerucharéŭwa tangugŭgu, rŭ yema yaxŏgŭxŭ rŭ taãèacŭma toxŭ nayauxgŭ. ¹⁸ Rŭ moxŭacŭ ga Pauru rŭ tomaã Chaŭtiáguxŭtagu nanaxŭãne. Rŭ yéma nangutaquèxegŭ ga guxŭma ga yaxŏgŭxŭãrŭ aèxgacŭgŭ. ¹⁹ Rŭ nŭxŭ narŭmoxè ga Pauru, rŭ ñŭxŭchi meãma namaã nŭxŭ nixu ga guxŭma ga yema Tupana ŭxŭ ga yexguma yema tama Yudíugŭ ixígxŭmaã nŭxŭ yaxuxgu ga Tupanaãrŭ ore. ²⁰ Rŭ yexguma Pauruarŭ orexŭ naxĩnŭègu ga nŭmagŭ, rŭ Tupanaxŭ nicuèxŭgŭ. Rŭ ñanagŭrŭgŭ Pauruxŭ: —Dŭcèx, Pa Toeneèx, cuma nŭxŭ cucuèx rŭ nangèxma i muxŭchixŭ i Yudíugŭ i yaxŏgŭxŭ. Rŭ guxŭma i nŭmagŭ rŭ nanaxwèxegŭ na nagu naxĩxŭ i ngèma mugŭ ga Moíché ŭmatŭxŭ. ²¹ Natŭrŭ ga togŭ ga tama yaxŏgŭxŭ rŭ marŭ namaã nŭxŭ nixugŭgŭ na cuma rŭ cunangŭxèèxŭ i guxŭma i Yudíugŭ i togŭ i nachíŭãnewa ngèxmagŭxŭ, na tama naga naxĩnŭèxècèx i ngèma mugŭ ga Moíché ŭmatŭxŭ. Rŭ marŭ namaã nŭxŭ nixugŭgŭ na cunangŭxèèxŭ na tama tŭxŭ ínawiŭchèxmŭpèxechiraŭxècèx ya nanegŭ,

rü na tama naga naxĩnüëxüçèx i tacümagü ga Moïché tüxü muxü. ²² ¿Tacü tá ixüexü i ñuxmax? Erü ngëma Yudíugü i yaxögüxü rü aixcüma tá nüxü nacüëxgü na marü nuã cunguxü. ²³ ¡Rü ngëmacèx name nixĩ na cunaxüxü i ngëma tá cumaã nüxü tixuxü! Nuã totanüwa nangëxma i ägümücü i yatügu i yanguxëëchaüxü i wüxi i uneta i Tupanamaã nüxü yaxuxü. ²⁴ ¡Ngema tupauca ya taxünewa nagagü, rü wüxigu namaã yanguxëë i ngëma tacüma ga Moïché tüxna äxü, rü Tupanapëxewa pegü peyamexëëgü! ¡Rü nüxü naxütanü i ñuxregu nüxü naxätanü na yadüpüxüerugüxüçèx i ngëma yatügu na ngëmaäcü yanguxëëgüäxüçèx i norü unetagü! Rü ngëmawa rü guxüma i ngëma Yudíugü rü tá nüxü nacüëxgü na aixcüma cuma rü ta naga cuxĩnüxüxü i ngëma mugü ga Moïché ümatüxü rü tama aixcüma na yĩxü ga yema ore ga cuchiga ga nüxü yaxugüexü. ²⁵ Rü ñuxüchi ngëma yaxögüxü i tama Yudíugü ixígüxü, rü marü naxçèx tanaxümatü ga torü ore na tama nangögüäxüçèx i tacü i namachi i marü togü norü tupananetachicünëxägüxü namaã icuëxüügüxü, rü tama na nangögüäxüçèx ya nagü, rü tama nangögüäxüçèx i naëxügü rü ëxna naxünagü i wëxnaäxü, rü tama naĩ i ngëmaã rü ëxna naĩ ya yatümaã inapëxüçèx —ñanagürügü.

Tupauca ga taxünegu Pauruxü niyaxgü

²⁶ Rü yexguma ga Pauru rü yéma tupauca ga taxünewa nanagagü ga yema ägümücü ga yatügu. Rü moxüäcü rü Tupanapëxewa nügü namexëë ga Pauru wüxigu namaã ga yema yatügu. Rü ñuxüchi guma tupauca ga taxünegu namaã naxücu na paimaã nüxü yaxuxüçèx na 7 ga ngunexügu tá yĩxü na yanguxëëgüäxü ga yema norü uneta ga Tupanamaã nüxü yaxugüxü, rü yemawena rü tá na inaxãmaregüäxü ga norü ämaregü ga Tupanaxü namaã yacuëxüügüxü ga wüxichigü. ²⁷ Rü yexguma marü nagüxchaügu ga yema 7 ga ngunexü, rü ñuxre ga Yudíugü ga Áchiaanecüäxgü rü Pauruxü nadaugü ga tupauca ga taxünewa. Rü yema Yudíugü rü duüxügüxü nanuëxëë na Pauruxü yayauxgüxüçèx. Rü yemacèx Pauruna nayuxgü. ²⁸ Rü tagaäcü aita naxüe ñaxümaã: — Pa Tomücügü Pa Yudíugüx, ¡Paxa toxü perüngüxëëx! Ñaã nixĩ i ngëma yatü i guxüwama yangüexëëchigüxü i duüxügü na taxchi naxaieçüçèx i yixema i Yudíugü, rü naxchi na naxaieçüçèx i ngëma mugü ga Moïché ümatüxü rü daa tupauca ya taxüne. Rü naetüwa i ñuxmax rü nuxa daa tupauca ya taxünegu nanamucu i ñuxre i duüxügü i tama tacümagu íxü, rü ngëmaäcü nanaxüxaxëë i ñaã nachica i üünexü —ñanagürügü. ²⁹ Rü yema ñanagürügü yerü üpaacü Yerucharéüwa Paurumaã nüxü nadaugü ga Turuquínu ga wüxi ga Epéchiucüäx ga tama Yudíu ixixü. Rü nüxü nacüëxgügu rü Pauru marü yexma nanaxücuxëë ga tupauca ga taxünegu. ³⁰ Rü guxüma ga yema ñanecüäxgü rü poraäcü nanuë. Rü tupauca ga taxüncèx nibuxmü, rü Pauruxü niyaxgü, rü tupaucaarü íäxtüwa nanatüchigügü. Rü yexguma paxa nanawäxtagü ga guma tupauca ga taxüneärü íäxgü. ³¹ Rü yexguma Pauruxü yamëxgüchaügu ga duüxügü, rü Dumacüäx ga churaragüarü äëxgacüxütawa nanguchiga ga ore na guxüwama ga Yerucharéüwa rü na nanuëxü ga duüxügü. ³² Rü yexgumatama ga guma churaragüarü äëxgacü rü nanangutaquëxexëë ga yema norü capitäügü namaã ga norü churaragü, rü paxa yema duüxügü íyexmagüxütwa naxĩ. Rü yexguma guma äëxgacüxü rü yema churaragüxü nadaugügu ga duüxügü, rü ínayachaxächigü ga na Pauruxü yamëxgüxü. ³³ Rü yexguma ga guma äëxgacü rü Paurucèx nixü rü nayayaxu. Rü nanamu na taxre ga cadenamaã na yanëixgüäxüçèx. Rü nüxna naca na texé yĩxü, rü tacü naxüxü. ³⁴ Natürü yema muxüma ga duüxügü rü toxica ga oremaã aita naxüe ga wüxichigü. Rü yexguma taxuacüma meã nüxü nacüëxgu ga tacüçèx na nanuëxü, rü guma äëxgacü rü nanamu na churaragüpatawa Pauruxü nagagüxü. ³⁵⁻³⁶ Rü yexguma churaragüpataarü toxönewa nanguxgu ga Pauru, rü churaragü nayangetaügü naxchaxwa ga yema muxüma ga duüxügü, yerü nanuëxüchi rü nawe nicaetanü rü ñanagürügü: —¡Yamëxüchi! — ñanagürügü.

Pauru rü duïxügüpëxewa nüqüétüwa nidexa

³⁷ Rü yexguma marü churaragüpatagu yamucuchigüchañägu rü Pauru rü Griégugawa guma äëxgacüna naca rü ñanagürü: —¿Cuxü namexü na cumaã nüxü chixuxü i wüxi i ore? —ñanagürü. Rü nüma ga äëxgacü nanangãxü rü ñanagürü: —Ëxna nüxü cucuèx na Griégugawa quidexaxü. ³⁸ ¿Tama ëxna cuma yiixü i Equitucüãx ga üpaxüra rü duïxügüxü cunuëëxü na äëxgacümaã nügü nadëixücëx rü dauxchitawa ga taxúema íxãpataxüwa cunagagüxü ga 4000 ga yatügü ga máëtaxügü? —ñanagürü. ³⁹ Rü yexguma ga Pauru rü nanangãxü, rü ñanagürü: —Choma rü Yudíu chixí, rü Tarsucüãx chixí. Rü Chiríchiaanewa rü yima nixí ya wüxi ya ñãne ya taxüchine. Rü ngëxguma curü me yixígu, rü cuxna chaca na duïxügümaã chidexaxücëx —ñanagürü. ⁴⁰ Rü yexguma ga guma äëxgacü rü: —Ngü —ñanagürü. Rü nüma ga Pauru, rü churaragüpataarü toxõnegu nachinagü, rü naxunagümëxë na nachiaçhixücëx ga duïxügü. Rü yexguma nachiaçhiegu, rü Yudíugawa nidexa, rü ñanagürü nüxü:

22

¹ —Pa Chautanüxügüx, ¡rü choxü iperüxñüë i ngëma ñuxma tá pemaã nüxü chixuxü na chaugüétüwa chidexaxücëx! —ñanagürü. ² Rü yexguma nüxü naxñüëgu ga na Yudíugawa namaã yadexaxü, rü yexeraacü inayarüchianegü. Rü yexguma namaã yadexagu ga Pauru, rü ñanagürü: ³ —Choma rü Yudíu chixí, rü Chiríchiaaneärü ñãne ga Tarsugu chabu. Natürü doma ñãne ya Yerucharéüwa chaya, rü Gamaniéu nixí ga chorü nguxëëruü. Rü meãma nawa changux ga guxüma ga mugü ga nuxcümaügüxü ga tórü oxigü nagu íxü. Rü guxügüma naxcëx chadau na guxüma i chorü ngüchañmaã Tupanaãxü chapuracüxü, ngëxgumarüü i guxãma i pema i ñuxmax. ⁴ —Rü choma ga üpa rü poraacü nawe chingëchigü ga yema Ngechuchuaxü yaxõgüxü na chanadëixücëx. Rü íchanayauxü, rü chanapoxcue ga muxüma ga yema yaxõgüxü ga yatüxügü rü ngexügü. ⁵ —Rü nüma ya paigüeru rü guxüma i tupauca ya taxüneärü äëxgacügüerugü rü nüxü nacuëxgü na aixcüma yiixü i ñãã chorü ore. Yerü nümagü rü choxna nanaxägü ga popera na choxü nangüxëëgüxücëx ga tatanüxügü ga Yudíugü ga Damacuwa yexmagüxü. Rü yéma Damacuwa chaxü na naxcëx chayadauxü-cëx ga yema Ngechuchuaxü yaxõgüxü, rü nuã Yerucharéüwa na chanagagüxücëx rü nuxã chayapoxcuexücëx.

Pauru nüxü nixu na ñuxãcü Ngechuchuaxü yaxõõxü

⁶ —Natürü yexguma namagu chixüyane rü marü chingaicaxgu ga Damacuwa na changuxü, rü meãma tocuchigu nixí ga yexguma. Rü ngürüãchi wüxi ga omü ga poraxü ga daxüwa ne baxixü rü choxü nabaxi. ⁷ —Rü ñaxtüanegu chayangu, rü nüxü chaxñü ga wüxi ga naga ga ñaxü choxü:

“Pa Chaurux, ¿tüxcüü i chowe quingëchigüxü?” ñaxü. ⁸ —Rü yexguma ga choma rü chanangãxü, rü ñacharügü:

“¿Rü texé quixí Pa Corix?” ñacharügü. Rü nüma ga yema naga rü choxü nangãxü, rü ñanagürü:

“Choma nixí i Ngechuchu ya Nacharétucüãx, rü chorü duïxügü nixí i ngëma nawe quingëchigüxü”, ñanagürü choxü. ⁹ —Rü yema chomücügü rü nüxü nadaugü ga yema omü, rü nabaixãchiãëgü, natürü tama nüxü naxñüë ga yema naga ga chomaã idexaxü.

¹⁰ —Rü nüxna chaca, rü ñacharügü ga chomax:

“¿Rü tacü tá chaxüxü, Pa Corix?” ñacharügü. Rü yexguma ñanagürü choxü ga Cori:

“¡Írúda, rü inachi, rü Damacuwa naxü, rü ngëma tá cumaã nüxü nixu ya wüxi ya yatü na tacü tá cuxüxü!” ñanagürü ga nüma ga Cori. ¹¹ —Rü yexguma ga choma rü chixoxetü yema omüëmamaã, rü yemacëx ga yema chomücügü rü choxmëxgu yangígüãcüma choxü nigagü, rü yemaacü Damacuwa changu. ¹² —Rü yéma nayexma ga wüxi ga yatü ga Ananíãgu äëgacü. Rü nüma nixí ga wüxi ga yatü ga aixcüma Tupanaga ñücü, rü nüma

rü meãma nayanguxêê ga yema mugü ga Moïché ümatüxü. Rü guxüma ga Yudíugü ga Damacuwa yexmagüxü, rü meã nachiga nidexagü. ¹³—Rü nüma ga Ananíã rü choxü ínayadau. Rü yexguma chauxütawa nanguxgu rü ñanagürü choxü:

“Pa Chaueneê Pa Chaurux, ¡wenaxãrú ingoxnaxëtü!” ñanagürü. Rü yexgumatama wenaxãrú chingoxnaxëtü rü meãma nüxü chadau. ¹⁴—Rü yexguma ñanagürü ta:

“Yima Tupana ya nuxcümaügüxü ga tórü oxigüarü Tupana cuyü naxuneta na nüxü cucuáxücèx i norü ngúchaü, rü na nüxü cudauxücèx ya yima Cristu ya mecü, rü naãxwatama nüxü cuyüxücèx i naga. ¹⁵—Erü cuma tá nixí i guxü i duüxügümaã nüxü quixuchigaxü ga ñuxãcü na Tupanaxü cudauxü rü cumaã yadexaxü. ¹⁶—¡Rü ñuxma rü marü taxuüma ícunanguxêê! ¡Rü írüda rü ínabaie! ¡Rü Cori ya Ngechuchuégagu naxcèx ínaca na cuyü nüxü nangechaüxücèx i curü pecadugü!” ñanagürü choxü.

Pauru nüxü nixu na ñuxãcü Tupana namuxü na yema tama Yudíugü ixígüxütanüwa naxüxücèx

¹⁷⁻¹⁸—Rü yexguma Yerucharéücèx chataeguxgu, rü tupauca ga taxünewa chaxü na yéma chayumüxèxücèx. Rü changoxetü, rü nüxü chadau ga Cori ya Tupana. Rü ñanagürü choxü:

“¡Napaxaãê, rü inaxüãchi i nuã Yerucharéüwa, erü duüxügü rü tãütáma naga naxínüê i ngêma ore i chauchiga nüxü quixuxü!” ñanagürü. ¹⁹—Rü choma chanangãxü, rü ñacharügü:

“Pa Corix, nüma i duüxügü rü nüxü nacuèxgü ga choma na yíxü ga guxüne ga ngutaquèxepataügüwa chaxüxü rü íchanayauxüxü rü chanapoxcuexü rü chayaçuaixgüxü ga yema cuyü yaxögüxü. ²⁰—Rü yexguma yamèxgüãgu ga guma curü duücü ga Etébaü ga curü orearü uruü, rü chomatama yéma chayexma, rü chorü me nixí ga na yamèxgüãxü. Rü choma nixí ga nüxna chadauxü ga naxchiru ga yema yamèxgüxü”, ñacharügü nüxü. ²¹—Natürü nüma ga Cori rü ñanagürü choxü:

“¡Rü paxa cugü namexêê rü inaxüãchi! Erü yaxügüxü i nachiuãnegüwa i ngêma duüxügü i tama Yudíugü ixígüxütanüwa tá cuyü chamu” —ñanagürü.

Churaragüarü ãëxgacümèxëwa nayexma ga Pauru

²² Rü yexguma Pauru yema ñaxgu rü yexma nayacuèxèëgü ga na meã nüxü inaxínüèxü ga yema duüxügü. Rü yexguma aita naxüèacüma ñanagürügü: —¡Noxtacüma peyamá! Rü name nixí i na nayuxü rü ngèxma na yanaxoxü —ñanagürügü. ²³ Rü yexguma aita naxüegu, rü norü gáuxüchirumaã nibuatanücüü, rü ãtèxeanexü daxü niwogütanücüü. ²⁴ Rü yexguma yemaxü nadèuxgu ga churaragüarü ãëxgacü, rü nanamu ga churaragüpatagu na yamucuchigüãxücèx ga Pauru. Rü nanamu na poraãcü naçuaixgüãxücèx na yadexaxücèx na nüxü nacuáxücèx ga tüxcüü yíxü na yemaãcü nachigamaã aita naxüexü ga duüxügü. ²⁵ Rü yexguma marü yanèixgüãgu na naçuaixgüãxücèx, rü Pauru nüxna naca ga yema capitáü ga yéma yexmaxü, rü ñanagürü: —¿Éxna pexmèxwa nangèxma na penaçuaixü i wüxi i Dumacüãx ega tama nüxna pecaxiragu? —ñanagürü. ²⁶ Rü yexguma yemaxü naxínügu ga capitáü, rü guma churaragüarü ãëxgacüxütawa naxü, rü namaã nüxü nixu, rü ñanagürü: —¿Tacü tá cuyü? Erü ñaã yatü rü Dumacüãx nixí —ñanagürü. ²⁷ Rü yexguma ga guma churaragüarü ãëxgacü, rü Paurucèx nixü, rü nüxna naca rü ñanagürü nüxü: —¿Aixcüma yíxü na Dumacüãx quiixü i cumax? —ñanagürü. Rü nüma ga Pauru nanangãxü, rü: —Ngü —ñanagürü. ²⁸ Rü yexguma ga guma churaragüarü ãëxgacü rü nanangãxü, rü ñanagürü: —Choma rü poraãcü choxü naxãtanü na Dumacüãx chaugü chixíxèèxü —ñanagürü. Rü yexguma nachonagü ga Pauru, rü ñanagürü: —Natürü i choma rü woetama chorü bucüma Dumacüãx chixí —ñanagürü. ²⁹ Rü yexgumatama nüxna nixígachi ga yema Pauruxü çuaixgüchaüxü. Rü nümatama ga yema churaragüarü ãëxgacü rü ta namuü

ga yexguma nüxü nacuèxgu ga Dumacüãx na yiixü ga Pauru, yerü marü cadenamaã nayanëixchirëx.

Yudíugüarü ãëxgacügütücumüpëxewa nayexma ga Pauru

³⁰ Rü yema churaragüarü ãëxgacü meãma nüxü nacuáxchaü ga tüxcüü na ínaxuaxüügüãxü ga yema Yudíugü. Rü yemacèx ga moxüãcü rü nanamu na nangutaquëxegüxücèx ga paigüarü ãëxgacügü rü guxüma ga yema ãëxgacügütücumü ga Yudíugüarü. Rü nayawëgü ga Pauruarü cadena rü yéma ãëxgacügüpëxewa nanagagü.

23

¹ Rü Pauru meãma nüxü nadawenü ga yema ãëxgacügü, rü ñanagürü nüxü: — Pa Chautanüxügüx, chomatama nüxü chacuèx rü guxüguma meã chamaxü ga Tupanapëxewa ñuxmata ñoma i ngunexüwa nangu —ñanagürü. ² Rü yexguma ga yema paigüeru ga Ananíã rü nanamu ga yema Pauruarü ngaicamana yexmagüxü na naãxwa tayamëxgüxücèx. ³ Rü yexguma ga Pauru rü ñanagürü nüxü: —Tupana tá cuxü napéax, Pa ãëxgacüx. Cuma rü düxétüwaxica cume natürü aixepena rü nachixe i curü maxü. Rü ñuxma rü ngema curüto na Moiché ümatüxü i mugü nüxü ixuxüãcüma choxna cuçaxücèx. Natürü wüxi i chixexü cuxü erü cumatama rü tama naga cuxinü i ngëma Tupana tüxü muxü erü cunamu na choxü napéaxücèx —ñanagürü ga Pauru. ⁴ Rü yexguma ga yema yexmagüxü rü ñanagürügü: —¿Tüxcüü i ngëmaãcü tacü namaã quixugüxü i paigüeru ya Tupana nüxü unetacü? —ñanagürügü. ⁵ Rü Pauru nanangãxü, rü ñanagürü: —Tama nüxü chacuèx, Pa Chautanüxügüx, na paigüeru yiixü. Erü Tupanaãrü ore i ümatüxüwa nüxü tadau rü ñanagürü:

“¡Tama curü ãëxgacümaã chixexü quixugü!”

ñanagürü. ⁶ Rü yexguma nüxü nacuèxgu ga Pauru ga na Chaduchéugü yiixü ga togü, rü na Parichéugü yiixü ga togü, rü yema ãëxgacügüpëxewa tagaãcüma ñanagürü: — Pa Chautanüxügüx, choma rü Parichéu chixí, rü Parichéu nane chixí. Rü ngëmacèx choxna pecagü i ñuxmax, erü chayaxö i wena tá na namaxëxü i yuexü —ñanagürü. ⁷ Rü yexguma yema ñaxgu ga Pauru, rü yema Parichéugü rü Chaduchéugü rü inanaxügüe ga nügümaã na iyaporagaexü, rü yexma nügü nitoye ga yema ngutaquëxewa. ⁸ Erü ngëma Chaduchéugü nagu rüxñüëgu rü tama wena namaxë i ngëma yuexü, rü nataxuma i orearü ngeruügu i daxücüãx, rü nataxuma i naãëgü —ñanagürügü. Natürü ngëma Parichéugü rü nayaxögü na nangëxmaxü i guxüma i ngëma. ⁹ Rü yemacèx guxüma aita naxüe. Rü ñuxüchi ñuxre ga ngüxëëruügu ga Moíchéarü mugüwa nguxëëtaegüxü ga Parichéugütücumüwa ügüxü rü inachigü, rü ñanagürügü: —Toxcèx rü taxuüma i chixexü naxü i ñaã yatü. Bexmana wüxi i tacü rü naãë namaã nidexa rü ëxna wüxi i orearü ngeruü i daxücüãx —ñanagürügü. ¹⁰ Rü yexeraãcü norü numaã nanaxixãchiãëgü ga yema duüxügü. Rü yemacèx naxoegaãë ga guma churaragüarü ãëxgacü ga na Paurugu nagaugügüchaüxü. Rü norü churaragüxü namu na yéma duüxügütanüwa Pauruxü napugüxücèx rü wena churaragüpatawa na nagagüãxücèx. ¹¹ Rü moxüãcüarü chütaxügu Paurucèx nangox ga Cori ga Tupana, rü ñanagürü nüxü: —¡Rü nataãë! Rü ngëxgumarüü i núma Yerucharéüwa choxü na quixuchigaxü, rü ngëxgumarüü tá ta nixí i Dumawa na choxü quixuchigaxü —ñanagürü ga Tupana.

Yudíugü naxcèx nadaugü na ñuxãcü Pauruxü yamëxgüchaüxü

¹² Rü moxüãcü, rü ñuxre ga Yudíugü rü nügümaã inaxunetagü ga tãütáma na nachibüexü rü naxaxegüxü ñuxmatáta Pauruxü yamëxgü. Rü ñanagürügü: — Tachixexügügu tá ega tacü ingöxgügu naxüpa na yamáxü i Pauru —ñanagürügü. ¹³ Rü 40 arü yexera ga yatügü nixí ga yema nügümaã ixunetagüxü. ¹⁴ Rü paigüarü ãëxgacügütanüwa rü Yudíugüarü ãëxgacügügütanüwa naxí, rü ñanagürügü nüxü: —Marü togümaã itaxuneta rü tachixexügügu tá ega tacü tangöxgügu naxüpa na tayamáxü i

Pauru. ¹⁵ Rū name nixī i pema rū ngēma togū i pexrūū āēxgacūgütūcumūwa ügūxū, rū churaragūarū āēxgacūna naxcèx peyacagū i ñuxma na moxū wena pepēxewa nagagūāxūcèx i Pauru. ¡Rū namaā nūxū pixu na penaxwèxegūnetaxū na meā nūxū pecuāxchaūxū i nachiga! Rū toma rū tá marū Ítamemare na namagu tayamáxūcèx naxūpa na Ínanguxū —ñanagürügū. ¹⁶ Natürü ngīne ga Paurueyèx rū nūxū nacuáchiga ga Pauruxū na yamèxgūchaūxū, rū yemacèx churaragūpatawa naxū na Paurumaā nūxū yanaxuxūcèx. ¹⁷ Rū Pauru naxcèx naca ga wūxi ga capitáū, rū ñanagürü nūxū: —¡Curū āēxgacūxūtawa naga i ñaā ngextūxūxū, erū nūxū nangēxma i ore i namaā nūxū yaxuxchaūxū! —ñanagürü. ¹⁸ Rū yema capitáū rū āēxgacūxūtawa nanaga ga yema ngextūxūxū. Rū ñanagürü nūxū: —Ngēma poxcuxū i Pauru rū chauxcèx naca, rū choxna naca na nuā cuxūtawa chanagaxūcèx i ñaā ngextūxūxū, erū nūxū nangēxma i ore i cumaā nūxū yaxuxchaūxū —ñanagürü. ¹⁹ Rū naxmēxgu yayauxāchiācūma toxnamana nanaga ga āēxgacū, rū yéma nūxna naca rū ñanagürü: —¡Tacū yīxū i ngēma chomaā nūxū quixuxchaūxū? —ñanagürü. ²⁰ Rū nūma ga ngextūxūxū nanangāxū, rū ñanagürü: —Ngēma Yudíugū, rū nügūmaā inaxunetagu na cuxna naxcèx nacagūxūcèx na moxū Yudíugūarū āēxgacūgütūcumūpēxewa na cunagaxūcèx i Pauru. Rū tá cumaā nūxū nixugū na meā nūxū nacuèxgūchaūxū i nachiga. ²¹ —¡Natürü tāūtáma nūxū cuyaxō! Erū 40 arū yexera i yatügū rū marū nügūmaā inaxunetagu, rū ñanagürügū:

“Tachixexūgugū tá ega tacū ingōxgūgu rū ēxna ixaxegūgu naxūpa na yamáxū i Pauru”, ñanagürügū. Rū ñuxma rū marū Ínamemare, rū namagu nananēixgū, rū curū orexicatama nixī i ñuxma Ínanguxēēgūxū —ñanagürü. ²² Rū yexguma ga āēxgacū rū Ínayamu ga yema ngextūxūxū, rū nūxna naxāga na taxúemaā nūxū yaxuxūcèx ga na namaā nūxū yaxuxū ga yemachiga.

Āēxgacū ga Perixūtawa Pauruxū namu

²³ Rū yexguma ga guma āēxgacū rū taxre ga norū capitáūcèx naca, rū ñanagürü nūxū: —¡Penamexēē i 200 i churaragū i nacutūmaāmare ixīxū, rū 70 i churaragū i cowarutagu īxū, rū 200 i churaragū i wocaxemaā ixāxnexū na 9 arū oragu i chūtacū Checharéawa naxīxūcèx! ²⁴ —¡Rū ngēxgumarūū ta penamexēē i ñuxre i cowarugū i Paurucèx na tórū āēxgacū i Perixūtawa naxūxūcèx rū na taxuūma nūxū üpetūxūcèx i namawa! —ñanagürü. ²⁵ Rū yema capitáūgūmaā yéma nanamu ga wūxi ga popera ga ñaxū:

²⁶ “Choma i Cláudiu Díchiu, rū cuxū charūmoxē Pa Āēxgacū ya Mecūxūchi Pa Perix.

²⁷ Rū yima yatū ya cuxcèx ngēma chanamucū, rū Yudíugū nayayauxgū rū wixguxūchi taèx nayamèxgū. Natürü yexguma nūxū chacuáchigagu na Dumacūāx na yīxū, rū yéma chaxū chorū churaragūmaā, rū nūxna chanapu.

²⁸ Rū nūxū chacuáxchaū ga tacū ga chixexūmaā na Ínaxuaxūgūāxū, rū yemacèx Yudíugūarū āēxgacūgütūcumūpēxewa chanaga. ²⁹ Rū yexguma nūxū chacuèx ga na Yudíugūarū muchigacèxmāre na Ínaxuaxūgūāxū. Natürü taxuūma ga chixexū naxū na tūxcūū yamáxūcèx rū napoxcuxūcèx. ³⁰ Natürü yexguma nūxū chacuáchigagu ga na nügūmaā inaxunetaxū ga Yudíugū ga na yamèxgūāxūcèx, rū yexgumatama nāgu charūxīnū na cuxūtawa chanamuxū. Rū yema Ínaxuaxūgūxū, rū namaā tá nūxū chixu na cuxūtawa naxīxū rū cumaā nūxū na yanaxugūxūcèx na tacūcèx Ínaxuaxūgūāxū”,

ñanagürü. ³¹ Rū yema chūtaxūgu inaxīāchi ga yema churaragū, yexgumarūū ga norū āēxgacū na namuxürüū. Rū Pauruxū nigagū ñuxmata Aūtípatiwa nangugū. ³² Rū moxūācū rū nawoegu ga yema churaragū ga nacutūmaāmare ixīxū rū naxpataūwa naxī. Rū yema churaragū ga cowarutagu īxū, rū Paurumaā inaxīāma. ³³ Rū yexguma Checharéawa nangugūgu, rū āēxgacū ga Perina nanaxā ga yema popera, rū Pauruxū rū ta inamugū. ³⁴ Rū yexguma nūxū nadaumatūgu ga popera ga āēxgacū ga Peri, rū Pauruna naca ga ngextácūāx na yīxū. Rū yexguma nūxū nacuèxgu ga na Chiríchiaanecūāx

yīxū, rü ñanagürü nüxū: ³⁵ —Cuxū tá icharūxīnū i ngēxguma ínangugūgu i ngēma cuxū íxuaxūgūxū —ñanagürü. Rü yexguma nanamu ga churaragū na wūxi ga ucapu ga ãëxgacū ga Erodepatawa yexmaxūwa nüxna na nadaugūxūcèx.

24

Pauru rü ãëxgacū ga Peripëxewa nügüétüwa nidexa

¹ Rü wūximēxpūx ga ngunexū ngupetūgu, rü Yerucharéüwa ne naxū ga paigüeru ga Ananiã, namaã ga ñuxre ga Yudíugüarū ãëxgacügüerugū rü wūxi ga yatū ga meãma dexaxū cuáxū ga Téturu ga naega. Rü nümagū rü ãëxgacū ga Perixütawa naxī na namaã nüxū yanaxugūxūcèx ga tūxcūü Pauruxū na ínaxuaxūgūxū. ² Rü yexguma Pauruxū yéma nagagūgu, rü inanaxūgū ga Téturu ga nüxū na yaxuxū, rü ñanagürü:

—Moxëxūchima i cuma Pa ãëxgacū Pa Perix, erü cugagu nixī i meãma toxū naxūpetūxū i nuã. Rü cugagu nixī i nuã i ñoma i nachiüãnewa na toxū nangëxmaxū i muxūma i mexūgū. ³ Rü moxë cuxna taxã erü guxūwama rü guxūguma cuxütawa tanayauxgū i guxūma i ngēma mexūgū Pa ãëxgacūxūchima, Pa Perix. ⁴ Natürü tama yexeraãcū cuxū chachixewechaü. Rü ngēmacèx cuxna chaca na paxaãchi meã toxū icurūxīnūxū. ⁵ Rü ñuxma rü wūxi i orexū cumaã chixuxchaü. Rü marü nüxū tadau i ñaã yatü rü wūxi i ðaaweanerüü na yīxū, erü chixexūmaã nayaxucuxëgū i Yudíugū i guxū i naãnewa na nügū yatoyexūcèx. Rü nüma nixī i norü ãëxgacū i ngēma duūxūgū i nüxū yaxōgūxū i Ngechuchu i Nacharétucūãx. ⁶ Rü toma tayayauxgū i ñaã yatü ga yexguma tupauca ga taxūne naxūxaxëëchaügu. Rü torü mugū tomaã nüxū ixuxūãcūma nüxna tacagūchaü. ⁷ Natürü ínangu ga churaragüarū ãëxgacū ga Díchiu, rü muxūma ga norü churaragūmaã toxna nanapu. Rü toma i ínaxuaxūgūxe, rü toxū namu na cuxütawa taxīxūcèx. ⁸ Rü ñuxma rü marü name i cumatama nüxna cuca i ngēma Pauru na nüxū cu-cuáxūcèx na aixcūma yīxū i guxūma i ngēma naxcèx ítanaxuaxūgūxū i tomax —ñanagürü. ⁹ Rü yema togū ga Yudíugū rü ta, rü ñanagürügū: —Rü aixcūma nixī i ngēma ore —ñanagürügū. ¹⁰ Rü yexguma ga guma ãëxgacū ga Peri rü naxmëxmaã Pauruxū naxuneta na yadexaxūcèx. Rü yexguma ga Pauru, rü ñanagürü: —Chorü taãëmaã cupëxewa chaugücèx chidexa, erü nüxū chacuèx na mucūma ga taunecü ñoma i nachiüãneärü ãëxgacū quiixū. ¹¹ Marü name i cumatama naxcèx ícuca, erü 12 i ngunexūxīcatama nangupetü ga na Yerucharéüwa changuxū na Tupanaxū chayarücuèxüxūcèx. ¹² Rü bai ga tupauca ga taxūnewa, rü bai ga ngutaquëxepataüguwa, rü bai ga ngürüanewamare ga íãnewa choxū nadaugū ga Yudíugū ga na texémaã íchioragacūxū, rü na chananuëxëëxū ga duūxūgū. ¹³ Rü ñuxma i ñaã duūxūgū i choxū íxuaxūgūxū, rü bai i wūxiwaxūra cuxcèx nanangoxëëgū na aixcūma yīxū i ngēma naxcèx choxū ínaxuaxūgūxū. ¹⁴ Natürü cumaã nüxū chixu, rü nuxcūmaüguxū ga chorü oxigüarū Tupanaãxū nixī i chapuracūxū ngëxgumarüü i choxū na nanaxwëxexū ya Ngechuchu ya Cristu ya nüxū chayaxōcū. Rü ngēma nixī i nümagū i Yudíugū naxugūãgu rü na:

“Tomare i ore”, ñagūxū. Rü aixcūma nüxū chayaxō i guxūma i Tupanaärü mugū ga Moíché ümatūxū rü guxūma i Tupanaärü ore ga nuxcūmaüguxū ga norü orearü uruügu ümatüguxū. ¹⁵ Rü choma rü ta yema nuxcūmaüguxūrüü Tupanaãxū chayaxō. Rü naxrūü chayaxō rü tá wena na namaxëxū i ngēma yuexū i mexūgū rü chixexūgū. ¹⁶ Rü ngēmacèx nixī i guxūguma meã chaugūna chadauxū na chauãëwatama nüxū chacuáxūcèx na chamexū i Tupanapëxewa rü duūxūgüpëxewa. ¹⁷ Rü dücax, Pa ãëxgacūx, rü ñuxre ga taunecü togū ga nachiüãnegu chixūgū, rü düxwaxarü chauchiüãnecèx wena chataegu na nuã chanangexūcèx ga díëru ga namaã nüxū charüngūxëëchaüxū i chautanūxūgū i Yudíugū i nüxū nataxuxū, rü nuã Tupanana chanaxāxūcèx i chorü ãmargū. ¹⁸⁻¹⁹ Rü yema ngunexūgu rü tupauca ya taxūnewa Tupanana íchanaxã ga chorü ãmargū, nawena na chaugū chamexëëxū ga Tupanapëxewa. Rü tama muxū ga duūxūgūmaã

chayexma, rü tama chananuẽxẽẽ ga duũxügü ga yexguma ñuxre ga Yudíugü ga Áchiaanecũãx choxũ daugügu ga yéma tupauca ya taxũnewa. Rü ngẽmagü chi nixĩ i ñuxma nuã ìxũ na choxũ ínaxuaxũgũxũcèx ega tacü nüxũ ngẽxmagu i chauchiga. ²⁰ Rü ngẽxguma tama tacü nüxũ ngẽxmagu ga yema tupauca ya taxũnewa choxũ daugũxũ, jrü ècü ñaã ñuxma nuxmagũxũ cumaã nüxũ ixugü na tacü ga chixexũxũ chowa nadaugũxũ ga yexguma Yudíugüarü ãẽxgacügütücümüpẽxewa chayexmagu! ²¹ Rü ñaxũxĩcatama nixĩ ga chorü ore ga tagaãcü namaã chachonagũxũ ga yexguma yema ãẽxgacügüpẽxewa chayexmagu:

“Rü ñuxma rü choxna pecagü erü choma chayaxõ i wena tá na namaxẽxũ i yuexũ”, ñacharügü ga yexguma —ñanagürü ga Pauru. ²² Natürü ga Peri rü meã nüxũ nacuèx ga yema Cristuaxũ yaxõchiga. Rü yemacèx ga yexguma Pauruaru orexũ naxĩnügü, rü ínayachaxãchi ga na nüxna naçaxũ, rü ñanagürü Yudíugũxũ: —Ngẽxguma churaragüarü ãẽxgacü ya Díchiu núma ùxgu, rü tá meãma nüxũ chacuèx i ngẽma naxcèx ípenaxuaxũxũ —ñanagürü. ²³ Rü yexguma ga Peri rü norü capitáũxũ namu ga na Pauruna nadauxũcèx. Natürü tama nanapoxcuxũchi, rü tama nanachuxu ga na naxũtagu naxĩãneãxũ ga namücügü, rü nüxũ na nangũxèegũxũ. ²⁴ Rü ñuxre ga ngunexũ marü ngupetügu rü wena yéma naxũ ga Peri ngĩmaã ga naxmèx ga Drusíla ga Yudíu ixĩcü. Rü Paurucèx nayacaxèẽ, rü nüxũ naxĩnü ga yema ore ga Pauru namaã nüxũ ixuxũ ga Cristuaxũ na yaxõxũchiga. ²⁵ Natürü yexguma Pauru meãma namaã nüxũ ixuxgu na ñuxãcü Tupana naxwèxexũ na meã imaxũxũ rü ñuxãcü nanaxwèxexũ na tórü maxũmaã meã icuáxũ rü ñuxãcü tá tũxna naçaxũ i tórü maxũchiga, rü poraãcü nabaixãchiãẽ ga Peri. Rü düxwa ñanagürü nüxũ: —jÈcü íxũ i ñuxmax! Rü ngẽxguma ñuxguacü icharũxãũxmaregu, rü wena táxarü cuxcèx changema —ñanagürü. ²⁶ Yerü Peri ínananguxèẽ na Pauru chi dĩeru nüxna ixãxũ na yangéãxũcèx, rü yemacèx muẽxpũxcüna naxcèx nangemaxũ, rü namaã nidexaxũ. ²⁷ Rü taxre ga taunecü yemaãcü nixĩgü. Rü ínanguxuchi ga Peri ga na ãẽxgacü yĩxũ, rü nachicüü ningucuchi ga Pórchiu ga Festu. Natürü nüma ga Peri, rü Yudíugümaã nügü namecümamaxèẽchaũ, rü yemacèx tama ínananguxuchixèẽ ga Pauru.

25

Ãẽxgacü ga Festupẽxewa nayexma ga Pauru

¹ Rü Checharéawa nangu ga Festu na yéma ãẽxgacũxũ yaxücuxũcèx. Rü marü tomaẽxpũx ga ngunexũ yéma nayexmagu, rü wenaxãrũ inaxũãchi, rü Yerucharéũwa naxũ. ² Rü yéma Yerucharéũwa rü yema paigüarü ãẽxgacügü rü Yudíugüarü ãẽxgacügü rü Pauruxũ ínaxuaxũgü Festupẽxewa. ³ Rü naxcèx ínacagü ga Yerucharéũwa Pauruxũ na namuxũcèx. Yerü nümagü rü nagu narũxĩnüẽ na namagu yacuxèũgũãxũ na yexma yamèxgüãxũcèx. ⁴ Natürü ga Festu rü nanangãxũ, rü ñanagürü: —Checharéagu napoxcu i Pauru, rü choma rü tá paxa ngema Checharéawa chaxũ. ⁵ Rü ngẽmacèx name nixĩ i perü ãẽxgacügü rü chowe narũxĩ i Checharéawa, rü ngẽxguma tacü rü chixexũ naxũxgu i ngẽma yatü, rü ngema tá nixĩ i chomaã nüxũ pixugũxũ —ñanagürü. ⁶ Rü maneca 8 rü èxna 10 ga ngunexũ Yerucharéũwa nayexma ga Festu, rü ñuxũchi Checharéacèx nataegu. Rü yexguma ínanguxguarü moxũãcü rü yema nachica ga ngextá duũxügüna ínaçaxũwa naxũ, rü yéma nayarüto norü tochicaxũwa. Rü Paurucèx nangema na yéma napẽxewa nagagüãxũcèx. ⁷ Rü yexguma yexma yaxücuxgu ga Pauru, rü yema Yudíugü ga Yerucharéũwa ne ìxũ, rü naxcèx naxĩ. Rü muxũma ga chixexũgümaã ínanaxuaxũgü. Natürü taxuwama nüxũ nüxũ nadauxèẽ na aixcüma yĩxũ ga yema naxcèx ínaxuaxũgũãxũ. ⁸ Rü yexguma ga Pauru rü nanangãxũ, rü ñanagürü: —Pa ãẽxgacüx, taxuũma ga chixexũ namaã chixugü ga yema mugü ga Moĩché umatũxũ, rü bai ga tupauca ya taxũnemaã, rü bai ga ãẽxgacü ya Chécharumaã —ñanagürü. ⁹ Natürü nüma ga Festu rü Yudíugümaã nügü namecümamaxèẽchaũ, rü yemacèx Pauruna naca, rü ñanagürü

nūxū: —¿Cunaxwèxexū na Yerucharéūwa cuxūxū na ngema cuxna chaçaxūcèx naxcèx i guxūma i ngēma naxcèx cuxū ínaxuaxūgūxū? —ñanagürü. ¹⁰ Rū yexguma ga Pauru rü nanangāxū, rü ñanagürü: —Choma rü cupèxewa changèxma na choxna cuçaxūcèx, erü cuma nixī i cuxū naxunetaxū i ãëxgacü ya tacü ya Chécharu na ãëxgacü quiixū i nūma. Rū ngēmacèx chanaxwèxe i nuã choxna cuca. Erü taxuūma i chixexū chaxü i Yudíugūmaã, ngëxgumarüü i cuma meãma nūxū cucuèx. ¹¹ Ngëxguma chi tacü i chixexū chaxūxgu rü marü name na naxcèx choxū yamèxgūxū, rü marü name i na chayuxū. Natürü ngëxguma nataxuxguma i tacü i aixcūma ixīxū i ngēma naxcèx choxū ínaxuaxūgūxū, rü taxuacūma texé Yudíugūna choxū tamu. Rū naxcèx íchaca na nūmatama ya ãëxgacü ya tacü ya Chécharu choxna naçaxūcèx —ñanagürü ga Pauru. ¹² Rū yexguma ga Festu rü norü ucuxèruügü ga ãëxgacügūmaã nidexa, rü ñuxūchi ñanagürü Pauruxū: —Marü naxcèx ícuca na ãëxgacü ya tacü ya Chécharu cuxna çaxūcèx. Ècü, ñuxma rü naxūtawa tá cuxū chamu —ñanagürü.

Ãëxgacü ga Agripapèxewa nayexma ga Pauru

¹³ Rū ñuxre ga ngunexū ngupetügu, rü Checharéawa nangugü ga Yudíugüarü ãëxgacü ga Agripa rü naëyèx ga Bereniche, na Festuxū yanamoxègūxūcèx. ¹⁴ Rū marü ñuxre ga ngunexū yéma nayexmagügu, rü Agripamaã nūxū nixu ga Festu ga Pauruchiga, rü ñanagürü: —Nuã nangèxma i wūxi i yatü i poxcuxū ga Peri tama ínguxuchixèèxū. ¹⁵ —Rū yexguma choma Yerucharéūwa chayexmagu, rü paigüarü ãëxgacügü rü Yudíugüarü ãëxgacügüerugü rü ínanaxuaxūgü, rü naxcèx ínacagü na namaã chanaxueguxūcèx rü na yamèxgüãxūcèx. ¹⁶ —Rü choma chanangāxū, rü tama tocūma nixī i toma i Dumacūãxgü i na tayamáxū i wūxi i duūxū ega tama nügüétüwa yadexaxíragu napèxewa i ngēma ínaxuaxūgūxū. ¹⁷ —Rü yemacèx ga yexguma nūma nangugügu ga yema Yudíugü, rü yexgumaärü moxūãcü rü chorü tochicaxūwa chitocuchi na nūxna chaçaxūcèx nachiga ga yema, rü yéma naxcèx changema ga yema yatü. ¹⁸ —Natürü ga yema Yudíugü ga ínaxuaxūgūxū, rü taxuūma ga tacü ga chixexū ga choma íchananguxèèxūxū nixugü. ¹⁹ —Natürü norü Tupanachiga rü wūxi ga yatü ga Ngechuchuchiga nixī ga yema nagu yadexagūxū. Rü nūma ga Yudíugü nūxū nixugü ga na nayuxū ga yema Ngechuchu, natürü Pauru nūxū ixuxgu rü marü wena namaxū. ²⁰ —Rü yexguma ga choma ga tama na nūxū chacuáxū ga ñuxãcü tá chanamexèèxū ga yema guxchaxū, rü yemacèx nūxna chaca ga Pauru ngoxi nanaxwèxe ga Yerucharéūwa na naxūxū, na yéma nūxna chaçaxūcèx. ²¹ —Natürü nūma ga Pauru naxcèx ínaca ga na ãëxgacü ya tacü ya Chécharupèxewa naxūxū na nūmatama ya Chécharu nūxna çaxūcèx. Rü yemacèx chanamu na meã nūxna nadaugūxūcèx ñuxmata choma ãëxgacü ya Chécharuxūtawa chanamux —ñanagürü. ²² Rū yexguma ga Agripa rü ñanagürü Festuxū: —Choma rü ta nūxū chaxīnūchaū i norü ore i ngēma yatü —ñanagürü. Rü Festu nanangāxū rü ñanagürü: —Moxū tátama nūxū cuxīnū —ñanagürü. ²³ Rū moxūãcü yema ucapu ga ãëxgacügü íngutaquèxegūxūwa nangugü ga Agripa rü Bereniche rü poraãcü nangèxãègü. Rü namaã ínangugü ta ga churaragüarü ãëxgacügü rü yema íānecūãxgü ga corigūxūchi ixīgūxū. Rü ñuxūchi Paurucèx nangema ga Festu na yema ãëxgacügüpèxewa nagagüãxūcèx. ²⁴ Rū ñanagürü ga Festu: —Pa ãëxgacü Pa Agripax, rü Pa Guxāma i Pema ya Nuxmagūxe, ñaã nixī i ngēma yatü i nachigamaã yadexagūxū i guxūma i Yudíugü. Rü chopèxewa ínanaxuaxūgü ga Yerucharéūwa rü nūma rü ta. Rü guxūguma tagaãcüma choxna naxcèx nacagü na nayuxū. ²⁵ —Natürü i choma rü taxuūma i tacü i chixexū i naxūxū nawa chadau na naxcèx yamáxū. Natürü nūma ga Pauru rü naxcèx ínaca na ãëxgacü ya tacü ya Chécharu nūxna çaxū, rü ngēmacèx nagu charūxīnū na ngēma chanamuxū. ²⁶ —Natürü taxuūma i ore i aixcūma ixīxū i nachiga choxū nangèxma na chorü ãëxgacü ya Chécharucèx chanaxūmatūxūcèx. Rü ngēmacèx chanamu na nuã pepèxewa nagagüãxūcèx, rü cuxcèx türü nixī, Pa ãëxgacü Pa Agripax, na nūxna cuçaxūcèx, na nūxū chacuáxūcèx i tacü

tá na chaxümatüxü naxcèx ya ãëxgacü ya Chécharu. ²⁷—Erü chauxcèx rü tama name na ngextá namuxü i wüxi i poxcuxü ega tama naxümatüxíragu nachiga na tacücèx ínaxuaxüügüãxü.

26

Pauru rü ãëxgacü ga Agripapëxewa nügüétüwa nidexa

¹ Rü yexguma ga Agripa rü ñanagürü Pauruxü: —Marü name i ñuxma i cugüétüwa quidexa —ñanagürü. Rü yexguma naxunagümëxë ga Pauru, rü inanaxüügü ga nügüétüwa na yadexaxü, rü ñanagürü: ²—Chataãë, Pa ãëxgacü Pa Agripax, erü cupëxewa chidexa i ñuxma na chaugüétüwa chachogüxücèx i guxüma i ngëma choxü na ínaxuaxüügüxü i ngëma chautanüxü i Yudíugü. ³—Rü yexeraãcü chataãë erü cuma nüxü cucuèx i guxüma i tocüma i toma i Yudíugü, rü guxüma i Moíché ümatüxü i mugü i naxcèx yadexagüxü i chautanüxügü. Rü ngëmacèx cuxna chaca na meã choxü icurüxñüxücèx.

Pauruarü maxü naxüpa ga Ngechuchuaxü na yaxõõxü

⁴ —Rü guxüma i ngëma chautanüxügü i Yudíugü rü nüxü nacuèxgü ga ñuxãcü na chamaxüxü ga natanüwa ga chauchiüãnewa rü Yerucharéüwa ga yexguma changextüxüüragu. ⁵ —Rü ngëxguma chauchigaxü yaxugüechaügu, rü nüma nüxü nacuèxgü ga choma rü woetama Parichéu na chiixü. Rü toma i Yudíugü i Parichéugü na tixígüxü, rü toma nixí i guxüma i totanüxü i Yudíugüarü yexera na poraãcü tanaxaurexü i ngëma tocüma. ⁶—Rü ñuxma i ngëma chautanüxügü i Yudíugü rü nuã pepëxewa choxü nagagü erü chayaxõ na Cristugagu nangëxmaxü i maxü i taguma gúxü, yema Tupana nuxcümaüügüxü ga torü oxigümaã inaxunetaxürü. ⁷ —Rü guxüma i totanüxügü i Yudíugü rü ínananguxëëgü na nüxü nadaugüxü rü tá na yanguxü i ngëma uneta. Rü ngëmacèx Tupanaxü nicuèxüügü rü guxügüma i ngunecü rü chütacü rü Tupanaãxü napuracüe. Rü choma rü ta íchananguxëë na nüxü chadauxü rü tá na yanguxü i ngëma uneta, rü ngëmacèx nixí, Pa ãëxgacüx, i ñuxma i choxü ínaxuaxüügüxü i ngëma chautanüxügü i Yudíugü. ⁸—¿Rü tüxcüü tama peyaxõgü na Tupana wena namaxëxëëxü i ngëma yuexü?

Pauru rü nüxü nixu ga ñuxãcü yema yaxõgüxüwe na yangëchigüxü

⁹ —Rü choma nagu charüxñügu ga noxri rü name ga muxüma ga chixexü namaã na chaxüxü ga yema Ngechuchu ya Nacharétucüãxãxü yaxõgüxü. ¹⁰ —Rü yemacèx nawe chingëchigü ga Yerucharéüwa. Rü paigüarü ãëxgacügüxütawa naxcèx íchaca ga popera na chanapoxcuexücèx ga yema yaxõgüxü. Rü yexma chanapoxcue ga muxüma. Rü yexguma chautanüxü ga Yudíugü nadaixgu ga yema yaxõgüxü, rü choma rü chorü me nixí. ¹¹ —Rü muëxpüxcüna rü chanapoxcuexü na nüxü naxoexücèx ga yema na yaxõgüãxü. Rü yemaãcü chanaxü ga guxñnema ga ngutaquëxepataügüwa. Rü poraãcü naxchi chaxaxíchi ga yema yaxõgüxü, rü yemacèx nawe chingëchigü ñuxmata to ga nachüãnegune ga ñãnegüwa.

Pauru rü wenaxãrü nüxü nixu ga ñuxãcü na yaxõõxü ga noxrix

¹² Rü ñanagürü ga Pauru: —Rü yema yaxõgüxüxü na chapoxcuexücèx nixí ga Damacuwa chaxüxü. Rü yemacèx ga paigüarü ãëxgacügü rü choxü namugü rü choxna nanaxãgü ga popera ga nawa choxna naxãgagüxü na chanapoxcuexücèx ga yema yaxõgüxü. ¹³ —Rü yexguma namagu taxíyane, Pa ãëxgacüx, rü yexguma meãma tocuchiwa nanguxgu, rü nüxü chadau ga wüxi ga omü ga daxüwa ne üxü ga üëxcüarü yexera íxíxü ga choxü baxixü rü yema chomücügüxü rü ta baxixü. ¹⁴ —Rü guxãma ga toma rü ñaxtüanegu tayayi. Rü choma rü nüxü chaxñü ga wüxi ga naga ga Yudíugawa choxü ñaxü:

“Pa Chauru Pa Chaurux, ¿tüxcüü i chowe quingëchigüxü? Poraãcü cugütama cuchix-exëë ñoma wüxi i tacü i ñmaguxügu cucuxgüxürüü”, ñanagürü choxü. ¹⁵ —Rü choma chanangãxü, rü ñacharügü:

“¿Texé quixi, Pa Corix?” ñacharügü. Rü nüma ga Cori rü ñanagürü choxü:

“Choma nixi i Ngechuchu rü chorü duüxügü nixi i ngëma nawe quingëchigüxü. ¹⁶ —¡Natürü írüda rü inachi! Rü marü cuxcëx changox i ñuxmax, erü cuxü chamuxchaü na choxü cupuracüxcëx rü nüxü quixuchigaxüxcëx i ngëma ñuxma na choxü cudaduxü rü ngëma yixcüra tá chauxütawa nüxü cudaduxü. ¹⁷ —Rü cuxna tá chadau i natanüwa i cutanüxügü i Yudíugü rü ngëma tama Yudíugü ixígüxü i ñuxma tá natanüwa cuxü chamuxü. ¹⁸ —Rü ngëma cuxü chamu na ngëma duüxügüxü choxü cucuëxëxüxcëx rü nüxü naxoëxüxcëx i nacüma i chixexügü rü chauga naxínüëxüxcëx. Rü ngëma tá cuxü na Chatanámëxëwa ícunanguxüxëxüxcëx i ngëma duüxügü na chowe naxixüxcëx rü choxü yaxögüãxüxcëx na choma rü nüxü nüxü changechaüxüxcëx i norü pecadugü, rü nüxü nangëxmaxüxcëx i nachica namaã i guxüma i chorü duüxügü i üünegüxü”, ñanagürü choxü ga Cori.

Pauru rü naga naxínü ga yema Ngechuchu namaã nüxü ixuxü

¹⁹ —Rü yemacëx ga chomax, Pa Æëxgacü Pa Agripax, rü naga chaxínü ga yema ore ga Ngechuchu chomaã nüxü ixuxü ga yexguma choxü nabaxixgu ga yema omü ga daxüwa ne üxü. ²⁰ —Natürü noxri rü Damacucüãxgümaã nüxü chixuchiga ga Tupanaãrü ore. Rü yixcama ga Yerucharéücüãxgümaã, rü yemawena rü guxü ga Yudéaanewa, rü ñuxüchi yema tama Yudíugü ixígüxümaã nüxü chixu. Rü ñacharügü:

“¡Nüxü perüxoe i pecüma i chixexügü, rü Tupanacëx pedaugü, rü meã pemaxë na duüxügü nüxü daugüxüxcëx na aixcüma peyaxögüxü!” ñacharügü. ²¹ —Rü yemacëxtama nixi ga tupauca ya taxünegu choxü yayauxgüxü rü choxü yamëxgüchaüxü ga chautanüxügü i Yudíugü. ²²⁻²³ —Natürü Tupana choxü narüngüxëë rü ngëmacëx taguma íchayachaxãchi na guxüma i duüxügümaã nüxü chixuxü rü woo buxü rü yaxü. Rü namaã nüxü chixu ga yema ore ga nuxcümaügüxü ga Tupanaãrü orearü uruügü rü Moíché nüxü ixugüxü na ñuxãcü tá nüxü nangupetüxü ga Cristu rü ñuxãcü tá na nayuxü, natürü yemawena rü nüma tá yíixü ga nüxüra yuwa ínadaxü. Rü namaã nüxü chixu ta ga yema nuxcümaügüxüãrü ore ga ñaxü:

“Rü Cristu rü tatanüxü i Yudíugümaã rü ngëma to i duüxügü i tama Yudíugü ixígüxümaã tá naxunagüãxü i ore i tüxü maxëxëëxü”, ñaxü. Rü yemachigaxüxícatama nixi ga namaã chixuxü —ñanagürü ga Pauru.

Pauru rü Agripaxü nanangüchaüxëë na yaxõxüxcëx

²⁴ Rü yexguma yemaãcü nügüétüwa yadeaxgu ga Pauru, rü ñanagürü ga Festu tagaãcüma: —Cungëãëmare Pa Paurux. Rü ngëma na yeücürü cungüechaü, rü düxwa nawa cungëãë —ñanagürü. ²⁵ Natürü ga Pauru rü nanangãxü, rü ñanagürü: —Tama changëãë Pa Æëxgacüxüchi, Pa Festux. Erü ñaã ore i nüxü chixuxü, rü aixcümaxüchima nixi. ²⁶ —Rü daa Æëxgacü ya Agripa rü meãma nüxü nacuëx i guxüma i ngëma pemaã nüxü chixuxü. Rü ngëmacëx tama chamuüácüma chorü taãëmaã napëxewa nüxü chixu, erü nüxü chacuëx na nüma rü ta nüxü nacuáxü i tacüchiga na yíixü i guxüma i ñaã ore. Erü tama ngextámare cúãcü naxüpetü i ngëma. ²⁷ —¿Cuyaxõxü, Pa Agripax, i ngëma Tupanaãrü orearü uruügü nüxü ixuxü? Choma nüxü chacuëx rü cuyaxõ —ñanagürü ga Pauru. ²⁸ Rü Pauruxü nangãxü ga Agripa, rü ñanagürü: —¿Éxna cuma nagu curüxínügu rü ngëmaãcü noxre i curü oremaã na choxü cuyaxõxëëxü? —ñanagürü. ²⁹ Rü ñanagürü ga Pauru: —Woo noxre i oremaã rü woo muxü i oremaã rü Tupana nanaxwëxe na cuyaxõxü. Rü tama i cuxicatama, natürü guxüma i ñaã nuã choxü ínüëxü rü ta, rü Tupana nanaxwëxe na chauxrüü yixígüxü, natürü tama chauxrüü daa cadenagümaã na yanëixgüxü —ñanagürü ga Pauru. ³⁰ Rü yexguma inachigü ga Agripa, rü Festu, rü

Bereníche, rü guxŭma ga yema namaã yéma rütogüxŭ. ³¹ Rü yexguma ga nümagü rü noxrŭwama naxĩ na yéma nügümaã Pauruchiga yadexagüxŭcèx. Rü ñanagürügü: —Rü ngêma yatü, rü taxuŭma i chixexŭ naxü na naxcèx yamáxŭ rü éxna naxcèx napoxcuxŭ —ñanagürügü. ³² Rü Festuxŭ ñanagürü ga Agripa: —Ngèxguma chi tama nümatama naxcèx ínacaxgu na Chécharu nüxna çaxŭcèx, rü chi ítananguxuchixëë —ñanagürü.

27

Pauruxŭ Dumawa namugü

¹ Rü yema äëxgacügü rü düxwa nagu narüxĩnŭe na norü äëxgacü ga Chécharu ga Itáriaanewa yexmacüxŭtawawa na toxŭ namugüxŭ. Rü norü churaragüarü capitáŭna nanamu ga Pauru namaã ga ñuxre ga togü ga poxcuexŭ na Chécharuxŭtawawa nagagüäxŭcèx. Rü guma capitáŭ rü Yúriu nixĩ ga naega, rü norü churaragütücumü rü Chécharuarü Dauruŭgü nixĩ ga naega. ² Rü nagu tichoŭ ga wüxi ga wapuru ga buanecümaã ixŭxŭne ga Adamíchiuwa ne ũxŭne ga Áchiaarü ñänegüwa ũxchaxŭne. Rü towe ta nixŭe ga Aritárcu ga Machedóniãñecŭŭx ga Techarónicawa ne ũxŭ. ³ Rü moxŭäcŭ rü Chidáŭärü türewa tangugü. Rü Paurumaã namecüma ga capitáŭ ga Yúriu. Rü ínanaxüexëë na yemacŭŭx ga namücügüxŭtawaga naxŭãneäxŭcèx ga Pauru, na nümagü nüxŭ nangŭxëëgüxŭcèx. ⁴ Rü yéma itaxĩächi. Rü Chiprearü capaxŭärü tocüwaguama taxĩ, naxchaxwa ga buanecü, yerü towaama nabu. ⁵ Rü yéma Chiprewa tixãŭ ga taxtŭ rü Chiríchiaanecutüwa tarüyicu. Rü yemacutügu taxĩ, rü Paŭpíriaanewa tachopetü rü ñuxmata Díchiaanewa yexmane ga ñäne ga Mirawa tangugü. ⁶ Rü yema capitáŭ yexma nüxŭ nayangau ga wüxi ga wapuru ga Aleyädriawa ne ũxŭne ga Itáriaanewa ũxŭne. Rü gumagu toxŭ nichoŭxëë, rü tomaã inaxŭächi. ⁷ Natürü írarüwatama itiñaxwetaxŭ ga muxŭma ga ngunexŭgu, rü guxchaäcüma Guíduarü toxmèxtawawa tangugü. Natürü towaama nabuema ga buanecü, rü yemacèx capaxŭ ga Chamonaärü toxmèxtawawa tachopetü rü capaxŭ ga Crétaxŭ ítachoeguächi. ⁸ Rü guxchaäcüma nacutügu taxĩ ga yema capaxŭ, rü wüxi ga nachica ga Mexŭ ga Türegu äegaxŭwawa tangugü. Rü ñäne ga Dácheaarü ngaicamana nayexma. ⁹ Natürü marü poraäcŭ namagu tanuxcŭ ga na itaxĩxŭ, rü marü naxãücüma ga na itaxĩãmaxŭ yerü marü nawa nangu ga guma tauemacügü ga nagu nagáuanecü. Rü yemacèx ga Pauru rü nayaxucuxë ga duŭxŭgü, rü ñanagürü: ¹⁰ — Pa Chomücügüx, nüxŭ chacuèx i ngèxguma chi ixĩãmagu, rü tá naxãücüma. Rü daa wapuru rü tá inayarütaxu namaã i guxŭma i naäcu. Rü ngürüächi i yixema rü tá ta tayue —ñanagürü. ¹¹ Natürü yema churaragüarü capitáŭ rü yexeraäcŭ guma wapuruarü yoragaama naxĩnŭ, rü marinerugüarü capitáŭgaama naxĩnŭ, rü tama aixcüma Pauruga naxĩnŭ. ¹² Natürü yema türe rü tama name ga yéma na tanangupetüxëëxŭ ga gáuanexŭ. Rü yemacèx wixguxüchi guxŭma ga duŭxŭgü nagu narüxĩnŭe rü narümemaë nixĩ ga na itaxĩächixŭ ga yéma. Rü nanaxwèxegü ga chi Cueníchewa na tangugüxŭ na yéma tanangupetüxëëxŭ ga gáuanexŭ, yerü yema nixĩ ga wüxi ga Crétaarü türe ga mexŭ ga tama poraäcŭ buanecü ga taxŭ nawa nguxŭ.

Taxtŭarü ngãxŭttügu nüxŭ naxü ga buanecü ga tacü

¹³ Rü inanaxügü ga na meãma topèxewaama nabuxŭ ga buanecü, rü yemacèx ga nümagü ga marinerugü rü nüxŭ nacuèxgügu rü chi meã ítangugü ga yema ítaxĩxŭwawa. Rü yemacèx itaxĩächi, rü nacutŭarü ngaicamagu taxĩ ga yema Crétaarü capaxŭ. ¹⁴⁻¹⁵ Rü natürü ngürüächi yixcamaxŭra rü wüxi ga buanecü ga taxŭchicü ga capaxŭärü tocüwawa ne ũxcü ngãxŭttüwaama nanacue ga guma wapuru. Rü taxuacüma ítxŭtaŭ nawaama ga buanecü. Rü yemacèx düxwa ítayachaxächi ga na tanatochinŭxŭ, rü toxŭ ínicuetaŭ. ¹⁶ Rü wüxi ga capaxŭxäcŭ ga Caudagu äegaxŭärü tocüwawaama tachopetü ga ngextá tama poraäcŭ íyabuaxŭwawa. Rü yéma poraäcŭ tapuracüe na guma wapurugu tanatúnagüxŭ ga norü ngue ga yatúchigüne. ¹⁷ Rü yexguma marü natúnagügüãgu ga guma ngue, rü

napanaxāgū ga tanūtaxūmaā nayanēixgūtūwe ga guma wapuru. Rū ñuxūchi nayawēgū ga yema naxchirutachinūgū ga namaā yacuetāūxū ga noxrīx, yerū namuē ga na Chírutearū naxnūcūwa yanangaixtaūgūxū. Rū yema buanecū toxū nicuetaūmare. ¹⁸ Rū moxūācū ga buanecū rū tama nangupetūēga, rū yemacēx inanaxūgū ga na ínanawoū ācuāxū. ¹⁹ Rū norū tomaēxpūx ga ngunexūgu, rū naxmēxmaātama ínanawoū ga yema natūxūgū ga guma wapuru, rū guxūma ga to ga norū yemaxūgū. ²⁰ Rū muxūma ga ngunexūgu, rū tama nangox ga üexcū rū ēxtagū, rū tama nangupetūēga ga guma buanecū ga taxūchicū. Rū dūxwa nagu tarūxīnūē ga marū tāūtāma na tamaxēxū. ²¹ Rū yexguma marū muxūma ga ngunexū tingegūgu ga tama na tachibūexū, rū yexguma guxūma ga yema duūxūgūtanūwa inachi ga Pauru, rū ñanagūrū: —Narūmemaē chi nixī, Pa Chomūcūgūx, ga chauga na pexīnūēxū, rū tāū chima na ixīāchixū ga Crétawa, rū tāū chima ñuxmarūū tūxū naxūpetū i ñāā āūcūmaxū rū taxuxū chima i chixexū tūxū nangupetū. ²² —Natūrū ¡petaāēgū! erū wapuruxica tá inayarūtaxu, natūrū i yixema rū taxúetāma tayue. ²³ —Erū ngewēxarū chūtaxūgu ya Tupana ya nūxū chapuracūcū ya chorū cori ixīcū rū nūma nanamu i wūxi i norū orearū urūū i daxūcūāx i chauxcēx ngóxū. ²⁴ —Rū ñanagūrū choxū:

“¡Tāxū i cumuūxū, Pa Paurux! Erū āēxgacū ya Chécharupēxewa tá cingu, rū cugagu tá Tupana nanamaxēxēē i guxūma i ngēma cumūcūgū i cumaā ngēxma wapurugu íxū”, ñanagūrū choxū. ²⁵ —Rū ngēmacēx, Pa Chomūcūgūx, ¡rū petaāēgū! erū choma rū aixcūma Tupanaāxū chayaxō, rū aixcūma tá nixī i ngēmaācū tá nangupetūxū ngēxgumarūū i ngēma chomaā nūxū yaxuxū. ²⁶ —Natūrū wūxi i capaxūwa tá tayarūcūxcuchitaūgū —ñanagūrū ga Pauru. ²⁷ Rū yexguma taxre ga yūxū tingexgu ga na itaxīxū, rū taxū ga taxtū ga Ariáticuwa tayexmagū, yerū ga buanecū rū nūxīca toxū nacuetāū. Rū ngāxūcūūgu nūxū nicuēxāchitanū ga yema marinerugū ga na dauxchitacutūwa tangugūchaūxū. ²⁸ Rū ínadataegū ga norū ngugūtamaxū rū 36 ga metru nixī ga norū mátama. Rū yexguma marū írarūwa yaxūguxūra itaxīxgu rū wenaxārū nanangugūtamagū, rū 27 ga metru nixī ga norū mátama ga yexgumax. ²⁹ Rū namuē ga na nutamaā yanañataūgūxū ga naxānacūwa, rū yemacēx guma wapuruchinūwa ínanawoū ga āgūmūcū ga aūclagū ga achugūnaxcēx ga napanaxāmaā ixātūxūxū na yemaācū íyachaxāchigūxēēāxūcēx ga guma wapuru. Rū nayumūxēgū ga paxa na yangunexūcēx. ³⁰ Natūrū ga yema marinerugū rū nibuxmūchaū ga guma wapuruwa, rū yemacēx nanawāixēgū ga guma wapuruarū ngue, rū ñanagūrūgū: —Ngēma wapurupēxearū aūclagū tá itawoū na nataixūcēx ya wapuru —ñanagūrūgūneta. ³¹ Natūrū ga Pauru rū churaragūarū capitāūmaā rū norū churaragūmaā nūxū nixu rū ñanagūrū: —Ngēxguma ñāā marinerugū rū tāūtāma nuxā wapurugu nachoxgu, rū guxāma i pema rū tá peyue —ñanagūrū. ³² Rū yexguma ga yema churaragū rū nayadaecunūgū ga guma ngue, rū inananguxēēgū. ³³ Rū yexguma marū yangunechaūgu, rū Pauru nayaxucūxēgū ga guxūma na nachibūexūcēx, rū ñanagūrū: —Taxre i yūxū nixī i ñuxma na taguma aixrūgumarūū pechibūexū, rū bai i tacū na pengōxū yerū porācū pexoegaāēgū. ³⁴ Rū ñuxma rū pemaā nūxū chixu na pechibūexū na peporaexūcēx, rū taxūma pexū ūpetūxūcēx. Erū taxúetāma itayarūtaxu rū bai i wūxi i peyaexūra inayarūtaxu —ñanagūrū. ³⁵ Rū yexguma marū yema ñaxgu, rū nanayaxu ga wūxi ga pāū, rū Tupanana moxē naxā napēxewa ga guxūma. Rū inanabūcu ga yema pāū, rū inanaxūgū ga na nangōōxū. ³⁶ Rū yexguma nataāēgū ga guxūma, rū nūmagū rū ta nachibūe. ³⁷ Rū 276 tixīgū ga guxāma ga toma ga guma wapurugu íxē. ³⁸ Rū yexguma marū nangāxēgu, rū ínanawoū ga yema trigu ga wapuru namaā āācuxū na nangūnagūāchixūraxūcēx ga guma wapuru.

Inangu ga guma wapuru

³⁹ Rū yexguma yangunegu, rū yema marinerugū tama nūxū nacuāane ga yéma. Natūrū nūxū nadaugū ga wūxi ga axcuchixū ga naxnūcūpechinūāxū, rū nagu narūxīnūē ga yéma

na yanangaixëëgüãxü ga wapuru. ⁴⁰ Rü yexguma nanadaü ga norü ngaxüxü ga aüclagü, rü yéma nanawogü. Rü nayawëgü ga norü toxchinüxüãrü nëixruügü, rü inananga ga yema napëxewa üxü ga naxchirutachinü ga namaã iticuetaüxü. Rü itanaxügü ga nüxü na tingaicaxü ga yema naxnücüpechinü. ⁴¹ Natürü wüxi ga naxnücüarü nuxtamaxüwa tayarüngaixtaü. Rü yéma naxnücüwa nayarüwápëxe ga guma wapuru rü marü tama yéma itaxiãchi. Rü yoxni ga nachinüwa, rü yuape nayapuxëë. ⁴² Rü yema churaragü rü nagu narüxñnë ga na nadaiãxü ga yema poxcuexü na taxuüma inaxüçèx ga yexguma naxãnacüwa nangugü. ⁴³⁻⁴⁴ Natürü yema norü capitáü ga churaragü, rü Pauruxü namaxëëchaü, rü yemacèx tama nanaxwëxe ga na nadaiãxü ga yema poxcuexü. Natürü nanamu na yema ixãnüxü rü nüxira inayuxgüxü na naxãnacüwa nawëxgüxüçèx, rü yema togü rü mürapewagügu rü ëxna yema wapurutüchigügu meã na inachoüxüçèx. Rü yemaãcü guxãma meãma naxãnacüwa tangugü.

28

Capaxü ga Márta wa nayexma ga Pauru

¹ Rü yexguma meãma naxãnacüwa tangugügu ga guxãma rü yexguma nüxü tacuèxgü na Márta na yiixü ga naëga ga yema capaxü. ² Rü yema yemacüãxgü ga duüxügü rü meãma toxü nayauxgü ga guxãma. Rü nanangixtagü ga wüxi ga üxü ga taxüne. Rü toxçèx nacagü ga guxãma na yéma togü tanaixügüxüçèx, yerü napu rü nagáuane. ³ Rü Pauru nanadetaquëxe ga ñuxre ga naïchacüügü, rü üxüxetüwa nayawocu. Natürü yexguma yéma yawocuãgu, rü üxüarü naïëmaxüchaxwa inayago ga wüxi ga äxtape. Rü Paurumëxëwa nayuxu, rü yéma nayarütuãchi. ⁴ Rü yexguma yema yemacüãxgü nüxü daugügu ga yema äxtape ga Paurumëxëwa na natuxü, rü nügümaã ñanagürügü: —Ñã yatü rü maneca wüxi i máëtaxü nixi. Rü woo taxtüwa yuwa na yañaxü, natürü Tupana tama nanamaxëëchaü —ñanagürügü. ⁵ Natürü guma üxüxetügu nanamaxü ga yema äxtape, rü taxuüma nüxü naxüpetü ga Pauru. ⁶ Natürü guxüma ga yema duüxügü rü inananguxëëgü rü ngoxi tá nachamé rü ëxna nayux. Rü marü nuxcüxürama ga yema nüxü na nadaunüxü rü taxuüma nüxü na üpetüxü, rü düxwa togu narüxñnë rü inanaxügüe ga na ñagüxü: —Maneca wüxi ya tupana nixi —ñagüxü. ⁷ Rü yema nachicaarü ngaicamana nayexma ga norü naãne ga yema capaxüãrü äëxgacü ga Púbiru ga naëga. Rü nüma meãma toxü nayaxu, rü yexma toxü napegüxëë ga tomaëxpüx ga ngunexü. Rü tomaã namecümamaxüchi. ⁸ Rü guxema Púbiru nanatü rü ngürücarewa tayexma, yerü tixaxüne rü tadü. Rü yéma tümaxütawa nangu ga Pauru, rü tümamaã nayumüxë, rü tümætügu naxüxmëx, rü tüxü narümexëë. ⁹ Rü yexguma yemaxü nadaugügu, rü Paurucèx yéma naxi ta ga guxüma ga togü ga idaaweexü ga yema capaxüçüãx, rü narümeë. ¹⁰ Rü nümagü rü muxüma toxna naxãmaregü. Rü yexguma itaxiãchigu, rü toxna nananagü ga guxüma ga tanaxwëxexü ga torü namawaü ga ðna.

Dumawa nangu ga Pauru

¹¹ Rü tomaëxpüx ga tauemacü yéma capaxüwa tayexmagü. Rü ñuxüchi nagu tichoü ga wüxi ga wapuru ga yema capaxüwa gáuanexü ngupetüxëxene. Rü Aleyãdríacüãx nixi ga guma wapuru. Rü napëxeraüwa nayexmagü ga taxre ga norü tupanachicünëxägü ga Catu rü Porugu äëgagüxü. ¹² Rü Chiracüchaarü türewa tangugü, rü tomaëxpüx ga ngunexü yéma tayexmagü. ¹³ Rü yéma itaxiãchi, rü nacutüarü ngaicamagu taxí ñuxmata Dequüwa tangugü. Rü moxüãcü inangu ga wüxi ga buanecü ga itaxiüwaama bucü rü toxü inicuetaü. Rü yemaãrü moxüãcüama rü Puteriwa tangugü. ¹⁴⁻¹⁵ Rü yexma nüxü tayangau ga ñuxre ga duüxügü ga yaxögüxü. Rü toxna naxu na wüxi ga yüxü yexma naxütagu tarüchoxüçèx. Rü marü wüxi ga yüxü ngupetügu rü itaxiãchi na namagu Dumawa taxüxüçèx. Rü marü toxü nacuáchigagü ga yema yaxögüxü ga Dumagugüxü. Rü yema nama ga Ápiugu äëgaxügu naxi na yexma toxü yangaugüxüçèx. Rü ñuxre rü

yema nachica ga Tomaēxpūx ga Taxepataūgu āegaxūwa toxū nayarünguxēēgü Rū togū rü nachopetū ñuxmata yema nachica ga Ápiuarū Ngüēchicagu āegaxūwa nangugü. Rū yexguma Pauru nüxū dēuxgu ga yema yaxōgūxū, rü Tupanana moxē naxā rü poraācū nataāē. Rū yemaācū Dumawa tangugü. ¹⁶ Rū yexguma Dumawa tangugūgu rü wūxi ga ĩpatawa nananguxēēgü ga Pauru nüxīca namaā ga wūxi ga churara ga nüxna dauxū.

Dumawa nayexma ga Pauru

¹⁷ Rū tomaēxpūx ga ngunexū marū yéma nayexmagu, rü Pauru naxcèx nangema ga yema Yudíugūarū āēxgacūgü ga Dumawa yexmagūxū. Rū yexguma nangutaquēxegūgu, rü ñanagürü ga Pauru nüxū: —Choma, Pa Chaueneēgūx, rü taxuūma i chixexū chaxū namaā i tatanūxūgü, rü bai i nuxcūmaūgūxū i tórü oxigücūmagūmaā. Natürü Yerucharéūgu choxū niyauxgü ga tatanūxūgü, rü Dumacūāx ga churaragūna choxū namugü. ¹⁸ Rū yexguma marū choxna nacagūegu ga Dumacūāxgü, rü choxū ningēxgūchaū, yerü taxuūma ga tacū ga chixexū chowa nadaugü na choxū yamēxgūxūcèx. ¹⁹ Natürü yema tatanūxūgü ga Yudíugü rü nayamuētanū na tama choxū yangēxgūxūcèx, rü yemacèx düxwa naxcèx íchaca na nūmatama ya āēxgacū ya Chécharu choxna çaxūcèx. Natürü tama tatanūxūgūxū na íchaxuaxūxūcèx nixī ga yemacèx íchaçaxū. ²⁰ Rū ngēmacèx nixī i pexcèx nuā changemaxū na pexū chadauxūcèx rü pemaā chidexaxūcèx. Pema nüxū pecuèx rü yixema i Yudíugü rü ítananguxēē i na ínanguxū ya Cristu. Rū yima Cristucèx nixī i choma i ñuxma i daa cadenamaā chináixū —ñanagürü. ²¹ Rū nūmagü nanangāxūgü, rü ñanagürügü: —Toma rü taxuūma i popera i Yudéawa ne muxū i cuchigagu umatūxū tayauxgü. Rū ngēma taeneēgü i ngema ne íxū rü núma ngugūxū rü bai i wūxi i nüxū ixuxū i tacū rü ore i chixexū i cuchiga. ²² Rū cuxūtawa nüxū taxīnūēchaū rü ¿ñuxū ñacuxū i cumax? Erü nüxū tacuèxgü rü guxūwama i Yudíugü rü chixri nachiga nidexagü i ngēma ore i ngexwacaxūxū i Ngechuchuchiga —ñanagürügü. ²³ Rū yexguma Paurumaā inaxunetagü ga wūxi ga ngunexū, rü napatawa naxī ga muxūma ga duūxūgü. Rū Pauru namaā nüxū nixu ga Tupanaārü ore ga ñuxācū āēxgacū na yiixū ya Tupana. Rū pèxmama inanaxūgü, rü ñuxmata nachütaxū rü nüxū nanangūchaūxēē ga yema duūxūgü na Ngechuchuaxū yaxōgūāxūcèx. Rū yemacèx Moíché umatūxū ga mugūwa rü nuxcūmaūgūxū ga Tupanaārü orearü uruūgü umatūxū ga orewa namaā nüxū nixu ga Ngechuchuchiga. ²⁴ Rū nūmaxū rü nayaxōgü ga yema Pauru namaā nüxū ixuxū natürü ga togü rü tama nayaxōgü. ²⁵ Rū yexguma tama wūxigu naxīnūēgu ga yema duūxūgü, rü inanaxūgü ga na íyaxīxū. Rū yemacèx ga Pauru rü ñanagürü nüxū: —Meā perü oxigūmaā nidexa ga Tupanaāē i Üünexū ga yexguma Ichaxíaxū yadexaxēēgu rü ñaxgu:

²⁶ “¡Rū ngema naxū, rü ngēma duūxūgūmaā nüxū yarūxu rü ñacurügü tá nüxū: ‘Rü woo nüxū pexīnūēgu rü tāūtáma aixcūma nüxū pecuèxgü. Rū woo nüxū perūdaunūgu rü tāūtáma aixcūma peyaxōgü. ²⁷ Rū ngēmaācū pixīgü i ñuxmax, erü tama choxū pecuáxchaū i pemax. Rū tama nüxū pexīnūē i chorü ore erü tama nüxū pexīnūēchaū. Rū tama nüxū peyaxōgü i ngēma choma pexū nüxū chadauxēēxū erü tama nüxū peyaxōgūchaū. Rū tama peāēwa chaugu perūxīnūē erü tama nüxū perūxoechaū i pecūma i chixexūgü rü tama chauxcèx pedaugūchaū na choma pexū chamaxēēxūcèx!’ ”

ñanagürü ga Tupanaāē i Üünexū. ²⁸ Rū ñanagürü ta ga Pauru: —Rü name nixī i pema rü ta nüxū pecuèx rü ñuxma rü marü inaxūgü na ngēma tama Yudíugü ixīgūxūtanūwa naxunagūxū i ñaā Tupanaārü ore i tūxū maxēxēēxū. Rū nūmagü tá nixī i aixcūma inaxīnūēxū —ñanagürü. ²⁹ Rū yexguma Pauru yema ñaxgu, rü ínixī ga yema Yudíugü, rü poraācū nūgūmaā íniporagatanūcū. ³⁰ Rū taxre ga taunecū ga mecū yéma nayexma ga Pauru nawa ga guma ĩ ga naxūtanūne ga nagu na napexūcèx. Rū yéma meāma nanayaxuxū ga guxūma ga duūxūgü ga naxūtawa íyadaugūxūxū. ³¹ Rū nüxū nixuchiga

ga ñuxãcü ãëxgacü na yĩxũ ga Tupana. Rü taxúema nüxna tanachuxu na nangúexëëãxũ
ga Cori ya Ngechuchu ya Cristuchiga. Rü taxúema naxcèx tanachixewe.

POPERA GA DUMAWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Dumaärü ñānēwa yexmagüxü

¹ Pa Chaueneëgüx, choma i Pauru nixi i pexcèx chanaxümatüxü i ñāñ popera. Rü choma nixi i Ngechuchu ya Cristuarü duüxü chiixü. Rü choma nixi ga Tupana choxü yaxuxü na choxü yamuxüçèx na duüxügümañ nüxü chixuxüçèx i norü ore i mexü i tüxü maxëxëxü. ² Rü nuxcümäxüchima Tupana nanamu ga norü orearü uruügü na naxümatügüäxüçèx ga norü ore i mexü. Rü yemaäcü tüxü nüxü nacüxëxë ga ñāñ ore i mexü. ³ Rü ñāñ ore i mexü rü törü Cori ya Ngechuchu ya Cristuchiga nixi. Rü nüma rü woo Tupana Nane na yiixü, natürü duüxügürüü nabu ga yexguma ñōma ga nañnēwa nanguxgu. Rü nuxcümäcü ga äxgacü ga Dabítaa nixi. ⁴ Natürü nümatama ya Ngechuchu rü üünecü nixi. Rü yexguma yuwa ínadxgu rü Tupana tüxü nüxü nadauxëx na aixcüma Nanexüchi na yiixü. Rü nüxna nanaxā ga guxüma ga pora. ⁵ Rü Ngechuchu ga Cristugagu nixi ga chomañ namecümäxü rü choxü naxunetaxü ga Tupana na norü puracü chaxüxüçèx. Rü yemacèx Ngechuchuégagu choxü namu na guxü i nachüñānēwa nüxü chixuxüçèx i norü ore na yaxögüäxüçèx i duüxügü rü Tupanaga naxñüxüçèx. ⁶⁻⁷ Rü pema rü ta, Pa Dumacüāxgüx, rü ngēma duüxügütanüwa pengëxmagü yerü Tupanaäxü peyaxögü rü naga pexñüë. Rü nüma rü pexü nangechaü rü marü pexü naxuneta na Ngechuchu ya Cristuarü duüxügü pixigüxüçèx rü ngēma norü duüxügütanüxü na pexigüxüçèx. Rü ñuxmax, Pa Chaueneëgü i Dumacüāxgüx, rü chanaxwëxe i nüma ya Tanatü ya Tupana rü törü Cori ya Ngechuchu ya Cristu pemañ namecümägü rü pexü narüngüxëxëgü na meñ pexü naxüpetüxüçèx rü aixcüma petañgüxüçèx.

Pauru rü nüxü nangüchaü na iyadauäxü ga yema yaxögüxü ga Dumawa yexmagüxü

⁸ Rü ñuxma rü Ngechuchu ya Cristuégagu Tupanana moxë chaxā pexcèx, erü guxüwama i guxü i nañnēwa rü duüxügü nüxü nixugügü na aixcüma Cristuaxü peyaxögüxü rü Tupanacèx pemaxëxü. ⁹ Rü nüma ya Tupana choxü nadau rü nüxü nacüx na aixcüma guxüguma pexcèx chayumüxëxü. Rü yimaäxü nixi i guxüma i chorü ngüchaümañ chapuracüxü rü nüxü chixuxü i norü ore i mexü i Nanechiga. ¹⁰ Rü guxüguma nüxna chaca na choxü ngēma namuxüçèx rü ngēmaäcü düxwa pexü íchayadauxüçèx ega norü ngüchaü yixigu. ¹¹ Erü aixcüma choxü nangüchaü na pexü chadauxü na pemañ nüxü chixuxüçèx i Tupanaärü ore na aixcüma meñ peyaxögüxüçèx rü yexeraäcü peporaexüçèx. ¹² Rü ngëxguma ngēmaäcü wüxiwa ingëxmagügu, rü tá wüxichigü yigü tatañgüxëx rü yigüaxü tanangüchaüxëx. Erü choma rü tá nüxü chadau na ñuxäcü törü Coriaxü peyaxögüxü rü pema rü tá ta nüxü pedau na ñuxäcü chayaxöxü. ¹³ Pa Chaueneëgüx, chanaxwëxe i nüxü pecüx na muëxpüxcüna pexü íchayadauxüxü, natürü ñuxmarüta rü choxü naguxcha. Natürü ngēma petanüwa chaxüxüchaü, erü chanaxwëxe na pemañ nüxü chixuxü i Tupanaärü ore yema toxnamana yexmagüxü ga duüxügümañ nüxü chixuxürüü. Erü chanaxwëxe i ngēma duüxügürüü meñ peyaxögü na ngēmaäcü Cristuwe naxixüçèx i ngēma petanüxügü i ñuxma tama yaxögüxü. ¹⁴ Rü aixcüma ngēma changuxüchaü erü nümatama ya Tupana choxü namu na guxü i duüxügümañ nüxü na chixuxüçèx i norü ore. Rü nanaxwëxe i duüxügü i meñ poperaxü icuáxümañ nüxü na chixuxü rü duüxügü i tama poperaxü icuáxümañ ta nüxü chixuxü i ngēma norü ore. Rü ngëxgumarüü ta nanaxwëxe na ngēma duüxügü i cuèx nüxü ngëxmaxümañ nüxü na chixuxü rü ngēma duüxügü i taxuguma rüxñüxümañ nüxü na chixuxü. ¹⁵ Rü ngëmacèx, Pa Chaueneëgü i Dumagu Ächiügüxü, rü choma rü marü

íchamemare na petanüwa na chaxũxũ, na pemaã rü ta nüxũ chixuxũcèx i Tupanaãrü ore i mexũ.

Tupanaãrü ore rü napora

¹⁶ Rü taxucèxma naxcèx chaxãne i ngẽma ore i mexũ. Erü ngẽma ore rü napora, rü ngẽmamaã nixĩ i napuracũxũ ya Tupana na guxãma ya yixema Cristuaxũ yaxõgũxe rü tüxũ nangẽxmaxũcèx i maxũ i taguma gúxũ. Rü ngẽma maxũ, rü Yudíugücèxirachiréx nixĩ, natürü i ñuxma rü guxũma i ngẽma tama Yudíugü ixĩgũxũcèx rü ta nixĩ. ¹⁷ Rü ngẽma norü orewa nixĩ i tamaã nüxũ yaxuxũ ya Tupana na tórü õgaguxicatama yĩxũ na napèxewa imexũ. Erü norü ore i ümatüxũwa rü ñanagürü:

“Rü yixema tümaãrü õgagu Tupanapèxewa mexẽ, rü tá tüxũ nangẽxma i maxũ i taguma gúxũ”,
ñanagürü.

Nagagutama nixĩ i duũxũgü inapoxcuexũ

¹⁸ Rü nüxũ tadaugü na Tupana daxũguxũ i naãnewa ne namuxũ i norü poxcu i ãücũmaxũ naxcèx i guxũma i ngẽma duũxũgü i tama naga ñnüexũ rü chixexũ ügũxũ rü ngẽma norü chixexũmaã togüaxũ naguxchaxẽegũxũ na tama nüxũ nacuèxgũxũcèx i ngẽma ore i aixcũma ixĩxũ. ¹⁹ Rü ngẽma duũxũgü i chixexũ ügũxũ rü meã nüxũ nacuèxgũchiréx na ñuxãcü yĩxũ ya Tupana yerü nümatama ga Tupana rü marü nüxũ nüxũ nadauxẽ ga yema. ²⁰ Rü woo tama nüxũ idaugügu ya Tupana, natürü guxũma i tacü i naxũxũwa nixĩ i nüxũ idaugũxũ. Rü yexguma noxri naãne naxüxgumama nixĩ ga meãma duũxũgũxũ nüxũ nadauxẽexũ na aixcũma Tupana na yĩxũ rü guxũguma na naporaxũ. Rü ngẽmacèx i ngẽma duũxũgü i chixexũ ügũxũ, rü taxucürüwama tacümaã nügü inapoxũgü i Tupanapèxewa. ²¹ Yerü woo nüxũ nacuèxgũchiréx na ñuxãcü yĩxũ ga Tupana, natürü tama nanayauxgũchaũ na norü Tupana yĩxũcèx, rü bai na moxẽ nüxna naxãgũxũ. Natürü yema ore ga taxuwama mexũguama narüxĩnüẽ, rü yemaãcü naẽchitamare namaxẽ rü yexeraãcü chixexũgu narüxĩnüẽ. ²²⁻²³ Rü nügü yaxugüegu rü duũxũgü i nüxũ icuáxũ nixĩgü natürü taxuguma narüxĩnüẽ. Yerü nüxna nixĩgachitanü ga Tanatü ya Tupana ya mexèchicü ya taguma yucü, na nawe naxĩxũcèx ga norü naxchicünèxãgũmare ga duũxũgü i yuxwèxexũchicünèxãmare ixĩgũxũ rü werigüchicünèxãmare ixĩgũxũ rü naèxũgüchicünèxãmare ixĩgũxũ rü ãxtapegüchicünèxãmare ixĩgũxũ. ²⁴ Rü yemacèx ga Tupana rü düxwa yemawa nanawogü ga yema duũxũgü na naxüğüãxũcèx ga guxũma ga yema chixexũ ga nüxũ ngúchaũgũxũ rü nügümaã na naxüğüãxũcèx ga naxũneãrü ngúchaũgü i ãne tũxna ãxũ. ²⁵ Rü yemaãcü nüxna nixĩgachi ga guma aixcũmaxũchi Tupana ixĩcü na nawe naxĩxũcèx ga norü tupanagü ga tama aixcũma ixĩgũxũ. Rü yema Tupana üxüpèxewa nayumüxègü rü yemaxũ nicuèxüügü, natürü tama nüxũ nicuèxüügü ga Tanatü ya Tupana ga naxücü rü inaxwèxecü na guxũguma nüxũ icuèxüügũxũ. Rü ngẽmaãcü yixĩ. ²⁶ Rü yemacèx ga Tupana rü düxwa yemawa nanawogü ga yema duũxũgü na naxüğüãxũcèx ga naxũneãrü ngúchaũ i ãne tũxna ãxũ. Rü èjxrüũ ga ngexũgü rü naxrüũ ngexũgümaãtama nangẽãègü rü tama yatüğümaã. ²⁷ Rü yexgumarüũ ta ga yatüğü rü naxrüũ yatüxũmaãtama nangẽãègü, rü tama ngexũgümaã. Rü yema naxũneãrü ngúchaũ ga chixexũgü rü nüxũ napora na naxrüũ yatüxũmaã namaxèxũ. Rü yemaãcü ga yema yatüğü rü nügümaã nanaxüğü ga yema naxũneãrü ngúchaũ i ãne tũxna ãxũ, rü düxwa yemagagu nidaawe rü naturaxũnegü. ²⁸ Rü yema na tama Tupanaxũ nacuèxgũchaũxũ, rü yemacèx ga nüma ga Tupana rü düxwa yemawa nanawogü ga yema duũxũgü na norü chixexũgu na naxĩnüẽchaxũcèx rü na naxüğüãxũcèx ga yema chixexũ. ²⁹ Rü düxwa ga yema duũxũgü rü guxũraũxũ ga chixexũ naxüğü ga Tupanapèxewa. Rü tama aixcũma meã naxmèxmaã rü natemaã namaxẽ. Rü naxaü rü nügünaxĩcatama nananugũchaũ i guxũma i tacü. Rü toguãxũ nachixexẽègüchaũ. Rü nixãũxãchixwèxegü, rü

namáētagü, rü nanuēwēxe, rü nawomüxēēwēxegü, rü naxūneārü ngúchañ nüxü napora, rü naxoregütèèxgü. ³⁰ Rü chixexūmaã toguāxü nixugüe, rü Tupanachi naxaie, rü toguāxmaã naguxchigagü. Rü nügügu naxīnūēgu rü togüarü yexera nixīgü, rü nügü nicuèxüügü. Rü naxcèx nadaugü na yexera chixexü naxügüxü. Rü tama nanatüga rü naēga naxīnūēchañ. ³¹ Rü tama inarüxīnūēchañ. Rü tama aixcūma nayanguxēē i ngēma nüxü yaxugüxü. Rü taxúexūma nangechaügü. Rü tama togüaxü nüxü nangechañ i tacü rü guxchaxü. Rü tama toguāx nüxü tangechañtümüügü. ³² Rü nümagü i ngēma duñxügü rü meāma nüxü nacuèxgüchirēx rü Tupana rü marü namaã nanaxuegu na noxtacūma nayuexü i ngēma duñx-ügü i ngēmaacü maxēxü. Natürü woo meāma nüxü nacuèxgüchirēx i guxūma i ngēma, natürü nanaxügüama i ngēma chixexü, rü nataāēgü ega togü naxüxgu.

2

Ngēxguma Tupana duñxügüxü poxcugu, rü tama chixexü naxü, erü ngēma duñxügü rü norü chixexügagutama nanapoxcue

¹ Rü ngēmacèx, Pa Duñxüx, rü woo texé quixīgu rü taxuacūma Tupanapēxewa cugüétüwa cuchogü, ega togüxü quixuechagu. Erü ngēxguma togüxü quixuechagu na nachixexü rü cugütama cupoxcu, erü cuma na cumücüxü quixuechaxü rü cuma rü ta cunaxü i ngēma chixexü i cumücüxü naxcèx quixuechaxü. ² Rü nüxü tacuèx rü Tupana tá nanapoxcue i ngēma duñxügü i namücügüxü ixugüechaxü. Rü ngēxguma napoxcueāgu, rü tama chixexü naxü ya Tupana, erü ngēma duñxügü rü norü chixexügagutama nixī i napoxcueāxü. ³ Rü dücax, Pa Duñxüx, rü ngēxguma togüxü quixu-echagu, natürü cuma rü ta cunaxüxgu i ngēmatama chixexü i nüma naxüxü, ¿rü ñuxücürüwa tá i nagu curüxīnüxü na Tupanachaxwa iquicüxü na tama cuxü napoxcuxüçèx? ⁴ ¿Rü tüxcüñ tama nagu curüxīnü i ngēma mexü i Tupana cuxcèx üxü? Nüma rü poraācücüxüchi cumaã namecūma rü yaxna cumaã naxīnü rü tama paxa curü chixexüçèx cuxü napoxcuchañ. ¿Rü ñuxma rü tüxcüñ nüxü cuxo? ¿Tama ēxna nüxü cucuèx na Tupana ngēmaacü cumaã mecümaxü na nüxü curüxoxüçèx i curü chixexü rü naxcèx na cumaxüxüçèx ya Tupana? ⁵ Natürü cuma rü tama Tupanaxü cucuāxchañ rü tama nüxü curüxoxchañ i curü chixexü. Rü ngēmaacü cugüçèxtama cunayexeraxēē i curü poxcu i tá cuyaxuxü i ngēma ngunexü i nagu Tupana napoxcuexü i ngēma chixexü ügüxü. Rü ngēma ngunexügu rü Tupana tá aixcūma ngēma duñxügümaã nanaxuegu na ñuxācü tá na napoxcueāxü. ⁶ Rü ngēxguma tá nixī i Tupana nüxü yaxügütanüxü i wüxichigü i duñxü naxcèx i ngēma naxügüxü. ⁷ Rü maxü i taguma gúxūmaã Tupana tá tüxü nanaxütanü ya yixema guxüguma mexü taxügüācūma naxcèx daugüxe na Tupana tümamaã taāēxü rü naxcèx daugüxe na aixcūma Tupanaxütawa tangugüxü. ⁸ Natürü Tupana tá tümamaã nanu rü tá tüxü napoxcu ya yixema tügüguxicatama rüxīnūēxē rü tama naga īnūēchañxē i ore i aixcūma ixīxü rü naxcèx daugüxe na ngēma chixexü taxügüxü. ⁹ Rü guxūma i ngēma duñxügü i chixexü ügüxü rü tá ngüxü ningegü rü poraācü tá chixexü nüxü naxüpetü. Rü ngēma Yudíugü i chixexü ügüxüxīra tá nixī i Tupana inapoxcuexü. Rü ngēmawena rü tá nanapoxcue i guxūma i ngēma togü i duñxügü i chixexü ügüxü. ¹⁰ Natürü ngēma duñxügü i mexü ügüxü, rü Tupana tá namaã nataāē, rü tá nanatachigaxēē, rü tá nanataāēxēē. Rü ngēma Yudíugü i mexü ügüxüçèxira tá nixī i ngēma. Rü ngēxgumarüü i guxūma i togü i duñxügü i mexü ügüxüçèx rü tá ta nixī. ¹¹ Erü Tupanapēxewa rü nawüxigu i ngēma duñxügü i Yudíugü ixīgüxü rü ngēma togü i duñxügü i tama Yudíugü ixīgüxü. Rü guxāma ya texé ya chixexü ügüxe rü tá tanayaxu i tümäärü poxcu, natürü guxāma ya texé ya mexü ügüxe rü tá Tupana tümamaã nataāē. ¹² Rü guxūma i duñxügü i pecadu ügüxü i tama nüxü cuèxgüxü i ngēma mugü ga Moīché umatüxü, rü tá inayarütaxe. Rü ngēxgumarüü ta i guxūma i ngēma pecaduāxgüxü i nüxü cuèxgüxü i ngēma mugü ga Moīché umatüxü, rü ngēma mugü nüxü ixuxüācūma Tupana tá nanapoxcue. ¹³ Erü Tupanapēxewa rü taxuwama

name i ngēma duūxūgū i nūxū ĩnūēmarexū natūrū tama nagu maxēxū i norū mugū. Natūrū ngēma duūxūgū i Tupanaārū mugūga ĩnūēxū nixī i aixcūma Tupanapēxewa imexū. ¹⁴ Dūcēx, i ngēma duūxūgū i tama Yudīugū ixīgūxū. Nūmagū rū tama nūxū nacuēxgū i Tupanaārū mugū. Natūrū ngēxguma nūēchamatama naxūgūmareāgu i ngēma Tupana tūxū muxū, rū tūxū nūxū nadauxēē na nūxū nacuēxgūxū i tacū na yīxū i mexū rū tacū na yīxū i chixexū, woo tama nūxū na nacuēxgūchirēxū i Tupanaārū mugū. ¹⁵ Erū nacūmagūwatama nixī i tūxū nūxū nadauxēēxū na nūxū nacuēxgūxū na tacū yīxū i mexū rū tacū na yīxū i chixexū. Rū ngēma duūxūgū rū ngēxguma chixexū naxūgūgu, rū naāēwatama nixī i nūxū nacuēxgūxū na nachixexū i ngēma naxūgūxū. Rū ngēxgumarūū ta i ngēxguma mexū naxūgūgu, rū naāēwatama nixī i nūxū nacuēxgūxū na namexū i ngēma naxūgūxū. ¹⁶ Rū ngēma ngunexū i nagu Tupana Cristuxū namuxū na guxū i duūxūgūxū yacagūxūcēx i norū maxūchiga, rū ngēma duūxūgū i tama Tupanaārū mugūxū cuēxgūxū rū naāēwa tátama nixī i nūxū nacuēxgūxū na chixexū naxūgūxū rū ēxna mexū naxūgūxū. Rū ngēxguma tá nixī i nangóxū i guxūma i ngēma chixexū i cúācūma naxūgūxū i duūxūgū, rū ngēma chixexū i nūxīcatama nagu naxīnūēxū. Rū Tupanaārū ore i pemaā nūxū chixuxū nixī i tūxū nūxū cuēxēēxū i ngēma.

Yudīugūchiga rū mugū ga Moīché ūmatūxūchiga

¹⁷ Natūrū pema Pa Chaueneēgū i Yudīugūx, rū ñaperūgūgū:

“Toma rū Yudīugū tixīgū rū meāma nūxū tacuēx i Tupanaārū mugū ga Moīché ūmatūxū”, ñaperūgūgū. Rū ngēmaācū nagu perūxīnūē na Tupanapēxewa pimexū erū meāma nūxū pecuēx i ngēma Tupanaārū mugū ga Moīché ūmatūxū. Rū ngēmaācū Tupanamaā pegū picuēxūgū erū nagu perūxīnūē na Tupana pexū nangechaūxū erū Yudīugū pixīgū. ¹⁸ Rū nūxū pixu na meāma nūxū pecuāxū i tacū nixī i Tupanaārū ngūchaū rū tacū nixī i mexū rū tacū nixī i chixexū. Rū Tupanaārū mugūwa naxcēx pengūe na naxcēx pedauxū i ngēma aixcūma mexū ixīxū. ¹⁹ Rū pema rū ñaperūgūgū:

“Toma rū meāma nūxū tacuēx na tanaxucūxēxū i ngēma togū i duūxūgū i tama Tupanaxū cuēxgūxū. Rū meāma nūxū tacuēx na itayanawēxāchixēēxū i ngēma togū i chixexūwa ngēxmagūxū”, ñaperūgūgū. ²⁰ Rū pema nagu perūxīnūēgu rū nūxū pecuēx na ñuxācū penaxucūxēxū i ngēma togū i duūxūgū i tama Tupanaxū cuēxgūxū rū ñuxācū penangūxēēxū i ngēma duūxūgū i ngexwacēx yaxōgūxū. Rū ngēmaācū nagu perūxīnūē na togūarū ucūxēruūgū pixīgūxū, erū Tupanaārū mugūwa pengūe rū ngēmacēx meāma nūxū pecuēx i tacū nixī i mexū rū tacū nixī i ore i aixcūma ixīxū. ²¹ Rū dūcax, Pa Chaueneēgū i Yudīugūx, pema na togūxū pengūxēēxū, ¿rū tūxcūū tama pegūtama pengūxēē? Pema nūxū pixu na tama namexū na ingīxū, ¿rū tūxcūū i pema ipengīēxū? ²² Rū pema nūxū pixu na tama namexū na naī i ngemaā ipexū, ¿rū tūxcūū i pema i ngēmaācū pemaxēxū? Rū pema na naxchi pexaieūxū i togūarū tupanagūnetachicūnēxāgū, ¿rū tūxcūū i naxcēx pengīēxū i norū tupaucagūarū ngēmaxūgū? ²³ Pema nūxū pixu na namexū i Tupanaārū mugū i ūmatūxū, rū petaāē erū meā nūxū pecuēxgū i ngēma mugū. Natūrū Tupanamaā chixexū pexūe, erū tama naga pexīnūē i ngēma pexū namuxū i norū mugūwa. ²⁴ Rū ngēmacēx i Tupanaārū ore i ūmatūxūwa rū ñanagūrū:

“Rū pegagu nixī na chixri Tupanachiga yadexagūxū i ngēma duūxūgū i tama Yudīugū ixīgūxū”,

ñanagūrū. ²⁵ Pema rū pegū ípewiechēxmūpēxechiraūgū na Tupanaārū duūxūgū pixīgūxūcēx. Rū name nixī na penaxūxū i ngēma, ega aixcūma naga pexīnūēgu i Tupanaārū mugū. Natūrū ngēxguma chi tama naga pexīnūēgu i Tupanaārū mugū, rū woo Yudīugū pixīgūgu, natūrū Tupanapēxewa rū taxuwama pexū name i ngēma na pegū ípewiechēxmūpēxechiraūgūxū. ²⁶ Rū ngēma togū i duūxūgū i tama nūgū íwiechēxmūpēxechiraūgūxū, rū woo tama ngēma naxūgūgu, natūrū Tupanaārū duūxūgū tá nixīgū ega naga naxīnūēgu i norū mugū. ²⁷ Rū dūcax, Pa Chaueneēgū i Yudīugūx,

rü ngēma duūxūgü i tama íwiechēxmüpēxechiraūgūxū natürü naga ñnüēxū i Tupanaārü mugü, rü ngēma duūxū rü tá Tupana-pēxewa pexū nixu na ñuxācū pechixexū. Rü ngēmaācū tá pexū naxūpetü erü tama naga pexīnūē i Tupanaārü mugü i wochirēx na nüxū pecuáxū i ngēma mugü, rü wochirēx na ípewiechēxmüpēxechiraūgūxū. ²⁸ Rü dücax, rü tama ngēma na Yudíuxacügü pixīgūxūcēx nixī na aixcūma Tupanaxācügü pixīgūxū. Rü tama ngēma na ípewiechēxmüpēxechiraūgūxūcēx nixī na Tupanaārü duūxūgü pixīgūxū. ²⁹ Erü yíxema aixcūma tūmaārü maxūnewa Tupanaga ñnüxē tixī ya aixcūma Tupanaxācū ixīxē. Rü ngēxguma aixcūma taāēwa yaxōxgu nixī i aixcūma Tupanaārü ixīxū. Rü Tupanaāē i Üünexū nixī i tüxū rüngūxēēxū na yaxōxūcēx, rü tama ngēma mugü ga Moíché ümatūxūgagu nixī. Rü yíxema aixcūma Tupanaārü ixīxē, rü Tupana rü tūmamaā nataāē woo duūxūgü tama tūmamaā taāēgūgu.

3

¹ ¿Rü ñuxma rü tacūwa tüxū namexū na Yudíugü ixīgūxū? ¿Rü tacūwa namexū na íwiechēxmüpēxechiraūgūxū? ² Rü poraācūxūchima tüxū name na Yudíugü ixīgūxū. Yerü nūma ga Tupana rü tüxnaxūchi nixī ga naxāāxū ga norü mugü i ümatūxū. ³ ¿Rü tacū tá ngupetūxū i ñuxma ega ñuxre i tatanūxū i Yudíugü rü tama meā yanguxēēgūāgu i ngēma Tupana tüxū muxū? ¿Rü pexcēx rü ngēmacēx tāūtāma yanguxēēāxū ya Tupana i ngēma tamaā inaxunetaxū? ⁴ Rü tama ngēmaācū nixī. Erü woo guxū i duūxūgü rü yadoratēēxgūgu, natürü Tupana rü taguma nidora rü guxūguma nayanguxēē i ngēma nūma tamaā inaxunetaxū. Rü yemacēx norü ore ga Dabí ümatūxūwa rü ñanagürü:

“Cumax, Pa Tupanax, rü aixcūma nixī i curü ore i nüxū quixuxū. Rü ngēxguma cuxū tangugūgūgu rü nüxū tadaugü na aixcūma cumexū”, ñanagürü. ⁵ Natürü duūxūgü rü ínatüe erü ñanagürügü:

“Rü nüetama nixī na chixexū ixūgūxū erü ngēmaācū yexeraācū nangox na namecūmaxū ya Tupana”, ñanagürügü. Rü ñanagürügü ta:

“Rü ngēxguma chí tórü chixexūgagu yexeraācū nangoxgu na aixcūma namecūmaxū ya Tupana, rü maneca tama name ega tórü chixexūcēx tüxū napoxcuegu”, ñanagürügü.

⁶ Natürü ngēma ñaxūgu na naxīnūēxū i duūxūgü rü poraācū ínatüe, erü tama ngēmaācū nixī. Erü ngēxguma chí tama namexgu ya Tupana, ¿rü ñuxācū chí i meā duūxūgūxū yacagūxū i naāneārü guxgu? ⁷ Natürü i duūxūgü rü ñanagürügü:

“Rü ngēxguma chí chorü chixexūgagu yexeraācū nangoxgu na ñuxācū aixcūma namexū ya Tupana, ¿rü tüxcūū yīxū i choxna naçaxū naxcēx i chorü chixexū rü choxū napoxcuxū naxcēx i ngēma?” ñanagürügü. ⁸ Natürü ngēma ñaxūgu na naxīnūēxū i duūxūgü rü poraācū ínatüe. Erü ngēxguma chí aixcūma yixīgu i ngēma nagu naxīnūēxū i duūxūgü, rü chí narümemaē nixī na yexeraācū chixexū naxūgūxū na yexeraācū mexū na ínguxuchixūcēx. Rü dücax, Pa Chaueneēgūx, nangēxma i chixexū i duūxūgü i choxū ügagūmarexū i nüxū ixugūexū na ngēma yīxū i chorü nguxēētae i duūxūgūxū namaā changūxēēxū. Natürü ngēma duūxūgü i ngēma ñagūxū rü nagagu tátama napoxcue.

Guxāma i yixema rü taxūetūxūgü

⁹ ¿Rü ñuxācū nixī i ñuxmax? ¿Pexcēx rü yixema i Yudíugü rü togü i duūxūgüarü yexera Tupanapēxewa imexū? Pemaā nüxū chixu rü tama ngēmaācū nixī. Erü guxūma i duūxūgü i Yudíugü ixīgūxū rü guxūma i duūxūgü i tama Yudíugü ixīgūxū, rü naxūetūxūgü. ¹⁰ Erü Tupanaārü ore i ümatūxūwa rü ñanagürü:

“Rü tataxuma ya texé ya aixcūma Tupanapēxewa mexē, rü bai ya wūxie. ¹¹ Rü tataxuma ya texé ya aixcūma nüxū cuāxe i Tupanaārü ore na ñuxācū nanaxwēxexū na naxcēx imaxēxū. Rü tataxuma ya texé ya aixcūma Tupanacēx dauxe. ¹² Rü guxāma ítatüe, rü guxāma itayarūtauxe rü chixexū taxūgü i Tupanapēxewa. Rü tataxuma ya texé ya aixcūma mexū üechaxe, rü bai ya wūxie. ¹³ Rü tūmaāx rü wūxi i yuetamaxū i ingenaxūrūū nixī erü ngēma ítanaxūxūxēē i nagūxūraūxū

i dexa i chixexŭ. Rŭ tŭmaãrŭ conŭmaã rŭ poraãcŭ tidorae. Rŭ ngẽma tŭmaãrŭ dexa rŭ ñoma ãxtapeguchatarŭŭ nixĩ erŭ togŭxŭ nachixexẽ. ¹⁴ Rŭ chixexŭ i ore i duŭxŭgŭãẽwa ngŭxŭmaãxĩcatama tidexagŭ. ¹⁵ Rŭ ítamemare na duŭxẽxŭ timáxŭ. ¹⁶ Rŭ ngextá ítaxĩxŭwa rŭ togŭxŭ tachixexẽ rŭ tanangechaŭxẽ rŭ chixexŭgu tanayixẽ. ¹⁷ Rŭ tama nŭxŭ tacuèx na ñuxãcŭ togŭ i duŭxŭgŭxŭ tangechaŭgŭxŭ rŭ meã natanŭwa tamaxẽxŭ. ¹⁸ Rŭ tama nŭxŭ tacuáxchaŭ na Tupanaxŭ tamuŭẽxŭ”, ñanagŭrŭ i ngẽma ore i ũmatŭxŭwa. ¹⁹ Rŭ nŭxŭ tacuèx rŭ ngema poxcu i Tupanaarŭ mugŭwa nŭxŭ yaxuxŭ rŭ naxcèx nixĩ i ngema Yudíugŭ ga natanŭwa nanguxŭ ga yema mugŭ. Rŭ woo ngema tama Yudíugŭ ixĩgŭxŭ i duŭxŭgŭcèx rŭ ta nixĩ i ngema poxcu. Erŭ taxŭema aixcŭma naga taxĩnŭ i ngẽma mugŭ. Rŭ ngẽmacèx taxucŭrŭwa texé Tupanapewa tŭgŭ ítapoxŭ i ngẽxguma Tupana tŭxŭ icagŭgu i tŭmaãrŭ pecaduchiga. ²⁰ Rŭ ñuxma na taxŭema aixcŭma naga ñnũxŭ i ngẽma mugŭ, rŭ ngẽmacèx taxucŭrŭwama texé tŭgŭ tixu na ngẽma mugŭ taxaurexŭgagu Tupanapẽxewa tamexŭ. Erŭ ngẽma mugŭ tŭxŭ nŭxŭ cuèxẽxŭ nixĩ na poraãcŭ ipecaduãxgŭxŭ.

Tórŭ ōgagu nixĩ i Tupana tŭxna naxãxŭ i maxŭ

²¹⁻²² Rŭ ñuxma na taxucŭrŭwama Tupanapẽxewa tŭxŭ yamexẽxŭ i ngẽma mugŭ, rŭ ngẽmacèx ya Tupana rŭ tŭxŭ nŭxŭ nacuèxẽ na ñuxãcŭ yĩxŭ i tŭxŭ yamexẽxŭ na napẽxewa imexŭcèx. Rŭ pemaã nŭxŭ chixu rŭ Ngechuchu ya Cristuaxŭ na yaxŭgŭxŭgagu nixĩ i tŭxŭ yamexẽxŭ ya Tupana na aixcŭma napẽxewa imexŭcèx. Rŭ yema mugŭ ga Moĩché ũmatŭxŭ rŭ yema ore ga nuxcŭmaŭgŭxŭ ga orearŭ uruŭgŭ ũmatŭxŭ rŭ tŭxŭ nŭxŭ nacuèxẽ i ngẽma. Rŭ yema mexŭ ga Tupana taxcèx ũxŭ ga yexguma núma namuãgu ga Nane na tórŭ pecadu naxŭtanŭxŭcèx, rŭ guxŭ i duŭxŭgŭ i yaxŭgŭxŭcèx nixĩ, erŭ Tupanapẽxewa rŭ nawŭxigu i guxŭma i ngẽma duŭxŭgŭ. ²³ Rŭ guxãma tipecaduãxgŭ rŭ nŭxna tayaxŭgugŭ ya Tupana ya tŭxŭ maxẽxẽcŭ. ²⁴ Natŭrŭ ga Tupana rŭ poraãcŭ tamaã namecŭma rŭ yemacèx tŭxŭ nangetanŭãcŭma tŭxŭ nimexẽgŭ na napẽxewa imexŭcèx. Rŭ ñuxma rŭ tŭxŭ nangẽxma i maxŭ i taguma gŭxŭ, yerŭ Ngechuchu ya Cristu rŭ marŭ tŭxŭ nanaxŭtanŭ ga tórŭ pecadugŭ. ²⁵⁻²⁶ Rŭ Tupana rŭ aixcŭma núma nanamu ga Cristu na nayuxŭcèx rŭ yemaãcŭ tórŭ pecadu naxŭtanŭxŭcèx na Tupana tŭxŭ nŭxŭ rŭngŭmaxŭcèx i ngẽxguma aixcŭma Cristuaxŭ yaxŭgŭgu. Rŭ yemaãcŭ nanaxŭ ga Tupana na tŭxŭ nŭxŭ nadauxẽxŭcèx na ñuxãcŭ nŭma nŭgŭcèx tŭxŭ yamexẽxŭ na aixcŭma napẽxewa imexŭcèx. Rŭ nuxcŭma ga Tupana rŭ yaxna namaã naxĩnŭ ga duŭxŭgŭ ga yexguma chixexŭ naxŭegu, rŭ tama paxa nanapoxcue. Rŭ ñuxma rŭ ta tŭxŭ nanawẽx na ñuxãcŭ aixcŭma namexŭ i ngẽma nŭma naxŭxŭ erŭ tŭxŭ ínanapi i tórŭ pecadugŭ. Rŭ ngẽmaãcŭ tŭxŭ nŭxŭ nadauxẽ na ñuxma rŭ ta aixcŭmacŭ yĩxŭ i ngẽxguma tŭxŭ yaxuxgu na napẽxewa marŭ timexŭ ya guxãma ya yíxema Ngechuchuaxŭ yaxŭgŭxe. ²⁷ Rŭ ngẽmacèx i ñuxma rŭ taxucŭrŭwama yigŭ ticuèxŭgŭ rŭ nŭxŭ tixu na yixematama yigŭ imexẽgŭxŭ i napẽxewa. Erŭ taxucŭrŭwama texé tŭgŭ tamexẽ i Tupanapẽxewa. Rŭ tama ngẽma na naxaurexŭcèx i ngẽma mugŭ nixĩ i imexŭ, rŭ tama ngẽma na mexŭ ixŭgŭxŭcèx nixĩ i imexŭ. Natŭrŭ Tupanapẽxewa time i ñuxma, erŭ Cristuaxŭ tayaxŭgŭ. ²⁸ Rŭ yixema nŭxŭ tacuèx rŭ ngẽxguma Cristuaxŭ yaxŭgŭgu nixĩ i Tupanapẽxewa imexŭ, rŭ tama ngẽma mugŭ na ixauregŭxŭcèx nixĩ i napẽxewa imexŭ. ²⁹ ¿Éxna pexcèx rŭ Tupana rŭ Yudíugŭarŭ Tupanaxĩcatama yĩxŭ? ¿Rŭ tama éxna i ngẽma togŭ i duŭxŭgŭarŭ Tupana rŭ ta yĩxŭ? Ngẽmaãcŭx, ngẽma togŭ i duŭxŭgŭ i tama Yudíugŭ ixĩgŭxŭarŭ Tupana ta nixĩ. ³⁰ Rŭ nŭxŭ tacuèxgŭ na nangẽxmaxŭ ya wŭxitama ya Tanatŭ ya Tupana. Rŭ guxŭma i duŭxŭgŭ i Cristuaxŭ yaxŭgŭxŭ, rŭ nŭma ya Tupana rŭ nayamexẽ na napẽxewa yamexŭcèx. Rŭ ngẽmaãcŭ i nŭma ya Tupana rŭ Yudíugŭxŭ nimexẽ i ngẽxguma yaxŭgŭãgu. Rŭ ngẽxgumarŭŭ ta nayamexẽ i guxŭma i togŭ i duŭxŭgŭ i ngẽxguma Cristuaxŭ yaxŭgŭãgu.

³¹ Rū ñuxma na Cristuaxŭ yaxōgŭxŭ, rŭ bexmana nagu perŭxŭnŭē na ngēmaācŭ iyanaxoxēēxŭ i ngēma mugŭ. Natŭrŭ tama ngēmaācŭ nixŭ. Erŭ ñuxma na Cristuaxŭ yaxōgŭxŭ rŭ aixcŭma tayanguxēē i ngēma Tupana tŭxŭ muxŭ.

4

Abráŭ rŭ Tupanaāxŭ nayaxō rŭ yemacèx Tupana nŭxŭ nixu na namexŭ

¹ ¿Rŭ ñuxma rŭ ñuxŭ ñagŭxŭ tá i nachiga ga nuxcŭmaŭcŭ ga tórŭ oxi ga Abráŭ? ¿Rŭ ñuxācŭ nixŭ ga nŭxŭ naxŭpetŭxŭ ga Tupanapēxewa? ¿Rŭ tŭxcŭŭ yŭxŭ ga Tupana nŭxŭ ixuxŭ ga Abráŭ rŭ mecŭ na yŭxŭ? ²⁻³ Rŭ dŭcax, yexguma chi wŭxi ga norŭ puracŭ ga mexŭcèx Tupanapēxewa namexgu ga Abráŭ, rŭ yexguma chi waxi nixŭ ga nŭxŭ nayexmaxŭ ga ŭacŭcèx nŭgŭ na yacuèxŭxŭ. Natŭrŭ taxucèxma Tupanapēxewa nŭgŭ nicuèxŭŭ ga Abráŭ, erŭ Tupanaārŭ ore i ŭmatŭxŭwa rŭ ñanagŭrŭ:

“Abráŭ rŭ Tupanaāxŭ nayaxō, rŭ yemacèx Tupana nanayaxu rŭ nŭxŭ nixu na namexŭ”, ñanagŭrŭ i ngēma ore. ⁴ Rŭ ngēxguma texé wŭxi i puracŭ ŭxgu rŭ tŭxŭ naxŭtanŭgu rŭ woetama tŭmaārŭ natanŭ nixŭ rŭ tama āmare nixŭ i ngēma. ⁵ Natŭrŭ tama ngēmaācŭ nixŭ i ngēxguma Tupanaāxŭ yaxōxgu. Erŭ ngēxguma yaxōxgu, rŭ tama ŭacŭ rŭ puracŭ i mexŭcèx nixŭ i Tupanapēxewa imexŭ, natŭrŭ Tupanapēxewa time erŭ tayaxō. Rŭ ngēmaācŭ Tupana tŭxŭ nayaxu ya yŭxema yaxōxē woo taxuŭma i ŭacŭ rŭ puracŭ i mexŭ taxŭxgu na ngēmacèx Tupana tŭxŭ rŭngŭxēēxŭ. ⁶ Rŭ nuxcŭmaŭcŭ ga āēxgacŭ ga Dabŭ rŭ ta tŭmachiga nidexa ga guxema duŭxē ga yaxōxē. Rŭ nŭxŭ nixu ga na tataāēxŭ ga guxema duŭxē yerŭ Tupanapēxewa tame, woo tama ŭacŭ rŭ mexŭ taxŭxgu na yemaācŭ Tupanapēxewa tamexŭcèx. ⁷ Rŭ nŭma ga Dabŭ rŭ ñanagŭrŭ:

“Rŭ tataāēgŭ ya yŭxema duŭxēgŭ ya Tupana tŭmaārŭ chixexŭgŭxŭ ngechaŭxē rŭ tŭmaārŭ pecadugŭxŭ iyanangŭmaxē. ⁸ Rŭ tataāē ya yŭxema duŭxē ya Tupana tama tŭxŭ nagu naxŭnŭxē i tŭmaārŭ pecadu”,

ñanagŭrŭ ga Dabŭ. ⁹ Rŭ dŭcax, ¿pexcèx rŭ ngēma taāē rŭ ngēma duŭxŭgŭ i Yudŭgŭ ixŭgŭxŭcèxicatama yŭxŭ, rŭ ēxna ngēma togŭ i duŭxŭgŭcèx ta yŭxŭ? Dŭcèx, rŭ marŭ pemaā nŭxŭ tixu rŭ Tupanapēxewa name ga Abráŭ yerŭ nayaxō. Rŭ yemacèx Tupana nanayaxu. ¹⁰ ¿Natŭrŭ ñuxgu nixŭ ga nayauxāxŭ? ¿Éxna marŭ ínawiechèxmŭpēxechiraŭguwena, rŭ ēxna naxŭpa ga na ínawiechèxmŭpēxechiraŭxŭ? Rŭ pemaā nŭxŭ chixu rŭ naxŭpa nixŭ ga na Tupana nayaxuxŭ ga Abráŭ. ¹¹ Rŭ Tupana nayaxuxguwena nixŭ ga ínawiechèxmŭpēxechiraŭxŭ ga Abráŭ. Rŭ yema nixŭ ga norŭ cuèxruŭ ga nawa nŭxŭ nacuáxŭ na aixcŭma Tupana marŭ nayaxuxŭ rŭ nŭxŭ nadauxŭ na namexŭ yerŭ nŭxŭ nayaxō. Rŭ ngēmacèx i ñuxma ya Abráŭ rŭ tŭmanatŭ yŭxŭ ya guxāma ya yŭxema yaxōgŭxe woo tama ítawiechèxmŭpēxechiraŭgŭgu. Rŭ ngēmaācŭ ya Tupana rŭ tŭxŭ nayaxu ya guxāma ya yŭxema yaxōgŭxe, rŭ tŭxŭ nadau na timexŭ erŭ tayaxōgŭ. ¹² Rŭ ngēxgumarŭŭ ta ya Abráŭ rŭ tŭmanatŭ nixŭ ya guxāma ya yŭxema ítawiechèxmŭpēxechiraŭgŭxe rŭ Abráŭrŭŭ yaxōgŭxe. Natŭrŭ tama ngēma na tŭgŭ ítawiechèxmŭpēxechiraŭgŭxŭcèx nixŭ i tŭmanatŭ yŭxŭ. Natŭrŭ tŭmanatŭ nixŭ erŭ tayaxōgŭ yexgumarŭŭ ga na yaxōxŭ ga nŭma ga tanatŭ ga Abráŭ naxŭpa ga na ínawiechèxmŭpēxechiraŭxŭ.

Abráŭ rŭ Tupanaāxŭ nayaxō rŭ yemacèx Tupana nayanguxēē ga norŭ uneta ga Abráŭmaā nŭxŭ yaxuxŭ

¹³ Rŭ Tupana rŭ Abráŭmaā inaxuneta na nŭma ya Abráŭ rŭ guxŭma i naxrŭŭ yaxōgŭxŭ rŭ tá na nayauxgŭāxŭ i ñoma i naāne na noxrŭ yŭxŭcèx. Natŭrŭ tama yema na mugŭ naxaurexŭcèx nixŭ ga Tupana yemaācŭ Abráŭmaā ixunetaxŭ. Natŭrŭ yemaācŭ namaā inaxuneta yerŭ Abráŭ nayaxō, rŭ yemacèx Tupanapēxewa name. ¹⁴ Natŭrŭ ngēxguma chi ngēma duŭxŭgŭ i mugŭ auregŭxŭcèxicatama yixŭgu i ngēma Tupanaārŭ uneta, rŭ natŭcèxmamare chi nixŭ i ngēma na yaxōgŭxŭ, rŭ chi ngēma Tupanaārŭ uneta rŭ

taxuwama name. ¹⁵ Nūxū tacuèx rü ngēma mugü ga Moïché ümatüxū rü poxcuwa tüxū naga erü taxúema aixcüma meã tayanguxēē. Natürü yexguma chi natauxguma ga yema mugü rü tataxu chima na texé chixri yanguxēēxū. ¹⁶ Rü yexguma Tupana Abráúmaã ixunetagu na nūxū tá nangüxēēxū, rü Abráúârü ôgagu nixī ga namaã inaxunetaxū. Rü ngēmacèx i guxāma i yixema na Abráúrüü yaxôgüxū rü taxcèx ta nixī ga yema Tupanaârü uneta ga Abráúmaã nūxū yaxuxū. Rü ngēmawa nūxū tacuèx rü tama yixema mugü auregüxecèxicatama nixī i ngēma Tupanaârü uneta, natürü guxāma ya yixema Abráúrüü Tupanaãxū yaxôgüxecèx ta nixī. Rü ñuxma rü guxāma i yixema na Abráúrüü meã yaxôgüxū rü Abráúxácügü tixīgü rü nūma rü tanatü nixī i Tupanapëxewa yerü nūxīra nayaxô. ¹⁷ Rü Tupanaârü ore i ümatüxüwa rü Abráúchigaxū nixu rü ñanagürü:

“Rü muxūma i duüxügünatü tá cuxū chixīxēē”,

ñanagürü. Rü Abráú rü Tupanaãxū nayaxô, rü yemacèx Tupana nayanguxēē ga norü uneta ga namaã nūxū yaxuxū. Rü yima Tupana nixī ya wena namaxëxëécü i yuexū. Rü yimatama nixī ya naxücü i ngēma woo ñuxma taxuxū. ¹⁸ Rü nūma ga Abráú rü aixcüma nayaxô ga yexguma Tupana nūxū ñaxgu:

“Rü tá namuxūchi i cutaagü”,

ñaxgu. Rü woo ga Abráú ga marü yaguãxūchichirëx na yīxū rü na nangexacüxū, natürü nayaxôõma ga yema Tupanaârü uneta rü meã ínananguxēē na wüxi ga nane tá nūxū yexmaxū. Rü yemaäcü ningu na muxūma i duüxügünatü yīxū, yema Tupana namaã nūxū ixuxürüü. ¹⁹ Rü Abráú rü wixguxuchi 100 ga taunecü nūxū nayexma ga yexguma. Natürü tama inayarümaãchi ga na yaxôõxū woo nūxū na nacúaxū ga paxa tá na nayuexū ga nūma rü namèx ga Chara rü marü poraäcü nangupetüarü taunecüãxgüxū ga na naxãxácügüxúcèx. ²⁰ Rü yemaäcü ga Abráú rü nayaxôõma na nūxū tá nayexmaxū ga wüxi ga nane yema Tupana namaã ixunetaxürüü. Rü tama nagu narüxīnū na Tupana ngürüãchi nawomüxëēxū. Natürü yexeraäcü Tupanaãxū nayaxôõma, rü nūxū nicuëxūü. ²¹ Rü aixcümaxūchi nayaxô na naporaxū ya Tupana na yanguxëēãxücèx i guxūma i ngēma norü uneta. ²² Rü yemacèx ga Tupana rü nūxū nixu na napëxewa namexū ga Abráú. Yerü Tupana nūxū nadau ga ñuxäcü aixcüma nūxū na yaxôõxū. ²³ Rü tama Abráúchigaxicatama nixī ga naxümatüxū ga Tupanaârü ore ga ñaxū:

“Rü Tupana rü nūxū nixu na napëxewa namexū ga Abráú, yerü nūxū nadau ga ñuxäcü aixcüma nūxū na yaxôõxū”,

ñaxū. ²⁴ Natürü guxāma i yixema na yaxôgüxūchiga ta nixī i ngēma ore. Erü Tupana rü tórü ôgagu tüxū nade na napëxewa imexū i yixema i nūxū na yaxôgüxū ya yima yuwa tórü Cori ya Ngechuchuxū írüdaxëēcü. ²⁵ Rü Ngechuchuxū nixī ga namuxū ga Tupana na tórü pecaducèx nayuxücèx. Rü ñuxūchi nūma ga Tupana rü wenaxârü Ngechuchuxū ínarüdaxëē na nagagu imexücèx i Tupanapëxewa.

5

Ñuxma rü Tupanapëxewa tame erü Cristuaxū tayaxôgü

¹ Rü ñuxma rü Tupanapëxewa time erü tayaxôgü. Rü ngēmacèx marü tama Tupanamaã taxuwanüãxgü i ñuxmax, erü tórü Cori ya Ngechuchu ya Cristu rü marü tamaã nanangüxmüxëē ya Tupana. ² Rü Cristugagu nixī na tamaã namecümaxū ya Tupana i ñuxmax erü tayaxôgü. Rü nūxū tacuèx rü guxūgutáma tamaã namecüma. Rü tataãégü erü nūxū tacuèx na tüxū tá nangëxmaxū i tachica i mexū i Tupanaxütawa. ³ Rü ngëxgumarüü ta tataãégü i woo ngúxū ingegügu. Erü nūxū tacuèx rü ngēma ngúxū rü tüxū narüngüxëē na yexeraäcü iporaexū rü yaxna namaã ixīnüëxücèx. ⁴ Rü ngëxguma yaxna namaã ixīnüëgu rü Tupana rü tamaã nataãē. Rü ngēma na tamaã nataãëxū rü ngēmacèx meã ítananguxëē na tüxū tá nangëxmaxū i tachica i mexū i Tupanaxütawa. ⁵ Rü ñuxma na ínanguxëēxū na tüxū tá nangëxmaxū i tachica i Tupanaxütawa, rü ngēmacèx taxucèxma tangechaügü. Erü Tupana rü poraäcü tüxū nangechaü. Rü ngēma Naãē i Üünexū i

tūxna namuxū nixī i tūxū nūxū cuèxēēxū i ngēma. ⁶ Rū yexguma taxucürūwama yigütama imaxēxēēgu, rü nawa nangu na Tupana yanguxēēxū ga yema norū uneta. Rū yexguma nixī ga ñoma ga nañnewa namuāxū ga Cristu na pecaduāxgūxūcèx nayuxūcèx. ⁷ Rū tama natauxcha na wūxie rü to i duūxūcèx tayuxū, woo wūxi i duūxū i mexūcèx yixīgu. Rū woo tangēxmagu ya texé ya naxcèx yuchaūchiréxe i wūxi i duūxū i aixcūma mexēchixū, natürü tama tūxū natauxcha i ngēma. ⁸ Natürü Tupana tūxū nūxū nadauxēē na ñuxācū tūxū nangechaūxū yerü yexguma ipecaduāxgūgu nixī ga taxcèx nayuxū ga Cristu. ⁹ Rū ñuxma rü Tupanapewa time yerü taxcèx nayu ga Cristu. Rū ngēmacèx meāma nūxū tacuèx rü nūma rü aixcūma tá tūxū ínanguxūxēē na tama tūxū napoxcuexūcèx ya Tupana. ¹⁰ Rū yexguma norū uwanügü ixīgügu, rü nūmatama ga Tupana rü nügümaā tūxū narüngüxmūēxēē ga yexguma nayuxgu ga Nane. Rū ñuxma na marü namaā irüngüxmūēxū, rü yexeraācū nūxū tacuèx na tūxū nangēxmaxū i maxū i taguma gúxū nagagu na namaxūxū i nūmax. ¹¹ Rū tama ngēxīcatama nixī. Natürü i ñuxma rü tórü Cori ya Ngechuchu ya Cristugagu rü Tupanamaā tataāēgü, yerü Cristugagu nixī ga Tupana ga tamaā nangüxmūxū.

Adáūchiga rü Cristuchiga

¹² Rū nūxiraxūcū ga yatü ga Adáūgagu nixī ga guxūma ga duūxūgüwa nanguxū ga pecadu. Rū pecadugagu ínangu i yu. Rū yemaācū guxūma ga duūxūgüwa naxūe na nayuxū, yerü guxūma nipecaduāx. ¹³ Rū naxūpa na Tupana Moíchéna naxāxū ga yema mugü ga naxūmatūxū, rü duūxūgü rü chixexū naxūgüecha, rü yemacèx nayue. Natürü yema mugü rü tauta nayexma ga yexguma, rü yemacèx taxucürūwa texé nūxū tixu ga yema duūxūgü ga na chixri naga naxīnūēxū ga yema mugü. ¹⁴ Rū yema duūxūgü ga Adáūwena buexū rü tama Adáūrūū nanangōx ga yema orix ga Tupana nūxna chuxuxū. Natürü chixexū naxūgü, rü yemacèx nayue. Rū yemaācū nixī ñuxmata Tupana Moíchéna naxā ga yema mugü ga naxūmatūxū. Rū Adáūwa ínaxūgü na nayuxū ga duūxūgü, natürü Cristuwa ínaxūgü na nayaxuxū i maxū i taguma gúxū. ¹⁵ Natürü yema chixexū ga Adáū ūxū rü taxuacū nagu tanangu i ngēma āmare ga Tupana tūxna āxū, erü tama namaā nawūxigu. Rū aixcūma nixī ga wūxi ga yatūarü chixexūgagu na nayuxū i guxūma i duūxūgü. Natürü tama yemaācū tamaā nanaxū ga Tupana. Yerü nūma rü tūxū nangetanūācūma nūma nanamu ga Nane ya Ngechuchu ya Cristu na tórü pecaducèx nayuxūcèx. Rū yemaācū guma Cristugagu Tupana nanamaxēxēē i muxūma i duūxūgü. ¹⁶ Rū yema pecadu ga Adáū ūxū rü taxuacūma nagu tanangu ga yema āmare ga Tupana tūxna āxū. Yerü wūxitama ga Adáūārü pecadugagu, rü Tupana nūxū nixu rü tá nayu naxcèx ga yema. Natürü Ngechuchu ya Cristugagu rü Tupana nūxū nixu na napēxewa imexū rü nūxna ínguxūxū i guxūma i tórü pecadugü. ¹⁷ Rū guxūma i duūxūgü nayue yerü wūxitama ga yatü ga Adáū rü pecadu naxū. Natürü tama yemaācū tamaā nanaxū ga Tupana, yerü ga nūma rü poraācū tamaā namecūma rü tūxū nangetanūācūma tūxū narüngūxēē. Rū ngēmacèx i ñuxma rü guxūma i ngēma duūxūgü i Tupana nūxū ixuxū na napēxewa yamexū, rü nūmatama ya Tupana rü Nane ya Ngechuchu ya Cristugagu nanamaxēxēē na namaā wūxigu āēxgacügü yixīgūxūcèx. ¹⁸ Rū yema Adáūārü chixexū rü poxcuwa nanagagü ga guxūma ga duūxūgü. Natürü yema mexū ga Ngechuchu ya Cristu ūxū rü pecaduwa ínananguxūxēē i guxūma i duūxūgü i yaxōgūxū, rü nūxna nanaxā i maxū i taguma gúxū. ¹⁹ Rū guma nūxīraūcū ga yatü ga Adáū rü tama Tupanaga naxīnū. Rū yemaācū wūxitama ga yatūgagu rü muxūma ga duūxūgü rü nipecaduāx. Natürü ínangu ga guma yatü ga Ngechuchu, rü meā Tupanaga naxīnū. Rū gumagagu rü muxūma i duūxūgü rü tá nime i Tupanapēxewa. ²⁰ Rū Tupana rü Moíchéna nanaxā ga norū mugü na duūxūgūxū nūxū nacuēxēēxūcèx na ñuxācū poraācū pecadu naxūgūxū. Natürü yexguma yexeraācū pecadu naxūgūgu ga duūxūgü, rü yexeraācū Tupanaāxū nangechaūtūmūgü. ²¹ Rū ñuxma woo pecadugagu na iyuxū, natürü Tupanaāxū tangechaūtūmūgü i guxūguma. Rū ngēmaācū pecaduwa

tüxŭ ínanguxŭxēē na napēxewa imexŭcèx rŭ tórŭ Cori ya Ngechuchu ya Cristugagu tüxŭ nangēxmaxŭcèx i maxŭ i taguma gŭxŭ.

6

Ñuxma rŭ tama pecadu ixügŭxŭcèx nixŭ i imaxēxŭ, natürŭ Cristucèx nixŭ i imaxēxŭ

¹ Rŭ ñuxma na Tupanaãxŭ ingechaŭtümüügŭxŭ, ¿rŭ ñuxácü tá imaxēxŭ i ñuxmax? ¿Rŭ pexcèx rŭ namexŭ na pecadu ixügŭechaxŭ na yexeraãcü Tupanaãxŭ ingechaŭtümüügŭxŭcèx? ² Rŭ dücax, tama ngēmaãcü nixŭ. Erŭ ñuxma pecaduchaxwa rŭ ñoma iyuexŭrŭü tixŭgŭ, erŭ marŭ tama naga taxŭnŭē. Rŭ ngēmacèx tama name i yeŭcŭrŭ pecadu taxŭgŭecha. ³ ¿Tama ēxna nüxŭ pecuèx na tacŭcèx yŭxŭ na íbaiŭxŭ? Rŭ ítabaiŭ na ngēmaãcü duŭxŭgŭxŭ nawéxŭcèx na aixcŭma Ngechuchu ya Cristuarŭ duŭxŭgŭ na ixŭgŭxŭ. Rŭ yexguma íbaiŭgu, rŭ nüma nayuxŭrŭü yexma nayu ga tacŭma ga nuxcŭmaŭxŭ. ⁴ Rŭ yexguma íbaiŭgu, rŭ Cristu yuxŭrŭü yexma nayu ga tacŭma ga nuxcŭmaŭxŭ, rŭ Cristu itáxŭrŭü inatèx ga yema tacŭma ga nuxcŭmaŭxŭ. Rŭ yemaãcü naxŭpetŭ na wena imaxēxŭcèx rŭ tüxŭ nangēxmaxŭcèx i maxŭ i ngexwacaxŭxŭ, yexgumarŭü ga Ngechuchu na yuwa írŭdaxŭ rŭ wena namaxŭxŭ ga yexguma Nanatŭ ga Tupana norŭ poramaã ínadaxēēgu. ⁵ Rŭ ñuxma na Cristumaã wŭxigu nayuxŭ ga tacŭma ga nuxcŭmaŭxŭ, rŭ nüxŭ tacuèx na aixcŭma Cristumaã tüxŭ nangēxmaxŭ i maxŭ i ngexwacaxŭxŭ. ⁶ Rŭ nüxŭ tacuèx rŭ yema tórŭ maxŭ ga nuxcŭmaŭxŭ rŭ Cristumaã wŭxigu curuchagu nayu na yexma yanaxoxŭcèx ga yema tacŭma ga chixexŭ. Rŭ ñuxma rŭ tama pecadutŭŭwa tangēxmagŭ, rŭ ngēmacèx marŭ tama naga taxŭnŭē. ⁷ Erŭ yŭxema yŭxe rŭ marŭ tama pecadutŭŭwa tangēxma na yeŭcŭrŭ pecadu taxŭechaxŭcèx. ⁸ Rŭ ñuxma na Cristumaã nayuxŭ ga tórŭ maxŭ ga nuxcŭmaŭxŭ, rŭ nüxŭ tacuèx na Cristurŭü tüxŭ nangēxmaxŭ i maxŭ i ngexwacaxŭxŭ. ⁹ Rŭ nüxŭ tacuèx rŭ ñuxma na yuwa ínadaxŭ ya Cristu, rŭ tagutáma wena nayu. Yerŭ nüma rŭ marŭ yuxŭ narŭyexera. ¹⁰ Rŭ yexguma nayuxgu ga Cristu rŭ pecaducèx nixŭ ga nayuxŭ, rŭ noxtacŭma yexma wŭxicana ningutanŭ ga guxŭma ga duŭxŭgŭarŭ pecadugŭ. Natürŭ ñuxma na namaxŭxŭ, rŭ Tupanacèx nixŭ i namaxŭxŭ na Tupanaärŭ ngúchaŭ naxŭxŭcèx. ¹¹ Rŭ ngēxgumarŭü ta i pema rŭ name nixŭ i pegŭgu perŭxŭnŭē na marŭ peyuexŭ pecaduchaxwa rŭ Tupanacèx pemaxēxŭ, erŭ Ngechuchu ya Cristuarŭ duŭxŭgŭ pixŭgŭ. ¹² Rŭ ngēmacèx rŭ tama name i pecadutŭŭwa pegŭ pengēxmagŭxŭēē na pemaã inacuáxŭcèx. Rŭ tama name i penaxŭchica i pecadu na pexeneärŭ ngúchaŭgŭ i chixexŭ pexŭ naxŭxŭēxŭcèx. ¹³ Rŭ tama name i pecaduna penaxágŭ i pexene na ngēmamaã chixexŭ pexŭgŭxŭcèx. Rŭ name nixŭ i Tupanana pegŭ pexágŭ, erŭ ñoma duŭxŭgŭ i yuexŭ rŭ wena maxēxŭrŭü pixŭgŭ. Rŭ ngēmacèx name nixŭ i Tupanana penaxágŭ i pexene na ngēmamaã mexŭ pexŭgŭxŭcèx. ¹⁴ Rŭ ñuxma rŭ tãŭtáma pecadutŭŭwa pengēxmagŭ na pemaã inacuáxŭcèx. Rŭ yexguma yema mugŭ ga Moíché ũmatŭxŭwe perŭxŭxgu, rŭ pemaã inacuèx ga pecadu. Natürŭ i ñuxma rŭ Cristugagu Tupana pemaã namecŭma, rŭ nüma nixŭ i pemaã inacuáxŭ i ñuxmax.

Ngēxguma wŭxi i corimēxēwa yigŭ ingēxmagŭxŭēēgu, rŭ ngēmaga nixŭ i ixŭnŭēxŭ

¹⁵ Rŭ ñuxma na tama yema Moíché ũmatŭxŭ ga mugŭtŭŭwa ingēxmagŭxŭ, rŭ ñuxma na Tupana rŭ Cristugagu tamaã mecŭmaxŭ, ¿rŭ ñuxácü tá imaxēxŭ? ¿Rŭ pexcèx namexŭ na yeŭcŭrŭ pecadu ixügŭechaxŭ? Rŭ dücax, tama name na ngēmaãcü imaxēxŭ. ¹⁶ Rŭ pema nüxŭ pecuèx rŭ ngēxguma wŭxi i corimēxēwa pegŭ pengēxmagŭxŭēēgu na naga pexŭnŭēxŭcèx rŭ ngēma tá nixŭ i perŭ cori ixŭxŭ, rŭ pema rŭ norŭ duŭxŭgŭ tá pixŭgŭ i ngēma cori i naga pexŭnŭēxŭ. Rŭ ñuxma rŭ pema tá nüxŭ pedaugŭ ngoxi ngēxŭrŭüxŭ perŭ me yixŭ na ngēmaga pexŭnŭēxŭcèx. Rŭ ngēxguma pecadu i yuwa tüxŭ gagŭxŭ perŭ me yixŭgu, rŭ ngēma tá nixŭ i pemaã icuáxŭ. Rŭ ngēxguma perŭ me yixŭgu na Tupanaga na pexŭnŭēxŭ, rŭ yimaga tá pexŭnŭē na napēxewa pimexŭcèx. ¹⁷ Natürŭ Tupanana moxē

chaxã, yerü woo pecaduga na pexĩnüëchiréxũ, natürü i ñuxma rü aixcüma naga pexĩnüë i ngẽma nguxẽëtae i marü peyaxuxũ i Cristuchiga. ¹⁸ Rũ ñuxma rü Tupanaãrũ duũxũgũ pixĩgũ erü nüma rü chixexũna pexũ inanguxũxẽë na tama pecadu pexũgüechaxũcèx. Rũ ngẽmaãcü pexũ narüngũxẽë na napëxewa pimexũcèx rü meã naxcèx pemaxèxũcèx. ¹⁹ Rũ ñoma i naãnecũãx i duũxũgũmaã chidexarũü nixĩ i tauxchaxũ i oremaã pemaã chidexaxũ i ñuxmax, erü pema rü woetama taguma nüxũ pexĩnüë i ñãã ore, rü ngürüãchi tãütáma nüxũ pecuèx i tacüchiga na yĩxũ i ngẽma pemaã nüxũ chixuxũ. Rũ dücax, rü nuxcüma rü ipenaxã ga pexene na namaã penaxũgũxũcèx ga nagúxũraũxũ ga chixexũ. Natürü i ñuxma rü name nixĩ i Tupanana pegü pexã na aixcüma napëxewa pexũünegũxũcèx rü naxcèxicatama pemaxèxũcèx. ²⁰ Rũ yexguma pecadutũüwa peyexmagügu, rü taxucürüwama Tupanapëxewa mexũ pexũgũ ga yexguma. ²¹ ¿Natürü tacüwa pexũ namexũ ga yema chixexũ i ñuxma rü wüxi i ãne pexna ãxũ? Yerü yema chixexũ rü yuwamare pexũ nagagü, rü tama i maxũwa. ²² Natürü marü tama pecadutũüwa pengëxmagü i ñuxmax, erü marü nüxna ípenguũ rü marü Tupanaãrũ duũxũgũ pixĩgũ. Rũ ngẽma waxi nixĩ i poraãcü pexũ mexũ erü ngẽmagagu penayaxu i maxũ i Tupanapëxewa üünexũ rü ngẽmawena tá penayaxu i maxũ i taguma gúxũ. ²³ Rũ ngẽma natanü na pecadu ixũxũ, rü yu nixĩ. Natürü yíxema tórü Cori ya Ngechuchuaxũ yaxõgũxe, rü Tupana tüxna nanaxãmare i maxũ i taguma gúxũ.

7

Wüxi i ngecü rü ngëxguma nayutegu rü marü tama ngĩtemëxëwa ingëxma. Rũ ñuxma na taxcèx nayuxũ ya Cristu, rü marü tama yema Moĩché ümatüxũ ga mugütũüwa tangëxmagü

¹ Pa Chaueneëgũx, rü pema na naga pexĩxũ i ngẽma mugü, rü nüxũ pecuèx rü ngëxguma tamaũxguxicatama nixĩ na ngẽma mugütũüwa tangëxmaxũ ya wüxichigü ya duũxẽ. ² Rũ dücax, rü wüxi i ngecü i átecü rü ngĩtemëxëwa ingëxma ega namaxyane ya ngĩte, erü ngẽma ñanagürü i ore i mugü. Natürü ngëxguma nayuxgu ya ngĩte, rü marü tama ngĩtemëxëwa ingëxma. Rũ yema mugü ga ngĩtemëxëwa ngĩxũ yexmaxëëxũ ga noxri rü marü tama ngĩmaã inacuèx. ³ Rũ ngẽmaãcü i ngëxguma namaxyane ya ngĩte rü to i yatümaã inapexgu, rü pecadu ixü. Natürü ngëxguma marü nayuxgu ya ngĩte, rü marü nüxna ínguxuchi i ngẽma mugü ga ngĩtemëxëwa ngĩxũ yexmaxëëxũ ga noxrix. Rũ ngëxguma wenaxãrũ naxãtegu rü taxuũma i chixexũ ixü. ⁴ Rũ ngëxgumarũü ta i pemax, Pa Chaueneëgũx, rü marü tama yema Moĩché ümatüxũ ga mugütũüwa pengëxmagü yerü nüma ga Cristu rü pexcèx nayu. Rũ ngẽmacèx i ñuxma rü Cristu ga yuwa írüdacüarü pixĩgũ. Rũ ngẽmaãcü nanaxü ya Tupana na naxcèx imaxèxũcèx, rü norü ngúchaũ ixũgũxũcèx. ⁵ Rũ yexguma nuxcümaũxũ ga tacümawe rüxĩxgu rü poraãcü tanaxü ga taxüneãrũ ngúchaũgũ woo yema mugü tüxna na nachuxuxũ ga yema. Natürü yexguma nüxũ icuèxgu na nachuxuxũ ga yema pecadu ga ixũxũ, rü yexeraãcü tanaxüxchaũ. Rũ yemaãcü ga yema tórü pecadugü rü yuwa tüxũ nagagü. ⁶ Natürü i ñuxma rü marü tama ngẽma mugütũüwa tangëxmagü, erü Tupana rü marü nüxna tüxũ inanguxũxẽë. Rũ ngẽmacèx i ñuxma rü ñoma duũxũgũ i iyuxürũü tixĩgũ i napëxewa i ngẽma mugü, erü marü tama tamaã inacuèx. Rũ ngẽmacèx tama naga taxĩ i ngẽma nuxcüma ümatüxũ ga mugü, erü marü nüxna ítanguxũ na Tupanaãrũ ngúchaũ ixũgũxũcèx rü naxcèx na imaxèxũcèx namaã i tórü maxũ i ngexwacaxũxũ i Naãë i Üünexũ tüxna ãxũ.

Ngẽma pecadu i chowa ngëxmaxũ rü chomaã inacuèx

⁷ ¿Rũ ñuxũ ñagũxũ tá i ñuxmax? ¿Rũ pexcèx rü yema mugü yĩxũ ga tüxũ pecaduãxëëxũ? ¿Rũ dücax, tama name i ngẽmaãcü naga tarüxĩnüë! Natürü yexguma chi yema mugü rü tama choxũ nüxũ nacuèxëëgu, rü tãü chima nüxũ chacuèx na pecadutũüwa chayexmaxũ. Rũ dücax, rü yexguma chi yema mugü rü tãü chima choxũ nüxũ cuèxëëgu na wüxi i pecadu yĩxũ na toguãxãrũ ngẽmaxũcèx chixauxãchixũ, rü

tāu chima nūxū chacuèx na pecadu yīixū i ngēma. ⁸ Natürü yexguma yema mugü choxū nguxēēgu na nachixexū na toguāxārū ngēmaxū choxū ngúchaūxū, rü yexguma ga pecadu rü nayoxniē na yexeraācü choxū na nangúchaūxēēxū. Rü ngēmaācü nūxū tadau rü ngēxguma chi natauxgu i ngēma mugü, rü tāu chima nūxū tacuèxgu na ñuxācü wūxi i chixexūchixū na yīixū i ngēma pecadu. ⁹⁻¹⁰ Rü noxri tauta yema mugūxū chacuèxgu, rü choma nagu charūxīnūgu rü chame. Natürü yexguma yema mugūxū chacuèxgu, rü nūxū chicuèxāchi na chixexū chaxūxū rü ngēma chixexūcèx rü tá na chayuxū. Rü yemaācü ga yema mugü ga Tupana Moīchéna āxū na duūxūgūxū namaxēēxūcèx, rü choxū nayuxēēāma. ¹¹ Rü nūma ga pecadu rü nayoxniē namaā ga yema mugü. Yerü yexguma yema mugü choxū nguxēēgu na ñuxācü nachixexū ga yema pecadu, rü yexeraācü choxū nangúchaū ga yema pecadu. Rü yemaācü ga yema pecadu rü choxū nawomūxēē rü nayoxniē namaā ga yema mugü rü yuwa choxū naga. ¹² Natürü yema mugü rü aixcūma naxūüne i Tupanapēxewa. Rü guxūma i ngēma Tupana tamaā nūxū ixuxū rü naxūüne rü aixcūma name rü tūxū narüngūxēē. ¹³ ¿Natürü ñuxācü nixī i ngēma i ñuxmax? ¿Éxna pexcèx rü yema mugü yīixū ga yuwa choxū gaxū? Rü dücax, rü tama ngēmaācü nixī. Erü ngēma pecadu nixī i Tupanaārü mugūmaā yoxniēxū na yuwa choxū nagaxūcèx. Rü ngēmaācü nūxū tacuèx na ñuxācü poraācü nachixexū i pecadu. Rü yexguma yema mugü choxū nguxēēgu na ñuxācü poraācü nachixexū ga yema pecadu, rü yexeraācü choxū nangúchaū ga yema chixexū rü yexeraācü chanaxūama ga pecadu. ¹⁴ Nūxū tacuèx i ngēma mugü rü Tupanaāē i Üünexūwa ne naxū. Natürü choma rü duūxūmare chixī, rü ngēmacèx nixī i chomaā inacuáxū i ngēma pecadu i chaxūxū. ¹⁵ Rü tama nūxū chacuèx na tacū choxū üpetūxū erü tama chanaxū i ngēma mexū i chanaxwèxexū na chaxūxū, natürü ngēma chixexū i tama chanaxwèxexū na chaxūxū rü ngēmaāma nixī i chaxūxū. ¹⁶ Natürü i ñuxma na chanaxūxū i ngēma tama chanaxwèxechiréxū na chaxūxū, rü ngēmawa nūxū chicuèxāchi na namexū i ngēma mugü. ¹⁷ Rü ngēmacèx i ñuxma rü tama chauechama nixī i chanaxūxū i ngēma chixexū. Natürü ngēma pecadu i chowa ngēxmaxū nixī i chomaā icuáxū, rü ngēma nixī i chixexū choxū üxēēxū. ¹⁸ Rü choma nūxū chacuèx rü wūxi i pecaduāxū i duūxūmare chixī, rü ngēmacèx chowa rü nataxuma i tacū i mexū. Erü woo chanaxwèxe na mexū chaxūxū, natürü tama chomaā nanguxū na chanaxūxū. ¹⁹ Erü ngēma mexū i chanaxwèxexū na chaxūxū, rü tama chanaxū. Natürü chanaxūama i ngēma chixexū i tama chanaxwèxexū na chanaxūxū. ²⁰ Rü ngēxguma chi chanaxūamagu i ngēma chixexū i tama chanaxwèxexū na chaxūxū, rü meāma nangox na tama chauechama chanaxūxū. Natürü ngēma pecadu i chowa ngēxmaxū nixī i chomaā icuáxū rü chixexū choxū üxēēxū. ²¹ Rü ngēmaācü nūxū chadau i ñuxācü na chíxū. Rü ngēxguma mexū chaxūxchaūgu rü choxū natauxcha na chixexūāma chaxūxū. ²² Choma rü chauāēwa rü chorü me nixī i Tupanaārü mugü, rü naga chaxīnūchaū. ²³ Natürü ñaā chaxune i ñoma i naānecūāx ixīxūwa, rü nangēxma i tacū i tama naxūxchaūxū i ngēma chauāē naxwèxexū. Rü ngēma pecadu i chowa ngēxmaxū nixī i chomaā icuáxū rü chixexū choxū üxēēxū. ²⁴⁻²⁵ Rü ngēmaācü i choma rü chauāēwa chayanguxēēchaū i Tupanaārü mugü, natürü ñoma i naānecūāx i chaxune rü nanaxūxchaū i ngēma nanaxwèxexū i pecadu. Rü taxucèxma chataāē i chomax. ¿Rü texé tá nūxna choxū ítanguxuchixēē i ñaā pecadu i chowa ngēxmaxū rü yuwa choxū gaxchaūxū? Rü Tupanana moxē chaxā erü tórü Cori ya Ngechuchu ya Cristu rü tá choxū nūxna ínanguxuchixēē.

8

Tupanaāē i Üünexū naxwèxexūācüma tamaxē

¹ Rü ñuxma ya Tupana rü marü taxucèxma nanapoxcue i ngēma duūxūgü i Ngechuchu ya Cristuarü duūxūgü ixīgūxū. ² Erü Tupanaāē i Üünexū i Ngechuchu ya Cristugagu

tūxū maxēxēxū, rü nüxna tūxū ínanguxūxēē i pecadu na tama yuwa tūxū nagagūxūcèx. ³ Rü yema taxūneārū ngúchaūgū rü marū nüxū narüyexera ga yema mugū ga Moīché ūmatūxū. Rü yemacèx ga yema mugū rü taxucürüwa mexū tūxū naxūxēē. Natürü nüma ga Tupana rü marū nanaxū ga yema taxucürüwa naxūxū ga yema mugū. Yerü ga Tupana rü ñoma ga naānewa nanamu ga Nanexūchi. Rü woo taxūne i pecaduāxūrūū nixī ga naxūne, natürü nüma ga Nane rü taguma napecaduāx. Rü nüma ga Nane rü tórü pecaducèx nayu, rü yemaācü inayanaxoxēē ga norü pora ga yema pecadu ga taxūnewa yexmaxū. ⁴ Rü yemaācü nanaxū ga Tupana na tūxū na natauxchaxūcèx na yanguxēēxū i ngēma tūxū namuxū i ngēma mugū. Erü ñuxma rü tama ñoma i taxūne naxwèxexūācüma tamaxē, natürü Tupanaāē i Üünexū naxwèxexūācüma nixī i imaxēxū. ⁵ Rü yíxema tümaxūne naxwèxexūācüma maxēxē, rü naxcèx tadaugū i ngēma ñoma i naānecūāx naxwèxexū. Natürü yíxema Tupanaāē i Üünexū naxwèxexūācüma maxēxē, rü ngēma Tupanaāē i Üünexū naxwèxexū nixī i naxcèx tadaugūxū. ⁶ Rü yíxema Tupanaāē i Üünexū naxwèxexūcèx daugūxe rü tataāēgū, rü tá tūxū nangēxma i tümäärü maxū i taguma gúxū. Natürü yíxema tümaxūne naxwèxexūcèx daugūxe rü ngēma rü tá yuwa tūxū nagagū. ⁷ Rü yíxema tümaxūne naxwèxexūcèx daugūxe rü Tupanamaā tarūxuwānūgū. Rü tama Tupanaga taxīnūēchaū erü taxucürüwama naga taxīnūē. ⁸ Rü ngēmacèx ya yíxema tümaxūneārū ngúchaūwe rüxīxē, rü taxucürüwa Tupanaārū ngúchaū taxūgū. ⁹ Natürü ngēxguma aixcüma pewa nangēxmagu i Tupanaāē i Üünexū rü tama pexeneārū ngúchaū pexū, natürü Naāē i Üünexūārū ngúchaū nixī i pexūxū. Rü yíxema tama tūxū nangēxmaxē i Tupanaāē i Üünexū i Cristu tūxna āxū, rü tama Cristuarū duūxū tixī. ¹⁰ Natürü ngēxguma pewa namaxūxgu ya Cristu, rü peāxē rü namaxū erü Cristugagu Tupana pexū nüxū inayarūngūma i perü pecadugu. Rü woo i pexene rü pecadugagu tá nayuama, natürü peāxē rü Cristugagu tá namaxū, erü Tupana pexū nadau na pimexū. ¹¹ Rü ngēxguma pewa namaūxgu i Naāē ya yima Tupana ga Ngechuchu ya Cristuxū írūdaxēēcū, rü nūmatátama ya yima Cristuxū írūdaxēēcū tá wena nanamaxēē i pexene i yuxwèxexū, rü Naāē i Üünexū i pewa maxūxū tá nixī i naxūxū i ngēma. ¹² Rü ngēmacèx, Pa Chaueneēgūx, rü tanaxwèxe i Tupanaārū ngúchaū taxū, rü tama tanaxwèxe i taxūne i pecaduāxūārū ngúchaū taxū. ¹³ Erü ngēxguma chi pexeneārū ngúchaū pexūxgu rü tá ipeyarūtauxe. Natürü ngēxguma Tupanaāē i Üünexūārū ngūxēēmaā ipeyanaxoxēēgu i ngēma pexene ūxchaūxū, rü aixcüma tá pexū nangēxma i maxū i taguma gúxū. ¹⁴ Erü guxāma ya yíxema Tupanaāē i Üünexū tümamaā icuáxe, rü aixcüma Tupanaxācügū tixīgū. ¹⁵ Yerü tama penayauxgū ga wūxi ga naāxē ga pecaduwa pexū gagūxū rü ngemagagu wenaxarū Tupanaarū poxcucèx pemuūē. Natürü yema Naāxē ga peyauxgūxū rü Tupanaāxē i Üünexū i naxacūgū pexū ixīgūxēēxū nixī. Rü ngēmatama Naāē i Üünexū nixī i tūxū rüngūxēēxū na tama imuūēxūcèx na Tupanana ingaicamagūxū rü:

“Pa Chaunatūx”, ñagūxū nüxū. ¹⁶ Rü ngēmatama Naāē i Üünexū nixī i aixcüma tūxū nüxū cuèxēēxū na Tupanaxācügū na ixīgūxū. ¹⁷ Rü ñuxma na Tupanaxācügū ixīgūxū i yixema, rü nüxū tacuèx rü daxūguxū i naānewa tá tanayaxu i ngēma mexūgū i Tupana tūxna āxchaūxū. Rü ngēmaācü Cristumaā tá tūxū nangēxma i tachica i mexū i Tupanaxūtawa, erü Cristurūū ngúxū tingegū na yixcūra wūxigu namaā mexūwa ingēxmagūxūcèx.

Ngēma mexū i yixcūra tá nüxū idauxūchiga

¹⁸ Rü dücax, choma nagu charūxīnū rü ngēma ngúxū i ñuxma ñoma i naānewa ingegūxū, rü taxuūma nixī i ngēxguma nagu nanguxgu i ngēma mexū i yixcūra tá nüxū idauxū i ngēxguma Cristumaā ingēxmagūgu i daxūguxū i naānewa. ¹⁹ Rü ñuxma rü guxūma i tacū i Tupana ūxū rü taxū i norü ngúchaūmaā inananguxēēgū i ngēma ngunexū i nagu tá nataeguxū ya Cristu na Tupana guxūpēxewa naxācügūxū iwéxū. ²⁰ Rü nüxū tacuèxgū rü yexguma pecadu naxūxgu ga guma nüxīraūcü ga yatū rü yexguma nixī ga

nachixexŭ ga guxŭma ga yema Tupana ũxŭ. Rŭ tama yema Tupana ũxŭārŭ ngŭchaŭ nixŭ ga yema, natŭrŭ yemaācŭ nŭxŭ naxŭpetŭ yerŭ ga Tupana rŭ yemaācŭ inaxuneta ga yexguma pecadu naxŭxgu ga guma yatŭ. Natŭrŭ i űuxma rŭ guxŭma ga yema Tupana ũxŭ rŭ ínananguxēē na ngēma chixexŭwa ínananguxŭcèx. ²¹ Erŭ ngēma ngunexŭ i Tupana tá nagu nadexŭ i naxācŭgŭ na naxŭtawa nangēxmagŭxŭcèx, rŭ ngēxguma tá ta nixŭ i chixexŭwa ínananguxŭēēāxŭ i guxŭma ga yema nŭmatama naxŭxŭ. Rŭ ngēmaācŭ wenaxārŭ noxrirŭŭ tá name i guxŭma. ²² Rŭ nŭxŭ tacuèx rŭ űaa naane rŭ guxŭma i nawa ngexmaxŭ rŭ űoma wŭxi i nge i ixraxacŭchaxŭcŭrŭxŭ poraācŭ ngŭxŭ ninge űuxmatáta nawa nangu i ngema ngunexŭ i nagu Tupana wena nangexwacaxŭxēēxŭ i guxŭma. ²³ Rŭ tama űaa naanexŭcatama nixŭ i ngŭxŭ ingexŭ i űuxma, natŭrŭ yixema i tŭxŭ ngexmaxŭ i Tupanaāxē i Ũñexŭ rŭ ta ngŭxŭ tingegŭ űxmatáta nawa nangu na Tanatŭ tŭxŭ dexŭ rŭ ngexwacaŭxŭ i taxŭnegŭ tŭxna āxŭ. Rŭ woo tŭxŭ nangexma i Naāxē i Ũñexŭ ya Tupana tŭxna muxŭ na norŭ ũgŭ yixŭxŭcèx i ngema mexŭgŭ i Tupana tá tŭxna naxāxŭ i dauxŭguxŭ i naanewa, natŭrŭ tanaxwèxe na ngemaxŭchi ingugŭxŭ. ²⁴ Cristu tŭxna nanaxā i maxŭ i taguma gŭxŭ, natŭrŭ ítananguxēēgŭmare na naxŭ-tawa ingugŭxŭ na nayauxgŭxŭcèx i ngēma maxŭ. Natŭrŭ nŭxŭ tacuèx rŭ ngēxguma chi marŭ nŭxŭ idaugŭgu i ngēma írŭnguxēēgŭxŭ, rŭ taxucèxma tŭxcŭŭ ítananguxēēgŭ. Erŭ ngēma marŭ nŭxŭ idauxŭ, rŭ taxucèxma ítananguxēē. ²⁵ Natŭrŭ ngēxguma tauta nŭxŭ idaugŭgu i ngēma írŭnguxēēgŭxŭ, rŭ tanaxwèxe i meā ítananguxēēgŭeche űuxmatáta nŭxŭ idaugŭ. Rŭ ngēmaācŭ nixŭ i Cristuxŭ írŭnguxēēgŭxŭ. ²⁶ Rŭ Tupanaāē rŭ tŭxŭ narŭngŭxŭēē ta na iporaexŭcèx i ngēxguma ituraegu i tŭrŭ ōwa. Rŭ yixema rŭ tama nŭxŭ tacuèx na űuxācŭ Tupanamaā idexagŭxŭ rŭ tacŭcèx iyumŭxēgŭxŭ. Natŭrŭ Naāē i Ũñexŭ rŭ naxauxācŭma ore i tama nŭxŭ icuáxŭmaā Tupanamaā nidexa rŭ taxcèx nayumŭxē. ²⁷ Rŭ Tupana ya meā tŭxŭ cuácŭ rŭ nŭxŭ nacuèx na űuxŭ űaxŭchiga yŭxŭ i ngēma Naāē i Ũñexŭ nŭxŭ ixuxŭ. Erŭ ngēma Naāē i Ũñexŭ rŭ Tupana naxwèxexŭācŭma Tupanaxŭ nacèèxŭ tŭmacèx ya yŭxema Tupanaārŭ duŭxŭgŭ ixŭgŭxe.

Cristu rŭ tŭxŭ naporaexēēāma na taxuŭma i guxchaxŭgŭ tŭxŭ narŭ-yexeraxŭcèx

²⁸ Rŭ nŭxŭ tacuèx rŭ tŭmaārŭ mexŭcèx nixŭ i Tupana ínananguxēēxŭ i guxŭma i ngēma tŭxŭ ũpetŭxŭ ya yŭxema nŭxŭ ngechaŭgŭxe ga nŭma nanaxwèxexŭācŭma tŭxŭ nadexe. ²⁹ Rŭ woetama nuxcŭmama ga Tupana rŭ marŭ tŭxŭ nacuèx na texégŭ tá tixŭgŭxŭ ya yŭxema noxrŭ ixŭgŭxe. Rŭ noxritama naāne ixŭgŭgumama tŭxŭ nade na Nanerŭŭ timexŭ i napēxewa, rŭ yima Nane rŭ tŭmamaā nayaxŭcèx rŭ tŭmamaā inacuáxŭcèx ya guxāma ya yŭxema naēneēgŭ ixŭgŭxe. ³⁰ Rŭ guxema noxri naāne ixŭgŭgumama Tupana tŭxŭ dexe, rŭ tŭmacèx naca na noxrŭ tixŭgŭxŭcèx. Rŭ guxema tŭmacèx naçaxe, rŭ nŭgŭcèx tŭxŭ nimexēēgŭ. Rŭ guxema nŭgŭcèx tŭxŭ yamexēēgŭxe, rŭ daxŭwa tá tŭxŭ nagagŭ na guxŭgutāma naxŭtawa tangēxmagŭxŭcèx. ³¹ ¿Rŭ űuxŭ űagŭxŭ tá i űuxma i ngēmachiga? Rŭ ngēxguma Tupana taétŭwa chogŭgu, ¿rŭ texé tá tŭxŭ rŭyexeraxŭ? ³² Yerŭ nŭma ga Tupana rŭ tama tŭxna nayanuxŭ ga Nanexŭchi. Natŭrŭ taxcèx inanamu ga Nane na taxcèx nayuxŭcèx i guxāma i yŭxema. Rŭ űuxma na yemaācŭ taxcèx inamuāxŭ ga Nane, ¿rŭ taux ēxna tŭxna naxāāxŭ i guxŭma i tacŭ i inaxwèxexŭ na naxcèx imaxēxŭcèx? ³³ Rŭ Tupana tŭxŭ nade rŭ tŭxŭ nixu na napēxewa imexŭ. Rŭ ngēmacèx ¿rŭ texé tá napēxewa tŭxŭ tixugŭ na ichixexŭ? Erŭ Tupanatama nixŭ ya tŭxŭ ixucŭ na tŭxŭ nataxuŭma i chixexŭ. ³⁴ ¿Rŭ texé tá poxcuwa tŭxŭ tamugŭ i űuxmax? ¿Pexcèx rŭ Cristu tá yŭxŭ? Dŭcèx, taxucŭrŭwama ngēmaācŭ nixŭ yerŭ Cristu nixŭ ga taxcèx yucŭ na tŭxŭ namaxēēēxŭcèx. Rŭ tama ngēxŭcatama taxcèx naxŭ, natŭrŭ wenaxārŭ ínarŭda. Rŭ űuxma rŭ Tupanaxŭtawa nangēxma rŭ ngema āēxgacŭ nixŭ. Rŭ ngema taétŭwa nachogŭ rŭ Tupanaxŭ taxcèx nacèèxŭ. ³⁵ ¿Rŭ űuxma rŭ tacŭ tá Cristuna tŭxŭ ixŭgachixēēxŭ na tama tŭxŭ nangechaŭxŭcèx? Rŭ woo ngŭxŭ ingegŭgu, rŭ ēxna guxchaxŭgŭ tŭxŭ ngēxmagu, rŭ ēxna duŭxŭgŭ Cristugagu taxchi aiegu, rŭ ēxna

itaiyaegu, rü ěxna ingexchirugügu, rü ěxna ãücümaxüwa ingĕxmagügu, rü ěxna duüxügu tüxü daixchaügu, natürü woo guxüma i ngĕma tüxü üpetügu, natürü ya Cristu rü tãütama nüxü narüchau na tüxü nangechaüxü. ³⁶ Natürü guxüguma ãücümaxüwa tangĕxmagü, ngĕma Tupanaârü ore i ümatüxü nüxü ixuxürüü. Erü ngĕma ore rü ñanagürü:

“Rü cugagu duüxügu toxü nadaixchaü rü duüxügüpĕxewa rü ñoma carnerugü i daiwa ĩxürüü tixĩgü”,

ñanagürü i ngĕma ore. ³⁷ Natürü woo guxüma i ngĕma tüxü na ngupetüxü, rü Ngechuchu ya Cristu ya tüxü ngechaücü, rü tüxü naporaexĕĕama na taxuüma i guxchaxügu tüxü narüyexeraxüçĕx, rü bai i tacü. ³⁸⁻³⁹ Rü ngĕmacĕx aixcüma chayaxō na taxucürüwama tacü Tupanana tüxü ixĩgachixĕĕxü na ngĕmaãcü tama tüxü nangechaüxüçĕx. Rü woo iyuxgu rü woo imaxĕgu, natürü Tupana tá tüxü nangechaüĕcha. Rü taxucürüwama Tupanana tüxü nixĩgachixĕĕ i tacü i norü orearü ngeruügu, rü ěxna tacü rü ngoxogü rü ěxna tacü i to i poraxü. Rü bai i tacü i ñuxma tüxü üpetüxü, rü bai i tacü i yixcüra tá ngĕxmaxü, rü bai i tacü i daxüwa ngĕxmaxü, rü bai i tacü i naãnetüüwa ngĕxmaxü, rü bai i tacü i to i Tupana üxü, rü taxucürüwama Tupanana tüxü nixĩgachixĕĕ na tama tüxü nangechaüxüçĕx. Rü ngĕmaãcü nixĩ i tüxü nangechaüxü ya Tupana nagagu ya tórü Cori ya Ngechuchu ya Cristu.

9

Tupana rü nanade i Yudügu na norü duüxügu na yixĩgüxüçĕx

¹ Düçĕx, Pa Chaueneĕgüx, rü pemaã tá nüxü chixu i wüxi i ore. Rü ngĕma ore i pemaã tá nüxü chixuxü rü aixcüma nixĩ erü Cristuarü duüxü chixĩ. Rü tama chidoṛa. Rü chauãĕwatama nüxü chacuĕx na aixcüma na yĩxü i ngĕma ore erü Tupanaãĕ i Üünexü nixĩ i chauãĕmaã icuáxü. ² Rü poraãcü changechaü, rü choxü nangúecha i chauãĕwa, erü tama nayaxōgü i chautanüxügu i Yudügu. ³ Rü aixcüma pemaã nüxü chixu rü guxüguma ngĕma chautanüxügu charüxĩnü, rü poraãcü chanaxwĕxe na Cristuaxü yaxōgüãxü. Rü choma rü aixcüma íchamemare na poxcuwa choxü namuxü ya Tupana rü Cristuna choxü yaxügachixĕĕxü ega ngĕmaãcü chi nüxü chayaxōgüxĕĕgu rü chanamaxĕxĕĕgu i ngĕma chautanüxügu i Yudügu. ⁴ Rü nümagü rü chauxrüü Yudügu nixĩgü. Rü Tupana rü nuxcümaxüchima namaã inaxuneta na naxãcügu yixĩgüxüçĕx. Rü norü oxigü rü nüxü nadaugü na ñuxãcü namexĕchixü ga Tupana ga yexguma naxçĕx nangoxgux. Rü Tupana rü norü oxigümaã inaxuneta rü ñanagürü nüxü:

“Rü ngĕxguma chauga pexĩnüĕgu rü tá pexü charüngüxĕĕ”,

ñanagürü nüxü. Rü Tupana rü nüxna nanaxã ga yema mugü ga Moĩché ümatüxü. Rü nanangüxĕĕ na ñuxãcü nüxü yacuĕxüügüxüçĕx. Rü meãma namaã inaxuneta na Cristu rü naxçĕx núma tá namuãxü na namaxĕxĕĕãxüçĕx rü nüxna na naxããxüçĕx i maxü i taguma gúxü. ⁵ Rü yema nuxcümaügüxü ga tórü oxigütaa nixĩgü i ngĕma Yudügu, rü ngĕmacĕx naxçĕx ta nixĩ ga yema uneta ga tórü oxigümaã nüxü yaxuxü ga Tupana. Rü ngĕma Yudügütanüxüwatama nixĩ ga nabuxü ga Cristu ya Tupanaxüchi ixĩcü ya guxüĕtüwa ngĕxmacü. Rü tanaxwĕxe i guxüguma nüxü ticuĕxüügu. Rü ngĕmaãcü yĩ. ⁶ Rü ñuxma rü woo tama guxü i Yudügu na yaxōgüxü, natürü taxucürüwama texé nüxü tixu na Tupana rü tama yanguxĕĕãxü i ngĕma norü uneta. Erü ngĕma Yudügu rü tama aixcüma guxüma Tupanaârü duüxügu nixĩgü. ⁷ Rü tama guxüma i duüxügu i Abrãütaagü ixĩgüxü, rü aixcüma Abrãütanüxü nixĩgü i Tupanapĕxewa. Yerü ga Tupana rü Abrãümaã nüxü nixu, rü ñanagürü:

“Rü cune ya Ichaátanüxügu tá nixĩ i aixcüma cutanüxügu ixĩgüxü i chopĕxewa”,

ñanagürü. Rü yemaãcü namaã inaxuneta woo na nayexmaxü ga togü ga Abrãüxãcügu. ⁸ Rü ngĕmawa meãma nüxü tacuĕx rü tama ngĕma na Abrãütaa tixĩgüxüçĕx nixĩ i Tupanaxãcügu tixĩgüxü. Natürü yixema aixcüma Tupanaârü uneta nüxü ixuxürüüãcüma yaxōgüxe waxi tixĩ ya aixcüma Abrãütaa ixĩgüxe i Tupanapĕxewa. ⁹ Yerü naxüpa ga

na nabuxū ga Abráū nane, rü yema Tupanaārü uneta ga Abráūmaã nüxū yaxuxū, rü ñanagürü:

“Rü naī ya taunecüarü ñúxgumaãcü tá wena nuã chaxū, rü cuxmèx i Chara rü tá ixãxãcü i ngèxguma”,

ñanagürü. ¹⁰ Natürü tama Abráūmaãxīcatama nixī ga yemaãcü yadexaxū ga Tupana. Yerü tórü oxi ga Ichaá namèx ga Rebecamaã rü ta nidexa ga Tupana. Rü ngīma rü ngīteaxū ixãxãcü rü nataxreēxpūx ga ngīne. ¹¹⁻¹³ Natürü yexguma tauta nabuegu rü taxuūma ga mexū rü ēxna chixexū naxūegu ga yema ngīnegü, rü Rebecamaã nidexa ga Tupana, rü ñanagürü:

“Rü ngēma nüxīra buxū i cune, rü ngēma wixweama buxūārü duūxū tá nixī”, ñanagürü ngīxū. Rü yema dexa rü namaã nawūxigu i Tupanaārü ore i ümatūxū i ñaxū:

“Marü chanayaxu ya Acobu, natürü nüxū chaxo ya Echaú”,

ñaxū. Rü yemaãcü ga Tupana rü ngīmaã nanangoxēē na namèxwa nangēxmaxū na tüxū nayaxuxū ya yīxema woetama nüxū ngúchaūxē na tümacèx naçaxū tama nagu naxīnūãcüma i tacü rü mexū rü ēxna tacü rü chixexū na taxūxū. ¹⁴ ¿Rü ñuxū ñagūxū i ñuxmax? ¿Pexcèx rü Tupana rü chixexū naxūxū ga yexguma tama Acobuxū nangechaūxürü nüxū na nangechaūgu ga Echaú? Rü dücax, tama chixexū naxū.

¹⁵ Yerü norü orewa rü Tupana rü Moīchēxū ñanagürü:

“Rü ngèxguma chi texémaã chamecümachaūgu, rü tümamaã tá chamecüma. Rü choxū tá tangechaūtümüü ya yīxema choxū ngechaūtümüüchaūxē”,

ñanagürü. ¹⁶ Rü ngēmaãcü tama ngēma tümataama tanaxwèxexūgagu rü ēxna ngēma taxūxūgagu nixī i Tupana tüxū yaxuxū ya texé. Natürü tüxū nayaxu erü nüxū tangechaūtümüü. ¹⁷ Rü yexgumarüü ta ga Tupana rü norü ore i ümatūxūwa rü ñanagürü nüxū ga Equituaneārü ãēxgacü:

“Rü ãēxgacūxū cuxū chingucuchixēē na cuwa duūxūgūxū nüxū chadauxēēxūcèx i ñuxãcü na chaporaxū. Rü ngēmaãcü chanaxū na guxū i duūxūgü i guxū i nañewa ngēxmagūxū, nüxū na cuáxūcèx i chauchiga”,

ñanagürü. ¹⁸ Rü ngēmaãcü ya Tupana rü nüxū tangechaūtümüü ya yīxema nüxū ngechaūtümüüchaūxē. Rü ngèxguma tüxū nataiãchiarü maxūãxēēchaūgu rü tüxū nanataiãchiarü maxūãxēē ya yīxema tama nüxū cuáxchaūxē. ¹⁹ Natürü bexmana tá ñacurügü choxū:

“Rü ngèxguma chi ngēmaãcü yixīgu ya Tupana, ¿rü tüxcüü nüxū nixu na tagagu yīxū na chixexū ixūgūxū rü tama naga ixīnūēxū? ¿Rü texé tabora na itayanaxoxēēxūcèx i Tupanaārü ngúchaū?” ñacurügü tá. ²⁰ Natürü Pa Duūxūx, ¿texé quixī i cuma rü ngēmacèx ngēmaãcü Tupanaxū cuyaxūgaxū? ¿Cuxcèx rü ēxna wūxi i tüxū i waixūmüwa üxū rü namexū i ngēma norü üruūmaã na ñaxū?

“¿Rü tüxcüü ngēmaãcü choxū cuxū na ngēmaãcü chixīxūcèx i ñuxmax?” ñaxū.

²¹ Rü ngēma tüxūārü üruü rü waixūmüwa nanaxū i tacü i nüma naxūxchaūxū. Rü ngèxguma nanaxwèxegu, rü ngēma waixūmüwa nanaxū i wūxi i tüxū na norü meruü yīxūcèx. Rü ngèxguma nanaxwèxegu, rü ngēmatama waixūmüwa nanaxū i wūxi i tüxū na norü guxchirechixū yīxūcèx. ²² Rü ngèxgumarüütama nixī i naxūãxū ya Tupana. Erü tüxū nanawéxchaū na ñuxãcü naporaxū i nüma rü ñuxãcü napoxcueãxū i ngēma duūxūgü i chixexū ügūxū, natürü poraãcü yaxna namaã naxīnū i ngēma duūxūgü, rü tama paxa nanapoxcue i ngēma ímemaregūxū na napoxcuexū. ²³ Natürü ga Tupana rü inanawéxchaū na ñuxãcü poraãcü tamaã namecūmaxū i yixema na yaxōgūxū. Rü ngēmacèx nixī i nüxū ingechaūtümüügūxū, rü nuxcūmatama tüxū nadexū na naxūtawa ingèxmagūxūcèx i daxūgūxū i nañewa i ngextá ínamexēchixūwa. ²⁴ Rü ngēmaãcü i yixema na Yudíugü ixīgūxū, rü tatanūwa Tupana tüxū nidexechi ya ñuxre na norü duūxūgü tixīgūxūcèx. Rü ngèxgumarüü ta i ngēma tama Yudíugü ixīgūxūtanūwa rü nayadexechi i togü. ²⁵ Rü ngēmacèx rü Tupanaārü ore ga Ochéa ümatūxūwa rü ñanagürü:

“Rü ngēma duūxūgü i tama chorü duūxūgüchirēx ixīgüxū, rü: ‘Pema rü chorü duūxūgü pixīgü i ñuxmax’, ñacharügü tá nüxū. Rü ngēma duūxūgü i tama Yudíugürüü nüxū changechaūchiréxū, rü: ‘Pexū changechaū i ñuxmax’, ñacharügü tá nüxū. ²⁶ Rü noxri ga Tupana rü yema duūxūgü ga tama Yudíugü ixīgüxūmaã nüxū nixu, rü ñanagürü nüxū: ‘Pema rü tama chorü duūxūgü pixīgü’, ñanagürü nüxū. Natürü yematama nachica ga ngextá nüxū íyemañaxūwa, rü wenaxārü yema duūxūgü ga tama Yudíugü ixīgüxūmaã nidexa ga Tupana ya Maxēxēeruū, rü ñanagürü nüxū: ‘Pema rü chauxacügü tá pixīgü’, ñanagürü nüxū”.

Rü yema nixī ga Tupanaārü ore ga Ochéa ümatüxū. ²⁷⁻²⁸ Rü Yudíugüchiga rü ta nidexa i Tupanaārü ore, yerü nuxcūmaūcü ga norü orearü uruū ga Ichaxía rü ñanagürü:

“Rü woo namuxūchichirēx i Yudíugü yima naxnücü ya taxtüpechinüwa yimacürüü, natürü noxre tátama nixī i aixcūma nayauxgüxū i maxū i taguma gúxū. Rü paxa tá ínangu ya tórü Cori na napoxcueāxūcèx i guxūma i ngēma tama noxrü ixīgüxū”, ñanagürü ga Ichaxía. ²⁹ Rü nümatama ga Ichaxía, rü ñanagürü ga ũpa:

“Rü ngēxguma chi nüma ya tórü Cori ya guxū i naāneārü yora rü tãū chima íyaxügüxēēāgu i ñuxre i tatanüxūgü i Yudíugü, rü chi itayarüxoxochi, yexgumarüü ga na iyanaxogüxū ga guma ñānegü ga Chodoma rü Gomora namaã ga guxūma ga yema duūxūgü ga yéma yexmagüxū”, ñanagürü ga Ichaxía.

Yudíugü rü tama nayaxōgüchaū i ore i mexū i Cristuchiga

³⁰ ¿Rü ñuxū ñagüxū i ñuxmax? Rü pemaã nüxū chixu rü ngēma duūxūgü i tama Yudíugü ixīgüxū ga tama Tupanacèx daugüxū ga noxrix, rü ngēmatama duūxūgü nixī i ñuxma Tupanapēxewa imexū yerü nayaxōgü. ³¹ Natürü yema Yudíugü ga nagu íxchaūxū ga yema Moīchearü mugü na Tupanapēxewa yamexūcèx, rü ínatüe. ³² ¿Rü ñuxācü ínatüe? Dücèx, ínatüe yerü yema mugüguama naxī na Tupanapēxewa yamexūcèx, rü tama Ngechuchuaxū nayaxōgüchaū. Rü yemaācü ga Ngechuchu rü yema duūxūgücèx rü wüxi ga guxchaxū nixī. ³³ Rü ngēmachiga nixī i Tupanaārü ore i ümatüxū i ñaxū:

“Choma rü Yudíugütanüwa chanamu ya Cristu. Rü nüma rü ngēma Yudíugücèx rü wüxi i guxchaxū tá nixī erü ngēxguma tama nüxū yaxōgüāgu rü tá inayarütaxe. Natürü ngēma duūxūgü i nüxū yaxōgüxū, rü aixcūma tá namaxē”, ñanagürü.

10

¹ Pa Chaueneēgüx, rü ngēma poraācü chanaxwèxexū rü chorü yumüxēwa Tupanana naxcèx chaçaxū, rü ngēma nixī na guxūma i chautanüxūgü i Yudíugü na yaxōgüxū rü ngēmaācü aixcūma Tupanaārü na yixīgüxūcèx. ² Rü aixcūma pemaã nüxū chixu, rü nümagü i Yudíugü rü aixcūma poraācü Tupanagu narüxīnūē rü nanaxügüchaū i Tupanaārü ngüchaū. Natürü ínatüe erü tama Cristuaxū nayaxōgüchaū na ngēmaācü Tupanapēxewa yamexūcèx. ³ Rü woo Tupana ñoma ga naānewa nanamu ga Cristu na gumagagu Tupanapēxewa yamexūcèx i duūxūgü, natürü nümagü i Yudíugü rü tama nüxū nacuèxgüchaū i ngēma. Rü nügütama nimexēēgüchaū, rü ngēmacèx nagu naxīāma i ngēma mugü ga Moīché ümatüxū rü tama Cristuaxū nayaxōgüchaū na nagagu Tupanapēxewa yamexūcèx. ⁴ Natürü nüma ga Cristu rü nayanguxēē ga yema mugü rü yemaācü inayanaxoxēē na tama tamaã inacuáxūcèx i ngēma mugü. Rü yemaācü nanaxū ga Cristu na guxūma i duūxūgü i nüxū yaxōgüxū rü aixcūma Tupanapēxewa yamexūcèx. ⁵ Rü Moīché nanaxūmatü nachiga na ñuxācü Tupanapēxewa tamexū ya wüxie ega naga taxīnūgu i ngēma mugü, rü ñanagürü:

“Tupana pexū namu na guxūgutáma meã peyanguxēēxū i guxūma i ngēma mugü erü ngēxguma naga pexīnūēgu i guxūma i ngēma mugü rü tá pemaxē. Natürü ngēxguma tama naga pexīnūēgu i wüxitama i ngēma mugü, rü tãütáma pemaxē”,

ñanagürü. ⁶ Natürü ñuxma rü Tupanapëxewa time ega Cristuaxŭ yaxõgügu. Rü ngëmacèx taxucèxma i cuãewa rü ñacurügü:

“¿Texé tá daxüguxŭ i naãnewa taxŭ na Cristucèx tayaçaxŭ na nuã naxŭxücèx rü tüxŭ yanangŭxëèxücèx na imexücèx i Tupanapëxewa?” ñacurügü. ⁷ Rü taxucèxma cuãewa ñacurügü:

“¿Rü texé tá yuexŭtanüwa taxŭ na ngëxma Cristucèx tayadauxŭcèx na nuã tanagaxŭcèx?” ñacurügü. ⁸ Erü tama ngëmaãcü nixŭ i Cristucèx idauxŭ, yerü yema ore ga Moïché ümatŭxŭ rü ñanagürü:

“Rü marü cuxŭtawana nangëxma i Tupanaärü ore. Rü cuèxwa nangëxma na nüxŭ quixuxŭcèx. Rü cuãewa nangëxma na nagu curŭxŭnŭxŭcèx”,

ñanagürü. Rü ñuxma Pa Chaueneëgŭx, rü pemaã nüxŭ chixu rü ngëmatama ore nixŭ i guxŭwama duŭxŭgümaã nüxŭ tixuxŭ. Rü ngëma ore nixŭ i pexŭ nüxŭ cuèxëèxŭ na ñuxãcü pexŭ nangëxmaxŭ i maxŭ ega aixcüma peyaxõgügu. ⁹ Erü ngëxguma cuèxmaã nüxŭ quixuxgu na curü Cori yŭxŭ ya Ngechuchu, rü ngëxguma cuãewa cuyaxõxgu na yuwa Tupana ínadxëèxŭ, rü tá cuxŭ nangëxma i maxŭ i taguma gúxŭ. ¹⁰ Erü taãewa tayaxõgü na ngëmaãcü Tupanapëxewa imexŭ. Rü taèxmaã nüxŭ tixu na Ngechuchu rü tórü Cori yŭxŭ, rü ngëmaãcü tanayaxu i maxŭ i taguma gúxŭ. ¹¹ Rü Tupanaärü ore i ümatŭxŭwa rü ñanagürü:

“Rü guxãma ya yŭxema ya Ngechuchuaxŭ yaxõxë, rü nüma ya Ngechuchu rü taxútama tüxŭ narümaãchiixëè erü tá nayanguxëè i guxŭma i ngema tümamaã inaxunetaxŭ”,

ñanagürü. ¹² Rü Tupanapëxewa rü guxŭma i duŭxŭgü rü nawŭxigu. Rü woo Yudŭgü yixŭgu rü èxna woo tama Yudŭgü yixŭgu, natürü Tupanapëxewa rü nawŭxigu i guxŭma i duŭxŭgü. Erü nüma ya tórü Cori, rü guxãärü Cori nixŭ. Rü nüma rü aixcüma tüxŭ namaxëxëè ya guxãma ya texé ya nüxna çaxe na tüxŭ namaxëxëèxücèx. ¹³ Erü Tupanaärü ore i ümatŭxŭwa rü ñanagürü:

“Rü guxãma ya texé ya tórü Corina çaxe na tüxna naxãxŭcèx i maxŭ, rü tá tanayaxu i tümäärü maxŭ i taguma gúxŭ”,

ñanagürü. ¹⁴ ¿Natürü ñuxãcü tá tórü Corina naxcèx tacagü, ega tama nüxŭ tayaxõgügu? ¿Rü ñuxãcü tá nüxŭ tayaxõgü, ega taguma nüxŭ taxŭnŭègu i nachiga? ¿Rü ñuxãcü tá nüxŭ taxŭnŭè i norü ore, ega taguma texé tümamaã nüxŭ ixuxgu? ¹⁵ ¿Rü ñuxãcü tá texé nüxŭ tixu i Cristuchiga ega taxŭema tüxŭ nüxŭ yarŭxuxëègu? Rü ngëmacèx nixŭ i Tupanaärü ore i ümatŭxŭ i ñaxŭ:

“Rü wŭxi i taãè nixŭ na ínangugŭxŭ i Tupanaärü orearü uruŭgü na duŭxŭgümaã nüxŭ yaxugŭxŭcèx i Tanatŭarü ore i mexŭ i Cristuchiga”,

ñaxŭ. ¹⁶ Natürü tama guxŭma i duŭxŭgü naga naxŭnŭè i ngëma ore i mexŭ. Rü Ichaxía nüxŭ ixuxŭrŭŭ nixŭ. Yerü ga nüma rü ñanagürü:

“Pa Corix, noxretama nixŭ i ngëma duŭxŭgü i toxŭ yaxõgŭxŭ i ngëma ore i nüxŭ tixuxŭ”, ñanagürü. ¹⁷ Rü dücax, rü ngëma na Cristuchigaxŭ naxŭnŭèxŭwa nixŭ i ne naxŭxŭ na yaxõgüãxŭ i duŭxŭgü. Rü ngëma nüxŭ naxŭnŭèxŭ, rü ore i mexŭ i Cristuchiga nixŭ.

¹⁸ Natürü i ñuxma rü pexna chaca, ¿éxna pexcèx rü ngëma Yudŭgü rü taguma nüxŭ naxŭnŭè i ngëma ore i mexŭ i Cristuchiga? Dücèx, ngëmaãcü marü nüxŭ naxŭnŭè. Erü Tupanaärü ore i ümatŭxŭwa rü ñanagürü:

“Rü ngëma Tupanaärü orearü uruŭgü, rü guxŭwama i ñoma i naãnewa rü nüxŭ nixugüè i norü ore. Rü ngextá ínangëxmagŭxŭwa i Yudŭgü, rü ngema rü ta nüxŭ nixugügu”,

ñanagürü i ngëma ore. ¹⁹ Natürü wena pexna chaca, ¿rü ngëma Yudŭgü rü tama èxna nüxŭ nicuèxãchitanü na Cristugagu yŭxŭ na Tupana nadexŭ i duŭxŭgü i ñuxmax? Rü ngëmaãcü nüxŭ nacuèxgü. Yerü Tupanaärü ore ga Moïché ümatŭxŭwa rü ñanagürü:

“Dücèx, Pa Yudŭgŭx, choma rü tá chanamaxëxëè i ngëma duŭxŭgü i tama Yudŭgü ixŭgŭxŭ, rü ngëmacèx i pema rü tá pixãxŭchigü. Rü ngëxguma chanamaxëxëègu i

ngēma togü i duïxügü i tama choxü cuèxgüchiréxü, rü pema i Yudíugü rü tá penue erü nüxü charüngüxëë i ngēma togü”,
 ñanagürü. ²⁰ Rü yemawena ga Ichaxía, rü tama namuü ga yema Yudíugümaã nüxü na yaxuxü ga yema Tupanaãrü ore ga ñaxü:
 “Rü ngēma duïxügü i tama Yudíugü ixīgüxü i tama chauxcèx daugüxü, rü choxü tá inayangaugü. Rü choma rü tá chaugü changoxëë naxcèx i ngēma duïxügü i tama chauxcèx ícagüchiréxü”,
 ñaxü. ²¹ Rü Tupana rü Ichaxíawa Yudíugüchiga nidexa rü ñanagürü:
 “Rü guxü i ngunexügu rü nüxna chaxuecha i ngēma duïxügü i tama chauga ñnüëchaüxü rü chomaã nuëxü. Natürü tama choxü inarüxñnüëchaü”,
 ñanagürü.

11

Nangēxma i ñuxre i Yudíugü i Tupana dexü na aixcüma noxrü yixīgüxüçèx

¹ Ñuxma pexna chaca rü, ¿pexcèx éxna ya Tupana rü marü nüxü naxo i norü duïxügü i Yudíugü? Tama nixi i nüxü naxoxü. Erü choma i Pauru rü Yudíu chixi. Rü Abráütanüxü chixi, rü Abráütaa ya Beyamítanüxü chixi. ² Rü nuxcümatama Tupana Yudíugümaã inaxuneta na norü duïxügü yixīgüxüçèx, rü ñuxma rü tama Yudíugüxü naxo. ¿Tama éxna nüxü pecuèx na ñuxü ñaxü ga Tupanaãrü orearü uruü ga Ería? Rü Tupanaãrü orewa nüxü tadaugü rü Ería rü Tupanapëxewa poraãcü yema Yudíugüxü nixugü. ³ Rü ñanagürü ga Ería:
 “Pa Corix, ngēma Yudíugü rü marü nanadai i curü orearü uruügu. Rü nagu napogüe i ngēma nachicagü i ngextá duïxügü cuxü ícuèxüügüxüwa. Rü chaxicatama íchayaxüächi. Rü choxü rü ta nimèxgüchaü”,
 ñanagürü ga Ería. ⁴ Natürü Tupana nanangäxü, rü ñanagürü:
 “Düçèx, choma rü marü choxü nangēxma i 7000 i yatügü i chaugüxü chidexeçixü. Rü nümagü rü taguma nüxü nicuèxüügü i ngēma tupanenetachicünèxã i Baá”,
 ñanagürü. ⁵ Rü ngëxgumarüü ta nixi i ñuxmax. Rü woo muxüma i Yudíugü tama nayaxögü, natürü nangēxma i ñuxre i Tupana namaã mecümaxügagu dexü. ⁶ Rü ñuxma na Tupana tüxü ngechaüxügagu tüxü nadexü, rü taxucürüwama texé nüxü tixu na tacü rü mexü na ixügüxügagu na yixixü. Erü ngëxguma chi tacü rü mexü ixügüxügagu yixgu na tüxü nadexü, rü natüçèxmamare chi nixi na nüxü ingechaütümüxügüxü. ⁷ ¿Rü ñuxãcü yixü i ñuxmax? Rü ngēma rümumaëxü i Yudíugü rü tama nüxü inayangaugü i ngēma maxü i naxcèx nadaugüxü. Natürü ngēma noxretama i Yudíugü i Tupana dexü, rü ngemagü nixi i nüxü iyangaugüxü. Rü guxüma ga yema togü ga Yudíugü rü Tupana ínanawogü yerü tama naga naxñü. ⁸ Rü ngëmachiga nixi i Tupanaãrü ore i ümatüxü i ñaxü:
 “Tupanatama ngēma duïxügüaxü nanaguxchaxëë. Rü ngëmacèx woo nüxü nadaugügu i ngēma ore i aixcüma ixixü, rü tama nüxü nacuèxgüéga. Rü woo nüxü naxñüégu i ngēma ore, rü tama nayaxögü. Rü ñuxma rü ta ngëmaãcü nixi”,
 ñanagürü. ⁹ Rü Dabí rü ta rü ñanagürü:
 “Rü ngēma duïxügü rü norü petacèx naxügüxü i õnagügagu rü norü muxüma i ngëmaxügügagu rü chixexügu tá nayi rü ngëmacèx tá napoxcue. ¹⁰ Rü naãëwa rü täütáma nüxü nacuèxgü, rü guxchaxügü tá nüxü nangēxma. Rü ñoma wüxi i duïxü i tacü i yaxü ípaxixürüü tá nixigü namaã i norü guxchaxügü”,
 ñanagürü.

Tupana nanamaxëxëë i ngēma tama Yudíugü ixīgüxü

¹¹ Rü pexna chaca, rü ñuxma na Cristuxü naxoexü i ngēma Yudíugü, ¿rü pexcèx éxna rü ngëmacèx ya Tupana rü tá nüxü naxoxochixü? Tama nüxü naxo. Natürü ñuxma na tama Cristuaxü yaxögüãxü i ngēma Yudíugü, rü ngëmacèx ya Tupana rü nüxü narüngüxëë

rü nanamaxēxēē i ngēma tama Yudíugü ixíngüxü. Rü ngēmaācü nanaxü ya Tupana na yaxāũxāchiexüçèx i ngēma Yudíugü, rü Cristuaxü na yaxōgüāxüçèx. ¹² Rü yema na ínatüexü ga yema Yudíugü, rü yemagagu muxüma ga togü ga duüxügü nanayauxgü ga Tupanaärü ngüxēē i taxü. Rü yema na noxretama ga Yudíugü nayaxōgüxü, rü yemagagu Tupana nanamaxēxēē ga yema tama Yudíugü ixíngüxü. Natürü ngēxguma tá Tupanacèx nawoeguxgu i guxüma i Yudíugü, rü Tupana rü tá yexeraācü nüxü narüngüxēē i guxüma i ngēma duüxügü i tama Yudíugü ixíngüxü. ¹³⁻¹⁴ Rü ñuxma Pa Duüxügü i Tama Yudíugü Ixíngüxü, rü choxü nangēxma i wüxi i ore i pemaā nüxü chixuxchaüxü. Rü dücax, petanüwa nixí i choxü namuxü ya Tupana na pemaā nüxü chixuxüçèx i norü ore. Rü ñuxma rü aixcüma meā chayanguxēē i ngēma puracü, erü chanaxwèxe na pexü nadaugüxü i ngēma chautanüxü i Yudíugü na ñuxācü Tupana pexü na rüngüxēēxü. Rü ngēmaācü tá nixāũxāchie i ñuxre i nümagü, rü tá Cristuaxü nayaxōgü, rü ngēmaācü tá nanayauxgü i maxü i taguma gúxü. ¹⁵ Nüxü tacuèx rü ngēma Yudíugü rü tama Cristuaxü nayaxōgüchaü i ñuxmax. Rü ngēmacèx ya Tupana rü nanade i ngēma togü i duüxügü i tama Yudíugü ixíngüxü. Natürü ñuxma na ngēmaācü yíixü, ¿rü ñuxācü tá nixí i ngēxguma Cristuaxü yaxōgüāgu i ngēma Yudíugü, rü wena Tupana nadexgu? Rü wüxi i mexēchixü tá nixí naxcèx i ngēma Yudíugü. Erü ñoma wüxi i duüxü i yuxü rü wenaxärü maxüxürüü tá nixíngü. ¹⁶ Rü Tupana rü wena tá nanade i ngēma Yudíugü i ngēxguma yaxōgüāgu. Rü ngēmaācü tá nixí, yerü nuxcümaācü ga nanatü ga Abráü rü Tupanaärü duüxü nixí. Rü ngēmacèx i nataagü i Yudíugü rü Tupanaärü duüxügü ta nixíngü. Rü ñoma wüxi i pāü i Tupanana ixāxürüü tá nixí. Erü ngēxguma ngēma pāüwa íraxü Tupanaärü yixígu, rü ngēmawa nüxü tacuèx na guxüma i ngēma pāü rü noxrü na yíixü. Rü ngēma wüxi i nanetü i Tupanana ixāxürüü tá nixí. Rü ngēxguma ngēma nanetüchumèxā rü Tupanaärü yixígu, rü ngēmawa nüxü tacuèx na guxüma i ngēma nanetü rü noxrü na yíixü. Rü ngēmaācü tá nixí i ngēma Yudíugümaā nangupetüxü, erü wüxi i ngunexügu rü guxüma i nümagü rü Tupanacèx tá nawoegu. ¹⁷ Tupana nüxü naxo ga yema Yudíugü ga tama yaxōgüchaüxü. Rü ñoma wüxi i orixchacüü i idaexürüü nixí ga yema Yudíugüxü naxoxü. Natürü nachicüü Tupana pexü nade woo tama Yudíugü na pixíngüxü. Rü wüxi i naixnecüçüāx i orixchacüü rü orix i toxüwa yarüñaxcuchixürüü pixíngü. Rü ñuxma i pema rü ta pexü nangēxma i pechica i natanüwa i ngēma duüxügü i Tupanaärü ixíngüxü. Rü Tupana rü pexü narüngüxēē rü pexü rü ta namaxēxēē. ¹⁸ Natürü pema i tama Yudíugü na pixíngüxü, rü tama name i pegü picuèxüü rü nüxü pixu na ngēma Yudíugüärü yexera pixíngüxü. Rü ngēxguma chi ngēmaācü pegü picuèxüügüchaügu, rü name nixí i nüxna pecuèxāchie na tama petanüwa ne naxüxü ga Cristu ya pexü maxēxēēcü, natürü Yudíugütanüwa nixí ga ne naxüxü. Rü ngēma Yudíugügagu nixí i Tupana pexü dexü rü pexü namaxēxēēxü i ñuxmax. ¹⁹ Natürü bexmana tá ñaperügügü:

“Tupana rü marü nüxü naxo ga yema Yudíugü rü yemacèx nachicüü tüxü nade”, ñaperügügü tá. ²⁰ Ngēmaācü aixcüma nixí ga Tupana nüxü oxü ga yema Yudíugü yerü tama nayaxōgü. Rü ngēma na peyaxōgüxüçèxicatama nixí i nachicüü Tupana pexü dexü i ñuxmax. Rü ngēmacèx tama name i pegü picuèxüügü. ¡Natürü pexuāégü na tama yema Yudíugüxü üpetüxürüü pexü üpetüxüçèx! ²¹ Yerü yema Yudíugü ga noxri Tupanaärü ixíngüxü, rü Tupana nüxü naxo yerü tama nayaxōgü. Rü yexguma yemaācü Tupana nüxü oxgu ga yema duüxügü rü pexü rü tá ta naxo ega tãütáma peyaxōgüechagu. ²² Dücèx, na ñuxācü namecümaxü ya Tupana. Natürü tüxü napoxcu ta ega tama aixcüma yaxōgügu. Rü nanapoxcue ga yema duüxügü ga chixexügu yixü, natürü pemaā rü namecüma. Natürü penaxwèxe i guxüguma nüma nanaxwèxexüācüma pemaxē rü peyaxōgü na guxüguma pemaā namecümaēchaxüçèx. Erü ngēxguma tama nüma nanaxwèxexüācüma pemaxēgu rü tama peyaxōgüechagu, rü tãütáma pemaā namecüma. Rü pexü rü tá ta naxo, rü tá pexü ínawogü. ²³ Natürü ngēxguma yaxōgüāgu i ngēma Yudíugü i ñuxma maxēxü, rü woo Tupana na nüxü oxü ga noxrix, natürü wena táxarü nanade erü nüxü nangēxma i

pora na wenaxārū nadeāxūcèx ega aixcūma yaxōgūāgu. ²⁴ Rū pema na tama Yudíugū na pixīgūxū, rū tama Tupanaārū duūxūgū pixīgū ga noxrix. Natürū Tupana pexū nade na noxrū pixīgūxūcèx. Rū ñuxma na yemaācū Tupana pexū dexū, rū ngēxguma yaxōgūāgu i ngēma Yudíugū, rū Tupana rū pexū nadexūārū yexera tá nūxū natauxcha na nadeāxū i ngēma Yudíugū, yerū woetama norū duūxūgūchirēx nixīgū ga noxrix.

Wūxi i ngunexū rū guxūma i Yudíugū tá nanayauxgū i maxū i taguma gūxū

²⁵ Pa Chaueneēgū i Yaxōgūxūx, nangēxma i wūxi i ore ga noxri tama duūxūgūxū nūxū nacuèxēxū ga Tupana. Natürū chanaxwèxe i nūxū pecuèx i ngēma ore na tama nagu perūxīnūēxūcèx na duūxūgū i nūxū cuèxūchixū pixīgūxū, rū pexicatama Tupana pexū dexū. Rū dūcax, noxretama nixī i ngēma Yudíugū i aixcūma yaxōgūxū. Rū ngēmaācū tá nixī ñuxmatáta yaxōgūā i guxūma i ngēma togū i duūxūgū i Tupana dexū. ²⁶ Natürū ngēmawena rū guxūtáma i Yudíugū rū tá ta nayaxōgū, rū tá nanayauxgū i maxū i taguma gūxū. Erū Tupanaārū ore i ūmatūxūwa rū ñanagūrū:

“Yima Cristu ya Ínanguxūxēcū, rū Yudíugūtanūwatama ne naxū. Rū nūma rū tá Yudíugūxū chixexūwa Ínanguxūxē. ²⁷ Rū aixcūma norū pecaduwa tá Íchananguxūxē i ngēma Yudíugū. Rū ngēxguma tá nixī na aixcūma chayanguxēxū i ngēma chorū uneta ga ūpaxūchima Abráūmaā nūxū chixuxū”,

ñanagūrū ga Tupana. ²⁸ Natürū i ñuxma ya Tupana rū Yudíugūxū nadau na norū uwanūgū yīxū erū tama nayaxōgū i ngēma ore i mexū. Natürū ngēmaācū naxūpetū na pexū natauxchaxūcèx na peyaxōgūxū i pema i tama Yudíugū na pixīgūxū. Natürū nūma ya Tupana rū ñuxma rū ta ngēma Yudíugūxū nangechaū yerū nuxcūmaūgūxū ga norū oxīgūmaā inaxuneta na nūxū tá nangūxēxū. ²⁹ Rū ngēxguma Tupana rū ūcū i mexūmaā inaxunetagu, rū aixcūma nayanguxē i ngēma, rū taguma nūxū inayarūngūma. Rū ngēxgumarū ta i ngēxguma texécèx nacaxgu, rū taguma nūxū inayarūngūma i ngēma. ³⁰ Rū pema na tama Yudíugū pixīgūxū, rū ūpa rū tama Tupanaga pexīnūē. Natürū ñuxma na tama naga naxīnūēxū i Yudíugū, rū ngēmacèx Tupanaāxū pengechaūtūmūgū erū peyaxōgū i pemax. ³¹ Rū ngēma pexū ngupetūxūrū nixī i ngēma Yudíugūxū nangupetūxū. Nūmagū rū tama Tupanaga naxīnūē i ñuxmax, natürū ngēmaācū nūxū nangupetū na Tupanaāxū pengechaūtūmūgūxūcèx, rū nūmagū rū ta Tupanaāxū nangechaūtūmūgūxūcèx i ñuxmax. ³² Yerū nūma ga Tupana rū guxūma ga duūxūgūmaā nanaxuegu na chixexūwa nangēxmagūxū nagagu ga norū pepadugū. Natürū yemaācū namaā nanaxuegu ga Tupana na nūxū nangechaūtūmūgūxūcèx i guxūma i duūxūgū. ³³ Rū namexēchi ya tórū Tupana, rū poraācūxūchima tūxū narūngūxē. Rū nūma rū nūxū nacuèxūchi erū guxūxūma nacuèx. Rū yixema rū taxucūrūwama nūxū tacuèx i tūxcūyī xū i tūxū nadexū, rū taxucūrūwama nūxū tacuèx i guxūma i ngēma naxūxū i nūmax. ³⁴ ¿Erū texé i tatanūwa nūxū tacuèx i guxūma i ngēma tórū Cori nagu ruxīnūxū? ¿Rū texé nūxū tacuèx na tórū Corixū taxucūxēxū? ³⁵ ¿Rū texé tūxira ūcū rū āmare tórū Corina taxā, na yixcama nūxī ūcūmaā tūxū nataeguxēēxūcèx? ³⁶ Erū guxūma i ūcū ingēxmaxū rū Tupanaxūtawa ne naxī. Rū nūma nixī ga naxūāxū ga guxūma na noxrū yīxūcèx. Rū name nixī i guxūguma nūxū ticuèxūgū rū tanataxē. Rū ngēmaācū yīi.

12

Pexū chacèxū na pegūtama Tupanana pexāgūxū na wūxi i āmare i maxūxū na pixīgūxūcèx

¹ Rū dūcax, Pa Chaueneēgūx, ñuxācū Tupana poraācūxūchima tamaā namecūma. Rū ngēmacèx pexū chacèxū na pegūtama Tupanana pexāgūxū na wūxi i āmare i maxūxū na pixīgūxūcèx. Rū ngēma āmare nixī i aixcūma napēxewa ūūnēxū rū namaā nataāēxū. Rū ngēmaācū nixī ya Tupana i nanaxwèxexū na nūxū picuèxūgūxū. ² Rū tama name i ñoma i naānecūāx i duūxūgūcūmagu pexī. Natürū name nixī i Tupanana pegū pexāgū na

nūma pexŭ naxŭchicŭxŭcèx rŭ ngexwacaxŭxŭ i peã pexŭ ngèxmaxŭcèx rŭ ngèmaãcŭ naxcèicatama pemaxèxŭcèx. Rŭ ngèmaãcŭ tá nŭxŭ pecuèx i tacŭ nixŭ i Tupana pexŭ naxwèxexŭ na penaxŭxŭ, rŭ tacŭ nixŭ i aixcŭma mexŭ i napèxewa, rŭ tacŭ nixŭ i namaã nataãèxŭ. ³ Rŭ Tupana ya chomaã mecŭmacŭ, rŭ choxŭ namu na pemaã nŭxŭ chixuxŭcèx i guxãma i pema na tama namexŭ na texé i petanŭwa tŭgŭ írŭtaxŭ rŭ tŭgŭgu tarŭxŭnŭxŭ na togŭarŭ yexera tiŭxŭ. Natŭrŭ name nixŭ na wŭxichigŭ meã tŭgŭ ngugŭarŭ maxŭãxŭ rŭ tŭgŭgu rŭxŭnŭxŭ na ñuxãcŭ Tupana tŭxna naxãxŭ i tŭmaãrŭ cuèx wŭxigu namaã i tŭmaãrŭ ō. ⁴ Rŭ dŭcax, rŭ taxŭnewa nangèxma i taeru rŭ tachacŭgŭ rŭ taparagŭ rŭ muxŭma i to i taxŭneãrŭ ngèmaxŭgŭ. Rŭ wŭxichigŭ i ngèma taxŭneãrŭ ngèmaxŭgŭ rŭ nŭxŭ nangèxma i noxrŭtama puracŭ. ⁵ Rŭ ngèxgumarŭ ta i yixema na yaxŭgŭxŭ, rŭ woo na imuxŭ natŭrŭ wŭxitama i duŭxŭgŭ tixŭgŭ, erŭ Cristuarŭ duŭxŭgŭ tixŭgŭ. Rŭ ngèmacèx i guxãma i yixema rŭ yigŭmŭcŭgŭ tixŭgŭ, erŭ woetama wŭxitama i duŭxŭgŭ tixŭgŭ. ⁶ Rŭ wŭxichigŭ i yixema, rŭ Tupana tŭxna nanaxã i tŭrŭ cuèx i nŭma nanaxwèxexŭ na tŭxŭ nangèxmaxŭ. Rŭ tanaxwèxe i meãma nagu taxŭ i ngèma cuèx i Tupana tŭxna ãxŭ. Rŭ ngèxguma tŭxna naxããgu i tŭrŭ cuèx na norŭ orearŭ uruŭ ixŭgŭxŭcèx, rŭ name nixŭ i ngèma ō i tŭxŭ ngèxmaxŭmaã tanaxŭ i ngèma puracŭ. ⁷ Rŭ ngèxguma tŭxna naxããgu i tŭrŭ cuèx na togŭxŭ rŭngŭxèègŭxŭcèx, rŭ name nixŭ i meãma tanaxŭ i ngèma. Rŭ ngèxguma texéna naxããgu i tŭmaãrŭ cuèx na togŭxŭ tangŭexèèxŭcèx, rŭ name nixŭ i meãma tanaxŭ i ngèma. ⁸ Rŭ yixema nŭxŭ cuáxe na Tupanaãrŭ oremaã togŭxŭ tataãèxèèxŭ, rŭ name nixŭ i meãma tanaxŭ i ngèma. Rŭ yixema nŭxŭ cuáxe na togŭmaã tangauxŭ i tŭmaãrŭ ngèmaxŭ, rŭ name nixŭ i tŭmaãrŭ ngŭchaŭmaã tanaxŭ i ngèma. Rŭ yixema ãèxgacŭ ixŭxè rŭ name nixŭ i meãma tayanguxèè i ngèma puracŭ. Rŭ yixema nŭxŭ cuáxe na togŭ tŭxŭ ngèchaŭtŭmŭgŭxŭ, rŭ name nixŭ i taãèãcŭma tanaxŭ i ngèma.

Ñuxãcŭ nanaxwèxe na namaxèxŭ i duŭxŭgŭ i Cristuaxŭ yaxŭgŭxŭ

⁹ Rŭ name nixŭ i aixcŭma meãma pegŭ pengechaŭgŭ i wŭxichigŭ. ¡Rŭ nŭxŭ pexo i guxŭma i tacŭ i chixexŭ ixŭxŭ! ¡Rŭ nagu pexŭ i ngèma aixcŭma mexŭ ixŭxŭ! ¹⁰ Rŭ name nixŭ i wŭxichigŭ pegŭ pengechaŭgŭ, ñoma pegŭeneèxŭchixŭ pengechaŭxŭrŭrŭ. Rŭ name nixŭ i naxcèx pedaugŭ na ñuxãcŭ peeneègŭxŭ petaxèèxŭ rŭ ñuxãcŭ pegŭ perŭngŭxèèxŭ. ¹¹ Rŭ tama name i cuxo ega tacŭ rŭ puracŭ cuxŭ namuxgu ya tŭrŭ Cori. Natŭrŭ name nixŭ i curŭ ngŭchaŭmaã cunaxŭ i norŭ puracŭ. ¹² Rŭ name nixŭ i petaãègŭ erŭ ipenanguxèè na Tupanaxŭtawa pengugŭxŭ. Rŭ ngèxguma tacŭ rŭ ngŭxŭ pexŭ ngupetŭgu, rŭ name nixŭ i yaxna namaã pexŭnŭè. ¡Rŭ tama name i nŭxŭ perŭchaue na peyumŭxègŭxŭ! ¹³ Rŭ ngèxguma nŭxŭ pedèuxgu na tacŭ nŭxŭ taxuxŭ i ngèma togŭ i yaxŭgŭxŭ, rŭ name nixŭ i nŭxŭ perŭngŭxèè. ¡Rŭ meã penayaxu i ngèma duŭxŭgŭ i pexŭtagu naxŭãnexŭ! ¹⁴ Rŭ ngèxguma chi texé chixri pemaã ŭpetŭgu, rŭ name nixŭ i tŭmacèx peyumŭxègŭ na meã tŭxŭ naxŭpetŭxŭcèx. Rŭ ngèmaãcŭ name nixŭ i Tupanana tŭmacèx peca na tŭxŭ nangŭxèèxŭcèx rŭ tama tŭxŭ napoxcuxŭcèx. ¹⁵ ¡Rŭ wŭxigu tŭmamaã petaãègŭ ya yixema taãègŭxe! ¡Rŭ wŭxigu tŭmamaã pexauxe ya yixema ngechaŭgŭxe rŭ auxexe! ¹⁶ ¡Rŭ meã pegŭ pengechaŭgŭ i wŭxichigŭ! ¡Rŭ tama pegŭ picuèxŭgŭ! ¡Rŭ namaã pegŭ pewŭxiguxèè i ngema tama nŭgŭ icuèxŭgŭxŭ! ¡Rŭ tama pegŭgu perŭxŭnŭè na togŭarŭ yexera nŭxŭ cuèxŭchigŭxŭ na pixŭgŭxŭ! ¹⁷ Rŭ ngèxguma texé chixexŭ pemaã ŭxgux, ¡rŭ tãŭtãma chixexŭmaã pexŭtanŭ! Natŭrŭ name nixŭ i naxcèx pedau na mexŭ pexŭxŭ i guxŭ i duŭxŭgŭpèxewa. ¹⁸ ¡Rŭ naxcèx pedau na guxŭma i duŭxŭgŭmaã meã pemaxèxŭ rŭ namaã na iperŭngŭxmŭxŭcèx i guxŭguma! ¹⁹ Pa Chaueneègŭ ya Pexŭ Changechaŭgŭxe, tama name i pegŭtama pexŭtanŭ ega texé tacŭ rŭ chixexŭ pemaã ŭxgu. Natŭrŭ name nixŭ i Tupanamèxègu penaxŭ i ngèma na nŭma napoxcuãxŭcèx. Erŭ Tupanaãrŭ ore i ŭmatŭxŭwa rŭ ñanagŭrŭ:

“Rŭ choxmèxwa nangèxma na duŭxŭgŭxŭ chapoxcuxŭ i norŭ chixexŭcèx. Rŭ choma tá nŭxŭ chanaxŭtanŭ i ngèma duŭxŭ i chixexŭ ŭxŭ”,

ñanagürü ya tórü Cori. ²⁰ Rŭ ngëxguma tacü rŭ chixexŭ cumaã naxŭxgu i togü, rŭ tama name i chixexŭmaã cunataeguxëë. Natürü name nixŭ i nagu quixŭ i Tupanaärü ore i ñaxŭ,

“Rŭ ngëxguma curü uwanü taiyèxgu, jrŭ nachibŭxëë! Rŭ ngëxguma yařawaxgu, jrŭ naxaxexëë! Erü ngëxguma ngëmaãcü cunaxŭxgu, rŭ poraãcü tá cunaxãnexëë”, ñaxŭ. ²¹ Rŭ ngëxguma togü chixexŭ cumaã ŭxgux, rŭ name nixŭ i cuxuãë na tama chixexŭgu cunguxücèx. Rŭ name nixŭ na mexŭ cuxŭxŭ namaã i ngëma duŭxŭ. Rŭ ngëmaãcü tá icuyanaxoxëë i ngëma chixexŭ i cumaã naxŭxchaŭxŭ.

13

¹ Rŭ name nixŭ i guxŭma i duŭxŭgü rŭ meã nórü ãëxgacüga naxŭnŭë. Erü Tupana nixŭ ya nüxŭ unetacü i guxŭma i ãëxgacügü. Erü nataxuma i ãëxgacü i tama Tupana ingucuchixëëxŭ. ² Rŭ ngëmacèx, texé ya tama tŭmaärü ãëxgacüga ñnŭchaŭxë, rŭ Tupanaga nixŭ i tama taxŭnŭxŭ. Rŭ yŭxema tama naga ñnŭchaŭxë, rŭ tá tapoxcue.

³ Erü ngëma ãëxgacügü rŭ tama ngëma mexŭ ŭgŭxŭärü poxcuruŭ nixŭ, natürü ngëma chixexŭ ŭgŭxŭärü poxcuruŭ nixŭ. Rŭ ngëxguma cunaxwèxegu na tama nüxŭ cumuŭxŭ i wŭxi i ãëxgacü, rŭ name nixŭ i meã cumaxŭ. Rŭ nŭma i ãëxgacü rŭ tá cumaã nataãë.

⁴ Erü nŭma i ãëxgacü rŭ Tupanaärü ngŭxëëruŭ nixŭ rŭ ngëmacèx nanamu na cuxŭ nangŭxëëxücèx. Natürü ngëxguma chixri cumaŭxgu, rŭ ngëxguma tá waxi nixŭ i nüxŭ cumuŭxŭ. Erü nŭma i ãëxgacü rŭ tama natücèxma nixŭ na nüxŭ nangëxmaxŭ i pora na cuxŭ napoxcuxŭ. Erü woetama Tupana nanamu na napoxcuãxücèx i ngëma duŭxŭ i chixri maxŭxŭ.

⁵ Rŭ ngëmacèx name nixŭ i naga cuxŭnŭ i curü ãëxgacügü. Rŭ tama ngëma poxcuxŭ na cumuŭxŭcèxicatama nixŭ i namexŭ na naga cuxŭnŭxŭ, natürü name nixŭ i naga cuxŭnŭ erü marü nüxŭ cucuèx na namexŭ i ngëma. ⁶ Rŭ ngëmacèx name nixŭ i meã nüxŭ penaxŭtanü i ngëma dŭëru i perü ãëxgacügücèx ixŭxŭ i ngëma nŭmagü nagu naxunetaxŭëxpŭx na nüxŭ penaxŭtanŭxŭcèx. Erü ngëma ãëxgacügü rŭ Tupanaãxŭ nixŭ i napuracüexŭ i ngëxguma naxŭãgu i ngëma puracü na pemaã inacuáxŭ.

⁷ Rŭ wŭxichigü i ngëma ãëxgacügü, rŭ name nixŭ i nüxna penaxã i ngëma nüxna ŭxŭ. jrŭ nüxŭ penaxŭtanü i ngëma dŭëru i perü ãëxgacügü nagu unetaxŭëxpŭx na nüxŭ penaxŭtanŭxŭ! jrŭ penaxŭx i ngëma ñãneärü puracü i perü ãëxgacügü pexŭ muxŭ na penaxŭxücèx! jrŭ nüxŭ pengechaŭgü rŭ naga pexŭnŭë i ngëma perü ãëxgacügü! Erü ngëmaãcü nixŭ i namexŭ na penaxŭxŭ.

⁸ Rŭ tama name i texéaxŭ tacü pengetanü. Natürü nangëxma i wŭxitama i ngetanü i taguma tŭxŭ ingutanŭxŭ. Rŭ ngëma nixŭ na yigü ingechaŭgŭxŭ. Rŭ ngëmacèx ya yŭxema aixcŭma tŭmamücŭxŭ ngechaŭxë rŭ marü tayanguxëë i guxŭma i ngëma Tupana tŭxŭ muxŭ. ⁹ Rŭ ñanagürü i Tupanaärü mugü:

“jrŭ tãütáma naŭ i ngemaã icupe! jrŭ tãütáma cumáëta! jrŭ tãütáma cungŭx! jrŭ tãütáma toguãxãrŭ ngëmaxŭ cuxŭ nangŭchaŭ!”

ñanagürü. Natürü ngëma mugü rŭ guxŭma i togü i Tupanaärü mugümaã rŭ wŭxigu nanu nagu i norü ore i ñaxŭ:

“jrŭ nüxŭ nangechaŭ i cumücü na cugŭtama cungechaŭxŭrŭü!”

ñaxŭ. ¹⁰ Rŭ yŭxema tŭmamücŭxŭ ngechaŭxë, rŭ taxuŭma i chixexŭ namaã taxü. Rŭ ngëmacèx i ngëxguma tamücŭxŭ ingechaŭgu, rŭ aixcŭma tayanguxëë i Tupanaärü mugü.

¹¹ Rŭ name nixŭ i tanaxü i guxŭma i ngëma, erü ñomaŭcüü rŭ nangëxma i muxŭma i guxchaxŭgü. Rŭ name nixŭ i pegü ípemexëë rŭ paxa penaxü i tórü Coriarü puracü. Erü ñuxma rŭ noxri yaxŭgŭguarü yexera ningaicamachigü i ngëma ngunexŭ i nagu tá taxcèx nataeguxŭ ya tórü Cori. ¹² Rŭ woo na naporaxŭ i Chataná i ñoma i naãnewa i ñuxmax, natürü paxa tá nagux i ngëma, rŭ paxa tá ñangu ya Cristu na nügŭxŭtawa tŭxŭ nagagŭxücèx. Rŭ ngëmacèx name nixŭ i nüxŭ tarŭxoe i guxŭma i chixexŭ ixŭgŭxŭ. Rŭ ñuxma na nüxŭ icuáxŭ i Tupanaärü ore, jrŭ ngŭxã yigŭna tadaugü na tama nagu iyixŭcèx i tacü rŭ chixexŭgü! jrŭ ngŭxã meã tamaxë na ngëmaãcü nüxŭ rŭyexeragŭxŭcèx i guxŭma

i chixexũ! ¹³ ĴRũ ngĩxã mexũ taxũgũ rũ meã tamaxẽ! Erũ aixcũma Cristuarũ duũxũgũ tixĩgũ, rũ tanaxwèxe i nũma nanaxwèxexũãcũma tamaxẽ. Rũ tama name na ingãxẽxũ rũ na naxũgũxũ i petagũ i chixexũ i duũxũgũ nawa ãũgatanũxũ. Rũ tama name i tingẽãẽmare rũ ěxna to i chixexũ taxũgũ, rũ bai na yigũ ichoxũgagũxũ, rũ bai i togũchi ixaixũ naxcèx i norũ ngẽmaxũgũ. ¹⁴ Natũrũ name nixĩ i nacũmagu pexĩ ya tórũ Cori ya Ngechuchu ya Cristu, rũ nũxna naxcèx peca na pexũ nangũxẽẽxũcèx na meã naxcèx pemaxẽxũcèx. Rũ tama name i naxcèx pedaugũ na ñuxãcũ pexeneãrũ ngũchaũ na pexũgũxũ.

14

Tama name i nũxũ quixu i cueneẽ i yaxõxũ

¹ Rũ ngẽxguma petanũgu naxãxchaũgu i wũxi i peeneẽ i tama perũũ meã Tupanaãrũ orexũ cuáxũ, rũ name nixĩ i meã penayaxu. Natũrũ tama name i namaã pegũ pechoxũga naxcèx i nacũmagũ i nagu yaxũxũ i Tupanapẽxewa. ² Rũ dũcax, nangẽxma i ñuxre i taeneẽgũ i nagu rũxĩnũẽxũ na namexũ na guxũraũxũ i õna nangõxgũxũ. Natũrũ nangẽxma i togũ i taeneẽgũ i tama aixcũma meã Tupanaãrũ orexũ cuẽxgũxũ i tama namachi ngõxgũchaũxũ. Rũ nũmagũ nũxũ nacũxgũgu rũ Tupanapẽxewa nachuxu na tacũ rũ namachi nangõxgũxũ, rũ ngẽmacèx nixĩ i nabũ rũ orĩxgũxicatama nangõxgũxũ. ³ Rũ ngẽxguma tangẽxmagu ya texé ya namachi ngõxẽ, rũ tama name i nũxũ taxoox i ngẽma togũ i duũxũgũ i tama namachi ngõxgũxũ. Rũ ngẽxgumarũũ ta ya yĩxema tama namachi ngõxẽ, rũ tama name na nũxũ tixuxũ i ngẽma duũxũgũ i namachi ngõxgũxũ, erũ nũmagũ rũ ta Tupanaãrũ duũxũgũ nixĩgũ. ⁴ ĴRũ texé quixĩ i cuma rũ ngẽmacèx nũxũ quixu i to i coriarũ duũxũgũ? Rũ dũcax, pemaã nũxũ chixu rũ ngẽma norũ cori tá nixĩ i nangugũxũ rũ ngoxi mexũ naxũx i ngẽma norũ duũxũ, rũ ěxna tama. Rũ ngẽma duũxũ rũ Tupanapẽxewa rũ tá name, erũ nũma ya tórũ Cori ya Cristu rũ nũxũ nangẽxma i pora na nũgũcèx namexẽẽãxũ i ngẽma duũxũ. ⁵ Rũ dũcax, nangẽxma i ñuxre i duũxũgũ i nagu rũxĩnũẽxũ na ngũxchigaarũ ngunexũ rũ togũ i ngunexũãrũ yexera namexũ na nagu Tupanaxũ yacuèxũũgũxũ. Rũ nangẽxma i togũ i duũxũgũ i nagu rũxĩnũẽxũ na guxũma i ngunexũgũ rũ nawũxiguxũ i Tupanapẽxewa. Natũrũ wũxichigũ i yixema rũ tanaxwèxe i meã taãẽwa nũxũ tacuèx na aixcũma Tupanapẽxewa namexũ i ngẽma taxũxũ rũ tixõxũ. ⁶ Rũ yĩxema duũxẽ ya tacũ rũ ngunexũ Tupanacèx íxũxũchixe, rũ ngẽmaãcũ tanaxũ na ngẽma ngunexũgu tórũ Corixũ ticuèxũũxũcèx. Rũ yĩxema namachi ngõxẽ, rũ ngẽmaãcũ tanangõx na tórũ Corixũ ticuèxũũxũcèx, rũ Tupanana moxẽ taxã naxcèx i ngẽma tangõxũ. Rũ yĩxema tama namachi ngõxẽ, rũ ngẽmaãcũ tanaxũ na tórũ Corixũ ticuèxũũxũcèx, rũ tũma rũ ta Tupanana moxẽ taxã naxcèx i ngẽma nabũ i tangõxũ. ⁷ Rũ ñuxma na ñoma i naãnewa imaxẽxũ, rũ taxúema tũgũcèxtama tamaxũ rũ ěxna tũgũcèxtama tayu. ⁸ Erũ ñuxma na imaxẽxũ, rũ tórũ Coriarũ ngũchaũ na ixũgũxũcèx nixĩ i imaxẽxũ. Rũ ngẽxguma iyuegu, rũ ngẽma rũ ta tórũ Corimẽxẽwa nangẽxma. Rũ ngẽmaãcũ nũxũ tadau rũ woo imaxẽgu rũ ěxna woo iyuegu, rũ tórũ Coriarũ duũxũgũ tixĩgũ, rũ namẽxwa tangẽxmagũ. ⁹ Rũ yemacèx nixĩ ga nayuxũ ga Cristu rũ wenaxãrũ namaxũxũ na tũmaãrũ Cori yĩxũcèx ga guxãma ga guxema yaxõgũxe ga marũ yuexe rũ guxãma ya yĩxema yaxõgũxe ya ñuxma rũ ta maxẽxẽ. ¹⁰ Rũ ngẽmacèx Pa Chaueneẽx, Ĵrũ tũxcũũ i nũxũ quixuxũ i cueneẽ i yaxõxũ? Rũ cumax, Pa To i Chaueneẽx, Ĵrũ tũxcũũ i nũxũ cuxoxũ i cueneẽ? Erũ guxãtãma i yixema rũ Tupanapẽxewa tá tangugũ na nũma tũxũ nangugũxũcèx rũ ngoxi ime rũ ěxna tama. ¹¹ Erũ Tupanaãrũ ore i ùmatũxũwa rũ ñanagũrũ ya tórũ Cori:

“Ngẽma aixcũma na chamaxũxũrũũ tá ta nixĩ i aixcũma guxũtãma i duũxũgũ chopẽxegu caxãpũxũgũxũ, rũ guxũtãma choxũ icuèxũũgũxũ”, ñanagũrũ. ¹² Rũ ngẽmaãcũ nũxũ tacuèx na wũxichigũ i yixema rũ aixcũma tá Tupanapẽxewa na ingugũxũ na namaã nũxũ ixuxũcèx na ñuxãcũ imaxẽxũ rũ tacũ na íxũxũ.

Tama name i chixexūgu cunanguxēē i cueneē i yaxōxū

¹³ Rū ngēmacèx nixī, Pa Chaueneēgūx, i tama namexū na tamüçügūxū ixuechaū. Natürü narümemaē nixī i nüxū perüxoe i guxūma i tacü i peeneēgūxū pecadugu yixēxū rü ēxna norü õxū chixexēxū. ¹⁴ Choma nüxū chacuèx rü nataxuma i õna i Tupanapēxewa chixexū. Rū aixcūmaxūchi nüxū chacuèx i ngēma erü tórü Cori ya Ngechuchu ya Cristuarü duūxū chixī, rü nüma choxū nüxū nacuèxēē i ngēma. Natürü ngēxguma chi texé nagu rüxīnūgu na tama Tupanapēxewa namexū i tacü rü õna na tangōxū, rü name nixī i noxtacūma tama na tanangōxū ega nagu tarūxīnūgu na tama namexū i ngēma. ¹⁵ Rū ngēxguma ngēma cungōxūcèx tūmaāēwa cunanguxēēgu ya cueneē, rü cumaā nüxū chixu rü tama aixcūma tūxū cungechaū. Rū tama name i ngēma cungōxūgagu chixexūgu tūxū cunguxēē rü tūxū icuyarūtauxēē ya yixema cueneē ya Cristu tūmacèx yuxe. ¹⁶ Rū ngēmacèx, woo cuxcèx namexgu i ngēma cuxūxū, natürü tama name na cunaxūamaxū ega ngēmacèx togü tá cuxū ixuxgu na pecadu yīxū i ngēma cuxūxū. ¹⁷ Rū ngēma Tupanapēxewa na imexūcèx rü tama tacü rü õna na ingōxū rü ēxna tacü rü axexū na ixaxūxūgagu nixī. Natürü napēxewa na imexūcèx rü tanaxwèxe i Naāē i Üünexūārü ngūxēēmaā meā tayanguxēē i ngēma Tupana naxwèxexū rü yigūmaā itarüngūxmüē rü aixcūma tataāēgü napēxewa ya Tupana. ¹⁸ Rū yixema ngēmaācū Cristucèx maxūxē, rü Tupana rü tūmamaā nataāē, rü guxūma i duūxūgü rü ta tūmamaā nataāēgü. ¹⁹ Rū ngēmacèx, jngīxā naxcèx tadaugü i guxūma i nacūma i mexū i yigūmaā tūxū rüngūxmüēxēxū! ¡Rū ngīxā yigü tarüngūxēē na yexeraācū iyaexūcèx i tórü õwa rü Tupanaārü orewa! ²⁰ Rū tama name i tacü rü õna na cungōxūgagu icuyanax-oxēē i Tupanaārü puracü i cueneēārü maxūwa. Rū aixcūma nixī i guxūma i õnagü i namexū i Tupanapēxewa. Natürü wūxi i chixexū nixī ega ngēma õna i ingōxūgagu chixexūgu nayixēēgu i taeneēgü. ²¹ Rū ngēmacèx tama name i cunangōx i namachi, rü ēxna cuyaxaxū ya binu, rü ēxna cunaxū i tacü i to, ega ngēmagagu chixexūgu cunanguxēēgu i cueneē i yaxōxū. ²² Rū ngēxguma cuma nagu curūxīnūgu na namexū na cunangōxū i ngēxūrūxūmare i õna, rü Tupanapēxewa rü name nixī i cuxicatama nüxū cucuèx i ngēma. Rū tataāē ya yixema tūmaāēwa nüxū cuáxe na Tupanapēxewa namexū i ngēma taxūxū. ²³ Natürü ngēxguma wūxie nagu rüxīnūgu na tama namexū i Tupanapēxewa na tacü rü õna na tangōxū, rü pemaā nüxū chixu rü chixexū taxū ega tanangōxomagü, erü tūmaāēwa nagu tarūxīnū na tama aixcūma namexū i ngēma taxūxū. Rū guxūma i ngēma tūmaāēwa nagu tarūxīnūxū na nachixexū rü aixcūma pecadu taxū ega tanaxūamagu.

15

Name nixī i cumüçüxū cutaāxēxēē

¹ Rū yixema na iporaexū i tórü õwa, rü name nixī i nüxū tarüngūxēē i ngēma tamüçügü i turaexū i norü õwa. Rū tama name i yigüguxicatama tarūxīnūē rü tóxrücèxicatama tadaugü. ² Natürü wūxichigü i yixema rü name nixī i taeneēāxū tanangūchaūxēē na ngēmaācū nüxū rüngūxēēxūcèx na yexeraācū yaxōxūcèx. ³ Yerü woo ga Cristu rü tama noxrütama ngūchaū naxū. Natürü nayanguxēē ga yema Tupanaārü ore ga ñaxū: “Pa Chaunatūx, rü ngēma duūxūgü i cumaā guxchigagūxū, rü chomaā nixī i naguxchigagūxū”, ñaxū. ⁴ Rū guxūma ga yema nuxcūma ümatūxū ga Tupanaārü orewa, rü naxūmatü na tūxū nanguxēēxūcèx na taguma nüxū rüxoexū ega woo tacü rü guxchaxū tūxū üpetügu. Rū yema Tupanaārü ore rü naxūmatü na tūxū nataāēxēēxūcèx rü tūxū nüxū nacuèxēēxūcèx na aixcūma Tupanaārü ixīgūxū. ⁵ Rū Tupana nixī ya tūxū rüngūxēēcū na yaxna namaā ixīnūēxūcèx i guxūma i guxchaxūgü. Rū nüma nixī i tūxū nataāēxēēxū. Rū chanaxwæe i nüma ya Tupana pexū narüngūxēē na aixcūma ngēma Cristu pexū naxwæexūācūma pemaxēxū. ⁶ Rū chanaxwèxe na ngēmaācū pemaxēxū na guxāma i

pema rü wüxigu nüxŭ picuèxüügüxŭcèx ya Tupana ya Nanatü ya tórü Cori ya Ngechuchu ya Cristu.

Duŭxŭgü i tama Yudíugü ixíguŭmaã nüxŭ nixü i ore i mexŭ

⁷ Rü ngēmacèx, yema Cristu pexŭ na dexŭrŭŭ rü name nixŭ i wüxichigü meã pegü peyaxu na ngēmaãcü Tupanaxŭ yacuèxüügüxŭcèx i duŭxŭgü. ⁸ Rü pemaã nüxŭ chixu rü Cristu núma naxŭ na Yudíugüxŭ yanangŭxēxŭcèx, na yemaãcü yanguxēēxŭcèx ga yema uneta ga nuxcūmaŭgüxŭ ga tórü oxigūmaã nüxŭ yaxuxŭ ga Tupana. Rü yemaãcü ga Cristu rü tüxŭ nüxŭ nadauxēē na aixcūmacü na yŭxŭ ya Tupana rü aixcūma yanguxēēxŭ i ngēma norü uneta. ⁹ Rü yexgumarŭŭ ta ga Cristu rü núma naxŭ naxcèx i ngēma duŭxŭgü i tama Yudíugü ixíguŭxŭ na nümagü rü ta Tupanaxŭ yacuèxüügüxŭcèx naxcèx na poraãcü Tupanaãxŭ nangechaŭtümŭgüxŭ. Rü yemachiga nixŭ ga yema Tupanaãrŭ ore ga Dabí ũmatŭxŭ ga ñaxŭ:

“Rü ngēmacèx guxŭ i nachiŭñecŭĀx i duŭxŭgüpēxewa tá cuxŭ chicuèxüŭ. Rü tá chorü wŭyaewa cuxŭ chataxēē”,

ñaxŭ. ¹⁰ Rü toxnamana i Tupanaãrŭ ore i ũmatŭxŭwa rü ñanagŭrŭ:

“Pa Duŭxŭgü i Tama Yudíugü Ixíguŭxŭ, rü name nixŭ i pema rü wüxigu chorü duŭxŭgü i Yudíugūmaã petaãgŭ”,

ñanagŭrŭ. ¹¹ Rü toxnamana, rü ñanagŭrŭ ta:

“Pa Duŭxŭgü i Tama Yudíugü Ixíguŭxŭ, rü name nixŭ i nüxŭ picuèxüügü ya tórü Cori. Rü Pa Guxŭma i NachiŭñecŭĀx i Duŭxŭgüx, rü name nixŭ i penataxēē”,

ñanagŭrŭ. ¹² Rü Ichaxía rü ta nanaxŭmatü rü ñanagŭrŭ:

“Rü Dabí nanatü ya Ichaíwa tá ne naxŭ i wüxi i nataa i tá Cristu ixíxŭ. Rü nüma tá nixŭ i norü ãēxgacü yŭxŭ i guxŭma i ngēma duŭxŭgü i tama Yudíugü ixíguŭxŭ. Rü ngēma duŭxŭgü rü tá aixcūma nüxŭ nayaxōgü rü tá ínananguxēēgü na yimagagu Tupana nüxŭ rŭngŭxēēgüxŭ”,

ñanagŭrŭ. ¹³ Rü ñuxma i pema na nüxŭ peyaxōgüxŭ rü chanaxwèxe i poraãcü pexŭ nataãxēē ya yima Tupana ya pexŭ rŭngŭxēēcü na meã Cristuxŭ ípenanguxēēgüxŭcèx. Rü ngēmaãcü i Tupanaãē i Ũnèxŭ rü tá pexŭ naporaexēē na yexeraãcü Cristuxŭ ípenanguxēēgüxŭcèx. ¹⁴ Pa Chaueneēgüx, meãma nüxŭ chacuèx na guxŭ i duŭxŭgūmaã pemecūmaxŭ, rü aixcūma Tupanaxŭ na pecuáxŭ, rü aixcūma meãma pegü pixucuxēgüxŭ. ¹⁵ Natŭrŭ ñaã poperawa rü meãma pexcèx chanaxŭmatü i ñuxre i Tupanaãrŭ ucuxēgü, erü tama chanaxwèxe i nüxŭ ipeyarŭngūmaē. Rü tama chamuŭ na pexcèx chanaxŭmatŭxŭ i ngēmachiga yerü Tupana nixŭ ga choxŭ mucü na pemaã nüxŭ chixuxŭcèx. ¹⁶ Rü nüma nixŭ ga choxŭ namuxŭ na Ngechuchu ya Cristuarü puracü chaxŭxŭcèx i natanŭwa i ngēma duŭxŭgü i tama Yudíugü ixíguŭxŭ. Rü ngēma puracü ga nawa choxŭ namuxŭ nixŭ na ngēma duŭxŭgūmaã nüxŭ chixuxŭ i ore i mexŭ na Tupanaxŭtawa chanagagüxŭcèx, na wüxi i ãmare i Tupana namaã taãxŭ i ngēma duŭxŭgü i Naã i Ũnèxŭ imexēēgüxŭ. ¹⁷ Rü ñuxma na Ngechuchu ya Cristuarü duŭxŭ na chíxŭ, rü ngēmacèx chataãē namaã i ngēma puracü i Tupanaãxŭ chaxŭxŭ. ¹⁸⁻¹⁹ Rü ñuxma rü yema Cristu chorü maxŭwa ũxŭchigaxŭxŭcatama nixŭ i chixuxŭ. Rü nüma nixŭ ga choxŭ nangŭxēēxŭ na Tupanaxŭtawa chanagagüxŭcèx ga yema duŭxŭgü i tama Yudíugü ixíguŭxŭ, na nümagü rü ta Tupanaga naxŭñüxŭcèx. Rü yemaãcü chorü oremaã, rü chorü puracūmaã, rü cuèxruŭgü ga taxŭ ga Tupana ũxŭmaã, rü Naã i Ũnèxŭãrŭ poramaã Tupanaxŭtawa chanagagü ga yema duŭxŭgü. Rü yemaãcü Yerucharéŭwa rü guxŭwama ñuxmata Ilíricuarü naãnewa meãma chayanguxēē na nüxŭ chixuxŭ ga yema ore i tüxŭ maxēxēēxŭ i Cristuchiga. ²⁰ Rü yemaãcü chapuracü na nüxŭ chixuxŭcèx ga Tupanaãrŭ ore i mexŭ ga ngextá taguma ñuxgu Cristuchigaxŭ ínaxŭñüxŭwa ga duŭxŭgü. Yerü tama chanaxwèxe ga marü togü nüxŭ íxuxŭwa rü duŭxŭgü marü nüxŭ ícuáxŭwa

nüxŭ na chixuxŭ ga yema ore. ²¹ Rŭ yemachiga nixŭ ga Tupanaârŭ ore ga Ichaxía ũmatŭxŭ ga ñaxŭ:

“Rŭ yíxema taguma Cristuchigaxŭ cuèxgŭxe, rŭ taguma nachigaxŭ ñnŭèxè, rŭ tá nüxŭ tacuèxgŭ i nachiga”,
ñaxŭ.

Pauru rŭ Dumawa naxŭxchaŭ

²² Rŭ yema toxnamana na chapuracŭxŭcèx nixŭ ga taxucŭrŭwa petanŭwa chaxŭxŭ woo muèxpŭxcŭnachirèx yéma chaxŭxchaŭ. ²³ Natŭrŭ ñuxma na marŭ chanaguxèèxŭ i ngèma puracŭ i toxnamana, rŭ nagu charŭxŭnŭ na petanŭwa chaxŭxŭ. Yerŭ ñuxgumamatama nixŭ ga nagu charŭxŭnŭèchaxŭ na petanŭwa chaxŭxchaŭxŭ. ²⁴ Rŭ ngèxguma Españawa chaxŭxgu, rŭ nagu charŭxŭnŭ na woe pexŭtagu íchidaxŭ. Rŭ nagu charŭxŭnŭ na ñuxre i ngunexŭ ngèxma petanŭgu charŭxŭxŭ. Rŭ wŭxi i chorŭ taãè tá nixŭ i ngèma. Rŭ ngèmawena rŭ chanaxwèxe i choxŭ perŭngŭxèè na Españawa chaxŭxŭcèx. ²⁵ Natŭrŭ i ñuxma rŭ Yerucharéŭwa tá chaxŭ, na ngema chanangexŭcèx i ñuxre i díeru naxcèx i taeneègŭ i ngema ngèxmagŭxŭ. ²⁶ Erŭ ngèma taeneègŭ i yaxŭgŭxŭ i Machedóniãñewa rŭ Acayaanewa ngèxmagŭxŭ, rŭ norŭ ngúchaŭmaã nagu narŭxŭnŭè na ngŭxŭ nanutaquèxegŭxŭ i ñuxre i díeru na ngèmaãcŭ nüxŭ nangŭxèègŭxŭcèx i taeneègŭ i nüxŭ nataxuxŭ i Yerucharéŭwa ngèxmagŭxŭ. ²⁷ Rŭ ngèma taeneègŭ i Machedóniãcŭŭax rŭ Acayacŭŭax rŭ norŭ me nixŭ na ngèmaãcŭ naxŭgŭŭaxŭ. Rŭ ngèma duŭxŭgŭ rŭ aixcŭma nüxŭ nangèxma i norŭ ngetanŭ i taeneègŭ i Yudíugŭtanŭwa. Erŭ ngèma taeneègŭ i Yudíugŭgagu nixŭ i ngèma togŭ i duŭxŭgŭtanŭwa nanguxŭ i Tupanaârŭ ore. Rŭ ñuxma rŭ name nixŭ i ngèma togŭ i duŭxŭgŭ rŭ norŭ ngèmaxŭmaã taeneègŭ i Yudíugŭ i yaxŭgŭxŭxŭ narŭngŭxèègŭ. ²⁸ Rŭ ngèxguma chanaguxèègu i ngèma puracŭ, rŭ ngèxguma taeneègŭ i Yudíugŭna marŭ ngŭxŭ chaxŭxgu i ngèma díeru, rŭ Españawa tá chaxŭ. Rŭ ngèxguma ngema chaxŭxgu, rŭ tá woe pexŭtagu íchidau. ²⁹ Rŭ nüxŭ chacuèx rŭ ngèxguma petanŭwa changuxgu, rŭ wŭxigu tá tataãègŭ, erŭ nŭma ya Cristu tá tŭxŭ nataãèxèè i ngèxguma ngèmaãcŭ wŭxiwa ingèxmagŭgu. ³⁰ Pa Chaueneègŭx, tŭrŭ Cori ya Ngechuchu ya Cristuégagu, rŭ ngèma na Naãèârŭ ngŭxèèmaã choxŭ pengechaŭxŭgagu pexŭ chacèèxŭ na Tupanana chauxcèx peçaxŭ i perŭ yumŭxèwa. Rŭ ngèmaãcŭ tá choxŭ perŭngŭxèè nawa i ñaã puracŭ i Tupana choxna ãxŭ. ³¹ ¡Rŭ Tupanana peça na choxŭ ínapoxŭxŭcèx nüxna i ngèma Yudíugŭ i Yudéaanewa ngèxmagŭxŭ i tama yaxŭgŭxŭ! ¡Rŭ nüxna peça naxcèx i ngèma taeneègŭ i yaxŭgŭxŭ i Yerucharéŭwa ngèxmagŭxŭ, na taãèãcŭma nayauxgŭŭaxŭcèx i ngèma díeru i ngema naxcèx changexŭ! ³² Rŭ ngèmaãcŭ ngèxguma Tupana naxwèxegu, rŭ taãèãcŭma petanŭwa tá changu, na wŭxigu pemaã chataãèxŭcèx. ³³ Rŭ chanaxwèxe na pemaã inaxŭxŭ ya Tupana ya tŭxŭ taãèxèècŭ. Rŭ ngèmaãcŭ yŭi.

16

Pauru rŭ nüxŭ narŭmoxè ga yema duŭxŭgŭ ga yaxŭgŭxŭ ga Dumawa yexmagŭxŭ

¹ Rŭ ñuxma na petanŭwa naxŭxchaŭxŭ i taeyèx i Febe, rŭ pemaã ngŭxŭ chixu rŭ wŭxi i taeyèx i mecŭ iyixŭ. Erŭ ngŭma rŭ nüxŭ irŭngŭxèè i ngèma yaxŭgŭxŭ i Chècréaarŭ ññewa ngèxmagŭxŭ. ² Rŭ chanaxwèxe i meã ngŭxŭ peyaxu, naegagu ya tŭrŭ Cori ya Ngechuchu, erŭ ngèma nixŭ i mexŭ na penaxŭxŭ namaã i guxŭma i yaxŭgŭxŭ. Rŭ chanaxwèxe i guxŭma i tacŭ i ngŭxŭ taxuxŭwa rŭ ngŭxŭ perŭngŭxèè, erŭ ngŭma rŭ poraãcŭ togŭxŭ irŭngŭxèè, rŭ choxŭ rŭ ta irŭngŭxèè. ³ ¡Rŭ nüxŭ perŭmoxègŭ i Prisila rŭ Aquiru! Rŭ nŭmagŭ rŭ chomŭcŭgŭ nixŭgŭ i Ngechuchu ya Cristuarŭ puracŭwa. ⁴ Rŭ nŭmagŭ rŭ ãcŭmaxŭwa nichocu na chauétŭwa nachogŭexŭcèx, na tama chayuxŭcèx ga chomax. Rŭ ngèmacèx moxè nüxna chaxã. Rŭ tama chaxicatama moxè naxcèx nüxna chaxã, natŭrŭ moxè nüxna naxãgŭ ta i guxŭma i taeneègŭ i yaxŭgŭxŭ i tama Yudíugŭ ixŭgŭxŭ. ⁵ ¡Rŭ nüxŭ perŭmoxègŭ ta i guxŭma i taeneègŭ i Aquirupatawa ngutaquèxegŭxŭ! ¡Rŭ

ngēxgumarūū ta nūxŭ perūmoxēgū ya chomūcū ya nūxŭ changechaŭcū ya Epenétu! Rū nūma nixī ga nūxīra Cristuaxŭ yaxōōxŭ ga Áchiaanewa. ⁶ ;Rū ngīxŭ perūmoxēgū i María ga poraācū petanūwa Tupanaāxŭ puracūcū! ⁷ ;Rū nūxŭ perūmoxēgū i chautanūxŭgū i Aŭdrúnicu rü Yúniā ga wūxigu chomaā poxcuexŭ! Rū nūmagū nixī i yatūgū i aixcūma Tupana imugūxŭ i guxūma i yaxōgūxŭ nūxŭ ngechaŭgūxŭ. Rū nūmagū rü nūxīra chauxūpa Cristuaxŭ nayaxōgū. ⁸ ;Rū nūxŭ perūmoxēgū ya Aŭpriātu ya chomūcū ya nūxŭ changechaŭcū ya chauxrūū tórū Coriaxŭ yaxōcū! ⁹ ;Rū nūxŭ perūmoxēgū ya Urubānu ya tomūcū ixīcū i Cristuarū puracūwa! ;Rū ngēxgumarūū ta nūxŭ perūmoxēgū ya Estaqui ya nūxŭ changechaŭcū! ¹⁰ ;Rū nūxŭ perūmoxēgū ya Apere ya aixcūma tūxŭ nūxŭ dauxēēcū na űuxācū Cristuaxŭ yaxōōxŭ! ;Rū ngēxgumarūū ta nūxŭ perūmoxēgū i Aritúburutanūxŭgū! ¹¹ ;Rū nūxŭ perūmoxēgū i chautanūxŭ i Erudiŭ! ;Rū ngēxgumarūū ta nūxŭ perūmoxēgū i Narsíchutanūxŭ i tórū Coriaxŭ yaxōgūxŭ! ¹² ;Rū ngīxŭ perūmoxēgū i Trifena rü Trifocha! Rū ngīmagū rü tórū Coriaxŭ ipuracū. ;Rū ngēxgumarūū ta ngīxŭ perūmoxēgū i taeyèx i Péchida i ngīxŭ ingechaŭgūcū! Rū ngīma rü marū poraācū tórū Coriaxŭ ipuracū. ¹³ ;Rū nūxŭ perūmoxēgū ya Rufu ya aixcūma meā tórū Coriaxŭ yaxōcū! ;Rū ngēxgumarūū ta ngīxŭ perūmoxēgū i naē ga chauerūū chomaā ixīcū! ¹⁴ ;Rū nūxŭ perūmoxēgū i Achícritu, rü Peregúte, rü Erme, rü Patroba, rü Erma, rü guxūma i togū i taeneēgū i natanūwa ngēxmagūxŭ! ¹⁵ ;Rū nūxŭ perūmoxēgū ta i Firórugu, rü Yúria, rü Neréu, rü naēyèx, rü Oripa, rü guxūma i togū i taeneēgū i yaxōgūxŭ i natanūwa ngēxmagūxŭ! ¹⁶ Rū chanaxwèxe i pegū pengechaŭgūācūma pegū perūmoxēgū i wūxichigū. Rū guxūma i ngēma yaxōgūxŭ i toxnamana ngēxmagūxŭ, rü pexŭ narūmoxēgū. ¹⁷ Pa Chaueneēgūx, pexŭ chacèèxŭ na pegūna pedaugūxŭcèx nūxna i ngēma duŭxŭgū i pexŭ itoyechaŭxŭ rü chixexūgu pexŭ yixēēgūchaŭxŭ. Erū ngēma duŭxŭgūarū nguxēētae rü tama namaā nawūxigu i ngēma nguxēētae ga noxri peyaxgūxŭ ga yexguma noxri peyaxōgūgu. Rū name nixī i noxtacūma nūxna pixīgachi i ngēma duŭxŭgū rü tama natanūgu pexāgū. ¹⁸ Erū ngēma duŭxŭgū rü tama tórū Cori ya Ngechuchu ya Cristuarū ngūchaŭ naxūgū, natürü noxrütama ngūchaŭ nixī i naxūgūxŭ. Rū ore i tauxchaxŭgūmaā nayaxucuxēgū i duŭxŭgū, rü ngēmaācū nana-womūxēēgū i ngēma duŭxŭgū i tama meā nūxŭ cuèxgūxŭ. ¹⁹ Rū guxūma i duŭxŭgū nūxŭ nacuèxgū na aixcūma meā Tupanaga pexīnūēxŭ i pemax. Rū ngēmacèx pemaā chataāē i chomax. Rū chanaxwèxe na meā nūxŭ pecuáxŭ i tacū nixī i mexŭ i Tupanapēxewa na penaxūxŭcèx i ngēma. Natürü ngēma Tupanapēxewa chixexŭ, rü ;nūxna pixīgachi na tama nagu peyixŭcèx! ²⁰ Rū ngēxguma ngēmaācū meā pemaxēgu rü nūma ya Tanatū ya Tupana ya tūxŭ taāēxēēcū rü tá pexŭ naporaexēē na aixcūma nūxŭ perüyexeraxŭcèx i Chataná. Rū chanaxwèxe i tórū Cori ya Ngechuchu ya Cristu pemaā inarūxāŭx rü pexŭ narūngūxēē. ²¹ Rū pexŭ narūmoxē ya Timutéu ya chomūcū ixīcū i Tupanaārū puracūwa. Rū ngēxgumarūū ta pexŭ narūmoxēgū i chautanūxŭgū i Dúchiu, rü Yachóŭ rü Sochípatru. ²² Rū choma i Téchiu na chanaxūmatūxŭ i űaā popera, rü choma rü ta pexŭ charūmoxē naegagu ya tórū Cori. ²³ Rū pexŭ narūmoxē ta ya Gayu ya napatawa changēxmacū. Rū nūma rü inanaxā ya daa napata na nawa nangutaquēxegūxŭcèx i guxūma i yaxōgūxŭ. Rū ngēxgumarūū ta pexŭ narūmoxēgū i Eratu i daa űāneārū dīēruarū dauruŭ ixīxŭ, rü taeneē i Cuarto. ²⁴ Rū chanaxwèxe i tórū Cori ya Ngechuchu ya Cristu pexŭ narūngūxēē i guxāma i pemax. Rū ngēmaācū yīi.

Pauru rü Tupanaxŭ yacuèxŭūācūma nanaguxēē i norū popera

²⁵⁻²⁶ ;Rū űuxmax, rü ngīxā nūxŭ ticuèxŭgū ya Tanatū ya Tupana! Rū nūma nūxŭ nangēxma i pora na pexŭ naporaexēēxŭcèx na meā peyaxōgūamaxŭcèx i ngēma norū ore i tūxŭ maxēxēēxŭ tamaā nūxŭ ixuxŭrūū. Rū ngēma nixī i ore i guxūwama nūxŭ chixuxŭ rü namaā changūexēētaexŭ i Ngechuchu ya Cristuchiga. Rū ngēmatama ore i Cristuchiga rü taxchaxwa naxēxŭgu ga noxrix, natürü i űuxma ya Tupana rü marū tūxŭ

nūxŭ nacuèxēē i ngēma. Rŭ nuxcūma tauta naāne ūxgu rŭ Tupanaxīcatama nūxŭ nacuèx ga yema, natŭrŭ i ñuxma rŭ norŭ orearŭ uruŭgŭ ūmatŭxŭ ga orewa taxcèx nanangoxēē. Rŭ ngēma ore rŭ namaā nawūxigu ga yema ore ga nuxcūma nūxŭ yaxuxŭ ga Tupana ya guxŭguma maxēchacŭ. Rŭ ñuxma ya Tupana rŭ guxŭwama nanamugŭ i norŭ orearŭ uruŭgŭ na guxŭ i duŭxŭgūmaā nūxŭ na yaxugŭexŭcèx i ngēma ore i Cristuchiga na nūxŭ yaxōgŭāxŭcèx rŭ naga na naxīnŭēxŭcèx. ²⁷ Rŭ nūma ya Tupana rŭ nūxīcatama nixī i Tupana yīxŭ, rŭ nūxīcatama nixī i guxŭxŭ nacuáxŭ. ¡Rŭ ñuxmax, rŭ ngīxā guxŭguma nūxŭ ticuèxŭŭgŭ, erŭ Nane ya Ngechuchu ya Cristu rŭ poraācŭ tŭxŭ narŭngŭxēē! Rŭ ngēmaācŭ yīī.

Rŭ nuāma pexna,
Pauru

NŪXĪRAŪXŪ GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corĭtĭuarŭ ĩānewa yexmagŭxŭ

1-2 Pa Chaueneēgŭ i Corĭtiucŭāxgŭx, choma i Pauru nixĭ i Tupana yaxuxŭ norŭ ngŭchaxŭmaā na Ngechuchu ya Cristu norŭ puracŭwa choxŭ namuxŭcèx. Rü choma rü namaā i taeneē i Chótene nixĭ i pexŭ tarŭmōxēgŭxŭ rü pexcèx tanaxŭmatŭxŭ i ñaā popera. Pa Chaueneēgŭ ya Tupanaārŭ Ixĭgŭxex, pema rü marŭ Tupanapēxewa pixŭüne yerŭ Ngechuchu ya Cristu marŭ pexŭ nixŭünexēē. Rü Tupana rü marŭ pexŭ nade na norŭ duŭxŭgŭ pixĭgŭxŭcèx wŭxigu namaā i guxŭma i ngēma duŭxŭgŭ i guxŭwama tórŭ Cori ya Ngechuchu ya Cristuxŭ icuèxŭgŭxŭ. Rü nüma ya Ngechuchu ya tórŭ Cori ixĭcŭ, rü ngēma duŭxŭgŭarŭ Cori ta nixĭ. ³ Rü chanaxwèxe ya Tanatŭ ya Tupana rü tórŭ Cori ya Ngechuchu ya Cristu norŭ ngechaxŭgagu poraācŭ pexŭ narŭngŭxēē rü pexŭ nataāēxēē.

Tupana tŭxŭ narŭngŭxēē erŭ Cristuarŭ duŭxŭgŭ tixĭgŭ

⁴ Rü taguma nüxŭ charŭchau na Tupanana moxē pexcèx chaxāxŭ. Rü moxē nüxna chaxā naxcèx i ngema ngŭxēē i Ngechuchu ya Cristugagu Tupana pexna āmarexŭ. ⁵ Yerŭ Cristugagu Tupana pexna nanamu ga Naāxē i Üünexŭ na pemaxā inaxāúxŭcèx. Rü pexna nanaxā ga norŭ ore, rü naétŭ pexŭ nanatauxchaxēē na nüxŭ pecuáxŭcèx na ñuxŭ ñaxŭchiga yixĭxŭ. ⁶ Rü yemaācŭ yexguma nüxŭ pexĭnŭēgu ga yema ore ga Cristuchiga rü aixcŭma peyaxōgŭ. ⁷ Rü ngēmacèx i ñuxma na ípenanguxēēxŭ na wena táxarŭ núma naxŭxŭ ya tórŭ Cori ya Ngechuchu ya Cristu, rü Tupana pexna nanaxā i taxŭ i cuèx na taxuŭma pexŭ taxuxŭcèx na naxcèx pemaxēxŭ. ⁸ Rü ngēmaācŭ tá pexna nadau ya Tupana ñuxmatáta nagŭ i naāne, rü guxŭgutáma pexŭ naporaexēē na aixcŭma peyaxōgŭamaxŭcèx rü naxcèx pemaxēxŭcèx, na taxúema chixexŭmaā pexŭ ixugŭxŭcèx i ngēxguma wenaxārŭ núma naxŭxgu ya tórŭ Cori ya Ngechuchu ya Cristu. ⁹ Rü Tupana rü guxŭguma nayanguxēē i norŭ uneta. Rü nüma nixĭ ga pexŭ nadexŭ na aixcŭma Nane ya tórŭ Cori ya Ngechuchu ya Cristumŭcŭgŭ pixĭgŭxŭcèx.

Nŭgŭ nitoye ga yema yaxōgŭxŭ

¹⁰ Pa Chaueneēgŭx, tórŭ Cori ya Ngechuchu ya Cristuégagu pexŭ chacèxŭ na wŭxigu pegŭmaā perŭxĭnŭēxŭ rü tama pegŭ pitoyexŭcèx. Rü name nixĭ i aixcŭma pegŭ pengechaŭgŭ rü aixcŭma wŭxigutama perŭxĭnŭē i peāēwa. ¹¹ Pa Chaueneēgŭx, pemaā nüxŭ chixu i ngēma ore, yerŭ Croétanŭxŭtanŭwa nüxŭ chacuáchiga ga pegŭmaā na penuēxŭ, rü tama aixcŭma wŭxigu na perŭxĭnŭēxŭ. ¹² Rü pemaā nüxŭ chixu i ngēma erŭ ñuxre i pema rü ñaperŭgŭgŭ:

“Choma rü Pauruwe charŭxŭ”, ñaperŭgŭgŭ. Rü togue rü:

“Choma rü Aporuwe charŭxŭ”, ñaperŭgŭgŭ. Rü togue rü:

“Choma rü Pedruwe charŭxŭ”, ñaperŭgŭgŭ. Rü togue rü:

“Choma rü Cristuwe charŭxŭ”, ñaperŭgŭgŭ. ¹³ ¿Rü ñuxācŭ nixĭ i ngēma? ¿Pexcèx rü

Cristu rü marŭ niyauxye? ¿Éxna pema nüxŭ pecuèxgu rü choma i Pauru chiŭxŭ ga curuchawa pexcèx chipotaxŭ rü chayuxŭ? ¿Rü éxna pema nüxŭ pecuèxgu rü chauégagu yĭxŭ ga ípebaiŭxŭ? ¹⁴ Rü Tupanana moxē chaxā, yerŭ taxúema pexŭ íchabaiŭxēē ga pemax. Rü Crispu rü Gayuxicatama nixĭ ga íchabaiŭxēēxŭ. ¹⁵ Rü ngēmacèx taxucŭrŭwa texé tŭgŭ tixu na chauégagu ítabaiexŭ. ¹⁶ Rü yemaācŭ aixcŭma íchanabaiŭxēē ga Estéfanatanŭxŭgŭ ta, natŭrŭ chauxcèx rü taxúema ga togue tŭxŭ íchabaiŭxēē. ¹⁷ Yerŭ nüma ga Cristu rü tama choxŭ namu ga duŭxŭgŭxŭ na íchabaiŭxēēxŭcèx, natŭrŭ choxŭ namu na duŭxŭgŭmaā nüxŭ chixuxŭcèx i norŭ ore i mexŭ i tŭxŭ maxēxēēxŭ. Rü

nanaxwèxe i tauxchaxŭ i oremaã nüxŭ chixu i ngẽma ore. Erü ngẽxguma chi ñoma nüxŭ cuèxüchixŭrüü nüxŭ chixuxgu i ngẽma ore, rü ngürüãchi i duïxŭgü rü tá chauguama narüxĩnŭe rü tá nüxŭ inayarüngümaẽ na Cristu yïxŭ ga tüxŭ maxẽxẽcŭ ga yexguma curuchagu nayuxgux.

Cristuwa nixĩ ga Tupana inawéxŭ ga norü pora rü norü cuèx

¹⁸ Rü ngẽma ore na ñuxãcü tórü pecaducèx curuchagu nayuxŭ ga Cristu, rü wüxi i natüçèxmamare nixĩ naxcèx i ngẽma duïxŭgü i poxcuwa ìxŭ. Natürü yixema na Tupana tüxŭ maxẽxẽxŭ, rü nüxŭ tacuèx na ngẽma ore rü Tupanaärü pora yïxŭ. ¹⁹ Erü norü ore i ümatüxŭwa rü ñanagürü ga Tupana:

“Rü tá ichayanaxoxẽe i guxŭma i norü cuèx i ngẽma duïxŭgü i nüxŭ cuèxüchigüxŭ. Rü tá nüxŭ chaxo i ngẽma duïxŭgüarü cuèx”,

ñanagürü. ²⁰ Rü ñuxmax, Pa Chaueneëgŭx, ¿Tupanapëxewa rü tacüwa namexŭ i ngẽma duïxŭgü i poraãcü nüxŭ cuèxüchixŭ? ¿Rü tacüwa namexŭ i ngẽma duïxŭgü i Moïché ümatüxŭ i mugüwa nguxẽeãægüxŭ? ¿Rü tacüwa namexŭ i ngẽma duïxŭgü i meã nüxŭ cuèxgüxŭ i ñoma i naãneärü cuáchigagu na yadexagüxŭ? Erü guxŭma i ngẽma cuèx i duïxŭgü nagu rüxĩnŭe xŭ rü Tupanacèx rü taxuwama name. ²¹ Natürü nüma ya Tupana ya guxŭxŭma cuácü, rü tama nanaxwèxe na ñoma i naãnecŭãx i duïxŭgüarü cuágagu na yïxŭ i naxütawa nangugüxŭ i nümagü. Natürü nanaxwèxe na ngẽma norü ore i mexügagu na yïxŭ i namaxẽxẽãxŭ i ngẽma duïxŭgü i yaxögüxŭ woo togücèx rü natüçèxmamare yixĩgu i ngẽma ore. ²² Ngẽma Yudíugü rü nüxŭ nadaugüchaŭ i cuèxruügu i Tupanaärü poramaã üxŭ. Rü ngẽma Griégugü rü naxcèx nadaugü i ñoma i naãneärü cuèx. ²³ Natürü ngẽma ore i toma nüxŭ tixuxŭ, rü Cristu ga curuchawa ipotacüchiga nixĩ. Rü ngẽma ore rü naãewa nangux i ngema Yudíugü. Rü ngẽma duïxŭgü i tama Yudíugü ixĩgüxŭcèx rü wüxi i natüçèxmamare nixĩ. ²⁴ Natürü ngẽma duïxŭgü i Tupana dexŭ i Yudíugü rü éxna tama Yudíugü ixĩgüxŭ rü ngẽma duïxŭgüçèx Tupana inanawéx i norü pora rü norü cuèx ga yexguma pecaducèx nayuxgu ga Cristu. ²⁵ Rü yema Tupana üxŭ ga yexguma nayuxgu ga Cristu rü muxŭma i duïxŭgüçèx rü wüxi i ngẽãemare nixĩ. Natürü ngẽma Tupana nagu rüxĩnŭxŭ rü guxŭma i ñoma i naãnecŭãx i duïxŭgüarü cuèxarü yexera nixĩ. Rü yexguma curuchagu nayuxgu ga Cristu rü muxŭma ga duïxŭgüçèx rü natura ga Tupana ga yexguma. Natürü yexguma nixĩ ga inawéãxŭ ga ñuxãcü guxŭ i duïxŭgüarü yexera na naporaxüchixŭ. ²⁶ Pa Chaueneëgŭx, name nixĩ i nagu perüxĩnŭe na ñuxãcü Tupana pexŭ dexŭ na norü duïxŭgü pixĩgüxŭcèx. Rü noxretama pixĩgü na nüxŭ pecuèxüchixŭ ega duïxŭgü pexŭ ngugügu, rü noxretama pixĩgü na ãëxgacügü pixĩgüxŭ, rü noxretama pixĩgü i ngẽma itaarü dïëruãxütanüxŭ pixĩgüxŭ. Natürü woo ngẽma na pixĩgügu rü Tupana rü pexŭ nade na norü duïxŭgü pixĩgüxŭcèx. ²⁷ Rü Tupana nanade ga yema duïxŭgü ga togü ga duïxŭgü nüxŭ ixuxgu rü taxuŭma icuáxŭ. Rü yemaãcü nanaxü ga Tupana na naxãneëxẽãxŭcèx i ngẽma duïxŭgü i nüxŭ icuèxüchixŭ. Rü Tupana nanade ga yema duïxŭgü ga togü nüxŭ ixuxgu rü turaexŭ. Rü yemaãcü nanaxü ga Tupana na naxãneëxẽãxŭcèx i ngẽma duïxŭgü i poraexŭ. ²⁸ Rü Tupana nanade ga yema duïxŭgü ga togü nüxŭ oexŭ, rü ñoma i naãnewa taxuŭma ixĩgüxŭ. Rü yemaãcü Tupana nanaxãneexẽe i ngẽma duïxŭgü i ñoma i naanewa norü ngemaxŭgümaã nügü icuèxüügüxŭ. ²⁹ Rü ngẽmacèx taxucürüwama texé tügü ticuèxŭŭ i Tupanapëxewa. ³⁰ Rü nümatama ga Tupana nixĩ ga Ngechuchu ya Cristuarü duïxŭgüxŭ pexŭ yaxĩgüxẽxŭ. Rü tatanüwa nanamu ga Cristu na nüma tüxna naxããxŭcèx i cuèx i aixcüma ixĩxŭ, rü pecaduwa tüxŭ ínanguxŭxẽxŭcèx. Rü nüma ya Cristu nixĩ i tüxŭ namaxẽxẽxŭ rü tüxŭ yamexẽëgüxŭ na aixcüma ixüünexŭcèx napëxewa ya Tupana. ³¹ Rü ngẽmacèx i Tupanaärü ore i ümatüxŭwa rü ñanagürü:

“Rü ngẽxguma texé tügü icuèxüüchaŭgu rü name nixĩ i tórü Corixŭ ticuèxŭŭ”,
ñanagürü.

2

Cristu ga curuchawa ipotacūchiga

¹ Pa Chaueneēgūx, yexguma noxri petanūwa chaxūxgu na pemaã nūxū chixuxūcèx ga Tupanaārū ore i aixcūma ixīxū i Cristuchiga, rū tama ñoma nūxū cuèxūchixūrūūācūma pemaã chidexa, rū tama ore ga guxchaxūmaã nixī ga pemaã nūxū chixuxū. ² Yerū yexguma petanūwa chayexmagu, rū Cristuchigaxūxīcatama nixī ga pemaã chixuxū. Rū taxuūma ga tacū ga togu charūxīnū. Rū yemaācū Ngechuchu ya Cristu ga curuchawa ipotacūguxicatama nixī ga charūxīnūxū. ³ Rū yexguma petanūwa changuxgu rū nūxū chadau ga taxū ga guxchaxūgū ga petanūwa, rū yemacèx poraācū chaxoegaāē rū Tupanapewa chorū muūmaā chidurux. ⁴ Rū yexguma pemaã chideaxgu rū pemaã nūxū chixuxgu ga Tupanaārū ore, rū tama ñoma nūxū cuèxūchixūrūūācūma pemaã nūxū chixu na yemaācū pexū chanangūchaūxēēxū na peyaxōgūxūcèx. Natūrū Tupanaāē i Ūūnexūārū ngūxēēmaā rū Tupanaārū poramaā nixī ga pexū chanangūchaūxēēxū. ⁵ Rū yemaācū Tupanaārū poramaā pemaã nūxū chixu ga yema ore na Tupanagagu yīxū na nūxū peyaxōgūxū, rū tama ñoma i naānecūāx i duūxūgūarū cuāgagu na yīxū.

Tupana rū Naāē i Ūūnexūwa nūgū tūxū nacuèxēē

⁶ Natūrū pemaã nūxū chixu, rū ngēxguma natanūwa changēxmagu i ngēma duūxūgū i marū meāma yaxōgūxū, rū ngēxguma nixī i chanangūxēēxū i ngēma aixcūma Tupanaarū cuèx i ūūnexū. Natūrū ngēma cuèx rū tama ñoma i naānewa ne naxū, rū bai i ñoma i naāneārū āēxgacūgū i paxa tá iyarūxoxūwa ne naxū. ⁷ Natūrū ngēma cuèx rū Tupanawa nixī i ne naxūxū. Rū ngēma cuèx nixī ga noxri tauta naāne ūxgu Tupanaxīcatama nūxū cuāxū ga na ñuxācū tá tūxna naxāāxū i maxū i taguma gūxū. ⁸ Natūrū yema Tupana nagu rūxīnūxū, rū taxuūma ga ñoma ga naānecūāx ga āēxgacū nūxū nacuèx. Yerū yexguma chi aixcūma nūxū nacuèxgūgu ga yema Tupana nagu rūxīnūxū rū tāū chima curuchawa nayapotagū ga guma mecū ya tōrū Cori. ⁹ Rū ngemachiga nixī i Tupanaārū ore i ūmatūxūwa i ñaxū:

“Rū ngēma duūxūgū i Tupanaxū ngechaūgūxūcèx, rū nūma nanamexēē i tacū i taxūema nūxū dauxū, rū taguma texé nūxū īnūxū, rū bai i texé nagu rūxīnūxū”, ñaxū. ¹⁰ Rū ngēma Tupana mexēēxū naxcèx i ngēma duūxūgū i nūxū ngechaūgūxū, rū ñuxma rū tūxū nūxū nacuèxēē i ngēma, yerū nūma nanamu ga Naāē i Ūūnexū na taxcèx nangoxēēāxūcèx. Rū ngēma Naāē i Ūūnexū rū guxūxūma nacuèx, rū èixrūxū i ngēma Tupanaxīcatama nūxū cuāxū rū ta nūxū nacuèx. ¹¹ Rū duūxūgūtanūwa rū ¿texé nūxū tacuèx na tacūgu naxīnūxū i wūxi ya yatū? Rū naāēxīcatama nixī i nūxū cuāxū i ngēma nagu naxīnūxū i ngēma yatū. Rū ngēxgumarūū ta Tupanaāē i Ūūnexūxīcatama nixī i nūxū cuāxū na tacūgu naxīnūxū ya Tupana. ¹² Rū yixema rū tama ñoma i naānecūāx i naāē nixī ga iyauxgūxū. Natūrū tanayauxgū i ngēma Naāē i Ūūnexū ga Tupana taxcèx nūma muxū na aixcūma nūxū icuāxūcèx i guxūma i ngēma mexūgū ga Tupana norū ngechaūmaā tūxna āmarexū. ¹³ Rū ñuxma na pemaã nūxū tixuxū i ngēmachiga, rū Tupanaāē i Ūūnexū toxna āxū i oremaā nixī i pemaã nūxū tixuxū. Rū tama ore i torū cuèxwa tayaxuxūmaā nixī i pemaã nūxū tixuxū. Rū ngēmaācū nūxū tixu i Tupanaāē i Ūūnexūārū ore namaā i ngēma duūxūgū i aixcūma Tupanaāē nawa ngēxmagūxū. ¹⁴ Rū texé ya tama Tupanaāē i Ūūnexū tūmawa ngēxmaxē, rū taxucūrūwa tanayaxu i ngēma Tupanaāē i Ūūnexū tūxū ngūxēēxū, erū tūmacèx ya yixema duūxē rū natūcèxmamare nixī. Rū tama nūxū tacuèxéga erū yixema Tupanaāē i Ūūnexū tūmawa ngēxmaxēxīcatama tixī ya nūxū cuāxe na tanangugūxū na ñuxū ñaxūchiga yīxū i ngēma Tupanaāē i Ūūnexū tūxū ngūxēēxū. ¹⁵ Rū yixema duūxē ya Tupanaāē i Ūūnexū tūmawa ngēxmaxē, rū meā tanangugū i guxūma. Natūrū ngēma togū i duūxūgū i tama Tupanaxū cuèxgūxū, rū

taxucürüwama tümaârü maxüxü nangugü ya yíxema duüxë ya aixcüma Tupanaãë tümawa ngëxmaxë. ¹⁶ Erü Tupanaârü ore i ümatüxüwa rü ñanagürü:

“¿Texé nüxü tacuèx na tacügu naxĩnüxü ya tórü Cori? ¿Rü texé nüxü tacuèx na Tupanaxü taxucuxëxü?”

ñanagürü. Natürü yixema nixĩ i aixcüma nüxü icuáxü i ngëma Cristu nagu rüxĩnüxü.

3

Pauru rü Aporu rü wüxigu Tupanaãxü napuracüe

¹ Pa Chaueneëgüx, yexguma noxri petanüwa changuxgu, rü taxucürüwa ngëma duüxügü i Tupanaãë nawa ngëxmaxümaã chidexaxürüüacü pemaã chidexa. Natürü ñoma i naãnecüāx i tama Tupanaxü cuëxgüxümaã chideaxgurüü nixĩ ga pemaã chidexaxü. Yerü pema rü yexwacëx, peyaxögü ga yexguma, rü yemacëx yexwacëx yaxögüxümaã chideaxürüüacü pemaã nüxü chixu ga Cristuchiga. ²⁻³ Rü taxchaxü ga oremaã pexü changúexëë, ngëxgumarüü i wüxi i õxhana ega noxri nabuxgu rü naëgünenixü ya taxchaacü yaxaxüne nüxna taxã. Rü yemaacü taxchaxü ga oremaã pemaã nüxü chixu ga Tupanaârü ore ga noxrix, yerü taxucürüwa nüxü pecuèxéga ga Tupanaârü ore ga guxchaxü. Rü ñuxma rü ta tama nüxü pecuèxéga i Tupanaârü ore i guxchaxü, erü ñoma tama yaxögüxü i duüxügürütama pemaxë. Rü dücax, ngëxguma ñuxma rü ta pixäuxächiwëxegu rü pegümaã penuëgu, rü ngëmawa nangox na ngëma tama yaxögüxürüüacütama nagu perüxĩnüëxü rü ñoma i naãnecüāxrüüacütama na pemaxëxü.

⁴ Rü ngëxguma petanüwa wüxie ñágügu rü:

“Choma rü Pauruwe charüxü”, ñágügu, rü togue rü:

“Choma rü Aporuwe charüxü”, ñágügu, rü ngëmawa nüxü tacuèx na ngëma duüxügü i tama yaxögüxürüüacüma na pemaxëxü. ⁵ Rü ngëxguma meã nagu rüxĩnüëgu, ¿rü tacü chixĩ i choma i Paurux? rü ¿tacü nixĩ i nüma i Aporux? Toma rü Tupanaârü duüxügümare tixīgü, rü togagu nixĩ ga nüxü peyaxögüxü ga tórü Cori ya Ngechuchu. Rü wüxichigü ga toma rü tanaxü ga yema puracü ga tórü Cori toxna äxü. ⁶ Rü chauxütawa nixĩ ga nüxü pexĩnüëxü rü peyaxögüxü ga Tupanaârü ore ga noxrix. Rü Aporu nixĩ ga pexü rüngüxëëcü na yexeraacü meã peyaxögüxü ga yema ore. Natürü Tupana nixĩ ga pexü maxëxëëcü. ⁷ Rü ngëmacëx woo yíxema tüxira duüxügümaã nüxü ixuxe i Tupanaârü ore rü woo yíxema wixwena yexeraacü duüxügüxü ngúexëëxë, rü taxuüma tixīgü. Natürü Tupana nixĩ ya guxüma ücü, erü nüma nixĩ i duüxügüxü namaxëxëëxü. ⁸ Rü ngëmaacü ya yíxema tüxira duüxügümaã nüxü ixuxe i Tupanaârü ore, rü yíxema wixwena yexeraacü duüxügüxü ngúexëëxë rü tawüxigumare i ngëma puracüwa. Natürü Tupana rü tá tüxü nanaxütanü i tümaârü puracü ya wüxichigü ngëxgumarüü na ñuxacü tanaxüxü i ngema puracü. ⁹ Rü ngëmaacü i toma rü wüxigu Tupanaãxü tapuracüe. Rü ngëmaacü nixĩ i perü maxüwa napuracüxü ya Tupana na nüma nanaxwëxëxüacüma pixīgüxüçèx. ¹⁰ Rü choma nixĩ ga Tupana choxü muxü na chaxira pemaã nüxü chixuxüçèx ga Cristuchiga. Rü togü nixĩ ga chowena yexeraacü pexü ngúexëëxü. Natürü guxãma ya texé ya naxüxe i ñaã puracü rü name nixĩ i taxuãë na meã tanaxüxüçèx. ¹¹ Rü ñaã puracü rü Ngechuchu ya Cristuwa nixĩ ga inaxügüxü, rü ngëmacëx taxucürüwama texé tayangucuchixëë i to i tüxü maxëxëëxü. ¹² Rü ñuxma na norü puracü ixüxü i wüxichigü i yixema, rü tanaxwëxe i taxuãë na aixcüma meã naxüxü i ngëma. Erü yíxema aixcüma meã naxüxe i norü puracü, rü ñoma wüxi i İpataarü üruü i uirumü rü dïërumü rü nuta i mexëchixümaã üpataxürüü tixĩ. Natürü yíxema tama aixcüma meã naxüxe i ngëma Cristuarü puracü rü ñoma İpataarü üruü i chixexü i naĩ rü naĩxätü rü dexnemenëxãmaremaã üpataxürüü tixĩ. ¹³ Natürü ngëxguma naguxgu i naãne, rü tá nangox na ñuxacü naxüãxü i Tupanaârü puracü i wüxichigü i duüxü. Erü ngëma ngunexügu rü tá nangëxma ya üxü ya taxüchine. Rü ñoma tacü üxüwa iguxürüü tá nixĩ i Tupana nüxü na üxü i wüxichigü i duüxüârü puracü na nüxü nacuáxüçèx ngoxi aixcüma

name rü ěxna tama. ¹⁴ Rü yíxema aixcūma meã naxúxe i Cristuarü puracü, rü yima ĩpata ya taixūne ya tama üxūmaã ixaxūnerüü tá nixĩ i ngēma tūmaārü puracü. Rü tá Tupanaxūtawa tanayaxu i tūmaārü natanü naxcèx i ngēma taxüxü. ¹⁵ Natürü yíxema tama aixcūma meã naxúxe i ngēma puracü, rü yima ĩpata ya tama taixūne ya üxūmaã ixaxūnerüü tá nixĩ i ngēma tūmaārü puracü. Rü tá ngēxma inayarüxomare i guxūma i ngēma taxüxü. Rü tūxicatama tãütáma tixa ñoma wüxi i duüxü i üxüemawa iyagoxürüü. ¹⁶ ¿Tama ěxna nüxü pecuèx i pema rü Tupanapata na pixĩgüxü, rü ngema Naãe ya Tupana rü pewa na namaxüxü? ¹⁷ Rü ngēxguma texé pexü chixetanüxēegu, rü Tupana tá tūxü napoxcu, erü Tupanapata ya nawa namaxūne rü naxüüne. Rü pematama nixĩ ya yima Tupanapata na pixĩgüxü. ¹⁸ Tama name i texé tügütama tawomüxēē. Rü ngēxguma petanüwa texé tügügu rüxĩnügü na wüxi i duüxü i nüxü cuáxe na tiixü i ñoma i naãnewa, rü name nixĩ i ñoma taxuūma tacuáxürüü tügü tixixēē. Rü ngēxguma tá nixĩ i wüxi i duüxü i aixcūma nüxü cuáxe tá tiixü. ¹⁹ Erü ñoma i naãneärü cuèx rü wüxi i ngēãemare nixĩ i Tupanacèx. Erü Tupanaärü ore i ümatüxüwa rü ñanagürü: “Rü ngēma duüxügü i nügügu rüxĩnüëxü na nüxü cuèxüchigüxü yiixü, rü norü cuèxgutama İnanatüexēē ya Tupana”, ñanagürü. ²⁰ Rü toxnamana i Tupanaarü orewa rü ñanagürü ta: “Törü Cori ya Tupana rü nüxü nacuèx na taxuwama namexü i ngēma norü İnü i ngēma duüxügü i ñoma i naanewa cuèxwa ngugüxü”, ñanagürü. ²¹ Rü ngēmacèx tama name i texé tügü ticuèxüxü ega duüxügüarü cuèxwamare tarüxüxgu.. Erü Tupana rü marü pexna nanaxã i guxūma na pexrü yiixüçèx. ²² Rü ngēmacèx i choma i Pauru, rü taeneē ya Aporu, rü taeneē ya Pedru, rü ñoma i naãne, rü torü maxü, rü torü yu, rü ñomatama i ngunexü, rü moxüärü ngunexü, rü guxūma i ngēma rü pexrü nixĩ. ²³ Rü pematama rü Cristuarü pixĩgü. Rü Cristu rü Tupanaärü nixĩ.

4

Yema ngúexügü ga Ngechuchu imugüxüärü puracüchiga

¹ Rü ngēmacèx tanaxwèxe i tomaã nagu perüxĩnüē na Cristuarü puracütanüxümare na tixĩgüxü. Rü nüma nixĩ i toxü namuxü na pexü tangüexēëxüçèx ga yema ore ga noxri Tupanaxĩcatama nüxü cuáxü. ² Rü ngēxguma texé tacü rü puracü tūxna äxgu, rü name nixĩ i aixcūma tayanguxēē i ngēma puracü i tūxna taxāxü na ngēmaäcü itanawéxüçèx na aixcūma wüxi i duüxü i mexü tixixü. ³ Rü ngēmacèx i ñuxma na meã chayanguxēēchaüxü i ngēma puracü i Tupana choxna äxü, rü taxucèxma chaugücèx chaxoegaãe ega woo choxna pecagu rü ěxna tacü rü äëxgacügü choxna caxgu naxcèx i ngēma puracü i chaxüxü. Rü woo i chomatama rü taxuxüçèxma íchicuèx na ngextá chixri chanaxüxü i ngēma puracü. ⁴ Natürü ñuxma na chomatama nagu charüxĩnüxü na nataxuūma i chorü chixexü i Tupanapëxewa, rü tama ngēmacèx Tupana choxü nadau na changearü pecaduäxü. Erü nümatama ya törü Cori ya Tupana nixĩ i aixcūma choxü nacuáarü maxüäxü. ⁵ Rü ngēmacèx tama name na toxü pengugüarü maxüäxü naxüpa na núma naxüxü ya törü Cori. Natürü name nixĩ i nüxü ĩpenanguxēē, erü nüma tá nixĩ i nangoxēēäxü i guxūma i ngēma ñuxma icúxü rü guxūma i ngēma duüxügü naãewa nagu rüxĩnüëxü. Rü ngēxguma tá nixĩ ya Tupana i tūmamaã nataãëxü ya wüxichigü ya yíxema aixcūma mexü ügüxe. ⁶ Pa Chaueneëgüx, perü mexüçèx nixĩ i pemaã nüxü tixuxü i ngēma ore na ngema Tupana naxwèxexüäcūma pemaxëxü. Rü choma rü Aporu nixĩ i perü cuèxruügü tixĩgüxü na towa pengüexü na Tupanaärü ore pemaã nüxü ixuxürüüäcü penaxüxü. Rü ngēmacèx tama name na wüxi i perü nguxēētaexümaã petaãëgüxü rü to rü nüxü pexoexü. ⁷ Rü ñuxma rü pexna chaca, ¿rü texé tixĩ ya yíxema pemaã nüxü ixuxe na togüarü yexera pexü ixixëexë? ¿Erü guxūma i ngema cuèx i pexü ngēxmaxü rü Tupana pexna nanaxã? Rü ñuxma na nüma pexna naxãäxü i ngēma cuèx ¿rü tūxcüü pegü picuèxüügü ñoma pematama perü poramaã penayaxuxürüü?

⁸ Rū pegūgu perūxīnūēgu rū aixcūma marū meāma Tupanaxū picuèxūchi rū marū pexū nangēxma i guxūma i tacū i penaxwèxexū na naxūtawa pengugūxūcèx. Rū pegūgu perūxīnūēgu rū ñoma āēxgacūgū i taxūrūū pixīgū rū taxuūma toxūtawa penaxwèxe i ñuxmax. ¿Chierū aixcūma Tupanapēxewa āēxgacūgū pixīgūgu na toma rū ta wūxigu pemaā āēxgacūgū na tixīgūxūcèx! ⁹ Rū toma na Ngechuchu toxū imugūxū, rū chauxcèx rū wixwe toxū nawogū ya Tupana. Rū ñoma poxcuexū i yuewa īxūrūū tixīgū. Rū ñoma wūxi i tacū i nūxū nacugūexūrūū tixīgū i napēxewa i Tupanaārū orearū ngeruūgū i daxūcūāx, rū napēxewa i ñoma i naānecūāx i duūxūgū, rū napēxewa i guxūma i tacū i Tupana ūxū. ¹⁰ Rū ñuxma na Cristuwe tarūxīxū, rū ngēmacèx taxuūma icuáxū toxū nawogū i duūxūgū, natūrū i pema rū pegūgu perūxīnūēgu rū guxūxūma pecuèx i Cristuchiga. Toma nūxū tacuèx na duūxūgūpēxewa taturaexū, natūrū i pema rū pegūgu perūxīnūē na aixcūma peporaexū. Rū duūxūgū toxū naxo, natūrū pexū nangechaūgū. ¹¹ Rū ñuxma rū ta tama inayacuèx na ngūxū tingegūxū, erū ñuxma rū ta taiya toxū nangux, rū tiṭawae, rū tangexchiru. Rū duūxūgū rū chixri tomaā nachopetū, rū tangepata. ¹² Rū tipae na yeūcūrū toxmēxmaā tapuracūeechaxū. Rū duūxūgū rū tacū tomaā nixugūe, natūrū i toma rū mexū i oremaā tanangāxūgū. Rū towe ningēxūtanū, natūrū yaxna namaā taxīnūē. ¹³ Rū chixri tochiga nidexagū, natūrū i toma rū meā nachiga tidexagū. Rū ñoma guxchirexū nadaugūxūrūū tomaā nixīgū, rū ñoma duūxūgū i taxuwama mexūācū toxū nixīxēē. Rū ñuxma rū ta ngemagutama tomaā naarūxīnūe. ¹⁴ Tama pexcèx chanaxūmatū i ñāā popera na pexū chaxāneēxēēxūcèx. Natūrū pexcèx chanaxūmatū na pexū chixucuxēgūxūcèx chauxacūgūxūchirūū, erū pexū changechaū. ¹⁵ Erū woo nangēxmagu i muxūma i perū nguxēēruūgū i Cristuchiga pexū ngūexēēxū, natūrū chaxicatama nixī i penatū chiīxū ga Cristuxū na peyaxuxūwa. Yerū chauxūtawa nixī ga noxri ga penayaxuxū ga Ngechuchu ya Cristuarū ore i tūxū maxēxēēxū. Rū ngēmacèx chaxicatama nixī i penatū chiīxū i perū ōwa. ¹⁶ Rū ngēmacèx pexū chacèxū na chauxrūxū meā pemaxēxū. ¹⁷ Rū ngēmacèx pexūtawa chanamu ya Timutéu ya poraācū nūxū changechaūcū ya chaune ixīcū i tórū Coriarū orewa. Rū nūma rū aixcūma meā nayanguxēē i guxūma i ngēma nagu chanamuxū. Rū nūma tá pexna nūxū nacuèxāchixēē na ñuxācū Ngechuchu ya Cristu naxwèxexūācūma meā chamaxūxū rū chanangūexēēxū ga yema yaxōgūxū ga natanūgu chixūgūxū. ¹⁸ Rū ñuxre i pemagū rū pegū picuèxūūgū, erū nagu perūxīnūē na tagutāma pexūtawa íchayadauxū. ¹⁹ Natūrū ngēxguma nanaxwèxegu ya tórū Cori, rū paxa tá ngema chaxū na pexū íchayadauxūcèx. Rū ngēxguma rū tá chomaxūchi nūxū chadau ngoxi ngēma duūxūgū i nūgū icuèxūūgūxū nūxū nangēxma i Tupanaārū pora rū ēxna yadoragūmare. ²⁰ Erū Tupanaarū pora rū tama nūxū tixumare, natūrū nagu ítamaxē i ngema pora. ²¹ ¿Rū ñuxma rū tacū ēxna nixī i penaxwèxexū i pema? ¿Penaxwèxe na pexū chingagūxū i ngēxguma ngema changuxgu, rū ēxna penaxwèxe na pexū changechaūācūma rū pemaā chamecūmaācūma pexū na íchayadauxū?

5

Duūxūgū i chixri maxēxūchiga

¹ Rū duūxūgū nūxū nixugūgū rū wūxi i yatū i petanūwa rū naērūcūmaātama naxāmèx. Rū ngēma nixī i pecadu i poraācū chixexūchixū, erū woo ngēma duūxūgū i tama yaxōgūxūtanūwa rū tama ngēmaācū naxūpetū. ² ¿Rū ñuxācū i pema i ngēxguma i pegū picuèxūūgūamaxū? Rū narūmemaē chi nixī na poraācū pengechaūgūxū. Rū ngēma yatū i ngēma chixexū ūxū rū name nixī na ípenamuxūchixū i petanūwa. ³ Rū woo tama petanūwa changēxmagu i chomax, natūrū guxūguma pegu charūxīnū. Rū ñoma pexūtawa changēxmaxūrūū rū tórū Cori ya Ngechuchu ya Cristuégagu pemaā nūxū chixu na tacū tá namaā pexūxū i ngēma duūxū. ⁴ Rū name nixī i tórū Cori ya Ngechuchu ya Cristuégagu pengutaquēxegū. Rū nūma ya tórū Cori ya Ngechuchu rū tá napetanūgu

na pexŭ naporaexēxŭcèx. Rŭ choma rŭ tá pexna chacuèxăchi i chorŭ yumŭxēwa. ⁵ Rŭ ngēma norŭ poxcu i tá nŭxna pexăxŭ i ngēma yatŭ, rŭ ngēma tá nixŭ na ípenamuxŭchixŭ i petanŭwa na Chataná ngŭxŭ nŭxŭ ingexēxŭcèx. Rŭ ngēmaăcŭ tá inayarŭxo i naxŭneărŭ ngŭchaŭ i chixexŭ, natŭrŭ naăē rŭ tá namaxŭ i ngēxguma wena núma naxŭxgu ya tórŭ Cori ya Ngechuchu. ⁶ Rŭ tama name i pema rŭ pegŭ picuèxŭŭ naxcèx i ngēma pexŭxŭ! ¿Tama ěxna nŭxŭ pecuèx i ngēma ore i ñaxŭ:

“Wŭxi i íraxŭ i păŭărŭ puxēerŭŭ rŭ taxŭma i păŭchara nipuxēē”, ñaxŭ? ⁷ Rŭ ngēmacèx name nixŭ i nŭxŭ perŭxoe i guxŭma i nuxcŭmaŭxŭ i pecŭma i pexŭ chixexēxŭ. Rŭ ngēxguma ngēmaăcŭ penaxŭxgu, rŭ ñoma ngexwacaxŭxŭ i păŭ i ngearŭ puxēerŭŭăxŭ i Ūpetŭchigaarŭ petawa ingŭxŭrŭŭ tá pime. Rŭ ñuxma i pema rŭ aixcŭma ngexwacaxŭxŭ i duŭxŭgŭ pixŭgŭ, yerŭ Cristu rŭ ñoma wŭxi i carnerurŭŭ marŭ tachicŭŭ tórŭ pecaducèx nayu. ⁸ Rŭ ngēmacèx name nixŭ i nŭxŭ tarŭxoe i nuxcŭmaŭxŭ i tacŭma i chixexŭgŭ rŭ aixcŭma Tupanagu tarŭxŭnŭē rŭ meă naxcèx tamaxē, erŭ ngexwacaxŭxŭ i norŭ duŭxŭgŭ tixŭgŭ. ⁹ Nŭxŭraŭxŭ ga chorŭ poperawa rŭ pemaă nŭxŭ chixu na tama natanŭgu pexăgŭxŭ i ngēma duŭxŭgŭ i naŭ i ngemaă naxŭneărŭ ngŭchaŭ ŭgŭxŭ. ¹⁰ Natŭrŭ yexguma yema ñachagu pexŭ, rŭ tama pemaă nŭxŭ chixu na nŭxna pixŭgachitanŭxŭchixŭ i ngēma duŭxŭgŭ i tama yaxŭgŭxŭ i naŭ i ngemaă maxēmarexŭ, rŭ ěxna ngēma duŭxŭgŭ i guxŭma i tacŭ nŭgŭna nugŭchaŭgŭxŭ, rŭ ěxna ngŭtèèxgŭxŭ, rŭ ěxna ngēma duŭxŭgŭ i tupanenetachicŭnèxăxŭ icuèxŭŭgŭxŭ. Erŭ ngēxguma chi naxchaxwa ípechoŭxgu i ngēma duŭxŭgŭ, rŭ chi taxucŭrŭwa i ñoma i naănewa pengēxmagŭ. ¹¹ Natŭrŭ yexguma pemaă nŭxŭ chixuxgu na tama natanŭgu pexăgŭxŭ i ngēma duŭxŭgŭ i chixri maxēxŭ, rŭ nachiga chidexa i ngēma duŭxŭgŭ i nŭgŭ ixugŭxŭ na peeneēgŭ i yaxŭgŭxŭ na yixŭgŭxŭ natŭrŭ naŭ i ngemaă maxēxŭ, rŭ ěxna aŭexŭ, rŭ ěxna tupanenetachicŭnèxăxŭ icuèxŭŭgŭxŭ, rŭ ěxna oregŭtèèxgŭxŭ, rŭ ěxna ngăxewèxegŭxŭ, rŭ ěxna ngŭtèèxgŭxŭ. Rŭ ngēma duŭxŭgŭ nixŭ i pemaă nŭxŭ chixuxŭ na tama namexŭ na natanŭgu pexăgŭxŭ rŭ bai i namaă na pechibŭexŭ. ¹²⁻¹³ Erŭ tama choxmēxwa nangēxma na nŭxna çacaxŭ i ngēma duŭxŭgŭ i tama Tupanaăxŭ yaxŭgŭxŭ. Rŭ Tupana tá nixŭ ya nŭxna çacŭ i ngēma duŭxŭgŭ. Natŭrŭ i pema rŭ pemēxwa nangēxma na nŭxna pecaxŭ i ngēma peeneēgŭ i yaxŭgŭxŭ i tama meă maxēxŭ. Rŭ name nixŭ i petanŭwa ípenamuxŭchi i ngēma duŭxŭ i chixri maxŭxŭ.

6

Ngēxguma tacŭ rŭ guxchaxŭ tŭxŭŭ ngēxmagu taeneēmaă, rŭ tama name i aēxgacŭgŭ i tama yaxŭgŭxŭpēxewa tayamexēē i ngēma

¹ Rŭ ngēxguma wŭxie i pema pexŭ nangēxmagu i tacŭ rŭ guxchaxŭ i wŭxi i peeneē i yaxŭxŭmaă, ¿rŭ tŭxcŭŭŭ wŭxi i aēxgacŭ i tama yaxŭxŭărŭ ngŭxēēcèx ípeyaca na nŭma pexŭ namexēēăxŭcèx i ngēma perŭ guxchaxŭgŭ? ¿Rŭ tama ěxna inamexŭ i ngēma peeneēgŭ i yaxŭgŭxŭ na namexēēgŭxŭ i ngēma perŭ guxchaxŭgŭ? ² ¿Tama ěxna nŭxŭ pecuèx na yixema na yaxŭgŭxŭ tá yŭxŭ i naăneărŭ guxgu nŭxna icagŭxŭ i guxŭma i ñoma i naănecŭăx i duŭxŭgŭ? Rŭ ñuxma na pema tá yŭxŭ i ñoma i naănecŭăx i duŭxŭgŭxŭ picagŭxŭ, ¿rŭ tŭxcŭŭŭ taxucŭrŭwa i pematama penamexēē i ngēma perŭ guxchaxŭgŭ i írachiréxŭ? ³ ¿Tama ěxna nŭxŭ pecuèx rŭ woo ngēma daxŭcŭăx i Tupanaărŭ orearŭ ngeruŭgŭ, rŭ yixema tá yŭxŭ i nŭxŭ icagŭxŭ? Rŭ ngēmacèx nixŭ i yexeraăcŭ pemēxwa nangēxmaxŭ na ñuxăcŭ penamexēēxŭ i ngēma guxchaxŭgŭ i ñoma i naănewa pexŭ ngēxmagŭxŭ. ⁴ Rŭ ngēmacèx, ngēxguma tacŭ rŭ guxchaxŭ pexŭ ngēxmagu i ñoma i naănewa, ¿rŭ tŭxcŭŭŭ i ngēma aēxgacŭgŭ i tama yaxŭgŭxŭxŭtawa pegŭ ípeyaxuaxŭgŭxŭ na pexŭ namexēēgŭăxŭcèx i ngēma? ⁵ Rŭ pemaă nŭxŭ chixu i ngēma ore na pexăneēxŭcèx. ¿Ěxna tataxuma i petanŭwa ya wŭxie ya nŭxŭ cuăxe na tanamexēēxŭ i ngēma guxchaxŭgŭ i petanŭwa ngēxmaxŭ? ⁶ Rŭ tama pegŭmaă penuēxŭcatama, natŭrŭ naetŭ rŭ

ãëxgacügü i tama yaxõgüxütawa pexĩ na penamexëëxücèx i ngẽma perü guxchaxügü. ⁷ Rũ ngẽma na pegümaã penuëxũ, rũ ngẽma rũ poraãcü chixexũ nixĩ. ¿Rũ tũxcüũ tama yaxna namaã pexĩnũe i ngẽma guxchaxügü i peeneë pemaã üxũ? ¿Rũ tũxcüũ tama namaã peporae ega texé perü tacücèx ngĩxgux? ⁸ Natürü i pema rũ poraãcü chixexũ pexüe, erü woo peeneëgü i yaxõgüxütãxũ rũ ta pengix.. ⁹⁻¹⁰ ¿Tama ëxna nüxũ pecuèx na ngẽma duïxügü i chixexũ ügüxũ rũ nataxuxütãma i nachica i ngextã Tupana ãëxgacü íyĩxũwa? ¡Rũ tama name i pegütama pewomüxëëgü! Erü ngextã Tupana ãëxgacü íyĩxũwa rũ nataxütãma i nachica i ngẽma duïxügü i naĩ i ngemaã ipexũ, rũ ngẽma duïxügü i tupananetachicünèxãxũ icuèxüügüxũ, rũ ngẽma duïxügü i naxmèxèchita rũ ëxna nateechita ngëãëxũ, rũ ngẽma yatügü i naxrũ yatüxũmaã ngëãëxũ, rũ ngẽma ngĩtèèxgüxũ, rũ ngẽma duïxügü i nügünaxica nanuxüchixũ i norü ngẽmaxügü, rũ ngẽma duïxügü i ngãxëwèxegüxũ, rũ ngẽma duïxügü i oregütèèxgüxũ, rũ ngẽma duïxügü i womüxëwèxegüxũ. Rũ guxũma i ngẽmagü rũ nataxütãma i nachica i ngextã Tupana ãëxgacü íyĩxũwa. ¹¹ Rũ yexgumarüütama pixĩgü ga ñuxre ga pema ga üpax. Natürü i ñuxma ya Tupana rũ marü pexũ ínanapi i perü chixexũ na noxrüxicatama pixĩgüxücèx. Rũ ñuxma rũ aixcüma napëxewa pime yerü Naãe i Üünexũ rũ tórü Cori ya Ngechuchu ya Cristuégagu marü perü pepaduna pexũ ínanguxüxëe.

Ñuxãcü naxüüne i taxüine

¹² Rũ ñuxre i pema rũ ñaperügügü:

“Rũ marü name na chanaxüxũ i ngẽma chanaxwèxexũ”, ñaperügügü. Rũ aixcüma nixĩ i ngẽma, natürü tama guxũ i ngẽma ixügüxũ rũ tũxũ name. Rũ aixcüma nixĩ i Tupana choxũ ínguxuchixëëxũ na chanaxüxücèx i ngẽma chanaxwèxexũ, natürü tama name na tacü rũ chixexũgu chaugü changuxëëxũ na chomaã inacuáxücèx. ¹³ Rũ ngëxgumarüũ ta rũ ñuxre i duïxügü rũ ñanagürügü:

“Rũ õna rũ taxü necèx nixĩ, rũ taxüine rũ õnacèx nixĩ”, ñanagürügü. Rũ aixcüma ngẽmaãcü nixĩ, natürü ya Tupana rũ tá inayanaxoxëe i guxũma i ngẽma. Rũ taxüine rũ tama naĩ i ngemaã namaã na ingëãëmarexücèx nixĩ. Erü taxünemaã nixĩ i naxüxũ i tórü Coriarü ngúchaũ. Rũ tórü Cori nixĩ ya taxünexũ maxëëcü. ¹⁴ Rũ yema Tupana wena namaxëëxürüũ ga tórü Cori ya Ngechuchu, rũ ngëxgumarüũ tá ta norü poramaã wena tũxũ namaxëëe. ¹⁵ ¿Rũ tama ëxna nüxũ pecuèx na ngẽma pexene rũ Cristuarü na yĩxũ? ¿Rũ ñuxãcü i ngẽma chaxune i Cristuarü ixĩxũ rũ ngexũ i ngëãëxũmaã inapexũ? Taxucürüwama ngẽmaãcü nixĩ. ¹⁶ ¿Rũ ëxna tama nüxũ pecuèx ega wüxi i ngexũ i ngëãëxũmaã inapexgu ya wüxi ya yatü rũ ngẽma taxre i naxüine rũ wüxitama i naxüine yĩxũ? Erü Tupanaãrü ore i ümatüxũwa rũ ñanagürü:

“Ngẽma taxre i naxüine rũ wüxitama i naxüine tá nixĩ”, ñanagürü. ¹⁷ Natürü ngëxguma wüxi i duïxũ rũ tórü Cori ya Cristuaxũ yaxõõxgu, rũ ngẽma naãe i ngẽma duïxũ rũ Cristuãëmaã wüxigutama narüxĩnũe. ¹⁸ Rũ ngẽmacèx name nixĩ na nüxũ perüxoexũ i pexeneãrü ngúchaũ na pexüxũ. Rũ guxũma i togü i pecadu i wüxi i duïxũ üxũ rũ tama naxünexũ nachixexëe. Natürü ngẽma na naĩ i ngemaã nangëãëxũ rũ ngẽma waxi nixĩ i naxünexũ chixexëëxũ. ¹⁹ ¿Tama ëxna nüxũ pecuèx i pexene rũ Tupanaãe i Üünexüpata na yĩxũ? Rũ pegu nixĩ i naxãchiüxũ i ngẽma Naãe i Üünexũ i Tupana pexna muxũ. Rũ ngẽmacèx i pema rũ tama pegüarü yoratama pixĩgü. ²⁰ Erü Tupana rũ marü pexcèx nataxe rũ poraãcü nüxũ petatanü. Rũ ngẽmacèx penaxwèxe i ngẽma pexenemaã meã Tupanacèx pemaxë na ngẽmaãcü namaã penataxëëxũ ya Tupana.

7

Ucuxëgü i ãmèxchiga

¹ Rū ñuxma rü tá pexũ changãxũ ga yema ãmèxchiga ga choxna naxcèx peçaxũ ga perü poperawa. Rū narümemaẽ chi nixĩ i noxtacüma tama naxãmax ya yatü. ² Natürü ngẽma na naxũneãrũ ngúchaũ na naxügümarexũ i duũxügü, rü narümemaẽ nixĩ i wüxichigü ya yatü rü na naxãmaxũ, rü wüxichigü i nge rü na naxãtexũ. ³ Rü yima yatü ya ãmacü rü taxucürüwama naxmèxna nügü ninuxũ. Rü ngẽma nge i ãtecü rü taxucürüwama ngĩtena ngĩgü iyanuxũ. ⁴ Erü ngẽma nge i ãtecü rü tama ngĩgüxũneãrũ yoratama iyixĩ, erü ngĩte nixĩ ya ngĩxĩneãrũ yora ixĩcü. Rü ngẽxgumarüũ ya ngĩte rü tama nügüxũneãrũ yora nixĩ, erü naxmèx iyixĩ i naxũneãrũ yora ixĩcü. ⁵ Rü tama name i wüxi ya yatü rü namèxna nügü ninuxũ, rü ãxna wüxi i ngecü rü ngĩtena ngĩgü iyanuxũ, ega tama nügümaã namexẽẽãgu na ñuxre i ngunexũ tama nügümaã namaxẽxũ naxcèx na nayumüxëgüxũ. Rü ngẽmawena rü name nixĩ na wenaxãrũ noxrürüũ nügümaã namaxẽxũ na tama Chataná nüxna ñnuxũcèx na chixexũgu nayixẽẽãxücèx. ⁶ Rü guxũma i ñãã ore i pemaã nüxũ chixuxũ i ãmèxchiga rü ãtechiga rü tama wüxi i mu nixĩ i ngẽma. Natürü pemaã nüxũ chixumare na nüxũ pecuáxücèx na namexũ i ngẽmaãcü na penaxüxũ. ⁷ Rü chomatama nagu charüxĩnũ rü chierü name nixĩ ega choma chamaxüxürüũ namaxëgu i guxũma i duũxügü. Natürü Tupana rü wüxichigü i duũxũna nanaxã i nacüma na ñuxãcü namaxẽxücèx rü ñuxãcü nagu naxĩnuxũcèx. Rü ngẽmacèx tama guxãma tawüxigu. ⁸ Rü ngẽma ngemèxgüxũ rü ngetegüxũ rü yutegüxũ rü namaã nüxũ chixu rü narümemaẽ nixĩ i chauxrũũ tama naxãmèx rü tama naxãte. ⁹ Natürü ngẽxguma wüxi i duũxũ taxucürüwa naxũneãrũ ngúchaũmaã naporagu, rü name nixĩ na naxãmaxũ rü ãxna naxãtexũ. Erü narümemaẽ nixĩ i noxtacüma naxãmèx rü ãxna naxãte na tama ngema norü ngúchaũgagu düxwa chixexũgu nanguxücèx. ¹⁰ Natürü yixema marü ãmaxë rü ãtexe, rü tümamaã nüxũ chixu na tama namexũ na tümataxũ na ítatáxũ. Rü ngẽma mu rü tórü Coriarü mu nixĩ, rü tama choxrü nixĩ. ¹¹ Natürü ngẽxguma chi ngürüãchi wüxi i ngexũ natexũ ítëxgu, rü name nixĩ i noxtacüma nangete rü ãxna wena natecèx nataegu. Rü ngẽxgumarüũ ta ya yatü rü tama name i namèxũ ínatèx. ¹² Rü ñuxma rü choxũ nangëxma i wüxi i ore i tümacèx ya yixema ãmaxë ngĩmaã i wüxi i nge i tama yaxõxcü. Rü ngẽma ore rü choxrütama nixĩ rü tama tórü Coriarü nixĩ. Rü ngẽxguma wüxi ya yatü ya õcü ngĩmaã ãmaxgu i wüxi i nge i tama yaxõxcü, rü tama name i ngĩxũ ínatèx, ega ngĩma rü aixcüma namaã naxãtechaũgu. ¹³ Rü ngẽxguma wüxi i nge i yaxõxcü ãtegu namaã ya wüxi ya yatü ya tama yaxõcü, rü tama name i ínatèx ya yima ngĩte ega nüma ya yima yatü rü aixcüma ngĩmaã naxãmèxchaũgu. ¹⁴ Rü yima yatü ya tama yaxõcü, rü namèx i yaxõxcügagu Tupana nüxũ nacuèx. Rü ngẽma ngecü i tama yaxõxcü, rü ngĩte ya yaxõcügagu Tupana ngĩxũ nacuèx. Erü ngẽxguma chi tama ngẽmaãcü yixĩgu, rü chi ngẽma naxãcügü rü duũxügü i tama yaxõgüxũãcügürüũ tá nixĩgü. Natürü i ñuxma ya naxãcügü rü marü Tupana tüxũ nacuèx. ¹⁵ Natürü ngẽxguma yima yatü ya tama yaxõcü rü namèxũ ínatáxchaũgu rü ;noxtacüma ngĩxũ ínatá! Rü ngẽxgumarüũ ega ngẽma ngecü i tama yaxõcü rü ngĩtexũ ínatáxchaũgu, rü ;noxtacüma ngĩtexũ ínatá! Rü ngẽxguma ya yima yatü ya yaxõcü rü marü name ega wena naxãmèxgu. Rü ngẽma ngecü i yaxõcü rü marü name ega wena naxãtegu. Erü Tupana pexũ nade na pegü pengechaũgüxücèx. ¹⁶ Rü ngẽmacèx, Pa Ngecü i Tupanaãxũ Yaxõxcüx, rü ngẽxguma cute i tama yaxõxũ cuxũ ítáxchaũgu, namë nixĩ i tama cunachuxu, erü tama nüxũ cucuèx ngoxi tá nüxũ cuyaxõxëẽ i ngẽma cute rü ãxna tama. Rü cumax, Pa Yatü ya Yaxõxcüx, rü ngẽxguma cuxmèx i tama yaxõxũ cuxũ ítáxchaũgu, rü name nixĩ i tama cunachuxu, erü tama nüxũ cucuèx ngoxi tá ngixũ cuyaxõxëẽ i ngẽma cuxmèx rü ãxna tama. ¹⁷ Rü ñuxma rü pemaã nüxũ chixu rü nüma ga Tupana rü wüxichigü ga duũxëna nanaxã ga tümãrũ cuèx na tümãrũ maxũmaã itacuáxücèx rü meã tanaxüxücèx i ngẽma puracü ga noxri tüxũ yexmaxũ ga tauta Tupana tümacèx caxgu. Rü ngẽma nguxẽẽtae nixĩ i namaã chanangüexẽẽxũ i guxũma i yaxõgüxũ i wüxichigü ya tupaucawa ngẽxmagüxũ. ¹⁸ Rü ngẽxguma Tupana naxcèx caxgu i wüxi i duũxũ i marü Yudíugürüũ íwiechëxmüpëxechiraũxũ, rü nüçetama nixĩ ega ngẽmaãcütaama yixĩgu. Rü ngẽxguma

Tupana nayauḡgu i wūxi i duūxū i tama íwiechèxmüpēxechiraūxū, rü nüetama nixī ega ngēmaācūtama yixīgu. ¹⁹ Erü Tupanapēxewa rü nüetama nixī ega wūxi i duūxū rü ínawiechèxmüpēxechiraūḡgu rü ēxna tama. Erü ngēma Tupana aixcūma naxwèxexū nixī na naga naxīnūxū i wūxichigü i duūxū. ²⁰ Rü wūxichigü i duūxū rü name nixī i nawatama napuracü ga yema puracü ga nüxū yexmaxū ga yexguma Tupana noxri naxcèx caxgu. ²¹ Rü yexguma wūxi ga coriarü duūxū quixīyane Tupana cuxcèx caxgu, rü tama name i ngēmacèx cuxoegaāē. Natürü ngēxguma cuxū natauxchagu na nüxna ícunguxuchixū i ngēma cori, rü marü name na ícunguxuchixū. ²² Rü cuma ga na cucoriāxyane cuxcèx naçaxū ga Tupana, rü name nixī i nüxna cucuèxāchi na Cori ya Cristu pecaduwa cuxū ínguxuchixēēxū. Rü cuma ga na cungearü coriāxyane cuxcèx naçaxū ga Tupana, rü name nixī i nüxna cucuèxāchi na tórü Cori ya Cristuarü duūxū quīxū i ñuxma na nüxū cupuracüxücèx. ²³ Tupana rü marü pexcèx nataxe rü poraācü nüxū petatanü. ¡Rü ngēmacèx i ñuxma rü tāūtāma naga pexīnūē i ngēma duūxūḡgu i wenaxārü ñoma i naāneārü chixexūwa pexū gagüchaūxū! ²⁴ Rü name nixī, Pa Chaueneēḡux, i wūxichigü i pema rü meā Tupanapēxewa penaxüama ga yema puracü ga noxri pexū yexmaxū ga yexguma Tupana pexcèx caxgu. ²⁵ Rü ñuxma rü tá pemaā nüxū chixu i nachiga i ngēma duūxūḡgu i ngemèxḡuxū rü ngetegūxū. Rü tórü Cori ya Ngechuchu rü taxuūma i mu choxna naxā i ngēmachiga. Natürü tá pemaā nüxū chixu i ñuxācü nagu charūxīnū i ngēmachiga. Rü ngēma chorü ore rü aixcūma nixī erü choma nixī i wūxi i duūxū ga nüxū changechaūtümüūācūma choxū nayaxuxū ga tórü Cori. ²⁶ Natürü ngēma ñuxma nüxū idauxū i guxchaxūḡgagu rü chauxcèx rü chi name i tama nixāmèx i ngēma yatüḡgu i ngemèxḡuxū. ²⁷ Rü ngēxguma marü cuxāmèxgu rü tama name i ngīxū ícutèx. Natürü ngēxguma cungeḡmèxgu rü name i tama cuxāmèx. ²⁸ Natürü ngēxguma cuxāmèxgu rü tama pecadu nixī i ngēma. Rü ngēxguma wūxi i paxū ātegu rü tama pecadu nixī i ngēma. Natürü ngēma ixāmèxḡuxū rü ixāteḡuxū rü tá nayexera i norü guxchaxūḡgu i ñoma i naānewa, rü ngēma nixī i tama chanaxwèxexū na nüxū nangupetūxū. ²⁹ Pa Chaueneēḡux, pemaā nüxū chixu rü tama muxū i ngunexū tüxū nangēxma na naxūxücèx i Tupanaārü puracü. Rü ngēmacèx ya yixema ixāmèxḡuxe rü name nixī i meā tanaxūḡgu i Tupanaārü puracü ñoma tangemèxḡuxūrū. ³⁰ Rü yixema ngexwaca yutanūḡuxe rü yixema peta ūḡuxe rü yixema itaxegūxe, rü tama name i ngēmacèx Tupanaārü puracü na ítangēxḡuxū. ³¹ Rü yixema tüxū nangēxmaxē i tümaārü ngēmaxūḡgu i ñoma i naānewa, rü tama name i ngēmacèx Tupanaārü puracü na ítangēxḡuxū. Erü ñoma i naāne i ñuxma nüxū idauxū rü paxa tá nagux. ³² Rü tama chanaxwèxe na tacücèx pexoegaāēḡuxū. Rü ngēxguma wūxi i yatü ngemèxgu, rü Tupanaārü puracügu narūxīnū rü nagu narūxīnū na ñuxācü Tupanaārü ngūchaū naxūxū. ³³⁻³⁴ Natürü ngēxguma naxāmèxgu ya wūxi ya yatü, rü ñoma i naāneārü ngēmaxūḡgu narūxīnū rü nagu narūxīnū na ñuxācü namèxū nataāēxēēxū. Rü ngēmaācü muxūgu narūxīnū. Rü ngēxgumarūū ta nixī i ngexūḡgu. Rü ngēma ngexū i ngetexū rü Tupanaārü puracügu narūxīnū, erü marü Tupanana nüḡu naxā rü guxū i naxūnemaā rü naāēmaā naxcèx namaxū. Natürü ngēma ngexū i ātexū rü ñoma i naāneārü ngēmaxūḡgu narūxīnū, rü nagu narūxīnū na ñuxācü natexū nataāēxēēxū. ³⁵ Rü perü mexūcèx nixī i pemaā nüxū chixuxū i ngēma, rü tama pexna na chanachuxuxücèx nixī. Natürü ngēma ñacharūḡgu na meā pemaxēxücèx rü aixcūma penaxūxücèx i tórü Coriarü puracü. ³⁶ Rü ngēxguma texé nagu rüxīnūgu na tümaxācü rü marü na napaxū, rü tümacèx namexgu na naxātexū, rü marü name i ngīxū taxūte ega aixcūma tümacèx namexgu. Rü ngēma na naxātexū i tümaxācü rü tama pecadu nixī. ³⁷ Natürü ngēxguma wūxi i yatü nüxū nangēxmagu i norü pacü rü tama nanaxwèxegu na ngīxū naxūtexū, rü ngēma rü ta marü name. Erü naxmēxwa ingēxma rü taxucèxma texé tanachixewe na ngīxū naxūtexūcèx. ³⁸ Rü ngēmawa nüxū tadau rü ngēma yatü i naxācü ngīxū ütèxū rü mexū naxū. Rü ngēma yatü i tama naxācü ngīxū ütèxū rü yexeraxū i mexū naxū. ³⁹ Rü wūxi i nge i ātecü rü ngītemēxēwa ingēxma i ngēxguma namaūxgu ya ngīte. Natürü ngēxguma nayuxgu

ya ngīte, rü marü name ega to i yatü i ngīma ngīxū ngúchaūxūmaã naxãtegu. Natürü inaxwèxe na wüxi ya yatü ya yaxõcümaã naxãtexū. ⁴⁰ Natürü chauxcèx rü yexeraãcü chi itaãe i ngëxguma chi tãu chima wena naxãtegu. Rü ngëma ore rü choxrütama nixī, natürü nagu charüxīnū rü Tupanaãe i Üünexūãrū ĩnū ta nixī.

8

Tupanetachicünèxãgüna naxuaxūgūxū ga õnachiga

¹ Ñuxma rü tá pemaã nüxū chixu i nachiga i ngëma õnagü i ngëma duūxūgü i tama Ngechuchuaxū yaxõgūxū norü tupanetachicünèxãgüna uaxūgūxū. Rü aixcüma nixī i wüxichigü i yixema i meãma nüxū icuáxū i ngëmachiga. Natürü ngëma nüxū na icuáxūgagu rü ñuxguacü rü yigü namaã ticuèxūxū. Natürü ngëma na yigü ingechaūxū rü tüxū narüngūxëe na yexeraãcü meã yaxõgüchigūxū. ² Rü ngëxguma chi texé nagu rüxīnūgu na tacūxū tacuáxū, rü name nixī i nüxna tacuèxãchi na ngëxguma rü ta tama aixcüma nüxū tacuáxū i guxūma i ngëma cuèx i aixcüma ixīxū. ³ Natürü ngëxguma texé aixcüma Tupanaxū ngechaūgu, rü Tupana rü tüxū nacuèx ya yixema. ⁴ Rü ngëma na nangõxū i ngëma õnagü i tupanetachicünèxãgüna naxuaxūgūxū i duūxūgü, rü meãma nüxū tacuèx na taxuwama namexū i ngëma tupanetachicünèxãgü erü tama aixcüma Tupanaxūchi nixīgü. Erü wüxixicatama nixī ya aixcüma Tupana ixīcü, rü nataxuma ya naī. ⁵ Rü woo duūxūgü nagu narüxīnūe rü nangexma i muxūma i tupanagü i ñoma i naanewa rü dauxūguxū i naanewa, natürü taxcèx rü tama ngemaãcü nixī. ⁶ Erü yixema nüxū tacuèx na wüxitama yixīxū ya Tupana ya Tanatü ixīcü. Rü nüma ya Tanatü nixī i naxūãxū i guxūma i tacü i ngëxmaxū, rü naxcèx nixī i imaxëxū i yixemax. Rü ngëxgumarūü ta nangëxma i wüxitama ya tórü Cori ya Ngechuchu ya Cristu. Rü yimagagu nixī na nangëxmaxū i guxūma, rü yimagagu nixī i tüxū nangëxmaxū i maxū. ⁷ Natürü tama guxūma i yaxõgūxū nüxū nacuèx na nangëxmaxū ya wüxitama ya Tupana rü wüxitama ya tórü Cori. Rü ñuxre i nümagü ga ũpa rü nüxū nayapue na nüxū yaxõgūãxū i ngëma tupanetachicünèxãgü, rü ñuxma rü ta tama aixcüma nüxū nacuèxgü i ngëma mexū i Tupana nüxū naxwèxexū. Rü ngëmacèx nixī i ñuxma i nagu naxīnūèxū na chixexū naxūgūxū i ngëxguma nangõxgūãgu i ngëma naxūnamachi i togü i duūxūgü norü tupanetachicünèxãgüna uaxūgūxū na nüxū namaã yacuèxūgūxūcèx. ⁸ Rü yixema nüxū tacuèx na tama tacü rü namachi na ingõxūgagu yīxū na Tupana tüxū dexū. Rü tãütáma yexera time i napëxewa ega nangõxgūgu i ngëma namachi. Rü tãütáma yexera tichixe i napëxewa ega tama nangõxgūgu. ⁹ Natürü i pema i nüxū na pecuáxū na tama pecadu yīxū na nangõxū i ngëma namachi, jrü pexuãgü erü ngürüãchi ngëma na pengõxūgagu chixexūgu tá penayixëe i ngëma peeneëgü i tauta aixcüma meã nüxū cuèxgūxū na tacü yīxū i Tupana nüxū naxwèxexū! ¹⁰ Erü cuma na meã Tupanaxū cucuáxū, rü ngëxguma chi cunangõxgu i ngëma namachi i ngextá tupanetachicünèxãgūxū íyacuèxūgūxūwa, rü ngürüãchi wüxi i cueneë i tauta meã Tupanaxū cuáxū tá cuxū nadau. Rü ngürüãchi nüma rü tá ta nanangõx i ngëma namachi woo naãewa nagu naxīnūgu na wüxi i chixexū yīxū na nangõxū i ngëma namachi. ¹¹ Rü ngëmaãcü i cuma na meã Tupanaxū cucuáxū, rü tá icuyanatauxëe i ngëma cueneë i Cristu naxcèx yuxū i tauta meã Tupanaxū cuáxū. ¹² Rü ngëmacèx i ngëxguma chixexūgu cunanguxëëxgu i ngëma cueneë i tauta meã Tupanaxū cuáxū, rü Cristumaã rü ta chixexū cuxū. ¹³ Rü ngëmacèx i ngëxguma ngëma namachi i changõxūgagu chixexūgu chananguxëëxgu i chaueneë, rü narümemaë nixī i noxtacüma taguma namachi changõx na tama pecadugu chananguxëëxūcèx i ngëma chaueneë.

9

Yixema Cristu tüxū muxë na nüxū tapuracūxūcèx, rü tüxna naxū i tumaãrū natanü

¹ Rū pemaã nüxŭ chixu rü tórü Coritama nixĩ ya choxŭ yaxucü rü choxŭ mucü na norü puracü chaxüxcèx, rü ngēmacèx taxuŭma i duŭxŭgümèxèwa changèxma i ñuxmax. Rū chomatama chauxetümaã tórü Cori ya Ngechuchuxŭ chadau, rü ngēma puracü i nüxŭ chaxüxŭgagu nixĩ i peyaxögüxŭ i pemax. ² Rū woo togü i duŭxŭgü tama choxŭ cuèxgüchaŭgu na tórü Cori choxŭ muxŭ, natürü i pema rü meãma nüxŭ pecuèx na nüma yĩxŭ ga choxŭ namuxŭ. Yerü chauxŭtawa nixĩ ga tórü Coriaxŭ peyaxögüxŭ, rü ngēmawa nüxŭ pecuèx na aixcüma yĩxŭ na nüma choxŭ namuxŭ. ³⁻⁴ Rū ñaã nixĩ i chorü dexa i namaã chanangãxŭxŭ i ngēma duŭxŭgü i chauchiga idexagüxŭ:

“¿Éxna tama name na duŭxŭgü choxna naxãxŭ i chorü òna rü chorü axexŭ naxcèx i chorü puracü? ⁵ ¿Éxna tama inamexŭ ta na wüxi i ngexŭ i yaxõxŭmaã na chaxãmaxŭ na chayagaxüçèx ngèxgumarüŭ na naxãmaxŭ i Pedru, rü naēneēgü ya tórü Cori, rü ngēma togü i yatügü i Tupana imugüxŭ? ⁶ ¿Rü éxna pema nagu perüxĩnŭēgu rü choma rü Bernabéxicatama i tama namexŭ na toxŭ perüngŭxèēgüxŭ ngēma togü i orearü uruŭgüxŭ na perüngŭxèēgüxŭrŭŭ? ⁷ ¿Tacü rü duŭxŭ i churarawa ũxŭ i nügüxŭtama naxŭtanüxŭ i norü òna? ¿Rü tacü rü duŭxŭ i orix itoxŭ i tama namúxŭ i norü o? ¿Rü tacü rü duŭxŭ i carnerugüna dauxŭ i tama nagünenixŭ ne ixaxüxŭ?” Ngēma ñacharügü nüxŭ i ngēma duŭxŭgü i chauchiga idexagüxŭ. ⁸ ¿Rü ñuxma rü tãütáma nagu perüxĩnŭē na chorü orexicatama yĩxŭ i ñaã nüxŭ chixuxŭ! Erü Tupanaãrŭ ore ga Moïché ũmatüxŭwa rü ta ngēma ñanagürü. ⁹ Erü ngēma ore rü ñanagürü:

“¿Rü ngēma woca i aruchuarü putèxewa puracüxŭ, rü tãütáma cunawèxnagu na tama yima aruchuwa nachibüxcèx!”

ñanagürü i ngēma ore. Rü nüxŭ tacuèx na tama wocagügu naxĩnŭxŭ ga Tupana ga yexguma yema ñaxgu. ¹⁰ Natürü pemaã nüxŭ chixu rü tagu nixĩ ga naxĩnŭxŭ ga yexguma yema ñaxgu ga Tupana. Rü tachiga nixĩ ga naxŭmatüxŭ ga yema ore. Erü yixema aruchunecü ũxe rü yixema norü oarü puxwa puracüxe, rü ngèxguma tapuracüeyane rü tanaxwèxegü na ítananguxèēgüxŭ i ngēma norü o i tüxna ũxŭ. ¹¹ Rü toma rü wüxi ya nanetüchire ya itatoxŭnerüŭ tixŭgü ga yexguma pemaã nüxŭ tixuxgu ga Tupanaãrŭ ore. ¿Rü ñuxma rü tama éxna i pexcèx namexŭ na toxna penaxãxŭ i tacü i toxŭ taxuxŭ? ¹² Rü ngèxguma ngēma togü i orearü uruŭgü petanüwa nayauxgügu i ngēma nüxŭ taxuxŭ, rü maneca toma rü yexera name nixĩ i petanüwa tanayaxu i ngēma toxŭ taxuxŭ. Natürü i toma rü tama ngēmaãcü tanaxü. Erü toma rü guxŭ i guxchaxŭmaã taporae na tama pexŭ tanaguxchaxèxèxèx na Cristuaxŭ peyaxögüxŭ. ¹³ Pema nüxŭ pecuèx rü guxŭma i duŭxŭgü i tupauca ya taxŭnewa puracüexŭ, rü ngēma òna ya yima tupaucawa ngèxmaxŭtama nangõxgü. Rü ngēma duŭxŭgü i tupaucagu Tupanacèx naxŭnagü dèixŭ, rü nanade i ñuxre i ngēma namachi norü ngõxruŭ. ¹⁴ Rü ngèxgumarüŭ ta ya yixema nüxŭ ixugüxe i ore i tüxŭ maxèxèxèxŭ, rü tórü Cori nüxŭ nixu rü name nixĩ i tanayauxtanü i ngēma tũmaarü puracü. ¹⁵ Natürü i choma rü taguma ngēmaãcü chanaxü. Rü ñuxma na pexcèx chanaxŭmatüxŭ i ñaã popera, rü tama tacü choxna pexãxüçèx nixĩ. Erü ngēma na taguma texèxŭtawa tacüçèx íchaçaxŭ, rü wüxi i chorü taãe nixĩ. Rü narümemaè chierü nixĩ na chayuxŭ naxŭpa na texé choxna nayaxuxŭ i ñaã taãe i choxŭ ngèxmaxŭ. ¹⁶ Rü ñuxma na nüxŭ chixuxŭ i ngēma ore i tüxŭ maxèxèxèxŭ, rü taguma ngēmacèx chaugü chicuèxŭŭ. Erü woetama ngēma nixĩ i chorü puracü ga Tupana choxna ãxŭ, rü ngēmacèx taxucürüwama chanangexrŭ. Erü poraãcü chi chachixexŭgu i ngèxguma tãü chima nüxŭ chixuxgu. ¹⁷ Rü ngèxguma chi chaugagu chitama chanaxŭxgu i ngēma puracü, rü nagu chi charüxĩnŭ na choxŭ naxãtanüxŭ. Natürü ngèxguma Tupana choxŭ muxŭãcüma chanaxŭxgu, rü chanaxŭama erü woetama ngēma nixĩ i chorü puracü ga Tupana choxna ãxŭ. ¹⁸ ¿Rü ñuxma rü tacü tá nixĩ i chorü natanü naxcèx i ngēma puracü i chaxüxŭ? Rü dücax, rü chorü natanü nixĩ i ngēma taãe i chayaxuxŭ i ngèxguma ngetanüãcüma nüxŭ chixuxgu i ngēma ore i

tūxŭ maxēxēxŭ. Rŭ ngēmaācŭ woo Tupanapēxewa name na petanŭwa chanayaxuxŭ i chorŭ natanŭ na ngēmamaā chamaxŭxŭcèx, natŭrŭ taguma texena naxcèx chaca.. ¹⁹ Rŭ woo taxŭxemēxēwa changēxma i chomax, natŭrŭ guxāmēxēwa chaugŭ changēxmaxēē, na ngēmaācŭ yexeraācŭ muxŭma i duŭxŭg ŭxŭ charŭngŭxēēxŭcèx na Cristuaxŭ yaxōgŭāxŭcèx. ²⁰ Rŭ ngēxguma chautanŭxŭ i Yudiŭgŭtanŭwa changēxmagu, rŭ namaā chaugŭ chawŭxiguēē na ngēmaācŭ nŭxŭ charŭngŭxēēxŭcèx na Cristuaxŭ yaxōgŭāxŭcèx. Rŭ woo tama yema Moīché ŭmatŭxŭ ga mugŭtŭŭwa changēxmagu, natŭrŭ chayanguxēēama i ngēma mugŭ na ngēmaācŭ Cristuxŭtawa chanagagŭxŭ i ngēma duŭxŭgŭ i ņuxma rŭ ta nagu īxŭ i ngēma mugŭ ga Moīché ŭmatŭxŭ. ²¹ Rŭ ngēxguma natanŭwa changēxmagu i ngēma duŭxŭgŭ i tama Yudiŭgŭ ixīgŭxŭ, rŭ ngēma duŭxŭgŭmaā chaugŭ chawŭxiguxēē na ngēmaācŭ nŭxŭ charŭngŭxēēxŭcèx na Cristuaxŭ yaxōgŭāxŭcèx. Natŭrŭ taguma íchanangēx i Tupanaārŭ mugŭ erŭ guxŭguma Cristuarŭ mugŭtŭŭwa changēxma. ²² Rŭ ngēxguma natanŭwa changēxmagu i ngēma duŭxŭgŭ i tama poraācŭ Cristuchigaxŭ cuēxgŭxŭ, rŭ choma rŭ ta ngēma duŭxŭgŭmaā chaugŭ chawŭxiguxēē, na ngēmaācŭ nŭxŭ charŭngŭxēēxŭcèx na Cristuaxŭ yaxōgŭāxŭcèx. Rŭ ngēmaācŭ guxŭma i duŭxŭgŭrŭŭ chaugŭ chixīxēē, rŭ nagŭxŭraŭācŭma naxcèx chadau na ngēmaācŭ dŭxwa Tupanaxŭtawa chanagagŭxŭcèx i ņuxre i nŭmagŭ. ²³ Rŭ ngēmaācŭ nixī i chapuracŭxŭ na guxŭwama nanguxŭcèx i ngēma ore i tŭxŭ maxēxēxŭ. Erŭ chanaxwēxe na choma rŭ ta choxŭ nangēxmaxŭ i ngēma maxŭ i taguma gŭxŭ, naxrŭŭ i guxŭma i ngēma duŭxŭgŭ i nŭxŭ yaxōgŭxŭ. ²⁴ Pema rŭ meāma nŭxŭ pecuèx i wŭxi i inŭca i nawa iŭaāchixŭ rŭ muxŭma inaxŭāchi, natŭrŭ wŭxixicatama nixī i ngēma nŭxīra ínguxŭ rŭ nayaxuxŭ i norŭ āmare. Rŭ name nixī i pegŭna pedau na Tupana pexna naxāxŭcèx i ngēma perŭ āmare. ²⁵ Guxŭma i ngēma duŭxŭgŭ i nŭgŭ ngŭexēēxŭ naxcèx i wŭxi i inŭca na togegŭxŭ naporamaexŭcèx, rŭ meā nŭgŭna nadaugŭ na ngēmaācŭ nayauxgŭāxŭcèx i norŭ āmare i paxaāchiruŭ ixīxŭ. Natŭrŭ yixema na yaxōgŭxŭ rŭ yigŭna tadaugŭ na meā naxŭgŭxŭcèx rŭ meā imaxēxŭcèx na nayauxgŭxŭcèx i tŭrŭ āmare i taguma gŭxŭ. ²⁶ Rŭ ngēmacèx i choma rŭ tama ņoma chauechitamare chiŭaxŭrŭŭ chixī, rŭ tama ņoma tacŭ i nŭgŭ dèixŭ i ngŭrŭanegumare idagŭxŭrŭŭ chixī. ²⁷ Rŭ ngēmacèx meā chaugŭmaā ichacuèx na taxuŭma i chaxuneārŭ ngŭchaŭ chaxŭxŭcèx. Erŭ tama chanaxwēxe i mexŭmaā togŭxŭ changuxēēchirēxācŭma chixexŭ chaxŭ rŭ ngemagagu tama chanayaxu i chorŭ āmare.

10

Nayaxucŭxēgŭ na tama nŭxŭ yacuèxŭŭgŭxŭcèx i tupananetachicŭnèxāgŭ

¹ Pa Chaueneēgŭx, chanaxwēxe i nŭxna pecuèxāchie ga tacŭ nŭxŭ na ngupetŭxŭ ga yema nuxcŭmaŭgŭxŭ ga tŭrŭ oxigŭ ga Moīchéwe rŭxīxŭ. Rŭ pema nŭxŭ pecuèx rŭ yexguma nawe naxīxgu rŭ wŭxi ga caixanexŭ napēxegu nixŭ rŭ nayadŭxŭ. Rŭ guxŭma ga yema duŭxŭgŭ rŭ wŭxigu Moīchémaā natŭŭgu nixīxŭtanŭ. Rŭ yexgumarŭŭ ta Moīchémaā nawa nichoŭ ga yema Taxtŭ ga Dauchiŭxŭ. ² Rŭ guxŭma ga yema duŭxŭgŭ rŭ yexguma wŭxigu Moīchémaā yema caixanexŭpechitatŭŭgu yaxīxŭtanŭgu rŭ yema Taxtŭ ga Dauchiŭxŭwa yachoŭgu, rŭ yemaācŭ nŭgŭ nangoxēēgŭ na Moīchéwema naxīxŭ. ³ Rŭ yexgumarŭŭ ta ga guxŭma ga yema duŭxŭgŭ nanangŭxgŭ ga yema pāŭ ga daxŭwa rŭyixŭ. ⁴ Rŭ guxŭma ga yema duŭxŭgŭ nayaxaxgŭ ga yema dexá ga Cristu nŭxna āxŭ. Yerŭ Cristu rŭ yema duŭxŭgŭxŭ ínixŭmŭcŭ ga yema ínaxŭŭwa, rŭ nŭxna nanaxā ga yema dexá ga yaxaxgŭxŭ. ⁵ Natŭrŭ narŭmumaē ga yema duŭxŭgŭ ga tama Tupanaārŭ ngŭchaŭ ŭgŭxŭ. Rŭ yemacèx ga yema duŭxŭgŭ rŭ yexma nayue rŭ yema nawogŭ ga naxŭnegŭ ga dauxchitawa ga taxŭema íxāpataxŭwa. ⁶ Rŭ guxŭma ga yema nangupetŭ na tŭrŭ cuèxruŭ yīxŭcè rŭ tama tŭrŭ oxigŭrŭxŭ chixexŭcèxama idaugŭxŭcèx. ⁷ Rŭ ngēmacèx tama name i nŭxŭ picuèxŭŭgŭ i tacŭ rŭ tupananetachicŭnèxāgŭ, yexgumarŭŭ ga ņuxre

ga nūmagū naxūgūxūrūū. Erū Tupanaārū ore i ūmatūxūwa rü tórū oxigūchigaxū nixu rü ñanagürū:

“Rü duūxūgū ínárütogū na nachibüexūcèx rü na naxaxegūxūcèx, rü ngēmawena rü inachigū na íyayūxexūcèx”,

ñanagürū i ngēma ore. ⁸ Rü tama name i yixema rü naī i ngemaã itape yexgumarūū ga ñuxre ga nūmagū naxūgūxūrūū. Rü yemacèx wūxitama ga ngunexūgu rü nayue ga 23,000. ⁹ Rü tama name i nūxū taxū ya tórū Cori na ñuxácü yaxna tamaã naxīnūxū yexgumarūū ga ñuxre ga nūmagū naxūgūxūrūū. Rü yemacèx nixī ga yema duūxūgūxū nangōxcuxū ga āxtapegū rü nayuxē. ¹⁰ Rü tama name i chixexū Tupanamaã pixugū yema ñuxre ga nuxcūmaūgūxū ga tórū oxigūrūū. Rü yemacèx ga Tupanaārū orearū ngeruū ga daxūcūāx rü nanadai. ¹¹ Rü guxūma ga yema nuxcūmaxūgūxū ga duūxūgūxū ngupetūxū, rü ñomaxūcūū rü tórū cuèxruū nixī. Rü naxūmatū na ngēmawa nūxū icuáxūcèx na ñuxácü Tupana naxwèxexū na imaxēxū i yixema i ñomaūcūū. ¹² Rü ngēmacèx ya yíxema tügūgu rüxīnūxē na taporaxū i Tupanapēxewa, rü name nixī na meã tügūna tadauxū na tama chixexūgu tanguxūcèx. ¹³ Rü ñuxma rü ta taguma pexcèx ínangu i ngúchaxū i chixexū i taxucürūwama namaã yaxna pexīnūexū. Rü name nixī i Tupanana perūyoū erū nūma rü aixcūma nayanguxēē i ngema tamaã inaxunetaxū rü taxūtáma nawa pexū nawogū i ngúchaxūgū i taxucürūwama yaxna namaã pexīnūexū. Natürū ngexguma tá ngúchaxūgū i chixexū pexcèx ínguxgu rü nūma rü tá pexū ínapoxū na tama nagu peyixūcèx. ¹⁴ Rü ngēmacèx, Pa Chaueneēgū ya Pexū Changechaūgūxex, jrū nūxū perūxoe i ngema nacūmagū i tupananetachicūnèxāgūcèx naxūgūxū i ngema duūxūgū i tama yaxōgūxū! ¹⁵ Pemaã nūxū chixu i ngēma ore, erū chauxcèx rü duūxūgū i nūxū cuáxū pixīgū. Rü pema tátama nagu perūxīnūē i ngēma pemaã nūxū chixuxū. ¹⁶ Rü ngēxguma òna i üünexūcèx ingutaquēxegūgu, rü yaxaxgūgu ya yima binu ya üünecū rü moxē naxcèx ixāgūgu, rü ngēmaācū yigū tangoxēē na Cristu ya taxcèx nagū ibacūwe rüxīxū. Rü ngēxguma nangōxgūgu i ngēma pāū i íbücuxū, rü ngēmaācū yigū tangoxēē na Cristu ya taxcèx naxūne íxácūwe rüxīxū. ¹⁷ Rü woo na imuxū i yixema, natürū wūxitama i pāū tangōxgū. Rü ngēmaācū nixī i wūxitama íxīgūxū erū wūxiwetama tarūxī. ¹⁸ jrū dücax i ngēma Yudígū i nangōxgūxū i ngēma naxūnamachi i Tupanacèx nadèixū! Rü ngēxguma wūxigu nūgūmaã nangōxgūāgu, rü guxūma i ngēma nangōxgūxū rü ngēmaācū nūgū nangōxēē na wūxigu Tupanawe naxīxū. ¹⁹ Rü ñuxma na ngēma ñachaxū, rü tama chanaxwèxe i nagu perūxīnūē na naxūünexū i ngēma namachi i ngēma duūxūgū i tama yaxōgūxū norū tupananetachicūnèxācèx dèixū. Rü tama chanaxwèxe i nagu perūxīnūē na tacūwa namexū i ngēma norū tupananetachicūnèxāgū, erū nangearū maxūāx. ²⁰ Natürū pemaã nūxū chixu rü ngēxguma ngēma duūxūgū i tama Tupanaxū cuèxgūxū, norū tupananetachicūnèxācèx nadaiāgu i tacū rü naxūna, rü tama Tupanacèx nixī i nadaiāxū, natürū ngoxogūcèx nixī i nadaiāxū. Rü tama chanaxwèxe i ngoxogūtanūxūxū pegū pixīgūxēē. ²¹ Rü pema na peyaxaxgūxū ya yima binu ya tórū Corixū namaã picuèxūūgūcū rü taxucürūwama namaã pexāmūcū i ngēma duūxūgū i Chatanáwe rüxīxū. Rü pema na tórū Coriarū mechawa penangōxū i ngēma òna i nūxū namaã picuèxūūgūxū rü taxucürūwama ngēma duūxūgū i Chatanáwe rüxīxūārū mechawa peyachibüe. ²² jrū ñuxū ñapegūxū i ñuxmax? ¿Éxna penanuxēēchaū ya tórū Cori? ¿Éxna pexcèx rü nūxū tarūporamaēgū i yixemax?

Name nixī i taeneēarū mexūc èx tadaugū rü tama i tóxrütama

²³ Pema rü ñaperūgūgū:

“Marū name na tanaxūxū i tacū i tanaxwèxegūxū”, ñaperūgūgū. Rü aixcūma nixī i ngēma, natürū tama tüxū name i guxūma i ngēma íxūxchaūxū. Rü ngēmaācū Cristu tüxū íngaxūxēē na naxūxūcèx i ngēma inaxwèxexū, natürū tama guxūma i ngēma íxūxū tüxū narūngūxēē na yexeraācū meã yaxōgūamachigūxūcèx. ²⁴ Rü tama name nixī i tóxrütama

mexūcèx tadaugü, natürü name nixī i togüarü mexūcèx tadaugü. ²⁵ Rū marü name i penangõx i nagúxūrauxū i namachi i namaã nataxegüxū, natürü taxucèxma tüxcüü naxcèx ípeca ngoxi marü tupanametaxüxū namaã yacuèxüxügüxū i namachi yixī. ²⁶ Erü ñoma i naãne rü guxüma i nawa ngèxmaxū, rü tórü Cori ya Tupanaarü nixī. ²⁷ Rū ngèxguma chi wüxi i duüxü i tama yaxõxū pexna uxgu na naxütawa peyachibüexūcèx, rü chi ngema pexīxgu, rü marü name i penangõx i guxüma i õna i pepèxegu yaxüxüchixū. Rū taxucèxma tüxcüü naxcèx pexoegaãe rü nüxna peca na ngextá ne naxüxū i ngèma namachi i pemaã nangõxū. ²⁸ Natürü ngürüãchi wüxie tá pemaã nüxū tixu rü ñatarügü:

“Ñãã namachi rü tupanametachicünèxácèx yamèxgüxū i naxünawa ne üxū nixī”, ñatarügü. Rū ngèxguma i pema rü tama name na penangõxū i ngèma namachi na tama chixexügu tüxū penguxèèxūcèx ya yíxema pemaã nüxū ixuxe, rü tama ngèmacèx taxoegaãèxūcèx i tümax. ²⁹ Rū tama pechiga nixī i chidexaxū i ngèxguma:

“Na tama taxoegaãèxūcèx”, ñachagu. Natürü yíxema pemaã nüxū ixuxechiga nixī i chidexaxū. Natürü bexmana ngürüãchi wüxi i yaxõxū tá cuxna naca rü ñanagürü tá cuxū:

“¿Tüxcüü i togü naxcèx oegaãèxügü choxna cunachüxu na tama chanaxüxū i tacü i chanaxwèxexū? ³⁰ Rū ngèxguma chi Tupanana moxè chaxãxgu naxcèx i ngèma õna i changõxū, ¿rü tüxcüü i ngèma õnacèx choxū quixu?” ñanagürü. ³¹ Dücèx, pemaã nüxū chixu rü name nixī i guxüma i ngèma pexüxümaã Tupanaxū picuèxüxügü. Rū ngèxguma tacü pengoxgügu rü exna tacü pixaxgügu rü èxna tacü i to pexügügu, rü name nixī i ngèmamaã Tupanaxū picuèxüxügü. ³² Rū tama name i penaxü i tacü i togüxū chixexügu yixèèxū, rü woo Yudíugü yixígügu rü èxna tama Yudíugü yixígügu, rü èxna yaxõgüxū yixígügu. ³³ Rū choma rü guxüwama guxüxüma chataãèxèèchaxū. Rū ngemacèx tama chanaxü i ngema chomatama namaã chataãèxèxū, natürü chanaxü i ngema togü namaã taãxèxū na ngemaãcü nümagü rü ta nuxū nangúchaxū na yaxõgüãxū rü nayauxgüãxū i maxū i taguma gúxū.

11

¹ Rū name nixī i nagu pexī i chaucüma ngèxgumarüü i choma na Cristucümagu chixüxürrü.

Name nixī i ngexügü rü mexü i nacümagu naxī

² Pa Chaueneëgüx, pemaã chataãe erü guxügüma chaugu perüxñüë rü nagu pexī ga yema nguxèètae ga pexū changúexèèxū. ³ Natürü chanaxwèxe i nüxū pecuèx na Cristu rü wüxichigü i yatüeru na yíixū. Rū yatüxügü rü naxmèxëru nixígü ngèxgumarüü ya Tupana rü Cristueru na yíixū. ⁴ Rū ngèmacèx i ngèxguma wüxi ya yatü ngutaquèxewa yumüxègu rü èxna Tupanaarü orexū yaxuxgu, rü tama ínangèxüchipatèxegu, rü ngèma rü wüxi i chixexū nixī i Cristupèxewa naxüxū. ⁵ Natürü ngèxguma chi wüxi i ngecü ngutaquèxewa yumüxègu rü èxna Tupanaarü orexū yaxuxgu, rü chi tama ngígü natüerugu, rü ngèma rü wüxi i chixexū nixī i ngítepèxewa naxüxū. Rū ñoma ngígü yadüeruxürrü iyixī. ⁶ Erü ngèxguma chi tama ngígü natüeruchaügu, rü narümemaë nixī i noxtacüma ngígü ibèixeru. Natürü ngèxguma chi wüxi i ngürü ãne yixígü i ngèma na ngígü nabèixeruxū rü èxna ngígü yadüeruxū, rü narümemaë nixī i ngígü itüeru. ⁷ Natürü yatügü rü tama name na nügü natüerügüxū. Yerü ga Tupana rü nügüraüãcü nanaxü ga yatü rü Tupanachipeta nixī. Rü yima yatüwa nixī i nangóxū na ñuxãcü namexèchixū ya Tupana. Rū ngèma ngecüwa nixī i nangóxū na ñuxãcü namexü ya yatü. ⁸ Yerü yexguma noxri Tupana naxüxgu ga yatü, rü tama ngecüwa nixī ga naxüãxū. Rū ngíma waxi nixī ga yatüwa ngíxū naxüxū. ⁹ Rū yatücèx nixī ga Tupana ngíxū üxū ga ngecü, rü tama ngecücèx nixī ga Tupana naxüxū ga yatü. ¹⁰ Rū ngèmacèx name nixī i ngígü itüeru na duüxügüpèxewa rü Tupanaarü orearü ngeruügü i daxücüãxgüpèxewa nangóxūcèx na ngítemèxèwa nangèxmaxū. ¹¹ Natürü Tupanapèxewa rü taxuüma nixī ya yatü ega natauxgu i ngecü. Rū ngèxgumarüü ta

i ngecū rü taxuūma iyixī ega natauxguma ya yatü. ¹² Yerü yexguma noxri Tupana ngīxū ūxgu ga ngecū, rü yatüwa nixī ga ngīxū naxūxū. Rü ngēxgumarūū ta ya yatü rü ngecūwa nixī i nabuxū. Natürü Tupana nixī ya naxücū i guxūma i duūxūgū. ¹³ Rü pematama tá penangugū rü ngoxi name na wüxi i ngecū rü tama ngīgū natüeruācūma nayumūxēxū. ¹⁴ Rü woetama tórü bucūma nixī i nūxū na icuáxū na wüxi i āne yīxū na nügū namēxyaexēxū i wüxi i yatūxū. ¹⁵ Natürü ngecūcèx rü wüxi i mexēchixū nixī na namēxyaexū. Erü Tupana rü ngīxna nanaxā i ngīyae na ngēmamaā ngīgū natüeruxūcèx. ¹⁶ Natürü ngēxguma chi texé ngēmachiga tügū choxūgagūgu, rü name nixī i nūxū tacuèx na ngēmatama yīxū i tacūma rü nacūma i guxūma i yaxōgūxū i guxūnema ya tupaucagūwa.

Duūxūgū rü chixri namaā inacuèxgū ga Coriarü òna i üünexū

¹⁷ Rü ñuxma i ñaā popera i pexcèx chaxūmatūxūwa rü pemaā nūxū chixu rü nangēxma i wüxi i pecūma i chixexū i tama namaā chataāēxū. Erü chauxcèx i ngēma perü ngutaquēxegū rü pexū nachixexēē, rü tama aixcūma perü meruūgū nixī. ¹⁸ Erü duūxūgū chomaā nūxū nixugūgū rü ngēxguma tórü Coricèx pengutaquēxegūūxgu rü pegū pitoye. Rü ngāxūgu chayaxō na aixcūma yīxū i ngēma nūxū yaxugūgūxū. ¹⁹ Choma rü nūxū chacuèx na aixcūma woe tátama yīxū i pegū pitoyexū na ngēmawa nūxū icuáxūcèx na texégū tiīxū ya yīxema aixcūma Cristuarü duūxūgū ixīgūxe. ²⁰ Rü ngēma pegū na pitoyexūgagu nixī na tama aixcūma tórü Corixū picuèxūūgūācūma yīxū i penangōxū i tórü Coriarü òna i Üünexū i ngēxguma pengutaquēxegūūxgu. ²¹ Erü ngēxguma penangōxgu i ngēma òna i Üünexū rü wüxichigū rü peñuxāēgū na pexira na penayaxuxūcèx i ngēma òna. Rü yoxni i ngēma togū rü ngēxma nataiyae, rü togū rü nayaxaxgū ya binu ñuxmata nangāxē. ²² ¿Éxna pengechiūgū ecèx tama ngēma pehibūexū rü pexaxegūxū? ¿Tūxcūū nūxū pexoe i ngēma togū i yaxōgūxū rü penaxāneēxēē i ngēma yaxōgūxū i ngearü ngēmaxūāxgūxū? ¿Rü tacūxū tá pemaā chixu i ñuxmax? ¿Pexcèx rü tá pemaā chataāēxū? Dūcèx, pemaā nūxū chixu rü tama pemaā chataāē naxcèx i ngēma pexūgūxū.

Tórü Coriarü òna i üünexūchiga

²³ Rü ngēma nguxēētae i pemaā nūxū chixuxū rü tórü Corixūtawatama chanayaxu. Rü yexguma tórü Cori ga Ngechuchuxū ínaxuaxūgu, rü yematama chütaxūgu rü nūma rü nanayaxu ga wüxi ga pāū. ²⁴ Rü Tupanana moxē naxā, rü yemawena rü inanabūcu, rü ñanagürü:

“Ñaā nixī i chaxune i pexcèx ichaxāxūchiga. ¡Rü penangō i ñaā pāū na ngēmaācū peāēwa choxna pecuèxāchiexūcèx!” ñanagürü. ²⁵ Rü yexgumarūū ta ga chibūwena rü Ngechuchu nanayaxu ga wüxi ga pochiyu ga binuchiūmaā āācuxū, rü ñanagürü:

“Rü daa binu rü wüxi i cuèxruū nixī na ngexwacèx Tupana duūxūgūmaā ixunetaxū i maxū i taguma gúxūchiga. Rü chaugū ya pexcèx ibacūmaā nixī i Tupana pexū nūxū cuèxēēxū i ngēmachiga. Rü ngēxguma ñuxguacū daa binu pixaxgūgu rü ñuxma choma na chanaxūxūrūū tá penaxū na peāēwa choxna pecuèxāchiexūcèx”, ñanagürü ga Ngechuchu. ²⁶ Rü guxūguma i ngēxguma penangōxgu i ñaā pāū rü peyaxaxgūgu ya daa binu rü ngēmawa tá duūxūgūxū nūxū picuèxēē na ñuxācū tórü pecaducèx nayuxū ga tórü Cori. Rü ngēmaācū tá penaxū ñuxmatáta wena nataegu i nūmax.

Texegūcèx nixī i tórü Coriarü òna i üünexū

²⁷ Natürü ngēxguma chi texe tama tügū tamexēēarü maxūxācūma nangōxgu i Coriarü pāū i üünexū rü tayaxaxūxgu ya yima binu ya üünecū, rü pecadu taxū napewa ya tórü Cori ya taxcèx yucū rü nagū ibacū. ²⁸ Rü ngēmacèx naxūpa na tanangōxū i ngēma pāū rü na tayaxaxūxū ya yima binu, rü name nixī i wüxichigū meā tūmaarü maxūgu tarūxīnū ngoxi nataxuma i tacū rü chixexū i tūmaarü maxūwa. ²⁹ Erü ngēxguma tama tügū tamaxēēarü maxūācūma tanangōxgu rü tayaxaxūxgu, rü tügūutama poxcuwa taga.

Erü tama aixcūma tayaxō na tōrū Corichiga yixīxū i ngema pāū rü yima binu.. ³⁰ Rū ngēmacèx nixī i muxūchixe i petanūwa rü pīdaaweexū rü peturaexū, rü ñuxre i togū rü marū nayuexū. ³¹ Natürü ngēxguma chi tōrütama maxūgu rüxīnūegu naxūpa na nangōxū i ngēma Coriarū òna, rü nūma rü taxucèx tūxū napoxcue. ³² Natürü ngēxguma tōrū Cori ñoma i tōrū maxūwa tūxū poxcugu, rü ngēmaācū tūxū inayarūwēxāchixēē na tama yixcūra naāneārū guxgu tūxū napoxcuxūcèx wūxigu namaā i ngēma duūxūgū i tama yaxōgūxū. ³³ Rū ngēmacèx, Pa Chaueneēgūx, ngēxguma pengutaquēxegūgu na penangōxūcèx i ngēma òna i üünexū, name nixī i pegū ípenanguxēē na guxāma wūxigu meā penangōxūcèx. ³⁴ Rū ngēxguma chi texé taiyèxgu, rü name nixī i tūmapatawatama tachibū na tama Tupana pexū poxcuexūcèx naxcèx na chixexū pexūexū i perū ngutaquēxegūwa. Rū ngēma to i guxchaxūgū i pexū ngēxmaxū, rü choma tá chanamexēē i ngēxguma petanūwa chaxūxgu.

12

Ngēma cuèx i Tupanaāē i Üünexū tūxna āxūchiga

¹ Pa Chaueneēgūx, chanaxwèxe i nūxū pecuèx na ñuxācū yīixū i ngēma cuèx rü ñuxacū na yixīxū i ngema tauxcha i Tupanaāē i Üünexū tūxna āxū. Rū ngēmachiga nixī i pemaā nūxū chixuxchaūxū i ñuxmax. ² Rū pema meāma nūxū pecuèx ga yexguma tauta Cristuaxū peyaxōgūgu, rü pegū nūxna pexāgū ga tupanametachicūnèxāgū ga tama idexaxū. ³ Rū ngēmacèx i ñuxma rü chanaxwèxe i meā nūxū pecuèx rü taxucūrūwama texe ya Tupanaāē i Üünexū tūmawa ngexmaxe rü chixri Ngechuchuchuga tidexa. Rū ngexgumarūxū ta rü taxucūrūwama texe ngūrūmare tūechama rü:

“Ngechuchu rü tōrū Cori nixī”, ñatarūgū ega tama Tupanaāē i Üünexū tūxū muxgu na ngēmaācū tidexaxūcèx. ⁴ Rū nūma ya Tupana rü duūxūgūna nanaxā i naguxūraū i tauchagū. Natürü ngema Naāxē i Üünexū i nawa ne naxīxū i ngema tauchagū rü wūxitama nixī. ⁵ Nangēxma i nagúxūraūxū i Tupanaarū puracū, natürü yima tōrū Cori ya tūxna naxācū i ngema puracūgū rü wūxitama nixī. ⁶ Rū Tupanaārū pora rü nagúxūraūācū nangox. Natürü wūxitama nixī ya yima Tanatū ya tawa gúxūraūācū nangoxēēcū i ngema norū puracū. ⁷ Rū ngema Naāē i Üünexū wūxixewachigū nanangoxēē i Tupanaarū pora i norū duūxūgūtanūwa na ngemaācū guxāarū ngūxēēruū yixīxūcèx. ⁸ Rū Naāē i Üünexū rü tūmāxena rü nanaxā i tauxcha na ucūexū tacuáxūcèx. Rū ngēmatama Naāē i Üünexū rü togueāxū rü nanatauxchaxēē na nūxū tacuáxū na mea tangúxēētaexū i Tupanaarū ore. ⁹ Rū togue rü ngēmatama Naāē i Üünexū tūxū nanatauxchaxēē na Tupanana tarūyoexūcèx. Rū togue rü tūxna nanaxā i pora na ngēmamaā naxcèx tayataanegūxēēxūcèx i ngēma ídaaweexū. ¹⁰ Rū togue rü tūxna nanaxā i pora na tanaxūxūcèx i mexūgū i Tupanaārū poramaā ūxū. Rū togue rü tūxū nanatauxchaēē na nūxū tixuxūcèx i Tupanaārū ore. Rū togue rü tūxna nanaxā i cuèx na nūxū tacuáxūcèx i tacū yīixū i ngoxogūarū ixīxū rü tacū yīixū i Tupanaāē i Üünexūārū ixīxū. Rū togue rü tūxna nanaxā i tauxcha na ngēma tama nūxū tacuáxū i nagawa tidexaxūcèx. Rū togue rü tūxna nanaxā i cuèx na tanangoxēēxūcèx na tacūchiga yīixū na tidexaxū ya yíxema to i nagawa idexáxe. ¹¹ Rū guxūma i ngēma rü Tupanaāē i Üünexūtama nixī i naxūxū. Rū nūma nixī i wūxichigū i duūxūna naxāāxū i ngēma cuèx i nūma nanaxwèxexū na nūxna naxāāxū.

Guxāma i yaxōgūxū rü wūxitama i naxūnewa naxūgū

¹² Rū duūxūxūne rü woo muxūgu nixūye, natürü wūxitama i naxūne nixī. Rū ngexgumarūxū ta i ngema Cristuāxū yaxōgūxū rü woo namu, natürü wūxitama i naxūnewa naxūgū. ¹³ Rū yexguma íbáiūgu rü Tupanaāē i Üünexū rü wūxitama i naxūne tūxū nixīgūxēē. Rū woo Yudíūgū na ixīgūxū, rü éxna tama Yudíūgū na ixīgūxū, rü

woo togümēxēwa ingexmagūxū rü ēxna taxúxemēxēwa ingēxmagūxū, natürü wüxitama i naxūne tūxū nixīgūxēē i nūma i Naāē i Ūünexū i nūxicatama ixīxū. Rū guxāma i yixema rü marü tūxna nangu i ngēma Naāē i Ūünexū. ¹⁴ Wüxi i naxūne rü tama naxāmenāxamare, natürü muxūgu nixūye. ¹⁵ Rū ngēxguma chi yima nacutü ñaxgu:

“Rū ñuxma na tama naxmēx chiīxū, rü ngēmacèx tama ngēma naxūnewa changēxma”, ñaxgu, rü tama ngēmacèx nūxū narūxo na ngema naxūnewa nangexmaxū. ¹⁶ Rū ngēxguma chi yima naxpaxchinü ñaxgu:

“Rū ñuxma na tama naxētü chiīxū, rü ngēmacèx tama naxūnewa changēxma”, ñaxgu, rü tama ngēmacèx nūxū narūxo na ngema naxūnewa nangexmaxū. ¹⁷ Rū ngēxguma chi guxūma i naxūne rü naxētü yixīgu, ¿rū tacūmaā chi i nūxū naxīnūxū i ngema naxūne? Rū ngēxguma chi guxūma i naxūne rü naxmachixē yixīgu, ¿rū tacūmaā chi i nūxū nawāxīxū? ¹⁸ Natürü Tupana ga naxúcū ga taxūne, rü ngexta nūma ínanaxwèxexūwa nanangexmaxēē i taeru rü tachacüügü rü taparagü. ¹⁹ Rū ngēxguma chi nataxuxgu i norü üyechigü i taxūne rü chi naxāmenēxāmare. ²⁰ Rū ngema naxūne rü woo muxūgu nixūye, natürü wüxitama i naxūne nixī. ²¹ Rū taxetü rü taxucürüwa taxmēxū ñanagürü:

“Choma rü tama chacuxwèxe”, ñanagürü. Rū ngēxgumarüü ta i taeru rü taxucürüwa tacutügūxū ñanagürü:

“Choma rü tama chapexwèxe”, ñanagürü. ²² Natürü ngēma yexeraācū āücūmaxū i taxūnewa, rü ngēma nixī i yexera nanaxwèxexū i taxūne. ²³ Rū ngēma taxūnewa yexeraācū naxcèx ixānexū, rü ngēma nixī i yexera meā ixūxchiruxū. Rū ngēma taxūnewa ngēxmaxū i tama inaxwèxexū na nangóxū, rü ngēma nixī i yexera meā idūxūxū. ²⁴ Natürü tama ngēmaācū tanaxū namaā i ngēma taxūnewa ngēxmaxū i guxāxūma iwéxū. Rū ngēmaācū Tupana nanaxū i taxūne, na yexeraācū nūxna idauxúcèx i ngēma yexera naxcèx ixānexū. ²⁵ Rū ngēmaācū Tupana nanaxū i taxūne na wüxichigü i norü üye nügügu naxīnūexúcèx rü nügü nangūxēēgūxúcèx. ²⁶ Rū ngēxguma chi wüxi i ngēma taxūnearü üye nūxū nguxgux, rü guxūma i ngēma togü i natanūxūgü rü ta nūxū nangux. Rū ngēxguma chi wüxi i ngēma taxūnearü üye taēxgu, rü guxūma i ngēma togü i natanūxūgü rü ta nataāēgü. ²⁷ Rū ñuxma i wüxichigü i pema rü Cristuxūnearü üye pixīgü, rü ngema naxūnewa pexügü. ²⁸ Rū ngēmacèx ya Tupana rü nanaxwae na ñaacü nügü inanuxū i norü duūxūgü: Rū yixema tūxira tūxū naxunetagūxe tixī ya norü puracūwa tūxū namugūxe. Rū tūxū naxuneta ya togegü na nūxū tixugūxúcèx i norü ore. Rū tūxū naxuneta ya togegü na duūxūgūxū tangūxēēxúcèx i norü ore, rü togegü na tanaxūgūxúcèx i mexūgü i Tupanaärü poramaā taxūgūxū. Rū togegü rü tūxū nanatauxchaxēē na tanameexēēxúcèx i idaaweexū, rü togegü na nūxū tarūngūxēēgūxúcèx i ngema tacü nūxū taxuxū, rü togegü yaxōgūxūärü āēxgacügü na tixīgūxúcèx. Rū tūxū nanatauchaxēē ya togegü na ngēma naga i tama nūxū tacuáxūwa tidexagūxúcèx. ²⁹ Rū tama guxāma Tupana tūxū imugūxe tixīgü, rü tama guxāma Tupanaärü orearü uruū tixīgü. Rū tama guxāma norü orewa nguxēētaegūxe tixīgü, rü tama guxāma nūxū tacuèx na tanaxūxū i mexūgü i taxūgü i Tupanaärü poramaā üxū. ³⁰ Rū tama guxāma nūxū tacuèx na tanameexēēxū i duūxūgü i idaaweexū. Rū tama guxāma nūxū tacuèx na nawa tidexagūxū i wüxi i naga i tama nūxū tacuáxū. Rū tama guxāma nūxū tacuèx na tanangoxēēxū na tacüchiga yadexaxū i ngēma duūxūgü i tama nūxū nacuáxū i nagawa idexaxū. ³¹ Rū name nixī inaxcèx pedèux na Tupana pexna naxāxúcèx i ngēma cuèx rü tauxchagü i rümemaegūxū.

Yigü na ingechaügūxūchiga

Natürü i ñuxma rü tá pexū changúxēē i tacü nixī i guxūma i ngēma pemaā nūxū chixuxūärü yexera rümemaēxū.

13

¹ Rū woo togū i nagawa chideaxgu, rū woo Tupanaārū orearū ngeruūgū i daxūcūāxgawa chideaxgu, natūrū űoma wūxi i tacū i āgaxūrūūmare chixī ega tama guxāxū changechaūgu. ² Rū woo nūxū chacuèxgu na meā duūxūgūmaā nūxū chixuxū i Tupanaārū ore, rū woo nūxū chacuèxgu i guxūma i tacū i ēxūguxū i Tupanachiga, rū woo choxū natauxchagu na chorū ōmaā chayaxīgachixēēxū ya mēxpūnegū, natūrū taxuwama chame ega tama guxāxū changechaūgu. ³ Rū woo ngēma duūxūgū i ngearū dīeruāxgūxūxū chayanuxgu i guxūma i tacū i choxū ngēxmaxū, rū woo Tupanaārū orecèx chaugū ichaxāxgu na ūxūwa choxū yagugūxūcèx, rū taxuwama choxū name i ngēma ega tama guxāxū changechaūgu. ⁴ Rū yīxema guxāxū ngechaūxē, rū yaxna namaā taxīnū, rū namaā tamecūma. Rū tama tixāūxāchiwèxe, rū tama togūxū tūgū tarūyexera rū tama tūgū ticuèxū. ⁵ Rū yīxema aixcūma guxāxū ngechaūxē, rū tama taguxchigawèxe, rū tama tūgūguxicatama tarūxīnū, rū tama tanuxwèxe, rū tama nagu tarūxīnūēcha ega texé chixexū tūmamaā ūxgu. ⁶ Rū tama namaā tataāē i chixexūgū, natūrū namaā tataāē i ngēma ore i aixcūma ixīxū. ⁷ Rū yīxema aixcūma guxāxū ngechaūxē, rū yaxna namaā taxīnū, rū guxūguma nūxū tayaxō, rū guxūguma mexūgu namaā tarūxīnū, rū taguma naxchi taxai woo tacū tūmamaā naxūxgu i togū. ⁸ Rū ngēma yigū na ingechaūxū rū tagutāma inayacuèx. Natūrū ngēma na nūxū ixuxū i Tupanaārū ore rū wūxi i ngunexūgu tá inayacuèx. Rū ngēma tama nūxū icuáxū i nagawa na idexaxū, rū tá ta inayacuèx. Rū ngēma űuxma nūxū icuáxū rū wūxi i ngunexūgu rū marū taxuwatāma tūxū name. ⁹ Erū ngēma tórū cuèx i űuxma tūxū ngēxmaxū, rū Tupanapēxewa rū naxīra. Rū ngēxgumarūū ta i ngēma norū orexū na ixuxū, rū wūxi i íramarexūtama nixī. ¹⁰ Rū guxūma i ngēma rū tá inayarūxo i ngēxguma Tupanapēxewa ingugūgu rū nūma tá guxūxūma tūxū nacuèxēēgu. ¹¹ Yexguma chabuxgu ga chomax, rū wūxi ga buxūrūū chidexa, rū buxū nagu rūxīnūxūgu charūxīnū, rū tama meā chauāēxū chacuèx. Natūrū yexguma marū chayèxgu, rū nūxū charūxo ga guxūma ga yema chorū bucūma. ¹² Rū ngēma űuxma nūxū idauxū i Tupanachiga, rū űoma wūxi i worua ya ūxachametūxewa yigū idauxūrūū nixī na taxcèx naxēxū. Natūrū yixcūra rū tá aixcūma meā nūxūxūchi tadau ya Tupana. Rū űuxma rū írarūwatama nūxū chacuèx i Tupanachiga. Natūrū wūxi i ngunexūgu rū tá meā nūxū chacuèx i guxūma i nachiga, ngēma na Tupana meāma choxū cuáxūrūū. ¹³ Rū űuxma rū nangēxma i tomaēxpūx i nacūmagū i guxūgutāma ngexmaxū. Rū űaāgū nixī:

1 Rū Tupanaāxū tayaxōgū

2 Rū nūxū ítananguxēē na nataeguxū ya Cristu

3 Rū nūxū tacuèx na tamūcūxū ingechaūxū.

Natūrū ngēma tomaēxpūxtanūwa rū ngēma rümemaexū nixī na guxāxū ingechaūxū.

14

Ngēma tama nūxū icuáxū i nagawa na idexaxūchiga

¹ ¡Rū naxcèx pedèux na guxāxū pengechaūxū! Rū ngēxgumarūū ta name nixī i naxcèx pedau i ngema tauxchagū rū ngema cuèx i Naāē i Ūūnexūwa ne īxū. Rū ngēma cuèx i yexeraācū penaxwaexū nixī na pexū natauxchaxū na nūxū pixuxū i Tupanaarū ore. ² Yīxema duūxē ya tama nūxū tacuáxū i nagawa idexaxe, rū Tupanamaā nixī i tidexaxū rū tama i duūxūgūmaā, erū taxúema nūxū tacuèx na űuxū űaxūchiga yīixū. Rū Tupanaāē i Ūūnexū nixī i tūxū idexaxēēxū, natūrū ngēma ore i nūxū tixuxū rū ēxūguxū nixī. ³ Naturū yīxema nūxū ixuxe i Tupanaarū ore rū ngema yaxōgūxūarū ngūxēeruxū tixī, erū yexeraācū cuèxwa tanangugūxēē rū nūxū tanangúchaxūxēē i ngema ore rū tanataāēxēē i ngema yaxōgūxū i ngexguma guxchaxū nūxū ūpetūgu. ⁴ Rū yīxema duūxē ya tama nūxū tacuáxū i nagawa idexaxe, rū tūmacèxtama nixī i ngema na yexeraācū mea Tupanaāxū tayaxōxūcèx. Natūrū yīxema nūxū ixuxe i Tupanaarū ore rū nūxū tixu na

yexeraãcū Tupanaãxū yaxōgūãxūcèx i guxūma i yaxōgūxū. ⁵ Choma chierū chanaxwèxe na guxāma i pema rü ngēma tama nūxū pecuáxū i nagawa na pidexagūxū. Natürü yexeraãcū chanaxwèxe na duūxūgūmaã nūxū pixuxū i Tupanaãrū ore. Erü ngēma to i nagawa na pidexagūxūãrū yexera narūmemaē na togūmaã nūxū pixuxū i Tupanaãrū ore. Natürü ngēma to i nagawa na idexaxū, rü name ega ngēma yaxōgūxūmaã nūxū ixuxgu na tacūchiga yīxū i ngēma dexa, na nūmagü rü ta yexeraãcū meã Tupanaãxū yaxōgūãxūcèx. ⁶ Rü ngēmacèx, Pa Chaueneēgūx, rü ngēxguma chi pexūtawa chaxūxgu, rü chi to i nagawa chideaxgu, ¿rū tacūwa chi pexū namexū i ngēma? Natürü ngēxguma chi pemaã nūxū chixuxgu i ngēma Tupana tūxū nūxū cuèxēxū, rü ēxna ngēma chomatama nūxū chacuáxū na aixcūma yīxū, rü ēxna ngēma ēxūguxū i ñuxma Tupana tūxū nūxū cuèxēxū, rü ēxna tacū rü to i nguxētae i Tupanachiga, rü ngēma waxi nixī i pexū mexū. ⁷ ¡Rü dücax ngēma paxetarū i quena rü ēxna arpa! Rü ngēxguma tãū chima texé meã napaūxgu, rü tãū chima nūxū tacuèx na tacūgu tanapaxūxū. ⁸ Rü ngēma churaragū, rü ngēxguma norü uwanügūmaã nügü nadaixchaūgu, ¿rū ñuxácū tá nügü namexēē na nügü nadeixūcèx ega tama meã nangógagu ya yima corneta ya dèixcèx naxcèx çaxūne? ⁹ Rü ngēxgumarūū ta pexū nangupetū. Rü ngēxguma chi perü conūmaã nūxū pixuxgu i dexa i taxúema nūxū cuáxū, ¿rū ñuxácū tá nūxū tacuèx na ñuxū ñaxūchiga yīxū i ngēma nūxū pixuxū? Rü ñoma ngürüanewa pidexagūxūrūū tá pixīgü. ¹⁰ Rü aixcūma nixī i namuxū i nagagü i ñoma i nañewa. Rü guxūma i ngēma nagagü rü name naxcèx i ngēma duūxūgü i nawa idexagūxū. ¹¹ Natürü ngēxguma chi tama nūxū chacuèxgu i ngēma naga i to i duūxū chomaã nawa idexaxū, rü ngēma duūxūcèx rü ñoma to i nachiuñecūñaxrūū chixī, rü chauxcèx rü ñoma to i nachiuñecūñax i duūxūrūū nixī i nūmax. ¹² Choma nūxū chacuèx rü pema rü pexū nangúchaū na pexū nangēxmaxū i ngēma nacūmagü i Tupanaãē i Üünexū tūxna āxū. Natürü name nixī i naxcèx pedau na guxūãrū yexera pexna naxāãxū i ngēma nacūmagü i namaã nūxū perüngūxēxū i guxūma i yaxōgūxū na yexeraãcū meã Tupanaãxū yaxōgūãxūcèx. ¹³ Rü ngēmacèx yixema duūxē ya taxúema nūxū cuáxū i nagawa idexaxe, rü name nixī i Tupanana naxcèx taca na tūxna naxāãxūcèx i cuèx na togūmaã nūxū tixuxūcèx na ñuxū ñaxūchiga yīxū i ngēma nūxū tixuxū. ¹⁴ Rü ngēxguma chi taxúema nūxū cuáxū i nagawa chayumūxēgu, rü chauãē nixī i ngēma yumūxexū. Natürü chomatama rü taxuūma chacuèx na tacūchiga yīxū i ngēma. ¹⁵ ¿Rü ñuxácū tá chayumūxēxū i ñuxmax? Rü marü name nixī ega taxúema nūxū cuáxū i nagawa chayumūxēgu, natürü chanaxwèxe i guxāma nūxū cuáxū i nagawa rü ta chayumūxē. Rü marü name nixī ega taxúema nūxū cuáxū i nagawa chawiyae. ¹⁶ Erü ngēxguma chi taxúema nūxū cuáxū i nagawa Tupanaxū quicuèxūūgu, rü yixema duūxēgü ya ngēma irūxīnūxē, rü taxucürüwa cumaã wūxigu Tupanaxū ticuèxūūgü, erü tama nūxū tacuèx na ñuxū ñaxūchiga yīxū i ngēma nūxū quixuxū. ¹⁷ Rü woo ngēma curü yumūxē rü namexēchixgu, natürü yixema duūxēgü ya ngēma irūxīnūxē rü taxuūma i mexū nawa tayaxu ega to i nagawa quideaxgu. ¹⁸ Tupanana moxē chaxā, erü perü yexera taxúema nūxū cuáxū i nagawa chidexa. ¹⁹ Natürü woo muxūma i ore i taxúema nūxū cuáxū i nagawa na chidexaxū, natürü ngēma yaxōgūxūãrū ngutaquēxegüwa rü chauxcèx rü narūmemaē chi nixī ega woo noxre i ore i meãma nūxū icuáxūwa namaã nūxū chixuxgu i Tupanaãrū ore na ngēmaãcū ngēmamaã meã chanangúexēxūcèx. ²⁰ Pa Chaueneēgūx, tama name i ñoma buxūgürūū chixri nagu perūxīnūe i ngēma ore i pemaã nūxū chixuxū. Rü narūmemaē nixī i ñoma buxūgürūxū pegü pixīgūxēē naxchēxwa i ngēma chixexū, natürü ngēma peru ñūwa rü penaxwèxe i duūxūgü i marü yaxūrūū mea nagu perūxīnūe rü nagu pexī i ngēma ore i pemaã nūxū chixuxū. ²¹ Tupanaãrū ore ga nuxcūmaūxū ga norü orearü uruū ümatūxū rü ñanagürü:

“Rü nuã tá chanamugü i to i nachiuñecūñax i duūxūgü na to i nagawa yadexagūxūcèx namaã i ñañ Yudíugü i tama yaxōgūxū. Natürü woo ngēmaãcū chanaxūxgu, rü

tāūtāma chauga naxīnūē i ngēma Yudíugü i tama irūxīnūēchaūxū”,
 űanagürü ga Tupana. ²² Rū ngēmacèx ngēma na taxúema nūxū cuáxū i nagawa idexaxū,
 rü wūxi i cuèxruū nixī naxcèx i ngēma duūxūgü i tama irūxīnūēchaūxū. Rū tama
 duūxūgü i marü yaxōgūxūcèx nixī i ngēma. Natürü ngēma Tupanaârü orexū na ixuxū,
 rü duūxūgü i marü yaxōgūxūcèx nixī na yexeraācü meā Tupanaāxū yaxōgūāxūcèx.
 Rū tama duūxūgü i tama irūxīnūēchaūxūcèx nixī i ngēma. ²³ Rū ngēxguma chi pema i
 yaxōgūxe pengutaquēxegügu, rü guxā chima to i nagawa pidexagügu, ¿rü űuxū űaxū tá
 ega petanügu naxūcuxgu i wūxi i duūxū i ngēma iyarūxīnūxū rü ēxna wūxi i duūxū i tauta
 yaxōxū? ¿Taux ēxna i nagu tá naxīnūxū na pexāūāēgūxū i pemax? ²⁴ Natürü ngēxguma
 chi guxāma i pema nūxū pixuxgu i Tupanaârü ore, rü chi petanügu naxūcuxgu i wūxi i
 duūxū i tama yaxōxū rü ēxna wūxi i duūxū i ngēma iyarūxīnūxū, rü tá nūxū naxīnū i
 ngēma Tupanaârü ore i nūxū pixuxū. Rū ngēmaācü tá nūxū nacuèx na nūma rü wūxi
 i pecaduāxū na yīxū. Rū nūgūgu tátama ínarūxīnū i ngēxguma nūxū naxīnūgu i ngēma
 nūxū pixugūxū. ²⁵ Rū ngēma chixexū i nūxīcatama nūxū nacuáxū rü tá naxcèx ínicuèx. Rū
 nūma rü ngēxma tá nacaxāpūxū, rü tá Tupanaxū nicuèxū. Rū tá nūxū nixu na aixcūma
 Tupana petanüwa nangēxmaxū.

Tama name i penaxīāchiāxēgü i perü ngutaquewa, rü name i meamare penaxü

²⁶ Dücèx, Pa Chaueneēgūx, űuxma tá pemaā nūxū chixu na űuxācü tá penaxūxū
 ega ngēxguma pengutaquēxegügu. Rū űuxre i pema rü marü name na Tupanaârü
 wiyaegu pewiyaegūxū, rü togue rü tangūxēētaegūxū, rü togue rü nūxū tixuxū i ngēma
 ore i Tupana tūxū nūxū cuèxēxū, rü togue rü nawa tidexagūxū i naga i tama nūxū
 tacuèxgūxū, rü togue rü tanangoxēēgūxū i ngēma dexa i to i nagawa nūxū yaxugūxū.
 Natürü guxūma i ngēma rü tanaxwèxe i yaxōgūxūārü ngūxēēcèx na yīxū, na yexeraācü
 yaxōgūāxūcèx rü meā Tupanacèx namaxēxūcèx. ²⁷ Rū ngēxguma to i naga i pema tama
 nūxū pecuáxūwa pidexagügu, rü name nixī i taxre rü ēxna tomaēxpūxicatama tidexagü.
 Rū tanaxwèxe i wūxiexira tidexa i noxri rü yīxcama ya togue. Rū ngēxguma chi texé
 to i nagawa ideaxgu, rü name nixī na tangēxmaxū ya wūxie ya nūxū ixuchigūxe na
 tacūchiga yīxū i ngēma ore i to i nagawa nūxū yaxuxū. ²⁸ Natürü ngēxguma chi tatauxgu
 na texé nūxū ixuchigūxū na tacūchiga yīxū i ngēma ore i to i nagawa nūxū yaxuxū, rü
 narūmemaē nixī na noxtacūma tama to i nagawa pidexagü i perü ngutaquēxewa. Rū
 narūmemaē i wūxichigü tūxica Tupanamaāxīcatama bexma tidexa. ²⁹ Rū ngēxgumarūū ta
 ngēxguma pengutaquēxegügu, rü name nixī i taxre rü ēxna tomaēxpūxicatama nūxū
 tixu i Tupanaârü ore. Rū ngēma togü i ngutaquēxetanūxū rü name nixī na meā
 nangugūgūāxū i ngēma ore. ³⁰ Natürü ngēxguma chi íyadexayane i wūxi i duūxū, rü
 Tupana tūmamaā ideaxgu ya togue ya ngēma rütuxe, rü name nixī na iyanachianexū
 i ngēma nūxīra idexaxū na tidexaxūcèx ya yīxema duūxē ya Tupana tūmamaā idexaxe.
³¹ Rū ngēmaācü guxāma i pema na Tupana pemaā idexaxū, rü name nixī i wūxichigü
 ípenanguxēē na pewa nanguxū na pidexagūxū i Tupanaârü ore. Rū ngēmaācü i ngēma
 togü i ngutaquēxetanūxūgü rü tá Tupanachiga meā nangúe rü tá nataāēgü. ³² Rū
 ngēmaācü tanaxwèxe i meāma tūmaāēmaā itacuèx ya wūxichigü ya yīxema Tupanaârü
 orexū ixuxe. ³³⁻³⁴ Erü perü ngutaquēxegüwa rü Tupana nanaxwèxe na meā penaxūxū i
 guxūma, rü tama nanaxwèxe na ngēma pexāūgatanūxū rü pegü ípetüexēēxū. Rū guxūma
 i togü i yaxōgūxūārü ngutaquēxegüwa rü marü nūxū nayapue na tama yadexagūxū i
 ngexūgü. Rū name nixī i pema rü ta ngēmaācü penaxū, erü nachuxu na yadexagūxū
 i ngexūgü i ngutaquēxegüwa. Rū name nixī na yatūgūga naxīnūēxū i ngexūgü, ngēma
 Tupanaârü ore tūxū muxūrū. ³⁵ Rū ngēxguma chi tacūxū nacuáxchaūgu i wūxi i ngexū,
 rü name nixī i nachīūwatama natena naca i nachiga i ngēma. Erü wūxi i āne nixī ega
 ngutaquēxewa yadeaxgu i wūxi i ngexū. ³⁶ Pa Corītiucūāxgūx, name nixī na nūxna
 pecuèxāchiexū na tama pewaxira ne naxūxū i Tupanaârü ore. Rū tama pexicatama nixī

i penayauxgūxū i ngēma. ³⁷ Rū ngēxguma chi texé tūgūgu rūxīnūgu na Tupanaārū orearū uruū tīxū rū ēxna tūgūgu tarūxīnūgu na Tupanaāē i Ūūnexū tūxna naxāxū i tacū rū cuèx, rū name nixī i nūxna tacuèxāchi na tórū Coriarū ore yīxū i ñāā ore i pexcèx chaxūmatūxū. ³⁸ Natürū ngēxguma chi texé tama nūxū cuáxchaūgu i ngēma pemaā nūxū chixuxū, rū name nixī i tama tūxū pecuáxchaū. ³⁹ ¡Rū ngēmacèx, Pa Chaueneēgūx, rū Tupanana naxcèx peca i cuèx na meāma nūxū pixuxūcèx i norū ore! ¡Rū tama penachuxu na to i nagawa yadexagūxū i duūxūgū! ⁴⁰ Rū perū ngutaquēxegūwa, rū name nixī na meā penaxūxū i guxūma. Rū tama name i ngēma pexāūgatanū rū pegū ípetūexēē.

15

Cristu na yuwa írūdaxūchiga

¹ Rū ñuxmax, Pa Chaueneēgūx, rū chanaxwèxe i nūxna pecuèxāchie i ngēma Tupanaārū ore i tūxū maxēxēēxū ga pemaā nūxū chixuxū. Rū yematama ore nixī ga pema peyauxgūxū. Rū ñuxma rū ngēmatama oregagu nixī i meā peyaxōgūxū. ² Rū ngēma oregagu nixī i pexū nangēxmaxū i maxū i taguma gúxū, ega aixcūma guxūguma peyaxōgūamagu. Natürū ngēxguma tama guxūguma peyaxōgūgu, rū natūcèxmamare nixī i ngēma perū ō. ³ Rū yexguma noxri petanūwa changuxgu, rū yema nūxira pexū changūxēēxū nixī ga yema chaxira togū choxū ngūxēēxū na Cristu rū tórū pecaducèx nayuxū, ngēma Tupanaārū ore i ūmatūxūwa nūxū yaxuxūrūū. ⁴ Rū yexgumarūū ta pexū changūxēēē na ñuxācū inatèxgūāxū, rū ñuxācū norū tomaēxpūx ga ngunexūgu rū wena na namaxūxū, ngēma Tupanaārū ore i ūmatūxūwa nūxū yaxuxūrūū. ⁵ Rū yexgumarūū ta pexū changūxēēē ga ñuxācū Pedrucèx na nangóxū ga Cristu, rū ñuxācū yixcūra rū norū ngúexūgū ga yamugūxūcèx na nangóxū. ⁶ Rū yemawena ga Cristu rū noxtacūma 500 arū yexera ga yaxōgūxūcèx nangox. Rū muxūma i ngēma duūxūgū rū ñuxma rū ta namaxē, natürū nūmaxū rū marū nayue. ⁷ Rū yemawena rū Chaūtiágucèx nangox, rū yixcama guxūma ga yema togū ga ngúexūgūcèx nangox. ⁸ Rū dūxwa chowa inayacuèx ga chauxcèx rū ta na nangóxū, woo ngürūāchimare nixī ga yema, ngēxgumarūū i wūxi i buxū i tautama norū ngunexūwa nanguyane buxūrūū. ⁹ Rū choma rū guxūma i ngēma togū i Tupana imugūxūtūūwa chaxū. Rū ngemacèx tama name i Tupana imuxūmaā choxū naxugūxū i duūxūgū, yerū nawe chingēchigū ga Tupanaārū duūxūgū rū poraācū chixexū chaxū. ¹⁰ Natürū ga Tupana rū chomaā namecūma, rū ngēmacèx i ñuxma rū choxū pedau na tacū chíxū rū ñuxācū na chíxū. Rū yema chomaā na namecūmaxū rū tama natūcèxma nixī. Yerū choma rū guxū ga togū ga yamugūxūārū yexera chanaxū ga Tupanaārū puracū. Natürū tama chauechama chanaxū ga yema puracū, natürū Tupana ga chomaā mecūmacū rū chomaā puracūcū nixī ga naxūcū ga yema puracū na nūxū chixuxūcèx ga norū ore. ¹¹ Natürū i ñuxma rū nūetama nixī ega woo choma chixīgu rū ēxna togū yixīgu ga pemaā nūxū ixuxū ga yema ore. Yerū yema ore ga pemaā nūxū tixuxū, rū Tupanaārū ore i tūxū maxēxēēxū nixī, rū yema nixī ga pixōgūxū.

Ñuxācū wena tá namaxē i duūxūgū i yuexū

¹² Marū pemaā nūxū tixu na Cristu rū yuwa ínadaxū. ¿Rū tūxcūū ñuxre i pema rū ñaperūgūgū:

“Yuexū rū tagutáma wena namaxē”, ñaperūgūgū? ¹³ Rū ngēxguma chi ngēma yuexū rū tagu chima wena namaxēgu rū yima Cristu rū tāū chima wena namaxū. ¹⁴ Rū yexguma chi Cristu tama wena maūxgu, rū ngēma ore i nūxū tixuxū i nachiga rū taxuwa chima name, rū natūcèxmamare chi nixī i perū ō. ¹⁵ Rū ngēxguma chi ngēmaācū yixīgu, rū toma i Tupanaārū orearū uruūgū rū doratēēxgūxū tixīgū. Erū nūxū tixu na Tupana Cristuxū wena maxēēxū. Rū ngēxguma chi tama aixcūma yixīgu na wena namaxēxū i yuexū, rū chi wūxi i doramare nixī na Tupana Cristuxū wena maxēēxū. ¹⁶ Rū ngēxguma chi ngēma yuexū rū tagu chima wena namaxēgu, rū ga Cristu rū chi ta tāū chima wena namaxū.

17 Rū yexguma chi Cristu tama wena maũxgu, rū natüçèxmamare chi nixĩ i peyaxõgũxũ, rū ñuxma rū chi ta perü pecadugagu ipeyarütauxe. 18 Rū chi ngẽmaãcü yixĩgu rū ngẽma duũxũgũ i Cristuaxũ yaxõgũxũ i marü yuexũ, rū chi ta tãu chima nüxũ nangẽxma i maxũ i taguma gũxũ. 19 Rū ngẽxguma chi ñoma i maxüçèxicatama yixĩgu na Cristuaxũ yaxõgũxũ, rū chi guxũ i togü i duũxũgũarü yexera tangechaütümüügü. 20 Natürü aixcũmaxũchi nixĩ ga Cristu ga yuwa na ínadxũ. Natanüwa i guxũma i ngẽma yuexũ i yixcũra tá írüdagũxũ, rū Cristu nixĩ ga namaã inaxügücü na ínadxũ, yerü nüma nixĩ ga nüxĩra wena namaxũxũ. 21 Rū yexgumarüũ wüxi ga yatügagu na nayuexũ ga duũxũgũ, rū ngẽxgumarüũ tá ta nixĩ na wüxi i yatügagu wena namaxẽxũ i ngẽma marü yuexũ. 22 Rū ngema na Adãügagu guxãma na yuexũ, rū ngẽxgumarüũ ta Cristugagu tá namaxẽxũ i guxũma i duũxũgũ i nüxũ yaxõgũxũ. 23 Natürü wüxichigü tá tümawa nangu na wena tamaxũxũ. Rū Cristu nixĩ ga nüxĩra maxücü. Rū ngẽxguma wena núma naxũxgu i nümax, rū ngẽxguma tá nixĩ i wena namaxẽxũ i ngẽma duũxũgũ i noxrü ixĩgũxũ. 24 Rū ngẽmawena tá nixĩ i nagũxũ i naãne. Rū ngẽxguma tá nixĩ ya Cristu i nüxũ naporamaẽxũ i guxũma i norü uwanügü. Rū ngẽxguma tá nixĩ i Nanatü ya Tupanana naxããxũ i guxũma na nüma namaã inacuáxüçèx. 25 Erü nüma ya Cristu rū ãëxgacü tá nixĩ ñuxmatáta nüxũ naporamaẽ i guxũma i norü uwanügü. 26 Rū ngẽma nawa iyacuáxũ i norü uwanü i tá nüxũ naporamaẽxũ, rū yu nixĩ. 27 Yerü Tupana rū marü Cristumẽxẽwa nanayexmagüxëë ga guxũma. Natürü woo Tupanaãrü ore nüxũ ixuxgu na Cristumẽxẽwa nangẽxmagüxũ i guxũma, natürü nümatama ya Tupana rū tama Cristumẽxẽwa nangẽxma. Yerü nüma ga Tupana nixĩ ga Cristumẽxẽwa nayexmagüxëããxũ ga guxũma. 28 Rū ngẽxguma guxũma Cristumẽxẽwa ngẽxmagügu, rū ñuxũchi nümatama ya Cristu ya Tupana Nane rū tá Nanatümẽxẽwa nügü nangẽxmaxëë. Yerü nüma ga Tupana nixĩ ga Cristumẽxẽwa nayexmagüxëããxũ ga guxũma. Rū ngẽmaãcü ya Tupana rū guxũmaã tá inacuèx. 29 Rū nangẽxma i ñuxre i duũxũgũ i petanüwa i Tupanaegagu yuexüchicüü íbaiũxũ. ¿Rü tüxcüü ngẽma naxügü? Rū ngẽxguma chi tama wena namaxẽgu i duũxũgũ i yuexũ, ¿rü tüxcüü ngẽma yuexüchicüü inabaiũ? 30 ¿Rü tüxcüü i toma rū guxũguma ãüçũmaxũwa tangẽxmagü? 31 Pemaã nüxũ chixu, Pa Chaueneëgũx, rū guxũ i ngunexũgu rū ãüçũmaxũwa changẽxma, rū tama nüxũ chacuèx i ñacü rū ngunexũgu Tupanaãrü oregagu tá na chayuxũ. Rū ngẽma rū aixcũmaxũchi nixĩ, ngẽxgumarüũ na aixcũma yĩxũ na choxũ nangẽxmaxũ i wüxi i taãë i taxũ i ñuxma na tórü Cori ya Ngechuchu ya Cristuaxũ peyaxõgũxũ. 32 Choma rū nuã Epéchiuwa rū Tupanaãrü orechigagu chorü uwanümaã poraãcü togü tachoxũgagü. Rū ñoma naẽxũ i idüraexũmaã togü tadèixürüü tixĩgü. ¿Natürü ñacüwa choxũ namexũ ga yema ega chorü maxũ i ñoma i naãnewa choxũ ngẽxmaxüçèxicatama yixĩgu? Rū ngẽxguma chi aixcũma yixĩgu na tama wena namaxẽxũ i yuexũ, rū marü name i ñatarügügü:

“¡Ngĩxã tachibüe rū taxaxegü, erü paxa tá tayue!” ñatarügügü. 33 ¡Natürü tãütama nawe perüxĩ i ngẽma duũxũgũ i ngẽmaãcü chixri idexagũxũ! Erü aixcũma nixĩ i ngẽma ore i ñaxũ:

“Rü texé ya chixexũ i duũxũmaã ãmücüxe, rū tüxũ inayanaxoxëë i tümacũmagü i mexũ”, ñaxũ. 34 Rū name nixĩ i meã pegüãëgu perüxĩnũë rū nüxũ perüxoe i ngẽma perü chixexũgü. Rū wüxi i perü ãne nixĩ na pemaã nüxũ chixuxũ rū ñuxre i pema rū tama aixcũma Cristuarü duũxũgü pixĩgũxũ rū tama aixcũma Tupanaxũ pecuèxgũxũ.

Ñuxãcü wena namaxẽ i yuexũgü

35 Natürü ngürüãchi tá texe pexna taca rū ñatarügügü pexũ:

“¿Ñuxãcü tá wena namaxẽxũ i yuexũ? ¿Rü nañuxraũxũ i naxũnemaã tá ínadxgũxũ?” ñatarügü tá pexũ. 36 Pa Duũxũ i Ngẽãëmarexũx ¡rü dücax! Rū ngẽxguma wüxi ya nanetüchire itoxgu, rū nüma ya yima naxchire rū nayu na ngemaãcü naxũxüçèx i ngẽma nanetü. 37 Rū ngẽma waixũmügu itoxũ, rū tama marü nanetü ixĩxũ nixĩ, natürü naxchire nixĩ ya yima itoxũne woo triguchire rū ëxna ngexürüxũmare i to i nanetüchire yixĩgu.

³⁸ Rū ngēxguma marū inatoxguwena, rū Tupana nixī i yanaxüxēēcü ya yima nachire na nūma nanaxwēxexüācūma yīxüçèx i ngēma nanetü. ³⁹ Rū tama guxü i naxünegü nawüxigu. Rū duüxēxüne rū nanatoraxü, rū naēxügüxüne rū to nixī, rū werigüxüne rū to nixī, rū choxnigüxüne rū to nixī. ⁴⁰ Rū ngēxgumarüü ta nangēxma i naxünegü i daxüguxü i naānecüāx, rū nangēxma i naxünegü i ñoma i naānecüāx. Rū ngēma daxüguxü i naānecüāx i naxünegü rū nüxü nangēxma i noxrütama mexü, rū ngēma ñoma i naānecüāx i naxünegü rū ta nüxü nangēxma i noxrütama mexü. Natürü tama nawüxigu i ngēma norü mewa. ⁴¹ Rū üèxcüarü yauracüü rū tama namaā nawüxigu i tauemacüarü yauracüü. Rū woramacurigüarü yauracüü rū to nixī. Rū nügütanüwa ya woramacurigü, rū tama nawüxigu i norü yauracüüwa. ⁴² Rū ngēxgumarüü tá ta naxüpetü namaā i naxünegü i ngēma duüxügü i yuexü. Erü ngēma naxüne i noxri nüxü ngēxmaxü rū iyarüxoxwēxexü nixī. Natürü ngēma naxüne i tá nüxü ngēxmaxü i ngēxguma wena namaxēgu, rū ngēma rū tagutáma inayarüxo. ⁴³ Rū ngēma naxüne i yuxü rū taxuwama name i ngēxguma inatēxgux. Natürü ngēxguma wena namaüxgu rū tá namexēchi. Rū ngēma naxüne i ñuxma turaxü rū ngēxguma wena namaüxgu rū tá naporá. ⁴⁴ Rū itanatèx i ngēma naxüne i ñoma i naānecüāx ixixü. Natürü ngēxguma ínadxgu, rū daxüçüāx i naxüne tá nixī. Rū ñuxma na nangēxmaxü i naxüne i ñoma i naānecüāx rū ngēmawa nüxü tacuèx na nangēxmaxü ta i naxüne i daxüçüāx. ⁴⁵ Tupanaärü ore i ümatüxüwa rū ñanagürü: “Guma nüxüraücü ga yatü ga Adáü rū nüxü nayexma ga ñoma ga naānecüāx ga naxüne ga paxaāchi maxüxü”,

ñanagürü. Natürü ya Cristu rū daxüçüāx nixī. Rū nūma nixī i tüxna naxāāxü i maxü i taguma gúxü. ⁴⁶ Noxri rū tüxü nangēxma i ñoma i naānecüāx i taxüne. Natürü yixcama rū Tupana tá tüxna nanaxā i to i taxüne i daxüçüāx ixixü. ⁴⁷ Guma nüxüraücü ga yatü ga waixümüwa ücü, rū ñoma ga naānecüāx nixī. Natürü tórü Cori ya Cristu rū daxüguxü i naānecüāx nixī. ⁴⁸ Rū ngēma taxünegü i ñoma i naānewa tüxü ngēxmaxü, rū guma Adáüxüne ga waixümüwa ücürüü nixigü. Natürü ngēma naxünegü i daxüwa nüxü ngēxmaxü i duüxügü, rū Cristuxünerüü nixigü. ⁴⁹ Rū ñgexgumarüü na Adáü ga waixümüwa ücürüü na yīxü i taxüne, rū ngēxgumarüü tá ta Cristu ya daxüwa ngēxmacürüü nixī i taxüne i yixcúra. ⁵⁰ Rū dücax, Pa Chaueneēgüx, pemaā nüxü chixu rū ñaā taxüne i namachinaxcèx rū naxchinèxānaxcèx, rū taxucürüwa Tupana āēxgacü íyīxüwa nangu. Erü ngēma iyarüxoxü, rū taxucürüwama Tupanaxütawa i ngextá taxuüma íyarüxoxüwa nixücu. ⁵¹ Natürü chanaxwèxe na nüxü pecuáxü i wüxi i ore i èxüguxü ga noxri Tupanaxīcatama nüxü cuáxü. Rū dücax, tāütáma guxā tayue, natürü guxāxüne rū tá naxüchicüü. ⁵² Rū ngürüāchimare wüxi i peāxētügu tá nixī i ngēma na naxüchicüüxü i taxüne i ngēxguma naāneärü guxgux naxāgagu ya corneta. Rū tá naxāga ya yima corneta, rū ngēxguma i ngēma duüxügü i yuexü rū tá inarüdagü na tagutáma wena nayuexüçèx. Rū yixema na imaxēxü rū tá naxüchicüü i taxünegü. ⁵³ Erü ngēma taxüne i yuxwēxexü rū woetama tama taixü rū tá naxüchicüü. Rū wüxi i ngexwacaxüxü i naxüne i aixcūma taixü rū tagutáma yuxü tá nixī. ⁵⁴ Rū ngēxguma ngēmaācü naxüchicüügu i taxüne i yuxwēxexü, rū tüxü nangēxmagu i taxüne i ngexwacaxüxü i taguma yuxü, rū ngēxguma tá nixī i yanguxü i Tupanaärü ore i ümatüxü i ñaxü:

“Marü inayarüxo na nayuexü i duüxügü. Rū Tupana rū marü yuxü narüyexera. ⁵⁵ Rū dücax, Pa Yux, ¿ngēxü i curü pora i namaā toxü curüyexeraxü? ¿Rü ngēxü i ngēma cuxne i namaā toxü cudèixü?”

ñanagürü i ngēma Tupanaärü ore. ⁵⁶ Rū ngēma naxne i yu, rū pecadu nixī. Erü ngēma pecadu nixī i naporaxēēxü i ngēma yu na tüxü nadèixüçèx. Rū ngēma mugü ga Moíché ümatüxü nixī i naporaxēēxü i pecadu, erü woo namexgu i ngēma mugü, natürü taxucürüwama texé aixcūma tayanguxēē. ⁵⁷ Natürü name nixī i Tupanana moxē taxā yerü nūma nanamu ga tórü Cori ya Ngechuchu ya Cristu na ngēma yuxü tüxü naporamaēēxüçèx. ⁵⁸ Rū ngēmacèx, Pa Chaueneēgü ya Pexü Changechaügüxex, rū

name nixī i meã peyaxõgüama rü taguma ípenatèx i Tupanaãrũ ore. Rü name nixī i guxũguma meã penaxü i tórũ Coriarũ puracü, erü pema nüxũ pecuèx rü ngẽma puracü i nüxũ pexũxũ, rü tama natüçèxma nixī.

16

Togü i yaxõgüxũcèx inanutaque ga dïeru

¹ Rü ñuxma tá pemaã nüxũ chixu i nachiga i ngẽma dïeru i penutaquẽxexũ na namaã nüxũ perüngũxẽegũxũcèx i taeneẽgü i yaxõgüxũ i Yudéaanewa ngẽxmagũxũ. Rü ngẽma yaxõgüxũ i Gáratanaanewa ngẽxmagũxũ rü marü namaã nüxũ chixu na ngĩxũ nanutaquẽxegũxũ i ngẽma dïeru. Rü chanaxwèxe i pema rü ta ngẽxgumarũ penaxü. ² Rü ngema dïeru i perü puracüwa ngxũ peyaxucüwa rü guxcü i yũxũarũ ngunexũgu rü tá ngxũ pexã i ngẽma dïeru i Tupanaarũ ixĩcũ. Rü ngĩmaã tá penguxũ na tama ngẽxguma ngema changuxguama ngĩxũ na pedexũcèx. ³ Rü ngẽxguma petanüwa changuxgu, rü tá chanaxümatü i ñuxre i poperagü naxcèx i taeneẽgü i Yerucharéüwa ngẽxmagũxũ. Rü ñuxũchi ngẽma poperamaã tá Yerucharéüwa chanamugü i ngẽma duũxũgü i pema nüxũ pexunetaxũ na ngema ngĩxũ nangegũxũcèx i ngẽma dïeru i taeneẽgüçèx ngĩxũ penutaquẽxecü. ⁴ Rü ngẽxguma chi choxũ natauxchagu na ngema Yerucharéüwa chaxũxũ, rü nümagü rü tá wüxigu chomaã ngema naxĩ.

Pauru nagu narüxĩnü na Corĩtiuwa naxũxũ

⁵ Choma rü Machedóniããnewa tá chaxüpetü na íchayadauxũcèx i taeneẽgü i ngema ngẽxmagũxũ. Rü ngẽmawena rü tá petanüwa changu na pexũ íchayadauxũcèx. ⁶ Rü ngürüãchi tá ñuxre i ngunexũgü ngẽxma petanügu charüxãũx, rü bexmana ngürüãchi ngema petanüwa tá chanangupetüxẽẽ ya mucü. Rü ngẽxguma rü tá pexũ natauxcha na choxũ perüngũxẽegũxũ na ngẽma íchaxũxchaũxüwa chaxũxũcèx. ⁷ Erü tama chanaxwèxe i paxaãchimare pexũ chadau. Natürü petanügu charüxãũxchaũ i ñuxre i ngunexũ ega chi norü ngüchaxũ yixĩxgu ya tórũ Cori. ⁸ Natürü nuã Epéchiuarü ñãnewa tá changẽxma ñuxmatáta Pêtecóstearü ngunexüwa nangu. ⁹ Erü nuã rü tórũ Cori poraãcü choxũ nanatauxchaxẽẽ na nüxũ chapuracüxũcèx rü nüxũ yaxõgüãxũcèx i muxũma i duũxũgü woo namu i ngẽma tama naxwèxegũxũ na nuã chapuracüxũ. ¹⁰ Rü ngẽxguma chi Timutéu petanüwa nguxgu, rü chanaxwèxe i meãma penayaxu na petanüwa nataãexũcèx. Erü nüma rü ta chauxrũ tórũ Coriarũ puracüwa napuracü. ¹¹ Rü ngẽmacèx tama chanaxwèxe i texé petanüwa nüxũ taxoe. Natürü chanaxwèxe i nüxũ perüngũxẽẽ na taãẽacüma nuã naxũxũ na choxũ íyadauxũcèx. Erü poraãcü íchananguxẽẽ na nuã nanguxũcèx namaã i ngẽma togü i taeneẽgü. ¹² Rü ngẽma taeneẽ i Aporu rü poraãcü nüxũ chacèxũ na petanüwa íyadauxũcèx namaã i ngẽma togü i taeneẽgü. Natürü tama ngema naxũxchaũ i ñuxmax. Natürü ngẽxguma naxãchicagu rü tá ngema naxũ.

Pauru nüxũ narümoxẽ ga yema yaxõgüxũ

¹³ ¡Rü pexuãegü na taxuũma i chixexũgu peyixũcèx! ¡Rü meãma peyaxõgüama woo tacü pexũ üpetügu! Rü name nixī i peporaeama rü taxucèxma pemuũẽ. ¹⁴ Rü guxũma i ngẽma pexũxũ, rü name nixī i pegü pengechaũgüãcüma penaxü. ¹⁵ Rü dücax, Pa Chaueneẽgüx, pema nüxũ pecuèx na Estéfanatanüxũgü yĩxũ ga nüxĩra yaxõgüxũ ga Acayaanewa. Rü meãma nüxũ pecuèxgü na ñuxãcü poraãcü taeneẽgü i yaxõgüxũxũ na nangũxẽegũxũ. ¹⁶ Rü chanaxwèxe i naga pexĩnüẽ i ngẽma duũxũgü i Estéfanatanüxũgürũ ixĩgũxũ. Rü ngẽxgumarũ ta chanaxwèxe i naga pexĩnüẽ i guxũma i ngẽma duũxũgü i ñãã Tanatüarũ puracüwa puracüexũ rü ngũxẽẽtaegũxũ. ¹⁷⁻¹⁸ Rü ñuxma na taxucürüwama chauxütawa pengẽxmagũxũ, rü wüxi ga chorü taãẽ nixī na núma naxĩxũ ga taeneẽgü ga Estéfana rü Fortunátu rü Acáicu. Rü yema taeneẽgü ga núma ìxũ rü pexũ nixuchigagü rü yemaãcü choxũ nataãexẽegü ga yema pexũ na nataãexẽegũxũrũ. Rü tanaxwèxe i naga pexĩnüẽ rü nüxũ pengechaũ i ngẽma duũxũgü i ngẽmagürũ

ixĩgũxũ. ¹⁹ Rũ guxũma i taeneẽgũ i yaxõgũxũ i Áchiaaneãrũ ããnegũwa ngẽxmagũxũ, rũ moxẽ pexcèx ngẽma namugũ. Rũ Aquiru rũ Prisila rũ guxũma i ngẽma yaxõgũxũ i Aquirupatawa ngutaquẽxegũxũ, rũ moxẽ pexcèx ngẽma namugũ naegagu ya tórũ Cori. ²⁰ Rũ guxũma i taeneẽgũ i núma ngẽxmagũxũ rũ moxẽ pexcèx ngẽma namu. Rũ chanaxwèxe i wũxichigũ i pema rũ pegũ pengechaũgũãcũma pegũ perũmoxẽgũ. ²¹ Choma i Pauru rũ choxmẽxmaãtama pexcèx chanaxũmatũ i ñãã chorũ moxẽ. ²² Rũ ngẽxguma chi texé tama tórũ Cori ya Ngechuchu ya Cristuxũ ngechaũgu, rũ Tupana tá tũxũ napoxcu. Rũ paxa tá ínangu ya tórũ Cori. ²³ Rũ chanaxwèxe i tórũ Cori ya Ngechuchu ya Cristu poraãcũ pexũ narũngũxẽẽ.. ²⁴ Rũ guxãma i pema, rũ poraãcũ pexũ changechaũãcũma pexũ charũmoxẽ naegagu ya tórũ Cori ya Ngechuchu ya Cristu.

Rũ nuãma pexna,
Pauru

NORŪ TAXRE GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corĭtiuwa yexmagŭxŭ

¹ Pa Chaueneēgŭ i Corĭtiucŭāxgŭ i Tupanaāxŭ yaxōgŭxŭ, rü Pa Chaueneēgŭ i Guxŭma i Acayaanewa Ngēxmagŭxŭ, choma i Pauru nixĭ i pexcèx chanaxŭmatŭxŭ i ñaā popera wŭxigu namaā i taeneē i Timutéu. Rü choma nixĭ i Tupana choxŭ yaxuxŭ na Ngechuchu ya Cristu choxŭ muxŭ na nüxŭ chixuxŭcèx i norŭ ore. ² Rü tanaxwèxe na Tanatŭ ya Tupana rü tórŭ Cori ya Ngechuchu ya Cristu pexna nanaxā i norŭ ngechaxŭ rü norŭ taāxŭ.

Pauru rü ngŭxŭ ninge

³ Rü toma rü nüxŭ ticuèxŭgŭ ya Tupana ya Nanatŭ ya tórŭ Cori ya Ngechuchu ya Cristu. Erŭ nüma nixĭ ya Tanatŭ ya nüxŭ ingechaŭtŭmŭgŭcŭ rü tórŭ Tupana ya guxŭguma tŭxŭ taāxēēcŭ. ⁴ Rü nüma ya Tupana rü toxŭ nataāxēē i ngēxguma ngŭxŭ tingexgu, na toma rü ta tanataāxēēgŭxŭcèx i ngēma togŭ i duŭxŭgŭ i ngŭxŭ ingegŭxŭ. Rü ngēmaācŭ ngēma Tupana toxŭ na taāxēēxŭrŭŭ toma rü ta tanataāxēēgŭ i ngēma togŭ i duŭxŭgŭ. ⁵ Rü ñuxma na Cristurŭŭ poraācŭ ngŭxŭ tingegŭxŭ, rü ngēxgumarŭŭ nümatama poraācŭ toxŭ nataāxēē. ⁶ Rü ngēmacèx, ngēxguma toma ngŭxŭ tingegŭgu, rü ngēmaācŭ toxŭ nangupetŭ na pema rü pexŭ nangēxmaxŭcèx i perŭ taāē rü perŭ maxŭ i taguma gŭxŭ. Rü ngēxguma Tupana toxŭ taāxēēgu, rü ngēmaācŭ tomaā nanaxŭ na pema rü ta pexŭ nangēxmaxŭcèx i perŭ taāē rü yaxna namaā pexĭnŭxŭcèx i ngēxguma ngēmatama ngŭxŭ i toma tingegŭxŭ pexŭ ngēxmagu. ⁷ Toma rü aixcŭma tayaxōgŭ na pema rü tagutāma ípenatāxŭ i Tupanaārŭ ore. Erŭ nüxŭ tacuèx rü ngēma na toxrŭŭ ngŭxŭ pingegŭxŭ, rü ngēxgumarŭŭ tá ta toxrŭŭ pexŭ nangēxma i ngēma taāē i Tupanawa ne ŭxŭ. ⁸ Pa Chaueneēgŭx, tanaxwèxe i nüxŭ pecuèx na ñuxre ga guxchaxŭgŭ toxŭ ngupetŭxŭ ga Áchiaanewa. Rü yema na poraācŭ toxŭ naguxchaxŭ, rü düxwa marŭ tama namaā taporae, rü nagu tarŭxĭnŭē na marŭ tāŭtāma tamaxēxŭ. ⁹ Rü nagu tarŭxĭnŭē rü ñoma yuwa taxĭxŭrŭŭ tixĭgŭ. Natŭrŭ yemaācŭ toxŭ naxŭpetŭ, erŭ Tupana ya yuexŭxŭ írŭdagŭxēēcŭ toxŭ nangŭxēēchaŭ na nüxĭcatama nüxŭ nangēxmaxŭ i pora na yuwa toxŭ ínangŭxŭxēēxŭcèx, rü taxucŭrŭwama togŭtama na ítangŭxŭxēēxŭ. ¹⁰ Rü Tupana rü toxŭ ínangŭxŭxēē nawa ga yema guxchaxŭ ga yuwa toxŭ gagŭchaŭxŭ. Rü ngēxgumarŭŭ tá ta toxŭ ínangŭxŭxēē nawa i ñaā taxŭ i guxchaxŭ i ñuxma toxŭ ngēxmaxŭ. Rü aixcŭma tayaxōgŭ na nüma rü guxŭgutāma ngēmaācŭ toxŭ nangŭxēēxŭ. ¹¹ Natŭrŭ tanaxwèxe i pema rü perŭ yumŭxēmaā toxŭ perŭngŭxēē. Rü ngēxguma chi ngēmaācŭ penaxŭxgux, rü muxŭma i duŭxŭgŭ rü tá Tupanana moxē naxāgŭ naxcèx i ngēma na ñuxācŭ toxŭ nangŭxēēxŭ.

Tŭxcŭŭ tama Corĭtiuwa naxŭ ga Pauru

¹² Nangēxma i tacŭ i toxŭ taāxēēxŭ. Rü ngēma nixĭ na toōēwa nüxŭ tacuáxŭ na ñoma i naānewa rü aixcŭma Tupana naxwèxexŭācŭma meā tamaxēxŭ. Rü pepēxewa nixĭ ga guxŭārŭ yexera yemaācŭ tamaxēxŭ. Natŭrŭ tama togagu nixĭ ga yema, yerŭ Tupana ya tomaā mecŭmacŭ nixĭ ga toxŭ rŭngŭxēēcŭ na yemaācŭ pepēxewa tamaxēxŭcèx. ¹³⁻¹⁴ Rü yema poperagŭ ga pexcèx taxŭmatŭxŭwa, rü nataxuma ga tacŭ ga icúxŭ. Natŭrŭ yema toma tamaxēxŭācŭma nixĭ ga pexcèx tanaxŭmatŭxŭ na yemawa meā nüxŭ pecuáxŭcèx na ñuxācŭ tixĭgŭxŭ. Rü woo i ñuxma rü tama aixcŭma meā toxŭ na pecuáxŭ, natŭrŭ chanaxwèxe i wŭxi i ngunexŭgu rü aixcŭma meā toxŭ pecuèx. Rü ngēxguma meā toxŭ pecuèxgu rü pema rü tá tomaā petaāēgŭ i ngēxguma ínangŭxgu ya tórŭ Cori ya Ngechuchu,

rū ngēxgumarūū i toma rū tá ta pemaã tataãëgü. ¹⁵⁻¹⁶ Rū yemagu charüxĩnũxüçèx nixĩ ga noxri ga pexütawa na chaxũxchaũxü na pexü íchayadauxüçèx rū yemaãcü pexü na charüngũxëëxüçèx. Rū nagu charüxĩnũ ga Machedóniããnewa chaxũxgu na pexütagu íchidauxü, rū yexguma Machedóniããnewa ne chaxũxgu rū wenaxârũ pexütagu íchidauxü. Rū yemaãcü chanaxũxchaũ, yerü nagu charüxĩnũ na yemawena choxü perüngũxëëxü na Yudéaanewa chaxũxüçèx. ¹⁷ Bexmana pema nagu perüxĩnũëgu rū tama aixcüma chayanguxëëgaãcüma nagu charüxĩnũ ga yema pexütawa na chaxüegaxü. ¿Éxna pema nagu perüxĩnũëgu rū ñoma wüxi i duũxü i tama Tupanaãxü yaxõxürüüãcüma chamaxü, rū “Ngü” ñacharügüchirëx woo tama chayanguxëëgagu i ngëma nüxü chixuxü? ¹⁸ Natürü Tupana toxü nacuèx na aixcüma yĩxü i ngëma torü ore ega pemaã itaxunetagu. ¹⁹ Erü yima Ngechuchu ya Cristu ya Tupana Nane ga guma Chiribánu rū Timutéu rū choma pemaã nüxü tixuchigacü, rū ore i aixcüma ixĩxüxüicatama nixu. Rū nüma rū aixcüma nayanguxëë i ngëma nüxü yaxuxü. ²⁰ Rū Cristu nixĩ ya yima yanguxëëcü ga guxüma ga yema unetagu ga Tupana nuxcümaxüchi nüxü ixuxü. Rū ngëmacèx ngëxguma Ngechuchuégagu Tupanaxü icuèxüügügu, rū ñatarügügu:

“Rū aixcüma nixĩ i ngëma”, ñatarügügu. ²¹ Rū ñuxma na Cristuarü duũxügu ixĩgüxü, rū Tupana nixĩ ya toxü poraexëëcü rū pexü poraexëëcü na taguma Cristuna ixĩgachixüçèx. Rū nümatama nixĩ ga tüxü nadexü na noxrü ixĩgüxüçèx. ²² Rū nüma ya Tupana rū naega tagu naxü erü tórü yora nixĩ. Rū nüma rū tüxna nanamu i Naãe i Üünexü na wüxi i tórü cuèxruü yĩxüçèx, rū ngëmawa nüxü icuáxüçèx na yixcüra tá tüxna naxããxü i muxüma i to i mexügu. ²³ Pema nüxü pecuèx ga noxri rū Corĩtiuwa chaxũxchaũ, natürü tama yéma petanüwa chaxü yerü tama chanaxwèxe na pexü changechaũgüxëëxü. Rū yemacèx tama pexütawa íchayadau, yerü tama pexü chingagüchaũ. Rū Tupana nüxü nacuèx na aixcüma na yĩxü ga yema. ²⁴ Rū tama tanaxwèxe na pexü tamuxü na ñuxãcü tá Tupanaãxü peyaxõgüxü. Erü pema rū marü aixcüma meãma peyaxõgü. Natürü ngëma tanaxwèxexü nixĩ na pexü tarüngũxëëgüxü na yexeraãcü petaãëgüxüçèx.

2

¹ Rū yemacèx nixĩ ga tama wena pexütawa chaxũxü, yerü tama chanaxwèxe ga pexü na changechaũxëëxü. ² Erü ngëxguma chi pexü changechaũxëëgu, ¿rū texé tá choxü tataãëxëë? ¿Rū ñuxãcü tá choxü petaãëxëë, ega pexü changechaũxëëgu? ³ Rū yemacèx nixĩ ga yemaãcü pexcèx popera chaxümatüxü na penamexëëgüxüçèx i perü guxchaxügu naxüpa na pexütawa chaxũxü. Yerü tama chanaxwèxe ga yexguma chi yéma chaxũxgu na choxü pengechaũxëëxü. Erü pema nixĩ i chanaxwèxexü na choxü petaãëxëëgüxü. Rū aixcüma nagu charüxĩnũ rū ngëxguma choma chataãëxgu rū pema rū tá ta petaãëgü. ⁴ Rū yexguma pexcèx chanaxümatügu ga yema popera, rū poraãcü chanaxixãchiãë, rū düxwa yema chorü ngechaũmaã chaxaxu. Natürü tama pexcèx chanaxümatü na pexü changechaũxëëxüçèx, natürü pexcèx chanaxümatü na nüxü pecuáxüçèx na ñuxãcü poraãcü pexü changechaũxü.

Pauru rū nüxü nüxü nangechaũ ga yema duũxü ga chixexü namaã üxü

⁵ Rū yema yatü ga choxü ngechaũxëëxü, rū tama choxüxüicatama nixĩ ga nangechaũxëëxü, natürü pexü rū ta nangechaũxëë. Natürü tama chanangu-petüxëëchaxü na pexna chacaxü i ngemachiga.. ⁶ Rū yema poxcu ga nüxna pexãxü ga yema duũxü ga yexguma pengutaquëxegügu, rū chauxcèx rū marü name na ngëxüicatama na yĩxü. ⁷ Rū ngëmacèx i ñuxma rū chanaxwèxe i nüxü nüxü pengechaũ i norü chixexü rū nüxü perüngũxëë na tama yexeraxü i chixexüwa nagaãxüçèx i ngëma norü ngechaũ. ⁸ Rū ngëmacèx chanaxwèxe i wenaxârũ noxrirüü nüxü nüxü pedauxëë na aixcüma nüxü pengechaũxü. ⁹ Rū yemacèx nixĩ ga yemachiga marü pexcèx chanaxümatüxü, yerü pexü chaxũxchaũ, rū nüxü chacuáxchaũ ngoxi marü aixcüma chauga pexĩnũë. ¹⁰ Rū

ñuxma pemaã nüxü chixu rü yixema pema tüxü nüxü pengechaüxë i tümaãrü chixexü, rü choma rü tá ta tüxü nüxü changechaü. Rü ngëxguma chi tacü rü chixexüxü tüxü changechaügu, rü pegagu nixi i Cristupëxewa tüxü nüxü changechaüxü i ngëma. ¹¹ Rü ngëmaãcü chanaxü na tama nayoxniëxüçëx i Chataná na chixexügu tüxü nayixëëxüçëx. Erü yixema rü meãma nüxü tacüx i nacüma i Chataná na ñuxãcü chixexügu tüxü nayixëëchaüxü.

Tróaarü ñãnewa rü nanaxixãchiã ga Pauru

¹² Rü yexguma Tróaarü ñãnewa changuxgu na nüxü chixuxüçëx ga Cristuarü ore, rü poraãcü choxü natauxcha na yéma tórü Coriaxü chapuracüxü. ¹³ Natürü tama aixcüma chataã ga yéma, yerü tama yexma nüxü chayangau ga taeneë ga Titu. Rü yemacëx nüxü charümoxë ga yëmacüãx ga duüxügü, rü ichaxüãchi, rü Machedóniããnewa chaxü.

Cristu rü Paurumaã napora

¹⁴ Rü Tupanana moxë taxãgü erü norü duüxügüxü toxü nixigüxëë. Rü ñuxma na Cristuarü duüxügü tixigüxü, rü nüma ya Tupana rü guxüguma tomaã nanaxüpëxe. Rü nüma nixi i toxü namuxü na duüxügüxü nüxü tacüxëëxüçëx i norü ore. Rü ngëma norü ore rü guxüwama nangu rü guxüguma nipuema ñoma wüxi i pumara i yixichixürüü. ¹⁵ Rü ñuxma i toma i Cristugagu Tupanapëxewa na timexü, rü guxüwama tanguchigagü natanüwa i ngema yaxögüxü rü ngema tama yaxögüxü.. ¹⁶ Rü ngëma duüxügü i tama yaxögüxü rü nüxü nawëxtümüxü i tochiga, erü ngema ore i nüxü tixuxü rü norü poxcuchigaxü namaã nixu. Natürü ngëma yaxögüxü rü namaã nataxëgü i tochiga erü ngema ore i nüxü tixuxü rü ore i namaxëxëxü nixi. Rü ngëmacëx ¿texëãxü natauxcha i ñãã puracü na nüxü tixuxü i ngëma ore? ¹⁷ Rü yixema toxrüü ixigüxëxicatama tixi ya tüxü natauxchaxe. Rü toma rü tama Tupanaãrü ore gu dïeru ngixü tayaxu ngëma togü naxügüxürüü. Natürü Tupanapëxewa rü aixcüma meã nüxü tixu i ngëma norü ore, erü nüma toxü nimugü rü Cristuarü tixigü.

3

Tupanaãrü uneta i ngëxwacaxüxüchiga

¹ Rü ñuxma na pemaã nüxü tixuxü na aixcüma Tupana yixü ga toxü mucü, rü bexmana tá nagu perüxñnüë na wenaxãrü togüëtüwa tidexagüxü. ¿Ëxna penaxwëxe na wüxi i carta i cuëxruü pexü tawéxü na nawa nüxü pecuáxüçëx na aixcüma Tupanaãrü orearü uruügü tixigüxü, rü ëxna penaxwëxe na pexütawa naxcëx itaçaxü i cartagü na ngëmawa duüxügü toxü cuáxüçëx naxrüxü i ngema togü? ² Rü pemaã nüxü tixu rü tama tanaxwëxe i tacü rü carta na duüxügü toxü cuáxüçëx, erü pematama nixi i ngëma cartarüü pixigüxü, rü pewa nixi i nangóxü na aixcüma Tupana yixü ga toxü mucü. Rü meãma toðëwa nüxü tacüx i ngëma. Rü yema na naxüchicüüxü ga perü maxü, rü ngëmawa guxüma i duüxügü nüxü nadau na aixcüma wüxi ga mexü ga puracü taxüxü ga petanüwa. ³ Rü ñuxma rü meãma nangox na pema rü ñoma wüxi i carta i Cristutama ümatüxürüü na pixigüxü. Rü torü puracügagu nixi i ngëma. Natürü tama wüxi i carta i tacü rü ümatüxümaã ümatüxü pixigü, natürü pema nixi i carta i Tupana ya Maxücüãë i Ünexü ümatüxü. Rü ngëma carta rü tama popera rü ëxna nutawa iwüçuchixü nixi, natürü perü maxüwa nixi i nangóxü i ngëma. ⁴ Rü ngëmacëx tama tamuüë na ngëmaãcü togüçëxtama tidexagüxü, erü tayaxögü na Cristugagu Tupana toxü dauxü na timexü. ⁵ Rü tama toxrütama cuëxmaã nixi i tanaxüxü i tacü rü mexü. Natürü guxüma i ngëma taxüxü rü Tupanaãrü ngüxëëmaã nixi i tanaxüxü. ⁶ Rü Tupana rü toxü narüngüxëë na duüxügümaã nüxü tixuxü i ngëma ngëxwacaxüxü i norü uneta na ñuxãcü Cristugagu tá tüxna naxããxü i maxü i taguma gúxü. Rü ngëma maxü rü tama yema mugü ga Moïché ümatüxügagu tanayaxu, natürü tanayaxu erü Tupanaãë i Ünexü tüxna nanaxã. Rü yema mugü ga Moïché ümatüxü rü yuwa tüxü nagagü,

natürü Tupanaãe i Üünexü rü tuxna nanaxã i maxü i taguma gúxü. ⁷ Rü yema mugü ga Moïchéna naxãxü ga Tupana, rü nutagu nixi ga naxumatüxü. Rü yexguma Moïché nayaxgu ga yema mugü, rü poraãcü niyaurachiwecüxü. Rü yemacèx ga duüxügü rü taxucürüwama Moïchéchiwegu narüdaunü. Natürü yema norü yaurachiwecüü rü nixochigü. Natürü ga yema mugü ga Moïché tuxna äxü i yuwa tuxü gagüxü, rü taxü ga yauracüxümaã ínangu. Rü yemaãcü namexèchi ga yexguma ínanguxgu. ⁸ Natürü yexeraãcü namexèchi nixi i ngëma uneta i ngexwacaxüxü i Tupanaãe i Üünexü taxcèx ngoxèexü. ⁹ Rü yemaãcü woo namexèchi ga yema mugü ga yuwa tuxü gagüxü, natürü yexeraãcü namexèchi i ngëma uneta i ngexwacaxüxü i Tupanapëxewa tuxü mexèexü. ¹⁰ Rü yema mugü ga noxri mexèchixü, rü ñuxma rü taxuwama name, ega namaã nügü nangugügu i ngëma Tupanaãrü uneta i ngexwacaxüxü i yexeraãcü mexèchixü. ¹¹ Rü yemaãcü woo namexèchi ga yema mugü ga paxaãchi ixixü, natürü yexeraãcü namexèchi i ngëma uneta i ngexwacaxüxü i guxügutáma ixixü. ¹² Rü toma aixcüma nüxü tacuèx na guxügutáma yixü i ngëma Tupanaãrü uneta i ngexwacaxüxü i mexèchixü, rü ngëmacèx tama cúãcüma duüxügümaã nüxü tixu. ¹³ Rü ngëmacèx tama duüxügüchaxwa iticuxgü yema Moïché üxürüü. Yerü ga Moïché rü nügü nidüxchiwe na tama nüxü nadaugüxücèx ga yema Yudíugü ga ñuxãcü na yaxochigüxü ga norü yaurachiwecüü. ¹⁴ Natürü ga yema duüxügü ga Moïchéxü íxümücügüxü rü ñoma yadüxgüchiwexürüü nixigü yerü tama nüxü nacuèxgüéga ga tacüchiga na yixü ga yema mugü. Rü ñuxma rü ta i ngëma Yudíugü rü tama nüxü nacuèxgüéga i ngëxguma nawa nangúegu i ngëma mugü. Erü nangëxma i tacü i ñoma yadüxgüchiwexürüü nüxü naguxchaxèexü na tama nüxü nacuèxgüxücèx. Rü ñuxma rü ta tama nüxna ínanguéga i ngëma nacüma erü Cristuxicatama nixi ya yima nüxna ínanguxècü. ¹⁵ Rü ñuxma rü ta i ngëma Yudíugü, rü ngëxguma nawa nangúegu i ngëma ore ga Moïché tuxna äxü, rü nangëxma i tacü i ñoma yadüxgüchiwexürüü nüxü naguxchaxèexü na tama nüxü nacuèxgüégaxücèx na tacüchiga yixü i ngëma ore. ¹⁶ Natürü ngëxguma wüxi i duüxü nüxü rüxoxgu i nacüma i chixexü, rü tórü Coriaxü yaxõõgu, rü ngëxguma nixi i nüxna ínanguxü i ngëma nüxü naguxchaxèexü. ¹⁷ Erü nüma ya tórü Cori rü Naãe i Üünexü rü wüxitama nixi rü ngextá ínangëxmaxüwa i tórü Coriãe i Üünexü, rü tuxü nanatauxchaxèe na Tupanana ingaicamagüxü. ¹⁸ Rü ngëmacèx guxãma i yixema na Cristuaxü yaxõgüxü rü ñoma wüxi i woruarüü tawa nangóchipeta na ñuxãcü namexèchixü ya tórü Cori erü nataxuma i tacü i tuxü idüxüxü naxchaxwa. Rü nüma ya tórü Cori i Naãe i Üünexü ixicü, rü guxüguma yexeraãcü tuxü nimexèechigü na naxrüü aixcüma imexücèx.

4

¹ Rü ngëmacèx taguma nüxü tarüchau i ñaã puracü, erü Tupana ya nüxü tangechaütümüccü nixi ga toxü mucü na tanaxüxücèx i ñaã puracü na duüxügümaã nüxü tixuxücèx i norü ore. ² Rü yemacèx nüxü tarüxoe ga guxüma ga tacü ga chixexü i ñe tuxna äxü i cúãcü üxü. Rü tama tanawomüxèèãcüma nixi i namaã nüxü tixuxü i ore rü tama tanaxüchicüü i ngëma ore. Natürü ngëma ore i aixcüma ixixüxicatama nixi i nüxü tixuxü. Rü ngëmaãcü Tupanapëxewa tamaxè rü duüxügüpëxewa togü itawèx na nüxü nacuèxgüxücèx na ñuxãcü tixigüxü i tomax. ³ Rü ngëxguma chi texécèx naguxchagu i ngëma ore i mexü i nüxü tixuxü, rü ngëma duüxügü i iyarütauxexücèxicatama nixi i naguxchaxü. ⁴ Erü nümagü rü tama nayaxõgü. Rü ngëmacèx i ñoma i naãneãrü äëxgacü i Chataná rü nüxü nanaguxchaxèe na tama nüxü nacuèxgüxücèx na ñuxãcü namexèchixü i norü ore ya Cristu ya Üünecü. Rü Cristuwa nixi i nangóxü na ñuxãcü na yixü ya Tupana. ⁵ Rü ngëxguma duüxügümaã nüxü tixuxgu i ngëma ore, rü tama tochigaxütama tixugü. Natürü nüxü tixu na Ngechuchu ya Cristu rü tórü Cori yixü, rü nüma tuxü na nangechaüxügagu perü ngüxèeruügu na tixigüxü. ⁶ Erü nümatama ya Tupana ga noxri naãne naxüxgux rü èãnexüwa nangoxèecü ga ngónexü, rü nümatama nixi i ñuxma i

tūxŭ yangoꝝnaãẽxẽẽgūxŭ na ngẽmawa nūxŭ icuáxŭcèx na ñuxãcü namexẽchixŭ i nūmax. Rŭ ngẽma norŭ mexŭ rŭ Ngechuchu ya Cristuchiwewa nixŭ i nūxŭ idauxŭ.

Tayaxõgũama ega woo ngúxŭ ingegũgu

⁷ Rŭ ngẽma nūxŭ na icuáxŭ na ñuxãcü namexẽchixŭ ya Tupana, rŭ ngẽma cuèx rŭ wūxi i mexẽchixŭ nixŭ. Natŭrŭ ngẽma cuèx i mexẽchixŭ rŭ taxŭne i maĩraxŭnaxcèxwa nangẽxma, na nangóxŭcèx na Tupanawa ne naxŭxŭ i guxŭma i pora rŭ tama i tawatama. ⁸ Rŭ guxŭwama toxŭ nangẽxma i guxchaxŭgŭ, natŭrŭ taguma nūxŭ tarŭchau i ñaã puracŭ. Rŭ woo poraãcü taxoegaãẽgũgu, natŭrŭ taguma ítanangẽx. ⁹ Rŭ woo togŭ towe ingẽxŭtanũgu, natŭrŭ ya Tupana rŭ taguma toxŭ ínawogŭ. Rŭ woo duŭxŭgŭ toxŭ napíexẽẽgu, natŭrŭ tama ngẽxma tayacuèxẽẽ i ñaã puracŭ. ¹⁰ Rŭ guxŭwama i ngextá ítaxŭxŭwa rŭ ãücŭmaxŭwa tangẽxmagŭ, yexgumarŭŭ ga Ngechuchu na ãücŭmaxŭwa nayexmaxŭrŭŭ. Natŭrŭ ngẽmaãcü toxŭ naxŭpetŭ na duŭxŭgŭ nūxŭ daugŭxŭcèx na ñuxãcü towa namaxŭxŭ ya Ngechuchu. ¹¹ Rŭ ñuxma na tamaxẽxŭ, rŭ guxŭ i ngunexŭgu rŭ Ngechuchugagu ãücŭmaxŭwa tangẽxmagŭ. Natŭrŭ ngẽmaãcü toxŭ naxŭpetŭ na Ngechuchu inawéxŭcèx i norŭ pora nawa i ñaã toxone i yuxwèxexŭ. ¹² Rŭ ngẽmaãcü Tupanaãrŭ orecèx ãücŭmaxŭwa tangẽxmagŭ, natŭrŭ ngẽmaãcü toxŭ naxŭpetŭ na pema rŭ pexŭ nangẽxmaxŭcèx i maxŭ i taguma gúxŭ. ¹³ Tupanaãrŭ ore i ũmatŭxŭwa rŭ ñanagŭrŭ:

“Nūxŭ chayaxõ rŭ yemacèx Tupanachiga chidexa”,

ñanagŭrŭ. Rŭ ngẽxgumarŭŭtama tixŭgŭ i toma na tayaxõgŭxŭ rŭ Tupanachiga tidex-agŭxŭ. ¹⁴ Erŭ nūxŭ tacuèxgŭ rŭ Tupana ga yuwa ínadaxẽẽcü ga Ngechuchu ya tórŭ Cori, rŭ yimatama Tupana tá nixŭ ya toxŭ írŭdagŭxẽẽcü, erŭ Ngechucharŭ duŭxŭgŭ tixŭgŭ. Rŭ ngẽmaãcü wūxigu pemaã nŭgŭxŭtawata tá toxŭ nagagŭ. ¹⁵ Rŭ guxŭma ga yema toxŭ ngupetŭxŭ rŭ perŭ mexŭcèx nixŭ na yexeraãcü yamuẽtanŭxŭcèx i ngẽma duŭxŭgŭ i Tupana nūxŭ rŭngŭxŭẽẽgŭxŭ. Rŭ ngẽmaãcü tá dŭxwa namuxŭchi i ngẽma duŭxŭgŭ i moxẽ Tupanana ãgŭxŭ rŭ nūxŭ icuèxŭŭgŭxŭ. ¹⁶ Rŭ ngẽmacèx taguma nūxŭ tarŭxoe na nūxŭ tixuxŭ i ngẽma ore. Rŭ woo yayachigũgu rŭ yaturachigũgu i toxone, natŭrŭ toðewa rŭ guxŭ i ngunexŭgu rŭ yexeraãcü tiporaetanŭ. ¹⁷ Erŭ ngẽma ngúxŭ i toxŭ ũpetŭxŭ i ñaã torŭ maxŭwa, rŭ ngẽma rŭ wūxi i paxaãchimare nixŭ rŭ paxa tá nangupetŭ. Natŭrŭ ngẽmaãcü tá tanayaxu i wūxi i maxŭ i mexẽchixŭ i tagutáma gúxŭ i ñoma i naãnecŭãx i maxŭãrŭ yexeraxŭchi ixŭxŭ. ¹⁸ Rŭ tama ngẽma ñuxma nūxŭ idauxŭgu nixŭ itarŭxŭñnũxŭ, natŭrŭ nagu tarŭxŭñnũẽ i ngẽma ñuxma tama nūxŭ idauxŭ. Erŭ ngẽma ñuxma nūxŭ idauxŭ rŭ tama natai, natŭrŭ ngẽma ñuxma tama nūxŭ idauxŭ, rŭ guxŭgutáma nangẽxmaẽcha.

5

¹ Rŭ nūxŭ tacuèxgŭ ega ngẽxguma iyanaxoxgu i ñaã toxone i paxaãchi ñuxma toxŭ ngẽxmaxŭ, rŭ daxŭgŭxŭ i naãnewa tá tanayaxu i wūxi i toxone i tagutáma iyarŭxoxŭ i Tupanatama toxcèx mexẽxŭ rŭ tama i duŭxŭgŭ. ² Rŭ ngẽmacèx i ñuxma i ñaã toxonewa tamaxẽyane, rŭ tama aixcŭma tataãẽgŭ. Erŭ tanaxwèxe na paxa toxŭ nangẽxmaxŭ i ngẽma toxone i daxŭgŭxŭ i naãnewa ngẽxmaxŭ. ³ Rŭ ngẽma toxone i daxŭgŭxŭ i naãnewa tá toxŭ ngẽxmaxŭ rŭ ñoma wūxi i naxchirurŭŭ tá toxŭ nidŭxŭ, na ngẽmaãcü naxãxŭnexŭcèx i toðẽ. ⁴ Rŭ ñaã toxone i ñuxma toxŭ ngẽxmaxŭwa tamaxẽyane, rŭ tanaxŭxŭchiãẽgŭ rŭ tama aixcŭma tataãẽgŭ. Rŭ tama aixcŭma ítanatáxchaŭ i toxone i ñoma i naãnewa toxŭ ngẽxmaxŭ, natŭrŭ tanaxwèxegŭ na tanayaxuxŭ i toxone i ngexwacaxŭxŭ na ngẽmaãcü ngẽma maxŭ i ngexwacaxŭxŭ iyanaxoxẽẽxŭcèx i toxone i ñuxma toxŭ ngẽxmaxŭ. ⁵ Rŭ Tupana nixŭ ya toxŭ imexẽẽcü naxcèx i ngẽma ngexwacaxŭxŭ i maxŭ rŭ ngẽma ngexwacaxŭxŭ i toxone. Rŭ toxna nanamu ga Naãẽ i Ũñexŭ na ngẽmawa nūxŭ tacuáxŭcèx na aixcŭma tá tanayaxuxŭ i ngẽma. ⁶ Rŭ ngẽmacèx taxucèxma taxoegaãẽgŭ. Erŭ nūxŭ tacuèx rŭ ñuxma ñaã toxonewa tamaxẽyane, rŭ taxucŭrŭwama tórŭ Corixŭtawata

tangēxmagü i daxūguxū i naānēwa. ⁷ Rū woo tama nūxū tadaugūgu ya yima tórü Cori i ñuxmax, natürü tayaxōgü na wūxi i ngunexū rü tá nūxū tadaugūxū. Rū ngēma nixī i toxū poraxēēxū i ñāā torü maxūwa. ⁸ Rū ngēmacèx taxucèxma taxoegaāēgü ega tayuegu. Erü toxcèx rü narümemaē nixī na nūxna ítachoxūxū i ñāā toxone, na tórü Corixūtawa tayangēxmagūxūcèx. ⁹ Rū ngēmacèx, woo ñoma i toxonēwa tangēxmagūgu rü ēxna tama nawa tangēxmagūgu, rü tanaxwèxe na guxūguma tórü Coriarü ngúchaū na taxūxū. Rū ngēmacèx naxcèx tadaugü na tanaxūxū i ngēma nanaxwèxexū i nūmax. ¹⁰ Erü guxātama i yixema rü Cristupēxewa tá tangugü na wūxichigü nayaxuxūcèx i ngēma tūxna ūxū. Rū nūma tá wūxichigūxū nangugüarü maxūāx. Rū ngēxgumarūū na ñuxācū meā imaxēxū rü ēxna chixri imaxēxū ga yexguma ñoma ga taxūnēwa iyexmagūgu, rü ngēmaācū tá tūxna nanaxā ya wūxichigü.

Cristu rü taxcèx Tupanaxū narüngüxmüxēē

¹¹ Rū ngēmacèx Tupanaārü orearü uwa tapuracüe rü tayaxucuxēgü i duūxūgü na yaxōgūāxūcèx. Erü toma rü aixcūma torü Corixū tamuūē. Rū Tupana toxū nacuèx na ñuxācū yīxū i tórü maxū, rü chierūna pema rü chi ta toxū pecuèxgux. ¹² Rū tama tanaxwèxe i wenaxārü togüētūwa tidexagü, natürü pexū tarüngūxēēchaū na pexū nangēxmaxūcèx na tacūcèx tomaā petaāēgūxū na nūxū pecuāxūcèx na ñuxācū penangāxūxū i ngēma duūxūgü i pepēxewa nūgü írūmegūnetaxū natürü norü maxūwa rü tama ixaixcūmagūxū. ¹³ Rū woo duūxūgü toxū daugūgu na Tupanagu taxūāēgūxū, rü nüetama nixī i ngēma erü nūmatama ya Tupana rü meāma toxū nacuèx. Natürü i pema rü meāma toxū pecuèx na meāma toōēxū tacuāācūma pemaā nūxū tixuxū ga norü ore. ¹⁴ Rū Cristu ya poraācū toxū ngechaūcū nixī ya ñuxma tomaā icuācū, erü tayaxō na nūma rü guxāārü pecaducèx nayuxū na yexma yanaxoxūcèx ga guxāārü chixexūgü. ¹⁵ Rū yemaācū guxūma ga duūxūgūcèx nayu ga Cristu, na ngēma duūxūgü i ñuxma maxēxū, rü tama nūmatama nagu naxīnūēxūgu namaxēxūcèx, natürü naxcèx na namaxēxūcèx ya yima naxcèx yucū rü wena írūdacū. ¹⁶ Rū ngēmacèx i toma rü tama ñoma i naānecūāx i duūxūgü nagu rüxīnūēxūrūū texéxū tangugüarü maxūāx. Rū woo ga ūpa rü ñoma ga naānecūāx ga duūxūgü nagu rüxīnūēxūrūū Cristuxū tangugü, natürü i ñuxma rü tama ngēmaācū namaā nagu tarūxīnūē. ¹⁷ Rū ngēxguma texé Cristuaxū yaxōxgu, rü ngexwacaxūxū i duūxū tixī. Rū nuxcūmaūxū ga tūmacūma rü marü tūxna inayarūxo, rü ngexwacaxūxū i maxū tūxū nangēxma. ¹⁸ Rū guxūma i ngēma rü Tupana nixī ya naxūcū. Rū nūma nixī ga Cristugagu tamaā inangūxmüxū. Rū ñuxma rü toxū namu na duūxūgūmaā nūxū tixuxū na namaā inangūxmüēxūcèx. ¹⁹ Yerü Tupana rü Cristugagu duūxūgūmaā nūgü narüngüxmüxēē. Rū tama duūxūgüarü pecadugu naxīnūācūma nanaxū ga yema. Rū ñuxma rü toxū namu na ngēmachigaxū duūxūgūmaā tixuxū. ²⁰ Rū ngēmaācū Cristuarü orearü ngeruūgü tixīgü, rü towa nixī i Tupana pexū cèèxūxū na namaā iperüngüxmüēxūcèx. Rū ngēmacèx Cristuégagu pexū tacèèxūgü na Tupanamaā iperüngüxmüēxūcèx. ²¹ Cristu rü taguma pecadu naxū. Natürü tagagu nixī ga Tupana ga ñoma pecaduāxūrūūācūma namaā naxūāxū na yemaācū nagagu tūxū inangūxūxēēxūcèx nawa i tórü chixexū na aixcūma napēxewa imexūcèx.

6

¹ Rū ñuxma na Tupanaārü ngūxēēruū tixīgūxū, rü pexū tacèèxū na tama nūxū pexoexūcèx ga yema pemaā na namecūmaxū ga yexguma nayuxgu ga Nane. ² Erü Tupana rü norü ore i ūmatūxūwa, rü ñanagürü:

“Rū yema ngunexū ga nagu namexūgu na choxū peyaxuxū, rü yexguma nixī ga pexū chaxīnūxū. Rū yexguma pexna chanaxuāxūgu ga maxū i taguma gūxū, rü yexguma nixī ga pexū charüngūxēēxū”, ñanagürü. Rū ñuxma nixī i ngēma ngunexū i nagu namexū na Tupanaxū peyaxuxū, rü ñuxma nixī i ngēma ngunexū i pexna naxuaxūāxū i maxū i taguma gūxū. ³ Rū toma rü

guxŭguma naxcèx tadau na guxãpêxewa meã tamaxêxŭ na taxucèxma texé chixri torŭ puracŭchiga idexaxŭcèx. ⁴⁻⁵ Rŭ guxŭwama duŭxŭgŭxŭ nŭxŭ tadauxêêchaŭ na aixcŭma Tupanaãrŭ duŭxŭgŭ tixŭgŭxŭ. Rŭ ngêmacèx yaxna namaã taxŭnŭê i ngêxguma woo ngŭxŭ toxŭ ngupetŭgu, rŭ êxna tacŭ toxŭ taŭxgu, rŭ êxna tacŭ rŭ guxchaxŭ toxŭ ngêxmagu, rŭ êxna toxŭ yaçuaixgŭgu, rŭ êxna toxŭ napoxcuegu, rŭ êxna naxixãchiãêtanŭgu rŭ tomaã nanuêgu. Rŭ poraãcŭxŭchima tapuracŭe, rŭ ñuxguacŭ rŭ tama tapee, rŭ ñuxguacŭ rŭ taiya toxŭ nangŭx. Natŭrŭ yaxna namaã taxŭnŭê i guxŭma i ngêma. ⁶ Rŭ ngexgumarŭxŭ ta duŭxŭgŭxŭ nŭxŭ tadauxêê na aixcŭma namexŭ i torŭ maxŭ, erŭ aixcŭma Tupanapêxewa meã tamaxê, rŭ meã Tupanaxŭ tacuèx, rŭ yaxna duŭxŭgŭmaã taxŭnŭê, rŭ namaã tamecŭma. Rŭ nŭxŭ nŭxŭ tadauxêê na towa nangêxmaxŭ i Tupanaãe i Ũnexŭ rŭ aixcŭma guxŭ i duŭxŭgŭxŭ tangechaŭxŭ. ⁷ Rŭ duŭxŭgŭxŭ nŭxŭ tadauxêê na aixcŭma namexŭ i torŭ maxŭ, erŭ namaã nŭxŭ tixu i ngêma ore i aixcŭma ixŭxŭ, rŭ itanawêx i Tupanaãrŭ pora i towa ngêxmaxŭ. Rŭ ngêma toxne ixŭxŭ rŭ ngêma nixŭ i torŭ maxŭ i aixcŭma mexŭ i Tupanapêxewa. Rŭ ngêmamaã nixŭ i togŭ ítapoxŭxŭ i torŭ uwanŭgŭpêxewa. ⁸ Rŭ ñuxguacŭ i duŭxŭgŭ rŭ toxŭ nicuèxŭgŭ, rŭ ñuxguacŭ rŭ tacŭ tomaã nixugŭe. Rŭ ñuxguacŭ rŭ meã tochiga nidexagŭ, rŭ ñuxguacŭ rŭ chixri tochiga nidexagŭ. Rŭ woo aixcŭmachirêx yixŭgu i ngêma ore i nŭxŭ tixuxŭ, natŭrŭ doratèèx toxŭ nawogŭe. ⁹ Rŭ woo meã toxŭ nacuèxgŭchirêxgu, natŭrŭ ñoma tama toxŭ nacuáxŭrŭŭ tomaã nixŭgŭ i duŭxŭgŭ. Rŭ ñuxguacŭ rŭ wixgutaèx tayue, natŭrŭ naetŭwa tamaxêãma. Rŭ toxŭ napoxcue, natŭrŭ tama toxŭ nadaixichi. ¹⁰ Rŭ woo tangechaŭgŭgu, natŭrŭ guxŭguma tataãgŭama. Rŭ woo ñoma i naãnewa tama tamuãrŭ ngêmaxŭãxgŭgu, natŭrŭ muxŭma i duŭxŭna tanaxã i taxŭ i mexŭ erŭ togagu nanayaxu i maxŭ i taguma gŭxŭ. Rŭ woo taxuŭma toxŭ ngêxmèxgu i ñoma i naãnewa, natŭrŭ daxŭ-guxŭ i naãnewa rŭ toxŭ nangêxma i guxŭma. ¹¹ Pa Chaueneëgŭ i Corŭtiucŭãx, dŭcax aixcŭma pemaã nŭxŭ tixu rŭ guxŭ i torŭ maxŭnemaã pexŭ tangechaŭgŭxŭchi. ¹² Rŭ toma rŭ tama pexŭ taxoe, natŭrŭ pema waxi nixŭ i tama petoxwèxexŭ. ¹³ Rŭ dŭcax, Pa Chaueneëgŭx, rŭ ñoma wŭxi i papá naxãcŭgŭxŭ cèèxŭxŭrŭŭ pexŭ chacèèxŭ na choxŭ pengechaŭgŭxŭcèx ngêma choma pexŭ changechaŭxŭrŭŭ.

Tupana ya maxŭcŭpata tixŭgŭ

¹⁴ ;Rŭ tãŭtãma namaã pexãmŭcŭ i ngêma duŭxŭgŭ i tama yaxŭgŭxŭ! Erŭ ngêxguma chi ngêmaãcŭ penaxŭxgu rŭ tãŭtãma guxã wŭxigu perŭxŭnŭê. ;Rŭ ñuxãcŭ nawŭxiguxŭ i ngêma mexŭ namaã i ngêma chixexŭ? ;Rŭ ñuxãcŭ nawŭxigu i ngŭonexŭ namaã i êãnexŭ? ¹⁵ ;Rŭ ñuxãcŭ nawŭxiguxŭ ya Cristu namaã i Chataná? ;Rŭ ñuxãcŭ nawŭxiguxŭ i wŭxi i duŭxŭ i yaxŭxŭ namaã i wŭxi i duŭxŭ i tama yaxŭxŭ? ¹⁶ ;Rŭ ñuxãcŭ Tupanapatawa nangêxmaxŭ i tupananetachicŭnèxãgŭ? Erŭ yixema rŭ Tupana ya maxŭcŭpata tixŭgŭ, rŭ tawa namaxŭ i nŭmax. Rŭ Tupana rŭ pechiga nidexa ga yexguma ñaxgu:

“Rŭ ngêma duŭxŭgŭwa tá chamaxŭ, rŭ natanŭgu tá chayarŭxŭŭxŭ. Rŭ norŭ Tupana tá chixŭ, rŭ nŭmagŭ rŭ tá chorŭ duŭxŭgŭ nixŭgŭ”,

ñaxgu. ¹⁷ Rŭ yemacèx ñanagŭrŭ ta ga tŭrŭ Cori:

“;Rŭ ípechoxŭ i natanŭwa i ngêma duŭxŭgŭ i tama chorŭ duŭxŭgŭ ixŭgŭxŭ! ;Rŭ tãxŭ i nŭxŭ pingŭgŭxŭ i ngêma chopêxewa chixexŭ! Rŭ choma rŭ tá pexŭ chayaxu. ¹⁸ Rŭ choma rŭ Penatŭ tá chixŭ, rŭ pemagŭ rŭ tá chaunegŭ rŭ chauxacŭgŭ pixŭgŭ”, ñanagŭrŭ ya tŭrŭ Cori ya Tupana ya guxŭãrŭ yexera poraxŭchicŭ.

7

¹ Rŭ dŭcax, Pa Chaueneëgŭ ya Pexŭ Changechaŭgŭxex, rŭ ngêma Tupanaãrŭ unetagŭ i pemaã nŭxŭ chixuxŭ, rŭ taxcèx nixŭgŭ. Rŭ ngêmacèx tanaxwèxe na yigŭna idaugŭxŭ na tama taxŭnemaã rŭ êxna taãemaã naxŭxŭcèx i ngêma Tupanapêxewa tama mexŭ. Rŭ tanaxwèxe i aixcŭma Tupanaxŭ imuêãcŭma nŭxna yigŭ taxŭgŭ rŭ naxcèxicatama tamaxê.

Pauru rū ngema Corĭtiucŭāxgūmaā nataāxē

² Rū tanaxwèxe i toxŭ pengechaŭgŭ. Rū dŭcax ga toma rū taxŭxemaāma chixexŭ taxŭgŭ. Rū taxŭxexŭma chixexŭgu tanguxēē. Rū taxŭxexŭma tawomŭxēēgŭ. ³ Rū tama pexŭ chixuxŭcèx nixī i pemaā nŭxŭ chixuxŭ i ngēma. Yerŭ marŭ pemaā nŭxŭ chixu na ñuxācŭ guxŭ ga chorŭ maxŭmaā pexŭ changechaŭxŭ. Rū ngema pexŭ na changechaŭxŭgagu rū íchamemare na petanŭwa chamaxŭxŭ rū ěxna wŭxigu pemaā chayuxŭ. ⁴ Rū ñuxma rū taxucèxma pexŭ chaxāneācŭma pemaā chidexa erŭ poraācŭ pemaā chataāē. Rū woo ngŭxŭ na tingegŭxŭ, natŭrŭ aixcŭma choxŭ penangŭchaŭxēē rū choxŭ petaāēxēē. ⁵ Rū yexguma Machedóniāānewa tangugŭgucŭrŭwa rū taguma itarŭngŭgŭ. Yerŭ guxŭwama ga ngexta ítaxŭxŭwa rū nŭxŭ itayangau ga guxchaxŭgŭ. Rū duŭxŭgŭ rū toxŭ nanaguxchaxēē na tanaxŭxŭ i Tupanaarŭ puracŭ rū yemacèx poraācŭ taxoegaāxēgŭ. ⁶ Natŭrŭ ya Tupana ya tŭxŭ taāēxēēcŭ ya yŭxema ngechaŭgŭxe, rū toxŭ rū ta nataāēxēē ga yexguma toxŭtawa nanguxgu ga taeneē ga Titu. ⁷ Rū tama yema toxŭtawa na nanguxŭcèxicatama tataāēgŭ, natŭrŭ tataāēgŭ ta yerŭ ga pema rū poraācŭ nŭxŭ penangŭchaŭxēē rū penataāēxēē ga guma taeneē ga Titu. Rū nŭma ga Titu rū tomaā nŭxŭ nixu na ñuxācŭ poraācŭ penaxwèxexŭ na toxŭ pedauxŭ. Rū tomaā nŭxŭ nixu na ñuxācŭ naxcèx pengechaŭgŭxŭ ga yema chomaā pexŭxŭ, rū na ñuxācŭ chauxcèx pexoe-gaāēgŭxŭ. Rū guxŭma ga yema oremaā rū yexeraācŭ chataāē. ⁸ Choma nŭxŭ chacuèx rū yema popera ga pexcèx chaxŭmatŭxŭ rū pexŭ nangechaŭgŭxēē, natŭrŭ ñuxma rū marŭ tama naxcèx changechaŭ na chanaxŭmatŭxŭ ga yema popera. Rū noxri rū yemāācŭ naxcèx changechaŭ ga yexguma nŭxŭ chacuèxgu ga na pexŭ nangechaŭgŭxēēxŭ ga yema popera ga yexguma penayauxgu. ⁹ Natŭrŭ i ñuxma rū chataāē na pexcèx chanaxŭmatŭxŭ ga yema popera. Rū tama yema na pengechaŭgŭxŭcèx chataāē, natŭrŭ chataāē yerŭ yema perŭ ngechaŭgagu Tupanana pecuèxāchie rū penaxŭchicŭŭ ga perŭ maxŭ. Rū pema rū aixcŭma Tupanana pecuèxāchieācŭma namaā peporae ga yema ngechaŭ, rū yemaācŭ taxuŭma ga chixexŭ pemaā taxŭ ga yexguma pexcèx tanaxŭmatŭgu ga yema popera. ¹⁰ Rū ngēma ngechaŭ i Tupana naxwèxexŭācŭma namaā iporaexŭ, rū name nixī, erŭ ngēma ngechaŭgagu naxŭchicŭŭ i tŭrŭ maxŭ rū ngēmagagu tanayaxu i maxŭ i taguma gŭxŭ. Rū ngēmacèx taxucèxma naxcèx pixāŭxāchie i ngēma ngechaŭ. Natŭrŭ ngēma ngechaŭ i ñoma i naānecŭāx i duŭxŭgŭ nŭxŭ ngēxmaxŭ rū taxuwama name erŭ yuwa nanaga. ¹¹ Rū yexguma yema poperamaā pexŭ changechaŭxēēgu, rū Tupana naxwèxexŭācŭma nixī ga namaā peporaexŭ ga yema ngechaŭ. ¡Rū dŭcax i ñuxma i tacŭ Tupana pemaā ŭxŭ i ngēma perŭ ngechaŭgagu! Yerŭ yema perŭ ngechaŭgagu rū aixcŭma nagu perŭxŭnŭē ga yema chixexŭ ga petanŭwa ŭpetŭxŭ, rū meāma chomaā nŭxŭ pixu ga yema. Rū yema perŭ ngechaŭgagu rū peāēwa nangux ga yema chixexŭ, rū poraācŭ Tupanaxŭ pemuŭē. Rū yemacèx penaxwèxe na yēma chaxŭxŭ na pexŭ chayarŭngŭxēēxŭcèx yerŭ penamexēēgŭchaŭ ga yema chixexŭ. Rū yema perŭ ngechaŭgagu rū aixcŭma penaxucuxē ga yema duŭxŭ ga chixexŭ ŭxŭ. Rū guxŭ ga yemawa rū ipenawēx na tama pegagu yīxŭ ga yema chixexŭ ga ngupetŭxŭ. ¹² Rū yemacèx, yexguma pexcèx chanaxŭmatŭgu ga yema popera, rū tama yema duŭxŭ ga chixexŭ ŭxŭgu charŭxŭnŭācŭma chanaxŭmatŭ, rū tama yema duŭxŭ ga namaā chixexŭ naxŭxŭgu charŭxŭnŭācŭma chanaxŭmatŭ. Natŭrŭ chanaxŭmatŭ ga yema popera na yemawa Tupanapēxewa nŭxna pecuèxāchiexŭcèx na ñuxācŭ aixcŭma toxŭ pengechaŭgŭxŭ. ¹³ Rū yema na toxŭ pengechaŭgŭxŭ, rū wŭxi ga taāē nixī ga toxcèx. Natŭrŭ yema taāēārŭ yexera nixī ga yema taāē ga toxŭ yexmaxŭ ga yexguma nŭxŭ tadèuxgu ga Titu ga ñuxācŭ taxŭ ga taāē petanŭwa na nayaxuxŭ. Rū aixcŭma guxāma ga pema nixī ga wenaxārŭ poraācŭ nŭxŭ penangŭchaŭxēēxŭ. ¹⁴ Rū noxri tauta yēma naxŭxgu ga Titu, rū namaā nŭxŭ chixu na mexŭ i duŭxŭgŭ na pixŭgŭxŭ. Rū ñuxma rū taxucèxma chaxāne, erŭ guxŭma ga yema Titumaā nŭxŭ chixuxŭ ga pechiga rū aixcŭma ngēmaācŭ nixī, yexgumarŭŭ na aixcŭma yīxŭ ga guxŭma ga yema Tupanaārŭ ore ga

pemaã nüxü tixuxü. ¹⁵ Rū ñuxma i Titu rü yexeraãcü pexü nangechaü i ngëxguma nüxna nacuëxächigu na ñuxãcü meã naga pexĩnüëxü rü ñuxãcü nüxü pengechaüãcüma meã penayaxuxü. ¹⁶ Rü choma rü ta poraãcü pemaã chataãëxüchi, erü nüxü chacuëx na aixcüma peyanguxëëxü ga guxüma ga yema pemaã nüxü chixuxü.

8

Yema yaxögüxü rü woo tama na namuãrü dïëruãxgüxü, natürü yema nüxü yexmacü ga dïërumaã meã togüxü narüngüxëëgü

¹ Rū ñuxmax, Pa Chaueneëgüx, rü pemaã nüxü tixuxchaü na ñuxãcü Tupana namaã mecümaxü i ngëma yaxögüxü i Machedóniãneãrü iãnegüwa ngëxmagüxü. ² Rü woo taxü ga guxchaxügü nüxü na üpetügüxü, natürü nataãëgüama. Rü woo tama na namuãrü dïëruãxgüxü, natürü yema nüxü yexmacü ga dïërumaã meã togüxü narüngüxëëgü. ³ Rü choma nüxü chadau rü pemaã nüxü chixu rü nümagü rü taãëãcüma ngïxü inaxãgü ga guxcüma ga dïëru ga nüxü tauxchacü na ngïxü inaxãgüxü. Rü ngïetü yemaãrü yexera taãëãcüma ngïxü inaxãgü. ⁴ Rü poraãcü toxü nacèëxügü na tama nüxna tanachuxuxüçèx na yemaãcü yema togü ga taeneëgüxü nangüxëëgüxüçèx. ⁵ Rü yema nagu tarüxĩnüëxüãrü yexera ngïxü inaxãgü ga yema yaxögüxü ga Machedóniãnecüãx. Yerü Tupananaxĩra nügü naxãgü rü yemawena toxna nügü naxuaxügü na toga naxĩnüëxüçèx, yema Tupana naxwëxexürü. ⁶ Rü yemacèx Tituxü tacèëxü na wena petanüwa naxüxüçèx na ngïxü pinguxëëxüçèx ga yema dïëru ga marü pemaã ngïxü inaxügücü na ngïxü penutaquëxexü naxcèx i ngëma togü i taeneëgü i nüxü nataxuxü. ⁷ Pema rü guxüwama meã ipexĩ erü meã peyaxögü, rü pexü natauxcha na meã nüxü pixuxü i Tupanaãrü ore erü meã nüxü pecuëx na tacüchiga yĩxü. Rü aixcüma togüxü perüngüxëëchaü, rü yema pexü tangüxëëxüãcüma pegü pengechaügü. Rü ñuxma rü ngëxgumarüü ta penaxwëxe na aixcüma meã ipexĩxü nawa i ngëma mexü i nacüma na dïëru ngïxü ipexãxü naxcèx i ngëma taeneëgü i nüxü nataxuxü. ⁸ Tama wüxi i mu nixĩ i ngëma pemaã nüxü chixuxü. Natürü chanaxwëxemare na nüxü pecuáxü na ñuxãcü taãëãcüma ngïxü inaxãgüxü ga togü ga yaxögüxü. Rü pemaã nüxü chixu i ngëma na pema rü ta ngïxü ipexãgüxüçèx i ngëma dïëru i togü i taeneëgüarü ngüxëëçèx ixïcü, na ngëmaãcü ipenawëxüçèx na aixcüma nüxü pengechaügüxü. ⁹ Erü pema rü marü nüxü pecuëx na ñuxãcü tamaã namecümaxü ga tórü Cori ya Ngechuchu ya Cristu. Rü woo nüxü nayexma ga guxüma, natürü ñoma wüxi ga ngearü yemaxüãxürüü pexcèx nügü nixixëë na ngëmaãcü pexü nangëxmaxüçèx i muxüma i mexügü. ¹⁰ Rü ñuxma rü perü mexüçèx nixĩ i pemaã nüxü chixuxü i ngëma dïëruarü nutaquëxechiga. Rü taunecü ga ngupetücügutama nixĩ ga ipenaxügüxü ga ngïxü na penutaquëxexü. Rü yema rü aixcüma perü ngüchaümaã nixĩ ga penaxüxü. ¹¹ Rü ñuxma rü yema noxri na meã ipenaxügüxürüü, rü name nixĩ i taãëãcüma rü perü ngüchaümaã peyanguxëë rü ngëma dïëru i pexü ngëxmacüwa ngïxü ipexã naxcèx i ngëma peeneëgü i nüxü nataxuxü. ¹² Erü ngëxguma aixcüma wüxi ya duüxë tümaãrü ngüchaümaã ngëma dïëru i tüxü ngëxmëxcüwa tümaëneëçèx ngïxü itaxãxgu, rü Tupana rü taãëãcüma ngïxü nayaxu. Erü nüma ya Tupana rü taguma tüxna ngïxcèx naca i ngëma tüxü tauxcü. ¹³ Rü ngëmacèx tama chanaxwëxe i ngëma togüxü na perüngüxëëxügagu pexü nataxu i pemax. ¹⁴ Natürü chanaxwëxe i guxãma tüxü nangëxma i tacü i tanaxwëxexü, erü tama name na texéaxü nataxuxü i tacü. Rü ñuxma na pexü nangëxmaxü i perü dïëru, rü name nixĩ i nüxü perüngüxëëgü i ngëma taeneëgü i nüxü nataxuxü. Rü ngürüãchi to i ngunexügu i pema pexü natauxgu, rü nümagü rü tá nüxĩ nüxü nangëxma na pexü nangüxëëgüxüçèx. Rü ngëmaãcü tá guxãtama tawüxigu. ¹⁵ Rü Tupanaãrü ore i umatüxüwa rü ñanagürü: “Guxema muxüma tüxü yexmaxë rü taxüma tüxü ínayaxü. Rü guxema noxretama tüxü yexmaxë rü tama tüxü inayataxu”, ñanagürü.

Titu rü namüçügüchiga

¹⁶ Natürü Tupanana moxē chaxā, erü nūma rü Tituxū nagu narūxīnūxēē na aixcūma pexū nangūxēēxūcèx, ngēma choma pegu charūxīnūxūrūū. ¹⁷ Rū nūma ga Titu rü: “Ngū” ñanagürü na wena petanūwa chanamuxū. Yerü nūma rü woetama poraācū pegu narūxīnū. Rū ngēmacèx i ñuxma rü wena petanūwa naxū, erü nūxū nangúchaū. ¹⁸ Rū Titumaā ngēma tanamu i wūxi i taeneē i guxūma i yaxōgūxū nūxū ngechaūgūxū erü nūma rü aixcūma meā nūxū nixu i Tupanaārū ore i tūxū maxēxēēxū. ¹⁹ Rū tama ngēmacèxicatama nixī. Erü guxūma i ngēma yaxōgūxū rü ngēma taeneēxū nax-unetagū na toxū íyaxūmücūxūcèx rü toxū nangūxēēxūcèx i ngēxguma Yerucharēūwa ngīxū tangexgu i ngēma dīeru, na ngēmaācū nūxū ticuèxūūgūxūcèx ya tórū Cori, rü na guxāma nūxū dauxūcèx na ñuxācū taāēācūma yigū rüngūxēēgūxū. ²⁰ Rū ítayaga i ngēma taeneē, erü tama tanaxwèxe i texé toxū tixu i yixcama ngīxcèx i ngēma tacū i dīeru i taeneēgūcèx ngīxū inutaquēxegücū. ²¹ Erü tama Tupanapēxewaxicatama tanaxwèxe na meā tanaxūxū, natürü guxū i duūxūgūpēxewa rü ta tanaxwèxe na meā tanaxūxū. ²² Rū Titumaā rü ngēma to i taeneēmaā petanūwa tanamu i wūxi i to i taeneē i toxū nūxū dauxēēxū na aixcūma nūxū nangúchaū na naxūāxū i Tupanaārū puracū. Rū ñuxma rü yexeraācū petanūwa naxūxchaū i nūmax, erü nūxū nacuèx na ñuxācū pema rü taāēācūma togūxū na perūngūxēēgūchaūxū. ²³ Rū ngēxguma texé pexna caxgu na texe yīxū ya Titu, jrū tūmamaā nūxū pixu na nūma rü chomücū ya wūxiwa chomaā pexcèx puracūcū na yīxū! Rū ngēma taxre i togū i namüçügū, rü ngēma nixī i yatügū i guxūma i yaxōgūxū nūxū unetagūxū na Cristuarū puracū naxūgūxūcèx. Rū nūmagū rü aixcūma norū maxūmaā Cristuxū nicuèxūūgū. ²⁴ Rū ngēmacèx chanaxwèxe i ngēma taeneēgūxū nūxū pedauxēē na aixcūma nūxū pengechaūgūxū, na guxūma i yaxōgūxū nūxū cuèxgūxūcèx i ngēmachiga. Rū ngēmaācū guxūma i ngēma yaxōgūxū tá nūxū nacuèxgū na aixcūma yīxū i ngēma mexū i ore i pechiga namaā nūxū tixuxū.

9

Yema dīeru ga yema togū ga yaxōgūxūcèx ngīxū inutaquēxecūchiga

¹ Rū taxucèxma tūxcūū pexcèx chanaxūmatū ngīchiga i ngēma dīeru i ngīxū penutaquēxegücū naxcèx i ngēma taeneēgū i yaxōgūxū i Yudéaanewa ngēxmagūxū. ² Erü marū nūxū chacuèx rü perū ngúchaūmaā ipenaxā i ngēma dīeru. Rū guxūguma taāēācūma ngēma yaxōgūxū i Machedóniāānewa ngēxmagūxūmaā nūxū chixu na ñuxācū i pema i Acayaanewa ngēxmagūxe rü naī ya taunecūgutama marū ípememarexū na ngīxū ipexāgūxū i ngēma dīeru. Rū yema rümumaēxū ga yaxōgūxū ga Machedóniāānecūāx, rü yexguma nūxū naxīnūēgu na ñuxācū taāēācūma togūcèx ngīxū na ipexāgūxū i perū dīeru, rü nūmagū rü ta inanaxūgū na ngīxū inaxāgūxū. ³ Natürü i ñuxma rü ngēma petanūwa chanamugū i ngēma taeneēgū na nūxū nadaugūxūcèx, na aixcūma yīxū i ngēma nūxū chixuxū i pechiga. Rū chanaxwèxe na aixcūma ípememarexū na ngīxū ipexāxū i ngēma dīeru, ngēma taeneēgūmaā nūxū chixuxūrūū. ⁴ Erü ngēxguma chi ñuxre i taeneēgū i Machedóniāānecūāx rü ngürūāchi chomaā petanūwa naxīxgu, rü tama chanaxwèxe na pexū na iyangauxū na tama aixcūma ípememarexū na ngīxū ipexāxū i ngēma dīeru. Rū toxū rü chi wūxi i ānexūchi nixī, erü marūchirēx namaā nūxū tixu na ñuxācū aixcūma ípememarexū na ngīxū ipexāxū i ngēma dīeru. Rū maneca pexū rü chi ta wūxi i ānexūchi nixī. ⁵ Rū ngēmacèx nixī i chauxcèx namexū na naxcèx íchaçaxū i ngēma taeneēgū na nūxīra petanūwa naxīxūcèx rü nūmatama pexū yanangūxēēgūxūcèx na ngīxū penutaquēxegūxūcèx i ngēma dīeru ga ūpamama ngīxū pixucū. Rū ngēmaācū aixcūma tá ímemare i ngēma dīeru i ngēxguma ngēma changuxgu. Rū togū tá nūxū nadaugū na aixcūma perū ngúchaūmaā yīxū na ngīxū ipexāgūxū rü tama aūācūma na yīxū. ⁶ Rū nūxna pecuèxāchie i ngēma dēxa i ñaxū:

“Rū yíxema noxretama i nanetüchire itoxe, rū noxretama i norü o tayaxu. Natürü yíxema muxü i nanetüchire itoxe, rū muxüma i norü o tayaxu”,

ñaxü! ⁷ Rū wüxichigü tanaxwèxe na ngixü itaxãxü i ngëma ngïgu tarüxĩnücü na ñuxre ngixü itaxãxchaüxü. Rū tama name i aüácüma ngixü itaxã rü éxna texé tüxü muácüma ngixü itaxã. Erü Tupana rü nüxü nangechaü i ngëma duüxü i taãëácüma ngixü ixãxü. ⁸ Rū Tupanaméxëwa nangëxma na poraãcü pexna naxããxücèx i guxüma i mexü i pexü taxuxü, na guxüguma pexü nangëxmaxücèx i ngëma penaxwèxexü rü naetü na pexü íyaxüxücèx na togüxü namaã perüngüxëëgüxücèx. ⁹ Tupanaärü ore i ümatüxüwa rü ñanagürü:

“Yima yatü ya mecü rü norü ngüchaümaã meã inanaxã nüxna i ngëma duüxügü i taxuüma nüxü ngëxmaxü. Rū Tupana rü tá guxügu nüxna nacuèxãchi na ñuxãcü namecümaxü i nümax”,

ñanagürü. ¹⁰ Tupana nixĩ ya tüxna naxãcü ya nanetüchire na inatoxücèx, rü tüxna naxãcü i õna na nangõxücèx. Rū nüma tá nixĩ i pexna naxããxü ya guxünema ya nanetüchire ya penaxwèxene na ipenatoxücèx. Rū nüma tá nanaxüxëë rü nanayaxëë ya yima nanetüchire. Rū tá nanamuxëë i norü o, na muxüchixü nawa peyaxuxücèx na ngëmamaã togüxü perüngüxëëgüxücèx. ¹¹ Rū ngëmaãcü i pema rü tá pexü nangëxma i guxüma i mexü na taxuchaãcüma nüxü perüngüxëëgüxücèx i togü. Rū ngëxguma ngëma togü i taeneëgüxütawa ngixü tangegügu i ngëma dïeru i naxcèx ngixü ipexãcü, rü nümagü rü tá poraãcü Tupanana moxë naxãgü ngixcèx. ¹² Erü ngëxguma nüxna ngixü taxãxgu i ngëma dïeru i nüxü ngïmaã perüngüxëëgüxücü i ngëma taeneëgü, rü tama tacü i nüxü taxuxücèxicatama ta nixĩ, natürü naetü i nümagü i taeneëgü rü perü ämaregagu tá poraãcü Tupanana moxë naxãgü. ¹³ Rū nümagü i ngëma taeneëgü rü tá Tupanaxü nicuèxüügü, erü ngëma perü ämaremaã tá nüxü nüxü pedauxëë na aixcüma naga pexĩnüxü i Cristuarü ore i mexü. Rū nümagü rü tá Tupanana moxë naxãgü naxcèx i ngëma perü ämare i perü ngüchaümaã nüxna rü guxüma i yaxögüxüna pexãgüxü. ¹⁴ Rū ngëxgumarüü i ngëma taeneëgü rü tá poraãcü pexcèx nayumüxëgü, erü pexü nangechaügü. Rū tá Tupanana moxë naxãgü naxcèx na ñuxãcü nüma ya Tupana poraãcü pexü nangüxëëxü na yemaãcü pexü natauxchaxücèx na nüxü perüngüxëëgüxü. ¹⁵ Rū ngëmacèx i ñuxma rü Tupanana moxë taxã, yerü tüxna nanamu ga Nane na tórü ämare yíxücèx. Rū nataxuma i ore i nagu mexü na nüxü ixuxücèx na ñuxãcü namaã itaãëgüxüchixü i ngëma ämare.

10

Pauruarü ore rü aixcüma nixĩ yerü Tupana nixĩ ga nüxna ägacü

¹ Rū ñuxma rü yema Cristu yaxna tamaã naxĩnüxürüü rü tamaã namecümaxürüü, rü choma rü ta pemaã yaxna chaxĩnüácüma rü pemaã chamecümaãcüma pexü chacèxü na chauga pexĩnüèxücèx. Erü nümaxü i duüxügü rü nüxü nixugü na pexü chamuüxü ega pexütawa changëxmagu natürü ngëxguma pexna chayaxügu rü tama pexü chamuü. ² Natürü ngëxguma ngëma petanüwa chaxüxgu, rü chierü natauxguma na tacücèx namaã chaporagaxü rü na chanaxucuxëxü i ngëma duüxügü i petanüwa toxü ixuxü na ñoma tama yaxögüxürüü na tamaxëxü. Erü choma rü íchamemare na namaãxüchi na chidexaxü. ³ Rū aixcüma woo duüxügü tixigü natürü tama ñoma i naanecüãxrüxü togü tadai i ngëxguma ítanapoxügu i Tupanaärü ore. ⁴⁻⁵ Erü ngëma toxne i namaã ítanapoxüxü i Tupanaärü ore rü tama ñoma i naãnecüãx namaã äxnexü nixĩ. Erü toma rü toxü nangëxma i Tupanaärü pora na ngëmamaã itayanaxoxëëxücèx i Chatanáärü pora. Rū ngëmaãcü itayanaxoxëë i guxüma i chixexü i ore i Tupanaxü namaã yaxugügüxü i duüxügü. Rū ngëmaãcü itayanaxoxëë i guxüma i Tupanaärü uwanügüarü ore i nügü namaã yacuèxüügüácüma duüxügümaã nüxü yaxugügüxü na tama Tupanaãxü yaxögüãxücèx. Rū guxüma i tacü i nagu naxĩnüxü i ngëma duüxügü i chixexü, rü Cristuna tanaxuaxü na nüma namaã inacuáxücèx. ⁶ Rū wüxicana marü meã Cristuga pexĩnüëgu, rü toma rü

ítamemare na tüxŭ tapoxcuexŭ ya guxãma ya texé ya tama naga ĩnüëxê i Cristuarŭ ore. ⁷ Pema rŭ norŭ düxétüxŭnewaxicatama nixĭ i penangugŭxŭ i wŭxi i duŭxŭ. Natŭrŭ ngêxguma texé tügŭ cuêxgu na Cristuarŭ duŭxŭ tĭixŭ, rŭ name nixĭ i nüxŭ tacuèx na toma rŭ ta tŭmarŭŭ Cristuarŭ duŭxŭgŭ tixĭgŭxŭ. ⁸ Rŭ woo írarŭwa chanangupetüxêê na chaugŭ chicuèxŭxŭ namaã i ngêma na Tupana toxŭ muxŭ, natŭrŭ taxucèxma naxcèx chaxãne. Erŭ aixcŭma Cori nixĭ ya toxŭ mucŭ na pexŭ tarŭngŭxêêgŭxŭcèx na yexeraãcŭ meã peyaxôgŭxŭcèx. Rŭ tama tacŭ rŭ chixexŭgu pexŭ na tayixêêxŭcèx nixĭ i toxŭ namuxŭ. ⁹ Rŭ tama chanaxwêxe i nagu perŭxĭnŭê na pexŭ íchabaixgŭchaŭxŭ namaã i ngêma poperagŭ i pexcèx chaxŭmatŭxŭ. ¹⁰ Erŭ nümaxŭ i duŭxŭgŭ rŭ nüxŭ nixugŭ na chorŭ poperawaxicatama pexŭ íchabajxgŭxŭ, natŭrŭ chomaxŭchi pexŭtawa changexmagu rŭ tama aixcŭma nüxŭ chacuèx na ñuãcŭ mea chidexaxŭ na ngemaãcŭ chauga pexŭ chaxĭnüexêêxŭcèx, ñaxŭmaã choxŭ nixugŭe. ¹¹ Natŭrŭ texe ya ngemaãcŭ idexáxe rŭ tanaxwêxe i nagu tarŭxĭnŭ rŭ ngêma pexna tayaxŭguãcŭma torŭ poperawa pemaã nüxŭ tixuxŭrŭŭ tátama tixĭgŭ i ngêxguma petanŭwa tangêxmagŭgu. ¹² Toma rŭ tama tanaxwêxe i namaã togŭ tawŭxiguxêê rŭ êxna nagu togŭ tangugŭ i ngêma duŭxŭgŭ i nügŭtama icuèxŭgŭxŭ. Nŭmagŭ rŭ nügŭtama nawomŭxêêgŭ, erŭ nügŭmaã nügŭ nawŭxiguxêê rŭ nügŭgutama nügŭ nangugŭ. ¹³ Natŭrŭ toma rŭ tama togŭ namaã ticuèxŭgŭ i ngêma yaxôgŭxŭ i tama Tupana toxmêxwa ngêxmagŭxêêxŭ. Yerŭ Tupana nixĭ ga tomaã nüxŭ ixucŭ na ngextá nanaxwêxexŭ na tapuracŭexŭ. Rŭ nüma nixĭ ga noxri Corĭtiuwa ga petanŭwa toxŭ nangugŭxêêxŭ na pemaã nüxŭ tixuxŭcèx ga norŭ ore. ¹⁴ Rŭ yemaãcŭ toxira nixĭ ga noxri petanŭwa tangugŭxŭ na pemaã nüxŭ tixuxŭcèx ga yema Cristuarŭ ore. Rŭ ngêmacèx i ñuxma na petanŭwa taxĭxŭ, rŭ tama tanangupetüxêê ga yema Tupana tomaã nüxŭ ixuxŭ, yerŭ nüma nixĭ ga toxŭ namuxŭ na pexŭ tarŭngŭxêêgŭxŭcèx. ¹⁵ Rŭ ngemacèx tama togŭarŭ puracŭmaãmare nixĭ i togŭ ticuèxŭgŭxŭ. Rŭ tama nüxŭ tachopetüchaŭ i ngêma Tupana tomaã nüxŭ ixuxŭ na pexŭ tangŭexêêxŭ. Natŭrŭ ngema pexŭ tanaxwaexŭ nixĭ na yexeraãcŭ nüxŭ pecuáxŭ i Tupanaarŭ ore na ngemaãcŭ yexera peyaxôgŭxŭcèx. ¹⁶ Rŭ ngêxguma marŭ petanŭwa tangugŭguwena rŭ tanaxwêxe i ngêma duŭxŭgŭ i perŭ yéamaxŭra ngêxmagŭxŭ i ngextá taguma texé nüxŭ íixuxŭwa taxĭ na ngêmamaã rŭ ta nüxŭ tixuxŭcèx i ore i mexŭ. Erŭ tama tanaxwêxe i togŭarŭ puracŭmaã togŭ ticuèxŭgŭ. ¹⁷ Erŭ Tupanaarŭ ore i ũmatŭxŭwa rŭ ñanagŭrŭ:
 “Rŭ ngêxguma texé tügŭ icuèxŭŭchaŭgu, rŭ name nixĭ i tórŭ Corixŭ ticuèxŭŭ, erŭ nüma nixĭ i tüxŭ nangŭxêêxŭ”,
 ñanagŭrŭ i ngêma ore. ¹⁸ Erŭ ngêma yatŭ i aixcŭma Tupanapêxewa mexŭ rŭ tama nügŭtama nicuèxŭŭ. Natŭrŭ ngêma yatŭ i tórŭ Cori nüxŭ icuèxŭxŭ nixĭ i aixcŭma Tupanapêxewa mexŭ.

11

Pauru rŭ nüxŭ nixuchiga ga yema orearŭ uruŭgŭneta ga tama Tupana imugŭxŭ

¹ Rŭ ñuxma i ngêma tá pemaã nüxŭ chixuxŭ, rŭ bexmana pexcèx rŭ wŭxi i ngêãemare nixĭ, natŭrŭ chanaxwêxe i choxŭ iperŭxĭnŭemare rŭ yaxna chomaã pexĭnŭê. ² Erŭ Tupana pexŭ inuxŭxŭrŭŭ pexŭ chinuxŭ. Erŭ chaugagu nixĭ i Cristuaxŭ peyaxôgŭxŭ, rŭ marŭ Cristuna pexŭ chaxuaxŭ na noxrŭxicatama pixĭgŭxŭcèx. Rŭ ngêmacèx chanaxwêxe i ngearŭ chixexŭãê Cristuxŭ pexŭ chawêx ñoma wŭxi i pacŭ i taguma yatŭxŭ cuèxcŭrŭŭ. ³ Natŭrŭ chaxoegaãê rŭ yema ãxtape norŭ doramaã Ebaxŭ na womŭxêêxŭrŭŭ, ngŭrŭãchi tá ta texé pexŭ tawomŭxêê, na nüxŭ perŭxoexŭcèx na Cristugu perŭxĭnŭêxŭ rŭ naxcèxicatama na pemaxêxŭ. ⁴ Erŭ pema rŭ tauxchaãcŭ nixĭ na pexŭ nawomŭxêêgŭxŭ. Rŭ ngêxguma ínangugŭgu i duŭxŭgŭ i pemaã nüxŭ ixuxŭ i to i Ngechuchuchiga ya tama yima toma nüxŭ tixuchigacŭ, rŭ pema rŭ nüxŭ peyaxôgŭ i ngêma duŭxŭgŭ. Rŭ pema rŭ taãêãcŭma penayaxu i to i naãê i tama Tupanaãê i Üünexŭ ga marŭ peyaxuxŭ ixĭxŭ. Rŭ

peyaxõgü i to i ore i tama Tupanaãrũ ore i mexũ ga noxri peyaxuxũ ixĩxũ. ⁵ Dũcèx, rü woo nawe perũxĩxgu i ngẽma togü i orearũ uruũgũneta, natürũ chauxcèx rü taxuwama choxũ narüyexeragũ. ⁶ Rũ woo tama choxũ nangẽxmagu i tauxcha na duũxũgũpẽxewa chidexaxũ, natürũ aixcũma meã nüxũ chacuèx i ngẽma nachiga chidexaxũ. Rũ ngẽma rü guxũma i torũ puracũwa marũ pexũ nüxũ tadauxẽẽ i guxũguma. ⁷ ¿Pexcèx rü chixexũ pemaã chaxũ ga yexguma chaugũ ícharũxĩragu na pexũ chataxẽẽxũcèx rü choxmẽxmaã chapuracũgu na ngetanũãcũma pemaã nüxũ chixuxũ ga Tupanaãrũ ore i tüxũ maxẽxẽẽxũ? ⁸ Rũ aixcũma yema togü ga yaxõgũxũ choxna ngĩxũ ägücũ ga dĩeru ngĩxũ chayaxu na yemamaã petanũwa chapuracũxũcèx rü pexũ charũngũxẽẽxũcèx. ⁹ Rũ yexguma petanũwa chayexmagu rü aixcũma choxũ itaxu ga dĩeru, natürũ taguma texéna ngĩxcèx chaca. Rũ taeneëgũ ga Machedóniããnewa ne ĩxũ rü choxna ngĩxũ naxãgũ ga yema choxũ tauxcũ. Rũ yemaãcũ tama pexũtawã ngĩxcèx íchaca ga yexguma. Rũ ñuxma rü ta tagutãma tacũcèx pexna chaca. ¹⁰ Rũ Cristu ya chowa ngexmacũégagu pemaã nüxũ chixu i ngema na aixcũma ngetanũãcũma petanũwa chapuracũxũ. Rũ ngema rü chorũ taãxẽ nixĩ. Rũ taxucürũwa texe i guxũ i Acáyaanewa choxna tanayaxu i ngema taãxẽ. ¹¹ ¿Rũ tacũcèx yĩxũ i ngẽmaãcũ chidexaxũ? ¿Éxna pexcèx rü tama pexũ changechaũxũcèx yĩxũ i ngẽmaãcũ chidexaxũ? Dũcèx, pemaã nüxũ chixu rü Tupana nüxũ nacuèx na ñuxãcũ aixcũma pexũ changechaũxũ. ¹² Natürũ ngẽma na ngetanũãcũma pemaã nüxũ chixuxũ i ngẽma ore, rü ngẽmaãcũ tá chanaxũecha na taxucürũwa chixri chauchiga yadexagũxũcèx i ngẽma togü i orearũ uruũgũneta i nügũ ixuxũ na toxrũ naxũgũãxũ i Tupanaãrũ puracũ. ¹³ Nũmagũ rü aixcũma orearũ uruũgũneta nixĩgũ, rü duũxũgũxũ nawomũxẽëgũ. Rũ nũmagũ rü togu nügũ nicuxgũ, rü nügũ nixugũ na Cristu yamugũxũ. ¹⁴ Rũ ngẽma rü taxucèxma namaã pebaixãchiãëgũ. Erũ woo i Chataná rü ta rü Tupanaãrũ orearũ ngeruũgũ i daxũcũãx i yauracũxũrũũãcũ nügũ nangoxẽẽ. ¹⁵ Rũ ngẽmacèx woetama ngẽmaãcũ nixĩgũ i ngẽma duũxũgũ i Chatanáãxũ puracũexũ. Rũ nũmagũ rü duũxũgũ i mexũ ügũxũgu nügũ nicuxgũ. Natürũ ngẽma ngẽmaãcũ ixĩgũxũ, rü Tupana tá nanapoxcue naxcèx i ngẽma chixexũ i naxũgũxũ.

Pauru rü yema puracũ ga Ngechuchu nawa namuxũwa ngũxũ ningẽ

¹⁶ Rũ wena pemaã nüxũ chixu rü tama chanaxwèxe i nagu perũxĩnũẽ na wũxi i ãũãẽxũ chiĩxũ. Natürũ ngẽxguma chi ngẽmaãcũ chomaã nagu perũxĩnũëgu, rü tama chanaxwèxe i choxna penachuxu na ñoma wũxi i ãũãẽxũrũũ chaugũétũwa chidexaxũ, na ngẽmaãcũ choma rü ta írarũwa chaugũtama chicuèxũxũcèx. ¹⁷ Rũ ñuxma na chaugũétũwa chidexaxũ rü ngẽma rü tama tórũ Coriarũ mu nixĩ. Natürũ ñoma wũxi i ãũãẽxũ nügũ icuèxũxũrũũ nixĩ i chidexaxũ. ¹⁸ Rũ ñuxma na nangẽxmaxũ i muxũchixũ i duũxũgũ i ñoma i naãnewa nügũ icuèxũgũxũ, rü choma rü tá ta írarũwa chaugũ chicuèxũ. ¹⁹ Pema rü nagu perũxĩnũẽ rü nüxũ cuèxũchigũxũ pixĩgũ. Natürũ taãëãcũma yaxna namaã pexĩnũẽ i ngẽma duũxũgũ i tama naãẽxũ icuáxũ. ²⁰ Rũ yaxna namaã pexĩnũẽ i ngẽma duũxũgũ i nügũxũ pexũ puracũexẽẽxũ, rü ngẽma ngetanũãcũma pexũ puracũexẽẽmarexũ, rü ngẽma pexũ womũxẽëgũxũ, rü ngẽma chixri pexũ yaxugũxũ, rü ngẽma pemaã guxchigagũxũ. ²¹ Rũ woo wũxi i ãnẽxũchi nixĩ na pemaã nüxũ chixuxũ, natürũ chauxcèx rü tama aixcũma pexũ nüxũ tadauxẽẽ ga torũ porã ga yexguma petanũwa tayexmagũgu. Natürũ ñuxma na tama namuũẽxũ na nügũ yacuèxũgũxũ i ngẽma togü i duũxũgũ, rü choma rü ta taxucèxma chamuũ na chaugũétũwa chidexaxũ woo pexcèx rü taxuwama namexgu i ngẽma nüxũ chixuxũ. ²² Nũmagũ rü nügũ yaxugũgu rü Yudũgũ nixĩgũ. Natürũ choma rü ta Yudũ chixĩ. Rũ nũmagũ nügũ yaxugũgu rü Iraétanũxũgũ nixĩgũ. Natürũ choma rü ta rü Iraétanũxũ chixĩ. Rũ nũmagũ rü nügũ yaxugũgu rü Abrãũtanũxũ nixĩgũ. Natürũ choma rü ta Abrãũtanũxũ chixĩ. ²³ Nũmagũ rü nügũ yaxugũgu rü Cristuaxũ napuracũe. Natürũ choma rü norũ yexera Cristuaxũ chapuracũ. Rũ ngẽma ñachagürũ pexũ woo pema nagu perũxĩnũëgu na ñoma wũxi

i āūāēxūrū chidexaxū. Rū ngēma duūxūgūarū yexera poraācū Tupanaāxū chapuracū. Rū norū yexera chapoxcu, rū norū yexera choxū naçuaixgū ga duūxūgū. Rū muēxpūxcūna rū āūcūmaxūchixūwa chayexma rū wixguxūchi taēx choxū nimēxgū. ²⁴ Rū 5 ēxpūxcūna nixī ga 39 ga çuaximaā choxū napoxcu-gūxū ga chautanūxūgū ga Yudūgū. ²⁵ Rū tomaēxpūxcūna nixī ga naīmaā choxū naçuaixgūxū, rū wūxicana ga nutamaā choxū ínamuxūchigūxū. Rū tomaēxpūxcūna nixī ga guma wapuru ga nagu chixūxūne rū chomaā inanguxū. Rū wūxicana ga yexguma chomaā inanguxgu ga wapuru rū wūxi ga chūtaxū rū wūxi ga ngunexū chinge na taxū ga taxtūarū ngāxūtūgu mūrapewaētūgu chatunagūācūma chiwēxēxū. ²⁶ Rū poraācū nu ne chanaxū, rū poraācū āūcūmaxūwa chayexma yerū natūgū ga āūcūmaxūgu chixūgū, rū ngītēxgūxū rū chixexū chomaā naxūgūchaū. Rū woo chautanūxūgū ga Yudūgūtanūwa, rū woo yema duūxūgū ga tama Yudūgū ixīgūxūtanūwa, rū woo íānegūwa, rū woo namagūwa, rū woo taxtū i taxūwa rū āūcūmaxūwa chayexma. Rū yema duūxūgū ga chomūcūgūneta ixīgūxūtanūwa rū ta āūcūmaxūwa chayexma. ²⁷ Rū poraācū chataarū puracūāx, rū muxūchixū ga guxchaxūgū choxū nangupetū. Rū muēxpūxcūna rū tama chape, rū chataiya, rū chiṭawa. Rū muēxpūxcūna rū tama chachibū, rū choxū nanadeyu, rū choxū nataxu ga chauxchiru. ²⁸ Rū naetūwa i guxūma i ngēma, rū guxū i ngunexūgu rū chaxoegaāē naxcēx i guxūma i ngēma yaxōgūxū i guxū i íānewa ngēxmagūxū. ²⁹ Rū ngēxguma chi texé tama poragu, rū choxū rū ta nangux. Rū ngēxguma chi wūxie texéxū pecadugu nguxēēgu, rū chauāēwa nangux i ngēma. ³⁰ Natūrū ngēxguma chi chaugū chicuèxūūchaūgu, rū tá chaugū chicuèxūū naxcēx na duūxūgū choxū dauxū na taxuwama chamexū. ³¹ Rū Tupana ya tórū Cori ya Ngechuchu ya Cristunatū ya mecū na guxūguma nūxū icuèxūūgūxū, rū nūxū nacuèx na aixcūma yīxū i ngēma nūxū chixuxū. ³² Rū yexguma Damacuwa chayexmagu, rū guma íāneārū āēxgacū ga Aretaarū ngūxēēruū, rū norū churaragūxū namu na nūxna nadaugūxūcēx ga guma íāneārū poxeguxūārū íāxgū na choxū yayauxgūxūcēx ga yexguma chi yéma íchaxūūxgu. ³³ Natūrū yema íāneārū poxeguxūārū íāxācūwa rū wūxi ga pexchigu choxū ínarūchūxūetaūgū ga chomūcūgū. Rū yemaācū chiña naxchaxwa ga yema āēxgacū.

12

Tórū Cori rū Pauruxū nangoxetūxēē rū nūxū nūxū nacuèxēē ga ṭacū ga ēxūguxū

¹ Taxuwama name na texé tūgū icuèxūūxū. Natūrū tá pemaā nūxū chixuama na ñuxācū tórū Cori choxū nangoxetūxēēxū rū ñuxācū choxū nūxū na nacuèxēēxū ga ṭacū ga ēxūguxū. ² Rū 14 ga taunecū marū nangupetū ga na Tupana daxūguxū ga naānewa ga nūma ínayexmaxūwa choxū nagaxū. Natūrū tama nūxū chacuèx rū chauāēwaxicatama nixī ga yéma choxū nagaxū, rū ēxna guxū ga chaxunemaā yīxū ga yéma choxū nagaxū. Rū Tupanaxīcatama nūxū nacuèx i ngēma. ³⁻⁴ Rū aixcūma meāma nūxū chacuèx na daxūguxū ga naānewa choxū nagaxū ga Tupana, natūrū tama nūxū chacuèx rū guxū ga chaxunemaā yéma choxū naga rū ēxna tama. Rū Tupanaxīcatama nixī ya nūxū cuácū i ngēma. Rū yéma nūxū chaxīnū ga ore ga ēxūguxū i guxūma i duūxūgūna chuxuxū na nūxū yaxugūxū. ⁵ Rū choma rū chi name na chaugū naxcēx chicuèxūūxū i ngēma, natūrū tāūtāma ngēmaācū chanaxū. Erū ngēma ngúxū na chingexūmaāxīcatama tá nixī i chaugū chicuèxūūxū. ⁶ Natūrū ngēxguma chi chaugū chicuèxūūchaūgu, rū tāū chima wūxi i ngēāēmare nixī i ngēma, erū aixcūma nixī i ngēma ore i nūxū chixuxū i chauchiga. Natūrū tama chaugū chicuèxūū na taxúema nagu rüxīnūxūcēx na ngēma chowa nūxū naxīnūēxū rū nūxū nadaugūxūārū yexera chiīxū. ⁷ Natūrū tórū Cori rū tama nanaxwēxe i poraācūxūchima chaugū namaā chicuèxūūxū ga yema ēxūguxū ga mexēchixū ga choxū nūxū nacuèxēēxū. Rū yemacēx chaxunewa nananguxēē ga wūxi ga choxū ngúxū ñoma wūxi ya tuxu chaxunewa ingaxixūrū. Rū yema rū ñoma wūxi ga Chatanáarū orearū ngeruūrū chauxūtawa nangu na choxū nachixewexūcēx na tama chaugū

chicuèxüüxcèx. ⁸ Rū tomaēxpüxcüna tórü Corina chaca na choxü iyanaxoxēēāxüçèx ga yema choxü ngúxü. ⁹ Natürü nüma ya tórü Cori rü ñanagürü choxü:

“Rü cuma nüxü cucuèx na guxüguma cuxü changechaü, rü ngēīcatama nixī i cunaxwèxexü. Rū ngēma duüxügü i tama poraexüwa nixī i aixcüma chanangoxēēxü i ñuxācü na chaporaxü”, ñanagürü choxü. Rū ngēmacèx chataāē ega tama chaporagu. Erü ngēxguma tama chaporagu rü ngēxguma nixī i chowa inawéāxü i norü pora ya Cristu. ¹⁰ Rū ngēma na Cristuxü na changechaüxügagu nixī i yaxna namaā chaxīnūxü ega woo chaturagu rü woo tacü chomaā yaxugüegu i duüxügü. Rū woo choxü natauxgu i chorü ngēmaxügü, rü woo duüxügü rü chowe yangēxütanügu, rü woo guxchaxügü choxü ngēxmagu rü Cristucèx rü yaxna namaā chaxīnū i guxüma i ngēma. Erü ngēxguma chaturagu, rü ngēxguma nixī i yexeraācü Cristu choxü poraxēēxü.

Pauru rü naxcèx naxoegaāē ga yema yaxögüxü ga Corītiuwa yexmagüxü

¹¹ Maneca ñoma wüxi i āüāēxürü chidexa, erü ngēmaācü chaugü chicuèxü. Natürü pegagutama nixī i düxwa ngēmaācü chaugüétüwa chidexaxü, yerü pema chi nixī ga choxü picuèxüügüxü, rü tama i chomax. Rū woo taxuwama chame i chomax, natürü taxuwama choxü narüyexeragü i ngēma orearü uruügüneta i nawe perüxīxü. ¹² Rū yexguma petanüwa chayexmagu, rü yaxna pemaā chaxīnūācüma pexü nüxü chadauxēē na aixcüma Cristu choxü muxü na nüxü chixuxüçèx ga norü ore. Rū cuèxruügümaā pexü nüxü chacuèxēē ga yema. Rū pexü nüxü chadauxēē ga taxü ga mexügü ga Tupanaärü poramaā üxü. ¹³ Rū yexguma petanüwa chayexmagu rü pemaā chamecüma yema guxüma ga togü ga yaxögüxümaā na chamecümaxürütama. Natürü wüxiwaxicatama nixī ga íchatüxü yerü ga petanüwa rü tama ngīxü chayaxu ga dīeru yema togü ga yaxögüxütanüwa ngīxü chayaxuxürü. Rū chanaxwèxe i choxü nüxü pengechaü i ngēma. ¹⁴ Rū ñuxma rü marü íchamemare na norü tomaēxpüxcüna pexü íchayadauxü. Rū tāütāma tacüçèx pexna chayaca. Erü tama perü ngēmaxügüçèx petanüwa chaxü, natürü pexcèxüchi nixī i ngēma chaxüxü. Pema rü chauxacügü pixīgü i Tupanaärü orewa. Rū ngēma papá rü mamáärü puracü nixī na naxācügüna naxāāxü i ngēma nüxü taxuxü. Rū tama naxācügüarü puracü nixī na nanatüna rü naēna naxāgüāxü. ¹⁵ Rū choma rü íchamemare na chorü ngúchaümaā pexcèx ichanaxāxü i guxüma i tacü i choxü ngēxmaxü rü woo chaugütama rü ta na ichaxāxü na aixcüma meā peyaxögüxüçèx. Natürü chauxcèx rü ngēxguma yexeraācü pexü changechaügu, rü pema rü yexeraācü nüxü perüxoetanü na choxü pengechaüxü. ¹⁶ Rū nümaxü i duüxügü i petanüwa, rü woo nüxü nacuèxgü na taguma tacüçèx pexütawa íchaçaxü, natürü nümagü rü nüxü nixugüama na pexü chawomüxēēācüma perü dīeru ngīxü chayaxuxü. ¹⁷ ¿Éxna pema nagu perüxīnūēgu rü yema duüxügü ga petanüwa chamugüxüwa pexü chawomüxēē? ¹⁸ Rū Titumaā nüxü chixu na petanüwa íyadauxüçèx. Rū namaā yéma chanamu ga yema to ga taeneē. ¿Éxna pema nagu perüxīnūēgu ga Titu rü pexü yéma nayawomüxēē? ¿Tama éxna aixcüma yīxü na chauxrüü meā na namaxüxü rü chauxrüü mexügu naxīnūxü ga Titux? ¹⁹ Bexmana pema tá nagu perüxīnūē rü ngēmaācü tidexagü, erü togüétüwatama tachogüchaü. Natürü, Pa Chaueneēgü ya Pexü Tangechaügüex, rü Tupanapēxewa rü Cristuégagu nixī i tidexagüxü na yexeraācü meā Tupanaāxü peyaxögüxüçèx rü yexeraācü meā na pemaxēxüçèx. ²⁰ Erü chaxoegaāē rü ngēxguma wena pexü íchayadēuxgu, rü ngürüāchi tama choma chanaxwèxexüācüma ípemaxē, rü ngēmacèx i pema rü tāütāma chomaā petaāēgü. Rū chaxoegaāē erü ngürüāchi tá pexü ichayangau na pegüchi ípexaiaxü, rü pegüarü ngēmaxüçèx pixāüxāchigüxü, rü pegümaā penuēxü, rü pegügüxicatama íperüxīnūēxü, rü pexoregütèxgüxü, rü toguāxü pixuxü, rü pegü picuèxüügüxü, rü chixexü ípexüexü rü ngēmaācü chixri ípemaxēxü. ²¹ Rū chaxoegaāē rü ngēxguma wena petanüwa chaxüxgu, rü ngürüāchi Tupana rü pegagu tá choxü naxānaxēē. Rū ngürüāchi ngechaü tá choxna pexā, erü muxēma i petanüwa rü marü ñuxgumama pecadu taxügüecha, rü tama nüxü

tarūxoechaŭ na Tupanapēxewa chixexŭ taxügüxŭ rü naĩ i ngemaãmare na tamaxēxŭ rü guxŭma i togü i chixexŭ na taxügüxŭ.

13

Pauru nayaxucuxē ga yema yaxōgüxŭ ga Corĩtiucŭāx rü ñuxŭchi nüxŭ narümoxē

¹ Ñuxma rü norü tomaēxpŭxcüna tá nixĩ na petanüwa chaxŭxŭ. Rŭ Tupanaärü ore rü tamaã nüxŭ nixu rü ngēxguma texé chixexŭ ũxgu rü taxre rü ēxna tomaēxpŭx i duŭxŭgŭ nüxŭ daugügu rü nüxŭ yaxugügu na aixcüma yĩxŭ, rü aixcüma tá poxcu tümamaã taxuegu ya yíxema chixexŭ ũxe. ² Rŭ ngēmacèx i pema i ũpamamatama pecadu ügüechaxe rü guxāma i pema ya chixri maxēxē, rü ñuxma na woo pexna chayaxŭguxŭ rü wenaxärü pexna nüxŭ chacuèxāchixēē rü ngēxguma tá ngema chaxŭxgu rü aixcüma tá chanamexēē i guxŭma i ngēma chixexŭ i petanüwa ngēxmaxŭ, rü tāütáma chanangupetŭxēēmare i ngēma. ³ Rŭ pema na naxcèx iperüdaunüxŭ na Cristu chowa idexaxŭ, rü ngēxguma ngema chaxŭxgu, rü ngēxguma tá nixĩ i nüxŭ pedauxŭ na aixcüma chowa na yadexaxŭ ya Cristu. Rŭ nüma ya Cristu rü chowa tá pexŭ nüxŭ nadauxēē na tama naturaxŭ natürü aixcüma yanguxēēaxŭ i norü ore rü tüxŭ napoxcuexŭ ya yíxema chixexŭ ügüxe. ⁴ Rŭ aixcüma nixĩ ga Cristu ga ñoma wüxi ga duŭxŭ i turaxŭrüü nügŭ yaxĩxēēxŭ ga yexguma curuchawa yapotagu. Natürü i ñuxma rü Tupanaärü poragagu namaxŭ. Rŭ ngēxgumarüü i toma na norü duŭxŭgŭ tixĩgüxŭ, rü taturae i toxonewa. Natürü ngēma na norü duŭxŭgŭ tixĩgüxŭ, rü Tupanaärü poragagu tá tamaxē na pexŭ tarüngŭxēēgüxŭcèx. ⁵ Rŭ name nixĩ i pegütama pengugŭ na nüxŭ pecuáxŭcèx ngoxi aixcüma meã peyaxōgŭ. Rŭ name nixĩ i pegŭ pengugŭarü maxŭāx rü ngoxi Tupanapēxewa pime. ¿Tama ēxna nüxna pecuèxāchie na Ngechuchu ya Cristu rü pewa nangēxmaxŭ ega aixcüma peyaxōgŭgu? ⁶ Rŭ chierüna nüxŭ pecuèxgu na toma rü tama orearü uruügŭnetamare na tixĩgüxŭ. ⁷ Rŭ Tupanana naxcèx taca na taxuŭma i chixexŭ na pexŭgüxŭcèx. Rŭ tama duŭxŭgŭpēxewa togŭ ítarütägüxŭcèx nixĩ na ngēmaãcü tayumüxēgüxŭ. Natürü Tupanana naxcèx taca i ngēma na aixcüma meã naxcèx pemaxēxŭcèx woo duŭxŭgŭ nagu rüxĩnüēgu na toma rü ítatüemarexŭ. ⁸ Toma rü taxucürŭwama chixri nachiga tidexagŭ i Tupanaärü ore i aixcüma ixĩxŭ, erü toma rü naetüwa tachogŭ i ngēma ore. ⁹ Rŭ tá tataēgŭ ega aixcüma peporaegu i perü maxŭwa rü ngēmacèx natauxgu i ŭacücèx pemaã na taporagaexŭ. Rŭ Tupanana tá naxcèx tacaama na pexŭ naporaexēēxŭcèx i perü maxŭwa na düxwa aixcüma mexŭ i norü duŭxŭgŭ na pixĩgüxŭcèx. ¹⁰ Rŭ naxŭpa na pexŭ na íchayadauxŭ nixĩ i pexcèx chanaxümatŭxŭ i ñaã popera, na ngēxguma ngema changuxgu rü nataxuxŭcèx i ŭacücèx pemaã na chaporagaxŭ. Erü tórü Cori choxŭ namu na pexŭ charüngŭxēēxŭcèx na yexeraãcü meã peyaxōgŭxŭcèx, rü tama chixexŭ pemaã na chaxŭxŭcèx nixĩ i choxŭ namuxŭ. ¹¹ Rŭ ñuxma na ichayacuèxēēxŭ i ñaã popera, Pa Chaueneēgŭx, rü chanaxwèxe i meã pexŭ naxŭpetü rü naxcèx pedau na ñuxãcü aixcüma meã Tupanacèx pemaxēxŭ. Rŭ name nixĩ i pegŭ petaāxēēgŭ rü wüxigu perüxĩnüē rü meã yaxna pegümaã pexĩnüē rü aixcüma pegŭ pengechaŭgŭ. Rŭ nüma ya Tupana ya tüxŭ ngechaŭcü rü tüxŭ rüngŭxmüēxēēcü, rü guxŭgutáma pemaã inarüxãŭx. ¹² Rŭ chanaxwèxe i wüxichigŭ i pema rü pegŭ pengechaŭgŭãcüma pegŭ perümoxēgŭ. ¹³ Rŭ guxŭma i togŭ i taeneēgŭ i yaxōgüxŭ rü pexŭ narümoxēgŭ. ¹⁴ Rŭ ñuxma rü chanaxwèxe i tórü Cori ya Ngechuchu ya Cristu pexŭ narüngŭxēē, rü Tanatü ya Tupana rü pexŭ nangechaŭ, rü Naã i Üünexŭ rü guxŭguma pemaã inarüxãŭx.

Rü nuãma pexna,
Pauru

POPERA GA GÁRATAANEWA YEXMAGÜXÜ GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Gárataaneärü ĩānegüwa yexmagüxü

1-2 Pa Toeneēgü i Yaxōgüxü i Gárataaneärü ĩānegüwa Ngēxmagüxü, choma i Pauru rü namaā i guxüma i taeneēgü i nuā chauxütawa ngēxmagüxü nixī i pexcèx tanaxümatüxü i ñāā popera. Rü choxü nixī ga namugüxü ga Ngechuchu ya Cristu rü Tanatü ya Tupana. Rü aixcüma tama duüxügü nixī ga choxü unetagüxü na chanaxüxcèx i ñāā Tupanaärü puracü. Natürü Tanatü ya Tupana ga Ngechuchuxü írüdaxēēcü rü nümatam ya Ngechuchu ya Cristu nixī ga choxü naxunetagüxü. 3 Rü chanaxwèxe i Tanatü ya Tupana rü tórü Cori ya Ngechuchu ya Cristu poraäcü pexü narüngüxēē rü pexü nataāxēē. 4 Rü nüma ga tórü Cori ya Ngechuchu rü nügü inaxā na tórü pecaducèx nayuxücèx na nüxna tüxü ĩnangüxüxēēxücèx i guxüma i ñoma i naāneärü chixexü. Rü yemaäcü nanaxü, yerü yema nixī ga Tanatü ya Tupanaärü ngúchaü. 5 ¡Namexēchi ya Tupana i guxüguma! Rü ngēmaäcü yīi.

Nataxuma i to i ore i tüxü maxēxēxü

6 Rü yema na Cristuaxü pengechaütümüügüxcèx nixī ga pexna naxuxü ya Tupana na penayaxuxücèx i maxü i taguma gúxü. Rü ñuxma rü poraäcü chaḃaixāchiāē, erü paxaxüchi ipenaxügü na Tupanana pixīgachixü, na nawe perüxixücèx i to i ngüxēētae i nagu perüxīnūēgu rü pexü maxēxēxü. 7 Natürü tama aixcüma nangēxma i to i ngüxēētae i nawa nayaxuxü i maxü i taguma gúxü. Natürü nangēxma i ñuxre i duüxügü i pexü naguxchaxēēchaüxü, rü nanaxüchicüügüchaü i ngēma ngüxēētae i mexü ga pemaā nüxü chixuxü ga Cristuchiga. 8 Rü toma rü marü pexna tanaxā ga yema ngüxēētae i aixcüma ixīxü i Ngechuchuchiga. Rü ngēxguma chi texé pexü ngúxēēgu i to i ngüxēētae, rü name nixī i noxtacüma Tupana tüxü napoxcu. Rü woo choma chixīgu, rü ēxna ṭacü rü Tupanaärü orearü ngeruü i daxücüāx yixīgu i pexü ngüxēēxü i to i ngüxēētae, rü name nixī i noxtacüma Tupana tüxü napoxcu. 9 Rü ñuxma rü wena pemaā nüxü chixu ga yema noxri pemaā nüxü chixuxü. Rü ngēxguma chi texé pexü ngúxēēgu i wüxi i to i ngüxēētae i tama yema noxri peyaxuxürüü ixīxü, rü name nixī i noxtacüma Tupana tüxü napoxcu. 10 Rü tama chomaā na petaāgüxcèx nixī i ngēma ñachaxü. Erü tama naxcèx chadau na duüxügü chomaā taāgüxü, natürü Tupana chomaā taāxücèx nixī i chadauxü. Erü ngēxguma chi duüxügüxüicatama chataāxēēchaügu, rü tāü chima Cristuarü puracütanüxü chixī.

Ñuxäcü Pauruxü nayaxu ga Tupana na norü puracüwa namuāxücèx

11 Natürü, Pa Chaueneēgüx, chanaxwèxe i nüxü pecuèx na ñāā ore i mexü i nüxü chixuxü, rü tama duüxügüāēwa yīxü na ne naxüxü. 12 Yerü tama wüxi ga duüxüxütawa naxcèx changüx. Natürü Ngechuchu ya Cristutama nixī ga choxü nüxü cuèxēēcü. 13 Pema rü marü nüxü pexīnūēchiga na ñuxäcü chamaxüxü ga ũpa ga yexguma Yudiügücümüga chixüxgu. Rü nüxü pexīnūēchiga na ñuxäcü poraäcü nawe chingēchigüxü ga guxüma ga Tupanaärü duüxügü ga yaxōgüxü rü ñuxäcü chixri namaā na chaxüpetüxü na yemaäcü nüxü nüxü charüxoxēēxücèx ga yema na Ngechuchuaxü yaxōgüāxü. 14 Rü muxüma ga chautanüxügü ga Yudiügü ga chorü nayaāxgüraüxüärü yexera nagu chixü ga yema Yudiügücüma. Yerü norü yexera meāma chayangüxēē ga nacümagü ga nuxcümaügüxü ga chorü oxigü nagu ĩxü. 15-16 Natürü yexguma tautama chabuxgu, rü woetama Tupana choxü naxuneta na choxü namuxücèx na chanaxüxcèx i norü puracü. Rü nüma rü chauxcèx naca na noxrü chixīxücèx yerü poraäcü choxü

nangechaŭ. Rŭ yexguma Tupana naxwèxegu, rŭ choxŭ nŭxŭ nacuèxēē ga Nane ya Cristu. Rŭ yemaācŭ nanaxŭ na ngēma duŭxŭgŭ i tama Yudíugŭ ixíguŭmaā nŭxŭ chixuxŭcèx na ñuxācŭ Ngechuchugagu tŭxŭ nangēxmaxŭ i maxŭ i taguma gúxŭ. Rŭ yexguma yemaācŭ Tupana choxŭ nŭxŭ cuèxēēgu ga Nane, rŭ taxúenama chayaca. ¹⁷ Rŭ bai ga Yerucharéŭwa na chaxŭxŭ na nŭxna chayaçaxŭcèx ga yema togŭ ga ngúexŭgŭ ga nŭxŭra Tupana imugŭxŭ. Natŭrŭ ga choma rŭ yexgumatama Arábiaanewa chaxŭ. Rŭ yemawena, rŭ Damacuarŭ ñānecèx chataegu. ¹⁸ Rŭ tomaēxpŭx ga taunecŭguwena rŭ dŭxwa Yerucharéŭwa chaxŭ na Pedruxŭ chacuáxŭcèx. Rŭ 15 ga ngunexŭtama naxŭtawa chayexma. ¹⁹ Rŭ yéma nŭxŭ chadau ta ga Chaŭtiágu ga tórŭ Cori naēneē. Natŭrŭ taxuŭma ga togŭ ga ngúexŭgŭ ga tórŭ Cori imugŭxŭxŭ chadau. ²⁰ Rŭ Tupana choxŭ nadau na aixcŭma yíxŭ i ngēma ore i ñuxma pexcèx chaxŭmatŭxŭ. ²¹ Rŭ yemawena, rŭ Chíríiaanewa rŭ Chiríchíiaanewa chaxŭ. ²² Natŭrŭ yema taeneēgŭ ga Cristuaxŭ yaxŭgŭxŭ ga Yudéaanewa yexmagŭxŭ, rŭ taguma choxŭxŭchi nadaugŭ. ²³ Rŭ yema nŭxŭ naxŭnŭxŭ ga chauchiga rŭ ñāxŭcatama nixŭ:

“Rŭ ngēma Pauru ga ŭpa tawe ingēchigŭxŭ, rŭ ñuxma rŭ duŭxŭgŭmaā nŭxŭ nixu i Tupanaārŭ ore i mexŭ, rŭ namaā nayaxucuxē na Cristuaxŭ yaxŭgŭāxŭcèx. Rŭ ngēmaācŭ nanaxŭ i ñuxma rŭ woo ga noxri rŭ inayanaxoxēēchaŭ ga yema ore”, ñaxŭ. Rŭ yexicatama nixŭ ga chauchiga ga nŭxŭ naxŭnŭxŭ. ²⁴ Rŭ yexguma ga yema duŭxŭgŭ rŭ Tupanaxŭ nicuèxŭgŭ nagagu ga yema Tupana chomaā ŭxŭ.

2

Yema togŭ ga ngúexŭgŭ ga Tupana imugŭxŭ rŭ meā Pauruxŭ nayauxgŭ

¹ Rŭ 14 ga taunecŭwena rŭ wenaxārŭ Yerucharéŭwa chaxŭ namaā ga Bernabé. Rŭ Titu rŭ ta íchayaga. ² Rŭ yéma chaxŭ yerŭ Tupana choxŭ nŭxŭ nacuèxēē ga na nanaxwèxexŭ na yéma chaxŭxŭ. Rŭ yéma Yerucharéŭwa, rŭ yema yaxŭgŭxŭārŭ āēxgacŭgŭmaāxŭcatama changutaquēxe. Rŭ meāma namaā nŭxŭ chixu ga nachiga ga yema Tupanaārŭ ore i mexŭ ga nŭxna chaxāxŭ ga yema duŭxŭgŭ i tama Yudíugŭ ixíguŭ. Rŭ yemaācŭ meāma namaā nŭxŭ chixu na ñuxācŭ na yíxŭ ga chorŭ ngŭxēētae, yerŭ tama chanaxwèxe na yixcŭra rŭ choxŭ nŭxŭ naxoexŭ rŭ ngēmaācŭ natŭcèxmamare na yíxŭ i ngēma puracŭ i chaxŭxŭ. ³ Rŭ yema yaxŭgŭxŭ, rŭ nŭmagŭ rŭ ta norŭ me nixŭ ga yema chorŭ ngŭxēētae. Rŭ yemacèx rŭ woo tama Yudíu na yíxŭ ga Titu rŭ taguma na ínawiechèxmŭpēxechiraŭxŭ, natŭrŭ yema āēxgacŭgŭ rŭ tama nanamu na ínawiechèxmŭpēxechiraŭxŭcèx. ⁴ Natŭrŭ aixcŭma nixŭ ga ñuxre ga taeneēgŭneta ixíguŭ ga bexmamare tatanŭgu nachocuxŭ. Rŭ yemagŭ nixŭ ga naxwèxegŭxŭ na inawiŭchèxmŭpēxechiraŭxŭ i ngēma yaxŭgŭxŭ i tama Yudíugŭ ixíguŭ. Rŭ ñuxma na Ngechuchu ya Cristuarŭ duŭxŭgŭ ixíguŭ, rŭ yema taeneēgŭneta rŭ bexma tatanŭgu nachocu na tŭxŭ nangugŭgŭxŭcèx na ñuxācŭ Cristu nŭxna tŭxŭ íngŭxŭxŭcèxŭ ga yema mugŭ ga Moíché ŭmatŭxŭ. Yerŭ nŭmagŭ nanaxwèxegŭ na wenaxārŭ nagu ixíxŭ ga yema mugŭ ga guxchaxŭ ga Moíché ŭmatŭxŭ. ⁵ Natŭrŭ bai ga írarŭwa naga na taxŭnŭxŭ ga yema duŭxŭgŭ. Yerŭ tama tanaxwèxegŭ na texé pexŭ naxŭchicŭxŭ i ngēma ore i mexŭ i aixcŭma ixíxŭ i tamaā nŭxŭ ixuxŭ i ñuxācŭ tŭxŭ na nangēxmaxŭ i maxŭ i taguma gúxŭ ega Cristuaxŭ yaxŭgŭgu. ⁶ Natŭrŭ yexguma yema yaxŭgŭxŭārŭ āēxgacŭgŭ ga Yerucharéŭwa yexmagŭxŭ nŭxŭ ñnŭēgu ga ñuxācŭ na yíxŭ ga chorŭ ngŭxēētae, rŭ namaā nataāēgŭ rŭ taxuŭma ga ŭacŭ ga togŭ ga mugŭ choxna naxāgŭ na namaā changŭxēētaexŭcèx. Natŭrŭ tama yema na āēxgacŭgŭ yixíguŭxŭgu charŭxŭnŭ, erŭ nŭxŭ chacuèx na Tupanapēxewa rŭ guxāma na wŭxigŭxŭ. ⁷ Natŭrŭ nŭmagŭ ga yema āēxgacŭgŭ, rŭ nŭxŭ nicuèxāchigŭ na choxŭ yíxŭ ga namuxŭ ga Tupana na yema duŭxŭgŭ ga tama Yudíugŭ ixíguŭmaā nŭxŭ chixuxŭcèx ga norŭ ore i mexŭ, yexgumarŭ ga Pedruxŭ na namuxŭrŭ ga Tupana na Yudíugŭmaā nŭxŭ yaxuxŭcèx ga yema ore. ⁸ Rŭ gumatama Tupana ga Pedruxŭ mucŭ na Yudíugŭmaā nŭxŭ na yaxuxŭ ga ore

i mexū, rü gumatama Tupana nixī ga choxū mucū na yema duūxūgū ga tama Yudíugū ixīgūxūmaā nūxū chixuxūcèx ga yema ore. ⁹ Rü yemacèx ga Chaūtiágu rü Pedru rü Cuáū ga yaxōgūxūārū āēxgacūgū, rü nūxū nicuēxāchigū na choxū naxunetaxū ga Tupana na chanaxūxūcèx i ngēma puracū. Rü yemacèx ga yema āēxgacūgū, rü tomēx niyauxāchigū ga choma rü Bernabé na toxū nūxū nadauxēēgūxūcèx na aixcūma namūcūgū tixīgūxū i ngēma puracūwa. Rü nūmagū rü ta norū me nixī na ngēma duūxūgū i tama Yudíugū ixīgūxūtanūwa na tanaxūxū i Tupanaārū puracū rü nūmagū i Yudíugūtanūwa. ¹⁰ Rü toxna naxcèx naca na nūxū tarūngūxēēgūxūcèx ga yema yaxōgūxū ga ngearū dīeruāxgūxū. Rü yexicatama nixī ga toxna nūxū nacuēxāchixēēxū. Rü choma rü ta ngēmatama nixī i guxūguma woetama meāma chaxūxū.

Pauru rü Aūtioquíawa Pedruxū naxucuxē

¹¹ Natürü yixcūra ga yexguma Aūtioquíawa naxūxgu ga Pedru, rü noxtacūma nūxū nūxū chaxīnūxēē, yerū tama aixcūma name ga yema naxūxū namaā ga yema yaxōgūxū ga tama Yudíugū ixīgūxū. ¹² Yerū noxri rü yema duūxūgū ga tama Yudíugū ixīgūxūmaā nachibū ga Pedru. Natürü yexguma yéma nangugūgu ga ñuxre ga Yudíugū ga yaxōgūxū ga Chaūtiágu yéma mugūxū, rü Pedru rü marū tama yema duūxūgū ga tama Yudíugū ga yéma ngugūxū ga nagu ixū ga yema nacūma na Tupanacèx ínawiechēmüpēxechiraūgūxū. ¹³ Rü yema togū ga Yudíugū ga yaxōgūxū, rü yexguma nūxū nadaugūgu ga yema Pedru ūxū, rü nūmagū rü ta nanaxūgū ga yema chixexū rü naxcèx nawoeguchaū ga yema nuxcūmaūgūxū ga nacūmagū. Rü dūxwa ga Bernabé rü ta natanūgu naxā ga yema chixexū ūgūxū. ¹⁴ Natürü yexguma nūxū chadēuxgu na tama Tupanaārū ore i mexū tūxū nguxēēxūācūma na namaxēxū ga yema yatūgū, rü guxū ga yaxōgūxūpēxewa Pedruxū nūxū chaxīnūxēē. Rü ñacharūgū nūxū:

“Rü dūcax i cuma na Yudíuchirēx quiixū, cuma rü tama aixcūma Yudíugūcūmagu quixū. ¿Rü ñuxācū i ñuxma i cunamuxū na Yudíugūcūmagu naxīxū i ngēma duūxūgū i tama Yudíugū ixīgūxū?” ñacharūgū nūxū.

Yudíugū rü woo ngēma duūxūgū i tama Yudíugū ixīgūxū rü norū ōgagu nixī i nayauxgūāxū i maxū i taguma gūxū

¹⁵ Rü pemaā nūxū chixu rü toma rü aixcūma torū bucūmatama Yudíugū tixīgū rü Tupanaxū tacuēxgū. Rü ngēmaācū tama duūxūgū i tama Tupanaxū cuēxgūxū tixīgū. ¹⁶ Rü nūxū tacuēxgū rü yema nuxcūmaūgūxū ga mugū ga Moiché ūmatūxū rü tama tūxū nimexēē i Tupanapēxewa, erū taxucūrūwama texé aixcūma naga taxīnūē i ngēma mugū. Natürü i ñuxma rü Tupana tūxū nadau na imexū ega Ngechuchu ya Cristuaxū yaxōgūgu. Rü yemacèx ga toma rü ta Ngechuchu ya Cristuaxū tayaxōgū na torū ōgagu Tupana toxū nadauxū na timexū. Erū nūxū tacuēxgū rü tama ngēma mugūgagu nixī na Tupanapēxewa tamexū ya wūxie, erū taxucūrūwama texé aixcūma naga taxīnū i ngēma mugū na ngēmaācū Tupanapēxewa tamexūcèx. ¹⁷ Rü ñuxma i yixema rü Cristuaxū tayaxōgū, rü ngēmacèx nixī i Tupanapēxewa imexū. Natürü ngēxguma chi wūxi i ngunexūgu rü yixema nagu rūxīnūēgu rü mugūgu na ixīxūgagu yixīgu na Tupanapēxewa imexū, rü maneca tá nagu tarūxīnūē na Cristu tūxū pecaduāxēēxū. Natürü dūcax, rü tama ngēmaācū nixī erū Cristu rü tagutáma texēxū napecaduāxēē. ¹⁸ Choma rü marū nūxū charūxo na nagu charūxīnūxū na mugūgu chixūxūgagu Tupanapēxewa chamexū. Natürü ngēxguma chi wenaxārū naxcèx chataegugu i ngēma nuxcūmaūgūxū i mugū rü chi nūxū charūxoxgu na Cristuaxū chayaxōxū, rü chi aixcūma wūxi i pecaduāxū chixī. ¹⁹ Yerū yexguma yema mugūwa changūxgu, rü dūxwa nūxū chicuēxāchi na tama yangūxū ga yema mugū na choxū namexēēxū Tupanapēxewa. Yerū taxucūrūwama aixcūma naga chaxīnū ga guxūma ga yema mugū. Rü ngēmacèx i ñuxma rü Cristuaxū chayaxō na Tupanapēxewa chamexūcèx rü naxcèxicatama chamaxūxūcèx. Rü Cristu rü curuchagu nayu na iyanaxoxūcèx ga nuxcūmaūxū ga chorū maxū ga choxū yexmaxū ga

yexguma yema mugügu chixūxgu. ²⁰ Rū ñuxma rü marü tama chaugümaâtama ichacuèx, natürü Cristu nixī ya chomaã icuácü erü chowa namaxū. Rū ñuxma rü Tupana Nane ya Cristuaxū chayaxōōcūma nixī i chamaxūxū i ñoma i naãnewa. Rū nüma nixī ga choxū nangechaūūxū, rü nügü inaxāxū na chauxcèx nayuxūcèx. ²¹ Rū tama nüxū chaxoxchaū i ngēma mexū ga Tupana taxcèx üxū ga yexguma nayuxgu ga Cristu. Yerü yexguma chi yema mugügu ixīxūgagu Tupanapēxewa imexgu, rü natüçèxmamare chi nixī ga na nayuxū ga Cristu.

3

Ñuxma rü tama ngēma mugügu taxī erü marü Cristuaxū tayaxōgü

¹ Pa Chaueneēgü i GárataneçūĀx, pema rü pengēãēgümare. Rū yexguma petanüwa tayexmagügu rü meãma guxāpēxewa pemaã nüxū tixu rü pexcèx tanangoxēē na ñuxācū curuchagu taxcèx nayuxū ga Ngechuchu ya Cristu. ¿Rü texé pexū tawomūxēē i ñuxma na tama naga pexīnūēxūcèx i ngēma ore i aixcūma ixīxū ga pemaã nüxū tixuxū? ² Rū wüxi i orecèx pexna chaca, rü ¿ñuxācū yīxū ga penayaxuxū ga Tupanaãē i Üünexū? ¿Éxna pexcèx rü yema mugü na pinguxēēgüxūgagu yīxū ga penayaxuxū, rü éxna ngēma ore i mexū ga nüxū pexīnūēxū rü pixōgüxūgagu yīxū? ³ Pema rü pengēãēgümare rü poraãcū ípetüe. Noxri rü Cristuaxū peyaxōgü yerü Tupanaãē i Üünexū pewa napuracü. ¿Rü ñuxācū i ñuxma i nagu perüxīnūēxū na wenaxarü naxcèx pewoeguxū i ngema nuxcūmaxūxū i mugü i taguma maxū pexna āxū? ⁴ Pema rü poraãcū Tupana pexū narüngūxēē. Rū chierü tama natüçèxmamare yixīgu ga yema, erü taxucürüwa natüçèxmamare nixī. ⁵ Rū yexguma Tupana pexna namuxgu ga Naãē i Üünexū rü petanüwa naxüāgu ga taxū ga mexügü ga norü poramaã naxūxū, rü ¿tacügagu nixī ga naxüāxū ga yema? ¿Pexcèx rü mugü na pinguxēēxūgagu yīxū ga Tupana naxūxū ga yema? Tama yemagagu nixī. Tupana rü petanüwa nanaxü ga yema taxū ga mexügü yerü nüxū peyaxogü ga norü ore ga nüxū pexīnūēxū. ⁶ Rū dücax, pemaã nüxū chixu rü name nixī i nuxcūmaüçü ga torü oxī ga Abráürüü pixīgü. Yerü Abráü rü Tupanaāxū nayaxō, rü yemacèx Tupana nüxū nadau ga na namexū. ⁷ Rū ngēmawa nüxū pedau rü ngēma duūxügü i Tupanaāxū yaxōgüxū nixī i aixcūma Abráütanūxū ixīgüxū i Tupanapēxewa. ⁸ Rū Tupanaārü ore i ümatüxūwa rü nüxū nixu na ñuxācū Tupanapēxewa tá na yamexū i ngēma duūxügü i yaxōgüxū i woo tama Yudíugü ixīgüxū. Rū yemaãcü nüxū nixu naxüpa ga na nangupetüxū. Yerü Tupana rü nuxcūmamatama Abráümaã nüxū nixu ga ñaã ore i mexū i ñaxū:

“Rü cugagu tá nüxū charüngüxēē i guxūma i nachiüñānecūĀx i duūxügü”,
ñaxū. Rü yemaãcü nüxū tacuèx rü Cristu rü Abráütaa na yīxū. ⁹ Rü ngēmacèx i ñuxma rü Tupana nanayaxu i guxūma i duūxügü i yaxōgüxū, yexgumarüü ga Abráü ga yaxōcūxū na nayaxuxürüü. ¹⁰ Natürü chixexūwa nangēxmagü i guxūma i ngēma duūxügü i nagu rüxīnūēxū na mugü yanguxēēgüxūgagu Tupanapēxewa yamexū. Erü Tupanaārü ore i ümatüxūwa rü ñanagürü:

“Rü guxūma i duūxügü i tama aixcūma yanguxēēgüxū i guxūma i ngēma mugü i ümatüxū, rü chixexūwa nangēxmagü”,

ñanagürü. Erü nüxū tacuèxgü na taxucürüwama aixcūma texé yanguxēēxū i guxūma i ngēma mugü. ¹¹ Rü ngēmaãcü meãma nangox na tama ngēma mugü tinguxēēxūcèx yīxū na texé Tupanapēxewa mexū. Erü Tupanaārü ore i ümatüxūwa rü ñanagürü:

“Rü yíxema tümaärü ògagu Tupanapēxewa mexē, rü yíxema tá tixī ya aixcūma tüxū nangēxmaxē i maxū i taguma gúxū”,

ñanagürü. ¹² Natürü ngēxguma nagu rüxīnūēgu na mugü inguxēēxūcèx yīxū na Tupanapēxewa imexū, rü taxucèx chima tüxcüü tayaxōgü. Erü Tupanaārü orewa rü ngēmachiga naxümatü, rü ñanagürü:

“Rü yíxema aixcūma meāma yanguxēxē i guxūma i mugū, rü ngēmagagu tá tūxū nangēxma i tūmaārū maxū”, ñanagürü. Natürü ngēma mugū rü düxwa chixexūwa tūxū naga erü taxucürüwama texé aixcūma meā tayanguxēē. ¹³ Natürü ga Cristu rü nawa tūxū ínanguxūxēē ga yema mugū ga chixexūwa tūxū yexmagūxēēxū. Rü taxcèx nixī ga chixexūwa nayexmaxū ga yexguma curuchagu nayuxgu. Erü Tupanaārū ore i ümatūxūwa, rü ñanagürü: “Rü guxāma ya yíxema wūxi i naīwa tūxū natuxēēgūācūma yúxe, rü chixexūwa tangēxma”, ñanagürü. ¹⁴ Rü yemaācū curuchagu nayu ga Ngechuchu ya Cristu na nüxū nangūxēēxūcèx i guxūma i ngēma duūxūgū i tama Yudíugū ixīgūxū, yema Tupana Abráūmaā ixunetaxūrü. Rü taxcèx rü ta nayu ga Cristu na yíxema rü ta nüxū yaxōgūxūcèx rü nayauxgūxūcèx i Tupanaāē i Üünexū i tamaā inaxunetaxū.

Tupanaārū uneta rü ngēma mugüarū yexera name

¹⁵ Pa Chaueneēgūx, ñuxma rü tá pemaā nüxū chixu i wūxi i cuèxruū na ñuxācū duūxūgū tacū nūgūmaā mexēēxū. Rü dücax, ngēxguma chi wūxi ya yatū rü texēmaā tacūcèx inaxunetagu rü chi wūxi i poperagu meā naxūmatūāgu i ngēma, rü taxucürüwa texé itayanaxoxēē rü éxna tanaxūchicūü i ngēma norü uneta. ¹⁶ Rü dücax, rü yexgumarūūtama nixī ga nangupetūxū ga yexguma Tupana rü Abráūmaā rü Abráūtaamaā inaxunetagu. Rü Tupanaārū ore i ümatūxūwa rü tama “Abráūtaagū” ñanagürü, yerü tama muxūma ga duūxūgūchiga nidexa. Natürü yema ore rü “Abráūtaa” ñanagürümare, yerü wūxitama ga duūxūgūchiga nixī ga yadexaxū. Rü yema rü Cristuchiga nixī. ¹⁷ Rü ngēmaācū pemaā chanangoxēē na Tupana rü Abráūmaā namexēēāxū rü namaā inaxunetaxū na Cristugagu tá yīxū i duūxūgūxū nangūxēēxū. Rü ngēmacèx i ñuxma rü yema Moīché ümatūxū ga mugū ga 430 ga taunecū yema unetawena ínguxū, rü taxucürüwama inayanaxoxēē ga yema Tupanaārū uneta ga nüxīra Abráūmaā nüxū yaxuxū. Rü ngēmacèx i ñuxma rü ta naporā i ngēma uneta. ¹⁸ Rü ngēxguma chi mugū ínguxēēgūxūgagu yixīgu na Tupana tūxū rüngūxēēxū, rü natūcèxmamare chi nixī ga yema Tupanaārū uneta ga nüxīra Abráūmaā nüxū yaxuxū. Natürü aixcūma nixī na ngetanūācūma Abráūxū nangūxēēxū ga Tupana, yerü yemaācū marū namaā inaxuneta. ¹⁹ Rü ñuxma rü ¿tacūwa namexū ga yema mugū ga Moīché ümatūxū? Rü dücax, Tupana rü marū Abráūmaā inaxunetaguwena nixī ga duūxūgūna naxāāxū ga yema mugū, na yemaācū duūxūgūxū nüxū nadauxēēxūcèx na ñuxācū porācū pecadu naxūexū. Rü yemaācū nixī ñuxmata ínangu ga guma Abráūtaa ya Cristu. Rü gumachiga nixī ga Abráūmaā inaxunetaxū ga Tupana ga noxrix. Rü yexguma ínanguxgu ga yema mugū, rü Tupana rü daxūcūāx ga norü orearū ngeruūgūmaāxīra nüxū nixu. Rü yemagū nixī ga nüxī Moīchémaā nüxū ixugūxū, rü nüma ga Moīché rü duūxūgūmaā nüxū nixu. ²⁰ Natürü yexguma Tupana Abráūmaā ixunetagu, rü nümaxūchima ga Tupana nixī ga Abráūmaā nüxū yaxuxū ga yema norü uneta. Rü tama togūmaāxīra nüxū nixu na yemagū nüxī Abráūmaā nüxū ixugūexūcèx.

Tacūcèx duūxūgūna nanaxā ga Tupana ga yema mugū

²¹ ¿Rü ñuxū ñapēgūxū i ñuxmax? ¿Pexcèx éxna rü yema Moīché ümatūxū ga mugū rü inayanaxoxēē i Tupanaārū unetagū? Rü dücax, tama ngēmaācū nixī. Yerü yexguma chi naporagu ga yema mugū na tūxna naxāāxū i maxū i taguma gūxū, rü chi Tupanapēxewa time i ngēxguma meāma yanguxēēgu. ²² Natürü tama ngēmaācū nixī. Erü Tupanaārū ore i ümatūxūwa nüxū tadau na guxūma i duūxūgū rü pecadutūūwa nangēxmagūxū. Rü ngēmacèx i ñuxma rü yíxema Ngechuchu ya Cristuaxū yaxōgūxexicatama tixī ya nayauxgūxe i ngēma maxū i aixcūma mexū i Tupana tamaā ixunetaxū. ²³ Rü yexguma tauta ínanguxgu ga Cristu na nüxū yaxōgūxūcèx, rü mugütūūwa tayexmagū rü tamaā inacuèx. Rü yemaācū tixīgū rü ñuxmata Tupana taxcèx nangoxēē ga Ngechuchu ya Cristu na nüxū yaxōgūxūcèx. ²⁴ Rü yemaācū ga yema mugū rü tamaā inacuèx

ñuxmata Cristuxütawa tüxü nagagü na nüxü yaxõgüxüçèx rü ngēmaäcü Tupanapēxewa imexüçèx. ²⁵ Natürü i ñuxma na marü núma nanguxü ya Cristu na nüxü yaxõgüxüçèx, rü marü tama ngēma mugütüüwa tangēxmagü. Rü ñuxma rü marü taxucèxma tüxcüü tamaã inacuèx i ngēma mugü. ²⁶ Rü ñuxma na Ngechuchu ya Cristuaxü peyaxõgüxü, rü Tupanaxäcügü pixīgü i guxāma i pemax. ²⁷ Rü ñuxma na Cristuégagu ípebaiüxü, rü Cristuarü pixīgü rü núma rü pemaã inacuèx na naxrüü pixīgüxüçèx. ²⁸ Rü ñuxma rü Tupanapēxewa rü nüetama nixí ega woo Yudíugü pixīgügu rü éxna tama. Rü nüetama ega woo wüxi i coriarü duüxügu pixīgügu rü éxna taxúxearü duüxügu pixīgügu. Rü nüetama ega woo piyatügu rü éxna pingexgu. Erü ñuxma na Ngechuchu ya Cristuarü duüxügu na pixīgüxü, rü wüxitama i duüxü pixīgü i guxāma i pemax. ²⁹ Rü ñuxma na Cristuarü pixīgüxü, rü ngēmacèx waxi nixí na aixcüma Abráütaagü pixīgüxü. Rü ngēmacèx i pema rü tá ta penayaxu i guxüma ga yema Abráümaã inaxunetaxü ga Tupana.

4

¹ Rü dücax, ngēxguma wüxi i buxü yunatügu, rü ngēma buxü rü tama ngēxgumatama nanayaxu i nanatüarü ngēmaxügu. Rü woo guxüma i nanatüarü ngēmaxüärü yora yixígu, natürü ngēxürüxü i nanatüarü puracütanüxürümare nixí ñuxmata nayèx. ² Rü ngēmacèx nangēxma i ngēma buxüärü dauruü i namaã icuáxü rü nüxü nüxna dauxü i ngēma nanatüarü ngēmaxügu ñuxmata nawa nangu ya yima taunecü ya noxri nanatü nagu unetacü na ngēma buxü rü nügümaã inacuáxüçèx. ³ Rü yexgumarüü nixí ga tamaã nangupetüxü ga noxrix. Yerü yexguma tauta Cristuxü icuèxgu, rü natüüwa tayexmagü ga yema naãégü i chixexügu i ñoma i naänemaã icuèxgüxü. ⁴ Natürü yexguma nawa nanguxgu ga yema ngunexü ga inaxunetaxü ga Tupana, rü núma nanamu ga Nane. Rü duüxügürüü wüxi ga ngewa nabu ga guma Nane. Rü yema Moíché ümatüxü ga mugütüüwa nayexma ga yexguma nabuxgu. ⁵ Rü yemaäcü núma nangu ga Tupana Nane na tüxü ínanguxüxéèxüçèx i guxāma i yixema ga noxri mugütüüwa na iyexmagüxü. Rü yemaäcü tüxü narüngüxéè ga núma ga Tupana Nane na Nanatü ya Tupanamaã tüxü yaxuxüçèx na aixcüma naxäcügüxüchi ixīgüxü. ⁶ Rü Tupana pexna nanamu ga Naãe i Üünexü na pexü nüxü nadauxéèxüçèx na aixcüma naxäcügüxüchi pixīgüxü. Rü ngēmacèx i ñuxma rü marü name i “Pa Chaunatüx”, ñaperügü nüxü ya Tupana. ⁷ Rü ngēmacèx i ñuxma rü Tupanaxäcüxüchi quixí, rü tama wüxi i norü duüxümare quixí. Rü ñuxma na naxäcüxüchi quixü, rü norü ngúchaü nixí na cuxna naxäãxü i guxüma i tacü i noxrü ixíxü.

Pauru rü yema yaxõgüxüçèx naxoegaã

⁸ Rü üpa ga yexguma tauta Tupanaxü pecuèxgu, rü perü tupananetagütüüwa peyexmagü rü nüxü picuèxüügu ga yema tama aixcüma Tupana ixīgüxü. ⁹ Natürü i ñuxma na Tupanaxü pecuáxü rü núma rü na pexü nacuáxü, rü ¿tüxcüü wena naxcèx pewoeguchaü i ngēma naãégü i chixexügu i ñoma i naänemaã icuèxgüxü? ¿Rü tüxcüü penaxwèxe na wena natüüwa pegü pengēxmagüxéèxü i ngēma naãégü i tama aixcüma poraexü i natüçèxmamare ixīgüxü? ¹⁰ Rü dücax i pemax, rü ñuxma rü ta ngēma nuxcümaügüxü i Yudíugüçümügu pexíama woo Cristuaxü na peyaxõgüxü. Erü penaxaure i ñuxre i ngunexügu rü ñuxre ya tauemacügü rü ñuxre ya taunecügü rü ñuxre i petagü, erü nagu perüxñüè na ngēmaäcü Tupanapēxewa tá pimexü. ¹¹ Rü ngēmacèx poraäcü chaxoegaã, erü ngürüächü natüçèxmamare tá nixí ga yema puracü ga petanüwa chaxüxü. ¹² Pa Chaueneëgüx, pexü chacèèxü na chauxrüü nüxü perüxoexü na nagu pexíxü i ngēma Yudíugüarü mugü. Erü ñuxma na Cristuwe charüxüxü rü marü nüxü charüxo na nagu chixüxü ga yema mugü ga üpa tama nagu pexíxü. Rü dücax, yexguma noxri petanüwa chayexmagu rü tama choxü pexo, rü ngēmacèx chanaxwèxe i ñuxma rü ta chauga pexñüè. ¹³ Rü pema rü marü nüxü pecuèx rü yexguma noxri pemaã nüxü

chixuxgu ga Tupanaārū ore i mexū, rū yema na chidaawexūgagu nixī ga petanūgu charūxāūxū rū pemaā nūxū chixuxū ga Tupanaārū ore. ¹⁴ Rū yema daawe ga choxū yexmaxū, rū woo pexcèx rū wūxi ga wèxtümūū nixī, natürū tama choxū pexo rū tama choxū ípetèxūchi. Natürū meāma choxū peyaxgū ñoma wūxi ga Tupanaārū orearū ngeruū i daxūcūāx chíxūrūū. Rū ñoma Ngechuchu ya Cristu chíxūrūū, meāma choxū peyaxgū. ¹⁵ ¿Natürū tacū ěxna nangupetū namaā ga yema perū taāē ga noxri pexū yexmaxū? Erū pemaā nūxū chixu rū noxri petanūwa chayexmagu rū poraācū chomaā petaāēgū. Rū yexguma chi pexū natauxchagu, rū pemaā nanguxūgu, rū chi pexetū peyaxu na choxna penaxāxūcèx, yerū yemaācū poraācū chomaā petaāēgū ga yexguma. ¹⁶ ¿Natürū tacū pexū naxūpetū i ñuxmax? ¿Pexcèx rū ěxna perū uwanū chixī yerū pemaā nūxū chixu ga Tupanaārū ore i aixcūma ixīxū? ¹⁷ Rū ngēma duūxūgū i pexū ngūxēēxū na Yudíugūcūmagu na pexīxūcèx, rū pegu narūxīnūēneta, tama aixcūma tacū rū mexūcèx nadaugū. Erū nūmagū rū toxna pexū nixīgachixēēchaū na ngēmaācū naga pexīnūēxūcèx. ¹⁸ Rū ngēma togū rū marū name na pegu naxīnūēxū, natürū nanaxwèxe na perū mexūcèx nadaugūxū i guxūguma. Rū tama name na petanūwa changēxmaguxicatama perū mexūcèx na nadaugūxū i ngēma togū. ¹⁹ Pa Chauxacūgūx, wenaxārū ñoma wūxi i mama ngīxācūmaā nguxnecacūrūū poraācū pexcèx ngūxū chinge na aixcūma meā Cristuaxū peyaxōgūxūcèx rū aixcūma naxcèx na pemaxēxūcèx. Rū ngēmaācū tá chixī ñuxmatáta Cristu naxwèxexūrūū pixīgū i perū maxūwa. ²⁰ Rū chierū ñuxmatama pexūtawa changēxmagu na pemaā chidexaxūchixūcèx, rū tama ñuxmarūū pexcèx chanaxūmatūmarexūcèx. Erū ñuxma rū tama nūxū chacuèx na tacūgu pemaā charūxīnūxū.

Ore i cuèxruū i Abráūxtaxū ga Agáchiga rū namèxūchi ga Charachiga

²¹ Rū pema na ngēma Moíché ūmatūxū i mugütūūwa pegū pengēxmagūxēēchaūxū, rū chanaxwèxe i chomaā nūxū pixu ngoxi aixcūma nūxū pecuá na ñuxū ñaxū i ngēma mugū. ²² Erū ngēma mugūwa nūxū tadau rū Abráū rū nūxū nayexma ga taxre ga nane. Rū wūxi ga nane rū naxūtaxū ga Agáwa nūxū nayexma, rū naī ga nane rū namèxūchi ga Charawa nūxū nayexma. ²³ Rū guma nane ga naxūtaxūwa nūxū yexmacū, rū nabu yerū yema nixī ga norū ngūchaū ga Abráū. Natürū guma nane ga namèxūchiwa nūxū yexmacū, rū nabu yerū yemaācū inaxuneta ga Tupana. ²⁴⁻²⁵ Rū pemaā nūxū chixu i ngēma ore erū ngēmawa nangēxma i tacū i aixcūma ixīxū i pexcèx changoxēēchaūxū. Rū yema taxre ga ngexūgū rū taxre i cuèxruūgū nixīgū na ngēmawa nūxū icuáxūcèx na ñuxācū Tupana duūxūgūxū rüngūxēēxū na naxūtawa nangugūxūcèx. Rū yema nūxīraūxū ga norū ngūxēē nixī ga yexguma Chinafārū mēxpúnewa Moíchéna naxāāgu ga norū mugū na naga naxīnūēxūcèx ga duūxūgū. Rū yema mugū ga Moíchéna naxāxū ga Chinafāwa rū Agá iyixī ga norū cuèxruū. Rū yema nge ga Agá rū naxūtaxū iyixī ga Abráū rū yemacèx ga ngīxācūgū rū ngīxrūūtama togütūūwa nayexmagū rū tama ínanguxū. Rū yemaācū ga yema nge rū wūxi i cuèxruū iyixī nachiga i ngēma Yudíugū i ñuxma maxēxū rū ngēma mugūwe rūxīxū. Erū nūmagū rū ñuxma rū ta natūūwa nangēxmagū i ngēma mugū ga Moíché yaxuxū ga mēxpúne ga Chinafā ya Arábíaanewa ngēxmanewa. Rū ñuxma rū ta ngēma mugūgu naxī rū tama nūxū narūxoe. ²⁶⁻²⁸ Natürū yema nge ga Abráū namèxūchi rū tama Agárūū iyixī. Rū ngīne ga Ichaá rū nabu yerū Tupanaāxū nayaxō ga Abráū ga yexguma Tupana namaā nūxū ixuxgu rū tá na nūxū nayexmaxū ga wūxi ga nane. Rū ñuxma Pa Chaueneēgūx, yixema rū ta tayaxō i ngēma Tupana tamaā ixunetaxū. Rū ngēmacèx i ñuxma rū tama ngēma nuxcūmaūgūxū i mugütūūwa tangēxmagū. Rū ngēmaācū Abráū namèxūchixacūgūrūū tixīgū. Rū ngēmaācū nūxū tadau na aixcūma Tupana yanguxēēxū i norū ore ga Abráū namèxūchichiga ūmatūxū i ñaxū:

“¡Nataāē, Pa Ngecū i Ngexacūcū! ¡Rū curū taāēmaā rüxáixnaxū woo tagumachirēx na cuxāxācūxū! Erū tá cuxāxācū, rū ngēma ngexū i cuxūtaxū i cuteaxū āxācūxūārū

yexera tá cuxũ nangẽxma i cuxacũgũ”,
 ñaxũ. ²⁹ Natürũ guma Abráũ nane ga naxũtaxũwa nũxũ yexmacũ, rü chixri namaxũ
 namaã ga guma Abráũ nane ga Tupanaãrũ unetagagu bucũ. Rü ngẽxgumarũ ta i
 ñuxma rü yixema i Tupanaãe i Üünexũgagu tũxũ na nangẽxmaxũ i maxũ, rü chixri
 tamaã nachopetũ i ngẽma Yudĩugũ i naxwẽxegũxũ na nagu ixĩxũ i ngẽma mugũ ga Moĩché
 ũmatũxũ. ³⁰ ¿Natürũ ñuxũ ñaxũ i Tupanaãrũ ore i ũmatũxũwa? Rü dücax, ngẽmawa
 Abráũmaã nũxũ nixu ga na ngĩxũ ínataxũcèx ga naxũtaxũ ngĩnemaã, yerũ taxucürũwama
 yema ngĩnemaã nayayauxye ga norũ yemaxũ ga namèxwaxũchixũcũ ga naneãrũ tá ixĩxũ.
³¹ Rü ngẽmaãcũ, Pa Chaueneẽgũx, rü nũxũ tadau rü tama Abráũ naxũtaxũxãcũgürũ
 tixĩgũ, erũ tama ngẽma mugütũũwa tangẽxmagũ. Natürũ Abráũ namèxũchixacũgürũ
 tixĩgũ, erũ Tupanaãrũ unetagagu tũxũ nangẽxma i tórũ maxũ.

5

Meã pegũna pedaugũ na tama wena ngẽma mugütũũwa pengẽxmagũxũcèx

¹ Rü ñuxma ya Cristu rü marũ tũxũ ínanguxũxẽe na tama ngẽma mugütũũwa
 ingẽxmagũxũcèx. Rü ngẽmacèx name nixĩ i pegũna pedaugũ na tama wena natũũwa
 pegũ pengẽxmagũxũcèx i ngẽma mugũ. ² ¡Rü choxũ iperũxĩnũe! Rü choma i Pauru rü
 pemaã nũxũ chixu, rü ngẽxguma chi nagu pexĩxgu na pegũ ípewiechẽxmüpẽxechiraũxũ
 na ngẽmaãcũ penayaxuxũcèx i perũ maxũ, rü ngẽxguma ya Cristu rü chi tax-
 uwama pexũ name. ³ Rü wena pemaã nũxũ chixu rü ngẽxũrũ i yatũ i nũgũ
 íwiechẽxmüpẽxechiraũchaũxũ na ngẽmaãcũ Tupanapẽxewa namexũcèx, rü name nixĩ
 i nũxna nacuèxãchi na taxucürũwa ngẽmaãcũ na nayauxãxũ i norũ maxũ ega tama
 aixcũma naga naxĩnũgu i guxũma i togũ i mugũ. ⁴ Rü guxãma i pema i nagu rüxĩnũxẽ
 na Tupanapẽxewa pimexũ ega nagu pexĩxgu i ngẽma mugũ, rü pemaã nũxũ chixu
 rü marũ Cristuna pixĩgachi i ngẽxgumax. Rü ngẽxgumarũ ta pegũ nũxna peyaxũxẽe i
 ngẽma ngechaũ ga noxri Tupana namaã pexũ ngechaũxũ. ⁵ Natürũ Tupanaãe i Üünexũ
 nixĩ i tũxũ rüngũxẽxũ na yaxõgũxũcèx. Rü ngẽmacèx nixĩ i ínanguxẽxũ na Cristugagu
 Tupanapẽxewa imexũ. ⁶ Rü ngẽmacèx i ñuxma na Ngechuchu ya Cristuarũ duũxũgũ
 ixĩgũxũ, rü nüetama nixĩ ega woo íwiechẽxmüpẽxechiraũgu rü èxna tama, erũ tama
 ngẽma nixĩ i Tupanapẽxewa tũxũ mexẽxũ. Rü ngẽma Tupana naxwẽxexũ i ñuxma nixĩ
 na aixcũma yaxõgũxũ rü ngẽmaãcũ yigũ na ingechaũgũxũ. ⁷ Pema rü meãma ipenaxũgũ
 na Cristuwe perũxĩxũ. ¿Rü texé èxna pexũ nũxũ taxoox na tama naga pexĩnũxũcèx i
 norũ ore i aixcũma ixĩxũ? ⁸ Rü pemaã nũxũ chixu, rü tama Tupana ga noxri pexcèx
 çacũ nixĩ ya yima pexũ nũxũ oócũ. ⁹ Rü name nixĩ i nũxna pecuèxãchie rü wũxitama i
 duũxũ i chixexũ ũxũ, rü nanachixexẽe i guxũma i togũ i natanũxũgũ, ñoma wũxi i íraxũ i
 pãũãrũ puxẽerũ rü wũxi i taxũ i pãũchara ipuxẽxũrũ nixĩ. ¹⁰ Choma rü chayaxõ na
 tórũ Cori tá pexũ rüngũxẽxũ na choma nagu charũxĩnũxũrũ nagu perũxĩnũxũcèx.
 Natürũ Tupana tá nanapoxcu i ngẽma duũxũ i pexũ chixeãxẽxũ, rü nüetama nixĩ
 ega woo texé tixĩgu. ¹¹ Rü nümaxũ i duũxũgũ rü chauchiga nidexagũ, rü nũxũ nixugũe
 na choma rü duũxũgũxũ changúexẽxũ na nũgũ ínawiũchẽxmüpẽxechiraũxũcèx rü
 mugũ na yanguxẽgũxũcèx na ngẽmaãcũ nũxũ nangẽxmaxũcèx i maxũ i taguma gũxũ.
 Natürũ, Pa Chaueneẽgũx, rü ngẽxguma chi ngẽmaãcũ duũxũgũxũ changúexẽegũ, rü tãũ
 chima chowe ningẽxũtanũ i Yudĩugũ, erũ tãũ chima naãewa nangux i ngẽma ore i nũxũ
 chixuxũ nachiga ya Cristu ga curuchagu taxcèx yucũ. ¹² Natürũ ngẽma duũxũgũ i pexũ
 chixeãgũxũ rü pexũ ucuxègũxũ na pegũ ípewiũchẽxmüpẽxechiraũxũcèx, rü ¿tũxcũũ
 èxna i nümagũ i tãũ noxtacũma nũgũ yacaugũpũxũcharexegũxũ ta? ¹³ Natürũ pemax, Pa
 Chaueneẽgũx, rü Tupana pexcèx naca na ngẽma mugũna ípenguxũxũcèx. Natürũ ñuxma
 na nũxna ípenguxũxũ, rü tama name i ngẽmacèx pexeneãrũ ngũchaũ pexũgũ. Natürũ

name nixĩ na pegü pengechaũgũxũ rü ngẽmaãcü pegü perüngũxẽẽgũxũ i wüxichigü. 14 Erü guxũma i Tupanaãrũ mugü rü wüxi i muwatama nangox rü ñanagürü: “¡Rü nüxũ nangechaũ i cumücü na cugütama cungechaũxürü!” ñanagürü. 15 Natürü name nixĩ i pexuãẽgü erü ngẽxguma chi pegümaã penuẽgu rü pegüchi pexaiegu, rü ngürüachi tá pegü pewoone rü tá ipeyanaxoxẽẽ i Tupanaãrũ ore i pewa ngẽxmaxũ.

Ngẽma taxüneãrũ ngúchaũ rü tama Tupanaãẽ i Üünexũãrũ ngúchaũmaã nawüxigu

16 Pemaã nüxũ chixu, rü name nixĩ i Tupanaãẽ i Üünexũ naxwèxexũãcũma pemaxẽ. Rü ngẽxguma ngẽmaãcü pemaxẽgu, rü tãütáma pexeneãrũ ngúchaũ pexügü. 17 Erü ngẽma taxüneãrũ ngúchaũ rü tama Tupanaãẽ i Üünexũãrũ ngúchaũmaã nawüxigu. Rü ngẽma Tupanaãxẽ i Üünexũãrũ ngúchaũ rü tama taxüneãrũ ngúchaũmaã nawüxigu. Erü ngẽma taxre i ngúchaũgü, rü nügüchi naxaie erü wüxichigü i ngẽma rü tamaã inacuáxchaũ. Rü ngẽmacèx i pema rü taxucürüwa penaxü i ngẽma pematama penaxwèxexũ. 18 Natürü ngẽxguma Tupanaãẽ i Üünexũ pemaã icuèxgux, rü marü tama ngẽma nuxcümaũgũxũ i mugütüüwa pengẽxmagü. 19 Rü meãma nangox na ñuxãcü namaxẽxũ i ngẽma duũxũgü i naxüneãrũ ngúchaũ ügũxũ, rü naĩ i ngemaã maxẽxũ, rü airugürüümare ixĩgũxũ. Rü tama naxãneẽ na ñacü rü chixexũ naxügũxũ. 20 Rü tupananetachicünèxãgũxũ nicuèxüügü, rü nayuüe rü nangõxwèxegü, rü aigu narüxĩnüẽ, rü nachoxũgawèxegü, rü togüchi naxaie norü ngẽmaxũgücèx, rü nanuxwèxegü, rü duũxũgũxũ naxucuxègü na to i nguxèètaegu naxĩxücèx, rü ngẽmaãcü nayatoye i duũxũgü na tama wüxigu naxĩnüèxücèx. 21 Rü togüarü ngẽmaxũgücèx nixãũxãchigü, rü nangãxewèxegü, rü peta naxügüecha, rü nanaxügü i muxũma i togü i chixexügü i ngẽxgumarüü ixĩxũ. Rü ngẽmacèx, wena pemaã nüxũ chixu rü guxũma i ngẽma duũxũgü i ngẽmaãcü maxẽxũ, rü nataxütáma i nachica i ngextá Tupana ãẽxgacü íyĩxũwa. 22 Natürü ngẽxguma Tupanaãẽ i Üünexũ tamaã icuèxgu, rü nüma nixĩ i tüxũ nangüxẽẽxũ na yigü ingechaũgũxücèx, rü itaãẽgũxücèx, rü meã yigümaã imaxẽxücèx, rü yaxna namaã ixĩnüèxücèx i togü, rü togümaã imecümagũxücèx, rü togüxũ rüngũxẽẽgũxücèx, rü aixcüma yanguxẽẽxücèx i ngẽma nüxũ ixuxũ. 23 Rü ngẽxgumarüü ta Naãẽ i Üünexũ tüxũ narüngũxẽẽ na tama chixexũmaã nataeguxẽẽxücèx ega togü chixexũ tamaã üxgux. Rü tüxũ narüngũxẽẽ na meãma yigünatama idauxücèx na tama chixexũgu iyixücèx. Rü nataxuma i mugü i nachuxuxũ na naxüxũ i ngẽma mexügü. 24 Rü ngẽma duũxũgü i aixcüma Ngechuchu ya Cristuarü duũxũgü ixĩgũxũ, rü marü nüxũ narüxoe ga yema nuxcümaũxũ ga norü maxũ ga chixexũ, rü yema naxüneãrũ ngúchaũgü ga chixexũ, rü guxũma ga ñacü ga to ga ngúchaũ ga tama mexũ. 25 Rü ñuxma na Tupanaãẽ i Üünexũ tüxna naxãxũ i tórü maxũ, rü name nixĩ i nüma tórü maxũmaã na inacuáxũ. 26 Rü tama name i yigü ítarüta rü togümaã tanuãẽ, rü bai na ñacücèx ixãũxãchixũ.

6

Name nixĩ i guxãma i pema rü pegü perüngũxẽẽgü i wüxichigü

1 Pa Chaueneẽgũx, ngẽxguma chi texéxũ pedèuxgu na ñacü rü chixexũgu tanguxũ, rü pema na Tupanaãẽ i Üünexũ naxwèxexũãcũma na pemaxẽxũ, rü name nixĩ i tüxũ pengechaũãcũma tüxũ perüngũxẽẽ na itayarüwèxãchixücèx. ¡Natürü pexuãẽgü i wüxichigü, na tama pema rü ta nagu peyixücèx i ngẽma chixexũ! 2 ¡Rü pegü perüngũxẽẽgü i ngẽxguma texé petanüwa guxchaxügü tüxũ ngẽxmagu! Erü ngẽxguma ngẽmaãcü pegü perüngũxẽẽgu, rü ngẽmaãcü tá peyanguxẽẽ i ngẽma Cristu pexũ muxũ. 3 Rü ngẽxguma texé nagu rüxĩnügu na wüxi i ñacü tixĩxũ, rü tügütama tawomüxẽẽ, erü Tupanapèxewa rü taxuũmachirèx tixĩ. 4 Rü ngẽmacèx i wüxichigü, rü name nixĩ i tügüarü maxütama tangügü. Rü ngẽxguma namexgu i tümaãrũ maxũ, rü tügümaã tátama tataãẽ,

rü taxucèxma tüxcüü togüarü maxüwa tügü tangugüarü maxüāx. ⁵ Erü tanaxwèxe ya wüxichigü na tümaärü maxünatama tadauxü i Tupanapëxewa. ⁶ Rü yíxema nayaxuxe i nguxëëtae i Tupanaärü orewa rü name nixí na tümaärü nguxëëruümaā tangauxü i gúxü i tümaärü ngëmaxügü. ⁷ ¡Rü pexuāëgü na tama ípetüexüçèx i perü maxüwa! Erü taxucürüwa texé Tupanaxü tawomüxëë. Rü yíxema chixexü úxe, rü chixexü tá tayaxu. Rü yíxema mexü úxe, rü mexü tá nixí i tayaxuxü. ⁸ Rü yíxema tümaxüneärü ngúchaü úxe, rü ngëma tümaxüneärü ngúchaü rü tá yuwa tüxü naga. Natürü yíxema Tupanaāë i Üünexüärü ngúchaü úxe, rü ngëma Tupanaāë i Üünexüwa tá tanayaxu i maxü i taguma gúxü. ⁹ Rü ngëmacèx tama name na nüxü rüchauexü na mexü ixüexü. Erü ngëxguma chi tama nüxü rüchauegu, rü düxwa mexü tá tayaxu i Tupanaxütawa. ¹⁰ Rü ngëmacèx ngëxguma tüxü nangëxmagu na tacümaā togüxü rüngüxëëxü, rü name nixí i guxāxüma tarüngüxëë. Natürü yexera tanaxwèxegü na nüxü rüngüxëëgüxü i ngëma taeneëgü rü taeyèxgü i yaxögüxü.

Pauru rü nüxü narümoxë ga yema yaxögüxü, rü nayaxucuxëgü

¹¹ Rü nuā tá ichanaxügü na chomaxüchima choxmëxmaā pexcèx chanaxümatüxü i ñaā popera. ¡Rü dücax, nüxü pedëux i ngëma choma chaxümatüxü na ñuxācü natamatüxü! ¹² Rü ngëma Yudíugü i pexü ngúexëëxü na pegü ípewiechëxmüpëxechiraügüxüçèx, rü ngëmaācü pexü namu erü nanataāëxëëgüchaü i ngëma togü i Yudíugü na tama naxchi naxaieçèx nagagu na Ngechuchu ya Cristu ga curuchagu yucüaxü na yaxögüāxü. ¹³ Erü woo i nümagü na ínawüchëxmüpëxechiraüxü, rü tama nayanguxëë i guxüma i mugü. Natürü nümagü rü nanaxwèxegü na pegü ípewüchëxmüpëxechiraüxü, na yixcama nügü yacuèxüügüxüçèx rü togü i Yudíugümaā nüxü na yaxuxüçèx na pema rü ta naxrüü nagu pexixü i ngëma nuxcümaügüxü i mugü. ¹⁴ Natürü i choma rü chaugü chicuèxüü erü nüxü chayaxō ya tórü Cori ya Ngechuchu ya Cristu ga curuchagu yucü. Rü ngëmacèxicatama nixí i chaugü chicuèxüüxü. Rü ñuxma na Cristu ga curuchagu yucüaxü chayaxōxü, rü marü tama nagu charüxñü i ñoma i naāne rü norü ngëmaxügü. Rü ngëxgumarüü ta i ñoma i naāne rü marü tama choxü nacuáxchaü. ¹⁵ Erü ngëxguma Ngechuchu ya Cristuarü duüxügü ixīgügu, rü Tupanapëxewa rü taxüma nixí i ngëma na íwiechëxmüpëxechiraüxü rü éxna tama. Natürü ngëma aixcüma napëxewa mexü nixí na naxüchicüüxü i tórü maxü na ngexwacaxüxü i duüxügü ixīgüxüçèx. ¹⁶ Rü Tupanana naxcèx chaca na pexü nataāëxëëgüxüçèx rü nüxü pengechaütümüügüxüçèx i guxāma i pema i aixcüma yanguxëëgüxe i ngëma pemaā nüxü chixuxü, rü guxāma ya yíxema aixcüma Tupanaärü duüxügü ixīgüxe. ¹⁷ Rü ñuxmawena rü tama chanaxwèxe na texé tacü rü guxchaxügü choxna āxü. Erü choma rü aixcüma tórü Cori ya Ngechuchuarü duüxü chixí. Rü ngëma chorü oxrigüchica i chowa ngëxmagüxüwa nüxü pecuèx na aixcüma yíxü i ngëma. ¹⁸ Pa Chaueneëgüx, chanaxwèxe i tórü Cori ya Ngechuchu ya Cristu pexü narüngüxëë i guxāma i pemax. Rü ngëmaācü yíi.

Rü nuāma pexna,
Pauru

POPERA GA EPÉCHIUWA YEXMAGÜXÜ GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Epéchiuarü ñānewa yexmagüxü

¹ Pa Chaueneēgü ya Epéchiuwa Ngēxmagüxe, choma i Pauru nixī i pexcèx chanaxümatüxü i ñāā popera. Rü choma i Pauru chixī i Tupana choxü yaxuxü na Ngechuchu ya Cristu choxü muxüçèx na duüxügümaā nüxü chixuxüçèx i norü ore. Rü pexcèx chanaxümatü i guxāma i pema ya Epéchiuarü ñānewa ngēxmagüxe rü Tupanaärü duüxügü ixīgüxe rü Ngechuchu ya Cristuaxü yaxōgüxe. ² Rü chanaxwexe i pexü narüngüxēē rü pexü nataāxēē ya Tanatü ya Tupana rü tórü Cori ya Ngechuchu ya Cristu.

Tupana rü poraäcü tüxü narüngüxēē erü Cristuarü duüxügü tixīgü

³ Rü name nixī i nüxü ticuèxüügü ya Tanatü ya Tupana ya tórü Cori ya Ngechuchu ya Cristunatü ixīcü. Erü nüma ya Tupana rü Cristugagu tüxna nanaxā i naguxüraüxü i ngüxēēgü i üünexü i dauxüguxü i naanewa taxcèx ne namugüxü. ⁴⁻⁵ Rü tautama naāne üxgu, rü Cristugagu Tupana tüxü nade na napēxewa ixüünegüxüçèx rü na nataxuxüçèx i tórü chixexü i napēxewa. Rü Tupana rü poraäcü tüxü nangechaü. Rü yemacèx nuxcümamatama tüxü naxuneta na naxäcügüxü tüxü nadexüçèx Ngechuchugagu. Rü yemaäcü nanaxü yerü yema nixī ga norü ngüchaü. ⁶ Rü ngēmacèx name nixī i guxügüma nüxü ticuèxüügü ya Tupana. Erü nüma rü poraäcüxüchima tamaā namecüma rü poraäcü tüxü narüngüxēē ga yexguma taxcèx núma namuāxgu ga Nane ya nüxü nangechaüxüchicü. ⁷ Rü Tupana rü poraäcü tüxü nangechaü, rü yemacèx nanamu ga Nane na taxcèx nayuxü rü nagü inabaxü na yemaäcü tüxü inanguxüxēēçèx rü tüxü nüxü nangechaüxüçèx ga tórü pecadugü. ⁸ Rü Tupana tüxü nüxü nadauxēē na ñuxäcü poraäcü tüxü nangechaüxü ga yexguma tüxna naxāāxgu ga guxüma ga tórü cuèx na taāxü icuáxüçèx rü tüxü natauxchaüçèx i norü ore. ⁹ Rü tüxü nüxü nacuèxēē ga norü ngüchaü ga noxri nüxīcatama nüxü nacuáxü. Rü yema norü ngüchaü ga nuxcümamaxüchima Cristumaā nagu naxīnüxü ga Tupana, rü yema nixī ga ñoma ga naānewa na namuāxü na tüxü yamaxēxēxüçèx. ¹⁰ Rü yema nagu naxīnüxü nixī na Cristumēxēwa nangēxmaxēēāxü i guxüma i daxüguxü i naānewa ngēxmaxü rü guxüma i ñoma i naānewa ngēxmaxü. Rü ngēmaäcü tá nanaxü ya Tupana i ngēxguma nawa nanguxgu na yanguxēēāxü. ¹¹ Yerü naxüpa ga ñoma ga naane naxüxü ga Tupana, rü woetama tomaā nanaxuegu na Cristugagu tanayauxgüxüçèx i ngēma maxü i taguma gúxü i nüma toxna naxāxchaüxü na aixcüma naxcèx tamaxēxüçèx. Rü aixcüma yemaäcü nanaxü yerü yema nixī ga norü ngüchaü ga Tupana ya guxüma ücü, ngēma nüma nagu naxīnüxüäcüma. ¹² Rü yemaäcü Tupana tomaā nanaxuegu na toma i toxira Cristuaxü yaxōgüxe naxcèx tamaxēxüçèx rü nüxü ticuèxüügüxüçèx naxcèx i norü pora i üünexü. ¹³ Rü yexgumarüü ta ga pema i Epéchiucüāxgü, rü yexguma nüxü pexīnüēgu ga yema ore i aixcüma ixīxü i tüxü maxēxēxü, rü yexguma Cristuaxü peyaxōgügu, rü namüçügü pixīgü. Rü Tupana ga tamaā ixunetacü na tüxna namuāxüçèx i Naāē i Üünexü, rü marü pexna nanamu i ngēma Naāē na nüxü pecuáxüçèx na aixcüma norü duüxügü pixīgüxü. ¹⁴ Rü ngema Naāē i Üünexü ga Tupana tüxna muxü, rü ngemaawa nixī i nüxü icuáxü na aixcüma Tupana tá tüxna naxāxü i guxüma i ngema tamaā inaxunetaxü. Rü ngēxguma wena núma naxüxgu ya Cristu na nügüxütawa tüxü nagagüxüçèx rü aixcüma tá tanayaxu i guxüma i ngema Tupana tomaā nüxü ixuxü. Rü ngēmacèx name nixī na nüxü icuèxüügüxü ya Tanatü ya Tupana ya üxüncü.

Pauru rü yaxōgüxüçèx nayumüxē.

15-16 Rū ngēmacèx, ñuxma na nūxū chachuáxū na aixcūma tórū Cori ya Ngechuchuaxū peyaxōgūxū rū na aixcūma nūxū pengechaūgūxū i guxūma i ngēma togū i Tupanaārū ixīgūxū, rū ngēmacèx taguma nūxū charūchau na pexcèx moxē nūxna chaxāxū rū pexna chacuēxāchixū i chorū yumūxēwa. 17 Rū ngēxguma namaā chideaxgu ya Tanatū ya Tupana ya mexēchicū ya Nanatū ya tórū Cori ya Ngechuchu ya Cristu, rū naxcèx nūxna chaca na pexna naxāxūcèx i ngēma cuèx i Naāē i Üünexūwa ne ūxū. Rū ngēma Naāē i Üünexū tá nixī i pexcèx nangoxēēxū i Tupanaārū ore i mexū na yexeraācū nūxū pecuáxūcèx ya Tupana. 18 Rū Tupanana naxcèx chaca na nūmatama pexū yangoxnaāēxēxūcèx, na nūxū pecuáxūcèx na tacū yīixū i ngēma ípenanguxēēxū i naxcèx pexū nadexū. Rū nūxna naxcèx chaca na pexū nūxū nacuēxēēxūcèx na ñuxācū namexēchixū i ngēma maxū i taguma gúxū i nūma norū duūxūgūcèx namexēēxū i daxūguxū i naānewa. 19-20 Rū ngēxgumarūū ta rū nūxna naxcèx chaca na pexū nūxū nacuēxēēxūcèx na ñuxācū nataxūchixū i norū pora i tawa ngēxmaxū rū namaā tūxū nangūxēēxū i yixema na yaxōgūxū. Rū ngēmatama pora i taxūmaā nixī ga napuracūxū ga Tupana ga yexguma yuwa Cristuxū ínadxēēgu rū daxūguxū ga naānewa nagaāxgu rū nūgūarū tūgūnecūwawa yanatoxēēāgu na guxāārū āēxgacū yīixūcèx. 21 Rū yemaācū guxūētūwa nanayexmaxēē. Rū ngēmacèx i ñuxma rū Cristumēxēwa nangēxmagū i guxūma i daxūguxū i naānecūāx i āēxgacūgū rū guxūma i ñoma i naānecūāx i āēxgacūgū. Rū ngēmaācū naxmēxwa nangēxmagū i guxūma i pora i ñuxma ngēxmagūxū rū guxūma i pora i tá ngēxmagūxū. Rū ngēmaācū i nūma rū guxū i āēxgacūgūarū āēxgacū tá nixī i guxūguma. 22 Rū yemaācū ga Tupana rū marū Cristumēxēwa nanayexmagūxēē ga guxūma. Rū yexgumarūū ta Cristuxū ningucuchixēē na guxūma i yaxōgūxūēru na yīixūcèx. 23 Rū ñuxma rū guxūma i yaxōgūxū rū wūxigu Cristuarū nixīgū. Rū nūma nixī i tawa nangēxmaxū i guxāma i yixema i nūxū na yaxōgūxū. Rū ngēxgumarūū ta nūma nixī i nangēxmaxēēāxū i guxūma i tacū i ngēxmaxū i guxūwama.

2

Tamaxē erū Tupana tūxū nangechaū

1 Rū ūpa ga pema rū perū pepadugagu rū perū chixexūgagu ñoma peyuexūrūū pixīgū. 2 Yerū ga pema rū nagu pexī ga yema chixexū i ñoma i naānecūāx i duūxūgū nagu íxū. Rū pema rū naga pexīnūē ga Chataná i ngoxogūarū āēxgacū ixīxū. Rū nūma nixī i nūxū nangūchaūxēēāxū na chixexū naxūgūxūcèx i guxūma i ngēma duūxūgū i tama Tupanaga ínūēxū. 3 Rū guxāma ga yixema rū yemaācū chixri tamaxē ga ūpa. Rū tanaxū ga tóxrūtama ngūchaū, rū nagu taxī ga yema taxūne naxwèxexū rū yema taāē naxwèxexū. Rū yemagagu yema togū ga duūxūgū ga chixexū ūgūxūrūū nawa taxūgū i ngēma poxcu i āūcūmaxūchixū i Tupana mexēēxū. 4 Natūrū ga Tupana rū poraācū nūxū tangechaūtūmūgū rū poraācū tūxū nangechaū. 5 Rū yemacèx, woo tórū pepadugagu ñoma iyuxūrūū tixīgū, natūrū ga Tupana rū tūxna nanaxā ga maxū ga yexguma Cristuxū ínadxēēgu. Rū ñuxma rū pexū nangēxma i maxū i taguma gúxū, erū Tupana pemaā namecūma. 6 Rū yema na Ngechuchu ya Cristuxū wena namaxēēxūrūū rū tūxū rū ta namaxēxēē ga Tupana. Rū yemaācū nanaxū na yixema rū ta Cristumūcūgū ixīgūxūcèx, rū namaā āēxgacūgū ixīgūxūcèx i daxūguxū i naānewa. 7 Rū yemaācū nanaxū ga Tupana na guxūgutāma duūxūgūxū nawéaxūcèx na ñuxācū Cristugagu poraācū tūxū nangechaūxū rū tamaā namecūmaxū. 8 Rū yemaācū pemaā namecūma ga Tupana. Rū yemacèx penayaxu ga maxū i taguma gúxū yerū peyaxōgū. Rū ngēma maxū rū taxucūrūwama pegūnatama penaxā, natūrū Tupana nixī ga pexna naxāmarecū ga yema. 9 Rū tama tacū i mexū i pexūxūgagu nixī i pexū nangēxmaxū i ngēma maxū, natūrū Tupana nixī ya pexna naxāmarecū na ngēmaācū taxūema tūgū icuēxūūxūcèx. 10 Rū Tupana nixī ga tūxū maxēxēēcū. Rū ñuxma rū tūxū nangēxma i ngēma maxū yerū

Ngechuchu ya Cristu tórü pecaducèx nayu. Rû Tupana tûxna nanaxã i ngẽma maxũ na meã imaxẽxúcèx rû mexũ ixügũxúcèx. Rû yemaãcü tûxũ narüngũxẽẽ ga Tupana yerü woetama nuxcũmaxũchima marü yemagu narũxĩnũ.

Cristu nixĩ ya yigũmaã tûxũ rüngũxmüëxẽẽcü

11-12 Rû ngẽmacèx i pema na tama Yudíugü pixĩgũxũ, rû name nixĩ i nũxna pecuèxãchie na tama toxrũũ na pixĩgũxũ ga noxri rû tama Tupanaxũ na pecuèxgũxũ. Rû yema na tama toxrũũ pixĩgũxũ rû yemacèx ga toma ga Yudíugü i togü na ítawiechèxmüpèxechiraũgũxũ, rû nũxũ tixugüe na pema rû tama Tupanapèxewa na pimexũ yerü tama toxrũũ pegü ípewiechèxmüpèxechiraũgü. Rû yexguma ga pema rû tama Cristuxũ pecuèxgü, yerü tama Tupanaãrũ duũxügü i Yudíugütanũxũ pixĩgü. Rû tama nũxũ pecuèxgü ga Tupana núma na namuxũ ga Nane na duũxügüarü pecaducèx nayuxúcèx na nũxna naxãxúcèx i maxũ i taguma gúxũ. Rû woo ga yema mexũgü ga Yudíugümaã inaxunetaxũ ga Tupana, rû taxucürüwa penayaxu. Yerü ñoma ga naãnewa rû pemaxẽmare, rû tama nũxũ pecuèx ga tacü chi pexũ na üpetũxũ ga yexguma chi peyuegu yerü tama Tupanaxũ pecuèx. ¹³ Natürü woo ga noxri rû tama Tupanaxũ na pecuáxũ, natürü i ñuxma rû nügũxũtawa pexũ nagagü. Rû Ngechuchu ya Cristuarü duũxügü pixĩgü yerü pexcèx nayu rû nagü inanaba. ¹⁴⁻¹⁵ Rû ñuxma rû Cristu nixĩ ya tûxũ rüngũxmüëxẽẽcü. Rû noxri ga toma ga Yudíugü rû pexchi taxaie yerü tama toxrũũ Yudíugü pixĩgü. Natürü i ñuxma rû Cristu marü yigũmaã tûxũ narüngũxmüëxẽẽ. Rû yemaãcü wüxitama i duũxügũxũ tûxũ nixĩgũxẽẽ rû inayanaxoxẽẽ na yigüarü uwanü ixĩgũxũ. Rû yexguma nayuxgu ga Cristu rû tûxũ ínanguxũxẽẽ na tama natüüwa iyexmagũxúcèx ga yema nuxcũmaũgũxũ ga mugü ga toma ga Yudíugü nagu taxĩxũ. Rû wüxitama i duũxügü i ngexwacaxũxũ tûxũ nixĩgũxẽẽ i toma i Yudíugü na tixĩgũxũ rû pema i tama Yudíugü na pixĩgũxũ. Rû yemaãcü nanaxü na guxãma i yixema rû norü duũxügü na ixĩgũxúcèx. Rû yemaãcü yigũmaã tûxũ inarüngũxmüëxẽẽ. ¹⁶ Rû yexguma curuchagu nayuxgu ga Cristu, rû inayanaxoxẽẽ ga yigüchi na ixaie xũ. Rû yemaãcü ga Cristu rû Tupanamaã tûxũ inarüngũx-müëxẽẽ, rû wüxitama i duũxügũxũ tûxũ nixĩgũxẽẽ. ¹⁷ Rû yexguma Cristu núma üxgu, rû taxcèx núma nanange ga ore ga mexũ ga marü yigũmaã rû Tupanamaã na rüngũxmüëxũ. Rû yema ore rû toxcèx nixĩ i toma i Yudíugü ga toxira Tupanaxũ na tacuáxũ. Rû yema ore rû pexcèx rû ta nixĩ ga woo tama Tupanaxũ na pecuèxgũxũ ga noxrix. ¹⁸ Rû ñuxma rû guxãma i yixema rû Cristugagu tûxũ natauxcha na Tanatü ya Tupanana ingaicamagũxũ. Rû ngẽmatama Naãẽ i Üünexũ nixĩ i tûxũ rüngũxẽẽxũ na nũxna ingaicamagũxúcèx ya Tanatü ya Tupana. ¹⁹ Rû ngẽmacèx i pema rû woo tama Tupanaxũ pecuèxgü ga noxrix, rû woo tama norü duũxügü pixĩgü ga yexguma, natürü tama ngẽmaãcü pixĩgü i ñuxmax. Erü ñuxma rû natanũxũ pixĩgü i guxũma i ngẽma duũxügü i Tupanaãrũ ixĩgũxũ. Rû aixcũma Tupanaxãcügũxüchi pixĩgü i ñuxmax. ²⁰⁻²² Guxãma i pema rû wüxi ya ípata ya mexũne ya Tupana nawa maxũne pixĩgü. Rû ngẽma cementu i ladriyu naetügu nugũxũ, rû ngẽma rû Tupanaãrũ ngüexũgü ga imugũxũ rû norü orearü uruũgü nixĩ. Rû yima ladriyu ya nüxirama cementuétüwa ixücuchicü rû Cristu nixĩ. Rû ngẽma inanaxügü na naxüãxũ ya guxũnema ya yima ï. Rû düxwa ningu na wüxi ya tupauca ya taxũne ya Cristugagu üünene na yĩxũ. Rû ngẽmaãcü i pema na Cristuarü pixĩgũxũ rû wüxigu tomaã peyanguxẽẽ ya wüxi ya tupauca ya taxũne i ngextá Tupanaãẽ i Üünexũ ímaxũxüwa.

3

Tupana rû Pauruxũ namu na ore i mexũxũ yaxuxũ namaã ga yema duũxügü ga tama Yudíugü ixĩgũxũ

¹ Rû ñuxma na yemaãcü Tupana pexũ rüngũxẽẽxũ, rû choma i Pauru rû pexcèx chayumüxẽ. Rû pemaã nũxũ chixu rû núma poxcupataũwa changẽxma erü Ngechuchu

ya Cristuarü duǔxǔ chixǐ. Rǔ nuxma chapoxcu erǔ guxǔwama nǔxǔ chixuchiga na pema rǔ ta pexǔ nangēxmaxǔ i pechica i Tupanaxǔtawa woo na tama Yudǐgǔ pixǐgǔxǔ. ² Rǔ maneca marǔ nǔxǔ pecuáchiga na ñuxácǔ Tupana choxǔ nangechaǔácǔma choxǔ muxǔ na pexǔ charǔngǔxēēxǔcèx rǔ pemaã nǔxǔ chixuxǔcèx i norǔ ore i mexǔ. ³ Rǔ Tupana chomaã nanangoxēē rǔ choxǔ nǔxǔ nacuèxēē ga yema ore ga pechiga ga noxri nǔxǐcatama nǔxǔ nacuáxǔ. Rǔ yemachiga nixǐ ga Írarǔwa marǔ pexcèx chanaxǔmatǔxǔ ga noxrix. ⁴ Rǔ yexguma pexcèx chanaxǔmatǔgu rǔ pemaã nǔxǔ chixu ga yema noxri ēxǔguxǔ ga ore i ñuxácǔ Tupana rǔ Cristugagu duǔxǔgǔxǔ namaxēxēēxǔ. Rǔ ngēxguma meã nawa pengúegu i ngēma popera rǔ tá nǔxǔ pecuèx na aixcǔma yǐixǔ ga yema ore ga noxri ēxǔguxǔ ga nachiga pexcèx chaxǔmatǔxǔ. ⁵ Rǔ yema nixǐ ga ore ga ēxǔguxǔ ga Tupana taxǔexǔma meã nǔxǔ nacuèxēēxǔ ga noxrix. Natǔrǔ i ñuxma rǔ ngēma Naãē i Ūñexǔ rǔ marǔ nanangoxēē i ngēma ore naxcèx i Tupanaãrǔ duǔxǔgǔ i ūñexǔ i yamugǔxǔ rǔ norǔ orearǔ uruǔgǔ. ⁶ Rǔ ñuxma rǔ tá pemaã nǔxǔ chixu i ñuxácǔ na yǐixǔ i ngēma ore ga noxri ēxǔguxǔ. Rǔ dǔcax, woo tama Yudǐgǔ pixǐgǔ natǔrǔ i ñuxma rǔ pexcèx rǔ ta nixǐ i ngēma maxǔ i taguma gǔxǔ ga noxri Tupana tomaã ixunetaxǔ. Rǔ ñuxma i pema rǔ ta norǔ duǔxǔgǔ pixǐgǔ. Rǔ pexcèx nixǐ i guxǔma i ngēma Tupanaãrǔ unetagǔ ga noxri tomaã nǔxǔ yaxuxǔ. Rǔ ngēmaãcǔ i ñuxma rǔ Ngechuchu ya Cristugagu pexǔ nangēxma i guxǔma i ngēma mexǔgǔ erǔ peyaxǔgǔ i norǔ ore i tǔxǔ maxēxēēxǔ. ⁷ Rǔ woo taxuwama chame na chanaxǔxǔcèx i norǔ puracǔ, natǔrǔ ya Tupana rǔ choxǔ namuãma rǔ choxǔ naporaxēē na nǔxǔ chixuxǔcèx i ngēma norǔ ore i mexǔ. ⁸ Rǔ chaugǔcèx i Tupanapēxewa rǔ choma nixǐ i guxǔ i norǔ duǔxǔgǔarǔ ñaxtǔwaama chaxǔxǔ. Rǔ woo ngēmaãcǔ chixǐ, natǔrǔ Tupana choxǔ nangechaǔ rǔ choxna nanaxã i ngēma puracǔ i mexǔ na ngēma tama Yudǐgǔ ixǐgǔxǔmaã nǔxǔ na chixuxǔcèx i norǔ ore i mexǔ na ñuxácǔ namexēchixǔ rǔ taguma iyagǔxǔ ga yema taxcèx naxǔxǔ ga Cristu. ⁹ Rǔ nǔma ga Tupana ya guxǔãrǔ ũruǔ ixǐcǔ, rǔ choxǔ namu na guxǔ i duǔxǔgǔxǔ nǔxǔ chacuèxēēxǔcèx na ñuxácǔ yǐixǔ i ngēma norǔ ngúchaǔ ga nuxcǔma ēxǔguxǔ ga noxri nǔxǐcatama nǔxǔ nacuáxǔ. Rǔ ngēma norǔ ngúchaǔ nixǐ i Cristugagu tǔxǔ na namaxēxēēxǔ. ¹⁰ Rǔ yemaãcǔ choxǔ namu ga Tupana na ngēma duǔxǔgǔ i tama Yudǐgǔ ixǐgǔxǔmaã nǔxǔ chixuxǔcèx i ore i mexǔ na yaxǔgǔãxǔcèx. Rǔ nǔma ya Tupana nanaxwèxe na yaxǔgǔãxǔ na ngēmaãcǔ guxǔma i ãēxgacǔgǔ i daxǔcǔãx nǔxǔ nadaugǔxǔcèx na ñuxácǔ nǔxǔ nacuèxǔchixǔ ga Tupana ga yexguma duǔxǔgǔaxǔ natauxchaxēēãgu na naxǔtawa nangugǔxǔcèx. ¹¹ Rǔ yemaãcǔ nǔxǔ nanatauxchaxēē ga Tupana yerǔ woetama nuxcǔmaxǔchima guxǔguma nagu narǔxǐnǔ na tǔrǔ Cori ya Ngechuchu ya Cristugagu tá na namaxēxēēãxǔ i duǔxǔgǔ. Rǔ yemaãcǔ nayanguxēē. ¹² Rǔ ñuxma na Cristuarǔ duǔxǔgǔ ixǐgǔxǔ rǔ nǔxǔ na yaxǔgǔxǔ, rǔ tǔxǔ natauxcha na Tupanana ingaicamagǔxǔ rǔ taxucèxma nǔxǔ na imuǔēxǔ. ¹³ Rǔ ngēmacèx i ñuxma na pexcèx ngǔxǔ chingexǔ rǔ pexǔ chacèxǔ na tama chauxcèx pexoegaãēgǔxǔcèx. Erǔ ngēma ngǔxǔ na chingexǔ i ñuxma rǔ perǔ meruǔ nixǐ i ngēma.

Cristu rǔ poraãcǔ tǔxǔ nangechaǔ

¹⁴ Rǔ ngēmacèx, ngēxguma nagu charǔxǐnǔgu na ñuxácǔ Tanatǔ ya Tupana taxcèx namexēēxǔ na naxǔcǔgǔ ixǐgǔxǔcèx, rǔ napēxegu chacaxǔpǔxǔ na nǔxǔ chicuèxǔxǔcèx. ¹⁵ Rǔ nǔma nixǐ i Nanatǔ yǐixǔ i guxǔma i norǔ duǔxǔgǔ i ñoma i naãnewa rǔ daxǔguxǔ i naãnewa ngēxmagǔxǔ. ¹⁶ Rǔ Tanatǔ ya guxǔguma poraãcǔ tamaã mecǔmacǔna chaca na Naãē i Ūñexǔãrǔ ngǔxēēmaã pexǔ naporaxēēxǔcèx na aixcǔma peporaexǔcèx i perǔ maxǔwa. ¹⁷⁻¹⁸ Rǔ ngēxgumarǔ ta nǔxna naxcèx chaca na perǔ ògagu pewa namaxǔxǔcèx ya Cristu. Rǔ ngēxguma ngēmaãcǔ perǔ maxǔwa peporaegu rǔ pexǔ nangēxmagu i ngēma ngechaǔ i aixcǔma ixǐxǔ, rǔ tá wǔxigu guxǔma i yaxǔgǔxǔmaã nǔxǔ pecuèx na ñuxácǔ nataxǔchixǔ i norǔ ngechaǔ i namaã tǔxǔ nangechaǔxǔ ya Cristu. ¹⁹ Rǔ woo tama yanguxgu i tǔrǔ cuèx na nǔxǔ icuáxǔcèx na

nañuxraũxũ i ngẽma ngechaũ i namaã Cristu tũxũ ngechaũxũ, natürü Tupanana naxcèx chaca na pexcèx nangoxèèãxũcèx na ñuxãcũ na yĩxũ i ngẽma ngechaũ na aixcũma pewa nangẽxmaxũ i guxũma i Tupanacũmagũ. ²⁰ Rũ ñuxma rũ name nixĩ i guxãma i yixema rũ nüxũ ticuèxũũgũ ya Tupana. Erũ nüma rũ nüxũ nangẽxma i pora na naxũãxũ i guxũma i ngẽma naxcèx íçaxũ rũ èxna nagu rüxĩnũèxũãrũ yexeraxũchi. Rũ ngẽma norũ pora i tawa ngẽxmaxũmaã nixĩ i naxũãxũ i guxũma i ngẽma. ²¹ Rũ ñuxma rũ name nixĩ i guxũma i norũ duũxũgũ i yaxõgũxũ rũ guxũgutãma Tupanaxũ nicuèxũũgũ naxcèx i ngẽma Ngechuchu ya Cristu ùxũ. Rũ ngẽmaãcũ yĩ.

4

Tupanaãe i Üünexũ rũ wüxigutama tũxũ narüxĩnũèxè

¹ Rũ ñuxma na ngẽmaãcũ Tupana tũxũ rüngũxèèxũ, rũ choma i Cristugagu na chapox-cuxũ, rũ pexũ chacèèxũ na Tupana naxwèxexũãcũma meã pemaxèxũ. Rũ name nixĩ i ngẽmaãcũ pemaxè erũ pexũ nixĩ ga nadexũ ga Tupana, rũ norũ duũxũgũ pixĩgũ i ñuxmax. ² Rũ tama name i pegũ picuèxũũgũ. Rũ name nixĩ i guxũguma pemecũmagũ rũ yaxna namaã pexĩnũè i togũ rũ nüxũ pengechaũgũ. ³ Rũ chanaxwae i wüxigu perüxĩnũè rũ ñoma wüxitama i duũxũrũũ pixĩgũ erũ pewa nangẽxma i Tupanaãe i Üünexũ. Rũ name nixĩ i naxcèx pedau na guxũguma pegũ pengechaũgũxũ rũ ngẽmaãcũ taguma ÷acücèx pegũ pitoyexũ. ⁴ Erũ yixema na Cristuarũ duũxũgũ ixĩgũxũ, rũ ñoma wüxitama i duũxũrũũ tixĩgũ. Rũ ngẽxgumarũũ ta wüxitama nixĩ i Naãe i Üünexũ i guxãwama maxũxũ. Rũ ngẽxgumarũũ ta Tupana pexũ nade na guxãma ípenanguxèègũxũcèx i wüxitama i maxũ i taguma gũxũ. ⁵ Rũ wüxitama nixĩ ya tórũ Cori, rũ wüxixũtama nixĩ i yaxõgũxũ rũ wüxicèxicatama nixĩ ga íbaiũxũ ga guxãma. ⁶ Rũ wüxitama nixĩ ya Tupana ya guxãnatũ ixĩcũ. Rũ nüma rũ guxãetũwama nangẽxma rũ guxãwama namaxũ. Rũ nüma rũ guxãxũ narüngũxèè na tanaxũxũcèx i norũ puracũ. ⁷ Natürü wüxichigũ i yixema rũ tanayaxu i ngẽma nacũma rũ ngẽma cuèx i Cristu tũxna ãmarechaũxũ na naxügũxũcèx i norũ puracũ. ⁸ Rũ ngẽmacèx i Tupanaãrũ ore i ümatũxũwa rũ ñanagürü:

“Rũ yexguma daxũgũxũ ga naãnewa naxũxgu, rũ yéma tũxũ nagagũ ga guxema marũ tũxũ ínanguxũxèè nawa ga tũmaarũ chixexũ. Rũ norũ duũxũgũna nanaxã ga cuèx na ngemamaã Tupanaarũ puracũ naxügũxũcèx”,

ñanagürü i ngẽma ore. ⁹ Rũ ñuxma Pa Chaueneègũx, rũ pexna chaca, rũ ÷tacũchiga nixĩ i ngẽma ore i ñaxũ, “Daxũwa naxũ”, ñaxũ? Rũ dücax, ngẽmawa nüxũ tacuèx ga noxri rũ ñoma ga naãnegu na ínaxĩxũ ga nümax. ¹⁰ Rũ gumatama Cristu ga ñoma ga naãnegu írũxĩcũ, rũ gumatama nixĩ ga daxũgũxũ i naãne i Tupana íngẽxmaxũwa ùxcũ na guxãetũwa nangẽxmaxũcèx rũ guxũwama nangẽxmaxũcèx. ¹¹ Rũ nümatama nixĩ ga guxema norũ duũxègũna naxããxũ ga tũmaãrũ cuèx rũ tũmaãrũ puracũ. Rũ tũxũ naxuneta ga ñuxre na toxnamana norũ orexũ tayarũxugũxũcèx. Rũ togegũ rũ tũxna nanaxã ga cuèx na duũxũgũmaã nüxũ tixuxũcèx i ngema norũ ore i tũxũ nüxũ nacuèxèèxũ. Rũ togegũ rũ tũxna nanaxã ga cuèx na duũxũgũaxũ tanangũchaũxèèxũ i Tupanaarũ ore na yaxõgũãxũcèx. Rũ togegũ rũ tũxna nanaxã ga cuèx na ngema yaxõgũxũarũ dauruxũgũ tixĩgũxũcèx. Rũ togegũ rũ tũxna nanaxã ga cuèx na norũ oremaã tangũxèètaegũxũcèx. ¹² Rũ yemaãcũ norũ duũxègũna nanaxã ga tũmaãrũ puracũ rũ tũmamaã inananguxũxèè na ngẽma yaxõgũxũxũ tarüngũxèègũxũcèx na ngẽmaãcũ guxũma i ngẽma yaxõgũxũ rũ yexeraãcũ nüxũ yacuáetanũxũcèx i norũ ore. ¹³ Rũ Cristu nanaxwèxe na ngẽma norũ orewa iyaetanũxũ i guxãma i yixema ñuxmatãta wüxigu aixcũma meã yaxõgũ rũ meã nüxũ icuèxgũ ya Tupana Nane. Rũ ngẽmaãcũ tá düxwa nawa tangugũ na aixcũma Tupana naxwèxexũãcũma ixĩgũxũ, rũ tá tiyaetanũ i norũ orewa ñuxmatãta ñoma Cristu ya aixcũma mexèchicürũ ixĩgũ. ¹⁴ Rũ tãtũtãma ñoma buxũgürũũ tixĩgũ i tórũ maxũwa. Erũ ngẽma buxũgũ rũ taxchaãcũ toguama narüxĩnũè. Rũ ngẽxguma ÷acũ rũ to i ngüxèètaexũ

naxĩnũegu rü ngẽmawe narũxĩ ñuxmata naga naxĩnũe i ngẽma duũxũgũ i chixexũ i norũ doramaã nawomũxẽẽgũxũ rü nachixexẽẽgũchaũxũ. Natürü i yixema rü tama name na ngẽxgumarũũ ixĩgũxũ. ¹⁵ Rũ name nixĩ i yigũ ingechaũgũãcũma nagu taxĩ i ngẽma ore i aixcũma ixĩxũ, na ngẽmaãcũ yexeraãcũ naxrũũ ixĩgũxũcèx ya Cristu ya guxũma i yaxõgũxũãrũ ãẽxgacũ ixĩcũ. ¹⁶ Rũ taeru ya Cristuwa nixĩ i ne naxũxũ i tórũ pora na naxcèx imaxẽxũcèx. Rũ guxãma i yixema rü wũxigu naxmẽxwa tangẽxmagũ. Rũ ngẽxguma Cristugagu meã wũxigu ipuracũegu rü yigũ rüngũxẽẽgu rü guxũma meãma inixũ. Rũ ngẽmaãcũ yigũ ingechaũgũãcũma norũ orewa tiyaetanũ na dũxwa nũma nanaxwèxexũãcũma ixĩgũxũcèx.

Maxũ i ngexwacaxũxũ i Cristugagu tüxũ ngẽxmaxũ

¹⁷ Rũ ñuxma rü Cristuégagu pexũ chaxucuxẽ na tama nagu pexĩxũ i ngẽma chixexũ ga noxri nagu pexĩxũ ga yexguma tauta Cristuaxũ peyaxõgũgu. Rũ tama name i nagu pexĩ i nacũmagũ i ngẽma duũxũgũ i tama Tupanaxũ cuèxgũxũ i naẽchitamare maxẽxũ. ¹⁸ Erũ Chataná rü nanatoõẽgũ i ngẽma duũxũgũ, rü ngẽmacèx chixexũguxicatama narũxĩnũe. Rũ nagagugũtama nũxũ nataxuma i maxũ i taguma gũxũ i Tupanawa ne ùxũ, erũ tama nũxũ nacuèxgũchaũ. ¹⁹ Rũ tama naxãneẽ na tacũ rü chixexũ na naxũgũxũ, rü ngẽmacèx nagu naxĩ rü nũxũ namepua i guxũraũxũ i chixexũgũ na naxũgũxũ. ²⁰ Natürü i pema rü tama ngẽmaãcũ na pemaxẽxũcèx nixĩ i Cristuaxũ peyaxõgũxũ. ²¹ Yerũ pema rü marũ meã nũxũ pexĩnũe ga Cristuchiga. Rũ toxũtawa naxcèx pengúe, rü nũxũ pecuèx i norũ ore i aixcũma ixĩxũ na ñuxãcũ Ngechuchu naxwèxexũãcũma na pemaxẽxũ. ²² Rũ ngẽmacèx name nixĩ i nũxũ perũxoe i ngẽma nuxcũmaũxũ i pecũmagũ ga ũpa nagu pexĩxũ. Yerũ yema nuxcũmaũxũ ga perũ maxũ rü nachixexũchi. Rũ pexũ napora rü pexũ nawomũxẽẽgũ na nagu pexĩxũcèx ga yema pexeneãrũ ngũchaũgũ i tama mexũ. Natürü i ñuxma rü name nixĩ i nũxũ perũxoe i guxũma i ngẽma. ²³ Rũ ngẽmacèx i ñuxma na Cristuarũ duũxũgũ pixĩgũxũ rü name nixĩ na Tupanaguxicatama perũxĩnũexũ. Rũ name nixĩ i Tupanana pegũ pexãgũ na Naãe i Üünexũ pewa puracũxũcèx rü na nangexwacaxũxẽẽãxũcèx i peãe. ²⁴ Rũ name nixĩ i penayaxu i ngexwacaxũxũ i pecũma i Tupana norũ ngũchaũmaã pexcèx mexẽexũ. Rũ ngẽma nacũma i ngexwacaxũxũ rü perũ maxũ i mexũwa tá nangõx i ngẽxguma nagu pexĩxgu i ngẽma ore i aixcũma ixĩxũ rü tama nawe perũxĩxgu i pexeneãrũ ngũchaũ. ²⁵ Rũ ngẽmacèx i ñuxma na Cristuarũ pixĩgũxũ rü tama name na pidoratèèxgũxũ. Natürü name nixĩ i wũxichigũ rü tümamũcũmaã aixcũmaxũ tixu. Erũ guxãma i yixema rü yigũtanũxũ i yaxõgũxũ tixĩgũ. ²⁶ Rũ ngẽxguma texé tacũ peãewa nguxẽẽgu rü ÿpegũna pedaugũ na tama pecadu pexũxũcèx! Rũ tama name i nagu perũxĩnũeẽcha natürü name nixĩ i paxa ngẽmatama i ngunexũgu nũxũ ipeyarũngũma i ngẽma naxũpa na yanaxũcuxũ ya ùèxcũ. ²⁷ Rũ pegũna pedaugũ na tama penaxũchicaxũcèx i Chataná na ngẽmaãcũ nayoxniẽxũcèx rü pemaã inacuáxũcèx. ²⁸ Rũ ngẽxguma texé petanũwa ngĩtèèxgu ga ũpa, rü name nixĩ i nũxũ tarũxo i ngẽma. Rũ name nixĩ i tümamẽxẽmaã meã tapuracũ na ngẽmaãcũ tüxũ nangẽxmaxũcèx i tümããrũ ngẽmaxũ na toguãx ya tüxũ nataxúemaã tangauxũcèx. ²⁹ Rũ tama name i chixexũ i oremaã pidexagũ. Rũ name nixĩ i ore i mexũmaã pidexagũ na ngẽmaãcũ ngẽma duũxũgũ i pexũ ñnũexũxũ perũngũxẽẽgũxũcèx na yexeraãcũ Tupanaga naxĩnũexũcèx rü nataãẽgũxũcèx. ³⁰ ¡Rũ pexuãẽgũ na tama penangechaũxẽẽxũcèx i Tupanaãe i Üünexũ! Erũ ngẽma Naãe i Üünexũ nixĩ i Tupana pexna muxũ na nũxũ pecuáxũcèx na aixcũma norũ duũxũgũ pixĩgũxũ ñuxmatáta ngẽma ngunexũ i nagu pexcèx núma naxũxũ ya Cristu. ³¹ ¡Rũ nũxũ perũxoe na nagu perũxĩnũeẽchaxũ ega texé tacũ rü chixexũ pemaã ũxgux! Rũ ngẽxgumarũũ ta name nixĩ na nũxũ perũxoexũ na aigũ perũxĩnũexũ, rü èxna penuèxũ, rü èxna pegũ na pengaexũ, rü èxna peguxchigawèxegũxũ. Rũ ngẽmaãcũ name nixĩ na nũxũ perũxoexũ i guxũma i ngẽma chixexũ i dexagũ. ³² Rũ name nixĩ i pegũ perũngũxẽẽgũ rü pegũmaã pemecũmagũ, rü pegũxũ pengechaũtümũgũ i wũxichigũ. Rũ ngẽxguma

petanüwa texé tacü rü chixexü pemaã üxgux, rü name nixĩ i pegüxü nüxü pengechaüğü i wüxichigü yema na Cristugagu Tupana pexü nüxü nangechaüxürüü.

5

Name nixĩ i meã namaxẽ i Tupanaxãcügü

¹ Rü ñuxma rü Tupanaxãcügü ya pexü nangechaüğüxe pixĩgü. Rü ngẽmacèx name nixĩ i naxcèx pedau na naxrüü meã pemaxẽxü rü naxrüü pimexü. ² Rü name nixĩ i pegü pengechaüğü yema Cristu tüxü na ngechaüxürüü. Rü nüma rü taxcèx nügü inaxã rü taxcèx nayu. Rü yemaãcü Tupanaxü nataãẽxẽ yerü yemaãcü tüxü namaxẽxẽ. ³ Rü ñuxma rü Tupanaãrü duüxügü pixĩgü. Rü ngẽmacèx tama name i naĩ i ngemaã rü ãxna naĩ ya yatümaã na ipepexü. Rü tama name na pexeneãrü ngüchaüwe perüxixü rü ãxna pegüna penanugüchaüxü i tacü i ngẽmaxügü. Rü ngẽmacèx name nixĩ i nüxü perüxoe i guxüma i ngẽma chixexügü, rü bai i nachiga na pidexagümarexü. ⁴ Rü tama name i tacü rü ore i ãüãchixüxü pixu, rü bai i tacü rü ngeãẽxümare pixu, rü bai i texéxü pecugücüraxü. Erü ngẽma ore i chixexügü rü taxuwama name. Rü narümemae nixĩ i Tupanana moxẽ pexãgü. ⁵ Rü aixcüma pemaã nüxü chixu rü ngẽxguma texé naĩ i ngemaã rü ãxna naĩ ya yatümaã ipexgu, rü ãxna tümãxüneãrü ngüchaü taxüxgu, rü taxucürüwama taxãchica i ngextá tórü Cori ya Cristu rü Tanatü ya Tupana ãẽxgacü íixixüwa. Rü ngẽxgumarüü ta taxucürüwama texé ngẽma taxãchica ega tügüna tananugüchaüxgu i tacü rü ngẽmaxügü. Erü yixema ngẽma nacüma tüxü ngẽxmaxẽ rü düxwa namaã tatupanaãx i ngẽma nacüma i chixexü. ⁶ Rü tama naga pexĩnüẽ ega texé tacü rü ore i ngẽãẽmarexümaã pexü womüxẽẽchaügu na penaxüxücèx i ngẽma chixexügü! Erü ngẽma chixexügügagu nixĩ i Tupana tá porãcü napoxcuexü i ngẽma duüxügü i tama naga ñnüẽxü. ⁷ Rü ngẽmacèx tama name i ngẽma duüxügümaã pexãmücügü na pema rü ta tama penaxüxücèx i ngẽma chixexügü. ⁸ Rü üpa ga pema rü ãñexüwa peyexmagü, yerü tama Tupanaxü pecuèx rü chixri pemaxẽ. Natürü i ñuxma na Tupanaxü pecuãxü rü tórü Coriarü duüxügü na pixĩgüxü, rü ngóonexüwa pengẽxmagü. Rü ngẽmacèx name nixĩ i duüxügü i ngóonexüwa ngẽxmagüxürüü meã na pemaxẽxü. ⁹ Erü ngẽxguma ngóonexüwa ingẽxmagu, rü mexü taxügü, rü nagu taxĩ i ore i aixcüma íixixü, rü meã tamaxẽ. ¹⁰ Rü ngẽmacèx name nixĩ i naxcèx pedau na nagu pexixü i ngẽma maxü i tórü Cori namaã taãẽxü. ¹¹ Rü tama name i pema rü ta penaxü i ngẽma chixexügü i taxuwama mexü i ngẽma togü i duüxügü i ãñexüwa ngẽxmagüxü ügüxü. Natürü narümemae nixĩ i penangoxẽẽ na nachixexü i ngẽma naxügüxü. ¹² Erü ngẽma chixexü i cúãcüma naxügüxü i ngẽma yatügü rü ngexügü, rü woo nachiga idexagümaregu rü wüxi i ãñexüchi nixĩ. ¹³ Natürü ngẽxguma ngóonexü nagu baxigu i tacü rü chixexügü rü meã tá nangox na ñuxãcü nachixexü. ¹⁴ Erü guxüma i tacü i ngẽxmaxü, rü ngẽxguma ngóonexüwa nangẽxmagu, rü meãma nangox na ñuxãcü yixü. Rü ngẽmacèx i Tupanaãrü orewa rü ñanagürü:

“¡Nabaixãchi i cuma na cupexü! ¡Rü írüda i cuma na icuyarütaxuxü! ¡Rü nagu rüxĩnü na ñuxãcü nachixexü i ngẽma curü pecadugü! Rü Cristu tá cuxcèx nanangóonexẽẽ rü tá cuxü narüngüxẽẽ na Tupanaxü cucuãxücèx”,

ñanagürü i ngẽma ore. ¹⁵ Rü ngẽmacèx name nixĩ i pexuãẽgü rü meã pemaxẽ. Rü tama name i ngẽma duüxügü i tama Tupanaãrü orexü cuèxgüxürüüãcüma na pemaxẽxü, natürü name na duüxügü i meã Tupanaga ñnüẽxürüü meã na pemaxẽxü. ¹⁶ Rü ñuxma na Tupana pexü yatauxchaãchixẽẽxü rü ¡pepaxãẽgü na nüxü pepuracüexü rü penaxüxü i ngẽma nüma nanaxwèxexü! Erü ñomaücüü i duüxügü rü porãcü chixexü naxügü. ¹⁷ Rü ñuxma na ngẽmaãcü namaxẽxü i togü i duüxügü, rü tama name na naxrüü pixĩgüxü. Rü tama name i duüxügü i ngẽãẽmarexürüü pixĩgü. Natürü name nixĩ i Tupanaãrü orewa pengüé na nüxü pecuãxücèx i tacü na yixü i tórü Cori pexü naxwèxexü na penaxüxü. ¹⁸ Rü tama name i tacü rü axexü i ngüchixãxümaã pengãxẽ, erü ngẽma rü chixexü tüxü

naxüxēē i ngēxguma ngēmaācü imaxēgu. Natürü name nixī i Tupanaāē i Ūünexūna pegü pexāgü na pewa nangēxmaxüçèx rü pemaā inacuáxüçèx. ¹⁹ Rü name nixī i Tupanaārü orechigagu rü norü wiyaegügu pegümaā pidexagü rü pegümaā nüxü pixu. Rü name nixī i nagúxūraüxü i norü wiyaegügu pewiyaegü, na ngēmaācü guxūne ya perü maxūnemaā tórü Corixü picuèxüügüxüçèx. ²⁰ Rü name nixī i guxūguma tórü Cori ya Ngechuchu ya Cristuégagu moxē nüxna pexāgü ya Tanatü ya Tupana naxçèx i guxūma.

Ñuxācü meā nügümaā namaxē i wüxi ya ĩpatacüāx i Cristuaxü yaxōgüxü

²¹ Rü ñuxma na Cristumēxēwa pengēxmagüxü, rü name nixī i pegüga pexīnūē i wüxichigü, erü Cristuxü pengechaügü rü naga pexīnūē. ²² Rü pemax, Pa Ngexügüx, rü ngēma tórü Cori naxwèxexürüü rü name nixī na petega pexīnūēxü. ²³ Erü nüma ya yatü rü namèxēru nixī, ngēxgumarüü ya Cristu na guxūma i yaxōgüxüēru na yīxü. Rü nümagü i yaxōgüxü rü Cristuxūne nixīgü rü nüma ya Cristu nixī i norü maxèxēēruü yīxü. ²⁴ Rü ngēxgumarüü na Cristuga naxīnūēxü i ngēma yaxōgüxü, rü ngēxgumarüü ta i ngexügü rü name nixī na guxūguma natega naxīnūēxü. ²⁵ Rü name nixī i namèxü nangechaü ya yatü, yema Cristu guxāma ga yaxōgüxexü na nangechaüxürüü. Rü yema na tüxü nangechaüxüçèx nixī ga nayuxü ga Cristu. ²⁶ Rü yemaācü nanaxü ga Cristu na nügüxü tüxü nadexüçèx rü tüxü yaxūünexēēxüçèx i guxāma i yixema na yaxōgüxü. Rü norü oremaā rü ngēma dexá i nawa íbaiüxūmaā tüxü nimexēē na aixcūma napēxewa imexüçèx. ²⁷ Rü yemaācü tüxü nimexēē na nügütama tüxü nawéxüçèx na aixcūma guxūwama imexü rü na nataxuxūma i tacü i tórü chixexü rü bai i írarüwa i ngēxguma napēxewa ingugügu. Erü tüxü nade na ixūünegüxüçèx rü guxūwama imexüçèx i napēxewa. ²⁸ Rü yema Cristu tüxü na ngechaüxürüü, rü wüxichigü ya yatü rü nanaxwèxe na namèxü nangechaüxü ñoma nügüxūnèxü na nangechaüxürüütama. Rü yixema tümamèxü ngechaüxé rü tügütama nixī i tangechaüxü. ²⁹ Erü tataxuma ya texé ya tümaxūnechitama aixe, natürü tanaxüwemü rü meāma nüxna tadau ngēma Cristu guxūma i yaxōgüxūna dauxürüü. ³⁰ Rü guxāma i yixema na yaxōgüxü rü Cristutanüxü tixīgü rü ngēmaācü wüxigu namücügü tixīgü. Rü nüma nixī i tüxna nadauxü. ³¹ Rü ngēmacèx i Tupanaārü ore i ümatüxūwa rü ñanagürü:

“Rü wüxichigü ya yatü rü nanatüna rü naēna tá nixügachi na namèxmaā inaxāüxüçèx. Rü ngēma taxre rü wüxi tátama nixīgü”,
ñanagürü i ngēma ore. ³² Rü ngēma ore i yatüchiga rü namèxchiga rü wüxi i ore i aixcūma mexü nixī. Natürü ñuxma na pemaā nüxü chixuxü i ngēma rü Cristuchiga rü yaxōgüxüchiga nixī i chidexaxü. ³³ Natürü ngēma ore rü pechiga ta nixī. Rü ngēmacèx i wüxichigü i pema i yatügü rü name nixī i pemèxü na pengechaüxü ngēma pegütama na pengechaüxürüü. Rü ngēxgumarüü ta i pema i ngexügü rü penaxwèxe i petega pexīnūē.

6

¹ Pa Buxügüx, ñuxma na Cristuarü pixīgüxü, rü name nixī i penatüga rü peega pexīnūē, erü ngēma nixī i aixcūma mexü. ²⁻³ Yerü yema mugü ga Tupana Moíchéna āxūtanüwa rü yema mu ga nüxīra wüxi ga unetamaā Tupana nüxü ixuxü, rü ñanagürü:

“;Rü tüxü nangechaü rü tüxü rüngüxēē ya cunatü rü cue na aixcūma cutaāēxüçèx rü namáxüçèx i curü maxü i ñoma i naānewa!”

ñanagürü. ⁴ Rü pemax, Pa Papágü rü Pa Mamágüx, rü tama name i penangamare rü penanuēxēē i pexacügü. Rü name nixī i meā penayaexēē, rü peyaxucuxēgü rü penangüexēē na meā tórü Coriaxü yaxōgüāxüçèx. ⁵ Rü pemagü, Pa Duüxügü ya Ixāārü Coriāxgüē, rü name nixī i meā naga pexīnūē i perü corigü i ñoma i naānewa. Rü penaxwèxe i nüxü pengechaügüācüma rü nüxü pemuēēācüma meā naga pexīnūē ñoma Cristuaxü pepuracüexürüü. ⁶ Rü tama name ega perü corigü pexü dawenüguxicatama meā nüxü pepuracüe na ngēmaācü pemaā nataāēxüçèx. Natürü ñuxma na Cristuarü duüxügü pixīgüxü, rü name nixī i guxūma i perü ngüchaümaā penaxü i ngēma Tupana

pexŭ naxwèxexŭ. ⁷ Rŭ ngēma puracŭ i perŭ cori pexna āxŭ, rŭ name nixī i petaãēãcŭma penaxŭ, ñoma tórŭ Cori ya Ngechuchuaxŭ pepuracŭexŭrŭ. Erŭ aixcŭma nŭxŭ nixī i pepuracŭexŭ rŭ tama i duŭxŭgŭaxŭ. ⁸ Rŭ name nixī i ngēmaãcŭ meã pepuracŭe, erŭ nŭxŭ pecuèx rŭ wŭxichigŭ i duŭxŭ rŭ woo wŭxi i coriarŭ duŭxŭ yixīgu rŭ ēxna taxúxearŭ yixīgu, natŭrŭ tórŭ Cori ya Ngechuchu tá nŭxŭ nanaxŭtanŭ naxcèx i ngēma mexŭ i naxŭxŭ. ⁹ Rŭ pemax, Pa Corigŭx, rŭ name nixī i ngēxgumarŭ ta meã namaã pemaxē i perŭ duŭxŭgŭ. Rŭ tama name i tacŭ rŭ chixexŭmaã penaxãŭxŭne. Rŭ nŭxna pecuèxãchie na pema rŭ ta perŭ duŭxŭgŭrŭ tórŭ Cori ya daxŭgucŭmèxèwa na pengèxmagŭxŭ. Rŭ aixcŭma guxãma i yixema rŭ tawŭxigu i napèxewa ya tórŭ Cori ya Cristu.

Cristuarŭ duŭxŭgŭarŭ poxŭruŭ i Tupana nŭxna āxŭ na nŭgŭ namaã ínapoxŭgŭxŭcèx naxchaxwa i Chataná

¹⁰ Rŭ ñuxma na tórŭ Corimŭcŭgŭ pixīgŭxŭ, Pa Chaueneēgŭx, rŭ name nixī i pegŭ peporaexē na penayaxuxŭcèx i ngema pora i nawa ne ŭxŭ. Erŭ nŭma rŭ naporaxŭchi. ¹¹ Rŭ pegŭ panaxŭ i guxŭma i ngema poxŭruŭgŭ i Tupana pexna āxŭ na ngēmamaã pegŭ ípepoxŭxŭcèx i ngēxguma Chataná pexŭ womŭxēēchaŭgu! ¹² Erŭ tama duŭxŭgŭ i taxrŭŭ āmachixŭ rŭ āxchinaxãxŭmaã nixī i yigŭ idaixŭ. Natŭrŭ ngēma namaã yigŭ idaixŭ nixī i Chatanáarŭ duŭxŭgŭ i ngoxogŭ i chixexŭgŭ i poraexŭ. Rŭ nŭmagŭ rŭ namuxŭchi rŭ tŭxŭ narŭporamaēgŭchaŭ. Rŭ tama nŭxŭ tadaugŭ erŭ naãgŭ nixī, natŭrŭ guxŭwama nangèxmagŭ i ñoma i naãnewa. Rŭ namaã inacuèx i ñoma i naãne i chixexŭ. ¹³ Rŭ ngēmacèx name nixī i penayauxgŭ i guxŭma i ngēma poxŭruŭgŭ i Tupana pexna āxŭ, na ngēmaãcŭ pegŭ ípepoxŭxŭcèx i ngēxguma ngēma naãgŭ pexŭ nachixexeēchaŭgu. Rŭ ngēmaãcŭ tãtãtama nŭxŭ penguxŭ i ngēma naãgŭ i chixexŭ rŭ tá nŭxŭ perŭporamaegŭ. ¹⁴ Rŭ ngemacèx name nixī i mea pegŭna pedaugŭ na tama perŭ uwanŭmèxègu peyixŭcèx. Rŭ penaxwae na pixaixcŭmagŭxŭ na taxuwama nachixexŭcèx i perŭ maxŭ. ¹⁵ Rŭ name nixī i guxŭguma ípememaregŭ na nŭxŭ peyarŭxugŭexŭcèx i ngema ore i ngŭxmŭxèeruxŭ. ¹⁶ Rŭ ngema guxŭarŭ yexera ixŭxŭ nixī na aixcŭma Cristuaxŭ peyaxŭgŭxŭ na ngēmaãcŭ pegŭ ípepoxŭxŭcèx nŭxna i Chatanáne i ãŭcŭmaxŭ i namaã tŭxŭ nachixexeēchaŭxŭ. ¹⁷ Rŭ name nixī i penayaxu i ngema maxŭ i taguma gúxŭ na ngemamaã pegŭ ípepoxŭxŭcèx ñoma wŭxi i churara i napatèxemaã nŭgŭ ípoxŭxŭrŭxŭ. Rŭ ngema Tupanaarŭ Ore i Naãē i Ŭnèxŭ pexna āxŭ, rŭ ngema nixī i pexne ixŭxŭ. ¹⁸ Rŭ tama name i nŭxŭ perŭchaue na peyumŭxègŭxŭ. Natŭrŭ name nixī i guxŭguma Tupanaãē i Ŭnèxŭarŭ ngŭxèemaã Tupanaxŭ pecèxŭ. Rŭ penaxwae i pexuãē na taguma nŭxŭ perŭxoexŭcèx. Rŭ ngemaãcŭ name nixī i naxcèx peyumŭxègŭ i guxŭma i Tupanaarŭ duŭxŭgŭ. ¹⁹ Rŭ ngēxgumarŭ ta chanaxwèxe i chauxcèx peyumŭxègŭ na Tupana choxŭ rŭngŭxèèxŭcèx rŭ choxna naxãxŭcèx i ngēma ore i nŭma nanaxwèxexŭ na nŭxŭ chixuxŭ. Rŭ chanaxwèxe i Tupanana naxcèx peca na choxŭ naporaxèèxŭcèx na tama chamuŭãcŭma nŭxŭ chixuxŭcèx rŭ mea chanangoxèèxŭcèx i ngema norŭ ore i Cristuchiga ga noxri exŭguxŭ i ñuxma maxŭ tŭxna āxŭ. ²⁰ Rŭ ngēma orexŭ na chixuxŭcèx nixī ga Tupana nŭgŭchicŭ choxŭ inamuxŭ. Rŭ ngēmagagu nixī i chapoxcuxŭ i ñuxmax. Rŭ chanaxwèxe i chauxcèx peyumŭxègŭ na tama chamuŭãcŭma meãma nŭma nanaxwèxexŭãcŭma nŭxŭ chixuxŭcèx i ngēma norŭ ore.

Pauru nanaguxè ga norŭ popera rŭ wenaxãrŭ yema duŭxŭgŭxŭ narŭmoxè

²¹ Rŭ taeneē ya nŭxŭ ingechaŭcŭ ya Tíquicu, rŭ chauxrŭŭ aixcŭma meãma napuracŭ i tórŭ Coriarŭ puracŭwa. Rŭ nŭma tá pemaã nŭxŭ nixu i guxŭma i chauchiga na ñuxãcŭ choxŭ naxŭpetŭxŭ i nuã. ²² Rŭ ngēmacèx nixī i pexŭtawa chanamuxŭ, na pemaã nŭxŭ yaxuxŭcèx na ñuxãcŭ toxŭ naxŭpetŭxŭ, na ngēmaãcŭ pexŭ nataãèxèèxŭcèx. ²³ Pa Toeneēgŭ i Yaxŭgŭxŭ, chanaxwèxe i Tanatŭ ya Tupana rŭ tórŭ Cori ya Ngechuchu ya Cristu pexŭ narŭ-ngŭxèègŭ i guxãma i pema na meã pegŭmaã pemaxèxŭcèx, rŭ aixcŭma

petaãgüxcèx, rü pegü pengechaügxüxcèx rü meã peyaxõgüxcèx. ²⁴ Rü chanaxwèxe i Tanatü ya Tupana nüxü narüngüxëẽ i guxüma i ngẽma duüxügü i aixcümaxüchi tórü Cori ya Ngechuchu ya Cristuxü ngechaügxü. Rü ngẽmaãcü yî.

Rü nuãma pexna,
Pauru

POPERA GA PIRIPUWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxê ga yema yaxögüxü ga Piripuwa yexmagüxü

¹ Pa Toeneëgü ya Piripuwa Ngëxmagüxex, choma i Pauru rü namaã i taeneë i Timutéu nixĩ i pexcèx tanaxümatüxü i ñaã popera. Rü toma rü Ngechuchu ya Cristuarü puracütanüxü tixĩgü. Rü pexcèx tanaxümatü i pema i yaxögüxüârü âëxgacügü na pixĩgüxü, rü pema i tupaucawa ngüxëëtaeruügü na pixĩgüxü, rü guxâma i pema i Ngechuchu ya Cristuaxü yaxögüxe. ² Rü chanaxwèxe i Tanatü ya Tupana rü tórü Cori ya Ngechuchu ya Cristu poraãcü pexü narüngüxëë rü pexü nataãëxëë.

Pauru rü yema yaxögüxüçèx nayümüxê

³ Rü guxüguma i ngëxguma pexna chacuèxächigu rü Tupanana moxê chaxã i pexcèx. ⁴ Rü ngëxguma chayümüxëgux, rü guxüguma chataãëäcüma pexcèx chayümüxê i guxâma i pemax. ⁵ Erü pema rü noxritama Tupanaârü orexü pexĩnüëgumama rü poraãcü choxü perüngüxëë na nüxü chixuxüçèx i norü ore i mexü. Rü ñuxma rü ta choxü perüngüxëëgüecha. ⁶ Rü Tupana rü marü inanaxügü i wüxi i mexü i puracü i perü maxüwa. Rü nüxü chacuèx rü nüma rü guxügutâma nanaxüecha i ngëma puracü ñuxmatáta yangüxëëã i ngëxguma ínanguxgu ya Ngechuchu ya Cristu. ⁷ Rü aixcüma name na ngëmaãcü pemaã nagu charüxĩnüxü, erü poraãcü pexü changechaü rü aixcüma Tupana wüxigu tüxü narüngüxëë i guxâma i yixema. Rü woo ñuxma na chapoxcuxü rü éxna ega âëxgacügüpëxewa choxü nagagügu, rü Tupana choxü narüngüxëë i ngëxguma norü ore i mexüetüwa chideaxgu rü namaã nüxü chixuxgu i âëxgacügü na aixcüma yĩxü i ngëma orewa nüxü iyarüngauxü i tórü maxü i taguma gúxü. Rü nüxü chacuèx rü ngëma choxü nangüxëëxüäcüma, rü pexü rü ta narüngüxëë. ⁸ Rü Tupana nüxü nacuèx na ñuxäcü poraãcü pexü chadauxchaüxü rü pexü na changechaüxü i guxâma i pemax, ngëma Ngechuchu ya Cristu pexü na ngechaüxürüü. ⁹ Rü chorü yumüxëwa naxcèx íchaca na yexeraãcü pegü pengechaügüxüçèx rü Tupanaxü pengechaügüxüçèx. Rü naxcèx íchaca na yexeraãcü nüxü pecuáxüçèx i guxüma i Tupanachiga rü yexeraãcü nüxü pecuáxüçèx na ñuxäcü nanaxwèxexü na naxcèx pemaxëxü. ¹⁰ Rü ngëmaãcü pexcèx chayümüxê erü chanaxwèxe na meã penangugüxü i tacü nixĩ i aixcüma mexü i Tupanapëxewa na penaxüxüçèx i ngëma. Rü chanaxwèxe na aixcüma namexü i perü maxü na taxucèxma tacüçèx Tupana pexna çaxüçèx i ngëxguma ínanguxgu ya Cristu. ¹¹ Rü naxcèx íchaca na Ngechuchu ya Cristu pexü narüngüxëëxü na aixcüma namexüçèx i perü maxü rü aixcüma penaxüxüçèx i ngëma Tupanapëxewa mexü na ngëmaãcü meã pemaxëäcüma Tupanaxü picuèxüügüxüçèx.

Chauxcèx rü Cristuarü ngüchaü na chaxüxüçèx nixĩ i chamaxüxü

¹² Pa Chaueneëgüx, rü chanaxwèxe i nüxü pecuèx rü guxüma i ngëma choxü üpetüxü, rü aixcüma ngëmaãcü choxü naxüpetü na yexeraãcü natachigaxüçèx i Tupanaârü ore i mexü. ¹³ Rü ñuxma i núma rü guxüma i churaragü i âëxgacüpataarü dauruügü rü guxüma i togü rü ta nüxü nacuèxgü na chapoxcuxü naxcèx na Cristuarü duüxü chíxü. ¹⁴ Rü ñuxma na chapoxcuxü rü muxüma i taeneëgü i yaxögüxü rü tama namüëäcüma nüxü nangüchaü na nüxü yaxugüexü i Tupanaârü ore i mexü. Rü yexeraãcü tórü Coriaxü nayaxögü. ¹⁵ Rü aixcüma nixĩ i ñuxre i duüxügü rü togüxü na yaxäüxächixëëxüçèxmare nüxü nixugüexü i Cristuchiga, erü togüxü narüyexerachaü. Natürü nangëxma i togü i duüxügü i aixcüma mexügu naxĩnüëäcüma meã nüxü ixügüexü i ngëma ore. ¹⁶ Rü ñuxre i duüxügü rü Cristuchigaxü nixugüe erü choxü

nangechaŭgü rü nüxŭ nacuèxgü na Tupana nuxma choxŭ muxŭ na íchanapoxŭxŭcèx i norü ore i mexŭ. ¹⁷ Natürü nangëxma i togü i noxrütama ngúchaŭcèx daugŭxŭ rü ngëmacèx nüxŭ ixugüexŭ i ngëma ore. Rü nümagü rü tama mexŭgu narüxŭnŭë, natürü naxcèx nadaugü na yexeraäcü choxŭ naguxchaxëëgüâxŭ i ñuxma na chapoxcuxŭ. ¹⁸⁻¹⁹ Natürü nüetama nixŭ ega woo ngëmaäcü yixŭgu. Erü woo mexŭ i norü ngúchaŭmaã yixŭgu rü éxna tama, natürü Cristuchigaxŭ nixugüe. Rü ngëma rü wüxi i taãë nixŭ i chauxcèx. Rü guxŭgutáma chataãëëcha erü nüxŭ chacuèx rü guxŭma i ngëma rü chorü mexŭcèx tá nixŭ erü chauxcèx peyumüxëgü rü choxŭ narüngŭxëë i Tupanaãë i Üünexŭ i Ngechuchu ya Cristuxŭ rüngŭxëëxŭ. ²⁰ Rü ngëma poraäcü chanaxwèxexŭ nixŭ na taguma tacü rü chixexŭ chaxŭxŭ na taxucèxma chaugŭcèx chaxänexŭcèx. Rü chanaxwèxe i guxŭguma íchamemare na guxäpëxewa tama chamuŭäcüma Cristuchigaxŭ chixuxŭ. Rü ñuxma na chamaxŭxŭ rü woo chayuxgu rü chanaxwæe i guxŭguma aixrŭgumarüütama chaugagu Cristuxŭ nicuèxüügü i duŭxŭgü. ²¹ Erü chauxcèx rü Cristuarü ngúchaŭ na chaxŭxŭcèx nixŭ i na chamaxŭxŭ. Natürü ngëxguma chayuxgux rü ngëma rü ta name, erü Cristuxŭtawa tá changëxma i ngëxguma. ²² Natürü tama nüxŭ chacuèx i tacü nixŭ i rümemaëxŭ i chauxcèx, ngëma na chayuxŭ rü éxna na chamaxŭxŭ. Erü ñuxma na chamaxŭxŭ rü choxŭ natauxcha na chanaxŭxŭ i tóru Coriarü puracü. ²³ Rü ngëmacèx tama nüxŭ chacuèx na tacü yŭixŭ i chauxcèx rümemaëxŭ i ngëma taxrewa. Erü ñuxguacü rü chanaxwèxe na chayuxŭ na Cristuxŭtawa changëxmaxŭcèx. Rü ngëma nixŭ i aixcüma yexera rümemaëxŭ i chauxcèx. ²⁴ Natürü i pexcèx rü nagu charŭxŭnŭ rü narümemaë nixŭ na ñoma i chaxunemaãtama na chamaxŭxŭ na ngëmaäcü pexŭ charüngŭxëëxŭcèx. ²⁵ Rü ñuxma na aixcüma meã nüxŭ chacuáxŭ na pechoxwèxexŭ, rü ngëmawa nüxŭ chacuèx na tãütáma paxa chayuxŭ. Rü ngëmaäcü tá chamaxáma na pexŭ charüngŭxëëxŭcèx na yexeraäcü Cristucèx pemaxëxŭcèx rü yexeraäcü taãëäcüma nüxŭ peyaxögŭxŭcèx. ²⁶ Rü ngëmaäcü wena táxaru petanüwa changëxma. Rü ngëxguma wena choxŭ pedaugügu rü aixcüma tá petaãëgü erü tá pexŭ nangëxma na tacücèx Ngechuchu ya Cristuxŭ picuèxüügŭxŭ. ²⁷ Rü ngëma guxŭârü yexera rümemaëxŭ nixŭ na naxcèx pedauxŭ na meã pemaxëxŭ, ngëma Cristuarü ore pemaã nüxŭ ixuxŭrŭü. Rü ngëxguma petanüwa chaxŭxgu rü éxna woo tama ngëma chaxŭxgu, natürü nüxŭ chaxŭnŭchaŭ na guxáma wüxigu pegü peporaexëëxŭ na taguma nüxŭ perüçhauxŭcèx na aixcüma peyaxögŭxŭ, rü ngëmaäcü Tupanaãxŭ pepuracüexŭ na yexeraäcü yaxŭchigŭxŭcèx i norü ore i mexŭ. ²⁸ Rü ngëmacèx penaxwèxe i tama texéxŭ pemuŭëäcüma nüxŭ pixugüama i ngëma ore. Rü ngëma na tama nüxŭ pemuŭëxŭ rü ngëma rü wüxi i cuèxruŭ tá nixŭ nüxŭ i perü uwanügü. Rü ngëmawa tá nüxŭ nacuèxgü na poxcuwa tá naxŭxŭ i nümagü natürü pema rü tá maxŭwa na pexŭxŭ. Rü Tupana tá nixŭ ya pexŭ rüngŭxëëcü na tama nüxŭ pemuŭëxŭcèx i ngëma perü uwanügü. ²⁹ Rü Tupanaga nixŭ na Cristuaxŭ peyaxögŭxŭ. Rü ngëxgumarüŭ ta naga nixŭ na Cristucèx ngúxŭ pingegŭxŭ. Rü ngëma rü wüxi i ngŭxëë nixŭ i pexna naxáxŭ ya Tupana. ³⁰ Pema rü choma rü wüxigu Tupanaârü puracüwa tangëxmagü, rü tanaxüama i ngëma puracü ega woo texé tüxŭ naguxchaxëëgux. Rü ũpa rü marü choxŭ pedau na ñuxäcü meã chanaxŭxŭ i ngëma puracü, rü ñuxma rü ta nüxŭ picuáchiga na ñuxäcü chanaxüamaxŭ woo namu i chorü guxchaxŭgü.

2

Cristu rü ñoma taxuŭma yŭixŭrŭü nügü nixŭxëë rü yemacèx ga Tupana rü guxŭârü äëxgacüxŭ nayaxŭxëë

¹ Rü dücax, Pa Chaueneëgŭx, rü ñuxma na Cristuarü duŭxŭgü pixŭgŭxŭ, ¿rü aixcüma yŭixŭ i nüma pexŭ nataãëxëëxŭ? ¿Rü aixcüma yŭixŭ i petaãëgŭxŭ erü nüma pexŭ nangechaŭ? ¿Rü aixcüma yŭixŭ i Tupanaãë i Üünexŭ pexŭtawa ngëxmaxŭ? ¿Rü aixcüma yŭixŭ i pegü pengechaŭgŭxŭ rü pegŭxŭ pengechaŭtümüügŭxŭ? ² Rü ngëxguma chi

ngēmaācū yixīgu, rü chanaxwèxe i guxāma wūxigu perūxīnūē, rü aixcūma guxāma pegü pengechaūgü, rü aixcūma guxāma ñoma wūxitama piixürüü na yiixü i peāē, rü guxāma wūxitama i ngúchaūcèx pedau. Rü ngēxguma ngēmaācū pemaxēgu rü wūxi i chorü taāē tá nixī. ³ Rü tama name na togüarü yexera pegü pixīgüxēēxü rü pegü picuèxüxügxü. Natürü narümemaē nixī i nagu perūxīnūēxü na ngema togü rü perü yexera nüxü nacuègüxü. ⁴ ;Rü tama pegüguxicatama perūxīnūē, natürü pegü peporaēxēē na togüxü perüngüxēēgüxüçèx! ⁵ Rü name nixī ga yema Ngechuchu ya Cristu nagu rüxīnūxügu na perūxīnūēxü i pemax. ⁶ Yerü nüma rü woo ga Tupanaxüchi na yiixü, natürü tama nügü nicuèxüxü na Tupana yixixü. ⁷⁻⁸ Rü yemacèx yéma nanatèx ga norü mexügu ga daxüguxü ga naānewa. Rü wūxi i duixü i togüaxü puracüxürüü nügü nixixēē. Rü ñoma wūxi i duixürüü ñoma ga naānegu nabu. Rü yexguma marü duixü yixīgu ga nümax, rü ñoma taxuūma yiixürüü nügü nixixēē. Rü Tupanaga naxīnū, rü yemaācū curuchagu nayu woo wūxi ga ānexüchi na yiixü ga yema. ⁹ Rü yemacèx ga Tupana rü guxüétüwa nanangexmaxēē rü nayangucuchixēē na guxūma i āēxgacügüétüwa nangēxmaxüçèx. ¹⁰ Rü yemaācū nanaxü ga Tupana na Ngechuchupēxegu tacaxāpüxügxüçèx rü nüxü ticuèxügxüçèx ya guxāma ya texé ya daxüguxü i naānewa ngēxmagüxe, rü guxāma i ñoma i naānewa ngēxmagüxe, rü guxāma ya texé ya marü yuexe. ¹¹ Rü yemaācū Tupana āēxgacüxü nayaxixēē na guxāma nüxü ixuxüçèx na tórü Cori yiixü ya Ngechuchu ya Cristu rü ngēmaācū nüxü icuèxügxüçèx ya Tanatü ya Tupana.

Cristuarü duixügu rü ñoma omügürüü nixīgü i natanüwa i ngēma duixügu i tama yaxōgüxü

¹² Rü ñuxma na nüxü pecuáxü na ñuxācū Nanatüga naxīnūxü ga Cristu, rü chanaxwèxe i chauga pexīnūē, Pa Chaueneēgü ya Pexü Changechaūgüxe. Rü yéma petanüwa chayexmagu chauga na pexīnūēxüārü yexera chanaxwèxe i chauga pexīnūē i ñuxma na tama petanüwa changēxmaxü. Rü chanaxwèxe i Tupanaxü pemuñēācūma naxcèx pedaugüama i perü maxü i taguma gúxü. ¹³ Erü Tupana nixī ya perü maxüwa puracücü na mexügu perūxīnūēxüçèx. Rü nüma nixī i pexü nangüxēēxü na naga pexīnūēxüçèx rü peyanguxēēxüçèx i ngema norü ngúchaxü. ¹⁴ ;Rü guxūma i ngema Tupanacèx pexüxüwa rü tama name i oöcü penaxü rü pegü naxcèx pechoxügagü! ¹⁵⁻¹⁶ Rü name i ngēmaācū meā pemaxē na taxúema tacü rü chixexüxü pewa iyangauxüçèx. Rü penaxwèxe i mexü i Tupanaxācügü pixīgü i natanüwa i ngēma duixügu i chixexü rü chixēāēgümarexü. Rü ngēxguma ngēma duixügümaā nüxü pixugüyane i ngēma ore i mexü i tüxü maxēxēēxü, rü yoxni natanüwa rü ñoma woramacurigü ya ēānexüwa ibáixgücürüü tá pixīgü. Rü ngēmaācū i ngēxguma wena núma naxüxgu ya Cristu rü poraācū tá pemaā chataāē erü tá nüxü chadau na tama natüçèxmamare yiixü ga yema puracü ga petanüwa chaxüxü. ¹⁷ Rü ngēma ñuxma na meā peyaxōgüxü, rü ngēma nixī i perü āmare i Tupanana pexāxü. Rü ngēma na meā yanguxüçèx i ngēma perü āmare i Tupanapēxewa, rü choma rü íchamemare na Tupanacèx ichanaxāxü i chorü maxü rü chayuxü. Rü ngēmacèx woo chayuxgu rü wūxi i taāē tá nixī i chauxcèx. Rü chanaxwèxe i pemagü rü ta ngēmacèx wūxigu chomaā petaāēgü. ¹⁸ Rü ngēmacèx ega ngēma ore i mexüçèx chayuxgux, rü tama name na pengechaūgüxü natürü chanaxwèxe na wūxigu chomaā petaāēgüxü.

Timutéu rü Epaporu- dítuchiga

¹⁹ Rü ngēxguma tórü Cori ya Ngechuchu naxwèxegu rü paxa petanüwa chanamuega ya taeneē ya Timutéu na pexü na iyadauxüçèx rü chataāēxüçèx i ngēxguma núma nangeāgu i pechiga. ²⁰ Rü aixcūma nataxuma i to i chorü ngüxēēruü i choma nagu charüxīnūxügu rüxīnūxü, rü Timutéuxicatama nixī. Rü nataxuma i to i naxrüü aixcūma pegü rüxīnūxü rü pexü rüngüxēēchaüxü. ²¹ Erü guxūma i togü rü naxcèx nadaugü i noxrütama ngúchaūgü, rü tama aixcūma nagu narüxīnūē i ngēma Ngechuchu ya Cristuarü ngúchaū. ²² Natürü i pema rü marü nüxü pecuèx na ñuxācū meā namaxüxü i Timutéu, rü

ñuxãcü choxũ nangũxẽẽxũ i Tupanaãrũ orearũ uchigawa, ñoma wũxi i buxũ i nanatũxũ rüngũxẽẽxũrũ. ²³ Rũ ngẽmacèx i ngẽxguma nũxũ chacuèxgu na ñuxãcü tá choxũ na naxũpetũxũ i núma, rũ ñuxũchi ngẽma petanũwa chanamuxchaũ i Timutéu na pexũ íyadauxũcèx. ²⁴ Rũ ngẽxgumarũũ ta nagu charũxĩnũ rũ tórũ Cori rũ aixcũma tá choxũ narüngũxẽẽ na chomatama ngẽma petanũwa íchayadauxũcèx. ²⁵ Rũ ngẽxgumarũũ ta chauxcèx name nixĩ i ngẽma petanũwa chanamuxũ i taeneẽ i Epaporudítu. Rũ nüma nixĩ ga pematama chauxcèx núma penamuxũ na choxũ nangũxẽẽxũcèx. Rũ nüma rũ chomũcü nixĩ i Tupanaãrũ puracũwa, rũ poraãcü choxũ narüngũxẽẽ i Tupanaãrũ orearũ uwa. ²⁶ Rũ poraãcü nũxũ nangũchaũ na pexũ íyadauxũ i guxãma i pemax. Rũ poraãcü naxoegaãẽ, yerũ pema rũ nũxũ pecuáchiga ga na yadaawexũ ga nümax. ²⁷ Rũ aixcũma nixĩ ga na yadaawexũ, rũ wixguxũchi taèx nayu. Natürũ Tupanaãxũ nangechaũtũmũũ rũ choma rũ ta nũxũ changechaũtũmũũ, rũ yemacèx naxcèx nayataanexẽẽ na tama yexeraãcü changechaũxũcèx. ²⁸ Rũ ngẽmacèx rũ yexeraãcü chanaxwèxe na paxa petanũwa chanamuxũ i Epaporudítu, na pema rũ petaãẽgũxũcèx i ngẽxguma wena nũxũ pedaugũgu. Rũ ngẽxguma i choma rũ tá ta chataãẽ i ngẽxguma nũxũ chacuèxgu na petanũwa nangẽxmaxũ na pexũ nangũxẽẽxũcèx. ²⁹ Rũ chanaxwèxe i tórũ Coriégagu petaãẽgũãcüma meã penayaxu erũ peeneẽ nixĩ. Rũ name nixĩ i nũxũ pengechaũgũ i guxũma i ngẽma duũxũgũ i Epaporudíturũũ ixĩgũxũ. ³⁰ Yerũ nüma ga Epaporudítu rũ yema na poraãcü nawa napuracũxũ ga Cristuarũ puracũ, rũ yemacèx wixguxũchi taèx nayu. Rũ ãücũmaxũwa nügũ nayexmaxẽẽ na pechicũũ choxũ nangũxẽẽxũcèx.

3

Ngẽma na Cristuxũ icuáxũ rũ ngẽma nixĩ i guxũãrũ yexera rümemaẽxũ

¹ Rũ ñuxma Pa Chaueneẽgũx, rũ chanaxwèxe i petaãẽgũ erũ tórũ Coriarũ duũxũgũ pixĩgũ. Rũ yema ore ga noxri pexcèx chaxũmatũxũ rũ tama choxũ nawèxtũmũũ na wena pexcèx chanaxũmatũxũ erũ aixcũma pexũ name i ngẽma ore. ² Rũ pegũna pedèux nũxna i ngẽma duũxũgũ i chixri maxèxũ rũ chixexũmaã pexũ ixucuxègũxũ! Rũ nümagũ nixĩ i nũxũ yaxugũexũ rũ ngẽxguma tama yigũ íwiechèxmüpèxechiraũgu, rũ taxucürũwama Tupanapèxewa time. ³ Natürũ yixema aixcũma Tupanapèxewa imexẽ, rũ yixema tixĩgũ. Rũ Tupanaxũ ticuèxũũgũ i Naãẽ i Üünexũãrũ ngũxẽẽmaã. Rũ tataãẽgũ erũ Ngechuchu ya Cristuarũ duũxũgũ tixĩgũ. Rũ tama tayaxõgũ na ngẽma yigũ íwiechèxmüpèxechiraũxũcèx Tupanapèxewa imexũ. ⁴ Rũ choma chi waxi nixĩ i guxũ i togũarũ yexera chayaxõxũ i ngẽma wiechèxmüpèxechiraũchiga. Rũ tataxu chima ya togue ya texé chauxrũũ yaxõxè i ngẽmachiga. ⁵ Yerũ yexguma 8 ga ngunexũ chauétũ yixĩgu ga na chabuxũ, rũ choxũ ínawiechèxmüpèxechiraũgũ, erũ Yudíu chixĩ. Rũ Beyamítanũxũ chixĩ. Rũ chaunatũ rũ chaué rũ Yudíugũ tixĩgũ, rũ ngẽmacèx i choma rũ Yudíuxũchi chixĩ. Rũ choma rũ Parichéuchirèx chixĩ, rũ pema nũxũ pecuèx rũ ngẽma Parichéugũ rũ meãma nanaxaure i Tupanaãrũ mugũ ga Moíché ümatũxũ. ⁶ Rũ yema na meã chayanguxẽẽchaũxũcèx ga yema mugũ ga Moíché ümatũxũ, rũ yemacèx nawe chingèchigũ ga yema duũxũgũ ga Ngechuchuaxũ yaxõgũxũ. Rũ yema na aixcũma meã chanaxaurexũcèx ga yema mugũ ga Moíché ümatũxũ, rũ yemacèx taxucürũwama texé chauchigaxũ tixu ga tama na chaxaurexũ. ⁷ Natürũ guxũma ga yema ũpa chauxcèx mexũ, rũ ñuxma rũ taxuwama choxũ name erũ marũ íchanatèx na Cristuaxũxĩcatama chayaxõxũcèx. ⁸ Rũ ñuxma na Ngechuchu ya Cristu ya chorũ Corixũ na chacuáxũ, rũ chauxcèx rũ guxũma ga yema ũpa nagu chixũxũ rũ taxuwama name, erũ ngẽma na Cristuxũ na chacuáxũ rũ guxũãrũ yexera narümemaẽ. Rũ guxũma ga yema mugũ ga noxri nagu chixũxũ rũ marũ nũxũ charũxo na Cristuwe charũxũxũcèx. Rũ chauxcèx rũ ñoma guxchirerũũ nixĩ ga yema ũpa nagu chixũxũ ega Cristumaã nügũ chananguxgu. ⁹ Rũ yemaãcü nũxũ charũxo ga guxũma nagagu ga yema na Cristuarũ duũxũ na chiĩxũcèx. Rũ ñuxma rũ Tupanapèxewa chame erũ Cristuaxũ chayaxõ. Rũ tama

ngêma na chamecūmaxūcèx rü éxna mugü chaxaurexūcèx nixĩ na chamexū i napêxewa. Natürü ngêma na Cristuaxū chayaxōxūcèx nixĩ i nügücèx choxū namexêxū ya Tupana. 10-11 Rū ngêma ñuxma chanaxwèxexū nixĩ na aixcūma Cristuxū chacuáxū rü chowa na nangêxmaxū i ngêma pora ga wena Cristuxū írüdaxêxū i ñuxma nūxū ngêxmaxū. Rū yema ngúxū na yangexū ga nūma rü na nayuxū rü ngêxgumarūütama chanaxwèxe i íchamemare na naxcèx ngúxū chingexū rü naxcèx chayuxū na yixcama choma rü ta yuwa ícharūdaxūcèx.

Pauru naxcèx nadau na Cristucèx namaxūxū ñuxmatáta Tupanax- ütawa nangu

12 Rū ñuxma na ngêma ñachaxū pemaã rü tama chanaxwèxe i nagu perüxĩnūē na guxūxū chacuáxū i Cristuchiga, rü éxna guxūwama na chamexū. Natürü guxū i ngunexūgu rü naxcèx chadauama na Ngechuchu ya Cristuarü ngúchaū na chaxūxūcèx, yerü yemacèx nixĩ ga nūma ga chauxcèx nadauxū ga noxrix. 13 Pa Chaueneēgūx, pemaã nūxū chixu rü chomatama meãma nūxū chacuèx rü ñuxma rü ta tautama nawa changu i ngêma naxcèx chadauxū. Natürü i ñuxma rü marü nūxū icharüngüma i guxūma ga yema noxri nagu chixūxū. Rū ñuxma rü chaugü chaporaxêē na aixcūma Cristucèx na chamaxūxū na nawa changuxūcèx i ngêma maxū i chopêxewaama ngêxmaxū. 14 Rū ngêmacèx i ñuxma rü naxcèx chadau na aixcūma Cristucèx chamaxūxū ñuxmatáta Tupanaxūtawa changu. Erü chanayauxchaū i ngêma ãmare i nūma daxūguxū i naãnewa naxcèx taxcèx nangemaxū i yixema na Ngechuchu ya Cristuarü duūxūgü ixīgūxū. 15 Rū guxāma i yixema na aixcūma Cristuaxū yaxōgūxū, rü name nixĩ i ngêmaãcü nagu tarüxĩnūē. Natürü ngêxguma chi texé i petanūwa toguama tarüxĩnūgu, rü Tupana tá tūxū nūxū nacuèxêē i ngêma nūma nanaxwèxexū na nūxū tacuáxū. 16 Rū ngêma inaxwèxexū nixĩ na aixcūma naga ixĩnūēechaxū rü meãma nagu ixixū i ngêma ore i marü nūxū icuáxū. 17 Pa Chaueneēgūx, chanaxwèxe i chauxrūū nagu pexĩ i ngêma pexū nūxū chadauxêēxū na namexū. ¡Rū penangugü na ñuxācü meã namaxêxū i ngêma togü i duūxūgü i toma tamaxêxūācüma maxêxū! 18 Rū marü muēxpūxcūna pemaã nūxū chixu, rü ñuxma rü changechaūācüma rü chauxaxācüma wena pemaã nūxū chixu rü nangêxma i muxūma i duūxūgü i Cristuarü uwanürüūācüma maxêxū. Rū nūmagü rü tama nūxū nacuèxgūchaū na Cristu curuchagu naxcèx yuxū. 19 Natürü ngêma duūxūgü rü tá dūxwa Tupana nanapoxcue. Rū ngêma naxūneärü ngúchaū nixĩ i namaã natupanaāxū. Rū woo nūxū nacuèxchirêx na wüxi i ãne na yīxū i ngêma chixexū natürü namaã nataãgūama. Rū ñoma i naãneärü ngêmaxūguxicatama narüxĩnūē. 20 Natürü i yixema rü daxūguxū i naãnewa tūxū nangêxma i tachica. Rū ítananguxêē na daxūguxū i naãnewa taxcèx ne naxūxū ya tórü Cori ya Ngechuchu ya Cristu ya tórü Maxêxêēruū. 21 Rū ñaã taxūne i yuxwèxexū rü nūma ya Cristu tá nanaxūchicüü na naxūne i mexêchixūrūū yīxūcèx. Rū ngêma norü pora i namaã guxūetüwa nangêxmaxū, rü ngêmamaãtama tá nanaxūchicüü i taxūne na noxrürüū yīxūcèx.

4

Ñuxma na tórü Coriarü ixīgūxū rü name nixĩ na guxūguma namaã itaãgūxū

1 Pa Chaueneēgūx, rü pexū changechaxū rü poraãcü pexū íchayadauxchaxū. Rū ngêma pemaã nūxū chixuxūrūū chanaxwèxe i meã tórü Coricèx pemaxê erü pema nixĩ i chorü taãē rü chorü ãmare i Tupana choxna āxū pixīgūxū. 2 Rū nūxū chacèxū i taeyèxgü i Ebódia rü Chitique na nügümaã nangüxmüèxūcèx, erü nūmagü rü tórü Corixacügü nixīgü. 3 Rū cumax, Pa Chomücü ya Mecü i Wüxigu Tupanaärü Puracüwa Chomaã Puracücūx, rü cuxna naxcèx chaca na nūxū curüngūxêxūcèx i ngêma taxre i taeyèxgü, erü nūmagü rü wüxigu chomaã rü Cremetemaã rü ngêma togü i chomücügü i Tupanaärü poperawa marü ngoxégagūxūmaã napuracüe i Tupanaärü orearü uwa. 4 Rū ñuxma na tórü Coriarü pixīgūxū, Pa Chaueneēgūx, rü name nixĩ i guxūguma namaã petaãgü. Rū wena pemaã

nūxŭ chixu, rŭ ꝑetaãĕgŭ! ⁵ Rŭ chanaxwĕxe i meã pemaxĕ na guxŭma i duŭxŭgŭ pexŭ nacuĕgxŭcĕx na aixcŭma mexŭ i duŭxŭgŭ na pixĭgŭxŭ. ꝑRŭ nŭxna pecuĕxãchie na tŕrŭ Cori rŭ paxa tá nataeguxŭ na nŭma naxŭxŭ! ⁶ ꝑRŭ taxucĕxma penaxĭxãchiãĕgŭ! ꝑRŭ Tupanamaã nŭxŭ pixu i perŭ yumŭxĕwa i guxŭma i ꝑacŭ i pexŭ ngupetŭxŭ! ꝑRŭ naxcĕx ípeca rŭ moxĕ nŭxna pexã! ⁷ Rŭ ngĕmaãcŭ i nŭma ya Tupana rŭ tá pexŭ nataãĕxĕĕ namaã i wŭxi i taãĕ i mexĕchixŭ i guxŭma i taãĕ i nŭxŭ icuáxŭãrŭ yexera mexĕchixŭ. Rŭ ñuxma na Ngechuchu ya Cristuarŭ duŭxŭgŭ pixĭgŭxŭ, rŭ ngĕma taãĕ i Tupana pexna ãxŭ rŭ tá nŭxna pexŭ ínapoxŭ i ngĕma chixexŭ i nagu perŭxŭñnŭĕchaxŭ.

Name nixĭ i nagu tarŭxŭñnŭĕ i guxŭma i ꝑacŭ i aixcŭma mexŭ ixĭxŭ

⁸ Rŭ ñuxma Pa Chaueneĕgŭx, rŭ name nixĭ i nagu perŭxŭñnŭĕ i guxŭma i ngĕma ore i aixcŭma ixĭxŭ, rŭ guxŭma i ngĕma nacŭma i taxucŭrŭwama texĕ chixri nachiga idexaxŭ. Rŭ name nixĭ i nagu perŭxŭñnŭĕ i guxŭma i ngĕma ore i aixcŭma meã iwĕxŭ rŭ guxŭma i ngĕma Tupanapĕxewa mexŭ, rŭ guxŭma i ngĕma mexŭ i duŭxŭgŭ namaã taãĕxŭ, rŭ guxŭma i ngĕma mexŭ i Tupanaxŭ naxcĕx icuĕxŭxŭgŭxŭ. Rŭ name nixĭ i ngĕmagu perŭxŭñnŭĕ. ⁹ Rŭ chanaxwĕxe i aixcŭma penaxŭ i ngĕma pexŭ changŭxĕĕxŭ, rŭ ngĕma pexŭ namaã chixucŭxĕgŭxŭ, rŭ ngĕma chauxŭtawa nŭxŭ pexĭñnŭĕxŭ, rŭ ngĕma chauxŭtawa nŭxŭ pedauxŭ na chanaxŭxŭ. Rŭ ngĕxguma ngĕmaãcŭ pemaxĕgu rŭ pemaã tá inarŭxãŭx ya Tupana ya tamaã irŭngŭxmŭcŭ rŭ tŭxŭ taãĕxĕĕcŭ.

Yema PiripucŭĀx ga yaxŕgŭxŭ rŭ dĕrumaã Pauruxŭ narŭngŭxĕĕgŭ

¹⁰ Rŭ ñuxma na chorŭ Coriarŭ chĭixŭ, rŭ poraãcŭ chataãĕ erŭ wenaxãrŭ choxna pecuĕxãchie rŭ choxŭ perŭngŭxĕĕ. Rŭ choma nŭxŭ chacuĕx rŭ pema rŭ guxŭguma choxŭ perŭngŭxĕĕchaŭ, natŭrŭ taguma pexŭ natauxcha ga na penaxŭxŭ ga yema. ¹¹ Rŭ tama ngĕma na ꝑacŭ choxŭ taxuxĕcĕx nixĭ i pemaã nŭxŭ chixuxŭ i ngĕmachiga. Erŭ choma rŭ marŭ chomaã nixŭ na namaã chataãĕxŭ i ngĕma choxŭ ngĕxmaxŭ. ¹² Rŭ nŭxŭ chacuĕx na ñuxãcŭ na yĭixŭ ega guxŭ choxŭ tauxgux, rŭ nŭxŭ chacuĕx na ñuxãcŭ na yĭixŭ ega choxŭ namuxŭchixgu. Rŭ marŭ chomaã nixŭ na namaã chataãĕxŭ i ngĕma choxŭ ngĕxmaxŭ woo changaxpŭtŭwegu, rŭ ĕxna woo chataiyaxgu, rŭ ĕxna woo choxŭ namuxŭchixgu rŭ ĕxna woo choxŭ natauxguma. ¹³ Rŭ Cristu nixĭ ya choxŭ poraxĕĕcŭ, rŭ ngĕmacĕx chomaã nanguxŭ na chanaxŭxŭ i guxŭma i ngĕma Tupana naxwĕxexŭ na chanaxŭxŭ. ¹⁴ Natŭrŭ ga pema rŭ wŭxi ga mexŭ choxŭ pexŭgŭ ga yexguma guxchaxŭwa chayexmagu rŭ choxŭ perŭngŭxĕĕ. ¹⁵ Rŭ pema, Pa Yaxŕgŭxŭ i PiripucŭĀx, rŭ meãma nŭxŭ pecuĕx rŭ yexguma noxri Machedŕniããnewa nŭxŭ chixuxgu ga Tupanaãrŭ ore, rŭ yexguma yĕma íchaxŭxŭgu, rŭ pexicatama nixĭ ga ãmare choxna pexãxŭ naxcĕx ga yema ngŭxĕĕ ga chauxŭtawa peyaxuxŭ. ¹⁶ Rŭ yexguma Techarŕnicaarŭ ãnewa chayexmayane, rŭ pema rŭ yĕma chauxcĕx penamugŭ ga perŭ ãmare na choxŭ perŭngŭxĕĕgŭxĕcĕx. Rŭ tama nixĭ ga yexgumarĭca choxŭ perŭngŭxĕĕxŭ. ¹⁷ Rŭ woo perŭ ãmaremaã chataãĕ, natŭrŭ yexeraãcŭ chataãĕ erŭ ngĕma choxŭ na perŭngŭxĕĕgŭxĕcĕx rŭ Tupana tá ãmare pexna naxã. ¹⁸ Rŭ ñuxma rŭ marŭ choxŭ nangĕxma i guxŭma i ꝑacŭ i chanaxwĕxexŭ, rŭ aixcŭma ngĕmaãrŭ yexera choxŭ nangĕxma. Rŭ ñuxma na Eaporudĭtu nŭma nangexŭ i perŭ ãmare, rŭ taxuŭma choxŭ nataxu. Rŭ ngĕma perŭ ãmare i chauxcĕx nŭma pemuxŭ, rŭ Tupanapĕxewa rŭ ñoma wŭxi i pumara i yixixŭrŭxŭ nixĭ, rŭ nŭma rŭ poraãcŭ namaã nataãĕ. ¹⁹ Rŭ ngĕmacĕx ya chorŭ Tupana rŭ norŭ ngĕmaxŭgŭ i mexĕchixŭwa tá pexna nanaxã i guxŭma i ꝑacŭ i pexŭ taxuxŭ. Rŭ ngĕmaãcŭ tá nanaxŭ erŭ Ngechuchu ya Cristuarŭ duŭxŭgŭ pixĭgŭ. ²⁰ Rŭ name nixĭ i guxŭguma nŭxŭ ticuĕxŭgŭ ya Tanatŭ ya Tupana. Rŭ ngĕmaãcŭ yĭi.

Pauru nanaguxĕĕ ga norŭ popera rŭ wenaxãrŭ yema duŭxŭgŭxŭ narŭmoxĕ

²¹ Rŭ chanaxwĕxe i chauĕĕgagu nŭxŭ perŭmoxĕgŭ i guxŭma i taeneĕgŭ i Ngechuchu ya Cristuaxŭ yaxŕgŭxŭ. Rŭ ngĕxgumarŭ ta pexŭ narŭmoxĕgŭ i ngĕma taeneĕgŭ i chauxŭtawa ngĕxmagŭxŭ. ²² Rŭ ngĕxgumarŭ ta pexŭ narŭmoxĕgŭ i guxŭma i taeneĕgŭ

i núma Dumawa ngěxmagüxű. Rű ngěma yexera pexű rűmoxěgüxű rű ngěma nixĩ i taeneěgü i Dumaãrű ãěxgacü ya tacüxű-tawa puracüexű. ²³ Rű chanaxwèxe i tórű Cori ya Ngechuchu ya Cristu pexű narüngűxěě i guxãma i pemax. Rű ngěmaãcü yĩ.

Rű nuãma pexna,
Pauru

POPERA GA COROCHAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corochawa yexmagŭxŭ

1-2 Pa Chaueneēgŭ ya Corochaarŭ Īānewa Ngēxmagŭxex, choma i Pauru rü wŭxigu namaā i taeneē i Timutéu nixī i pexcèx tanaxŭmatŭxŭ i ñāā popera. Rü choxŭ nixī ga Tupana ga inamuāchixŭ na guxŭwama nüxŭ chixuchigŭxŭcèx i Ngechuchu ya Cristuarŭ ore. Rü pexcèx chanaxŭmatŭ i guxāma i pema ya chaueneēgŭ ya aixcŭma Tupanaārŭ duŭxŭgŭ ixīgŭxe ya Cristuaxŭ yaxōgŭxe. Rü chanaxwèxe i Tanatŭ ya Tupana pexŭ narŭngŭxēē na meā pegŭmaā pemaxèxŭcèx rü petaēgŭxŭcèx.

Pauru rü yema yaxōgŭxŭcèx nayumŭxē

3 Rü guxŭguma i ngēxguma pexcèx tayumŭxēgŭgu, rü moxē nüxna taxā ya Tupana ya Nanatŭ ya tŕrŭ Cori ya Ngechuchu ya Cristu. 4 Rü ngēmaācŭ tanaxŭ erŭ marŭ nüxŭ tacuāchiga na ñuxācŭ aixcŭma meā Ngechuchu ya Cristuaxŭ peyaxōgŭxŭ, rü aixcŭma nüxŭ pengechaŭgŭxŭ i guxŭma i ngēma duŭxŭgŭ i Tupanaārŭ ixīgŭxŭ. 5 Rü nüxŭ tacuèxgŭ na ngēmaācŭ meā Tupanapēxewa pemaxèxŭ erŭ penayauxgŭchaŭ i ngēma mexŭgŭ i Tupana pexŭ namaā nguxŭxŭ i daxŭguxŭ i naānewa. Rü ñuxma rü meā ĩpenanguxēē na penayauxgŭxŭcèx i ngēma mexŭgŭ yerŭ marŭ nüxŭ pexŭnŭē ga Tupanaārŭ ore i mexŭ i aixcŭma ixīxŭ. 6 Rü ngēmatama ore i mexŭ ga pexŭtawa nguxŭ, rü guxŭwama nangu i ñuxmax. Rü guxŭwama ningŭchigŭ rü duŭxŭgŭarŭ maxŭxŭ naxŭchicŭŭ, yema perŭ maxŭxŭ na naxŭchicŭŭxŭrŭŭ ga yexguma nüxŭ pexŭnŭēgu rü nüxŭ pecuèxgŭgu na ñuxācŭ Tupana aixcŭma pexŭ na ngechaŭxŭ rü pexŭ rŭngŭxēēchaŭxŭ. 7 Rü ngēma ore i mexŭ nixī ga pexŭ nangŭexēēxŭ ga Epáparu ya tomŭcŭ ya nüxŭ tangechaŭgŭcŭ ya wŭxigu tomaā Tupanaārŭ orewa puracŭcŭ. Nŭma rü Cristuarŭ puracŭtanŭxŭ ya mecŭ nixī, rü nŭma nixī i tochicŭŭ pexŭ nangŭxēēxŭ. 8 Rü nŭma ya Epáparu nixī i tomaā nüxŭ yaxuxŭ i pechiga na ñuxācŭ Tupanaāē i Ūnèxŭārŭ ngŭxēēmaā choxŭ pengechaŭgŭxŭ. 9 Rü ngēmacèx i toma ga noxritama pexŭ tacuāchigagu, rü taguma nüxŭ itayarŭngŭmaē na pexcèx tayumŭxēgŭxŭ. Rü guxŭguma Tupanana naxcèx tacagŭ na meā pexŭ nüxŭ nacuèxēēxŭcèx i ngēma nŭma nanaxwèxexŭ na penaxŭxŭ. Rü nüxna naxcèx tacagŭ na pexna naxāxŭcèx i nagŭxŭraŭxŭ i cuèx i Naāē i Ūnèxŭwa ne ŭxŭ. 10 Rü nüxna naxcèx tacagŭ na meā tŕrŭ Cori naxwèxexŭācŭma na pemaxèxŭcèx rü guxŭguma penaxŭxŭcèx i ngēma nŭma nanaxwèxexŭ. Rü nüxna naxcèx tacagŭ na pexŭ natauxchaxēēāxŭcèx na togŭxŭ perŭngŭxēēgŭxŭcèx rü guxŭ i ngunexŭgu yexeraācŭ Tupanaxŭ pecuāxŭcèx. 11 Rü nüxna naxcèx tacagŭ na norŭ pora i mexèchixŭmaā pexŭ naporaexēēxŭcèx, na namaā peporaexŭcèx i guxŭma i guxchaxŭgŭ rü yaxna namaā pexŭnŭēxŭcèx. 12 Rü ñuxŭchi tanaxwèxe i taēēācŭma Tanatŭ ya Tupanana moxē pexā, erŭ nŭma pexŭ nimexēēgŭ na pema rü ta penayauxgŭxŭcèx i ngēma mexŭgŭ i naxŭtawa ngēxmagŭxŭ i nŭma tá nüxna naxāxŭ i ngēma duŭxŭgŭ i noxrŭ ixīgŭxŭ. 13 Yerŭ nŭma ga Tupana rü marŭ Chatanámèxēwa tŭxŭ ĩnanguxŭxēē rü Nane ya nüxŭ nangechaŭcŭmèxēwa tŭxŭ nangēxmagŭxēē. 14 Rü guma Nanegagu nixī ga tŭxŭ namaxèxēēxŭ rü tŭxŭ nüxŭ nangechaŭxŭ ga tŕrŭ pecadugŭ.

Rü yexguma pecaducèx nayuxgu ga Cristu rü Tupana nügŭmaā nanangŭxmŭèxēē ga duŭxŭgŭ

15 Taguma texé Tupanaxŭ tadau, natŭrŭ nŭma rü nŭma nanamu ga Nane na duŭxŭgŭ nüxŭ daugŭxŭcèx rü nüxŭ nacuèxgŭxŭcèx na ñuxācŭ na yīxŭ i nŭma ya Tupana. Rü naxŭpa ga guxŭma ga tacŭ i ñuxma ngēxmaxŭ, rü nüxŭra marŭ nayexma ga Tupana

Nane. ¹⁶ Rū Nanexŭ nixĭ ga namuxŭ ga Tupana na naxüāxŭcèx ga guxŭma i tacü i ñuxma ngēxmaxŭ i daxŭguxŭ i naānewa rü ñoma i naānewa, rü guxŭma i ngēma nüxŭ idauxŭ rü ngēma tama nüxŭ idauxŭ. Rū yemaācü nanaxü ga guxŭma ga norü orearü ngeruŭgü i daxŭcŭāxârü āēxgacŭgü rü guxŭma ga ngoxogŭarü āēxgacŭgü. Rū yemaācü nanaxü ga guxŭma na nüxŭ yacuèxŭgŭxŭcèx. ¹⁷ Rū naxŭpa i guxŭma i tacü i ñuxma ngēxmaxŭ, rü Cristu rü marü nüxĭra nayexma. Rū nagagu nixĭ i meā inanuxŭ i guxŭma erü nüma nixĭ i namaā inacuáxŭ. ¹⁸ Rū nüma ya Cristu rü naēru nixĭ i guxŭma i ngēma yaxōgŭxŭ. Rū nüma nixĭ ga naxüāxŭ rü nüxna naxāāxŭ ga maxŭ. Rū nüma nixĭ ga nüxĭra yuwa ínadaxŭ na guxŭārü āēxgacŭ yĭxŭcèx. ¹⁹ Rū Cristu rü Tupanaxŭchi nixĭ, yerü yemaācü nanaxwèxe ga Tupana. ²⁰ Rū Tupana rü ñoma ga naānewa nanamu ga Cristu na curuchagu pecaducèx nayuxŭcèx. Rū yemaācü nixĭ ga Tupana nŭgŭmaā nangŭxmŭēēxŭ ga guxŭma i ñoma i naānewa ngēxmaxŭ rü guxŭma i daxŭguxŭ i naānewa ngēxmaxŭ. Rū yemaācü nanaxü ga Tupana yerü yemaācü nanaxwèxe. ²¹ Rū pema ga ŭpa rü tama Tupanamŭcŭgŭ pixĭgŭ yerü naxchi pexaie nagagu ga perü chixexŭ ga naga perŭxĭnŭexŭ rü pexŭxŭ. ²² Natŭrŭ i ñuxma ya Tupana rü nŭgŭmaā pexŭ narŭngŭxmŭēē na namŭcŭgŭ i mexŭ pixĭgŭxŭcèx. Rū yemaācü nanaxü ga Tupana ga yexguma Cristu duŭxŭxŭ ixĭxgu rü curuchawa ngŭxŭ yangexgu rü yexma nayuxgu. Rū yemaācü naya ga Cristu na nŭgŭxŭtawa pexŭ nagagŭxŭcèx rü napēxewa pimexŭcèx rü nataxuxŭcèx i perü chixexŭ. ²³ Natŭrŭ ngema na pengugŭxŭcèx, rü penaxwèxe na guxŭguma mea peyaxōgŭxŭ rü meā naga pexĭnŭēxŭ rü taguma nüxŭ perŭxoexŭ i ngēma norü ore i mexŭ ga marü nüxŭ pexĭnŭēxŭ. Rū ngematama ore nixĭ i ñuxma nüxŭ yaxugŭexŭ i gŭxŭ i naanewa.

Tupana rü Pauruxŭ namu na guxŭma ga yaxōgŭxŭxŭ nangŭxŭēēxŭcèx

²⁴ Rū ñuxma na woo pexcèx ngŭxŭ chingexŭ rü chataāē erü nüxŭ chacuèx rü ñāā chaxunemaā choma rü ta chayanguxŭēē ga yema ngŭxŭ ga Cristu ingexŭ naxcèx i norü duŭxŭgŭ i yaxōgŭxŭ. ²⁵ Rū ñuxma ya Tupana rü choxŭ namu na nüxŭ charŭngŭxŭēēxŭcèx i guxŭma i ngēma norü duŭxŭgŭ i yaxōgŭxŭ. Rū perü mexŭcèx nixĭ i choxŭ namuxŭ na guxŭwama meā nüxŭ chixuxŭcèx i norü ore. ²⁶⁻²⁷ Rū ngēma Tupanaārü ore rü ñanagŭrŭ:

“Rū Cristu rü pewa nangēxma i ñuxmax, rü nagaguxicatama nixĭ i pexŭ nangēxmaxŭ i pechica i daxŭguxŭ i naānewa i ngextá ínamexēchixŭwa”,

ñanagŭrŭ. Rū yema nuxcŭmaŭgŭxŭ ga duŭxŭgŭ rü tama nüxŭ nacuèxgŭ ga yemachiga, natŭrŭ ñuxma ya Tupana rü norü duŭxŭgŭxŭ nüxŭ nacuèxēē. Erü nüma ya Tupana rü norü duŭxŭgŭxŭ nüxŭ nadauxēēchaŭ na ñuxācü poraācü pexŭ nangechaŭxŭ rü pexŭ nangŭxŭēēxŭ i guxāma i pema i tama Yudŭgŭ ixĭgŭxe. Rū ñuxma i pema na woo tama Yudŭgŭ pixĭgŭxŭ, natŭrŭ pema rü ta pexŭ nangēxma i pechica i daxŭguxŭ i naānewa erü Cristuaxŭ peyaxōgŭ. ²⁸ Rū ñuxma i toma rü Cristuchigaxŭ nixĭ i tixuxŭ. Rū ngema ore i Tupanaarŭ cuèx nawa ngexmaxŭmaā nixĭ i guxŭma i duŭxŭgŭxŭ tixucŭxēgŭxŭ rü tanangŭexŭēēxŭ na ngemaācü ngearŭ chixexŭāxŭ Cristuxŭtawa tagagŭxŭ. ²⁹ Rū ngēmatama puracŭ nixĭ i nawa poraācüxŭchima chapuracŭamaxŭ woo tacü rü guxchaxŭ chauxcèx ínguxgu. Rū guxŭma i ngēma pora i Cristu choxna āxŭ i chowa ngēxmaxŭ nixĭ i choxŭ poraxŭēēxŭ na chanaxŭamaxŭcèx i ngēma puracŭ.

2

¹ Pa Chaueneēgŭx, chanaxwèxe i nüxŭ pecuèx na ñuxācü poraācü pexcèx chapuracŭxŭ. Rū ngēxgumarŭŭ ta chanaxwèxe i nüxŭ pecuèx na ñuxācü poraācü chapuracŭxŭ naxcèx i ngēma taeneēgŭ i Laodichéaarŭ íānewa ngēxmagŭxŭ rü guxŭma i petanŭxŭgŭ i taguma choxŭ daugŭxŭ. ² Rū ngēmaācü poraācüxŭchima chapuracŭ na nüxŭ rü ta chanangŭchaŭxŭēēxŭcèx. Erü chanaxwèxe i guxŭma aixcŭma nŭgŭ nangechaŭgŭ rü nüxŭ nangēxma i ngēma mexŭ i cuèx i aixcŭma ixĭxŭ. Rū ngēmaācü tá meāma nüxŭ

nacuèxgü ga yema noxri Tupanaxĩcatama nüxü cuáxü. Rü yima rü Cristutama nixĩ. ³ Rü nüma nixĩ i nüxü nangẽxmaxü i guxüma i cuèx i aixcüma mexü. Rü nüma nixĩ i taxcèx nangoxẽãxü i Tupanachiga. ⁴ Rü pemaã nüxü chixu i ngẽma ore erü tama chanaxwexe na texé pexü womüxẽëgüxü namaã i tacü rü ore i chixexüwa pexü gagüxü. ⁵ Rü woo na tama ngema petanüwa changẽxmaxü, natürü chauãëwa rü poraãcü pegu charüxĩnü. Rü wüxi i chorü taã nixĩ na nüxü chacuáxü na ñuxãcü meã pegü ipinuxü na meã pegümaã ipecuáxüçèx rü ñuxãcü tama nüxü perüxoexü na Cristuaxü peyaxögüxü.

Ñuxma na Cristuarü ixügüxü rü ngexwacaxüxü i maxü tüxü nangẽxma

⁶ Rü pema ga noxri rü meãma tórü Cori ya Ngechuchu ya Cristuxü peyauxgü. Rü ñuxma rü yema noxri meãma na penayauxgüxürrü rü name nixĩ i guxüguma nüxna penaxã i perü maxü na nüma pexü namaã inacuáxüçèx. ⁷ Rü wüxi i nanetü nanaxwexe i naxchúmèxã na nataixüçèx rü na namaxüxüçèx. Rü ngẽxgumarü ta i pema rü penaxwexe na meã Cristuna peyaxüxgüxü na meã nawa piyaetanüxüçèx rü meã naxcèx pemaxẽxüçèx rü meã nüxü peyaxögüamaxüçèx yema noxri Epáparu pexü ngüexẽëgurü. Rü name nixĩ i guxüguma Tupanana moxẽ pexã. ⁸⁻⁹ Rü naxcèx pexuãëgü i ngẽma duüxügü i pexü womüxẽëgüchaüxü! Rü tama name i nüxü iperüxĩnüë i ngẽma norü ore i tama aixcüma ixixü rü taxuwama mexü. Erü ngẽma duüxügü rü pexü nangüexẽëchaü na nagu pexixüçèx i ngẽma nacümagü ga nuxcümaügüxü ga duüxügü nagu ixü. Rü ñoma i naãneärü nguxẽëtaegü nixĩ i inaxĩnüëxü. Rü tama aixcüma Cristuchiga nixĩ i ngẽma pexü nangüexẽëxü. Rü name nixĩ i nüxna pixĩgachi i guxüma i ngẽma nguxẽëtaeruügü i chixexügü rü Cristuwe perüxĩ. Erü Cristu rü Tupanaxüchi nixĩ rü guxüma i Tupanaärü pora rü Cristuwa nangẽxma. ¹⁰ Rü ñuxmax, rü Tupanaärü maxü rü norü pora rü aixcüma pewa nangẽxma erü namèxwa pengẽxmagü ya Cristu ya namaã icuácü i guxüma i daxüçüãxãrü ãëxgacügü rü guxüma i ngoxogüarü ãëxgacügü. ¹¹ Rü ngẽma Yudiügü rü nügü ínawiehèxmüpèxechiraügü na Tupanapèxewa yamexüçèx. Natürü ngẽxguma Cristuaxü yaxögügu rü tama ngẽmaãcü tamaã nanaxü ya Cristu na imexüçèx. Erü nüma ya Cristu rü tórü maxüwa napuracü rü tüxü ínguxüxèë nawa i taxüneärü ngüchaügü. Rü ngẽmaãcü nixĩ i tüxü yamexẽëxü na Tupanapèxewa imexüçèx. ¹² Rü yexguma ípebaiügu, rü Cristu na itáxürrü yexma natèx ga yema nuxcümaüxü ga perü maxü. Rü yema Cristu na írüdaxürrü rü pema rü ta penayaxu i maxü i ngexwacaxüxü, yerü peyaxögü na Tupana norü poramaã Cristuxü írüdaxẽëxü. ¹³ Rü üpa ga pema rü tama aixcüma pexü nayexma ga maxü i taguma gúxü yerü pepecaduãxgü rü pexeneärü ngüchaü pexügü. Natürü i ñuxma rü Cristuxü namaxẽëxürrü pexü namaxẽëë ya Tupana erü Cristuarü duüxügü pixĩgü. Rü Tupana rü marü Cristugagu tüxü nüxü nangechaü ga guxüma ga tórü pecadugü. ¹⁴ Rü noxri rü tachixe yerü tama aixcüma naga taxĩnüë ga yema mugü ga Moïché tüxna äxü, rü tórü pecadugü rü yuwa tüxü nagagü. Natürü ga Cristu rü curuchagu tórü pecaducèx nayu, rü yemaãcü Tupana tüxü nayangutanüxèë ga yema tórü pecadugü. ¹⁵ Rü yexguma curuchagu nayuxgu ga Cristu, rü yexguma nixĩ ga Chatanáxü naporamaëxü ga Tupana. Rü yexguma nixĩ ga guxü ga duüxügüpèxewa Chatanáxü naxãnexẽëxü ñoma wüxi i churaragüarü ãëxgacü i norü uwanü i nüxü naporamaëxüxü naxãnexẽëxürrü.

Name nixĩ i naxcèx tadaugü i ngẽma mexügü i daxügüxü i naãnewa ngẽxmagüxü

¹⁶ Rü ñuxma rü taxucèxma tüxcüü pexü nixu i ngẽma Yudiügü ega woo tama naxrüü penaxüxgux. Nümagü rü ñuxre i õnagüxicatama nangõxgü, rü ñuxre i axeüxĩcatama nixaxgü, rü ñuxre i petaarü ngunexügü naxauregü na ngẽmaãcü Tupanaxü yacuèxüügüxüçèx. Rü nangẽxma i norü peta i gucü ya taunecügu Tupanacèx naxauregüxü rü togü i petagü i gucü ya tauemacügu naxauregüxü. Rü nüxü nangẽxma i nacümagü na ñuxãcü ngüxchigaarü ngunexügü naxauregüxü. ¹⁷ Rü aixcüma yema nuxcümaügüxü ga Yudiügü rü nanaxauregü ga yema nacümagü yerü ga Cristu rü

tauta ínangu ga yexguma. Natürü i ñuxma rü marü ínangu ya Cristu rü tórü peca-ducèx nayu. Rü ñuxma rü name nixĩ na naga ixĩnũxũ rü tama nagu ixĩxũ i ngẽma nuxcũmaũgũxũ i nacũmagũ. ¹⁸ Rü tãütáma naga pexĩnũẽ i ngẽma duũxũgũ i nüxũ ixugũxũ na ipeyarũtauxexũ ega tama daxũcũāx i orearũ ngeruũgũxũ picuèxũũgũgu! Nũmagũ rü tama nügũ nicuèxũũgũneta rü nügũ nixugũ na yangoxetũgũxũ. Rü noxrũtama cuèxmaāmare nügũ nicuèxũũgũ. ¹⁹ Natürü i nũmagũ rü tama aixcũma naga naxĩnũẽ ya yima taeru ixĩcũ ya Cristu ya tüxũ poraexẽẽcũ rü tüxũ iyaetanũxẽẽcũ i tórü õwa i guxāma i yixema i norũ duũxũgũ ixĩgũxe. Rü nüma ya Cristu nixĩ i wũxigu tüxũ naxĩnũẽxẽxũ i wũxichigũ i yixema ngẽma Tupana naxwèxexũrũ. ²⁰ Rü yexguma nayuxgu ga Cristu rü yexma nayu ga nuxcũmaũxũ ga perũ maxũ, rü yexma nayarũxo ga guxũma ga nuxcũmaũgũxũ ga pecũmagũ i ñoma i naānecũāx i duũxũgũ nagu rüxĩnũẽxũ. Rü ngẽmacèx i ñuxmax ħrũ tüxcũũ nixĩ i ñoma i naānecũāx maxẽxũrũ nagu pemaxẽxũ i pemax, rü tüxcũũ nixĩ i ngẽma Yudũgũcũmagu pexĩxũ? ²¹ Rü nũmagũ i Yudũgũ rü nüxũ nixugũe rü ñanagũrũgũ:

“Tama name i nüxũ quingõgũ i ngẽā, rü tama name i cunangõx i yea, rü tama name i cunayaxu i ngẽma”, ñanagũrũgũ. ²² Natürü guxũma i ngẽma nacũmagũ rü paxa tá inayarũxo erũ duũxũgũarũ nixĩgũ. Rü ngẽma pexũ namuxũ rü duũxũgũarũ mugũmare nixĩ. Rü ngẽma pexũ nangũxẽẽxũ rü duũxũgũarũ nguxẽẽtaemare nixĩ. ²³ Rü guxũma i ngẽma pexũ namuxũ rü pexcèx namexcũraxũ erũ pexũ naxucũxègũ na ħacũ pexauregũxũcèx, rü tama pegũ picuèxũũgũxũcèx, rü meā pexenemaā ipecuèxgũxũcèx. Natürü guxũma i ngẽma mugũ rü tama aixcũma pexũ narũngũxẽẽ na nüxũ perũxoexũcèx i pexeneārũ ngũchaũgũ.

3

¹ Rü ñuxma i pemax, rü Cristu wena maxũxũrũ rü pexũ nangẽxma i maxũ i ngexwacaxũxũ. Rü ngẽmacèx name nixĩ i naxcèx pedau i ngẽma mexũgũ i daxũgũxũ i naānewa ngẽxmaxũ i ngextá Cristu rü Tupanaārũ tũgũnecũwawa írũtoxũwa rü namaā āẽxgacũ íyĩxũwa. ² Rü name nixĩ i guxũguma nagu perũxĩnũẽ i ngẽma daxũgũxũ i naānewa ngẽxmaxũ i ngemaxũgũ rü tama i ngẽma ñoma i naānewa ngẽxmaxũ. ³ Yerũ yexguma nayuxgu ga Cristu rü yexma nayu ta ga nuxcũmaũxũ ga perũ maxũ. Rü ñuxma rü pexũ nangẽxma i perũ maxũ i ngexwacaxũxũ erũ Cristutanũxũ pixĩgũ rü Tupanamẽxẽwa pengẽxmagũ. ⁴ Rü nũmatama ya Cristu nixĩ i pexũ namaxẽxẽxũ. Rü ngẽxguma wena núma nangoxgu, rü namaā tá pengõe, rü naxrũũ tá pimexèchi.

Marũ nüxũ tarũxo i nuxcũmaũxũ i tacũma i chixexũgũ rü tanayaxu i ngexwacaxũxũ i tórũ maxũ

⁵ Rü ñuxma rü name nixĩ i nüxũ perũxoe i guxũma i ñoma i naāneārũ chixexũ i pewa ngẽxmaxũ. Rü tama name i pemèxna naĩ i ngemaā pemaxẽ, rü tama name i petena naĩ ya yatũmaā pemaxẽ. Rü tama name i penaxũ i pexeneārũ ngũchaũ rü bai i nagu perũxĩnũẽmare. Rü tama name i pexũ nangũchaũ i ħacũ rü to i chixexũgũ. Rü tama name i pegũnaxĩcatama penanuxuchigũchaũ i guxũma i ngẽmaxũgũ, erũ yixema ngẽma nacũma tüxũ ngẽxmaxẽ rü dũxwa namaā tatupanaāx. ⁶ Rü guxũma i ngẽma chixexũgũcèx tá nixĩ i Tupana napoxcuexũ i ngẽma duũxũgũ i ngẽmaācũ maxẽxũ rü tama naga ĩnũẽchaũxũ. ⁷ Rü pema ga ũpa rü penaxũ ga yema chixexũgũ, rü yemaācũ pemaxẽ. ⁸ Natürü i ñuxma rü name nixĩ i nüxũ perũxoe i guxũma i ngẽma na pegũchi pexaixũ, rü pegũmaā penuèxũ, rü chixri pemaxẽxũ, rü pegũmaā peguxchigagũxũ, rü guxũma i ngẽma chixexũ i dexa i nüxũ pixuxũ. ⁹ Rü tama name i pegũmaā pidorae, erũ marũ ípenatèx ga nuxcũmaũxũ ga pecũma rü guxũma ga yema chixexũgũ ga ũpa pexũgũxũ. ¹⁰ Rü ñuxma rü marũ penayaxu i ngexwacaxũxũ i perũ maxũ rü ngexwacaxũxũ i duũxũgũ pixĩgũ. Rü guxũ i ngunexũgu rü Tupana pexũ ningexwacaxũxẽẽchigũ na yexeraācũ pimexũcèx naxrũũ rü yexeraācũ nüxũ na pecuèxgũxũcèx ya Tanatũ ya

Tupana ya maxū tūxna ācū. ¹¹ Rū ñuxma rū Tupanacèx rū nüetama nixĩ ega Yudíu quixĩgu rū ěxna tama. Rū nüetama nixĩ ega ícuwiechèx-müpěxechiraūgu rū ěxna tama. Rū nüetama nixĩ ega tacū rū nachiuñanecūāx i duūxū quixĩgu, rū ěxna tacū rū duūxū quixĩgu. Rū nüetama nixĩ ega wūxi i coriarū duūxū quixĩgu, rū ěxna taxúxearūma duūxū quixĩgu. Erū ñuxma rū ngēma guxūārū yexera aixcūma tūxū mexū nixĩ na Cristu rū guxūārū āēxgacū yīxū rū guxāwama nangēxmaxū. ¹² Rū ñuxma ya Tupana rū pexū nangechaū i pema rū pexū nadei na noxrū pixīgūxūcèx. Rū ngēmacèx name nixĩ i guxūguma pexū nangechaūtūmūūgū i togū, rū namaā pemecūmagū, rū tauxchaācūma nūxna penaxā, rū taguma napēxewa pegū picuèxūxūgū. Rū ngēxguma woo tacū pemaā naxūxgux rū name nixĩ i yaxna namaā pexīnūē. ¹³ Rū name nixĩ i wūxichigū i pema na pegūmaā yaxna pexīnūēxū. Rū ngēxguma chi texé tacū pemaā ūxgux, rū name nixĩ i pegūxū nūxū pengechaūgū i ngēma. Rū yexgumarūū ga tórū Cori na pexū nūxū ngechaūxūrūū, rū name nixĩ i togūaxū nūxū pengechaūgū. ¹⁴ Rū guxūārū yexera mexū nixĩ na pegū pengechaūgūxū. Erū ngēxguma aixcūma pegū pengechaūgūgu rū aixcūma wūxigu tá perūxīnūē, rū meā pegūmaā tá pemaxē. ¹⁵ Rū name nixĩ na pemaā inacuāxū i ngēma taāē i Cristu pexna āxū na ngēmaācū aixcūma pegū pengechaūgūxūcèx. Yerū yemacèx nixĩ ga Tupana pexū dexū na wūxitama i duūxūgū pixīgūxūcèx rū meā wūxigu perūxīnūēxūcèx. Rū name nixĩ i moxē nūxna pexāgū ya Tupana. ¹⁶ Rū name nixĩ i guxūguma peāēwa nangēxma i Cristuarū ore rū taāēācūma naga pexīnūē. Rū name nixĩ i meā peāēxū pecuāācūma namaā pegū pengūexēē rū pegū pixucūxēgū na ngēmaācū pegūaxū penangūchaūxēēxūcèx. Rū name nixĩ i aixcūma Tupanana moxē pexāgūācūma naga pewiyaegū i nagūxūraūxū i norū wiyaegū. ¹⁷ Rū guxūma i ngēma pexūxū rū nūxū pixuxū rū name nixĩ i tórū Cori ya Ngechuchuégagu penaxū. Rū name nixĩ i ngēmaācū Ngechuchuégagu Tanatū ya Tupanana moxē pexāgū.

Tupana nanaxwèxe na meā namaxēxū i duūxūgū i Cristuaxū yaxōgūxū

¹⁸ Pa Ngexūgū i Ātegūxūx, rū name nixĩ i petega pexīnūē. Erū woetama ngēma nixĩ i mexū na penaxūxū erū tórū Cori ya Cristuarū duūxūgū pixīgū. ¹⁹ Pa Yatūgū i Āmaxgūxūx, rū name nixĩ i ngīxū pengechaūgū i pemèxgū. Rū tama name na ngīmaā pechixecūmagūxū. ²⁰ Pa Buxūgūx, rū name nixĩ i guxūwama penatū rū peega pexīnūē, erū ngēma nixĩ i namaā nataāēxū ya tórū Cori. ²¹ Pa Papāgūx, rū tama name i penanuēxēē i pexacūgū. Erū ngēxguma ngēmaācū penaxūxgux rū ngūrūāchi tá nūxū nawèxtūmūū i ngēma namaā nūxū pixuxū. ²² Pa Duūxūgūx i Ixāārū Coriāxgūxūx, rū name nixĩ i guxūwama naga pexīnūē i perū corigū i ñoma i naānewa pemaā icuèxgūxū. Rū tama name i pexū nadaugūguxicatama meā pepuracūe na ngēmaācū penataāēxēēxūcèx. Natūrū name nixĩ i mexū i perū ngūchaūmaā guxūguma meā pepuracūe erū tórū Corixū pemuē. ²³ Rū guxūma i ngēma perū puracū i pexūxūwa rū name nixĩ i perū ngūchaūmaā penaxū ñoma tórū Cori ya Cristuaxū pepuracūexūrūū rū tama i duūxūgūaxū. ²⁴ Rū marū nūxū pecuèx rū daxūgūxū i naānewa rū tórū Cori ya Cristu tá pexna nanaxā i perū āmare i maxū i taguma gūxū. Erū yima Cristu ya aixcūma perū Cori ixīcūaxū nixĩ i pepuracūexū. ²⁵ Natūrū yīxema chixexū ūxe rū tá ta tanayaxu i tūmaārū natanū naxcèx i ngēma chixexū i taxūxū, rū aixcūma Tupana tá tūxū napoxcu. Erū Tupanapēxewa rū guxūma i duūxūgū rū nawūxigu, rū taxucūrūwama texé Tupanachèxwa tiña ega chixexū taxūxgux.

4

¹ Rū pemax, Pa Corigūx, rū name nixĩ i perū duūxūgūmaā pemecūmagūxū, rū tama penawomūxēēxū. ¡Rū nūxna pecuèxāchie na pema rū ta pexū nangēxmaxū ya perū Cori ya daxūgucū! ² ¡Rū guxūguma peyumūxēgū, rū pexuāēgū na tama chixexūgu peyixūcèx! ¡Rū Tupanana moxē pexāgū! ³ ¡Rū toxcèx rū ta peyumūxēgū na Tupana

toxŭ natauxchaxēēxŭcèx na nŭxŭ tixuxŭcèx i norŭ ore i mexŭ, rŭ meãma duŭxŭgŭmã nŭxŭ tixuxŭcèx i ngēma ore ga noxri tama nŭxŭ nacuèxgŭxŭ i Cristuchiga! Rŭ ngēma ore cèx nixŭ i ñuxma ichapoxcuxŭ. ⁴ Rŭ chanaxwèxe i chauxcèx peyumŭxēgŭ na meã duŭxŭgŭcèx chanangoxēēxŭ i ngēma ore, erŭ ngēma nixŭ i mexŭ na chanaxŭxŭ. ⁵ ;Rŭ meã pemaxē napēxewa i ngēma duŭxŭgŭ i tama yaxōgŭxŭ! ;Rŭ ñuxma na pexŭ natauxchaxŭ, rŭ yoxni paxa penaxŭx i Tupanaãrŭ puracŭ! ;Rŭ taxŭ i perŭchomarexŭ! ⁶ Rŭ ngexguma togŭ i duŭxŭgŭmã pidexagŭgu, rŭ name nixŭ i penataãēxēē namaã i ngema dexa i namaã nŭxŭ pixuxŭ. ;Rŭ ngemaãcŭ mea penangaxŭ i ngema pexna cèxŭ nachiga i perŭ ò!.

Pauru nanaguxēē ga norŭ popera rŭ wenaxãrŭ yema duŭxŭgŭxŭ narŭmoxē

⁷ Rŭ nŭma ya taeneē ya Tíquicu ya nŭxŭ ingechaŭgŭcŭ rŭ aixcŭma choxŭ narŭngŭxēē rŭ wŭxigu chomaã Cori ya Tupanacèx napuracŭ. Rŭ nŭma tá pemaã nŭxŭ nixu i chauchiga. ⁸ Rŭ ñuxma rŭ petanŭwa chanamu na pexŭ nataãēxēēxŭcèx rŭ pemaã nŭxŭ yaxuxŭcèx na ñuxãcŭ toxŭ nangupetŭxŭ i tomax. ⁹ Rŭ Tíquicumaã petanŭwa chanamu i Onéchimu ya taeneē ya nŭxŭ ingechaŭgŭcŭ ya aixcŭma meã Tupanaãrŭ puracŭ ŭcŭ. Rŭ nŭma rŭ petanŭxŭ nixŭ. Rŭ nŭmagŭ tá nixŭ i pemaã nŭxŭ yaxugŭxŭ na tacŭ ngupetŭxŭ i nŭma. ¹⁰ Rŭ pexŭ narŭmoxē i Aritácu i wŭxigu chomaã poxcuxŭ. Rŭ ngēxgumarŭŭ ta pexŭ narŭmoxē i Marcu i Bernabéeneē ixŭxŭ. Rŭ marŭ pemaã nŭxŭ chixu i Marcuchiga na meã penayauxgŭxŭcèx i ngēxguma petanŭwa nanguxgu. ¹¹ Rŭ ngēxgumarŭŭ ta pexŭ narŭmoxē ya taeneē ya Ngechuchu ya Ixaixcŭmacŭgu ãegacŭ. Rŭ ngēma tomaēxpŭx i yatŭgŭ rŭ ngēxŭcatama nixŭ i Yudiŭgŭ i yaxōgŭxŭ i wŭxigu chomaã puracŭexŭ i Tupanaãrŭ puracŭwa. Rŭ nŭmagŭ rŭ poraãcŭ choxŭ nataãēxēēgŭ. ¹² Rŭ ngēxgumarŭŭ ta pexŭ narŭmoxē i Epáparu. Rŭ nŭma rŭ petanŭxŭ nixŭ, rŭ aixcŭma nanaxŭ i Cristuarŭ puracŭ. Rŭ nŭma rŭ norŭ yumŭxēwa rŭ guxŭguma Tupanaxŭ nacèèxŭ pexcèx na aixcŭma meã pemaxēxŭcèx rŭ peyaxōgŭamaxŭcèx rŭ aixcŭma penaxŭxŭcèx i ngēma Tupana naxwèxexŭ. ¹³ Rŭ choma rŭ marŭ nŭxŭ chadau rŭ pemaã nŭxŭ chixu i ñuxãcŭ Epáparu poraãcŭ pexcèx napuracŭ rŭ naxcèx napuracŭ i ngēma taeneēgŭ i Laodichéaarŭ ñãnewa rŭ Iráporiarŭ ñãnewa ngēxmagŭxŭ. ¹⁴ Rŭ Luca ya duturu ixŭcŭ ya nŭxŭ ingechaŭgŭcŭ, rŭ pexŭ narŭmoxē. Rŭ ngēxgumarŭŭ ta pexŭ narŭmoxē i Dema. ¹⁵ ;Rŭ chauégagu nŭxŭ perŭmoxēgŭ i taeneēgŭ i Laodichéawa ngēxmagŭxŭ! ;Rŭ ngēxgumarŭŭ ta nŭxŭ perŭmoxēgŭ i Nifa rŭ guxŭma i taeneēgŭ i yaxōgŭxŭ i napatawa ngutaquēxegŭxŭ! ¹⁶ Rŭ ngēxguma marŭ nŭxŭ pedamatŭguwena i ñãã popera, rŭ chanaxwèxe i Laodichéawa penamu na ngemacŭãx i taeneēgŭ rŭ ta nŭxŭ nadaumatŭgŭxŭcèx. Rŭ ngēxgumarŭŭ ta i ngēma popera i Laodichéawa chamuxŭ, rŭ ngēxguma pexŭtawa nanguxgu rŭ chanaxwèxe i nŭxŭ pedamatŭgŭ. ¹⁷ Rŭ chanaxwèxe i Ariquípumaã nŭxŭ pixu, rŭ ñapegŭgŭ nŭxŭ:

“;Rŭ meã napuracŭ rŭ yanguxēē i ngēma puracŭ i tórŭ Cori cuxna ãxŭ!” ñapegŭgŭ nŭxŭ. ¹⁸ Choma i Pauru rŭ choxmēxmaãtama pexcèx chanaxŭmatŭ i ñãã chorŭ moxē. ;Rŭ nŭxna pecuèxãchie na chapoxcuxŭ! Rŭ chanaxwèxe i Tupana pexŭ narŭngŭxēē.

Rŭ nuãma pexna,
Pauru

NÜXĪRAÜXÜ GA POPERA GA TECHARÓNICAWA YEXMAGÜXÜ GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Techarónicawa yexmagüxü

¹ Pa Toeneēgü i Techarónicawa Ngēxmagüxü i Tanatü ya Tupana rü Tórü Cori ya Ngechuchu ya Cristuarü Duüxügü Ixīgüxüx, choma i Pauru rü namaã i taeneē i Chiribánu rü Timutéu nixi i pexcèx tanaxümatüxü i ñaã popera. Rü tanaxwèxe i Tanatü ya Tupana rü tórü Cori ya Ngechuchu ya Cristu pexü narüngüxēē rü pexü nataãēxēē.

Meãma nayaxōgü ga yema Techarónicawa yexmagüxü rü yemaãcü wüxi ga cuèxruü ga mexü nixīgü

² Rü torü yumüxēwa rü guxüguma pexna tacuèxāchigü, rü pexcèx Tupanana moxē taxã. ³ Rü guxüguma i ngēxguma Tanatü ya Tupanamaã tidexagügu, rü taguma nüxü itayarüngümaē na ñuxācü meã peyaxōgüācüma penaxüxü i Tupanaärü puracü, rü ñuxācü nüxü pengechaügüācüma togüxü perüngüxēēxü. Rü taguma nüxü itayarüngümaē na ñuxācü aixcüma meã ípenanguxēēxü ya tórü Cori ya Ngechuchu ya Cristu rü ngēmacèx yaxna namaã pexīnūē i ngēma ngúxü i ñuxma pingexü. ⁴ Pa Chaueneēgüx, Tupana pexü nangechaü, rü nüxü tacuèx rü nümatama nixi ga pexü nadexü. ⁵ Rü yexguma pemaã nüxü tixuxgu ga Tupanaärü ore i tüxü maxēxēēxü, rü tama toechama tidexagümare, yerü Tupanaãē i Üünexü toxü narüngüxēē na norü poramaã pemaã nüxü tixuxü. Rü meã nüxü tacuāācüma pemaã nüxü tixu ga yema ore yerü toēwatama nüxü tacuèx na aixcüma yīxü. Rü pematama nüxü pecuèx ga ñuxācü meã pepēxewa na tamaxēxü ga yexguma na yemaãcü pexü tarüngüxēēgüxüçèx. ⁶ Rü pema rü meãma penaxügü ga yema pexü tangúexēēxü rü yema tüxü nangúexēēxü ga tórü Cori ya Ngechuchu. Rü Tupanaãē i Üünexü pexü taāēxēēācüma penayauxgü ga yema ore ga woo yemacèx poraãcü ngúxü na pingegüxü. ⁷ Rü yemaãcü ga pema rü wüxi ga cuèxruü ga mexü pixīgü naxcèx ga guxüma ga yema yaxōgüxü ga Machedóniãñewa rü Acayaanewa yexmagüxü. ⁸ Rü yema na peyaxōgüxügagu rü tórü Cori ya Ngechuchuarü ore rü guxüwama ninguchigü. Rü ngēmacèx i ñuxma rü Machedóniãñewa rü Acayaanewa rü guxüwama nüxü nacuèxgü na ñuxācü meã Tupanaaxü peyaxōgüxü. Rü ngēmacèx marü taxucèxma tüxcüü i toma rü namaã nüxü tixu i ngēma ore i mexü i pechiga. ⁹ Erü nümagütama i ngēma duüxügü rü marü nüxü nixugügü ga ñuxācü ga pema rü meã toxü na peyaxgüxü ga yexguma petanüwa taxixgu. Rü nüxü nixugügü ta ga ñuxācü nüxü na perüxoexü ga perü tupananchicünèxägü na Tupanaxüchi ya maxücü rü ixaixcümacüwe perüixüçèx rü nüxü pepuracüexüçèx. ¹⁰ Rü nüxü nixugügü ta na ñuxācü aixcüma ípenanguxēēxü na wenaxärü daxüwa ne naxüxü ya Ngechuchu ya Tupana Nane ga yuwa ínadaxēēācü. Rü yima Ngechuchu nixi ya tüxü ínguxüxēēcü nüxna i ngēma poxcu i āücümaxü tá ínguxü.

2

Pauruarü puracü ga Techarónicawa

¹ Pa Chaueneēgüx, rü pematama nüxü pecuèx rü tama natüçèxmamare nixi na pexütawa taxixü. ² Rü pema nüxü pecuèx rü naxüpa ga pexütawa na tangugüxü rü chixri tomaã nachopetü ga Pirípucüāxgü rü tomaã naguxchigagü. Natürü Tupana toxü narüngüxēē na pemaã nüxü tixuxüçèx ga norü ore i tüxü maxēxēēxü. Rü yemacèx tama tamuñēācüma pemaã nüxü tixu ga yema ore woo ga torü uwanügü rü poraãcü

toxŭ na naguxchaxēēgŭāxŭ. ³ Rŭ yexguma pemaā nŭxŭ tixuxgu ga yema ore, rŭ tama itatŭeācŭma pemaā nŭxŭ tixu. Rŭ tama chixexŭ pemaā taxŭgŭchaŭācŭma rŭ tama pexŭ tawomŭxēēgŭchaŭācŭma pemaā nŭxŭ tixu ga yema ore. ⁴ Yerŭ Tupana nixŭ ga toxŭ unetacŭ rŭ toxŭ mucŭ na pemaā nŭxŭ tixuxŭcèx ga norŭ ore i mexŭ i tŭxŭ maxēxēēxŭ. Rŭ yemacèx Tupana naxwèxexŭācŭma pemaā nŭxŭ tixu ga yema ore. Rŭ tama duŭxŭgŭxŭmare na tataāxēēgŭxŭcèx pemaā nŭxŭ tixu, natŭrŭ nŭxŭ tixu na Tupanaxŭ tataāxēēgŭxŭcèx. Rŭ nŭma ya Tupana nixŭ i tŭxŭ nacuáxŭ rŭ tŭxŭ nadauxŭ rŭ nangugŭāxŭ i ngēma nagu rŭxŭnŭēxŭ. ⁵ Rŭ pema nŭxŭ pecuèx rŭ taguma pepèxewa pexŭ ticuèxŭgŭ na toga pexŭnŭēxŭcèx, rŭ taguma pexŭ tawomŭxēēgŭ na ngŭxŭ tayauxgŭxŭcèx ga perŭ dŭēru. Rŭ Tupana nixŭ ya toxŭ daucŭ na taguma yemaācŭ na tanaxŭxŭ. ⁶ Rŭ taguma naxcèx tadaugŭ na duŭxŭgŭ toxŭ icuèxŭgŭxŭcèx, rŭ woo i pema rŭ bai i togŭ i duŭxŭgŭ. ⁷ Rŭ woo Cristutama toxŭ namu na yaxōgŭxŭārŭ āēxgacŭgŭ na tixŭgŭxŭ natŭrŭ tama ņoma wŭxi ga āēxgacŭrŭŭ pepewa tixŭgŭ. Natŭrŭ meāmare pemaā itacuèx, ņoma wŭxi i mamá i ngŭxŭcŭgŭna meā dèuxcŭrŭŭ pemaā tixŭgŭ. ⁸ Rŭ poraācŭ pexŭ tangechaŭ, rŭ yemacèx pemaā nŭxŭ tixu ga Tupanaārŭ ore. Rŭ tama yemaxicatama pexna taxāxchaŭ ga yexguma. Natŭrŭ marŭ itamemare ta ga pexcèx na tayuexŭ, yerŭ poraācŭ pexŭ tangechaŭgŭ. ⁹ Pa Chaueneēgŭx, pema nŭxŭ pecuèx ga ņuxācŭ poraācŭ na tapuracŭexŭ na torŭ ōnacèx tataxegŭxŭcèx. Rŭ ngunecŭ rŭ woo chŭtacŭ tapuracŭe na taxŭeaxŭma wŭxi ga guxchaxŭ tixŭgŭxŭcèx ga yexguma petanŭwa tayexmagŭgu rŭ pemaā nŭxŭ tixuxgu ga Tupanaārŭ ore. ¹⁰ Pa Duŭxŭgŭ i Tupanaāxŭ Yaxōgŭxŭ, pema nixŭ ga toxŭ pedaugŭxŭ rŭ Tupana rŭ ta toxŭ nadau ga ņuxācŭ meā na tamaxēxŭ ga petanŭwa, rŭ ņuxācŭ taxuŭma ga chixexŭ na taxŭxŭ ga yexguma. ¹¹ Rŭ pema nŭxŭ pecuèx ta ga ņuxācŭ pexŭ na tanangŭchaŭxēēxŭ. Rŭ yexguma pengechaŭgŭgu, rŭ pexŭ tataāxēēgŭ ņoma wŭxi i papá i naxācŭgŭxŭ taāxēēgŭxŭrŭŭ. ¹² Rŭ ņuxma na Tupanaārŭ pixŭgŭxŭ, rŭ pexŭ taxucŭxēgŭ na meā naxcèx pemaxēxŭ. Rŭ nŭma nixŭ i pexcèx nangemaxŭ na ngextá āēxgacŭ íyŭxŭwa pengugŭxŭcèx na ngema mexŭwa pengēxmagŭxŭcèx. ¹³ Rŭ ngēmacèx guxŭguma pexcèx Tupanana moxē taxā, yerŭ yexguma noxri nŭxŭ pexŭnŭēgŭ ga yema norŭ ore ga pemaā nŭxŭ tixuxŭ, rŭ meā penayauxgŭ, yerŭ nŭxŭ pecuèxgŭ rŭ aixcŭma Tupanaārŭ ore nixŭ rŭ tama duŭxŭgŭarŭ oremare nixŭ. Rŭ yema ore nixŭ ga naxŭchicŭxŭ ga perŭ maxŭ ga yexguma peyaxōgŭgu. ¹⁴ Pa Chaueneēgŭx, nŭxŭ tacuèx na ņuxācŭ ngŭxŭ pingegŭxŭ yerŭ petanŭxŭgŭtama pexchi naxaie rŭ chixri pemaā nachopetŭ. Natŭrŭ yemaācŭtama nŭxŭ nangupetŭ ga Tupanaārŭ duŭxŭgŭ ga Ngechuchu ya Cristuaxŭ yaxōgŭxŭ ga Yudéaanewa yexmagŭxŭ. Yerŭ natanŭxŭgŭtama ga Yudŭgŭ rŭ chixri namaā nachopetŭ. ¹⁵ Rŭ yema Yudŭgŭ nixŭ ga tórŭ Cori ga Ngechuchuxŭ imèxgŭxŭ, yexgumarŭŭ ga norŭ oxigŭ rŭ nuxcŭmaŭgŭxŭ ga Tupanaārŭ orearŭ uruŭgŭxŭ na nadèixŭrŭŭ. Rŭ yema Yudŭgŭ nixŭ ga towe ingēxŭtanŭxŭ. Rŭ Tupanamaā rŭ guxŭ i duŭxŭgŭmaā narŭxuwangŭ. ¹⁶ Rŭ ngēxguma ngēma duŭxŭgŭ i tama Yudŭgŭ íxŭgŭxŭmaā nŭxŭ tixuxchaŭgu i Tupanaārŭ ore na nŭmagŭ rŭ ta nŭxŭ nangēxmagŭxŭcèx i maxŭ, rŭ ngēma Yudŭgŭ rŭ toxna nanachuxu. Rŭ ngēmaācŭ i ngēma Yudŭgŭ rŭ poraācŭxŭchima chixexŭ naxŭgŭ. Rŭ ngēmacèx i ņuxma rŭ dŭxwa marŭ nŭxna nangu i ngēma Tupanaārŭ poxcu i āŭcŭmaxŭchixŭ.

Pauru rŭ nŭxŭ nangŭchaŭ na wenaxārŭ natanŭwa naxŭxŭ ga yema yaxōgŭxŭ ga Techarónicawa

yexmagŭxŭ

¹⁷ Pa Chaueneēgŭx, yexguma pexna ítixŭxguwena, rŭ woo tama pexŭtawa na tayexmagŭechaxŭ, natŭrŭ guxŭguma pegu tarŭxŭnŭē, rŭ poraācŭ toxŭ nangŭchaŭ na pexŭtawa taxŭxŭ na wenaxārŭ pexŭ ítayadaugŭxŭcèx. ¹⁸ Rŭ aixcŭma ngema taxŭxchaŭ. Rŭ chomatama i muēxpŭxcŭna rŭ chanaxwèxe na ngema pexŭtawa taèx chaxŭŭxŭegaxŭ natŭrŭ ngoxo i Chataná rŭ guxŭguma toxŭ nanaguxchaxēē na tama ngema taxŭxŭcèx.

¹⁹ Natürü pexü ítayadaugüchaũãma erü ngëxguma wenaxãrũ núma naxũxgu ya tórü Cori ya Ngechuchu ya Cristu rü çtècücèx tá nixĩ i Tupanapëxewa tataãëgüxũ i tomax? Rũ aixcũma pewa tá nixĩ i ítananguxëëxũ na tomaã nataãëxũ ya Tupana. Rũ pema tá nixĩ i torü taãë pixĩgüxũ. Rũ pegagu tá nixĩ i aixcũma togũmaãtama tataãëgüxũ i napëxewa.

²⁰ Rũ ngëmaãcü pegagu nixĩ i togũmaãtama tataãëgüxũ, rü pema nixĩ i torü taãë pixĩgüxũ.

3

¹ Rũ yema na taxuacũma ñuxãcü wenaxãrũ petanũwa na chaxũxũ, rü düxwa nagu charüxĩnũ na Atenagutama na charüxãũxũ. ²⁻³ Rũ pexütawa chanamu ga taeneë ga Timutéu na pexü iyadauxüçèx. Erü nüma nixĩ i Tupanaãrũ puracütanũxũ i wüxigu namaã tapuracüexũ na tanaxunagüxüçèx i ngëma ore i mexü i Cristuchiga. Rũ ngema petanũwa chanamu na pexü nangüxëëxüçèx na yexeraãcü peyaxögüxüçèx rü aixcũma petaãëgüxüçèx rü ngëmaãcü taguma texé i petanũwa nüxũ rüxoxüçèx ega tacü rü guxchaxũ pexü ngëxmagu. Erü pematama marü nüxũ pecuèx na guxãma i yixema na yaxögüxũ rü ngüxũ tá tingegü. ⁴ Rũ yexguma petanũwa tayexmagügu rü marü pemaã nüxũ tixu na ngüxũ tá pexü üpetüxũ. Rũ pema marü nüxũ pecuèx na aixcũma yemaãcü pexü nangupetüxũ. ⁵ Rũ yemacèx ga yexguma marü tama namaã chaporagu ga yema tama paxa pechigaxũ na chacuáxũ, rü yemacèx düxwa Timutéuxũ yéma petanũwa chamu na pexna yaçaxüçèx ngoxi meã ípeyaxögüama i Tupanaãrũ ore. Yerü chaxoegaãë rü bexmana ngoxo i Chataná rü chixexügu pexü nayixëë, rü chi ngëmaãcü yixĩgu, rü natüçèxmamare chi nixĩ ga pemaã nüxũ tixuxũ ga Tupanaãrũ ore. ⁶ Natürü ñuxma na ínanguxũ i Timutéu na petanũwa ne naxũxũ, rü mexü i ore i pechiga ngema ne nange. Rũ tomaã nüxũ nixu na ñuxãcü meã peyaxögüxũ, rü ñuxãcü guxãma meã pegü pengechaũgüxũ. Rũ tomaã nüxũ nixu ta na ñuxãcü guxüguma toxũ pengechaũgüãcüma togu perüxĩnũëxũ, rü ñuxãcü poraãcü wena toxũ pedaugüchaũxũ rü ngexgumarüxũ ta i toma rü toxũ nangüchaũ na wena pexü tadaugüchaũxũ. ⁷ Rũ ngëmacèx, Pa Chaueneëgüx, rü woo guxchaxũ toxũ na ngëxmaxũ rü ngüxũ na tingegüxũ, rü poraãcü toxũ nataãëxëë i ngëma pexü na tacuáchigaxũ na meã ípemaxëxũ rü meã peyaxögüamaxũ. ⁸ Rũ ñuxma na nüxũ tacuáchigaxũ na aixcũma meã tórü Coriaxũ peyaxögüamaxũ, rü poraãcü tataãëgü. ⁹ ¿Rü ñuxãcü tá Tupanana moxë taxã naxcèx i ngëma taãë i taxũ i toxna pexãxũ? Erü aixcũma pegagu nixĩ i toxũ nangëxmaxũ i wüxi i taãë i taxũ i napëxewa. ¹⁰ Rũ ngunecü rü chütacü rü tayumüxëgü, rü Tupanana naxcèx tacagü na petanũwa toxũ nawoeguxëëxüçèx na wena pexü tadaugüxüçèx rü pexü tarüngüxëëgüxüçèx na yexeraãcü nüxũ peyaxögüxüçèx. ¹¹ Rũ poraãcü tanaxwëxegü na Tanatü ya Tupana rü tórü Cori ya Ngechuchu ya Cristu toxũ natauxchaxëëxũ na wena petanũwa ítayadaugüxüçèx. ¹² Rũ tanaxwëxegü na tórü Cori ya Ngechuchu pexü rüngüxëëxũ na yexeraãcü pegü pengechaũgüxüçèx rü guxü i duüxügüxũ na pengechaũgüxüçèx, ngëxgumarüü i toma rü poraãcü pexü na tangechaũgüxürüü. ¹³ Rũ tanaxwëxegü na tórü Cori ya Ngechuchu pexü rüngüxëëxũ na peãëwa rü aixcũma meã peyaxögüxüçèx rü norü duüxügü i aixcũma mexügü na pixĩgüxüçèx rü na nataxuxüçèx i perü pepadugü i napëxewa ya Tanatü ya Tupana i ngëxguma wena núma naxũxgu ya tórü Cori ya Ngechuchu ya Cristu namaã i guxũma i norü duüxügü. Rũ tanaxwëxe na ngëmaãcü yĩixũ.

4

Maxü i Tupanaxü taãëxëëxüchiga

¹ Rũ ñuxma Pa Chaueneëgüx, rü tórü Cori ya Ngechuchuégagu pexü tacèxũ rü pexü tamu na guxüguma Tupanacèx meã pemaxëxũ yema pexü tangüxëëxürüü rü ñuxma marü penaxüxürüü. ² Pema rü marü nüxũ pecuèx ga yema torü ucuxëgü ga tórü Cori ya Ngechuchu toxũ muxü na pexü tangüxëëxüçèx. ³ Rũ Tupana nanaxwëxe na aixcũma namexü i perü maxü rü naxcèxicatama na pemaxëxũ. Rũ tama name i chixri pemaxë

i napēxewa rü to i ngexüğümaã pengēãēgūmare. ⁴ Rü wüxichigü tanaxwèxe na aixcüma tümamèxü tangechaüxü, rü ngīmaãxīcatama na tamaxüxü. ⁵ Rü tama name i ngīxü na pecuáxchaūmarexüçèx ngīmaã pexāmèx i wüxi i nge erü ngēmaãcü namaxē i ngēma duüxüğü i tama Tupanaãxü yaxögüxü. ⁶ Rü tama name i texé ngīmaã tamaxü i naxmèx ya tümaēneē. Erü yexgumarüü ga marü pemaã nüxü tixuxürüü, rü Tupana tá poraãcü tüxü napoxcu ya guxāma ya yíxema ngēmaãcü maxēxē. ⁷ Erü Tupana tüxü nade na meã imaxēxüçèx rü tama chixexü ixügüxüçèx. ⁸ Rü ngēmacèx ega texé tama naga ĩnügu i ñã nguxēētaegü, rü pemaã nüxü chixu rü tama wüxi i duüxüga nixī i ngēma nüxü taxoxü, natürü Tupanagatama nixī i nüxü taxoxü. Rü guma nixī ga pexna namucü ga Naãē i Üünexü. ⁹ Rü ngēma na pegü pengechaüğüxüchiga, rü taxucèxma pexcèx chanaxümatü i poperawa. Yerü Tupanatama marü pexü nangüexēē i ngēma na ñuxäcü aixcüma pegü pengechaüğüxü. ¹⁰ Rü aixcüma nixī i guxüğüma meã nüxü pengechaüğüxü i guxüma i taeneēgü i Machedóniãñewa ngēxmagüxü. Natürü, Pa Toeneēgüx, pexü tacèxüğü na yexeraãcü meã nüxü pengechaüğüxüçèx. ¹¹ ¡Rü meã pegü pengechaüğü, rü pexrütama maxügu perüxñüē, rü tama i togüarü maxügu! ¡Rü pematama naxcèx pepuracüe i perü ngēmaxüğü yema marü pemaã nüxü tixuxürüü! ¹² Rü ngēxguma ngēmaãcü pemaxēgu, rü ngēma duüxüğü i tama yaxögüxü rü tá pexü nangechaüğü, rü taxuütama pexü nataxu.

Ñuxäcü tá nixī i ngēxguma nataegugu ya tórü Cori

¹³ Pa Chaueneēgüx, rü ñuxma rü tá pexü nüxü chacuèxēē i ngexta tá naxixü i ngema yaxögüxü i yuexü na ngemaãcü tama pengechaüğüxüçèx naxruxü i ngema tama nüxü cuèxgüxü na wena tá namaxèxü i ngema yuexü. ¹⁴ Erü yixema na yaxögüxü na nayuxü rü wena namaxüxü ga Ngechuchu, rü ngēxgumarüü ta tayaxögü na Tupana tá ĩnadagüxēxü i guxüma i ngēma Ngechuchuaxü yaxögüäcüma yuexü. ¹⁵ Rü ngēmacèx pemaã nüxü tixu i ngēma ore ga tórü Cori ya Ngechuchu namaã nguxēētaexü. Rü ngēxguma wena núma naxüxgu ya tórü Cori ya Ngechuchu rü yixema na imaxèxü i ñoma i nañewa rü täütama yixira napèxe taxī i ngēma yuexü. ¹⁶ Erü nümatama ya Cori ya Ngechuchu rü daxüwa tá ĩnarüxī, rü tá nangēxma i wüxi i naga i taxü i daxüwa inaxüxü i tüxü muxü, rü tá nüxü taxīñüē i Tupanaärü orearü ngeruüğüarü äëxgacü i tagaãcü daxüwa icagüxü, rü tá yacuegüxü ya Tupanaärü corneta. Rü ngēxguma i ngēma yuexü i Cristuaxü yaxögüxü rü tá ĩnarüdagü. ¹⁷ Rü ngēmawena i yixema na imaxèxü rü Tupana tá wüxigu caixanexügu tüxü nigagü namaã i ngēma duüxüğü i yuwa írüdagüxü. Rü ngēmaãcü tá daxügu tórü Cori ya Ngechuchuxü tayangaugü na guxügutama naxütawa ingēxmagüxüçèx. ¹⁸ Rü ngēmacèx chanaxwèxe i ñã oremaã pegü petaãëxēēgü.

5

¹ Natürü, Pa Chaueneēgüx, rü ngēma norü ngunexü rü taunecü i tá nagu nangupetüxü i ngēma pemaã nüxü chixuxü, rü taxucèxma pexcèx chanaxümatü i ngēmachiga. ² Erü pematama meã nüxü pecuèx rü ngēma ngunexü i taxüema nagu ĩnanguxēēxügu tá nixī i ĩnanguxü ya tórü Cori ya Ngechuchu. Rü ñoma wüxi i ngītèxáxü i ngürüächi chütacü ĩnguxürüü tá nixī. ³ Rü ngēxguma duüxüğü nagu írüxñüēgu na guxüma na mexü rü taxuüma na nüxü üpetüxü, rü ngēma ngunexüğügu rü tá ngürüächi nagux i guxüma. Rü ñoma wüxi i ngecü i äxäcücü rü ngürüächi ngīxäcümaã nguxnecacürüü tá nixī na taxüema naxchaxwa ĩñaxü i ngēma. ⁴ Natürü pemax, Pa Chaueneēgüx, rü marü meãma nüxü pecuèx i Cristuarü nguchiga. Rü ngēmacèx taxucèxma ngürüächi pexü ĩnayabaixgü ya Cori ya Ngechuchu ñoma wüxi i ngītèxáxü tüxü ĩbaixgüxürüü. ⁵ Erü guxāma i pema rü Tupanaärü duüxüğü pixīgü, rü ngēmacèx ngóonexüwa pengēxmagü rü meãma nüxü pecuèx na ñuxäcü meã pemaxèxü. Rü yixema rü tama Chatanáärü duüxüğü tixīgü, rü ngēmacèx tama ēänexüwa tangēxmagü rü tama tanaxü i ngēma chixexü i ēänexüwa üxü. ⁶ Rü ngēmacèx tama name i taechita tamaxēmare naxrüü i ngēma duüxüğü i tama

yaxōgūxū. Rū name nixī i taxuāēgū, rū meā taāēgu tarūxīnūē. ⁷ Erū ngēma duūxūgū i naēchitamare maxēxū rū ñoma duūxūgū i chūtacū peexūrū nixīgū. Rū ngēma duūxūgū i axegūxū rū chūtacū nixī i nūgū nangāxēxēxū. ⁸ Natūrū i yixema rū ngóonexūwa tangēxmagū, rū ngēmacèx tanaxwèxe i guxūguma taxuāēgū. Rū name nixī i aixcūma meā Tupanaāxū tayaxōgū, rū yigū tangechaūgū, rū meā ítananguxēē na Tupana tūxna naxāxūcèx i ngēma maxū i taguma gūxū. Rū ngēxguma ngēmaācū imaxēgu, rū ngēmaācū tá yigū ítapoxū i ngēxguma Chataná chixexūgu tūxū yixēēchaūgu. ⁹ Erū Tupana rū tama tūxū nade na tūxū napoxcuexūcèx, natūrū tūxū nade na tórū Cori ya Ngechuchu ya Cristugagu nayauxgūxūcèx i maxū i taguma gūxū. ¹⁰ Rū Ngechuchu ya Cristu rū taxcèx nayu na wūxigu namaā imaxēxūcèx i daxūguxū i naānewa. Rū nūetama ega woo marū iyuyane ínanguxgu rū ēxna imaxēyane ínanguxgu, erū daxūguxū i naānewa rū wūxiwa tá namaā tamaxē. ¹¹ Rū ngēmacèx, Pa Chaueneēgūx, rū name nixī i wūxichigū pegū petaāxēēgū rū pegū peporaexēē i perū ōwa ngēxgumarū i ñuxma na marū ípenaxūgūxū.

Pauru rū nayaxucūxēgū ga yema yaxōgūxū

¹² Pa Chaueneēgūx, pexū tacèxūgū na nūxū pengechaūgūxūcèx i ngēma taeneēgū i petanūwa puracūexū rū pemaā icuèxgūxū rū pexū ngúxēēxū i Cori ya Ngechuchuarū ore. ¹³ Rū name nixī i namaā petaāēgū rū aixcūma meā nūxū pengechaūgū i ngēma taeneēgū, erū nūmagū nixī i pexū nangūxēēgūxū. Rū name nixī i pegū pengechaūgūācūma pemaxē. ¹⁴ Rū pemaā nūxū tixu ta na penaxucūxēgūxū i ngēma duūxūgū i oexū i tama pura-cūechaūxū. ¡Rū nūxū penangúchaūxēēgū i ngēma duūxūgū i marū nūxū rūxoechaūxū na yaxōgūāxū! ¡Rū nūxū perūngūxēēgū i ngēma duūxūgū i turaexū i norū ōwa! ¡Rū name nixī i yaxna namaā pexīnūē i guxūma i ngēma taeneēgū! ¹⁵ Rū ngēxguma texé chixexū pemaā ūxgu, rū tama name i chixexūmaā penataeguxēē. ¡Natūrū name nixī i naxcèx pedau na guxūguma mexū pexūgūxū i pegūtanūwa rū ngema togūtanūwa rū ta! ¹⁶ Rū name nixī i guxūguma petaāēgū. ¹⁷ ¡Rū guxūguma peyumūxēgū! ¹⁸ ¡Rū woo tacū pexū ngupetūgu, rū Tupanana moxē pexāgū! Erū ngēmaācū nanaxwèxe ya Tupana na pemaxēxū i pema i Ngechuchu ya Cristuarū duūxūgū na pixīgūxū. ¹⁹ Rū tama name i nūxū pexoe i Tupanaāē i Ūnēxū. ²⁰ Rū tama name i nūxū pexoe i Tupanaārū ore ega texéwa pemaā yadeaxgu ya Tupana. ²¹ Natūrū name nixī i meāma penangugū i guxūma i oregū na nūxū pecuáxūcèx rū ngoxi aixcūma yīxū i ngēma ore rū ēxna tama. ¡Rū ngēma ore i aixcūma mexūxīcatama pixōgū! ²² ¡Rū nūxna pixīgachi i nagūxūraūxū i chixexūgū! ²³ Rū chanaxwèxe i nūmatama ya Tupana ya tūxū taāxēēcū pexū imexēē na aixcūma napēxewa pimexūcèx. Rū chanaxwèxe i guxūwama pexna nadau i peāēwa rū pexenewa na nataxuxūcèx i tacū i perū chixexū i ngēxguma wenaxārū nūma naxūxgu ya tórū Cori ya Ngechuchu ya Cristu. ²⁴ Rū nūma ya Tupana ya pexū decū rū nixaixcūma na yanguxēēāxū i guxūma i ngēma tamaā inaxunetaxū.

Pauru rū wenaxārū yema duūxūgūxū narūmoxē rū naxcèx ínaca na Cori ya Ngechuchu ya Cristu meā nūxū rūngūxēēxū ga

yema yaxōgūxū

²⁵ Pa Chaueneēgūx, ¡Toxcèx peyumūxēgū! ²⁶ Rū chanaxwèxe i chauégagu nūxū perūmoxēgū i guxūma i taeneēgū. ²⁷ Rū Cori ya Ngechuchuégagu pexū chamu na guxū i taeneēgūpēxewa na nūxū pedaumatūxū i ñaā popera i pexcèx ngēma chamuxū. ²⁸ Rū chanaxwèxe i tórū Cori ya Ngechuchu ya Cristu pexū narūngūxēē i guxūma i pemax.

Rū nuāma pexna,
Pauru

NORŪ TAXRE GA POPERA GA TECHARÓNICAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxŏgŭxŭ ga Techarónicawa yexmagŭxŭ

¹ Pa Techarónicawa Ngēxmagŭxŭ i Toeneēgŭ i Yaxŏgŭxŭ i Tanatŭ ya Tupana rü tŏrŭ Cori ya Ngechuchu ya Cristuarŭ Duŭxŭgŭ Ixŭgŭxŭ, choma i Pauru rü taeneē i Chiribánu rü Timutéu nixŭ i pexcèx tanaxŭmatŭxŭ i ñaã popera. ² Rü tanaxwèxe i Tanatŭ ya Tupana rü tŏrŭ Cori ya Ngechuchu ya Cristu pexŭ narŭngŭxēē rü pexŭ nataēxēē.

Ngēma chixexŭ ŭgŭxŭ rü Tupana tá nanapoxcue i ngēxguma wenaxārŭ nŭma naxŭxgu ya Cristu

³ Pa Toeneēgŭx, rü guxŭguma pexcèx Tupanana moxē taxā, erŭ name nixŭ na ngēmaācŭ tanaxŭxŭ. Erŭ guxŭguma yexeraācŭ peyaxŏgŭetanŭ rü yexeraācŭ pegŭ pingechaŭgŭetanŭ. ⁴ Rü ngēmacèx tomatama taāēācŭma pechigaxŭ tixu natanŭwachigŭ i ngēma duŭxŭgŭ i Tupanaāxŭ yaxŏgŭxŭ. Rü namaā nüxŭ tixu na ñuxācŭ meā peyaxŏgŭxŭ, rü ñuxācŭ namaā peporaexŭ i guxŭma i ngēma guxchaxŭgŭ rü ngŭxŭgŭ i pexŭ ngupetŭxŭ. ⁵ Rü ngēma guxchaxŭgŭ i pexŭ ngupetŭxŭwa nüxŭ tacuèx na aixcŭmacŭ yŭxŭ ya Tupana, erŭ pexŭ nangugŭ na aixcŭma pimexŭ na pichocuxŭcèx i ngextá nŭma āēxgacŭ íyŭxŭwa. Rü ngēma na pichocuxŭcèx nixŭ i ngŭxŭ pingegŭxŭ i ñuxmax. ⁶ Rü aixcŭma name nixŭ na Tupana napoxcuexŭ i ngēma duŭxŭgŭ i ngŭxŭ pexŭ ingegŭxēēxŭ. ⁷ Natŭrŭ i pema i ñuxma ngŭxŭ ingegŭxe rü name nixŭ i wŭxigu tomaā pexŭ inarŭngŭēxēē ya Tupana. Rü ngēma rü tá nanaxŭ ya Tupana i ngēxguma ŭxŭemagu daxŭwa ne naxŭxgu ya tŏrŭ Cori ya Ngechuchu ya Cristu wŭxigu namaā i norŭ orearŭ ngeruŭgŭ i poraexŭ. ⁸ Rü aixcŭma nŭma tá naxŭ i nŭma ya tŏrŭ Cori ya Ngechuchu na napoxcueāxŭcèx i ngēma duŭxŭgŭ i tama Tupanaxŭ cuāxchaŭgŭxŭ rü tama naga ñnŭēxŭ i ngēma ore i mexŭ i tŏrŭ Cori ya Ngechuchu ya Cristuchiga. ⁹ Rü ngēma duŭxŭgŭ rü wŭxi i poxcu i taguma gŭxŭgu tá napoxcue erŭ tŏrŭ Cori ya Ngechuchuarŭ yaxŭwa tá nawogŭ. Rü ngēma rü tagutáma nüxŭ nadaugŭ na ñuxācŭ namexēchixŭ rü naporaxŭ ya tŏrŭ Cori ya Ngechuchu. ¹⁰ Rü ngēmaācŭ tá ngēma duŭxŭgŭmaā nangupetŭ i ngēxguma tŏrŭ Cori ya Ngechuchu nŭma ŭxgu. Rü nŭma tá nangu na nŏrŭ duŭxŭgŭ nüxŭ icuèxŭgŭxŭcèx, rü tá nabaixāchiāēgŭ rü nataāēgŭ erŭ tá nüxŭ nadaugŭ na ñuxācŭ namexēchixŭ i nŭmax. Rü pema rü tá ta wŭxigu namaā pengēxmagŭ, yerŭ peyaxŏgŭ ga yema Tupanaārŭ ore ga pemaā nüxŭ tixuxŭ. ¹¹ Rü ngēmacèx guxŭguma pexcèx tayumŭxēgŭ. Rü Tupanana taca na nŭma pexŭ nadauxŭ na aixcŭma mexŭ i norŭ duŭxŭgŭ pixŭgŭxŭ i ñuxma na pexŭ nadexŭ. Rü ngēxgumarŭŭ ta nüxna taca na nŭmatama norŭ poramaā yanguxēēāxŭcèx i guxŭma i ngēma mexŭ i peāēwa nagu perŭxŭñnŭēxŭ rü guxŭma i ngēma puracŭgŭ i mexŭ i perŭ ŏgagu pexŭxŭ. ¹² Rü ngēxguma Tupana ngēmaācŭ pexŭ rŭngŭxēēgu, rü perŭ maxŭ i mexŭgagu rü guxŭma i duŭxŭgŭ tá nüxŭ nicuèxŭgŭ ya tŏrŭ Cori ya Ngechuchu ya Cristu. Rü nŭmatama ya tŏrŭ Cori rü tá pemaā nataāē erŭ nŭma rü wŭxigu Tanatŭ ya Tupanamaā pexŭ nangechaŭgŭ.

2

Pauru rü nanangoxēē i ñuxācŭ tá na yŭxŭ i ngēxguma ínanguxgu ya Cori ya Ngechuchu

¹⁻² Rü ñuxma Pa Chaueneēgŭx, rü pemaā nüxŭ chixuxchaŭ i nachiga na ñuxācŭ tá na yŭxŭ i ngēxguma tŏrŭ Cori ya Ngechuchu ya Cristu wena nŭma ŭxgu rü tŭxŭ nangutaquēxēēgŭgu na wŭxiwa namaā ingēxmagŭxŭcèx. Rü pemaā nüxŭ tixu na tama ngŭrŭāchi togumare perŭxŭñnŭēxŭ rü paxa peyaxŏgŭxŭ i tacŭ rü ore i tama toma pemaā

nüxü tixuxü. Erü tama tanaxwèxe na pebaixãchiãëgüxü ega texé pemaã idoraegu rü pemaã nüxü ixuxgu na marü ínanguxü ya tórü Cori ya Ngechuchu. Rü ngëxguma texé pemaã nüxü ixuxgu na nagu taxãnegüxü na Cristu rü marü ínanguxü, rü tama name i tümaga pexĩnüë. Rü woo pemaã nüxü tixugügü na tanayauxgüxü i wüxi i torü popera i nüxü ixuxü na marü ínanguxü ya tórü Cori ya Ngechuchu, ¡rü täütáma tüxü peyaxögü!³ ¡Rü täütáma naga pexĩnüë i ngëma duüxügü i ngëmaãcü pexü womüxëëgüchaüxü! Erü naxüpa na Ngechuchu núma üxü rü tá ínangu i ngëma yatü i Tupanaärü uwanü ixixü, rü tá nananuëxëë i muxüma i duüxügü i yaxögüchiréxü. Natürü ngëma yatü rü Tupana marü namaã nanaxuegu rü tá napoxcu.⁴ Rü ngëma Tupanaärü uwanü rü tá Tupanamaã rü guxüma i ngëma Tupanaärü ixixümaã narüxuwänü. Rü tá naxchi naxai i guxüma i tacü i mexü i duüxügü Tupanaxü namaã icuëxüügüxü. Rü Tupanaärü tupauca ya taxünewa tá nayarüto ñoma Tupana yixüürü. Rü tá nügü nixu na Tupana yixü.⁵ ¿Tama ëxna nüxna pecuëxãchie ga yexguma petanüwa chayexmagu rü marü meãma pemaã nüxü chixu nachiga ga yema?⁶ Rü pema marü nüxü pecuëx na tüxcüü yixü i tauta núma naxüxü i ngëma Tupanaärü uwanü. Tauta núma naxü, erü tauta nawa nangu i ngema ngunexü i nagu nua naxüxü.⁷ Rü ngëma chixexü i Tupanaärü uwanü üxü, rü marü cúãcü inaxügü. Natürü nümatama i Tupanaärü uwanü rü täütáma nangox ñuxmatáta ngëma norü chogüruü nüxü ingé.⁸ Rü ngëxguma tá nixi i ínanguxü i ngëma Tupanaärü uwanü. Natürü núma ya tórü Cori ya Ngechuchu rü wüxi i “cue” ñaxümaã tá nayamëx. Rü ngëxguma ínanguxgu ya tórü Cori ya Ngechuchu rü ngëma norü yaxracüüxümaã tá inayanaxoxëë i ngëma norü uwanü.⁹ Rü ngëma Tupanamaã rüxuwänüãxü, rü ngëxguma ínanguxgu rü tá nüxü nangëxma i Chatanáärü pora rü ngëmacëx tá naporaxüchi. Rü tá nanaxü i nagüxüraüxü i cuëxruügü i Chatanáärü poramaã naxüxü i namaã duüxügüxü nawomüxëëxü.¹⁰ Rü nagüxüraüxü i chixexü tá naxü na nawomüxëëãxüçëx i ngëma duüxügü i Tupana tá poxcuëxü. Rü ngëmaãcü tá nüxü naxüpetü i ngëma duüxügü, yerü tama nanayauxgüchaü rü tama nüxü nangechaü i ngëma Tupanaärü ore i aixcüma ixixü i tüxü maxëxëëxü.¹¹ Rü ngëmacëx ya Tupana rü nanangexrü i ngëma duüxügü na poraãcü ínatüexüçëx rü yaxögüãxüçëx i ngëma ore i doramare ixixü.¹² Rü ngëmacëx düxwa Tupana tá namaã nanaxuegu na napoxcuëxü i guxüma i ngema duüxügü i tama yaxögüchaüxü i norü ore rü namaã taãëgüxü i ngëma chixexü na naxügüxü.

Tupana tüxü nade na tüxü nangëxmaxüçëx i maxü i taguma gúxü

¹³ Natürü, Pa Chaueneëgüx i Tórü Cori ya Ngechuchu Pexü Ngechaügüxex, rü guxüguma Tupanana moxë peçcëx taxã yerü núma ga Tupana rü noxritama naãne ixügügumama pexü nade na pexira penayauxgüxüçëx i maxü i taguma gúxü ga yexguma pexü nangüxëëgu ga Naãë i pexü üünexëëxü rü peyaxögügu ga yema ore i aixcüma ixixü.¹⁴ Rü yemacëx Tupana peçcëx naca ga yexguma pemaã nüxü tixuxgu ga norü ore i mexü i tüxü maxëxëëxü. Erü núma nanaxwèxe na pexü nangëxmaxüçëx i peçcica i tórü Cori ya Ngechuchu ya Cristuxütawa i ngextá ínamexëchixüwa.¹⁵ Rü ngëmacëx, Pa Chaueneëgüx, rü chanaxwèxe i meã peyaxögüama rü tama nüxü ipeyarüngümaë ga yema ore ga tomatama pexü tangüxëëxü rü yema ore ga poperagu peçcëx taxümatüxü.¹⁶⁻¹⁷ Rü chanaxwèxe i tórü Cori ya Ngechuchu ya Cristu rü Tanatü ya Tupana pexü nataãxëëgü rü pexü narüngüxëë na guxüguma mexü i oremaã pidexagüxüçëx rü mexü pexügüxüçëx. Rü yima Tanatü ya Tupana nixi ya tamaã namecümaãcüma tüxü ngechaücü rü guxüguma tüxü taãëxëëcü rü tamaã ixunetacü na wüxi i ngunexü tá naxütawa ingëxmagüxü.

3

Pauru naxcëx ínaca na naxcëx nayumüxëgüxü

¹ Rū ñuxma Pa Chaueneēgūx, rü chanaxwèxe na toxcèx peyumüxēgūxū na paxa guxūwama nanguxūcèx i tórü Cori ya Ngechucharü ore i mexū, rü duūxūgū norü ngúchaūmaā na nayauxgūxūcèx ga yema pema na penayauxgūxūrūū. ² ;Rü toxcèx peyumüxēgū ta na tama Ꞥacü rü chixexū tomaā naxūgūxūcèx i ngēma duūxūgū i chixexūgū! Erü tama guxūma i duūxūgū nayaxōgū. ³ Natürü tórü Cori ya Ngechuchu rü aixcūma nayanguxēē i ngēma tamaā inaxunetaxū. Rū nüma tá pexū naporaexēē rü pexna nadau na tama chixexūgu peyixūcèx. ⁴ Rū tórü Cori ya Ngechuchu toxū nüxū nacuxēē na aixcūma penaxūxū i ngēma pexū tamuxū rü tagutāma nüxū perūxoexū na ngēmaācū penaxūxū. ⁵ Rū tanaxwèxe i tórü Cori ya Ngechuchu pexū narūngūxēē na aixcūma pegū pengechaūgūxūcèx, ngēma Tupana tüxū ngechaūxūrūū. Rū naxcèx ítaca na pexū naporaexēēxūcèx na Cristurūū namaā peporaexūcèx i ngēma ngūxūgū i ngēxguma pexcèx ínanguxgu.

Name nixī na ipuracūexū i wūxichigū

⁶ Pa Chaueneēgūx, tórü Cori ya Ngechuchu ya Cristuégagu pexū tamu na tama namaā pixāmücūgūxūcèx i Ꞥacü i taeneē i tama puracūchaūxū rü tama ngēma pexū tangūexēēācūma maxūxū. ⁷ Erü pema rü marü nüxū pecuxèx na ñuxācū tá pemaxēxū na toxrūū penaxūxūcèx. Yerü toma ga yexguma petanūwa tayexmagūgu rü torü ònacèx tapuracūe, rü tama yexma tarūchomare. ⁸ Rū toma rü taguma texéarü òna ngetanūācūma tangōx. Natürü ngunecü rü chütacü rü torü ònacèx tapuracūe na tama wūxi ga guxchaxū pexū tixīgūxūcèx. ⁹ Rū wochirēx Tupanapēxewa rü name nixī ga perü ngūxēēcèx na ítacaxū, natürü tama yemaācū tanaxū. Rū torü ònacèx tapuracūe yerü pexū nüxū tadauxēēchaū na ñuxācū meā imaxūxū. ¹⁰ Yerü yexguma petanūwa tayexmagūgu, rü pemaā nüxū tixu rü yíxema tama puracūchaūxē, rü noxtacūma ngexrūma nixī na tachibūxū. ¹¹ Rū pexcèx tanaxūmatü i ngēmachiga, erü marü nüxū taxīnūē na petanūwa nangēxmaxū i ñuxre i duūxūgū i oexū rü tama puracūechaūxū rü toguechigagumare rüxīnūēxū. ¹² Rū tórü Cori ya Ngechuchu ya Cristuégagu tanamu na meāmare ínapuracūexūcèx i ngēma duūxūgū na nümatama norü ònacèx nataxegūxūcèx. ¹³ Pa Chaueneēgūx, Ꞥtama nüxū perūchau na mexū pexūexū! ¹⁴ Rū ngēxguma texé tama naga ínūgu i ñaā ore i poperawa pemaā nüxū tixuxū ;rü marü tüxū pecuxèx na texé tīxū! Rū tama name i tümamaā pexāmücü na taxānexūcèx i tümax. ¹⁵ ;Natürü tāūtāma namaā perūxuwānū! Rū name nixī i ñoma peeneēxū pexucūxēxūācūma meā tüxū pexucūxēmare.

Pauru rü naxcèx ínaca na Cori ya Ngechuchu nüxū rüngūxēēxū ga yema yaxōgūxū

¹⁶ Rū chanaxwèxe i nümatama ya tórü Cori ya taāearü yora pexū narūngūxēē na guxūguma i guxūwama petaāēgūxūcèx. Rū chanaxwèxe na nüma rü petanūwa na nangēxmaxū i guxāma i pemax. ¹⁷ Choma i Pauru rü choxmēxmaātama pexcèx chanaxūmatü i ñaā chorü moxē. Rū ngēmaācū nixī i chaugū nagu chawüégaxū i guxūma i chorü popera. Rū ngēmaācū nixī i chanaxūmatūxū. ¹⁸ ;Rü nüma ya tórü Cori ya Ngechuchu ya Cristu rü pexna naxāā i ngema norü ngechaxū i guxāma i pemax!

Rü nuāma pexna,
Pauru

NÜXÏRAÜXÛ GA POPERA GA TIMUTÉUCAᶘ NAXÜMATÜXÛ GA PAURU

Timutéuxü narümoᶘ ga Pauru

1-2 Pa Timutéux, choma i Pauru nixi i cuxcèᶘ chanaxümatüxü i ñaã popera. Rü choxü nixi ga yamuxü ga Ngechuchu ya Cristu na norü puracü chaxüxcèᶘ, yerü yemaãcü nanaxwèᶘe ga Tupana ya tüxü maxèᶘèècü rü tórü Cori ya Ngechuchu ya Cristu ya ínguxèègücü. Rü cuma Pa Timutéux, rü chaune quixi i Tupanaãrü orewa yerü chauxütawa nixi ga cunayaxuxü ga Tupanaãrü ore ga noxrix. Rü chanaxwèᶘe ya Tanatü ya Tupana rü tórü Cori ya Ngechuchu ya Cristu rü cuxna nanaxã i norü ngechaxü rü norü mecüma rü norü taã.

Timutéuxü naxucuxè ga Pauru nachiga ga yema nguxèètaegü ga tama aixcüma ixü

3 Yexguma cuxna ichaxüãchigu na Machedóniãñewa na chaxüxcèᶘ rü cumaã nüxü chixu na Epéchiuarü íãnegu na curüãüxü na ícuyachaxãchigüxèèxüxcèᶘ i ngema duüxügü i doramaãmare ngéma nguxèètaegüxü. 4 Rü chanaxwèᶘe i ngéma duüxügümaã nüxü quixu na nüxü naxoexüxcèᶘ na namaã nangúexèèãxü i ngéma nacümagü ga nuxcümaügüxü ga duüxügü nagu íxü. Erü guxüma i ngéma oregü rü doramare nixi, rü ngëmagagu düxwa nügümaã nanuë i duüxügü. Rü ngéma oregü rü tama aixcüma nüxü narüngüxèè i duüxügü na meã Tupanaãxü yaxögüãxüxcèᶘ. 5 Natürü Tupana nanaxwèᶘe i tórü maxünewa na ingearü pecaduãxgüxü, rü na mexügu rüxñüèxü, rü aixcüma meã na yaxögüxü. Rü nüma tüxü namu na ngémaãcü imaxèãcüma yigü na ingechaügüxü. 6 Natürü ñuxre i duüxügü rü marü nüxna nixigachi i Tupanaãrü ore na nawe naxixüxcèᶘ i ngéma ore i taxuwama mexü i nuëwa nagagümarexü. 7 Erü nümagü tüxü nangúexèèchaü i ngéma mugü ga Moïché tüxna äxü, natürü tama nüxü nacüèxgü i tacüchiga na yíxü i ngéma tamaã nüxü yaxugüexü rü tüxü nangúexèèxü woo nüma nagu naxñüègu rü meãma nüxü nacüèxgü. 8 Rü nüxü tacüèᶘ rü ngéma mugü ga Moïché tüxna äxü rü tüxü name ega Tupana naxwèᶘexüãcüma naga íxñüègu. 9-10 Natürü nüxü tacüèxgü rü guxüma i ngema mugü rü duüxügü i chixexü ügüxcèᶘ nixi. Rü ngéma nixi i ngéma duüxügü i tama íruxñüèchaüxü, rü ngéma tama norü äëxgacüga ñüèxü, rü ngéma chixexü ügüxü, rü ngéma pecaduãxgüxü, rü ngéma tama Tupanaga ñüèxü, rü ngéma nanatüxü rü naèxü imèxgüxü, rü guxüma i ngéma máètagüxü, rü ngéma naxüneärü ngüchaüwe rüxixü, rü ngéma yatügü rü ngexügü i naxrüü yatüxü rü ngexümaã ngèãègüxü, rü ngéma duüxègümaã taxegüxü, rü ngéma idoratèèxgüxü, rü ngéma äëxgacügümaã idoragüxü, rü guxüma i ngéma naxügüxü i tacü rü chixexü i yatoxyepexü i ngema nguxèètae i mexü. 11 Rü ngéma nguxèètae i mexü rü Tupanaarü orewa nangexma, rü ngemagu nixi i nüxü iyarüngauxü i ngema maxü i taguma gúxü. Rü ngemaarü uruxü nixi ya Tupana ya mecümaxüchicü i choxü namuxü.

Pauru rü Tupanana moᶘ naxã yerü nüxü nüxü nangechaü ga norü chixexügü

12 Rü moᶘ nüxna chaxã ya Ngechuchu ya Cristu ya tórü Cori erü nüma choxü naporaxèè rü choxü nangugü na wüxi i mexü i norü duüxü chixixü. Rü ngëmacèᶘ choxü naxuneta na nüxü chapuracüxü. 13 Üpa ga choma rü chixri nachiga chidexa ga Cristu, rü naxchi chaxai ga yema duüxügü ga nüxü yaxögüxü. Rü nawe chingechigü rü namaã chixexü chixugü. Natürü woo yemaãcü na chamaxüxü, rü Tupanaãxü changechaütümüxü yerü tama aixcüma nüxü chacüèᶘ ga tacü na chaxüxü, yerü tauta Cristuaxü chayaxõ. 14 Rü yemaãcü ga tórü Cori ya Ngechuchu rü poraãcüxüchima chomaã namecüma yerü choxü narüngüxèè na nüxü chayaxõxcèᶘ rü nagagu nüxü

changechaũxúcèx i guxũma i duũxũgũ. ¹⁵ Rũ pemaã nüxũ chixuxchaũ i wũxi i ore i aixcũmaxũchi ixĩxũ i inaxwèxegũxũ na guxãma nüxũ cuáxũ. Rũ Ngechuchu ya Cristu rũ ñoma ga naãnewa nangu na namaxẽxẽãxúcèx i pecaduãxgũxũ. Rũ natanũwa rũ choma nixĩ ga guxũãrũ yexera na chixexũ chaxũxũ. ¹⁶ Natürũ Tupana choxũ nüxũ nangechaũ ga yema chorũ chixexũ na chowa duũxũgũxũ nüxũ nadauxẽxúcèx ga ñuxãcü nüma ga Ngechuchu ya Cristu yaxna chomaã na naxĩnũxũ ga woo guxũ ga pecaduãxgũxũãrũ yexera chixecũ na chiĩxũ. Rũ ngẽmaãcü wũxi i cuèxruũ chixĩ naxcèx i guxũma i duũxũgũ na nümagũ rũ ta nüxũ nangẽxmaxúcèx i maxũ i taguma gúxũ. ¹⁷ Rũ ñuxma tanaxwèxe i guxũgutãma nüxũ ticuèxũũgũ rũ tanataxẽegũ ya yima nüxĩcatama Tupana ixĩcü. Rũ woo tama nüxũ tadaugũ i ñuxma natürũ guxũguma tórũ Æxgacũ nixĩ rũ tagutãma nayu. Rũ ngẽmaãcü yĩ. ¹⁸⁻¹⁹ Pa Chaune, Pa Timutéux, ñãã nixĩ i chorũ ore i cumaã nüxũ chixuxũ. Rũ ũpa ga yexguma Tupana yadexaxẽegu ga ñuxre ga taeneegũ, rũ nüxũ nixugũgũ na cuma rũ tá mexũ i Tupanaãrũ orearũ uruũ quiĩxũ. Rũ ñuxma chanaxwèxe i yemagũ nüxũ ixuxũrũ meã cuyanguxẽe i ngẽma puracũ i mexũ i Tupana nawa cuxũ muxũ. Rũ chanaxwèxe na aixcũma cuyaxõxũ rũ cuãewa cumatama nüxũ cucuáxũ na aixcũma namexũ i ngẽma puracũ i ícuxũxũ. Ñuxre i duũxũgũ rũ nüxũ nacuèxgũchirẽx i tacũ nixĩ i mexũ na naxũgũãxũ, natürũ chixexũãma naxũgũ. Rũ ngẽmacèx dũxwa nüxũ narũxoe na Cristuaxũ yaxõgũãxũ. ²⁰ Rũ yemaãcü nüxũ naxũpetũ ga Imenéũ rũ Areyáũdru. Rũ dũxwa choma Chatanána chanawogũ ga yema taxre na Chataná ngúxũ nüxũ ingexẽegũxúcèx na ngẽmawa nüxũ nacuèxgũxúcèx na tama namexũ na chixri Tupanachiga yadexagũxũ.

2

Name nixĩ i guxũma i duũxũgũcèx tayumũxẽgũ

¹ Rũ ñuxma rũ tá pemaã nüxũ chixu na ñuxãcü namexũ na peyumũxẽgũxũ. Rũ pexũ chamu na guxũma i duũxũgũcèxira peyumũxẽgũxũ. ¡Rũ Tupanana naxcèx peca na nüxũ nangũxẽxúcèx rũ nüxũ nüxũ nangechaũxúcèx i norũ pecadugũ! ¡Rũ moxẽ nüxna pexã ya Tupana naxcèx i guxũma i norũ ngũxẽe i guxũ i duũxũgũna naxãxũ! ² Rũ ngẽxgumarũ ta name nixĩ i naxcèx peyumũxẽ i guxũma i nachiũãnegũarũ ãxgacũgũ i tacũgũ rũ guxũma i ngẽmatũũwa ngẽxmagũxũ i ãxgacũgũ na ngẽmaãcü itaãegũxúcèx rũ tũxũ nangẽxmaxúcèx i wũxi i maxũ i mexũ i Tupanapẽxewa rũ guxũ i duũxũgũpẽxewa. ³ Rũ ngẽma nixĩ i namaã nataãxũ ya yima Tupana ya tũxũ maxẽxẽecũ. ⁴ Erũ nüma nanaxwèxe na guxãma tũxũ nangẽxmaxũ i maxũ i taguma gúxũ rũ guxãma nüxũ cuáxũ i ngẽma ore i aixcũma ixĩxũ. ⁵ Rũ nüma ya Tupana rũ wũxitama nixĩ. Rũ ngẽxgumarũ ta wũxitama nixĩ i taétũwa chogũxũ na Tupanaxũtawa tũxũ nangugũxúcèx. Rũ nüma nixĩ ya Ngechuchu ya Cristu ya Tupana Nane ga duũxũxũ ixĩcü. ⁶ Rũ nüma ga Ngechuchu rũ nügũ inaxã rũ nayu na guxũ i duũxũgũaxũ naxũtanũãxúcèx na Tupanaxũtawa nangugũxúcèx. Rũ yexguma Ngechuchu yuxgu nixĩ ga Tupana yanguxẽexũ ga yema ũpaacũ duũxũgũmaã nüxũ yaxuxũ na ñuxãcü tá namaxẽxẽãxũ. ⁷ Rũ Tupana choxũ naxuneta na norũ orearũ ngeruũ chiĩxũcèx. Rũ choxũ namu na chanangũxẽxúcèx i ngẽma duũxũgũ i tama Yudíugũ ixĩgũxũ na nümagũ rũ ta yaxõgũãxúcèx rũ nüxũ nacuèxgũxúcèx i ngẽma ore i aixcũma ixĩxũ. Rũ ngẽma pemaã nüxũ chixuxũ, rũ aixcũma nixĩ, rũ tama chidora. ⁸ Rũ ñuxma chanaxwèxe i guxũwama nayumũxẽgũ i yatũgũ. Rũ chanaxwèxe i ngearũ pecaduãxãcüma naxugũmẽxẽ rũ ngẽmaãcü tama texẽmaã nanuẽãcüma rũ tama tacũchiga nügũ nachoxũgagũãcüma nayumũxẽgũ. ⁹ Rũ chanaxwèxe i ngexũgũ rũ meamare ũxũ i naxchirugu nicuxgũ, rũ meamare nügũ namexẽeyaegũ, rũ tama poraãcü nügũ nangèxãegũ uirumaã rũ meruxũgũmaã rũ naxchiru i tatanũxũmaã. ¹⁰ Natürũ narũmemaẽ nixĩ i meãmare Tupanacèx namaxẽ, rũ mexũ i puracũ naxũgũ, erũ ngẽmaãcü nanaxwèxegũ na namaxẽxũ i ngẽma ngexũgũ i aixcũma Tupanaaxũ yaxõgũxũ. ¹¹ Rũ chanaxwèxe i ngexũgũ rũ meã inaxĩnũe i ucuxẽgũ. Rũ tama name na

nachoxügawèxegüxü. ¹² Erü ngexügüna rü chanachuxu na yatügüxü nangúexêêxü, rü yatüarü âëxgacü na yïxü. Rü name nixi i inarüxïñüëmære i perü ngutaquëxegüwa. ¹³ Yerü Tupana rü Adáüxüxïra naxü rü yixcama ga Eboxü. ¹⁴ Rü Chataná rü tama Adáüxü nawomüxêê, natürü yema ngecüxü nixi ga nawomüxêêxü. Rü yemaâcü pecadugu ingu ga yema ngecü. ¹⁵ Rü yemacèx Tupana nüxü nixu rü tá poraâcü nüxü nangux i ngëma ngexügü i ngëxguma naxíraxacügügu. Natürü ngïma i ngecü rü tá inayaxu i maxü i taguma güxü ega meã ngïxãcügümaã inacuèxgu, rü mexügu naxïñüâcüma yaxõõgu, rü guxügüma duïxügüxü nangechaügu rü meã Tupanapëxewa namaxëgu.

3

Yaxõgüxüârü âëxgacügüchiga

¹ Rü pemaã nüxü chixuxchaü i wüxi i ore i aixcüma ixïxü. Rü ngëxguma chi texé naxwèxegu na yaxõgüxüârü âëxgacü tiïxü, rü mexü i puracü nixi i naxcèx tadauxü. ² Rü yixema yaxõgüxüârü âëxgacü rü tanaxwèxe na aixcüma mecü tiïxü na taxúema tümachiga chixri idexaxüçèx. Rü tanaxwèxe i wüxixicatama tixi ya tümamèx, rü aixcüma meã tamaxü rü mexüguxicatama tarüxïñü na guxü i duïxügü tüxü ngechaügüxüçèx. Rü tanaxwèxe i guxügüma meã duïxügüxü tayaxu i tümapatawa, rü mexü i ngúexêêruü tixi. ³ Rü tama name i wüxi i ngãxwèxexü rü nuwèxexü tiïxü, rü tama name i tümäärü dïeruguama rüxïñüxê tiïxü. Natürü name nixi i guxü i duïxügümaã yaxna taxïñü rü namaã tamecüma. ⁴ Rü tanaxwèxe i meãma tümachiümaã itacuèx, rü tümaxãcügü rü meã tümaga naxïñüê, rü tüxü nangechaügu. ⁵ Erü ngëxguma chi tama tümachiümaã meã itacuèxgu rü ¿ñuxãcü i guxüma i Tupanaãxü yaxõgüxümaã meã itacuáxü? ⁶ Rü yixema ngema yaxõgüxümaã icuáixê rü tama name na ngexwacèx yaxõxê tiïxü, erü ngürüâchi tá tügü ticuèxü. Rü ngëmagagu düxwa nagu tangu i ngëma poxcu i Chatanáxü namaã napoxcuxü ya Tupana. ⁷ Rü tanaxwèxe i woo i ngëma duïxügü i tama yaxõgüxü rü tüxü nangechaügu na taxúema chixri tümachiga idexagüxüçèx rü tama Chataná chixexügu tüxü na nguxêêxüçèx.

Yatügü i diácunugü i tupaucawa ngüxêêtaegüxüchiga

⁸ Rü ngëxgumarü ta i ngëma yatügü i tupaucawa ngüxêêtaegüxü ixïgüxü rü nanaxwèxe i mexüguxicatama rüxïñüêxü nixïgü. Rü nanaxwèxe i aixcüma nayanguxêêgü i ngëma nüxü yaxugüexü. Rü tama nanaxwèxe i ngãxêêchagüxü nixïgü rü éxna norü dïeruguama rüxïñüêxü nixïgü. ⁹ Rü name nixi i meãma nüxü nacuèxgü i guxüma i Tupanaârü ore, na nüxü nacuèxgüxüçèx na tacüçèx na yaxõgüãxü. Rü nanaxwèxe i nügüãêwatama nüxü nacuèxgü na norü maxü rü aixcüma yamexü i Tupanapëxewa. ¹⁰ Rü tanaxwèxe i to i puracüwa nüxü taxügüxira i noxrix. Rü ngëxguma marü taguma chixexü naxügügu, rü marü name i tupaucawaârü ngüxêêruü tayaxïgüxêê. ¹¹ Rü ngëma yatügü i tupaucawa ngüxêêtaegüxü ixïgüxü rü tanaxwèxe i naxmèxgü rü ta mexüguxicatama narüxïñüê. Rü tama name i oregütèèxgüxü nixïgü, natürü tanaxwèxe i meã namaxë rü aixcüma nayanguxêêgü i ngëma nüxü yaxugüxü. ¹² Rü ngëma yatügü i tupaucawa ngüxêêtaegüxü ixïgüxü rü tanaxwèxe i wüxixicatama tixi ya naxmèx. Rü tanaxwèxe i meãma napatacüãxgümaã inacuèx, rü naxãcügü rü meã naga naxïñüê. ¹³ Rü ngëma yatügü i tupaucawa ngüxêêtaegüxü, rü ngëxguma meãma naxügüãgu i norü puracü i tupaucawa rü guxüma i duïxügü tá nüxü nangechaügu. Rü ñuxüchi i nümagütama i ngëma yatügü rü tá yexeraâcü nüxü natauxcha na nüxü yaxugüexü i ñuxãcü Tupana nanaxwèxexü i Ngechuchu ya Cristuaxü na yaxõgüãxü i duïxügü.

Aixcüma nixi i ngëma ore i Tupana tüxü nüxü cuèxêêxü i Cristuchiga

¹⁴⁻¹⁵ Rü choma chanaxwèxe i paxa ngema chaxü na cuxü íchayadauxüçèx. Natürü ngürüâchi tama paxa ngema chaxü, rü ngëmacèx cuxcèx chanaxümatü i ñaã popera na nüxü cucuáxüçèx i ñuxãcü tá cugümaã icucuáxü napewa i ngema duïxügü i Tupanaxü

yaxōgūxū. Erū nūmagū nixī i Tupana ya maxūcūarū duūxūgū yixīgūxū rū nūxū yaxugūgūxū rū ínapoxūgūaxū i norū ore i aixcūma íxīxū. ¹⁶ Rū yixema nūxū tacuèx rū aixcūma namexēchi i ngēma ore ga noxri ēxūguxū i ñuxma Tupana tūxū nūxū cuèxēēxū i Cristuchiga. Rū nūma ga Cristu rū duūxūgūxū nūgū nawēx ga yexguma ñoma ga naānewa nayexmagu. Rū Naāē i Ūñexū nūxū nixu na mecū yīxū. Rū Tupanaārū orearū ngeruūgū i daxūcūāx nūxū nadaugū. Rū guxū i nachiuānegūwa rū duūxūgū nūxū nixugūe i nachiga, rū guxūwama duūxūgū nūxū nayaxōgū. Rū Nanatū rū wenaxārū daxūguxū i naānewa nanaga i ngextá ínamexēchixūwa.

4

Duūxūgū i nūxū ruxoexū na yaxōgūāxūchiga

¹ Tupanaāē i Ūñexū rū nūxū nixu rū ngēxguma yangaicagu na nagūxchaūxū i naāne rū nūmaxū i duūxūgū rū tá nūxū narūxoe na yaxōgūāxū i Tupanaārū ore i mexū. Rū tá nawe narūxī i duūxūgū i doramare i orexū ixugūxū i Chatanáārū nguxēētae nangūexēēxū. ² Rū ngēma yaxōgūxū rū tá nūxū inarūxīnūē i ngēma duūxūgū i meā maxēnetaxū rū idorateēxgūxū. Rū ngēma duūxūgū rū yeūcūrū nanaxūgū i ngēma chixexū rū dūxwa namaā nixū na chixexūguxicatama naxīnūēxū. ³ Rū ngēma duūxūgū rū nanachuxu na iyangīgūxū i duūxūgū. Rū nanachuxu na duūxūgū nangōxgūxū i ñuxre i ōnagū rū wochirēx Tupana nanaxū i guxūma i ōnagū na moxē naxcèx inaxāgūācūma nangōxgūāxūcèx i norū duūxūgū i yaxōgūxū rū nūxū cuèxgūxū i norū ore i aixcūma íxīxū. ⁴⁻⁵ Natūrū guxūma i Tupana ūxū rū name. Rū taxuacūma nūxū taxo ega Tupanana moxē naxcèx íxāxiraācūma nayauxgu. Erū Tupanaārū ore rū ngēma yumūxē rū nanaxūñexēē i ngēma ōna i Tupanapēxewa, rū ngēmacèx name nixī na nangōxū.

Wūxi i mexū i Ngechuchu ya Cristuarū ngūxēēruū rū mexūmaā nanguxēētae

⁶ Rū ngēxguma ngēma cumaā nūxū chixuxū i oremaā cunangūexēēgu i taeneē i yaxōgūxū, rū ngēxguma nawa cunūechagu i ngēma ore i marū quixōxū, rū ngēxguma nagu quixūechagu i ngēma mexū i nguxēētae i marū nagu quixūxū, rū ngēxguma tá nixī i wūxi i mexū i Ngechuchu ya Cristuarū ngūxēēruū quiīxū. ⁷ Rū tama name na naga cuxīnūxū i ñoma i naānecūāxārū dexagūmare i tama aixcūma íxīxū. Natūrū name nixī i guxūguma cugū cuporaxēē na yexeraācū Tupanaxū cungechaūxūcèx rū nawe curūxūxūcèx rū naxcèx cumaxūxūcèx. ⁸ Rū wūxi i mexū nixī na naporaxēēxū rū yaxīāxcūxēēxū i taxūne na aixcūma naporaxūcèx. Natūrū ngēmaārū yexera narūmemaē nixī na yigū iporaxēēxū na Tupanaxū ingechaūxūcèx erū ngēma rū guxūwama tūxū name i ñoma i naānewa rū daxūguxū i naānewa rū ta. ⁹ Rū aixcūma nixī i ngēma ore i cumaā nūxū chixuxū, rū name nixī i guxūma tayaxōgū. ¹⁰ Rū ngēmacèx nixī i ipuracūexū rū yigū iporaexēēxū na nūxū ixuxūcèx i ngēma ore i mexū, erū nūxū tayaxōgū ya tórū Tupana ya maxūcū ya guxāārū maxēēēruū íxīcū. Erū nūma nixī i namaxēxēēāxū i ngēma duūxūgū i nūxū yaxōgūxū. ¹¹ Rū chanaxwèxe i cunangūexēē i ngēma ore rū duūxūgūxū cumu na naga naxīnūexūcèx. ¹² ¡Meā cugūna nadau na taxūema cuxū naxoxūcèx naxcèx i ngēma na cunextūxūxū! Rū name nixī i wūxi i mexū i cuèxruū quixī naxcèx i guxūma i ngēma yaxōgūxū. Rū ngēmacèx cunaxwèxe i mexū i oremaā quidexa, rū meā duūxūgūpēxewa cumaxū, rū aixcūma nūxū cungechaū i guxūma i duūxūgū, rū meā Tupanaāxū cuyaxō, rū napēxewa meā cumaxū. ¹³ Rū chanaxwèxe i ngutaquēxewa rū guxū i duūxūgūpēxewa nūxū cudaumatū i Tupanaārū ore, rū duūxūgūmaā nūxū quixu na ñuxū ñaxūchiga yīxū. Rū chanaxwèxe i ngēmaācū cunangūexēē rū nūxū cunangūchaūxēē i ngēma taeneēgū ñuxmatáta ngēma changu i chomax. ¹⁴ Rū ngēmacèx name nixī i aixcūma namaā cupuracū i ngēma cuèx ga Tupana cuxna āxū ga yexguma norū puracūcèx cuxū naxunetagu rū yema yaxōgūxūārū āēxgacūgū cuxū yangōgūācūma cumaā nūxū yaxuxgu na cuxna naxāāxū ga yema cuèx. ¹⁵ ¡Meā naxū i guxūma i ngēma

cumaã nüxü chixuxü, na ngẽmaãcü guxü i duüxüğü nüxü daugüxcèx na ñuxãcü guxü i ngunexüğü yexeraãcü meã Tupanacèx na cumaxüxü! ¹⁶ ¡Inaxuãẽ na ñuxãcü meã cugüna cudauxü rü ñuxãcü meã cunangüexẽxü i ngẽma togü! Erü ngẽxguma meã cunaxüxgu i guxüma, rü tá cunayaxu i maxü i taguma gúxü rü ngẽma togü i cuxü irüxñüxü rü tá ta nüxü curüngüxẽẽ na nümagü rü ta nayauxgüãxüxcèx i ngẽma maxü.

5

Ñuxãcü nixi i namexü na nüxü ingechaüxü i ngẽma yaxögüxü

¹ Taguma name i cunanga i wüxi i yatü i cuxü rüyamaẽxü. Rü narümemaẽ nixi i meãma cunaxucuxẽ ñoma cunaturüü. Rü ngẽma ngextüxcügü rü name nixi i meãma namaã quidexa ñoma cueneëgüxüchirüü. ² Rü yixema yaguãxgü ya ngexegü rü name nixi i meãma tümamaã quidexa cuexüchirüü. Rü ngẽxgumarüü ta i paxüğü rü name nixi i meãma namaã quidexamare wüxi i cueyèxüchirüü, rü tama name i chixexüğü namaã curüxñü. ³ ¡Tüxü rüngüxẽẽ ya yixema yutegüxe ega aixcüma tacü tüxü taxgu! ⁴ Natürü ngẽxguma chi wüxi i yutecü ngixü nangẽxmagu i ngixãcüğü rü éxna ngítaagü, rü name nixi i nümagü ngixü narüngüxẽẽgü rü ngixna nanaxã i tacü i ngixü taxuxü. Erü Tupana nanaxwèxe na ngitanüxüira ngixna daugüxü na ngẽmaãcü yangutanüxẽẽgüãxüxcèx ga yema naẽ na nayaexẽxü. ⁵ Natürü yixema yutexe ya tüxica irüxãxẽ rü tüxü nataxüxe i tümatanüxü, rü Tupanaxütawaxicatama ítananguxẽẽ i tümaãrü ngüxẽẽ rü guxüguma woo chütacü rü ngunecü rü tayumüxẽ na tüxü nangüxẽẽxüxcèx ya Tupana. ⁶ Natürü yixema yutexe ya tümaãrü ngüchaügüxicatama rüxñüxẽ, rü Tupanapëxewa rü ñoma tayuxüü tixi. ⁷ Rü ngẽma nixi i ore i tá cunangüexẽxü i ngẽma yaxögüxü na nügüna nadaugüxcèx na taxüma i chixexü naxügüxcèx rü taxüema nachiga chixri idexagüxcèx. ⁸ Erü ngẽxguma chi wüxie rü tama meã nüxna tadèuxgu i tümapatacũãxgü rü tümaẽ rü tümanatü, rü maneca tama aixcüma meã Tupanaãxü tayaxõ. Rü wüxi i tama yaxõxüãrü yexera chixecü tixi. ⁹ Rü ngẽxguma chi wüxi i ngexü i yutexü naxcèx ícaxgu na ngẽma yaxögüxü ngixü rüngüxẽẽgüxüxcèx rü tanaxwèxe i 60 ya taunecüarü yexera ngixü nangẽxma rü wüxitama nixi ga ngite ga ngixü yexmacü ga noxrix. ¹⁰ Rü tanaxwèxe i guxüma i duüxüğü ngixü nacüxgü na wüxi i mexü üxcü na yixü. Rü name i meã ngixãcüxü yaexẽecü iyixi, rü meã ngipatawa duüxügüxü yaxucü iyixi, rü yaxögüxüãrü ngüxẽẽruü iyixi, rü daaweexüãrü ngüxẽẽruü iyixi. Rü ngẽmaãcü tanaxwèxe i guxüraüxü i mexü na naxüxü. ¹¹ Natürü tama tanaxwèxe i yaxögüxüãrü puracü nixi i ngixna na nadaugüxü i wüxi i yutecü ega tama 60 wa nanguxgu ya ngirü taunecü. Erü wüxi i yutecü i pacü, rü ngẽxguma ngirü ngüchaü Cristuna ngixü ixügachixẽẽgu, rü tá inaxwèxe na wena naxãtexü. ¹² Rü duüxüğü tá chixri ngichiga nidexagü, erü tama aixcüma iyanguxẽẽ ga yema Cristumaã inaxunetaxü ga noxrix. ¹³ Rü ngima rü düxwa ngextá iyaxáuchigümare, rü náí ya í rü nagu iyarüxãüx, rü düxwa tama ipuracüchaü. Rü tama ngẽmaxicatama ixü, natürü düxwa ixoregütèèx, rü iyangẽxmachigü nawa i ngẽma dexa i tama mexü i togüchiga, rü guxüwama nüxü iyaxu i ngẽma ore i tama mexü. ¹⁴ Rü ngẽmacèx chanaxwèxe i ngẽma yutegüxü i paxüğü na wenaxãrü naxãtegüxü, rü naxããcügüxü, rü mexü i napataarü dauruüğü na yixigüxü. Rü ngẽmaãcü i ngẽma duüxüğü i ngixchi aiexü, rü taxucürüwa chixri ngichiga nidexagü. ¹⁵ Cumaã nüxü chixu i ñaã ore, erü ñuxre i yutecü rü marü nüxü irüxoe i ore i mexü rü Chatanáwe irüxi. ¹⁶ Rü ngẽxguma chi wüxi i ngecü i yaxõxcü rü ngixü nangẽxmagu i ngitanüxü i yutecü, rü name nixi i ngixü irüngüxẽẽ. Rü ngẽmaãcü tãütáma togü i yaxögüxüãrü puracü tá nixi na ngixna na nadaugüxü. Rü ngẽxguma tá nüxü natauxcha i ngẽma togü i yaxögüxü na ngixü nangüxẽẽgüxü i ngẽma yutecü i aixcüma ngixü natauxcüma i ngitanüxüğü i ngixü rüngüxẽẽgüxü. ¹⁷ Rü ngẽma yaxögüxüãrü aëxgacüğü i aixcüma meãma ngema yaxögüxümaã icuáxü, rü name nixi i ngẽma yaxögüxü aixcüma nüxü nangechaügü rü namaã nataãgü. Rü guxüãrü yexera tanaxwèxe i nüxü nangechaügü rü nüxü

narüngüxëëgü i ngema Tupanaarü orexü ixugüxü rü nangúexëëxü. ¹⁸ Erü Tupanaarü orewa rü ñanagürü:

“Tama name i nüxna taxaü i ngëma taxüna i puracüxü”,
ñanagürü. Rü ñanagürü ta:

“Wüxi i puracütanüxü rü tanaxwëxe i nüxü na naxütanüxü i norü puracü”,
ñanagürü i ngëma Tupanaarü orewa. ¹⁹ Rü ngëxguma chi texé nüxü ixuxgu na chixexü naxüxü i wüxi i yaxögüxüârü äëxgacü, rü täütáma tüxü icuxñü ega natauxguma i taxre rü éxna tomaëxpüx i togü i duüxügü i nüxü daugüxü na aixcüma chixexü naxüxü. ²⁰ Natürü ngëma yaxögüxüârü äëxgacügü i aixcüma pecadugu maxëxü, rü name nixí i guxü i yaxögüxüpëxewa cunaxucuxë, na guxüma i ngëma togü i yaxögüxüârü äëxgacügü rü ta namuëxücèx na naxügüãxü i tacü rü chixexü. ²¹ Rü ñuxma Tupanapëxewa rü tórü Cori ya Ngechuchu ya Cristupëxewa rü ngëma daxüçüãx i orearü ngeruügü i Tupana nüxü ngechaügüxüpëxewa, rü cuxü chamu na naga cuxñüxü i ñaã ore i cumaã nüxü chixuxü. Rü chanaxwëxe i ngëma cumaã nüxü chixuxürüü meã cunaxucuxë i guxüma i ngëma yaxögüxü rü nüetama ega woo texé tixígu. ²² Rü ngëxguma texexü quingucuchixëëchaügu na ngema yaxögüxüârü äëxgacü tixixücèx, ¡rü taxü i cuñuxãëxü na namaã cuyumüëxü i wüxi i duüxü i tama nüxü cucuáxü i norü maxü! Natürü name nixí i noxri rü meã nagu curüxñü i ngëma erü ngürüãchi tá wüxi i duüxü i pecadu üechaxü quingucuchixëë, rü cugagu tá nixí erü tama icuxuãë. ¡Rü meã cugüna nadau na tama pecadugu cunguxücèx! ²³ Rü ngëma na cunguxnecaüxü i ñuxguacü, rü name nixí i írarüwa binune cuyaxaxü, rü tama i dexáxicatama. ²⁴ Rü nangëxma i duüxügüarü pecadugü i noxtacüma ngóxü naxüpa na Tupana nüxna çaxü. Natürü nangëxma i to i pecadugü i duüxügüarü rü täütáma nangox ñuxmatáta naãneärü guxwa nanguxgu rü Tupana tüxna icagügu. ²⁵ Rü ngëxgumarüü ta nangëxma i duüxügüarü puracügü i mexü i Tupanacèx naxügüxü i ñuxma marü nüxü idauxü. Rü nangëxma ta i puracügü i mexü i ñuxma tama nüxü idauxü natürü yixcüra tá nüxü idaugüamaxü.

6

¹ Guxãma ya yíxema yaxögüxe rü ixãärü coriãxë, rü tanaxwëxe i tümaärü corixü tangechaü na ngëmaãcü taxucürüwa texé Tupanachiga rü tórü nguxëëtaechiga chixri idexaxücèx. ² Rü ngëxguma chi wüxi ya duüxë ya Tupanaãxü yaxõxë rü wüxi i cori i tümarüü yaxõxümaã tacoriãxgu, rü tama tanaxwëxe i ngëma na tümaëneë yíxücèx nüxü tarüxo na nüxü tangechaüxü i tümaärü cori. Natürü tanaxwëxe i yexeraãcü meã nüxü tapuracü erü tümaärü cori i nüxü tarüngüxëëxü i tümarüü yaxõxü nixí rü tümaëneë i Tupana nüxü ngechaüxü nixí. Pa Timutéux, chanaxwëxe i meãma cunangüexëë i ngëma ore i cumaã nüxü chixuxü, rü guxüma i yaxögüxüpëxewa nüxü quixu.

Tupanaarü ore rü aixcüma tüxü name

³ Rü cumaã nüxü chixu rü nangëxma i duüxügü i namaã nguxëëtaegüxü i ngëma nguxëëtae i tama namaã wüxiguxü i tórü nguxëëtae, rü tama namaã wüxiguxü i tórü Cori ya Ngechuchu ya Cristuarü nguxëëtae i mexü, rü tama namaã wüxiguxü i ngëma nguxëëtae i Tupanaarü orewa ngóxü. ⁴ Rü cumaã nüxü chixu rü yíxema ngëmaãcü nguxëëtaexe rü tügü ticuëxüü rü taxuüma tacuëx. Rü ngëmacèx ngëxürüüxümare i dexa rü naxcèx tachoxügawëxe, rü tama texéga taxñüchaü, rü düxwa ñoma tidawewürüü tixí namaã i ngëma tümacüma. Rü ngëmagagu rü taxãüxãchiwëxe, rü tanuxwëxe, rü togümaã taguxchiga, rü taxúxeaxüma tayaxõ. ⁵ Rü ngëmaãcü i ngëma duüxügü i chixëãëgüxü, rü nügümaã nanuëëcha, rü tama nüxü nacuëxgü i ngëma ore i aixcüma ixíxü, rü nagu narüxñüë rü Tupanaarü orewa nixí i dñeru ngíxü nayauxgüxü. ⁶ Rü aixcüma nixí i Tupanaarü orewa nüxü iyarüngauxü i taxüma i mexü, natürü ngëma mexü rü tümacèxicatama nixí ya yíxema namaã taãëgüxe i ngëma marü tüxü ngëxmaxü. ⁷ Rü yixema rü yexguma noxri ixíraegu, rü ngearü yemaxüãxëmaã tabue i ñoma i

naãnewa. Rü ngëxguma iyuxgu rü taxucürüwa tayange i tórü ngëmaxügü. ⁸ Natürü ngëxguma tüxü nangëxmagu i taxchiru rü tórü òna rü name nixĩ i ngëmamaãtama tataãëgü. ⁹ Natürü ngëma duüxügü i dïeruãxgüchaüxü, rü tama yaxna namaã naxĩnüe i ngëxguma ngëma dïëruarü ngüchaü nüxü poragu. Rü ngëmacèx nagu nayi i muxüma i ngüchaügü i taxuwama mexü i chixexüwa nagagüxü, rü ngëmacèx düxwa i ngëma duüxügü rü poraãcü nachixe rü norü guxümaãma inayarütauxe. ¹⁰ Erü ngëma na dïëruaguama rüxĩnüxü rü ngëma nixĩ i guxüma i chixexügüarü ügü. Rü nangëxma i ñuxre i duüxügü i dïëruaguama rüxĩnüëxü rü ngemacèx Tupanana nixĩgachi. Rü ngemaãcü nügünatama guxchaxü naxãgü rü nügüxütama ngechaü nanguxëëgü..

Tupanaãxü yaxõgüamaxüchiga

¹¹ Natürü cumax, Pa Timutéux, rü wüxi ya yatü ya Tupanaxü yaxõcü quixĩ. ¡Rü ngëmacèx nüxna ixügachi i guxüma i ngëma chixexü! ¡Rü meã Tupanapëxewa namaxü, rü norü ngüchaü naxü, rü meã nüxü yaxõ, rü nüxü nangechaü i duüxügü, rü yaxna namaã naxĩnü! Rü tama name i cugü quicuëxüxü. ¹² ¡Cugü naporaxëë na meã cuyaxõõmaxüçèx rü cunaxüamaxüçèx i Tupanaãrü puracü ega woo tacü rü guxchaxü cuxü üpetügux! ¡Rü cugüna nadau na ngemaãcü taguma cuxna iyanaxoxüçèx i ngema maxü i taguma gúxü! Yerü yema maxüçèx nixĩ ga noxri Tupana cuxü yaxuxü ga yexguma muxüma ga duüxügüpëxewa nüxü quixuxgu na ñuxãcü Ngechuchu ya Cristu-axü na cuyaxõxü. ¹³⁻¹⁴ Rü ñuxma Pa Timutéux, rü napëxewa ya Tupana ya guxãxüma maxëxëëcü, rü napëxewa ya Ngechuchu ya Cristu ga ãëxgacü ga Piratumaã nüxü ixucü ga ñuxãcü Nanatü ya Tupanaãxü na yaxõõxü, rü cuxü chamu na naga cuxĩnüxü i ngëma ore i cumaã nüxü chixuxü. Rü tama chanaxwëxe i cunaxüchicüü i ngëma ore, na taxúema texé tacüçèx cuxü oregüxüçèx rü chixri cuchiga idexaxüçèx. Rü chanaxwëxe i ngëmaãcü meã cunaxü ñuxmatáta ínangu ya tórü Cori ya Ngechuchu ya Cristu. ¹⁵ Erü ngëma ngunexü i Tupana nagu naxwëxexügu rü tá Cristuxü nangoxëë. Erü nüxĩcatama Tupana nixĩ, rü nüma nixĩ i aixcüma mecü yĩxü rü guxüetüwama nangëxmaxü. Rü guxü i ãëxgacügüarü ãëxgacü yĩxü, rü guxü i corigüarü Cori yĩxü. ¹⁶ Rü nüxĩcatama nixĩ na taguma nayuxü. Rü nüma rü poraãcü ínangóonexüwa namaxü, rü taxucürüwa texé ngëma ngóonexüna tangaicama. Taguma wüxi i duüxü nüxü nadau, rü taxuacüma texé nüxü tadau. Nüma rü guxüguma naporaxüchi rü taguma inayarüxo na ãëxgacü yĩxü. Rü ngëmacèx tanaxwëxe i guxãma nüxü ticuëxüügüecha. Rü ngëmaãcü yĩ. ¹⁷ Rü yixema muarü dïëruáxe i ñoma i naãnewa, ¡rü tùmamaã nüxü pixu na tama ngëmamaã tügü ticuëxüügüçèx rü tama nagu tarüxĩnüëxüçèx na ngëma tumaãrü dïëruwa nüxü itayangaugüxü i tumaãrü maxü! Erü ngëma dïëru rü paxa tá nagux. Natürü narümemaë nixĩ i Tupanaga taxĩnü, erü yimawa nixĩ i nüxü itayangaugüxü i tumaãrü maxü. Rü nüma nixĩ i poraãcü tüxna naxããxü i guxüma i tacü i inaxwëxexü na itaãëgüxüçèx. ¹⁸ ¡Rü namaã nüxü ixu i ngëma muarü dïëruãxgüxü, rü name na ngëmamaã mexü naxügüxü rü togü i duüxügüxü nangüxëëgüxü! Rü ngëmaãcü tá namu i ngema mexügü i naxügüxü i Tupanapëxewa. Rü tanaxwëxe i nümagü i muarü dïëruãxgüxü rü na ínamemaregüxü na togüna naxããxü rü namaã nangauxü i ngëma norü ngëmaxügü. ¹⁹ Rü ngëmaãcü tá nüxü nangëxma i norü mexügü i daxügüxü i naãnewa, rü tá nanayauxgü i ngëma maxü i aixcüma ixĩxü.

Pauru rü Timutéuxü namu, rü yemaãcü inayacuëxëë ga norü popera

²⁰ Pa Timutéux, ¡meã namaã nangüxëëtae i guxüma i ngëma ore i cuxü chamuxü! Rü tama name na icurüxĩnüxü i ñoma i naãnecüãxãrü dexagümare i taxuwama mexü rü ngëma ore i doramare ixĩxü i duüxügü nüxü ixugügünetaxü na ore i nawa nüxü icuáxü yĩxü. ²¹ Erü ñuxre i nümagü i ngëma noxrütama cuëxgu íxü, rü düxwa ngëmagagu Tupanana nixĩgachi. Rü chanaxwëxe i Tupana meã pexü narüngüxëë.

Rü nuãma pexna,

Pauru

NORÜ TAXRE GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxë ga Pauru

¹ Pa Timutéux, choma i Pauru nixi i cuxcèx chanaxümatüxü i ñaã popera. Rü choxü nixi ga namuxü ga Ngechuchu ya Cristu, yerü yemaãcü nanaxwèxe ga Tupana. Rü nüma choxü namu na nüxü chixuxüçèx na ñuxäcü tüxü nangëxmaxü i maxü i taguma gúxü, ega aixcüma Ngechuchu ya Cristuaxü yaxögügu. ² Cuxü changechaü, Pa Chaune, Pa Timutéux. Rü chanaxwèxe ya Tanatü ya Tupana rü Ngechuchu ya Cristu ya tórü Cori na cuxü nangüxëëgüxü rü nüxü cungechaütümüügüxü rü cuxü nataãëxëëgüxü.

Tama name i taxãne na Cristuchigaxü ixuxü

³ Guxüguma i chütacü rü ngunecü rü cuxna chacuèxächixü i chorü yumüxëwa, rü poraãcü cuxcèx moxë Tupanana chaxã. Rü nüxü nixi i chapuracüxü i mexü i chauãëmaã, yexgumarüü ga nuxcümaügüxü ga chorü oxigü naxügüxürüü. ⁴ Choma rü nüxna chacuèxächi na ñuxäcü poraãcü chauxcèx cungechaüxü rü chauxcèx cuxaxuxü ga yexguma cuxna íchixüxgu. Rü wenaxärü cuxü chadauxchaü na aixcüma chataãëxüçèx. ⁵ Erü nüxna chacuèxächi na ñuxäcü aixcüma Tupanaãxü cuyaxõxü. Rü curü noxë ga Loída rü cue ga Euníchia rü tüma rü woetama tüxira Tupanaãxü tayaxögü rü nüxü chacuèx i ñuxma rü cuma rü ta aixcüma cuyaxõxü. ⁶ Rü ngëmacèx cumaã nüxü chixu na cugü cuporaxëëxü na yexeraãcü cunaxüamaxüçèx i ngëma Tupanaärü puracü ga naxcèx cuxna naxããxü ga cuèx ga yexguma noxri cuxü chingögüãcüma cumaã chayumüxëgu. ⁷ Yerü Tupana rü tama tüxna nanamu ga naãë i tüxü muüëëxü. Natürü tüxna nanamu ga Naãë i Üünexü na tüxü naporaxëëxüçèx na aixcüma duüxügüxü ingechaügüxüçèx rü meã yigümaã icuáxüçèx. ⁸ Rü tama chanaxwèxe na cuxänexü na nüxü quixuxü i nachiga ya tórü Cori. Rü ngëxgumarüü ta tama chanaxwèxe i chauxcèx cuxãne i ngëma na chapoxcuxü naxcèx i Tupanaärü ore. Rü name nixi i yaxna namaã cuxinü i ngëma ngúxü i cuxcèx ínguxü nagagu i ngëma ore i mexü i nüxü quixuxü. Rü Tupana tá cuxü naporaxëë. ⁹⁻¹⁰ Rü Tupana tüxü namaxëxëë rü tüxü nade na naxcèxicatama imaxëxüçèx. Natürü tama tacü rü mexü na ixüxügagu nixi ga yemaãcü tamaã namecümaxü ga Tupana. Natürü yemaãcü tüxü narüngüxëë yerü woetama yema nixi ga nanaxwèxexü yerü Ngechuchu ya Cristugagu tüxü nangechaü. Rü nüma ya Tupana ga tautama naãne üxgumama tüxü ngechaücü, rü yexguma ínanguxgu ga tórü maxëxëëruü ga Ngechuchu ya Cristu, rü yexguma nixi ga Tupana tüxü nüxü dauxëëxü na ñuxäcü poraãcü tüxü nangechaüxü. Rü nüma ga Cristu nixi ga iyanaxoxëëãxü na iyuxuchixü yerü nüma rü yuwa ínarüda rü wena namaxü. Rü norü orewa tüxü nüxü nacuèxëë na yixema rü ta tüxü nangëxmaxü i ngëma maxü i taguma gúxü ega nüxü yaxõxgu. ¹¹ Rü Tupana choxü ningucuchixëë na nüxü chixuxüçèx i ngëma norü ore i mexü. Rü choxü namu na ngëma oremaã chanangüxëëxüçèx i duüxügü i guxüwama. ¹² Rü ngëmacèx nixi i poraãcü ngúxü chingexü rü chapoxcuxü i ñuxmax. Natürü tama naxcèx chaxãne i ngëma, erü choma nüxü chacuèx na texéaxü chayaxõxü. Rü nüxü chacuèx na naporaxü i nüma na nüxna nadauxüçèx i ngëma puracü i choxna naxãxü rü namaã inacuáxüçèx i chauãë i guxügutáma ñuxmatáta ngëma ngunexü i nagu wena núma naxüxü. ¹³ Rü chanaxwèxe i meãma nagu quixü i ngëma nguxëëtae i mexü ga chauxütawa naxcèx cungúxü. Rü name nixi i meã nüxü cuyaxõõma ya Ngechuchu ya Cristu rü meã nüxü cungechaü i guxüma i duüxügü, erü Cristuarü duüxü quixi. ¹⁴ Rü name nixi i Tupanaãë i Üünexü i tawa maxüxüärü ngüxëëmaã ícunapoxü i ngëma nguxëëtae i mexü i Tupana cuxna

ãxũ. ¹⁵ Cuma marũ nüxũ cucuèx rü guxũma ga yema yaxõgũxũ ga Áchiaarũ naãnewa ne ìxũ rü marũ choxna naxĩgũ. Rü yematanũwa nayexma ga Figueru rü Ermóquene. ¹⁶ Onesíferu rü muèxpũxcũna choxũ nataãèxèè, rü tama chauxcèx naxãne i ngẽma na chapoxcuxũ. Rü ngẽmacèx chanaxwèxe i tórũ Coriaxũ nangechaũtũmũũgũ i guxũma i natanũxũgũ. ¹⁷ Rü yexguma noxritama Dumawa nanguxgu ga nümax, rü chauxcèx nadauecha rü ñuxmata choxũ iyangau. ¹⁸ Cuma meãma nüxũ cucuèx ga ñuxãcũ tüxũ na nangũxèèxũ ga Onesíferu ga Epéchiuarũ ìãnewa. Rü ngẽmacèx chorũ yumũxèwa naxcèx íchaca na Tupanaãxũ nangechaũtũmũũxũcèx i ngẽxguma wena ñoma i naãnewa naxũxgu ya tórũ Cori ya Ngechuchu.

2

Ngechuchu ya Cristuarũ puracũtanũxũ i mexũchiga

¹ Rü ñuxma, Pa Chaune, Pa Timutéux, ¡rũ cugũ naporaxèè namaã i ngẽma pora i Ngechuchu ya Cristu cuxna ãxũ! ² Yema ore ga chauxũtawa nüxũ cuxĩnũxũ ga yexguma muxũma ga duũxũgũpèxewa nüxũ chixuxgu, rü chanaxwèxe i ñuxma cuxi ngẽma oremaã cunangúexèè i togũ i yatũgũ i meã naãèxũ cuèxgũxũ na nüxĩ togũxũ nangúexèèxũcèx namaã i ngẽma ore. ³ Rü tama name i naxcèx cumuũ na Ngechuchu ya Cristuarũ oregagu ngúxũ quingexũ. Natürũ name i namaã cupora ñoma wüxi i mexũ i norũ churararũ. ⁴ Rü wüxi i duũxũ i churarawa ngẽxmaxũ, rü taxucürwama to i puracũ i tama churaraarũ ixĩxũgu narũxĩnũ. Natürũ ngẽma norũ ãèxgacũ nagu namuxũ i puracũgu nixĩ i naxĩnũxũ na ngẽmaãcũ norũ ãèxgacũxũ nataãèxèèxũcèx. ⁵ Rü ngẽxgumarũ ta wüxi i duũxũ i wüxi i ñucawa nügũ ingucuchixèèxũ, rü taxuacũma nanayaxu i norũ ãmare ega chixri naxĩnũcèxwèxegu rü tama ngẽma ñucaarũ ãèxgacũga naxĩnũgu. ⁶ Rü texé ya naãnewa puracũxe rü name nixĩ i tüxira tanayaxu i tümanetũarũ o. ⁷ ¡Rü guxũguma nagu rüxĩnũ i ñãã ore i cumaã nüxũ chixuxũ! Rü nüma ya Cori ya Ngechuchu tá cumaã inananguxũxèè i guxũma na nüma nanaxwèxexũãcũma cunaxũxũcèx i ngẽma puracũ. ⁸ ¡Rü nüxna nacuèxãchi ya Ngechuchu ya Cristu ya Dabítanũxũ ga guma yuwa írũdacũ! Rü yimachiga nixĩ i ngẽma ore i mexũ i duũxũgũmaã nüxũ chixuxũ. ⁹ Rü ngẽma oregagu nixĩ i ngúxũ na chingexũ rü ñoma wüxi i máètaxũrũ nũma poxcupataũwa cadenamaã chichotaxũ. Natürũ Tupanaãrũ ore i mexũ, rü guxũwama nanguama rü taxucürwama texé tayachota. ¹⁰ Rü ngẽmacèx yaxna namaã chaxĩnũ i ngẽma ngúxũ i chingexũ naxcèx i ngẽma duũxũgũ i Tupana dexũ. Erũ chanaxwèxe i nümagũ rü ta Ngechuchu ya Cristuaxũ nayaxõgũ, rü ngẽmaãcũ na nayauxgũãxũcèx i maxũ i mexũ i taguma gúxũ. ¹¹ Rü pemaã nüxũ chixuxchaũ i wüxi i ore i aixcũma ixĩxũ. Rü ngẽxguma Cristu yuxũrũ norũ orecèx iyuegu, rü naxrũ tá ta wena tamaxè na nüma ñangèxmaxũwa ingèxmagũxũcèx. ¹² Rü ngẽxguma ñoma i naãnewa yaxna namaã ixĩnũègu ega ngúxũ ingexgu, rü daxũguxũ i naãnewa rü wüxigu namaã ãèxgacũ tá tixĩgũ. Rü ngẽxguma tama Cristuxũ icuáxchaũgu i ñoma i naãnewa, rü nüma rü tãütáma tüxũ nacuáxchaũ i daxũguxũ i naãnewa. ¹³ Natürũ woo ñuxguacũ i yixema rü tama aixcũma naxũxgu i ngẽma Tupanamaã ixunetaxũ, natürũ nüma ya Tupana rü guxũguma nayanguxèè i ngẽma tamaã inaxunetaxũ, erũ taxuacũma nügũtama nawomũxèè.

Wüxi i mexũ i puracũtanũxũ i Tupana namaã taãèxũchiga

¹⁴ Rü ngẽma yaxõgũxũ i cuxũtawa ngẽxmagũxũ, rü name nixĩ i Tupanaegagu nüxna nüxũ cucuèxãchixèè na tama nuxcũmaũgũxũ i ore i taxuwama mexũcèx nügũmaã na yaporagatanũcũxũcèx. Erũ ngẽma rü wüxi i chixexũ nixĩ, rü nanachixèèxèè i ngẽma duũxũgũ i nüxũ ñnũèxũ. ¹⁵ ¡Rü cugũ naporaxèè na meã cunaxũxũ i Tupanaãrũ puracũ na cumaã nataãèxũcèx i ngẽxguma napèxewa cunguxgux rü ngemaãcũ taxucèxma cuxãnexũcèx i ngẽxguma nüma cuxna nacaxgu naxcèx i curũ puracũchiga! ¡Rü ngẽmacèx name i aixcũma meã namaã cungúexèètae i ngẽma ore i mexũ i aixcũma ixĩxũ! ¹⁶ ¡Rü nüxũ

rüxo i ñoma i nañnecũãxãrũ dexagũmare i taxuwama mexũ! Erũ ngẽma duũxũgũ i ngẽma dexagũmaregu ãxũ, rũ guxũguma yexeraãcũ chixexũgu nayi. ¹⁷ Rũ ngẽma norũ nguxẽẽtae i ngẽma duũxũgũ, rũ ñoma wũxi i ðaaweane i tũxũ ãyimachixẽẽxũrũũ nixĩ. Rũ yema nixĩ ga nũxũ ngupetũxũ ga Imenũ rũ Firetu. ¹⁸ Yerũ nidoragũmare ga nũxũ na yaxugũexũ rũ marũ na nangupetũxũ i yuetaarũ dachiga. Rũ yemaãcũ nanawomũxẽẽgũ ga ñuxre ga duũxũgũ na tama noxrirũũ yaxõgũãxũcèx i Tupanaãrũ ore. ¹⁹ Natũrũ Tupanaãrũ ore rũ taguma inayarũxo rũ taguma naxũchicũũ. Rũ ngẽma norũ orewa rũ ñanagũrũ:

“Tõrũ Cori ya Tupana nũxũ nacuèx i texé tixĩ ya norũ duũxũgũ ixĩgũxe. Rũ guxãma ya yĩxema nũxũ ixuxe na Ngechuchu ya Cristu rũ tũmaãrũ Cori yĩxũ, rũ name nixĩ i nũxna tixĩgachi i guxũma i chixexũ”,

ñanagũrũ i ngẽma norũ orewa. ²⁰ Wũxi i duũxũ i dũeruãxũchixũ rũ napatawa nangẽxma i poratu i uirunaxcèx rũ dũerumũnaxcèx. Rũ nangẽxma ta i poratu i naĩnaxcèx rũ waixũmũnaxcèx. Rũ ngẽma poratu i uirunaxcèx rũ dũerumũnaxcèx rũ mexũ i norũ õnacèx nixĩ. Natũrũ ngẽma poratu i naĩnaxcèx rũ waixũmũnaxcèx rũ guxchirechixũ nixĩ. ²¹ Rũ ngẽxguma wũxi i yaxõxũ naxwèxegu na aixcũma mexũ i Tupanaãrũ puracũtanũxũ na yĩxũ, rũ name nixĩ i nũxna nixũgachi i guxũma i chixexũ. Rũ ngẽxguma tá nixĩ i Tupanapẽxewa aixcũma naxũnèxũ na naxũãxũcèx i nagũxũraũxũ i puracũ i Tupana namaã nũxũ ixuxũ. ²² ¡Nũxũ rũxo i guxũma i ngẽma chixexũ i ngextũxũcũgũ nagu rũxĩnũèxũ! ¡Rũ meã Tupanapẽxewa namaxũ rũ aixcũma nũxũ yaxõ! ¡Rũ nũxũ nangechaũ i guxũma i duũxũgũ, rũ tãxũ i namaã cunuxũ! ¡Rũ ngẽmaãcũ namaxũ wũxigu namaã i guxũma i ngẽma duũxũgũ i aixcũma Tupanacèx maxèxũ rũ ngemaãcũ yumũxègũxũ!. ²³ Rũ tama name i naxcèx icurũxĩnũ i ngẽma dexagũ i taxuwama mexũ. Erũ ngẽma dexagũgagu rũ dũxwa nũgũchi naxaie i duũxũgũ. ²⁴ Rũ wũxi i Tupanaãrũ puracũtanũxũ rũ tama name na texemaã nũcèx nadauxũ. Rũ narũmemae nixĩ na guxãma namecũmaxũ. Rũ nanaxwèxe i yaxna namaã naxĩnũãcũma meã duũxũgũxũ nangũxèẽ i Tupanaãrũ ore. ²⁵⁻²⁶ Rũ wũxi i Tupanaãrũ puracũtanũxũ rũ name na yaxna namaã naxĩnũãcũma meã nayaxucuxègũãxũ i ngẽma duũxũgũ i tama irũxĩnũèchaũxũ. Rũ name i ngẽmaãcũ ãnananguxèẽ na Tupana nũxũ rũngũxèẽxũ i ngẽma duũxũgũ na nũxũ naxoèxũcèx i norũ chixexũ rũ nũxũ nacuèxgũxũcèx i ngẽma ore i aixcũma ixĩxũ. Erũ Tupana nanaxwèxe na naxuãègũxũ i ngẽma duũxũgũ rũ nawa ãnanguxũxũ i ngẽma chixexũ i ngoxo i Chataná nagu nayixèẽxũ na noxrũtama ngũchaũ namaã naxũxũcèx.

3

Nuxãcũ tá nixĩ i duũxũgũcũma i ngẽxguma nagũxchaũgu i naãne

¹ Rũ chanaxwèxe i nũxũ cucuèx rũ ngẽxguma nagũxchaũgu i naãne rũ tá nangẽxma i ãcũmaxũgũ rũ guxchaxũgũ naxcèx i duũxũgũ. ² Rũ duũxũgũ rũ tá nũgũguxicatama narũxĩnũè, rũ norũ dũeruguama tá narũxĩnũè. Rũ tá nũgũ nicuèxũxũgũ, rũ ngẽmaãcũ tãũtãma nũxũ nacuèxgũchaũ i togũ i duũxũgũ i tama naxrũũ taarũ dũeruãxũgũxũ. Rũ chixri Tupanachiga tá nidexagũ, rũ tãũtãma nanatũga rũ naèga naxĩnũèchaũ. Rũ tãũtãma moxè inaxã i ngẽxguma Tupana nũxũ rũngũxèẽgu, rũ ngẽmaãcũ tãũtãma nũxũ nacuèxgũchaũ i Tupanaãrũ ore. ³ Rũ tãũtãma nagu narũxĩnũè i togũ i duũxũgũxũ na nangechaũgũxũ, rũ tãũtãma nũxũ nangechaũtũmũũgũ. Rũ tá naxoregũtèèxgũ, rũ tãũtãma nũgũ naporaexèẽ na yaxna namaã naxĩnũèxũcèx i naxũneãrũ ngũchaũgũ. Rũ tá nichixecũma, rũ tá naxchi naxaie i guxũma i ngema mexũ. ⁴ Rũ duũxũgũechitawèxegũxũ tá nixĩgũ, rũ nuèwèxexũ tá nixĩgũ, rũ nũgũ icuèxũgũxũ tá nixĩgũ. Rũ tá norũ ngũchaũcèxama nadaugũ, rũ tãũtãma Tupanaxũ nacuèxgũchaũ. ⁵ Rũ tá nũgũ nayaxõgũxũchinetaxèẽ natũrũ ngẽma norũ chixexũ i naxũgũxũwa tá nangoxoma na tama aixcũma yaxõgũãxũ i ngẽma ore i mexũ. Rũ ngẽma duũxũgũ i ngẽmaãcũ maxèxũ, rũ tama name na namaã cuxãmũcũxũ rũ natanũgu cuxãxũ. ⁶⁻⁷ Erũ ngẽma duũxũgũtanũwa nangẽxmagũ i nũmaxũ i ãpatagu ichocuetanũxũ. Rũ norũ nguxẽẽtaemaã nayawomũxèẽgũ i ngẽma ngexũgũ i

ngema ngëxmagüxü i tama naãëxü icuáxü rü chixri maxëxü. Rü ngëma ngexügü, rü norü ngüchaügütama chixexüwa nanagagü, rü ngëmacèx woo guxüguma nangúe natürü taguma aixcüma nüxü nacuèxgü i ngëma ore i aixcüma ixixü. ⁸ Rü ngëma duüxügü i chixexümaã nguxëëtaegüxü, rü chixexüguxicatama narüxñüë, rü tama aixcüma nayaxögü i Tupanaärü ore. Rü naxchi naxaie i ngëma ore i aixcüma ixixü, naxrüü ga yema yuüxügü ga Yane rü Yáübre ga tama Moïchéga ñnüëchaüxü. ⁹ Natürü täütáma muxü i duüxügü nüxü nayaxögü. Erü guxüwama i duüxügü rü tá nüxü nicuèxächitanü na wüxi i duüxügü i chixexügu rüxñüexü rü ngeãëmarexü yixigüxü naxrüxü ga yema taxre ga tama Moïchéga ñnüëchaüxü.

Ucuxëmaã inyacuèxëë ga Pauru na Timutéumaã yadexaxü

¹⁰⁻¹¹ Natürü cumax, Pa Timutéux, marü nüxü cucuèx ga ñuxäcü meã na chanangúexëëxü ga duüxügü, rü ñuxäcü meã chamaxüxü, rü ñuxäcü nagu charüxñüxü rü meã chayaxöxü, rü ñuxäcü yaxna namaã chaxñüxü ga duüxügü rü nüxü changechaüxü. Rü cuma nüxü cucuèx ga ñuxäcü na chaugü chaporaxëëxü na yaxna namaã chaxñüxü i guxchaxügü. Yerü ga duüxügü rü chowe ningexütanü na choxü yamèxgüxüçèx. Rü cuma rü nüxü cucuèx ga tacü choxü na üpetüxü ga Aütioquíawa rü Icúniüwa rü Listrawa, rü ñuxäcü chowe na yangexütanüxü rü poraäcü ngüxü chingexü. Natürü tórü Cori ya Tupana choxü ínapoxü na tama choxü yamèxgüxüçèx. ¹² Rü aixcüma cumaã nüxü chixu rü guxãma ya yíxema naxwèxegüe na Ngechuchu ya Cristucèx tamaxëxü, rü togü tá tümachi naxaie rü chixri tá tümamaã nachopetü. ¹³ Natürü ngëma duüxügü i chixecümagüxü rü ngëma duüxügü i idoratèèxgüxü rü yexeraxü i chixexügu tá nayi. Erü Chataná marü nayawomüxëëgü, rü ngëmacèx nüxü togüxü nawomüxëëgü. ¹⁴ Natürü i cuma rü name nixü i guxüguma meã nagu quixü i guxüma i ngëma ore i marü cungüxü. Erü cumatama rü nüxü cucuèx na aixcüma yixü i ngëma ore, rü nüxü cucuèx na texégü tixigüxü ga guxema namaã cuxü nguxëëgüxe. ¹⁵ Rü cuma nüxü cucuèx rü cubuxgumamatama nawa cungux i ngëma Tupanaärü ore i üünexü. Rü ngëmawa cunayaxu i cuèx na nüxü cucuáxüçèx i ñuxäcü tüxü na nangëxmaxü i maxü i taguma gúxü ega Ngechuchu ya Cristuaxü yaxögügu. ¹⁶ Rü guxüma i Tupanaärü ore i ümatüxü rü nügüãëwatama nanayaxu ga Tupana. Rü ngëma ore rü name na duüxügüxü namaã ingúexëëxü, rü namaã yaxucuxëgüxü rü namaã iyanawëxächixëëgüxü, rü namaã nangúexëëxü na meã Tupanapëxewa namaxëxüçèx. ¹⁷ Rü ngëmaäcü i ngëma ore rü tüxü narüngüxëë ya yíxema Tupanaärü ixixë, na meã nüxü tacuáxüçèx i ngëma Tupana naxwèxexü rü ítamemarexü na tanaxüxü i nagúxüraüxü i puracü i Tupana tümamaã nüxü ixuxü.

4

¹⁻² Rü nüma ya Ngechuchu ya Cristu ya núma tá ücü na nüxü yacagüxüçèx i ngëma duüxügü i maxëxü rü ngëma marü yuechiréxü, rü yimapëxewa rü Tupanapëxewa cuxü chamu na nüxü quixuxüçèx i ngëma ore i mexü. Rü ngëxguma cuxü yatauxchaächigu rü woo cuxü naguxchagu, rü chanaxwèxe i nüxü quixuama i ngëma ore. Rü ngëmaäcü chanaxwèxe na icuyanawëxächixëëgüxü rü meã cuyaxucuxëgüxü rü nüxü cunangúchaüxëëxü i duüxügü. Rü name nixü i yaxna namaã cuxñüäcüma meã cunangúexëë. ³ Erü yixcüra i duüxügü rü täütáma nüxü naxñüëchaü i ngëma nguxëëtae i mexü. Erü ngëma duüxügü rü nichixecüma. Rü ngëmacèx naxcèx nadaugü i norü ngúexëëruügü i nüma nanaxwèxegüxüäcüma nangúexëëxü. ⁴ Rü täütáma nüxü naxñüëchaü i Tupanaärü ore i aixcüma ixixü. Erü ngëma ore i doramare ixixüguama tá narüxñüë. ⁵ ;Natürü cuma rü meã cugüna nadau, rü ínaxuãë, rü namaã napura ega ngüxü cuxü üpetügu! ;Rü nüxü ixuama i ore i mexü i tüxü maxëxëëxü, rü meã yanguxëë i ngëma puracü i Tupana cuxna äxü! ⁶ Täütáma muxü i ngunexü ñoma i naãnewa changëxma erü marü choxü ningaica na Tupanaärü puracü chaxüxügagu chayuxü rü

choxü na yamèxgüxü i duüxügü. ⁷ Rü choma rü marü chayanguxëë i ngema puracü i Tupana choxna äxü. Rü ñuxma na nagúxü i ngema puracü rü taguma nüxü charüxo na chayaxõxü. ⁸ Rü ñuxma rü marü Tupana choxü namaã nanguxü i ngëma ämare i mexëchixü ya tórü Cori ya Ngechuchu ya äëxgacü ya mecü tá choxna äxü i ngëxguma wenaxârü ñoma i naãnewa naxüxgu. Rü täütáma chaxica choxna nanaxã i ngëma ämare, natürü tá tüxna nanaxã ya guxãma ya yíxema tümaârü ngúchaümaã ínanguxëëgüxe na wenaxârü núma naxüxü.

Timutéuxü naxucuxë ga Pauru

⁹ Cumaã nüxü chixu rü chanaxwëxe i paxa nuã cuxü, rü choxü ícuyadau. ¹⁰ Dema rü ñoma i naãneârü ngëmaxügu naxínüxügagu choxna nixü rü ñãne ga Techarónicawa naxü. Rü Crechéüte rü Gárataanewa naxü, rü Titu i Darumáchiaanewa. ¹¹ Rü Lucaxicatama nixí i ñuxma chauxütawa ngëxmaxü. Rü chanaxwëxe i naxcëx cudau i Marcu na nuã cunagaxüçëx. Erü núma rü chauxcëx name na choxü na nangüxëëxü i ñãã puracüwa. ¹² Rü Tíquicu rü ñãne ya Epéchiuwa chanamu. ¹³ ¡Ngëxguma nuã cuxüxgu rü nuã nange i chorü gáuxüchiru ga ñãne i Tróawa ngëxmaxü ga Carputatawa chatáxü! Rü chanaxwëxe i nuã cunana i chorü poperagü. Rü guxüârü yexera chanaxwëxe na nua cunanaxü i chorü poperagü i idixgüpütaxü. ¹⁴ Areyáüdrü i cobrenaxcëx i buetarearü üwa puracüxü rü poraãcü chixri chomaã naxüpetü. Natürü Tupana nüxü nacüx i ñuxãcü tá na napoxcuãxü naxcëx ga yema chixexü ga chomaã naxüxü. ¹⁵ ¡Meã cugüna nadau na tama chixexü cumaã naxüxüçëx! Erü poraãcüxüchima naxchi naxai i Tupanaârü ore i mexü. ¹⁶ Yexguma noxrixüchima äëxgacügüpëxewa chaugüétüwa chideaxgu rü taxúema choxü tarüngüxëë. Guxüma choxna nibuxmü. Natürü tama chanaxwëxe ya Tupana rü nagu narüxínü i ngëma. ¹⁷ Natürü tórü Cori choxü naporaxëë rü choxü narüngüxëë na choxü natauxchaxüçëx na nüxü chixuxüçëx ga norü ore i mexü i tüxü maxëxëëxü. Rü yemaãcü guxüma ga yema duüxügü ga tama yaxõgüxü ga yéma yexmagüxü rü nüxü naxínüë ga yema ore. Rü yemaãcü tórü Cori ya Ngechuchu choxü ínanguxuchixëë ga yexguma taxü ga äücümaxüwa chayexmagu. ¹⁸ Rü núma ya tórü Cori tá choxü ínanguxuchixëë nawa i guxüma i chixexügü. Rü tá choxna nadau na ngextá äëxgacü íyíxüwa choxü nagaxüçëx. Rü name i guxüguma nüxü ticüxüügü. Rü ngëmaãcü yí.

Pauru rü wenaxârü Timutéuxü narümoxë rü naxcëx ínaca na Cori ya Ngechuchu ya Cristu nüxü rüngüxëëxü

¹⁹ Chanaxwëxe i chauégagu nüxü curümoxë i Prisila, rü Aquiru, rü Onechéperutanüxügü. ²⁰ Eratu rü ñãne i Corítiugu narüxãüx. Rü Turuquínu rü idaawexüma ñãne i Miretuwa chanatëx. ²¹ Rü naxüpa i gáuanexü rü chanaxwëxe i nuã cuxü. Rü cuxü narümoxëgü i Eubúru, rü Prudëte, rü Linu, rü Cádizia, rü guxüma i taeneëgü i yaxõgüxü. ²² Rü chanaxwëxe i tórü Cori ya Ngechuchu ya Cristu cumaã nangëxma, rü Tupana pexü narüngüxëë ya guxãma i pemax.

Rü nuãma pexna,
Pauru

POPERA GA TITUCAᶆ NAXÜMATÜXÜ GA PAURU

Tituxü narümoxë ga Pauru

¹⁻² Pa Titux, choma i Pauru i Tupanaârü puracütanüxü nixi i cucxëx chanaxümatüxü i ñaã popera. Rü Ngechuchu ya Cristu nixi ga choxü mucü na ngëma duüxügü i Tupana dexümaã nüxü chixuxüçëx i norü ore na Tupanaãxü yaxögüãxüçëx rü nüxü nacuëxgüxüçëx i ngëma norü ore i aixcüma ixixü i tüxü rüngüxëxü na naxcëx imaxëxüçëx. Rü ngëmaãcü Tupanaãxü tayaxögü rü naxcëx tamaxëchaü erü tanayauxgüchaü i ngëma maxü i taguma gúxü. Rü ngëma maxü i taguma gúxü nixi ga nuxcümaxüchima ga yexguma tauta naãne üxgu Tupana ya taguma idoracü nüxü ixuxü. ³ Rü ñuxma rü marü nawa nangu na Tupana tüxü nüxü cuëxëxü i ngëma norü ore i mexü i tüxü maxëxëxü. Rü ngëmacëx nümatama ya Tupana ya tórü maxëxëruü choxü namu na nüxü chixuxüçëx i ngëma norü ore. ⁴ Pa Titux, cuma rü chaune quixi i Tupanaârü orewa yerü chauxütawa cunayaxu ga Tupanaârü ore ga noxri rü ñuxma rü chauxrü cuyaxö. Rü chanaxwëxe i cucü narüngüxëëgü rü cucü nataãëxëëgü ya Tanatü ya Tupana rü Ngechuchu ya Cristu ya tórü maxëxëruü.

Tituarü puracü ga yexguma Crétawa nayexmagu

⁵ Rü yexguma Crétaarü capaxügu cucü chamuxgux, rü cumaã nüxü chixu na yema yaxögüxütanüwa cunaxüxü ga yema puracü ga tama chinguxëxü ga yexguma cuxna yéma chataegugu. Rü yemacëx cumaã nüxü chixu na wüxichigü ya ñãnewa rü nüxü cuxunetaxü i tupaucaarü ãëxgacügü na ngema yaxögüxümaã inacuëxgüxüçëx, yema cucü chamuxrüü. ⁶ Rü wüxi i ãëxgacü i yaxögüxüârü, rü name i meã namaxü na taxúema chixri nachiga idexagüxüçëx. Rü name i wüxitama tixi ya namëx. Rü naxäcügü rü name na yaxögüãxü rü meã namaxëxü na taxúema nüxü ixuxüçëx na chixri namaxëxü rü tama nanatüga naxinüxü. ⁷ Erü yixema yaxögüxüârü ãëxgacü ixixë, rü Tupanaârü puracü nixi i taxüxü. Rü ngëmacëx tanaxwëxe i aixcüma meã tamaxü. Rü tama name i wüxi i yatü i chixecümaxü tixi rü chixexügu rüxünüxü tixi. Rü tama name na tangãxüxü, rü nucëx tadauxü, rü togü i duüxügüxü tawomüxëxü norü dïerucëx. ⁸ Natürü narümemae na guxüguma meã duüxügüxü tayaxuxü i tümapatawa, rü aixcüma nüxü tangechaü i ngëma duüxügü i meã maxëxü. Rü tanaxwëxe i wüxi i yatü i aixcüma tümãëxü cuáxe tixi, rü guxüguma duüxügümaã mecümaxë tixi, rü aixcüma Tupanacëx maxüxë tixi, rü guxüguma meã tügümaã icuáxe tixi. ⁹ Rü yixema yaxögüxüârü ãëxgacü ixixë rü name i nagu tixü i ngëma ore i aixcüma ixixü ga tümamaã nüxü ixuxü na tümã rü ta togüxü tangüexëxüçëx i ngëma ore i mexü, na ngëmaãcü nüxü tanangüchaüxëxüçëx rü nüxü tayaxögüxëxüçëx i ngëma duüxügü i noxri tama yaxögüchaüxü. ¹⁰ Erü nangëxma i muxüma i yaxögüchirëxü i tama aixcüma irüxünüëchaüxü. Rü ngëma guxüârü yexera tama irüxünüëchaüxü nixi i ngëma Yudügu i yaxögüchirëxü i ñuxma naxwëxëgüxü na nuxcümaügüxü i nacümawe naxixü i ngëma yaxögüxü. Rü nümagü rü ore i taxuwama mexüxü nixugügü, rü ngëmaãcü duüxügüxü nawomüxëëgü. ¹¹ Natürü ngëma duüxügü i ngëmaãcü chixri nguxëëtaegüxü, rü chanaxwëxe i noxtacüma icuyanangeëxgüxëë. Erü muxüma i duüxügüxü nachixexëëgü rü ñuxmata ñuxre ya ñpatawachigü rü nanachixexëë i guxüma i duüxügü na tama aixcüma Tupanaãxü yaxögüãxüçëx. Rü ngëma ore i taxuwama mexümaã duüxügüxü nangüxëë na ngëmaãcü tüxü nawomüxëëgüãcüma ngixü nayauxgüxüçëx i dïeru. ¹² Rü wüxi ga yematama capaxüçüãx ga norü tupanaârü orearü urüü nixi ga natanüxügüxütama ixuxü rü ñaxü:

“Rü ñaã Cretacüãx i duüxügü rü guxüguma doratëëxgüxü nixigü, rü ñoma naëxügürüü nidürae, rü nitaanü, rü nixoxochi”, ñaxü. ¹³⁻¹⁴ Rü aixcüma nixi ga yema ore ga nüxü

yaxuxü ga yema yatü. Rü ngëmacèx chanaxwèxe i poraäcü cuyaxucuxëgü i ngëma yaxögüxü na aixcüma meã yaxögüãxüçèx, rü tama nagu naxïxüçèx i ngëma Yudiügücüma. Rü chanaxwèxe i namaã nüxü quixu na tama naga naxïnüëxüçèx ega tacü namuãxgu i ngëma duüxügü i tama nüxü cuëxgüchaüxü i ore i aixcüma ixïxü. ¹⁵ Rü yixema aixcüma Tupanapëxewa mexë rü guxüwama tame. Natürü yixema tama aixcüma Tupanapëxewa mexë, rü taxucürüwa tacü rü nacüma i nagu tixüxümaã tügü tamexëë. Rü woo tümaãëwa nagu tarüxïnüxüwa rü tachixe erü ngëma nacüma i nagu tixüxümaã Tupanapëxewa tügü tamexëëchaü. ¹⁶ Rü ngëma duüxügü i ngëmagu rüxïnüëxü rü nügü yaxugügügu rü Tupanaxü nacüèx, natürü ngëma nümagü naxügüxüwa nüxü tacüèx na tama aixcüma yïixü na Tupanaxü nacüèxgüxü. Rü nümagü rü Tupanapëxewa nichixe, rü tama naga naxïnüë, rü taxuwama nime na tacü rü mexü naxügüxü.

2

Nguxëëtae i aixcüma mexü

¹ Natürü i cuma, Pa Titux, rü name i guxügütáma ngëma mexü i nguxëëtaemaã cunangüexëë rü taguma nüxna quixügachi. ² ¡Rü meã yaxucuxëgü i ngëma yatügü i yaguãxgü na aixcüma meã naãëxü nacuaãcüma namaxëxüçèx, rü taguma nadauxcüraxüwèxegüxüçèx, rü guxüguma meã nagu na naxïnüëxüçèx! ¡Rü nangüexëë na aixcüma meã Tupanaãxü yaxögüãxüçèx, rü guxü i duüxügüxü nangechaügüxüçèx, rü yaxna namaã naxïnüëxüçèx ega woo tacü rü guxchaxü nüxü üpetügux! ³ Rü ngëxgumarüü ta chanaxwèxe i meã cuyaxucuxëgü i ngëma ngexügü i yaguãxgü na meã Tupanapëxewa namaxëxüçèx. Rü tama name na yaxoregütèëxgüxü, rü nangãxëwèxegüxü. Rü name nixï i guxü i duüxügüpëxewa rü meã namaxë. ⁴⁻⁵ Rü ngëma ngexügü i yaguãxgü rü name nixï i meã na nangüexëëãxü i ngëma ngexügü i paxügü na aixcüma natexü rü naxäcügüxü nangechaügüxüçèx, rü meã naãëxü nacüèxgüxüçèx, rü mexüguxicatama na naxïnüëxüçèx, rü meã napatana nadaugüxüçèx, rü guxü i duüxügümaã namecümagüxüçèx, rü aixcüma natega naxïnüëxüçèx na taxüema chixri Tupanaärü orchiga idexagüxüçèx. ⁶ ¡Rü ngëxgumarüü ta meãma yaxucuxëgü i ngëma ngextüxüçügü na aixcüma meã naãëxü nacuaãcüma namaxëxüçèx rü tama nadauxcüraxüwèxegüxüçèx! ⁷ ¡Rü cumatama rü name nixï i meã napëxewa cumaxü i guxüwama na ngëmaäcü wüxi i norü cuëxruü i mexü quiixüçèx! Rü ngëxguma cunangüexëëgu, rü cunaxwèxe i mexügu curüxïnüäcüma cunangüexëë rü tama ñnucäcüma namaã nüxü quixu i ngëma ore. ⁸ Rü ngëxguma ngëmaäcü meã cunangüexëëgu i ngëma ore i mexü, rü taxüetáma texé chixri nachiga tidexa. Rü ngëmaäcü ya yixema chixri tachiga idexagüchaüxë rü tá taxãneë erü taxucürüwa tacü rü chixexüxü tixugü i tachiga. ⁹ ¡Rü meãma yaxucuxëgü i ngëma duüxügü i coriãxgüxü! ¡Rü namaã nüxü ixi na guxüguma meã norü coriga naxïnüëxüçèx, rü norü corimaã namecümagüxüçèx, rü taguma norü corixü nachoxügagüxüçèx! ¹⁰ Rü tama name i norü coriaxü nangïxgü, natürü nanaxwèxe i aixcüma meãma norü corimaã namaxë rü taguma nanawomüxëëgü. Rü ngëxguma ngëmaäcü namaxëgu, rü guxüma i togü i duüxügü tá nüxü nadaugü na ñnuxäcü aixcüma namexëchixü i ngëma ore i duüxügüxü namaã ingüexëëxü nachiga ya Tupana ya tórü maxëxëëruü. ¹¹ Tupana rü poraäcüxüchima tamaã namecüma, rü yemacèx núma nanamu ga Nane na guxüma i duüxügüaxü nangëxmaxüçèx i maxü i taguma gúxü ega nüxü yaxögüãgu. ¹² Rü ngëma na Tupana tamaã mecümamaxüwa nüxü tacüèx na namexü na nüxü rüxoexü i ñoma i naãnecüãxärü ngüchaügü rü guxüma i to i chixexügü i napëxewa ixüxü. Rü ngëma Tupana taxcèx üxü tüxü nanguxëë na meã yigümaã icuëxgüäcüma togü i duüxügüpëxewa rü Tupanapëxewa meã imaxëxü i ñoma i naãnewa. ¹³ Rü tüxü nanguxëë ta na guxüguma meã ñnanguxëëgüxüçèx na nataeguxü ya Ngechuchu ya Cristu ya tórü maxëxëëruü ya tórü Tupana ya tacü ixïcü. Erü Tanatü ya Tupana rü tamaã inaxuneta na

wena tá nataeguxŭ ya Ngechuchu, rŭ wŭxi i taã tá nixŭ i ngëxguma ínanguxgu. ¹⁴ Rŭ nŭma ga Ngechuchu rŭ taxcèx nayu na tŭxŭ ínanguxŭxëxŭcèx nawa i guxŭma i chixexŭ, rŭ tŭxŭ yamexëëgŭxŭcèx na aixcŭma norŭ duŭxŭgŭ i mexŭ ixŭgŭxŭcèx rŭ aixcŭma naxcèx idaugŭxŭcèx na guxŭguma mexŭ ixŭgŭxŭcèx. ¹⁵ Rŭ ngëma ore tá nixŭ i duŭxŭgŭxŭ namaã cungúexëëxŭ rŭ nŭxŭ cunangúchaŭxëëxŭ na Tupanacèx namaxëxŭcèx. Rŭ ngëma oremaã tá aixcŭma cuyaxucuxëgŭ i duŭxŭgŭ erŭ Tupanatama nixŭ ya cuxŭ mucŭ na ngëmaãcŭ cunaxŭxŭ. Rŭ tama name na texé cuxŭ oxŭ.

3

Ñuxãcŭ name na namaxëxŭ i ngëma yaxôgŭxŭ

¹ Rŭ ngëma yaxôgŭxŭ i duŭxŭgŭ, ¡rŭ namaã nŭxŭ ixu na nachixŭanearŭ ãëxgacŭgŭga naxŭnŭexŭ rŭ guxŭma i ngema togŭ i ãëxgacŭgŭga naxŭnŭexŭcèx! ¡Rŭ yaxucuxëgŭ na ínamemaregŭxŭcèx na naxŭgŭãxŭcèx i guxŭma i mexŭ i puracŭgŭ i ãëxgacŭgŭ unagŭxŭ! ² Rŭ tama name i texéchiga chixri nidexagŭ rŭ texémaã nanuë. Natŭrŭ name nixŭ i guxŭ i duŭxŭgŭmaã namecŭmagŭ rŭ aixcŭma guxŭ i duŭxŭgŭxŭ nangechaŭgŭ rŭ tama nŭgŭ nicuèxŭxŭgŭ. ³ Rŭ name nixŭ i yaxna namaã taxŭnŭë i ngëma tama yaxôgŭxŭ, yerŭ yixema rŭ ta ga ũpa rŭ chixri tamaxë, rŭ tama Tupanaga taxŭnŭë. Rŭ itayarŭtauxe rŭ tórŭ ngúchaŭ tŭxŭ napora. Rŭ chixexŭgu rŭxŭnŭëãcŭma tamaxë rŭ taxãxŭachiwëxegŭ. Rŭ naxchi taxaie ga togŭ, rŭ nŭma rŭ ta taxchi naxaie. ⁴ Natŭrŭ yexguma Tupana ya tórŭ maxëxëëruŭ tŭxŭ nŭxŭ dauxëëgu i norŭ ngechaxŭ naxcèx i guxŭma i duŭxŭgŭ, rŭ nŭma rŭ tŭxŭ namaxëxëë. ⁵ Rŭ yema na tŭxŭ namaxëxëëxŭ rŭ tama tacŭ rŭ mexŭ na ixŭgŭxŭgagu nixŭ, natŭrŭ tŭxŭ namaxëxëë yerŭ nŭxŭ tangechaŭtŭmŭŭgŭ. Rŭ Naãë i Ũnŭexŭ i tŭxŭ ngexwacaxŭxëëxŭãrŭ poramaã Tupana tŭxŭ inayanaxoxëë ga tórŭ pecadu na ngexwacaxŭxŭ i duŭxŭgŭ ixŭgŭxŭcèx. ⁶ Rŭ Ngechuchu ya Cristu ya tórŭ Maxëxëëruŭgagu nixŭ ga Tupana ga guxŭma ga norŭ ngúchaŭmaã tŭxna namuãxŭ ga Naãë i Ũnŭexŭ. ⁷ Rŭ yemaãcŭ tamaã namecŭma rŭ tŭxŭ narŭngŭxëë ga Tupana na aixcŭma imexŭcèx i napëxewa, rŭ na nayauxgŭxŭcèx i ngëma írŭnguxëëgŭxŭ i maxŭ i taguma gŭxŭ. ⁸ Rŭ guxŭma i ngëma marŭ cumaã nŭxŭ chixuxŭ rŭ aixcŭma nixŭ. Rŭ ngëmacèx chanaxwëxe i guxŭguma nŭxŭ quixu i ngëma ore na aixcŭma mexŭ naxŭgŭxŭcèx i ngëma duŭxŭgŭ i Tupanaãxŭ yaxôgŭxŭ. Erŭ ngëma ore rŭ guxŭwama name i guxãcèx. ⁹ ¡Natŭrŭ nŭxna ixŭgachi i ngëma dexagŭ i taxuwama mexŭ i duŭxŭgŭ nawa nŭgŭ choxŭgagŭxŭ rŭ ngëma oregŭ i nuxcŭmaŭgŭxŭ i duŭxŭgŭchigamare ixŭgŭxŭ! ¡Rŭ nŭxna ixŭgachi i ngëma nŭgŭ ngaexŭ! ¡Rŭ tama name na natanŭgu cuxãxŭ i ngëma duŭxŭgŭ i nŭgŭmaã nŭxŭ rŭnuëtanŭcŭŭxŭ nachiga i ngëma mugŭ ga Moíché ŭmatŭxŭ! Erŭ guxŭma i ngëma na nŭxŭ rŭnuëtanŭcŭŭxŭ rŭ taxuwama name, rŭ natŭcèxmamare nixŭ. ¹⁰ Rŭ ngëxguma chi wŭxie i petanŭwa rŭ chixexŭ i nguxëëtaemaã ngëma yaxôgŭxŭxŭ titoyegu, rŭ name nixŭ i tŭmamaã nŭxŭ quixu na tama ngexŭ tawagŭxŭcèx. Rŭ ngëxguma tanaxŭamagu, rŭ name nixŭ na wena tŭmamaã nŭxŭ quixuxŭ. Rŭ ngëxguma tama cuga taxŭnŭchaŭgu rŭ tanaxŭamagu i ngëma chixexŭ rŭ name nixŭ i noxtacŭma tŭxŭ ícumuxŭchi natanŭwa i ngëma yaxôgŭxŭ. ¹¹ Erŭ ngëma chixri na tamaxŭxŭwa rŭ tá nangox na tachixeãëxŭ ya yíxema duŭxë rŭ tŭmaãrŭ pecadugagu tá nixŭ na tapoxcuxŭ.

Tituxŭ naxucuxë ga Pauru

¹² Rŭ ngëxguma cuxŭtawa chanamuxgu i Artema rŭ ëxna Tíquicu, rŭ chanaxwëxe i paxa Nicaporíchiuwa cuxŭ na choxŭ ícuyadauxŭcèx. Erŭ ngema tá nixŭ i chanan-gupetŭxëëxŭ ya yima tauemacŭgŭ ya nagu nagáuanecŭ. ¹³ Rŭ guxŭma i cuxŭ taux-chaxŭmaã chanaxwëxe i nŭxŭ curŭngŭxëë i ãëxgacŭ i Chena i Dumacŭãxgŭarŭ mugŭxŭ cuãxŭ rŭ Aporu na paxa núma naxŭxŭcèx. Rŭ chanaxwëxe i nŭxna cunaxã i ngëma nanaxwëxexŭ i norŭ namawaŭ na taxuŭma nŭxŭ taxuxŭcèx. ¹⁴ Rŭ ngëma taeneëgŭ i

yaxõgũxũ, rü name nixĩ i naxcèx nangúe na mexũ naxügũxũ rü togũxũ nangũxẽẽgũxũ ega tacü nüxũ tauygux. Rü ngẽmaãcü i ngẽma togü rü tá nayaxõgü.

Pauru rü wenaxãrü Tituxũ narümoxẽ rü naxcèx ínaca na Tupana nüxũ rüngũxẽẽxũcèx

¹⁵ Rü guxũma i taeneẽgü i nuã chauxõtawa ngẽxmagũxũ rü cuxũ narümoxẽgü. Rü ngẽxgumarũũ ta i choma rü chanaxwèxe i nüxũ curümoxẽ i taeneẽgü i yaxõgũxũ i cuxõtawa ngẽxmagũxũ. Rü chanaxwèxe i Tupana pexũ narüngũxẽẽ i guxãma i pemax.

Rü nuãma cuxna,
Pauru

POPERA GA FILEMÚŮCAŮ NAXŮMATŮXŮ GA PAURU

Pauru rŮ nŮxŮ narŮmoxŮ ga FilemŮŮ

¹ Pa ToeneŮ i FilemŮŮ i ToxrŮxŮ TupanaarŮ PuracŮwa PuracŮxex, choma i Pauru rŮ taeneŮ i TimutŮumaŮ cuxcŮx tanaxŮmatŮ i űaŮ popera. RŮ choma rŮ nuxa chapoxcu nagagu na nŮxŮ chixuxŮ i Ngechuchu ya CristuarŮ ore. ² RŮ űaŮ popera i cuxcŮx taxŮmatŮxŮ, rŮ naxcŮx ta nixŮ i ngŮma taeneŮgŮ i cupatawa ngutaquŮxegŮŮxŮ rŮ ngixcŮx ta nixŮ i taeyŮx i Ápia rŮ naxcŮx ta nixŮ i taeneŮ i AriquŮpu i taxrŮxŮ TupanaarŮ puracŮwa puracŮxŮ. ³ RŮ chanaxwŮxe i TanatŮ ya Tupana rŮ tŮrŮ Cori ya Ngechuchu ya Cristu pexŮ narŮngŮxŮŮ rŮ pexŮ nataŮŮxŮŮ.

FilemŮŮ rŮ aixcŮma NgechuchuaxŮ nayaxŮ rŮ yema yaxŮgŮxŮxŮ nangechaŮ

⁴ RŮ guxŮguma i ngŮxguma cuxna chacuŮxŮchigu i chorŮ yumŮxŮwa, rŮ Tupanana moxŮ chaxŮ cuxcŮx. ⁵ ErŮ nŮxŮ chacuŮchiga na űuxŮcŮ nŮxŮ cuyaxŮxŮ ya tŮrŮ Cori ya Ngechuchu rŮ űuxŮcŮ nŮxŮ na cungechaŮxŮ i guxŮma i duŮxŮgŮ i TupanaarŮ ixŮgŮxŮ. ⁶ RŮ Tupanana naxcŮx chaca na cuxŮ nangŮxŮŮxŮcŮx na duŮxŮgumaŮ nŮxŮ quixuxŮcŮx na űuxŮcŮ CristuaxŮ yaxŮgŮxŮ i yixemax, erŮ chanaxwŮxe na meŮ nŮxŮ cucuŮxŮ na űuxŮcŮ Ngechuchu ya Cristugagu poraŮcŮ tŮxŮ nangŮxŮŮxŮ ya Tupana. ⁷ RŮ choma rŮ poraŮcŮ chataŮŮxŮchi na űuxŮcŮ nŮxŮ cungechaŮxŮ i ngŮma yaxŮgŮxŮ. ErŮ cugagu nixŮ, Pa ChaueneŮx, na nataŮŮgŮxŮ i ngŮma togŮ i yaxŮgŮxŮ.

Pauru rŮ FilemŮŮna naca na mea OnŮchimuxŮ nayaxuxŮcŮx

⁸⁻⁹ RŮ ngŮmacŮx nangŮxma i wŮxi i ngŮxŮŮ i cuxŮtawa naxcŮx íchacaxchaŮxŮ. RŮ dŮcax, Cristu nixŮ ya choxŮ mucŮ rŮ ngŮmacŮx choxŮ nangŮxma i pora na cuxŮ chamuxŮ na cunaxŮxŮcŮx i ngŮma ngŮxŮŮ i mexŮ i tá cumaŮ nŮxŮ chixuxŮ. NatŮrŮ tama ngŮmaŮcŮ cuxŮ chamuxchaŮ erŮ cuxŮ changechaŮ, rŮ ngŮmacŮx chauxcŮx narŮmemaŮ nixŮ na cuxŮ chacŮŮxŮmarexŮ naxcŮx i ngŮma. RŮ choma i Pauru rŮ marŮ chaya rŮ űuxma rŮ chapoxcu Ngechuchu ya CristucŮx. ¹⁰ RŮ ngŮmacŮx cuxna naxcŮx chacaxchaŮ i wŮxi i ngŮxŮŮ naxcŮx i OnŮchimu i nuŮ poxcupataŮwa chauxŮtawa CristuxŮ yaxuxŮ. RŮ ngŮmacŮx i űuxma rŮ TupanaarŮ orewa rŮ chaune nixŮ. ¹¹ RŮ Ůpa ga OnŮchimu rŮ wŮxi ga curŮ duŮxŮ ga taxuwama cuxŮ mexŮ nixŮ. NatŮrŮ i űuxma rŮ cuxŮ rŮ choxŮ rŮ ta name. ¹² RŮ űuxma rŮ cuxcŮx chanataeguxŮŮ i nŮma i OnŮchimu. RŮ chanaxwŮxe i meŮ cunayaxu, űoma choxŮ cuyaxuxŮrŮŮ. ¹³ ChierŮ chanaxwŮxe na nuxma chauxŮtagu naxŮŮxŮ, rŮ na cuchicŮŮ choxŮ nangŮxŮŮxŮcŮx i űuxma na chapoxcuxŮ naxcŮx i TupanaarŮ ore i mexŮ. ¹⁴ NatŮrŮ tama chanaxŮxchaŮ i ŮacŮ i tauta “NgŮ” űacuxŮ choxŮ. ErŮ ngŮma ngŮxŮŮ i cuxna naxcŮx chaçaxŮ, rŮ chanaxwŮxe na curŮ ngŮchaŮtama yŮŮxŮ i ngŮma rŮ tama i chorŮ mugagu na yŮŮxŮ. ¹⁵ RŮ bexmana Tupana nanaxwŮxe na paxaŮchi cuxna yaxŮxŮ ga OnŮchimu na yixcama rŮ wenaxŮrŮ cuxcŮx nataeguxŮcŮx rŮ ngŮmaŮcŮ guxŮgutŮma cuxŮtawa nangŮxmaxŮcŮx. ¹⁶ NatŮrŮ i űuxma rŮ tama ngŮxŮrŮŮxŮmare i curŮ duŮxŮrŮŮ nixŮ, erŮ wŮxi i curŮ duŮxŮrŮŮ yexera nixŮ i űuxmax, erŮ taeneŮ i nŮxŮ ingechaŮxŮ nixŮ. RŮ aixcŮma poraŮcŮ nŮxŮ changechaŮ i chomax, natŮrŮ chanawae i cuma rŮ yexeraŮcŮ nŮxŮ cungechaŮ. ErŮ űuxma rŮ tama wŮxi i curŮ dŮŮxŮmare nixŮ, natŮrŮ wŮxi i cueneŮ i tŮrŮ CoriaxŮ yaxŮxŮ nixŮ i űuxmax. ¹⁷ RŮ ngŮmacŮx, rŮ ngŮxguma choxŮ cudŮxgu na aixcŮma cueneŮ chiŮxŮ, rŮ chanaxwŮxe i meŮ cunayaxu i OnŮchimu, űoma choxŮ cuyaxuxŮrŮŮ. ¹⁸ RŮ ngŮxguma ŮacŮ rŮ chixexŮ cumaŮ naxŮxgu rŮ Ůxna ŮacŮ cuxŮ nangetanŮgu, rŮ chanaxwŮxe i chomaŮ nŮxŮ quixu na űuxre yŮŮxŮ, na cuxŮ chanaxŮtanŮxŮcŮx. ¹⁹ RŮ chomatama i Pauru rŮ choxmŮxmaŮxŮchi chanaxŮmatŮ i űaŮ popera. RŮ aixcŮma chomatama tá cuxŮ chanaxŮtanŮ. RŮ tŮŮtŮma cuxna nŮxŮ chacuŮxŮchixŮŮ na űuxŮcŮ choxŮ cunangetanŮxŮ i curŮ maxŮ i taguma gŮxŮ i

chaugagu Tupanaxŭtawa cuyaxuxŭ. ²⁰ Rŭ ngĕmaãcŭ, Pa Chaueneẽx, rŭ chanaxwèxe i tórŭ Corigagu chauxcèx cunaxŭ i ngĕma ngŭxĕẽ. Rŭ chanaxwèxe i choxŭ cutaãxĕẽ, erŭ chaueneẽ i Cristuaxŭ yaxŏxŭ quixĩ. ²¹ Rŭ cuxcèx chanaxŭmatŭ i ñãã popera erŭ nŭxŭ chacuèx na aixcŭma chauga cuxĩnŭxŭ rŭ tá cunaxŭxŭ i ngĕma cuxna naxcèx chaçaxŭãrŭ yexera. ²² Rŭ ngĕxgumarŭŭ ta chanaxwèxe na chauxcèx cunamexĕẽxŭ i wŭxi i nachica i ngextá tá nawa changuxŭ. Erŭ íchananguxĕẽ na Tupana tá nangãxŭxŭ i perŭ yumŭxĕgŭ, rŭ tá choxŭ nangŭxĕẽxŭ na pexŭ íchayadauxĕcèx.

Pauru rŭ wenaxãrŭ Filemúŭxŭ narŭmoxĕ rŭ naxcèx ínaca na Cori ya Ngechuchu ya Cristu nŭxŭ rŭngŭxĕẽxŭ

²³ Rŭ moxĕ cuxcèx ngĕma namu i Epáparu. Rŭ nŭma rŭ wŭxigu chomaã napoxcu naxcèx ya Ngechuchu ya Cristu. ²⁴ Rŭ ngĕxgumarŭŭ ta moxĕ cuxcèx ngĕma namugŭ i Marcu, rŭ Aritárcu, rŭ Dema rŭ Luca. Rŭ nŭmagŭ rŭ chomŭcŭgŭ nixĭgŭ i Tupanaãrŭ puracŭwa. ²⁵ Rŭ chanaxwèxe i tórŭ Cori ya Ngechuchu ya Cristu pexŭ narŭngŭxĕẽ i guxãma i pemax.

Rŭ nuãma cuxna,
Pauru

POPERA GA YUDÍUGÜ GA YAXŌGÜXÜCA_X ÜMATÜXÜ

Tupana rü Nanewa tamaã nidexa

¹ Nuxcüma ga Tupana rü muëxpüxcüna rü nagúxüraüxüãcüma norü orearü uruüğüwa tórü oxigümaã nidexa, rü namaã nüxü nixu ga tacü nüxü na nanaxwëxexü. ² Natürü i ñomaücüü ya Tupana rü Nanewatama nixi i tamaã yadexaxü rü tüxü nüxü nacuëxëëxü na ñuxãcü tüxü nangüxëëchaüxü. Rü gumaxü nixi ga namuxü na naxüãxüçex ga ñoma ga naãne rü daxüguxü ga naãne rü üëxcü rü tauemacü rü woramacurigü rü éxtagü. Rü ñuxüchi guma Nanena nanana ga guxüma ga yema na noxrü yiüxüçex. ³ Rü Nanewa nixi i nüxü idauxü na ñuxãcü namexëchixü i nüma ya Tupana. Rü nüma ya Nane rü Nanatü ya Tupanarütama nixi. Rü ñuxma na guxüärü äëxgacü yiüxü ya Nane, rü guxümaãma inacüex rü norü ore i poraxümaã nanamu i guxüma na nüma nanaxwëxexüãcüma na yiüxüçex. Rü nüma ya Nane nixi ga taxcëx nayuxü na nüxü rüxoexüçex ga tórü pecadugü. Rü yemawena rü Nanatüxütawa naxü i daxüguxü i naãnewa. Rü yéma Nanatüarü tügüncüwawa nayarüto erü guxüärü äëxgacü nixi i ñuxmax.

Tupana Nane rü guxüma i orearü ngeruüğü i daxü- cüãxétüwa nangëxma

⁴ Rü ñuxma i nüma ya Nane rü guxüma i Tupanaärü orearü ngeruüğü i daxüçüãxärü yexera nixi rü naëtüwa nangëxma yerü yemaãcü nanaxuegu ga Nanatü. ⁵ Rü ngëmaãcü nixi i ñuxma yerü ga Tupana rü taguma wüxi ga norü orearü ngeruüxü ñanagürü: “Cuma nixi i Chaune. Rü ñuxma chanangoxëë na aixcüma Chaune quiüxü”, ñanagürü. Rü taguma wüxi ga norü orearü ngeruüchiga ñanagürü: “Choma nixi i Nanatü chiüxü rü nüma rü Chaune nixi”, ñanagürü. ⁶ Natürü yexguma ñoma ga naãnewa namuãgu ga Nane ya guxüëtüwa ngëxmacü, rü ñanagürü ga Tupana: “Chanaxwëxe i guxüma i chorü orearü ngeruüğü i daxüçüãx rü nüxü nicuëxüüğü ya Chaune”, ñanagürü. ⁷ Rü yexguma norü orearü ngeruüğü ga daxüçüãxchiga yadeaxgu ga Tupana, rü ñanagürü: “Choma chanaxwëxexüãcüma chanamu i ngëma chorü orearü ngeruüğü i chorü ngüxëëruüğü ixigüxü. Rü ngëxguma chanaxwëxegu rü ñoma buanecü rü ñoma üxüemarüü chayaxigüxëë, rü chanaporaexëë na naxügüãxüçex i chorü ngüchaü”, ñanagürü. ⁸ Natürü yexguma Nanechiga yadeaxgu ga Tupana rü ñanagürü: “Cuma rü chauxrüü Tupana quixi. Rü guxügutáma äëxgacü quixi. Rü aixcüma meã guxümaã icucuëx erü aixcümacü quixi. ⁹ Rü nüxü cungechaü i guxüma i ngëma nacüma i mexü natürü naxchi cuxai i guxüma i ngëma nacüma i chixexü. Rü ngëmacëx i choma na Cunatü ya Tupana chiüxü rü guxäëtüwa cuxü changëxmaxëë rü guxäärü yexera cuxü chataãëxëë”, ñanagürü. ¹⁰ Rü yexgumarüü ta Nanexü ñanagürü ga Tupana: “Cuma rü guxüärü Cori quixi. Rü noxrüarü ügügumama ga yexguma natauxgutama ga ñoma ga naãne, rü cuma nixi ga cunaxüxü. Rü cumatama nixi ga cunaxüxü ga üëxcü rü tauemacü rü guxüma ga éxtagü. ¹¹ Rü guxüma i ngëma rü tá nagux, natürü i cuma rü guxügutáma cüngëxmaëcha. Rü guxüma i ngëma rü ñoma naxchirurüü tá nangaue. ¹² Rü ñoma wüxi i naxchiru i ngauxü i ngëma itëxmarexürüü tá ícunawogü i ñoma i naãne rü guxüma i daxüwa nüxü idauxü. Rü to i ngexwacaxüxümaã tá cunaxüchicüü, ñoma wüxi i naxchiru i ngauxü i ngexwacaxüxümaã ixüchicüüxürüü. Natürü i cuma rü tá cunaxëixrügumaraxüëcha rü tagutáma cuyu”,

ñanagürü ga Tupana. ¹³ Rü Tupana rü ñanagürü nüxü:

“¡Nuã chauxütawa rüto ñuxmatáta nüxü cuxü charüporamaëxëe i guxüma i curü uwanügü!”

ñanagürü. Natürü ga Tupana rü taguma yema ñanagürü nüxü ga ngëxürüüxü ga norü orearü ngeruügü ga daxücüãx. ¹⁴ Rü guxüma i Tupanaärü orearü ngeruügü i daxücüãx rü naãëgü i Tupanaãxü puracüexü nixügü. Rü nüma ya Tupana rü núma nanamugü na nüxü yanangüëëgüxüçèx i guxüma i ngëma duüxügü i Tupana naxwëxexü na nayauxgüãxü i maxü i taguma gúxü.

2

Tama name i nüxü taxoe i ngëma maxü i Tupana tüxna uaxüxü

¹ Rü ñuxma na nüxü icuáxü na guxüma i Tupanaärü orearü ngeruügü i daxücüãxärü yexera yïixü ya Nane, rü ngëmacèx name na yexeraäcü meã naga ixïnüëxü i ngëma ore i nachiga ixïxü. Erü tama tanaxwëxe na nüxü rüxoexü na yaxögüxü. ² Rü yexguma tauta Nane ya Cristuxü núma namuxgu ga Tupana, rü norü orearü ngeruügü ga daxücüãxgüwa duüxügümaã nüxü nixu ga norü mugü na naga naxïnüëxüçèx. Rü yema mugü rü aixcüma natora yerü guxüma ga yema duüxügü ga tama naga ïnüëxü, rü yema mugü nüxü ixuxüäcüma Tupana nanapoxcue. ³ Rü yexguma yemaäcü napoxcueägu ga yema duüxügü ga tama naga ïnüëxü, ¿rü ñuxücürüwa i yixema i naxchaxwa ibuxmüxü na tama tüxü napoxcuexüçèx ega nüxü ixoegu i ngëma maxü i mexëchixü i ñuxma Cristugagu tüxna naxuaxüxü? Rü dücax, nümatama ya tórü Cori nixï ga nüxïra naxunagüãxü ga yema maxü, rü ñuxüchi yixcama nixï ga yema nüxü ïnüëxü ga nüxï meã tüxü nüxü nacüëxëëxü na aixcüma yïixü i tüxü nangëxmaxü i ngëma maxü ega nüxü yaxögügu ya Cristu. ⁴ Rü nümatama ga Tupana rü ta taxcèx nanangoxëe na aixcüma yïixü i Cristugagu tüxü nangëxmaxü i ngëma maxü. Yerü nüma ga Tupana rü Naãe i Üünexüwa tüxü nanawëx ga naguxüraxüxü ga taxü ga mexügü rü cuëxruxügü ga norü poramaã naxüxü yema nüma nanaxwëxexüäcüma. Rü yemaäcü nixï ga wenaxärü tüxü nüxü nadauxëëxü na aixcüma yïixü na Cristugagu tüxü nangëxmaxü i ngëma maxü.

Tupana rü ñoma ga naãnewa nanamu ga Ngechuchu ya Cristu na taxrüü duüxüxü yïixüçèx

⁵ Rü ñuxma rü guxüma i ngëma mexügü i Cristugagu tüxü ngëxmaxü i pemaã nüxü tixuchigaxü, rü Tupana rü taguma daxücüãx ga norü orearü ngeruügüna naxãga na namaã inacuëxgüxüçèx. Natürü duüxügüxü nixï ga namuxü na namaã inacuëxgüxüçèx ga guxüma ga yema mexügü. ⁶ Erü Tupanaärü ore i ümatüxüwa rü ñanagürü:

“Pa Tupanax, ¿rü tacü nixï i duüxügü rü ngëmacèx naga curüxïnüxü? ¿Rü tacüwa name rü ngëmacèx nüxü cungechaüxü? ⁷ Rü paxaãchi curü orearü ngeruü ga daxücüãxgütüüwa cunayexmagüxëe ga duüxügü, natürü i ñuxma rü aixcüma namaã cutaãe rü nüxü quicuëxüxü. ⁸ Rü naxmëxwa cunangëxmaxëe i guxüma ga yema cuxüxü”,

ñanagürü i ngëma orewa. Rü yemaäcü nixï ga Tupana ga duüxügümëxëwa nayexmagüxëëãxü i guxüma i ñoma i naãnewa ngëxmaxü. Rü nataxuma i tacü i ñoma i naãnewa i tama naxmëxwa nangëxmaxëëxü. Natürü woo na ngëmaäcü yïixü, rü ñuxma rü ta tauta nüxü tadau na duüxügümëxëwa nangëxmaxü i guxüma i ñoma i naãnewa ngëxmaxü.

⁹ Natürü nüxü tadau ya Ngechuchu ya aixcüma guxümaãma icuäcü. Rü yexguma Tupana ñoma ga naãnewa namuxgu rü paxaãchi norü orearü ngeruü ga daxücüãxgüarü ñaxtüwaama nanaxüxëe. Natürü i ñuxma ya Tupana rü poraäcü Ngechuchuxü nataxëe rü äëxgacü ya tacü nayaxïxëe yerü ngüxü ninge rü guxüma ga duüxügüçèx naya yerü yemaäcü nanaxwëxe ga Tupana yerü tüxü nangechaü rü tüxü narüngüxëëchaü. ¹⁰ Yerü ga Tupana rü nanaxwëxe na guxüma i naxäcügü nüxü nangëxmaxüçèx i nachica i mexü

i naxütawa. Rü yemacèx ñoma ga nañewa nanamu ga Ngechuchu ya Cristu na ngúxü yangexücèx rü taxcèx nayuxücèx na aixcūmaxüchi tüxü nangëxmaxücèx i maxü i taguma gúxü. Rü name nixi na yemaäcü naxüäxü ga Tupana yerü nümatama nixi ga naxüäxü ga guxüma rü namëxwa nangëxma na nüma nanaxwëxexüäcüma namaã inacuáxücèx. ¹¹ Rü Ngechuchu nixi ya tüxü imexëëgücü na Tupanapëxewa ixüünegüxücèx. Rü ñuxma i nüma ya Ngechuchu ya tüxü imexëëgücü rü guxäma i yixema na tüxü yaxüünexëëgüxü rü wüxitama nixi ya Tanatü. Rü ngëmacèx nixi i nüma ya Ngechuchu ya Tupana Nane, rü tama taxcèx naxänexü na naëneëgümaã tüxü naxuxü. ¹² Erü Tupanaärü ore i ümatüxüwa rü ñanagürü ga Nane:

“Rü chaueneëgüxü tá nüxü chacuèxëë i cuchiga, Pa Chaunatüx. Rü norü ngutaquëxegüwa rü tá cuxcèx chawiyae na ngëmaäcü cuxü chicuèxüxücèx”, ñanagürü. ¹³ Rü toxnamana i Tupanaärü ore i ümatüxüwa rü ñanagürü ta ga Nane: “Cuxü chayaxõ, Pa Chaunatüx, erü nüxü chacuèx rü tá choxü curüngüxëë”, ñanagürü. Rü ñanagürü ta:

“Rü daxe chixi, Pa Chaunatüx, namaã i cuxacügü i chaueneëgü i choxna cumugüxü”, ñanagürü. ¹⁴ Rü nüma ga Ngechuchu rü woo Tupana na yixixü natürü duüxürüxüäcü ñoma ga naanewa naxü na taxruxü naxämachixücèx rü naxägüxücèx na tachicüü nayuxücèx rü yemaäcü yanaxoxëëäxücèx ga Chatanáarü pora ga namaã tüxü iyanatauxëëxchaüxü. ¹⁵ Rü yemaäcü nanaxü ga Ngechuchu na Chatanámeëxewa tüxü ínguxüxëëxücèx ya guxäma ya yixema noxri naxcèx muüëxë ga na tayuexü. ¹⁶ Rü yemacèx ñoma ga nañewa nangu ga Ngechuchu na taxcèx nayuxücèx i guxäma i yixema na Abráürüü yaxögüxü. Rü tama daxücüäx i orearü ngeruügücèx nayu, natürü taxcèx nixi ga numa naxüxü rü nayuxü. ¹⁷ Rü nüma ga Ngechuchu rü nanaxwëxe na yixema i naëneëgü ixigüxürüütama nügü na yaxixëëxü na yemaäcü aixcūma mecūmacü ya nüxü ingechaütümüügücü ya tórü chogürüü yixücèx i Tupanapëxewa. Rü yemacèx nixi ga nügü inaxäxü rü nayuxü na yemaäcü Tupana duüxügüaxü nüxü ngechaüxücèx i norü pecadugü. ¹⁸ Rü yema nümatama ngúxü na yangexü ga yexguma Chataná nüxna ñnügu, rü ngëmacèx i ñuxma rü nüxü natauxcha na tüxü nangüxëëxü ya yixema Chataná tüxna ñnüxë.

3

Ngechuchu rü Moïchéxü narüyexera

¹ Rü ñuxma Pa Chaueneëgü ya Tupanapëxewa Üünegüxe, rü pexü nixi ya Tupana inadexü na norü duüxügü pixigüxücèx. Rü ngëmacèx name nixi i aixcūma meã nagu perüxñüë ya Ngechuchu ya Cristu ya Tupana núma namücü. Rü nüma ya Ngechuchu nixi i tórü chogürüü i Tupanapëxewa tüxü ixüünexëëcü. Rü yimaäxü nixi i yaxögüxü. ² Rü Tupana rü marü Ngechuchuxü naxuneta na naxüäxücèx ga yema puracü ga Tupana nüxna äxü. Rü nüma ga Ngechuchu rü aixcūma Nanatüga naxñü rü nayanguxëë ga yema puracü yexgumarüü ga Moïché meãma na naxüxü ga yema puracü ga Tupana nüxna äxü na nüxna nadauxücèx ga Tupanaärü duüxügü ga Yudüügü. ³ Rü woo ga noxri rü Moïchéxü nitaégacüüxëë ga Tupana, natürü i ñuxma rü Moïchéarü yexera Ngechuchuxü nixi i yataégacüüxëëxü. Rü wüxi ya ípata ya ngexwacèx ixüxünerüü nixi, erü woo ngëma ípatamaã tataãë, natürü ngëma yexeraäcü nüxü icuèxüxüxü nixi i ngëma ípataarü üruü. ⁴ Rü guxünema ya í rü nüxü nangëxma i norü üruü. Natürü guxüma i tacü i ngëxmaxü, rü Tupana nixi ya naxücü. ⁵ Rü Moïché rü wüxi ga Tupanaärü duüxü ga aixcūma mexü nixi yerü meã nüxna nadau ga Tupanaärü duüxügü ga Yudüügü, yema Tupana namaã nüxü ixuxürüü. Rü nüma ga Moïché nixi ga yema duüxügümaã nüxü yaxuxü ga ñuxäcü Tupana tá yixcúra nüxü na rüngüxëëxü. ⁶ Natürü nüma ya Ngechuchu rü Moïchéarü yexera nixi erü Tupana Nanexüchi nixi. Rü nüma nixi i nüxna nadauxü i guxüma i ngëma Tupanaärü duüxügü ixigüxü. Rü yixema rü ta Tupanaärü

duũxũgũ tixĩgũ ega aixcũma Ngechuchuaũ yaxõgũgu rũ taguma nũxũ rũxoegu. Rũ Tupana nanaxwèxe na guxũguma Ngechuchumaã itaãẽgũxũ erũ nũxũ tacuèx na wũxi i ngunexũ rũ tá taxcèx nataeguxũ na wũxiwa namaã ingẽxmagũxũcèx.

Tupanaãrũ duũxũgũ rũ tá inarũngũẽ

⁷⁻⁸ Rũ ngẽmacèx i Tupanaãrũ ore i ùmatũxũwa rũ ñanagürũ i Naãẽ i Üünexũ:

“Rũ ñũxma na nũxũ pexĩnũèxũ i ngẽma Tupana pemaã nũxũ ixuxũ, rũ tama name na nũxũ pexoexũ, yexgumarũũ ga na naxũgũãxũ ga yema duũxũgũ ga Tupanaxũ ùgũxũ rũ tama naga ñnũèxũ ga yexguma Moĩchéwe naxĩxgu ga yema naãne ga ngextá taxúema íxãpataxũwa”.

⁹ Rũ yemacèx ga Tupana rũ ñanagürũ:

“Rũ yema nixĩ ga chixexũ naxũgũxũ ga nuxcũmaũgũxũ ga perũ oxigũ yerũ choxũ naxũgũ yerũ tama choxũ nayaxõgũchaũ. Rũ yemaãcũ nanaxũgũ woo 40 ga taunecũgu nũxũ na nadaugũxũ ga yema mexũgũ ga üünexũ ga napèxewa chaxũxũ. ¹⁰ Rũ yemacèx namaã chanu ga yema duũxũgũ, rũ ñacharũgũ nũxũ: ‘Pema rũ guxũguma chixexũguxicatama perũxĩnũèècha, rũ taguma penaxũxchaũ i ngẽma chanaxwèxexũ na penaxũxũ’, ñacharũgũ nũxũ. ¹¹ Rũ yemacèx nixĩ ga namaã chanuxũ ga yema duũxũgũ, rũ aixcũmaxũchi namaã nũxũ chixu na tãütáma yema naãne ga noxri namaã ichaxunetaxũwa nangugũxũ na ngẽxma nangũèxũcèx”,

ñanagürũ ga Tupana. ¹² Rũ ñũxma Pa Chaueneẽgũx, rũ name nixĩ i pegũna pedaũgũ na tama ngürũãchi pechixearũ maxũãxũcèx, rũ ngẽmagagu na nũxũ perũxoexũ na Tupana ya maxũcũaxũ na peyaxõgũxũ. ¹³ Natürũ ñũxma pexũ natauxchagu, rũ name nixĩ na wũxichigũ pegũaxũ penangũchaũxèèxũ i guxũ i ngunexũgu na taxúema i petanũwa Tupanaxũ taxoxũcèx nagagu i ngẽma pecadu i pexũ womũxèèchaũxũ. ¹⁴ Rũ ngema na Cristuxũtawa nayauxgũxũcèx i maxũ i taguma gũxũ, rũ tanaxwæe na guxũguma aixcũma yaxõgũechaxũ. Rũ ngẽxguma noxrirũütama guxũguma meã nũxũ yaxõgũechagu rũ tama nũxũ rũxoegu, rũ tá namaã tũxũ nangẽxma i tachica i daxũguxũ i naãnewa. ¹⁵ Natürũ ñũxma nixĩ i namexũ na meãma yaxõgũxũ. Rũ ngẽmacèx i Tupanaãrũ ore i ùmatũxũwa rũ ñanagürũ:

“Rũ ñũxma na nũxũ pexĩnũèxũ i ngẽma Tupana pemaã nũxũ ixuxũ, rũ tama name na nũxũ pexoexũ, yexgumarũũ ga yema duũxũgũ ga tama Tupanaga ñnũèxũ ga yexguma Moĩchéwe naxĩxgu ga yema naãne ga ngextá taxúema íxãpataxũwa”,

ñanagürũ. ¹⁶ ¿Rũ texégũ tixĩ ga guxema nũxũ ñnũèxè ga yema Tupana tũmamaã nũxũ ixuxũ, rũ ñũxũchi tama Tupanaga ñnũèxè? Rũ pemaã nũxũ chixu rũ yemagũ nixĩ ga yema duũxũgũ ga Moĩché Equituanewa ínguxũxèèxũ. ¹⁷ ¿Rũ texémaã nixĩ ga nanuxũ ga Tupana ga 40 ga taunecũgu? Rũ pemaã nũxũ chixu rũ namaã nanu ga yema duũxũgũ ga chixexũ ùgũxũ. Rũ yemacèx yema nachica ga ngextá taxúema íxãpataxũgu nayue. ¹⁸ ¿Rũ texégũmaã nixĩ ga aixcũmaxũchi inaxunetaxũ ga Tupana na tãütáma yema naãnewa nangugũxũ na yexma nangũèxũcèx? Rũ pemaã nũxũ chixu, rũ yemagũ nixĩ ga yema duũxũgũ ga tama naga ñnũèxũ. ¹⁹ Rũ ngẽmawa nũxũ tacuèx na taxucürũwama yema naãne ga noxri Tupana namaã ixunetaxũwa nangugũxũ ga yema duũxũgũ, yerũ tama nũxũ nayaxõgũ.

4

¹ Rũ ngẽmacèx i ñũxma na Tupana tamaã ixunetaxũ na nũgũxũtawa tá tũxũ ya-chocuxèèxũ na ngẽxma rũngũèxũcèx, rũ tanaxwèxe i taxuãègũ, na tama ngürũãchi wũxie i tatanũwa tama ngẽxma taxũcuxũ. ² Erũ ñũxma i yixema rũ marũ nũxũ taxĩnũè i Tupanaãrũ ore i mexũ, yexgumarũũ ga yema nuxcũmaũgũxũ ga duũxũgũ nũxũ na naxĩnũèxũ. Natürũ nũmagũ ga yema duũxũgũ rũ taxuwama nũxũ name ga nũxũ na naxĩnũèxũ ga yema ore yerũ tama yema naga ñnũèxũrũũ aixcũma nũxũ

nayaxögü. ³⁻⁴ Natürü i yixema na yaxögüxü, rü tá aixcüma Tupanaxütawa tichocu na ngëxma rüngüëxüçèx. Rü wüxiwa i Tupanaärü ore i ümatüxüwa rü ngüxchigaarü ngunexüchigaxü nixu, rü ñanagürü:

“Rü ⁶ ga ngunexügu nixi ga naguxëëãxü ga norü puracü ga Tupana. Rü yexguma norü ⁷ ga ngunexüwa nanguxgu rü guxüma ga norü puracüna narüngü”,

ñanagürü. Rü nuxcüma ga Tupana rü nanaxwëxe na nangüëxü ta ga yema nuxcümaügüxü ga törü oxigü ga Moïchéwe rüxixü. Natürü ga nümagü rü tama nüxü nayaxögüchaü rü tama naga naxinüë. Rü yemacèx ga Tupana rü norü ore i ümatüxüwa rü ñanagürü:

“Yema duüxügü rü tama choxü nayaxögü rü yemacèx namaã chanu rü aixcümaxüchi namaã nüxü chixu na täütáma yema naãne ga namaã ichaxunetaxüwa nangugüxü na ngëxma nangüëxüçèx”,

ñanagürü. ⁵⁻⁶ Rü yemaãcü ga yema duüxügü ga nüxira nüxü ñnüëxü ga Tupanaärü ore i mexü, rü tama nawa nichocu ga yema nachica ga Tupana namaã nüxü ixuxü, yerü tama naga naxinüë. Rü ngëmacèx nixi i Tupanaärü ore i ümatüxüwa i ñaxü:

“Ngëma duüxügü i tama chauga ñnüëxü rü täütáma ngëma nachica i namaã ichaxunetaxüwa nichocu na ngëxma nangüëxüçèx”,

ñaxü. Natürü ñuxma rü ta nangëxma i nachica i tümacèx ya yixema ngëxma Tupanaxütagu chocuchaüxë na ngëxma tarüngüëxüçèx. ⁷⁻⁸ Rü ngëma nachica i ngextá nagu nangüëxü i duüxügü rü tama yema naãne ga nuxcümaügüxü ga törü oxigüxacügü tümaärü äëxgacü ga Yochuémaã tayauxgüxü nixi. Yerü yexguma chi yema naãne yixigu, rü Tupana rü täü chima wenaxärü nüxü naxuneta ga to ga ngunexü na nagu naxütawa yachocuxüçèx na ngëxma nangüëxüçèx i duüxügü. Rü yemacèx ga Tupana rü wenaxärü nüxü naxuneta i wüxi i to i ngunexü na naxütawa yachocuxüçèx i duüxügü na ngëxma nangüëxüçèx. Rü ngëma ngunexü rü ñuxma nixi. Rü yemacèx ga Tupana rü mucüma ga taunecü ga Moïchéwena rü Dabímaã nüxü nixu ga yema norü ore ga ümatüxü i ñaxü:

“Rü ñuxma na nüxü pexinüëxü i ngëma Tupana pemaã nüxü ixuxü, rü tama name na nüxü pexoexü”,

ñaxü. Rü yematama nixi ga ore ga marüchirëx pemaã nüxü chixuxü. ⁹ Rü ngëmacèx i ñuxma rü ta nangëxma i wüxi i nachica i üünexü i nagu tá aixcüma nangüëxü i ngëma Tupanaärü duüxügü ixigüxü. ¹⁰ Rü yixema Tupanaxütawa ichocuxe na ngëxma tarüngüëxüçèx, rü nüxna tarüngüë i guxüma i tümaärü puracügü yexgumarüü ga Tupana rü nüxna na nangüxü ga norü puracügü ga yexguma naãne naxüxguwena. ¹¹ Rü ngëmacèx name na meã yaxögüxü rü naga ixinüëxü na ichocuxüçèx i ngextá Tupana tüxü írüngüëxëxüwa. Erü tama tanaxwëxe na texé ngürüachi yema nuxcümaügüxü ga duüxügü ga tama Tupanaga ñnüëxürüü norü orexü na taxoxü. ¹² Erü Tupanaärü ore rü namaxü rü naporaxüchi. Rü wüxi i tara i guxücüwawa meã waixmaguxüärü yexera nixi na natéxü. Erü ngëma ore rü tawa nixücu ñuxmata taãëwa nangu, rü ñuxmata nawa nangu i ngëma wüxichigü nagu rüxinüxü. Rü ngëmaãcü meãma nanangoxëëãma i guxüma i ngëma yixicatama nagu rüxinüxü rü tüxü ngüchaüxü. ¹³ Rü nataxütáma i tacü i Tupana üxü i tá naxchaxwa nügü icüxü erü napëxewa rü guxüma meã nangox. Rü guxüxü nadau rü guxüxü nacüex ya yima tá tüxna çacü na namaã nüxü ixuxüçèx i törü maxüchiga.

Ngechuchu rü mecüxüchi ya törü ngüxëëruü nixi i Tupanapëxewa

¹⁴ Ngechuchu ya Tupana Nane rü mecüxüchi ya törü ngüxëëruü nixi i Nanatüpëxewa. Rü ñuxma rü daxügüxü i naãnewa i Nanatüxütawa nangëxma na ngëma taétüwa nachogüxüçèx. Rü ngëmacèx tanaxwëxe i guxüguma nüxü tayaxögüecha rü taguma nüxü tarüxoë. ¹⁵ Rü nüma ya Ngechuchu rü aixcüma nüxü nacüex na tüxü nangüxëëxü erü nüxü nacüex na ñuxacü tüxü naguxchaxü i ngëxguma Chataná tüxna ñnügu rü pecadugu tüxü nanguxëëchaügu, yerü nüxna rü ta naxinü ga Chataná, ngëma tüxna

na naxĩnũxũrũũ. Natũrũ nũma ga Ngechuchu rũ taguma chixexũ naxũ. ¹⁶ Rũ ñũxma na tũxũ nangẽxmaxũ ya tórũ ngũxẽẽruũ ya Ngechuchu, rũ name nixĩ i tama imuũẽãcũma nũxna tangaicamagũ ya tórũ ãẽxgacũ ya Tupana ya tũxũ ngechaũcũ. Rũ tanaxwẽxe na ngẽmaãcũ nũxna ingaicamagũxũ na nũxũ ingechaũtũmũũgũxũcẽx rũ tũxũ nangechaũãcũma tũxũ nangũxẽẽxũcẽx i ngẽxguma guxchaxũgũ tũxna ngaicamagu.

5

¹ Nuxcũma ga Tupana rũ Moĩchẽmaã nũxũ nixu na Arãũ yĩxũcẽx ga Yudiũgũarũ paigũeru ixĩcũ na guma duũxũgũtũwa chogũxũcẽx ga Tupanapẽxewa. Rũ guxũma ga yema Arãũwena ũgũxũ ga paigũeru rũ duũxũgũtanũwa nũxũ naxunetagu na yema duũxũgũarũ ngũxẽẽruũ yĩxũcẽx ga Tupanapẽxewa rũ Tupanana naxããxũcẽx ga ãmaregũ rũ Tupanacẽx nadaiãxũcẽx ga naxũnagu na yemaãcũ nũxũ nũxũ nangechaũxũcẽx ga norũ pecadugũ. ² Natũrũ ngẽma paigũeru rũ guxũma i duũxũgũrũũtama nixĩ na pecadugu nanguxũ. Rũ ngẽmacẽx nũxũ nacuẽx na ñuxãcũ yaxna namaã naxĩnũxũ i duũxũgũ i ngẽxguma naẽchitamare pecadu naxũegu rũ tama aixcũma Tupanawe naxĩxgu. ³ Rũ ngẽma paigũeru rũ tama ngẽma duũxũgũarũ pecaducẽxicatama nixĩ i nadaiãxũ i naxũnagu, natũrũ nanaxwẽxe i noxrũtama pecaducẽx rũ ta na nadaiãxũ i naxũnagu na ngẽmaãcũ Tupana nũxũ nũxũ nangechaũxũcẽx i ngẽma pecadugũ. ⁴ Rũ taxũema tũgũtama tingucuchixẽẽ na paigũeru tiĩxũcẽx. Natũrũ Tupana nixĩ ya tũxũ unetacũ rũ tũxna naxãcũ i ngẽma puracũ na paigũarũ ãẽxgacũ tiĩxũcẽx, yexgumarũũ ga Tupana rũ Arãũxũ na yangucuchixẽẽxũrũũ na paigũeru yĩxũcẽx. ⁵ Rũ yexgumarũũ ga Ngechuchu rũ tama nũgũtama ningucuchixẽẽ na Tupanapẽxewa tórũ ngũxẽẽruũ i paigũeru yĩxũcẽx. Natũrũ Tupana nixĩ ga yangucuchixẽẽcũ. Yerũ Tupanatama nixĩ ga nũxũ ñacũ:

“Cuma nixĩ i Chaune. Rũ ñũxma chanangoxẽẽ na Chaune quiĩxũ”,

ñacũ. ⁶ Rũ toxnamana i Tupanaãrũ ore i ũmatũxũwa rũ ñanagũrũ ta:

“Cuma nixĩ i guxũgutãma duũxũgũarũ ngũxẽẽruũ i paigũeru quiĩxũ, guma pai ga Melquisedãrũ”,

ñanagũrũ. ⁷ Rũ yexguma Cristu ñoma ga naãnewa maũxgu, rũ porãcũ nayumũxẽ rũ tagaãcũ rũ naxauxãcũ Tupanana naca na nũxũ nangũxẽẽxũcẽx na naga naxĩnũxũcẽx. Rũ yemaãcũ nanaxũ ga Cristu, yerũ Tupana rũ napora na nũxũ nangũxẽẽxũcẽx na tama yuxũ namuũxũcẽx. Rũ Tupana rũ Cristuxũ naxĩnũ yerũ nũma ga Cristu rũ aixcũma Tupanaga naxĩnũ. ⁸ Rũ nũma ga Cristu rũ woo Tupana Nane na yĩxũ, natũrũ ngũxũ ninge naxcẽx na Tupanaga naxĩnũxũ. ⁹ Rũ yemaãcũ nũgũ inaxã rũ curuchagu nayu na tũmaãrũ maxẽxẽẽruũ yĩxũcẽx ya guxãma ya yĩxema naga ñnũẽxẽ. ¹⁰ Rũ Nanexũ nixĩ ga naxunetaxũ ga Tupana na guxũgutãma nũgũpẽxewa tórũ ngũxẽẽruũ i paigũeru yĩxũcẽx yexgumarũũ ga pai ga Melquisedã ga norũ yumũxẽwa nuxcũmaũcũ ga tórũ oxĩ ga Abrãũcẽx Tupanana çacũ na guma Abrãũxũ nangũxẽẽxũcẽx ga Tupana.

Wũxi i ãũcũmaxũchixũ nixĩ na nũxũ rũxoexũ na yaxõgũxũ

¹¹ Rũ ñũxma rũ toxũ nangẽxma i muxũchixũma i ore i Cristuchiga ixĩxũ i pemaã nũxũ tixuxchaũxũ. Natũrũ naguxchaxũchi na meãma pemaã tanangoxẽẽxũ i ngẽma, erũ pema rũ tama pexũ natauxcha na nũxũ pecuãxũ. ¹² Rũ marũ ñuxgumama nũxũ na pecuãxũ i Tupanaãrũ orchiga, rũ pema rũ chi marũ namaã pengũexẽẽtae. Natũrũ i pema rũ ñũxma rũ ta penaxwẽxe na wena pemaã tanangoxẽẽxũ i ngẽma Tupanaãrũ ore i taxchaxũ i nawa inaxũgũxũ na Tupanachigaxũ icuãxũ. Rũ ngẽmaãcũ i pema, rũ ñoma õxchana i naẽgũnenixũwa maĩxũrũũtama pixĩgũ. Erũ tama nũxũ pecuẽxgũega i guxũma i ngẽma Tupanaãrũ ore i yexeraãcũ tamaã nũxũ ixuxũ i Cristuchiga na ñuxãcũ Tupana naxwẽxexũ na naga pexĩnũẽxũ. ¹³ Rũ yĩxema yaxõxẽ ya tama nũxũ cuẽxégaxe na ñuxãcũ Tupanacẽx tamaxũxũ, rũ wũxi i õxchana i maĩxũrũũ tixĩ. Rũ ngẽmaãcũ pixĩgũ i pemax. ¹⁴ Natũrũ yĩxema yaxõxẽ ya tũmamaã yaxũxe na tanangugũxũ na çacũ yĩxũ i ngũxẽẽtae

i mexŭ rŭ ěxna chixexŭ, rŭ aixcŭma nŭxŭ tacuèx na ñuxăcŭ Tupanacèx tamaxŭxŭ. Rŭ yíxema rŭ ñoma wŭxi i duŭxŭ i yaxŭ i namachimaã āwemŭxŭrŭŭ tixī. Natŭrŭ i pema rŭ tama ngēmaăcŭ pixīgŭ.

6

¹ Rŭ ngēmacèx name nixī i yexeraăcŭ tingŭeetanŭ na aixcŭma meã nŭxŭ icuáxŭcèx i Cristuchiga. Rŭ tanaxwèxe na nŭxŭ ichopetŭxŭ ga yema ore ga nawa inaxŭgŭxŭ na Cristuchigaxŭ icuáxŭ. Rŭ tãŭtãma yeŭcŭrŭ yema ore ga nawa inaxŭgŭxŭchiga tidexagŭecha. Rŭ taxucèxma tŭxcŭŭ wena pemaã nŭxŭ tixu na nŭxŭ perŭxoexŭcèx na nagu pexīxŭ i ngēma mugŭ ga Moīché ŭmatŭxŭ i tama tŭxŭ maxēxēxŭ. Rŭ ngēxgumarŭŭ ta taxucèxma tŭxcŭŭ wena pemaã nŭxŭ tixu i nachiga na ñuxăcŭ Tupanaăxŭ yaxŭgŭxŭ. ² Rŭ ngēxgumarŭŭ ta taxucèxma tŭxcŭŭ wena pexŭ tangŭexēē na ñuxăcŭ Tupanacèx íbaiŭxŭ rŭ ñuxăcŭ duŭxŭgŭxŭ ingŭgŭăcŭma namaã iyumŭxexŭ. Rŭ ngēxgumarŭŭ ta taxucèxma tŭxcŭŭ wena pexŭ tangŭexēē na ñuxăcŭ tá wena namaxēxŭ i duŭxŭgŭ i yuexŭ rŭ ñuxăcŭ naãneărŭ gŭxgu rŭ Tupana tá wŭxichigŭ i duŭxŭgŭna çaxŭ na ñuxăcŭ namaxēxŭ i ñoma i naãnewa. ³ Rŭ ngēmacèx i ñuxma rŭ ngēxguma Tupana tama tŭxna nachŭxgu rŭ tanaxwèxe i yexeraăcŭ tingŭeetanŭ na aixcŭma guxŭma i Cristuchigaxŭ icuáxŭcèx rŭ nŭxŭ na icuáxŭcèx na aixcŭma ngēma nŭma nanaxwèxexŭăcŭma meã naxcèx na imaxēxŭ. ⁴⁻⁵ Natŭrŭ ngēxguma chi wŭxie Cristuxŭ yaxŭgu, rŭ chi meãma Tupanaxŭ tacuèxgu, rŭ chi Naãē i Ūnēxŭxŭ tayaxŭgu, rŭ chi nŭxŭ tacuèxgu na ñuxăcŭ namexŭ i Tupanaărŭ ore rŭ ñuxăcŭ na namexŭ i daxŭgŭxŭ i naãne, rŭ name nixī i taxuăē. ⁶ Erŭ ngēxguma chi ngēmaăcŭ meã tayaxŭgu i noxrix rŭ ñuxŭchi Cristuxŭ ítatēxŭchixgu, rŭ marŭ taxucŭrŭwama texé wenaxărŭ Tupanacèx tŭxŭ tataeguxēē. Erŭ ngēxguma ngēmaăcŭ ítanatēxŭchixgu ya Tupana Nane, rŭ ñoma wena curuchawa tayapotaxŭrŭŭ tayaxŭxēē, erŭ guxŭ i duŭxŭgŭpēxewa āne nŭxŭ tingexēē. ⁷ Rŭ dŭcax, wŭxi i naãne i pucŭ nagu nguxŭ rŭ meãma nanetŭ nawa nayae tŭmacèx ya yíxema nagu ŭanexē, rŭ Tupanaărŭ ngŭxēēgagu nixī i ngema. ⁸ Natŭrŭ ngēxguma ngēma naãne rŭ tuxu rŭ natŭanegŭ i chixexŭ nawa yaegu, rŭ Tupana rŭ tá chixexŭ namaã naxuegu rŭ ŭxŭwa tá nigu i guxŭma i nawa yaxŭ. Rŭ ngēxgumarŭŭ tá tixī ya yíxema Cristuxŭ ítaxe.

Ítananguxēē na nayauxgŭxŭ i maxŭ i taguma gŭxŭ rŭ ngēmacèx tama nŭxŭ tarŭxoe na yaxŭgŭxŭ

⁹ Natŭrŭ, Pa Chaueneēgŭ ya Pexŭ Tangechaŭgŭxe, rŭ woo ngēmaăcŭ pemaã tidexagŭgu, natŭrŭ aixcŭma nŭxŭ tacuèx na tama ngēma duŭxŭgŭ i nŭxŭ rŭxoexŭrŭŭ pixīgŭxŭ. Erŭ pema rŭ pexŭ nangēxma i maxŭ i taguma gŭxŭ, rŭ Tupana rŭ tá aixcŭma poraăcŭ pexŭ narŭngŭxēē na naxcèx pemaxēxŭcèx. ¹⁰ Erŭ nŭma ya Tupana rŭ aixcŭmacŭ nixī. Rŭ nŭma rŭ tãŭtãma nŭxŭ inayarŭngŭma ga yema mexŭ ga pexŭxŭ rŭ ñuxăcŭ taeneēgŭ i yaxŭgŭxŭxŭ na pengechaŭgŭxŭ ga yexguma nŭxŭ perŭngŭxŭēēgŭgu, ngēma ñuxma ípenaxŭxŭrŭŭtama. ¹¹ Rŭ ñuxma rŭ tanaxwèxe i wŭxichigŭ i pema rŭ ngēmaăcŭ noxrirŭŭ mexŭ i perŭ ngŭchaŭmaã nŭxŭ perŭngŭxŭēēgŭecha i taeneēgŭ ñuxmatáta wena núma naxŭ ya Cristu. Rŭ tanaxwèxe na ngēmaăcŭ pemaxēxŭ na dŭxwa aixcŭma Cristuxŭtawa pengugŭxŭ ngēma ípenanguxŭxŭrŭŭ. ¹² Rŭ tama tanaxwèxe na nŭxŭ perŭxoetanŭcŭŭxŭ na Cristuwe perŭxŭxŭ. Natŭrŭ tanaxwèxe i naxrŭŭ pixīgŭ i ngēma duŭxŭgŭ i guxŭguma meã yaxŭgŭăcŭma Cristuwe rŭxŭămaxŭ rŭ nayauxgŭxŭ i guxŭma i ngēma mexŭgŭ ga Tupana namaã ixunetaxŭ. ¹³ Rŭ dŭcax, yexguma tŭrŭ ŭxi ga Abráŭmaã inaxunetagu ga Tupana rŭ nŭgŭégagutama inaxuneta, yerŭ tataxuma ga texé ga norŭ yexera ixŭxē na tŭmaegagu inaxunetaxŭcèx. ¹⁴ Rŭ yemacèx ga Tupana rŭ Abráŭxŭ ñanagŭrŭ:

“Rŭ aixcŭmaxŭchi tá poraăcŭ cuxŭ charŭngŭxŭēē. Rŭ tá cuxŭ nangēxma i muxŭchixŭtama i cutaagŭ”,

ñanagürü. ¹⁵ Rŭ Abráŭ rŭ meãma ínananguxêê ga guma nane ga Tupana namaã ixunetacü. Rŭ yemacèx nabu ga guma nane ga Ichaá ga Tupana namaã nüxŭ ixucü. ¹⁶ Rŭ ngêxguma duŭxŭgŭ tacücèx ixunetagu, rŭ to i norü yexera ixŭxŭegagu inaxunetagu. Rŭ wüxicana tacücèx ngêmaãcü inaxunetagu, rŭ nüxŭ tacuèx rŭ aixcüma tá nanaxŭgŭ i ngêma naxcèx inaxunetagüxŭ, rŭ marü taxucürüwama yeücürü nachiga nidexagüecha. ¹⁷ Rŭ yemacèx ga Tupana rŭ yexguma inaxunetagu namaã ga yema duŭxŭgŭ ga nayauxgŭxŭ tá ga yema ngŭxêê ga Tupana nüxna áxchaŭxŭ, rŭ nügüégagutama inaxuneta, yerü nanaxwèxe na meãma nüxŭ nacuèxgŭxŭ na aixcüma tá yanguxêêãxŭ rŭ tagutáma naxüchicüüãxŭ ga yema namaã inaxunetaxŭ. ¹⁸ Rŭ nüxŭ tacuèx rŭ ngêxguma tacücèx nügüégagu inaxunetagu ya Tupana, rŭ taxucürüwama tüxŭ nawomüxêê rŭ nanaxüchicüü i ngêma. Rŭ ñuxma i guxãma i yixema na Tupanacèx ibuxmüxŭ na tüxŭ nangŭxêêxücèx rŭ tüxŭ namaxêêxücèx, rŭ nüma ya Tupana rŭ nügüégagu tamaã inaxuneta na ngêmaãcü tá tüxŭ nangŭxêêxŭ. Rŭ ngêmaãcü tüxŭ nanangüchaŭxêê rŭ tüxŭ narüngŭxêê na nüxŭ icuáxŭcèx na aixcüma tá nayauxgŭxŭ i ngêma maxŭ i taguma gŭxŭ i tamaã inaxunetaxŭ. ¹⁹ Rŭ ñuxma na ínanguxêêxŭ na aixcüma tá nayaxuxŭ i ngêma maxŭ i taguma gŭxŭ, rŭ taxucèxma taxoegaãégŭ, erü nüxŭ tacuèx na aixcüma daxŭgŭxŭ i naãnewa i Tupana íngêxmaxŭwa tá ingugŭxŭ. ²⁰ Rŭ ngema nangêxma ya Ngechuchu i ñuxma yerü nüxŭra yexma naxücu na Tupanapêxewa taétüwa nachogŭxŭcèx. Rŭ ngêmaãcü guxŭguma tórü ngŭxêêruü i paigüeru nixŭ, guma Melquisedé ga Tupanapêxewa Abráŭtŭwa chogücürüü.

7

Ngechuchu rŭ guma nuxcümaücü ga pai ga Melquisedérüütama nixŭ

¹ Rŭ guma Melquisedé rŭ ñãne ga Charéŭrŭ ãêxgacü nixŭ ga yexguma namaŭxgu ga Abráŭ. Rŭ nüma ga Melquisedé, rŭ duŭxŭgŭarü pai nixŭ ga Tupanapêxewa. Rŭ yexguma Abráŭ rŭ to ga nachiŭãneãrŭ ãêxgacügümaã nügü nadaixgu rŭ nüxŭ nayexeragu, rŭ Melquisedé rŭ namawa Abráŭpêxegu nayangu ga yexguma Abráŭ napatacèx taegugu. Rŭ nüma ga Melquisedé rŭ Tupanaégagu Abráŭmaã mexŭ naxuegu. ² Rŭ Abráŭ rŭ nüxŭ nayexma ga guxŭma ga yemaxŭgŭ ga yema ãêxgacügŭ ga namaã nügü nadèxŭna napuxŭxŭ. Rŭ yemawa ínanaxŭxüchi ga yema Tupanana üxŭ, rŭ Melquisedéna nanaxã. Rŭ ngêma naega i Melquisedé rŭ ãêxgacü ya Ixaixcümacü ñaxŭchiga nixŭ. Rŭ norü ñãne ga Charéŭ rŭ Taãêxêêruü ñaxŭchiga nixŭ. Rŭ ngêmacèx i naega i Melquisedé rŭ ãêxgacü ya Taãêxêêruü ñaxŭchiga ta nixŭ. ³ Rŭ Tupanaãrŭ ore ga nuxcüma ümatüxŭwa rŭ tama nüxŭ nixu na texé tŭxŭ ga nanatü rŭ naê rŭ norü oxigŭ ga Melquisedé. Rŭ ngêxgumarüü ta tama nüxŭ nixu i norü buxchiga rŭ norü yuxchiga. Rŭ ngêmacèx Tupana Nanerüü guxŭguma duŭxŭgŭarü ngŭxêêruü ya pai nixŭ i Tupanapêxewa. ⁴ Rŭ ñuxma rŭ name nixŭ i nagu perüxŭnŭê na ñuxãcü aixcüma ãêxgacü ya tacü yŭxŭ ga Melquisedé. Yerü nuxcümaücü ga tórü oxŭ ga Abráŭ rŭ Melquisedéna nanaxã ga yema Tupanana üxŭ ga natanüwa ga yema yemaxŭgŭ ga togŭ ga ãêxgacügüna napuxŭxŭ. Rŭ ngêmawa nüxŭ tacuèx na Tupanapêxewa tórü oxŭ ga Abráŭrŭ yexeracü yŭxŭ ga Melquisedé. ⁵ Rŭ ñuxma i Yudŭgŭ, rŭ guxŭma i norü ngêmaxŭwa ínanaxŭxüchigŭ i ngêma Tupanana üxŭ, rŭ ñuxŭchi norü paigüna nanaxã yerü yemaãcü nixŭ ga namuãxŭ ga yema mugŭ ga Moŭché ümatüxŭ. Natürü guxŭma i ngêma paigŭ rŭ Lebítaagŭ nixŭgŭ. Rŭ nüma ga Lebŭ rŭ guxŭma i Yudŭgŭrŭü Abráŭtaa nixŭ. Rŭ ngêmaãcü i ngêma Yudŭgŭ rŭ norü paigüna nanaxã i ngêma Tupanana üxŭ, woo natanüxŭgŭ i Yudŭgŭ na yŭxŭ i ngêma paigŭ. ⁶ Natürü ga Melquisedé rŭ woo tama Lebítaa nixŭ, natürü Abráŭmêxewa nanayaxu ga yema Tupanana üxŭ. Rŭ nüxŭ tacuèx na Abráŭ yŭxŭ ga noxri nayaxucü ga Tupanaãrŭ uneta. Rŭ Melquisedé rŭ Tupanana naca na Abráŭmaã mexŭ naxueguxŭcèx. ⁷ Rŭ guxãma meãma nüxŭ tacuèx rŭ ngêxguma texé toguècèx Tupanana caxgu na tüxŭ nangŭxêêxücèx, rŭ Tupanapêxewa rŭ yixema nüxna

çaxe rü ngēma togü i naxcèx ítaçaxüârü yexera tixĩ. Rü ngēmaãcü nüxü tacuèx na Abráüârü yexera yiixü ga Melquisedé i Tupanapëxewa. ⁸ Rü ñuxma i nuã tatanüwa rü ngēma paigü i ngixü yauxgüxü i ngēma dïeru i Tupanana ücü, rü duüxügümare nixigü rü tá nayue. Natürü ngëxguma Melquisedéchiga yadexagu i Tupanaârü ore, rü ñoma namaxüxürüü nixĩ i nachiga yadexaxü. Rü ngēmawa nüxü tacuèx na Cristu ya guxüguma maxücürüü na yiixü ga Melquisedé. ⁹⁻¹⁰ Rü Abráütaa ga Lebí, rü guxüma i paigü i Lebítaagü ixigüxü i ñuxma ngixü yauxgüxü i ngēma dïeru i Tupanana ücü, rü nümagü rü ta Abráümaã Melquisedéna nanaxägü ga yema Tupanana üxü. Yerü nüma ga Lebí rü guxüma ga nataagü i ñuxma Yudíugüarü paigü ixigüxü, rü woo ga na tauta nabuexü ga yexguma, natürü marü Abráüxünewa nayexmagü ga yexguma Melquisedé namawa Abráüpëxegu yanguxgu. Rü ngēmawa nüxü tacuèx na guxüma i ngēma paigüarü yexera yiixü ya Melquisedé. ¹¹ Rü nuxcümaügüxü ga tórü oxigü ga Yudíugü, rü Lebítaagü ga paigümëxëwa nixĩ ga nayauxgüãxü ga Tupanaârü mugü. Natürü pemaã nüxü chixu rü yexguma chi yema paigü aixcüma yema Yudíugüxü imexëëgüga ga Tupanapëxewa, rü taxucèx chima Tupana nüxü naxuneta ga naĩ ga pai ga Melquisedérüü ixicü ga tama Lebítaa ga Aräürüü ixicü. Rü yemacèx ga Tupana rü nüxü naxuneta ga Nane ga Ngechuchu na tórü chogüruü ya pai yiixücèx. ¹² Rü yemacèx ga Tupana rü yema Yudíugüarü paigüchicüxü nayangucuchixëë ga Cristu. Rü nüma nixĩ i ñuxma i aixcüma Tupanapëxewa tüxü yamexëëgüxü. Rü guxüma ga Lebítaa rü paigü nixigü yerü yemaãcü nixĩ ga naxueguxü nawa ga yema mugü ga Moiché ümatüxü. Natürü nüma ga Cristu rü marü nanaxüchicüü ga guxüma ga yema. ¹³⁻¹⁴ Erü meãma nüxü tacuèx rü nüma ya tórü Cori ya Ngechuchu ya yima nachiga idexagücü rü tama Lebítaa nixĩ erü nüma rü Yudátaa nixĩ. Rü nüxü tacuèx rü taxuüma ga Yudátaa rü pai nixĩ, yerü ga Moiché rü yexguma yema paigüchiga yadeaxgu rü taxuüma ga Yudátaaxü naxuneta na pai yiixücèx. ¹⁵ Rü ngēmaãcü meã nangox na Tupana iyanaxoxëëxü ga guxüma ga yema mugü ga Moiché ümatüxü ga paigüchiga. Yerü nüma ga Tupana rü nüxü naxuneta ga wüxi ga pai ga yexwacaxücü ga tama Lebítaa ixicü. Rü nüma nixĩ i tórü Cori yiixü ya Melquisedérüü ixicü, erü guxüma i ngēma togü i paigüarü yexera nixĩ. ¹⁶ Rü guxüma ga yema togü ga paigü rü nangucu yerü Lebítaa nixigü. Natürü nüma ga Cristu rü paixü ningucuchi yerü poramaã yuwa ínarüda rü guxüguma namaxëcha na tüxü nangüxëëxücèx. ¹⁷ Rü ngēmacèx i Tupanaârü ore i ümatüxüwa rü tórü Corichiga ñanagürü:

“Cuma rü guxügutáma duüxügüarü ngüxëëruü ya pai quixĩ Melquisedérüü”, ñanagürü. ¹⁸⁻¹⁹ Rü yemacèx ga Tupana rü ñoma ga naãnewa nanamu ga Nane, yerü yema mugü ga paigüchiga naxümatüxü ga Moiché rü tama poraãcü tüxü narüngüxëë yerü tama aixcüma tüxü nimexëëgü ga Tupanapëxewa. Rü yemacèx Nanexü namu ga Tupana na tórü pecaducèx nayuxücèx na ngēmaãcü tüxü nangëxmaxücèx i maxü i taguma gúxü rü aixcüma Tupanamücügü ixigüxücèx. ²⁰⁻²¹ Rü yexguma Tupana yema togü ga paigüxü ngucuxëëgu, rü nanangucuxëëmare. Natürü yexguma Cristuxü yangucuchixëëgu na tórü ngüxëëruü ya pai yiixücèx, rü nügüégagutama inaxuneta. Rü yemacèx ga yexguma Cristuxü yangucuchixëëgu rü ñanagürü:

“Choma i Cori ya Tupana rü marü cuxü chaxuneta na guxügutáma duüxügüarü ngüxëëruü ya pai quiixücèx. Rü ngēma rü tagutáma chanaxüchicüü erü chaugüégagu ichaxuneta”,

ñanagürü. ²² Rü ñuxma na yemaãcü nügüégagutama inaxunetaxü ga Tupana, rü nüxü tacuèx na aixcümaxüchima yema paigüarü yexera na yiixü ya Cristu erü guxügutáma Tupanapëxewa tüxü narüngüxëë. ²³ Rü yema togü ga paigü rü namuxüchi, yerü niyuetanü. Rü yemacèx taxucürüwama guxüguma paigü nixigü. ²⁴ Natürü ñuxma na tórü ngüxëëruü ya paixü yangucuchixü ya Ngechuchu, rü ngēmacèx marü taxucèxma texë ya togue tingucuchi, erü nüma ya Ngechuchu rü tagutáma nayu. ²⁵ Rü ngēmacèx nixĩ

i ñuxma i nüxŭ natauxchaxŭ na aixcŭma tŭxŭ namaxēxēxŭ ya guxāma ya yixema norŭ ngŭxēēmaā Tupanaxŭtawa ngugŭxe. Erŭ nŭma ya Ngechuchu rŭ guxŭguma namaxēcha na tŭmaetŭwa nachogŭxŭcèx. ²⁶ Rŭ ngēmaācŭ ya Ngechuchu, rŭ nüxŭcatama nixŭ i pai ya tŭrŭ ngŭxēēruŭ yŭxŭ i Tupanapēxewa. Erŭ nŭma rŭ aixcŭma naxŭŭne, rŭ nataxuma i chixexŭ i nawa, rŭ nangearŭ pecaduāx yerŭ taguma taxrŭŭ pecadu naxŭ. Rŭ ñuxma rŭ guxŭetŭwa nangēxma i daxŭguxŭ i naānewa i Tupana íngēxmaxŭwa. ²⁷ Rŭ Ngechuchu rŭ tama ngēma togŭ i paigŭerurŭŭ nixŭ. Erŭ nŭmagŭ rŭ nanaxwèxe na guxŭ i ngunexŭgu Tupanacèx naxŭnagŭ nadèixŭ na ngēmaācŭ Tupana nüxŭ nüxŭ ngechaŭxŭcèx i noxrŭtama pecadugŭ rŭ guxŭ i duŭxŭgŭarŭ pecadugŭ ta. Natŭrŭ nŭma ga Ngechuchu rŭ yexguma nŭgŭ inaxāxgu, rŭ wŭxicanatama pecaducèx nayu. Rŭ ngēma rŭ guxŭgutama name i Tupanapēxewa. ²⁸ Rŭ yema mugŭ ga Moíché ŭmatŭxŭ, rŭ duŭxŭgŭmarexŭ naxuneta na paigŭerugŭ yixŭgŭxŭcèx. Natŭrŭ nŭmagŭ rŭ ta nipecaduāxgŭ. Natŭrŭ yemawena ga Tupana rŭ nŭgŭégagu Nanexŭ naxuneta na tŭrŭ ngŭxēēruŭ yŭxŭcèx. Rŭ yima Nane rŭ guxŭguma mecŭxŭchi ya tŭrŭ Maxēxēruŭ nixŭ. Rŭ nŭma rŭ guxŭguma tŭxŭ narŭngŭxēē i Tupanapēxewa.

8

Ngechuchu nixŭ ya tŭrŭ ngŭxēēruŭ i Tupanapēxewa

¹ Rŭ ngēma pemaā nüxŭ tixuxchaŭxŭ i ñuxma nixŭ na tŭxŭ nangēxmaxŭ ya tŭrŭ ngŭxēēruŭ ya mexēchicŭ i Tupanaxŭtawa. Rŭ nŭma rŭ Tupana Nane ya Cristu nixŭ. Rŭ daxŭguxŭ i naānewa i Tupanaārŭ tŭgŭnecŭwawa narŭto erŭ guxŭārŭ āēxgacŭ nixŭ. ² Rŭ ngēma daxŭguxŭ i naānewa i ngēma nachica i ŭnŭnexŭ ga Tupana ŭxŭwa nixŭ i taxcèx ínacaxŭ. Rŭ tama ngēma Yudŭgŭarŭ paigŭrŭŭ wŭxi ya ípata ya duŭxŭgŭ ŭxŭnewa Tupanana taxcèx ínaca. ³ Rŭ guxŭma i ngēma Yudŭgŭarŭ paigŭeru rŭ nangucu na Tupanana naxāgŭāxŭcèx i āmaregŭ rŭ naxcèx nadaiāxŭcèx i naxŭnagŭ na Tupana nüxŭ nüxŭ ngechaŭxŭcèx i duŭxŭgŭarŭ pecadugŭ. Rŭ yemacèx ga Ngechuchu rŭ Tupanana nŭgŭ naxāmare na duŭxŭgŭarŭ pecaducèx nayuxŭcèx. ⁴ Rŭ ñuxma i nŭma ya Ngechuchu rŭ daxŭguxŭ i naānewa nangēxma na ngēma tŭrŭ ngŭxēēruŭ ya pai yŭxŭcèx i Tupanapēxewa. Rŭ ngēmacèx tama ñoma i naānewa nixŭ i pai yŭxŭ. Natŭrŭ ngēxguma chi ñoma i naānewa nangēxmagu rŭ tŭŭ chima pai nixŭ erŭ ñoma i naānewa nangēxmagŭ i ngēma Yudŭgŭarŭ paigŭ i Tupanana āmare āgŭxŭ yema Moíchéarŭ mugŭ nüxŭ ixuxŭrŭŭ. ⁵ Natŭrŭ ngēma puracŭ i ñoma i naānewa naxŭgŭxŭ i ngēma Yudŭgŭarŭ paigŭ, rŭ naxcèx nadauxŭtaegŭmare i ngēma Ngechuchu daxŭguxŭ i naānewa ŭxŭ. Rŭ ngēma nachica i nawa Tupanacèx napuracŭexŭ i ngēma paigŭ, rŭ nanaxŭchicŭnèxāgŭmare i ngēma nachica i Ngechuchu nawa ngēxmaxŭ. Rŭ meāma nüxŭ tacuèx i ngēma, yerŭ yexguma Moíché naxŭxchaŭgu ga Tupanapata, rŭ Tupana rŭ ñanagŭrŭ nüxŭ:
 “¡Dŭcèx, meā nangugŭ i ngēma cuèxruŭ ga cuxŭ chawéxŭ ga mèxpŭne ga Chinaŭwa! Rŭ chanaxwèxe i ngēmaācŭ na cunaxŭxŭ”,
 ñanagŭrŭ. ⁶ Natŭrŭ nŭma ya tŭrŭ ngŭxēēruŭ ya Cristu rŭ daxŭguxŭ i naānewa nangēxma, rŭ ngēma aixcŭmaxŭchi Tupanapēxewa taétŭwa nachogŭ. Rŭ ngēma Yudŭgŭarŭ paigŭ rŭ nagu naxŭāma ga yema nuxcŭmaŭxŭ ga uneta ga Moíché ŭmatŭxŭ. Natŭrŭ nŭma ya Tupana rŭ marŭ tŭxna nanaxā i wŭxi i ngexwacaxŭxŭ i uneta erŭ tamaā nüxŭ nixu na Cristu yŭxŭ ya aixcŭma tŭrŭ ngŭxēēruŭ ixŭcŭ. Rŭ nŭma rŭ nayu na Tupanapēxewa tŭxŭ yamexēēxŭcèx, rŭ ngēma Tupanaxŭtawa nangēxma i ñuxma na taétŭwa nachogŭxŭcèx. Rŭ ngēmaācŭ nüxŭ tadau na Tupanaārŭ uneta i ngexwacaxŭxŭ rŭ yema nuxcŭmaŭxŭ ga unetaarŭ yexera yŭxŭ na namexŭ. ⁷ Yerŭ yexguma chi yema nüxŭraŭxŭ ga uneta ga Moíché ŭmatŭxŭ rŭ aixcŭma namexgu na duŭxŭgŭxŭ namaxēxēxŭcèx, rŭ marŭ taxucèx chima tanaxwèxe i to i ngexwacaxŭxŭ i Tupanaārŭ uneta. ⁸ Natŭrŭ nŭma ga Tupana rŭ nüxŭ nadau na tama aixcŭma napēxewa duŭxŭgŭxŭ yamexēēxŭ ga yema nüxŭraŭxŭ ga uneta ga Moíchéna naxāxŭ. Rŭ yemacèx ga Tupana rŭ ñanagŭrŭ:

“Wüxi i ngunexü rü wena táxarü guxüma i chorü duüxügümaã ichaxuneta. ⁹ Natürü ngëma chorü uneta i ngexwacaxüxü, rü täütáma namaã nawüxigu ga yema nüxíraüxü ga chorü uneta ga nuxcümaügüxü ga perü oxigümaã nüxü chixuxü ga yexguma nüxü charüngüxëëgu na ínachoxüxüçèx ga Equituarü naãnewa. Yerü nümagü ga yema duüxügü rü tama chauga naxĩnüë rü tama nayanguxëë ga yema nüxíraüxü ga chorü uneta, rü yemacèx íchanawogü. ¹⁰ Natürü ngëxguma nawa nanguxgu na wena namaã ichaxunetaxü, rü ñaãcü tá nixĩ i guxüma i Yudíugümaã ichaxunetaxü: ‘Rü tá meãma ngëma duüxügüxü nüxü chacuèxëë i chorü mugü na aixcüma naãëwa nangëxmagüxüçèx. Rü choma rü tá norü Tupana chixĩ, rü nümagü rü tá chorü duüxügü nixĩgü’. ¹¹ Rü guxüma i ngëma duüxügü i choxü yaxögüxü, rü aixcüma tá choxü nacuèxgü. Rü ngëmacèx taxucèxtáma tüxcüü nügümaã nüxü nixugügü i chauchiga na ngëmaãcü choxü nacuèxgüxüçèx. Erü guxüma i chorü duüxügü rü aixcüma tá meã choxü nacuèxgü woo buxü rü éxna yaxü. ¹² Rü tá nüxü nüxü changechaü i norü chixexügü, rü tá nüxü ichayarüngümaxüchi i norü pepadugü”

ñanagürü ga Tupana. ¹³ Rü dücax, ñuxma na Tupana ngexwacaxüxü i unetachiga idexaxü, rü ngëmawa nüxü tacuèx na yema nüxíraüxü ga uneta rü marü nangupetüchaüxü. Rü nüxü tacuèx rü guxüma i ngëma marü ngupetüchaüxü, rü paxa tá inayarüxo. Rü ngëmaãcü i ngëma Yudíugüarü paigü, rü marü inayarüxoxchaü na Tupanapëxewa duüxügüxü nangüxëëxü. Erü nüma ya Tupana rü marü Cristuxü ningucuchixëë na tórü ngüxëëruü yiixüçèx i napëxewa.

9

Tupanapata ga duüxügü üxünechiga rü Tupanapata ya daxüguxü i naãnewa ngëxmanechiga

¹ Rü yexguma nuxcüma Moíchémaã yadeaxgu rü nüxna naxããgu ga yema nüxíraüxü ga uneta, rü Tupana namaã nüxü nixu na ñuxãcü nanaxwèxexü na nüxü yacuèxüügüxü. Rü yexgumarüü ta namaã nüxü nixu na ñuxãcü nanaxwèxexü na naxcèx naxüãxü ga wüxi ga ípata ga naxchirunaxcèx na yéma nüxü yacuèxüügüxüçèx ga paigü. ² Rü guma ípata ga naxchirunaxcèx rü nitüyemachĩã. Rü yema naxmachĩã ga nüxíra nawa ixücuxü, rü “Nachica i Üünexü” nixĩ ga naëga. Rü yéma nayexma ga werachica rü mecha ga pãu ga üünexü nagu nuxü. ³ Rü yema to ga naxmachĩã ga yema tüyemachĩãxüçèxwena üxü rü “Nachica i Üünexüchixü” nixĩ ga naëga. ⁴ Rü yéma nayexma ga yema mecha ga uirunaxcèx ga ngextá nawa yagugüãxü ga pumara ga yixixü ga yexguma yaguxgu. Rü yéma nayexma ta ga yema baú ga Tupanaãrü mugü nagu namaã nanguxügüxü. Rü yema baú rü guxüwama uirumaã natüxüne. Rü yematama baúarü aixepewa nayexma ga wüxi ga tüxüxãcü ga uirunaxcèx ga yema pãu ga daxüwa rüyixümaã aãcuxü. Rü yexgumarüü ta yema baúarü aixepewa nayexma ga Arãüãrü caxüruü ga rüxüxüne, rü guma nutagü ga Tupanaãrü mugü nagu ümatügücü. ⁵ Rü yema baúétüwa nayexmagü ga yema taxre ga daxüçüãxchicünèxãgü ga ixãxpëxatüxü. Rü naxpëxatügümaã nayadüxëtügü ga yema baúãtaü. Rü yema daxüçüãxchicünèxãgüarü ngãxüwa nixĩ ga nügü nangoxëëxüxü ga Tupana. Natürü taxucèxma tüxcüü yexeraãcü nüxü tixu i ngëmachiga. ⁶ Rü wüxicana yemaãcü na namexëëgüãxü ga guxüma ga yema, rü ñuxüchi ga paigü rü guxüguma yema nüxíraüxü ga naxmachĩãgu nachocuxü na yéma Tupana namaã nüxü ixuxüãcüma nüxü yacuèxüügüxüçèx. ⁷ Natürü yema to ga naxmachĩãwa rü yema paigüarü aëxgacüxicatama nixĩ ga yexma ücuxü. Rü tama guxüguma yexma naxücu, natürü wüxicanatama yexma naxücu ga wüxichigü ga taunecügu. Rü yexguma yexma naxücu rü yéma nanange ga naxünagü rü guma nagümaã yema baúxü namaxcuetü. Rü yemaãcü ga yema paigüarü aëxgacü rü inanaxã ga guma nagü na

noxrütama pecadu rü guxūma ga duūxūgūarū pecaduxū iyanangūmaxūcèx ga Tupana. ⁸ Natürü yema paigūarū āēxgacūxicatama nixī ga yema Nachica ga Üünexūchixūgu ücuxū ga Tupana íyexmaxūwa. Rü ngēmaācū Tupanaāē i Üünexū tüxū nüxū nacuèxēē na taxucürüwama yexma Tupana íyexmaxūgu nachocuxū ga guxūma ga duūxūgū yerü yexguma nagu naxīxgu ga yema mugū ga Moīché ūmatūxū rü nachuxu ga yema. ⁹ Rü guxūma i ngēma pemaā nüxū chixuchigaxū, rü wūxi i cuèxruū nixī i taxcèx i yixema na ñuxma imaxēxū. Rü ngēmawa nüxū tadau rü yema āmaregū ga Tupanana naxāgūxū rü yema naxūnagū ga Tupanacèx nadèixū rü taxucürüwama yema duūxūgūxū nimexēē na aixcūma Tupanapēxewa yamexūcèx. ¹⁰ Rü yema nuxcūmaūgūxū ga mugū ga ōnagūchiga rü axeūgūchiga rü nacūmagūchiga ixīxū, rü yema duūxūgūarū düxétūxūnecèxicatama nixīgū. Rü yemacèx tama yema duūxūgūxū nimexēē na aixcūma Tupanapēxewa yamexūcèx. Rü woo natora ga yema mugū ga noxrix, natürü yexguma ínanguxgu ga Cristu rü marü yexma nayacuèx na duūxūgūmaā naporaxū. ¹¹ Natürü i ñuxma rü marü ínangu ya Cristu. Rü nüma nixī i aixcūma tórü ngūxēēruū yīxū i Tupanapēxewa, rü nagagu nixī i nangēxmaxū i maxū i taguma gúxū. Rü ngēma nachica i ngextá taétüwa ínachogūxūwa rü aixcūma naxūüne erü tama guma ípata ga naxchirunaxcèx ga duūxūgūmare üxūnerū nixī erü daxūguxū i naānewa nangēxma. ¹² Rü Cristu rü marü daxūguxū i naānegu naxūcu i ngextá Tupana íngēxmaxūwa. Rü taxucèxma tüxcūū wūxichigū ya taunecūgu ngēxma naxūcu, erü marü guxūguma ngema nangēxmaēcha. Rü yexguma yexma naxūcuxgu, rü tama yema nanange ga chibugūgū rü wocaxacūgūgū na Tupanana naxāāxūcèx. Natürü nüma ga Cristu rü nagütama inaxā na yemaācū naxūtanūāxūcèx ga tórü pecadugū rü tüxū nangēxmaxūcèx i maxū i taguma gúxū. ¹³ Rü yema mugū ga Moīché ūmatūxū rü ñanagürü:

“Ngēxguma texé yuetaxū ingōgūgu, rü taxucürüwama Tupanapata ya naxchirunaxcèxgu taxūcu”,

ñanagürü. Rü yemacèx ga yema Yudíugū, rü yexguma wūxi ga yuetaxū yangōgūgūgu rü nanaxwèxegū ga na norü paixūtawa nagaāxū ga wūxi ga woca na yema pai Tupanacèx yamáxūcèx rü na yaguāxūcèx na yemaācū ga guma tanimaca rü dexágu nagūāxūcèx na yema duūxūgūxū namaā namaxcuxūcèx na yemaācū nüxna ínayixūcèx ga norü chixexū. Natürü yema rü duūxūgūarū düxétūxūnewaxicatama nanāmexēē rü tama norü maxūxū namexēē. ¹⁴ Natürü nagū ya Cristu rü yema naxūnagūgūarū yexera name erü tórü maxū namexēē na aixcūma Tupanapēxewa imexūcèx. Rü Cristu rü woo Tupana Nane na yīxū rü na nataxuxū ga norü chixexū, natürü Tupanana nügū naxā rü tórü pecaducèx nayu yerü Naāē i Üünexū nanaporaxēē. Rü yemaācū curuchagu nanabaxēē ga nagū. Rü ñuxma ya yima nagū rü ningū na tüxū namexēēxūcèx i Tupanapēxewa. Rü ngēmacèx taxucèxma tanaxwèxe na nagu ixīxū ga yema mugū ga Moīché ūmatūxū ga tama tüxna naxāxū i maxū i taguma gúxū. Rü ñuxma na Cristugagu Tupanapēxewa imexū, rü nüma ya Cristu rü tüxū narūngūxēē na naxūxūcèx i ngēma Tupana ya maxūcū tüxū naxwèxexū. ¹⁵ Rü ñuxma na tórü pecaducèx nayuxū ga Ngechuchu ya Cristu, rü nüma nixī i tórü ngūxēēruū i Tupanapēxewa, ngēma Tupanaārü uneta i ngexwacaxūxū nüxū ixuxürü. Rü ñuxma i yixema na Tupana tüxū dexū, rü tüxū nangēxma i maxū i taguma gúxū ega yima Naneāxū yaxōgūgu. Rü ngēxgumarūū ta i guxūma i Tupanaārü duūxūgū ga nuxcūma yaxōgūxū, rü nüxū nangēxma i maxū i taguma gúxū yerü Cristu nayu na norü pecaduna ínanguxūxēēāxūcèx. ¹⁶ Rü ngēxguma nayuxchaūgu i wūxi i duūxū, rü wūxi i poperagu nanaxūmatü na texé tá nayaxuxū i norü ngēmaxūgū. Natürü ngēxguma namaūxgu i ngēma duūxū, rü taxucürüwama texé tanayaxu i norü ngēmaxūgū. ¹⁷ Rü ngēmacèx i ngēma popera rü tama natora i ngēxguma namaūxgu i ngēma duūxū. Rü ngēxguma nayuxguxicatama nixī i naporaxū. ¹⁸ Rü nüma ga Cristu rü norü yumaā nixī ga Tupanapēxewa tüxū yamexēēgūxū. Yerü ga Moīché rü nüxū nixu rü yexguma texé pecaduāxgu rü tanaxwèxe na tümaārü paixūtawa tanagaxū ga wūxi ga naxūna na

tümaegagu nayuxêẽãxücèx rü inabaãxücèx ga nagü na Tupana tüxü nüxü ngechaüxücèx ga tümaãrü pecadu. ¹⁹ Rü Moïché rü guxüma ga duüxügüpêxewa nüxü nixu ga guxüma ga Tupanaãrü mugü. Rü yemawena nanayaxu ga wocaxacügügü rü chibuxacügügü, rü dexámaã nanaxüéü. Rü ñuxüchi nanayaxu ga wüxi ga naïxchacüüxácü rü ñuxre ga tüèxmü ga dauxüne, rü yema naïxchacüügu nanabagümü. Rü yemamaã guma nagüwa nanacúe rü ñuxüchi nanamaxcuétü ga yema popera ga Tupanaãrü mugü nawa yexmaxü. Rü yexgumarüü ta nayamaxcutanü ga guxüma ga duüxügü. ²⁰ Rü ñuxüchi ga Moïché rü ñanagürü nüxü ga duüxügü:

“Tupana rü marü inaxuneta na pexü tá nangüxêẽxü. Rü daa nagümaã pexü chimaxcutanü i ñuxma erü ngẽmaãcü nixi i choxü namuxü na ngẽmawa nüxü pecuáxücèx na aixcüma tá pexü nangüxêẽxü”,

ñanagürü. ²¹ Rü ñuxüchi ga Moïché rü guma nagümaã nanamaxcuétü ga guma ñpata ga naxchirunaxcèx ga nawa Tupanaxü yacuèxüüğüne. Rü yexgumarüü ta nayamaxcutanü ga guxüma ga yemaxügü ga namaã Tupanaxü yacuèxüüğüxü ga guma ñpataarü aixepewa yexmagüxü. ²² Rü nüxü tacuèx rü yema duüxügü ga yexguma pecadu naxügügu rü Tupanapêxewa nügü yamexêẽgüchaügu, rü norü paigüxütawa nanaga ga wüxi ga naxüna na nüxü yamáãxücèx rü inabagüxêẽãxücèx na Tupana tama napoxcuexücèx. Natürü ñuxma ya Tupana rü tüxü nüxü nangechaü i tórü chixexü yerü tórü pecaducèx nayu ga Ngechuchu rü nagü inanaba. Rü yexguma chi tãu chima nayuxgu rü nagü inabaãgu, rü taxucürüwa chima Tupana tüxü nüxü nangechaü i tórü pecadugü.

Cristu rü nayu na iyanaxoxêẽãxücèx i pecadu

²³ Rü yemacèx ga Tupana rü nuxcümaxüchima Moïchémaã nüxü nixu na paigü duüxügüarü pecaducèx nadèixü ga naxünagü rü inabaãxü ga nagü na yemaãcü Tupana tama napoxcuexücèx ga duüxügü. Natürü i ñuxma i yixema na Tupana tüxü dexü, rü tüxü nangèxma i tachica i daxüguxü i naãnewa yerü Nane ya Cristutama tórü pecaducèx nayu rü inanaba ga nagü. Rü yima nagü rü Tupanapêxewa rü poraãcü ngẽma naxünagügüarü yexera narüporamaẽ. ²⁴ Rü ngẽmacèx i ñuxma rü taxucèxma tüxcüü guma ñpata ga naxchirunaxcèx ga duüxügü üxünegu naxücu ya Cristu na ngẽma taétüwa nachogüxücèx. Erü nüma ya Cristu rü marü Tupanaxütawaxüchi nangu i daxüguxü i naãnewa. Rü ngẽma Nanatüpêxewa nangèxma i ñuxma na ngẽma taétüwa nachogüxücèx. ²⁵ Rü ngẽmacèx i ñuxma rü taxucèxma tüxcüü guxüguma Nanatüna nügü naxãècha na ngẽmaãcü taxcèx nayuuuxücèx. Rü yema Yudügüarü paigüarü ãëxgacügü rü gúcü ga taunecügügu guma ñpata ga üünenegu nachocuxü na yéma Tupanana naxãgüãxücèx ga guma naxünagügü. ²⁶ Natürü ya Cristu, rü taxucèxma tüxcüü gúcü ya taunecügügu Tupanana nügü naxãècha, erü ngëxguma chi ngẽmaãcü yixügu rü chi noxri naãne ixügügumama rü chi marü muëxpüxcüna taxcèx nayu. Natürü ñomaücüü ga Cristu rü marü ñoma ga naãnewa nangu na wüxicanatama nügü inaxãxücèx rü pecaducèx nayuxücèx. ²⁷⁻²⁸ Rü ngẽma na wüxicanatama nayuexü i duüxügü naxüpa na Tupanapêxewa nangugüxü, rü yexgumarüütama ga Cristu rü wüxicanatama nügü inaxã rü nayu na iyanaxoxêẽãxücèx i muxüma i duüxügüarü pecadugü. Natürü wena taxarü núma naxü. Rü ngëxguma wena núma naxüxgu rü tama pecaduarü oxêẽwa tá núma naxü. Natürü tá núma naxü na namaxêẽãxücèx i guxüma i ngẽma duüxügü i aixcüma ínangüxêẽgüxü.

10

¹ Rü yema mugü ga Moïché ümatüxü rü írarüwatama yema duüxügücèx nanangoxêẽ ga tacü tá na naxüxü ga Cristu. Natürü ga yema mugü rü tama aixcüma Cristurüü naporá, yerü taxucürüwama Tupanapêxewa nayamexêẽ ga yema duüxügü woo gúcü ga taunecügügu Tupanacèx nanadaiixü ga naxünagü na yemaãcü Tupanana nangaicamagüxücèx. Rü yemaãcü ga yema mugü rü taxucürüwama Cristurüü nanamaxêẽ ga

yema duŭxŭgŭ. ² Rŭ yexguma chi yema mugŭ aixcŭma yema duŭxŭgŭxŭ imexēēgu ga Tupanapēxewa, rŭ tāŭ chima nagu narŭxŭnŭēēcha na yapecaduāxŭ, rŭ chi nŭxŭ narŭxoe na naxŭnagŭ Tupanacèx nadèixŭ. ³ Natŭrŭ woo gŭcŭ ga taunecŭgŭgu Tupanacèx naxŭnagŭ nadèixŭ ga duŭxŭgŭ, rŭ tama norŭ pecadu inayarŭxoxēē. Rŭ yema rŭ norŭ pecaduarŭ cuèxāchixēēruŭmare nixŭ. ⁴ Yerŭ guma nagŭ ga yema wocagŭ rŭ chibugŭ rŭ tama naporā na iyanaxoxēēāxŭcèx ga pecadugŭ. ⁵ Rŭ yemacèx ga Cristu ga yexguma ñoma ga naānewa naxŭxchaŭgu, rŭ Nanatŭxŭ ñanagŭrŭ:

“Tama cunaxwèxe na naxŭnagŭ cuxcèx nadèixŭ i duŭxŭgŭ na naxŭtanŭgŭāxŭcèx i norŭ pecadugŭ. Natŭrŭ cunamexēē i ñāā chaxune na ngēmamaā chanaxŭtanŭxŭcèx i pecadu. ⁶ Rŭ tama namaā cutaāē i ngēma naxŭnagŭ i cuxna naxāmaregŭxŭ rŭ cuxcèx nadèixŭ rŭ yagugŭxŭ na naxŭtanŭgŭāxŭcèx i norŭ pecadugŭ. ⁷ Rŭ yemacèx rŭ ñacharŭgŭ: ‘Dŭcèx, Pa Chaunatŭx, daxe chixŭ, rŭ nuā cupēxewa changēxma na chanaxŭxŭcèx i curŭ ngŭchaŭ rŭ na chayuxŭcèx, ngēma curŭ orewa chauchiga naxŭmatŭxŭrŭŭ’, ñacharŭgŭ”.

⁸ Rŭ yemaācŭ ga Cristu rŭ nŭxŭ nixu na Tupana rŭ tama aixcŭma namaā nataāēxŭ ga yema na naxcèx nadaiāxŭ ga naxŭnagŭ rŭ naxcèx yagugŭāxŭ na naxŭtanŭgŭāxŭcèx ga norŭ pecadugŭ woo yema mugŭ ga Moŭché ŭmatŭxŭwa rŭ duŭxŭgŭxŭ namu na naxŭgŭāxŭ ga guxŭma ga yema. ⁹ Rŭ yemawena ga Cristu, rŭ ñanagŭrŭ ta:

“Dŭcèx, Pa Chaunatŭx, daxe chixŭ, rŭ nuā cupēxewa changēxma na chanaxŭxŭcèx i curŭ ngŭchaŭ rŭ duŭxŭgŭarŭ pecaducèx na chayuxŭcèx”,

ñanagŭrŭ. Rŭ yemawa nŭxŭ tacuèx na Tupana rŭ marŭ iyanaxoxēēāxŭ na naxŭnagŭ naxcèx nadèixŭ, yerŭ Nanexŭ ningucuchixēē na pecaducèx nayuxŭ. ¹⁰ Rŭ ñuxma na Ngechuchu ya Cristu naxŭxŭ ga yema Tupanaārŭ ngŭchaŭ, rŭ ngēmamacèx nixŭ i ñuxma i Tupanapēxewa ixŭnaxŭ i yixema. Yerŭ nŭma ga Cristu rŭ Tupanana nŭgŭ naxā na wŭxicanatama guxāārŭ pecaducèx nayuxŭ. ¹¹ Rŭ guxŭma i Yudŭgŭarŭ paigŭ rŭ wŭxichigŭ i ngunexŭgu rŭ tupaucawa nangēxmagŭxŭ na Tupanana naxāgŭāxŭcèx i naxŭnagŭ i naxcèx nadaiixŭ. Rŭ guxŭguma yemaācŭ nanaxŭgŭxŭ natŭrŭ taguma aixcŭma inayarŭxo ga norŭ pecadugŭ woo yemaācŭ na naxŭgŭxŭāxŭ. ¹² Natŭrŭ nŭma ga Ngechuchu ya Cristu rŭ wŭxicanatama Tupanana nŭgŭ naxā na guxāārŭ pecaducèx nayuxŭcèx. Rŭ yemawena rŭ ñuxŭchi daxŭwa naxŭ rŭ Tupanaārŭ tŭgŭnecŭwawa nayarŭto, erŭ guxāārŭ āēxgacŭ nixŭ i ñuxmax. ¹³ Rŭ ngēma nixŭ i nangēxmaxŭ ñuxmatāta ya Tupana rŭ guxŭma i norŭ uwanŭgŭxŭ nŭxŭ nayexeraxēē. ¹⁴ Rŭ nŭma ga Ngechuchu ya Cristu rŭ wŭxicanatama Tupanana nŭgŭ naxā rŭ nayu na guxŭguma Tupanapēxewa timexŭcèx ya yixema Tupanacèx tŭxŭ yaxŭnaxŭcèxēēgŭxe. Rŭ ngēmamacèx i ñuxma rŭ taxucèxma tŭxcŭŭ wena nŭgŭ inaxā rŭ nayu, yerŭ wŭxicanatama guxŭma ningutanŭxēē. ¹⁵⁻¹⁶ Rŭ Tupanaāē i Ŭnaxŭ rŭ tŭxŭ nŭxŭ nacuèxēē na aixcŭma yŭixŭ i ngēma, yerŭ nŭma ga Tupana rŭ ñanagŭrŭ:

“Ngēxguma nawa nanguxgu na wena ngēma Yudŭgŭmaā ichaxunetaxŭ, rŭ wŭxi i ngexwacaxŭxŭ i uneta tá nŭxna chaxā. Rŭ tá meā ngēma duŭxŭgŭxŭ nŭxŭ chacuèxēē i chorŭ mugŭ na aixcŭma naāēwa nangēxmagŭxŭcèx rŭ guxŭguma naga naxŭnaxŭcèx. ¹⁷ Rŭ tá nŭxŭ ichayarŭngŭmaxŭchi i ngēma duŭxŭgŭarŭ pecadugŭ rŭ ngēma chixexŭ i naxŭgŭxŭ. Rŭ tagutāma wena nŭxna chacuèxāchi”, ñanagŭrŭ. ¹⁸ Rŭ ngēmaācŭ nŭxŭ tacuèx rŭ ngēxguma Tupana duŭxŭgŭaxŭ nŭxŭ ngechaŭgu i norŭ pecadugŭ, rŭ marŭ taxucèxma tŭxcŭŭ nanaxwèxe na wena tacŭ i naxŭnagŭ nŭxna naxāgŭxŭ naxcèx i pecadu.

Name nixŭ i Tupanana tangaicamagŭ

¹⁹⁻²⁰ Rŭ ngēmamacèx i ñuxma, Pa Chaueneēgŭ, rŭ taxucèxma tŭxcŭŭ tamuŭē na Tupana íngēxmaxŭwa ichocuxŭ na namaāxŭchi idexagŭxŭcèx. Rŭ nuxcŭmaxŭchima rŭ paigŭarŭ āēxgacŭxicatama yexma naxŭcu nagu ga guma ŭpata ga naxchirunaxcèx ga Tupana

nawa yexmane. Rū taxucürüwama ngexerüxüxemare yexma taxücu. Natürü nüma ga Ngechuchu ya Cristu rü marü inayanaxoxëë ga guxüma ga yema ga yexguma curuchagu nayuxgu rü nagü inabaãgu na Tupana íngëxmaxüwa tüxü yachocuxëëxüçèx rü namaãxüchi idexagüxüçèx. Rū woo taxucürüwama Tupanana tangaicamagü ga noxrix, natürü nüma ga Cristu rü nayu na tüxü namaxëxëëxüçèx. Rū nagagu nixĩ i ñuxma i Tupanaxütawa ingugüxü. ²¹ Rū nüma nixĩ i Tupanapëxewa tüxü nangüxëëxü i guxãma i yixema i Tupanaãrü duüxügü ixīgüxe. ²² Rū ñuxma na tüxü nangëxmaxü ya tórü ngüxëëruü i Tupanapëxewa, rü tanaxwëxe i ngearü chixexüãcüma Tupanana tangaicamagü na namaãxüchi idexagüxüçèx. Rū tanaxwëxe i aixcüma tayaxögü na nüma rü tá meã tüxü nayaxuxü yerü Cristu rü taxcèx nayu na tüxü iyanaxoxëëãxüçèx i tórü chixexü rü yemacèx marü naegagu ítabaiü. ²³ Rū tanaxwëxe i aixcüma meã Cristuaxü tayaxögüecha yerü nagümaã tüxü inayanaxoxëë ga tórü chixexü. Rū ngëmacèx ítananguxëë na wena taxarü núma naxüxü na Nanatüxütawa tüxü nagagüxü. Rū taguma tanaxwëxe na nüxü rüxoexü na yaxögüxü, rü bai i írarüwa. Erü Tupana ga tamaã ixunetacü na tüxü nangüxëëxü, rü aixcümaxüchi tá nayanguxëë i guxüma ga yema tamaã nüxü yaxuxü. ²⁴ Rū ñuxma na ngëmaãcü tüxü nangüxëëxü ya Tupana, rü name nixĩ i guxüguma naxcèx tadaugü na ñuxãcü wüxichigü yigü rüngüxëëgüxü na yexeraãcü yigü ingechaügüxüçèx rü mexü ixügüxüçèx. ²⁵ Rū name nixĩ i guxüguma tórü ngutaquëxegüwa na íngügüxü. Erü nümaxü rü marü nüxü narüxoe na ngutaquëxewa naxixü, rü tama tanaxwëxe na ngëxgumarüü ixīgüxü. Rū ngëmacèx name nixĩ i yigüaxü tanangüchaüxëë na ingutaquëxegüxü. Rū ñuxma na nüxü icuáxü na marü yangaicaxü ya tórü Cori, rü yexeraãcü tanaxwëxe na yigüaxü nangüchaüxëëxü. ²⁶ Natürü ngëxguma chi texé Cristuaxü yaxöchirëxgu ga noxrix rü ñuxüchi noxtacüma nüxü tarüxoxgu, rü marü nataxuma na ñuxãcü namexëëxü i ngëma tümaãrü pecadu i Tupanapëxewa. ²⁷ Erü ngëxguma chi ngëmaãcü noxtacüma Cristuxü tarüxoxgu, rü aixcümaxüchi tá tanayaxu i ngëma poxcu i ãücümaxü i Tupana tá tüxü namaã poxcuxü rü yima üxü ya iyaurane ya nawa tá ínaguxüne i ngëma Tupanamaã rüxuwangüxü. Rū ngëxícatama nixĩ i tüxü ínanguxëëxü ya yixema Cristuxü rüxoxe. ²⁸ Rū nüxü tacuèx rü yexguma texé tama Moíchéarü mugüga ñnügu rü nayexmagu ga taxre rü ëxna tomaëxpüx ga duüxügü ga tüxü daugüxü rü tüxü ixügüexü na aixcüma tama naga taxínüxü, rü ãëxgacügü rü noxtacüma tüxü nimëxgü rü tama nüxü tangechaütümügü. ²⁹ Natürü Tupana rü aixcüma yexeraãcü tá nanapoxcue i ngëma duüxügü i tama Nanega ñnüëxü rü yima nagü ya pecaduarü piruüxü oexü rü Naãe i Ünexü i nüxü ngechaüxümaã guxchigagüxü. ³⁰ Rū meãma nüxü tacuèx rü Tupana rü tama natüçèxma ñanagürü:

“Choma tá nixĩ i namaã nüxü chacuáxü na tacü tá namaã chaxüxü i guxüma i ngëma chixexü ügüxü. Rū aixcüma tá chanapoxcu”,
ñanagürü. Rū yexgumarüü ta ñanagürü:

“Choma tátama nixĩ i nüxna chaçaxü i wüxichigü i chorü duüxügü i norü maxüchiga”,
ñanagürü. ³¹ Rū dücax, rü aixcüma namaxü ya Tupana, rü ngëmacèx ega tama naga ixñnüëgu rü wüxi i ãücümaxüchixü nixĩ na namëxgu inguxü na tüxü napoxcuxüçèx. ³² Rū dücax, name nixĩ i nüxna pecuëxãchie ga ñuxãcü na yíixü ga yexguma noxri Cristuxü peyauxgu. Rū yexguma ga pema rü yema na peyaxögüxügagu rü poraãcü guxchaxügü pexü nangupetü, natürü tama Cristuxü perüxoe rü bai ga írarüwa. ³³ Rū ñuxre ga pema rü duüxügü pemaã naguxchigagü rü guxãpëxewa pexü niçuaixgü. Rū toguãx ga pema rü pegü ipeyaxãgü na yema pemüçgürüü ngüxü pingegüxüçèx. ³⁴ Rū pema rü pexü nangechaütümügü ga yema petanüxügü ga yaxögüxü ga poxcupataüwa yexmagüxü. Rū taãëãcüma yaxna namaã pexínüë ga yema tama yaxögüxü ga pexna napuxüxü ga perü yemaxügü. Rū tama naxcèx pexoegaãe, yerü meãma nüxü pecuèx rü daxügüxü i naãnewa pexü nangëxma i ngëma perü ngëmaxügüarü yexera ixixü, erü tagutáma nagux. ³⁵ Rū ngëmacèx i ñuxmax, rü tama name na nüxü perüxoexü na Cristuaxü peyaxögüxü

woo tacü pexü üpetügu. Erü marü nüxü pecuèx rü Tupana rü aixcūmaxüchi tá pexna nanaxã i perü ãmare i maxü i taguma gúxü, erü Cristuaxü peyaxögü. ³⁶ Rü ngēma guxchaxügü i pexü ngupetüxü, rü name nixi i yaxna namaã pexĩnüē na penaxüxcèx i Tupanaãrü ngúchaü rü penayaxuxüçèx i ngēma ãmare i pemaã inaxunetaxü. ³⁷ Erü Tupanaãrü ore i ümatüxüwa rü ñanagürü:

“Paxaxüchi tá wenaxãrü núma naxü ya Cristu. Rü aixcūma täütáma nuxcü ínangu.

³⁸ Natürü yixema tümaãrü õgagu chopèxewa mexē, rü name nixi i guxüguma tayaxõcūma chauxcèx tamaxü. Natürü ngèxguma nüxü tarüxoxgu na tayaxõxü, rü choma rü täütáma tümamaã chataãē”,

ñanagürü. ³⁹ Natürü i yixema rü tama ngēma duüxügü i nüxü rüxoexü i Tupana tá poxcuexürü tixigü. Erü yixema rü ngēma yaxõgüxütanüxü tixigü, rü ngēmacèx tüxü nangèxma i maxü i taguma gúxü.

11

Törü õchiga

¹ Rü ñuxma rü törü õgagu nixi i nüxü icuáxü na aixcūma tá nayauxgüxü i guxüma i ngēma irünguxèègüxü ga Tupana tamaã ixunetaxü. Rü ngēma törü õgagu nixi i nüxü icuáxü na aixcūma Tupana tá yanguxèèxü i ngēma norü uneta i ñuxma tauta nüxü idauxü. ² Rü ñuxre ga nuxcūmaügüxü ga törü õxigü rü Tupanaãxü nayaxögü, rü yemacèx ga Tupana rü namaã nataãē. ³ Rü ngēma törü õgagu nixi i nüxü icuáxü na aixcūma yixü na Tupana rü norü oremaãmare nangoxèèãxü ga ñoma ga naãne rü üèxcü rü tauemacü rü woramacurigü rü èxtagü. Rü yemaãcü ga Tupana, rü ngürüwa nanangoxèèmare ga guxüma i ngēma ñuxma nüxü idauxü. ⁴ Rü guma nuxcūmaücü ga Abé rü Tupanaãxü nayaxõ. Rü yemacèx Tupanaga naxĩnü rü nüxna nanaxã ga wüxi ga naxüna ga Tupanacèx yamáxü. Natürü ga naëneē ga Caï rü tama Tupanaga naxĩnü rü tama nüxna nanaxã ga yema ãmare ga Tupana nüxü naxwèxexü. Rü yemacèx ga Tupana rü woo tama Caïmaã nataãē, natürü Abémaã nataãē rü nüxü nixu na mecü yixü yerü nayaxõ rü naga naxĩnü. Rü ngēmacèx i ñuxmax na woo nayuxü ga Abé, natürü wüxi i törü cuèxruü nixi. Erü nawa nixi i nüxü icuáxü na Tupana naxwèxexü na yaxõgüxü rü naga ixĩnüèxü. ⁵ Rü Enó rü ta Tupanaãxü nayaxõ rü naga naxĩnü. Rü yemacèx nixi ga namaxãcütama yagaãxü na tama nayuxüçèx. Rü namücügü rü taguma nüxü inayangaugü, yerü Tupana nayaga. Rü Tupanaãrü ore i ümatüxüwa nüxü nixu rü yexguma tauta yagaãgu, ga Enó rü nanaxü ga yema Tupana naxwèxexü. ⁶ Natürü taxuacūma Tupana tamaã nataãē ega tama nüxü yaxõgügu. Rü yixema namaã ãmücüchaüxē, rü tanaxwèxe na tayaxõxü na aixcūmaxüchi nangèxmaxü i nüma rü aixcūma tüxü nangüxèèxü ya yixema naxcèx daugüxe rü naga ñnüèxē. ⁷ Rü yexguma Noemaã yadeaxgu ga Tupana, rü nüma ga Noe rü nayaxõ rü naga naxĩnü. Rü Tupana rü namaã nüxü nixu rü tá na ínguxèèãxü ga mucü ga taxüchicü ga taguma duüxügü nüxü daucü rü tá guxüwama inanguanexèècü. Rü namaã nüxü nixu ga na naxüãxüçèx ga wüxi ga wapuru ga taxüne na tama nayuexüçèx ga nüma rü namèx rü nanegü rü naneãxgü. Rü Tupanaga naxĩnü ga Noe, rü nanaxü ga guma wapuru, rü yemaãcü tama nayue ga nüma rü napatacūãx. Rü yemaãcü Tupanaãxü nayaxõ. Natürü yema togü ga duüxügü rü tama nayaxögü, rü yemacèx Tupana nanapoxcue. Natürü nüma ga Tupana rü Noexü nixu na napèxewa namexü, yerü nüxü nayaxõ. ⁸ Rü guma törü õxi ga Abráü, rü Tupanaãxü nayaxõ. Rü yemacèx nixi ga naga naxĩnüxü rü nüxna yaxüxü ga nanatüchiüãne na nawa naxüxcèx ga yema naãne ga Tupana tá nüxna äxü na noxrüxüchi yixüçèx. Rü yemaãcü nanaxü ga yexguma Tupana namuxgu. Rü nanatüchiüãnewa inaxüãchi ga Abráü woo tama nüxü na nacuáxü ga ngextá tá na naxüxü. ⁹ Rü yexguma nawa nanguxgu ga yema naãne ga Tupana namaã ixunetaxü, rü ñoma yexma naxüãneãxürüümare ipata ga naxchirunaxcèxmaãmare naxãchiü. Rü yexgumarüütama nixigü ga nane ga Ichaá rü

nataa ga Acobu, yerü yexguma nayaegu rü Abráŭrŭ űnoma yexma naxĩãneãxŭrŭŭmare nixĩgŭ ga yema naãnewa. Rŭ yemaãcŭ nixĩgŭ ga guxŭma ga nŭmagŭ ga na woo Tupana rŭ namaã inaxunetaxŭ ga na noxrŭxŭchi yĩxŭcèx ga yema naãne. ¹⁰ Rŭ yemaãcŭ ga Abráŭ, rŭ woo űnoma yexma naxũãneãxŭrŭŭmare yema nayexma, natŭrŭ Tupanaãxŭ nayaxŭchigŭama, yerŭ nŭxŭ nacuèx na Tupana tá daxŭguxŭ i naãnewa na nagaxŭ nawa ya yima ĩãne ya nŭmatama naxŭxŭne ya tagutáma iyarŭxoxŭne. ¹¹ Rŭ yexgumarŭŭtama iyixĩ ga Abráŭ namèx ga Chara. Rŭ woo ga na taguma naxããcŭchirèxŭ yerŭ marŭ iyaxŭchi, natŭrŭ ixããcŭ yerŭ iyaxŭŭma na Tupana rŭ aixcŭma tá yanguxèèãxŭ ga yema norŭ uneta ga tá na naxããcŭxŭ. ¹² Rŭ yemaãcŭ ga Abráŭ rŭ woo marŭ yaguãxŭchi na yĩxŭ, natŭrŭ dŭxwa nŭxŭ nayexma ga wŭxi ga nane, rŭ gumawa ne naxĩ ga muxŭma ga nataagŭ. Rŭ űxma rŭ űnoma èxtagŭrŭŭ namuxŭchi, rŭ űnoma naxnŭcŭ ya taxuacŭma yaxugŭcŭrŭŭ nixĩgŭ, yerŭ yemaãcŭ Abráŭmaã inaxuneta ga Tupana. ¹³ Natŭrŭ nŭmagŭ ga Abráŭ rŭ Ichaá rŭ Acobu rŭ nayue, rŭ yemacèx tama nŭxŭ nadaugŭ ga guxŭma ga nataagŭ i űxma ngèxmagŭxŭ, rŭ tama namaã inacuèxgŭ ga yema naãne ga noxri Abráŭmaã nŭxŭ yaxuxŭ ga Tupana. Natŭrŭ Tupanaãxŭ nayaxŭgŭama, rŭ yemacèx nŭxŭ nacuèxgŭ rŭ Tupana rŭ tá aixcŭma na yanguxèèãxŭ ga yema norŭ uneta ga namaã nŭxŭ yaxuxŭ. Rŭ nataãègŭ yerŭ nŭxŭ nacuèxgŭ na tãŭtáma guxŭguma űnoma ga naãnewa na nayexmagŭechaxŭ, rŭ yemacèx nŭxŭ nixugŭe na to i nachiŭãnecŭãxŭrŭŭmare yixĩgŭxŭ ga űnoma ga naãnewa. ¹⁴ Rŭ nŭmagŭ rŭ yema oremaã meãma tŭxŭ nŭxŭ nacuèxèè na tama űnoma ga naãneguxicatama naxĩnŭèxŭ natŭrŭ ĩnanguxèègŭãxŭ i to i nachica i daxŭguxŭ i naãnewa ngèxmaxŭ. ¹⁵ Rŭ nŭmagŭ rŭ yexguma chi nanaxwèxegŭgu ga naxcèx na nawoeguxŭ ga yema naãne ga noxri nawa ne naxĩxŭ, rŭ tãŭ chima nŭxŭ naguxcha rŭ chi naxcèx nawoegu. ¹⁶ Natŭrŭ ga nŭmagŭ rŭ nŭxŭ nangŭchaŭgŭ i ngèma naãne i mexèchixŭ i daxŭwa ngèxmaxŭ i Tupanaxŭtawa. Rŭ yemacèx nixĩ ga Tupana ga tama naxãnexŭ na nŭgŭ yaxuxŭ na norŭ Tupana yĩxŭ. Yerŭ nŭma ga Tupana rŭ naxcèx nanamexèè ga wŭxi ga ĩãne ya daxŭguxŭ i naãnewa ngèxmane. ¹⁷⁻¹⁸ Rŭ Tupana ga noxri rŭ Abráŭmaã nŭxŭ nixu rŭ űnagŭrŭ:

“Cune ya Ichaáwa tá cuxŭ nangèxma i muxŭchixŭtama i cutaagŭ”,

űnagŭrŭ. Rŭ Abráŭ rŭ nayaxŭ na Tupana rŭ aixcŭmaxŭchi tá na yanguxèèãxŭ ga yema namaã inaxunetaxŭ. Rŭ yemacèx ga yexguma Tupana nŭxŭ ŭxgu rŭ Ichaácèx nŭxna nacaxgu na naxcèx yamáãxŭcèx, rŭ nŭma ga Abráŭ rŭ tama nanachŭxu. Rŭ ĩnamemare na Tupanacèx yamáãxŭ ga guma nane ga nŭgŭmaã wŭxicacŭ. ¹⁹ Yerŭ nŭma ga Abráŭ rŭ nayaxŭ na Tupanaãxŭ natauxchaxŭ na wena namaxèxèèãxŭ i yuexŭ. Rŭ yemacèx ga Abráŭ rŭ ĩnamemare na Tupanacèx nanexŭ yamáxŭ yerŭ nayaxŭ na Tupana rŭ wena tá namaxèèãxŭ. Rŭ aixcŭmaxŭchi yemaãcŭ Abráŭcèx nanaxŭ ga Tupana, yerŭ woo űnoma marŭ nayuxŭrŭŭ nixĩ ga nane, natŭrŭ ga Tupana rŭ maxŭcŭ nŭxna nanamu. Rŭ yema rŭ wŭxi ga tŭrŭ cuèxruŭ nixĩ na űxãcŭ aixcŭma yaxŭŭxŭ ga Abráŭ. ²⁰ Rŭ guma Ichaá rŭ ta Tupanaãxŭ nayaxŭ. Rŭ yemacèx ga yexguma marŭ nayèxgu, rŭ nayumŭxè rŭ Tupanana naca na nanegŭ ga Acobu rŭ Echaŭxŭ nangŭxèèxŭcèx. Rŭ yemaãcŭ nayumŭxè yerŭ aixcŭma nayaxŭ na Tupana tá yanguxèèxŭ ga yema nŭxna naxcèx naçaxŭ. ²¹ Rŭ guma Acobu rŭ ta Tupanaãxŭ nayaxŭ. Rŭ yemacèx ga yexguma marŭ nayèxgu rŭ nayuxchaŭgu, rŭ norŭ caxŭxŭmaã nŭgŭ inachixèè rŭ Tupanaxŭ nicuèxŭŭ. Rŭ nayumŭxè rŭ Tupanana naca na nataagŭ ga Yúche nanegŭxŭ nangŭxèèxŭcèx. Rŭ yemaãcŭ nayumŭxè yerŭ aixcŭma nayaxŭ na Tupana tá yanguxèèxŭ ga yema Abráŭmaã inaxunetaxŭ. ²² Rŭ guma Yúche rŭ ta Tupanaãxŭ nayaxŭ. Rŭ yemacèx ga yexguma nayuxchaŭgu, rŭ natanŭxŭgŭmaã nŭxŭ nixu rŭ űnagŭrŭ:

“Tataagŭ rŭ yixcŭra rŭ tá ĩnachoxŭ i nuã Equituanewa na nawa naxĩxŭcèx i ngèma naãne ga Tupana tŭrŭ oxŭ ga Abráŭmaã nŭxŭ ixuxŭ. Rŭ ngèxguma ngema naxĩxgu, rŭ chanaxwèxe ya chauxchinèxãgŭ rŭ ta ngema nanana na ngèxma yatèxgŭãxŭcèx”, űnagŭrŭ. ²³ Rŭ yemawena rŭ mucŭma ga taunecŭgŭ rŭ nimu ga yema duŭxŭgŭ ga

Equituanewa. Rū yema nachiuñeārū ãëxgacü, rū tama nanaxwèxe na yexeraãcü yamuëtanüxü, rū yemacèx nanamu na tüxü nadèixücèx ga guxãma ga buxe ga iyatüxe ga yexwacèx ibuetanüxë. Natürü nanatü rū naë ga guma tórü oxi ga Moïché, rū aixcüma Tupanaãxü tayaxögü. Rū yemacèx ga yexguma noxri nabuxgu ga Moïché, rū tomaëxpüx ga tauemacügu itayacüxgü, yerü nüxü tadaugü na namexëchixü rū tama naxcèx tamuüë ga yema Equituaneärü ãëxgacüarü ore ga woo na naxunagüãxü ga na buxe tüxü nadèixü. ²⁴⁻²⁵ Rū Moïché rū ta Tupanaãxü nayaxõ. Rū yemacèx ga yexguma marü nayèxgu rū tama nanaxwèxe na nügü yaxuxü na Equituaneärü ãëxgacüxacü ngïne na yiixü, yerü naxcèx rū narümemaë na natanüxügü ga Yudiügümaã wüxigu ngüxü yangexü. Rū tama nanaxwèxe na tacü ga ñoma ga naãneärü chixexümaã nügü na nataãëxëxü, yerü nüxü nacuèx rū yema taãë rū paxaãchiruümare nixi. ²⁶ Rū yexgumarüü na daxüguxü ga naãnena na yaxüxü ga Cristu na ngüxü yangexücèx, rū yexgumarüü ta nixi ga Moïché ga ãëxgacüpatana na yaxüxü, yerü naxcèx rū narümemaë na natanüxügü ga Yudiügümaã wüxigu ngüxü yangexü. Natürü taxucèxma yema ngüxügu narüxĩnü, yerü nüxü nacuèx rū tá wüxi i ngunexügu Tupanaxütawa na nayauxãxü i norü natanü. ²⁷⁻²⁸ Rū yema na yaxõõxücèx nixi ga Tupanaga naxĩnüxü ga Moïché. Rū yemacèx ga yexguma Tupana namuxgu ga na naxüãxü ga üpetüchiga, rū nayanguxëë ga yema Tupana namuxü. Rū nüma ga Moïché rū guxüma ga natanüxügü ga Yudiügüxü namu na wüxichigü ga ñpatawa yamáãxücèx ga wüxi ga carneruxacü na yemagümaã namaxcuãxücèx ga naãxpatagü. Rū ñanagürü nüxü:

“Ñoma i chütaxügu rū tá Tupana núma Equituanewa nanamu i wüxi i norü orearü ngeruü i daxüçüãx rū tá nanadai ya yima nüxira bucü ya Equituanecüãxgü nane i wüxichigü ya ñpatawa. Natürü ngëxguma yima nagümaã penamaxcuxgu i perü ñãxpata, rū tãütãma pechiügu naxücu”,

ñanagürü. Rū yemaãcü ga Moïché rū Tupanaga naxĩnü yerü nüxü nayaxõ. Rū yemacèx ga yema orearü ngeruü ga daxüçüãx rū taxuüma ga Yudiügünexü nimèx. Rū yema na yaxõõxücèx nixi ga ínaxüxüxü ga Equituarü naãnewa, rū tama naxcèx namuüxü na guma Equituaneärü ãëxgacü tá namaã nanuxü. Rū taguma nüxü narüxo ga Tupanawe na naxüxü, yerü Tupana ya ëxügucüarü ngüchaü naxü. ²⁹ Rū yema duüxügü ga Moïchéwe rüxixü rū ta nayaxögü. Rū yemacèx ga yexguma yema Taxtü ga Dauchiüxüwa nangugügu, rū yema dexá rū nügüna nixigachi, rū nipaaneãchi, rū yéma nichoü. Natürü yexguma yema Equituanecüãx ga churaragü ga nawe ngëgüxü nawe ichoügu, rū yexma nayiama, yerü wenaxärü nügüna naxi ga yema dexá. ³⁰ Rū yexguma guma ñãne ga Yericüwa nangugügu ga yema duüxügü, rū taxucürüwama nichocu, yerü guxüwama naxãtapüx. Natürü Tupanaãxü nayaxögü, rū yemacèx Tupanaga naxĩnüë rū 7 ga ngunexü nüxü ínichoeguãchitanücüü, yema Tupana namaã nüxü ixuxürüü. Natürü yexguma norü 7 ga ngunexüwa nanguxgu, rū nüëchama niwëxgütapüx, rū yemaãcü nichocu. ³¹ Natürü yema nge ga Yericüçüãx ga Raá, rū woo chixri imaxü ga noxrix, natürü yexguma yéma nangugügu ga yema taxre ga Yudiügü ga bexma ngugütaewa yéma ñxü, rū ngïma iyixi ga nüxü nangüxëëxü. Rū yemacèx tama yema togü ga Yericüçüãx ga tama Tupanaga ínüëxürüü iyu, yerü Tupanaãxü iyaxõ. ³² ¿Rü ñuxma rū tacü i togü i duüxügüchigaxü tá pemaã chixuxü? Rū changechica na pemaã nüxü chixuxücèx i nachiga ga yema nuxcümaügüxü ga ãëxgacügü ga Yedeü rū Bará rū Chaüchóü rū Yeté rū Dabí rū Chamue, rū guxüma ga nuxcümaügüxü ga Tupanaärü orearü uruügü. ³³ Rū yema na yaxögüãxücèx nixi ga Tupana nüxü rüngüxëëxü. Rū yemaãcü to ga nachiuñanegüarü ãëxgacügüxü narüporamaëgü, rū meãma norü duüxügümaã inacuèxgü rū aixcüma nanayauxgü ga yema Tupana namaã ixunetaxü. Rū yemacèx ga yexguma woo aitanügu yatëxcuchigüãgu, rū taxuüma namaã naxü ga aigü yerü Tupana nüxna nadau. ³⁴ Rū yexguma norü uwanügü üxüxetüwa yawocuxgu, rū taxuüma nüxü naxüpetü rū tama nixae, yerü Tupanaãxü nayaxögü rū nüma rū nüxna nadau. Rū

yexguma togü taramaã nadaixchaũgu, rü Tupana nüxũ narüngũxẽẽ na taxuũma nüxũ üpetũxũcèx. Rü yexguma naturaegu rü norü uwanügü nadaixchaũgu, rü Tupana nanaporaexẽẽ. Rü yexguma to ga nachĩũãneãrũ churaragũmaã nügü nadaixgu, rü yema togü ga churaragũxũ narüyexeragü. ³⁵ Rü nayexma ga ngexũgü ga yuexacũxũ, natürü yema naxãcügü rü wenaxãrũ ínarüdagü yerü Tupanaãxũ nayaxõgü. Natürü nayexma ga togü ga poraãcũ ngúxũ ingegũxũ yerü norü uwanügü yemaãcũ namaã nachopetü na Tupanaxũ ínatèxgũxũcèx. Natürü ga nümagü rü tama Tupanaxũ ínatèxgü rü yemacèx nayue, yerü naxcèx rü narümemaẽ nixĩ na wena namaxèxũ rü nayauxgũãxũ i ngẽma maxũ i taguma gúxũ. ³⁶ Rü nayexma ta ga ñuxre ga togü ga yaxõgũxũ ga duũxũgü nüxũ cugüexũ, rü yaçuaixgũxũ, rü cadenamaã yanèixgũxũ, rü poxcupataũgu nawocuxũ. ³⁷ Rü ñuxre ga nümagü rü nutamaã ínanamuxũchigü rü yemaãcũ nanadai. Rü togü rü nayawãixyegü rü nayue. Rü ñuxre ga togü rü ngúxũ nüxũ ningexẽẽgü na Tupanaxũ ínatèxgũxũcèx. Rü togü rü taramaã nanadai. Rü ñuxre ga nümagü rü nu ne nanaxĩmare rü carneruchèxmüũ rü chibuchèxmüũmaãmare nixãxchiru. Rü taxuũma nüxũ nayexma, rü nanaxĩxãchiãègü yerü norü uwanügü rü chixri namaã nachopetü. ³⁸ Rü ñoma ga naãnecũãx rü naxchi naxaie, natürü Tupana rü nüxũ nangechaũ. Rü ñoma ga naãnewa rü norü uwanügüchaxwa nu ne nanaxĩmare ga taxúema íxãpataxũwa. Rü ngürüanegu nipexũtanümare yerü nangepatagü. ³⁹ Rü guxũma ga yema nuxcũmaũgũxũ ga duũxũgü woo norü õgagu Tupana namaã na taãexũ, natürü taxuũma ga yema duũxũgü rü nüxũ nadau ga yema mexũgü ga Tupana namaã nüxũ ixuxũ. ⁴⁰ Rü yemaãcũ namaã nangupetü ga yema duũxũgü, yerü ga Tupana rü tagu narũxĩnü rü tama nanaxwèxe na nüxĩra nüxĩca yamexèègũãxũ, natürü nanaxwèxe na tamaã wũxigu yamexèègũãxũ. Rü ñuxma i yixema na yaxõgũxũ, rü yema nuxcũmaũgũxũ ga duũxũgürüũ Tupanaãrũ duũxũgü tixĩgü, yerü Nane ya Ngechuchu rü guxãcèxma nayu. Rü wũxi i ngunexũ rü tá taxcèx núma naxũ na nügũxũtawa tũxũ nagagũxũcèx na ngema ingèxmagüechaxũcèx.

12

Name nixĩ i Ngechuchucũmagu taxĩ

¹ Rü ñuxma na nüxũ icuáxũ na ñuxãcũ aixcũma Tupanaãxũ yaxõgũãxũ ga guxũma ga yema nuxcũmaũgũxũ ga duũxũgü, rü ngẽma rü wũxi i tórü cuèxruũ nixĩ na ñuxãcũ Tupana naxwèxexũ na naxcèx imaxèxũ. Rü ngẽmacèx i ñuxmax, ¡rü ngĩxã nüxũ tarüxoe i guxũma i ngẽma pecadu i tũxũ ítüexèèxũ rü tũxũ naguxchaxèèxũ na meã yaxõgũxũ! ¡Rü ngĩxã paxa naxcèx tadaugü na meã Tupanacèx imaxèxũ rü guxũguma aixcũma naxũxũ i ngẽma tũxũ nanaxwèxexũ! ² Rü name nixĩ i tanangugü na ñuxãcũ namaxũxũ ga Ngechuchu rü nagu taxĩ i nacũma. Yerü nüma nixĩ ga nuxcũma nagu naxĩnüxũ na ñuxãcũ tórü õgagu tá tũxũ namaxèxèèxũ rü nüma nixĩ i tũxũ nangũxèèxũ na aixcũma meã yaxõgüechaxũcèx na ngẽmaãcũ naxũtawa ingugũxũcèx. Rü nüma rü tama nügü nachuxu na curuchawa ngúxũ yangexũ, rü tama nagu narũxĩnü ga yema ãne na yangexũ, natürü nataãèxũchi yerü nüxũ nacuèx na yemawena rü tá muxũma i duũxũgü nayauxgũxũ i maxũ i taguma gúxũ. Rü ñuxma rü Tupanaãrũ tũgüncèwawa narũto na ngema guxããrũ ãèxgacü yĩxũcèx. ³ Rü name nixĩ i penangugü rü nagu perũxĩnüè na ñuxãcũ ga Ngechuchu rü yaxna namaã naxĩnüxũ ga yema ngúxũ ga nüxũ yangexèègũxũ ga yema duũxũgü ga pecaduãxgũxũ. Rü nüma ga Ngechuchu rü yemaãcũ yema ngúxũmaã yaxna naxĩnü na pema rü tama nüxũ perũchaxũcèx rü tama nüxũ perũxoexũcèx na nüxũ peyaxõgũxũ. ⁴ Rü ñuxma i pema na peyaxõgũxũ, rü ngúxũ pingegü erü pecaduxũ perũxoe. Natürü taxúema ga petanüwa rü yemacèx Cristurũ yuwa tangu. ⁵ Rü name nixĩ i nüxna pecuèxãchie i norü ore ya Tupana i namaã pexũ yaxucũxègũxũ i ñuxma na naxãcügü pixĩgũxũ. Erü ngẽma norü ore i ümatũxũwa rü ñanagürü: “Pa Chaunex, ¡tãxũ i nüxũ cuxoxũ i ngèxguma cuxũ icharüwèxãchixèègu! ¡Rü tãxũ i cuyarũmaxãchixũ i ngèxguma cuxũ chaxucũxègu! ⁶ Erü nüma ya Cori ya Tupana

rü tüxü inayarüwêxâchixêê ya yíxema tüxü nangechaüxê. Rü tüxna nanacuaixca ya yíxema naxâcüxü tüxü nayaxúxe, na ngêmaâcü tüxü nanguxêêxücèx na ñuxâcü nanaxwèxexü na naxcèx tamaxüxü”, ñanagürü. ⁷ Rü ngêmacèx i pemax, rü name nixí na yaxna namaã pexĩnüèxü i ngêxguma Tupana pexna naçuaixcagu. Erü ngêxguma ngêmaâcü pemaã yixígu, rü pexü nüxü nacuèxêê na aixcüma naxâcügü pixígüxü. Erü guxüma i papá rü inayanawêxâchixêê i ngêma aixcüma naxâcügü ixígüxü. ⁸ Natürü ngêxguma chi Tupana tama pexü iyarüwêxâchixêêgu, naxâcügüxü iyanawêxâchixêêxürüü, rü ngêmawa tá nüxü pecuèx na tama aixcüma naxâcügü pixígüxü, rü ngenatüxü pixígüxü. ⁹ Rü wüxichigü i yixema ga yexguma ibuegu, rü tanatügü rü tüxü taxucuxêgü, rü yixema rü tümaga taxĩnüè rü tüxü tangechaügü. Rü ngêmacèx i ñuxma rü yexeraâcü tanaxwèxe na naga ixĩnüèxü ya Tanatü ya daxügücü na ngêmaâcü nayaxuxücèx i maxü i taguma gúxü. ¹⁰ Rü tanatügü rü wüxi i paxaâchicèxmare tüxü taxucuxêgü na tüma tanaxwèxegüxüâcüma imaxêxücèx. Natürü ya Tupana rü aixcüma tórü mexücèx nixí i tüxü iyanawêxâchixêêxü na naxrüü ixüünegüxücèx. ¹¹ Rü aixcüma tama tataãégü i ngêxguma Tupana tüxü iyarüwêxâchixêêgu, erü tüxü nangux. Natürü ngêmawena i ngêxguma naga ixĩnüègu rü yanguxêêgu i ngêma tamaã nüxü yaxuxü, rü aixcüma tataãégü.

Naxâücüma na tama Tupanaga ixĩnüèxü

¹² Rü ngêmacèx i ñuxma na ngúxü pingegüxü rü pipaexü na Tupanawe perüxixü, rü name nixí i pegü peporaexêêãma na noxrirüütama meã peyaxögüxücèx. ¹³ Rü name nixí i naxcèx pedaugü na Tupana pexü naxwèxexüâcüma aixcüma meã pemaxêxü, na yíxema ñuxma tama meã yaxögüxe rü meã tayaxögüxücèx. ¹⁴ ¡Rü naxcèx pedèux na guxü i duüxügümaã pemecümaxü! Rü ngêxgumarüü ta name nixí i naxcèx pedau na Tupanapêxewa naxüünexü i perü maxü. Erü yíxema tama Tupanapêxewa üünexê rü tãütáma tórü Corixü tatau. ¹⁵ ¡Rü pegüna pedaugü na taxúema nüxü oxücèx i ngêma ngüxêê i Tupana tüxü nangechaüâcüma tüxna äxü! Erü tama tanaxwèxe na texé petanüwa Cristuchi aixü rü ngêmaâcü togüxü chixexümaã taxucuxêxü na Cristuna tixügachixücèx. ¹⁶ Rü tama name i texé i petanüwa rü naí i ngemaã na itapexü. Rü tama name na texé tümaärü ngêmaxücèx Tupanaxü na oxü. Rü yemaâcü nanaxü ga guma nuxcümaâcü ga Acobueneê ga Echaú. Yerü yexguma nataiyagu rü wüxi ga õnacèx nüxü naxo ga guxüma ga yema nüxna üxü ga nanatü chi nüxna äxü. ¹⁷ Rü pema nüxü pecuèx rü yemawena ga yexguma nayauxchaüãgu ga yema noxri nüxna üxü, rü marü taxucürüwama nanayaxu, yerü marü naêneê ga rübumaêcüna tanaxâ ga nanatü. Rü nüma ga Echaú rü woo poraâcü naxaxu, natürü marü taxucürüwama ñuxâcü nanayaxu. Rü ngêmawa nüxü tacuèx na ñuxâcü naxâücümaxü na tórü ngêmaxücèx Tupanaxü ixoxü. ¹⁸⁻²¹ Rü nuxcüma ga tórü oxigü ga Moïchéwe rüxixü, rü nüxü naxĩnüè ga Tupanaga ga yexguma nüxü yangaicagügu ga guma mëxpúne ga Chinaïgu äegane. Rü nüxü nadaugü ga na yayauraxü ga guma mëxpúne rü poraâcü naxêänexü rü poraâcü buanecü ixüxü rü yabèixbéxanexü rü yaduruanexü. Rü poraâcü namuêê ga yema duüxügü, yerü nüxü naxĩnüè ga wüxi ga corneta ga tagane rü Tupana ga tagaâcü yéma ñacü:

“Ngêxguma chi wüxie i petanüwa daa mëxpúnewa üxgu ¡rü noxtacüma nutamaã tüxü ípemuxüchiâcüma tüxü pimá! Rü woo wüxi i pexüna yixígu ¡rü ngêxgumarüü ta ípenamuxüchiâcüma peyamá!”

ñanagürü. Rü yexguma yadeaxgu ga Tupana, rü poraâcü namuêê ga yema duüxügü. Rü norü muümaã Tupanaxü nacèèxügü na íyachaxâchixücèx ga namaã na yadexaxü. Rü yema na poraâcü naxâücümaxüchixü ga yema nüxü nadaugüxü, rü yemacèx nixí ga nümatama ga Moïché ga ñaxü:

“Chorü muümaã chidurux i ñuxmax”,

ñaxũ. Rũ yemaãcü nixĩ ga namaã nangupetũxũ ga yema duũxũgũ ga Moĩchémaã nayauxgũxũ ga yema nũxĩraũxũ ga Tupanaãrũ mugũ. Natũrũ i pemax, Pa Chaueneẽgũx, rũ tama yemaãcü pexũ naxũpetũ ga yexguma penayauxgũgu ga Tupanaãrũ ore i ngexwacaxũxũ i Cristuchiga ixĩxũ. ²² Rũ ñũxma i pema rũ taxucẽxma pemuũẽ, yerũ ga Cristu rũ taxcẽx nayu na Tupana ya guxũguma maxũcũxũtawa tũxũ nagagũxũcẽx, na guxũguma norũ ãne ya daxũgune ya Yerucharẽũgu ãeganewa ingẽxmagũxũcẽx. Rũ ngema tá tangutaquẽxegũ namaã i ngẽma muxũchixũma i norũ orearũ ngeruũgũ i daxũcũãx na wũxigu namaã Tupanaxũ icuẽxũũgũxũcẽx. ²³ Rũ ñũxma i pemax, rũ marũ natanũxũgũ pixĩgũ i guxũma i ngẽma togũ i duũxũgũ i Tupanaãrũ poperawa ngoxégagũxũ. Rũ marũ naxcẽx pexĩ ya Tupana ya yima guxãnatáma cacũ. Rũ marũ natanũwaama pexũgũ i guxũma ga yema duũxũgũ ga mecũmagũxũ ga yuexũ ga Tupana imexẽẽgũxũ. ²⁴ Rũ marũ naxcẽx pexĩ ya Ngechuchu ga taxcẽx yucũ na tũxũ namaxẽxẽxũcẽx, ngẽma Tupanaãrũ uneta i ngexwacaxũxũ tamaã nũxũ ixuxũrũũ. Rũ nagũmaã pexũ iyanaxoxẽẽ ga perũ chixexũgũ na aixcũma Tupanapẽxewa pimexũcẽx. Rũ yexguma nũxcũmaxũcũ ga Abégũ inabaxẽẽ ga naeneẽ rũ Tupana rũ poxcu naxuegu. Natũrũ yexguma Cristugũ ibaxgu rũ Tupana rũ duũxũgũmaã nanaxuegu i maxũ i taguma gũxũ. ²⁵ Rũ ngẽmacẽx name nixĩ i pexuãẽgũ na tama nũxũ pexoexũcẽx ya yima Tupana ya ñũxma tamaã idexacũ. Rũ dũcax yema nuxcũmaũgũxũ ga tórũ oxigũ ga Moĩchéwe rũxĩxũ rũ taxucũrũwa Tupanachaxwa nibuxmũ na tama napoxcũeãxũcẽx ga yexguma Tupanaxũ naxoegu rũ tama naga naxĩnũẽgu ga yexguma Moĩchéwa Tupana yaxucũxẽgũgu. Rũ yema na taxucũrũwa Tupanachaxwa yabuxmũxũ ga nũmagũ, rũ yexeraãcü tũxũ naguxcha i yixema na naxchaxwa ibuxmũxũ ega tama naga ixĩnũẽgu i ñũxma na Cristuwa tũxũ yaxucũxẽgũxũ i nũma ya Tupana i daxũgũxũ i naãnewa ngẽxmacũ. ²⁶ Rũ yexguma Moĩchéwe naxĩxgu ga tórũ oxigũ, rũ Tupana rũ nagamaã nayadurũxanexẽẽ. Natũrũ i ñũxma rũ ñanagũrũ:

“Wena táxarũ chayadurũxanexẽẽ. Natũrũ ngẽxguma ngẽmaãcü chanaxũxgu rũ tãũtáma ñoma i naãnexĩca chidurũxẽẽ, natũrũ uẽxcũ rũ woramacurigu rũ ẽhtagũ rũ tá ta chayadurũxgũxẽẽ”,

ñanagũrũ. ²⁷ Rũ yema na:

“Wena táxarũ chayadurũxanexẽẽ”, ñaxũ, rũ ngẽmawa nũxũ tacuẽx rũ guxũma ga yema naxũxũ i tama guxũgucẽx ixĩxũ, rũ Tupana tá inayanaxoxẽẽ na ngẽma guxũgucẽx ixĩxũĩcatama na íyaxũgũxũcẽx. ²⁸ Rũ ngẽma na tórũ ãẽxgacũ na yĩxũ ya Tupana, rũ guxũgucẽx nixĩ, rũ tagutáma inayarũxo na noxrũ ixĩgũxũ. Rũ ngẽmacẽx name nixĩ na Tupanana moxẽ ixãgũxũ, rũ nũxũ ingechaũgũãcũma rũ nũxũ imuũẽãcũma nũxũ icuẽxũũgũxũ, ngẽma nũma nanaxwẽxexũrũũ. ²⁹ Erũ tórũ Tupana, rũ ñoma wũxi ya ũxũrũũ aixcũma inayanaxoxẽẽ i guxũma i tórũ chixexũ.

13

Ñuxãcü Tupanaxũ tataãẽxẽẽ

¹ Rũ ñũxma rũ tama name na nũxũ perũchãuexũ na wũxichigũ pegũ pengechaũgũxũ ñoma peeneẽxũ pengechaũxũrũũ. ² Tama name na nũxũ ipeyarũngũmaẽxũ na meãma penayaxuxũ i ngẽma duũxũgũ i pepatawa ngugũxũ. Erũ nũxũ tacuẽx rũ nũmaxũ ga yemaãcü naxũgũxũ rũ ñuxguacũ rũ tama nũxũ nacuããcũma bexma Tupanaãrũ orearũ ngeruũgũ i daxũcũãxũ meã nayauxgũ. ³ Rũ name nixĩ i nũxna pecuẽxãchie i ngẽma duũxũgũ i poxcuexũ, ñoma pema rũ ta naxrũũ pepoxcuexũrũũ. Rũ ngẽxgumarũũ ta name nixĩ nũxna pecuẽxãchie i ngẽma duũxũgũ i togũ ngũxũ nũxũ ingexẽẽgũxũ, erũ ngũrũãchi tá ta ngẽmaãcü pexũ nangupetũ. ⁴ Rũ ngẽma yatũgũ i ãmaxũ rũ name nixĩ i meã naxmẽxmaã namaxẽ rũ tũxũ nangechaũgũ. Rũ ngẽxgumarũũ ta i ngexũgũ, rũ name nixĩ i meã natemaã namaxẽ rũ nũxũ nangechaũgũ. Erũ Tupana rũ aixcũma tá nũxna naca rũ tá nanapoxcũe i ngẽma duũxũgũ i naĩ i ngemaã rũ ẽxna naĩ ya yatũmaã ipexũ.

Rü ngëxgumarüü tá ta tüxü napoxcue ya guxãma ya yíxema ngemèxãcüma rü ngeteãcüma tügümaã maxëmarexe. ⁵ Rü tama name na dïeruguama perüxñüëxü. Rü name nixí i namaã petaãëgü i ngëma marü pexü ngëxmaxü. Yerü Tupana rü ñanagürü:

“Tagutáma cuxna chixü, rü tagutáma cuxü íchatèx”,

ñanagürü. ⁶ Rü ñuxma na nüxü icuáxü na ngëmaãcü tamaã inaxãüxü, rü ngëmacèx tama taxãne na ñagüxü:

“Nüma ya Cori nixí ya choxü rüngüxëëcü. Rü ngëmacèx taxucèxma chamuü. Erü taxucürüwama texé tacü rü chixexü chomaã taxü”,

ñagüxü. ⁷ Rü name nixí i nüxna pecuèxãchie ga yema perü dauruügu ga noxri pemaã icuáxü rü pemaã nüxü ixugüxü ga Tupanaärü ore. Rü name nixí i nagu perüxñüë ga na ñuxãcü meã namaxëxü pepëxewa rü ñuxãcü meã yaxögüãcüma nayuexü. Rü name nixí ga nüma yaxögüãxürüü meã peyaxögü i pemax. ⁸ Rü nüma ya Ngechuchu ya Cristu rü guxüguma nayanguxëë i ngëma tamaã nüxü yaxuxü. Rü nuxcüma rü nayanguxëë ga norü ore, rü ñuxma rü ta nayanguxëë. Rü guxügutáma ngëmaãcü nixí. Rü ngëmacèx tanaxwèxe na aixcüma nüxü yaxögüxü. ⁹ Rü tama name i peyaxögü i ngëma nguxëëtaegü i tama toma pexü namaã tangüxëëxü i tama Tupanaärü ixügüxü. Rü nuxcüma rü nagu taxí ga yema mugü ga Moiché ümatüxü ga tüxna nachuxuxü na tacü ixüxü rü tacü ingöxü. Natürü yema mugü rü taguma tüxü naporaexëë ga na Tupanacèx imaxëxü. Rü ngëmacèx tanaxwèxe na Tupana ya tüxü ngechaücüwa nayaxuxü i tórü pora na aixcüma naxcèx imaxëxüçèx. ¹⁰ Rü ngëma duüxügü i Moichéarü mugügu íxü, rü Tupanacèx naxüna nadaí na tama napoxcueãxüçèx naxcèx i norü pecadu. Natürü tama nüxü nayaxögü ya Cristu ga tórü pecaducèx yücü. Rü ngëmacèx taxucürüwama taxrüü nanayauxgü i ngëma ngüxëë i Cristu nüxna uaxüxü. ¹¹ Rü ngëma duüxügüarü paigüarü ãëxgacü, rü tupaucawa nanange ya nagü i naxünagü na Tupanana naxããxüçèx na tama Tupana napoxcuexüçèx i ngëma duüxügü. Natürü naxünegü i ngëma naxünagü, rü ñãneärü íxpemawa nayanagugü. ¹² Rü yexgumarüü ta ga Ngechuchu rü ñãneärü íxpemawa ngüxü ninge rü nayu na nagümaãtama Tupanacèx yaxüünegüxëëãxüçèx i duüxügü. ¹³ Rü ngëmacèx i yixema, rü name nixí i nüxna tixígachi i ngëma mugü ga Moiché ümatüxü, rü name nixí i Ngechuchucèx taxí. Rü woo duüxügü tüxü cugüegu, yema Ngechuchuxü na nacugüexürüü, rü name nixí i naxrüü yaxna namaã taxñüë. ¹⁴ Erü yixema na yaxögüxü, rü tãütáma ñoma i naãne i paxa tá gúxüwa tangëxmagüecha. Erü daxüguxü i naãnewa tüxü nangëxma i tachica. Rü ngëma tá nixí i ingugüxü na guxügutáma Tupanamaã ingëxmagüechaxüçèx. ¹⁵ Rü ngëmacèx tanaxwèxe i Ngechuchu ya Cristuégagu guxüguma Tupanaxü ticuèxüügü. Rü ngëma na taèxmaã nüxü icuèxüügüxü, rü ngëma nixí i ãmare i mexü i nüxna ixãxü. ¹⁶ ¡Rü tãxü i nüxü ipeyarüngümaëxü na togüxü perüngüxëëxü rü namaã pengauxü i perü ngëmaxügü! Erü ngëma nixí i ãmare i Tupanana pexãxü i aixcüma namaã nataãëxü. ¹⁷ ¡Rü naga pexñüë i ngëma perü dauruügu i pemaã icuèxgüxü, rü penaxüx i ngëma pemaã nüxü yaxuxü! Erü nümagü rü Tupanapëxewa pexna nadaugü na meã pemaxëxüçèx erü nüxü nacuèxgü na Tupana tá nüxna çaxü i nachiga na ñuxãcü pexna nadaugüxü. Rü name nixí i meã namaã pemaxë i ngëma perü dauruügu na wüxi i taãe na yíxüçèx i ngëma norü puracü rü tama wüxi i norü guxchaxü na yíxüçèx. Erü ngëxguma chi wüxi i norü guxchaxü yixígu i ngëma norü puracü na pexna nadauxü, rü pema rü chi taxuüma i mexü nawa peyaxu i ngëma norü puracü. ¹⁸ Rü name i toxcèx peyumüxëgü. Erü toðëwa nüxü tacuèx na aixcüma meã tayanguxëëxü i ngëma puracü i Tupana toxna ãxü rü tanaxwèxe na guxüguma ngëmaãcü tanaxüxü. ¹⁹ Rü ngëma guxüärü yexera pexna naxcèx chaçaxü nixí na peyumüxëgüxü na Tupana paxa pexcèx choxü taeguxëëxüçèx.

Yema duüxügüxü narümoxë rü naxcèx ínaca na Tupana nüxü rüngüxëëxü

²⁰⁻²¹ Rü ñuxma chanaxwèxe i poraãcü pexü narüngüxëë ya Tupana ya tórü taãëxëëruü rü tórü ngüxmüxëëruü ixícü. Rü nüma nixí ga yuwa ínadxëëãxü ga tórü Cori ya

Ngechuchu ya Cristu ya guxũma i yaxõgũxũãrũ dauruũ ya guxããrũ yexera ixĩcũ. Rũ ñuxma na curuchagu taxcèx nabaãxũ ga guma nagũ ga tũxũ nüxũ cuèxèècũ na ñuxãcũ guxũguma tũxũ nangechaũxũ ya Tupana, rũ chanaxwèxe na nüma ya Tupana pexũ yamexèègũxũ rũ pexũ nangũxèèxũ na aixcũma guxũma i perũ maxũwa pimexũcèx. Rũ ngèxgumarũũ ta chanaxwèxe na Ngechuchu ya Cristuwa tũxũ nangũxèèxũcèx ya Tupana na nüma nanaxwèxexũãcũma ixĩgũxũcèx. Rũ ñuxma tanaxwèxe i guxũguma yima Cristuxũ tikuèxũũgũ. Rũ ngẽmaãcũ yĩ. ²² Pa Chaueneègũx, pexũ chacèèxũ na yaxna namaã pexĩnüèxũ i ñãã noxretama i ore i pexũ namaã chataãèxèèxũ rũ pexũ namaã chaxucũxèxũ. ²³ Rũ chanaxwèxe na nüxũ pecuáxũ rũ taeneè ya Timutéu rũ marũ ínanguxuchi ga na napoxcuxũ. Rũ ngèxguma paxa nuã chauxũtawa nanguxgu, rũ tá ngema petanũwa chanaga i ngèxguma pexũ íchayadèuxgu. ²⁴ ¡Rũ nüxũ perũmoxègũ i guxũma i ngẽma perũ dauruũgũ i pemaã ícuáxũ! ¡Rũ ngèxgumarũũ ta nüxũ perũmoxègũ i guxũma i togũ i taeneègũ i yaxõgũxũ! Rũ taeneègũ i Itáriaanewa ngèxmagũxũ rũ ta pexũ narũmoxègũ. ²⁵ ¡Rũ Tupana poraãcũ pexũ rüngũxèèx i guxãma i pemax! Rũ ngẽmaãcũ yĩ.

Rũ nuãma pexna.

TUPANAARŪ ORE GA CHAŪTIÁGU ÜMATÜXŪ

Chaŭtiágu nüxŭ narümoxê ga natanüxŭgü ga Yudŭgü ga yaxôgüxŭ

¹ Pa Chautanüxŭgü i Yudŭgü i Ngechuchuaxŭ Yaxôgüxŭ i Guxŭ i Nañewa Ngëxmagüxŭx, choma i Chaŭtiágu pexŭ charümoxê. Rü choma nixŭ i Tanatü ya Tupana rü tórü Cori ya Ngechuchu ya Cristuaxŭ chapuracüxŭ.

Ngêma cuèx i aixcüma Tupanawa ne üxŭchiga

² Pa Chaueneëgü i Yaxôgüxŭx, name nixŭ na petaãëgüxŭ i ngëxguma nagüxŭraüxŭ i guxchaxŭgü pexcèx ínguxgu. ³ Erü pema nüxŭ pecuèx rü ngëxguma meã peyaxôgüamagu ega woo ñacü rü guxchaxŭ pexŭ üpetügu rü wüxi i mexŭ nixŭ i ngêma. Erü ngêmaãcü nixŭ ya Tupana i pexŭ naporaexêxŭ na yexeraãcü meã nüxŭ peyaxôgüxŭcèx. ⁴ Rü name nixŭ na peporaexŭ na aixcüma Tupanapêxewa pimexŭcèx, rü naxcèxicatama pemaxêxŭcèx, rü taxuwama nachixexŭcèx i perü maxŭ. ⁵ Ngëxguma chi wüxie i petanüwa tama meã nüxŭ cuèxgu na ñacü tüxŭ nanaxwèxexŭ ya Tupana, rü name nixŭ i nüxna naxcèx taca i cuèx, rü nüma tá guxŭma i norü ngüchaŭmaã tüxna nanaxã. Erü Tupana meãma guxŭ i duüxŭgüna nanaxã i cuèx, rü tama nayanuxŭ, rü taxúexŭma nanga. ⁶ Natürü ngëxguma naxcèx ítacaxgu rü tanaxwèxe na aixcüma tayaxôxŭ rü tá na tanayaxuxŭ i ngêma naxcèx ítaçaxŭ. Rü tama name na nagu tarüxŭnŭxŭ rü täütáma tanayaxuxŭ. Erü yíxema tama meã yaxôxê, rü ñoma taxtŭarü yuape i buanecümaã guxŭwama çuexŭrüü tixŭ i tümaãrü maxŭwa. ⁷⁻⁸ Rü yíxema duüxê ya ñuxma meã yaxôxê rü moxŭ rü tama meã yaxôxê, rü taxucürüwama nagu tarüxŭnŭ na ñacü Tupanaxŭtawa tayaxuxŭ. Erü yíxema duüxê ya ngêmaãcü yaxôxê, rü tümaãrü maxŭwa rü tama aixcüma wüxigutama tarüxŭnŭ. ⁹ Rü yíxema yaxôxê ya tama muãrü díeruãxê, rü name nixŭ i tataãë erü Tupanaxãcü tixŭ rü tümamaã nataãë. ¹⁰ Rü yíxema yaxôxê ya muãrü díeruãxê rü name nixŭ i tataãëãma ega woo wüxi i ngunexŭ tüxŭ natauxgu i tümaãrü díeru. Erü ngêma díeruãxŭ i duüxŭgü, rü ñoma putürachacurüü tama natai. ¹¹ Rü ngëxguma nangunagügu ya üèxcü rü poraãcü nanguxetügu, rü narüñexê i ngêma putüra rü narüngu i nachacu, rü ngëxma nagux na namexŭ. Rü ngëxgumarüü tá ta nayu i ngêma díeruãxŭchixŭ rü ngëxma tá nayarüxo i norü guxŭma.

Tupana tüxŭ naxŭ, natürü tama chixexŭgu tüxŭ nanguxêxŭcèx

¹² Rü nataãë ya yima yatü ya meãma yaxôõmacü i ngëxguma Tupana nüxŭ üxgu. Erü ngëxguma ngêmaãcü yaxna namaã naxŭnŭãmagu, rü Tupana tá namaã nataãë rü tá nüxna nanaxã i norü ãmare i mexŭ i taguma gúxŭ. Rü ngêma nixŭ i ãmare i Tupana tümamaã ixunetaxŭ ya yíxema nüxŭ ngechaŭgüxe. ¹³ Natürü ngëxguma texe ñnü i chixexŭ tümacèx ínguxgu na chixexŭ taxüxŭcèx rü tama name i nagu narüxŭnŭ na Tupana tümamaãwa ínanguxêxŭ i ngema ñnü i chixexŭ. Erü ya Tupana rü taguma naãëwa nangu na chixexŭ naxüxŭ, rü ngëxgumarüxŭ ta taguma chixexŭ i ñnü texeãëwa nanguxêë na chixexŭ taxüxŭcèx. ¹⁴ Natürü ngêma chixexŭ i tümatama nagu tarüxŭnŭxŭ nixŭ i chixexŭgu tüxŭ nguxêxŭ. ¹⁵ Rü ngêma chixexŭ i tümatama nagu tarüxŭnŭxŭ nixŭ i tüxŭ pecaduãxêxŭ. Rü ngêma pecadugagu tá nixŭ i düxwa itayarütaxuxŭ. ¹⁶ Pa Chaueneëgü ya Pexŭ Changechaŭgüxex, tama name i pegütama pewomüxêëgü. ¹⁷ Erü guxŭma i ngêma aixcüma mexŭ i tüxŭ ngëxmaxŭ, rü naxŭtawa ne naxŭ ya Tupana ya daxügucü ga naxücü ga üèxcü rü tauemacü rü woramacurígü rü êxtagü. Rü nüma rü guxŭguma nanaxêxŭrügumaraxŭ rü taguma naxüchicüü. ¹⁸ Rü nüma nixŭ ga tüxna naxããxŭ ga norü ore i aixcüma ixŭxŭ na ngêmaãcü tüxŭ nangëxmaxŭcèx i maxŭ i taguma gúxŭ. Rü yemaãcü nanaxŭ yerü nanaxwèxe na yixira nüxŭ na yaxôgüxŭ, rü yixcama i togü.

Ñuxãcü aixcüma Tupanaãxũ tayaxõ

¹⁹ Pa Chaueneëgü ya Pexũ Changechaũgüxex, rü ngëxguma texé pemaã nüxũ ix-uxgu i Tupanaãrũ ore, rü name nixĩ i meã iperũxĩnũë. Rũ tama name i tüxũ pe-choxũgagũ. ²⁰ Erũ ngëxguma nanuxgu i wüxi i duũxũ, rü tama Tupanaãrũ ngúchaũ naxũ. ²¹ Rũ ngëmacèx name nixĩ i nüxũ perüxoe i guxũma i ngëma chixexũgũ i guxũwama ngëxmagũxũ. ¡Rũ meã penayaxu i ngëma ore i Tupana pexna ãxũ! Erũ ngëmawa pexũ nangëxma i maxũ i taguma gúxũ. ²² Rũ tama name i iperũxĩnũëmare i ngëma ore, natürũ name nixĩ i penaxũ i ngëma pemaã nüxũ yaxuxũ. Erũ ngëxguma iperũxĩnũëmaregu rü tama penaxũxgu, rü pegütama pewomüxëëgũmare. ²³ Erũ yíxema irũxĩnũmarexe i Tupanaãrũ ore natürũ tama naxũxe i ngëma nüxũ yaxuxũ, rü wüxi i yatũ i daucüwa nügũ dauchametüxürũ tixĩ. ²⁴ Erũ nügũ nadauchametũ, natürũ ngëxguma yaxũgachigu rü marũ nüxũ inayarüngüma na nañuxchametũraũxũ i noxrix. ²⁵ Natürũ yíxema guxũguma meã nüxũ daumatüxe rü naga ñnũxë i ngëma ore i aixcüma ixĩxũ i pecaduwa tüxũ ínguxuchixëëxũ, rü Tupana rü tá aixcüma guxũwama tüxũ narüngũxëë. Erũ tama ngëma orexũ taxĩnũmare, natürũ tanaxũ i ngëma tümamaã nüxũ yaxuxũ. ²⁶ Rũ ngëxguma chi wüxie nagu rüxĩnũgu na meãma Tupanaxũ tacuáxũ natürũ tama nüxna tadëuxgu ya tümããrũ conũ i tümããrũ orewa, rü tũgütama tawomüxëë, rü tama aixcüma Tupanaãxũ tayaxõ. ²⁷ Natürũ ngëma nacüma i Tanatũ ya Tupanapëxewa aixcüma üñexũ, rü ngëma nixĩ na nüxũ tarüngũxëëxũ i tacutagũ rü yutegũxũ rü tũgũna tadauxũ na tama ñoma i naãneãrũ chixexũgu taxüxũ.

2

Name nixĩ i guxũ i duũxũgũxũ tangechaũ

¹ Pa Chaueneëgüx, pema rü nüxũ peyaxõgũ ya tórũ Cori ya Ngechuchu ya Cristu ya mexëchicü. Rũ ngëmacèx tama name na chixriãcü penayaxuxũ i ñuxre i duũxũgũ rü meã penayaxuxũ i togũ. ² Rũ ngëxguma chi perũ ngutaquëxegu naxücxgu i wüxi i yatũ i uirumaã aneraãxũ rü mexchiruxũ, rü ngëxgumarũ chi ta ngëxma naxücxgu i wüxi i yatũ i ngearũ dñeruãxũ rü wëxachiruxũ, rü name nixĩ i guxũxũma wüxigu meã peyaxu. ³ Natürũ tama name ega meã penayauxgu i ngëma mexchiruxũ rü:
 “¡Nuã mexũ i naxmëxwëxewa rüto!” ñapegũxũ nüxũ, natürũ ngëma wëxachiruxũxũ rü:
 “¡Cuma rü ngëxmatama nachi, rü ëxna yea ñatüanewa rüto!” ñapegũxũ nüxũ. ⁴ Rũ ngëxguma tama wüxigu meã penayauxgu i ngëma taxre, rü pewatama nangox na tama aixcüma guxãxũ pengechaũgũxũ rü chixexũ i duũxũgũ pixĩgũxũ ega ngëmaãcü chixri penayauxgu i duũxũgũ. ⁵ Pa Chaueneëgü ya Pexũ Changechaũgüxex, ¡Iperũxĩnũë i ñãã ore! Tupana tüxũ nade ya yíxema ngearũ dñeruãxgũxe i ñoma i naãnewa na meã nüxũ tayaxõgũxüçëx. Erũ nanaxwëxe i tanayauxgũ i ngëma maxũ i taguma gúxũ i tümamaã inaxunetaxũ ya yíxema nüxũ ngechaũgũxe. ⁶ Natürũ pema rü chixri penayaxu i ngëma duũxũgũ i ngearũ dñeruãxgũxũ rü meã penayaxu i ngëma duũxũgũ i dñeruãxgũxũ. ¿Taux ëxna ngëma dñeruãxgũxũ yĩxũ i ngëma chixri pemaã maxëxũ rü ãëxgacügũxũtawa pexũ íyaxuaxũgũxũ? ⁷ Rũ ngëma dñeruãxgũxũ nixĩ i chixexũ namaã ixugüexũ ya Cristu ya perũ Cori ya mexëchicü. ⁸ Tupanaãrũ orewa nangëxma i norũ mu i guxũ i mugüarũ yexeraxũ i ñaxũ:
 “¡Nüxũ nangechaũ i cumücü ngëma na cugütama cungechaũxürũ!”
 ñaxũ. Rũ ngëxguma aixcüma naga pexĩnũëgu i ngëma mu, rü mexũ nixĩ i pexũxũ. ⁹ Natürũ ngëxguma meã penayauxgu i wüxi i yatũ i mexchiruxũ rü chixri penayauxgu i ngëma wëxachiruxũ, rü pecadu pexü. Rũ Tupanapëxewa pechixexũgu erũ tama naga pexĩnũë i ngëma pexũ namuxũ. ¹⁰ Erũ ngëxguma chi texé naga ñnũgu i guxũma i Tupanaãrũ mugũ natürũ chi wüxiwatama ítatüxgu na tama naga taxĩnũxũ, rü chi ñoma guxũma i Tupanaãrũ mugüga tama taxĩnũxürũ tachixexũgu. ¹¹ Erũ nümatama ya Tupana ga ñacü:
 “¡Tãütãma naĩ i nge i ãtecümaã cungeãë!” ñacü,

rü ñanagürü ta:

“¡Tãütáma cumáëta!”

ñanagürü. Rü ngëxguma chi tama naĩ i nge i átecümaã cungeãëxgu, natürü cumáëtagu, rü tama aixcüma meã naga cuxĩnũ i ngëma Tupana tũxũ muxũ. ¹² Rü ngëmacèx name nixĩ na meã pidexagũxũ rü meã pemaxëxũ. Erü Tupana tá pexna naca i perü maxũchiga ngoxi Cristu pexũ muxũãcüma pemaxë rü éxna tama. Rü ngëma Cristu tũxũ muxũ nixĩ na yigü ingechaũgũxũ. ¹³ Erü guxãma ya yixema tama tümamücügü tũxũ ngechaũtümüũgũxe, rü Tupana rü tãütáma nũxũ tangechaũtümüũgũãcüma tũxna naca i tümäärü maxũchiga. Natürü yixema tümamücügü tũxũ ngechaũtümüũgũxe, rü tãütáma tamuũë i ngëxguma Tupana tũxna caxgu, erü nũxũ tangechaũtümüũgũãcüma tá tũxna naca.

Ega aixcüma yaxõgũgu, rü tanaxwëxe i mexũ taxũgü rü nũxũ tarüngũxëë i togü

¹⁴ Pa Chaueneëgũx, ¿Tacüwa namexũ ega wũxie:

“Choma rü Tupanaãxũ chayaxõ”, ñagũgu, natürü tama mexũ taxũxgu? ¿Pexcèx rü Tupana tá tũxũ maxëëxũ ega ngëmaãcü tayaxõxgux? ¹⁵⁻¹⁶ Rü ngëxguma chi wũxi i taeneë rü éxna taeyèx i yaxõxũ rü nangexchirugu rü nangewemũgu, rü chi wũxie i pema rü ñapegũgu:

“¡Mexũ cuxũ üpetü, rü icũxcuchi na tama cuxũ nadeyuxüçèx, rü meã nachibü!” ñapegũgu, rü ¿tacüwa name i ngëma ega tama nũxna penaxãxgu i ngëma nũxũ taxuxũ? ¹⁷ Rü ngëxguma yaxõmaregu natürü tama mexũ ixũxgu, rü tama togũxũ rüngũxëëgu, rü ¿tacüwa namexũ i ngëmaãcü na yaxõxũ? ¹⁸ Erü ngëxguma cuyaxõmaregu natürü tama mexũ cuxũxgu, rü ngürüächi tá wũxie ñatarügü cuxũ:

“Cuma rü cuyaxõmare natürü taxuxũma i mexũ cuxũ Natürü choma rü chayxõ rü naétü mexũ chaxũ. ¿Rü ñuxãcü tá nũxũ chacuáxũ na cuyaxõxũ ega tama mexũ cuxũxgu? Natürü choma rü chorü ü i mexũmaã tá cuxũ chanawë na aixcüma chayaxõxũ”, ñatarügü tá cuxũ. ¹⁹ Cuma cuyaxõ na nangëxmaxũ ya wũxitama ya Tupana. Marü name. Natürü ngoxogü rü ta ngëmaãcü nayaxõgü, rü porãcü niduxruxe erü Tupanaxũ namuũë. ²⁰ Pa Yatü ya tama Meã Nagu Rũxĩnücũx, cuma rü tama nũxũ cucuèx i ngëxguma cuyaxõmaregu rü tama mexũ cuxũxgu, rü taxuwama name i ngëmaãcü na cuyaxõxũ. ²¹ Tupana nũxũ ixuxgu rü nuxcümaũcü ga tórü oxĩ ga Abráũ rü wũxi ga yatü ga mecü nixĩ. Yerü mexũ naxü rü Tupanaga naxĩnũ ga yexguma namaã nũxũ yaxuxgu na naxcèx yamáãxüçèx ga nane ga Ichaá. ²² Rü ngëmawa nũxũ tacuèx rü tama nayaxõmare ga Abráũ, natürü mexũ naxü ta. Rü yema naxũxüwa tũxũ nũxũ nacuèxëë na aixcüma Tupanaãxũ yaxõõxũ. ²³ Rü yemaãcü ningu ga yema ore ga ümatũxũ ga ñaxũ:

“Abráũ rü Tupanaãxũ nayaxõ rü yemacèx Tupana nũxũ nixu na mecü yĩxũ yerü nũxũ nayaxõ. Rü nũxũ nixu ta na namücü yĩxũ ga Abráũ”.

²⁴ Rü ngëmawa nũxũ tadau na Tupana namaã taãëxũ ya yima yatü ya mexũ ücü rü tama yaxõmarecü. ²⁵ Rü yemaãcü ta ngĩmaã nangupetü ga nuxcüma ga Raá. Rü Tupana ngĩmaã nataãë yerü mexũ ixü ga yexguma meã nayauxãgu ga ngĩpatawa ga yema orearü ngeruũgü ga Yudíugü. Rü ngĩgagu namaxë ga yema orearü ngeruũgü yerü to ga namagu iyamugü ga yexguma norü uwanügü nadaixchaũgu. Rü woo ga ngĩma rü chixri na namaxũxũ ga noxrix, natürü mexũ ixü yerü iyaxõ, rü yemacèx Tupana ngĩmaã nataãë. ²⁶ Rü wũxi i naxũne rü taxuwama name rü nayumare ega natauxguma i naãë. Rü ngëxgumarü ta nixĩ na taxuwama namexũ na yaxõmarexũ ega taxuũma i mexũ ixũxgux.

3

Tórü conũchiga

¹ Pa Chaueneëgũx, tama name i muxëma i pema rü nguxëëtaexũgü pegü pixĩgũxëëchaũ. Erü pema nũxũ pecuèx na yixema i nguxëëtaexũgü na ixĩgũxũ, rü guxũ i duũxũgüarü yexera tá tũxna naca ya Tupana tórü maxũchiga rü tórü puracũchiga. ² Guxãma i

yixema rü muēxpūxcūna chixexū taxūe. Yima yatū ya taguma chixexūxū ixucū rü aixcūma mecū nixī, erū nūxū nacuēx na ñuxācū guxūwama nūgūna nadauxū na tama chixexū naxūxūcèx. ³ Rü ngēma na taga naxīnūxūcèx i wūxi i cowaru, rü tanaxwèxe na naxūtūxūnáguxū na ngēmaācū yixema inaxwèxexūācūma meā iyaxūxūcèx. ⁴ ;Düçèx nagu perūxīnūē ya wapurugū ya buanecūarū poramaā ixūxūne! Rü woo nitaxūchi rü buanecū ya taxūchicūmaā inicuegū, natürü íracū ya quiyamaā nanatoxchinū i norū toxpēxeruū, rü ngextá nūma ínanaxwèxexūwa nanaxūxēē. ⁵⁻⁶ Rü ngēxgumarūū ta nixī ya tórū conū rü woo na naxírachiréxū, natürü namuxūchi i norū ore. Rü wūxitama i úxūarū yauraxū i íraxūwa inaxūgū na yaxaxū i taxūma i naāne. Rü tórū conū rü ñoma wūxi ya úxūrūū nixī. Rü taxūnewa rü wūxi i taxū i chixexū nixī ya yima tórū conū erū nanachixexēē i guxūma i tórū maxū. Rü ngēma Tupana ngoxogūxū ípoxcuexūgune ya úxūemawa ne naxū i ngēma chixexū i namaā yadexaxū ya tórū conū. Rü ngēma chixexūmaā nanachixexēē i guxūma i tórū maxū. ⁷ Duūxūgū rü nūxū nacuēx na íyapuxēēāxū rü nūxna nachogūxū i nagúxūraūxū i naēxūgū i idúraexū, rü werigū, rü āxtapegū, rü choxnigū. ⁸ Natürü taxúema nūxū tacuēx na nūxna tachogūxū ya túmaārū conū. Erū wūxi i chixexū i taxū i taxucūrūwama texé iyarūxoxēēxū nixī. Rü ngēma norū dexa rü úūrūū tūxū nayuxēē. ⁹ Rü yima tórū conūmaā nūxū ticuēxūū ya Tanatū ya Tupana, rü yimamaātama chixexū namaā tixugūe ta i duūxūgū i Tupana nūgūācū úxū. ¹⁰ Rü ngēma taēxmaā, rü meā duūxūgūchiga tidexagū, natürü ngēmatama taēxmaā rü namaā taguxchigagū ta. Pa Chaueneēgūx, tama name na ngēmaācū yīxū. ¹¹ Wūxi i dexáarū chuxchuxūwatama rü taxuacūma ínaxūxū i dexá i mexū rü dexá i chixexū. ¹² Pa Chaueneēgūx, wūxi i iguera rü taxuacūma oríbuarū omaā naxo, rü wūxi i uba rü taxuacūma igueraarū omaā naxo. Rü ngēxgumarūū ta wūxi i dexáarū chuxchuxū i yucūrachiūxūwa, rü taxuacūma ínaxūxū i dexá i mexū.

Ngēma cuèx i aixcūma ixīxū

¹³ Ngēxguma chi petanūwa nangēxmagu i wūxi i duūxū i nūxū cuáxū rü meā naāēxū cuáxū, rü name nixī na meā namaxūxū rü mexū na naxūxū rü tama nūgū yacuēxūūxū na ngēmaācū pexū nūxū nadauxēēxūcèx na aixcūma wūxi i duūxū i nūxū cuáxū yīxū. ¹⁴ Natürü ngēxguma chi pixāūxāchiwèxegūgu rü togūchi pexaiegu rü norū yexera pegū pixīxēēchaūgu, rü taxuacūma pegūgu perūxīnūē na mexūgū rü nūxū cuēxgūxū pixīgūxū. Rü wūxi i dora i taxū nixī i ngēma ega ngēmaācū pixīgūgu. ¹⁵ Erū ngēma na íxāūxāchiwèxegūxū rü duūxūgūchi na íxaie xū rü norū yexera yigū na íxīgūxēēchaūxū, rü tama Tupanawa ne naxū, natürü ñoma i naānecūāxwa rü ngoxo i Chatanáwa nixī i ne naxūxū. ¹⁶ Erū ngextá āūxāchi ítaxūwa rü duūxūgū nūgū írüyexeraxēēchaūxūwa, rü ngēma rü taxuūma meā inixū rü nagúxūraūxū i chixexū nangēxma. ¹⁷ Natürü guxāma ya yixema aixcūma tūxū nangēxmaxē i ngēma cuèx i Tupanawa ne úxū, rü aixcūma meā tamaxē rü guxāmaā tamecūmagū, rü meā duūxēxū tayauxgū i túmapatawa, rü meā itarūxīnūē i túmamūcūarū ucuxē, rü guxū i duūxūgū tūxū nangechaūtūmūūgū, rü guxāmaāma tūgū tawūxiguxēēgū, rü tixaixcūmagū, rü mexū taxūgū. ¹⁸ Rü yixema naxcèx daugūxe na duūxūgū nūgūmaā írūngūxmūēxū, rü wūxi i mexū taxūgū. Erū ngēmawa tá nūxū tadaugū na aixcūma meā Tupanacèx namaxēxū i ngēma duūxūgū.

4

Duūxūgū i ñoma i naāneārū ngúchaūcèx daugūxūchiga

¹ ;Tūxcūū pegūmaā penuē rü pegū pedai? Pegūmaā penuē erū pexū nangēxma i ngēma perū ngúchaūgū i chixexūgū. ² Pema pexū nangúchaū i ngēma pexū taxuxū natürü taxuacūma pexū nanguxū, rü ngēmacèx peyamèx i togū. Rü norū ngēmaxūcèx pixāūxāchie natürü taxuacūma pexū nanguxūēga, rü ngēmacèx pegūmaā penuē, rü pegū pedai. Rü tama penayauxgū i ngēma penaxwèxexū erū tama Tupanana naxcèx peca.

³ Rū ngēxguma naxcèx ípecaxgu, rü tama penayaxu, erü naxcèx ípeca i ngēma tama Tupana pexũ naxwèxexũ. Rū ngēma pematama penaxwèxexũ nixĩ i naxcèx ípeçaxũ na namaã pegütama petaãèxèemarexũcèx. ⁴ Pa Duũxũgü i Chixri Maxèxũx, ¿Tama éxna nüxũ pecuèx rü ngēxguma ñoma i naãnexũ pengechaũgu rü Tupanamaã perüxuwaxũ? Erü texé ya ñoma i naãnexũ ngechaũxè rü Tupanamaã tarüxuwaxũ. ⁵ Rü tama natüçèxma nixĩ i ngēma Tupanaãrü ore i ñaxũ:

“Ngēma Naãè i Üünexũ i Tupana tüxna muxũ rü tüxũ ninuxũ erü noxrü tixĩ rü tüxũ nangechaũ”,

ñaxũ. ⁶ Natürü Tupana rü tüxũ narüngũxèè na namaã iporaexüçèx i guxũma i ñoma i naãneãrü ngúchaũ i chixexũ. Rü ngēmacèx norü orewa rü ñanagürü:

“Tupana rü tümamaã nanu ya yíxema tügü icuèxüxũgüxe, natürü tüxũ narüngũxèè ya yíxema tama tügü icuèxüxũgüxe”,

ñanagürü. ⁷ Pa Chaueneëgüx, ¡Meã Tupanaga pexĩnüè! ¡Rü nüxũ pexoó i ngoxo i Chataná! Rü nüma rü tá pexna niña. ⁸ ¡Tupanana pengaicamagü! Rü nüma rü tá ta pexna nangaicama. Rü pemax, Pa Pecaduãxgüxũx, ¡nüxũ perüxoe i pecüma i chixexũ! Rü pemax, i Tupanawe rüxĩxchaũxè natürü ñoma i naãnewe rü ta rüxĩxchaũxè, ¡penamexèèx i perü maxũ na Tupanacèxicatama pemaxèxüçèx! ⁹ ¡Pegümaã pengechaũgü rü pexauxe erü pipecaduãx! Rü texé ya ñoma i naãneãrü taãewa cugüxe, rü name nixĩ i tügümaã taxauxe. Rü texé ya tümacüma i chixexũmaã taãxèxè, rü name nixĩ i Tupanapèxewa tügümaã tangechaũ. ¹⁰ Rü name nixĩ i Cori ya Tupanapèxegu pecaxãpüxũgü rü namaã nüxũ pixu na taxuwama pimexũ. Rü ngēxguma i nüma rü tá pexũ nicuèxüũ rü pexũ nataxèè.

Tama name i chixexũgu cueneëmaã curüxĩnü

¹¹ Pa Chaueneëgüx, ¡Tãxũ i chixexũmaã pegü pixugüxũ! Erü yíxema chixexũmaã tümãèneèchigagu idexáxe rü éxna chixexũmaã nüxũ dawenüxè, rü chixe nüxũ tawogü ta i Tupanaãrü ore. Rü ngēxguma chixexũgu Tupanaãrü oremaã curüxĩnügu, rü Tupanaãrü orearü yexera cugü quixĩxèèchaũ erü tama aixcüma naga cuxĩnü. ¹² Tupanaxĩcatama nixĩ ya tüxna naxãcü i norü mugü rü ñuxũchi tá tüxna çacü rü ngoxi naga ixĩnüè i ngēma norü ore. Rü nümatama nixĩ i nüxũ nangèxmaxũ i pora na tüxũ namaxèxèèxũ rü éxna tüxũ nayuexèèxũ. ¿Natürü texé quixũ i cumax rü ngēmacèx cunangugüxũ na ñuxãcü namaxũxũ i cumücü?

Taxüema nüxũ tacuèx na çacü tá tüxũ ngupetüxũ i moxũãrü ngunexũgu

¹³ ¡Choxũ iperüxĩnüè i pema na ñapegüxũ:

“Ñuxma rü éxna moxũ tá náí ya ñãnewa taxĩ, rü wüxi ya taunecü tá ngèxma tayayaxu, rü tá ngēma tataxegü na mucü i dñeru ngixũ iyaxuxüçèx”, ñaperügü! ¹⁴ Pema rü tama nüxũ pecuèx na çacü tá pexũ üpetüxũ i moxũ. ¿Çacü nixĩ i perü maxũ? Perü maxũ rü ñoma wüxi i cherena i paxaãchi nüxũ idauxũ rü ngēxgumatama ngupetüxürü tá inayarüxo. ¹⁵ Rü narümemaè nixĩ na ñapegüxũ:

“Ngēxguma chi nanaxwèxegu ya Cori ya Tupana na imaxèxũ, rü chi tanaxü i ñãã puracü i nagu rüxĩnüèxũ”, ñapegüxũ. ¹⁶ Natürü i pema rü pegü picuèxüũgüchaũ. Rü guxũma i ngēma rü tama name. ¹⁷ Yíxema nüxũ cuáxe na ñuxãcü Tupanapèxewa meã tamaxũxũ, natürü tama naxüxe, rü pecadu taxü.

5

Ucuxè i dñeruãxgüxüçèx

¹ Pa Duũxũgü i Dñeruãxgüxũx, ¡Iperüxĩnüè i ñãã ore! ¡Pexauxe rü aita pexüe erü chixexũ tá pexũ naxüpetü! ² Perü ngēmaxũgü rü marü nangaue, rü ngēma pexchiru i mexèchixũ rü nawe nanangõmü. ³ Perü uiru rü perü dñeru rü ngèxma naxãütanü rü ngèxma nangaue. Rü ngēma norü ãütanü rü wüxi i perü cuèxruũ tá nixĩ na pema rü

tá ta ipeyarütaxexü ñoma tacü üxüwa ixaxürüü. Tupana ngixü nadau i perü dñeru i ngñmaã penguüxcü, rü ngëmacèx tá pexü napoxcu i naãneärü guxgu. ⁴ Rü yema perü puracütanüxü ga tama meã nüxü penaxütanüxü, rü ñuxma rü ngixcèx nidexagü ga yema dñeru ga tama nüxna ngixü pexäcü. Rü Tupana ya guxäärü Cori rü ngëma duüxügüxü naxñü na ngixcèx yadexagüxü ga yema dñeru ga nüxü ngixü pengetanücü ga peanewa na napuracüexücèx. ⁵ Rü ñoma i naãnewa rü pegü pengèxãëgü rü pemepata rü pemuärü ngëmaxüãxgü rü petaãëgü rü meã pechibüe. Natürü nawa tá nangu na ngëmacèx Tupana tá pexü poxcuexü. ⁶ Rü pema penapoxcue rü penadai i ngëma duüxügü i taxuüma i chixexü pemaã üchirèxü. Rü nümagü rü pexü narüturamaëgü, rü taxuacüma nügü ínapoxügü.

Tanaxwèxe i tayumüxë rü meã ítananguxëë ya Cori ya Tupana

⁷ Rü ñuxma Pa Chaueneëgüx, rü name nixí i meã ípenanguxëë ñuxmatata ínangu ya Cori ya Tupana. Rü dücax, yíxema naãnewa puracüxe rü meã ítananguxëë ya pucü na naxügüxcèx i tümanetü. Rü ñuxüchi ñuxre ya tauemacü ítananguxëë na nayaxü i tümanetüarü o, rü ngëxguma rü tá tayabuxgü. ⁸ Rü pema rü ta penaxwèxe na meã ípenanguxëëxü na ínanguxü ya Cori ya Tupana. ¡Rü petaãëgü, rü täxü i nüxü perüchaxuexü na ípenanguxëëxü! Erü marü ningaica na ínanguxü ya tórü Cori. ⁹ Pa Chaueneëgüx, name nixí i nüxü perüxoe na pegüchigaxü pixuechaü na tama ngëmacèx pexna naçaxücèx ya Tupana. Erü marü ningaica na ínanguxü na duüxügüxü yacagüxcèx i norü maxüchiga. ¹⁰ Pa Chaueneëgüx, name nixí i nüxna pecuèxächie ga yema nuxcümaügüxü ga Tupanaärü orearü uruügü ga na ñuxäcü yaxna namaã naxñnüëxü ga yexguma ngúxü yangegügu. Rü name nixí i pema rü ta ngëxgumarüü yaxna namaã pexñnüëãma rü Tupanacèx pemaxëãma ega ngúxü pingegügu. ¹¹ Rü yixema nüxü tacüex na nataãëgüxü ga yema duüxügü ga meã Tupanacèx maxëãmaxü ga yexguma ngúxü nüxü üpetügu. Rü pema nüxü pecuèx ga ñuxäcü meã namaxama ga guma Yox ga yexguma ngúxü nüxü üpetügu. Rü nüxü pecuèx ga yixcama ga na ñuxäcü tórü Cori ya Tupana poraäcü nüxü rüngüxëëxü. Erü nüma ya tórü Cori ya Tupana rü namecümäxüchi rü poraäcü nüxü tangechaütümüügü. ¹² Rü guxüärü yexera, Pa Chaueneëgüx, rü ngëxguma tacücèx ipexunetagu, rü tama name i Tupanaegagu ipexuneta, rü éxna ñoma i naãneegagu ipexuneta, rü éxna tacü i to i naegagu ipexuneta. Natürü ngëxguma aixcüma yixígu i wüxi i ore ¡rü noxtacüma: “Ngü” ñapegü! Rü ngëxguma tama aixcüma yixígu i wüxi i ore ¡rü noxtacüma: “Tama” ñapegü! Rü ngëxguma ya Tupana rü täütáma pexü napoxcue naxcèx i ngëma perü uneta. ¹³ Rü ngëxguma wüxie i petanüwa naxixächiãëgu, rü name nixí na tayumüxëxü. Rü ngëxguma wüxie taãëgu, rü name nixí na tawiyaexü rü Tupanaxü ticuèxüxü. ¹⁴ Rü ngëxguma wüxie i petanüwa idaawexgu, rü name nixí i naxcèx peyaca i yaxögüxüärü äëxgacügü na tümacèx nayumüxëgüxcèx rü Cori ya Tupanaegagu chixümaã tüxü yangögügüxcèx. ¹⁵ Rü ngëxguma aixcüma Tupanaãxü yaxögüãcüma nayumüxëgügu, rü tá tümacèx nitaane, rü nüma ya Cori ya Tupana tá tüxü ínarüdaxëë nawa i tümaärü ðaawe. Rü ngëxguma chi tacü rü pecadu taxüxgu, rü Tupana tá tüxü nüxü nangechaü. ¹⁶ Rü ngëmacèx name nixí i pegümaã nüxü pixu i perü pecadugü rü pegücèx peyumüxëgü i wüxiechigü na pexcèx yataanegüxcèx. Rü yima mecü ya yatüarü yumüxë rü aixcüma natora erü Tupana nanangãxü. ¹⁷ Tupanaärü orearü uruü ga Ería nixí ga wüxi ga yatü ga taxrüü ixícü. Natürü yexguma nüma guxü ga norü ngúchaümaã nayumüxëgu na tama napuxücèx, rü tomaëxpüx ga taunecüarü ngãxügu rü tama napu ga yema naãnewa. ¹⁸ Natürü yemawena rü wenaxärü nayumüxë ga Ería rü pucücèx ínaca. Rü wenaxärü napu. Rü narüxü ga guxüma ga nanetügü. ¹⁹ Pa Chaueneëgüx, ngëxguma chi texé petanüwa Tupanana ixügachigu, rü tangëxmagu ya wüxie ya tüxü taeguxëëxë na wenaxärü Tupanawe tarüxüxcèx, rü mexü taxü. ²⁰ Erü ngëxguma texé Tupanacèx

nataeguxẽẽgu i wüxi i duŦxŦ nüxna i norü chixexŦ, rü tümagagu Tupana tá nanamaxẽẽ i ngẽma duŦxŦ, rü tá nüxŦ nüxŦ nangechaŦ i norü pecadugü.

Rü nuãma pexna,
ChaŦtiágu

NÜXĪRAÜXÜ GA POPERA GA PEDRU ÜMATÜXÜ

Pedru nüxü narümoxe ga yema yaxõgüxü ga to ga nachiiãnegu woonexü

¹ Pa Chaueneëgüx, choma i Pedru nixi i pexcex chanaxümatüxü i ñãã popera. Rü choma nixi i Ngechuchu ya Cristu choxü muxü na duüxügümaã nüxü chixuxücex i norü ore. Rü pexcex chanaxümatü i pema na perü naãnena to i nachiiãnegügu pena-woonexü i Põtuanewa rü Gárataanewa rü Capadochiaanewa rü Áchiaanewa rü Bitíniãanewa ngëxmagüxe. ² Rü pexü nixi ga nadexü ga Tanatü ya Tupana, yerü woetama yema nixi ga nuxcümaxüchima nagu naxinüxü. Rü nanamu ga Naãe i Üünexü na pexü yamexëëgüxücex na aixcüma napëxewa pixüünegüxücex rü Ngechuchu ya Cristuga na pexinüxücex rü nagümaã na piyauxgüxücex na nataxuxücex i perü chixexügü. Rü chanaxwëxe i Tanatü ya Tupana poraãcü pexü narüngüxëe rü pexü nataãëxëe.

Ítananguxëe na wena tá imaxëxü

³ ;Rü ngixã nüxü ticuëxüügü ya Tupana ya tórü Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tüxna nanaxã ga maxü ga yexwacaxüxü, yerü poraãcü nüxü tangechaütümüügü. Rü ngëmacex i ñuxma i yixema rü ta ítananguxëe na wena tá imaxëxü. ⁴ Rü pema rü wüxi i ngunexügu rü aixcüma tá penayauxgü i guxüma i ngëma mexügü i Tupana tá pexna äxü i ñuxma daxüguxü i naãnegu pexü namaã nanguxüxü. Rü ngëma tá pexna naxãxü rü tagutáma inayarüxo, rü tagutáma naxãüachi, rü tagutáma nangau. ⁵ Rü ñuxma na Tupanaãxü peyaxõgüxü rü nüma rü norü poramaã tá pexna nadau ñuxmatáta aixcüma penayauxgü i ngëma maxü i taguma gúxü i tá pexna naxãxü i ngëxguma naguxgu i naãne. ⁶ Rü ngëmacex name nixi i poraãcü petaãëgü, rü nüetama nixi ega woo ñuxma ñãã perü maxüwa rü paxaxãchi muxüma i guxchaxügü pexü üpetügu. ⁷ Erü ngëmaãcü nixi i pexü naxüxü ya Tupana na nüxü nacuáxücex rü ngoxi aixcüma peyaxõgü rü ëxna tama. Rü ngëxguma peyaxõgüamagu ega woo guxchaxügü pexcex ínguxgu, rü ngëma perü õ rü wüxi i uiruarü yexera nixi na namexü erü ngëma uiru rü woo namexëchi natürü düxwa nangau. Rü ngëma uiru rü üxümaã nüxü taxü na nüxü icuáxücex rü ngoxi aixcüma uiruxüchi yiixü. Rü ngëxgumarüü ta nixi i perü õ na guxchaxügümaã Tupana nüxü üxü na nüxü nacuáxücex rü ngoxi aixcüma nüxü peyaxõgü na yixcama pexü yacuëxüüxücex rü mexü i pechica pexna naxãxücex rü pemaã nataãëxücex i ngëxguma wena núma naxüxgu ya Ngechuchu ya Cristu. ⁸⁻⁹ Pema rü Ngechuchu ya Cristuxü pengechaügü woo taguma nüxü na pedaugüxü. Rü ñuxma rü ta woo tama nüxü pedaugü, natürü nüxü peyaxõgü, rü poraãcü petaãëgü. Rü ngëma perü taãëmaã rü taxuacüma nüxü pixuéga na ñuxãcü petaãëgüxüchixü, erü marü penayauxgü i perü maxü i taguma gúxü. Rü ngëmacex nixi i nüxü peyaxõgüxü. ¹⁰ Rü nuxcümaxüchima ga Tupanaärü orearü uruügü, rü nüxü nixugüe ga na ñuxãcü tá Tupana pexü narüngüxëëxü. Rü nümagü rü poraãcü nangüe rü naxcex nadaugü i ngëma maxü i taguma gúxü. ¹¹ Rü nümagü ga yema orearü uruügü rü Tupanaärü poperawa nangüe na nüxü nacuëxgüxücex na ñuxãcü tá na yiixü rü ñuxguacü tá na nangóxü ga guma Maxëëeruü ga Cristu. Rü Cristuãe i Üünexü ga yema orearü uruügüwa yexmaxü, rü nüxü nüxü nacuëxëe ga na Cristu rü tá ngúxü yangexü rü tá nayuxü rü yixcama rü wena tá na namaxüxü rü ñuxüchi daxüguxü i naãnena tá na naxüxü na guxüärü äëxgacü yiixücex. ¹² Natürü Tupana rü yema nuxcümaügüxü ga orearü uruügüxü nüxü nacuëxëe na täütáma nümagü nüxü nadaugüxü ga guma Maxëëeruü ga naxcex nadaugücü, natürü pema tá yiixü na nüxü pedaugüxü. Rü dücax, Pa Chaueneëgüx, gumatama Maxëëeruüchiga nixi ga perü orearü uruügü pemaã nüxü ixugügüxü ga yexguma Tupanaãe i Üünexü ga daxüwa ne muxü yadexagüxëëgu. Rü

guxüma i ngëma ore i yima Maxëxëëruüchiga, rü woo Tupanaârü orearü ngeruüğü i daxüçüäx rü nüxü nangüchaüğü na yexeraäcü nüxü nacuèxgüxü.

Tupana rü taxcèx naca na napëxewa naxüünexüçèx i tórü maxü

¹³ Rü ñuxma na Cristuarü duüxüğü pixïgüxü, rü penaxwèxe na pexuäëgüxü rü ípememarexü na penaxüxü i norü ngüchaü. Rü name nixï i aixcüma meã ípenanguxëë i guxüma i ngëma mexüğü i Tupana tá pexna äxü i ngëxguma Ngechuchu ya Cristu núma üxgu. ¹⁴ Rü ñuxma na Tupanaxäcügü pixïgüxü, rü penaxwèxe na aixcüma naga pexïnüëxü. Rü tama name i nagu pexï ga yema nuxcümaüxü ga perü ngüchaü ga üpa nagu pexïxü ga yexguma tauta Tupanaxü pecuèxgu. ¹⁵ Natürü penaxwèxe i aixcüma meã pemaxë na Tupanapëxewa naxüünexüçèx i perü maxü. Erü nüma ya Tupana ya pexü decü, rü naxüüne. ¹⁶ Rü norü ore i ümatüxüwa rü ñanagürü:

“Chanaxwèxe i chauxrüü pixüüne, erü choma rü chaxüüne”,

ñanagürü. ¹⁷ Rü pema na “Pa Tonatüx” ñapegüxü nüxü ya Tupana, rü ñuxma na ñoma i naãnewa pemaxëxü rü name nixï i guxüguma nüxü pemuë. Erü nüma rü aixcümaxüchi nanangugü i wüxichigü i duüxüğüarü maxü na ñuxäcü yiixü. Rü tüxü napoxcu ya guxäma ya texé ya chixexü ügüxe, rü nüetama nixï ega woo texé tixïgu, erü napëxewa rü nawüxigumare i guxüma i duüxüğü. ¹⁸⁻¹⁹ Rü Tupana rü marü pexü ínanguxüxëë nawa ga yema nuxcümaüxü ga perü maxü ga taxuwama mexü ga perü oxigüxütawa peyaxuxü. Rü yema na nawa pexü ínanguxüxëëxüçèx rü pexna naxäaxüçèx i maxü i ngexwacaxüxü, rü poraäcü nüxü naxätanü. Yerü tama uiru rü ëxna dïëru i ngauxwèxexümaã nanaxütanü, natürü Cristugü ya mexëchicümaã nixï ga naxütanüaxü. Yerü nüma ga Cristu rü ñoma wüxi i carneru i taxuwama nañuxraüxü i Tupanacèx imáxürüü pexcèx nayu na pexü naxütanüxüçèx. ²⁰ Rü nüma ga Tupana rü woetama nuxcümaxüchima tauta naãne ixüğügu, rü marü Cristuxü naxuneta na pexcèx nayuxüçèx. Natürü ñomaücüü nixï ga nangóxü ga guma Cristu na pexü nangüxëëxüçèx. ²¹ Rü ñuxma rü Cristugagu nixï i nüxü peyaxögüxü ya Tupana ga yuwa Cristuxü írüdaxëëcü rü daxüwa nagacü. Rü ngëmacèx nixï i ñuxma i Tupanaäxü peyaxögüxü rü ípenanguxëëgüxü na daxüwa pexü nagagüxüçèx. ²² Rü ñuxma na naga pexïnüëxü i Tupanaârü ore i aixcüma ixïxü rü pexü natauxcha na pegü pengechaüğüxü erü Tupana rü marü pexü inayanaxoxëë i perü chixexüğü. Rü ngëmacèx penaxwèxe i aixcüma guxü i perü ngüchaümaã pegü pengechaüğü. ²³ Rü ñuxma i pema rü marü penayauxgü i ngexwacaxüxü i perü maxü. Rü ngëmacèx ñoma ngexwacèx pebuexürüü pixïgü. Natürü ngëma maxü rü tama penatü rü pee ya yuwèxéxewa nixï i penayaxuxü. Natürü Tupanaârü ore i maxüxü i taguma iyarüxoxüwa nixï i penayaxuxü. ²⁴ Erü Tupanaârü ore i ümatüxüwa rü ñanagürü:

“Guxüma i duüxüğü rü ñoma wüxi i natüanerüümare nixï. Rü guxüma i norü mexü, rü wüxi i nanetüchacurüümare nixï. Rü ngëma natüane rü nayu, rü nachacu rü narüngu. Rü ngëxgumarüü ta nixï i duüxüğü na tama nataixü i norü maxü i ñoma i naãnewa. ²⁵ Natürü tórü Coriarü ore rü taguma inayarüxo”,

ñanagürü i Tupanaârü orewa. Rü ngëma Tupanaârü ore i mexü nixï ga pemaã nüxü yaxugüxü.

2

¹ Rü ngëmacèx name nixï i nüxü perüxoe i guxüma i chixexüğü, rü ngëma na pidoratèëxgüxü, rü ngëma na togüpëxewa meã na pemaxënetaxü rü ngëma na pixäüxächiwèxegüxü, rü ngëma na pexoregütèëxgüxü. ²⁻³ Rü ngëxguma chi aixcüma nüxü picuèxächitanügu na ñuxäcü namecümaxüchixü ya tórü Cori, rü ñoma wüxi i õxchana i ngexwacèx buxü i naëgünenixü nüxü ngüchaüxürüü penaxwèxe i poraäcü pexü nangüchaü i norü ore na ngëmawa peporaexüçèx rü meã peyaexüçèx i perü õwa na ngëmaäcü guxüwama namexüçèx i perü maxü i taguma güxü.

Cristu nixĩ ya nuta ya maxũcü

⁴ Rũ ñuxma rũ name nixĩ i tórũ Corina pengaicamagũ. Erũ nũma ya tórũ Cori nixĩ ya yima nuta ya maxũcü ya Tupana nayaxucũ na namaã inaxũgũãxũcèx ya napata. Rũ woo duũxũgũ nũxũ oexũ, natürũ yima nixĩ ya Tupana nayaxucũ erũ naxcèx rũ namexèchi. ⁵ Rũ ngẽxgumarũũ ta i pemax, rũ Tupana pexũ nade na napataarũ nutagũ ya maxècü pixĩgũxũcèx. Rũ pema nixĩ i Tupanaãrũ ngũxèẽruũgũ i üünexũ i Ngechuchu ya Cristuégagu Tupanana ãmare pexãgũxũ. Rũ ngẽma ãmare i nũxna pexãgũxũ i namaã nataãèxũ rũ ngema nixĩ i perũ maxũ i mexũ i napèxewa. ⁶ Rũ Tupana rũ norũ ore i ümatũxũwa rũ Cristuchigaxũ nixu rũ ñanagürũ:

“Ñuxma na ichanaxũgũxũ ya chopata, rũ yima nuta ya nũxĩra chayaxücuchicũ, rũ yima nixĩ ya nuta ya mexèchicũ ya chomatama chanayaxucũ na chopata namaã ichaxũgũxũcèx. Rũ yima nuta rũ chaunchiga nixĩ. Rũ yixema nũxũ yaxõxè, rũ aixcũma tá tanayaxu i ngẽma maxũ i taguma gũxũ i tümamaã ichaxunetaxũ”, ñanagürũ. ⁷ Rũ pema na nũxũ peyaxõgũxũ, rũ Cristu rũ pexcèx rũ guxũwama name rũ naporaxũchi. Natürũ ngẽma tama yaxõgũxũcèx, rũ taxuwama name. Rũ ngẽmacèx ya Tupana rũ norũ ore i ümatũxũwa rũ ñanagürũ:

“Yima nuta ya ïpataarũ üruũgũ nũxũ ocũ, rũ chauxcèx rũ gucũ ya nutaarũ yexera namexèchi. Rũ ngẽmacèx yimaetũwa nixĩ ichanaxũgũxũ ya chopata”, ñanagürũ. ⁸ Rũ Tupanaãrũ ore rũ ñanagürũ ta:

“Guxũma i ngẽma tama yaxõgũxũ rũ tama irũxĩnũèchaũxũ rũ yima nutagu tá nayarũpucutũgũ”, ñanagürũ. Rũ ngẽmaãcü i guxũma i ngẽma tama yaxõgũxũ rũ tá chixexũgu nayi erũ tama Tupanaga naxĩnũèchaũ rũ tama Cristuaxũ nayaxõgũchaũ. Rũ ngẽmacèx Tupana tá nanapoxcue yema nũma nũxũ yaxuxürũ. ⁹ Natürũ pema nixĩ i duũxũgũ i tórũ ãèxgacũ ya Tupana pexũ dexũ na norũ ngũxèẽruũgũ pixĩgũxũcèx. Rũ pema nixĩ i duũxũgũ i napèxewa ixüünexũ erũ nũmatama ya Tupana rũ norũ duũxũgũxũ pexũ nixĩgũxèẽ na nũxũ pixuxũcèx i norũ ore i aixcũma mexèchixũ. Rũ nũmatama ya Tupana nixĩ ga chixexũwa pexũ ïnanguxũxèèxũ na norũ ngõonexũ i mexèchixũgu pechocuxũcèx. ¹⁰ Rũ ïpa ga pema rũ tama Tupanaãrũ duũxũgũ pixĩgũ, natürũ i ñuxma rũ aixcũma norũ duũxũgũ pixĩgũ. Rũ ïpa rũ taxúeaxũma pengechaũtũmũũgũ, natürũ i ñuxma rũ Tupanaãxũ pengechaũtũmũũgũ.

Ñuxma na Tupanaãrũ duũxũgũ pixĩgũxũ, rũ name nixĩ i meã naxcèx pemaxè

¹¹ Pa Chaueneègũ ya Pexũ Changechaũgũxex, rũ ñuxma na Tupanaãrũ duũxũgũ pixĩgũxũ, rũ tama ñoma i naãnecũãx pixĩgũ. Rũ ngẽmacèx pexũ chacèèxũ na nũxũ perũxoexũcèx i guxũma i ngẽma ngũchaũgũ i chixexũ i ñoma i naãnecũãx nagu ïxũ. Erũ ngẽma ngũchaũgũ i chixexũ rũ taãèxũ chixexũgu nanguxèèchaũ. ¹² Rũ name nixĩ i meã pemaxè napèxewa i ngẽma duũxũgũ i tama Tupanaxũ cuèxgũxũ. Rũ ngẽxguma woo poraãcü chixri pechiga yadexagũgu i nũmagũ, rũ tá nũxũ nadaugũ na ñuxãcü mexũ pexũgũxũ, rũ tá Tupanaxũ nicuèxũũgũ i ngẽxguma Cristu wena nũma ïxgu. ¹³ Rũ name nixĩ na tórũ Cori ya Ngechuchugagu tümaga pexĩnũèxũ ya guxãma ya yixema perũ ãèxgacũgũ ixĩgũxe. Rũ ngẽmaãcü name nixĩ i meã naga pexĩnũè ya ãèxgacũguètũwa nangèxmaxũ. ¹⁴ Rũ ngẽxgumarũũ ta name nixĩ i naga pexĩnũè i ngẽma togũ i ãèxgacũgũ i petanũwa namugũxũ ya yima ãèxgacũ ya tacũ na napoxcueãxũcèx i ngẽma chixexũ ügũxũ rũ namaã nataãègũxũcèx i ngẽma mexũ ügũxũ. ¹⁵ Erũ Tupana nanaxwèxe na mexũ pexũgũxũ na ngẽmaãcü ipeyanangeèxgũxèèxũcèx i ngẽma duũxũgũ i tama Tupanaãrũ orexũ cuãxchaũgũxũ rũ chixri ngẽma orchiga idexagũxũ. ¹⁶ Rũ ñuxma na Cristu pexũ ïnguxũxèèxũ, rũ name nixĩ i duũxũgũ i aixcũma ïnguxũxürũũãcü meã pemaxè. Natürũ ñuxma na ïpenguxũxũ rũ tama name na ngẽmamaã pegũ ïpepoxũxũ na tacũ rũ

chixexũ pexũgũxũcèx. Erũ ñuxma na Tupanaãrũ duũxũgũ pixĩgũxũ, rũ name nixĩ i norũ ngũchaũxĩcatama pexũgũ. ¹⁷ Rũ name nixĩ i meã penayauxgũ i guxũma i duũxũgũ. ¡Rũ nũxũ pengechaũ i taeneẽgũ i yaxõgũxũ! ¡Rũ nũxũ pemuũẽ ya Tupana! ¡Rũ naga pexĩnũẽ ya ãẽxgacũ ya tacũ ya Dumacũãx!

Tanaxwèxe i Cristurũũ yaxna namaã taxĩnũẽ i ngẽxguma ngũxũ ingegũgu

¹⁸ Pa Duũxũgũ i Coriãxgũxũx, ¡rũ nũxũ pengechaũgũ rũ naga pexĩnũẽ i perũ corigũ! Rũ tama name i ngẽma perũ corigũ i pemaã mecũmaxũxũxĩcatama pengechaũgũ, natũrũ name nixĩ i nũxũ pengechaũgũ ta i ngẽma perũ corigũ i chixecũmaxũ. ¹⁹ Erũ Tupana rũ pemaã nataãẽ ega nũxũ na pengechaũgũxũcèx yaxna namaã pexĩnũẽgu i ngẽxguma texé natũcèxmamare chixexũ pemaã ùxgu rũ ngũxũ pexũ tingexẽẽgu. ²⁰ Natũrũ çtacũwa pexũ namexũ ega yaxna namaã pexĩnũẽgu i ngẽxguma wũxi i perũ chixexũcèx pepox-cuegu? Natũrũ ngẽxguma tacũ rũ mexũ i pexũxũgagu ngũxũ pingegũgu rũ yaxna namaã pexĩnũẽgu, rũ ngẽma waxi nixĩ i Tupanapẽxewa mexũ. ²¹ Rũ ngẽma na mexũ pexũxũgagu ngũxũ pingegũxũcèx nixĩ i Tupana pexũ dexũ. Yerũ ga Cristu rũ ta pexcèx ngũxũ ninge. Rũ yemaãcũ pexũ nũxũ nadauxẽẽ na ñuxãcũ nũma nanaxwèxexũ na naxrũũ yaxna namaã pexĩnũẽxũ i ngẽma ngũxũ. ²² Nũma ga Cristu rũ taguma pecadu naxũ, rũ taguma texéxũ nawomũxẽẽ. ²³ Rũ yexguma duũxũgũ chixexũ namaã ixugũegu, rũ nũma rũ taxuũma ga chixexũmaã nanangãxũ. Rũ yexguma ngũxũ nũxũ yangexẽẽgũgu, rũ nũma rũ tama tacũ rũ chixexũmaã nanaxãũxũne. Natũrũ Tupanamaã nũxũ nixu na nũma namaã namexẽẽãxũcèx ga yema duũxũgũ ga chixri namaã chopetũxũ. Yerũ nũxũ nacuèx rũ Tupana rũ aixcũma meã nanangugũ i guxũma i duũxũgũarũ maxũ. ²⁴ Rũ nũmatama ga Cristu rũ nũgũxũnegu nayange ga tórũ pecadugũ ga yexguma curuchagu nayuxgu. Rũ yemaãcũ nanaxũ na nũxũ rũxoexũcèx i tórũ chixexũ na naxcèxĩcatama imaxèxũcèx. Nũma rũ pexcèx nanapix na yemaãcũ pexũ nameẽxẽẽxũcèx. ²⁵ Rũ pema ga ũpa rũ ñoma carnerugũ i nu ne naxĩmarexũrũũ pixĩgũ. Natũrũ i ñuxma rũ marũ Cristucèx pewoegu. Rũ nũma nixĩ i perũ dauruũ yĩxũ, rũ nũma nixĩ i pexna nadauxũ.

3

Ñuxãcũ Tupana nanaxwèxe na namaxẽxũ i ngẽma ixãmaxũ rũ ixãtexũ

¹⁻² Rũ pemax, Pa Ngexũgũx, rũ name nixĩ i petega pexĩnũẽ na ngẽma pete i tama yaxõxũ nũxũ dauxũcèx i perũ maxũ i mexũ i Tupanapẽxewa rũ duũxũgũpẽxewa rũ ngẽmacèx na yaxõõxũcèx woo taxuũma i Tupanaãrũ orexũ namaã pixugu. ³ Rũ ngẽma na aixcũma pimexũcèx, rũ tama name i nagu perũxĩnũẽ na ñuxãcũ pegũ pemexẽẽyaxũchixũ, rũ ãxna uirunaxcèx i ngèxãẽruũmaã pengèxãẽgũxũ, rũ ãxna tatanũxũchixũ i naxchirugu na picuxgũxũ. ⁴ Natũrũ name nixĩ i perũ maxũwa pegũ pimexẽẽgũ rũ guxũma i duũxũgũmaã pimecũmagũ rũ taguma texémaã penuãẽgũ, erũ ngẽma nixĩ i perũ mexũ i taguma iyarũxoxũ i aixcũma mexũ i Tupanapẽxewa. ⁵ Rũ yemaãcũ norũ maxũ i mexũmaã nixĩ ga nũgũ yangèxãẽgũxũ ga yema nuxcũmaũgũxũ ga ngexũgũ ga Tupanapẽxewa ixũunexũ. Rũ nũmagũ rũ Tupanaãxũ nayaxõgũ rũ natega naxĩnũẽ. ⁶ Rũ yemaãcũ ta iyixĩ ga Chara ga ngĩte ga Abrãũga na naxĩnũxũ, rũ ngĩrũ corimaã naxuaxũ. Rũ pemagũ rũ tá ta ngĩrũũ pixĩgũ ega mexũ pexũgũgu. Rũ ñuxũchi taxucèxtáma tũxcũũ petecèx pemuũẽ. ⁷ Rũ ngẽxgumarũũ ta i pemax, Pa Yatũgũx, rũ name nixĩ i meã pemexũ pengechaũgũ rũ aixcũma yaxna ngĩmaã pexĩnũẽ, erũ ngĩma rũ irũturamaẽ. Rũ name nixĩ i ngĩmaã petaãẽgũ erũ Tupana rũ pexna naxããxũrũũ ngĩxna nanaxã i ngẽma maxũ i taguma gũxũ. Rũ name nixĩ i ngẽmaãcũ meã ngĩmaã pemaxẽ na Tupana nũxũ ñnũxũcèx i perũ yumũxẽgũ.

Yĩxema mexũ ùgũxe ya ngũxũ ingegũxechigã

⁸ Rũ ngẽmaãcũ chanaxwèxe i guxãma i pema rũ pegũxũ pengechaũtũmũũgũ rũ wũxigu perũxĩnũẽ, rũ aixcũma nũxũ pengechaũgũ i guxũma i taeneẽgũ i yaxõgũxũ. Rũ

chanaxwèxe i aixcüma pemecümagü rü guxãmaã pegü pewüxiguxêê. ⁹ Rü ngëxguma texé chixexü pemaã üxgu, rü tama name i pema rü ta chixexü tümamaã pexü. Rü ngëxguma texé pemaã guxchigagu, rü tama name i pema rü ta tümamaã peguxchiga. Natürü narümemaê nixĩ i mexü i oremaã tüxü pengãxüga rü tüxü perüngüxêê, erü Tupana pexü nadei na pexü nangüxêxücèx. ¹⁰ Erü Tupanaärü ore i ümatüxüwa rü ñanagürü: “Ngëxguma texé taãêäcüma maxchaügu, rü name nixĩ i nüxna tadau ya tümaärü conü na tama chixexü i oremaã yadeaxücèx. Rü ngëxgumarüü ta name nixĩ i nüxna tadau i tümaãx na tama doraxü yaxuxücèx. ¹¹ Rü name nixĩ i nüxna tayaxü i guxüma i chixexügü, rü mexü taxü. Rü ngëxgumarüü ta name nixĩ i guxüguma naxcèx tadau na togümaã tataãxü. ¹² Erü tórü Cori rü tüxna nadau ya yíxema aixcüma ímexê, rü nüxü naxĩnü i tümaärü yumüxê. Natürü tümamaã nanu ya yíxema chixexü ügüxe”, ñanagürü i ngëma Tupanaärü ore. ¹³ ¿Rü texé tá chixexü pemaã üxü ega pema rü aixcüma guxüguma mexü pexügügu? ¹⁴ Natürü ngëxguma chi ngëma mexü na pexügüxücèx ngüxü pingegügu, rü name nixĩ i petaãegü. ¡Rü taxucèxma texéxü pemuüê, rü taxucèxma tacücèx pexoegaãegü! ¹⁵ Rü name nixĩ i perü Corixü peyaxixêê ya Cristu rü aixcüma naga pexĩnüê, rü guxüguma ípememare na meã penangãxüxücèx i guxüma i duüxügü i pexna çaxü na tüxcüü Cristuaxü peyaxögüxü. ¹⁶ Natürü name nixĩ i nüxü pengechaüäcüma penangãxü rü tama pegügu perüxĩnüêäcüma na norü yexera pixígüxü. Rü name nixĩ i meã pemaxê na taxucèxma pexoegaãxücèx. Rü ngëxguma ngëmaäcü pemaxëgu rü tá naxãneê i ngëma duüxügü i chixri pechiga idexagüxü na ñuxäcü Cristucèx pemaxêxü. ¹⁷ Yixema rü ngüxü tingegü ega chixexü ixügügu. Natürü narümemaê nixĩ na mexü ixügüxücèx ngüxü na ingegüxü, ega ngëmaäcü Tupana naxwèxegu. ¹⁸ Yerü nümatama ga Cristu rü ngüxü ninge, rü wüxicanatama guxãärü pecaducèx nayu. Rü woo na mecü yĩxü rü taxcèx nayu i yixema i chixexü i duüxügü ixígüxü. Rü yemaäcü nanaxü na Tupanaxütawa tüxü nagagüxücèx. Rü woo nayu ga naxüne, natürü ga naãê rü tama nayu. ¹⁹ Rü yexguma naxüne yuxgu rü naãê rü natanüwa naxü ga yema naãegü ga Tupana poxcuexü, rü orexü namaã nayarüxu. ²⁰ Rü yema naãegü ga yexma poxcuexü, rü yema nixĩ ga naãegü ga yema duüxügü ga Noe maxügu tama ixĩnüêchaüxü woo Tupana yaxna namaã naxĩnü ga yexguma Noe naxüyane ga guma wapuru. Rü 8 ga duüxügüxicatama nixĩ ga guma wapurugu ichoüxü, rü yema nixĩ ga guma mucü ga taxüchicüarü dexáétüwa maxêxü. ²¹ Rü yema dexá rü wüxi ga cuèxruü nixĩ. Erü ngëxguma dexáwa íbaiegu, rü duüxügüxü nüxü tacüxêê na Ngechuchu ya Cristu wena maxüxügagu yĩxü i tüxü nangëxmaxü i maxü i taguma güxü. Rü tama taxüneärü düxétüwa na imexücèx nixĩ i íbaieü, natürü ítabaie yerü marü Tupanana naxcèx taca na tüxü iyanaxoxêêäxücèx ga tórü pecadugü na aixcüma napëxewa imexücèx rü aixcüma mexügu rüxĩnüêxücèx. ²² Rü nüma ga Ngechuchu ya Cristu, rü daxügüxü i naãnewa naxü, rü ñuxma rü Tupanaärü tügünecüwawa nangëxma. Rü ñuxma rü namëxwa nangëxmagü i guxüma i Tupanaärü orearü ngeruügu i daxücüãx rü guxüma i ãëxgacügü i daxücüãx.

4

Tanaxwèxe i ngëma cuèx i Tupana tüxna äxümaã nüxü tarüngüxêê i taeneëgü

¹⁻² Rü ngëmacèx name nixĩ na ípememarexü na ngüxü pingegüxü yexgumarüü ga Cristu na ngüxü yangexü. Erü yíxema ngüxü ingexe rü marü nüxü tarüxo i tümaärü pecadu na guxüguma meã Tupana naxwèxexüäcüma tamaxüxücèx, rü tama i tümaxüne naxwèxexüäcüma na tamaxüxücèx. ³ Üpa ga pemax, rü mucüma ga tauncü penaxüecha i ngëma chixexü i ñuxma i ngëma duüxügü i tama Tupanaxü cuèxgüxü ügüxü. Rü yexguma ga pema rü pecadu pexügüäcüma pemaxê, rü penaxü ga pexeneärü ngüchaü, rü pengãxê, rü peta ga nawa pexãügatanüxü pexügü, rü tacü i nguchiëxgüxü poraäcü pixaxcugü, rü tupananchicüxüxü picüxüügu i woo Tupana na pexna nachuxuxü i ngëma. ⁴ Rü yema duüxügü ga namaã pexãmücügüxü ga yexguma chixri pemaxëgu,

rü ñuxma rü poraãcü nagu narüxñnüë na ñacüçèx tama natanügu pexãgüxü rü tama nawe perüixü i ngëxguma norü chixexü naxügügu. Rü ngëmacèx nixi i ñuxma i chixri pechiga yadexagüxü. ⁵ Natürü nümagü rü tá ta Cristupëxewa nangugü na namaã nüxü yaxugüxüçèx na ñuxãcü namaxëxü. Rü nüma ya Cristu rü ínamemare na nüxna yacachigüxüçèx i guxüma i duüxügü i maxëxü rü yuexü. ⁶ Rü ngëmacèx ya Tupana rü naxüpa na nayuexü i duüxügü rü marü nüxna nanaxuaxü i maxü i taguma gúxü. Erü nanaxwèxe na naxrüü guxüguma mexüwa namaxëëchaxü ega woo ñoma i naãnewa nayuegu i naxünegü. ⁷ Rü marü ningaica na nagúxü i ñoma i naãne rü guxüma i ñacü i nawa ngëxmaxü. Rü ngëmacèx name nixi na ípexuãëxü rü meã peãe ta ipexügüxü rü guxüguma peyumüxëgüxü. ⁸ Rü guxüãrü yexera i ngëma pexü chanaxwëxexü nixi na aixcüma pegü pengechaügüxü i wüxichigü. Erü ngëxguma aixcüma yigü ingechaügügu rü ngëmaãcü inayarüxo i muxüma i pecadugü. ⁹ ¡Rü meã pegü peyaxugü i wüxichigü i pechiüwa! Rü tama name i tümamaã penuãëãcüma tüxü peyaxu. ¹⁰ Rü wüxichigü i pemax, rü Tupana pexna nanaxã i perü cuèx. Rü ngëma perü cuèxmaã rü name nixi i wüxichigü pegü perüngüxëëgü, na aixcüma Tupanaãrü ngüxëëruü i mexü na pixigüxüçèx rü meã namaã pepuracüexüçèx i guxüma i ngëma cuèx i Tupana pexna äxü. ¹¹ Rü ngëxguma texé nüxü ixuxgu i ore, rü name nixi i aixcüma Tupanaãrü orexü tixu. Rü ngëxguma texé togüxü rüngüxëëgu, rü name nixi i Tupana tüxna äxü i poramaã tanaxü. Rü guxüma i ngëma pexüxü rü name nixi i meãma penaxü na ngëmaãcü Ngechuchu ya Cristugagu Tupanaxü picuèxüügüxüçèx. Erü nüma ya Tupana rü guxüguma namexëchi rü naporaxüchi. Rü ngëmaãcü yü.

Ngëxguma Cristuaxü yaxõxgu rü ngúxü tinge

¹² Pa Chaueneëgü ya Pexü Changechaügüxex, ñuxma na taxü i guxchaxügü i perü ngüxëëruü pexcèx ínguxü, ¡rü táxü i pebaixãchiãëgüxü, ñoma ñacü i taguma nüxü pedauxü ngupetüxürüü! ¹³ Natürü narümemaë nixi na petaãëgüamaxü, yerü yema Cristu ngúxü na ingexürüü nixi i ngúxü na pingegüxü i ñuxmax na petaãëgüxüçèx i ngëxguma wena núma naxüxgu i nümax. ¹⁴ Rü ngëxguma Cristuaxü na peyaxögüxügügu texé pemaã guxchigagu, rü wüxi i perü taãë nixi i ngëma. Erü ngëmaãcü nüxü pecuèx na Tupanaãë i Üünexü rü pewa na nangëxmaxü. ¹⁵ Rü ngëxguma chi ngúxü pingegügu, rü name nixi na wüxi i mexü na pexügüxügügu na yüxü rü tama wüxi i chixexügügu na yüxü, ngëxgumarüü i máeta rü éxna ngitéèx rü éxna togüarü guxchaxüwa na pegü pengëxmagüxëëxü. ¹⁶ Natürü ngëxguma texé Cristuaxü tayaxõxügügu ngúxü tingexgu, rü taxucèxma tüxcüü ngëmacèx taxãne. Rü name i ngëmacèx Tupanaxü ticuèxüü. ¹⁷ Rü ñuxma rü marü nawa nangu na Tupana ngúxü tüxü ingexëëxü na ngëmaãcü tüxü iyanawëxãchixëëxüçèx i yixema na naxãcügü ixigüxü. Rü ngëxguma ngëmaãcü tamaã inaxügüãgu, rü ¿ñuxãcü tá nüxü naxüpetü i ngëma duüxügü i tama Tupanaãrü ore i mexüga ínüëchaüxü? ¹⁸ Erü Tupanaãrü ore i ümatüxüwa rü ñanagürü:

“Ngëma duüxügü i mexü ügüxü rü guxchaãcüma nanayauxgü i maxü i taguma gúxü. Rü ñuxma na ngëmaãcü yüxü, ¿rü ñuxãcü tá nüxü nangupetüxü i ngëma duüxügü i chixexü ügüxü rü pecaduãxgüxü?”

ñanagürü. ¹⁹ Rü ngëmacèx ya yixema Tupana naxwëxexüãcüma ngúxü ingegüxe, rü name nixi na mexü taxügüechaxü rü Tupana ya tüxü ücümëxëgu na tanaxüxü i tümãë na nüxna tüxü nadauxüçèx. Erü nüma ya Tupana rü mecü nixi rü taguma texéxü nawomüxëë.

5

Ucuxëgü naxcèx i ngëma yaxõgüxü

¹ Rü ñuxmax, Pa Yaxõgüxüãrü Äëxgacügüx, rü pexna chanaxãxchaü i wüxi i ucuxë i mexü, erü choma rü ta pexrüü yaxõgüxüãrü äëxgacü chixi. Rü chomaxüchima nixi ga nüxü chadauxü ga ñuxãcü ngúxü na yangexü ga Cristu. Rü choma rü tá ta pexrüü choxü

nangëxma i chauchica i mexü i ngëxguma wena núma naxüxgu. ² Rü chanaxwëxe i nüxna pedau rü nüxü perüngüxëë i guxüma i Tupanaärü duüxügü i pemëxwa ngëxmagüxü. Rü name i mexü i perü ngúchaümaã Tupana naxwëxexüãcüma penaxü i ngëma puracü, rü tama texé pexü muxguxica penaxü rü ëxna dīerucëx penaxü. ³ Rü tama name i namaã penuëãcüma rü penangaãcüma penamu i ngëma duüxügü. Natürü chanaxwëxe i mexü i perü maxü nüxü pewëx na ñuxäcü Tupana naxwëxexü na namaxëxü. ⁴ Rü ngëxguma wena núma naxüxgu ya tórü Dauruüxüchi ya Cristu, rü pema rü tá penayauxgü i wüxi i perü ãmare i ngëxcueruü i mexëchixü i taguma ngauxü. ⁵ Rü ngëxgumarüü ta i pemax, Pa Ngextüxücügüx, rü name nixī i naga pexīnüë i ngëma perü ãëxgacügü i Tupanaärü puracüwa puracüexü. Rü guxāma i pema i yaxōgüxü, rü name nixī i wüxichigü pegü perüngüxëë rü taguma pegügu perüxīnüë na pemücügüarü yexera pixīgüxü. Erü Tupanaärü ore i ümatüxüwa rü ñanagürü:

“Tupana rü tama norü me nixī i ngëma duüxügü i nügü icuëxüxügüxü. Natürü nüxü narüngüxëë rü namaã namecüma i ngëma duüxügü i tama nügü icuëxüxügüxü”, ñanagürü i ngëma ore. ⁶ Rü ngëmacëx tama name i pegü picuëxüxü. Rü narümemae i Tupanamëxë ya poranetüxüwa pegü pengëxmagüxëë na nüma pexü yacuëxüxügüxüçëx i ngëxguma nawa nanguxgu na ngëmaãcü pemaã naxüãxü. ⁷ Rü name nixī i Tupanamëxëgu penaxü i guxüma i perü oegaãëgü, erü nüma ya Tupana rü guxüguma pegu narüxīnü rü aixcüma pexna nadau. ⁸ Rü name nixī i guxüguma pegüna pedaugü rü ipexuãëgü, erü perü uwanü i Chataná rü doma wüxi ya ai ya idüraxüchicürüü nanañaane rü tümacëx nadau na texëxü tá nachixexëëxü. ⁹ ;Rü peporaeamëx rü peyaxōgüamëx i ngëxguma tacü rü chixexü pemaã naxüxchaügu! Erü nüxü pecuëx rü guxüma i taeneëgü i guxüwama ngëxmagüxü rü pexrüü ngëmatama ngüxü ningegü. ¹⁰ Natürü ngëxguma paxaxāchi ñoma i naãnewa ngüxü pingegüguwena, rü Tupana rü tá pexü nimexëë na aixcüma napëxewa pimexüçëx, rü tá pexü narüngüxëë na taguma nüxü perüxoexüçëx, rü tá pexü naporaexëë na aixcüma perü maxüwa peporaexüçëx. Rü daatama Tupana nixī ya tüxna naxäcü i guxüma i mexü i tüxü ngëxmaxü, rü tüxü deicü na naxütawa tüxü nangëxmaxüçëx i tachica i mexü i taguma gúxü, erü Ngechuchu ya Cristuarü duüxügü tixīgü. ¹¹ Rü name nixī i guxüguma nüxü ticuëxüügü ya Tupana, erü nüma nixī i guxüärü ãëxgacü yīxü i guxüguma. Rü ngëmaãcü yīi.

Pedru rü yema yaxōgüxüxü narümoxë

¹² Taeneë ya Chiribánu ya meã yaxōcümaã petanüwa chanamu i ñaã nuxmarexü i popera na pexü chixucüxëgüxüçëx rü pemaã nüxü chixuxüçëx na ngëma pexü nangechaüxügagu yīxü ya Tupana i aixcüma pexü nangüxëëxü. Rü ñuxma na ngëmaãcü pexü nangechaüxü, rü name nixī i guxüguma naxcëx pemaxë. ¹³ Rü pexü narümoxëgü i guxüma i taeneëgü i yaxōgüxü i pexrüü Tupana dexü i núma Dumawa ngëxmagüxü. Rü ngëxgumarüü ta pexü narümoxë i chorü ngüxëëruü i Marcu ya chaunerüü ixīcü. ¹⁴ Rü chanaxwëxe i wüxichigü i pema rü pegü pengechaügüãcüma pegü perümoxëgü. Rü ngëxgumarüü ta chanaxwëxe na aixcüma petaãëgüxü i guxāma i pema na Ngechuchu ya Cristuarü duüxügü pixīgüxü. Rü ngëmaãcü yīi.

Rü nuãma pexna,
Pedru

NORÜ TAXRE GA POPERA GA PEDRU ÜMATÜXÜ

Pedru nüxü narümoxe ga yema yaxögüxü

¹ Pa Chaueneëgüx, choma i Chimáü i Pedru nixi i pexcèx chanaxümatüxü i ñaã popera. Rü choma rü Ngechuchu ya Cristuarü ngüxëëruü chixi, rü nüma nixi ga choxü namuxü na nüxü chixuxücèx i norü ore. Rü pexcèx chanaxümatü i pema na toxrüü aixcüma peyaxögüxü, erü tórü Tupana rü tórü Maxëxëëruü ya Ngechuchu ya Cristu rü aixcüma nimexëchi. ² Rü ñuxma na Tanatü ya Tupanaxü pecuáxü rü tórü Cori ya Ngechuchuxü pecuáxü, rü chanaxwëxe i nümagü aixcüma pemaã namecüma rü aixcüma pexü nataãxëë.

Yaxögüxücümagüchiga

³ Rü Tupana rü noxrütama poramaã marü tüxna nanaxã ga guxüma i ngëma nacüma i mexü i inaxwëxexü na aixcüma meã naxcèx imaxëxücèx. Rü yemaãcü nanaxü ga yexguma tüxü nüxü nacüxëëgu ga guma tórü Cori ya mexëchicü ga norü poramaã tüxü decü. ⁴ Rü yematama norü poramaã tüxna nanaxã ga guxüma ga norü ngüxëë i mexëchixü ga inaxunetaxü na naxrüü pimexücèx rü nüxna pixigachixücèx i guxüma i chixexügü i duüxügüarü ngüchaü i chixexügagu ñoma i naãnewa ngëxmaxü. ⁵ Rü ngëmacèx penaxwëxegü na pegü peporaexëëxü na yexeracü peyaxögüxü rü meã togüpëxewa pemaxëxü. Rü ñuxuchi name na meãma nüxü pecuáxü na tacü yixü i Tupana pexü naxwëxexü. ⁶ Rü ngëxgumarüü ta penaxwëxegü na meã pegümaã ipecuáxü na tama chixexügu peyixücèx. Rü ñuxüchi name na yaxna pegümaã pexinüëxü. Rü ngëxgumarüü ta name na aixcüma Tupanaxü pengechaügüxü. ⁷ Rü ñuxüchi penaxwëxegü na pegü pengechaügüxü ya guxãma i pemax. Rü ngëxgumarüü ta name na guxüma i duüxügüxü pengechaügüxü. ⁸ Rü ngëxguma aixcüma ngëma pexü chaxucuxëxüãcüma pemaxëgu, rü tãütãma natücèxma nixi i perü maxü, rü tãütãma natücèxma nixi na nüxü pecuáxü ya tórü Cori ya Ngechuchu ya Cristu. ⁹ Natürü yixema tama ngëma pexü chaxucuxëxüãcüma maxüxë, rü ñoma tangexetüxüruü tixi. Rü ñoma wüxi i duüxü i tama nagu rüxinüxü i ngëma yixcüra tá nüxü ngupetüxüruü tixi, erü nüxü itayarüngüma na ñuxãcü Tupana tüxü nüxü ngechaüxü ga tümaãrü pecadugü. ¹⁰ Rü ngëmacèx, Pa Chaueneëgüx, name nixi na yexeraãcü meã Tupanacèx pemaxëxü na ngëmaãcü ipenawéxücèx na aixcüma Tupanaãrü duüxügü ya pexcèx naçaxe rü pexü dexe na pixigüxü. Rü ngëxguma ngëmaãcü pemaxëgu rü tagutãma chixexügu peyi rü tagutãma Tupanaxü ípetèx. ¹¹ Rü ngëmaãcü ya Tupana, rü tá meã pexcèx nayawãxna i iãx na tauxchaãcü pichocuxücèx i ngextã guxügutãma ãëxgacü iyixüwa ya tórü Cori ya Ngechuchu ya Cristu ya tórü Maxëxëëruü. ¹² Rü ngëmacèx woo marü nüxü na pecuáxü rü nagu na pexixü i ngëma ore i aixcüma ixixü, natürü guxügutãma pexna nüxü chacuèãchixëëcha ga yema pexü namaã chaxucuxëxü. ¹³ Erü ñuxma na chamaxüxü i chomax, rü nagu charüxinü na namexü na pexna nüxü chacuèãchixëëxü i ngëma ore i namaã pexü chixucuxëgüxü, na ngëmaãcü pexü changüxchaüxëëxücèx na meã Tupanacèx pemaxëxü. ¹⁴ Rü pemaã nüxü chixu i ngëma, erü tórü Cori ya Ngechuchu ya Cristu choxü nüxü nacüxëë na paxa tá chayuxü. ¹⁵ Rü ñoma rü ta na chamaxüxü, rü meã pexü chixucuxëgü na ngëxguma chayuxguwena rü guxüguma nüxna pecuèãchiexücèx i ngëma chorü ucuxëgü na ñuxãcü Tupana naxwëxexü na pemaxëxü.

Pedru rü namücügü rü aixcüma Cristuxü nadaugü ga na ñuxãcü namexëchixü

¹⁶ Rü yexguma pexü tangüxëëgu na ñuxãcü naporaxü ya tórü Cori ya Ngechuchu ya Cristu rü ñuxãcü tá wena na nataeguxü, rü tama tomatama togüãewa tayaxuxü i ore nixi. Yerü tomatama toxetümaã nüxü tadau na ñuxãcü namexëchixü i nüma ya tórü Cori.

17 Rū nüxü tadau ga yexguma Tanatü ya Tupana nüxü icuèxüügu. Rū nüxü taxĩnüë ga yexguma gumatama Tanatü ya Tupana ya Mexëchicü ñaxgu:

“Daa nixĩ ya Chaune ya nüxü changechaüxüchicü. Rū choma rü poraãcü namaã chataãxüchi”,

ñaxgu. 18 Rū aixcüma tomaxüchima nüxü taxĩnüë ga yema Tupanaga ga daxügüxü ga naãnewa inaxüxü, yerü tomatama rü tórü Corimaã tayexmagü nawa ga guma mëxpüne ga üünene ga yexguma yema ngupetügu. 19 Rū yemaãcü nüxü tadau na aixcüma yĩxü ga yema ore ga nuxcümaügüxü ga Tupanaãrü orearü uruügu nüxü ixugügüxü. Yerü yema nüxü yaxugügüxürüütama nixĩ ga nüxü tadauxü. Rū name nixĩ i pema rü ta aixcüma meã nagu perüxĩnüë i ngëma ore, erü wüxi i omü i íraxetüxü i ëänexüwa ibaxixürüü nixĩ. Rū ngëma ore rü tá pexü nüxü nacuèxëë i Tupanachiga ñuxmatáta ínangu ya tórü Cori ya Ngechuchu ya Cristu ya yima woramacuri ya ngunetüxü ngócürüü ixícü. Rū ngëxguma ínganguxgu i nüma rü aixcüma tá meã pexü nüxü nacuèxëë i guxüma i nachiga. 20 Natürü chanaxwëxe na guxüãrü yexera nüxü pecuáxü i ñaã ore i tá pemaã nüxü chixuxü. Rū dücax, taxúema tüechamatama nüxü tacuèx i tacüchiga na yĩxü i Tupanaãrü ore i ümatüxü, ega Tupanaãë i Üünexü tama tüxü rüngüxëëgu. 21 Yerü taxuüma ga Tupanaãrü orearü uruü rü nüechamatama nügüãëwa nanayaxu ga yema ore ga nüxü yaxugügüxü. Natürü yexguma yema orexü yaxugügügu, rü Naãë i Üünexü nixĩ ga yadexagüxëëxü.

2

Doramaã duüxügüxü ngúexëëxüchiga

1 Natürü nuxcüma rü nayexma ta ga Tupanaãrü orearü uruügüneta ixügüxü ga Yudügütanüwa. Rū ngëxgumarüü tá ta petanüwa nangëxma i duüxügü i nguxëëruügüneta ixügüxü. Rū nümagü rü tá doramaã nanaxüchicüü i Tupanaãrü ore, rü ngëmaãcü tá pexü nangüexëë i ore i dora ixixü na pexü nawomüxëëgüxüçèx. Rū nümagü rü tãütama naga naxĩnüechaü ya yima tórü Cori ya Ngechuchu ya Cristu ya norü Maxëxëëruüchirëx ixícü. Rū ngëmagagu ya Tupana rü ngürüãchi tá nanapoxcue i ngëma duüxügü i ngëmaãcü maxëxü, rü tá inayanaxoxëë. 2 Rū nümagü rü tá nüxü nixugü na tama wüxi i chixexü yĩxü ega woo taxüneãrü ngúchaü ixüxgu. Rū muxüma i togü i duüxügü rü tá nawe narüxĩ i ngëma chixexü i naxügüxüwa. Rū ngëma chixri pexü ngúexëëxügagu rü muxüma i togü i duüxügü rü tá chixri nachiga nidexagü i Tupanaãrü ore i mexü i aixcüma ixixü. 3 Rū nümagü i ngëma duüxügü i chixexü rü tá nügüna nananugüchaü i guxüma. Rū ngëmacèx tá pemaã nüxü nixu i ore i chixexü ixixü na ngëmaãcü pexü nawomüxëëgüxüçèx rü pexü ngixü nayauxgüxüçèx i perü dïëru. Natürü tá napoxcue i ngëma duüxügü, rü tãütama nibuxmü. Erü Tupana rü woetama nuxcümmama nanamexëë i ngëma poxcu. 4 Yerü ga Tupana rü tama nüxü nüxü nangechaü ga norü orearü ngeruügü ga daxüçüãx ga pecadu ügüxü. Rū yemacèx ínaxëänexüwa i ngoxogüxü ínapoxcuexüwa nanawogü. Rū cadenamaã nayanëixgü na ngema nangëxmagüxüçèx ñuxmatáta nawa nangu i ngëma ngunexü i nagu Tupana nüxna çaxü i guxüma i duüxügü. 5 Rū yexgumarüü ta ga Tupana rü tama nüxü nüxü nangechaü ga yema nuxcümaügüxü ga duüxügü ga chixexü ügüxü. Rū yemacèx mucü ga taxüchicü naxcèx yéma nanamu na gumamaã nadaiãxüçèx ga yema duüxügü ga chixexü ügüxü. Natürü ga Tupana rü Noexü nadau ga na meãma duüxügüxü yaxucuxëgüxü na nüxü naxoexüçèx ga norü chixexügü. Rū yemacèx ga Tupana rü Noexü namaxëë namaã ga 7 ga natanüxügü. Natürü nanadai ga guxüma ga yema togü ga duüxügü. 6 Rū Tupana rü yexgumarüü ta inayanaxoxëë ga guma íãnegü ga Chodoma rü Gomora ga poraãcü chixri duüxügü nawa maxëne. Rū ínangu ga guma íãnegü ñuxmata norü tanimacaxicatama íyaxü. Rū yemaãcü nanaxü na guma íãnegü rü wüxi ga cuèxruü na yĩxüçèx nüxü ga yema duüxügü ga chixexü ga yemawena maxëxü. 7 Natürü ga Chodomawa rü Tupana nanamaxëë ga Lox ga wüxi ga yatü ga mecü ixícü ga poraãcü ngechaücü ga yexguma nüxü nadëuxgu

ga ñuxãcü chixri na namaxẽxũ ga yema duũxũgũ ga natanũwa nayexmaxũ. ⁸ Rũ guxũ ga ngunexũgu rũ nũma ga Lox ga meã maxũcü rũ poraãcü naãewa nangux ga yexguma nũxũ nadẽuxgu rũ nũxũ naxĩnũgu ga yema chixexũgũ ga naxũgũxũ ga yema duũxũgũ ga natanũwa nayexmaxũ. ⁹ Rũ yema Loxũ na namaxẽẽxũrũũ ga Tupana, rũ nũxũ natauxcha na tũxũ ínanguxũxẽẽxũ i ngẽxguma Chataná tũxna ñnũgu ya yĩxema meã maxẽxẽ. Rũ ngẽxgumarũũ ta ya yĩxema chixexũ ùgũxe, rũ nũxũ natauxcha na poxcuwa tũxũ nangẽxmagũxẽẽxũ ñuxmatáta nawa nangu i ngẽma ngunexũ i nagu guxũma i duũxũgũxũ yacagũxũ. ¹⁰⁻¹¹ Rũ Tupana rũ aixcũma tá nanapoxcue i ngẽma duũxũgũ i naxũneãrũ ngúchaũgu ñxũ i tama naga ñnũechaũxũ ya tórũ Cori. Rũ ngẽma duũxũgũ rũ taxũegama naxĩnũechaũ, rũ nadauxcũraxũwẽxegũ rũ nũgũguxicatama narũxĩnũẽ. Rũ tama namuũẽ na namaã naguxchigagũxũ i ngẽma ãẽxgacũgũ i daxũcũãx i Tupanatũũwa ngẽxmagũxũ. Rũ ngẽmaãcü namaxẽ i ngẽma duũxũgũ. Natũrũ woo Tupanaãrũ orearũ ngeruũgũ i daxũcũãx i ngẽma duũxũgũxũ rũyexeraxũchichirẽxũ, rũ namuũẽ na ngẽmaãcü namaã naguxchigagũxũ i ngẽma ãẽxgacũgũ i daxũcũãx i Tupanatũũwa ngẽxmagũxũ. ¹²⁻¹³ Rũ ngẽma nguxẽẽruũgũneta, rũ ñoma naẽxũgũrũũ nixĩgũ, rũ naẽxũgũrũũ taxuũma nacuẽxgũ. Rũ ngẽma naxũnegũ naxwẽxexũ nixĩ i naxũgũxũ. Rũ nabue na ñoma naẽxũgũ i yayauxgũxũ rũ nadẽixũrũũ yixĩgũxũcèx. Rũ chixri nachiga nidexagũ i ngẽma tama nũxũ nacuẽxgũxũ. Natũrũ ngẽma chixexũ i naxũgũxũgagu tá inayarũtauxe, rũ ngẽmaãcü ngũxũ tá ningegũ nagagu i ngẽma ngũxũ i toguãxũ yangexẽẽgũxũ. Rũ nũmagũ rũ namaã nataãegũ i ngẽma chixexũ i ngunecũtama naxũgũxũ. Rũ ngẽxguma pemaã nachibũegu, rũ wũxi i chixexũchixũ rũ ãnexũchi nixĩgũ erũ ngema rũ ta nanaxũgũ i norũ chixexũgũ i namaã pexũ nawomũxẽẽgũchaũxũ. ¹⁴ Rũ ngẽma duũxũgũ rũ taxuacũma wũxi ya ngeãxũ nadaugũmare, erũ naãewa rũ nagu narũxĩnũẽ na nũxũ tangũchaũxũ. Rũ tama nũxũ ninguẽga na pecadu naxũgũechaxũ. Rũ naxcèx nadaugũ na ñuxãcü chixexũgu tũxũ nayixẽẽxũ ya yĩxema duũxũgũ ya turaearũ maxũãxgũxe. Rũ nũxũ nicuẽxũchi na ñuxãcü tacũ nũgũna nanugũexũ. Natũrũ Tupana rũ marũ namaã nanaxuegu na napoxcueãxũ. ¹⁵ Rũ ngẽma duũxũgũ rũ tama nagu naxĩ i ngẽma Tupana nũxũ naxwẽxexũ, rũ ngẽmacèx inayarũtauxe. Rũ nagu naxĩ ga yema chixexũ ga nagu yaxũxũ ga nuxcũmaũxũ ga Tupanaãrũ orearũ uruũ ga Baráũ ga Beú nane ga chixexũ ùxũ na yemaãcü dẽeru ngĩxũ nayaxuxũcèx. ¹⁶ Rũ noxrũtama buru ga woo taguma idexachirẽxcũ, rũ wũxi ga duũxũrũũ namaã iyadexa rũ inanga naxcèx ga yema chixexũ ga naxũxchaũxũ. Rũ yemaãcü Baráxũ íyachaxãchixẽẽ na tama naxũãxũcèx ga yema chixexũ ga naxũxchaũxũ. ¹⁷ Rũ ngẽma duũxũgũ rũ taxuwama nime ñoma wũxi i puchu i ngearũ dexããxũrũũ. Rũ ñoma wũxi i caixanexũ i buanecũ icuexũrũũmare nixĩ na taxuwama yamexũ. Natũrũ Tupana rũ marũ nanamexẽẽ i wũxi i nachica i ãnexũchixũ i ngextá guxũgutáma ínapoxcueãxũwa i ngẽma duũxũgũ. ¹⁸ Rũ ngẽmaãcü tá nanapoxcue i ngẽma duũxũgũ, erũ nũgũ yacuẽxũũgũãcüma chixri nidexagũ i ore i taxuwama mexũmaã. Rũ tũxũ nixucũxẽgũ na tũmaxũneãrũ ngúchaũgu na taxĩxũcèx ya yĩxema marũ ngexwacèx ngẽmaxũ rũxochirẽxe. ¹⁹ Rũ tũmamaã nũxũ nixu rũ ngẽxguma nawe tarũxĩxgu rũ tá tũxũ ínanguxũxẽẽ na taxuũmẽxẽwa tangẽxmagũxũcèx rũ tũma tanaxwẽxexũãcüma tamaxẽxũcèx. Natũrũ ngẽma duũxũgũ i ngẽmaãcü chixri idexagũxũ, rũ nũmagũtama rũ norũ chixexũtũũwa nangẽxmagũ. Erũ guxũma i duũxũgũ, rũ ngẽma nũxũ rũyexeramaẽxũtũũwa nũgũ nangẽxmagũxẽẽ. ²⁰ Rũ guxãma ya yĩxema marũ tórũ Cori ya Ngechuchu ya Cristu ya tórũ Maxẽẽẽruũxũ cuẽxgũxe, rũ marũ nawa ítanguxũ i ñoma i naãneãrũ chixexũgũ. Natũrũ ngẽxguma chi wenaxãrũ naxcèx tawoegugu i ngẽma chixexũ i nawa ítanguxũchirẽxũ, rũ tũmaãrũ me yixĩgu na wena ngẽma chixexũtũũwa tangẽxmagũxũ, rũ aixcũma noxriarũ yexera tichixe. ²¹ Erũ ngẽxguma chi nũxũ tacuẽxgũguwena nũxũ tarũxoegu i ngẽma ore i mexũ ga noxri tayauxgũxũ, rũ narũmemaẽ chi nixĩ ga noxtacũma tãũ chima nũxũ na tacuẽxgũxũ i ngẽma maxũ i aixcũma mexũ. ²² Tupanaãrũ ore i ùmatũxũwa rũ ñanagũrũ:

“Ngẽma airu i nügü oxgüxü, rü wenaxârü naxcèx nataegu i norü oxü na yaweaxücèx. Rü ngẽma cuchi i norü yora meãma aiyachiréxü, rü ngẽxgumatama wenaxârü norü aiyanecèx nataegu”, ñanagürü i ngẽma orewa. Rü ngẽxgumarüü nixĩ i ngẽma duüxügü i marü Tupanaârü orexü cuèxgüchiréxü rü ñuxüchi wenaxârü naxcèx woeguxü i norü chixexügü ga noxri nawa ínanguxüchiréxü.

3

Tóru Coriarü taeguchiga

¹ Pa Chaueneëgü ya Pexü Changechaügüxex, ñaã nixĩ i ngẽma norü taxre i popera i pexcèx chaxümatüxü. Rü yema nüxĩraüxü ga poperawa pemaã nüxü chixuxürüü, rü wena pexü chixucuxëgü rü pexna nüxü chacuèxächixëẽ na aixcüma meã Tupanaârü oregu perüxĩnüèxücèx. ² Rü chanaxwèxe i nüxna pecuèxächie i ngẽma ore ga nuxcümaügüxü ga Tupanaârü orearü uruügü ga ixüünexü nüxü ixugügüxü. Rü ngẽxgumarüü ta chanaxwèxe i nüxna pecuèxächie i ngẽma tóru Cori ya Ngechuchu ya tóru Maxëxëeruüârü mugü ga pexü nangúexëèxü ga norü orearü uruügü ga nüma pexütawa namugüxü. ³⁻⁴ Natürü chanaxwèxe i guxüârü yexera nagu perüxĩnüè i ñaã ore i pemaã tá nüxü chixuxü. Rü dücax, rü ngẽxguma nagúxchaügu i ñoma i naãne, rü tá ínangugü i duüxügü i chixexü i nagu íxü i naxüneârü ngúchaügu. Rü nümagü rü tá nacugüeácüma ñanagürügü:

“Düçèx, Cristu inaxuneta na wena núma naxüegaxü. ¿Rü tacü namaã nangupetü i ñuxma na tama ínanguxü? Rü marü düxwa nayue ga tóru oxigü ga yaxögüxü, natürü noxri naãne üxgumama rü nanangẽxgumaraüéchatama i guxüma”, ñanagürügü tá. ⁵⁻⁶ Natürü ngẽma duüxügü i ngẽmaãcü idexagüxü rü tama nüxü nacuèxgüchaü ga yema ngupetüxü ga yexguma Tupana ñoma ga naãnewa namuãgu ga guma mucü ga tacü ga iyanaxoxëècü ga guxüma ga tacü ga ñoma ga naãnewa yexmaxü. Rü nuxcümaxüchima naxüpa ga guma mucü rü woetama nayexma ga ñoma ga naãne rü guxüma i daxüwa nüxü idauxü ga Tupana ngoxëèxü ga yexguma namuãgu na nangóxücèx. Rü yemaãcü dexáchiüwa nangox ga ñoma ga naãne rü dexáarü ngäxütüchiüwa nayexma, yerü yemaãcü nanamu ga Tupana. ⁷ Natürü ngẽma ñuxma ngẽxmaxü i daxüwa nüxü idauxü rü ñoma i naãne rü Tupana namaã nanguxü na yixcama üxüwa yaxaxücèx, yerü yemaãcü namaã nanaxuegu. Rü ngẽma ñoma i naãne rü ngẽma daxüwa nüxü idauxü, rü yima üxü ya Tupana nüxü ixuxünewa tá nixĩ i aixcüma ínaguãxü i ngẽma ngunexü i nagu naxunetaxügu na napoxcueãxü rü chixexüwa nawogüãxü i ngẽma duüxügü i tama naga ínüéchaüxü. ⁸ Rü ñuxmax, Pa Chaueneëgü ya Pexü Changechaügüxex, tama chanaxwèxe i nüxü ipeyarüngümaë na wüxitama i ngunexü rü tóru Coricèx rü 1000 ya taunecürüü yüxü. Rü ngẽxgumarüü ta, 1000 ya taunecü rü tóru Coricèx rü wüxitama i ngunexürüü yüxü. ⁹ Rü ñuxre i duüxügü rü nagu narüxĩnüè na tãütáma paxa ínanguxü ya tóru Cori yema tamaã inaxunetaxürüü. Natürü nüma ya tóru Cori rü tama nanuxcüãë na yanguxëèãxü i ngẽma norü uneta, natürü nüma rü tamaã yaxna naxĩnümare. Erü nüma rü tama nanaxwèxe na texé iyarütaxuxü, natürü nanaxwèxe na guxãma nüxü rüxoexü i tümacüma i chixexü. ¹⁰ Natürü ngẽma ngunexü i tóru Cori nagu ínguxü, rü taxúema nagu ínanguxëèxügu tá nixĩ. Erü ngürüächimare tá ínangu ñoma wüxi i ngítëxáxü ínguxürüü. Rü ñuxüchi guxüma i tacü i daxügüxü i naãnewa ngẽxmagüxü rü tá tagaãcü niwãixgü rü ngẽmaãcü tá inayarütaxe. Rü yima üèxcü rü tauemacü rü woramacurigü rü èxtagü rü tá nixae rü ngẽxma tá nayarüxogü. Rü ngẽxgumarüü tá ta i ñoma i naãne rü tá nixa namaã i guxüma i tacü i nawa ngẽxmagüxü. ¹¹ Rü ñuxma na ngẽmaãcü tá namaã nangupetüxü i guxüma i tacü i ngẽxmaxü, rü yexeraãcü penaxwèxe na aixcüma Tupanapëxewa pixüünexü rü nüma nanaxwèxexüácüma na pemaxëxü. ¹² Rü name nixĩ i meã ípenanguxëè i ngẽma ngunexü i nagu tá ínanguxü ya tóru Cori ya

Tupana. ¡Rü paxa guxũwama nüxũ pixu i norü ore rü aixcüma naxcèx pemaxê na ngẽmaãcü ípenanguxêẽxücèx! Rü ngẽma ngunexũgu rü guxũma i daxũwa nüxũ idauxũ rü tá nixa rü tá inachaxichigü. Rü ñoma i naãne rü üèxcü rü tauemacü rü êxtagü rü yima üxümaã tá inachaxichigü. ¹³ Natürü yixema na yaxõgüxũ rü ítananguxêẽ i ngẽma ngexwacaxũxũ i daxũgüxũ i naãne rü ngexwacaxũxũ i ñoma i naãne ga Tupana tamaã ixunetaxũ. Rü ngẽma rü guxũtáma name, rü yixema rü tá ta aixcüma time. ¹⁴ Rü ngẽmacèx, Pa Chaueneẽgü ya Pexũ Changechaũgüxex, rü ñuxma na ípenanguxêẽxũ i ngẽma, rü name nixĩ i aixcüma meã pemaxê rü aixcüma pegü pengechaũgü na taxuwama nachixexücèx i perü maxũ rü aixcüma petaãègüxücèx i ngẽxguma wena núma naxũxgu. ¹⁵ Rü name nixĩ i nüxna pecuèxãchie na yaxna tamaã naxĩnüxũ ya tórü Cori, erü nanaxwèxe na tüxũ nangẽxmaxũ i tórü maxũ i taguma gúxũ. Rü ngẽmatama pexcèx chanaxümatüxürüü ta nixĩ ga pexcèx naxümatüãxũ ga taeneẽ ya nüxũ ingechaũgücü ya Pauru ga yexguma Tupana naporaxêẽãcüma pexcèx naxümatüãgu. ¹⁶ Rü guxũma ga norü poperawa rü ñaã pexcèx chaxümatüxũchiga nanaxümatü ga Pauru. Natürü yema pexcèx naxümatüxũwa rü nangẽxma i ñuxre i ore i guxchaxũ na nüxũ icuáxũ na tacüchiga yĩxũ. Rü ngẽma duũxügü i tama aixcüma Tupanaxũ cuèxgüxũ rü tama aixcüma yaxõgüxũ, rü nanaxüchicüügü i ngẽma ore ngẽxgumarüü na guxũma i Tupanaãrü ore i ümatüxũ naxüchicüügüxürüü. Natürü ngẽma chixexũ na naxügüxũgagu rü nügü tátama inayarütauxexêẽ. ¹⁷ Rü ngẽmacèx, Pa Chaueneẽgü ya Pexũ Changechaũgüxex, rü ñuxma na nüxũ pecuáxũ i tacü tá na ngupetüxũ, rü name nixĩ i pexuãègü na tama pexũ nawomüxêègüxücèx i ngẽma chixexũ i duũxügü rü tama nüxũ perüxoexücèx na meã peyaxõgüxũ. ¹⁸ Rü ngẽmacèx, Pa Chaueneẽgüx, penaxwèxe na pegü peporaexêẽxũ na wüxichigü i ngunexũ yexeraãcü tórü Cori ya Ngechuchu ya Cristu ya tórü Maxêxêẽruũxũ pecuáxücèx rü yexeraãcü nüxũ picuáetanüxücèx na ñuxãcü aixcüma pexũ nangechaũxũ. ¡Rü ngẽmacèx rü guxũgutáma rü ngĩxã nüxũ ticuèxüügü! Rü ngẽmaãcü yĩ.

Rü nuãma pexna,
Pedru

NÜXĨRAÜXÜ GA POPERA GA CUÁÛ ÜMATÜXÜ

Ore i tüxü maxëëxüchiga

¹ Pexcèx tanaxümatü nachiga ya Tupana Nane ya Cristu ya yima woetama marü nüxĩra yexmacü ga yexguma noxritama tauta naãne üxgu. Rü nüma rü Ore i Maxëëxëruü nixĩ i naega erü nüma nixĩ i tamaã nüxü yaxuxü i Tupanachiga rü tüxü namaxëëxü. Rü toma ga norü ngüexügü na tixīgüxü, rü nüxü taxĩnüë rü toxetümaã nüxü tadaugü rü tomëxmaã nüxü tingögügü. ² Rü yima Maxëëxëruü ya Cristu rü toxü nügü nawëx. Rü nüxü tadaugü rü duüxügümaã nüxü tixu na ñuxäcü yĩxü. Rü ñuxma rü pemaã rü ta nüxü tixuchiga ya yima Cristu ya tüxna naxäcü i maxü i taguma gúxü. Rü noxri rü Nanatüxütawa nayexma, natürü ñoma ga naãnewa nangu rü toxcèx nangox. ³ Rü yema toma nüxü tadaugüxü rü nüxü taxĩnüëxü rü pemaã nüxü tixu na tomücügü pixīgüxücèx, ngëxgumarüü i toma na Tanatü ya Tupana rü Nane ya Ngechuchu ya Cristumücügü tixīgüxürüü. ⁴ Rü ngëmacèx pexcèx tanaxümatü i ñaã ore na wüxigu aixcümäxüchi itaãëgüxücèx.

Ñoma ngóonexürüü name ya Tupana

⁵ Rü ñaã nixĩ ga ore ga tomaã nüxü yaxuxü ga Ngechuchu ya Cristu. Rü pemaã nüxü tixu na ñoma ngóonexürüü namexü ya Tupana, rü nawa rü nataxuma i chixexü i ñoma ëänexürüü ixixü, rü bai i íraxü. ⁶ Rü ngëxguma chi:

“Tanatü ya Tupanamücügü tixīgü”, ñagügu, natürü chixri imaxëgu, rü tidoraemare erü tama aixcüma meã tamaxë. ⁷ Rü ngëxguma chi Tupanarüü ngóonexüwa imaxëgu, rü yigümücügü tixīgü i yixema, rü Tupana Nane ya Ngechuchu rü nagümaã tüxü inayanatauxëë i guxüma i tórü chixexü. ⁸ Ngëxguma chi nüxü ixuxgu rü:

“Changearü pecaduãx”, ñagügu, rü yigütama tawomüxëë, rü tidoraemare. ⁹ Natürü ngëxguma chi Tupanamaã nüxü ixuxgu i tórü pecadugü, rü nüma tüxü nüxü nangechaü rü tüxü inayanatauxëë i guxüma i tórü chixexü, erü nüma rü mecü nixĩ rü taguma tüxü nawomüxëë. ¹⁰ Natürü ngëxguma chi:

“Tangearü pecaduãxgü”, ñagügu, rü doratèëx nüxü tawogü ya Tupana rü tama aixcüma tawa nangëxma i norü ore.

2

Cristu rü tórü chogürüü nixĩ

¹ Pa Chauxacügüx, pexcèx chanaxümatü i ñaã ore na tama chixexü pexügüxücèx. Natürü ngëxguma chi wüxie chixexü üxgu, rü nangëxma ya tümaëtüwa chogücü nüxna ya Tanatü ya Tupana na tama tüxü napoxcuxücèx. Rü yima nixĩ ya Ngechuchu ya Cristu ya aixcüma mecü ixĩcü. ² Rü guma Ngechuchu ya Cristu rü nügü inaxã rü nayu na naxütanüãxücèx ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³ Rü ngëxguma chi naga ixĩnüëgu i ngëma tüxü namuxü ya Tupana, rü nüxü tacuèx na aixcüma nüxü icuáxü. ⁴ Rü ngëxguma chi wüxie:

“Choma rü Tupanaxü chacuèx”, ñagügu, natürü tama naga taxĩnügu i ngëma tüxü namuxü ya Tupana, rü wüxi i doratëxáxü tixĩ. ⁵ Natürü yixema naga ñnüxë i ngëma tüxü namuxü ya Tupana, rü aixcümäxüchi Tupanaxü tangechaü. Rü ngëmawa nüxü tacuëxgü na aixcüma Tupanaärü duüxügü ixīgüxü. ⁶ Rü yixema:

“Tupanaärü duüxü chixĩ”, ñagüxe, rü name nixĩ na meã tamaxüxü yema Ngechuchu ya Cristu meã maxüxürüü.

Tupanaärü mu i ngëxwacaxüxüchiga

⁷ Pa Chaueneëgüx, tama wüxi i ngexwacaxüxü i Tupanaärü mu nixĩ i pexcèx chaxümatüxü. Natürü ñaãtama noxriarü ügügumama pexü yexmaxü ga mu nixĩ. Rü ñaãtama nixĩ i Tupanaärü mu ga nuxcümaüxü ga marü nüxü pexĩnüëxü. ⁸ Natürü ñaã Tupanaärü mu i pexcèx chaxümatüxü rü guxüguma nangexwacaxü. Rü ngëxguma naga pexĩnüëgu i ñaã Tupanaärü mu na pegü pengechaügüxü, rü tama ëänexüwatama pemaxë, natürü Cristurüü ngëma ngóonexü i aixcüma ixixüwa pengëxmagü. ⁹ Rü ngëxguma chi wüxie:

“Choma rü ngëma ngóonexüwa changëxma”, ñagügu, natürü tümaëneëchi taxaixgu, rü ëänexüwatama tangëxma. ¹⁰ Yíxema tümaëneëxü ngechaüxë rü ngóonexüwa tamaxü, rü taxucëxma tüxcüü pecadu taxü. ¹¹ Natürü yíxema tümaëneëchi aixe, rü ëänexüwatama tamaxü, rü ëänexügu tixü. Rü tama nüxü tacuèx na ngextá taxüxü, erü tümacèx naxëane. ¹² Pa Chauzacügüx, pexcèx chanaxümatü erü Cristugagu Tupana marü pexü nüxü nangechaü i perü pecadugü. ¹³ Pa Papágüx, pexcèx chanaxümatü i ñaã ore erü nüxü pecuëxgü ya Tanatü ya Tupana ga noxriarü ügügumama yexmacü. Pa Ngextüxcügüx, pexcèx chanaxümatü erü marü nüxü perüyexera i ngëma ngoxo i Chataná i chixexüärü üruü. ¹⁴ Pa Buxügüx, pexcèx chanaxümatü erü marü nüxü pecuëxgü ya Tanatü ya Tupana. Pa Papágüx, pexcèx chanaxümatü erü marü nüxü pecuëxgü ya Tanatü ya Tupana ga noxriarü ügügumama yexmacü. Pa Ngextüxcügüx, pexcèx chanaxümatü erü peporae, rü guxüguma peëwa nangëxma i Tupanaärü ore, rü marü nüxü perüyexera i ngëma ngoxo i Chataná i chixexüärü üruü. ¹⁵ ;Tãxü i pexü nangüchaüxü i ñoma i naãne rü norü ngëmaxügü! Ngëxguma chi texéaxü nangüchaügu i ñoma i naãne rü tama Tanatü ya Tupanaxü tangechaü. ¹⁶ Erü guxüma i ngüchaügü i ñoma i naãnewa ngëxmaxü rü ñoma i naãneärütama nixĩ rü tama Tupanaärü nixĩ. Rü ngëma ngüchaügü rü ngëma nixĩ i taxüneärü ngüchaügü, rü taxetüarü ngüchaügü, rü yigü na icuëxüügüxü tórü ngëmaxügümaã. ¹⁷ Natürü ñoma i naãne rü guxüma i ngüchaügü i nawa ngëxmaxü rü tá nagux. Natürü yíxema Tupanaga ñnüxë rü guxügutáma tamaxü.

Ore i aixcüma ixixüchiga rü ore i dora ixixüchiga

¹⁸ Pa Chauzacügüx, paxa tá nagux i ñoma i naãne. Pema rü marü nüxü pexĩnüchiga rü tá ínganu i wüxi i Cristuarü uwanü, natürü marü ínganugü i muxüma. Rü ngëmawa nüxü tacuèx na marü nagüxchaüxü i ñoma i naãne. ¹⁹ Rü ngëma Cristuarü uwanügü rü tatanüwatama nangëxmagüchirëx, natürü tama aixcüma tatanüxü nixĩgü, erü ngëxguma chi tatanüxü yixĩgügu rü tatanügu chitama narücho. Natürü marü tatanüwa ínachoxü na meãma nüxü icuáxüçèx na tama aixcüma tatanüxü yixĩgüxü. ²⁰ Natürü pema rü Cristu marü pexna nanamu i Naãe i Üünexü, rü ngëmacèx meãma nüxü pecuèx i Tupanaärü ore. ²¹ Rü ñuxma rü tama nixĩ na tama nüxü pecuáxüçèx na pexcèx chaxümatüxü. Natürü pexcèx chanaxümatü erü marü meãma nüxü pecuèx i ngëma ore i aixcüma ixixü. Rü nüxü pecuèx rü ngëma ore i aixcüma ixixüwa rü nataxuma i dora. ²² ;Texé tiixü ya yíxema idoratëxáxe? Yíxema:

“Ngechuchu rü tama aixcüma Cristu ya Tupana Nane nixĩ”, ñagüxe, tixĩ ya idoratëxáxe. Yíxema tixĩ ya Cristuarü uwanü, erü tama nüxü tacuáxchaü ya Tanatü ya Tupana rü Nane ya Ngechuchu. ²³ Guxãma ya yíxema tama nüxü cuáxchaüxë ya Tupana Nane ya Ngechuchu, rü tama nüxü tacuáxchaü ta ya Tanatü ya Tupana. Natürü yíxema Ngechuchuaxü yaxõxë, rü Tanatü ya Tupanaãxü rü ta tayaxõ. ²⁴ Rü ngëmacèx name nixĩ i peyaxõgüama i ngëma ore ga noxri nüxü pexĩnüëxü. Rü ngëxguma peyaxõgüamagu i ngëma ore ga noxri nüxü pexĩnüëxü, rü aixcüma norü duüxügü pixĩgü ya Tanatü ya Tupana rü Nane ya Ngechuchu. ²⁵ Rü nümatama ya Ngechuchu ya Cristu nixĩ i tamaã inaxunetaxü na tüxna naxããxüçèx i maxü i taguma gúxü. ²⁶ Nangëxma i duüxügü i chixexüwa pexü gagüchaüxü. Rü ngëmachiga nixĩ i pexcèx chanaxümatüxü i ñaã ore. ²⁷ Natürü pema rü marü Cristu pexna nanamu i Naãe i Üünexü, rü guxüguma pewa

nangëxma. Rû ngëmacèx tama penaxwèxe i to i perü ngúexëëxü erü nümatama i Naãë i Üünexü rû pexü nangúexëë i guxüma. Rû norü nguxëëtae rû aixcüma nixí rû tama dora nixí. Rû ngëmacèx name nixí na guxüguma Cristuaxü peyaxögüxü, ngëma Naãë i Üünexü pexü ngúexëëxüãcüma. ²⁸ Rû ñuxmax, Pa Chauzacügüx, rû name nixí na meãma Cristuaxü peyaxögüxü na tama nüxü imuüëxüçèx, rû tama ixãneëxüçèx napëxewa i ngëxguma wena nuã naxüxgu. ²⁹ Pema nüxü pecuèx na Cristu rû aixcüma mecü yïixü. Rû ngëxgumarüü ta name nixí na nüxü pecuáxü na guxüma i duüxügü i mexü ügüxü rû Tupanaxãcügü na yixügüxü.

3

Tupanaxãcügüchiga

¹ ¡Dücèx, Pa Chaueneëgüx, ñuxãcü poraãcü tüxü nangechaü ya Tanatü ya Tupana! Rû ngëmacèx nixí i naxãcügümaã tüxü naxuxü i nümax. Rû aixcüma naxãcügü tixígü. Rû ngëmacèx ñoma i naãnecüãx i duüxügü rû tama tüxü nacuáxchaü erü Tupanaxü rû ta tama nacuáxchaügü. ² Pa Chaueneëgü ya Pexü Changechaügüxe, ñuxma rû marü Tupanaxãcügü tixígü woo tama tüxü nüxü nacuèxëë na ñuxãcü tá ixígüxü i yixcüra. Natürü nüxü tacuèxgü na Ngechuchurüü tá ixígüxü i ngëxguma nangoxgu, erü tá nüxü tadaugü na ñuxãcü yïixü i nümax. ³ Rû guxãma ya yíxema yaxõxë na Ngechuchurüü tá tiixü, rû tügüna tadau na Ngechuchu ya Cristurüü aixcüma Tupanapëxewa tamexü. ⁴ Natürü guxãma ya yíxema pecadu üxe, rû Tupanamaã chixexü taxü. Erü ngëxguma tama Tupanaga taxñügu, rû tapecaduãx. ⁵ Pema nüxü pecuèx rû Ngechuchu ya Cristu rû ñoma ga naãnewa naxü na iyanaxoxëëãxüçèx i tórü pecadugü. Rû nüma rû taguma pecadu naxü. ⁶ Rû ngëmacèx guxãma ya yíxema aixcüma nüxü yaxögüxe, rû tama pecadu taxügüecha. Natürü guxãma ya yíxema pecadu üechaxe, rû ngëmaãcü tamaxë erü taguma Cristuxü tadau, rû taguma nüxü tacuèx. ⁷ Pa Chauzacügüx, ¡täxü i naga pexñüëxü i ngëma duüxügü i pexü iyarütauxexëëchaüxü! Yíxema mexü üxe rû aixcüma mecü tixí, ngëxgumarüü ya Cristu na aixcüma mecü yïixürüü. ⁸ Natürü yíxema pecadu üechaxe rû ngëmawa tüxü tacuèx na Chatanáãrü duüxü tiixü, erü nüma i Chataná rû noxriarü ügügumama pecadu naxüecha. Rû yemacèx ga Tupana Nane rû ñoma ga naãnewa naxü na iyanaxoxëëãxüçèx ga yema Chataná üxü. ⁹ Rû yíxema Tupanaxãcü ixixë rû tama pecadu taxüecha, erü naxãcüxüchi tixí. Rû taxuacüma pecadu taxüecha erü Tupana nixí ya tümanatü. ¹⁰ Yíxema chixexü üxe rû tümaëneëchi aixe, rû tama Tupanaxãcü tixí. Rû ngëmawa nüxü tacuèx na texé tixígüxü ya Tupanaxãcügü rû texé tixígüxü ya Chatanáãcügü.

Name nixí na yigü ingechaügüxü

¹¹ Rû yexguma noxritama pexü tangúexëëgu, rû pemaã nüxü tixu na guxãma yigü ingechaxügüxü. ¹² Rû tama tanaxwèxe na Caïrüü ngoxo i Chatanáãcü ixígüxü. Yerü nüma rû naëneëxü nimèx. ¿Rü tacüçèx nixí ga yamaãxü? Nayamèx yerü yema nüma naxüxü rû tama name, rû yema naëneë üxü rû name. ¹³ Pa Chaueneëgüx, ¡täxü i pebaixãchiãëgüxü ega pexchi naxaiegu i ñoma i naãnecüãx i duüxügü! ¹⁴ Yixema rû marü nüxna ítanguxü i ngëma yu rû ñuxma rû marü maxüwaama tangëxmagü. Nüxü tacuèxgü i ngëma erü nüxü tangechaügü i taeneëgü. Yíxema tama tümaëneëxü ngechaüxë rû yuwatama tangëxma. ¹⁵ Rû yíxema tümaëneëchi aixe rû wüxi i máëtaxü rû nüxü nataxuma i norü maxü i taguma gúxü. ¹⁶ Rû Ngechuchu ya Cristu rû tórü pecaducèx nayu, rû yemaãcü tüxü nüxü nadauxëë i ngëma ngechaü i aixcüma ixixü. Rû ngëxgumarüü ta i yixema, rû tanaxwèxe na ímemarexü na nüxü rüngüxëëxü i taeneëgü woo ngemagu iyuxgu. ¹⁷ Natürü ngëxguma chi wüxi i yatüãxü nangëxmagu i muxüma i norü ngëmaxügü, rû chi nüxü nadëuxgu i namücü na nüxü nataxuxü, rû taxuacüma:

“Choma rü Tupanaxü changechaü”, ñanagürü, ega tama nüxü nangüxëëgu i namücü. ¹⁸ Pa Chauxacügüx, tama name i taëxmaã rü tórü oremaãxicatama nüxü tangechaü i taeneë. Natürü tanaxwëxe i tórü maxümaã rü tórü ü i mexümaã nüxü tangechaü.

Tama taxãneë na Tupanana ingaicamagüxü

¹⁹⁻²⁰ Rü ngëxguma aixcüma yigü ingechaügügu, rü nüxü tacuèx na aixcüma naga ixĩnüëxü i ngëma ore i aixcüma ixĩxü, rü Tupanapëxewa rü aixcüma naxãcügü ixĩgüxü, woo ngëxguma taãëwa naga rüxĩnügü rü:

“Tama Tupanaxãcü chixĩ”, ñagügu. Erü nüxü tacuèx rü Tupana nixĩ i taãëärü yexera, rü nüma nüxü nacuèx i guxüma. ²¹ Pa Chaueneëgü ya Pexü Changechaügüxex, ngëxguma taãëwa nüxü icuèxgu na Tupanaxãcüxüchi ixĩgüxü, rü tama taxãneë na nüxna ingaicamagüxü ya Tanatü ya Tupana. ²² Rü nüma tá tuxna nanaxã i guxüma i tacü i naxcèx íçaxü erü naga taxĩnüë i ngëma tuxü namuxü rü tanaxü i ngëma nüma namaã nataãëxü. ²³ Rü nüma tuxü namu na Nane ya Ngechuchu ya Cristuaxü yaxögüxü rü yigü ingechaügüxü, yema nüma tuxü namuxüãcü. ²⁴ Rü yíxema naga ñnüëxë i ngëma Tupana tuxü muxü, rü aixcüma Tupanaärü duüxügü tixĩgü rü nüma ya Tupana rü aixcüma tümawa namaxü. Rü ñuxma rü nüxü tacuèx na aixcüma Tupanaärü duüxügü ixĩgüxü rü tawa namaxüxü, erü Naã i Üünexü ga tuxna namuxü tuxü nüxü nacuèxëë.

4

Yíxema tuxü nangëxmaxë i Tupanaãë i Üünexü rü yíxema tuxü nangëxmaxë i Cristuarü uwanüãë

¹ Pa Chaueneëgü ya Pexü Changechaügüxex, ;Tãxü i nüxü peyaxögüxü i guxüma i orearü uruügü i nügü ixugügüxü na aixcüma Tupanaärü orearü uruügü yixĩgüxü! Natürü name nixĩ i penangugü i norü ore na nüxü pecuáxüçèx ngoxita aixcüma Tupanaãë yĩxü i nawa idexaxü rü ëxna tama. Erü ñoma i naãnewa rü guxüwama nangëxma i muxüma i idoratèëxgüxü i nügü ixugüxü na Tupanaärü orearü uruügü yixĩgüxü. ² Rü tá pemaã nüxü chixu na ñuxãcü tá nüxü pecuáxü na texé tíxü ya yíxema aixcüma Tupanaãë tümawa ngëxmaxë. Rü dücax, guxüma i orearü uruügü i nüxü ixugüxü na Tupana duüxüxü yaxĩxëëxü ya Ngechuchu ya Cristu, rü ngëma nixĩ i aixcüma Tupanaãë nawa idexaxü. ³ Natürü guxüma i ngëma orearü uruügü i tama nüxü ixugüxü na Tupana duüxüxü yaxĩxëëxü ga Ngechuchu, rü ngëma rü tama nüxü nangëxma i Tupanaãë i Üünexü. Natürü Cristuarü uwanüãë nixĩ i nawa ngëxmaxü. Marü nüxü pexĩnüë na ínguxchaüxü i Cristuarü uwanü, natürü ñuxma rü marü ñoma i naãnewa nangëxma. ⁴ Pa Chauxacügüx, pema rü Tupanaxãcügü pixĩgü. Rü marü nüxü perüyexera i ngëma tama aixcüma Tupanaärü orearü uruügü ixĩgüxü. Erü ngëma Tupanaãë i Üünexü i peãëwa ngëxmaxü rü nüxü narüyexera i ngëma Cristuarü uwanüãë i ñoma i naãnecüãxgüwa ngëxmaxü. ⁵ Rü nüma i Cristuarü uwanüärü duüxügü rü ñoma i naãnecüãxgü nixĩ. Rü ngëmacèx ñoma i naãnehigagu nidexagü. Rü ñoma i naãnecüãx i duüxügü rü nüxü inarüxĩnüë. ⁶ Natürü i yixema rü Tupanaxãcügü tixĩgü. Rü yíxema Tupanaxü cuáxe rü tuxü itarüxĩnü. Natürü yíxema tama Tupanaxü cuáxe rü tama tuxü itarüxĩnü. Rü ngëmawa nüxü tacuèxgü na texé tixĩgüxü ya aixcüma Tupanaärü duüxügü ixĩgüxe rü texé tixĩgüxü ya Cristuarü uwanüärü duüxügü ixĩgüxe.

Tupana tuxü nangechaü

⁷ Pa Chaueneëgü ya Pexü Changechaügüxex, name nixĩ na yigü ingechaügüxü, erü Tupana nixĩ ya tuxü ngüexëëcü na yigü ingechaügüxü. Rü guxãma ya yixema tümãëneëxü ngechaüxë rü Tupanaxãcü tixĩgü rü Tupanaxü tacuèx. ⁸ Yíxema tama tümãëneëxü ngechaüxë rü tama Tupanaxü tacuèx, erü Tupana nixĩ ya tuxü ngüexëëcü na yigü ingechaügüxü. ⁹ Tupana rü ñoma ga naãnewa nanamu ga Nane ya nügümaã wüxicacü na yimagagu tuxü nangëxmaxüçèx i maxü i taguma güxü. Rü yemawa Tupana tuxü

nüxü nadauxêê na ñuxãcü tüxü nangechaüxü. ¹⁰ Rü woo Tupanaxü tangechaügü, natürü ngêma ngechaü i guxüârü yexera ixixü nixi na nüma tüxü nangechaüxü rü ñoma ga naãnewa na namuãxü ga Nane na taxcêx nayuxücêx rü naxütanüãxücêx ga tórü pecadugü. ¹¹ Pa Chaueneêgü ya Pexü Changechaügüxex, yexguma yemaãcü tüxü nangechaügu ga Tupana, rü ngêmacêx name nixi i yixema rü ta yigü tangechaügü. ¹² Taguma texé Tupanaxü tadau. Natürü ngêxguma aixcüma yigü ingechaügügu, rü Tupana rü tawa namaxü rü norü ngechaü rü aixcümaxüchi tórü maxüwa nangox. ¹³ Rü nüma rü marü tüxna nanamu ga Naã i Üünexü. Rü ngêmwawa nüxü tacuêx na aixcüma norü duüxügü ixigüxü rü nüma rü tawa na namaxüxü. ¹⁴ Rü tomatama nüxü tadaugü rü nüxü tixuchigagü na Tanatü ya Tupana núma namuxü ga Nane na guxüma i duüxügüxü namaxêêxücêx. ¹⁵ Rü yixema yaxõxê rü nüxü ixuchigaxe na Tupana Nane yixü ya Ngechuchu, rü aixcüma Tupanaârü duüxü tixi, rü Tupana rü tümawa namaxü. ¹⁶ Rü yixema nüxü tacuêxgü rü tayaxögü na Tupana rü poraãcü tüxü nangechaüxü, erü nüma nixi i aixcüma guxãxü nangechaüxü. Rü yixema aixcüma tümãeneêxü ngechaüxê, rü Tupanaârü duüxü tixi, rü nüma ya Tupana rü aixcüma tümawa namaxü. ¹⁷ Rü ngêxguma aixcüma Tupanaxü ingechaügügu, rü tórü maxüwa nangox i ngêma, rü täütáma nüxü tamuêê i ngêma ngunexü i nagu tüxü yacagüxügu naxcêx i tórü maxü. Erü woo ñoma i naãnewa tangêxmagü, natürü napêxewa rü Cristurüü tixigü. ¹⁸ Rü ngêxguma aixcüma Tupanaxü ingechaügügu, rü nüxü tacuêx na täütáma tüxü napoxcuxü, rü ngêmacêx taxucêxma nüxü tamuêê. Natürü ngêxguma chi nüxü imuêêgu, rü nüxü tacuêx na tama aixcüma nüxü ingechaügüxü. ¹⁹ Rü yixema rü Tupanaxü tangechaügü, yerü nüxüra tüxü nangechaü ga nümax. ²⁰ Ngêxguma chi texé:

“Choma rü Tupanaxü changechaü”, ñagügu, natürü tümãeneêchi taxaixgu, rü tidora. Erü ngêxguma tama nüxü tangechaügu i tümãeneê i nüxü tadauxü ¿rü ñuxücürüwa tá nüxü tangechaü ya Tupana ya tama nüxü tadaucü? ²¹ Rü Ngechuchu ya Cristu tüxü namu rü ñanagürü:

“Yixema Tupanaxü ngechaüxê, rü name nixi na tümãeneêxü rü ta tangechaüxü”, ñanagürü.

5

Nüxü tarüyexera i ñoma i naãneârü ngúchaügü

¹ Ngechuchu rü Tupana Nane ya Cristu nixi. Rü guxãma ya yixema nüxü yaxõxê, rü Tupanaxãcü tixigü. Rü yixema Tanatü ya Tupanaxü ngechaüxê, rü nüxü tangechaü ta i guxüma i naxãcügü. ² Rü ngêxguma Tupanaxü ingechaügügu rü naxüxgu i ngêma nüma tüxü namuxü, rü nüxü tacuêx na aixcüma nüxü ingechaügüxü i ngêma naxãcügü ixigüxü. ³ Rü ngêxguma aixcüma Tupanaxü ingechaügügu rü naga taxinüê i ngêma tüxü namuxü. Rü ngêma tüxü namuxü rü tama naguxcha na naga ixinüêxü. ⁴ Erü guxãma ya aixcüma Tupanaxãcü ixixê, rü tama ñoma i naãneârü ngúchaü i chixexügu tarüxinü. Rü yixema rü tayaxögü, rü ngêmacêx tama name i ñoma i naãneârü ngúchaü i chixexügu tarüxinüê. ⁵ Rü yixema yaxõxê na Tupana Nane yixü ya Ngechuchu, rü yixema tixi ya tama ñoma i naãneârü ngúchaü i chixexügu rüxinüxê.

Ore i Tupana Nanechiga

⁶ Rü nüxü tacuêx na aixcüma Tupana Nane yixü ya Ngechuchu. Yerü yexguma ñoma ga naãnewa nayexmagu rü dexáwa ínabaiegu, rü nümatama ga Tupana nüxü nixu na Nanexüchi yixü. Rü yexguma curuchagu nayuxgu rü nagü inabaãgu ga Ngechuchu, rü Tupana rü wenaxârü inanawêx na aixcüma Nane na yixü. Rü ngêxgumarüü ta i ngêma Naã i Üünexü i taguma idoraxü, rü tüxü nüxü nacuêxêê na aixcümaxüchi Tupana Nane na yixü. ⁷ Rü ngêmaãcü tüxü nangêxma i tomaêxpüx i cuêxruügu i tüxü nüxü cuêxêêxü na aixcüma Tupana Nane yixü ya Ngechuchu. ⁸ Rü ngêma norü wüxi nixi i Naã i Üünexü,

rü ngẽma norü taxre nixĩ ga yema Tupanaga ga yexguma Ngechuchu dexáwa íbaiegu, rü ngẽma norü tomaẽxpüx nixĩ ga yema Tupana üxü ga yexguma curuchagu nagü inabaãgu ga Ngechuchu. Rü guxüma i ngẽma tomaẽxpüx, rü wüxigu nüxü nixu na aixcüma Tupana Nane yĩxü ya Ngechuchu. ⁹ Nüxü tayaxõgü i duüxügü ega tacüxü tamaã yaxugügu. Natürü Tupanaãrü ore nixĩ i yexeraãcü aixcümaxüchi ixixü. Rü Tupana nixĩ ya tamaã nüxü ixucü na Ngechuchu rü Nane yĩxü. ¹⁰ Rü yíxema nüxü yaxõxë ya Tupana Nane rü nüxü tacuèx na aixcüma yĩxü i ngẽma ore i Tupana nüxü ixuxü i Nanechiga. Natürü yíxema tama Tupanaãxü yaxõxë rü doratèx nüxü tawogü ya Tupana erü tama tayaxõ i ngẽma ore i Tupana nüxü ixuxü i Nanechiga. ¹¹ Rü ñaã nixĩ i norü ore ya Tupana i tamaã nüxü yaxuxü, rü ñanagürü:

“Chomatama marü pexna chanaxã i maxü i taguma gúxü. Rü ñaã maxü rü Chaunegagu pexü nangẽxma”, ñanagürü. ¹² Yíxema nüxü yaxõxë ya Tupana Nane rü tüxü nangẽxma i ngẽma maxü i taguma gúxü. Natürü yíxema tama nüxü yaxõxë ya yima Tupana Nane rü tama tüxü nangẽxma i ngẽma maxü.

Cuáü rü ñuxre ga norü ucuxẽmaã inayacuèxëẽ ga norü popera

¹³ Pa Chaueneẽgüx ya Tupana Naneãxü Yaxõgüxex, pexcèx chanaxümatü i ñaã ore na nüxü pecuáxücèx na pexü nangẽxmaxü i ngẽma maxü i taguma gúxü. ¹⁴ Rü ngẽmacèx tama taxãneẽ na nüxna ingaicamagüxü ya Tupana. Rü nüxü tacuèxgü ega tacücèx nüxna icaxgu, rü nüma tüxü naxĩnü i ngẽxguma norü ngúchaü yixĩgu i ngẽma naxcèx nüxna icaxü. ¹⁵ Rü ngẽxguma nüxü icuèxgu na nüma tüxü naxĩnüxü i ngẽxguma tacücèx nüxna icaxgu, rü nüxü tacuèx ta na tüxna naxããxü i ngẽma naxcèx nüxna icaxü. ¹⁶ Rü ngẽxguma chi texé nüxü dèuxgu i tümaẽneẽ na pecadu naxüxü, rü name nixĩ na naxcèx tayumüxexü ega tama pecadu i iyanatauxëẽxü yixĩgu. Rü Tupana tá nanamaxëẽ i ngẽma tümaẽneẽ ega tama pecadu i iyanatauxëẽxü yixĩgu. Nangẽxma i pecadu i tüxü iyarütauxëẽxü. Rü ngẽxguma ngẽma pecaduwe naxüãmagu i wüxi i peeneẽ, rü tama pemaã nüxü chixu na naxcèx peyumüxëgüxü. ¹⁷ Guxüma i chixexü i ixüxü, rü pecadu nixĩ. Natürü nangẽxma i pecadu i tama tüxü iyarütauxëẽxü. ¹⁸ Rü nüxü tacuèx, rü yíxema Tupanaxãcü ixixë, rü tama pecadu taxüecha, erü nüma ya Tupana Nane rü tüxna nadau. Rü taxuacüma tüxna nangaicama i ngoxo i Chataná i tüxü pecaduãxëẽchaüxü. ¹⁹ Nüxü tacuèxgü na Tupanaxãcügü ixigüxü, natürü guxüma i ñoma i naãnecüãx rü ngoxo i Chatanámxëwë nangẽxmagü. ²⁰ Rü nüxü tacuèx ta na ñoma ga naãnewa nanguxü ga Tupana Nane, rü tüxna nanaxã ga cuèx na nüxü icuèxgüxücèx ya yima aixcümaxüchi Tupana ixicü. Rü norü duüxügü tixigü ya yima aixcümaxüchi Tupana ixicü, erü Nane ya Ngechuchu ya Cristuarü duüxügü tixigü. Rü nüma ya Tupana Nane nixĩ i aixcümaxüchi Tupana yĩxü rü tüxna naxããxü i maxü i taguma gúxü. ²¹ Pa Chauxacügüx, ¡Pegüna pedaugü na tama nüxü peyaxõgüxücèx i tupanachicügü! Rü ngẽxĩcatama nixĩ i chorü ore i pemaã nüxü chixuxü.

Rü nuãma pexna,
Cuáü

NORŮ TAXRE GA POPERA GA CUÁŮ ŮMATŮXŮ

CuáŮrŮ moxĕ

¹ Pa ChaueneĕgŮ i YaxōgŮxe ya Tupana PexŮ Dexex, pexcĕx chanaxŮmatŮ i choma i CuáŮ i yaxōgŮxŮrŮ āĕxgacŮ na chiŮxŮ. Choma rŮ aixcŮma pexŮ changechaŮ. RŮ tama i chaxica, natŮrŮ guxŮma i ngĕma nŮxŮ cuĕxgŮxŮ i TupanaārŮ ore i aixcŮma ixŮxŮ, rŮ ngĕxgumarŮŮ ta pexŮ nangechaŮgŮ. ² PexŮ tangechaŮ erŮ toxrŮŮ nŮxŮ pecuĕxgŮ i ngĕma ore i aixcŮma ixŮxŮ i guxŮgutáma tawa ngĕxmaxŮ. ³ RŮ nŮma ya TanatŮ ya Tupana rŮ Nane ya Ngechuchu ya Cristu rŮ poraācŮ tá pexŮ narŮngŮxĕĕgŮ rŮ nŮxŮ pengechaŮtŮmŮgŮ rŮ pexŮ nataāĕxĕĕgŮ, erŮ nŮxŮ pecuĕx i ngĕma ore i aixcŮma ixŮxŮ rŮ pegŮ pengechaŮgŮ. ⁴ RŮ poraācŮ chataāĕ ga yexguma nŮxŮ chadĕxgu na űuxācŮ űuxre i petanŮxŮgŮ rŮ aixcŮma meā naga na naxűnŮxŮ i ngĕma ore i aixcŮma ixŮxŮ, yema TanatŮ ya Tupana tŮxŮ muxŮrŮŮ. ⁵ RŮ űuxmax, Pa ChaueneĕgŮ ya PexŮ ChangechaŮgŮxex, rŮ pexna nŮxŮ chacuĕxāchixĕĕ na namexŮ na yigŮ ingechaŮgŮxŮ. RŮ ngĕma rŮ tama wŮxi i ngexwacaxŮxŮ i TupanaārŮ mu nixŮ. NatŮrŮ yematama nixŮ ga mu ga noxriarŮ ŮgŮgumama Tupana tŮxna āxŮ. ⁶ Ngĕxguma TupanaxŮ ingechaŮgŮgu, rŮ tanaxŮ i guxŮma i ngĕma tŮxŮ namuxŮ. ErŮ nŮma rŮ noxriarŮ ŮgŮgumama tamaā nŮxŮ nixu na yigŮ ingechaŮgŮxŮcĕx i wŮxichigŮ.

OrearŮ uruŮgŮ i womŮxĕĕruŮchiga

⁷ GuxŮwama i űoma i naānewa rŮ nanaxűāne i muxŮma i womŮxĕĕruŮgŮ ixűgŮxŮ. RŮ nŮxŮ nixuchigagŮ na tama Tupana duŮxŮxŮ yaxűxĕĕxŮ ga Ngechuchu ya Cristu. RŮ ngĕma ngĕmaācŮ idexaxŮ, rŮ wŮxi i womŮxĕĕruŮ nixŮ, rŮ CristuarŮ uwanŮ nixŮ. ⁸ ¡pexuāĕgŮ na taxŮema pexŮ womŮxĕĕgŮxŮcĕx rŮ na tama natŮcĕxma yűxŮcĕx i tŮrŮ puracŮ! ¡NatŮrŮ meā peyaxōgŮama na aixcŮma penayaxuxŮcĕx i guxŮma i ngĕma Tupana pexna āxchaŮxŮ! ⁹ RŮ yűxema nangupetŮxĕĕxĕ ga yema Cristu tŮxŮ ngŮxĕĕxŮ, rŮ tama aixcŮma TupanaxŮ tacuĕx. NatŮrŮ yűxema tama nŮxna íchoxŮxĕ ga yema Cristu tŮxŮ ngŮxĕĕxŮ, rŮ aixcŮma nŮxŮ tacuĕx ya TanatŮ ya Tupana rŮ Nane ya Ngechuchu. ¹⁰ RŮ ngĕxguma chi wŮxi i duŮxŮ petanŮwa nguxgu rŮ tama yema Cristu tŮxŮ ngŮxĕĕxŮmaā pexŮ nangŮxĕĕgu, rŮ ¡tāŮtáma penayaxu i pechiŮwa rŮ bai i nŮxŮ perŮmoxĕgŮ! ¹¹ ErŮ ngĕxguma wŮxie tŮmachiŮwa nayauxgu, rŮ tananaāĕraxŮ rŮ natanŮxŮ tŮgŮ tixűxĕĕ nawa i ngĕma norŮ chixexŮ.

CuáŮrŮ ore ga nawa iyacuáxŮ

¹² ChoxŮ nangĕxma i muxŮma i to i ore i pemaā nŮxŮ chixuxchaŮxŮ. NatŮrŮ tama chanaxwĕxe na űaā poperawa pemaā nŮxŮ chixuxŮ, erŮ paxa tá petanŮwa íchayadauxchaŮ na chomatama pemaāxŮchi nŮxŮ chixuxŮcĕx na ngĕmaācŮ wŮxigu aixcŮma itaāĕgŮxŮcĕx. ¹³ RŮ ngĕma nuā natanŮwa changĕxmaxŮ i yaxōgŮxŮ i peeneĕgŮ ixűgŮxŮ i Tupana dexŮ, rŮ pexŮ narŮmoxĕgŮ. RŮ ngĕxĭcatama nixŮ i chorŮ ore i pemaā nŮxŮ chixuxŮ.

RŮ nuāma pexna,
CuáŮ

NORŮ TOMAĚXPŮX GA POPERA GA CUÁŮ ŮMATŮXŮ

CuáŮ rŮ Gayumaã nataãe

¹ Pa Chaueneẽ, Pa Gayu i Aixcŭma CuxŮ ChangechaŮxẽx, rŮ cuxcèx chanaxŭmatŭ i choma i CuáŮ i yaxõgŭxŮãrŮ ãẽxgacŭ na chiŮxŮ. ² Pa Chaueneẽx, Tupanana chaca na meã cuxna nadauxŭcèx i curŮ maxŭwa rŮ cuxunewa, ngẽma curŮ õwa cuxna na nadauxŭrŮŮ. ³ RŮ poraãcŭ chataãe ga yexguma núma naxŮxgu ga ñuxre ga taeneẽgŭ, rŮ chomaã nŭxŮ yaxugŭgu ga cuchiga na ñuxãcŭ meã cuyaxõxŮ i TupanaãrŮ ore i aixcŭma ixŮxŮ, rŮ guxŭguma meã naga na cuxŮnŭxŮ. ⁴ RŮ guxŭguma chataãẽxŮchi i ngẽxguma nŭxŮ chaxŮnŭgu na ñuxãcŭ TupanaãrŮ ore nŭxŮ ixuxŮãcŭma meã namaxẽxŮ i chaux-acŭgŭ. RŮ aixcŭma nataxuma i to i taãe i ngẽmaãrŮ yexera ixŮxŮ. ⁵ Pa Chaueneẽ i CuxŮ ChangechaŮxẽx, mexŮ cuxŮ erŮ nŭxŮ curŭngŭxẽe i ngẽma togŭ i taeneẽgŭ i toxnamana ne ŮxŮ i cuxŮtawa ngugŭxŮ. ⁶ RŮ nŭmagŭ rŮ nuã nangugŭ, rŮ torŮ ngutaquẽxepataŮwa nŭxŮ nixugŭe na ñuxãcŭ nŭxŮ cungechaŮxŮ rŮ namaã cumecŭmaxŮ. RŮ chanaxwèxe i nŭxŮ curŭngŭxẽe i ngẽma taeneẽgŭ i ngẽxguma wena cuxŮtawa nangugŭgu. RŮ ngẽxguma cuxna íyaxŮxgu rŮ ;nŭxna naxã i tacŭ i nŭxŮ taxuxŮ i norŮ namawaŮ! ErŮ TupanaãrŮ me nixŮ na ngẽmaãcŭ nŭxŮ rŭngŭxẽẽxŮ i norŮ orearŮ uruŭgŭ. ⁷⁻⁸ RŮ nŭmagŭ, rŮ Ngechuchu ya CristuarŮ puracŭ nixŮ i naxŭgŭxŮ, rŮ ngẽmacèx norŮ oremaã nanaxŮãne. NatŮrŮ tama nanayauxgŭ i ngẽma tama yaxõgŭxŮãrŮ ngŭxẽe, rŮ ngẽmacèx name nixŮ i yixema na nŭxŮ rŭngŭxẽẽgŭxŮ na ngẽmaãcŭ yixema rŮ ta wŭxigu namaã naxŭgŭxŮcèx i TupanaãrŮ puracŭ.

Diótepe rŮ chixexŮ naxŮ natŮrŮ Demétriu rŮ mexŮ naxŮ

⁹ Choma rŮ marŮ chanaxŭmatŭ i wŭxi i popera naxcèx i ngẽma tupaucatanŭxŭgŭ i curŮ íãnewa ngẽxmagŭxŮ. NatŮrŮ núma i Diótepe rŮ tama naga naxŮnŭchaŮ i ngẽma nŭxŮ tixuxŮ, erŮ nanaxwèxe na nŭmatama namuãxŮ i ngẽma tupaucatanŭxŮ. ¹⁰ RŮ ngẽxguma ngema chaxŮxgu rŮ tá nŭxŮ chaxoregŭ erŮ tochiga i chixexŮmaã inayarŭdexasexŮ. RŮ woo tomaã na ngexŮ nawagŭxŮ, rŮ naetŭwa to i chixexŮ naxŮ, erŮ tama nanayauxchaŮ i ngẽma taeneẽgŭ i ngẽma ngugŭxŮ. RŮ nanachŭxu na texé nayaxuxŮ i ngẽma taeneẽgŭ. RŮ yixema nayauxchaŮxẽ, rŮ ngutaquẽxepataŮwa tŭxŮ ínawoxŮ. ¹¹ Pa Chaueneẽ i CuxŮ ChangechaŮxẽx, ;TãxŮ i nŭxŮ cuyadauxŮxŮ i ngẽma togŭ i chixexŮ ŭgŭxŮ! NatŮrŮ name nixŮ i nŭxŮ cuyadauxŮ i ngẽma mexŮ ŭgŭxŮ. ErŮ yixema guxŭguma mexŮ ŭxe rŮ Tupanaxãcŭ tixŮ. NatŮrŮ yixema chixexŮ ŭechaxe rŮ tama TupanaxŮ tacuèx. ¹² Guxŭma i duŮxŭgŭ nŭxŮ ixuxgu i Demétriu rŮ wŭxi ya mecŭ nixŮ. RŮ toma rŮ ta nŭxŮ tacuèx na meã naga naxŮnŭxŮ i TupanaãrŮ ore i aixcŭma ixŮxŮ. RŮ ngẽmacèx toma rŮ ta nŭxŮ tixu na aixcŭma mecŭ yŮxŮ. RŮ cuma nŭxŮ cucuèx na aixcŭma na yŮxŮ i ngẽma nŭxŮ tixuxŮ.

CuáŮãrŮ ore ga nawa iyacuáxŮ

¹³ Choma choxŮ nangẽxmachirẽx i muxŭma i chorŮ ore i cumaã nŭxŮ chixuxchaŮxŮ, natŮrŮ tama ñãã poperagu cuxcèx chanaxŭmatŭchaŮ. ¹⁴ ErŮ choma rŮ paxa ngẽma chaxŮxchaŮ, rŮ ngẽxguma rŮ meã tá yigŭmaã tidexagŭ. ¹⁵ ;Meã cuxŮ naxŮpetŭ rŮ tãxŮ i cuxoegaãẽxŮ! Tamŭcŭgŭ i númacŭãx rŮ moxẽ cuxcèx ngẽma namugŭ. RŮ chanaxwèxe i nŭxŮ curŭmoxẽ i wŭxichigŭ i tamŭcŭgŭ i ngẽma ngẽxmagŭxŮ. RŮ ngẽxŮcatama nixŮ i chorŮ ore i cumaã nŭxŮ chixuxŮ.

RŮ nuãma cuxna,
CuáŮ

POPERA GA YUDA ÜMATÜXÜ

Yema yaxõgüxü narümoxë ga Yuda

¹ Pa Yaxõgüxü i Guxüwama Ngëxmagüxü, choma i Yuda nixi i pexcëx chanaxümatüxü i ñaã popera. Rü choma nixi i Chaütiágueneë chiixü, rü Ngechuchu ya Cristuarü duüxü chixi. Rü pexcëx chanaxümatü i pema na Tanatü ya Tupana pexü dexü rü pexü ngechaüxü rü Ngechuchu ya Cristu pexna dauxü. ² Rü pexcëx chayumüxë na guxüguma Tupanaãxü pengechaütümüügüxcëx, rü pexü nataãxëëgüxcëx, rü pexü nangechaüxcëx.

Duüxügü i doramaã ngüxëëtaegüxüchiga

³ Pa Chaueneëgü ya Pexü Changechaügüxex, noxri rü poraãcü choxü nangüchaü na pexcëx chanaxümatüxü nachiga i ngëma maxü i taguma gúxü i tüxü ngëxmaxü. Natürü ñuxma na petanügu nachocuxü i ñuxre i duüxügü i íyatoxëëgüchaüxü i Tupanaärü ore, rü ngëmacëx chanaxwëxe na pexcëx chanaxümatüxü na pexü chaxucüxëxcëx rü ípenapoxüxcëx i ngëma ore i aixcüma ixixü ga nuxcüma wüxicanatama Tupana norü duüxügüna äxü. ⁴ Rü ngëma duüxügü i pexü nawomüxëëcüma petanügu chocuxü nixi i pexü ngüxëëxü rü ñaxü:

“Tupana rü namecümáxüchi rü ngëmacëx täütáma pexü napoxcue ega woo chixri pemaxëgu”, ñaxü. Rü ngëxgumarüü ta tama nüxü nacuëxgüchaü ya tórü Cori ya Ngechuchu ya Cristu ya tórü yora ixicü. Natürü ngëma duüxügü i ngëmaãcü maxëxü, rü woetama nuxcü mama Tupanaärü ore i ümatüxüwa rü marü nüxü nixu na Tupana tá napoxcuxü.

⁵ Rü woo na marü nüxü pecuáxü natürü pexna nüxü chacuëxächixëëchaü na ñuxãcü namaã nangupetüxü ga yema nuxcümaügüxü ga Yudiügu ga Moíchewe rüixü. Rü tórü Cori ya Tupana rü poraãcü nüxü narüngüxëë na Equituanewa ínangüxcëx, natürü yixcama rü nanadai ga yema tama naga ñnüëchaüxü. ⁶ Rü ngëxgumarüü ta pexna nüxü chacuëxächixëë na ñuxãcü namaã nangupetüxü ga yema daxücüãx ga orearü ngeruügü ga noxri ixüünechiréxü natürü yixcama nagagutama pecadu ügüxü. Rü yemacëx ga Tupana rü ëänexüwa nanawogü, rü ngëxma nanapoxcue ñuxmatáta nawa nangu i ngëma ngunexü i nagu tüxü yacagüxü. ⁷ Rü yexgumarüü ta nüxü nangupetü ga guma ñänegü ga Chodoma rü Gomora rü guma ñänegü ga norü ngaicamagugüne. Yerü guma ñänecüãxgü, rü poraãcü chixri nügümaã namaxë, rü yemacëx ga Tupana rü üxümaã ínanagu. Rü yemaãcü inayanaxoxëë ga guma ñänegü na yemawa tüxü nüxü nacuëxëxüxcëx na nangëxmaxü i wüxi i poxcü naxcëx i guxüma i ngëma chixexü ügüxü.

⁸ Natürü woo ngëmaxü na nacuëxgüxü i ngëma idoraexü i petanügu chocuxü, natürü norü chixexüga narüxñüëãma. Rü poraãcü chixri nügümaã namaxë, rü tama tórü Cori ya Tupanaga naxñüëchaü, rü chixri Tupanaärü orearü ngeruügü i daxücüãxchigagu nidexagü. ⁹ Rü ngëma duüxügü rü naëchitamare nidexagü rü tama Tupanaärü orearü ngeruü ga Miguérerüü nügüna nadau i norü orewa. Rü guma Miguére rü woo guxü i Tupanaärü orearü ngeruügü i daxücüãxärü äëxgacü na yixü, natürü tama ngoxo ga Chatanámaã naguxchiga ga yexguma Moíchëxüncëx yema nügümaã yaporagatanücüxgu, na nüxü nacuëxgüxcëx na texéarü tá yixü ga Moíchëxüne. Natürü nüma ga Miguére rü ñanagürümare:

“Cori ya Tupana tá cuxü nanga”,

ñanagürümare. ¹⁰ Natürü ngëma duüxügü i doramaã i petanügu chocuxü, rü tama Tupanaxü nacuëxgüãcüma chixri nachiga nidexagü, rü chixri norü orearü ngeruügü i daxücüãxchiga nidexagü. Rü ñoma naëxügürüü naxüneärü ngüchaüwemare narüxü, rü ngëmaãcü namaxë. Natürü ngëma chixexü i naxügüxcëx, rü Tupana tá nanapoxcue.

¹¹ Rū wūxi i ngechaŭxŭchi nixī naxcèx i ngēma duŭxŭgŭ erŭ ngēmaācŭ namaxē. Rū Caī ga naēneēxŭ imáxŭrŭŭ nixīgŭ. Rū āēxgacŭ ga Baráŭrŭŭ dīerucèx chixexŭ naxŭgŭ. Rū Corérŭŭ tama Tupanaga naxīnŭēchaŭ, rŭ ngēmacèx Tupana tá nanapoxcue. ¹² Rŭ ngēxguma tupaucawa tórŭ Coriarŭ ōnacèx pengutaquēxegŭgu, rŭ wūxi i ānexŭchi nixīgŭ. Erŭ narŭcutanŭxŭ, rŭ poraācŭ nachibŭe rŭ naxaxegŭ, rŭ nŭgŭguxicatama narŭxīnŭē. Rū űoma caixanexŭ i ngearŭ pucŭāxŭ i paanexŭētŭwa ũpetŭxŭ natŭrŭ tama nanetŭxŭ ixaiyagŭxŭrŭŭ taxuwama nime. Rŭ ngēma nanetŭgŭ i ngēxguma norŭ owa nanguxgu rŭ tama ixoxŭrŭŭ nixīgŭ. Rŭ űoma naīgŭ i guxŭma i naxchŭmèxāmaā napuxŭ rŭ yuxuchixŭrŭŭ taxuwama nime i ngēma duŭxŭgŭ. ¹³ Rŭ űoma yuape i taxŭ i norŭ chixixŭ i āŭāchixŭ naxānacŭwa yataxŭrŭŭ nixīgŭ, erŭ poraācŭ chixexŭ naxŭgŭ. Rŭ űoma woramacurīgŭ ya nu ne naxīmarecŭrŭŭ nixīgŭ. Natŭrŭ Tupana rŭ marŭ namaā nanaxuegu na ngēma waanexŭchixŭwa guxŭgutáma nawogŭāxŭ. ¹⁴⁻¹⁵ Rŭ nuxcŭmaŭcŭ ga Enó ga Adáŭtaa ixīcŭ rŭ ngēma duŭxŭgŭchiga nidexa ga yexguma Tupana yadexaxēēgu, rŭ űanagŭrŭ:

“Rŭ nŭxŭ chadau ya Cori ya Tupana na muxŭchixŭ i norŭ orearŭ ngeruŭgŭ i daxŭcŭāxmaā núma ũcŭ na duŭxŭgŭna naçaxŭcèx i norŭ maxŭchiga rŭ napoxcueāxŭcèx i guxŭma i ngēma duŭxŭgŭ i chixexŭ ũgŭxŭ rŭ namaā guxchigagŭxŭ”, űanagŭrŭ. ¹⁶ Rŭ ngēma duŭxŭgŭ rŭ űacŭcèx idexagŭwèxexŭchixŭ nixīgŭ, rŭ űoguāxŭ ixuxwèxegŭxŭchixŭ nixīgŭ. Rŭ noxrŭtama ngŭchaŭcèx daugŭxŭ nixīgŭ. Rŭ nŭgŭ icuèxŭŭgŭxŭ nixīgŭ. Rŭ nŭmaxŭ meā tŭmachiga nidexagŭneta ya duŭxègŭ, na tŭmaxŭtawa űacŭ na nayauxgŭxŭcèxmare.

Yuda nayaxucuxēgŭ ga yema yaxōgŭxŭ

¹⁷ Pa Chaueneēgŭ ya Pexŭ Changechaŭgŭxex, űnŭxna pecuèxāchie ga yema ore ga pemaā nŭxŭ yaxugŭgŭxŭ ga tórŭ Cori ya Ngechuchu ya Cristuarŭ ngŭexŭgŭ ga imugŭxŭ! ¹⁸ Rŭ nŭmagŭ rŭ űanagŭrŭgŭ pexŭ:

“Ngēxguma nagŭxchaŭgu i naāne rŭ tá nangēxma i duŭxŭgŭ i tá nŭxŭ cugŭexŭ i Tupanaārŭ ore rŭ noxrŭtama ngŭchaŭ i chixexŭgumare maxēxŭ”, űanagŭrŭgŭ pexŭ. ¹⁹ Rŭ ngēma duŭxŭgŭ nixī i pexŭ itoyexŭ na tama wŭxigu perŭxīnŭēxŭcèx rŭ tama meā peyaxōgŭxŭcèx. Rŭ nŭmagŭ rŭ naxŭneārŭ ngŭchaŭwe narŭxī, rŭ tama nawa nangēxma i Tupanaāē i ũŭnexŭ. ²⁰ Natŭrŭ pemax, Pa Chaueneēgŭ ya Pexŭ Changechaŭgŭxex, űrŭ pegŭ perŭngŭxēēx na guxŭguma yexeraācŭ nagu pexīxŭ rŭ peyaxōgŭxŭ i ngēma ore i ũŭnexŭ i marŭ peyauxgŭxŭ! űRŭ guxŭguma Tupanaāē i ũŭnexŭārŭ ngŭxēēmaā peyumŭxēgŭ! ²¹ űRŭ guxŭguma nagu pexī i ngēma Tupanaārŭ ngechaxŭ! űRŭ meā ípenanguxēēx i ngēma ngunexŭ i nagu tá núma naxŭxŭ ya tórŭ Cori ya Ngechuchu ya Cristu na nŭxŭ ingechaŭtŭmŭŭgŭācŭma tŭxna naxāāxŭcèx i maxŭ i taguma gŭxŭ! ²² űRŭ pexŭ nangechaŭtŭmŭŭgŭ i ngēma tama aixcŭma yaxōgŭxŭ, rŭ nŭxŭ perŭngŭxēēgŭ na meā yaxōgŭāxŭcèx! ²³ Rŭ togŭ, űrŭ paxa norŭ pecaduwa ípenayaxuchi na namaxēxŭcèx rŭ tama yima ũxŭ ya Tupana mexēnegu yanatauxexŭcèx! Rŭ woo ngēma tama yaxōgŭchaŭxŭ, űrŭ pexŭ nangechaŭtŭmŭŭgŭ! űNatŭrŭ pegŭna pedaugŭ na tama norŭ chixexŭgu peyixŭcèx! Rŭ ngēma norŭ chixexŭ i pexcèx mexcŭraxŭxŭ, űrŭ nŭxŭ pexo!

Tupanaxŭ yacuèxŭŭācŭma inayacuèxē ga norŭ popera

²⁴⁻²⁵ Rŭ yima wŭxitama ya Tupana ya tórŭ Maxēēerŭŭ ixīcŭ, rŭ nŭxŭ nangēxma i pora na pexna nadauxŭcèx na tama pecadugu peyixŭcèx. Rŭ nŭxŭ nangēxma i pora na íyanaxoxēēāxŭcèx i guxŭma i perŭ chixexŭgŭ na petaāēgŭācŭma nŭgŭpēxewa pexŭ nagagŭxŭcèx i ngextá āēxgacŭ íyīxŭwa. Rŭ ngēmacèx tanaxwèxe i tórŭ Cori ya Ngechuchu ya Cristuégagu Tupanaxŭ ticuèxŭŭgŭ, erŭ núma rŭ guxŭārŭ yexera name rŭ naporá, rŭ guxŭētŭwa nangēxma, rŭ guxŭmaā inacuèx. Rŭ yemaācŭ nixī ga nuxcŭmaxŭchima, rŭ ngēmaācŭ nixī i űuxmax, rŭ guxŭgutáma ngēmaācŭ yīŭ.

Rü nuãma pexna,
Yuda

YEMA CUÁÜ NÜXÜ DAUXÜ I YIXCÜRA TÁ NGUPETÜXÜCHIGA

Ore ga Cuáüxü nüxü nacuèxëxü ga Ngechuchu ga Cristu

¹ Ñaã nixĩ i ngëma ore ga Tupana Ngechuchu ya Cristuxü nüxü cuèxëxü na nüxĩ norü duüxügüxü nüxü nacuèxëxüçèx i ngëma paxa tá ngupetüxü. Rü nüma ga Ngechuchu ya Cristu nixĩ ga norü orearü ngerüü ga daxüçüãxü namuxü na norü duüçü ga Cuáümaã nüxü na yaxuxüçèx. ² Rü choma i Cuáü chixĩ ga aixcüma meãma nüxü chadauxü rü chanaxümatüxü ga guxüma ga yema Tupanaãrü ore ga Ngechuchu chauxçèx ngoxëxü. ³ Rü tataãe ya yixema duüxügüpëxewa nawa ngúxe i ñaã Tupanaãrü ore, rü ngëxgumarüü ta tataãegü ya yixema nüxü ñnüëxë rü naga ñnüëxë i ñaã ore i ümatüxü, erü paxa tá ningu i ngëma nüxü yaxuxü.

Cuáü nanaxümatü naxçèx ga yema 7 tücumü ga yaxögüxü ga Áchiaanewa yexmagüxü

⁴ Rü choma i Cuáü rü chanaxümatü i ñaã ore pexçèx i yaxögüxe ya yima 7 ya ñãne ya Áchiaarü naãnewa ngëxmagünewa ngëxmagüxe. Rü chanaxwëxe i pexü narüngüxëe rü pexü nataãëxëe ya yima Tupana ya woetama ngëxmaëchacü. Rü ngëxgumarüü ta chanaxwëxe i pexü narüngüxëe rü pexü nataãëxëe i ngëma Naãe i Üünexü i naxütawa ne üxü i perü dauruü ixixü i pema i yaxögüxe ya yima 7 ya ñãnewa na pengëxmagüxü. ⁵ Rü ngëxgumarüü ta chanaxwëxe na pexü nangüxëxü rü pexü nataãëxëxü ya Ngechuchu ya Cristu ga aixcüma meãma nüxü ixücü ga Tupanaãrü ore ga ñoma ga naãnewa. Rü nüma nixĩ ga nüxĩra yuwa ínadxü. Rü nüma rü guxüma i ñoma i naãnewa ngëxmagüxü i nachiüãneãrü ãëxgacügüarü ãëxgacü nixĩ. Rü nüma rü tüxü nangechaü, rü nagümaã tüxü inayanaxoxëe i tórü pecadugü. ⁶ Rü ñuxma na guxüãrü ãëxgacü yixü i nümax, rü tüxü naxüchica i ngextá nüma ãëxgacü íyixüwa. Rü paigüxü tüxü nixigüxëe na Nanatü ya Tupanaãxü ipuracüexüçèx rü nüxü icuèxüügüxüçèx. Rü name nixĩ i guxügutáma Cristuxü ticuèxüügü, erü nüma rü guxügutáma guxüãrü ãëxgacü nixĩ. Rü ngëmaãcü yĩ. ⁷ Rü dücax, marü ningaica na caixanexügu ínanguxü ya Cristu! Rü guxütáma i duüxügü nüxü nadau, rü woo ga yema nacanapacütüügüxü rü tá ta nüxü nadaugü. Rü guxü i duüxügü i guxü i nachiüãnecüãx i tama yaxögüxü rü norü muümaã rü norü ngechaümaã tá naxauxe i ngëxguma ínanguxgu i nümax. Rü aixcüma ngëmaãcü tá nixĩ. ⁸ Rü nüma ya tórü Cori ya Tupana ya guxüãrü ãëxgacü ixücü ya woetama ngëxmaëchacü, rü ñanagürü:

“Chowa nixĩ ga inaxügüxü ga guxüma, rü nataxuma i tacü i chorü yexera ngëxmaëchaxü”, ñanagürü.

Cuáüçèx nangox ga Cristu ya mexëchicü

⁹ Rü choma i Cuáü na pexçèx chanaxümatüxü i ñaã popera, rü peeneë chixĩ. Rü ngëma na Ngechuchuna na chaxüxü rü chaxãchica i ngextá nüma ãëxgacü íyixüwa. Rü Ngechuchuçèx pexrüü ngúxü chinge, natürü nüma pexü naporaexëxürüü choxü naporaxëe na yaxna namaã chaxñnüxüçèx i guxüma i ngëma ngúxü i choxü üpetüxü. Rü choma rü capaxü ga Pátmugu chapoxcu naxçèx na nüxü chixuxü ga Tupanaãrü ore ga Ngechuchuchiga. ¹⁰⁻¹¹ Rü wüxi ga yüxüarü ngunexügu rü Tupanaãe i Üünexü chomaã inacuèx, rü changoxetü rü choweama nüxü chaxñnü ga wüxi ga naga ga tagaxü ga ñoma cornetagarüü ixixü ga ñaxü choxü:

“Chowa nixĩ ga inaxügüxü ga guxüma, rü nataxuma i tacü i chorü yexera ngëxmaëchaxü. Rü ñuxma chanaxwëxe na wüxi i poperagu cunaxümatüxü i ngëma nüxü cudauxü. Rü ñuxüchi chanaxwëxe i ngëma yaxögüxü ya yima 7 ya ñãne ya Áchiaarü

naãnewa ngëxmagünewa ngëxmagüxütanüwa cunamu. Rü yima 7 ya ñãne nixĩ ya Epéchiu rü Esmira rü Pérgamu, rü Tiatíra rü Chardi rü Firadérfia rü Laodichéa”, ñanagürü. ¹² Rü chaugü íchidau na nüxü chacuáxcèx na tacü yĩxü ga yema chomaã idexaxü. Rü yexguma chaugü íchidèuxgu rü nüxü chadau ga 7 ga weraarü üruügü ga uirunaxcèx ixīgüxü. ¹³ Rü yema 7 ga weraarü üruügüarü ngäxütanüwa nüxü chadau ga wüxi ga duüxü ga chauxcèx nangechuchu ga duüxüxü ixïcüraüxü. Rü wüxi ga naxchiru ga máxümaã naxäxchiru. Rü wüxi ga goyexü ga uirunaxcèxmaã nigoyeremü. ¹⁴ Rü nayae rü nachoxochi ñoma tacü i choxochixürüü. Rü naxëtü rü ñoma üxüemarüü niyauracüü. ¹⁵ Rü nacutü rü ta niyauracüü ñoma cobrexüchi i meãma ípixürüü. Rü yexguma yadexagu rü natagaxüchi ñoma taxü i dexá i chuxchuxü ägaxürüü. ¹⁶ Rü norü tügünemëxëwa nüxü nayexma ga 7 ga woramacurigü. Rü naãxwa nayexma ga wüxi ga tara ga guxücüwawa téxü. Rü nachiwe rü ñoma üèxcü poraãcü nguxetügurüü nixĩ. ¹⁷ Rü yexguma nüxü chadèuxgu, rü napëxegu chayangu ñoma chayuxürüü. Natürü ga nüma rü norü tügünemëxëmaã choxü ningögü, rü ñanagürü choxü:

“¡Tãxü i cumuüxü! Choma nixĩ i chaxira chayexmaxü rü guxügutáma changëxmaëchaxü. ¹⁸ Rü choma nixĩ i yuwa ícharüdaxü rü ñuxma rü chamaxü. Rü üpa rü chayü, natürü i ñuxma rü marü guxügutáma chamaxëcha. Rü choxmëxwa nangëxma na ñuxgu tá nayuxü i wüxichigü i duüxü. Rü ngëxgumarüü ta choma nixĩ i namaã ichacuáxü i ngëma nachica i ngextá ínangëxmagüxüwa i guxüma i duüxügü i yuexü. ¹⁹ Rü ñuxma rü chanaxwëxe i cunaxümatü i ngëma nüxü cudauxü. Rü ngëma nixĩ i ñuxma ngëma yaxögüxümaã ngupetüxü, rü ngëma yixcüra tá ngupetüxü. ²⁰ Rü ñuxma rü tá cuxcèx chanangoxëë i ngëma ëxügüxü i ngëma 7 i woramacurigü i chorü tügünemëxëwa nüxü cudauxüchiga rü ngëma 7 i weraarü üruügü i uirunaxcèxchiga. Rü ngëma 7 i woramacurigü i nüxü cudauxü, rü ngëma äëxgacügü i ngëma 7 tücümü i yaxögüxüetüwa ngëxmagüxüchiga nixĩ. Rü ngëma 7 i weraarü üruügü rü ngëma 7 tücümü i yaxögüxü i yima 7 ya ñãnewa ngëxmagüxüchiga nixĩ”.

2

Ore ga yema 7 tücümü ga yaxögüxüçèx ümatüxü Ore ga yema yaxögüxü ga Epéchiuarü ñãnewa yexmagüxüçèx ümatüxü

¹ “Rü ñuxma chanaxwëxe i ngëma Epéchiuwa ngëxmagüxü i yaxögüxüärü äëxgacüçèx cunaxümatü, rü ñacurügü nüxü: ‘Ñãã nixĩ i norü ore ya yima ngëma yaxögüxütanügu yarüxüüçü rü norü tügünemëxëmaã nüxna daucü i ngëma yaxögüxüärü äëxgacügü’. ² Rü ñanagürü i nümax:

‘Choma nüxü chacuèx i guxüma i ngëma cuxüxü. Rü nüxü chacuèx na ñuxäcü poraãcü choxü cupuracüxü rü ñuxäcü cunaxüamaxü i ngëma puracü woo ngëmacèx muxüma i guxchaxügü cuxcèx ínguxgu. Rü nüxü chacuèx na tama curü me yĩxü i ngëma duüxügü i chixexü ügüxü. Rü ngëxgumarüü ta nüxü chacuèx na meã cunangugüarü maxüäxü i ngëma duüxügü i nügü ixügüxü na Tupana imügüxü yixīgüxü natürü tama aixcüma ixīgüxü na Tupana yamügüxü. Rü cuma rü nüxü cucuèxama na idoratèëxmargüxü yixīgüxü. ³ Rü woo naguxcha i ngëma puracü i chauxcèx cuxüxü, natürü cunaxüama. Rü woo chaugagu poraãcü ngüxü na quingexü, natürü yaxna namaã cuxĩnü, rü tama nüxü curüchau. ⁴ Natürü nangëxma i wüxi i cuxüxü i tama chorü me ixixü. Rü ngëma nixĩ na tama noxrirüü choxü cungechaüxü i ñuxmax. ⁵ Rü ngëmacèx i ñuxma na ngëma chixexügu cunguxü, rü name nixĩ i nüxna cucuèxächi na ñuxäcü choxü cungechaüxü ga noxrix. Rü name nixĩ i nüxü curüxo i curü chixexü rü noxrirüü choxü cungechaüäcüma mexü cuxü. Natürü ngëxguma chi tama nüxü curüxoxgu i curü chixexü, rü paxa tá cuxü íchayadau, rü tá cuxü chaxo na tama ngëma togü i yaxögüxütanüwa cuxächicaxüçèx. ⁶ Natürü nangëxma i wüxi i cuxüxü i chorü me ixixü. Rü ngëma nixĩ na naxchi cuxaixü i ngëma chixexü i naxügüxü i ngëma Nicoraítagu. Rü choma rü ta naxchi chaxai i ngëma

chixexũ i naxügũxũ'. ⁷ Rũ yíxema ãchixexẽ rũ name nixĩ i naga taxĩnũ i ngẽma Tupanaãẽ i Üünexũ nüxũ ixuxũ namaã i ngẽma yaxõgũxũtũcumũgũ". Rũ ñanagürũ:

"Yíxema nüxũ rüporamaẽxẽ i chixexũ rũ tá tüxũ nüxũ chamuxnetaxẽẽ i norũ o i ngẽma orix i tüxũ maxẽxẽxũ i Tupanaãrũ orixnecüwa ngẽxmaxũ", ñanagürũ i Naãẽ i Üünexũ.

Ore ga yema yaxõgũxũ ga Esmiraarũ ãñewa yexmagũxũcèx ümatũxũ

⁸ Rũ yema chomaã idexaxũ rũ ñanagürũ ta:

"Chanaxwèxe i Esmirawa ngẽxmagũxũ i yaxõgũxũãrũ ãẽxgacücèx cunaxümatũ, rũ ñacurügũ tá: 'Ñãã nixĩ i norũ ore ya yima nüxĩra yexmacü rũ guxüguma ngẽxmaẽchacü ga paxaãchi yucü rũ wenaxarũ maxücü'. ⁹ Rũ ñanagürũ i nümax:

'Choma nüxũ chacuèx i guxũma i ngẽma cuxũxũ. Rũ nüxũ chacuèx na ñuxãcü ngúxũ quingexũ. Rũ nüxũ chacuèx na cungearũ dñeruãxũ i ñoma i naãnewa, natürũ daxüguxũ i naãnewa cuxũ nangẽxma i ngẽma taguma gúxũ. Rũ nüxũ chacuèx na ñuxãcü chixri cuchiga yadexagũxũ i ngẽma duũxügũ i nügũ ixugũxũ na Yudíugũ yixĩgũxũ. Natürũ i nümagũ rũ aixcũma Chatanáãrũ duũxügũmare nixĩgũ. ¹⁰ Rũ tãxũ i cumuũxũ naxcèx i ngẽma ngúxũ i tá quingexũ! Rũ ngoxo i Chataná rũ tá norũ duũxügũxũ namu na poxcupataũgu pexũ napoxcuexüçèx i ñuxre i pema na ngẽmaãcü pexũ naxüxüçèx. Rũ ñuxre i ngunexũ tá ngúxũ pingegũ. Natürũ woo ngẽmaãcü ngúxũ pingegũgu rũ chanaxwèxe i choxũ cuyaxõõma ñuxmatáta cuyux. Rũ choma rũ tá cuxna chanaxã i curũ ãmare i maxũ i taguma gúxũ'. ¹¹ Rũ yíxema ãchixexẽ rũ name nixĩ i naga taxĩnũ i ngẽma Tupanaãẽ i Üünexũ nüxũ ixuxũ namaã i ngẽma yaxõgũxũtũcumũgũ". Rũ ñanagürũ:

"Yíxema ñoma i naãnewa nüxũ rüporamaẽxẽ i chixexũ, rũ tãütãma Tupana ngoxogũxũ ípoxcuexũwa tüxũ nawogũ", ñanagürũ i Naãẽ i Üünexũ.

Ore ga yema yaxõgũxũ ga Pérgamuãrũ ãñewa yexmagũxũcèx ümatũxũ

¹² Rũ yema chomaã idexaxũ rũ ñanagürũ ta:

"Chanaxwèxe i Pérgamuwa ngẽxmagũxũ i yaxõgũxũãrũ ãẽxgacücèx cunaxümatũ, rũ ñacurügũ tá: 'Ñãã nixĩ i norũ ore ya yima nüxũ nangẽxmacü i ngẽma tara i guxüçüwawa téxũ'. ¹³ Rũ ñanagürũ i nümax:

'Choma nüxũ chacuèx na yima ãñe ya Chataná poraãcü namaã ícuáxũnewa na cumaxũxũ. Natürũ woo ngẽxma na cuxãchiũxũ, rũ tama choxũ ícutèx. Rũ woo yexguma chorũ orearũ uruũ ga mecü ga Atípaxũ yamèxgũgu nagu ga guma ãñe ga nawa Chataná duũxügũmaã ícuáxũne, rũ tama nüxũ curüxo na choxũ cuyaxõõmaxũ. ¹⁴ Natürũ nangẽxma i ñuxre i tacü i cuxũxũ i tama chorũ me ixĩxũ. Rũ ngẽma nixĩ na cugũxũtawã cunangẽxmagũxũẽxũ i ñuxre i curũ duũxügũ i tama nüxũ rüxoechaũxũ i ngẽma nguxẽẽtae ga nuxcũma Baráũ Yudíugũarũ ãẽxgacü ga Baráxũ namaã ucuxèxũ na chixexũgu Yudíugũxũ nayixẽẽxüçèx. Rũ yema Yudíugũ rũ yema ucuxègagu nawa naxĩ ga yema petagũ ga togũ ügũxũ naxcèx ga norũ tupanãnetachicünèxãgũ. Rũ yexgumarũ ta yema ucuxègagu nixĩ ga naĩ ga ngemaã namaxèxũ ga Yudíugũ. Rũ ñuxma i ñuxre i curũ duũxügũ i Pérgamuwa ngẽxmagũxũ rũ nagu naxĩ ga yema nuxcũmaũxũ ga nguxẽẽtae ga chixexũ, rũ tama nüxũ narüxoechaũ. ¹⁵ Rũ ngẽxgumarũ ta ngema cunangẽxmagũxũẽ i ñuxre i duũxügũ i tama nüxũ rüxoechaũxũ i ngẽma Nicoraítãgũarũ nguxẽẽtae i Baráũãrũ nguxẽẽtaeruũ chixexũ. ¹⁶ Rũ ngẽmacèx chanaxwèxe i nüxũ curüxo i ngẽma chixexũ. Rũ ngẽxguma chi tama nüxũ curüxoxgu, rũ paxã tá ngema cuxũtawã chaxũ rũ ngẽma tara i chauèxwa ngẽxmaxũmaã tá ngema duũxügũxũ chadai'. ¹⁷ Rũ yíxema ãchixexẽ rũ name nixĩ i naga taxĩnũ i ngẽma Tupanaãẽ i Üünexũ nüxũ ixuxũ namaã i ngẽma yaxõgũxũtũcumũgũ". Rũ ñanagürũ:

"Yíxema nüxũ rüporamaẽxẽ i chixexũ rũ tá tüxna chanaxã i pãũ i daxüçũãx. Rũ tá tüxna chanaxã ya wüxi ya nuta ya chócü i wüxi i naega i ngexwacaxũxũ nagu ümatũxũ. Rũ yíxema nayaxuxexicatama tixĩ ya nüxũ cuáxe i ngema naéga", ñanagürũ i Naãẽ i Üünexũ.

Ore ga yema yaxōgūxū ga Tiatíraarū ãñewa yexmagūxūcèx ùmatūxū

¹⁸ Rū yema chomaã idexaxū rū ñanagürü ta:

“Chanaxwèxe i Tiatírawa ngēxmagūxū i yaxōgūxūārū ãēxgacūcèx cunaxūmatū, rū ñacurūgū tá: ‘Ñãã nixī i norū ore ya yima Tupana Nane ya ñoma üxüemarūü iyauraxetücüücü rū nacutūgū rū ñoma cobre i meãma ípixūrūü ixīxūne’. ¹⁹ Rū ñanagürü i nūmax:

‘Choma nūxū chacuèx i guxūma i ngēma mexū i cuxūxū. Rū nūxū chacuèx na ñuxācü cumücūgūxū cungechaūxū, rū ñuxācü meãma choxū na cuyaxōxū, rū ñuxācü nūxū na curūngūxēēxū i ngēma togū i yaxōgūxū, rū ñuxācü yaxna namaã cuxīnūxū i guxchaxūgū. Rū nūxū chacuèx i ñuxma na noxriarū yexera cunaxūxū i ngēma cuxū chanaxwèxexū. ²⁰ Natürü nangēxma i wūxi i cuxūxū i tama chorū me ixīxū. Rū ngēma nixī na ngēma cunangēxmaxēēchaxū i ngēma ngexū i Yechabé i nūgū ixuxū na Tupanaārū orearū uruū na yīxū, natürü norū nguxēētaemaã chorū duūxūgūxū ngēma womūxēēxū na chixri namaxēxūcèx, rū na i ngēmaã inapēgūxūcèx, rū nangōxgūāxūcèx i ngēma ònagū i togū norū tupanetachicūnèxāgūcèx dèixū na ngēmamaã nūxū yacuèxūgūxūcèx. ²¹ Rū choma rū marū ngīxū íchananguxēē rū yaxna ngīmaã chaxīnū na nūxū naxoxūcèx i ngēma ngīcūma i chixexū, natürü tama inaxwèxe na nūxū naxoxū rū ínataāxū i ngēma ngīrū chixexū i naxūxū. ²² Rū ñuxma i ngēma nge rū tá ngīxū chidaawexēē na ngīrū ngürücarewa ngūxū yangexūcèx, rū ngēma duūxūgū i ngīmaã ipexū i ngēma nge rū nūmagū rū tá ta ngūxū na yangegūxūcèx ega tama nūxū naxoegu i ngēma chixexū i ngīmaã naxūgūxū. ²³ Rū tá chanadai i ngīxācügū i ngēma nge. Rū ngēmawa tá nūxū nacuèxgū i guxūma i yaxōgūxū na aixcūma nūxū chacuáxū i ngēma naāēwa nagu naxīnūxū i wūxichigū i duūxū. Rū wūxichigū i pemax rū tá pexū chanaxūtanū ngēma na ñuxācü pemaxēxūācüma rū ñuxācü penaxūxūācüma. ²⁴⁻²⁵ Natürü pemagū i Tiatíracūāx i tama nagu íxē i ngēma ngexūārū nguxēētae i chixexū rū taguma nawa ngúexe i ngēma ore i togū naxugūgu rū Chatanáārū ore i ēxūguxū ixīxū, rū pemaã nūxū chixu rū ngēma pexū chanaxwèxexū nixī na meã namaã penguxūgūxū rū naga pexīnūēxū i ngēma chorū ore ñuxmatáta íchangu i chomax. Rū ngēxīcatama nixī i pexū chanaxwèxexū. ²⁶ Rū yíxema nūxū rüporamaēgūxe i ngēma chixexū rū naxūgūamaxē i ngēma tūxū chanaxwèxexū ñuxmatáta tayuemare, rū tá chaugūxūtawa tūxū chaxūchica na wūxigu chomaã guxūārū ãēxgacū tixīgūxūcèx. ²⁷ Rū yema Chaunatū ãēxgacūxū choxū na ixīxēēxūrūü tá tūxna chanaxā i pora na guxū i nachīñānegūmaã taporaexūcèx. Rū ngēxguma ñoma i naānecūāx i duūxūgū tama tūmaga ínūēgu rū ñoma wūxi i tūxū ngīxū ipuxēēxūrūü tá namaã tixīgū rü poraācü tá tanapoxcue. ²⁸ Rū tá tūxna chanaxā ya yima woramacuri ya pēxmama nūxū idaucū’. ²⁹ Rū yíxema āchixexē rü name nixī i naga taxīnū i ngēma Tupanaāē i Üünexū nūxū ixuxū namaã i ngēma yaxōgūxūtücumūgū” ñanagürü.

3

Ore ga yema yaxōgūxū ga Chardiarū ãñewa yexmagūxūcèx ùmatūxū

¹ Rū yema chomaã idexaxū rū ñanagürü ta:

“Chanaxwèxe i Chardiwa ngēxmagūxū i yaxōgūxūārū ãēxgacūcèx cunaxūmatū, rū ñacurūgū tá: ‘Ñãã nixī i norū ore ya Tupana Nane ya Naāē i Üünexū nawa ngēxmacū ya yima 7 ya woramacuri nūxū ngēxmacū’. Rū ñanagürü i nūmax: ‘Choma nūxū chacuèx i guxūma i ngēma cuxūxū. Rū nūxū chacuèx ta rü woo guxūwama duūxūgū nūxū ixugūgu na Tupanacèx namaxēxū i ngēma yaxōgūxū i cuxūtawa ngēxmagūxū natürü tama aixcūma nixī i ngēma, erü ngēma yaxōgūxū rü tama aixcūma choxū nayaxōgū rü tama aixcūma chauxcèx namaxē. ² Rū name nixī i cuḃaixāchi rü cugū íquicuèx rü cuyangūxēē i ngēma íraxū i mexū i cuxū íyaxūxū i marū iyarūxoxchaūxū. Erü nūxū chadau rü ngēma cuxūxū rü tama Tupanapēxewa name. ³ Rū nūxna nacuèxāchi ga

yema nguxêetae ga mexû ga noxri nûxû cuxîñûxû rû cuyaxuxû, rû nagu ixû! ¡Rû nûxû rûxo i ngêma chixexû i cuxûxû! Natürü ngêxguma tama nûxû curûxoxgu i curû chixexû, rû ñoma wûxi i ngîtêxáxû i ngürüâchi ínguxürüü tá cuxûtawa chaxû. Rû tãütáma nûxû cucuêx na ñuxguacü yîixû. ⁴ Natürü ngema Chardiwa cuxû nangêxma i ñuxre i duûxûgü i mexû i tama ñoma i naãneârü chixexûmaã nügü âûâchiarü maxûâxgûxû. Rû nûmagü rû tá cómûxûmaã nixâxchiru rû ngêmaâcü tá chomaã inaxî, erü nûmagü rû duûxûgü i mexû i chauxcêx maxêxû nixîgü. ⁵ Rû yîxema nûxû rûporamaêgûxe i chixexû, rû tá cómûxûmaã tixâxchiru. Rû tãütáma nawa tûxû íchapiéga i ngêma chorü popera i nagu chayawügûxû i ngêma duûxûgü i nûxû nangêxmaxû i maxû i taguma gûxû. Rû Chaunatüpêxewa rû guxûma i norü orearü ngeruûgü i daxûcûâxgüpêxewa tá tûxû chixu na chorü duûxûgü tixîgûxû'. ⁶ Rû yîxema âchixêxê rû name nixî i naga taxîñü i ngêma Tupanaãe i Üünexû nûxû ixuxû namaã i ngêma yaxôgûxûtücumügü".

Ore ga yema yaxôgûxû ga Firadérfiarü ñãnewa yexmagûxûcêx ümatûxû

⁷ Rû yema chomaã idexaxû rû ñanagürü ta:

"Chanaxwêxe i Firedérfiawa ngêxmagûxû i yaxôgûxûârü âêxgacücêx cunaxümatü rû ñacurügü tá: 'Ñã nixî i norü ore ya yima Üünecü ya aixcûma Cristu ixîcû ya Dabîrûü âêxgacü ya tacü ixîcû ya nûxû nangêxmacü i pora na yawâxnaâxûcêx rû nawâxtaâxûcêx i daxûguxû i naãne. Rû ngêxguma texécêx yawâxnaãgu, rû taxucürüwama texé tûmachêxwa tanawâxta. Rû ngêxguma texêchêxwa nawâxtaãgu, rû taxucürüwa texé tûmacêx tayawâxna'. ⁸ Rû ñanagürü i nûmax:

'Choma nûxû chacuêx i guxûma i ngêma cuxûxû. Rû dücax, cuxû chanatauxchaxêe na togûmaã nûxû quixuxûcêx i chorü ore, rû taxucürüwa texé cuxna tanachuxu na cunaxûxûcêx i ngêma puracü. Rû choma nûxû chacuêx na tama aixcûma cuporaxûchixû, erü noxretama nixî i ngêma yaxôgûxû i cuxûtawa ngêxmagûxû. Natürü cuma rû naga cuxîñü i chorü ore, rû tama icuyacux na chorü duûxû quiixû. ⁹ Rû ngêmacêx i ngêma duûxûgü i Chatanáarü ixîgûxû i nügü ixugûxû na chorü duûxûgü yixîgûxû natürü tama aixcûma choxrü ixîgûxû, rû tá chanamu na cupêxegu nacaxâpûxügûxûcêx na nûxû nacuêxgûxûcêx na aixcûma cuxû changechaûxû. ¹⁰ Cuma rû meãma cuyanguxêe i ngêma cuxû chamuxû na aixcûma cuyaxôômaxû naetüwa i ngêma guxchaxûgü i cuxû ngupetûxû. Rû ngêmacêx tá cuxû íchapoxû na tama cuxna nanguxûcêx i ngêma guxchaxû i taxû i ñoma i naãnewa tá ínguxû na guxûma i ñoma i naãnecûâx i duûxûgûxû naxûxûcêx. ¹¹ Rû paxa tá ngema cuxûtawa chaxû. Rû chanaxwêxe i ñuxma meã cumaxûxûrûü meã cumaxecha, na taxúema cuxna napuxûcêx i ngêma curü âmare. ¹² Rû yîxema nûxû rûporamaêgûxe i guxûma i chixexû, rû Chaunatü ya Tupanaxûtawa tá tûxû changêxmagûxêe na tagutáma ngema ítachoxûxûcêx. Rû tûmagu tá chanaxümatü i naega ya Chaunatü ya Tupana. Rû ngêxgumarüü tá ta tûmagu chanaxümatü i naega ya Tupanaârü ñãne ya Yerucharéu ya ngexwacaxûne ya Tupanaxûtawa i daxûguxû i naãnewa írûixûñe. Rû ngêxgumarüü tá ta tûmagu chanaxümatü i chauéga i ngexwacaxûxû'. ¹³ Rû yîxema âchixêxê rû name nixî i naga taxîñü i ngêma Tupanaãe i Üünexû nûxû ixuxû namaã i ngêma yaxôgûxûtücumügü".

Ore ga yema yaxôgûxû ga Laodichéawa yexmagûxûcêx ümatûxû

¹⁴ Rû yema chomaã idexaxû rû ñanagürü ta:

"Chanaxwêxe i Laodichéawa ngêxmagûxû i yaxôgûxûârü âêxgacücêx cunaxümatü rû ñacurügü tá: 'Ñã nixî i norü ore ya yima aixcûma ixîcû ya aixcûma yanguxêêcû i ngêma nûxû yaxuxû rû ore i aixcûma ixîxûxûxicatama ixucü. Rû nûma nixî ga inaxügûãxû ga guxûma ga yema Tupana üxû'. ¹⁵ Rû ñanagürü i nûmax:

'Choma nûxû chacuêx i guxûma i ngêma cuxûxû. Rû nûxû chacuêx na tama wûxi i duûxû i chauxchi aixû quiixû, natürü tama wûxi i duûxû i aixcûma choxû ngechaûxû quixî. Rû chierü noxtacûma wûxi i duûxû i chauxchi aixû quixîgu rû êxna noxtacûma

wüxi i duũxũ i aixcũma choxũ ngechaũxũ quixĩgu. ¹⁶ Natürü ñuxma na írarüwatama choxũ cungechaũxũ, rü ngẽmacèx tá cuxũ íchatèx. Erü tama noxtacũma wüxi i duũxũ i chauxchi aixũ quixĩ rü tama noxtacũma wüxi i duũxũ i aixcũma choxũ ngechaũxũ quixĩ. ¹⁷ Rü cuma cugũ quixuxgu rü cumuãrũ dîeruãx, rü cumuãrũ ngẽmaxũãx, rü meãma cuxũ naxüpetü, rü taxuũma cuxũ nataxu. Natürü i cuma rü tama nüxna cucuèxãchi na chopèxewa rü wüxi i taxuwama mexũ quiĩxũ, rü wüxi i ngechaũxũchi quiĩxũ, rü wüxi i taxuũma cuxũ ngẽxmaxẽ quiĩxũ, rü ñoma wüxi i ngexetüxürüü quiĩxũ, rü ñoma wüxi i ngexchiruxürüü quiĩxũ. ¹⁸ Rü ñuxma rü cuxũ chaxucuxẽ na chauxütawa naxcèx cutaxexüçèx i uiru i marü üxüwa iguxũ i nüxĩcatama ixĩxũ. Rü ngẽmaãcü tá aixcũma cuxũ nangẽxma i curü ngẽmaxũ. Rü ngẽxgumarüü ta cuxũ chaxucuxẽ na chauxütawa naxcèx cutaxexüçèx i cuxchiru i cómuxũ na ngẽmagu quicúxüçèx na taxúema cuxũ dauxüçèx na cungechiruxũ. Rü ngẽxgumarüü ta cuxũ chaxucuxẽ na chauxütawa naxcèx cutaxexüçèx i curü mèixètüxũ na curümexètüxüçèx na wena quidauchixüçèx. ¹⁹ Choma rü tüxũ chaxucuxẽ rü tüxũ ichayarüwèxãchixẽẽ ya guxãma ya yíxema tüxũ changechaũxẽ. Rü ngẽmacèx name nixĩ i nüxũ curüxo i cucũma i chixexũ, rü aixcũma choxũ cungechaũ rü cunaxü i ngẽma cuxũ chanaxwèxexũ. ²⁰ Rü dücax, choma rü ìãxwa tümacèx chacagüecha. Rü ngẽxguma chi texé choxũ ñügu rü chauxcèx tayawãxnagu, rü tá tümaxütagu chaxücu. Rü tümamaã tá chachibü rü tüma i chomaã. ²¹ Rü yíxema nüxũ rüporamaègüxe i chixexũ, rü tá chaugüxütawa tüxũ charütogüxẽẽ na chomaã ãëxgacü tixĩgüxüçèx, yexgumarüü ga choma rü nüxũ na charüporamaèxũ ga chixexũ, rü ñuxũchi Chaunatüxütawa na chayarütoxürüü na namaã ãëxgacü chiĩxüçèx'. ²² Rü yíxema ãchixexẽ rü name nixĩ i naga taxĩnü i ngẽma Tupanaãe i Üünexũ nüxũ ixuxũ namaã i ngẽma yaxögüxütücumügü”, ñanagürü ga yema chomaã idexaxũ.

4

Tupanaxũ nataxẽëgü i daxüguxũ i naãnewa

¹ Rü yemawena ga choma ga Cuáũ rü nüxũ chadau ga wüxi ga ìãx ga iwãxnaxũ ga daxüguxũ ga naãnewa. Rü yema naga ga nacornetagaraũxũ ga noxri nüxũ chaxĩnüxũ ga chomaã idexaxũ, rü ñanagürü choxũ:

“¡Nuxã naxĩnagü! Rü tá cuxũ nüxũ chadauxẽẽ i ngẽma yixcüra tá ngupetüxũ”, ñanagürü.

² Rü yexgumatama ga choma rü Tupanaãe i Üünexũ rü chauãemaã inacuèx, rü daxüwa nanaga. Rü yéma daxüguxũ ga naãnewa nüxũ chadau ga wüxi ga tochicaxũ ga mexèchixũ ga yéma Tupana nawa rüttoxũ. ³ Rü guma yema tochicaxüwa rütocü, rü ñoma nuta ya mexèchicü ya yasperüü nixĩ na namexũ rü ñoma nuta ya cornalínarüü nixĩ na namexũ. Rü yema tochicaxüetüwa nayexma ga wüxi ga chirapa ga ñoma nuta ga esmerádarüü mexèchicü. ⁴ Rü yema tochicaxüçüwawa nayexmagü ga 24 ga togü ga tochicaxügü ga nüxũ ínumaèguãchixũ. Rü yema tochicaxügüwa narütogü ga 24 ga ãëxgacügü ga yaxögüxüãrũ ixĩgüxũ. Rü cómuxũmaã nixãxchiru rü uirunaxcèx nixĩ ga norü ngèxcuerüügü. ⁵ Rü yema nachica ga Tupana írüttoxüwa ínaxüxũ ga bèixbèxanexũ rü duruanexũ rü nagagü. Rü yema tochicaxüpèxewa nayexma ga 7 ga omügü ga yéma naĩgüxũ. Rü yema omügü nixĩ ga Tupanaãe i Üünexũ ga yema 7 ga yaxögüxütücumümaã icuáxũ. ⁶ Rü yema Tupanaãrũ tochicaxüpèxewa rü ñoma dexáétüwarüü ixĩxümaã nachaxu rü nichipetü woruarüü. Rü yema tochicaxüxũ ínachomaèguãchi ga ägümücü ga daxüçüãx ga maxèxũ ga guxüwama äxètüxũ naweama rü napèxewa. ⁷ Rü wüxi ga yema daxüçüãx ga maxèxũ rü nanaxairaxũ. Rü yema to rü nanawocaraxũ. Rü yema norü tomaèxpüx rü nanaduũxüchiweraxũ. Rü yema norü ägümücü rü nanaxĩyü i gonagüxüraxũ. ⁸ Rü yema ägümücü ga daxüçüãx ga maxèxũ, rü wüxichigü nüxũ nayexma ga 6 ga naxpèxatügü. Rü guxüwama ga naxpèxatüétüwa rü naxpèxatütüüwa rü namuxètü. Rü ngunecü rü chütacü rü ñanagürügüecha:

“Naxüüne, naxüüne, naxüüne nixĩ ya tórü Cori ya Tupana ya guxüetüwa ngêxmacü rü woetama ngêxmaêchacü”, ñanagürügüecha. ⁹⁻¹⁰ Rü yema daxüçüãx ga maxêxü, rü yexguma nüxü yacuèxüügüüxgu ga guma tochicaxüwa rütocü, rü moxê nüxna naxâgügu, rü yema 24 ga âêxgacügü ga yaxögüxüârü rü yima woetama ngêxmaêchacüpêxegu nacaxâpüxügü, rü nüxü nicuèxüügü, rü napêxegu nananu ga norü ngêxcueruügü. ¹¹ Rü ñanagürügü:

“Pa Torü Cori, Pa Torü Tupanax, cuxü nixĩ i namexü na ticuèxüügüxü rü cuxü tataxêégüxü, erü guxüetüwa cungêxma. Yerü cuma cunaxü ga guxüma rü curü núchaügagu nixĩ i nangóxü i ñuxmax”, ñanagürügü.

5

Popera ga idixixüchiga rü Tupana Nane ga ñoma wüxi ga carnerurüü imácüchiga

¹ Rü ñuxüchi nüxü chadau ga guma tochicaxüwa rütocü, rü norü tügünemêxêwa nanange ga wüxi ga popera ga idixixü. Rü düxétüwa rü aixepewa rü naxâmatü ga yema popera. Rü 7 wa niñaxtachipêxe. ² Rü nüxü chadau ga wüxi ga norü orearü ngeruü ga daxüçüãx ga poraxüchixü ga tagaäcü ícaxü rü ñaxü:

“¿Texé tixĩ ya yíxema mexe na tayagautanüxü i norü ñaxtachipêxexü rü ítayadixgüxü i ñaã popera?” ñaxü. ³ Natürü woo ga daxüguxü ga naãnewa rü bai ga ñoma ga naãnewa rü bai ga yuexütanüwa, rü tataxuma ga texé ga mexe na ítayadixgüxü rü nüxü tadaumatüxü na ñuxü ñaxü ga yema popera. ⁴ Rü choma rü poraäcü chaxaxu yerü tataxuma ga texé ga mexé na ítayadixgüxü rü nüxü tadaumatüxü na ñuxü ñaxü ga yema popera. ⁵ Natürü wüxi ga yema 24 ga âêxgacügü ga yaxögüxüârü, rü ñanagürü choxü:

“¡Tâxü i cuxaxuxü! Erü yima Cristu ya Yudátaa ya airüxü poracü ya âêxgacü ya Dabítaa ixïcü, rü marü nüxü narüyexera i guxüma i chixexü. Rü ngêmacèx nüma nixĩ i namexü na yagautanüâxücèx i ngêma 7 i norü ñaxtachipêxexü i ngêma popera rü na íyawêgüâxücèx”.

⁶ Rü ñuxüchi nüxü chadau ga Tupana Nane ga ñoma wüxi ga carneruxacü ga mèxwa írudaxürüü yexma chicü naxütagu ga guma tochicaxüwa rütocü rü natanügu ga yema âgümücü ga daxüçüãx ga maxêxü rü yema 24 ga âêxgacügü. Rü nüxü nayexma ga 7 ga nachatacuxre ga norü poraarü cuèxruü rü 7 ga naxëtü. Rü guma 7 ga naxëtü rü ngêma nixĩ i Tupanaãe i Üünexü i guxüma i ñoma i naãnewa namuxüârü cuèxruü ixïcü. ⁷ Rü guma pecaduarü ütanücèx yucü rü guma tochicaxüwa rütocücèx nixü, rü nanayaxu ga yema popera ga norü tügünemêxêwa yexmaxü. ⁸ Rü yexguma nayauxãgu ga yema popera, rü yema âgümücü ga daxüçüãx ga maxêxü rü yema 24 ga âêxgacügü rü inacaxgüâpüxü napêxegu ga guma pecaduarü ütanücèx yucü. Rü wüxichigü ga yema âêxgacügü rü nüxü nayexma ga wüxi ga norü paxetarüü ga arpa. Rü yexgumarüü ta nüxü nayexma ga copa ga uirunaxcèx ga pumaratêxemaã napagüxü. Rü yema pumaratêxe rü nayixichi ga yexguma yaxaxgu. Rü yema pumaragü, rü ngêma nixĩ i Tupanaârü duüxügüarü yumüxêgüarü cuèxruügü. ⁹ Rü nagu nawiyaegü ga wüxi ga wiyae ga yexwacaxüxü ga ñaxü:

“Cuma nixĩ i cumexü na cunayaxuxü i ngêma popera rü cuyagautanüxü i ngêma norü ñaxtachipêxexü. Yerü cuma rü marü quimèxchirêx, rü cugümaã Tupanaãxü naxcèx cutaxe i nagúxüraüxü i duüxügü i nagúxüraüxü i nachüãnecüãx i nagúxüraüxü i nagawa idexagüxü. ¹⁰ Rü ngêmagüxü cuxüchica i ngextá âêxgacü íquiüxüwa, rü Tupanaârü ngüxêëruügüxü cuyaxígüxêë na cumaã wüxigu guxü i naãnemaã inacüxgüxücèx”,

ñanagürügü. ¹¹ Rü yemawena ichadawenü, rü nüxü chaxĩnü ga naga ga muxüchixüma ga Tupanaârü orearü ngeruügü ga daxüçüãx. Rü norü ngâxüwa nayexma ga yema tochicaxü rü yema âgümücü ga daxüçüãx ga maxêxü rü yema 24 ga âêxgacügü. Rü namuxüchima ga yema Tupanaârü orearü ngeruügü ga daxüçüãx ga yema yexmagüxü.

¹² Rü tagaäcü ñanagürügü:

“Daa nixĩ ya yima ñoma wüxi i carneruacürüü imácü ga pecaduarü ütanücèx yucü. Rü nüma nixĩ i namexü na guxüârü âëxgacü yĩxü, rü guxüârü yora yĩxü, rü guxü i cuèx nüxü ngëxmaxü, rü guxüârü yexera naporaxü. Rü nüma nixĩ i namexü na guxãma nüxü ngechaügüxü rü nataxëëgüxü rü nüxü icuèxüügüxü”, ñanagürügü. ¹³ Rü nüxü chaxĩnü ta ga naga ga guxüma ga yema Tupana üxü i daxüguxü i naãnewa rü ñoma i naãnewa rü naãnetüüwa rü taxtü i taxüwa ngëxmagüxü ga ñagüxü:

“Name nixĩ na guxügutãma guxãma nüxü icuèxüügüxü rü nüxü ngechaügüxü rü nataxëëgüxü ya yima pecaduarü ütanücèx yucü rü yima ngëma tohichaxüwa rütocü, erü nümagü nixĩ i guxüguma âëxgacügü yixügüxü”, ñanagürügü. ¹⁴ Rü yema ägümücü ga daxüçüãx ga maxëxü rü ñanagürügü:

“Ngëmaãcü yĩ”, ñanagürügü. Rü yema 24 ga âëxgacügü rü inacaxgüãpüxü rü nüxü nicuèxüügü.

6

Yema 7 ga ñaxtachipëxe- ruüchiga

¹ Rü ñuxüchi nüxü chadau ga yexguma guma pecaduarü ütanücèx yucü yagauyegu ga yema nüxĩraüxü ga norü ñaxtachipëxexü ga yema popera. Rü nüxü chaxĩnü ga wüxi ga yema daxüçüãx ga maxüxü ga tagaãcü ñoma duruanexürüü ñaxü choxü:

“¡Nuã naxü!” ñaxü. ² Rü ichadawenü rü nüxü chadau ga wüxi ga cowaru ga cómuxü. Rü yema naetüwa rütöxü rü nüxü nayexma ga wüxi ga norü würa. Rü wüxi ga ngëxcuerü nüxna naxã. Rü poraãëcuma norü cowarumaã inaxüãchi na duüxügüxü nayexeraxüçèx. ³ Rü yexguma guma pecaduarü ütanücèx yucü yagauyegu ga yema norü taxre ga yema poperaarü ñaxtachipëxexü, rü nüxü chaxĩnü ga yema norü taxre ga yema daxüçüãx ga maxüxü ga ñaxü choxü:

“¡Nuã naxü!” ñaxü. ⁴ Rü yema naxü ga wüxi ga cowaru ga dauxü. Rü yema naetüwa rütöxü rü wüxi ga tara ga taxü nüxna naxã. Rü yexgumarüü ta pora nayaxu na iyanaxoxëëãxüçèx na nügü nangechaügüxü ga duüxügü. Rü yemaãcü nanaxü na nügü nadëjxüçèx ga duüxügü. ⁵ Rü yexguma guma pecaduarü ütanücèx yucü yagauyegu ga yema norü tomaëxpüx ga yema poperaarü ñaxtachipëxexü, rü nüxü chaxĩnü ga yema norü tomaëxpüx ga yema daxüçüãx ga maxüxü ga ñaxü choxü:

“¡Nuã naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naetüwa rütöxü rü naxmëxwa nüxü nayexma ga wüxi ga tacüarü yaruü ga balanza. ⁶ Rü nüxü chaxĩnü ga wüxi ga naga ga yema daxüçüãx ga maxëxüârü ngãxütanüwa inaxüxü ga ñaxü:

“Wüxi i ngunexüârü puracütanü rü naxãtanü i wüxi i kilo i trigu. Rü wüxi i ngunexüârü puracütanü naxãtanü i tomaëxpüx i kilo i chebada. ¡Natürü tãxü i cuyanatauxëëxü i ngëma chixü rü yima binu!” ñanagürü. ⁷ Rü yexguma guma pecaduarü ütanücèx yucü yagauyegu ga yema norü ägümücü ga yema poperaarü ñaxtachipëxexü, rü nüxü chaxĩnü ga yema norü ägümücü ga yema daxüçüãx ga maxëxü ga ñaxü choxü:

“¡Nuã naxü!” ñaxü. ⁸ Rü ichadawenü rü nüxü chadau ga wüxi ga cowaru ga dexexü. Rü yema naetüwa rütöxü rü Yu nixĩ ga naega. Rü yema naweama ne üxü, rü Yuexüchica nixĩ ga naega. Rü yema taxre nanayauxgü ga pora na ñoma ga naãnewa rü wüxi ga yema norü ägümücütücumü ga duüxügümaã inacuèxgüxüçèx na daimaã rü taiyamaã rü ñaaweanemaã rü ngoxo idüraexümaã nayuexëëãxüçèx. ⁹ Rü yexguma guma pecaduarü ütanücèx yucü yagauyegu ga yema norü wüximëxpüx ga yema poperaarü ñaxtachipëxexü, rü nüxü chadau ga wüxi ga nachica ga ngextã Tupanacèx naxümagü nawa yagugüxü na nüxna naxãgüãxüçèx. Rü yema nachicatüüwa nüxü chadau ga naãëgü ga yema duüxügü ga Tupanaârü orexü na yaxugüxüçèx nadëixü. ¹⁰ Rü yema naãëgü rü tagaãcü ñanagürügü:

“Pa Torü Cori ya Guxüetüwa Ngëxmacü rü Üünecü rü Ixaixcümäcux, ¿ñuxgura tá ta i nuxna cucaxü rü cunapoxcuexü i ngëma duüxügü i chixexü ga toxü dëixü?” ñanagürügü. ¹¹ Rü ñuxüchi ga Tupana rü wüxichigü ga yema duüxügüna nanaxã ga naxchiru ga máxü rü cómuxü. Rü yema duüxügüãëgüxü ñanagürü:

“¡Paxaãchi iperüngüë ñuxmatáta yangu i peeneëgü i Cristuaxü puracüexü i pexrüü tá dëixü!” ñanagürü. ¹² Rü yexguma guma pecaduarü ütanücèx yucü yagauyegu ga yema norü 6 ga yema poperaarü ñaxtachipëxexü, rü nüxü chadau ga poraãcü na naxiãxãchianexü. Rü üèxcü rü wüxi ga naxchiru ga waxcharaxürüü nixi. Rü tauemacü rü guxüwama nagürüü naduema. ¹³ Rü woramacurigü rü èxtagü rü daxüwa narüyi rü ñoma ga naãnegu nayi. Rü ñoma orix i doxüxüma buanecü ya tacü rüyixëëxürüü nixi. ¹⁴ Rü guxüma i daxüwa nüxü idauxü rü inayarütaxu. Rü ñoma wüxi i popera i dixcumüächixü rü iiyarütaxuxürüü nixi. Rü guxüma ga mëxpúnegü rü capaxügü rü nixigachi ga nachicawa. ¹⁵ Rü ñoma ga naãnewa yexmagüxü ga nachiuãnegüarü äëxgacügü, rü mëxpúnemagu rü mëxpüneärü nutatanügu nicuxgü. Rü wüxigu yexma namaã nicuxgü ga yema togü ga äëxgacügü ga taxügü ga ñoma ga naãnemaã icuèxgüxü, rü churaragüarü äëxgacügü ga taxügü, rü yema duüxügü ga muärü dïeruãxgüxü, rü yema duüxügü ga ñoma ga naãnewa poraexü, rü guxüma ga duüxügü ga coriãxgüxü, rü guxüma ga duüxügü ga ngearü coriãxgüxü. ¹⁶ Rü guxüma ga nümagü, rü guma mëxpúnexü rü guma nutagüxü ñanagürügü:

“¡Toétügu peyi na toxü ipicuxgüxüçèx naxchaxwa ya yima ngëma tochicaxüwa rütocü, rü naxchaxwa ya yima pecaduarü ütanücèx yucü erü tama tanaxwèxe na toxü napoxcuexü! ¹⁷ Erü marü ínangu i ngëma ngunexü i äücümaxü i nagu napoxcuexü i ngëma duüxügü i tama Tupanaärü ixigüxü. ¿Rü texé tá namaã tabora i ngëma?” ñanagürügü.

7

Yema Yudíugü ga nacatüwa cuèxruüãxgüxüchiga

¹ Rü yemawena rü nüxü chadau ga ägümücü ga Tupanaärü orearü ngeruügü ga daxüçüãx ga ñoma ga naãneärü ägümücüpëxegu chigüxü. Rü ínapoxügü ga gucüma ga buanecügü na tama waixümüãneetügu naxüxüçèx, rü tama taxü i taxtüëtügu naxüxüçèx, rü bai i tacü rü naíetügu naxüxüçèx. ² Rü yexgumarüü ta nüxü chadau ga wüxi ga Tupanaärü orearü ngerü ga daxüçüãx ga üèxcü íyarügoxüwaama ne üxü. Rü nüxü nayexma ga Tupana ya Maxüçüarü tacüarü üégarü. Rü nüma rü tagaãcü nüxna nacagü ga yema togü ga ägümücü ga Tupanaärü orearü ngeruügü ga nayauxgüxü ga pora na nachixexëëgüãxüçèx ga guxüma ga waixümü rü guxüma ga taxü ga taxtü. ³ Rü ñanagürü nüxü:

“¡Tãxü i yatacüma penachixexëëxü i waixümü rü taxtü i taxü rü naigü, ñuxmatáta nacatüwa tayaxüarü cuèxruüãxgü i ngëma Tupanaärü duüxügü ixigüxü!” ñanagürü. ⁴ Rü nüxü chaxínü ga ñuxre na yíxü ga yema cuèxruüãxgüxü. Rü guxüma ga Yudíugütanüwa rü 144,000 nixi. ⁵⁻⁸ Rü yema cuèxruüãxgüxü ga Yudíugü, rü ñaã nixi:

Yudátaagü - 12,000

Rubéütaagü - 12,000

Gadutaagü - 12,000

Achetaagü - 12,000

Netarítaagü - 12,000

Manachétaagü - 12,000

Chimeütaagü - 12,000

Lebítaagü - 12,000

Ichacátaagü - 12,000

Chaburãütaagü - 12,000

Yúchetaagü - 12,000

Beyamítaagü - 12,000

⁹ Rü yemawena ichadawenü, rü nüxü chadau ga muxüchixüma ga nagúxüraüxü ga duüxügü ga nagúxüraüxü ga nagawa idexagüxü ga guxüma ga nachiuñewa ne ñxü. Rü yema tochicaxüpëxegu rü guma pecaduarü ütanüçex yucüpëxegu nachigü. Rü yema na namuxüchixü rü taxucürüwa texé tayaxugü na ñuxre yïxü. Rü naxchiru ga icómüxü rü imáxümañ nixäxchiru. Rü naxmëxwa nanangegü ga wairaátügü. ¹⁰ Rü guxüma ga nümagü rü tagaäcü ñanagürügü:

“Yima tórü Tupana ya tochicaxüwa rütocü rü yima pecaduarü ütanüçex yucü nixi ya tüxü maxëxëégücü”, ñanagürügü. ¹¹ Rü guxüma ga Tupanaärü orearü ngeruügü ga daxüçüäx rü nüxü ñachimaëguächi ga yema tochicaxü rü yema 24 ga äëxgacügü rü yema ägümücü ga daxüçüäx ga maxëxü. Rü yema tochicaxüpëxegu nanangüçuchitanü ga yema orearü ngeruügü, rü Tupanaxü nicuëxüügü. ¹² Rü ñanagürügü:

“Rü ngëmaäcü yï. Rü nüma nixi i namexü na guxüguma guxäma nüxü icuëxüügüxü, rü nataxëëgüxü, rü moxë nüxna ixägüxü, rü nüxü ingechaügüxü, erü guxü i cuëx nüxü nangëxma, rü guxüëtüwa nangëxma, rü guxüärü yexera naporä. Rü ngëmaäcü yï”, ñanagürügü. ¹³ Rü ñuxüchi wüxi ga yema 24 ga äëxgacügü rü choxna naca, rü ñanagürü:

“¿Texégü tixigü ya yixema cómuchirugüxe, rü ngextá ne taxí?” ñanagürü. ¹⁴ Rü choma chanangäxü, rü ñacharügü:

“Pa Corix, cuma nixi i nüxü cucuáxü na texégü tixigüxü”, ñacharügü. Rü yexguma ga nüma rü ñanagürü:

“Yixemagü tixigü ga nawa ngupetütanüxë ga yema ngúxü ga taxü rü marü tügü iyauxgüchiruxe nagüwa ga guma pecaduarü ütanüçex yucü. Rü ngëmacëx nixi i ticómüchiruxü. ¹⁵ Rü ngëmacëx nixi i Tupanaärü tochicaxüpëxewa tangëxmagüechaxü rü ngunecü rü chütacü rü Tupana íngëxmaxüwa nüxü tapuracüexü. Rü nümatama ya Tupana ya tochicaxüwa rütocü rü tüxna nadau. ¹⁶ Rü marü tagutáma wenaxärü taiya tüxü nangux, rü tagutáma titawae. Rü marü tagutáma üexcü tüxü nigu, rü tagutáma üexcüarü nañanexü tüxü nangux. ¹⁷ Erü yima pecaduarü ütanüçex yucü i ngëma tochicaxüütawa ngëxmacü, rü tá aixcüma meä tüxna nadau ñoma carnerugüna idauxürüü. Rü nawa tá tüxü nagagü i ngëma dexáarü chuxchuxügü i maxëëruü. Rü Tupana tá tüxü ñanapi i guxüma i tümagüüxëtü”, ñanagürü.

8

Yema norü 7 ga ñaxtachipëxeruüchiga rü yema buetare ga uirunaxcëxchiga

¹ Rü yexguma guma pecaduarü ütanüçex yucü yagauyegu ga yema norü 7 ga yema poperaarü ñaxtachipëxexü, rü ngäxü ga ora nachipetüanemare ga daxügüxü ga nañewa. ² Rü ñuxüchi nüxü chadau ga yema 7 ga Tupanaärü orearü ngeruügü ga daxüçüäx ga yexma Tupanapëxegu chigüxü. Rü wüxichigü nanayaxu ga norü corneta ga nüxna naxäxüne. ³ Rü yemawena ínangu ga wüxi ga to ga Tupanaärü orearü ngeruü ga daxüçüäx. Rü yema nanange ga wüxi ga norü buetare ga uirunaxcëx ga pumaraarü gutëxeruü. Rü yema uirunaxcëx ga pumaraarü gutëxeruütaxmüpëxegu nachi. Rü nanayauxtëxe ga taxü ga pumara ga nüxna naxäxü na yema tochicaxüpëxewa yexmaxü ga pumaraarü gutëxeruütaxmüwa yaguäxüçex, na yemaäcü Tupanana naxäxüçex ga yema pumaratëxe na yema pumaraema rü wüxigu Tupanaärü duüxügüarü yumüxëmañ Tupanaxütawa nanguxüçex. ⁴ Rü yema pumaratëxe ga yema orearü ngeruüäxü yexmaxü rü daxü naxüëma wüxigu namañ ga Tupanaärü duüxügüarü yumüxëgü ñuxmata Tupanaxütawa nangu. ⁵ Rü ñuxüchi ga yema orearü ngeruü rü nanayaxu ga yema buetare ga pumaraarü gutëxeruü. Rü yema pumaraarü gutëxeruütaxmüwa nanayaxu ga äwe ga naicü, rü gumamañ nanaxüäcu ga guma buetare. Rü ñuxüchi ñoma ga nañneetügu nanaña. Rü yexgumatama poraäcü naduruächiane, rü poraäcü nicuxcuane rü nibëixbëxane rü naxiäxächiane.

Tupanaãrũ orearũ ngeruũgũ ga daxũcũãxãrũ cornetachiga

⁶ Rũ yexguma ga yema ⁷ ga Tupanaãrũ orearũ ngeruũgũ ga daxũcũãx ga icornetaãxũ, rũ nügũ ínamexêêgũ na nagu yacuegũxũcèx. ⁷ Rũ wũxi ga yema Tupanaãrũ orearũ ngeruũ rũ nüxĩra nayacue ga norũ corneta. Rũ yexgumatama ñoma ga naãneetũgu narũyi ga gáuxũ rũ üxüema ga nagümaã ãeũxũ. Rũ wũxi ga yema norũ tomaẽxpũxarũ üye ga ñoma ga naãne rũ nixa. Rũ yexgumarũũ ta wũxi ga yema norũ tomaẽxpũxarũ üye ga naĩxnecũ rũ nixa. Rũ guxũma ga natüane rũ nixae. ⁸ Rũ yema norũ taxre ga Tupanaãrũ orearũ ngeruũ rũ nayacue ga norũ corneta. Rũ ñũxũchi wũxi ga ñacũ ga taxũchixũ ga namẽxpũneraũxũ ga iyauxraxũ, rũ yexma taxtũ ga taxũgu nanaña. Rũ wũxi ga yema norũ tomaẽxpũxarũ üye ga taxtũ rũ nagũxũ nananguxuchi. ⁹ Rũ wũxi ga yema norũ tomaẽxpũxarũ üyetücumũ ga yema taxtũwa maxẽxũ, rũ nayue. Rũ yexgumarũũ ta wũxi ga yema norũ tomaẽxpũxarũ üyetücumũ ga wapurugũ, rũ inayi. ¹⁰ Rũ yema norũ tomaẽxpũx ga Tupanaãrũ orearũ ngeruũ, rũ nayacue ga norũ corneta. Rũ ñũxũchi wũxi ga taxũchicũ ga woramacuri ga taemaxũchicũ rũ daxũwa narũngu. Rũ wũxi ga omũ ga ixaxũrũũ nixĩ. Rũ nagu nangu ga wũxi ga yema norũ tomaẽxpũxarũ üye ga natũgũ rũ natüxacũgũ. ¹¹ Rũ guma woramacuri rũ Üxũxũ nixĩ ga naega. Rũ wũxi ga yema norũ tomaẽxpũxarũ üye ga guxũma ga dexá rũ naxũxchiũ. Rũ muxũma ga duũxũgũ rũ yema dexáwa nayue yerũ naxũxchiũ. ¹² Rũ yema norũ ägũmũcũ ga Tupanaãrũ orearũ ngeruũ rũ nayacue ga norũ corneta. Rũ wũxi ga yema norũ tomaẽxpũxarũ üye ga üexcũ rũ nixo. Rũ yexgumarũũ ta wũxi ga yema norũ tomaẽxpũxarũ üye ga tauemacũ rũ woramacurigũ rũ êxtagũ rũ nixo. Rũ yemaãcũ wũxi ga yema norũ tomaẽxpũxarũ üye ga guxũma ga yema rũ naxẽãne. Rũ ga ngunecũ rũ ägũmũcũ ga ora naxẽãne. Rũ ga chũtacũ rũ ägũmũcũ ga ora nataxuma ga tauemacũ rũ bai ga woramacurigũ rũ bai ga êxtagũ. ¹³ Rũ yemawena ichadawenũ rũ nüxũ chaxĩnũ ga wũxi ga iyũ ga daxũgu íxexeũxũ ga tagaãcũ ñaxũ:

“Nangechaũtũmũũgũ i ngẽma duũxũgũ i yea pecaduãxũ i naãnewa maxẽxũ i ngẽxguma yacuegũãgu tá ya norũ cornetagũ i ngẽma togũ i tomaẽxpũx i Tupanaãrũ orearũ ngeruũgũ”, ñaxũ.

9

¹ Rũ yema norũ wũximẽẽxpũx ga Tupanaãrũ orearũ ngeruũ, rũ nayacue ga norũ corneta. Rũ nüxũ chadau ga wũxi ga woramacuri ga daxũwa rüngucũ ga ñoma ga naãnegu ngucũ. Rũ guma woramacuri nanayaxu ga yema äxmaxũ ga taguma iyacuáxũãrũ chawi. ² Rũ nayawãxna ga yema äxmaxũ ga taguma iyacuáxũ. Rũ yema inayagoema ga caxixũ ñoma wũxi i taxũ i uxearũ caxixũrũũ. Rũ yema caxixũ rũ nanaxẽẽmaxẽẽ ga üexcũ. ³ Rũ yema caxixũwa ínachoxũ ga munũgũ ga naãneetũgu yixũ. Rũ yema munũgũ rũ nanayauxgũ ga pora ga nüxna naxãxũ na ñoma tuxchinawerũũ duũxũgũxũ nachixũcèx. ⁴ Rũ yema munũmaã nüxũ nixu na tama natüanexũ nachixexẽẽxũcèx rũ bai i ñacũ rũ nanetũgũ rũ bai i ñacũ rũ naĩgũ. Natürũ nanamu na nachixexẽẽgũãxũcèx ga yema duũxũgũ ga tama Tupanaãrũ cuèxruũ nacatũwa yexmaxũ. ⁵ Natürũ tama nanamu na yema duũxũgũxũ nadèixũcèx. Natürũ nanamu na ngũxũ nüxũ yangexẽẽmaregũxũcèx ga wũximẽẽxpũx ga tauemacũ. Rũ yema ngũxũ ga nüxũ yangexẽẽgũxũ, rũ ñoma tuxchinawe duũxũgũxũ chixũrũũ nixĩ. ⁶ Rũ ngẽma ngunexũgũgu rũ duũxũgũ tá naxcèx nadaugũ na nayuexũ, natürũ tãütãma nayue. Rũ woo nanaxwèxegũxũchi na nayuexũ, natürũ taxucürũwatãma nayue. ⁷ Rũ yema munũgũ rũ ñoma cowaru i guerawa íxũrũũ nixĩgũ. Rũ naẽruwa nüxũ nayexma ga ñacũ ga ñoma ngèxcuerũ ga uirunaxcèxruũ ixĩgũxũ. Rũ nachiwe rũ nanaduũxũchiweraxũgũ. ⁸ Rũ nayaegũ rũ ñoma ngeãxyaerũũ nixĩgũ. Rũ napũtagũ rũ ñoma aipũtagũrũũ nixĩgũ. ⁹ Rũ naxũnewa nayexma ga norũ poxũruũ ga fierunaxcèx. Rũ naxpẽxatũgũga rũ ñoma muxũchine ya caru ya guerawa cowaru tũgũnegarũũ ixĩxũ. ¹⁰ Rũ nareexũgũ rũ ñoma tuxchinawerũũ naxãnegu. Rũ

yema naneguwa rü naxãguchata na wüximẽxpüx ya tauemacü duüxügüxü ngúxü yangexẽgüxcèx. ¹¹ Rü yema munügüarü ãëxgacü, rü yema ãxmaxü ga taguma iyacuáxüârü dauruü nixî. Rü Yudiügügawa ga yema munügüarü ãëxgacü, rü Abadóü nixî. Rü Griégügügawa rü Apolióü nixî. Rü ngẽma rü: “Chixexẽeruü”, ñaxüchiga nixî. ¹² Rü yexma nayacuèx ga yema nüxïraüxü ga chixexü ga taxü, natürü Ínayaxüama ga to ga taxre. ¹³ Rü yema norü 6 ga Tupanaârü orearü ngeruü rü nayacue ga norü corneta. Rü nüxü chaxïnü ga wüxi ga naga ga yema Tupanapëxewa yexmaxü ga uirunaxcèx ga pumaraarü gutëxeruütaxmüwa inaxüxü. ¹⁴ Rü yema naga rü nanamu ga yema orearü ngeruü ga cornetaãxü, rü ñanagürü nüxü:

“¡Yawëgüxü i ngẽma ägümücü i orearü ngeruügü i Chatanáârü ixïgüxü i taxtü i Eufrátegu ngãxügüxü!” ñanagürü. ¹⁵ Rü yemaäcü niwëgüxü ga yema ägümücü ga orearü ngeruügü na nadaiãxücèx ga wüxi ga yema norü tomaëxpüxarü üyetücumü ga duüxügü. Yerü ga yema orearü ngeruügü rü woetama yemacèx Ínamemaregü na yema ora rü yema ngunexü rü guma tauemacü rü guma taunecü nadaiãxücèx ga yema duüxügü. ¹⁶ Rü nüxü chaxïnü na ñuxre na yïxü ga yema orearü ngeruügüarü churaragü ga cowaruétügu ïxü. Rü 200 miyónegü nixïgü. ¹⁷ Rü yemaäcü nixî ga nüxü chadauxü ga yema cowarugü ga yexguma changoxetügu. Rü yema churaragü ga yema cowaruétügu ïxü rü nüxü nayexma ga norü ngèxcuxünexü ga poxüruü ixïxü ga ñoma üxüxetürüü iyauraxü. Rü yema poxüruü rü nixâmatü rü nidaumatü rü niyèuxmatü rü nidexmatü. Rü yema cowaruerugü rü ñoma aierurüü nixïgü. Rü naãxgüwa inaxüxü ga üxüema rü caxixü rü azufre. ¹⁸ Rü wüxi ga norü tomaëxpüxarü üyetücumü ga duüxügü rü nayue namaã ga yema tomaëxpüx ga chixexẽeruü ga üxüema rü caxixü rü azufre ga yema cowarugüèxwa íchoxüxü. ¹⁹ Yerü ga yema cowarugü rü naãxwa rü nareexüwa nixî ga nüxü nayexmaxü ga norü pora na duüxügüxü nadëixücèx. Yerü ga nareexügü rü ñoma äxtaperüü nixïgü, rü yemamaã nanangõx ga duüxügü rü ngúxü nüxü ningexẽ rü nanadai. ²⁰ Natürü ga yema togü ga duüxügü ga tama yema poxcuruügümaã yuexü, rü tama nüxü narüxoe ga yema chixexügü ga naxügüxü. Rü tama nüxü narüxoe na nüxü yacuèxüügüxü ga ngoxogü rü norü tupanetachicünèxãgü ga uirunaxcèx rü dïërumünaxcèx rü cobrenaxcèx rü nutagünaxcèx rü naïnaxcèx. Rü yemaäcü nüxü nicuèxüügüama ga yema norü tupanetachicünèxãgü ga ngearü maxüãxü rü tama nüxü dauxü rü tama nüxü ïnüxü rü tama ixüxü. ²¹ Rü tama nüxü narüxoe na namáëtagüxü, rü yayuüexü, rü nangëãëgüxü rü nangïtèëxgüxü.

10

Orearü ngeruü ga nüxü yexmaxü ga popera ga idixixüchiga

¹ Rü nüxü chadau ga wüxi ga to ga Tupanaârü orearü ngeruü ga daxügüxü ga naãnewa íruxïxü. Rü wüxi ga caixanexüârü ngãxüwa nayexma, rü wüxi ga chirapa naétügu nabo. Rü nachiwe rü ñoma üèxcürüü niyauracüü. Rü naparagü rü ta ñoma üxüemarüü niyauracüü. ² Rü naxmëxwa nüxü nayexma ga wüxi ga poperaxacü ga íiwëgüxü. Rü norü tügünepara rü taxtü i taxüetügu nachicutü. Rü norü toxwepara rü waixüümüãnegu nachicutü. ³ Rü ñuxüchi ga nüma rü tagaäcü aita naxü ñoma wüxi ya ai ya tagaäcü aita ücürüü. Rü yexguma aita naxüxgu rü 7 ëxpüxcüna naduruãchiane. ⁴ Rü yexguma yema 7 ëxpüxcüna na naduruãchianexüguwena rü chanaxümatüchaü. Natürü nüxü chaxïnü ga wüxi ga naga ga daxügüxü ga naãnewa inaxüxü ga ñaxü choxü:

“¡Tãxü i cunangoxëëxü i ngẽma 7 i duruanexü nüxü ixuxü! ¡Rü ngexrüma na cunaxümatüxü!” ñaxü choxü. ⁵ Rü ñuxüchi ga yema Tupanaârü orearü ngeruü ga nüxü chadauxü na taxtü ga taxüetügu rü waixüümüetügu nachicutüxü, rü daxü naxunagü ga norü tügünehacüü. ⁶ Rü inaxuneta naegagu ga Tupana ya yima guxügüma maxücü ya yima naxücü i daxügüxü i naãne rü ñoma i naãne rü taxtü i taxü rü guxüma i tacü nawa ngëxmagüxü. Rü ñanagürü ga yema orearü ngeruü:

“Ñuxma rü marü täütáma nuxcü ningu i ngêma Tupana nüxü ixuxü. ⁷ Erü ngêxguma nawa nanguxgu na ngêma norü 7 i Tupanaârü orearü ngeruü inaxügüxü na yacueâxü ya norü corneta, rü ngêxguma tá nixî i yanguxü ga yema noxri êxügüxü ga Tupanaârü uneta, yema nuxcümaügüxü ga norü orearü uruügümaã nüxü yaxuxü”, ñanagürü. ⁸ Rü yema naga ga noxri nüxü chaxînüxü ga daxügüxü ga nañewa inaxüxü, rü wenaxârü chomaã nidexa. Rü ñanagürü choxü:

“¡Naxütawa naxü i ngêma Tupanaârü orearü ngeruü i taxtü i taxüetügu rü waixümüâneetügu chicutüxü! ¡Rü nüxna nayaxu i ngêma poperaxacü i marü íiwêgüxü i naxmêxwa ngêxmaxü!” ñanagürü. ⁹ Rü naxütawa chaxü ga yema orearü ngeruü, rü nüxna naxcêx chaca ga yema poperaxacü na choxna naxâaxücêx. Rü nüma rü ñanagürü choxü:

“Naã nixî. ¡Rü nayaxu rü nangõx! Rü cuêxwa rü berurerüü tá namaïcura. Natürü cuanüwa rü tá nanaxüxâchi”, ñanagürü choxü. ¹⁰ Rü yema orearü ngeruümêxêwa chanayaxu ga yema poperaxacü, rü chanangõx. Rü chauêxwa rü berurerüü namaïcura. Natürü yexguma chanangõxguwena rü chauanüwa rü nanaxüxâchi rü changuxneca. ¹¹ Rü ñuxüchi chomaã nüxü nixu, rü ñanagürü choxü:

“Name nixî na wenaxârü Tupanaârü orexü quixuxü namaã i muxüma i nagüxüraüxü i duüxügü, rü muxüma i nachiüñanecüâxgü i duüxügü, rü muxüma i duüxügü i to i nagawa idexagüxü, rü muxüma i nachiüñanegüarü âêxgacügü”, ñanagürü choxü.

11

Taxre ga orearü uruüchiga

¹ Rü yemawena chanayaxu ga wüxi ga dexnemenêxã ga ngugürüü ixîxüne ga choxna naxâxüne. Rü guma choxna naxâcü rü ñanagürü choxü:

“¡Inachi rü nangugü ya yima Tupanapata rü ngêma pumaraarü gutêxeruütaxmü! ¡Rü yaxugü rü ñuxre yîxü i ngêma duüxügü i ngêma Tupanaxü icuêxüügüxü! ² ¡Natürü ngêma naãxtü ya Tupanapata, rü täütáma cunangugü! Erü ngêma duüxügü i tama Tupanaãxü yaxögüxüna marü nanaxã. Rü nümagü rü tomaêxpüx ya taunecüarü ngâxü tá chixexü namaã naxügü ya yima ñãne ya üünene ya Yerucharéü. ³ Rü choma rü tá chanamu i taxre i chorü orearü uruügü na 1,260 i ngunexü duüxügümaã nüxü yaxügüxücêx i chorü ore. Rü nümagü i ngêma taxre rü tá niwêxchiru na ngêmawa duüxügü nüxü cuêxgüxücêx na ngechaü nüxü nguxgüxü”, ñanagürü choxü. ⁴ Rü ngêma taxre i orearü uruügü nixî i norü cuêxruü i ngêma taxre i nanetü i orîbu rü ngêma taxre i weraarü üruügü i tórü Cori ya ñoma i naãneârü yora ixîcüpêxewa ngêxmagüxü. ⁵ Rü ngêxguma texé chixexü namaã ügüchaügu i ngêma taxre i orearü uruügü, rü nümagü rü üxüema ya naãxwa íacuexechinemaã tüxü tá ínagu. Rü ngêmaâcü tá inayanaxoxêê i norü uwanügü. Rü ngêmaâcü tá tüxü nadai ya yîxema chixexü namaã ügüchaüxê. ⁶ Rü ngêma taxre i orearü uruügü rü nüxü nangêxma i pora na íyachaxâchixücêx ya pucü na tama napuxücêx i guxüma i ngêma 1,260 i ngunexügü i nagu Tupanaârü orexü yaxügüxü. Rü ngêxgumarüü ta nüxü nangêxma i pora na nagüxü yaxîxêêgüâxücêx i dexá. Rü ngêxgumarüü ta nüxü nangêxma i pora na ñoma i nañewa namugüâxücêx i nagüxüraüxü i poxcuruügü na ngêmaâcü ngüxü duüxügüxü yangexêêgüxücêx i ngêxguma ngêma taxre naxwêxegügu. ⁷ Natürü ngêxguma ngêma taxre i orearü uruügü naguxêêgügu na nüxü yaxügüxü i Tupanaârü ore, rü ngêma ngoxo i ngêma âxmaxü i taguma iyacuáxüwa íxüxüxü, rü tá ngema taxrena nayuxu. Rü tá nüxü narüyexera, rü tá nanadai. ⁸ Rü ngêma naxünegü i ngêma taxre rü tá yima ñãne ga tórü Cori nawa curuchawa ipotane ya Yerucharéüârü ítamügüwa nawogü. Rü yima ñãne rü nachixe rü ngêmacêx Chodomaârü ñãnemaã rü Equituanemaã nanaxugü. ⁹ Rü tomaêxpüx i ngunexüârü ngâxü rü muxüma i nagüxüraüxü i duüxügü rü muxüma i guxü i nachiüñanecüâx i duüxügü rü muxüma i duüxügü i to i nagawa idexagüchigüxü, rü tá nüxü nadaugü i naxünegü. Rü täütáma

nanaxwèxegü na texé inatèxgüxü. ¹⁰ Rü ngêma duüxügü i ñoma i naãnewa maxêxü rü tá nataãégü na marü nayuxü i ngêma taxre. Rü ngêma na poraãcü nataãégüxüchixü rü tá nügüna ãmare naxägü, yerü yema taxre ga orearü uruügü rü poraãcü nanachixewe rü naãewa nanangüxêégü. ¹¹ Natürü yema tomaëxpüx ga ngunexüârü ngäxüguwena, rü Tupana wenaxârü nanamaxêxêë ga yema taxre. Rü wenaxârü ínarüdagü. Rü guxüma ga yema duüxügü ga nüxü daugüxü rü poraãcüxüchi namuê. ¹² Rü ñuxüchi ga yema taxre ga orearü uruügü, rü nüxü naxînüé ga wüxi ga naga ga tagaãcü daxügüxü ga naãnewa inaxüxü ga ñaxü:

“¡Nuã daxüwa pexí!” ñaxü. Rü yemaãcü ga nümagü rü wüxi ga caixanexügu daxügüxü ga naãnewa naxí. Rü norü uwanügü rü yéma nüxü narüdaunü. ¹³ Rü yexgumatama poraãcü naxîãxãchiane. Rü wüxi ga yema norü 10 arü üye ga guma ñãne, rü niwèxgü. Rü 7,000 ga duüxügü nayue namaã ga yema ñãxãchiane. Rü yema togü ga duüxügü ga maxêxü rü poraãcüxüchi namuê. Rü Tupana ya daxügüxü i naãnewa ngêxmacüxü nicuèxüügü. ¹⁴ Rü yexma nayacuèx ga yema norü taxre ga chixexü. Natürü paxa tá ínangu i ngêma norü tomaëxpüx ixixü.

Guma norü 7 ga cornetachiga

¹⁵ Rü yema norü 7 ga Tupanaârü orearü ngeruü, rü nayacue ga norü corneta. Rü nayexma ga nagagü ga tagaãcü daxügüxü ga naãnewa inaxügüxü ga ñagüxü:

“Ñuxma rü yima mecü na namaã inacuèxgüxü i ñoma i naãne, rü nüma nixí ya tórü Cori ya Tupana rü Nane ya Cristu. Rü nüma rü guxügutáma namaã inacuèxgü”, ñagüxü. ¹⁶ Rü nümagü ga yema 24 ga ãëxgacügü ga norü tochicaxügüwa rütogüxü ga Tupanapëxewa, rü yexma nanangücuchitanü, rü Tupanaxü nicuèxüügü. ¹⁷ Rü ñanagürügü:

“Pa Torü Cori ya Tupana ya Guxüârü Yexera Poracüx, cuma rü woetama cuyexmaêcha, rü ñuxma rü ta cungêxmaêcha. Rü moxê cuxna taxägü, erü marü cugümêxêwa cunangêxmaxêë i guxüma, rü marü icunaxügü na namaã icucuáxü. ¹⁸ Rü ngêma duüxügü i tama cuxrü ixigüxü rü poraãcüxüchi nanuê, natürü nawa nangu i ngêma ngunexü i nagu tá cunapoxcuexü. Rü ngêxgumarüü ta marü nawa nangu na nüxü quicagüxü i guxüma i duüxügü i yuxü. Rü marü nawa nangu na nüxü cunaxütanüxü i ngêma curü duüxügü i curü orearü uruügü, rü ngêma duüxügü i cupêxewa imexü, rü guxüma i ngêma duüxügü i cuxü muêxü i yaexü rü buexü. Rü marü nawa nangu na icuyanaxoxêëxü i ngêma duüxügü i nachixexêëxü i ñoma i naãne”, ñanagürügü. ¹⁹ Rü ñuxüchi Tupanapata ga daxügüxü ga naãnewa yexmane, rü niwãxna. Rü yéma norü aixepewa nüxü chadau ga yema baú ga Tupanaârü uneta ga nutagu ümatüxü. Rü nibèixbêxane, rü poraãcü nicuxcuane, rü naxîãxãchiane rü poraãcü gauxü narüyi.

12

Wüxi ga nge rü wüxi ga coya ga taxü

¹ Rü ñuxüchi daxüwa nangox ga wüxi ga cuèxruü ga taxü. Rü iyexma ga wüxi ga nge ga üèxcürüü iyaurchirucüücü. Rü ngütüücutüwa nayexma ga tauemacü. Rü yema ngîrü ngèxcueruü ga ngîruwa yexmaxü, rü 12 ga woramacurigü nixígü. ² Rü yema nge rü itacharaü. Rü poraãcü aita ixü yerü ixíraxacüchaü rü poraãcü inguxnecaxüchi. ³ Rü yemawena daxüwa nangox ga to ga cuèxruü. Rü yéma nayexma ga wüxi ga coya ga taxüchixü ga dauxü ga 7 ga naëru nüxü yexmaxü rü 10 ga naxchatacuxre. Rü wüxichigü ga naëruwa rü nüxü nayexma ga norü ngèxcueruü. ⁴ Rü nareexümaã inayatúchigü ga wüxitücumü ga norü tomaëxpüxarü üye ga woramacurigü, rü ñoma ga naãneëtügu nanawogü. Rü yema coya rü ngîpêxegu nayachi ga yema nge ga íraxacüchaücü, yerü tüxü nangöxchaü ga guxema ngîxácüxe ga yexguma tabuxgu. ⁵ Rü yema nge rü ixíraxacü, rü nayatü. Rü nüma rü tá guxü i nachüüãneârü ãëxgacü nixí, rü tá namaã inacuèx. Natürü ga guma ngîne rü Tupana ngixna nanayaxu rü yema ínatoxüwa nanaga. ⁶ Rü yema

nge rü wüxi ga nachica ga ngextá taxúema íxãpataxüwa iña. Rü yéma Tupana ngĩxcèx nanamexëẽ ga wüxi ga ngĩchica na yéma ngĩxna nadauxücèx rü ngĩxü naxüwemüxücèx ga 1,260 ga ngunexü. ⁷ Rü yemawena ga daxüwa rü nügü nadai. Rü Miguere ga Tupanaârü orearü ngeruügarü âëxgacü ixícü rü guxüma ga natanüxü ga orearü ngeruügü, rü nügü nadai namaã ga yema coya ga taxüchixü rü norü orearü ngeruügü. Rü yema coya rü ñuxüchi norü orearü ngeruügü i chixexü rü poraãcü Tupanaârü orearü ngeruügümaã nügü nadai. ⁸ Natürü ga yema coya rü norü orearü ngeruügü rü tama Tupanaârü orearü ngeruügüxü narüporamaëgü. Rü ñuxüchi ga yema coya rü norü orearü ngeruügü rü nangechica ga daxüguxü ga naãnewa. ⁹ Rü yemaãcü inatèxüchi ga daxüguxü ga naãnewa ga yema coya ga yema nuxcümaüxü ga äxtape. Rü nüma rü ngoxogu rü Chatanágu naxãega. Rü nüma nixĩ i guxüma i ñoma i naãnecüãx i duüxügüxü nawomüxëëxü. Rü nüma rü norü orearü ngeruügümaã ñoma ga naãnegu narüwoü. ¹⁰ Rü ñuxüchi nüxü chaxĩnü ga wüxi ga naga ga daxüguxü ga naãnewa tagaãcü ñaxü:

“Ñuxma rü marü nawa nangu na tórü Tupana rü norü duüxügüxü namaxëxëëxü. Rü ñuxma rü nüma tüxü nüxü nadauxëẽ na guxüârü yexera naporaxü rü guxüârü âëxgacü yiixü. Rü Nane ya Cristu rü marü tüxü nüxü nadauxëẽ na guxümaã inacuáxü. Yerü marü daxüguxü ga naãnewa inatèxüchi ga Chataná ga ngunecü rü chütacü tórü Tupanapëxewa taeneëgüxü yeücürü ixuechaxü. ¹¹ Rü nümagü ga yema taeneëgü, rü marü Chatanáxü narüyexeragü nagügagu ga guma pecaduarü ütanücèx yucü rü nagagu ga Tupanaârü ore ga nüxü yaxugüxü. Yerü ga nümagü rü tama nayanuxügü ga norü maxü, rü inamemaregü na Tupanacèx nayuxü. ¹² ¡Rü ngëmacèx petaãëgü i guxãma i pema i daxüguxü i naãnewa ngëxmagüxe! ¡Natürü pengechaütümüügü i pema i yea naãne i pecaduãxüwa ngëxmagüxe rü taxtü i taxüwa ngëxmagüxe! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i ngunexü nüxü inayaxü na chixexü naxüxü, erü paxa tá napoxcu”, ñanagürü ga yema naga. ¹³ Rü yema coya ga taxüchixü ga Chataná nagu icúxü rü yexguma nügü yacuèxãchigu ga ñoma ga naãnegu na natáexü, rü ngĩwe ningèchigü ga yema nge ga íraxacücü. ¹⁴ Natürü ga Tupana rü ngixü naxüxpexatü ga yema nge. Rü nanaxiyüpexatügüraxü. Rü yemaãcü nachica ga ngextá taxúema íxãpataxüwa iña naxchaxwa ga yema coya ga Chataná nagu icúxü.. Rü yema nachicawa nixĩ ga Tupana ngĩxna dauxü, rü ngĩxü üwemüxü ga tomaëxpüx ga taunecüarü ngãxü. ¹⁵ Rü yema coya ga Chataná rü dexá nügüèxwa inaxüxüxëẽ na wüxi ga natü naxüxücèx, rü yema natümaã ngĩxü yachaxëëxücèx ga yema nge. ¹⁶ Natürü ga waixümü rü ningëx na iyachexëëxücèx ga yema dexá ga coya nügüèxwa íxüxüxëëxü. ¹⁷ Rü ñuxüchi ga yema coya ga Chataná, rü poraãcüxüchima ngĩmaã nanu ga yema nge. Rü inixü na nügü namaã yadèixücèx ga yema togü ga ngixãcügü ga yema nge. Rü ngëma ngixãcügü i ngëma coyamaã nügü dèixü, rü ngëma nixĩ i ngëma duüxügü i meã Tupanaârü orega ñnüèxü rü meã yaxögüechaxü i Ngechuchu ya Cristuarü ore i aixcüma ixixü. Rü ñuxüchi ga yema coya rü norü numaã taxtü ga taxüãnacügu nayarüñu.

13

Taxre ga ngoxogüchiga

¹ Rü nüxü chadau ga wüxi ga ngoxo ga taxü ga taxtügu íñuãchixü ga 7 eruxü rü 10 chatacuxrexü. Rü wüxichigü ga naxchatacuxrewa rü nüxü nayexma ga norü ngèxcuerü. Rü naërugügu naxümatü ga ñuxre ga naegagü ga Tupanamaã guxchigagüxü. ² Rü yema ngoxo ga nüxü chadauxü, rü wüxi ga airüü nixĩ. Rü naxmëxgü rü chatü ga taxümëxëgürüü nixĩ. Rü naãx rü wüxi ga aièxrüü nixĩ. Rü yema coya ga Chataná rü yema ngoxoxü naporaxëẽ na naxrüü naporaxücèx rü naxrüü âëxgacü yiixücèx na ñoma ga naãnemaã inacuáxücèx. ³ Rü wüxi ga naëruwa ga yema ngoxo, rü nüxü nayexma ga wüxi ga taxü ga norü oxri ga namaã nayuxchaüxü. Natürü ga yema norü oxri rü nüxü nixë, rü naxcèx nitaane. Rü guxüma ga ñoma ga naãnecüãx ga duüxügü rü poraãcü yema

ngoxomaã nabaixãchie, rü nawe narüxĩ. ⁴ Rü ga duüxügü rü yema coya ga Chatanáxü nicuèxüügü yerü yema ngoxoxü naporaxëẽ na ãëxgacü yĩxücèx. Rü yexgumarüü ta yema ngoxoxü nicuèxüügü, rü ñanagürügü:

“¿Texé tangëxma ya ñaã ngoxorüü poraxe? ¿Rü texé tapora na namaã tügü tadèixü?” ñanagürügü. ⁵ Natürü ga Tupana rü tama yema ngoxona nanachuxu na nügü yacuèxüüxcèx rü tacü Tupanamaã yaxugüxcèx rü ãëxgacü na yĩxücèx ga 42 ga tauemacü. ⁶ Rü yemaäcü chixexü naxü ga yema ngoxo. Rü poraäcü tacü Tupanamaã nixugü. Rü Tupanamaã naguxchiga, rü napatamaã rü ta naguxchiga, rü tümamaã naguxchiga ya guxãma ya yixema daxüguxü i naãnewa ngëxmagüxe. ⁷ Rü yema coya ga Chataná rü yema ngoxoxü naporaxëẽ na Tupanaärü duüxügümaã nügü nadèixücèx ñuxmatáta tüxü nayexera. Rü ãëxgacüxü nayaxixëẽ na namaã inacuáxcèx ga nagüxüraüxü ga duüxügü ga guxüma ga nachüãnecüãx ga nagüxüraüxü ga nagawa idexagüxü. ⁸ Rü tá ngëma ngoxoxü nicuèxüügü i guxüma i duüxügü i ñoma i naãnewa maxëxü i noxritama naãne üxgu ngeégagüxü nawa i norü popera ya yima pecaduarü ütanücèx yucü i nagu yawügüãxü i ngëma duüxügü i marü Tupana nüxna naxãxü i maxü i taguma gúxü. ⁹⁻¹⁰ Rü ngëxguma texé äxchixëgu, rü name nixĩ i naga taxĩnü i ñaã tá pemaã nüxü chixuxü. Rü ngëxguma texé tümamaã naxuegugu na tüxü yayauxgüxü, rü noxtacüma tá tiyaxu. Rü ngëxguma texé tümamaã naxuegugu na tüxü yamèxgüxü, rü noxtacüma tá tüxü nimèxgü. Rü ngëmacèx ya yixema Tupanaärü duüxügü ixigüxe, rü woo tacü rü guxchaxü tüxü ngupetügu, rü tanaxwèxe na yaxna namaã taxĩnüxü rü tayaxögüamaxü. ¹¹ Rü yemawena nüxü chadau ga wüxi ga to ga ngoxo ga taxrechatacuxrexü ga waixüümüãnewa íxüxüxü. Rü yema naxchatacuxre rü ñoma carneruchatacuxrerüü nixĩ. Natürü ga naga rü wüxi ga coya ga taxüchixügarüü nixĩ. ¹² Rü yexguma yema nüxüraüxü ga ngoxopëxewa nayexmagu, rü naxrüütama napora. Rü ñoma ga naãnemaã inacuèx, rü nanamu ga ñoma ga naãnewa maxëxü ga duüxügü na yema nüxüraüxü ga ngoxo ga ixëärü oxriáxüxü na yacuèxüügüxcèx. ¹³ Rü yema ngoxo nanaxü ga taxü ga cuèxruügü ga duüxügü tama nüxü cuáxü na naxügüãxü. Rü daxüwa nanayixëẽ ga üxü, rü ñoma ga naãnegu nayi napëxewa ga duüxügü. ¹⁴ Natürü ga Tupana rü tama yema ngoxona nanachuxu na ñoma ga naãnewa maxëxü ga duüxügüxü nawomüxëexü namaã ga yema cuèxruügü ga yema nüxüraüxü ga ngoxopëxewa naxüxü. Rü yemaäcü ga yema ngoxo rü duüxügüxü namu na naxügüãxcèx ga naxchicünèxã ga yema nüxüraüxü ga ngoxo ga taramaã chexexü rü poraäcü rüxóxü rü tama yuxü. ¹⁵ Rü Tupana rü tama yema to ga ngoxona nanachuxu na namaxëëãxcèx ga yema nüxüraüxü ga ngoxochicünèxã. Rü yemaäcü ga yema ngoxo rü nanamaxëẽ ga yema naxchicünèxã na yadexaxücèx rü na nadaiãxcèx ga guxüma ga yema duüxügü ga tama nüxü icuèxüügüxü. ¹⁶ Rü yexgumarüü ta guxüma ga duüxügüxü namu na norü tügünemëxëwa rü ëxna nacatüwa nüxü na nayexmaxücèx ga wüxi ga cuèxruü ga yema ngoxoéga ixixü. Rü yemaäcü nanamu ga guxüma ga duüxügü rü woo buxü rü ëxna yaxü, rü woo duüxügü i muärü dïeruãxgüxü rü ëxna ngearü dïerüãxgüxü, rü woo duüxügü i ngearü coriãxgüxü rü ëxna duüxügü i ixãärü coriãxgüxü. ¹⁷ Rü taxucürüwa texé tümäärü tacücèx tataxe rü ëxna tümäärü tacümaã tataxe ga yexguma tümäärü tügünemëxëwa rü ëxna tümecatüwa tüxü natauxgu ga yema ngoxoéga rü ëxna yema ngoxoégarü cuèxruü ga número. ¹⁸ Rü ñaã orexü na icuáxcèx, rü tanaxwèxe na tüxü nangëxmaxü i tórü cuèx. Rü yixema tüxü nangëxmaxë i tümäärü cuèx, rü name nixĩ i tanangugü i ngëma número i ngëma ngoxoéga ixixü. Erü ngëma número rü wüxi i yatüégachirëx nixĩ. Rü ngëma número rü 666 nixĩ.

14

Yema 144,000 ga duüxügüarü wiyae

¹ Rû yemawena ichadawenü, rû nüxü chadau ga guma pecaduarü ütanüçèx yucü ga guma mëxpüne ga Siõügu äeganeetügu chicü. Rû naxütawa nayexma ga 144,000 ga duüxügü ga nacatüwa ixäegaxü namaã ga guma pecaduarü ütanüçèx yucüéga rû Nanatü ya Tupanaëga. ² Rû ñuxüchi nüxü chaxînü ga wüxi ga naga ga tagaxü ga daxüguxü ga naãnewa inaxüxü ga ñoma taxü i cotüna i chuxchuxügarüü ixîxü rû ñoma poraãcü yaduruanexürüü ixîxü rû ñoma muxüchixü i duüxügü i arpawa ípaxetaxüüüü ixîxü. ³ Rû yema 144,000 ga duüxügü rû nagu nawiyaegü ga wüxi ga yexwacaxüxü ga wiyae napëxewa ga Tupanaärü tohichaxü rû napëxewa ga yema ägümücü ga daxüçüãx ga maxëxü rû napëxewa ga yema 24 ga äëxgacügü. Rû taxucürüwama texé ga togue nüxü tacuèxéga ga yema wiyae. Rû yema 144,000 ga duüxügüicatama nixî ga nüxü cuèxgüxü. Rû yema nixî ga Tupana ñoma ga naãnewa deixü na namaxëxëëãxüçèx. ⁴ Rû yema nixî ga duüxügü ga tama ñoma ga naãneärü ngúchaü i chixexümaã nügü äüãchiarü maxüãxgüxü rû tama nüxü rüxoexü na Tupanaãxü yaxögüãxü. Rû nümagü rû yima Tupana Nane ga pecaduarü ütanüçèx yucüwe narüxî i ngextá inaxüxüwa. Rû yemagü nixî ga ñoma ga naãneçüãxtanüwa nüxira Tupana naxçèx taxexü na noxrü rû Naneärü duüxügü i üünexü yixîgüxüçèx. ⁵ Rû yematanüwa rû taguma texé nüxü taxînü na doraxü yaxugüxü, erü Tupanapëxewa rû nataxuma i norü chixexü.

Orearü ngeruügu ga daxüçüãxärü orechiga

⁶ Rû ñuxüchi nüxü chadau ga wüxi ga to ga orearü ngeruü ga daxüguxü ga naãnegu íxexeüxü ga iyangexü ga Tupanaärü ore i guxügutáma ixîxü, na guxü i nachüãnecüãxgümaã rû nagüxüraüxü i duüxügümaã rû guxüma i duüxügü i nagüxüraüxü i nagawa idexagüxümaã nüxü yaxuxüçèx. Rû yemaãcü inayange ga yema Tupanaärü ore na guxüma i ñoma i naãnewa maxëxü i duüxügümaã nüxü yaxuxüçèx. ⁷ Rû tagaãcü ñanagürü:

“¡Nüxü pemuë ya Tupana rû nüxü picuèxüügu! Erü marü nawa nangu na guxüma i duüxügüna naçaxü. ¡Rû nüxü picuèxüügu ya yima naxüçü i daxüguxü i naãne rû ñoma i naãne rû taxtü i taxü rû guxüma i natüxacügü!” ñanagürü. ⁸ Rû yemawena nangox ga to ga orearü ngeruü ga daxüçüãx, rû ñanagürü:

“Marü nagu nayarüchixe ya yima ñane ya taxüne ya Babiróniã, rû nagu napogüe rû nayawètaügüxëe ya norü ígü. Yerü yema ñanecüãx rû nanachixexëe ga guxüma ga to ga nachüãnecüãx ga duüxügü. Rû guxüma ga yema duüxügüxü namu na naxügüãxüçèx ga yema chixexü ga guma ñanewa naxügüxü ga Tupanapëxewa poraãcü chixexü”, ñanagürü. ⁹⁻¹⁰ Rû yemawena nangox ga to ga orearü ngeruü ga tagaãcü ñaxü:

“Ngëxguma chi texé nüxü icuèxüügu i ngëma ngoxo rû naxchicünèxãxü ticuèxüügu rû tügü itaxãxgu na tümacatüwa rû éxna tümamëxëwa ngëma ngoxoégamaã tacuèxruüãxü, rû Tupana rû poraãcüxüchi tá tüxü napoxcu namaã i ngëma poxcu i guxüärü yexera ixîxü i nümatama ya Tupana norü numã namexëxü. Rû üxümaã rû azufre i iyauraxümaã tá ngúxü tüxü ningexëe napëxewa i norü orearü ngeruügu rû napëxewa ya yima Nane ga pecaduarü ütanüçèx yucü. ¹¹ Rû naëma ya yima üxü ya nawa Tupana ngúxü tüxü ingexëene, rû guxügutáma ngëma nicaixqueecha. Rû bai i írarüwa tá tüxü narüna i ngëma ngúxü ya yixema ngëma ngoxoxü rû ngëma ngoxochicünèxãxü icuèxüügüxe rû tügü ixãxë na ngëma ngoxoégamaã taxäegaxü. Rû bai i ngunecü rû bai i chütacü tá tüxü narüna i ngëma ngúxü”, ñanagürü. ¹² Rû ngëmacèx ya yixema Tupanaärü duüxügü ixîgüxe rû norü orega ínüxë rû Ngechuchuaxü yaxögüxe, rû name nixî na yaxna namaã taxînüxü rû tayaxögüamaxü ega woo tacü rû guxchaxü tüxü ngupetügu. ¹³ Rû ñuxüchi nüxü chaxînü ga wüxi ga naga ga daxüguxü ga naãnewa inaxüxü ga ñaxü choxü:

“¡Naxümatü i ñaã ore i tá cumaã nüxü chixuxü! Rû ñuxmaüçüü tá tataãëgü ya yixema tórü Coriaxü meã yaxögüãcüma yuexe. Erü Tupanaãe i Üünexü rû ñanagürü: ‘Ngü,

ngẽmaãcũ tá tataãẽgũ ya yíxema, erũ tá itarũngũẽ nũxna i tũmaãrũ puracũgũ. Rũ ngẽma mexũ i taxũgũxũ rũ tũmamaã wũxigu daxũgũxũ i naãnewa tá naxũ' ”, ñanagũrũ.

Ñoma i naãnewa nanade i ngẽma duũxũgũ i Tupanaãrũ ixĩgũxũ

¹⁴ Rũ ñũxũchi ichadawenũ rũ nũxũ chadau ga wũxi ga caixanexũ ga cómuxũ. Rũ yema caixanexũetũwa narũto ga Tupana Nane ga duũxũxũ ixĩcũ. Rũ naẽruwa nayexma ga wũxi ga norũ ngẽxcueruũ ga uirunaxcẽx. Rũ namẽxwa nayexma ga wũxi ga cũxchi ga ínapomaguxũ ga tẽxechixũ. ¹⁵ Rũ Tupanapatawa ínaxũxũ ga wũxi ga to ga orearũ ngeruũ ga tagaãcũ ñaxũ nũxũ ga guma caixanexũetũwa rũtocũ:

“¡Inaxũgũ na cunadexũ i ngẽma duũxũgũ i cuxrũ ixĩgũxũ! Erũ marũ nawa nangu na cugũxũtawã cunagagũxũ, erũ ngẽma curũ duũxũgũ i ñoma i naãnewa ngẽxmagũxũ rũ ínamemare na cunadexũ”, ñanagũrũ. ¹⁶ Rũ ñũxũchi ga guma yema caixanexũetũwa rũtocũ rũ ñoma trigu i buxuxũrũũ naãneetũgu ngĩmaã nayabuãchi ga norũ cũxchi. Rũ nanade ga yema norũ duũxũgũ ga ñoma ga naãnewa yexmagũxũ. ¹⁷ Rũ ñũxũchi daxũgũxũ i naãnewa ngẽxmane ya Tupanapatawa ínaxũxũ ga wũxi ga to ga orearũ ngeruũ ga nũxũ nayexmacũ ga wũxi ga cũxchi ga ínapomaguxcũ ga tẽxechixcũ. ¹⁸ Rũ yema pumaraarũ gutẽxeruũtaxmũwa ínaxũxũ ga wũxi ga to ga orearũ ngeruũ ga ùxũmaã icuáxũ. Rũ nũma rũ tagaãcũ ñanagũrũ nũxũ ga yema to ga orearũ ngeruũ ga yema cũxchi ga ínapomaguxcũ ga tẽxechixcũ nũxũ yexmaxũ:

“¡Inaxũgũ na cunadexũ i ngẽma duũxũgũ i yéa naãnewa ngẽxmagũxũ i tama Tupanaãrũ ixĩgũxũ! Erũ marũ nawa nangu na Tupana napoxcuexũ”, ñanagũrũ. ¹⁹ Rũ yema orearũ ngeruũ rũ ñoma ga naãneetũgu ngĩmaã nayabuãchi ga norũ cũxchi. Rũ nayadexechi ga yema duũxũgũ ga tama Tupanaãrũ ixĩgũxũ ga ñoma ga naãnewa yexmagũxũ. Rũ wũxi ga taxũ ga nachicagu nanawocu na yexma Tupana norũ numaã nadẽixũcẽx, ñoma ubagũ imẽixtũũxũrũũ. ²⁰ Rũ yema nachica ga íãneãrũ íxpemawa yexmaxũgu nanadai. Rũ guma nagũ ga yéa íyaxũchicũ, rũ 300 ga kilómetru ínayarũbaichi, rũ wũxi ga metruarũ ngãxũ nixĩ ga norũ mátama ga guma nagũ.

15

Tupanaãrũ orearũ ngeruũgũ ga nũxũ nayexmaxũ ga 7 ga poxcuruũgũ

¹ Rũ ñũxũchi ga daxũgũxũ ga naãnewa rũ nũxũ chadau ga wũxi ga to ga taxũ ga cuẽxruũ ga namaã íhãixãchixũ. Rũ nayexma ga 7 ga orearũ ngeruũgũ ga daxũcũãx ga nũxũ yexmagũxũ ga 7 ga poxcuruũ. Rũ yema poxcugu nixĩ ga yagũxũ ga norũ nú ga Tupana. ² Rũ yexgumarũũ ta nũxũ chadau ga ñoma wũxi ga nanaxtaaetũwaraũxũ ga woruarũũ iyauraetũcũũxũ ga ùxũema nawa inachixũ. Rũ yéa tayexmagũ ga guxema nũxũ rüyexeraxe ga yema ngoxo rũ yema ngoxochicũnẽxã rũ yema ngoxoéga rũ yema número ga yema ngoxoéga ixĩxũ. Rũ yema nanaxtaaetũraũxũgu tachigũ. Rũ tũxũ nayexmagũ ga tũmaãrũ paxetarũgũ ga arpa ga Tupana tũxna ãxũ. ³ Rũ nagu tawiyaegũ ga Moíché ga Tupanaãrũ duũxũ ixĩcũarũ wiyae. Rũ yexgumarũũ ta nagu tawiyaegũ ga yema wiyae ga guma Tupana Nane ga pecaduarũ útanũcẽx yucũarũ ixĩxũ ga ñaxũ:

“Pa Torũ Cori ya Tupana ya Guxũãrũ Yexera Poracũx, nataxũchi rũ namexẽchi i guxũma i ngẽma cuxũxũ. Rũ cuma rũ guxũgutãma guxũma i nachiuãnegũarũ ãẽxgacũ quixĩ. Rũ cuma rũ aixcũma meãma namaã icucucẽx rũ taguma quidora. ⁴ ¿Rũ texé tãũtãma cuxũ tamuũ, Pa Corix? ¿Rũ texé tãũtãma cuxũ ticucũxũ? Erũ cuma rũ cuxicatama nixĩ i uũnecũ quixũ. Rũ guxũma i nachiuãnecũãx rũ nuã tá naxĩ, rũ tá cuxũ nicucũxũgũ. Yerũ marũ nũxũ nadaugũ na quixaixcũmaxũ i guxũma i ngẽma nũxũ quixuxũwa rũ aixcũma mea cunangugũxũ i guxũma i ngẽma chixexũ ùgũxũ rũ ngẽma mexũ ùgũxũ”,

ñanagũrũ ga yema wiyae. ⁵ Rũ yemawena ichadawenũ rũ nũxũ chadau ga daxũgũxũ ga naãnewa na yawãxnaxũ ga yema nachica ga uũnecũ ga Tupanapataarũ aixepewa

yexmaxũ ga ngexta namaã ínganguxũgũxũwa ga guma nuta ga Tupanaãrũ mugũ nagu ũmatũcũ. ⁶ Rũ guma Tupanapatawa ínachoxũ ga yema 7 ga orearũ ngeruũgũ ga daxũcũãx ga nũxũ nayexmagũxũ ga yema 7 ga poxcuruũgũ. Rũ naxchiru ga mexẽchixũmaã rũ iyauracũũxũmaã nixãxchiru. Rũ yema norũ goyeremũũgũ rũ uirunaxcẽx nixĩ. ⁷ Rũ ñũxũchi wũxi ga yema ãgũmũcũ ga daxũcũãx ga maxũxũ, rũ wũxichigũ ga yema 7 ga orearũ ngeruũgũna nanaxã ga wũxi ga copa ga uirunaxcẽx ga Tupana ya guxũguma maxẽchacũarũ nu i ãũcũmaxũmaã ixããcuxũ. ⁸ Rũ guma Tupanapata rũ namaã naxããcu ga yema caixema ga Tupana ya mexẽchicũ rũ poracũwa ne ũxũ. Rũ taxucũrũwama texé yexma taxũcu ñũxmata nagũ ga yema 7 ga poxcuruũ ga yema 7 ga orearũ ngeruũgũaxũ yexmaxũ.

16

copagũ ga Tupanaãrũ numaã ixããcuxũchiga

¹ Rũ ñũxũchi nũxũ chaxĩnũ ga wũxi ga naga ga tagaãcũ guma Tupanapatawa inaxũxũ ga ñaxũ nũxũ ga yema 7 ga orearũ ngeruũgũ:

“¡Ngema pexĩ, rũ naãneetũwa peyabagũãcu i ngẽma 7 i copagũ i Tupanaãrũ nu i ãũcũmaxũmaã ixããcuxũ!” ñanagũrũ. ² Rũ yema naxũ ga wũxi ga Tupanaãrũ orearũ ngeruũ, rũ naãneetũgu nayabaãcu ga norũ copa. Rũ guxũma ga duũxũgũ ga yema ngoxoégamaã ixãegaxũ rũ yema ngoxochicũnẽxãxũ icuẽxũũgũxũ, rũ nawa inayarũgogũ ga taixna ga nguxuchixũ ga taguma ixẽxũ. ³ Rũ yema norũ taxre ga orearũ ngeruũ, rũ taxũ ga taxtũtũtũgu nayabaãcu ga norũ copa. Rũ nagũxũ nananguxuchi ga dexá, rũ ñoma wũxi i duũxũ i texé imáxũgũrũ nixĩ ga dexá. Rũ guxũma ga tacũ ga taxtũwa maxẽxũ rũ nayue. ⁴ Rũ yema norũ tomaẽxpũx ga orearũ ngeruũ rũ natũgũtũtũgu rũ natũxacũgũtũtũgu nayabaãcu ga norũ copa. Rũ guxũma ga yema natũgũ rũ natũxacũgũ, rũ nagũxũ nanacẽxichi. ⁵ Rũ ñũxũchi nũxũ chaxĩnũ ga yema Tupanaãrũ orearũ ngeruũ ga guxũma ga dexámaã icuáxũ ga ñaxũ:

“Pa Torũ Cori ya Tupana ya Üñecũ ya Woetama Yexmaẽchacũ rũ Ñũxma Ngẽxmaẽchacũ, cuma rũ wũxi i mexũ cuxũ na ngẽmaãcũ dexá nagũxũ cunacẽxichixẽẽxũ naxchaxwa i ngẽma duũxũgũ. ⁶ Yerũ nũmagũ rũ nanadai ga yema curũ duũxũgũ rũ curũ orearũ uruũgũ, rũ inanaba ga nagũ. Rũ ñũxma i cuma rũ wũxi i mexũ nixĩ i cuxũxũ na ngẽma dexá nagũxũ cunacẽxichixẽẽxũ na nawa naxaxegũxũcẽx. Yerũ yema nixĩ ga yema nanaxwẽxegũxũ rũ yemacẽx nixĩ ga curũ duũxũgũxũ nadẽixũ”, ñaxũ. ⁷ Rũ nũxũ chaxĩnũ ga wũxi ga naga ga yema pumaraarũ gutẽxeruũtaxmũwa inaxũxũ ga ñaxũ:

“Ngũ, Pa Cori ya Tupana ya Guxũãrũ Yexera Poracũx, aixcũma nixĩ i namexũ i ngẽma cuxũxũ”, ñaxũ. ⁸ Rũ yema norũ ãgũmũcũ ga orearũ ngeruũ rũ uẽxcũtũtũgu nayabaãcu ga norũ copa. Rũ yemaãcũ poraãcũ nananaiemaxẽẽ ga uẽxcũ na yema norũ naĩẽmaxũmaã ínaguãxũcẽx ga duũxũgũ. ⁹ Rũ guxũma ga duũxũgũ rũ poraãcũ nũxũ nanguxema, natũrũ tama nũxũ narũxoe ga nacũma ga chixexũ rũ tama Tupanaxũ nicuẽxũũgũ. Rũ naguxchigagũama namaã ga Tupana ya guxũma i ngẽma poxcuruũmaã icuãcũ. ¹⁰ Rũ yema norũ wũximẽẽxpũx ga orearũ ngeruũ, rũ yema ngoxoarũ tochicaxũtũtũgu nayabaãcu ga norũ copa. Rũ guxũwama ga ngextá ãẽxgacũ íyĩxũwa ga yema ngoxo, rũ naxẽãne. Rũ yema na poraãcũ nũxũ nangũxũ ga duũxũgũ, rũ nũgũ nangõõrũ conũãxgũ. ¹¹ Natũrũ woo yemaãcũ nũxũ na nangupetũxũ ga duũxũgũ, rũ tama nũxũ narũxoechaũ ga yema chixexũ ga naxũgũxũ. Natũrũ yema na poraãcũ nũxũ nangũxũ ga norũ taixnagũ, rũ naguxchigagũama namaã ga Tupana ya daxũgucũ. ¹² Rũ yema norũ 6 ga orearũ ngeruũ, rũ yema taxtũ ga Eufraetũtũtũgu nayabaãcu ga norũ copa. Rũ inayache ga yema taxtũ na wũxi ga nama na yĩxũcẽx naxcẽx ga yema nachĩũãnegũarũ ãẽxgacũgũ ga uẽxcũ íyarũgoxũwa ne íxũ. ¹³ Rũ nũxũ chadau rũ yema coyaãxwa, rũ yema nũxĩraũxũ ga ngoxoẽxwa, rũ yema to ga ngoxo ga yema orearũ uruũnetaẽxwa, rũ wũxiẽxwachigũ ínaxũxũ ga wũxi ga naãẽ ga chixexũ ga ñoma curururũ ixĩxũ. ¹⁴ Rũ yema

ngoxoãëgü nixĩ ga naxügüxü ga yema taxü ga cuèxruügü ga duüxügü taxucürüwa ügüxü. Rü yema ngoxogü rü ínachoxü na nangutaquëxexëëgüãxücëx i guxüma i ñoma i naãnewa ngëxmagüxü i nachiuãnegüarü äëxgacügü na Tupana ya Guxüärü Yexera Poracümaã nügü nadaixücëx i ngëxguma nawa nanguxgu i naãneärü gux. ¹⁵ Natürü dücax, rü pexuãëgü erü tórü Cori ya Ngechuchu ya Cristu rü ñanagürü:

“Choma rü ngürüãchi taxúetáma choxü ínanguxëëyane íchangu, ñoma wüxi i ngĩtëxáxü ínguxürüü. Rü tataãe ya yíxema ímemarexe ñoma wüxi i duüxü i naxchiru ímexëëxürüü na tama tangexchiruxücëx rü taxánexücëx i ngëxguma íchanguxgu”, ñanagürü. ¹⁶ Rü yema ngoxogü, rü nanangutaquëxexëë ga guxüma ga ñoma ga naãnewa yexmagüxü ga nachiuãnecüãxgüarü äëxgacügü. Rü yema nachica ga nawa nangutaquëxegüxü, rü Armaguedóügu naxãega i Yudíugügawa. ¹⁷ Rü yema norü 7 ga orearü ngerüü, rü buanecügumare nayabaãcu ga norü copa. Rü guma Tupanapata ya daxügüxü i naãnewa ngëxmanewa inanaxü ga wüxi ga naga ga tagaxü ga yema Tupanaärü tochicaxüwa ínaxüxü ga ñaxü:

“Marü ningu”, ñaxü. ¹⁸ Rü nibëixbëxane, rü poraãcü nicuxcuane, rü niduruane. Rü poraãcü naxiãxãchiane. Rü noxri Tupana duüxügüxü üxgumama rü taguma nayexma ga wüxi ga íãxãchiane ga yemarüü poraxü. ¹⁹ Rü guma íãne ga taxüne ga Babiróniã, rü tomaëxpüxgu ningüxyeane. Rü guma íãnegü ga ñoma ga naãnewa yexmagüne rü niwëxtaügü. Rü Tupana rü nüxna nacuaxãchi ga guma íãne ga Babiróniãärü chixexü. Rü yemacëx norü numaã poraãcü nanapoxcu ga guma íãne, yerü poraãcüxüchi namaã nanu. ²⁰ Rü guxüma ga capaxügü rü guxünema ga mëxpünegü, rü inayarüxogü. ²¹ Rü daxüwa narüyi ga gáuxü ga ítapütaxü, rü duüxügüëtügu nayi. Rü wüxipütachigü ga yema gáuxü, rü 40 ga kilogu nixĩ ga nayaxü. Rü ga duüxügü rü Tupanamaã naguxchigagü nagagu ga yema poxcuruü ga gáuxü, yerü poraãcü nüxü nangux ga yema poxcu ga Tupana namaã napoxcuexü.

17

Íãne ga Babiróniã ga wüxi ga nge ga ngëãëxü- chicügu ixuxüne

¹ Rü yema 7 ga orearü ngerüügü ga nüxü yexmagüxü ga 7 ga copagü, rü yematanüwa rü wüxi ga orearü ngerüü, rü chauxcëx nixü, rü ñanagürü choxü:

“¡Nuã naxü! Rü tá cuxü nüxü chadauxëë i tacü tá nixĩ i ngĩrü poxcu i ngëma nge i ngeãëxüchicü i taxü i dexágüëtüwa rütöxcü. ² Rü ñoma i naãnewa ngëxmagüxü i nachiuãnegüarü äëxgacügü, rü ngĩmaã namaxë, rü yemaãcü poraãcü chixexü naxügü. Rü guxüma i ñoma i naãnecüãx, rü ngĩrü chixexü nüxna naxüe”, ñanagürü. ³ Rü yexguma Tupanaãe i Üünexü yemaãcü choxü ngoxetüxëëgu, rü yema orearü ngerüü rü wüxi ga nachica ga ngextá taxúema íxãpataxüwa choxü naga. Rü yema ngixü chadau ga wüxi ga nge ga wüxi ga ngoxo ga dauxüëtüwa rütöxcü. Rü yema ngoxo rü guxüwama naxãegaxüne, rü yema naegagü rü Tupanamaã naguxchiga. Rü 7 nixĩ ga naëru rü 10 ga naxchatacuxre. ⁴ Rü yema nge rü wüxi ga naxchiru ga dauxracharaxü rü dauxümaã íxãchiru. Rü uirumaã rü nutagü ga mexëchicümaã ingãxãe. Rü ngixmëxwa ngixü nayexma ga wüxi ga copa ga uirunaxcëx. Rü yema copa rü namaã naxããcu ga nagüxüraüxü ga yema Tupanapëxewa chixexü rü nagüxüraüxü ga chixexügü ga yema nge üxü. ⁵ Rü ngĩcatügu naxümatü ga wüxi ga naega ga taxúema nüxü cuáxü na ñuxü ñaxüchiga yiixü. Rü yema naega rü ñanagürü:

“Rü yima Babiróniã rü guxüma i ngema duüxügü i chixexü ügüxü i ñoma i naãnewa maxëxüarü mamá nixĩ”, ñanagürü. ⁶ Rü ngixü chadau ga yema nge ga na nangãxüxü namaã ga guma nagü ga yema duüxügü ga Tupanaärü íxügüxü rü yema duüxügü ga Ngechuchuarü orexü na yaxugüxücëx dëixü. Rü yexguma yemaxü chadëuxgu, rü chabaixãchi. ⁷ Rü yexguma ga yema orearü ngerüü rü ñanagürü choxü:

“¿Tacüçèx cubaixãchi? Düçèx, tá cumaã nüxü chixu na tacüchiga yïixü i ngêma nge, rü tacüchiga yïixü i ngêma ngoxo i 7 eruxü rü 10 chatacuxrexü i naetüwa natoxü. ⁸ Rü ngêma ngoxo i nüxü cudauxü, rü yema nixi ga nuxcümáxüchi maxchiréxü natürü ñuxma rü marü yuxü rü ngêma áxmaxü i taxuguma iyacuáxüwa ngêxmaxü. Natürü paxa tá ngema íxüxüxü, rü ñuxüchi ngêma nachica i guxügutáma nagu napoxcuxüwa tá üxü. Rü ngêma ngoxoma á tá nabaixãchiãégü i ngêma duüxügü i ñoma i naãnewa maxêxü i tama nawa ngoxégagüxü i ngêma Tupanaärü popera i noxritama naãne ixügügu Tupana nagu yawügüxü i ngêma duüxügü i nüxü nangêxmaxü i maxü i taguma gúxü. Rü nümagü i ngêma duüxügü rü aixcüma tá namaã nabaixãchiãégü i ngêxguma nüxü nadaugügu i ngêma ngoxo ga nuxcümáxüchi maxchiréxü rü yuxü natürü wena táxaru ínguxü. ⁹ Rü ñaã nixi i wüxi i ore naxcèx i ngêma duüxügü i nüxü natauxchaxü na nüxü nacuèxgüxü. Rü ngêma 7 i naëru i ngêma ngoxo, rü yima nixi ya 7 ya mëxpünechiga. Rü yima 7 ya mëxpüneetüwa nixi i natoxü i ngêma nge. Rü ngêxgumarüü ta i ngêma naërugü, rü 7 i nachiuãnegüarü äëxgacügüchiga nixi. ¹⁰ Rü wüximêëxpüx i ngêma äëxgacügü rü marü togü nüxü narüyexeragü, rü ñuxma rü marü tama äëxgacügü nixigü. Rü ngêma norü 6 i ngêma äëxgacügü, rü nüma rü ñuxma rü äëxgacü nixi. Rü ngêma norü 7 tá nixi i yixcüra ínguxü. Natürü ngêxguma ínanguxgu i ngêma norü 7 i nawa iyacuáxü i ngêma äëxgacügü, rü paxaãchimare tá nixi i äëxgacü yïixü. ¹¹ Rü ngêma ngoxo ga nuxcümáxüchi maxchiréxü rü ñuxma rü marü yuxü, rü ngêma nixi i norü 8 i ngêma äëxgacügü. Rü nüma rü ngêma 7 tanüxü nixi. Natürü i nüma rü ngêma nachica i guxügutáma nagu napoxcuxüwa naxü. ¹² Rü ngêma 10 i naxchatacuxre i nüxü cudauxü, rü 10 i nachiuãnegüarü äëxgacügüchiga nixi. Natürü i nümagü rü tauta inanaxügüe na duüxügümaã inacuèxgüxü. Natürü yixcüra tá nanayauxgü i pora na wüxítátama i ora ngêma ngoxomaã wüxigu äëxgacügü yixigüxüçèx. ¹³ Rü ngêma 10 i äëxgacügü rü wüxigu nagu narüxínüë na ngêma ngoxona naxägüãxüçèx i norü pora, na ngêma ngoxo namaã icuáxüçèx. ¹⁴ Rü ñuxüchi i ngêma äëxgacügü rü ngêma ngoxo rü tá nügü nadai namaã ya yima Tupana Nane ga pecaduarü útanüçèx yucü. Natürü ya yima Tupana Nane rü tá nüxü narüyexera, erü nüma rü guxü i corigüarü Cori nixi, rü guxü i nachiuãnegüarü äëxgacügüarü Äëxgacü nixi. Rü yixema namücügü ixigüxe, rü yixemagü tixigü ya Tupana tüxü dexe rü tümacèx naçaxe. Rü tümagü rü aixcüma naga taxínüë”, ñanagürü choxü. ¹⁵ Rü yema orearü ngeruü rü ñanagürü ta choxü:

“Ngêma taxü i dexá i nüxü cudauxü i naetüwa natoxü i ngêma nge i ngêãëxüchicü, rü nagüxüraüxü i duüxügüchiga nixi, rü guxüma i duüxügü i to i nagawa ídexagüxüchiga nixi, rü guxüma i nachiuãnecüãxgü i duüxügüchiga nixi. ¹⁶ Rü ngêma 10 i naxchatacuxre i nüxü cudauxü i nüxü ngêxmaxü i ngêma ngoxo, rü tá ngêma nge i ngêãëxüchicüchi naxaie. Rü tá ngêma ngena nanapuxü i guxüma i tacü i ngixü ngêxmaxü, rü ngêmaãcü ngexchiruãcüma tá ngêxma irüxãüx. Rü tá ngixü nangõxgü, rü üxüwa tá ngixü nigügü. ¹⁷ Yerü ga Tupana rü yema 10 ga äëxgacügüxü nagu narüxínüëxëë na naxügüãxüçèx i ngêma nanaxwèxexü i nüma ya Tupana. Rü ngêmacèx i ngêma äëxgacügü, rü tá wüxigu nagu narüxínüë na ngêma ngoxoxü naporaxëëgüxü na norü äëxgacü yïixüçèx ñuxmatáta Tupana yanguxëë i ngêma nüxü yaxuxü. ¹⁸ Rü ngêma nge i ngixü cudèuxcü, rü yima nixi ya yima ñãne ya taxüne ya guxüma i nachiuãnegüarü äëxgacügümaã icuáxüne”, ñanagürü.

18

Nagu nayarüchixe ga ñãne ga Babiróniã

¹ Rü yemawena nüxü chadau ga wüxi ga to ga orearü ngeruü ga daxügüxü ga naãnewa írüxüxü ga taxü ga äëxgacü ixixü. Rü yema orearü ngeruüarü yauracüxümaã nangóone ga ñoma ga naãne. ² Rü tagaãcü ñanagürü:

“Marü nagu nayarüchixe ya yima ñãne ya Babiróniã ya itaégacüxüne. Rü ñuxma rü ngoxogüchiü nixi rü nagúxüraüxü i naãe i chixexügüchiü nixi. Rü ñuxma rü ngëxma naxãchiü i nagúxüraüxü i ngurucugü rü werigü i chixexü i duüxügü naxchi aixü. ³ Yerü guxüma ga nachiuñanecüãxgü, rü guma ñãneärü chixexü nüxna naxüe. Rü norü ãëxgacügü, rü yema poraãcü chixri namaxë. Rü guxüma ga ñoma ga nachiuñanecüãxgü ga taxetanüxügü, rü nügü namuärü diëruãxëëgü namaã ga yema ñãneärü yemaxügü ga tama Tupanapëxewa mexü”, ñanagürü. ⁴ Rü ñuxüchi nüxü chaxñü ga to ga naga ga daxügüxü ga naãnewa inaxüxü ga ñaxü:

“¡Dücèx i guxãma i pema ya chorü duüxügü ixigüxe, rü ípechoxü nawa ya yima ñãne na tama ngëma ñanecüãxrü pipecaduãxgüxücèx rü tama nagu peyixücèx i ngëma poxcu i tá yima ñãnewa nguxü! ⁵ Erü ngëma ñanecüãxärü pecadugü, rü nügüétüwa narünucue, rü düxwa marü daxügüxü i naãnewa nangu. Rü ñuxma ya Tupana rü nüxna nacuèxãchi i ngëma chixexü i naxügüxü, rü ngëmacèx tá yima ñanexü napoxcu. ⁶ Rü ngëma poraãcü chixexü na naxügüxürü, rü ngëxgumarüü tá ta nixi na chixexümaã nüxü penaxütanüxü i pemax. ¡Rü ñuxma na ngëma ñanecüãx togümaã chixexü naxügüxü, rü taxreëxpüxcüna tá penachixexëe i pemax! ¡Rü ngëma chixexü ga yema ñanecüãx togücèx mexëëgüxü, rü pema rü taxreëxpüxcüna tá ngëmaãcü naxcèx penamexëe! ⁷ ¡Rü ngëma na nügü yacuèüügüxü rü mexëchixüwa na namaxëxü, rü ngëxgumarüü tá ta nixi na ngüxü nüxü pingexëëgüxü rü ngechaü nüxü pingexëëgüxü! Erü ñuxma i ngëma ñanecüãx rü nügüãewa ñanagürügü: ‘Yixema rü ñoma wüxi i ãëxgacürü mexëchixüwa tangëxmagü. Rü tagutãma wüxi i yutexürü tangechaügü’, ñanagürügü nügüãewa i ngëma ñanecüãx. ⁸ Rü ngëmacèx tá nixi i wüxitãtama i ngunexügu ínanguxü i ngëma ñãneärü poxcuruü. Rü ngëma ñanecüãx rü ngüanemaã tá nayue, rü poraãcü tá nangechaügü, rü poraãcü taiya tá nüxü nangux, rü norü ñãne rü üxümaã tá nigu. Erü naporaxüchi ya yima Tupana ya guxüärü Cori ixicü i ngëma ñanexü poxcucü”, ñanagürü ga yema naga. ⁹ Rü ngëma nachiuñanegüarü ãëxgacügü ga yema ñãnewa poraãcü chixri maxëxü rü mexëchixüwa yexmagüxü, rü tá poraãcü norü ngechaümaã yima ñanecèx naxauxe i ngëxguma nüxü nadaugügu i ngëma üxüema i namaã yaxaxü. ¹⁰ Natürü ngëma ãëxgacügü rü ngëma poxcuxü na namuëxüchëxwa rü tá yaxüwa nüxü narüdaunü, rü ñanagürügü tá:

“Cungechaütümü, Pa Itaégacüxüne ya Ñãne ya Babirónia ya Guxü i Nachiuñanegümaã Porachirénex. Erü wüxitama i oragu cuxcèx ínangu i curü poxcu”, ñanagürügü tá. ¹¹ Rü guxüma i ñoma i naãnecüãx i taxetanüxü, rü tá poraãcü norü ngechaümaã naxcèx naxauxe ya yima ñãne. Erü marü taxúetãma naxcèx nüxü tataxe i norü ngëmaxügü i ngëma nangegüxü. ¹² Rü marü taxúetãma naxcèx nüxü tataxe i norü uiru, rü norü diërumü, rü norü nutagü i mexëchixü, rü naxpügü i mexëchixü i dauxracharaxü rü idauxcharaü i ngëma nangegüxü. Rü ngëxgumarüü ta taxúetãma naxcèx nüxü tataxe i nagúxüraüxü i norü naixchipanügü i yixixü, rü norü ngëmaxügü i marfilnaxcèx rü mürapewa i mexëchixünaxcèx rü cobrenaxcèx rü fierunaxcèx rü nutanaxcèx i ngëma nangegüxü. ¹³ Rü taxúetãma naxcèx nüxü tataxe i norü canela rü togü i norü üexüwemüxügü i yixixü, rü pumaratëxe i guruü ixixü, rü togü i pumaragü i yixixü, rü binugü rü chixügü, rü arina i mexëchixü, rü trigu i ngëma nangegüxü. Rü ngëxgumarüü ta ngëma nanagagü i wocagü, rü carnerugü, rü cowarugü, rü autugü i cowaru ítúchigüxü, rü duüxügü i puracüruügü. Rü ngëmaãcü woo duüxëgü rü ngëma tüxü nagagü na tümamaã nataxegüxücèx. ¹⁴ Rü ngëma taxetanüxü, rü ñanagürügü tá nüxü ya yima ñãne:

“Cuwa rü marü nataxuma i ngëma orix i curü duüxügüarü me ixixü. Rü marü nataxuma i guxüma i ngëma meruügü ga noxri cuxü yexmaxü, rü tagutãma wenaxärü cuxü nangëxma”, ñanagürügü tá. ¹⁵ Rü ngëma taxetanüxü i guxüma i ngëma orixgümaã rü ngëma meruügümaã taxegüxü rü guma ñãnegü nügü muärü diëruãxëëxüchigüxü, rü yaxüwa tátama nüxü narüdaunü ya yima ñãne, erü nüxü namuë i ngëma poxcu i yima ñanexü üpetüxü. Rü tá poraãcü norü ngechaümaã naxauxe. ¹⁶ Rü ñanagürügü tá:

“Nangechaütümüü ya yima ñãne ya itaégacüxüne. Erü noxri rü ñoma wüxi i nge i mexêchixü i naxchiru i dauxracharaxü rü dauxcharaxümaã äxchirucü i uirumaã rü nutagü ya mexêchicümaã ngêxãêxcürüü nixĩ. ¹⁷ Natürü ngürüãchi nagux i guxüma i ngêma ñãneärü meruügü”, ñanagürügü tá. Rü guxüne ya wapurugüarü äëxgacügü, rü guxüma i norü duüxügü ya yima wapuruwa puracüexü, rü guxüma i duüxügü ya yima wapurugu ìxü, rü guxüma i taxetanüxügü i wapurugu yarüxüüxü, rü yaxüwa tátama nayachaxgütanüãchi, rü ngema tá nüxü narüdaunü. ¹⁸ Rü ngêxguma nüxü nadaugügu i norü caxixü na yaxaxü ya yima ñãne, rü tagaãcü tá ñanagürügü:

“Nataxuma ya nái ya ñãne ya daa ñãne ya itaxégacüxünerüü ixixüne”, ñanagürügü. ¹⁹ Rü norü ngechaümaã nügüétügu tá waixümü nagünagügü, rü tá poraãcü naxauxe, rü tagaãcü ñanagürügü tá:

“Nangechaütümüü ya yima ñãne ya itaxégacüxüne. Rü noxri rü norü yemaxügümaã nügü nimuärü dïeruãxêëgü ga guxüne ga wapurugüarü yoragü. Natürü i ñuxma rü ngürüãchi wüxi i oragutama rü inayarüxo i guxüma i ngêma. ²⁰ Natürü ñuxma na napoxcuxü ya yima ñãne, rü name nixĩ i petaãëgü i pema i daxüguxü i naãnewa ngêxmagüe, rü pema i Tupana pexü imugüe, rü pema i Tupanaärü orexü ixugüe, rü guxãma i pema i Tupanaärü duüxügü ixigüe. Erü ñuxma na napoxcuxü ya yima ñãne, rü ngêmaãcü Tupana pexü naxütanü naxcèx ga yema chixexü ga pemaã naxügüxü ga guma ñãnecüãx”, ñanagürügü. ²¹ Rü ñuxüchi wüxi ga Tupanaärü orearü ngeruü ga daxücüãx rü nanangenagü ga wüxi ga nuta ga taxüchicü ga ñoma tacüarü caruürüü ixïcü. Rü yema orearü ngeruü rü taxtü ga taxügu nanaña ga guma nuta ga taxüchicü, rü ñanagürü:

“Ngêxgumarüü tá quixĩ na icuyarüxoxü, Pa ñãne ya Itaxégacüxüne ya Babiróniãx, rü tagutáma texé wena cuxü nadau. ²² Rü tagutáma wena curü ñtamügüwa texé nüxü taxĩnü i paxetarüügü i arpagü rü quenagü rü cornetagü. Rü ngêxgumarüü ta cuwa nataxütáma i puracütanüxügü i tacüwa puracüexü, rü tagutáma texé nüxü taxĩnü na cuwa ínapuracüexü i chawüarü caruügü. ²³ Rü marü tagutáma texé nüxü tadau i cuwa i omü. Rü marü tagutáma texé nüxü taxĩnü i ngígüchigaarü petagüarü cuxcuane. Rü ngêmaãcü tá cumaã nangupetü woo ga noxri rü yema taxetanüxü ga cuwa taxegüxü rü guxüma ga togü ga taxetanüxüärü yexera nixigü. Rü ngêmacèx tá poraãcü cupoxcu nagagu ga yema chixexü ga namaã cunawomüxêëxü ga guxüma ga togü ga nachüãnecüãx ga duüxügü”, ñanagürü. ²⁴ Yerü guma ñãnecüãx ga duüxügü nixĩ ga nadèixü rü inabaxêëgüxü ga nagü ga Tupanaärü orearü uruügü rü yema duüxügü ga Tupanaärü ixigüxü rü guxüma ga duüxügü ga ñoma ga naãnegu Tupanaarü oregagu nadèixü.

19

¹ Rü yemawena nüxü chaxĩnü ga muxüma ga duüxügüga ga daxüguxü ga naãnewa tagaãcü ñagüxü:

“¡Ngĩã Tupanaxü ticuèxüügü! Erü nüma nixĩ i tüxü namaxêëxü. Rü nüma ya tórü Tupana nixĩ i guxüärü yexera namexêchixü rü naporaxüchixü. ² Rü nüma rü aixcüma meãma nanangugü i guxüma i duüxügüarü maxü, rü aixcüma tá nanapoxcue i ngêma chixexü ügüxü. Rü ngêmacèx marü nanapoxcu ya yima ñãne ya itaxégacüxüne ya chixene ya norü chixexümaã nachixexêëne i guxüma i ñoma i naãnecüãx i duüxügü. Rü ñuxma i nüma ya Tupana rü norü duüxügü ga guma ñãnecüãx dèixüxü naxütanü”, ñanagürügü. ³ Rü ñuxüchi wenaxärü ñanagürügü:

“¡Ngĩã Tupanaxü ticuèxüügü! Erü ngema norü caxixü na yaxaxü ya yima ñãne, rü tagutáma ngéma nayarüxo”, ñanagürügü. ⁴ Rü yema 24 ga äëxgacügü rü yema ägümücü ga daxücüãx ga maxêxü rü yexma nanangücuchitanü, rü Tupana ya norü tochicaxüwa rütocüxü nicuèxüügü. Rü ñanagürügü:

“Rü ngêmaãcü yĩ. ¡Rü ngĩã nüxü ticuèxüügü ya tórü Cori!” ñanagürügü. ⁵ Rü ñuxüchi yema tochicaxüxütawa inanaxü ga wüxi ga naga ga ñaxü:

“Name nixĩ i tórü Tupanaxũ picuèxüügü i guxãma i pemax Pa Buxüğü rü Pa Yaxüğüx i norü duüxüğü na pixĩgüxü rü nüxü na pemuüëxü”, ñaxü.

Tupana Nane ga pecaduarü ütanicèx yucüarü ngĩgüarü petachiga

⁶ Rü ñuxüchi nüxü chaxĩnũ ga tacü ga ñoma muxüchixü ga duüxüğü idexagüxürüü ixĩxü ga ñoma taxü i dexá i chuxchuxürüü ixĩxü ga ñoma poraäcü yaduruanexürüü ixĩxü ga ñaxü:

“¡Ngĩã Tupanaxũ ticuèxüügü! Erü nüma ya tórü Cori ya Tupana ya guxüärü yexera poracü, rü marü ningucuchi na guxümaã inacuáxü. ⁷ ¡Rü ngĩã tataãëgü rü guxü i tórü taãëmaã nüxü ticuèxüügü! Erü marü nawa nangu na iyangĩxü ya yima Tupana Nane ga pecaduarü ütanicèx yucü. Rü ngëma norü duüxüğü i ñoma namèxürüü ixĩgüxü rü marü nügü ínimexëëgü. ⁸ Rü yima Tupana Nane rü ngëma nüxü yaxögüxüxü namu na mexëchixü rü cómuxü rü iyauracüxü i naxchirumaã na yaxãxchiruxü. Rü ngëma naxchiru i mexëchixü rü ngëma nixĩ i ngëma duüxügüarü maxü i mexüchiga”, ñanagürügü. ⁹ Rü ñuxüchi ga Tupanaärü orearü ngeruü, rü ñanagürü choxü:

“Chanaxwèxe i cunaxümatü i ñaã ore i cumaã tá nüxü chixuxü: ‘Tataãëgü ya yíxema tüxna naxuxe i norü ngĩgüarü petawa ya yima Tupana Nane ga pecaduarü ütanicèx yucü’”, ñanagürü. Rü ñuxüchi ñanagürü ta:

“Ngëma ore i cumaã nüxü chixuxü, rü Tupanaärü orexüchitama nixĩ”, ñanagürü. ¹⁰ Rü choma rü yema orearü ngeruüpëxegu chacaxãpüxü na nüxü chicuèxüxüçèx. Natürü ga nüma rü ñanagürü choxü:

“¡Tãxü i ngëma cuxüxü! Erü choma rü ta Tupanaärü duüxü chixĩ, ngëxgumarüü i cuma rü cueneëgü i Ngechuchuarü ore i aixcüma ixĩxü ixögüechaxürüü ta chixĩ. Rü name nixĩ i Tupanaxũ quicuèxü”, ñanagürü. Erü ngëma ore i Ngechuchuchiga ixĩxü, rü yematama ore nixĩ ga Tupanaärü orearü uruüğü nüxü ixugüexü ga yexguma Tupanaãë i Üünexü nawa ideaxgu.

Guma Tupana Nane ga cowaru ga cómuxüetügu tonagüçichiga

¹¹ Rü ñuxüchi nüxü chadau ga daxügüxü ga naãne na yawãxnaxü. Rü yéma nangox ga wüxi ga cowaru ga cómuxü. Rü guma naetüwa rütocü rü Ixaixcümacü rü Aixcüma Yanguxëëcü nixĩ i naega. Rü nüma rü aixcüma guxüma i duüxügüarü maxüxü nacuèx, rü aixcüma tá guxüma i ngëma chixexü ügüxümaã nügü nadai rü tá nanapoxcue. ¹² Rü naxëtügü, rü ñoma üxüemarüü niyauracüü. Rü naëruwa rü namu ga norü ngëxcueruügü. Rü naxatügu naxümatü ga wüxi ga naega ga nüxücatama nüxü nacuáxü. ¹³ Rü wüxi ga naxchiru ga ducharaxügu nicux. Rü naega rü Tupanaärü Ore nixĩ. ¹⁴ Rü nawe narüxü ga guxüma ga norü churaragü ga daxüçüãx. Rü nümagü rü naxchiru ga imexëchixü rü cómuxümaã nixãxchiru. Rü cowarugü ga ícómuxüetügu naxĩ. ¹⁵ Rü naãxwa nayexma ga wüxi ga tara ga tēxechixü na yemamaã napíxëëãxüçèx i guxüma i ngëma duüxüğü i tama nüxü yaxögüxü. Rü tá nüma nanaxwèxexüãcüma ngëma duüxügümaã inacuèx. Rü nüma rü tá poraäcü ngëma duüxüğü i tama yaxögüxüxü napoxcu namaã i ngëma poxcu ya Tupana ya Guxüxü Rüporamaëcü norü numaã mexëëxü. Rü ñoma ubagü i norü maixruüwa imèixtüxürüü tá nixĩ na napoxcueãxü. ¹⁶ Rü naxchirugu rü naperemagu naxümatü ga wüxi ga naega ga ñaxü:

“Guxüma i naxiüãnegüarü ãëxgacügüarü ãëxgacü, rü guxüma i corigüarü Cori ixüçü”, ñaxü. ¹⁷⁻¹⁸ Rü ñuxüchi nüxü chadau ga wüxi ga Tupanaärü orearü ngeruü ga daxüçüãx ga üèxcügu chixü. Rü nüma rü tagaäcü ñanagürü nüxü ga guxüma ga ngurucugü ga yexma ixexëtanüxü:

“¡Nuã pexĩ rü pengutaquëxegü naxcèx i õna i taxü i Tupana pexcèx mexëëxü na penangöxüçèx i naxiüãnegüarü ãëxgacügümachi, rü churaragüarü ãëxgacügümachi, rü yatüğü i poraxüchixümachĩ, rü cowarugümachi, rü ngëma cowaruëtügu ixü i duüxügümachi, rü ngëma duüxüğü i coriãxgüxümachĩ rü ngëma ngearü

coriãxgüxümachi rü ngëma buxügümachi rü ngëma yaxügümachi!” ñanagürü. ¹⁹ Rü ñuxüchi nüxü chadau ga yema nüxïraüxü ga ngoxo rü guxüma ga nachüüñegüarü ãëxgacügü ga norü churaragümaã yéma ngutaquëxegüxü na nügü nadëixüçèx namaã ya yima cowaruétügu ìxücü rü norü churaragü. ²⁰ Rü yema nüxïraüxü ga ngoxo rü niyaxu. Rü wüxigu namaã niyaxu ga yema to ga ngoxo ga orearü uruünetä ixïxü ga yema nüxïraüxü ga ngoxopëxewa naxüxü ga cuëxruügü ga duüxügü tama nüxü cuáxü na naxügüãxü. Rü yema cuëxruügümaã nixï ga nawomüxëëãxü ga yema duüxügü ga nüxü icuëxüügüxü ga naxchicünëxã ga yema nüxïraüxü ga ngoxo rü nügü ixägüxü na yema ngoxoégamaã na yaxüégagüxü. Rü yema nüxïraüxü ga ngoxo rü yema to ga ngoxo ga orearü uruünetä ixïxü, rü wüxigu maxëxüma nawa nawoü ya yima naxtaa ya üxümaã iyaurachiüne ya azufremaã ixaxüne. ²¹ Rü yema tara ga tëxechixü ga guma cowaruétüwa rütocüëxwa yexmaxümaã nanadai ga yema ngoxogüarü ngüxëëruügü ga ãëxgacügü rü norü churaragü. Rü guxüma ga ngurucugü, rü yemamachimaã nangãxcharaügü.

20

Chataná rü 1,000 ga taunecü ninëix

¹ Rü yemawena nüxü chadau ga wüxi ga Tupanaärü orearü ngeruü ga daxügüxü ga naãnewa íruxïxü. Rü naxmëxwa nayexma ga yema äxmaxü i taxuguma iyacuáxüärü chawi rü ñuxüchi wüxi ga cadena. ² Rü yema Tupanaärü orearü ngeruü rü yema coyaxü niyaxu. Rü yematama coya nixï ga yema nuxcümaüxü ga äxtape ga ngoxo ga Chataná ixïxü. Rü yema orearü ngeruü rü 1,000 ga taunecügüçèx nayanëix. ³ Rü yema orearü ngeruü rü yema äxmaxü i taxuguma iyacuáxügu nayatëxcuchi. Rü ñuxüchi yexma meãma nanawãxtaü na nüma ga Chataná rü marü taguma wenaxärü duüxügüxü nawomüxëëxüçèx ñuxmatáta 1,000 ya taunecü ngëxma yangeã. Rü ngëxguma marü yanguxëëãgu ya yima 1,000 ya taunecü, rü tá paxaxãchi nayangëx. ⁴ Rü ñuxüchi nüxü chadau ga ñuxre ga tochicaxügü. Rü yema tochicaxüwa tarütogü ga guxema Tupanaxütawa nayauxgüxe ga pora na duüxügüxü ticagüxüçèx. Rü yexgumarüü ta nüxü chadau ga naãégü ga yema duüxügü ga Ngechucharü orexü na yaxugüxüçèx nadaünaägüxü. Rü yema nixï ga duüxügü ga meãma nüxü ixugüxü ga Tupanaärü ore rü tama yema ngoxoxü icuëxüügüxü rü bai ga yema ngoxochicünëxãxü icuëxüügüxü, rü tama nügü ixägüxü na nacatüwa rü ëxna naxmëxwa yema ngoxoégamaã yaxëgaxü. Rü nüxü chadau ga wena na namaxëxü, rü 1,000 ga taunecü Cristumaã wüxigu ãëxgacü nixïgü. ⁵ Rü yemagü nixï ga nüxïrama írüdagüxü. Natürü ga yema togü ga yuexü rü täütáma namaxë ñuxmatáta yima 1,000 ya taunecüguwena. ⁶ Rü tataãégü ya yixema tüxira írüdagüxe erü Tupanaärü duüxügü tixïgü. Rü ngëma Tupanaärü poxcu rü marü täütáma tümacëx nixï. Rü tá Tupanaärü rü Cristuarü ngüxëëruügü tixïgü. Rü 1,000 ya taunecü tá Cristumaã ãëxgacügü tixïgü.

ngoxo i Chataná rü marü nagu nayarüchixe

⁷ Rü ngëxguma marü nangupetügu ya yima 1,000 ya taunecü, rü Chataná rü tá ningëx i ngëma ínapoxcuxüwa. ⁸ Rü nüma i Chataná rü tá ínaxüxü na yawomüxëëãxüçèx i guxüma i ñoma i naãnecüãx i duüxügü rü Goga rü Magoga na ngëmagüxü nangutaquëxexëëxüçèx na Tupanaärü duüxügümaã nügü nadëixüçèx. Rü ngëma Chatanáärü churaragü, rü ñoma taxtü i taxüärü naxnecüchicutëxerüü tá namuxüchi. ⁹ Rü ngëmaãcü i Chatanáärü churaragü rü tá ñoma i naãneärü tagu ninguuchi. Rü tá Tupanaärü duüxügüxü rü yima ñane ya Tupana nüxü ngechaxüne ya Yerucharéüxü ínachoeguãchi. Natürü Tupana rü daxüwa tá nanayixëë ya üxü, rü yimamaã tá nixae i guxüma i ngëma namaã rüxuwanügüxü. ¹⁰ Rü ngëma ngoxo i ngëma duüxügüxü womüxëëxü, rü nawa tá natáe ya yima naxtaa ya üxümaã iyaurachiüne ya azufremaã ixaxüne. Rü yima nixï ya naxtaa

ga marü nawa nawoŭne ga yema nüxĩraũxũ ga ngoxo rü yema to ga ngoxo ga orearü uruŭneta ixĩxũ. Rü yima naxtaawa tá nixĩ i guxũgutáma ngunecü rü chütacü ngúxũ yangegüxũ.

Ngẽma taxũ i tochicaxũ i cómuxũwa rütocüpẽxewa nangugü i duũxũgü

¹¹ Rü ñuxũchi nüxũ chadau ga wüxi ga taxũ ga tochicaxũ ga cómuxũ, rü nüxũ chadau ga guma nawa rütocü. Rü gumachaxwa nibuxmü ga ñoma ga naãne rü guxũma ga daxũwa nüxũ idauxũ, rü inayarütauxe. ¹² Rü nüxũ chadau ga yema yuexũ ga yaexũ rü buexũ ga Tupanapẽxegu chigüxũ. Rü ningena ga poperagü. Rü yexgumarüü ta ningena ga yema Tupanaãrü popera i nagu yawügüxũ i ngẽma duũxũgü i nüxũ nangẽxmaxũ i maxũ i taguma gúxũ. Rü yema yuexũ rü yexgumarüü ga ñuxãcü na namaxẽxũ ga wüxichigü rü yexgumarüü ga ñuxãcü na yema poperawa inaxümatüxũrüüãcüma Tupana namaã nüxũ nixu na ngextá tá naxĩxũ. ¹³ Rü yema yuexũ ga taxtũ ga taxũwa yexmagüxũ rü wenaxãrü ínarüdagü. Rü yema yuexũ ga tauquewa yexmagüxũ rü wenaxãrü ínarüdagü. Rü yemaãcü ínarüdagü ga guxũma ga duũxũgü ga yuexũ. Rü guxũma ga yema yuexũ rü Tupana nüxna nicachigü rü yexgumarüü ga ñuxãcü na namaxẽxũ ga wüxichigü rü namaã nüxũ nixu na ngextá tá naxĩxũ. ¹⁴ Rü yemawena rü guma naxtaa ga üxũmaã iyaurachiünewa nawoŭ ga yu guxũma ga norü poramaã. Rü guma naxtaa ga üxũmaã iyaurachiüne, rü ngẽma nixĩ i poxcu i taguma iyacuáxũ i tümacèx ixĩxũ ya yixema tama Tupanaãrü duũxũgü ixĩgüxe. ¹⁵ Rü guma naxtaa ga üxũmaã iyaurachiünewa tawoŭ ga guxema ingeégaxe nawa i ngẽma Tupanaãrü popera i nagu tiwügüxũ ya yixema tüxũ nangẽxmaxẽ i maxũ i taguma gúxũ.

21

Ngexwacaxũxũ i ñoma i naãne rü guxũma i daxũwa ngẽxmaxũ

¹ Rü yemawena nüxũ chadau na nayexwacaxũxũ ga ñoma ga naãne rü guxũma ga tacü ga daxũwa yexmagüxũ. Yerü yema nüxĩra yexmagüxũ rü marü nangupetü, rü yema taxũ ga taxtũ rü marü nataxuma. ² Rü nüxũ chadau ga guma ñãne ga mexũne ga Yerucharéü ga yexwacaxũne ga daxũgüxũ ga naãnewa Tupanaxütawa íruxĩxũne ga guxũwama mexẽchine ñoma wüxi i pacü i ngẽxguma iyangĩxgu rü ngítecèx ngĩgü mexẽxcürüü ixĩxũne. ³ Rü nüxũ chaxĩnũ ga wüxi ga naga ga yema tochicaxũwa inaxũxũ ga tagaãcü ñaxũ:

“Tupana rü duũxũgütanüwa nangexma i ñuxmax. Rü natanüwa tá namaxẽcha. Rü nümagü rü norü duũxũgü tá nixĩgü. Rü nüma ya Tupana rü natanüwa tá nangẽxmaẽcha, na guxũguma norü Tupana yiixücèx. ⁴ Rü nüma tá ínanapi i naxgüüëtü i guxũma i ngẽma duũxũgü. Rü marü táütáma texé tayu, rü texé tümãrü ngechaũmaã taxaxu, rü texé ngúxũ tingegü. Erü guxũma i ngẽma ngúxũ rü marü inayarüxo”, ñanagürü. ⁵ Rü guma yema tochicaxũwa rütocü rü ñanagürü:

“Dücèx, choma rü chanangexwacaxũxẽe i guxũma i tacü i ngẽxmaxũ”, ñanagürü. Rü ñuxũchi ñanagürü ta:

“¡Naxümatü i ñãã ore! Erü ñãã ore rü aixcüma nixĩ, rü ñãã nixĩ i ore i mexũ na yaxõxũ”, ñanagürü. ⁶ Rü yemawena rü ñanagürü choxũ:

“Ñuxma rü marü ningu i guxũma. Rü chowa nixĩ ga inaxügüxũ ga guxũma, rü nataxuma i tacü i chorü yexera ngẽxmaẽchaxũ. Rü yixema itawaxe, rü choma rü tá nangetanüãcüma tüxũ chaxaxẽmare nawa i ngẽma dexá i maxẽeruũ. ⁷ Rü yixema nüxũ rüporamaẽgüxe i chixexũ, rü tá tanayauxgü i guxũma i ngẽma mexũgü i nüxũ chixuxũ. Rü choma rü tá tümãrü Tupana chixĩ, rü tümã i chauxacügü. ⁸ Natürü ngẽma muũxũ i nüxũ rüxoexũ na chowe naxĩxũ, rü nawa tá nawoŭ ya yima naxtaa ya üxũmaã iyaurachiüne ya azufremaã ixaxũne. Rü ngẽxgumarüü ta i ngẽma tama yaxõgüxũ, rü ngẽma chixexũ ügüxũ, rü ngẽma máetagüxũ, rü ngẽma naĩ i ngemaã ipexũ,

rü ngēma iyuüxü rü ngõxwèxegüxü, rü ngēma tupananetachicünèxãxü icuèxüüügüxü, rü ngēma idoratèèxgüxü, rü nawa tá nawoü ya yima naxtaa ya üxümaã iyaurachiüne ya azufremaã ixaxüne. Rü ngēma nixĩ i poxcu i taguma iyacuáxü i nüxü ínanguxèèxü i ngēma tama yaxõgüãcüma yuexü”, ñanagürü.

Yexwacaxüne ga Yerucharéüchiga

⁹ Rü yema 7 ga orearü ngeruügü ga nüxü yexmagüxü ga 7 ga copagü ga yema 7 ga poxcuruümaã ixãcuxü, rü yematanüwa rü wüxi ga orearü ngeruü rü chauxcèx nixü, rü ñanagürü choxü:

“¡Nuã naxü! Rü tá cuxü nüxü chadauxèè i ngēma yaxõgüxü i ñoma namèxrüü tá ixīgüxü ya yima Tupana Nane ga pecaduarü ütanücèx yucü”, ñanagürü. ¹⁰ Rü yexguma yemaãcü Tupanaãe i Üünexü choxü ngoxetüxèègu, rü yema orearü ngeruü rü wüxi ga mèxpüne ga taxünewa choxü naga. Rü choxü nüxü nadauxèè ga guma ñãne ya üünene ga Yerucharéü ga daxügüxü ga naãnewa Tupanaxütawa íruxixüne. ¹¹ Rü guma ñãne rü Tupanaãrü yauracüüxümaã nangóone. Rü yema norü yauracüüxü ga guma ñãne rü ñoma wüxi ya nuta ya mexèchicürüü nixĩ. Rü ñoma nuta ya yasperüü nixĩ na yachipetüxü. ¹² Rü guma ñãne rü guxüwama ínapoxegu. Rü nataxüchi rü namáchanexüchi ga yema norü poxegüxü. Rü yema norü poxegüxü rü nüxü nayexma ga 12 ga norü ñãx. Rü wüxichigü ga yema ñãxwa nayexma ga wüxi ga Tupanaãrü orearü ngeruü. Rü wüxichigü ga yema ñãxwa nangoxéga ga wüxichigü ga yema 12 ga Acobu nane ga Yudíugü nawa ne íxü. ¹³ Rü tomaèxpüx ga norü ñãx rü napèxewaama nayexma, rü yema to ga tomaèxpüx rü norü toxwecüwawa nayexma, rü yema to ga tomaèxpüx rü norü tügünecüwawa nayexma, rü yema to ga tomaèxpüx rü naweama nayexma. ¹⁴ Rü guma ñãneãrü poxegüxü, rü 12 ga nuta ga taxüchicüétüwa inaxügü. Rü wüxichigü ga guma nutagüwa nangoxéga ga wüxichigü ga norü ngüexügü ga guma Tupana Nane ga pecaduarü ütanücèx yucü. ¹⁵ Rü yema orearü ngeruü ga chomaã idexaxü, rü nüxü nayexma ga wüxi ga norü ngugüxü ga uirumenèxãnaxcèx na yemamaã nangugüãxücèx ga guma ñãne, rü norü ñãxgü, rü norü poxegüxügü. ¹⁶ Rü guma ñãne rü nawüxigumare ga guxücüwawa. Rü norü mèx rü nawüxigumare namaã ga norü tatachinü. Rü yema orearü ngeruü rü yema uirumenèxãmaã nanangugü ga guma ñãne. Rü 2,200 kilómetru nixĩ ga norü mèx. Rü yexgumarüü ta 2,200 kilómetru nixĩ ga norü tatachinü. Rü 2,200 kilómetru ta nixĩ ga norü máchane. ¹⁷ Rü yemawena rü inanangu ga yema norü poxegüxü ga guma ñãne. Rü 65 metru nixĩ ga norü máchane. Rü yemaãcü duüxügüarü ngugüxümaã nanangugü. ¹⁸ Rü yema norü poxegüxü ga guma ñãne, rü nuta ga mexèchicü ga yaspaxcèx nixĩ. Rü nümatama ga guma ñãne rü uirunaxcèx nixĩ. Rü ñoma woruarüü niyauracüü. ¹⁹ Rü guma nutagü ga itacü ga norü poxegüxüpara ixīgücü, rü nagüxüraücü ga nuta ga imexèchicümaã nangèxãè. Rü guma nüxüraücü ga napara rü nuta ga yaspemaã nangèxãè. Rü guma norü taxre ga napara rü nuta ga safirumaã nangèxãè. Rü guma norü tomaèxpüx ga napara rü nuta ga ágatamaã nangèxãè. Rü guma norü ágümücü ga napara rü nuta ga esmerádamaã nangèxãè. ²⁰ Rü guma norü wüximèèxpüx ga napara rü nuta ga onichemaã nangèxãè. Rü guma norü 6 ga napara rü nuta ga cornalínamaã nangèxãè. Rü guma norü 7 ga napara rü nuta ga crisólitumaã nangèxãè. Rü guma norü 8 ga napara rü nuta ga berilumaã nangèxãè. Rü guma norü 9 ga napara rü nuta ga topásiumaã nangèxãè. Rü guma norü 10 ga napara rü nuta ga crisoprásamaã nangèxãè. Rü guma norü 11 ga napara rü nuta ga yachítumaã nangèxãè. Rü guma norü 12 ga napara rü nuta ga amatístamaã nangèxãè. ²¹ Rü yema 12 ga norü ñãx ga guma ñãneãrü poxegüxü rü perlanaxcèx nixĩ. Rü wüxichigü ga yema ñãx rü wüxitama ga perla nixĩ. Rü yema norü ítamü ga guma ñãneãrü ngãxüwa dapetüxü, rü uiruxicanaxcèx nixĩ. Rü ñoma woruarüü niyauracüü. ²² Rü guma ñãnewa rü taxúnema ga ngutaquèxepataxü ga ngextá Tupanaxü nawa yacuèxüügünexü chadau, yerü nümatama ga Tupana ya poracü rü Nane

ga pecaduarü ütanüçèx yucü rü yéma nayexma na duüxügü nüxü icuèxüügüxüçèx. ²³ Rü yima ñane rü taxucèxma üèxcü rü tauemacü nüxü nabaxi, erü Tupanaärü ngóonexütama nixí i nangóonexëëxü. Rü yima Tupana Nane ga pecaduarü ütanüçèx yucü nixí ya norü omü ixícü. ²⁴ Rü ngéma Tupanaärü ngóonexü i yima ñanexü ngóonexëëxü tá nixí i nangóonexëëxü naxcèx i guxüma i ñoma i nañecüñax i duüxügü. Rü ngéma tá nangugü i guxüma i nachiüñanegüarü ãëxgacügü i yaxögüxü rü tá Tupanana nayana i norü mexügü. ²⁵ Rü norü ñaxgü rü tagutáma narüwãxtagü erü ngéma rü guxüguma nangunexeche rü taguma nachüta. ²⁶ Rü ngéma tá nanana i guxüma i ñoma i nañeärü mexügü. ²⁷ Natürü tagutáma ngëxma naxücu i tacü i Tupanapëxewa chixexü, rü bai ya texé ya chixexü úxe rü éxna idoratéxáxe. Rü yíxema Tupana Nane ga pecaduarü ütanüçèx yucüarü poperawa ngoxégagüxexicatátama tixígü ya ngëxma chocuxe.

22

¹ Rü ñuxüchi ga yema orearü ngerü rü choxü nüxü nadauxëë ga wüxi ga natü ga metacüchiüxü rü ichipetüchiüxü ga dexá ga maxëëruü. Rü yema tochicaxü ga nawa natogüxü ga Tupana rü Nane ga pecaduarü ütanüçèx yucü, rü nawa nixí ga ne nadaxü ga yema natü. ² Rü guma ñaneärü ngäxüwa dapetüxü ga ítamüarü ngäxügu nida ga yema natü. Rü norü guxücutüwa narüxügü ga naígü ga maxëëruü. Rü yema naígü rü wüxicanatama naxo ga wüxichigü ga tauemacügu rü yemaäcü 12 éxpüxcüna naxo ga wüxi ga taunecügu. Rü naätügü ga yema naígü, rü guxü i nachiüñanecüñax i duüxügü i yaxögüxüärü tañëxëëruü nixí. ³ Rü ngéma rü nataxütáma i tacü i Tupana chixexü namañ naxuxuchixü. Rü yima ñanewa tá nangëxma i norü tochicaxü ya Tupana rü Nane ga pecaduarü ütanüçèx yucü. Rü norü duüxügü rü tá nüxü nicuèxüügü. ⁴ Rü ngéma norü duüxügü rü tá nachiwexüchixü nadaugü, rü tá naegamañ nixäegacatü. ⁵ Rü ngéma rü tagutáma nachüta. Rü ngéma norü duüxügü, rü taxucèxtáma nanaxwèxe i daparina rü éxna üèxcü na nangóonexüçèx. Erü nümatama ya tórü Cori ya Tupana rü tá nüxü nabaxi. Rü nümagü i ngéma duüxügü rü guxügutáma wüxigu Tupanamañ ãëxgacügü nixígüecha.

Marü ningaica na wena núma naxüxü ya Ngechuchu ya Cristu

⁶ Rü ñuxüchi ga yema Tupanaärü orearü ngerü rü ñanagürü choxü:

“Ñañ ore rü aixcüma ixíxü nixí, rü ñañ nixí i ore i mexü na yaxöxü. Rü nüma ya tórü Cori ya Tupana ga nuxcüma norü orearü urüügümañ nüxü ixucü ga tacü tá na ngupetüxü, rü nümatama nixí i ñuxma inamuaxü i norü orearü ngerü i daxüçüñax na norü duüxügüxü nüxü nadauxëëxüçèx na tacü tá paxa nangupetüxü”, ñanagürü. ⁷ Rü nüma ya tórü Cori ya Ngechuchu rü ñanagürü:

“Paxa tá íchangu. Rü tataañ ya yíxema naga ñnuxë i ngéma Tupanaärü ore i ñañ poperagu ümatüxü”, ñanagürü. ⁸ Rü chomatama i Cuáñ rü nüxü chaxínü rü nüxü chadau i guxüma i ngéma nüxü chixuxü. Rü yemaxü chaxínüguwena rü nüxü chadëuxguwena, rü yema orearü ngerü ga yemaxü choxü dauxëëxüpëxegu chacaxäpüxü na nüxü chicuèxüüxüçèx. ⁹ Natürü ga nüma rü ñanagürü choxü:

“¡Tãxü i ngéma cuxüxü! Erü choma rü ta Tupanaärü duüxü chixí, ngëxgumarüü i cuma rü cueneëgü i Tupanaärü orexü ixugüxü rü ngéma duüxügü i naga ñnüëxü i ngéma ore i ñañ poperagu ümatüxü. Rü name nixí i Tupanaxü quicuèxü”, ñanagürü. ¹⁰ Rü ñanagürü ta choxü:

“Tama name na icuyacüxü i ngéma Tupanaärü ore i ñañ poperagu ümatüxü, erü marü ningaica na yanguxü i ngéma ore. ¹¹ Natürü ngéma chixexü ügüxü, rü chixexü tá naxügüecha. Rü ngéma Tupanapëxewa chixri maxëxü, rü chixri tá namaxëëcha. Natürü yíxema mexü ügüxe, rü name nixí na mexü taxügüechaxü. Rü yíxema Tupanapëxewa ixüünexë, rü name nixí na Tupanapëxewa tixüüneëchaxü”, ñanagürü. ¹² Rü ñanagürü ga Ngechuchu:

“Dücèx, paxa tá íchangu namaã i ngẽma ãmare i wüxichigüna tá chaxãxü ngẽxgumarüü na ñuxãcü tanaxüxü i tümax. ¹³ Choma nixĩ i norü ügü i guxüma, rü chowa nixĩ i yacuáxü erü nataxuma i tacü i choweama üxü. ¹⁴ Rü tataãëgü ya guxãma ya yíxema yima pecaduarü ütanücèx yucügüwa tügü iyauxgüchiruxe na Tupanapëxewa timexücèx na yima ãaneãrü ãaxwa tichocuxücèx rü nüxü tangõxnetagüxücèx i ngẽma norü o i ngẽma naĩ i maxëëruü. ¹⁵ Natürü täütáma yima ãanewa nichocu i ngẽma tama yaxõgüxü, rü ngẽma iyuüxü rü ngõxwèxegüxü, rü ngẽma naĩ i ngemaã ipegüxü, rü ngẽma máëtagüxü, rü ngẽma tupananetachicünèxãxü icuèxüügüxü. Rü ngẽxgumarüü ta i ngẽma idorateëxgüxü i norü me ixixü na togüxü nawomüxëëgüxü, rü täütáma nawa nichocu ya yima ãane. ¹⁶ Rü choma i Ngechuchu, rü guxãma i pema i yaxõgüxütanüwa chanamu i chorü orearü ngerüü na pemaã nüxü yaxuxücèx i guxüma i ngẽma chorü ore. Rü choma nixĩ i Dabítaa chíxü. Rü choma nixĩ ya yima woramacuri ya pèxmama poraãcü nangóonexëëcürüü chíxü”, ñanagürü. ¹⁷ Rü Tupanaãë i Üünexü rü guxüma i yaxõgüxü, rü Ngechuchuxü ñanagürügü:

“¡Nuã naxü!” ñanagürügü. Rü yíxema nüxü ñnuxë i ñaã ore, rü:

“¡Nuã naxü!” ñatagügü. Rü yíxema itawáxe rü tüxü nachixégaxe, rü name nixĩ i nuã taxü rü tüxü nangetanüácüma nawa taxaxe i ngẽma dexá i maxëëruü. ¹⁸ Rü guxãma ya yíxema irüxñüxë i ñaã Tupanaãrü ore i ñaã poperagu ümatüxü, rü tümamaã nüxü chixu rü ngẽxguma chi texé íyatóxëëgu i ngẽma Tupanaãrü ore i ñaã poperagu ümatüxü, rü Tupana rü tá tümacèx nanayexeraxëë i ngẽma poxcuruügü i ñaã poperawa nachiga naxümatüxü. ¹⁹ Rü ngẽxguma chi texé nüxü üpetügu i wüxitama i ñaã Tupanaãrü ore i ñaã poperagu ümatüxü, rü Tupana rü täütáma tüxü nüxü nangõxnetaxëë i ngẽma norü o i ngẽma naĩ i maxëëruü i ñaã poperawa nachiga naxümatüxü. Rü ngẽxgumarüü tá ta täütáma tüxü nimucuchi nawa ya yima ãane ya üünene i ñaã poperawa nachiga naxümatüne. ²⁰ Rü yima nüxü ixücü i ñaã ore, rü ñanagürü:

“Ngẽmaãcü, paxa tá íchangu”, ñanagürü. Rü ngẽmaãcü yí. Rü choma i Cuáü rü ñacharügü:

“¡Nuã naxü Pa Cori ya Ngechuchu!” ñacharügü. ²¹ Rü chanaxwèxe i tórü Cori ya Ngechuchu ya Cristu poraãcü pexü narüngüxëë i guxãma i pemax. Rü ngẽmaãcü yí.